


Goãmũ Yare Wereripũ



Desano: Goãmũ Yare Wereripũ New Testament

Goãmu Yare Wereripu

Desano: Goãmu Yare Wereripu New Testament

copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source files dated 29 Jan 2022

17771afc-c309-57fd-9ff3-2d5a0cd59ff1

Contents

SAN MATEO	1
SAN MARCOS	95
SAN LUCAS	152
SAN JUAN	246
HECHOS	315
ROMANOS	399
1 CORINTIOS	440
2 CORINTIOS	480
GALATAS	505
EFESIOS	520
FILIPENSES	534
COLOSENSES	543
1 TESALONICENSES	552
2 TESALONICENSES	560
1 TIMOTEO	564
2 TIMOTEO	575
TITO	582
FILEMÓN	587
HEBREOS	590
SANTIAGO	621
1 PEDRO	631
2 PEDRO	642
1 JUAN	649
2 JUAN	658
3 JUAN	660
JUDAS	662
APOCALIPSIS	666

San Mateo

Jesucristo Goãmt̃ magu ïgu acawererã iribojegue majarã erã waïre were gojam̃htañumi Mateo

¹ Jesucristo ñecũ sũmarã iribojegue majarã árĩñuma. Eropigu ïgu ñecũ mũrũ iribojegue majagu Davi waïcũgu árĩmũriñumi. Ìgu árĩboro core erã ñecũ Abrahã waïcũgu árĩmũriñumi.

² Abrahã Isaa pagu árĩñumi. Isaa Jacobo pagu árĩñumi. Jacobo Judá sã pagu árĩñumi. ³ Judá porã Fares Zara sã árĩñuma. Erã pago Tamar waïcũgo árĩñumo. Fares Esrom pagu árĩñumi. Esrom Aram pagu árĩñumi. ⁴ Aram Aminadab pagu árĩñumi. Aminadab Naasón pagu árĩñumi. Naasón Salmón pagu árĩñumi. ⁵ Salmón Booz pagu árĩñumi. Ìgu pago Rahab árĩñumo. Booz Obed pagu árĩñumi. Ìgu pago Rut árĩñumo. Obed Isaí pagu árĩñumi. ⁶ Isaí Davi pagu árĩñumi. Davipũ Israe majarã tauro opu árĩñumi. Ìgu Uria waïcũgu mũrũ marapore ïgu marapocũra pũhrũ Salomo waïcũgũre porãcũñumo igo.

⁷ Salomo Roboam pagu árĩñumi. Roboam Abías pagu árĩñumi. Abías Asa pagu árĩñumi. ⁸ Asa Josafat pagu árĩñumi. Josafat Joram pagu árĩñumi. Joram Uzías pagu árĩñumi. ⁹ Uzías Jotam pagu árĩñumi. Jotam Acaz pagu árĩñumi. Acaz Ezequia pagu árĩñumi. ¹⁰ Ezequia Manase pagu árĩñumi. Manase Amón pagu árĩñumi. Amón Josia pagu árĩñumi. ¹¹ Josia Jeconia sã pagu árĩñumi. Erã árĩrisubure Israe yeba majarãre Babilonia majarãpu ñeagãñuma erã ya yebague peresu iimorã.

¹² Eropi Babilonia yeba erã ejara pũhrũ, Jeconia marapo Salatiere porãcũñumo. Salatier Zorobabe pagu árĩñumi. ¹³ Zorobabe Abiud pagu árĩñumi. Abiud Eliaquim pagu árĩñumi. Eliaquim Azor pagu árĩñumi. ¹⁴ Azor Zadoc pagu árĩñumi. Zadoc Aquim pagu árĩñumi. Aquim Eliud pagu árĩñumi. ¹⁵ Eliud Eleazar pagu árĩñumi. Eleazar Matán pagu árĩñumi. Matán Jacobo pagu árĩñumi. ¹⁶ Jacobo José pagu árĩñumi. José María marapu árĩmũriñumi. Mariapu Jesu pago árĩmo. Jesupu masare taubu árĩgu Cristo erã arĩ piyudigu árĩmi.

¹⁷ Eropirã Abrahãre mari queonũgacũ, ne Daviguere mari queotucũ, oã árĩpehrerã árĩrã catorce cururi gohra árĩñuma. Eropirã mari dipaturi Davire queocũ, ne Babiloniague Israe majarãre erã aĩgãboro core queotucũ catorce cururi gohra dipaturi árĩñuma. Eropiituhaja Babiloniague

erã ejara pũhrũ mari queonũgacũ ne Cristo ĩgũ masa dehyoacũgue mari queotucũ catorce cururi gohra árĩñuma daja.

*Jesucristo ĩgũ masa dehyoarare wereñumi Mateo
Lc 2.1-7*

¹⁸ Eropigũ Jesucristo õpa masa dehyoapũ. ĩgũ pago Mariapũ José mera mojoto diribo árĩpo. Eropigo igo ĩgũ mera marapũcũboro core Espĩritu Santo ĩgũ turari mera majigũ bocapo. Eropigo igo basi majigũ opawahgũriñere masipo igo. ¹⁹ Eropigũ José igore mojoto diribodigũ irire masigũ, diaye árĩrire ĩgũ iigũ árĩgũ igore cóãbu iiripũ. Igore gũhyasĩuro iidiabigũ, masa erã masibiricũ ta igore cóãbu iiripũ. ²⁰ Irire ĩgũ pepirisubu Goãmũ anyupũ quẽroque Josére dehyoagũ, õpa arĩpũ.

—José, Davi mũrũ pãrami, María mera gũhyasĩriro mariro mojoto dirique. Igo Espĩritu Santo ĩgũ turari mera ne nijipo árĩ wahgãrigo ãhrimo. Eropigũ gũhyasĩriro mariro igore mojoto dirique. ²¹ Igo porãcũgocumo. ĩgũ igo magũ ta ĩgũ ya maca majarãre erã ñeri iira dipuwajare taubu árĩgũcumi. ĩgũ eropa taubu árĩcũ Jesu waĩyegũca mũhũ ĩgũgãre, arĩpũ anyu Josére.

²² I árĩpehreri eropa wayoro iribojegue majagũ Goãmũ ya weremũhtadigũ ĩgũ arĩ gojadiro dopa ta. Irire ĩgũre Goãmũ gojadoreñumi. Õpa arĩ gojamũriñumi Goãmũ yare:

²³ Nómeo mũmũ mera árĩbigo, majigũgãre bocago porãcũgocumo igo magũgãre. Eropigũ Emanuel waĩcũgũcumi ĩgũgã, arĩ gojañumi Goãmũ yare gojayudigũgue.

Emanuel arĩdiaro “Goãmũ mari mera ta ãhrimi,” arĩdiaro ĩiaa.

²⁴ Goãmũ yagũ anyu Josére eropa arĩ werera pũhrũ Josépũ wahgã anyu ĩgũ dorediro dopa ta María mera mojoto diripũ. ²⁵ Igo magũgãre igo porãcũboro core Josépũ igo mera árĩnibiripũ. Igo pũ porãcũpo pare. Eropigũ ĩgũpũ igo magũgãre Jesu waĩyepũ.

2

Abe mũririro majarã õaro masirã Jesure ĩarã ejañuma

¹ Judea yeba árĩri maca Belén waĩcũri maca Jesu masa dehyoapũ. Irisubu Herode Judea yeba majarã erã tauro opũ árĩpũ. ĩgũ eropa masa dehyoara pũhrũ necãre buherã necãre õaro masirã abe mũririro pũ majarã ahri, Jerusalengue erañorã. ² Eropa erarã, masare ero majarãre serẽpiñorã:

—¿Judío masa erã tauro opũ árĩbu dohpaguere nohogue masa dehyoayuri ĩgu? Abe ĩgu mũririro majarãgue árĩrã, ne necãmũ dehyoacũ ĩabũ. Eropã ĩgu dehyoacũ ĩha “Opũ masa dehyoagũ iicumĩ,” arĩ masiabũ gũa. Eropã ĩgu ne dehyoacũ ĩarã gũa yujuro mera ĩgũre umupeorã arĩrã ĩabũ õgue, arĩ wereñorã necãre buheri masa masare.

³ Erã eroparĩcũ pee erã opũre Herodere irire wererã wañorã. Eropĩgu gajĩgu opũ masa dehyoarare erã werecũ peegu Herodepũ guñaricupũ. Eropirã árĩpehrerã Jerusalén majarã sã ĩgu iro dopa ta guñaricũñorã erã sã. ⁴ Eropĩgu Herodepũ árĩpehrerã pahia oparãre, judío masare buherã sãre sihupehocãpũ. ĩgu sihubeora pũhrũ erã gamenerepehrecũ ĩha, erãre serẽpipũ ĩgu:

—¿Nohogue masa dehyoagũcuri Goãmũ beyedigu Cristopũ mũa pepicũ? arĩ serẽpipũ ĩgu erãre. ⁵ Ōpa arĩ wereñorã erã ĩgũre:

—Belén, Judea yebague árĩri macague Cristo masa dehyoagũcumi. Ōpa arĩ gojamũriñumi Goãmũ yare weremũhtadigũ:

⁶ Belén waĩcũri macague yujugũ opũ dehyoagũcumi. ĩgu Goãmũ yarãre Israe majarãre dorebu árĩgũcumi. Eropiro Belén Judea yeba árĩri macari watope bu árĩri maca árĩquerero gajĩ macari tauro árĩroca, arĩ gojamũriñumi Goãmũ yare gojayudigũgue, arĩ wereñorã erã Herodere.

⁷ Erã eropã arĩra pũhrũ Herode masa erã peebiroque abe mũririropũ arinirãre sihubeopũ. ĩgu pohroque erã ejara pũhrũ, erãre ĩgu serẽpira pũhrũ, erã necãmũre erã ĩaranũre wereñorã erã ĩgũre. ⁸ Erã eropã werera pũhrũ Herodepũ erãre Beléngue obeogu õpa arĩpũ erãre:

—Ĩgũgãre õaro amaque. ĩgũgãre mũa bocajara pũhrũ yu sãre wererã arique mũa. ĩgũgãre umupeogu wabu ĩiaa yu sã, arĩ were obeoripũ erãre Herodepũ.

⁹ ĩgu eropã arĩra pũhrũ, erã waha wañorã. Erã eropã wacũ abe mũririropũ erã ĩadiru necãmupũ erã core wamũhtaniguicãyoro. Eropiro majĩgũgã ĩgu árĩro weca dujanũgaja wayoro iriru necãmũ. ¹⁰ Eropirã necãmũ dujanũgajacũ ĩarã, bũrigã mucubiriñorã erã. ¹¹ Majĩgũgã ĩgu árĩri wihigue eja, ñaja wañorã erã. Eropã ñajajarã majĩgũgãre ĩgu pago mera árĩgũre ĩañorã erã. Eropirã erã mereja, ĩgũre umupeoñorã. Umupeotuhaja, erã ya comorire aĩbeo, pãgũñorã erã ĩgũgãre aĩgãrirare omorã. Eropirã orore, buirire, poresuri sãre aĩwiu, ĩgũgãre waja mariro oñorã. ¹² Irire otuhara pũhrũ carĩa

wañorã erã. Erã eropa carĩcũ quẽroque Goãmũ werepũ erãre: “Herode pohro dujabiricãque,” arĩ werepũ Goãmũ erãre quẽroguere. Īgũ eropa arĩ werera pũhrũ, erãpũ wahgãñorã. Erã eropa wahgãra pũhrũ gaji mague erã ya yebague dujarã dujaa wañorã.

José sã Jesugãre aĩ duhri gã wañuma Egiptogue

¹³ Erã eropa wara pũhrũ Goãmũ yagũ anyu quẽroque Josére dehyoagu, õpa arĩ werepũ:

—Wahgãque. Herodepũ majigugãre wejẽbu amagucumi dohpaguere. Eropigu majigu sãre ĩgũ pago sãre Egiptogue duru aĩ duhri gãque. Eroguere yũ dipaturi mũre werecũgue dujarique, arĩ werepũ anyu Josére.

¹⁴ Īgũ eroparĩcũ peegu, Josépũ ñami ta wahgã, majigu sãre ĩgũ pago sãre Egiptogue aĩ duhri gã wapũ. ¹⁵ Egiptogue eja, Herode ĩgũ ojocarropẽ ta eroguerẽ arĩñorã erã. Eropa wayoro iribojegue majagu Goãmũ ya weremũhtadigu ĩgũ arĩ gojadiro dopa ta. Irire ĩgũre Goãmũ gojadoreñumi. Õpa arĩ gojamũriñumi Goãmũ yare gojayudigugue: “Egiptogue arĩgũre yũ magure sihubeoabũ,” arĩ gojamũriñumi Goãmũ yare weremũhtadigugue.

Herode majirãre wejẽdoreñumi

¹⁶ Eropigu necã buherã erã duhri dujaacũ peegu Herodepũ guatariacãpũ. Eropigu Belén majarãre, iri maca pohro majarã sãre erã porãre ũa porãgãre wejẽpehocãdorepũ ĩgũ. Ne dehyoarãre wejẽnũgadore pe bojori oparãre wejẽtudorepũ ĩgũ. Nere necãre buheri masa necãmũre erã ĩaranũre wereñorã Herodere. Erã eroparĩcũ peegu ĩgũ Jesu masa dehyoarĩnũre masigu, “I nũcũ bojori ta ĩgũ opacumi,” arĩgũ majirãre pe bojori oparãre wejẽtudorepũ. ¹⁷ Īgũ eropiicũ iribojegue majagu Jeremia Goãmũ yare weremũhtadigu ĩgũ arĩ gojadiro dopa ta eropa wayoro. Õpa wereyu gojañumi ĩgũ:

¹⁸ “Ramã waĩcũroque bũsũro carabũ. Bũrigã bũjawereri mera orerã carama. Raquel acawererã Israe masa marasã nome erã porãre bũrigã orerãcoma. Erã porã sĩricũ ĩarã ne bũjawere duhosome,” arĩ gojañumi iribojeguere Herode majirãre wejẽdoreboro core.

¹⁹ Eropi Herode ĩgũ sĩrira pũhrũ Egiptogue arĩdigũre Josére Goãmũ yagũ anyu quẽroque dehyoapũ daja. Eropa dehyoagu õpa arĩpũ Josére:

²⁰ —Majigugãre wejẽdianirã mũra sĩria wahãma. Eropigu ĩgũ majigũre, ĩgũ pago sãre Israe yebague aĩ dujaaque mũhũ, arĩ werepũ anyu Josére.

²¹ Īḡu eropa arīra pūhrū wahgā, majigugāre ĭḡu pago mera ta Israe yebague aĩ dujaa wapū. ²² Arquelao Herode magū ĭḡu pagure gohrotodigū ĭḡu árīcū pee, Josépu Judea yeba árīḡu güipū. Eropigū dipaturi ta Goāmū quēroque ĭḡure werenemopū. ĭḡure Judeague dipaturi dujadorebiripū. ĭḡu eropa werera pūhrū erā Galilea yebague waha wañorā. ²³ Iri yebaguere Nazare waĩcūri macague eja árīñorā erā. Eropa iññorā erā Goāmū yare weremūhtanirā erā gojadiro dopa ta. Ōpa arī wereyumūriñuma: “ ‘Cristo Goāmū beyedigū Nazare majagu ta āhrimi,’ arīrācoma masa,” arī gojamūriñuma iribojegue majarā.

3

Ñu waĩyegū masare wereñumi

Mr 1.1-8; Ľc 3.1-9, 15-17; Jn 1.19-28

¹ Eropi irisubure Ñu Goāmū yarāre waĩyeri masū árīpū. Judea yeba masa mariroque ĭḡu Goāmū yare werenūgarū.

² Ōpa arī werepū masare ĭḡu pohro ejarāre.

—Mūa ñero iirare bujawere duhucāque. Ūmaro majagu Goāmū mūa opū ĭḡu árīboro merogā duhyaa, arī werepū ĭḡu Ñu.

³ Iribojegue majagu Isaia Goāmū yare weremūhtadigū Ñu eropa waburire ōpa arī gojayuñumi:

Masa mariroque werenigui gaguiniguigū ōpa arī buhegūcumi ĭḡu: “Mari Opū ĭḡu ariburi mare amuro dopa ta ĭḡu ariboro core ōarā árīyūque mūa ĭḡure peemorā,” arī wereniguigūcumi, arī gojañumi Isaia.

⁴ Ihĩ Ñu camello ya gasirire suhri sañagu, waibuḡu ya gasirodare tuādiudigū árīpū. Eropigū poreroare bamūripū. Eropárīcū nūḡu majarā momere bapū. ⁵ Jerusalén maca majarā, árīpehrero Judea yeba árīrā, dia Jordán waĩcūriya pohro árīrā sā ĭḡure peerā wañorā. ⁶ Erā eropa pee, erā ñero iirare bujawere, Goāmūre irire weretarimūriñorā erā. Erā eropa werecū peegū dia Jordán waĩcūriyague Ñu erāre waĩyepū.

⁷ Eropigū bajarā fariseo masa, saduceo masa sā ĭḡure waĩyedorerā ejacū ĭagu Ñu werepū erāre:

—Mūa ñero iiricūrā āhraa mūa. “Goāmūre gua ñeri dipuwaja moabiricāporo,” arīrā, ¿mūa yure waĩyedorerā ahriri? ⁸ ĭḡu mūa ñero iira dipuwajare moabiricū ōpa iique mūa. Diaye ta mūa ñeri iirare bujawererā árīrā, ōarire gohrotorā árīrā, ōarire iique mūa. ⁹ Ōpa arī pepibiricāque: “Abrahā mari ñecū mūrū árīmūripū. Eropirā Goāmū mera ōhaa,” arī pepibiricāque mūa. Mūare arīḡu tiiaa. Abrahā

pāramerā mũa áríri duhpiburi áríbeaa. Goãmũ gamegũ í utāyeri mera gajirāre iimasimi Abrahā acawererāre. Eropirā Abrahā pāramerā mũa áríri bu gohra ta āhraa. ¹⁰ Ōpa āhraa: Mari masa yucũ iro dopa āhraa. Goãmũpũ come opagũ iro dopa āhrimi. Eropigũ ñeri dũcacũri yucũre pa cohā, iri nuguri sāre tabetagũcumi. Tabetatuhaja, peamegue cóāgũcumi ĩgũ iri yucũre, iri nuguri sāre. Eropa ta iigũcumi mũa sāre ĩgũre gamebirāre. ¹¹ Yũ pũhrũ yũ tauro turagũ arigũcumi. Ōatariagũ āhrimi. ĩgũ iro dopa ōagũ áríbeaa yũpũ. Eropigũ ĩgũre pepigũ “Yũ tamera bu gohra árígũ āhraa,” arĩ pepia yũhũ. Mũa ñero iirare bujawerera pũhrũ, yũpũ deco mera waĩyea. Yũ pũhrũ arigũpũ yũhũ tauro iigũcumi. Espíritu Santore ogũcumi masa mera áriniguibure. Eropigũ peamegue ĩgũ ñerire soewearo dopa ta ĩgũpũ mũa ñero iirire coegũcumi. ¹² Yũ pũhrũ arigũ trigo gasirire cóāgũ iro dopa āhrimi. Gasirire cóāgũ ĩgũ sihburu mera árípehreri trigo yeri gasirire sũha weami. ĩgũ eropa sũha weara pũhrũ trigo gohra yeripũre ĩgũ diburi wihigue debugũcumi. ĩgũ sũha weara gasiripũre ĩgũ soegũcumi. Ōpa ii beyegũcumi yũ pũhrũ arigũpũ. Ōarire gohrotonirāpũre ĩgũ mera áriniguicũ iigũcumi. Erā ñerire bujawerebirāpũre peamegue yaribiri peamegue cóāgũcumi, arĩ werepũ Ñũ.

Ñũ Jesure waĩyeñumi

Mr 1.9-11; Lc 3.21-22

¹³ Pũhrũ Jesu Galileague árídigũ wapũ. Jordán waĩcũriyague ejapũ Ñũre “Yũre waĩyeque,” arĩgũ. ¹⁴ Negohraguere Ñũ ĩgũre waĩyediabiriripũ.

—Cue, mũpũ yũ tauro turagũpũre yũre mũ waĩyecũ ōaboaya. Mũre waĩyebu áríbeaa yũhũ, arĩ yũhrípũ Ñũ Jesure.

¹⁵ Jesupũ yũhrípũ ĩgũre:

—Yũre waĩyeque. Mari ōpa iirā Goãmũ ĩgũ dorediro dopa ta iirā iiaa, arĩpũ Jesu. ĩgũ eroparĩcũ peegũ,

—Áũ, arĩ yũhrípũ Ñũ. ¹⁶ Eropa arĩtuhaja Jesure waĩyepũ. Waĩyetuhajacũ Jesu diague niguidigũ majanũgajapũ. ĩgũ majanũgajacũ ta, umusi ĩgũre pārima wayoro. Eropigũ Goãmũ yagũ Espíritu Santo buja iro dopa bejagũ ĩgũ weca ĩgũ دچارicũ ĩapũ ĩgũ basi. ¹⁷ Eropiro umarogue wereniguiro cariyoro:

—Ihĩ yũ magũ yũ mahigũ āhrimi. ĩgũ mera bũrigā mucubiria, arĩro cariyoro umaroguere.

4

Watĩ ñerire iidoreriñumi Jesure

Mr 1.12-13; Lc 4.1-13

¹ Eropi Espiritu Santopu Jesure masa marirogue wadorepu erogue watĩ ñgure ñerire iidoreboro dopa.

² Erogue ejagu, cuarenta nuri gohra baro mariro arĩpu Jesu. Eropiro puhruquere ñgure oa puriyoro pare. ³ Ñgu oaboacũ ñagu watĩpu ñgu pohrogue ejagu opa arĩpu:

—Muhu Goãmu magu arĩgu opa ñhmuque. Iyerire utayerire bari poyacũ iique, arĩripu ñgu Jesure.

⁴ Ñgu eroparĩcũ peegu Jesu gamebiripu. Eropigu Jesu opa arĩ yuhripu:

—Goãmu yare erã gojarapũ opa ahraa: “Masare bari mera dihta ojocaribiro gahmea. Arĩpehreri Goãmu ñgu ya wereniguri mera arĩro gahmea,” arĩmi Goãmu, arĩ yuhripu Jesu watire.

⁵ Ñgu eropa arĩ yuhrira puhru watĩpu Jerusalén waĩcari macague Jesure aĩgãpu. Erogue eja, Goãmu ya wihi wecague Jesure aĩ murijapu ñgu. ⁶ Aĩ murijatuha, ñgure opa arĩripu:

—¿Diaye ta Goãmu magu gohra ta ahriri muhu? Goãmu yare erã gojarapũ opa ahraa:

“Goãmu ñgu yarã anyuare mure ñhadibudoregucumi.

Eropirã erãpu mure ñhadiburãcoma mugue utaye weca mehbejari arĩã,” arãa ñgu gojarapũ.

Erã mure eropa ñhadibumorã arĩcũ muhu Goãmu magu ta arĩgu õgue buhrima dija ñhmuque yure. Mure erã itamucũ ñhmuñata yure, arĩripu watĩpu.

⁷ Ñgu eroparĩcũ peegu gamebiripu Jesu. Ñpa arĩ yuhripu ñgure:

—Goãmu yare erã gojarapũ opa arãa: “Goãmu muu Opu ñgu arĩrare ‘¿Diaye ta ahriri?’ arĩ masidiarã Goãmure ii ñhudoremaabiricãque,” arãa Goãmu yare erã gojarapũ, arĩpu Jesu.

⁸ Ñgu eropa arĩ yuhrira puhru umadigugue utãgugue Jesure aĩ muriapu daja. Irigu wecague muri bejaja, arĩpehreri macarire i umu majare ñhmupu Jesure. Erã opari sãre ñhmupu. ⁹ Eropa ñhmugu Jesure opa arĩpu:

—Yure mereja, “Muhu yu opu ahraa,” arĩ umupeoque muhu yure. Muhu yure eropa iicũ mure arĩpehreri i macarire mure ogura, arĩ wereripu watĩ.

¹⁰ Ñgu eroparĩcũ Jesu opa arĩ yuhripu daja:

—Satana, waque muhu. Ñpa arãa Goãmu yare erã gojarapũ: “Mu Opu Goãmu dihtare umupeoque. Ñgu ya

doreri dihtare iique,” arāa Goām̄u yare erā gojarap̄u, ar̄ip̄u Jesu wat̄ire.

¹¹ Īḡu eropar̄ic̄u peeḡu wat̄i waha wap̄u. Īḡu wara p̄uhr̄u anyuap̄u eja, Jesure itamuñorā. Īḡure barire oñorā.

Galilea yeba Jesu buhenugañumi

Mr 1.14-15; Lc 4.14-15

¹² Eropi Ñure peresu erā iic̄u peeḡu, waha wap̄u Jesu. Galilea yebague ejaḡu. ¹³ Ero ár̄iri macague Nazaregue waha, tarigā, Capernaum waic̄uri macague ejaḡu. Galilea waic̄uri ditaru pohro ár̄ib̄u Capernaum. Iri maca Zabulón yeba pohro, Neftalí yeba pohro ár̄ib̄u Capernaum. Eroque eja ár̄ip̄u Jesu. ¹⁴ Eropa ta iip̄u Jesu iribojegue majaḡu Goām̄u yare werem̄htadiḡu Isaia Īḡu ar̄i gojadiro dopa ta. Ōpa ar̄i gojajuñumi:

¹⁵ Zabulón yeba pohro, Neftalí yeba pohro, ditaru waro, Jordán waic̄uriya gajip̄u masegue Galilea yeba āhraa. Iri yeba judio masa ár̄ibirā ya yeba āhraa. ¹⁶ Ero majarā Goām̄u yare ōaro masibeam̄a. Eropa masibiriquererā ta ōaḡure ĩarāgue masirācoma. Erāp̄u Goām̄ure ne masibeam̄a. Eropirā peamegue wamorā ta ár̄irima. Eropiḡu yujuḡu erāre Goām̄u yare masic̄u iiḡucumi, ar̄i gojañumi Isaia Jesu eraboro coregue.

¹⁷ Eroque ár̄iḡu Goām̄u yare weren̄gap̄u Jesu:

—M̄ua ñeri iirare bujawereque. Eropa iirā ōarip̄ure gohrotoque. Ūmaro majaḡu Goām̄u ár̄ipehrerā tauro Īḡu op̄u ár̄iboro merogā duhyaa, ar̄i weren̄gap̄u Īḡu.

Wapic̄urā wai wej̄erāre ĩḡu mera majarā ár̄imorāre sihuñumi Jesu

Mr 1.16-20; Lc 5.1-11

¹⁸ Eropi Galilea waic̄uri ditaru t̄urogue ejaḡu, Simore, ĩḡu paḡu maḡu Andre mera bocajap̄u Jesu. Simo ta Pedro erā ar̄i piyuḡu ár̄ip̄u. Erā wai wej̄eri masa ár̄iñorā. Erā ya wej̄eri yuc̄ure mehyurā iñorā iri ditaru w̄ari ditarugue. ¹⁹ Erāre boca ōpa ar̄ip̄u Jesu:

—Ȳu mera majarā ár̄imorā arique m̄ua. Ȳu mera m̄ua aric̄u waire ñeha gameneorā m̄ua ár̄iro dopa ta, Goām̄u yarā ár̄imorāre masare sihu gameneomorā ár̄ic̄u iiḡura m̄uare. Ȳu mera m̄ua aric̄u eropa iimorāre amuḡura m̄uare. Eropirā ȳu mera arique, ar̄ip̄u ĩḡu erāre.

²⁰ Eropa ĩḡu ar̄ic̄u peerā ta erā ya wej̄edi yuc̄ure apic̄aa, Jesu mera waha wañorā.

²¹ Eropirā erā Jesu mera tarigā, Santiagore ĩḡu paḡu maḡu Ñu s̄are bocañañorā daja. Erā Zebedeo porā ár̄iñorā. Erā yaru dohodirugue erā paḡu mera erā s̄a erā ya wej̄edi

yucure amurã iĩnorã. Erã perãre ĩgu sihubeopũ. ²² ĩgu eropa sihubeocũ pee, erãpũ erã pagure, dohodiru sãre api Jesu mera waha waĩnorã.

Bajarã masare buheñumi Jesu

Lc 6.17-19

²³ Eropi árĩpehrerogue Galilea yebare Jesu buhe curipũ. Judio masa gũa buheri wirigue ðari buherire, umaro majagũ ĩgu opũ árĩricurire buherũ. Eropigũ dorecurãre ðarã iigu árĩpehreri dorecurire cóapũ ĩgu. ²⁴ ĩgu eropa iicũ peerã Siria yeba majarã árĩpehrerogue iri yeba árĩrã ĩgure masinũgañorã. Eropa masirã, gajiropa árĩri dore oparãre, watẽa ñajasũnirãre, pũriri dorecurãre, sĩriri mũra dorecurãre, dũpũ turabirã sãre aĩ ejañorã Jesu pohrogue. Eropigũ árĩpehrerãre erãre ðarã wacũ iipũ Jesu.

²⁵ ĩgu eropa iicũ ĩarã, Galilea yeba majarã Decapoli yeba majarã, Jerusalén majarã, Judea yeba majarã, Jordán waĩcuriya gajipũ masepũ majarã, bajarã masa ĩgu mera waĩnorã.

5

Utãgũgue mũria, ero buheñumi Jesu masare

¹ Masa bajarã ĩgu pohro erã ejacũ ĩagũ Jesu utãgũgue mũriapũ. Mũrija, ero doajapũ. Ero ĩgu doacũ ĩgu buherã ĩgu pohrogue ejañorã. ² Erã ejacũ ĩagũ ðpa arĩ buhenũgapũ:

Õpa árĩrã àhrima mucubirirã, arĩ buheñumi Jesu

Lc 6.20-23

³ —Erã ñerire bujawererã, Goãmure gamerã mucubirirã àhrima. Umaro majagũ erã opũ árĩroguere warãcoma erã. Umaro maja erã ya àhraa. Eropirã bũrigã mucubirirãcoma.

⁴ “Orerã sã mucubirirã àhrima. Erãre mucubiricũ iimi mari Pagũ. Eropirã mucubirirã árĩrãcoma.

⁵ “Gajirãre tarinũgadiabirã eropa árĩca arĩbirã mucubirirã àhrima. Goãmũ “Ogũra,” ĩgu arĩrare oparãcoma. Eropirã erã sã mucubirirã árĩrãcoma.

⁶ “Goãmũ ĩgu dorero dopa iidiarã, ðarire iidiarã mucubirirã àhrima. Goãmũ ĩgu itamucũ erã ðarire ii ojo-gorocurãcoma. Eropirã mucubirirã árĩrãcoma.

⁷ “Gajirãre mojomoro ĩarã mucubirirã àhrima. Erã eropa mojomoro ĩacũ Goãmũ erã sãre mojomoro ĩagũcumĩ. Eropirã mucubirirãcoma.

⁸ “Erã ñerire cóãnirã, mucubirirã àhrima erã. Goãmure ĩarãcoma erã. Eropirã mucubirirãcoma.

9 “Gajirãre gamequeãcũ bosarã mucubirã ãhrima. Erãre “Yũ porã ãhrima,” arĩgucumi Goãmũ. Eropirã mucubirãcoma.

10 “Goãmũ dorerire erã iira waja gajirã mera ñero tarinirãpũ umaro majagu erã opu árĩroguere ïgu yare oparãcoma erã. Eropirã mucubirãcoma.

11 “Yahare mũa iira waja gajirã mũare erã turiquerecũ ta mucubirã ãhraa mũa. Mũare erã ñero iicũ mucubirã ãhraa mũa. Yaharã mũa árĩri waja mũare árĩpehreri ñeri quere goroweoquerecũ ta mucubirã ãhraa mũa. 12 Goãmũ yare weremũhtanirãre mũa core árĩnirãre erãguere ta ñero iimũhtañuma. Mũa sãre erãre iidiro dopa iicũ mucubirique. Ōaro sĩporãcũque. Eropigu umarogue mũa ejaçũ wũaro ðaro iigucumi mũare Goãmũ. Eropirã mucubirique mũa, arĩ werepũ Jesu.

Moa iro dopa, boyoro iro dopa ãhrima Jesu yarã, arĩ buheñumi

Mr 9.50; Lc 14.34-35

13 Eropi Jesu buhenemopũ:

—Moa waibugũ dihire iri ñero wabiricũ iiro dopa ta mũapũ yaharãpũ árĩpehrerã gajirãre ñerire erã iidiabiricũ iiaa. Moa ñeri wacũ dipaturi ðari iimasiya mara. Iri moa ne ðabeaa. Iri eropa wacũ iri moare cóãcãro gahmea. Irire cóãra pũhrũ weca ejama. Ne duhpiburi árĩbeaa iri erã cóãra. Iri duhpiburi árĩbiro dopa ta árĩbircãque mũa. Goãmũ yapũre iiniguicãque, arĩ werepũ Jesu.

14 Eropi ïgu buhenemopũ:

—Boyoro marire ñhamasicũ iiro dopa ta mũapũre yaharãpũre i yeba majarãre Goãmũ yare wererã erãre masicũ iiro gahmea. Utãgu weca árĩri macare duhmasiya mara. 15 Eropi sihãgodirure masa sihãgorã gajino docague dibubeama. Irure sihãgogũ umarogue duhpomi iri wihi majarã árĩpehrerã erã ïaboro dopa. 16 Eropirã mũa sã mũa Goãmũre mũa umupeorire dibubircãque. Ōaro wereque. Eropirã ðarire iique. Mũa eropa iicũ ïarã masa erã mari Pagũ umaro majagũre umupeorãcoma. “Ïgu turagu, ðagu ãhrimi,” arĩrãcoma, arĩ werepũ Jesu.

Goãmũ ïgu dorerire ïgu gojarare wereñumi Jesu

17 Eropa arĩtuhaja, erãre werenemopũ:

—Ire mũa masicũ gahmea yũhũ. Goãmũ ïgu dorerire Moisere ïgu apirare, ïgu yare weremũhtanirã erã gojara sãre cóãgu arĩgu iibiribũ. Iri dorerire mũare ðaro were amugu arĩgu iibũ. Goãmũ yare erã werediro dopa ta iigu aribũ. 18 Diaye ta mũare arĩgu iiaa. I yeba umaro árĩropẽ ta

ĩḡu doreri sã árĩroca. Goãmu ĩḡu dorerare iipehogucumi. ¹⁹ Eropirã iri dorerire yujurãyeri tarinugarã, gajirãre eropa ta iidorerã bu árĩrã árĩrãcoma. Ũmaro majagu opu ĩḡu árĩroque bu árĩrã iro dopa árĩrãcoma. Yujuñe doreriñe árĩquerecũ ta erã tarinugarã bu árĩrã iro dopa árĩrãcoma erã. Gajirãpu ĩḡu dorerire õaro iirã, gajirãre erã iiro dopa iidorerã umaro majagu ĩḡu opu árĩroque oparã iro dopa árĩrãcoma erã. ²⁰ Mũare arĩḡu tĩaa yũhu. Masare buherã, fariseo masa sã Goãmu gamerire queoro iibeama. Erã tauro Goãmu gamerire iique mua. Mua eropa iibirã, ĩḡu opu árĩroquere ne ejasome mua, arĩ werepu Jesu.

Papũrĩre werenĩguĩre wereñumi Jesu

Lc 12.57-59

²¹ Eropa arĩtuhaja erãre werenemopu:

—Iribojegue majarã õpa arĩ wererare ta peenirã árĩribu mua: “Masare wejẽbircãque. Masare wejẽdigu erã dipuwaja moabu ãhrimi,” erã arĩrare peenirã árĩribu mua. ²² I erã werera tauñariro mũapũre werenemogura. ĩḡu acaweregu mera papũridigupu masure wejẽdigu iro dopa ta ãhrimi. Eropĩgu erã dipuwaja moabu ãhrimi ĩḡu sã. ĩḡu acaweregure gameturiḡu dipuwaja moadorerã pohro erã aĩḡabu ta ãhrimi ĩḡu sã. “Ñegu pee masibigu ãhraa mũhu,” ĩḡu acaweregure arĩḡure peamegue wama guhyataria ĩḡure.

²³ “Mua acaweregu mũare ĩḡu ĩhaturicũ ĩḡu mera amumãhtaque Goãmure serẽboro core. Eropirã Goãmu wihigue mua Goãmure umupeorã waboro core, waibugure mua oboro core õpa iique. ²⁴ Goãmure mua oburire duhucãnique dohpa. Mua acaweregu pohroque waha, “Dipaturi ĩhaturibircãrã. Irire iripẽta duhurã,” irire arĩque ĩḡure. Mua eropa amura pũru Goãmure umupeorã waque daja ĩḡu ya wihigue.

²⁵ “Gajigu mũare weresãdiagu, dipuwaja moadoreri wihigue mũare ĩḡu aĩḡadiacũ, ĩḡu mera guaro mariro arĩque. Dipuwaja moadoregu pohroque ĩḡu aĩ ejaboro core ĩḡu mera õaro ahmu werenĩguique. Mua eropa iicũ ĩagu mũare weresãbiribocumi. Mua eropa iibiricũ eroguerẽ mũare aĩ ejacũ ĩḡupu dipuwaja moadoregure weresãgucumi. ĩḡu eropa weresãcũ, beyegupu peresu iirãguere mũare ogucumi. Eropirã erã mũare peresu iirãcoma. ²⁶ Eroque arĩnĩguirãca mua. Ne erã wajayedorerare mua wajayephocũgue wirirãca mua, arĩ werepu Jesu.

Gajigu marapo mera ñero iirire wereñumi Jesu

27 Õpa arĩ werenemopu Jesu:

—Iribojegue majarã õpa erã arĩ wererare peenirã árĩribu mua. “Gajigu marapo mera ñero iibiricãque,” erã arĩrare peenirã árĩribu mua. 28 I erã werera tauñariro muare ipure werenemogura: Nomeore ñeabiriqueregũ ta yujugu igo mera árĩdiagũ igore ñero uaribejagu ñero guña pepigu ñero iituhami igo mera.

29 “Eropirã mua cuiru diayepu árĩdiru mera ñero iirã irirure mua gorawea cóãbodiro dopa ta iri ñerire duhucãque. Irire duhubirã peamegue warãca. Mua cuirure cóãcũ iri cuiru dihta dederea. Mua ñerire duhubirãpu peamegue waha ñetariaro tarirãca. Eropirã iri ñerire duhucãque. 30 Eropirã mua mojoto diayepu maja mojoto mera ñero iirã iri mojtore tabeta cóãbodiro dopa ta iri ñerire duhucãque. Irire duhubirã peamegue warãca. Mua mojtore mua cóãcũ iri mojoto dihta dederea. Mua ñerire duhubirãpu peamegue waha ñetariaro tarirãca. Eropirã iri ñerire duhucãque, arĩ werepu Jesu.

Erã marasã nomere cóãrire wereñumi Jesu

Mt 19.9; Mr 10.11-12; Lc 16.18

31 Õpa arĩ werenemopu Jesu:

—Iribojegue i sãre arĩñuma: “Ïgu marapore cóãdiagũ ïgu cóãburire wereripũ mera igore cóãmasimi,” arĩñuma iribojeguerẽ. 32 I erã werera tauñariro muapure ire weregura: Yujugu ïgu marapo umũ mera ñero iibiriquerecũ ta igore cóãbocumi. Ïgu eropa cóãdigo gajigu mera marapucũgo ñero iigo iicumo gajigu mera árigo. Eropigu igo marapu igore cóãdigũ igore gajigu mera ñero iicũ iimi. Eropigu ïgu cóãdigo mera marapocũgu igo mera ñero iigu iimi ïgu sã, arĩ werepu Jesu.

Waĩpeo arĩrare wereñumi Jesu

33 Õpa arĩ werenemopu Jesu:

—Iribojegue majarãre erã õpa arĩ wererare peenirã árĩribu mua: “Mua arĩdiro dopa ta eropa iique. ‘Goãmũ mera diaye ta eropa iigura,’ mua arĩdiro dopa ta iique,” erã arĩ wererare peenirã árĩribu mua. 34 I erã werera tauñariro muare weregura. “Umaro mera diaye ta arĩgu iiaa,” arĩ umaro mera arĩ waĩpeo arĩbiricãque. Umaropu mari Opũ ïgu árĩro ãhraa. Bu árĩro árĩbeaa. Ero eropa árĩro árĩcũ ïarã eropa arĩmaabiricãque. 35 I yeba mera ne waĩpeo arĩbiricãque. I yeba sã Goãmũ ya yeba ta ãhraa. Ero eropa árĩro árĩcũ ïarã eropa arĩmaabiricãque. Jerusalén mera ne waĩpeobiricãque. Turagu mari Opũ ya maca ãhraa Jerusalén. Bu árĩro árĩbeaa. Eropirã

eropa arĩmaabiricãque. ³⁶ “Yũ dipuru mera diaye arĩgu iiaa,” arĩ waĩpeobiricãque. Mũa poari borecũ iimasi-beaa mũa. Iri ñiri wacũ sãre iimasibea mũa. Eropa iimasibirã árĩrã “Yũ dipuru mera diaye arĩgu iiaa,” arĩ waĩpeobiricãque. ³⁷ “Iirãra,” arĩrã waĩpeoro mariro diaye ta irire arĩniguicãque. “Iisome,” arĩrã sã waĩpeoro mariro arĩniguicãque. Mũa waĩpeo arĩrã watĩ ñegu ĩgu dorero dopa ta iirã iica, arĩ werepũ Jesu.

Erã basi gamediarire wereñumi Jesu

Lc 6.29-30

³⁸ Ōpa arĩ werenemopũ daja Jesu:

—Iribojegue ōpa erã arĩ wererare peenirã árĩribũ mũa. “Mũre gajigũ mũ cuirure ĩgu patĩadiro dopa ta mũ sã ĩgũre patĩa gameque. Mũ gũcũrĩrure ĩgu panuadiro dopa ta mũ sã ĩgũre ĩgu gũcũrĩrure panua gameque,” erã arĩ wererare peenirã árĩribũ mũa. ³⁹ Erã werera tauñariro weregũra daja mũare. Mũare ñero iidigũre eropa ĩacãque. Yujupũ mũ wayuporãre pacũ, “Gajipũ sãre padiagu paque,” arĩque ĩgũre. ⁴⁰ Gajigũ mũre dipuwaja moagũre ĩgu weresãcũ, ĩgu dipuwaja moagupũ mũhũ camisa mera mũre weresãdigũre wajayedorebocumi. ĩgu eropa wajayedorecũ ĩgũre oque. Iriñere otuhaja mũ weca majañe suhriro sãre onemoque ĩgũre. ⁴¹ Yujugũ surara gajinore yuju kilómetro mũre aĩgãbasadorecũ, gaji kilómetro aĩgãnemobasaque daja ĩgũre. ⁴² Mũre serẽdigũre ĩgu serẽropẽ ta oque ĩgũre. Eropigũ gajigũ mũre wayudorecũ wayuque ĩgũre ĩgu wayudorerare, arĩ werepũ Jesu.

Mũare ĩhaturirãre mahique, arĩ wereñumi Jesu

Lc 6.27-28, 32-36

⁴³ Ōpa arĩ werenemopũ daja Jesu:

—Masa ōpa arĩmũrima: “Mũa mera majarãre mahique. Eropirã mũare ĩhaturirãpũre ĩhaturi gameque daja,” erã arĩrãre peenirã árĩribũ mũa. ⁴⁴ Erã werera tauñariro weregũra mũare daja: Mũare ĩhaturirãre mahi umupeoque. Mũare ñero iirãre ōaro árĩdoreque. Mũare ĩhaturirãre ōaro iique. Eropirã mũare ñero wereniguirãre mũare ñero iirã sãre “Erã sã ōaro árĩporo,” arĩrã Goãmũre serẽbasaque. ⁴⁵ Mũa eropa iirã marĩ Pagũ umaro majagu Goãmũ porã ahraa mũa. Goãmupũ yujuropa ta iimi masare. Ñerãre, ōarã sãre abere asicũ iimi ĩgu. Eropigũ Goãmũ ĩgu dorerire iirã sãre, iibirã sãre deco merecũ iimi ĩgu. Masare yujuropa ĩgu iiro dopa ta mũa sã masare iique. ⁴⁶ Mũare umupeorã dihtare mũa umupeocũ ne duhpiburi árĩbeaa iri. Ñerã masa wajasea corerã sã eropa ta

iima. Eropirã árĩpehrerãre umupeoque. ⁴⁷ Mũa acawererã dihtare mũa õaro bocatĩricũ ne duhpiburi árĩbeaa iri. Goãmure masibirã sã eropa ta iima. Eropirã árĩpehrerãre õaro bocatĩrique. ⁴⁸ Neri marirã árĩque mũa. Mari Pagu umaro majagu ĩgu ñeri marigu ĩgu árĩdiro dopa ta mũa sã ñeri marirã árĩque, arĩ werepũ Jesu.

6

Õari iirire wereñumi Jesu

¹ Dipaturi ĩgu werenemopũ:

—Goãmũ ya árĩburire õarire iirã árĩrã, “Goãmũ yare iipehorã ahraa gua,” arĩ werebircãque gajirãre. Mũa eropa arĩ wererã mũa õaro iira ne duhpiburi árĩbeaa. Eropigu Goãmũ umaro majagu õarire mũa iira wajare mũare osome.

² “Eropirã mojomorocũrãre itamurã, irire masare ii ĩhmubircãque. Masa erã ĩabiro itamuque erãre. Gajirã iro dopa iibircãque. Erã masa bajarã watope mojomorocũrãre itamura. Mague niguirã watope mari buheri wirigue árĩrã watope sãre ii ĩhmuma. Erã eropa iiquererã erã mari pũrũpũre ñero iicorerã aħrima. Eropa masa watope õarire ii ĩhmurã erã, “Õarã aħrima erã,” masare arĩdorerã iima. Erã eropa iirã masa umupeori mera wajatatuhama. Eropigu Goãmũ ne wajayesome erãre.

³ Eropirã mojomorocũrãre itamurã, irire yayarogã iique. Mũa wapi mera árĩquererã ta ĩgu ĩabiro irire iique. ⁴ Masa erã ĩabirogue mojomorocũrãre itamuque. Masa ĩabirogue mũa itamuquerecũ Goãmũ ĩhami. Eropigu mari Pagũpũ mũare wajayegũcumi, arĩ werepũ Jesu.

Goãmure serẽriñere buheñumi Jesu

Lc 11.2-4

⁵ Dipaturi ĩgu werenemopũ:

—Goãmure serẽrã, mari pũrũpũ ñero iicorerã iiro dopa iibircãque mũa. Erã mari buheri wirigue nigui, mague sãre nigui, Goãmure serẽ ĩhmuma erã masare. Eropa serẽ ĩhmurã diaye masa erãre umupeori mera erã mucubirituhama. Eropigu Goãmũ erãpũre umupeosome. ⁶ Mũaru Goãmure serẽmorã mũa ya taribugue biha ñajaque. Biha ñaja mari Pagũ ĩasũya marigũre serẽque. Mũa eropa iicũ masa erã ĩabiro árĩquerecũ ta mari Pagũpũ mũare ĩagũcumi. Eropa peegu mũare õaro iigũcumi ĩgu.

⁷ “Eropirã Goãmure serẽrã, pepiro mariro mũa serẽrare ta dipaturi serẽ maji dujabircãque. Eropa ta iima Goãmure masibirã. “Bajasuburi yuju disiro ta gua serẽcũ guare peegũcumi,” arĩ pepima erã. ⁸ Erã iiro dopa iibircãque.

Mua serēboro core mari Pagu mua gamerire masituhami.
 9 Eropirā ōpa arī serēro gahmea Goāmure.

Gua Pagu umaro majagu mu ōagu árīrīre árīpehrerā
 umupeoporo. 10 Dohpaguere árīpehrerā weca opu
 árīque. Umaroguere mu dorero dopa ta erā iiro dopa
 ta i yeba majarā sã eropa iiporo. 11 Eropigu umuri
 nucu gua baburire oniguicāque guare. 12 Gajirā
 guare erā ñero iirare gua cãdijiro dopa ta mu sã
 gua ñero iirare cãdijique. 13 Eropigu gua ñero iib-
 orare cãhmotaque. Eropigu guare ñerire iibiricãcũ
 iique. Mũhu gua Opu turagu eropa árīniguiguca.
 Árīpehrerā mure eropa umupeoniguicārãcoma, arī
 serēque Goāmure, arī werepu Jesu.

14 “Gajirāre mure erā ñero iirare mua cãdijicũ ĩagu,
 mari Pagu umaro majagu mua ñero iira sãre cãdijigucumi.
 15 Gajirā mure erā ñero iirare mua cãdijibiricũ mari Pagu
 mua ñero iira sãre cãdijisome, arī werepu Jesu.

Goāmure umupeomorã ba duhurire buheñumi Jesu

16 Eropigu ĩgu erāre werenemopu:

—Goāmure umupeomorã ba duhurã bujawererã iro dopa
 ii ĩhmubiricāque. Eropa iima mari pũrupũ ñero iicorerã.
 Erã erã diaporire bujawererã iro dopa āhrama. Erã
 eropárĩcũ erã ba duhucũ ĩha masima masa. Diaye ta mure
 arĩgu iiaa. Masa erāre umupeocũ gahmema erã. Eropirã
 erāre umupeocũ ĩarã mucubirituhama. Eropigu Goāmupũ
 erāre ōaro iisome. Eropirã erã iiro dopa ii ĩhmubiricāque
 mua. 17 Mua sã ba duhurã mua árīniguiro dopa ta árīque.
 Mua ya dipure uyu mera sũcã ōaro wũapocāque. Mua
 diapori sãre coecāque. 18 Mua eropa iicũ mua ba duhucũ
 ĩha masisome masapũ. Goāmũ dihta ĩha masigucumi. Mua
 seyaro mua árĩcũ ĩgũpũ mua mera āhrimi. Eropa ĩagu ĩgu
 mure ōaro iigucumi, arī werepu Jesu.

Umaro majare guñadoreñumi Jesu

Lc 12.33-34

19 Jesu werenemopu daja:

—I yeba majare aĩ gameneobiricāque. Ō maja boa
 waboca. Iri boabiricũ yajari masũ aĩbocumi irire. ĩgu
 yajabiricũ mega tũabocoma. Eropiro i yeba maja dederema
 guhya āhraa. Eropirã i yeba majare bũrigã gamebiricāque.
 20 Umaro majapure turaro gameque mua. Umaro majare
 mega tũamasibeama. Eroque mua opaburi ne boabea.
 Eroguere yajari masũ ne aĩmasibeami. 21 Eroque mua
 opaburi iri árĩcũ, umaro majare Goāmũ yare bũrigã
 guñarãca mua, arī werepu Jesu.

Masa erã pepiro dopa ta iima, arĩ wereñumi Jesu

Lc 11.34-36

²² Eropi buhegu õpa arĩ werenemopu erãre:

—Mua cuiri mua dũpũre sihãgodiru iro dopa ta ãhraa, arĩ werediacy õpa ãhraa. Mua pepiro dopa ta iiaa. Mua õaro mera pepirã árĩrã õarire iiaa. ²³ Mua ñerire pepirã árĩrã ñeri dihtare i mua. Umaro majare mega tũamiaa. Eropirã mua ñeri dihtare mua pepiniguicãcũ iri ñeripu ñetariari ãhraa, arĩ wereru Jesu.

Niyerure gamerã, Goãmũpũre gamebeama, arĩ wereñumi Jesu

Lc 16.13

²⁴ Eropigu igu erãre werenemopu:

—Yujugu Goãmũpũre guñagu niyerupũre guñabeami. Niyerupũre burigã guñagu Goãmũpũre guñabeami. Eropigu niyeru dihtare gamegu árĩgu Goãmũre mucubiricũ iibeami. Goãmũ sãre niyeru sãre peñere gametarimaja masiya mara mũare, arĩ wereru Jesu.

Goãmũ igu porãre ñhadibumi, arĩ wereñumi Jesu

Lc 12.22-31

²⁵ Eropigu erãre werenemopu:

—Eropigu mũare ire arĩgu iiaa. Mua árĩricũre mua barire, ihririre, suhri sãre wũaro guñaricũbiricãque. Mũare deyoro moagu bari dihtare bamorãre, suhri sañamorã dihtare Goãmũ iibiripu mũare. Mua iri dihtare guñacũ gamebeami. ²⁶ Mirimagũ porãre Goãmũ igu ñhadiburire masique mua. Erã poeri moorã ãhrima. Eropiro erã bari dihburi wiri erãre mara. Mari Pagupu erãre erã baburire ohomi. Mirimagũ porã tauro mũapũre mahimi Goãmũ. Eropigu mua sãre ñhadibugũcumĩ igu. ²⁷ Wũaro mua pepiri mera iri mũare pagarã wacũ iibeaa. Eropiro mua wũaro pepiri duhpiburi árĩbeaa.

²⁸ “¿Eropirã duhpirã mua suhri sañaburire wũaro guña bujawere pepicãri? Nũgu maja gori iri gorire pepique. Iri gori ne iiro mariro õari goricũa. Iri gori õari suhri iro dopa õari gori dehyoaa. ²⁹ Salomo opu mũru õari suhri opagu igu árĩquerecũ ta iri goripu igu ya suhri tauro õari gori ãhraa. ³⁰ Iri gorire õari gori iimi Goãmũpu. Iri gori bajamenurigã árĩra puhru ñaidija pehrea wahaa. Mero ãhri, gajinu peamegue soe cóãcãma. Iri eropa mata pehrequerecũ ta iri gori iri õari gori árĩcũ iimi Goãmũ. Eropigu Goãmũ iri gorire igu õari gori igu iidiro tauro mua sãre õaro iigũcumĩ. Suhrire ogũcumĩ. Goãmũre daberogã umupeoa mua. ³¹ Eropirã mua baburire, mua ihriburire, mua suhri sañaburire wũaro guñabiricãque. ³² Goãmũre masibirãpu

irire eropa amaniguicãma. Mari Pagu umaro majagu árĩpehreri mua gamerire masimi. Igũ eropa masicũ mua ya árĩburire wũaro guñabiricãque. ³³ Goãmũ mua Opu igũ árĩborore gamemũhtaque mua. Mua eropa iira puhũ Goãmũpũ mua gameri duhyacũ ogucumi. ³⁴ Eropirã ñamigãre mua dohpa warocuri arĩ wũaro bujawere ne pepibiricãque. Dohpagãre mua ñero tariboro árĩtuhaa. Eropirã dohpagã maja dihtare pepique. Gajinũ majare wũaro bujawere pepinemobiricãque. Goãmũpũ muare itamugucumi, arĩ werepũ Jesu.

7

Gajirãre “Ñerã ãhrima,” arĩbiricãque, arĩ wereñumi Jesu

Lc 6.37-38, 41-42

¹ Eropigu igũ erãre werenemopũ:

—Gajirãre “Ñerã ãhrima,” arĩ erã iirare werewũabiricãque mua. Mua eropa arĩ werewũabiricũ Goãmũ mua sãre “Ñerã ãhrima,” arĩsome. ² Gajirãre “Ōaro iibeama,” mua arĩ pepidiro dopa ta Goãmũpũ mua sãre eropa ta arĩ ñagucumi. Mua gajirãre beyero dopa Goãmũpũ mua sãre eropa ta beyegucumi. ³ Mari werenigu queori mera buhecũ ōpa iirã ãhraa mua. Mua acaweregu igũ cuirugue miri pogañegã mehñajacũ iri pogañegãre ōaro ñhaa mua. Mua ya cuiripũre wũarimiji árĩquerecũ ta irimijire ne pepibeaa mua. Eropirã gajigũre miri pogañegãre mua ñaro dopa ta mua acaweregu igũ ñero iiripũre ōaro ñhaa mua. Mua basi turaro ñerire iiquererã ta irire eropa pepicãa mua. ¿Dohpa árĩronore eropa ãhriri mua? ⁴ Ōpa arĩ wereniguia mua acawererãre: “Acaweregu, ñerire iigũ iica mũhũ. Eropigu irire duhucãque,” arĩ wereniguia mua. Eropa igũre ñerire iidorebiriquererã mua sã ñerire duhubeaa. ¿Duhpirã irire ñerire iinirã árĩquererã ta irire pee masibeari mua? ⁵ Eropa iirã masa erã pũrũpũre ñero iicorerã ãhraa mua. Mua ñero iiripũre duhumũhtaque. Mua eropa iira puhũ mua acawererãre “Mua ñero iirire duhucãque,” arĩ weremasia mua.

⁶ Diayea iro dopa árĩrãre ñetariarãre Goãmũ ya ōatariarire erã umupeobiririre werebiricãque erãre. “Erãgue ñero wereya ñero arĩri,” arĩrã werebiricãque erãre, arĩ werepũ Jesu.

Mari Pagure mari serẽrere wereñumi Jesu

Lc 11.9-13; 6.31

⁷ Eropigu igũ erãre werenemopũ:

—Goãmure mari Pagure serêque mua. Mua eropa serêrã mua aĩrãca. Mua serêrire bocarãca. Goãmure eropa serêniguicãque mua. Mua eropa iicũ ãgu muare ogucumi. ⁸ Árípehrerã Goãmure serêrã aĩrãcoma. Eropirã erã serêrare bocarãcoma. Eropigu árípehrerã Goãmure eropa serêniguicãrãre ãgu erãre ogucumi.

⁹ “¿Mua porã barire muare serêcũ utãyepure obocuri mua erãre? Obiriboya. ¹⁰ ¿Mua porã waire muare serêcũ añapure obocuri mua erãre? Obiriboya mua. ¹¹ Mua ñerã áríquererã ta mua porãre ðarire omasia mua. Eropigu mari Pagu mua tauro ðarire ohomi muare ãgu porãre ãgure mua serêrire.

¹² “Gajirã muare ðaro iicũ gahmea mua. Erãre mua ðaro iicũ gamero dopa ta ðaro iique erã sãre. Erã ðaro iibiriquerecũ ta muarũ erãre ðaro iique. Eropa ta iidorea Moise dorerigue, Goãmũ yare weremuhtanirã erã gojarague sã, arĩ werepũ Jesu.

Miri disiporogã queorire wereñumi Jesu

Lc 13.24

¹³ Eropigu ãgu queorire werenemopũ erãre ðpa arĩgu:

—Goãmũ pohrogue wadiarã ãgu yare iiro gahmea muare. Eropirã ãgu yare eropa iimaabiricãro gahmea. Miri disiporogãgue mua wadiacũ diasa ãhraa. Eropiro diasa ãhraa Goãmũ pohrogue mua wadiacũ. Peamegue masa erã wacũ diasabeaa. Wuarĩ disiporogue mari ñajacũ diasabeaa. Iri disiporogue ta masa erã ñajaboro dopa ta peamegue masa erã wacũ diasabeaa. Eropirã masa bajarã erogue warã iima. ¹⁴ Goãmũ pohrogue wadiacũ diasa ãhraa. Bajamerãgã masa erogue warãcoma. Erogue warã umuri nucũ Goãmũ mera árniguirãcoma, arĩ werepũ Jesu.

Yucũgu ducare masirã dipagũ sãre masiro dopa ta masa erã iirire ãarã erã árnícũrre masia mari, arĩ wereñumi Jesu

Lc 6.43-44

¹⁵ Eropigu ãgu werenemopũ erãre:

—Õaro pee masique. “Goãmũ yare weremuhtarã ãhraa,” arĩ gũyarãre peebiricãque mua. Erã ðarire iirã iro dopa aririma mua pohrogue. Erã pepirigue ñerã ãhrima erã. ¹⁶ Erã ñero iicũ ãarã ñerã erã árnícũ masirãca mua. Erã ðaro iicũ ãarã, ðarã erã árnícũ masirãca mua. Aña poragũ dipatõrre ducacũbeaa. Poracudigu sã higuera dipure ducacũbeaa. ¹⁷ Õadigu yucũgu ðarire ducacũca. Ñedigupũ ñerire ducacũca. ¹⁸ Yucũgu ðadigu ñerire ne ducacũmasibirica. Eropiro ñedigu sã ðarire ducacũmasibirica. ¹⁹ Õarire ducacũbiriri yucure pa cóãcã, peamegue soecãma. Eropa ta iigucumi Goãmũ ãgu gamerire

iibiräre. ²⁰ Eropirã “Goãmũ yare weremũhtarã ähraa,” arĩrã erã gũyacũ õpa masirãca. Erã iiricũrire ãaque. Erã õarire iirã árĩcũ ãha “Goãmũ ya wereniguirã ta ährima,” arĩ ãha masirãca. Erã ñerire iirã árĩcũ ãha “Goãmũ ya wereniguirã árĩbeama. Eropirã gũyarã ährima,” arĩ ãha masirãca, arĩ wererũ Jesu.

“Mũare ne masibeaã,” arĩgũca yũhũ bajarã masare, arĩ wereñumi Jesu

Lc 13.25-27

²¹ Eropigũ ãgũ erãre werenemopũ:

—Bajarã yũre “Yũ tĩgũ,” arĩrã árĩquererã ta umaro majagũ Goãmũ ãgũ árĩroguere wasome erã. Yũ Pagũ umaro majagũ ãgũ gamerire iirã dihta ãgũ opũ árĩroguere warãcoma. ²² Pehrerinũ árĩcũ bajarã masa õpa arĩrãcoma yũre: “Gũã tĩgũ, mũ yare gũã buheabũ. Mũ waĩ mera pũririre, watẽare cóãbũ. Eropirã mũ turari mera baja deyoro moarire iiabũ gũã,” yũre arĩrãcoma. ²³ Erã eropa arĩquerecũ õpa arĩ yũhrigũca erãre: “Mũare ne masibeaã. Ñerire iirã ähraa mũã. Yũ pohro aribircãque,” arĩgũca yũhũ erãre. Eropirã Goãmũ gamerire iique yũ pohro aridiarã, arĩ wererũ Jesu.

Pe wihi iira queorire wereñumi Jesu

Lc 6.47-49; Mr 1.22

²⁴ Eropigũ queori mera wererũ Jesu erãre buhegũ:

—Eropi árĩpehrerã i yũ wereniguirire peenirã yũ dorerire iirã, õaro pee masigũ wihi iidigũ iro dopa ährima erã. ãgũ ãhcãri goberire seha, wihire nugunũgapũ. ²⁵ ãgũ wihire ãgũ tuhajara pũhrũ deco bũrigã ahri, dia miritaria wayoro. Miruñe bũrigã weãyoro. Eropa waquerecũ ta iri wihi ãhcãro ãgũ nugura wihi árĩro ne mihrua dijabiriyoro. ²⁶ Eropirã árĩpehrerã yũ wereniguirire peenirã árĩquererã ta yũ dorerire iibirãpũ pee masibigũ ãgũ wihi iigũ iro dopa ährima. ãgũpũ ãgũ wihire dia tũro maja imiporo weca nugu, õaro iibiripũ. ²⁷ ãgũ wihire tuhajara pũhrũ, deco bũrigã ahri, dia miritaria waha, miruñe bũrigã weãyoro. Eropa weãro iri wihire weã mehpicãyoro, arĩ wererũ Jesu.

²⁸⁻²⁹ ãgũ eropa arĩ buhecũ peerã, peemaria wañorã masa. “ãgũ marire opũ ãgũ buhero dopa ta buhemi ãgũ. Marire buherã iro dopa buhebeami,” arĩ pepiñorã erã.

8

Jesu camĩ boagũre õagũ wacũ iĩñumi

Mr 1.40-45; Lc 5.12-16

¹ Jesu utāgugue buhe doadigu dijaa wapũ. Īgũ dijacũ ĩarã masa bajarã ĩgũre nurusiañorã. ² Ero ĩgũ wadiro yujugũ cami boagũ mague ĩgũre nurusiaja eja, mereja, ĩgũre serẽpũ.

—Gua tĩgũ, mũhũ yũre ðagũ iidiagu iique, arĩpũ.

³ Īgũ eroparĩcũ peegũ ĩgũ mojoto mera Jesu ĩgũre mohmeripũ.

—Áũ, mũre ðagũ wacũ iiaa, arĩpũ Jesu ĩgũre.

Īgũ eroparĩcũ ta iri cami boara yarima wayoro. ⁴ Eropa iituhaja Jesu ĩgũre arĩpũ daja:

—Yũhũ mũre ðpa iirare ne gajirãre werebircãque. Mũ ya dũpũre ðarare pahire ĩhmugũ waque, “Õaro ãhrimi,” arĩdoregũ. Tuhajanugu Moise dorerire Goãmũ ĩgũ apidiro dopa ta iique. Eropigũ Goãmũ ya wihigue mirimagũre asũ wahgã apique mũ dore tarirare masa árĩpehrerã erã masimaja ðaro, arĩpũ Jesu.

Surara opũ ĩgũ pohro majagũ dorecũcũ Jesu ðagũ iĩñumi ĩgũre

Lc 7.1-10

⁵ Ero pũhrũ Jesu Capernaum waĩcũri macague ĩgũ ejacũ surara opũ ĩgũ pohro eja, ĩgũre turaro ðpa arĩ serẽpũ:

⁶ —Gua tĩgũ, yũ pohro majagũ ne buhari mera dorecũgũ wamasibirinijagũ, ĩgũre burigã pũricũ pepigũ yaha wihigue oyacumi ĩgũ, arĩpũ ĩgũ Jesure.

⁷ Īgũ eroparĩcũ pee:

—Áũ, arĩ, ĩgũre ĩgũ dorecũrĩre taugũ wagũra, arĩpũ Jesu.

Īgũ eroparĩcũ ðpa arĩpũ surara opũ:

⁸⁻⁹ —Opũ, ðaroca. Aribita. Ñegũ ãhraa yũhũ. Yaha wihire mũre ñajaridorebuno árĩbeaa yũhũ. Yuju diaye ta mũ turari mera dorebeoque. Mũ eropa iicũ yũ pohro majagũ ðagũ wagũcumi. Yũre yũ weca árĩrã gajirã oparã dorema. Yũ sã surarapũre dorea. Yujugũre “Waque,” yũ arĩcũ ĩgũ wahami. Gajigũre “Arique,” yũ arĩcũ ahrimi. Yũ pohro majagũre “Ire iique,” yũ arĩcũ irire iimi. Eropigũ mũ ĩgũre mũ dorero dopa ta ĩgũ dorecũgũ tarigũcumi, arĩpũ ĩgũ.

¹⁰ Jesu ĩgũ eroparĩcũ pee uca wa bajarã masa ĩgũ mera nurusiarãre ðpa arĩpũ:

—Diaye ta mũare arĩgũ iiaa. Ihĩ surara opũ Israe masũ árĩbiriqũregũ Goãmũre burigã umupeomi. Īgũ pohro majagũre yũ ðagũ wacũ iiburire masituhami. Ne Israe masare ihĩ iro dopa umupeorãre ĩanibea. ¹¹ Mũare arĩgũ iiaa. Bajarã ihĩ iro dopa árĩrã árĩpehrero majarã umaro majagũ ĩgũ opũ árĩroque eja, erogũe árĩrã mera barãcoma. Mũa

ñecũ sũmarã mura Abrahã, Isaa, Jacobo mera barãcoma erã. ¹² Masa gajirãpũ “Opũ ãgũ árĩrogue wamorã ãhraa gũa,” erã arĩquerecũ ta ñerogue naitĩarogue cóãgãgũcumĩ erãre. Erogue ãgũ cóãnirã burigã ore, bujawereri mera erã gũcũrire cũridihurãcoma, arĩ werẽpũ Jesu.

¹³ Irire eropa arĩtuhaja surara opũre arĩpũ:

—Dujaaque mũ ya wihigue. Mũ pohro majagu tarigũcumĩ. “Diaye ta tarigũcumĩ,” arĩ mũ pepidiro dopa ta tarigũcumĩ, arĩpũ Jesu.

Ãgũ eroparĩcũ ta ãgũ pohro majagu pũ õha warũ.

Pedro mũñecore dorecũgore tauñumi Jesu

Mr 1.29-31; Lc 4.38-39

¹⁴ Pũhrũ Jesu Pedro ya wihigue eja, Pedro mũñeco dorecũcũ ãpũ ãgũ. Nimacũri árĩcũ oyapo igo. ¹⁵ Igo eropa dorecũcũ ãanijagu igo mojtore mohmẽpĩpũ. ãgũ eropa mohmẽpicũ ta nimacũri taria wayoro. Taricũ pepigo igopũ wahgã, erãre barire ejopo.

Jesu bajarã dorecũrãre tauñumi

Mr 1.32-34; Lc 4.40-41

¹⁶ Eropi ñamicague bajarã watẽa ñajasũnirãre masa aĩ ejañorã Jesu pohrogue. Erã eropa aĩ ejacũ ãagũ mata ãgũ watẽare cóãcũ masa õha wañorã. Eropigu árĩpehrerãre dorecũrãre erã aĩ ejanirãre taupehocãpũ Jesu. ¹⁷ Eropa ta iipũ ãgũ iribojegue majagu Goãmũ yare weremũhtadigu Isaia ãgũ arĩdiro dopa ta. Õpa arĩ gojañumi: “Mari dorecũrire taucãmi ãgũ. Marire pũririre cohãmi ãgũ,” arĩ gojañumi Isaia Jesu ariboro coregue.

Yujurãyeri Jesu mera majarã árĩdiariñuma

Lc 9.57-62

¹⁸ Jesu masa bajarã ãgũ pohro árĩcũ ãagũ,

—Wũariya gajipũ masegue ina taribujarã, arĩpũ ãgũ buherãre. ¹⁹ Erã taribujaboro core judio masare buhegu Jesu pohrogue eja, õpa arĩpũ:

—Buhegu, mũ mera wadiaa noho mũ waro, arĩpũ.

²⁰ Jesu õpa arĩ yũhrĩpũ:

—Yũ mera árĩcũ diasã ãhraa. Nũgu majarã diayea erã carĩburi toreri opama. Mirimagũ porã sã erã ya suhri opama. Yũpũre Goãmũ ãgũ obeodigũpũre ne yaha wihi mara. Eropirã yũ mera árĩrã ñero tarirãca mũa, arĩ yũhrĩpũ Jesu.

²¹ Eropi gajigu Jesu buhegu õpa arĩpũ:

—Gũa opũ, yũ pagũ ãgũ sĩricũ yaatuhajagu mũ mera wagũra, arĩpũ ãgũ Jesure.

²² Jesu yũhrĩpũ:

—Yure gamebirã sîrinirã iro dopa ta âhrima. Erãpu sîrinirãre yaaporo. Eropigu mapu yu mera majagu árîbu arique dohparagã, arîpu îgu.

Jesu miruñere yusudoreñumi

Mr 4.35-41; Lc 8.22-25

²³ Eropa arîtuhaja dohodirugue ñajapu. Eropirã îgu buherã sã îgu mera waha ñajañorã. ²⁴ Ero erã taribujarisubu iriyague miruñe bariğã ariyoro. Eropiro pãgúri dohodirure miucãriyoro. Eropa miruñe weãquerecũ ta Jesupu carîgu iipu. ²⁵ Eropa wacũ ñarã erã îgure wahgũñorã. Wahgũ òpa arîñorã:

—Opu, mirimorã iica mari. Miruñere tauque, arîñorã.

²⁶ Erã eroparîcũ Jesu yuhripu:

—¿Duhpirã güimaacãri mua? Yure merogã umupeorã âhraa mua, arîpu Jesu erãre.

Eropa arîgu ta wahgãnugaja miruñere pãgúri sãre “Yusaque,” arîpu. Îgu eroparîcũ miruñe, pãgúri sã yusudijapehrea wayoro. ²⁷ Îgu eropa iicũ ñha uca, òpa arî wereniguiñorã erã basi.

—¿Ñehmuno masu âhriri ihî? I miruñe, pãgúri sã yuhrisũgu âhrimi, arîñorã erã.

Watëa ñajasûnirãre tauñumi Jesu

Mr 5.1-20; Lc 8.26-39

²⁸ Erãre eropa wara puhru taribujaja, Gerasa majarã ya yebague eja pu. Eroque erã ejacũ perã uma Jesure bocatîriñorã. Masa goberi watopegue árîñirã árîñorã. Erã watëa ñajasûnirã árîrã gorowererã guhyarã árîñorã. Eropirã erogue masa ne wabiriñorã. ²⁹ Îgure bocatîri òpa arî gaguiniguiñorã:

—¿Muhu Goãmuhu magu duhpihu ahrihi muhu guã pohroguere? ¿Guare Goãmuhu dorero ejabiriquerecũ ta dipuwaja moagu ahrihi muhu? arî gaguiniguiñorã erã watëa mera.

³⁰ Ero pohro bajarã yesea ahma barã iñorã. ³¹ Erãre ñanjarã, watëapu òpa arî bariğã serëñorã Jesure:

—Guare oã umare cóãgu soã yesea pohroque wadoreque guare. Erã mera guare árîdoreque, arî serëñorã erã Jesure.

³² —Áu, waque, arîpu Jesu.

Îgu eroparîcũ watëa perã masa mera árîñirã waha, yesea pohroque ejañorã. Erãre ñajacũ ta yesea gorowere, dipaturague oma buha, wariyague yuriñaja yuhria, miri sîripehrea wañorã.

33 Erã eropa wacũ ãarã yeseare ãhadiburãpũ gũi, omagã wañorã. Macague eja yesea erã mirirare were-siripehocãñorã erã. Watẽa erã ñajasũnirãre Jesu ãgu cóãra sãre werepehocãñorã erã. 34 Erã eropa weresirira pũhrũ iri maca majarã árípehrerã Jesure ãarã ejañorã. Eropirã ãgure ãara pũhrũ turaro mera wiriadoreñorã ãgure erã ya yebare.

9

Dũpũ bũhadigure ðagũ wacũ iĩñumi Jesu

Mr 2.1-12; Lc 5.17-26

1 Erã eropa wadorera pũhrũ Jesu dohodirugue ñaja, wũariyague taribujaa, ãgu ya macague eja. 2 Erogue gajirã dũpũ bũhadigure pũgu mera coã ãi wahgã erañorã Jesu pohro. “Jesu ãre ãgu dorecũrire taricũ iigũcumĩ,” arĩ pepiñorã erã. Erã eropa arĩ pepicũ masigu Jesu dorecũgure ðpa arĩpũ:

—Mucubirique mũhũ. Mũ ñero iirare cóãtuhabũ yũhũ, arĩpũ ãgu.

3 ãgu eroparĩcũ peerã yujurãyeri masare buherã ðpa arĩ pepiriñorã erã basi: “Ihĩ eropa arĩ ãgu wereniguiiri mera Goãmũre ñero arĩgu iimi,” arĩ pepiñorã erã buherã. 4 Erã eropa arĩ pepicũ masigu, ðpa arĩpũ Jesupũ:

—¿Duhpirã eropa arĩ ñero pepiri mũa? 5 “Mũ ñero iirare cóãbũ,” yũ arĩcũ “Gũyagu ãhrimi,” arãa mũa masibiriquererã ta. ãgure “Wahgãñugajaque. Curique,” yũ arĩcũ yũ arĩra diaye arĩri arĩcũ mata mũa ãha masirãca. 6 Yũhũ masũ Goãmũ ãgu obeodigu i yeba majarã erã ñero iirire cóãmasia yũhũ. Mũa ire masiborore ðpa ta ãgu wahgãñugacũ iigũra, arĩpũ Jesu.

Eropa arĩtuhaja dũpũ bũhadigure ðpa arĩpũ:

—Wahgãñugajaque. Mũ pũgure ãi, mũ ya wihigue dujaaque, arĩpũ ãgure.

7 ãgu eroparĩcũ ta peegu dũpũ bũhadigu wahgãñugaja, ãgu ya wihigue dujaa wapũ. 8 Masa ãgu eropa wacũ ãarã gũiñorã. Eropirã Jesure Goãmũ ãgu turarire opacũ ãarã Goãmũre umuipo, ðaro wereniguiñorã.

Jesu Mateore sihuñumi

Mr 2.13-17; Lc 5.27-32

9 Erã eropa iira pũhrũ Jesu erogue áridigu wiria, yũre Mateore bocatĩrimi. Oparã ya áriburire masare wajasea coregu áribũ. Eropigu irisubure yũ mohmeri taribugue doabũ. Ero yũ doacũ ãagu, ðpa arĩmi yũre:

—Yũ mera majagu áribũ arique, arĩmi yũre Jesu.

ãgu eroparĩcũ pee, wahgãñugaja ãgu mera wabũ.

10 Puhru yaha wihigue Jesu sã barã erama. Bajarã wajasea corerã “ñero iirã” erã arĩrã gua mera ta bama. 11 Erã mera gua bacũ ĩarã, fariseo masa Jesu buherãre õpa arĩma:

—¿Duhpigũ muare buhegu wajasea corerã ñero iirã mera bahari? arĩma erã guare ĩgu buherãre.

12-13 Erã eroparĩcũ peegu Jesupũ õpa queori mera yuhrimi:

—Dorecubirã duhturure amabeama. Dorecũrã dihta duhturure ahmama. Dorecũrã duhturu amaro dopa ta “Ñerã ãhraa,” arĩrã yũre amarãcoma. Eropigu “Ñerã ãhraa,” arĩrã dihtare erã ñero iirare bujaweredore õaripũre gohroto-cũ iigu aribũ yũhũ. Erã basi “Õarã ãhraa gua,” arĩ pepirãre itamugũ aribiribũ. Goãmũ ĩgu arĩrãre erã arĩ gojarare masique mũa. “Waimũrãre wejẽ soemujurã yũre eropa umupeocũ ne gamebeaa. Gajirãre mũa mojomoro ĩacũpũre gahmea,” arĩmi Goãmũ, arĩ gojañumi. I eropa arĩrãre masique mũa. Irire õaro buhenemorã waque, arĩmi Jesu fariseo masare.

Ba duhurire serẽpiñuma Ñu buherã Jesure

Mr 2.18-22; Lc 5.33-39

14 Puhru Ñu waĩyegu ĩgu buherã gua pohro eja Jesure serẽpima:

—Gua Ñu buherãpũ bajasuburi Goãmũ ya árĩburire iirã ba duhua. Fariseo masa sã eropa ta ba duhuma. ¿Duhpirã mũa buherãpũ ba duhubeari? arĩma erã Jesure.

15 Jesu erãre õpa arĩ yuhrimi:

—Õpa ãhraa iri: Mojoto diridigu ĩgu bosenu iicũ ĩgu mera majarã bujowererã ba duhurã árĩbeama. ĩgu mera árĩrã mucubiri barã iima. Eropa ta yũ buherã sã yũ mera árĩrã ba duhumasibeama. Yujunũ yũre Goãmũ aĩcãgucumi. Eropa ĩgu yũre aĩra puhru yũ buherã mera árĩsome yũhũ. Irisubugue ta yũ buherã ba duhurãcoma, arĩ yuhrimi Jesu.

16 Erã iribojegue maja buheri mama buheri mera erã peñe buhemorediacũ ĩagu õpa arĩ werenemomi Jesu erãre:

—Ne mama gasiro suhri gasiro mera murañe suhrirore seretu masiya mara. Eropa seretura puhru mama gasiro mari coecũ mura suhriro arĩro yehguea wa daja, tara gameneo, wũatariaro yehgueacũ iiaa. Eropa ta mura buheri mama buheri mera wapi moa buhebircãro gahmea. 17 Eropirã ne igui deco imisĩri decore waibugũ gasiro ajuro mura ajuro mera diyebircãro gahmea. Eropiicũ igui deco imisĩri pahmura puhru mura ajurore yeguedija wahaa. Iri ajuro yehgucũ igui deco sã, ajuro sã cohmoa wahaa.

Eropirã igui deco waibuꝑu gasiro mama ajuro mera diyero gahmea. Eropiicũ igui deco pahmuro ðaro iri ajuro sêraa. Eropa ta mama buheri mura buheri mera buhebiriçãro gahmea, arĩ weremi Jesu erãre.

Jairo magore ðago ii, behreri opaniguigo sãre ðago wacũ iĩnumi Jesu

Mr 5.21-43; Lc 8.40-56

18 Īꝑu eropa arĩ wererisubu ꝑua judio masa buheri wihi opu Jesu pohrogue erami. Eraa, mereja, ðpa arĩmi:

—Yũ mago negãꝑue sĩria wahãmo. Igore ma mojtore duhpeoꝑu arique. Ma eropa iicũ masagocumo, arĩmi ĩꝑu Jesure.

19 Īꝑu eroparĩcũ peeꝑu Jesu wahgãnuꝑaja, ĩꝑu mera wami. ꝑua ĩꝑu buherã sã ĩꝑu mera wabu. 20 ꝑua erogue waniguicũ ero nomeo Jesu ꝑurꝑu eja, ĩꝑu suhriro ojogorore mohmepiñamo. Doce bojori gohra umuri nãcu behreniguigo árĩpo. 21 Òpa arĩ pepipo igo eropa iigo: “Īꝑu suhriro dihtare mohmepiñago ðago dujagoca yũhũ,” arĩ pepipo igo. Eropigo igo mohmepicũ mata igo di wirira purumujuyoro. 22 Igo eropa iicũ masigu Jesu majinuꝑaja, igore arĩmi:

—Mucubirique mũhũ. Mũhũ yãre umupeori mera ðago dujaa, arĩmi ĩꝑu.

Īꝑu eroparĩcũ ta ðha wamo igo.

23 Eropa iituhaja Jesu ꝑua mera opu ya wihigue ejami sĩridigo pohro. Ñajajagũ bajarã masa i wihigue árĩrã turaro busucũ ĩami. Gajirã ñehamere orerãre gaguiniguirãre ĩami. Gajirã igogãre yaaboro core tarisu iro dopa árĩrire purirãre ĩami. 24 Erã eropa iicũ ĩagũ masare ðpa arĩmi:

—Wiriaque mũa. Sĩribeamo igo. Carĩgo iimo, arĩmi erãre.

Īꝑu eroparĩcũ peerã, “Eroparĩcãꝑu iimi ihĩ,” arĩrã masa ĩayema ĩꝑure. 25 Īꝑurũ erãre disiporogue wiupehocãmi. Tuhajanugu sĩridigo pohrogue eja, igo mojtore ñeapũ. Īꝑu eropa ñeañacũ ta masa bejaja, wahgãnuꝑajapo igo. 26 Īꝑu eropa iirare peerã, ero majarã masa árĩpehrerã masa werewuãñorã.

Perã cuiiri ĩhajabirãre ĩacũ iĩnumi Jesu

27 Ero árĩnirã ꝑua Jesu mera wacũ, perã cuiiri ĩhajabirã ĩꝑare piyu nũrusiama:

—Opũ Davi pãrami masare taugũ, ꝑuare mojomoro ĩaque mũhũ, arĩ gaguiniguima erã.

28 Erã eroparĩcũ Jesu gaji wihigue ñajami. Īgũ eropa ñajacũ masirã cuiri ĩhajabirã ĩgũ pohrogue ñaja wama. Erã eropa ñajacũ ĩagũ ĩgũpũ erãre serẽpimi:

—¿Marire ĩacũ iigũcumi ĩgũ, arĩ pepiri mũa yũre? arĩmi ĩgũ.

—Opũ, eropa ta arĩ pepia gũa, arĩ yũhriima erã.

29 Erã eropa yũhricũ ta erã cuirire ñapeomi. Ñapeogũ, õpa arĩmi:

—Yũre “Eropa iigũcumi,” mũa arĩ pepidiro dopa ta eropa ta iigũra, arĩmi Jesu.

30 Īgũ eroparĩcũ ta erã cuiri õha wabũ. Eropi Jesu õpa arĩmi erãre:

—I yũ õpa iirare gajirãre ne werebircãque, arĩrimi Jesu.

31 Īgũ eropa arĩquerecũ ta waha, i yeba majarãre weresirĩnirã árĩma ĩgũ eropa iirare erã.

Wereniguimasibigure wereniguicũ iĩñumi Jesu

32 Iri wihire erã cuiri õha wanirã wiriarisubu gohra yu-jugũ wereniguimasibigure aĩgãrima Jesu pohro masa. Watĩ ĩgũre ñajasũdigũ ĩgũre wereniguimasibircũ iidi árĩmi.

33 Erã aĩ ejacũ ĩagũ watĩre Jesu cóãmi. Īgũ eropa watĩre cóãcũ wereniguimasibiridigũpũ wereniguia wami. Īgũ eropa iicũ ĩarã árĩpehrerã ĩhamaria wama.

—Ne i yeba Israe yebaguere õpa iirãre ĩabirimũrabũ mari, arĩ wereniguima masa erã basi.

34 Fariseo masa gajiropa arĩ wereniguima:

—Watẽa opũ ĩgũ turari mera watẽare cohãmi ihĩ, arĩ wereniguima erã.

Masare mojomoro ĩañumi Jesu

35 Eropi árĩpehreri macari ero árĩri macarire, paga macari sãre buhe curigũ wami Jesu gũa mera. Õari buherire erã buheri wirigue buhegũ wami ĩgũ. Eropigũ Goãmũ ĩgũ opũ árĩborore weremi. Árĩpehreri dorecuri sãre ero majarãre taumi ĩgũ. 36 Erã masa bajarã ñero tarirã, itamuri moorã, oveja dibuya marirã iro dopa erã árĩcũ ĩapũ Jesu erãre. Eropa ĩagũ Jesu erãre mojomoro ĩami. 37 Eropigũ õpa arĩmi ĩgũ gũare ĩgũ buherãre:

—Ojodũca baja iri bugatuhajacũ baja árĩcũ mohmeri wũaro ãhraa. Mohmeri masapũ bajamerãgã ãhriima. Eropa ta õari buherire peemorã bajarã árĩcũ wũaro ãhraa mari mohmeri. Iri eropa arĩquerecũ ta mari masare buhemorã bajamerãgã ãhraa. 38 Eropirã õari buherire buhemorãre gajirãre ĩgũ obeomorãre serẽque Goãmũre mũa, arĩmi Jesu gũare.

10

Jesu doce gohra beyeñumi ïgu buhedoregu obeomorãre
Mr 3.13-19; Lc 6.12-16

¹ Puhru doce guare ïgu buherãre Jesu sihubeo, turarire omi guare. Watẽare gua cóãmasiburire, árïpehreri dorere gua taumasiburire omi guare.

² Õpa waïcwrã árïbu gua Jesu ïgu apinirã: Simo árïmi. ïgure ta Pedro arï piyumi Jesu. Simo pagu magu Andre árïmi. Santiago ïgu pagu magu Ñu mera árïmi. Erã pagu Zebedeo waïcumi. ³ Felipe, Bartolomé, Toma, yuhũ Mateo árïbu gua. Yurũ oparã ya árïburire masare wajaseabasa coredigu árïribũ. Gua mera gajigu Santiago árïmi. ïgu Alfeo magu árïmi. Eropigu Lebéo sã árïmi. ïguru Tadeo erã arï piyudigu árïmi ïgu. ⁴ Simo celote ya curu majagu, Juda Iscariote sã árïma. Judaru Jesure ïhaturirãre ïhmubu árïmi.

Jesu ïgu buherãre buhedoregu obeoñumi
Mr 6.7-13; Lc 9.1-6

⁵ Eropi guare ïgu buherãre docere obeogu, "Õpa iique," arï wereseremi guare:

—Judio masa árïbirã pohroguere wabiricãque. Ne Samaria yeba maja macarigue sãre wabiricãque. ⁶ Israe yeba majarã pohroguere waque. Goãmure masibirã àhrima erã. ⁷ "Ûmaro majagu opu árïboro merogã duhyaa," arï buheque erãre. ⁸ Eropirã cami boarãre, gaji baja gajiropa árïri dore oparã sãre òarã wacũ iique. Sïrinirãre masuque. Watẽa ñajasünirãre cohã wiuque erã watẽare. Mũare iri turarire ogu iiaa. Eropirã mua sã yu eropa odio dopa ta masare wajasearo mariro òarã wacũ eropa iicãque.

⁹ "Mua warã ne niyerure aïbiricãque. ¹⁰ Ne mua ajure, ne peñe camisare, ne peba zapatari sãre aïgãbiricãque. Mua buheroguere ero majarãru mũare barire oporo.

¹¹ "Iri macariguere ejarã, mua carïborore masa òaro umupeogu pohroguere amaque. Eropirã ïgu ya wihi ta dujanique. Ne warãque wiriaque iri wihire. ¹² Eropirã wihigue ñajarã "Àhriri," arïque iri wihi majarãre. ¹³ Mũare erã gamecũ, "Goãmũ mera òaro arïque mua," arïque erãre. Mũare erã gamebiricũ, "Goãmũ mera òaro arïque," mua arïbiricãque erãre. ¹⁴ Eropirã mũare erã gamebiricũ, erã mua buherire peediabiricũ ïarã iri wihire wiria waque. Eropa wiriarã, guburi maja nicure moje siripique erã ïaro, erã ya dipuwajare ïhmumorã. Iri maca majarã mũare gamebiricũ eropa ta iique erã sãre. ¹⁵ Diaye ta mũare arïgu

tiiaa. I umu pehrecũguere Sodoma majarã Gomorra majarã mura burigã dipuwajacurãcoma. Erã eropa dipuwajacuro tauro mware gamebirãpu dipuwajacurãcoma. arĩ weremi Jesu guare.

Jesu yarãre gajirã erã ñero iiborore wereñumi Jesu

Eropa arĩtuha õpa arĩnemomi guare igu buherãre:

¹⁶ —Yure peeque mua. Oveja iro dopa arĩrãre mware yeea guarã iro dopa ta ñerã arĩrã watopegue obeogu iiaa. Eropirã mwaru õaro pee masirã arĩque. Eropirã gariboro mariro õaro arĩque erã mera. ¹⁷ Õaro iique mua. Masa mware erã oparãre orãcoma mware dipuwaja moadorerã. Erã buheri wirigue sãre parãcoma mware. ¹⁸ Eropirã mua yaharã mua arĩri dipuwaja macari majarã oparã pohrogue erã tauro oparã pohrogue sãre aĩgãrãcoma mware dipuwaja moadoremorã. Eropirã mware erogue erã aĩgãcũ judio masa arĩbirã oparã sãre õari buherire wererãca mua. ¹⁹⁻²⁰ Mware oparã pohrogue erã aĩgãcũ erãre mua wereniguiburire wvaro pepibircãque. Mware erã serẽpicũ ta mua erãre yuhriburire masirãca Goãmu mera. Eropa masirã mua irire mua gamero wereniguisome. Goãmuru mari Pagu igu Espiritu Santo mera mware wereniguicũ iigucumi.

²¹ “Irisubure erã tĩrã erã pagu porã Jesu yarã arĩcũ ãha wejẽdore wiarãcoma oparãre. Erã pagu sumarã erã porã Jesu yarã erã arĩcũ ãha wejẽdore wiarãcoma oparãre. Erã porãpu erã pagu sumarã erã Jesu yarã erã arĩcũ ãha wejẽdore wiarãcoma oparãre. ²² Eropirã masa arĩpehrerã yure mua umupeora dipuwaja ãhaturirãcoma mware. Erã mware erã ñero iiquerecũ ta mware erã ñero iirare yujuro bojerã yure duhubircũ Goãmũ mware taugucumi. Eropigu igu pohrogue mware opagucumi. ²³ Yuju maca mware erã ñero iicũ gaji macague duhri wahgãque. Diaye ta mware arĩgu tiiaa. Israe yeba arĩri macarire mua buhepehoboro core, yuhu masu Goãmũ igu obeodigu i yebague dujarigura.

²⁴ “Buherã erãre buhegure masi taribeama. Eropigu pohro majagu sã igu opu weca arĩbeamĩ. ²⁵ Yujugu buhegure igure weredigu iro dopa dujaro gahmemi igu. Pohro majagu sãre igu opu iro dopa ta dujami. Mwaru yu buherã ãhraa. Eropirã yure iidiro dopa ta mua sãre iirãcoma. Eropirã yure “Watĩ Beelzebú ãhrimi,” arĩ weresãrã, mua sãre yaharãre ñero arĩ wereniguirãcoma erã, arĩ weremi Jesu guare.

¿Nihinore güicũ õhari? arĩ wereñumi Jesu

Lc 12.2-7

²⁶ Eropa arīra pūhrū Jesu ōpa arīnemomi guare:

—Eropirā mūare erā ñero iidiarāre güibiricāque. Masa erā yayasārare pūhrū gajirā masirācoma. Erā dibura sāre gajirā masirācoma. ²⁷ Eropirā mūare yayarogā yū wererare bajarā masa watope wereturiaque mūapū. ²⁸ Mūare wejērā mūa dūpū dihtare wejēmasima. Mūa sīporāpū sīrībeaa. Eropirā mūare wejēdiarāre güibiricāque. Goāmūpūre güique. Īgū mūa dūpū mūa sīporāri sāre peamegue dedeomasimi mūare. Eropirā Īgūpūre güique.

²⁹ “Perā mirua wajamarīma. Erā eropa wajamariquerēcū ta Goāmū ōaro mahi ĩhadibumi erāgāre. Goāmū dorebiricū ne sīrībeami yujugūgā. ³⁰ Eropigū mūa poarire ne yuju poadagā dūhyaro mariro masipehomi Goāmū. Eropa ta mūa árīricūri sāre masipehomi Goāmū. Eropa masigū mūare ĩhadibuniguicāmi. ³¹ Miruare ĩgū ĩhadiburo tauro mūapūre ĩhadibumi Goāmū. Eropirā wūaro bujawere guñaricūbiricāque mūa, arī weremi Jesu.

Jesure mūa umupeorire wereque masare, arī wereñumi

Lc 12.8-9

³² Eropigū gūa sāre werenemomi:

—Yujugū “Jesucristo yagū āhraa,” masare ĩgū arī werecū yū sā ĩgūre “Yahagū āhrimi,” arī weregūra yū Pagū umaro majagūguere. ³³ Yujugū masare güigū “Jesucristo yagū árībeaa,” masare ĩgū arī werecū yū sā “Yahagū árībeami ĩgū,” arī weregūra yū Pagūguere umaro majagūguere, arī weremi Jesu.

Jesu yū buhecū masa erā basi game dūca warirācoma, arī wereñumi

Lc 12.51-53; 14.26-27

³⁴ Eropa arītuhaja ōpa werenemomi masare:

—¿Dohpa arī pepiri mūa yūre? ¿Yūhū masare yū buhegu aricū yū buheri mera masa ĩhaturisome, arī pepiri mūa? Eropa árībeaa. Masa yū buherire peerā pe curu erā basi dūca warirācoma. Yujurāyeri yū buherire peerācoma. Gajirāpū irire gamebirā erāre ĩhaturirācoma. Eropirā yujuro mera árīsome masa. ³⁵ Mūrā yū buherire erā peera dipuwaja erā porā erāre ĩhaturirācoma. Mūrā nome erā yū buherire peera dipuwaja erā porā nome erāre ĩhaturirācoma. Erā mūñecosā nome yū buherire erā peera dipuwaja erā beposā nome erāre ĩhaturirācoma. ³⁶ Eropirā masa erā acawererāre yū buherire peecū ĩarā erāre ĩhaturirā árīrācoma.

³⁷ “Yūre erā mahibodiro tauro erā pagū sūmarāpūre mahitarinūgarā yaharā árīsome erā. Yūre erā mahiborono tauro erā porāpūre mahitarinūgarā yaharā árīsome erā.

³⁸ Eropirã crusague yu sîridiro dopa ta yaharã erã árîra waja ñero tarirãcoma erã sã. Eropa ñero taridiabirã yaharã árîsome. ³⁹ Masa yure guñaro mariro erã gamero iirã peamegue warãcoma erã. Yaha árîburipure erã guñarã árîpehrerinuri Goãmũ mera õaro árînguicãrãcoma, arî weremi Jesu.

Mari wajataburire wereñumi Jesu

Mr 9.41

⁴⁰ Eropa arîtuhaja õpa werenemomi gua sãre:

—Mũare yaharãre yujugu õaro mera bocatîrigu, yu sãre bocatîrigu iimi îgu. Eropigu yure õaro bocatîrigu yure obeodigu sãre bocatîrigu iimi. ⁴¹ Eropigu Goãmũ yare weredigu wajatagucumi. Îgure õaro iigucumi Goãmũ. Eropigu îgu yahare îgu weregu árîcũ îagu yujugu îgure õaro bocatîrigu weredigu iro dopa ta wajatagucumi îgu sã. Eropi gajigu õaro iidigu wajatagucumi. Eropigu îgu õaro iigu îgu árîcũ îagu yujugu îgure õaro bocatîrigu õaro iidigu dopa wajatagucumi îgu sã. ⁴² “Jesu yagugã ta ãhrimi,” mũa arî îarã îgugãre itamudiarã deco yusari mera dihta tãaquerecũ, diaye ta mũa sãre õaro iigucumi Goãmũ, arî weremi Jesu.

11

Ñu waîyegu îgu buherãre Jesure serêpidoregu obeoñumi
Lc 7.18-35

¹ Guare îgu buherãre îgu eropa arî werera puhru ero pohro árîri macarigue buhegu waha wami îgu.

² Eropigu Ñu peresugue árîgu Jesu îgu iiricurire peebeoru. Eropa peegu Ñu îgu buherãre Jesure serêpidoregu obeoru. ³ Eropirã gua pohrogue eja, Jesure serêpima erã Ñu buherã.

—Ñu õpa arî serêpidoreami mure: “¿Yu puhru gajigu îgu arigucumi,” yu eropa arîdigu ta ãhriri mũhu? ¿O gajigure corerãcuri gua?” arî serêpi doreami Ñu, arîma erã Jesure.

⁴ Erã eroparîcũ peegu Jesu yũhrimi:

—Dohpaguere mũa peerare, mũa îarare Ñure wererã waque. ⁵ Õpa arîque: “Jesu mera cuiri îhajibirã îhama. Curimasibirã cuhrima. Cami boanirã õarã wahama. Peejabirinirã peea wahama. Sîrinirã masa wahama,” arî wereque. Eropirã mojomorocurãre õari buherire yu wererare wereque îgure. Eropa arî weretuhaja õpa arî wereque Ñure. ⁶ “Yure peegu ‘Diaye ta ãhraa,’ arîgu îgu

mucubirigu āhrimi,” arāmi Jesu, arī, Ñure wererā waque, arīmi Jesu.

7 Ñu buherā erā wara pūhrū, Jesu Ñu árīricūre werenūgami masa bajarāre.

—Masa marirogue Ñu pohrogue warā ero majare taare miru weācū ĩarā ejabiribū mūa. ⁸ Ōari suhricūgū sāre ĩabiribū mūa. Ōari suhricūrā oparā ya wirigue āhrima. ⁹ Masa marirogue ejarā Goāmū yare weremūhtadigūpūre ĩarā ejabū mūa. Diaye ta Ñu Goāmū yare weremūhtagū āhrimi. Gajirā Goāmū yare weremūhtanirā tauro árīgū āhrimi Ñupū. ¹⁰ Iribojegue Goāmū yare erā gojarapū ōpa arī wereyuyoro Ñure.

Mari Pagū ĩgū magūre ōpa arīpū. “Mū core mūre wereyubure obeogū iiaa,” arīmi Goāmū, arī gojañuma Ñure.

¹¹ Mūare diaye ta arīgū iiaa. Masa árīpehrerā tauro āhrimi Ñu waīyegū. Irisubure ĩgū eropa árīquerecū ta umaroguere Goāmū ĩgū opū árīroguere árīpehrerā docanūgagūpū Ñu tauro árīgūcumī.

¹²⁻¹³ “Ñu waīyegū ĩgū eraboro core Moiserē ĩgū apira doreri mera Goāmū marire doremi. Goāmū ya weremūhtanirā mūra erā gojara sã eropa ta árīribū marire dorera. Dohpaguepūre Ñu ōari buherire, Goāmū opū ĩgū árīrire buhemi. ĩgū eropa buhecū pee masa erā ejatuharo erā turari mera Goāmū erā opū árīcū būrigā gahmema. ¹⁴ “Elia arīgūcumī,” iribojegue erā arīdigū ta Ñupū āhrimi. “Iribojegue majarā erā arīrare diaye ta āhraa,” arīdiarā Ñu ĩgū erā eropa arīdigū árīcū masirāca mūa. ¹⁵ Ōaro peeque mūa ire, arīmi Jesu.

¹⁶ Eropigū ōpa arīnemomi masare:

—¿Mūa dohpague majarā masa ñehmarano iro dopa āhriri mūa pepicū? Mūa majirā iiro dopa ōpa āhraa. Doberi duarogue bira doarā, ōpa arī dūyasoma erāgā erā basi: ¹⁷ “Mūa bayaburire tarisu purirabū gūa. ¿Duhpirā mūa mucubiri bayarā aribirari? Eropirā gūa būrigā ñehamere orerabū. ¿Mūapū duhpirā gūa mera orebirari?” arīma dūyasorā. Erā majirā arī dūyasorā iro dopa ta iirā ōpa iiaa mūa dohpague majarā. ¹⁸ Ñu waīyegū Goāmū ya árīburire ba duhugū vinore ihribirimi. ĩgū eropa ihribiricū ĩarā “Pee masibigū āhrimi,” arīribū mūa ĩgūre. ¹⁹ Yūpū masū Goāmū ĩgū obeodigū árīgū yūhū baha, ihria. Yū eropa iicū ĩarā ōpa arāa mūa yūpūre. “Īaque. Ihī wūaro bagū, merericūgū sã āhrimi. Wajasea corerā ñero iirā erā

wapicugũ āhrimi ĩgu,” arāa mũa yũre. Mũa gamero dopa gũa iibiricũ ero wabeaa mũare. Mũa masibiriquerẽ ta gũa iirare ĩarã, Goãmũ masirire gũa opacũ masirãca mũa, arĩmi Jesu erãre.

*Iri macari majarãre turiñumi Jesu erã ñerire
bujawerebircũ ĩagu*

Lc 10.13-15

²⁰ Pũhrũ ero maja macari majarãre turipũ Jesu. Iri macarire gaji macari sãre Goãmũ turari mera tauro deyoro moarire ii ĩhmudi árĩrimi ĩgu. ĩgu eropa ii ĩhmuquerecũ ta erã ñero iirire duhubirinirã árĩma erã. Eropigu erãre õpa arĩpũ ĩgu.

²¹ —Corazín maca majarã mũa ñero tarirãca. Betsaida majarã mũa sã ñero tarirãca. Mũa ya macaguere yũhũ Goãmũ turari mera deyoro moarire iirabũ. Mũa peebirabũ. Iribojegue Tiro waĩcũri macare, Sidón waĩcũri maca sãre yũ deyoro moarire yũ iicũ ĩarã ero majarãpũ erã ñerire bujawereboañuma. Eropa iirã õaripũre gohrotoboañuma. Bujawererã bujawereri suhrire saña, erã basi peame witũ mera mohsiripeoboañuma erã ñero iirare bujawere ĩhmumorã. Mũapũ eropa iibea. ²² Eropigu mũare arĩgu tiiaa. Dipuwaja moarinũ árĩcũ, Goãmũ Tiro majarã mũra, Sidón majarã mũra tauro ñerã mũa árĩri waja mũare ñero gohra dipuwaja moagũcumi ĩgu. ²³ Mũa Capernaum majarã, mũa ejatuharo Goãmũ pohrogue wadiarabũ. Mũa Goãmũ yare iidiabiricũ mũare Goãmũ peamegue cóagũcumi. Mũa ya macague Goãmũ turari mera deyoro moarire ii ĩhmurabũ. Mũa yũre peebirabũ. Iribojegue Sodoma waĩcũri macare deyoro moarire yũ eropa iicũ iri macapũ dohpaguere árĩboca. ²⁴ Eropigu mũare arĩgu tiiaa. Dipuwaja moarinũ árĩcũ Goãmũ Sodoma maca majarã mũra tauro, mũapũre mũa ñeri dipuwaja dipuwaja moagũcumi, arĩpũ Jesu iri macari majarãre.

Yũ pohrogue soorã arique, arĩñumi Jesu

Lc 10.21-22

²⁵ Irisubu ĩgu Pagũ mera wereniguigu õpa arĩmi Jesu.

—Ahũ, mũhũ mũmaro majarã tauro opũ, i yeba majarã tauro opũ āhraa. I mũ buherire “Masituhaja gũa,” arĩrãre masicũ iibea. Mũ yare masipehobirãpũre masicũ iibabũ mũhũ. Mũhũ eropa iicũ “Õhaa,” arãa yũhũ mũre. ²⁶ Eropa ta āhraa, Ahũ. Erã masibirãpũre erã masicũ gahmeabũ mũhũ, arĩmi Jesu ĩgu Pagũre.

²⁷ Eropigu masare gũa sãre õpa arĩ werenemomi:

—Yü Pagu árîpehreri yü iiborore apimi yûre. Îgu dihta yûre ôaro masimi. Yü sã îgure masia. Yü beyenirã sã îgure masima yü îgure masidorerã árîrã. Erã nücu ta yü Pagure masia gûa. ²⁸ Goãmü mera ôaro árîdiarã baja dorerire iiraa müa. Iri doreri nücürire omaro iro dopa ta ähraa. Eropirã gariborea wahaa müa iri dorerire iirã. Eropa gariborerã yûre serêque. Müare soocü iigura. ²⁹ Yühu pûriro mera doregü árîbeaa. Nijiyajaro doregü ähraa. Eropirã yü doreripûre iique. Eropa iirã dipuwaja marirã ôaro árîrãca müa. ³⁰ Eropiro yü itamuri mera yahare iicü diasabeaa. Eropirã yü dorerire iirã nücürire pepiro mariro ôaro árîrãca, arîmi Jesu.

12

Judio masa erã soorinü árîcü trigo pororire türîñuma Jesu buherã

Mr 2.23-28; Lc 6.1-5

¹ Merogã îgu eropa arî buhera pûhrü Sabado árîcü gûa Jesu mera trigo otera pohegue îha tariabu. Eroque tariarã gûa îgu buherã oaboarã, trigo pororire türî aî babü gûa.

² Gûa eropa iicü îarã, fariseo masa Jesure ôpa arîma:

—Peenique guare. ¿Duhpirã erã mari soorinü árîquerecü ta mohmeri? Mari dorerire tarinügarã iima erã, arîma erã.

³⁻⁴ Erã eroparîcü peegu Jesu “Yü buherã tarinügarã iibeama,” arîgu ôpa arîmi erãre:

—Iribojegue Davi îgu mera majarã mera oaboagu Goãmü ya wihigue ñaja, iri wihi árîri panre bañumi îgu mera majarã mera. Iri pan pahia dihtare badorerã árîyoro. Goãmü doreri gajirãre iri panre badorebiriyo. ¿Davi irire îgu iirare Goãmü yare erã gojarapûgue buhebirari müa? Davi iri panre bagü Goãmure tarinügagü iibiriñumi. Dohpagãre yü buherã sã trigo yerire türî barã Goãmure tarinügarã iibeama. ⁵ Eropi Goãmü ya wihi mohmerã pahia ne soobeama mari soorinürire. Eropa soobiriquererã Goãmü dorerire tarinügarã árîbeama. ¿Iri buhebirari müa Goãmü Moiserë îgu apirapûre? ⁶ Müare arîgu tiiaa: Goãmü wihire umupeorã iri wihi mohmerã erã soobicicü îarã “Ôhaa,” arãa müa. Erã tauro yûpûre umupeoro gahmea. ⁷ Goãmü yare erã gojarapü ôpa ähraa: “Waimurãre wejê soerã yûre müa eropa umupeocü gamebeaa. Gajirãpûre müa mojomoro îacü gahmea yühu,” arîmi Goãmü, arãa îgu yare gojarapûre. Îgu eropa arîrãre müa ôaro masirã, yü buherãre erã dipuwaja mariquerecü ta erãre weresãmasibiriboya müa. ⁸ Yühu masü Goãmü îgu

obeodigu inonu soorinu säre masa erä iiburire doremasia, arimi Jesu fariseo masare.

Mojoto buhadigu õaro wañumi

Mr 3.1-6; Lc 6.6-11

⁹ Īgu eropa arira puhru waha gua judio masa buheri wihigue ejabu gua Jesu mera. ¹⁰ Ero mojoto buhagu arimi. Eropirā fariseo masapu Jesure weresāmorā, ĩgure serēpima:

—Sabadonu mari soorinure masare õarā wacū iidore-beami Goāmū. ¿Eropa ta āhriri mū pepicū? arī serēpima erā.

¹¹ Jesu yuhrimi erāre:

—Mūa yagu oveja mari soorinu arīquerecū gobegue ĩgu yuhriñajadigure ĩgure aī wiurāca mūa. ¹² Oveja tauro āhrimi masapu Goāmū ĩacū. Eropiro mari soorinu arīcū masure taucū õapūrica, arī yuhrimi Jesu erāre.

¹³ Īgu eropa arira puhru mojoto buhagure õpa arimi:

—Mū mojtore sīsirābeoque, arimi ĩgu.

Īgu eroparīcū mojoto buhagupu sīsirābeomi. Īgu eropa sīsirābeora puhru ta õari mojoto dujabu. ¹⁴ Erā soorinu ĩgu eropiicū ĩarā fariseo masa waha, erā basi õpa arīñorā:

—¿Dohpa ii mari Jesure wejērācuri? arīñorā erā erā basi.

Isaia Goāmū yare weremūhtadigu iribojegue majagu Jesure weryuñumi

¹⁵ Jesu erā eropa arīrire masigu waha wami. Īgu eropa wacū bajarā masa ĩgure nurūsiamā. Eropigu ĩgupu arīpehrerā erā mera majarā dorecurāre õarā wacū iimi. ¹⁶ Eropigu dorecunirāre erāre ĩgu taurare gajirāre were-dorebirimi ĩgu. ¹⁷ Eropa dorecurāre õarā wacū iigu Goāmū yare weremūhtadigu Isaia iribojegue ĩgu arī gojadiro dopa ta iigu iimi Jesu. Ōpa arī gojañumi Isaia mūrū:

¹⁸ Ōpa arimi Goāmū: “Ihī yu pohro majagu āhrimi. Īgu yu beyedigu āhrimi. ĩgure mahia. Eropigu ĩgu mera mucubiria. Yu Espiriture ĩgure ogura. Eropigu yu turari mera arīpehrerā masare diaye iirire weregucumi ĩgu. ¹⁹ Eropigu ĩgu ne game dūyasosome. Eropigu gaguiniguisome. Eropigu masa bajarā watope ĩgu burigā gaguinigui weresome. ²⁰ Guaro mariro masare mojomorocurāre itamugucumi ĩgu. Daberogā ũjuri peamere yaubiro dopa ta masare turabirāre õaro iigucumi ĩgu. Sīporā marirāre õaro sīporācucū iigucumi. Eropa ta iiniguigucumi ĩgu watire ĩgu tarinugaboro core. ²¹ Eropirā masa bajarā ĩgure

umupeorãcoma," arĩmi Goãmũ ĩgu magu iiburire, arĩ gojañumi Isaia.

Jesu watĩ turarire opami, arĩ weresãñuma masa

Mr 3.19-30; Lc 11.14-23; 12.10

²² Yujunũ watĩ ñajasũdigure masa aĩgãrima gũa pohroque Jesure taudorerã. ĩgũũ watĩ ñajasũdigũ wereniguimasibirimi. Eropigũ cuiri ĩhajabirimi. Erã ĩgũre eropa aĩ eracũ ĩha õagũ wacũ iimi Jesu ĩgũre. ĩgu eropa iicũ õaro ĩha, wereniguimi pare. ²³ ĩgu eropa wacũ ĩarã, masa ĩhamaria wama.

—¿Ihĩ Davi mũrũ pãrami masare taubu ãhriri? arĩma erã erã basi.

²⁴ Erã eroparĩquerecũ Jesu watẽare ĩgu cóãrare peerã fariseo masapũ õpa arĩ pepiñorã:

—Beelzebũ, watẽa opũ, ĩgu turari mera watẽare cohãmi Jesu, arĩ pepiñorã erã.

²⁵ Erã eropa arĩ pepicũ masigũ, Jesu õpa arĩ weremi erãre werenigui queori mera:

—Yuju yeba majarã erã basi gamequeãrã iri yeba majarã pehrea wabocoma. Yuju maca majarã erã basi gamequeãrã iri maca majarã pehrea wabocoma. Yuju wihi majarã sã gamequeãrã eropa ta wabocoma. ²⁶ Eropigũ Beelzebũ watẽa opũũ yũre watẽare cóãdoregũ ĩgu basi ĩgu yarãre cóãboñumi ĩgu. Eropirã erã sã wapehrea waboñuma.

²⁷ Õpa arĩ weresãa mũa yũre: "Ĩgu Beelzebũ itamuri mera watẽare cohãmi," arĩ weresãa mũa yũre. Mũa mera majarã sã watẽare cohãma. Eropirã erã "Watĩ ĩgu turari mera erãre cohãa gũa," arĩbeama. "Goãmũ ĩgu turari mera watẽare cohãa," arĩma. Eropirã mũa yũre "Watĩ turari mera watẽare cohãmi," mũa arĩra diaye árĩbiricũ mũa mera majarã wererãcoma. ²⁸ Eropigũ yũũ watẽare cóãgu Goãmũ ĩgu Espĩritu Santo turari mera cohãa. Yũ eropa cóãcũ ĩarã õpa arĩ masirãca mũa: "Goãmũ ĩgu opũ árĩri i yebaguere árĩtuhajaa dohpaguere," arĩrãca mũa.

²⁹ "Õpa ta ãhraa watĩ turagũ tarinũgari werediacũ: Wihi opũ turagũre diribigũ yajagũ ĩgu ya wihigue ñajaja yajamasibeami. ĩgũre ĩgu dirira pũhrũ tamerare yajamasimi ĩgũre, arĩ weremi Jesu.

Eropa arĩ weremi watĩre ĩgu tarinũgarare weregũ. Watĩ turagũ árĩquerecũ ta Jesu ĩgũre tarinũgami watẽare cóãgu.

Eropa arĩtuhaja õpa arĩ werenemomi Jesu masare gũa sãre:

³⁰ —Yujugũ yũre gamebigũ, yũre ĩhaturigũ ãhrimi. Yuju yũre itamubigũ, yũre teboricucũ ĩgu iimi.

³¹ “Eropigu mũare diaye arĩgu tiaa yũhũ. Árípehreri ñerire masa erã iicũ erã wereniguicũ sãre Goãmũ cãdijimasimi. Eropa cãdijiqueregu Espíritu Santore erã ñero arĩ wereniguicũ Goãmũ iri tamerare ne cãdijisome. ³² Yũ masũre Goãmũ ĩgu obeodigũre erã ñero arĩ wereniguicũ iri ñerire cãdijimasimi Goãmũ. Espíritu Santopũre erã ñero arĩ wereniguicũ irire ne cãdijisome Goãmũ. Dohpaguere pehrerinũ pũhrũ sãre erã eropa arĩrare ne cãdijisome ĩgu, arĩ buhemi Jesu erãre.

Yucũ dũcare masiro dopa ta masa erã wereniguirire peerã erã árĩricũre masia mari, arĩ wereñumi Jesu

Lc 6.43-45

³³ Eropigu õpa arĩ werenemomi erãre werenigui queori mera:

—Óadigu yucũgu õarire dũcacua. Ñedigu yucũgu ñerire dũcacua. Yucũgu dũcare masirã “Írigũ dũca ta ãhraa,” arĩ masia mari. Mari eropa masiro dopa ta masa erã wereniguirire peerã erã árĩricũre masia mari. ³⁴ Añaa iro dopa ñerã ãhraa mũa. Mũa ñerã árĩrã, õarire wereniguimasibea mũa. Mari guñarigue mari pepidiro dopa ta mari wereniguia. ³⁵ Óagu õarire pepimi. Eropigu õarire wereniguimi. Ñegu ñerire pepimi. Eropigu ñerire wereniguimi. ³⁶ Mũare arĩgu iiaa. Óaro pepi wereniguirã árĩque mũa. Óaro wereniguibirinirã dipuwaja moarinũ árĩcũ, mũa eropa arĩmaacãrãre Goãmũre wererãca. ³⁷ Mũa queoro wereniguirare masigu, “Óarã ãhrima,” arĩ beyegũcumi Goãmũ. Eropigu mũa ñero wereniguirare masigu, “Ñerã ãhrima,” arĩ beyegũcumi ĩgu daja, arĩmi Jesu erãre.

Masa ñerã Jesure deyoro moarire iidoreñuma

Mr 8.12; Lc 11.29-32

³⁸ ĩgu eropa arĩra pũhrũ masare buherã, fariseo masa sã ĩgũre õpa arĩma:

—Buhegu, Goãmũ ĩgu obeodigu árĩgu Goãmũ turari mera ii ĩhmuque gũare, arĩrima erã.

³⁹ Jesu yũhrimi:

—Mũa dohpague majarã ñerã, Goãmũre gamebirã ãhraa. Yũhũ diaye arĩgu árĩcũ mũa masidiarã Goãmũ turari mera deyoro moarire iidorerã yũre. Mũa eropa dorequerecũ Goãmũ yare weremũhtadigu Jona iribojegue majagu Goãmũ turari mera ĩgu iira dihtare ĩhmumi Goãmũ mũare. ⁴⁰ Jona uhrenũ gohra waimũ wũagu paru pohecaguere árĩñumi. ĩgu iidiro dopa ta yũ sã masũ Goãmũ ĩgu obeodigu uhrenũ árĩgũca yeba pohecaguere. ⁴¹ Iribojegue

majarãpũ Nínive maca majarã Jona Goãmũ yare ïgũ wererare peerã, erã ñero iirare bujawereñuma. Ōarire gohrotoñuma. Dohpaguere mũa watopegue Jona tauro árïgũ àhraa yũhũ. Yũhũ Goãmũ yare mũaare werequerecũ ta mũa ñero iirare bujawerebeaa. Eropirã Nínive majarã mũrapũ erã ñero iirare bujawerenirãpũ dipuwaja moarinũ árïcũ mũa ñerire bujawerebirinirãre “Ñerã àhrima,” arĩ weresãrãcoma mũaare. ⁴² Iribojegue majago, sur majago, opo bũro igo sã mũa dohpague majarãre weresãgocumo dipuwaja moarinũ árïcũ. Igo Salomo opũ ïgũ masirire peediago yoarogue aridigo Salomo opũre peego ejañumo. Eropigo ðaro iigo iĩnumo dohpague majarã tauro. Mũaare arïgũ tiiaa. Dohpaguere mũa watopegue Salomo tauro masigũ àhraa yũhũ. Yũhũ mũa mera árïquerecũ mũa yũ masirire peediabeaa. Mũa eropa peediabirira waja igo opo bũro mũaare “Ñerã àhrima,” arĩ weresãgocumo, arĩmi Jesu erãre.

Watĩ dipaturi masũguere ïgũ ñajara queorire wereñumi Jesu

Lc 11.24-26

⁴³ Eropigũ dipaturi Jesu queori moa weremi masare.

—Yujugũ watĩ masũ mera árïdigũ waha, ïgũ deco mariri yebague cuhri, ïgũ sooborore amariñumi. ⁴⁴ Eropa bocabigũ õpa arĩ pepiñumi ïgũ. “Masũre yũ cóãdigũ mera ta dipaturi árïgũ wagura,” arĩ pepiñumi ïgũ. Eropa arĩ pepigũ ïgũ dujaa waha ïgũ cóãdigũre ta bocañumi daja. ïgũ bocaboro core masũpũ õagũ árïriñumi. ⁴⁵ Eropigũ watĩ gajirã siete watẽare ïgũ tauro ñerãre sihugũ wañumi. ïgũ eropa sihucũ erã árïpehrerã ïgũ mera árïñuma. Masũpũ ero core yujugũ watĩre opagũ ñegũ árïñumi. Pũhrũ bajarã watẽare opagũ ñetariagũ árïñumi. Eropa dohpague majarã Goãmũre gamebirã, yũ buherire peediabirã ñetariarã ta warãcoma, arĩmi Jesu erãre.

Jesu acawererã ïgũ pohro erañuma

Mt 3.31-35; Lc 8.19-21

⁴⁶ Masare ïgũ eropa arĩ wereniguirisubu ïgũ pago ïgũ pagũ porã mera disiporo nigui, ïgũre weretamudiañorã. ⁴⁷ Eropigũ yujugũ Jesure weremi:

—Mũ pago mũ pagũ porã mera disiporo niguima mũre weretamudiarã, arĩmi.

⁴⁸ ïgũ eroparïcũ peegũ ero árïrãre õpa arĩmi Jesu erãre buhebu:

—¿Noa àhriri yũ pago gohra? ¿Noa ta yũ pagũ porã gohra àhriri mũa ïacũ? arĩmi.

⁴⁹ Eropa arïgũ, guare ïgũ buherãre sïpu, õpa arĩmi:

—Oã ährima yu pago yu pagu porã iro dopa árĩrã. ⁵⁰ Erã yu Pagu umaro majagu ïgu gamerire iima. Eropa iirã yu pagu magu, yu pagu mago, yu pago iro dopa ta ährima, arĩmi Jesu erãre.

13

Jesu oteri masu ya queorire wereñumi

Mr 4.1-9; Lc 8.4-8

¹ Irinu ta Jesu wihigue árĩgu wiriami gua mera. Wiri, wuariyague waha, iriya turo pohro doami. ² ïgu eropa doacũ iarã bajarã masa ïgu pohrogue gamenerema. Eropa cũhñacũ ïagu dohodirugue ñajaa, irirugue doami ïgu. Masapu imiporogue niguima. ³ Eropigu baja queori mera weremi ïgu erãre. Őpa arĩmi:

—Oteri masu otegu wañumi. ⁴ ïgu eropa otecũ gajiyeri ma turo yuri merejayoro. Ero mehmerejarayerire mirimagu porã ahri bacãñuma. ⁵ Eropi gajiyeri utã watope yuri merejayoro. Ero utã watope nicu mariñariro árĩro mata puhriyoro. ⁶ Eropa puhri ara árĩquerero, abe ïgu burigã asicũ, nuguri marinijaro ñaiñaja sĩa wayoro. ⁷ Gajiyeri pora watope yuri merejayoro. Porapu puhri iri tiataria wa, oterayeripure wejēcayoro. ⁸ Gajiyeri ðari yebapu yurimerejayoro. Őaro puhri ducacayoro. Gajisari cien yeri, gajisari sesenta yeri, gajisari treinta yeri ducacayoro. ⁹ Irire ðaro peeque mua, arĩmi Jesu.

Jesu werenigui queori mera ïgu buherire wereñumi

Mr 4.10-12; Lc 8.9-10

¹⁰ ïgu eropa arĩra puhru gua ïgu buherã ïgu pohro eja, serẽpibu ïgure:

—¿Ne, duhpigu masare queori mera were buheri mahu? arĩ serẽpibu gua.

¹¹ Jesu yuhrimi:

—Umaro majagu masa tauro opu ïgu árĩrire iri-bojegue majarã erã masibirirare muare masicũ iimi Goãmũ. Gajirãpũre eropiilbeamĩ ïgu. ¹² Eropigu masirãre masinemocũ iigucumi ïgu. Eropirã erãpu ðaro masirãcoma. Masibirãpũre merogã erã masiquerecũ erãpũre masibiricũ iigucumi ïgu. ¹³ Eropigu queori mera buhea. Yu eropiicũ ðpa waha. Dohpague majarã ñaquererã pee masisome. Eropirã peequererã masibeamã. Irire peebirinirã iro dopa ährima erã. ¹⁴ Eropa árĩrã Isaia iri-bojegue majagu ïgu arĩ gojadiro dopa ta iima erã. Őpa arĩ gojañumi:

Õpa arĩmi Goãmũ: “Goãmũ yare peerãca mũa. Eropa peequererã ne masisome mũa. ¹⁵ Mũa dipuru buri ãhraa. Eropirã mũa gamiro goberire bihaa peeri arĩrã. Mũa cuirire cuumitĩa ñhari arĩrã. Eropa iibirã õaro ñarã masiboaya mũa. Eropirã peerã masiboaya mũa. Mũa guñarigue õaro masiboaya. Eropirã yure Goãmũre gameboaya mũa. Mũa eropa yure gamecũ mũa ñerire cãdiji, mũare tauboaya,” arĩmi Goãmũ, arĩ gojañumi Isaia, arĩmi Jesu.

¹⁶ Mũarũ peerã masia. Eropirã mucubirirã ãhraa mũa. ¹⁷ Mũare ta arĩgu iiaa. Dohpague mũa ñarire mũa peerire iribojegue majarã Goãmũ yarã burigã ñadiariñorã. Goãmũ yare weremũhtanirã sã irire burigã ñadiariñorã. Ne ñabiriñorã. Dohpague mũa peeri sãre burigã peedariñorã erã. Ne peebiriñorã. Erã eropa masidiaquerecũ ta Goãmũ erãre masidorebiripũ irisubuguerẽ, arĩ weremi Jesu guare ñgu buherãre.

*Jesu oteri masũ queorire were amũñumi ñgu buherãre
Mr 4.13-20; Lc 8.11-15*

¹⁸ Pũhrũ Jesu guare werenemomi:

—Peeque mũa. Oteri masũ queorare mũare were amugũra. Yũre peerã õaro masique. ¹⁹ Oteriyeri õari buheri iro dopa ãhraa. Eropiro ma tũro mehmerejarayeri õari buheri iro dopa ta ãhraa. Eropirã masa õari buherire peequererã ta ne masibeama. Eropigu masa õari buherire erã peecũ ñagu ñegũrũ watĩ ahri, iri buherire õari buherire masidorebeamĩ masare. Mirimagũ porã iriyerire erã dote aĩ badiro dopa ta iimi. ²⁰ Eropi utã watope yuri merejarayeri õari buheri iro dopa ta ãhraa. Eropirã masa õari buherire pee, mucubiriri mera mata irire pee aĩma. ²¹ Eropa pee aĩquererã utã watope arĩri yucũ nuguri mariri yucũ iro dopa ta oã masa sã turabeama. Eropa turabirã yaha õari buherire erã peera dipuwaja gajirã erãre ñero iicũ yahare duhucãma. Gajirã erãre erã ñero iicũ irire yujuro bojebiri, yahare duhucãma. ²² Eropi pora watope yuri merejarayeri õari buheri iro dopa ta ãhraa. Eropirã masa õari buherire peequererã i yeba majare wũaro pepiri mera niyerure gametarima. Erã eropa iicũ iripũ õari buherire cãhmotaa. Iri cãhmotacũ masa Goãmũ gamerire iibeama. ²³ Eropi õari yeba yuri merejarayeri õari buheri iro dopa ãhraa. Eropirã masa õari buherire peerã irire õaro masima. Eropa masirã arĩrã, Goãmũ gamerire iima erã. Yujurãyeri wũaro õarire iima cien yerĩ dũcacũro dopa ta. Gajirã erã docañariro õarire Goãmũ yare iima sesenta yerĩ dũcacũro dopa ta.

Gajirã merogã ðarire iima treinta yeri ducacuro dopa ta, arĩ weremi Jesu guare.

Trigo watopegue taa tiara queorire wereñumi

²⁴ Eropi dipaturi gaji queorire gua sãre weremi Jesu.

—Ūmaro majagu ĩgu opu árĩrire werediacũ ðpa ãhraa: Pohe opu ĩgu ya pohegue ðariyerire ĩgu otediro dopa ta ãhraa ũmaro majagu ĩgu opu árĩri. ²⁵ Pohe opu trigo otera puhru árĩpehrerã ĩgu mera majarã sã erã carĩrisubu ĩgure ĩhaturigu arĩñumi. Eropa arigu trigo yeri erã oterayeri watope ñeri taare oteñumi. Otetuhaja waha wañumi. ²⁶ Puhru trigo sari puhri iiriyoro. Eropiro iri ducacuboro core árĩcũ iri ñeri taa sã puhri iri pohere tiha wacũ iiyoro. ²⁷ Eropirã pohe opure mohme corerã ĩgu pohrogue eja serẽpiñuma: “Opu, ¿ðariyeri dihtare mu ya pohere otequerecũ duhpiro ñeri taa sã tiari iri pohere?” arĩñuma erã. ²⁸ “Yure ĩhaturigu ãhrañumi iri taare otegu,” arĩñumi pohe opu. “¿Taare gua curacũ gahmeri muhu?” arĩñuma ĩgure mohme corerã. ²⁹ “Taare curabiricãque, taare curanijarã trigopure curari,” arĩñumi. ³⁰ “Trigo iri ñeri taa mera puhricãniporo. Iri ñairisubu dũca aĩrãre ðpa arĩrã: ‘Iri ñeri taare cura gameneopimãhtaque irire soemorã. Puhru trigore tũrĩque. Tũrĩpeho, irire yu diburi wihigue apique,’ arĩrã erãre,” arĩñumi pohe opu, arĩmi Jesu queori mera weregu.

Mostazayegã queorire wereñumi Jesu

Mr 4.30-32; Lc 13.18-19

³¹ Eropi gaji queori guare ðpa arĩ buhemi daja.

—Ūmaro majagu ĩgu opu árĩri werediacũ mostazayegã iro dopa ãhraa. Iriyegã miriyegã gohra ãhraa. Iriyegã yujugu oteri masu ĩgu pohegue oteami. ³² Iriyegãre ĩgu pohegue otera puhru ðaro puhria. Eropiro yucugu wuatariadigu wahaa. Eropa wacũ mirimagu porã bajarã irigu duparigue suhri suama. Eropa ta ũmaro majagure mari Opure masirã bajamerãgã erã árĩmãhtaquerecũ ta puhruquere erã bajarã warãcoma, arĩ weremi Jesu

Pan bugari queorire wereñumi Jesu

Lc 13.20-21

³³ Eropi gaji queori mera guare ðpa arĩ buhemi daja:

—Ūmaro majagu ĩgu opu árĩri pan bugacũ iiburi iro dopa ãhraa. Yujugo nomeo panre iigo pan bugacũ iiburi pohgare merogã moremo trigo pohga mera. Igo eropa iicũ pan bugacũ iiburi pohga merogã árĩquerero ta trigo pohgare ðaro seyapehrea wahaa. Eropa ta ũmaro majagure mari

Opure bajarã masa árîpehrero majarã masirãcoma, arîmi Jesu.

Queori mera Jesu îgu buherãre wereñumi

Mr 4.33-34

³⁴ I árîpehreri buherire queori mera weremi Jesu. Queori mariro werebirimi îgu masare. ³⁵ Eropa ta iimi îgu Goãmũ yare weremuhtadigu îgu arî gojadiro dopa ta. Ōpa arî gojañumi iribojegue:

Queori mera weregura. Goãmure i yebare îgu îhacũnugura pũhrũ, ne masare îgu werebirirare weregura, arî gojajuñumi Jesu iiborore.

Jesu trigo watopegue ñeri taa tiara queorire were amupehoñumi

³⁶ Eropi masare goeriseregu, wihigue ñajaa wami Jesu. Eropirã gua îgu buherã îgu pohrogue eja, serëpibu gua:

—Trigo watopegue ñeri taa tiara queorire werepehoque guare, arîbu gua îgure.

³⁷ Jesu yũhrimi guare:

—Pohe opu ðariyerire otediro iro dopa ta ãhraa yũhũ. Yũhũ masũ Goãmũ îgu obeodigu ãhraa. ³⁸ Poherũ i yeba iro dopa ta ãhraa. Ōariyeri puhriro umaro majagu îgu opu árîrogue árîmorã iro dopa ta ãhrima. Ñeri taapu watî yarã iro dopa ta ãhrima. ³⁹ Pohe opure îhaturigu ñeri taare otedigu watî iro dopa ta ãhrimi. Iri ñairisubu pehrerinũ iro dopa ãhraa. Eropirã trigore aîrã anyua iro dopa ta ãhrima.

⁴⁰ Iri ñeri taare erã curarare soe peamegue cóãdiro dopa ta pehrerinũ árîcũ watî yarãre peamegue cóãrãcoma. ⁴¹ Yũhũ masũ Goãmũ îgu obeodigu yaharã anyuare obeogura. Yu obeocũ anyuapu ñeri iidorenirãre, ñerire iinirãre yu dorerogue gameneorãcoma. ⁴² Gameneotuhaja peamegue cóãrãcoma erãre. Erogue erã burigã ore, bujawereri mera gũcũri cũridihurãcoma. ⁴³ Eropirã Goãmũ yarã erã Pagũ erã Opu îgu árîrogue árîrãcoma. Ero árîrã, ðaro mucubiriri mera árîrãcoma erã. Ire ðaro peeque mũa, arî weremi Jesu.

Niyeru wũaro diburare îgu bocara queorire wereñumi

⁴⁴ Eropi gaji queori mera weremi daja:

—Umãro majagu îgu opu árîri niyeru wũaro diburare bocadiro iro dopa ãhraa. Eropigu yujugu masũ curigu wagu iri niyerure guñaña mariro bocañumi yuju yebague. Eropa bocagu burigã mucubiriñumi îgu. Bocatuhaja waha iri yebague dipaturi dujara irire ðaro dibunemoñumi. Eropigu îgu bocarare aîbu iri yebare asũdiañumi. Eropigu îgu yare duapeho, iri yebare asũñumi. Umãro majagu opu îgu

áriri ĩḡu bocadiro dopa ta āhraa. ĩḡu bocarare ĩḡu buřigā gamediro dopa ta ũmaro majagũ masa weca opũre õaro erā masira pũhrũ masa buřigā gahmema ĩḡure, arĩ weremi Jesu.

Waja pagariyere asũra queorire wereñumi

⁴⁵ Eropi gaji queori mera weremi daja:

—Ũmaro majagũ ĩḡu opũ arĩri waja pagariye perla waĩcũriyere asũdigũ iro dopa āhraa. ⁴⁶ Iriyere amagũ õataririyere bocañumi. Bocagũ iriyere gametarigũ arĩpehreri ĩḡu yare duapehogũ wañumi. Eropa duatuhaja iriyere waja pagariyere asũñumi. Iriyerire buřigā ĩḡu gamediro dopa ta ũmaro majagũ masa weca opũre õaro erā masira pũhrũ masa buřigā gahmema ĩḡure, arĩmi Jesu.

Wejēdigũ mehyura queorire wereñumi Jesu

⁴⁷ Eropi gaji queori mera Jesu weremi daja gũa sãre:

—Ũmaro majagũ ĩḡu opũ arĩri wejēdigũ erā mehyudigũ iro dopa ta āhraa. Irigũ wejēdigũ mera bajarā waire gajiropa arĩrãre ñeama. ⁴⁸ Irigũ ũjutũria wacũ wai wejērãpũ irigũre wejēdigũre imiporogue tara majaa õarā waire beyema. Őarãre erā pũirigue beye sãma. Ñerā waire cóãcãma. ⁴⁹ Pehrerinũ arĩcũ õpa ta arĩroca. Anyuapũ masare beyerãcoma. Ñerãre beye aĩ wiurãcoma õarā watope arĩrãre. ⁵⁰ Aĩ wiu, erãre peamegue cóãrãcoma. Erogue erā ore, buřigā bujawereri mera gũcũri cũridihurãcoma ñerãpũ, arĩ weremi Jesu.

Mũra buherire, mama buheri sãre wereñumi Jesu

⁵¹ ĩḡu eropa arĩ werera pũhrũ gũare serēpimi ĩḡu:

—¿I arĩpehrerire peeri mũa? arĩ serēpimi ĩḡu.

—Peeã gũa, arĩ yũhribũ.

⁵² Gũa eroparĩcũ ĩḡu weremi gũare:

—Judio masare buherã watope yujugũ ũmaro majagũ ĩḡu opũ arĩrĩre buhenũgagũ iri mama buherire buhegũ iribojegue maja sãre masigũ weremi. ĩḡu wihi opũ iro dopa āhrimi. ĩḡu ĩḡu ya wihi diburare õarire aĩ wiugũ, mamare, mũra sãre aĩ wiumi ĩḡu, arĩmi Jesu gũare.

Jesu Nazaregue ĩḡu ya macague wañumi

Mr 6.1-6; Lc 4.16-30

⁵³ Iri queori bajare ĩḡu buhera pũhrũ ĩḡu mera gũa waha wabũ. ⁵⁴ Waha, ĩḡu masara macague ejabũ. Erogue eja, gũa buheri wihigue buhemi ĩḡu. ĩḡu eropa buhecũ peerã, pee ũca wama erã.

—¿Nohogue masiyuri ihĩ i buherire? ¿Dohpa ii ĩḡu i deyoro moarire iimasiri? arĩ wereniguima erã erã basi.

⁵⁵ Ihĩ taboa mohmeri masu magu ta aħrimi ĩgu. Eropi ĩgu pago María aħrimo. Eropi Santiago, Jos , Simo, Juda ĩgu pagu pora aħrima. ⁵⁶ Dohpaguere ĩgu pagu pora nome i maca aħrima. Eropigu ĩgu mari iro dopa ta arĩgu aħrimi.  Eropa arĩqueregu ta nohogue peeyuri i buherire? arĩ wereniguima er er basi.

⁵⁷ Eropir er ĩgure umupeobirima. Er eropa umupeobiric ĩagu opa arĩmi Jesu erre:

—Arĩpehrerogue Gom yare weremuhtagure gajir umupeoma. ĩgu ya maca majar ĩgu ya wihi arĩr dihta ĩgure umupeobeama. Eropir yare umupeobeaa ma oh yuħu masadigu arĩc, arĩmi ĩgu erre.

⁵⁸ Eropigu er ĩgure umupeobiric, iri macare baja deyoro moarire iibirimi Jesu.

14

Ñu waĩyegu sĩrirare werera

Mr 6.14-29; Lc 9.7-9

¹ Irisubure Herode Galilea majagu opu Jesu ĩgu iirare peebeop. ² Eropa peegu opa arĩrip:

—Ñu waĩyeri masu sĩridigu dipaturi masa dehyoagu iicumi. Eropa masadigu arĩgu ĩgu turarire opami ĩgu deyoro moarire iigu, arĩrip Herode ĩgu pohro majarre. Jesure “Ñu mu ta aħrimi,” arĩ pepirip ĩgu Ñure ĩgu wejedorera puħu.

³⁻⁵ Eropigu Ñure ĩgu wejedoroboro core Herode ĩgu pagu magu Felipe marapore ehma igo mera marapocup. ĩgu eropa iic ĩagu Ñu waĩyegu Herodepre opa arĩ wereniguip:

—M pagu magu marapore marapocug Gom dorerire tarinugagu iiaa muħu, arĩrip Ñu ĩgure. ĩgu eropa arĩra waja Herode ĩgure wejediariip. “ ‘Ñu Gom yare weremuhtagu aħrimi,’ arĩ pepima judio masa,” arĩgu erpre gũip Herode. “Ñure y wejec er guabocoma,” arĩgu erre gũip. Eropa gũigu Ñure wejediabiririp. Eropa wejebiriqueregu ta ĩgure ñeha diridore, peresu iip. ĩgure eropa iic gamepo ĩgu marapo Herodia. ⁶ Eropi Herode ĩgu masa dehyoaran arĩc bosenu iip ĩgu. ĩgu eropa bosenu iic ĩgu marapo mago bosenu eranir er ĩhuro baya ĩhmupo igo. Igo eropa baya ĩhmuc Herode mucubirip. Eropa mucubirigu igore arĩp:

⁷ —Gom mera diaye ta arĩgu iiaa. Yre m sererop ta ogra yuħu mre, arĩp pare Herodep ĩgu marapo

magore. ⁸ Īḡu eroparīcū Īḡu marapo igo magore igo serēburire werepo igore. Igo eropa werecū igo magopu ōpa arī serēpo Herodere.

—Ñu waīyegu dipurure tabetadoreque. Eropigu soropa mera Īḡu dipurure yare oque, arīpo igo.

⁹ Igo eroparīcū peegu Herode burigā bujawerepu. Masa erā peero “Mu serēro mure ogura,” arītuhapu Īḡu. Eropigu Īḡu Īḡu eropa arīrare guhyasīrigu “Mure osome,” arīmasibiripu igore. Eropigu igo Īḡure dorero dopa ta Herodepu Īḡu pohro majarāre Ñure wejēdorepu. ¹⁰ Eropigu Ñu dipurure tabetadorecāpu pare peresugue arīḡure. ¹¹ Tabetatuhaja, soropa mera Īḡu dipurure aīḡariñorā erā. Īḡu marapo magore Īḡu dipurure erā ocū, igopu igo pagoguere aī taupo.

¹² Erā eropa iira puhru Ñu Īḡu buhenirā Īḡu dāpu mumarore aīḡā wañorā. Eropa yaatuhajarā, erā irire Jesure wererā arima.

Cinco mil masare bari oñumi Jesu

Mr 6.30-44; Lc 9.10-17; Jn 6.1-14

¹³ Ñu sīrirare peegu Jesu gua mera dohodirugue ñaja, masa marirogue sihu wami. Jesu erogue wacū peerā, masa erā ya macarire wiri, marigue waha Īḡu core ejatuhañorā.

¹⁴ Eropiro Jesu Īḡu wadiru dohodiru tuhajara puhru Īḡu bajarā masa arīcū ĩha, mojomoro ĩami erāre. Eropa mojomoro ĩagu erā mera bajarā dorecārāre ōarā wacū iimi.

¹⁵ Ñamicague gua Īḡu buherā ōpa arību:

—Ñamicague āhraa. Ohō masa marirogue āhraa. Ōḡā arīri macarigue masare wadoreque. Erā baburire asūrā waporo, arīribu gua Īḡure.

¹⁶ Jesu yuhrimi guare:

—Wabiricāporo erā. Mua basi ta barire oque erāre, arīmi guare.

¹⁷ —Cinco pan dipurure, perā ta wai säre iripēta opaa gua, arī yuhribu gua.

¹⁸ —Irire yare aīḡarique mua, arīmi guare.

¹⁹ Gua irire ora puhru, taa weca masare Īḡu doadoremi pare. Erā eropa doaribusu cinco pan dipurure aī, perā wai säre aī, umarogue ĩhamuju, Īḡu Pagure “Ōhaa,” arīmi. Ōpa arītuhaja iri pan dipurure nuha, guare Īḡu buherāre omi. Īḡu eropa ocū guapu iri barire masare guerebu. ²⁰ Eropirā arīpehrerā ōaro baha yapia wama. Erā ba dūharare doce puiri gohra aī gameneo, ujutu dobobu gua. ²¹ Ero irire banirā uma dihtare queocū cinco mil uma arīma. Nome, majirā sā arīma.

*Jesu deco weca curiñumi**Mr 6.45-52; Jn 6.16-21*

²² Pühru guare ĩgu buherãre Jesu dohodirugue ñajadore wuariyague taribuja yuudoremi masare ĩgu goerisererisubu. ²³ Goeriseretuhaja, ĩgu basi utãgugue mæria, ĩgu Pagu Goãmu mera serẽgu wapu ĩgu seyaro. ²⁴ Irisubure wuariya deco gohra gua taribujacũ miruñe burigã ahri, pãguri pagari wahgã, dohodirure deco paa ñajabu. ²⁵ Eropa wacũ boyomuririboro core cãreña wahgãrisubu Jesu deco weca cuhrapi wahgãrimi gua pohrogue arigu. ²⁶ Gua pohrogue ĩgu aricũ ĩarã güibu gua. Eropa güirã gaguinuiribu.

—Sĩridi mũru watĩ aħrimi, arĩ gaguiniguibu gua.

²⁷ Gua eropa güicũ Jesu õpa arĩmi:

—Ne yure ĩha ucabiricãque. Yuhu ta aħraa. Güibita, arĩmi guare.

²⁸ ĩgu eroparĩcũ peegu Pedro arĩmi ĩgure:

—Yu tĩgu, diaye ta mũhu ta árĩgu, deco weca curi wahgãdoreque yure mu pohrogue, arĩmi ĩgu.

²⁹ —Arique, arĩ yuħrimi ĩguřu.

ĩgu eroparĩcũ Pedropu dohodirugue árĩdigu wiria, deco weca Jesu pohrogue niguigãrimi. ³⁰ Miruñe iri burigã aricũ ĩagu güimi. Eropa güigu diha dija warimi.

—Yure tauque, arĩ gaguiniguimi ĩgu Jesure.

³¹ ĩgu eroparĩcũ ta Jesu ĩgu mojtore ñeha,

—Merogã umupeoa mũhu yure. ¿Duhpigu yure guñaturabeari mũhu? arĩmi ĩgu Pedrore.

³² Eropa arĩra pühru dohodirugue ñajama erã. Erã eropa ñajara pühru, miruñe taria wabu. ³³ Eropirã gua ĩgu buherã dohodirugue árĩrã Jesure umupeobũ.

—Diaye ta mũhu Goãmu magu ta aħraa, arĩbu gua ĩgure.

*Genesare majarã dorecũrãre tauñumi Jesu**Mr 6.53-56*

³⁴ Eropi taribujaja, Genesare waĩcũri yebague ejabu. ³⁵ Ero majarã Jesure ĩha masima. Eropa masirã erã pohro árĩrãre dorecũrãre aĩgãridorema. Eropirã erã dorecũrãre ĩgu pohrogue aĩ erama.

³⁶ —Mu suħriro tũro dihtare guare mohmepiñadoreque, arĩ serẽma erã Jesure. Eropirã arĩpeħrerã dorecũrã ĩgu suħrirore mohmepiñanirã dihta õarã wama.

15*Masa ñerã wacũ iirire wereñumi Jesu**Mr 7.1-23*

¹ Eropi Jerusalén majarã, fariseo masa, masare buherã mera Jesu pohroque erarã, serëpima ïgure:

² —¿Duhpirã mari ñecũ sũmarã mãra erã dorediro dopa iibeari mũ buherãpũ? Erã mari dorero dopa ta erã baboro core mojo coe ïhmubeama, arĩma erã Jesure.

³ Jesu yũhrigũ serëpimi erãpũre:

—¿Mũapũ duhpirã Goãmũ doreripũre iibeari? ¿Duhpirã mãa ya doreri dihtare iiri mũapũ? ⁴ Ōpa arĩmi Goãmũ: “Mũa pagũ sũmarãre umupeoque,” arĩmi. Eropigũ “Ïgũ pagũ sũmarãre ñero werenigũ coredigũre erã dipuwaja moarã wejẽbu árĩgũcumi,” arĩmi Goãmũ. ⁵ Ïgũ eropa arĩquerecũ ta mũapũ õpa arĩdorea masare erã pagũ sũmarãre. “‘Mũare itamumasibea. Mũare yũ oborare Goãmũ ya árĩburire opehocãbũ,’ arĩque mãa pagũ sũmarãre,” arĩ buheraa mãa. ⁶ Mũa eropa buherã erã pagũ sũmarãre erã umupeobiricũ iiaa mãa. Mũa eropa iirã Goãmũ buherire tarĩnũgarã iiaa mãa mãa ya doreri dihtare iirã. ⁷ Masa erã ïabiropũre ñero iicorerã ãhraa mãa. Goãmũ ya weremũhtadigũgue Isaia mãare diaye ta were gojamũriñumi iribojegũre:

⁸ Oã masa yũre õaro werenigũquererã yũre õaro umupeobeama. Erã ya sĩporãripũ gajipũgue ãhraa.

⁹ Goãmũ ya dorerire arĩbodirore erã ya werenigũiri dihtare buhema erã. Eropirã yũre umupeo erã sĩbũipeori duhpiburi árĩbeaa, arĩ gojañumi Isaia, arĩmi Jesu fariseo masare, masare buherã sãre yũjuropa ta.

¹⁰ Eropa arĩtuhaja ïgũ pohroque masare sihubeo, õpa arĩmi:

¹¹ —Peeque mãa. Mũa disirorire ñajaripũ mãa baripũ masare ñerã masa wacũ iibeaa. Mũa werenigũiripũ mãa ya disiro wiriripũ mãare ñerã árĩcũ iiaa, arĩmi Jesu.

¹² Ïgũ eropa arĩ buhera pũhrũ gũa ïgũ buherãpũ ïgure werebũ:

—Mũ eroparĩcũ peerã fariseo masa guama, arĩ werebũ gũa ïgure.

¹³ Irire pee õpa arĩ yũhrimi gũare:

—Erã otera iro dopa ãhrima. Yũ Pagũ umaro majagu árĩpehreri oterare ïgũ otebirirare nuguri mera ta cura cóagũcumi. ¹⁴ Erãre eropa ïacãque. Erã Goãmũ yare masibirã masa cuiiri ïhajabirã iro dopa ãhrima. Cuiiri ïhajabirã seyaro erã basi game tũagã erã perãgue ta mehtua yuhridijarãcoma gobegue. Eropa erã Goãmũ yare masibiri-quererã ta gajirãre masibirãre buhediarima. Eropirã erã erã buherã sã peamegue warãcoma, arĩmi Jesu.

¹⁵ Īḡu eroparīcū peegu Pedro arīmi:

—Īñe queoriñere erā disiro wiriri queorire werenemoque guare daja, arīmi Īḡu Jesure.

¹⁶ Jesu yūhrimi:

—¿Ne, peenibeari mūa? ¹⁷ Masa erā barire bacū erā ya disiro ñajaa. Eropiro erā parugue ñajaja, pūhrū erā dūpūpū ñerire cohāa. Ibu gohra āhraa. Mari bari marire ñerā wacū iibea. ¿Ire masibeari mūa? ¹⁸ Masa ya disiro wiriri, erā wereniguiripū erā pepiri āhraa. Erā ya pepiripū ñeri árīro masare ñerā árīcū iiaa. ¹⁹ Erā pepirigue ōpa ñeri nūgaa: Ñeri pepiri, masare wejēri, gajigū marapo mera ñero iiri, ñero iirā nome mera ñero iiri, yajari, gūyari, masare ñero quere iiri, masa erā pepirigue nūgaa. ²⁰ Iri ñeripū masare ñerā árīcū iiaa. Masa erā dorerire mūrague erā iimuridiro dopa ta mojoto coebiriquererā ta erā bacū iri masare ñerā masa árīcū iibea, arīmi Jesu.

Judio maso árībigō Jesure umupeoñumo

Mr 7.24-30

²¹ Eropa arī buhetuhaja guare sihu waha wami daja. Tiro waīcūri maca pohrogue Sidón waīcūri maca pohrogue ejabū gūa. ²² Gūa erogue ejacū Canaa yeba majago ero árīgo Jesu pohrogue eja, turaro mera wereniguimo:

—Opū Davi pārami, masare taugū yūre mojomoro ĩaque mūhū. Yū mago watī ñajasūdigo ñetariaro tarimo igo, arīmo.

²³ Igo eropa arīquerecū ta Jesu igore yūhribirimi. Īḡu eropa iicū ĩarā gūa Īḡu buherāpū ĩgure ōpa arīribū:

—Wadoreque igore. Ñe gariboro būsucumo, arīribū gūa.

²⁴ Gūa eroparīcū peegu Īḡu yūhrimi igore:

—Israe majarā oveja dederenirā iro dopa árīrā dihtare itamudoregū obeomi yū Pagū yūre, arīmi Īḡu.

²⁵ Īḡu eroparīcū ta Jesu guburi pohro merejamo igo.

—Mūhū eropa arīqueregū itamuque yūre, arīmo igo.

²⁶ Jesu yūhrimi igore:

—Wihi opū porā ya barire diayeare ocū ōabeaa. Eropa arīḡu, Israe masa yare gaji yeba majarāre yū ocū ōabeaa, arī weremi Jesu igore.

²⁷ —Eropa ta āhraa, Opū. Eropa arīquerecū barisubū dijarire diayea sā bacohrema. Gaji yeba majago yū árīquerecū ta yū sāre itamuque mūhū, arī yūhrimo igo.

²⁸ Igo eroparīcū Īḡu yūhrimi:

—Mūhū nomeo, yūre būrigā umupeoa. Mū gamero dopa ta eropa waroca, arīmi Jesu igore.

Īḡu eroparīcū ta igo mago mata ōago wapo.

Bajarã dorecũrãre õarã wacũ iĩnumi Jesu

²⁹ Eropã arĩtuhaja gũare sihu waha, Galilea waĩcũriya tũro pohrogue sihu ejami daja. Pũhrũ Ƴtãgũgue mũria, erogue doajami. ³⁰ Ero ĩgu doacũ masa bajarã erama. Eropirã bajarã dorecũrãre aĩ erama. Curimasibirãre, cuiri ĩhajabirãre, yujupũ ñero guburucũrãre, apayuriri árĩrãre, wereniguimasibirãre, bajarã gajirã dorecũrãre ĩgu pohrogue aĩ erama masa. Eropã aĩ erarã Jesu guburi pohrogã apima erã. Erã eropã duhupira pũhrũ õarã wacũ iimi Jesu erãre. ³¹ ĩgu eropã iicũ ĩarã masa ĩhamaria wama. Wereniguimasibirinirã erã wereniguicũ ĩarã, apayuriri árĩnirã erã õarã wacũ ĩarã, curimasibirinirã erã curicũ ĩarã, cuiri ĩhajabirinirã erã ĩacũ ĩarã, ĩhamaria wama erã. Eropirã õpa arĩma:

—Mari Israe majarã mari Opũ Goãmũ turagu õagu åhrimi, arĩ umupeoma erã Goãmũre.

Cuatro mil gohrare masa bajarãre barire oĩnumi Jesu

Mr 8.1-10

³² ĩgu eropã iira pũhrũ Jesu gũare ĩgu buherãre sihubeo arĩmi:

—Oã masa yũ mera Ƴhrenũ gohra árĩtuhajama. Erãre bari pehrea waca. Eropigũ erãremojomoro ĩhaa. Erã babiriquererã erã ya wirigue dujaacũ gamebirica. Mague warã erã oaboarã turabiribocoma. Eropigũ erãre bari ejotudiaca, arĩmi ĩgu.

³³ ĩgu eroparĩcũ gũa ĩgu buherã ĩgũre serẽpibũ:

—¿Duhpii mari õguere masa mariroguere barire bocabocuri erã bajarã masare ejoburire? arĩbũ gũa ĩgũre.

³⁴ —¿Dinacũ dipuru pan dipurure opari mũa? arĩmi gũare.

—Siete pan dipuru, bajamerãgã waire opaa, arĩ yũhribũ gũa.

³⁵ Gũa eroparĩcũ peegũ ĩgu masare taa weca doadoremi. ³⁶ Tuhajanugu siete pan dipurure, waigã sãre aĩ, ĩgu Pagũre “Õhaa,” arĩ serẽtuhaja, pan dipurure nuha, gũare ĩgu buherãre omi. Eropirã gũa ĩgu buherã iri barire masare guerebũ. ³⁷ Eropirã masa irire baha, yapia wama. Erã ba dũharare siete puiiri gohra aĩ gameneo Ƴjũtu dobobũ gũa. ³⁸ Ero banirãre Ƴma dihtare queocũ cuatro mil gohra arĩma. Nome, majirãgã sã arĩma. ³⁹ Erã eropã batuhajacũ Jesu masare goerisere, dohodirugue ñaja, Magdala waĩcũri yebague gũare sihu ejami.

16

Fariseo masa, saduceo masa sã Goãmũ turari mera deyoro moarire Jesu iicũ ïadiariñuma

Mr 8.11-13; Lc 12.54-56

¹ Eropi fariseo masa, saduceo masa mera Jesu pohrogue erama. “Ïgu Goãmũ ïgu obeodigu árĩbeami,” arĩ ïadiariñuma. Eropirã ïgure Goãmũ turari mera deyoro moarire ïgu ii ïhmucũ gamerima. Ïgu ii ïhmumasibiricũ “Goãmũ obeodigu árĩbeami,” arĩdiarima. ² Erã ïgure deyoro moarire eropa iidorecũ Jesu yũhrimi erãre:

—Ñami wacũ necã õaro boyocũ ïarã “Õari ñami árĩroca,” arãa mũa. ³ Eropirã boyoropure ñipicũ ïarã, “Deco ariroca,” arãa mũa. Umarore ïhamemujurã, “Õpa waroca,” arĩ masia mũa. Eropa õaro masiquererã ta dohpague Goãmũ turari mera mũare yũ ii ïhmuquerecũ ta ne irire õaro masibea mũa. ⁴ Dohpague majarã ñetariarã Goãmũre gamebirã Goãmũ turari mera ii ïhmurire ïadiarima. Deyoro moarire ii ïhmusome yũhũ. Goãmũ yare weremũhtadigu Jona mũrũ ïgure wadirore masituhaa mũa. Iri dihtare ïhmugũra mũare, arĩ yũhrimi Jesu.

Eropa arĩ weretuhaja gũare sihu waha wami daja.

Fariseo masa saduceo masa erã ñeri buherire wereñumi Jesu

Mr 8.14-21

⁵ Wũari ditarugue gũa taribujarã panre cãdijicãnirã árĩribũ. ⁶ Eropigu Jesu gũare weremi:

—Fariseo masa saduceo masa erã pan bũgacũ iiburire õaro masique mũa. Gũhya ãhraa, arĩ weremi gũare:

⁷ Ïgu eroparĩcũ pee wisirã gũa basi irire wereniguibũ.

—Mari panre mari aĩgãribiricũ ïagũ eropa arĩcumi ïgu, arĩ pepiribũ gũa.

⁸ Gũa eropa arĩrare masigu, gũare serẽpimi:

—¿Duhpirã panre mũa cãdijirare guñari mũa? Merogã gohra yũre umupeoa mũa. ⁹ ¿Masinibeari mũa? ¿Cinco mil umare cinco pan dipurure yũ nuha orare guñabeari mũa? ¿Erã baha yapira pũhrũ doce puiiri gohra mũa ujutu doborare guñabeari mũa? ¹⁰ ¿Eropirã daja siete pan dipurure nuha, cuatro mil umare yũ ora sãre guñabeari mũa? ¿Erã baha yapira pũhrũ dinucũ puiiri gohra mũa ujutu doborare guñabeari mũa? ¹¹ ¿Eropirã pan bũgacũ iiburire yũ werecũ duhpirã õaro peebeari mũa? Eropa arĩgũ pan gohrare arĩgũ iibea. Fariseo masa, saduceo

masa erã pan buğacũ iiburire ðaro iique, arĩğũ pan gohrare arĩğũ iibeaa, arĩ weremi ĩğũ guare.

12 ĩğũ eropa arĩ werecũ gũa masibũ. “Pan buğacũ iiburire,” arĩğũ pan gohrare arĩğũ iibirimi. Eropa arĩğũ fariseo masa, saduceo masa erã buherire arĩğũ iidi árĩrimi guare. “Erã ya buherire pebircãque,” arĩğũ iimi.

*Jesu diaye ta Cristo ĩğũ árĩrire wereñumi Pedro
Mr 8.27-30; Lc 9.18-21*

13 Eropi Jesu mera warã Cesarea Filipino waĩcũri maca pohro árĩri macague ejabũ gũa. Eropiğũ iri macague gũa ejara pũhrũ Jesu guare ĩğũ buherãre serẽpiñami:

—¿Nihino árĩcũri yũhũ masa erã pepicũ? arĩ serẽpimi ĩğũ.

14 —“Ñu waĩyegũ ãhrimi,” arĩma mũre gajirã. Gajirã “Elia ãhrimi,” arĩma. Gajirãpũ “Jeremia árĩbocumi o gajigũ Goãmũ yare weremũhtanirã mera majagũ árĩbocumi,” arĩma, arĩ yũhribũ gũa ĩğũre.

15 —¿Mũarũ pepicũ nihino árĩcũri yũhũ? arĩ serẽpimi ĩğũ guare daja.

16 Simo Pedropũ yũhrimi:

—Mũhũ Cristo Goãmũ obeodigũ ãhraa. Goãmũ ojocarigũ magũ ãhraa mũhũ, arĩ yũhrimi Simo Pedro.

17 —Simo, Jona magũ, mũhũ mucubirigũ ãhraa. Őpa arĩ mũ yũre yũhrira masa erã werera árĩbeaa. Yũ Pagũ umaro majagũpũ irire mũre masicũ iiami. 18 Mũre arĩğũ tiiaa. Mũhũ Pedro waĩcũğũ ãhraa. (Pedro arĩğũ utãye arĩğũ iipũ.) Iye utãye weca wũari wihire yũ iibodiro dopa ta yaharãpũre yuju curu wũari curu árĩcũ iigũca yũhũ. Eropiğũ watĩ ĩğũ yarã mera yaharãre tarinũgasome. Eropirã yaharã ne peamegue wasome. 19 Őmaro majagũ mari Opũ ĩğũ árĩro maja sawire mũre ogũra. Eropiğũ i yebaguere mũ iidorebiricũ yũ sã umarogue árĩğũ iidoresome. I yebaguere mũ iidorecũ umarogue yũ sã iidoregũra, arĩmi Jesu.

20 ĩğũ eropa arĩra pũhrũ guare ĩğũ buherãre weremi:

—Yũre “Cristo ãhrimi ĩğũ,” ne arĩ weresiribircãque gajirãre, arĩmi guare.

Jesu ĩğũ sĩriburiñere, ĩğũ masa mũriaburiñe sãre wereñumi

Mr 8.31-9.1; Lc 9.22-27

21 Irisubure ta Jesu guare ĩğũ buherãre ðaro werepehonũgami:

—Jerusalengue yũre waro gahmea dohpaguere. Eroque majarã, mũrã, pahia oparã, mari masare buherã sã yũre ñero iirãcoma. Eropirã yũre wejẽrãcoma. Eropa ta

ñero tariro gahmea yure. Eropigu uhrenu puhru ta masa mariaguca, arĩ weremi guare igu.

²² Igu eroparĩcũ peegu Pedropu gajipu ñarigã Jesure aĩgã, iguare opa arĩmi:

—Opu, eropa arĩbiricãque. Mu arĩro dopa wabiricãporo. Mure erã wejebiricãporo, arĩrimi igu Jesure.

²³ Igu eroparĩcũ peegu Jesu majinugaja, iguare opa arĩmi:

—Satana iro dopa wereniguigu iiaa muhu. Eropa arĩbiricãque. Mu pepiri masa ya pepiri ahraa. Goãmu ya pepiri árĩbeaa. Eropigu ya iiborore cãhmotadiaa muhu, arĩmi Jesu Pedrore.

²⁴ Igu eropa arĩra puhru guare weremi:

—Yujugu ya mera majagu árĩdiagu, igu gamero iidiarire duhucãgucumi. Eropigu igu ya mera majagu árĩri dipuwaja ñero tariugucumi. Eropa ñero tariqueregu ta yahare iiniguicãgu árĩgucumi. ²⁵ Yujugu masu igu ya árĩburi dihtare pepigu igu dederea wagucumi. Eropigu yujugu masu yaha árĩburi dihtare iigu árĩpehrerinuri ya mera umarogue ðaro árĩgucumi igu. ²⁶ Yujugu masu i yeba majare árĩpehrerire opaqueregu peamegue wagu ðarire wajatasome. Eropigu i yebague opaburi dihtare guñagu, igu sirigu waburire guñabigu igu siporã mera peamegue dederegucumi. ²⁷ Yuhu masu Goãmu obeodigu yaharã anyua mera i yebague dujariguca. Yu Pagu igu goesiriri mera dujarigu árĩpehrerã masare erã ñeri iira dipuwaja dipuwaja moagura. Erã ðaripure erã iicũ ðaro iigura erãre. ²⁸ Diaye arĩgu tiaa. Yujurãyeri mua õguere árĩrã mua siriboro core yure ya opu arigu árĩcũgue ñarãca, arĩ weremi Jesu.

17

Jesu igu dupure gohrotoñumi

Mr 9.2-13; Lc 9.28-36

¹ Eropi seis nuri puhru Jesu Pedrore, Santiagore, igu pagu magu Ñu sare umadigu utãgugue erã dihtare sihumariapu.

² Umarogue erã marijara puhru erã ihabeoro igu dupure gohrotopu. Igu diapo abe umu majagu iro dopa gohra goesiriyoro. Eropiro igu suhri goesiriri suhri ðaro boreriñe wayoro. ³ Mata iribojegue majarã Moise muru Elia muru sã dehyoañorã. Eropirã Jesu, Moise, Elia mera igu weretamucũ ñañorã erã urerã igu buherã. ⁴ Eropigu Pedro Jesure arĩpu:

—Opu, mari ohõ árĩcũ ðadiaa. Mu gamecũ uhre wihigã iirã. Mu ya wihigã, Moise ya wihigã, Elia ya wihigã iirã mari, arĩpu.

⁵ Īḡu eropa arī wereniguirisubu, imica curu ðaro gos-siriri curu erāre cāhmotacāyoro. Eropa wacū imica curu pohecague Goāmū Īḡu wereniguiiri busuyoro:

—Ihī yu magu yu mahiḡu āhrimi. Īḡu mera mucubiria. Īḡure peeque, arīri busuyoro.

⁶ Eropa arīro caricū peerā Īḡu buherā ūca mehmereja wañorā. ⁷ Erā eropa wara pūhrū Jesu erā pohroque eja, erāre buacare ñahrū:

—Wahgānugajaque mūa. Gūibiricāque, arīpū Īḡu erāre.

⁸ Īḡu eroparīcū erā ĩhabeo, Jesu dihtare ĩañorā. Gajirāre ĩabiriñorā.

⁹ Eropirā utāḡugue erā dijaricū Jesu erāre turaro mera arīpū:

—Dohparagā yure eropa warare gajirāre ne werebir-icāque. Yūhū masū Goāmū Īḡu obeodigu yūhū sīri masa mūriara pūhrū irire gajirāre wereque mūa, arīpū Jesu.

¹⁰ Īḡu buherāpū Īḡure serēpiñorā:

—“Cristo Goāmū beyedigu Īḡu ariboro core Eliare arimūhtarō gahmea,” arīma masare buherā. ¿Dohpa arīronore eropa arīri erā? arī serēpiñorā erā Īḡure:

¹¹ Jesu yūhrīpū:

—Diaye ta āhraa. Eliare arimūhtadoremi Goāmū árīpehrerire amumūhtabure. ¹² Ōpa arīḡu mūare arīḡu iiaa. Elia eratuhami. Īḡu eropa eraquerecū ta erā Īḡure ne ĩha masibirima. Eropirā erā gamero dopa ñero iinirā árīma Īḡure. Eropa ta iirācoma yu masure Goāmū Īḡu obeodigure. Erā eropa iicū ñero tarigūca yūhū, arīpū Jesu.

¹³ Īḡu eropa arī werecū erā peeñorā. “Elia,” arīḡu, Ńu waīyegure wereḡu iipū. Irire masiñorā pare erā.

Jesu ñama sīriiri mūrare dorecūḡure tauñumi

Mr 9.14-29; Lc 9.37-43

¹⁴ Eropirā utāḡugue mūrijanirā erā ūrerā Jesu mera dijararā ḡua pohroque erama bajarā masa árīroque. Erā eracū ĩaḡu yujugū ūmū Jesu pohroque eja, merejami.

¹⁵ —Opū, yu magure mojomoro ĩaque. Īḡu ñama sīriiri mūrare dorecūḡu āhrimi. Eropiḡu Īḡu ñetariaro tarimi. Ba-jasuburi peamegue mehmerejamūrimi Īḡu. Yujuyerisuburi diaguere yuri ñajamūrimi. ¹⁶ Eropiḡu mū buherā pohroque aī erarabū. Erā Īḡure ōaḡu wacū iimasibirama, arīmi Īḡu Jesure.

¹⁷ Jesu arīmi ero árīrāre:

—Dohpague majarā mūa ñerā āhraa. ¿Yure ne umupeo-birigohracāri? Yoari boje mūare buherabū yūhū. ¿Dipē

yoari boje yure mua garibori? Īgure aīgārique yure, arīmi Jesu.

¹⁸ Īgu majigure erā aī eratumajacū ĩha Jesu watire tuhri cóāmi. Eropigu mata ōagū wami ĩgu magū.

¹⁹ Pūhrū gua ĩgu buherā gua seyaro árīrā Jesure serēpibū: —¿Duhpirā guapū ĩgu magure watire cóāmasibirayuri? arī serēpibū gua.

²⁰ Jesu yūhrimi:

—Yure daberogā umupeoa mua. Diaye ta mūare weregu iiaa. Goāmure “Diaye ta iigu āhrimi,” mua arī umupeorā miriyegā mostazaye pegā mua umupeoquererā irigu utāgure “Sohogue waque,” mua arīcū, waha waroca. Goāmure eropa umupeorā árīpehrere iimasia mua. ²¹ Ino watire mua cóādiarā Goāmure būrigā serēro gahmea mūare. Eropirā ba duhuro gahmea Goāmure serēmōrā, arīmi Jesu guare.

Dipaturi Jesu ĩgu sīriburiñere ĩgu masa mūriaburiñe sāre wereñumi

Mr 9.30-32; Lc 9.43-45

²² Eropi Galilea yebague gua curicū, Jesu guare weremi:

—Yūhū masū Goāmū ĩgu obeodigu āhraa. Masa yure ñeha, gajirāguere yure wiarācoma. ²³ Eropa yure erā wiara pūhrū wejērācoma erā. Eropa erā wejēdigū ũhrenū pūhrū masagūca, arīmi ĩgu guare.

Īgu eropa arī werecū pee būrigā būjawerebū gua.

Goāmū wihi maja wajayeburire serēpiñuma gajirā

²⁴ Eropirā Capernaum macague gua ejacū, Goāmū wihi maja wajayeburire wajasea corerā Pedro pohrogue eja, ĩgure serēpiñama:

—¿Mūare buhegū Goāmū wihi maja árīburire wajayeri ĩgu? arī serēpima erā.

²⁵ —Wajayemi ĩgu, arī yūhrimi Pedro.

Īgu eropa arīra pūhrū wihigue ĩgu ñajacū ta Jesu Pedrore serēpimūhtami:

—Simo, ¿dohpa arī pepiri mūhū? ¿I yeba majarā oparā ñehmarāpūre waja aīri mū pepicū? ¿Erā mera majarāre wajaseari? ¿O gaji yeba majarāpūre wajaseari? arī serēpimi ĩgu Pedrore.

²⁶ —Gaji yeba majarāpūre wajaseama, arī yūhrimi Pedro.

Īgu eroparīcū Jesu weremi:

—Eropigu opū ĩgu ya yeba majarāre wajaseabirimūrimī. ²⁷ Eropa árīquerecū ta wajasea corerāre guacū iidiabeaa mari. Eropirā wajayerāca. Ditarugue waque. Erogue eja wejerīcārore mehyuque. Eropigu

waimu bamuhtadigure tara suaque. Eropigu igu waimu disirogue niyerusere bocajaguca mahu. Irise queoro wajacuroca. Yure, mua sare Goamu wihi maja ariburire era wajaseacu oaro queoro sihajaroca irise. Irisere bocajagu mari wajamoriñere wajayephegu waque, arimi Jesu Pedrore.

18

Jesu igu buherare era weca opu aribure wereñumi
Mr 9.33-37; Lc 9.46-48

¹ Irisubure gua Jesu buhera igu pohrogue eja serëpibu igare:

—¿Umaro majagu igu opu ariroguere gua mera majagu nihino wabocuri aripehrera weca opu? arı serëpibu gua.

² Gua eroparicu Jesu majigugare sihubeo, igugare gua watope duhudobomi. Duhudobotuhaja guare arimi.

³ —Diaye mware were purumujugura. Oa majiraga Goamure era opu gohra pepima. Eopira mua sa era iro dopa ta pepira, oarire gohrotora umaro majagu opu ariroguere waraca. Era iro dopa pepibira opu igu ariroguere wasome mua. ⁴ Eropigu umaro majagu igu opu ariroguere eropa pepicagu, ihı majiguga dopa pepigu ta gajira tauro opu wahami. ⁵ Eopira yahare iimora opa arigugare gamera, yu sare gahmea mua, arı weremi Jesu guare.

Nerire iicu guhya ahraa arı wereñumi Jesu
Mr 9.42-48; Lc 17.1-2

⁶ Eropigu opa werenemomi:

—Iga dopa arigu yure ne umupeogure weregura mware. Yujugu iga iro dopa arigure nerire iidoredigu igu netariaro tarigucumi. Gajigure masa igu wanugure wariye utaye mera dirisiu, wariyague igure coacu ñero wabocumi igu. Eropigu iga dopa arigure nerire iidoredigupu wariyague era coadigu tauro ñero tarigucumi. Igu turaro dipuwaja moasugucumi. ⁷ Masare nerire iicu iiri ahraa. Irire iira i yeba majara ñero tarima. Gajira nerire iidorema gajira masare. Era nerire iidorenirapu era tauro netariaro tariracoma.

⁸ “Mu mojoto mera ñero iigu iri mojotore mu tabe coabodiro dopa ta iri nerire duhuque. Irire duhubigu peamegue waguca. Eroguere ne peame yaribea. Mu mojotore mu coacu iri dca dihta cohmoboya. Eropigu mupu epasi ariqueregu ta puhru Goamu mera ariguca. Mu pe mojoto mera arigure peamegue igu coacu netariaro tariguca. Eropigu iri ñeri iiripure duhuque. Mu guburu

mera ñero iigu iri guburu sãre mu tabe cóãbodirop dopa ta iri ñerire duhuque. Irire duhubigu peamegue waguca. Eroguere ne peame yaribea. Mu guburure mu cóãcũ irisi dihta cohmoboya. Eropigu epasi arĩqueregu ta puhru Goãmu mera arĩguca. Mũhu pe guburu mera arĩgure mre peamegue cóãcũ mu ñetariaro tariguca. Eropigu iri ñeri iiripare duhuque. ⁹ Mu cuiru mera ñero iigu irirure mu gorawea cóãbodirop dopa ta iri ñerire duhuque. Irire duhubigu peamegue waguca. Eroguere ne peame yaribea. Mu cuirure cóãcũ iriru dihta cohmoboya. Yujupu cuiru mariquerecũ ta puhru Goãmu mera arĩguca. Mre pe cuiru mera arĩgure peamegue mre cóãcũ, mu ñetariaro tariguca. Eropigu iri ñeri iiripare duhucãque, arĩmi Jesu.

Oveja dederedigu queorire wereñumi Jesu

Lc 15.3-7

¹⁰ Eropigu gua sãre werenemomi:

—Ne, oã majirãgãre doobiricãque. Mre are arĩgu tiiaa. Erãgãre ñhadiburã anyua umarogue yu Pagu pohrogu eropa arĩniguima. ¹¹ Yũhu masu Goãmu igu obeodigu i yebague dederebonirãre taugu arigu iibu yũhu, arĩ weremi Jesu.

¹² Eropa arĩtuha õpa arĩ queorire ahmu wereniguimi.

—Ovejare ñhadibugũ cien ovejare opagu yujugu oveja dederea wacũ ñagu õpa iigucumi erãre ñhadibugũpu. Gajirã ovejare noventa y nueve ovejare erã bari campogue duhubo, dederedigũre amagu wagucumi. ¹³ Diaye ta arĩgu iiaa mre. Igũre bocagu burigã mucubirigucumi igũ. Gajirã noventa y nueve dahyarã mera mucubiridigu arĩqueregu erã tauro igũ bocadigũpũre mucubirigucumi. ¹⁴ Eropa ta mari Pagu umaro majagu oãgã iro dopa arĩrã sãre erã dederecũ gamebeami, arĩmi Jesu.

Mũ acaweregu mre ñero iicũ õpa iique, arĩñumi Jesu

Lc 17.3

¹⁵ Eropa arĩtuhaja õpa werenemomi Jesu:

—Mũ acaweregu mre ñero iicũ igũ mera weretamugu waque. Mũ seyaro irire weretamuque. Mũ eropa iicũ igũ mre peebocumi. Igũ peecũ “Mre dipaturi ne õpa iisome yũhu,” igũ arĩcũ mu acawereguere dipaturi wapicu iigũca mũhu. ¹⁶ Mre igũ peediabiricũ tamerare yujugu mera wadiagu, o perã mera wadiagu, erãre wapicũgã dipaturi igũre wereniguigu waque daja “Erã sã peeporo,” arĩgu. ¹⁷ Eropigu mu mera majarã sãre igũ peediabiricũ arĩpehrerã Jesu yarã mera gamenere igũre weresãque.

Eropirã Jesu yarã gamenererã sãre ĩgu peediabiricũ ĩarã Goãmure masibigu ñegu árĩro dopa iique ĩgure.

18 “Diaye ta mũare arĩgu iiaa. I yeba mua yaharã yaha dorerire oparãca. Eropirã mua i yebare iidorebirirare yu sã ɯmarogue arĩgu iidoresome. I yeba mua iidorerare yu sã ɯmarogue iidoregũca.

19 “Dipaturi mũare ire weregũra daja: Mũa perã Goãmure sererã, yujuro mera pepirã árĩcũ, yu Pagu ɯmaro majagu irire mũare ogũcumi. 20 Perã o ɯrerã yaharã yahare iimorã erã gamenerecũ yu sã erã mera ãhraa, arĩ weremi Jesu.

21 Pũhrũ Pedro Jesu pohrogue eja serẽpimi:

—Opũ, ɥu acaweregũ mũ yagu ĩgu dinucusuburi yure ñero iicũ ĩagu irire cãdijitugũcuri yũhũ? ɥO siete suburi ĩgu iicũ cãdijitugũcuri yũhũ? arĩ serẽpimi Pedro.

22 Jesu yũhrimi:

—Sietesuburi dihta mũre ĩgu ñero iirare mũ cãdijicũ ero wabeaa. Bajasuburi ĩgu mũre ñero iicũ sãre cãdijique, arĩmi ĩgure.

Pohro majagu gajigu ĩgu wajamorate ĩgu cãdijidiabirira queorire wereñumi Jesu

23 Eropigu Jesu õpa werenemomi gũare:

—Ūmaro majagu opũ arĩri werediacũ õpa ãhraa. Yujugu opũ ĩgu pohro majarãre erã ĩgure wajamorate wajayepheo dorediarĩñumi. 24 Erã wajamorate ĩgu queonũgacũ, ĩgure mohme corerãpũ wũaro wajamogũre ĩgu pohrogue aĩgãriñuma. Wajamogũpũ wũaro wajamoñumi opũre. 25 Eropigu ĩgu wajayemasibiricũ ĩagu ĩgu opũ ĩgure, ĩgu marapore, ĩgu porã sãre pohro majarã acu, erãre gajirãre duadiarĩñumi ĩgu wajamore wajaseagu. 26 ĩgu eropa duadiacũ wũaro wajamogũpũ mereja, ĩgu opũre turaro serẽñumi: “Opũ, gũare gajirãre duabiricãque. Mojomoro ĩagu corenique. Mũre wajayepheogũca,” arĩñumi ĩgu ĩgu opũre. 27 ĩgu eroparĩcũ peegu ĩgure mojomoro ĩagu, ĩgu wajamorate eropa ta cãdijipehocãñumi.

28 “ĩgu eropa iira pũhrũ wajamodigũpũ waha, gajigu pohro majagũre bocajañumi. ĩgũpũ merogã wajamoñumi ĩgure wajamodigũpũre. Eropa bocajagu yojaro mera ñeañumi ĩgure. “Yũre mũ wajamorate wajaye purumujuque duru,” arĩñumi ĩgu ĩgu mera majagũre. 29 ĩgu eroparĩcũ gajigu pohro majagũpũ mereja ĩgure bũrigã serẽriñumi: “Yũre mojomoro ĩaque. Merogã corenique. Mũre wajayepheogũra,” arĩriñumi gajigu pohro majagu ĩgure. 30 ĩgu eropa arĩ serẽquerecũ ta ĩgu yũhribriñumi. Eropigu ĩgu gajigu pohro majagũpũre peresu iidoreñumi

ne ĩgu wajayephocũgue. ³¹ Wũaro wajamodigu ĩgure merogã wajamogupure ĩgu eropa iicũ ĩha papũri, gajirã pohro majarãpũ erã opure weresãrã waũuma. ³² Erã eropa arĩ weresãcũ peegu erã opu erãre weresãdigure sihubeo õpa arĩũumi: “Mũhu ñetariagu ãhraa. Mũhu yũre bũrigã serẽcũ mu wajamorare cãdijipehocãrabugũ yũhu mũre. ³³ Mũre yũ eropa iiquerecũ ta mũpũ merogã wajamogupure cãdijibirayoro mũhu. Mu wajamorare yũ cãdijidiro dopa ta ĩgu sãre mu cãdijicũ õtariaboya. ¿Duhpigũ ĩgure mojomoro ĩabirari ĩgure eropa iigu mũhu?” arĩũumi ĩgu opu ĩgure. ³⁴ Eropa arĩgu bũrigã guagu, peresu iĩũumi ĩgu pohro majagure ne ĩgu wajayephocũgue, arĩ weremi Jesu.

³⁵ Eropigu õpa arĩ i queorire weretumi:

—Eropa ta iigucumi yũ Pagũ umaro majagu mũare. Mũa árĩpehrerã mũa acawererã mũare ñero iirare õaro mũa cãdijipehobiricũ ĩgu mũare dipuwaja moagucumi, arĩmi Jesu.

19

*Erã marasã nomere erã cóãcũ õabeaa, arĩ wereũumi Jesu
Mr 10.1-12; Lc 16.18*

¹ Irire ĩgu eropa arĩ werera pũru ĩgu Galilea árĩdigu Judea yebague gũare sihu wami. Dia Jordán waĩcũriya gajipũ masegue ejabũ. ² Erogue gũa wacũ bajarã masa gũare nũrusiagãma. Erã mera majarãre dorecũrãre õarã wacũ iimi ĩgu.

³ Eropi yujurãyeri fariseo masa gũa pohro erama. Jesure weresãdiarã, ñero ĩgu wereniguicũ peediarã, ĩgure õpa serẽpima:

—¿Mari marapore mari gamero cóãcũ õhari? ¿Mari doreripũ eropa ta iidoreri mũ pepicũ? arĩ serẽpima erã.

⁴ Jesu yũhrimi.

—¿Goãmũ yare erã gojarapũgue ne ire buhebiriniari mũa? Õpa arĩ gojara ãhraa: “Negohraguere i yebare ĩhacũnugudigu mũũ, nomeo sãre iipũ,” arĩ gojaũumi Moise. ⁵ Õpa ãhraa ĩgu arĩ gojanemora: “Eropigu mũũ ĩgu pagũ sũmarãre cohã wiria, ĩgu marapo mera árĩgucumi. Eropirã erã perã árĩquererã ta yuju dũpũ iro dopa ta árĩrãcoma,” arĩ gojaũumi. ⁶ Eropirã erã perã iro dopa árĩbeamã. Yuju dũpũ iro dopa ta árĩrã iima. Goãmũ doreri mera mojoto dirima. Eropirã duhubiricãro gahmea erãre, arĩmi Jesu erãre.

⁷ ĩgu eroparĩcũ fariseo masa serẽpima daja:

—Mũhu eropa werequerecũ ta õpa arĩ gojaũumi Moiserũ: “Mũ marapore cóãdiagu paperapũgue irire gojaque. Eropa

gojagũ iripũre mũ marapore mũ ora pũhrũ igore cóãmasia mũhũ,” arĩ gojañumi Moise. ¿Mũ arĩro dopa arĩquerecũ ta duhpigũ Moisepũ eropa arĩ gojayuri? arĩ yũhrima erã igũre.

⁸ Jesu yũhri gamemi erãre:

—Goãmũ dorerire mũa ñecũ sũmarã erã iidiabiricũ ñagu “Eropa ta wacuraporo,” arĩgũ, “Mũa marapore cóãmasia,” arĩ gojañumi Moise. Ñgu eropa arĩ gojara árĩquerecũ ta negohraguere mũa marasã nomere cóãcũ gamebiripũ. ⁹ Mũare arĩgũ tiiaa: Masũ ñgu marapo igo gajigũ mera ñero iibiriquerecũ ta igore cóãgũ, gajigo mera marapocũgũ, ñgu gajigo mera ñero iigũ iimi. Eropigũ ihĩ cóãdigo mera marapocũgũ sã igo mera ñero iigũ iimi, arĩmi Jesu.

¹⁰ Ñgu eroparicũ peerã, gũa ñgu buherãpũ õpa arĩbũ:

—Eropa mũmũ ñgu marapo mera erã game cóãbiricũ, maripũre ne marapo marirã árĩcũ õaboca gũare, arĩbũ gũa.

¹¹ Jesu yũhrimi gũare:

—Mũa arĩro dopa ta árĩpehrerã árĩmasibeama. Goãmũ marapocũdorebirinirã dihta eropa árĩmasima. ¹² Ñma marapocũmasibirã yujurãyeri ãhrima. Yujurãyeri mũa ero ta poyari masa mata nomere gamebirã masa dehyoama. Gajirã masa erã ãpiritõ diuri erã weanirãpũ marapocũmasibeama. Gajirã mũa mũmaro majagũ erã Opũ yare itamudiarã marapocũbeama. Eropirã oã marapocũdiabirã eropa ta pepicãrã, eropa ta erã árĩ ojogorocũcũ õhaa, arĩmi Jesu gũare.

*Majirãgã ya árĩburire Goãmũre serẽbasañumi Jesu
Mr 10.13-16; Lc 18.15-17*

¹³ Eropi masa majirãgãre Jesure mohmepiñadoremorã Jesu pohrogue añ erama. Eropa añ erarã, erã Jesure ñgu mojotore erãgãre mohmepidorediama. Eropirã erãgãre erã õaro árĩburire Goãmũre serẽbasadorediama Jesure. Erã eropa iicũ ñarã gũa ñgu buherã erãre turiribũ. ¹⁴ Gũa eropa turicũ ñagũ, gũare Jesu õpa arĩmi:

—Majirãgã yũ pohrogue ariporo. “Waque,” arĩbiricãque erãgãre. Erãgã Goãmũre erã opũ pepima. Eropirã ñgu mũmaro majagũ ñgu opũ árĩroguere oãgã iro dopa pepirã ãhrima eroguerẽ, arĩmi Jesu.

¹⁵ Eropa arĩtuhaja erã majirãgãre mohmepituhaja waha wami.

*Doberĩ opagũ Jesu mera weretamuñumi
Mr 10.17-31; Lc 18.18-30*

¹⁶ Ñgu eropa iira pũhrũ yujugũ masũ mamũ Jesu pohrogue eraa, serẽpimi igũre:

—Ne mǎhǎ ōagǎ buhegǎ āhraa. ¿Yǎ árǐpehrerǐnǎri Goǎmǎ mera árǐdiagǎ, ōarǐre iidiagǎ dinopǎre iibocuri yǎhǎ? arǐmi ĩgǎ.

17 —¿Dohpa arǐronore yǎre ōagǎ arǐ piyuri mǎhǎ? Goǎmǎ dihta ōagǎ āhrimi. Árǐpehrerǐnǎri Goǎmǎ mera árǐdiagǎ ĩgǎ dorerire iique, arǐmi Jesu.

18 —¿Di doreripǎre arǐgǎ iiri? arǐ serēpinemomi ĩgǎ.

Jesu yǎhrimi:

—Masare wejēbiricǎque. Gajǐgǎ marapo mera árǐbita. Yajabita. Gǎyabita. 19 Mǎ pagǎ sǎmarǎre umupeoque. Mǎ basi mahiro dopa ta mǎ pohro árǐgǎ sǎre mahique. I dorerire iiro gahmea, arǐmi Jesu.

20 —I dorerire ne tarǐnǎgabirǐmǎrabǎ yǎhǎ. ¿Ñeheno dǎhyari yǎ iinemoburi yǎ árǐpehrerǐnǎri Goǎmǎ mera árǐdiagǎ? arǐmi ĩgǎ Jesure.

21 ĩgǎ eroparǐcǎ peegǎ Jesu werenemomi:

—Mǎhǎ Goǎmǎ mera ōaro árǐdiagǎ mǎ yare árǐpehrerire duagǎ waque. Eropa duagǎ árǐpehreri niyerure mǎ wajatarare mojomorocǎrǎre oque. Mǎ eropa iicǎ wǎaro mǎ ya ǎmaroguere Goǎmǎ pohroguere árǐyuroca. Mǎ eropa iira pǎhrǎ yǎ mera majagǎ árǐbu arique, arǐ weremi Jesu.

22 ĩgǎ wǎaro opagǎ árǐpǎ. Eropǐgǎ Jesu ĩgǎre eroparǐcǎ peegǎ ĩgǎ oparǐre mojomorocǎrǎre odiabǐgǎ, turaro bǎjawere sǎabiri waha wami.

23 ĩgǎ eropa wacǎ Jesu gǎare ĩgǎ buherǎre werenemomi:

—Diaye ta mǎare arǐgǎ iiaa. Doberi oparǎ Goǎmǎre ĩgǎ opǎ árǐroguere erǎ wadiacǎ diasa āhraa. 24 Mǎare werenemogǎra: Camellopǎ awiru gobegǎgue ĩgǎ ñajatariwereadiacǎ masiya mara ĩgǎre. Eropa ta doberi opagǎ Goǎmǎ opǎ ĩgǎ árǐroguere wacǎ diasataria, arǐmi ĩgǎ.

25 ĩgǎ eroparǐcǎ gǎa ĩhamaria wa gǎa basi ōpa arǐbǎ:

—Yaho. ĩgǎ arǐro dopa ta diaye árǐcǎ, ne yujugǎ masǎre Goǎmǎ taubiribocumi ĩgǎ pohro waborore, arǐbǎ gǎa gǎa basi.

26 Gǎa eroparǐcǎ Jesu gǎare ĩhabeo, ōpa weremi:

—Masa erǎ bocatǐuro erǎ ōaro iira mera Goǎmǎ pohroguere wamasibeamá. Goǎmǎpǎ masare peamegue wabonirǎre taumasimi. ĩgǎ árǐpehrerire ōaro iimasipehocǎmi, arǐmi ĩgǎ gǎare.

27 ĩgǎ eroparǐcǎ Pedro ĩgǎre arǐmi:

—Peenique. Gǎapǎ gǎa ya árǐpehrerire apipehocǎbǎ mǎ mera warǎ. ¿Gǎa ōpa iirǎ dohpa árǐrǐre wajatarǎcuri gǎa? arǐmi ĩgǎ.

28 —Mũare diaye arĩgu tiiāa: Pehrerinũ pũhrũ árĩpehreri mama gohrotoroca. Irisubuguere yũhũ masũ Goãmũ ĩgu obeodigu yũ opũ doaro goesiriro doagũca yũhũ. Yũhũ ero doacũ mua sã doce gohra árĩnirã oparã árĩri mera doarãca. Eropirã Israe masare doce cururi majarãre beyerãca õarã sãre ñerã sãre. 29 Eropirã mua árĩpehrerã õari buherire yaha árĩburire iimorã, mua wirire, mua pagũ porãre, mua pagũ sumarãre, mua porãre, mua poerire apicãnirã wũaro wajatarãca. Eropirã árĩpehrerinũri Goãmũ mera õaro árĩrãca. 30 Dohpaguere bajarã oparã árĩnirã mũra irisubuguere bu árĩrã dujarãcoma. Eropirã dohpaguere bajarã bu árĩnirã mũra irisubure oparã gohrotorãcoma daja, arĩ weremi Jesu guare ĩgu buherãre.

20

Igui pohe mohmerã queorire wereñumi Jesu

1 Eropi dipaturi Jesu queorire weremi daja õpa arĩgu:

—Õmaro majagu opũ ĩgu árĩri werediãcũ pohe opũ iro dopa ãhraa. ĩgu pohe opũ boyo pãri merejacũ ĩgu pohere mohmemorãre sihugũ wañumi. 2 “Yujuse niyerusere yujunũ mohmeri wajare wajayegũra yujunũre,” arĩñumi. “Áũ,” arĩñuma mohmemorã. Erã eroparĩcũ pohegue mohmedoregu obeoñumi ĩgu erãre. 3 Eropigu mũague nueve árĩcũ doberi duarogue wañumi daja. Erogue ejagu, gajirã mohmebirãre ãañumi. 4 Eropa ĩagu erãre arĩñumi: “Mũa sã yaha pohere mohmerã waque. Oaro wajayegũra,” arĩñumi ĩgu. 5 Eropirã erã pohegue mohmerã wañuma. Eropi pohe opũ goeri boje árĩcũ, ñamicague tres árĩcũ sãre gajirãre mohmedoreñumi daja. 6 Eropi ñamicague cinco árĩcũgue doberi duarogue ĩgu wañumi daja. Erogue eja gajirã mohmeri moorãre ãañumi. Erãre arĩñumi: “¿Ne gajino iibiriquerẽ yujunũre ãaniguineacãri mũa?” arĩ serẽpiñumi erãre. 7 “Ne guare mohmeri mara,” arĩ yũhriñuma erã. “Mũa sã yaha pohere mohmerã waque,” arĩñumi erãre. Eropirã ĩgu arĩdiro dopa ta ĩgu ya pohere mohmerã wañuma.

8 “Eropi ñamicague mohme duhurisubugue árĩcũ pohe opũ ĩgu mohmerãre coregũre õpa arĩñumi: “Mohmerãre sihuque. Erã eracũ erãre wajayeque. Erã pũhrũgue mohmedorenirãre wajayemũhtaque. Erãre wajayetuha, gajirã sãre wajayetuha, yũ mohmedoremũhtanirãre wajaye ojogorocũque,” arĩñumi ĩgu. 9 Eropigu cinco árĩcũ mohmenũganirãre yujuse niyeruse wajayeñumi. 10 ĩgu eropa wajayecũ ãarã, “Guare tauñariro wajayegũcumĩ,” arĩ

pepiriñuma ïgu doremũhtanirãpũ. Erã sãre yujuropa ta wajayecãñumi. ¹¹ Eropirã erãre niyerure ïgu wajayetuhajacũ erã opũ mera papũri ïgure arĩñuma: ¹² “Oã gũa pũhrũgue mũ mohmedorenirãpũ yuju hora ta mohmeama. Gũapũ yujunũ ðaro mohmeneacarabũ. Ñero abe asi-ami gũare. Gũa eropa yoari boje mohmequerecũ ta gũa pũhrũgue mohmenũganirã sãre yujuropa wajayecãbũ mũhũ,” arĩ guañuma erã ïgu mera. ¹³ Erã eroparĩcũ peegu yujugũ erã mera majagure pohe opũ yũhriñumi: “Ne acaweregu, yujuse niyerusere wajayegũra, arĩrabũ mũare. Yũ eroparĩcũ yũhriabũ mũa. Eropigũ yũ arĩdiro dopa ta mũare wajayeabũ yũhũ. Queoro wajayeabũ mũare. Ne yajabirabũ mũare. ¹⁴ Eropigũ yũ wajayerare aĩ wihigue dujaaque. Ìre pũhrũ yũ mohmedoredigũ sãre mũare yũ wajayediropẽ ta wajayegũra. ¹⁵ Yaha niyeru ãhraa i. Eropigũ yũ gamero dopa ta i mera wajayegũra. ¿Gajirãre tauñariro yũ wajayecũ ïhaturiri mũhũ?” arĩñumi ïgu pohe opũ, arĩ weremi iri queorire Jesu.

¹⁶ Eropa arĩgu werenemomi ïgu:

—I queori arĩro dopa ta yaharã árĩmũhtanirãre erã pũhrũ yaharã árĩnirã sãre yujuro mera ogucumi Goãmũ ïgu ya ðarire. Eropirã árĩmũhtanirãpũ “Gũare onemogucumi,” arĩmasibeama, arĩ weremi Jesu.

Dipaturi Jesu ïgu sĩriburiñere ïgu masa mũriaburiñere wereñumi

Mr 10.32-34; Lc 18.31-34

¹⁷ Eropi Jerusalengue warã yujuro mera ta waniguirã, gũare ïgu buherãre sihubeotuha, gajipũgue gũare gũa seyarore aĩgãmi Jesu. Gũa seyaro gũa árĩcũ weremi.

¹⁸ —Peeque yũre. Dohpaguere Jerusalengue warã iiaa mari. Erogue yũ masure Goãmũ ïgu obeodigure ñeha, gajirãre orãcoma. Pahia oparãre, masare buherã sãre yũre orãcoma. Eropirã yũre wejẽdorerãcoma erã. ¹⁹ Eropa wejẽdorerã judio masa árĩbirãre yũre orãcoma. Erã eropa ora pũhrũ erãpũ yũre wereya, tãrarãcoma. Tuhaja, crusague pabiarãcoma yũre. Eropigũ yũ sĩrira pũhrũre ãhrenũ waboro gohra masa mũriagũca, arĩ weremi Jesu.

Santiago, Ñũ mera erã pago erãre serẽbasapo Jesure

Mr 10.35-45

²⁰ Eropigo Zebedeo marapo Santiago, Ñũ igo porã mera Jesu pohrogue eja, merejapo ïgure serẽbo arigo.

²¹ —¿Dohpa yũ iicũ gahmeri mũhũ? arĩpũ Jesu igore.

—Muhu opu ñajagu yu porã sãre dorerã acuque. Eropa acugu mu perari erãre doboque, arĩ serẽpo igo igo porã mera.

²² Jesu õpa arĩpu:

—Mua ñero tariborore masibiriquererã ta eropa serẽa mua. ¿Dohpaguere yu ñero tariboro dopa ta mua sã ñero tarirã yujuro bojebocuri mua? arĩpu Jesu igo porãre.

—Yujuro bojerãca, arĩ yuhriñorã Santiago Ñu mera.

²³ —Diaye ta ãhraa. Yu ñero taridiro dopa ta ñero tarirãca mua sã. Eropa mua tarimorã árĩquerecũ ta yu mera doremorãre muare yuhũ beyemasibea. Yu Pagupu amutuhami irire. Eropirã igu beyenirã dihta yu diayepure, yu copupure doarãcoma, arĩpu Jesu erãre.

²⁴ Eropirã gua gajirã diez igu buherãpu erã oparã árĩburire Jesure serẽcũ Santiago, Ñu sã mera guabu gua. ²⁵ Gua eropa guacũ ñagu Jesu árĩpehrerã igu buherãre sihu gameneo, õpa arĩ weremi guare:

—Goãmure masibirã oparãpu masare dorerã, pũriro mera dorema. ²⁶ Mupũ eropa iisome mua basi. Mua mera majagu opu árĩdiagu, árĩpehrerã igu mera majarãre itamugu árĩporo. ²⁷ Eropigu árĩpehrerãre doregu árĩdiagu pohro majagu iiro dopa ta árĩporo. ²⁸ Eropa arĩgu ta ãhraa yu sã. Masare dorebiragu arigu iibiribu. Yuhũ masu Goãmu igu obeodigu árĩqueregu ta i yebaguere masare itamugu arigu iibu. Eropigu bajarã masa erã ñero iira dipuwajare sĩribasagu arigu iibu. Eropigu masa peamegue wabonirãre taugu arigu iibu, arĩmi Jesu guare.

Perã cuiri ñhajabirãre ñacũ iĩnumi Jesu

Mr 10.46-52; Lc 18.35-43

²⁹ Eropi Jericógue árĩnirã gua wacũ bajarã masa Jesure nurusiamã. ³⁰ Eropi Jesu igu tarigãcũ perã cuiri ñhajabirã ma turo doanirã peema. Eropa peerã õpa arĩ gaguiniguinemoma:

—Opu Davi muru pãrami, masare taubu, guare mojomoro ñaque, arĩ gaguinima.

³¹ Erã eropa gaguiniguicũ masapu erãre turima.

—Ejarimaricãque, arĩma masa erãre. Erã eropa arĩquerecũ ta erã gaguiniguidiro tauro gaguiniguinemoma daja.

—Opu Davi muru pãrami, guare mojomoro ñaque, arĩ gaguiniguima daja.

³² Erã eroparĩcũ peegu Jesu ñagaja erãre sihubeo serẽpimi,

—¿Dohpa yu muare iicũ gahmeri? arĩ serẽpimi.

³³ —Opu, guare ñacũ iique, arĩ yuhrima erã.

³⁴ Erã eroparĩcũ Jesu erãre mojomoro ãami. Eropa mojomoro ãagũ erã cuirire mohmepimi. Ìgũ eropa mohmepicũ ta erã òaro ãha wama. Eropa ãanirã ãgũre nũrsia wahãma.

21

Jerusaléngue ejañumi Jesu

Mr 11.1-11; Lc 19.28-40; Jn 12.12-19

¹ Eropi Jerusaléngue gũa ejaboro core Betfagé waĩcũri macague ejamũhtanibũ gũa Jesu mera. Betfagé utãgũ Olivo waĩcũdigũ gubuye árĩbũ. Eroque ejagũ, gũare perãre ãgũ buherã mera majarãre Jesu ãgũ core obeomũhtami. ² Òpa doremi erãre:

—Si macague waque. Eroque ejarã, mata burrore ãgũ magũgã mera erã dirinugudigũre bocajarãca. Erãre boca, ãgũre diriradarire pãa aĩgãribasaque yũre. ³ Mũa eropa iicũ ãagũ, burro opu “¿Duhpimorã burrore pãri mũa?” ãgũ arĩcũ peerã òpa arĩ yãhrique: “Mari tĩgũ burrore gamebeoniami dohpa. Eropigũ dohparagã wiagũcumĩ ãgũ,” arĩ yãhrique ãgũre, arĩdore obeomi Jesu perã ãgũ buherãre.

⁴ Eropa iimi Goãmũ yare weremũhtadigũ ãgũ arĩ gojadiro dopa ta. Òpa arĩ gojañumi iribojegue:

⁵ Jerusalén majarãre òpa arĩ wereque: “Íaque mũa. Mũa opu mũa pohrogue ahrimi. ãgũ ta masare òaro iigũ ãhrimi. Burro magũgã weca arigũcumĩ,” arĩ wereque Jerusalén majarãre, arĩ gojañumi iribojeguere.

⁶ Jesu ãgũ obeonirã perã iri macague eja, ãgũ iidoreldiro dopa ta iĩnorã erã. ⁷ Burragore igo magũgã sãre aĩgãrima. Aĩgãrituhaja gũa weca maja suhrire tuwea aĩ, erã weca peobũ gũa. Gũa eropa iira pũhrũ Jesu ãgũgã weca mũribejami wabu. ⁸ Mũribejatuha, ãgũgã weca Jerusaléngue wami. ãgũ eropa aricũ ãarã masa bajarã ãgũ wari maha deco erã ya weca maja suhrire tuwea aĩ, sãopi mũhtama Jesure umupeorã. Gajirãpũ pũricũri dũpũrire mare apimũhtama “ãgũ wari maha òari maha árĩporo,” arĩrã. ⁹ Eropirã ãgũ core warã, ãgũ pũhrũ nũrsiarã mera òpa arĩ gaguĩnguima:

—Davi mũrũ pãramire marire itamubure umupeorã. Ihĩ Goãmũ ãgũ obeodigũ òaro arĩporo. Òmaro majagũre “Turagũ ahrimi,” arĩ umupeorã, arĩ gaguĩnguima masa.

¹⁰ Eropirã Jerusaléngue erã eropa ejacũ ero majarãpũ ãhamaria wama.

—Cue, ¿nihino ãhriri ihĩ? arĩ game serẽpima erã basi.

¹¹ Gajirã masa yãhrima:

—Ihĩ Goãmũ yare weremuhtagũ Nazare majagũ Jesu waĩcũgũ ãhrimi, arĩ werema erã masare.

Goãmũ wihigue ejañumi Jesu

Mr 11.15-19; Lc 19.45-48; Jn 2.13-22

¹² Pũhrũ Goãmũ wihigue ejami Jesu gũa mera. Iri wihigue eja ñaja wami. Ñajaja masa duadoarãre asũrã sãre boca jagũ erãre cohã wiucãmi iri wihigue. Eropigũ niyerure game gohroto doarã ya mesarire yomemuju, aĩ majipi beomurimi. Bujare duarã erã doari pẽrori sãre eropa ta iimi. ¹³ Eropa iigũ õpa arĩmi:

—Goãmũ yare erã gojarapũ õpa ãhraa: Goãmũ arĩmi: “Yaha wihi Goãmũ mera wereniguiiri wihi waĩcũroca,” arĩmi Goãmũ, ãhraa iigũ gojarapũ. Mũapũ i wihire Goãmũ wihire duadoarã game yajarã iiaa, arĩmi iigũ erãre.

¹⁴ Iigũ eropa iira pũhrũ cuiri ihajabirã, curimasibirã sã Goãmũ wihiguere iigũ pohrogue erama. Erã eropa eracũ erãre õarã dujacũ iimi iigũ. ¹⁵ Eropa õarire iigũ iicũ ãarã, pahia oparã, masare buherã sã guama iigũ mera. Eropirã majirãgã sã Jesure, “Davi mũrũ pãrami, masare itamubu, turagũ ãhraa mũhũ,” erã arĩ umupeocũ peerã guanemoma dipaturi erã. ¹⁶ Eropa guarã õpa arĩma Jesure:

—¿Erã eroparĩcũ peebeari mũhũ? Eropa arĩbiricãporo, arĩ dorema erã Jesure.

—Erã eroparĩcũ peea. ¿Goãmũ yare erã gojarapũre ire ne buhebiriri mũa?

Majirãgãre Goãmũre õaro umupeocũ iibũ mũhũ, ãhraa Goãmũ yare erã gojarapũ, arĩmi Jesu erãre.

¹⁷ Eropa arĩtuha erãre cóãgã, Betania waĩcũri macague eja, iri ñamire ero arĩmi.

Jesu yucũgũre higuera gũre sĩridoreñumi

Mr 11.12-14, 20-26

¹⁸ Gajinũ boyorogue Jerusalengue gũa dujaacũ, oaboami Jesu. ¹⁹ Eropa oaboagũ, ma tũro niguidigũ higuera gũre ãhanijagũ, irigũ dũcare omagũ warĩmi. Dũca maribũ irigũrũ. Pũri dihta arĩbũ. Dũca maricũ ãagũ Jesu õpa arĩmi:

—Irigũ yucũgũ ne dipaturi dũcacũsome, arĩmi iigũ.

Iigũ eroparĩcũ irigũrũ mata ñaidija wabũ. ²⁰ Irigũ eropa wacũ ãarã, gũa iigũ buherã ãhamaria wabũ.

—¿Duhpiro mata irigũ ñaidija wahãri? arĩ serẽpibũ Jesure.

²¹ Jesu yũhrimi:

—Ire guãaque mũa. Goãmũre õaro guãatura umupeoque. “Diaye ta eropa ta iigũcumĩ iigũ,” arĩrã, “Goãmũ iisome,” arĩbirã, yũhũ irigũre iidiro dopa ta iimasirãca

mua sã. Eropirã irigure yu s̄iridoreldro dopa ta tauro diasarire doremāsirãca mua Goãmure guñatura umupeorã. Irigu utãgu sãre “Dua aĩ, wuariyague cóãdigu árĩporo,” Goãmure mua arĩcũ irigu utãgu dija waroca. ²² Goãmũ irigu diague dijacũ iigucumi. Goãmure mua umupeocũ,” Yu serẽro dopa ta eropa waroca,” mua arĩ guñacũ, mua serẽldro dopa ta Goãmũ iigucumi, arĩmi Jesu.

Jesure doredigure serẽpiñuma pahia oparã, masare buherã, murã mera

Mr 11.27-33; Lc 20.1-8

²³ Eropi Goãmũ wihigue dujaja buhemi igu. Igu eropa buhecũ pahia oparã, masare buherã, murã mera igu pohrogue eraa serẽpima:

—¿Noa doreri mera ire eropa iigu iiri mũhu? ¿Noa mure Goãmũ wihigue árĩnirãre cóãdoreari? arĩ serẽpima erã.

²⁴ Erã eroparĩcũ Jesu yũhrimi:

—Mũare yũhu sã serẽpigura. Ōaro mua yure yũhricũ yu sã mũare yũhri gamegura. ²⁵ ¿Ñu masare igu waĩyecũ noano igure waĩyedoremũriyuri mua pepicũ? ¿Goãmũ doreyuri? ¿O masapũ doremũriyuri mua pepicũ? arĩ serẽpimi Jesu erãre.

Igu eroparĩcũ erãpu erã basi game wereniguima:

—¿Dohpa arĩ yũhrirãcuri mari? “Goãmũ Ñure doreñumi,” mari arĩcũ, “¿Goãmũ Ñure igu dorequerecũ ta duhpirã igu wererare peebirari mua?” arĩbocumi Jesu marire. ²⁶ Oã masapũ “Diaye ta Ñu Goãmũ yare weremũhtadigu árĩmi,” arĩ pepima erã. Erã eropa pepirã “Ñu igu waĩyecũ Goãmũ igure dorebiriñumi,” mari arĩcũ peerã masapũ guarãcoma mari mera, arĩma erã erã basi. ²⁷ Erã eropa arĩ werenigui amura pũhrũ Jesure yũhrima erã.

—Ñure waĩyedoredigure gua masibea, arĩma erã.

Erã eroparĩcũ peegu õpa arĩmi Jesu:

—Irisubu tamerare yu sã mua serẽpirare werebeaa mũare. Yu iirire doregure werebeaa mũare, arĩmi igu erãre.

Yujugu porã iira queorire wereñumi Jesu

²⁸ Igu eropa arĩra pũhrũ Jesu queori moa werenemomi erãre:

—¿Dohpa arĩ pepirãcuri yu õpa arĩ werecũ? arĩmi Jesu erãre. Perã pagu árĩñumi. Tĩgũpũre õpa arĩñumi erã pagu: “Mahgu, pohegue mohmegũ waque,” arĩñumi.

²⁹ “Wabeaa,” arĩ yũhririñumi igu magũ negohrare. Eropa arĩqueregu ta pũhrũguere pohegue wadiariñe árĩyoro daja

ĩgũre. Eropigũ wañumi ĩgũ. ³⁰ Eropigũ erã pagũ ĩgũ magũ ðũhyagũ pohrogue eja, ĩgũ tĩgũre ĩgũ arĩdiro dopa ta pohegũe wadorerĩnumi. “Áũ,” arĩriñumi ðũhyagũrũ. Eropa arĩqueregũ ta wabiriñumi ĩgũ. ³¹ ¿Nihinopũ ĩgũ pagũ ĩgũ dorediro dopa ta iiyuri? arĩ serẽpimi Jesu.

—Ĩgũ tĩgũrũ iĩnumi, arĩ yãhrima erã.

Erã eroparĩcũ Jesu weremi:

—Mũare ðiaye arĩgũ tiiaa. “Ñetariarã ãhrima,” mũa arĩnirãrũ Goãmũ opũ ĩgũ árĩroguere mũa wabodiro árĩquerecũ ta erãrũ warãcoma. ³² Ñu waĩyeri masũ buhegũ arigũ mũare “Óaro iirã árĩque,” arĩ wererimi. Eropa ĩgũ werequerecũ ta ĩgũre peebiribũ mũa. Eropirã ĩgũ dorerire yãhribiribũ. Erã ñerã arĩnirãrũ wajasea corerãrũ, nome ñero iiricũnirãrũ ĩgũre peenirã árĩma. Erã eropa pee gohrotorare ĩabũ mũa. Mũa eropa ĩaquererã ta mũarũ ne gohrotodiabirabũ. Eropirã peebirabũ mũa, arĩmi Jesu pahia oparãre, mũrã sãre.

Ñerã mohme corerã queorire wereñumi Jesu

Mr 12.1-12; Lc 20.9-19

³³ Eropi Jesu ðipaturi ĩgũ pepiri mera õpa arĩ queorire moa erãre buhenemomi:

—Gajisubũ mũare werenigui queoriñere yũ werecũ peeque daja, arĩmi. Yeba opũ árĩñumi. ĩgũ ya pohere igũdarire oteñumi. Otetuha, sãrĩrore nugu, iguire erã cãhra bujuburi gobere seañumi. Pohe decogue ãmari wihigã sãre iĩnumi ĩhadibumaja õaro. Eropigũ gajirãre ĩgũ ya pohe deco mera apiñumi erã mohme corera waja. Eropigũ iri pohere erãre mohme coredoretuhaja gaji yebague waha wañumi ĩgũ. ³⁴ Igui ñirisubũ arĩcũ opũ ĩgũ pohro majarãre ĩgũ ya pohe mohme corerã pohrogue obeoñumi. Pohe maja ĩgũ oteri ðũcare ĩgũ ya sero maja ðũcare aĩdoregũ obeoriñumi. ³⁵ Eropirã pohere mohme corerãrũ ĩgũ pohro majarãre ñero iĩnuma. Yujugũre turaro paa, gajigũre wejẽ, gajigũre utã mera deañuma. ³⁶ Pũhrũ pohe opũ ðipaturi ĩgũ pohro majarãre ĩgũ obeomũhtanirã tauñariro arĩri curu majarãre obeoriñumi daja. Eropirã pohere mohme corerã mũararo ta iĩnuma erã sãre daja.

³⁷ “Eropigũ ĩgũ obeotudigũ ĩgũ magũ árĩñumi. “Yũ magũrũre umupeorãcoma,” arĩgũ ĩgũre obeoriñumi. ³⁸ ĩgũ eropa arĩ pepiquerecũ ta pohere mohme corerã ĩgũ magũ ĩgũ aricũ ĩarã, õpa arĩñuma: “Pohe opũ magũ ahrimi ĩgũ. ĩgũre wejẽ cóãcãrã mari. Eropiro i pohe mari ya pohe ðujaroca,” arĩriñuma erã basi. ³⁹ Eropa arĩrã ĩgũre ñeha

pohe turogue aīgā, wejēcāñuma erā ĩgure, arīmi Jesu erāre. Eropa arītuhaja Jesu erāre serēpimi:

⁴⁰ —¿Pohe opu arigū dohpa iigūcuri ĩgū ya pohere mohme corerāre? arī serēpimi Jesu pahia oparāre, mūrā sāre.

⁴¹ —Īgū gajirāre pohere mohme coremorāre gohrotogūcumi. Arīmūhtanirāre ñetarianirāre wejēgūcumi. Īgure dūcare queoro wiamorāpūre mohmedoregūcumi, arī yūhrima erā.

⁴² Erā eroparīcū Jesu werenemomi erāre:

—¿Goāmū yare erā gojarapū ire yūre ĩgū arī gojarare buhebiriri mūa?

Ihī Cristo utāye iro dopa ta āhrimi. Masa Cristore gamebirācoma. Erā gamebiriqerēcū Goāmū ĩgure beye opu acumi. Goāmūpū irire iimi. Īgū eropa iicū ĩarā “Ōataria,” arī pepia mari, arī gojañuma iribojegure.

¿Irire ne buhebiriri mūa? ⁴³ Eropigū mūare arīgū tiiaa yūhū. Goāmū ĩgū dorerire iirā ĩgū ōari orire opaboya mūa. Mūa iibiricū ĩha gajirāpūre ogūcumi Goāmū. Gajirā masapū ĩgū dorero dopa ta iirācoma. ⁴⁴ Yūre gamebirāpū yū dipuwaja moamorā ñero tarirācoma, arīmi Jesu pahia oparāre, mūrā sāre.

⁴⁵ Iri pohe opu queorire ĩgū arīcū peerā, “Īgū iri queori mera ‘Ñerā mohme corerā iro dopa āhrima,’ marire arīgū weresāgū iicumi ĩgū,” arī pepiñorā erā. ⁴⁶ Eropa arī pepirā, ĩgure ñeadiariñorā oparāpū. Masapū Jesure umupeo “Goāmū yare weremūhtadigū āhrimi ĩgū,” arīmuriñorā erā. Erā eropa arīrā arīcū pahia oparā sã masare güirā, Jesure ñeabiriñorā.

22

Wūari bosenu queorire wereñumi Jesu

¹ Eropi dipaturi gajī queori mera erāre buhenūgami Jesu:

² —Ūmaro majagū ĩgū opu árīri werediācū i queori iro dopa āhraa. Yūju yeba majagū tauro opu árīñumi. Eropigū ĩgū magū ya árīburi bosenu iinūmi. Īgū mojoto diriri bosenu árīyoro. ³ Eropigū opu ĩgū pohro majarāre bosenu ĩarā arimorāre sihudore obeoriñumi. Erāpū aridiabiriñuma. ⁴ Eropigū gajirāre sihudoregū obeoriñumi daja ĩgū pohro majarāre. “Yū sihubeorāre ōpa arī wereque. ‘Mari baburire iituhama. Wecūare, wecūagā ōaro diicūrāre wejē amutuhajama. Eropiro árīpehleri bosenu majare iituhajama. Eropirā bosenu majare barā arique,’ arī wereque erāre,” arī obeoriñumi ĩgū opu ĩgū

pohro majaräre. ⁵ Erä eropa werera pührü ĩgu sihubeonirä eropa pepicãnuma. Bosenüre ĩarã wabiriñuma. Yujugu ĩgu pohegue waha, wañumi. Gajigu ĩgu mohmerire ĩagu wañumi. ⁶ Gajirãpü ĩgu pohro majaräre eräre wererä eraniräre ñeha, eräre ñero iñuma. Eropii wejêcãnuma. ⁷ Erä eropa iicũ peegu, opupü guañumi. Gua, erä eropa wejêra dipuwaja dipuwaja moadoregü ĩgu surarare oboñumi. Eropirã surara eräre wejêpehocã, erä ya macare soecãnuma. ⁸ Erä eropa iira pührü, opu ĩgu pohro majaräre õpa arĩñumi: “Bosenü majare amutuharama. Yu sihumũhtanirä yu bosenüre ĩabonirä aribeama. Ñerã ährima erä. ⁹ Eropirã macare wari marigue müa bocajaräre bosenüre ĩamoräre sihuque,” arĩñumi ĩgu ĩgu pohro majaräre. ¹⁰ ĩgu eroparĩcũ ĩgu pohro majarã marigue waha, árĩpehrerã erä bocajaräre, ñeräre, õaräre wereñuma. Erä eropa sihura pührü ejañuma erä bajarã. Õaro bosenü erä iiri taribure masa ujtũritaria wañuma.

¹¹ “Ero erä doacũ opupü yujugure mojoto diririnü majañe suhriro sañabigure ĩañumi. ¹² “Ne, acaweregü, ¿duhpigü mojoto diririnü majañe suhrirore sañabiriqueregü ñajarari müñü?” arĩ serẽpiñumi opu. ĩgu eropa serẽpicũ masupü werebiriñumi. ¹³ ĩgu eropa werebiricũ ĩagu ĩgu pohro majaräre õpa arĩñumi opupü: “Īre ñeha ĩgu mojotorire dirique. ĩgu guburi sãre dirique. Dirituha aĩ wiria, disiporogue naitĩarogue ĩgure cõãque. Erogue ĩgu turaro ore, bajawereri mera gũcũri cũridihugũcumi,” arĩñumi opu, arĩ weremi Jesu.

¹⁴ ĩgu eropa arĩra pührü õpa arĩtumi ĩgu:

—I queori wadiro dopa ta Goãmü bajarã masa ĩgu sihubeonirä árĩquererã ta bajamerãgã ĩgu mera dujarãcoma, arĩ weretumi Jesu.

Oparã ya wajare wajayeburire gajirã serẽpiñuma Jesure Mr 12.13-17; Lc 20.20-26

¹⁵ ĩgu eropa arĩra pührü fariseo masa waha, ĩgure weresãburire erä basi weretamuñorã erä. Erä ĩgure baja serẽpiri mera eräre ĩgu gajiropa yuhricũ weresãmorã iiriñorã. ¹⁶ Eropirã erä mera majaräre, Herode ya curu majarã sãre, Jesure serẽpidorerã oboñorã. Erãpü gũa pohrogue eraa, Jesure serẽpima:

—Buhegu, diaye wereniguü gũyari marigu mü árĩcũ masia gũa. Eropigü opu árĩcũ sãre bu árĩgu ĩgu árĩcũ sãre müñü yujuropa ĩhaa. Eropigü Goãmü yare diaye mü werecũ sãre gũa masia. Masa suacũ sãre erä suabiricũ sãre queoro werea. ¹⁷ Eropigü guare wereque. ¿Roma

majarã árĩpehrerã tauro opũ árĩgũre gobierno majare marire wajayero gahmeri mã pepicũ? ¿Mari doreripũ irire wajayedoreri? arĩ serẽpima Jesure.

¹⁸ Jesupũ erã ĩgũre ñero weresãdiarire masigũ õpa arĩ yũhrimi:

—Gũyaricurã ähraa mã. ¿Duhpirã yũ ñero wereniguicũ peediari mã? ¹⁹ Dohparagã niyerusere oparã yare wajayeburisere aĩrique. Irisere ĩarã, arĩmi ĩgũ.

Ĩgũ eroparĩcũ peerã niyerusere aĩgãrima erã. ²⁰ Erã irisere aĩ eracũ ĩagũ ĩgũ serẽpimi erãre:

—¿Nihino gohra masũ waĩcũgũ tuhyari irisere? ¿Noa waĩ tuhyari? arĩ serẽpimi ĩgũ.

²¹ —César waĩcũgũ masa tauro opũ masũ ĩgũ waĩ sã tuhyami iriseguere, arĩ yũhrima erã.

Erã eroparĩcũ peegũ Jesu weremi:

—Irisubu tamera masa tauro opũ yare ĩgũre oque. Goãmũ yare Goãmũpũre oque, arĩmi Jesu.

²² ĩgũ eroparĩcũ peerã, pee ¼ca wa, waha wama.

Saduceo masa Goãmũ ĩgũ sĩrinirãre masurire serẽpiñuma Jesure

Mr 12.18-27; Lc 20.27-40

²³ Eropi irinũ ta yujurãyeri saduceo masa Jesure ĩarã erarã gũa pohrogue erama. Saduceo masa “Goãmũ sĩrinirãre masusome,” arĩ pepirã árĩma. Eropirã õpa arĩma erã ĩgũre:

²⁴ —Buhegũ, õpa arĩ gojañumi Moise: “Yujugũ ĩgũ tĩgũ marapocũgũ porã mariqueregũ ta ĩgũ sĩricũ ĩgũ pagũ magũre ĩgũ tĩgũ marapo árĩdigore marapocũro gahmea. Eropigũ ĩgũ tĩgũ mũrũ ĩgũ porãcũbodiropã dopa ta porãcũro gahmea ĩgũ pagũ magũre. Eropirã igo porã ĩgũ tĩgũ mũrũ porã iro dopa ta árĩrãcoma,” arĩ gojañumi Moise, arĩma erã saduceo masa.

²⁵ Irire eropa arĩ weretuha i queorire werenemoma erã Jesure:

—Yujugũ porã siete gohra árĩñorã. Erã tĩgũpũ marapocũ, porã marigũ ta sĩria wapũ. Eropigũ gajigũ ĩgũ pagũ magũ sã ĩgũ tĩgũ marapo árĩdigore marapocũpũ. ²⁶ ĩgũ eropa marapocũra pũhrũ ĩgũ sã ĩgũ tĩgũ mũrũ iro dopa ta porã mariqueregũ ta sĩria wapũ. Eropigũ ĩgũ pagũ magũ ĩgũ tĩgũ mũrũ iro dopa ta porã mariqueregũ ta sĩria wapũ. Eropa dihta wañorã yujugũ porã gohra. Ne porã mariquererã ta sĩripehrea wañorã erã. ²⁷ Erã marapo sã erã pũhrũ sĩria wapo pare, arĩ õpa serẽpima Jesure: ²⁸ ¿Ne, Goãmũ árĩpehrerãre ĩgũ sĩrinirãre masucũ nihino marapo árĩgocuri igo? Erã siete árĩpehrerã igore marapocũnirã

árĩñorã. ¿Eropigo nihino marapo gohra árĩgocuri igo? arĩ serẽpima erã.

²⁹ Jesu yũhrimi erãre:

—Goãmũ yare erã gojarapũ wereniguirire ne masibea mũa. Eropirã Goãmũ ĩgũ turari sãre ne masibea mũa. Eropiro mũa pepiripũ ne diaye árĩbeaa. ³⁰ Sĩrinirã erã masa mũriara pũhrũ erã anyua iro dopa ãhrima. Erã ũa nome mera marapocũbeama eroguerẽ. ³¹ Sĩrinirã mũra erã masa mũriaboropũre weregura. ¿Goãmũ iribojegue ĩgũ arĩrare ne buhebiriri mũa? Őpa arĩñumi ĩgũ: ³² “Yũhũ Abrahã, Isaa, Jacobo erã opũ ãhraa,” arĩ wereñumi Goãmũ iribojegue. Erã sĩrira pũhrũgue “Erã opũ ta ãhraa,” arĩ wereñumi Goãmũ. Eropirã erã sĩrinirã mũra ĩgũ masunirã árĩrã erã ojocarirã ãhrima, arĩmi Jesu.

³³ ĩgũ eropa arĩ buhecũ peerã bajarã masa pee ũa wama.

Őatariariñere doreriñere wereñumi Jesu

Mr 12.28-34

³⁴ Eropĩ saduceo masa Jesure erã yũhrimasibiricũ peerã, fariseo masapũ gũa pohrogue gamenerema daja. ³⁵ Eropĩgũ erã mera majagũ, masare buhegũpũ Jesu ĩgũ ñero arĩcũ peediagũ gũa serẽpirimi ĩgũre.

³⁶ —Buhegũ, ¿Goãmũ ya doreri ōatariaro doreripũ diñe doreripũ ãhriri? arĩ serẽpimi ĩgũ.

³⁷ Jesu ĩgũre yũhrimi:

—“Bũrigã mũa sĩporã mera, mũa turari mera, mũa ōaro guñari mera Goãmũre mũa Opũre mahique,” arĩmi Goãmũ. ³⁸ Iñe doreriñe ōatariariñe ãhraa. ³⁹ Iñe doreriñe pũhrũ gajiñe doreriñe sã ōataria: “Mũ basi mahiro dopa ta mũ pohro árĩrã sãre mahique,” arĩmi Goãmũ. ⁴⁰ Iñe peñe doreriñere iirã árĩpehreri gaji dorerire iipehorã iiaa mari. Goãmũ yare weremũhtanirã iribojegue erã gojara sãre iirã iiaa mari eropa iirã, arĩ weremi Jesu.

¿Noano acaweregũ ãhriri Cristo? arĩ serẽpi ãañumi Jesu

Mr 12.35-37; Lc 20.41-44

⁴¹ Eropĩ fariseo masa ero gamenererã erã árĩcũ Jesu erãre serẽpimi:

⁴² —“Cristo mari Pagũ ĩgũ obeodigũ ãhrimi,” arãa mũa. ¿Nihino ãhriri ĩgũ ñecũ iribojegue majagũ, mũa pepicũ? arĩmi ĩgũ.

—Cristo Davi mũrũ pãrami árĩgũcumĩ, arĩ yũhrima erã.

⁴³ Jesu weremi:

—¿Davipũ Cristo ñecũ árĩqueregũ ta duhpigũ opũcũturiayuri Cristore? ¿Duhpigũ eropa opũcũdoreyuri Espĩritu Santo ĩgũre? Őpa arĩñumi Davi mũrũ:

44 Goãmũ yũ opũre õpa arĩmi: “Ohõ yũ diayepũ dorebu doaque. Eropigũ mũre ãhaturirãre mũre tarinũgabasagũra yũhũ mũ pohro majarã dopa arĩmorãre,” arĩmi Goãmũ yũ opũre, arĩ gojañumi Davi mũrũ.

45 Eropa arĩ gojagũ ta Davi mũrũ opũcũñumi Cristore. Cristo Davi mũrũ opũ ãhrimi. ¿Eropigũ Davi mũrũ Cristo ñecu arĩqueregũ duhpigũ opũcũyuri Cristore? arĩ weremi Jesu.

46 Ìgũ eropa arĩ werecũ erã ìgũre ne yũhrimasibirima. Eropirã iripẽta serẽpi duhucãma erã ìgũre. Eropirã ìgũre gũirã dipaturi serẽpi ãbairima ìgũre pare.

23

Masare buherã, fariseo masa sã erã ñero iirire wereñumi Jesu

Mr 12.38-40; Lc 11.37-54; 20.45-47

¹ Eropi masa bajarãre gũa sãre Jesu weremi daja.

² —Masare buherã, fariseo masa sã Goãmũ doreri Moisere ìgũ apirare wererã ãhrima erã. ³ Erã eropa wererã arĩcũ mũare erã dorerare iipehoque mũa. Eropa iiquererã ta erãre ãhacũbiricãque mũa. Erã buhero dopa ta iibeama erã. ⁴ Masare baja dorema erã bocatũbiririre. Eropa dorequererã ta erã dorero dopa ta masa erã iimasibiriquerecũ ãrã erãre itamubeama.

⁵ Masa erã ãacũ dihta õaro ii ãhmuma erã. Goãmũ yare erã gojarapũri erã duhsãri comogãre pagañari comogãre erã diaporire dirituma masare erãre ãadorerã. Erã dũca sãre dirituma iri comogãre. Eropirã erã suhri sãre gajirã ya tauro yoari arĩriñe ahmu sañama, “Gũa Goãmũre umupeotaria,” arĩ ãadorerã. ⁶ Eropirã bosenũri arĩcũ oparã erã doarigue doadiama. Eropirã mari buheri wirigue sãre õari doari dihtare doadiama erã. ⁷ Eropirã doberi duarogue gajirã õaro umupeori mera erãre bocatĩri serẽcũ gahmema erã. Erãre “Buhegũ,” arĩ piyucũ gahmema.

⁸ “Mũarũre “Buhegũ,” arĩ gajirã piyucũ iibiricãque. Mũa arĩpehrerã yuju curu majarã ãhraa. Eropigũ mũare buhegũ yũhũ yujugũ ta ãhraa. ⁹ Eropirã i yeba majarãre “Mari pagũ,” arĩrã erãre umupeorã iica. Ne eropa arĩ iibiricãque. ðmaro majagũ dihta mari Pagũ ãhrimi. Ìgũ dihtare umupeoro gahmea marire. ¹⁰ Eropirã masũre “Opũ,” arĩbiricãque. Mũa opũ yũhũ Cristo yujugũ ta ãhraa. ¹¹ Pohro majagũ iro dopa mũare itamugũ ìgũ ta arĩgũcumi opũ arĩbu. ¹² Yujugũ opũ arĩdiagũ docanũgaja arĩcorecãro gahmea. Eropigũ docanũgagũ “Bu arĩgũ ãhraa yũhũ,” arĩ pepigũ ìgũ ta arĩgũcumi opũ arĩbu, arĩ weremi Jesu.

Judio masare buherã, fariseo masa mera erã gũyarire wereñumi Jesu

13 Īgũ eropa arĩra pũhrũ erãre werenemomi:

—Mũa masare buherã, fariseo masa sã ñero tarirãca. Gũyaricũrã ãhraa mũa. Gajiropa mũa arĩ buhecũ peerãpũ Goãmũ Īgũ opu áriroguere wasome. Mũa sã eroguere wasome. Eropa arĩ buherã eroguere wadiarãre cãhmotaa mũa.

14 “Mũa masare buherã, fariseo masa sã ñero tarirãca. Gũyaricũrã ãhraa mũa. Wapeweyarã nome erã wajamocũ ĩha erã ya wirire emacãa mũa erã nomere. Eropa erãre mojomoro ĩabiriquererã masa erã ĩhuro yoari boje Goãmũre serẽ ĩhmuraa mũa masare. Mũa eropa iira dipuwaja gajirã tauro dipuwaja moagũcumi mũare.

15 “Mũa masare buherã, fariseo masa sã ñero tarirãca. Gũyaricũrã ãhraa mũa. Wũariyague taribuja, yoaro maja macarigue wahaa mũa mũa dorerire iibure omarã. Mũa dorerire iibure boca, ĩgũre buhea. Mũa eropa iicũ ĩgũpũ mũa tauro ñero iinũgagũcumi. Eropirã ĩgũre peamegue wabu áricũ iiaa mũa.

16 “Mũa ñero tarirãca. Cuiiri ĩhajabirã erã ĩhajabiro dopa ta masibirã ãhraa mũa. Eropa áriquererã ta gajirãre buheraa mũa. Ōpa arĩ buheraa mũa: “‘Goãmũ wihi mera iigũra,’ arĩ waĩpeogũ ĩgũ arĩdiro dopa ta iibiricũ ōaroca,” arĩ buheraa mũa. “‘Goãmũ ya wihi maja oro mera iigũra,’ arĩ waĩpeodigũpũre ĩgũ arĩdiro dopa ta ii ojogorocũro gahmea,” arĩ iri sãre buheraa mũa. 17 Cuiiri ĩhajabirã erã ĩhamasibiro dopa ta masibirã ãhraa mũa. Pee masibirã ãhraa. ¿Dinopũre umupeoro gahmeri? Orore umupeobiricãro gahmea. Goãmũpũ iri orore ĩgũ ya wihi áricũ ōari iimi irire. Eropirã ĩgũ ya wihipũre umupeoro gahmea mũare. Eropiro mũa buheripũ queoro wabeaa. 18 I sãre buheraa mũa: “‘Goãmũ wihi maja mesa mera iigũra,’ arĩ waĩpeodigũ ĩgũ arĩdiro dopa ta ĩgũ iibiricũ ōacãroca,” arĩ buheraa mũa. “‘Iri mesa weca mari aĩgã apira ta mera iigũra,’ arĩ waĩpeodigũpũre ĩgũ arĩdiro dopa ta ii ojogorocũro gahmea,” arĩ buheraa mũa queoro buhebirã. 19 Cuiiri ĩhajabirã erã ĩhamasibiro dopa ta masibirã ãhraa mũa. ¿Dipũ iri gohra áhriri mũa pepicũ? Goãmũre masũ ĩgũ ora mũra iri gohra áribiriñaria. Iri mesa weca Goãmũre ĩgũ ocũ, ōari wahaa iri mesa weca áriiri. Eropiro iri mesa bu áriiri mesa áribeaa. Goãmũre erã ora weca tauro ōari mesa ãhraa. 20 Eropigũ “Goãmũ wihi maja mesa mera iigũra,” yujugũ arĩ waĩpeogũ, iri mesa weca apira mera ĩgũ eropa arĩgũ iicumĩ. Eropiro mũa buheripũ queoro wabeaa. 21 Goãmũ ĩgũ ya wihi majagũ áhrimi. Eropigũ

“Goāmũ wihī mera eropa iigura,” arī waīpeogu diaye ta Goāmũ waī mera eropa arīgu iicumī. ²² Goāmũ umaro majagu āhrimi. Eropigu “Um̄aro mera iigura,” yujugu arī waīpeogu, Goāmũ mera ta eropa arīgu iicumī. Eropiro m̄a buheripũ queoro wabeaa.

²³ “M̄a masare buherā, fariseo masa s̄a ñero tarirāca. Ḡyariçurā āhraa m̄a. Bari s̄aricũ iirisarire menta, anis, comina waīçurisarire aī deara p̄hrũ diez quēri iiaa. Eropa iira p̄hrũ yujuquē ta aīgā apia Goāmũ wihigue Goāmũ dorerire iimorā. M̄a eropa iri dorerire iiquererā ta tauro òaro iirire guñabeaa m̄a. Diaye iirire, mojomoro ñarire, Goām̄ure umupeorire ne guñabeaa m̄a. D̄ucare m̄a aīrare merogā Goāmũ wihire apicũ òhaa. Eropa iirā òpa iinemoque: Diaye iirire, mojomoro ñarire, Goām̄ure umupeorire iique. ²⁴ Cuiiri ñhajibirā erā ñabiro dopa ta diaye majare masibirā āhraa m̄a. Òpa iiaa m̄a. M̄a dorerire iidorerā árīpehrerire òaro iidiaa yujuñegā d̄hyaro mariro. M̄a eropa iiquererā ñerip̄ure duhubeeaa.

²⁵ “M̄a masare buherā, fariseo masa s̄a ñero tarirāca. Ḡyariçurā āhraa m̄a. M̄a dorero dopa ta m̄a soroparire, m̄a ihriri parire m̄a coeweeaa m̄a òarire ii ñmurā. Eropa coequererā ta m̄a siporārip̄ure coebeaa. Eropirā m̄a árīricurire m̄a pepirip̄ure ne òarire gohrotobeeaa. Gajirā yare yajadiarā, m̄a basi dihta pagarire aīdiarā árīrā, eropa dihta pepia m̄a. ²⁶ Cuiiri ñhajibirā erā ñhajibiro dopa ta masibirā āhraa m̄a fariseo masa. M̄a pepirire gohrotom̄htaque m̄a. Eropirā òarip̄ure iique. M̄a eropa iirā masa erā ñhuro s̄are òarā gohra árīrāca pare m̄a.

²⁷ “M̄a masare buherā, fariseo masa s̄a ñero tarirāca. Ḡyariçurā āhraa m̄a. Masa comorore boreri mera erā s̄ūhuma. Eropirā masa iri comorore erā ñacũ òari comoro dehyoa. Iri comoro eropa òaro deyoquerecũ ta, poheca majague iigu boara ḡoariguere ñaya mara. ²⁸ Eropa ta m̄a s̄a masa erā ñhabeoro òarā dehyoa m̄a. Eropa òarā deyorā m̄a árīquerecũ ta m̄a pepiriguere ñeri ḡyariçurā árītariacā boanirā iro dopa, arī weremi Jesu.

Judio masare buherā, fariseo masa s̄are iigu dipuwaja moaborore wereñumi Jesu

Eropa arītuhaja òpa arīnemomi daja:

²⁹ —M̄a masare buherā, fariseo masa s̄a ñero tarirāca. Ḡyariçurā āhraa m̄a. Goāmũ yare werem̄htanirā iribojegue majarā erā masa goberire òaro amuraa m̄a. Eropirā iribojegue majarāre òaro iinirā m̄urare erā wéanuginirā m̄urare òaro amuraa m̄a. ³⁰ Eropa iirā òpa arī wereniguiraa m̄a: “Iribojegue mari ñecũ s̄amarā m̄urague erā iidiro

dopa guapũ iibiriboya. Irisubugue árĩnirãre Goãmu yare weremuhtanirãre guapũ wejëbiriboya,” arĩ wereniguiraa mua. ³¹ Eropa arĩrã árĩrã, mua ñecu sumarã mura Goãmu yare weremuhtanirã murare erã wejëñirã erã árĩcũ wererã iica. Erã wejëñirã pãramerã mua árĩri sãre mua basi weresãrã iica mua. ³² Mua ñecu sumarã mura iidiro dopa ta ii ojogorocũque.

³³ “Aña iro dopa ñerã ãhraa mua. Aña porã iro dopa ãhraa mua. Goãmu mua ñeri dipuwajare ãgu peamegue ãgu cóãboro core duhrimasibeeaa mua. ³⁴ Eropigu Goãmu yare weremuhtarãre, gajirã masirãre, gajirã muare buhemorãre mua pohro obeogura. Yu eropa obeocũ muapũ yujurãyeri erãre wejërãca. Gajirãre crusague pabiarãca. Gajirãre mua buheri wirigüe tãrarãca. Erãre macari nũcu nurũsuarãca. ³⁵ Mua eropa iirã árĩpehrerã ñeri marirãre mua wejëra dipuwaja dipuwajacurãca. Abel murare Cain ãgu wejëra dipuwajare dipuwajacurãca muapũ. Árĩpehrerã ãgu puhru árĩnirãre õarãre erã wejëra dipuwaja sãre dipuwajacurãca mua sã. Eropirã Goãmu wihi pohro waimurãre mua soeburi mesa pohro Zacariare mua acawererã mura wejëñorã. ãgupa Berequias magu árĩpu. Eropirã ãgu sãre erã wejëra dipuwaja dipuwajacurãca mua. ³⁶ Diaye muare weregũ ta iiaa. Erã árĩpehrerãre erã wejëra dipuwaja dohpague majarã dipuwajacurãcoma, arĩ weremi Jesu.

Jerusalén majarãre burigã bujawereñumi Jesu

Lc 13.34-35

³⁷ Eropa arĩtuhaja õpa werenemomi Jerusalén majarãre bujawere ãgu:

—Mua Jerusalén majarã, mua acawererã mura Goãmu yare weremuhtanirãre wejëmurĩnirã árĩma. Eropirã Goãmu obeonirãre, utã mera deamurĩnirã árĩma. Cãreña buro igo igo porãre igo quëdupuri mera igo coã oyaro dopa ta bajasuburi opadiarabũ muare. Muapũ irire ne yure gamebirabũ. ³⁸ Dohpaguere mua árĩri maca cóãra maca árĩroca. ³⁹ Diaye muare arĩgu tiiaa. Puhrugue dujarigũca daja yuhũ. Eropa yũ dujaricũ ãarã mua yure “Goãmu turari mera arĩgu õaro ariporo,” arĩrãca. Yure mua irire arĩboro core, dipaturi yure ãasome mua, arĩmi Jesu.

24

Goãmu wihi cóãra wihi árĩroca arĩñumi Jesu

Mr 13.1-2; Lc 21.5-6

¹ Eropi Goãmu wihire Jesu ãgu wiriara puhru gua ãgu buherã iri wihi maja wirire ãarã,

—Ōatariari wiri āhraa. Īaque mu sã, arĩbu gua ĩgure.

² Jesu yũhrimi:

—I wihi majare dohpaguere ĩaraa mua. Muare weregu tiiaa. I wihi árĩpehreri mua ĩara i utã sã cohmopehrea waroca. Ne yujuye utãye dujasome, arĩmi ĩgu gũare.

I mũmũ pehreburiñere wereñumi Jesu

Mr 13.3-23; Lc 21.7-24; 17.22-24

³ Pũhrũ Olivo waĩcũdigũ utãgũgue eja, erogue doami Jesu. Ero ĩgu doacũ gua ĩgu buherã gua seyaro ĩgu pohrogue eja serẽpibũ.

—Wereque guare. ¿Dohpárĩcũ eropa warocuri mu arĩdiro dopa waro? ¿Pehrerinũ coregã mu dujariboro coregã dohpa wanũgacũ ĩarãcuri gua? arĩ serẽpibũ gua.

⁴ Jesu yũhrimi:

—Ōaro iyuque mua. Eropirã gajirã muare erã gũyarire peebiricãque. ⁵ Bajarã masa “Cristo āhraa yũhũ,” arĩ gũyarã árĩrãcoma. Erã eropa gũyacũ peerã bajarã masa Goãmũ yare duhurãcoma. ⁶ Mua pohrogã gajirã masa erã gamewejẽcũ peerãca mua. Eropirã yoarogue majarã erã sã erã gamewejẽcũ peebeorãca. Eropa peequererã ta ne wũaro irire pepibiricãque. Eropa ta wamũhtaroca. Eropa wacũ pehburinũ dũhyaniroca dohpa. ⁷ Irisubure yuju yeba majarã gaji yeba majarã mera gamewejẽrãcoma. Eropirã yujugũ opu yarã gajigũ opu yarã mera gamewejẽrãcoma. Eropirã masa bajarã oa mera sĩrirãcoma. Gajirã dorecũ ñero tarirãcoma. Eropiro bajasuburi i yeba ñohmeroca. ⁸ Eropa ñero tariquererã i yeba majarãre tauro erã ñero tariboro dũhyaa dohpa. Ñero tarinirãcoma dohpa.

⁹ “Irisubure gajirã muare ñeha ñero iidorerã orãcoma muare gajirã oparãre. Erã eropa ocũ muare wejẽrãcoma. Yaharã mua árĩri dipuwaja árĩpehrerã muare ĩhaturirãcoma. ¹⁰ Irisubure bajarã yaharã árĩnirã yũre cóarãcoma. Eropirã erã mera majarãre Jesu yarãre erã ĩhaturirãcoma. Eropirã erã mera majarã erã árĩquerecũ ta ĩhaturirãcoma. Eropirã erã mera majarã erã árĩquerecũ ta erãre ñero iimorãre erãre orãcoma. ¹¹ Irisubure bajarã “Goãmũ yare weremũhtarã āhraa,” arĩ gũyarã árĩrãcoma. Eropirã bajarã masa erã gũyarire peerã árĩrãcoma. ¹² Irisubure ñetariaro iirãcoma masa. Eropirã erã mera majarãre mahinemosome. ¹³ Eropirã muare erã ñero iiquerecũ ta muare erã ñero iirare yujuro bojerã yũre duhubiricũ Goãmũ muare taugũcumi. Eropigũ ĩgu pohrogue muare opagũcumi. ¹⁴ Eropiro i ñari

buheri árīpehreroguere i yebaguere erā wereburi buheri árīroca. Goāmũ ĩgu opu árĩrire árīpehrerāre wererācoma árīpehrerā iri buherire erā masiboro dopa. Eropa werera pũhũ pehrerinũ nũgaroca.

15 “Ñetariagu Goāmũ yare goroweogu aribure weremuriñumi iribojegue Daniel mũrũ Goāmũ yare weremũhtadigu. Irisubure ĩgu ñetariagu Goāmũ wihigue ĩgu niguicũ ĩarāca mũa. (Irire buhegu peeporo.) 16 Ero ĩgu niguicũ ĩarā, Judea yeba árĩrāpũ utā yucague oma duhriporo. 17 Irisubure masa ñero tarirācoma. Eropirā yojaro mera duhrirā waporo. Irisubure erā wiri weca maja pũrigue árĩrā wihi pohecague erā yare aĩrā ñajabiricāporo. 18 Eropirā irisubure gajirā erā poerigue árĩrā erā ya suhrire wihigue árĩri suhrire aĩrā pihabiricāporo. 19 Irisubure nijiposā nome, erā porāre mihrirāre oparā nome sã mojomorocũrā nome dujarācoma. 20 Eropirā Goāmũre õpa arĩ serēque: “Puhiró árĩcũ gũa judio masa soorinũ árĩcũ sãre gũa oma duhriburinũ árĩbiricāporo,” arĩ serēque mũa Goāmũre. 21 Irinũrire masa ñero tarirācoma. I yebare ĩgu ĩhacũnugura pũhũ masa ñero tarimuriñuma. Iri eropa árĩquerecũ ta árīpehreri pũriri erā ñero taridiro tauro ñetariaro tarirācoma masa pehreburiñũ coregāre. Eropa ñero erā tarira pũhũ, dipaturi eropa ñero tarisome i yeba pare. 22 Eropigu Goāmũ irinũrire bajamenũrigā árĩcũ ĩigũcumi. ĩgu eropa ĩbiricũ ne yujugu masũ taribiribocumi. Eropigu ĩgu beyenirā erā tariborore bajamenũrigā ñero tariburinũrire apigũcumi Goāmũ.

23 Irisubure gajirāre pee masi ĩaque: “ĩaque. Ohõ āhrimi Cristo,” erā arĩcũ erāre peebiricāque. “Ero āhrimi Cristo,” erā arĩcũ sãre peebiricāque. 24 “Cristo āhraa,” arĩ gũyarā, “Goāmũ yare weremũhtarā āhraa,” arĩ gũyarā árĩrācoma irisubure. Eropirā Goāmũ ĩgu beyenirāre gũyarā, erā deyoro moarire ii ĩhmurācoma. Goāmũ yare erāre cóacũ iidiarā iirācoma erā gũyari masa. 25 I árīpehrerire wereyumũhtaa mũare iri eropa waboro core. Eropirā õaro pee masiyuque mũa. 26 Gajirā masa mũare õpa arĩcũ, “Masa marirogue āhrimi Cristo,” erā arĩcũ eroguererē ĩarā wabiricāque. Eropirā erā “Ohõ iri wihigue āhrimi ĩgu,” erā arĩcũ sãre erāre peebiricāque. 27 Yũhũ masũ Goāmũ ĩgu obeodigu guñaña mariro dujarigũra. Bupu ĩgu miacũ mũarore, abe mũririrogue, abe ñajarogue yojaro mera ĩgu miabeoro dopa ta eropa ta dujarigũra yũhũ. 28 Masa erā ñeri erā ĩinĩguirogue erogue Goāmũ erāre erā ñeri dipuwaja dipuwaja moagũcumi erāre, arĩ weremi Jesu.

Cristo i yebague ĩgu dujariborore wereñumi ĩgu
Mr 13.24-37; Lc 21.25-33; 17.26-30, 34-36

²⁹ Eropigu guare werenemomi:

—Masa ñero erã tariranuri puhru abe umu majagu, ñami majagu sã boyo duhurãcoma. Erã eropa wacũ necã dipu yuri dijariroca. Eropiro umaro maja sã yeba sã burigã ñohmeroca. ³⁰ Irisubu ta yuhu masu Goãmu ĩgu obeodigu yu dehyoacũ masa ĩarãcoma. Eropirã árĩpehreri cururi majarã orerãcoma. Eropirã yu turari mera, yu gosesiriri mera, umaro maja imica curu weca i yebaguere yu dujaricũ ĩarãcoma masa. ³¹ Corneta busuroca. Eropigu yaharã anyuare árĩpehrero i yebaguere obeogura. Eropirã árĩpehrerogueru yaharãre yu beyenirãre erã aĩ gameneorãcoma.

³² “Higueragu irigu waricũrire masia mua. Irigu yucugu pũcũcũ ĩarã, “Bojori merogã duhyaa,” arĩ masia mua. ³³ Eropa ta irigu waro dopa ta masique mua. I árĩpehreri yu arĩra eropa wacũ ĩarã, “Cristo dujariboro merogã duhyaa,” arĩ masique mua. ³⁴ Diaye arĩgu tiiaa muare. Irisubu majarã erã sĩriboro core árĩpehreri yu arĩdiro dopa ta eropa waroca. Umaro i yeba sã pehrea waroca. ³⁵ Yu wereniguiripu ne pehresome. Árĩpehreri yu arĩdiro dopa ta eropa waha ojogorocuroca.

³⁶ “Irinure yu dujariburinure, iri hora sãre masibea yuhu. Anyua sã irire masibeama. Masa sã ne masibeama. Yu Pagu dihta irire masimi.

³⁷ “Noé ĩgu árĩrasubu majarã erã arĩdiro dopa ta i yeba majarã yu dujariboro coregã eropa ta arĩrãcoma. ³⁸ Yeba miriboro core masa baha, ihri, iĩnuma. Eropirã mojoto diriñuma. Noé sã erã wãadiru dohodirugue erã ñajaboro core murraro ta iimũririñuma masa. ³⁹ Mata turaro deco ahri, guñaña mariro yeba miria wayoro. Masa sã miripehrea wañuma. Guñaña mariro ero miridiro dopa ta, yuhu masu Goãmu ĩgu obeodigu i yebaguere guñaña mariro dujariguca. ⁴⁰ Irisubure yare umupeorãre beye gameneodoreguca. Eropigu poheguere perã mohmerã árĩcũ yujugure aĩrãcoma yu mera árĩbure. Eropigu gajigu ero dujagucumi. ⁴¹ Irisubure nome perã nome erã yujuro erã ojodũcare erã biurã árĩcũ yujugore aĩrãcoma. Eropigo gajigo ero ta dujagocumo.

⁴² “Õaro guñamasi coreque. Yuhu mua opu yu dujariburinure ne masibea mua. ⁴³ Ire guñaque. Yajari masu ĩgu wihigue ĩgu ñajaa ĩgu yajaborore wihi opu masigu, iri ñamire ĩgu carĩbiriboñumi yajari masure coregu. Eropigu yajari masure ĩgu ya wihire ñajaridorebiriboñumi. ⁴⁴ Wihi

opu ĩgu ya wihire corero dopa ta mua sã yu ariburire core áriñque. Yuhu masu Goãmu ĩgu obeodigu i yebare dujarigu guñaña mariro ariguca. Eropirã yahare eropa iiniguirã yure coreque, arĩmi Jesu.

Yujugu mohme coregu ĩgu opure ðaro umupeorire, gajigu ĩgu ðaro umupeobiriri sãre wereñumi Jesu

Lc 12.41-48

⁴⁵ Eropi Jesu ðpa arĩ queorire moami buhenemobu:

—Mohme coregu ĩgu opure umupeogu pee masigu ðpa ta áhrimi. Opu curigu wagu, mohme coregure ĩgu wihire apimi. ĩgu apigupu doregu árigucumi. Eropigu barisubu áricũ mohme coregu gajirã mohmeri masare barire gueremi. ⁴⁶ Eropigu opu ĩgu ya wihi dujarami. ĩgu dujaracũ ĩagu mohme coregu ĩgu opu ĩgu dorediro dopa ta iipehogu árigu, mucubirigu árigucumi. ⁴⁷ Diaye mware arigu tiaa. ĩgu eropa iicũ ĩagu ĩgu opu áripehreri ĩgu yare ĩhadibugpu apigucumi ĩgure. ⁴⁸⁻⁴⁹ Ñegu mohme coregupu ðpa ta áhrimi. “Yu opu yoja deyobeami,” arigu, gajirã mohme corerãre paa, wãaro baha, ihri, mererã mera meregucumi. ⁵⁰ ĩgu eropa iirisubu ĩgu opu guñaña mariro dujaragucumi. ĩgu dujararinure ne masibeami mohme coregu. ⁵¹ Eropa dujaragu ñegu ĩgu iirare pee ĩgure turaro dipuwaja moagucumi. Eropigu guyaricurã erã warogue ĩgure cóagucumi. Eroguere ĩgu turaro ore, bujawereri mera ĩgu gucuri cūridihugucumi, arĩmi Jesu.

25

Diez nome iira queori mera buheñumi Jesu

¹ Eropi Jesu dipaturi ðpa arĩ queorire weremi buhenemogu daja:

—Umaro majagu ĩgu opu áriñi diez nome erã wadiro dopa áhrraa: Diez nome áriñuma. Yuju ñami erã, erã sihãgori dipuru mera mojoto diridigare bocatĩrirã wañuma. ² Erã mera majarã nome cinco nome pee masibirã nome áriñuma. Gajirã nomepu cinco nome pee masirã nome áriñuma. ³ Pee masibirã nomepu erã sihãgori dipurure yuy dicuri dipurure aĩquererã erã gohrotoburire aĩabiriñuma. ⁴ Pee masirã nomepu erã sihãgori dipurure dicuri dipurure aĩ gaji yuy dipuru sãre erã gohrotoburire aĩañuma. ⁵ Eropirã mojoto diridigu ĩgu yoja deyobiricũ erã nome wuja pūricũ carĩa wañuma. ⁶ Eropiro ñami deco gaguinigpu carĩñumi: “Peeque, mojoto diridigu arigu carimi. ĩgure bocatĩrirã arique,” arĩ gaguiniguigpu carĩñumi. ⁷ ĩgu eroparicũ peerã erã nome wahgã, erã sihãgori dipurure

amuñuma. ⁸ Eropirã pee masibirã nomepũ, gajirã nomere pee masirã nomere õpa arĩñuma: “Gua sihãgori dipuru yairo iiaa. Eropirã merogã mua ya uyure oque guare,” arĩ serẽriñuma erã nome. ⁹ Erã eropa arĩ serẽquerecũ ta pee masirã nomepũ õpa yũhriñuma: “Gua ya uyũ mũare ocũ árĩpehrerãre sihajabiriboca. Eropirã uyũ duarã pohro mua basi asũrã waque,” arĩ yũhriñuma pee masirã nomepũ. ¹⁰ Eropirã pee masibirã nome asũrã wañuma. Erã eropa wara pũhrũ mojoto diridigu erañumi. Īgu eracũ ĩha, erã amutuhanirã nome pee masirã nome ĩgure bocatĩriñuma. Īgu mojoto diriri bosenugue ĩgu mera ĩarã wañuma. Eropirã erã bosenũ erã iri wihigue ñajara pũhrũ, disiporore biacãñumi. ¹¹ Pũhrũgue pee masibirã nomepũ erariñuma. “Opũ, guare pãgũque,” arĩriñuma erã nome. ¹² “Diaye mũare arĩgu tiaa. Mũare masibea yũhũ,” arĩñumi ĩgu erã nomere.

¹³ Yũ dujariburinũre iri hora sãre ne masibea mua. Eropirã pee masirã nome erã yare õaro amutuha erã coreldiro dopa ta õarã, ñeri marirã ãhri coreque mua sã, arĩ weremi Jesu.

Niyeruseri oroseri queorire wereñumi Jesu

¹⁴ Eropa arĩ weretuha õpa arĩ queorire moa buhenemomi daja gua sãre:

—Irisubu yũ dujariburinũ ĩgu wihi opũ iidiro dopa árĩroca. Wihi opũ árĩñumi. Īgu gajipũgue curigu wagũ, ĩgure mohme corerãre sihubeoñumi. Eropigu erãre ĩgu yare coredoreñumi. ¹⁵ Eropa coredoregu erã dibu masiopẽ erãre niyeruserire wajapagariserire oñumi. Yujugure cinco mil seri oroserire oñumi. Gajigure pe mil seri oñumi. Gajigure yuju mil seri oñumi. Erãre otuha waha wañumi. ¹⁶ Eropigu cinco mil seri ĩgu odigu mata iriseri mera gajinore asũñumi. Īgu asũra mera duagu gaji cinco mil seri wajatanemoñumi ĩgu. Eropigu diez mil seri mera dujañumi. ¹⁷ Eropigu pe mil seri ĩgu odigu mata ĩgu ora pũhrũ ta iriseri mera gajinore asũñumi. Īgu asũra mera duagu gaji pe mil seri wajatanemoñumi. Eropigu wapicũri mil seri opañumi. ¹⁸ Yuju mil seri ĩgu odigupũ gobe seha, iri gobegue dibuñumi iriserire dibugũ.

¹⁹ “Pũhrũ yoara pũhrũ erã opũ goerañumi. Eropa eragu ĩgu niyeruseri mera erã wajatanemorare queobu ĩgure mohme corerãre sihubeoñumi. ²⁰ Eropigu cinco mil seri ĩgu odigu ĩgu opũ pohrogue eja, diez mil seri wiañumi ĩgure. “Cinco mil seri yũre ohabũ mũhũ. Īañatagũ. Iriseri mera gaji cinco mil serire wajatanemoabũ,” arĩñumi

ĩgũre. ²¹ “Ōaro iiaya mũhũ. Mũhũ ðagũ yũ dorediro dopa ta iidigũ ãhraa. Eropigũ dohpaguere wũaro mũ mohmeborore apigũra. Eropigũ yũ mera mucubirique,” arĩñumi ĩgũ opũ ĩgũre. ²² Eropigũ pe mil serire aĩdigũ sã ĩgũ opũ pohrogue eja, wereñumi ĩgũre: “Pe mil seri yũre ohabũ mũhũ. ĩañatagũ. Iriseri mera gajiseri pe mil seri wajatanemoabũ,” arĩñumi ĩgũ. ²³ “Ōaro iiaya mũhũ. Mũhũ ðagũ yũ dorediro dopa ta iigũ ãhraa. Merogãre ðaro iiaya mũhũ. Eropigũ dohpaguere wũaro mũ mohmeborore apigũra. Eropigũ yũ mera mucubirique mũhũ,” arĩñumi ĩgũ opũ.

²⁴ “Eropigũ yuju mil serire aĩdigũpũ, ĩgũ opũ pohrogue eja, wereñumi ĩgũre: “Opũ, mũhũ turaro mohmedoregũ ãhraa. Eropigũ gajirãre mohmedorequeregũ oteri moogu árĩqueregũ ta mũ dihta iri dũcare aĩa. ²⁵ Mũhũ eropa árĩgũ árĩcũ mũre gũiabũ. Eropa gũigũ gobe seha, iri gobegue mũ niyuserire dibucãbũ. ĩañatagũ. Ohõ ãhraa mũ ya niyuseri,” arĩñumi ĩgũ ĩgũre. ²⁶ “Mũhũ ñegũ butagũ ãhraa. Yũre, ‘Mũhũ gajirãre mohmedorequeregũ mũ dihta iri dũcare aĩa,’ arãa mũhũ yũre. ²⁷ ¿Mũhũ yũre eropa árĩqueregũ ta, duhpigũ yũ óraserire niyeru diburi wĩhigue dihbubirari mũhũ? Mũ erogue dibugũ iriseri mera wũaro wajatanemoboaya. Irire mũhũ iicũ dujaragũ wajatanemoboaya yũhũ,” arĩñumi opũ ĩgũre. ²⁸ Eropa arĩgũ gajirã ĩgũre mohme corerãre doreñumi ĩgũ: “Niyeruserire emaque ĩgũre. Diez mil seri opagũpũre oque. ²⁹ Árĩpehrerã baja oparãre onemogũra. Moorãpũre merogã erã opaquerecũ ta erãre emapehocãgũra. ³⁰ Ihĩ mohme coregũ duhpibu árĩbeami. Naitĩarogue ñerogue cóãcãque ĩgũre. Erogue ĩgũ turaro ore, bujawereri mera ĩgũ gũcũri cũridihugũcumi,” arĩñumi opũ, arĩ weremi Jesu.

Dipuwaja moaborore wereñumi Jesu

³¹ Eropi Jesu werenemomi:

—Yũhũ masũ Goãmũ ĩgũ obeodigũ árĩpehrerã anyua mera doregũ dujarigũca. Eropa dujarigũ opũ doarogue yũ gosesiriri mera doagũca. ³² Eropa yũ doacũ, yaharã anyua i yeba majarãre árĩpehrerãre yũ pohro gameneorãcoma. Erãre gameneora pũhrũ pe curu dũca wagũra erãre. Oveja ĩhadibugũ ĩgũ iiro dopa ĩgũ cabrare ĩgũ dũca waro dopa ta masare dũca wa dobogũra. ³³ Eropa dũca wagũ oveja dopa árĩrãre ðarãre yũ diayerũ dobogũra. Eropigũ cabra dopa árĩrãre, ñerãre yũ corũpũ dobogũra. ³⁴ Yũ eropa iira pũhrũ yũhũ árĩpehrerã tauro opũ yũ diayerũ doarãre ðpa arĩ weregũra: “Yũ Pagũ mũare ðaro iigũcumi. I

yebare ìhacũnugudigugue ta mua ya árĩburire ìgu opu árĩrore amuyutuhami Goãmũ. Eropirã dohpaguere ìgu amuyudiroguere árĩrã arique. ³⁵ Yũ oaboacũ ìarã mua yũre barire obu. Yũ ñemesibucũ mua yũre tĩabũ. Mua pohro yũ curicũ yũre ìha masibiriquererã yũre òaro bocatĩribũ mua. ³⁶ Suhri marigu yũ árĩcũ ìarã mua yũre suhrire sãbũ. Dorecucũ mua yũre ìarã aribũ. Peresu yũ árĩcũ sãre yũre ìarã aribũ,” arĩgura òarãre. ³⁷ Yũ eroparĩcũ peerã òarãpũ yũre serẽpirãcoma: “Opu, ¿dohpárĩcũ mu oaboacũ mure barire ori gua? ¿Dohpárĩcũ mu ñemesibucũ mure tĩari gua? ³⁸ ¿Dohpárĩcũ mure ìha masibiriquererã òaro bocatĩriri gua? ¿Dohpárĩcũ mu suhri marigu mu árĩcũ mure suhri sãri gua? ³⁹ ¿Dohpárĩcũ mu dorecucũ o peresugue mu árĩcũ sãre mure ìarã ejari gua?” arĩrãcoma yũre. ⁴⁰ Erã eropa arĩ serẽpicũ peegu yũhũ òpa erãre yũhriɣuca: “Diaye muare arĩgũ tĩiaa. Oã yaharã mera majagũ bu arĩgũ arĩquerecũ ta, mua ìgũre eropa ta òaro iibũ. Eropa arĩgũre eropa iirã, yũre iiro dopa iirã tĩiaa mua,” arĩ weregura erãre.

⁴¹ “Òarãre yũ eropa arĩ werera pũhũ, copũpũ árĩrãre ñerãre yũ árĩpehrerã tauro opu òpa arĩgura: “Goãmũ ìgu dipuwaja moamorã ãhraa mua. Yũ mera dujabiricãque. Peamegue waque mua. Iri peame ne yaribea. Wafĩ, ìgu yarã anyua sã erã árĩborore iri peamere iimi Goãmũ. ⁴² Yũ oaboacũ mua yũre barire obiribũ. Yũ ñemesibucũ mua yũre tĩabiribũ. ⁴³ Mua pohro yũ curicũ yũre masibirã bocatĩribiribũ. Eropa ìacãbũ. Suhri marigu yũ arĩquerecũ ta, yũre suhri sãbiribũ mua. Dorecugũ yũ árĩcũ, peresu yũ árĩcũ sãre eropa ìacãbũ mua yũre,” arĩ weregura erãre ñerãre. ⁴⁴ Yũ eroparĩcũ peerã erã yũre serẽpirãcoma: “Opu, ¿mu oaboacũ, mu ñemesibucũ, gua masibigu mu árĩcũ, suhri marigu mu árĩcũ, dorecugũ mu árĩcũ, peresugue mu árĩcũ, dohpárĩcũ guapũ mure itamubiriri?” arĩ serẽpirãcoma yũre. ⁴⁵ Erã eropa arĩ serẽpicũ yũhũ erãre òpa arĩ weregura: “Diaye muare arĩgũ tĩiaa. Oã yaharã mera majagũre bu arĩgũre mua ne itamubiribũ. Eropa arĩgũre mua itamubirã, yũre ta itamubeaa mua,” arĩ weregura erãre. ⁴⁶ Eropigu erãre eropa dipuwaja moaniguicãgucumi Goãmũ. Erã eropa dipuwajacũri ne pehresome. Eropirã òarãpũ umũri nũcu òaro árĩrãcoma, arĩ weremi Jesu.

26

*Pahia oparã, murã mera Jesure wejẽdiañuma
Mr 14.1-2; Lc 22.1-2; Jn 11.45-53*

¹ Iri árĩpeherrerire ĩgu buhera pũhrũ Jesu guare ĩgu buherãre weremi:

² —Penũ pũhrũ Pascua árĩroca. Irire mũa masia. Irisubure yũhũ masũre Goãmũ ĩgu obeodigure ñearãcoma. Ñeha yũre crusague wejẽrãcoma, arĩmi ĩgu guare.

³ Irisubu ta pahia oparã, mũrã sã gamenereñorã. Caifa pahia opũ ya wihi gamenereñorã erã. ⁴ Ero gamenere, erã guyari mera Jesure ñeha erã wejẽburire game weretamurã iĩñorã.

⁵ —Bosenũ árĩcũ ĩgure ñeabiricãrã. Masa gua ĩgure ñeacũ ĩarã gua gamenerenijarã gamequeãbocoma, arĩã iĩñorã erã erã basi.

Nomeo poresuri mera Jesure pipeopo

Mr 14.3-9; Jn 12.1-8

⁶ Irisubure Simo cami boadigũ ya wihi árĩmi Jesu. Gua sã árĩbũ. ĩgu árĩri maca Betania waĩcũri maca árĩbũ. ⁷ Iri wihi ĩgu baro watope yujugo nomeo poresuri aĩgãri, Jesu dipuru weca pipeomo. Iri poresuri alabastro waĩcũdiru dicũri deco, igo pipeori deco wajapagari deco árĩbũ. ⁸ Igo eropa pipeocũ ĩarã gua Jesu buherã guarã õpa arĩnũgabũ:

—¿Duhpigo igo irire eropa iisirimaacãri? ⁹ Iri poresurire duaboañumo. Eropa duago wũaro niyerure wajataboañumo. Eropa wajatago,mojomorocũrãre iri niyerure oboañumo, arĩbũ gua ĩgu buherã.

¹⁰ Gua eroparĩcũ ĩagu, Jesu guare weremi:

—¿Duhpirã eropa arĩri mũa igore? Yũre õaro iigo iimo. ¹¹ Mجومorocũrãpũ mũa mera eropa árĩniguirãcoma. Eropirã mũa erãpũre omasia. Yũpũ i yebare mũa mera eropa árĩniguisome. ¹² Yũre erã yaaboro core yũ dũpũre amuyugo, poresuri mera sũhumo yũre. ¹³ Eropigũ diaye ta mũare arĩgu iiaa. Árĩpehrero i yebaguere õari buherire erã wererogue igo õpa iirare wererãcoma. Erã eropa werecũ peerã masa bajarã igore guñarãcoma, arĩ weremi Jesu guare.

Juda Iscariote Jesure ĩhaturirãre ĩgu ĩhmuburire erã mera weretamuñumi

Mr 14.10-11; Lc 22.3-6

¹⁴ Irisubure yujugũ gua mera majagũ Juda Iscariote pahia oparã pohroque eja. ¹⁵ Eja, erãre serẽpipũ.

—¿Jesure mũare yũ ĩhmucũ dipẽ wajayerãcũri yũre mũa? arĩ serẽpipũ erãre.

Ĩgu eroparĩcũ, erã ĩgure treinta seri plataserire oñorã. ¹⁶ Erã eropa ocũ Judapũ Jesure ĩgu ĩhmuburinũre corenipũ.

Jesu ĩgu buherã mera ĩgu baturinu árĩyoro

Mr 14.12-25; Lc 22.7-23; Jn 13.21-30; 1Co 11.23-26

¹⁷ Eropi buḡabiriri panre erã baburinu bosenu árĩnũgarĩnu árĩbu. Eropirã ḡua Jesu buherã ĩgu pohroḡue waha serẽpibu ĩḡure:

—¿Nohonogue bosenu mari baburire amudoreḡu obeori muhu ḡuare? arĩbu ĩḡure.

¹⁸ ḡua eroparĩcũ ĩgu ḡuare weremi:

—Jerusalẽḡue waḡue. Ero mua bocagure õpa arĩ wereḡue: “Marire buheḡu mũre õpa arĩ weredoreami: ‘Yu ñero tariboro merogã duhyanijaa. Pascua árĩcũ yuhu, yu buherã mera mu ya wihi ḡua barãca,’ arĩ weredore obeomi ḡuare,” õpa arĩ wereḡue iri wihi opare, arĩ obeomi Jesu ḡuare.

¹⁹ Eropirã ḡuare ĩgu dorediro dopa ta iirã, Pascua árĩcũ ḡua baburire amubu ḡua.

²⁰ Eropi iri ñamire ḡua mera doce ĩgu buherã mera baḡu árĩmi Jesu. ²¹ ḡua barisubu ĩgu ḡuare weremi:

—Diaye ta mũare arĩḡu iiaa. Yujugũ mari mera majagũ ta yure ĩhaturirãre ĩhmugucumi yure, arĩ weremi ĩgu ḡuare.

²² ĩgu eroparĩcũ peerã ḡuapu burigã bujawererã, ĩḡure serẽpinũgabũ ḡua yujurãyeri.

—Opũ, ¿yu ãhriri mũre ĩhmubu? arĩ serẽpibu.

²³ ḡua eropa arĩ serẽpicũ ĩgu yuhrimi:

—Yu barĩpare yu mera yoso baḡu ta ãhrimi yure ĩhaturirãre ĩhmubu. ²⁴ Iribojegue erã yure arĩ gojadiro dopa ta yuhu masũ Goãmũ ĩgu obeodigũ sĩrigũca. Yure ĩhaturirãre ĩhmudigupu ñetariaro tarigucumi. Eropiro ĩḡupure ĩgu masa dehyoabiricũ õaboya. Ñero taribiri-boñumi, arĩmi Jesu.

²⁵ ĩgu eroparĩcũ ĩḡure ĩhaturirãre ĩhmubu Juda ĩḡure serẽpimi:

—Buheḡu, ¿mũre ĩhmubu ãhriri yuhu? arĩ serẽpimi ĩgu.

—Ë u. Mũhu ta ãhraa, arĩmi.

²⁶ Eropa arĩ weretuhaja ḡua barisubu Jesu panre aĩ, Goãmũre “Õhaa,” arĩmi. Eropa arĩtuha irire nuha ḡuare ĩgu buherãre ḡueremi.

—Ire aĩ, baḡue. I yu duḡu ãhraa, arĩmi ĩgu.

²⁷ Eropa arĩtuha ĩgu ihriripare aĩ, Goãmũre “Õhaa,” arĩ, ḡuare omi.

—Mua árĩpehrerã ire ihrique. ²⁸ I yu di ãhraa. Bajarã ñero erã iirare cóãbu sĩrigũca. Eropigũ yu di cóãḡũca. Eropa sĩrigũ Goãmũ yu Paḡu “Masare õaro iigũra,” ĩgu arĩdiro ii ojogorocũḡũca. ²⁹ Mũare arĩḡu tiiaa. Yu Paḡu ĩgu opu árĩroḡue mua mera igui deco mama decore

ihriguca. Mari erogue ihriboro core i igui decore dipaturi ihrinemosome yuhũ, arĩmi Jesu guare.

Pedro "Jesure masibea," ĩgu arĩ guayaburiñere wereñumi Jesu

Mr 14.26-31; Lc 22.31-34; Jn 13.36-38

³⁰ Eropirã yujuñe Goãmure bayariñere bayatuhajarã wiriabu. Utãgu Olivo waĩcudigugue wabu gua. ³¹ Erogue gua ejacũ Jesupu guare weremi:

—Dohpagã ñami mua arĩpehrerã yure cóãgãrãca. Mua yure cóãborore õpa ta arĩ gojañuma Goãmũ yare erã gojarapũ: "Ovejare ĩhadibugure erã wejẽcũ iiguca. Yũ eropa iicũ oveja ĩgu yarã ĩgure cohãgã wasiria warãcoma," arĩ gojañuma. ³² Eropigũ Goãmũ yure ĩgu masura pũhrũ mua core Galileague wamũhtaguca, arĩmi ĩgu.

³³ ĩgu eroparĩcũ peegu Pedro õpa arĩrimi:

—Yũ mera majarã arĩpehrerã erã mure cóãgãquerecũ ta yurũ mure ne cóãsome, arĩmi ĩgu.

³⁴ Jesu yũhrimi:

—Diaye arĩgu tiiaa mure. Dohpagã ñami cãreña ĩgu wereboro core uhresubu "Yũhu Jesure masibea," arĩguca mũhũ, arĩmi ĩgu Pedroro.

³⁵ ĩgu eropa arĩquerecũ ta Pedro õpa arĩ yũhrimi:

—Mũ mera yure erã wejẽquerecũ ta, "Jesure masibea," ne arĩsome yũhũ, arĩ yũhririmi Pedro.

Eropirã gua sã gajirã ĩgu buherã Pedro ĩgu arĩro dopa ta arĩribũ gua Jesure.

Getsemanigue Goãmure serẽñumi Jesu

Mr 14.32-42; Lc 22.39-46

³⁶ Eropi Getsemanĩ waĩcũri gorogue Jesu gua ĩgu buherã mera waha, erogue eja, guare arĩmi:

—Ohõ doayunque. Mua ohõ doaropẽ sohõgue Goãmũ mera wereniguigu wagu iiaa, arĩmi ĩgu guare.

³⁷ Eropa arĩtuha Pedroro, perã Zebedeo porãre, erã urerãre sihugãmi. Eropigũ ĩgu turaro bujawere, ñero siporãcũpũ. ³⁸ Eropa bujaweregu ĩgu mera majarãre ĩgu sihugãnirãre arĩpũ:

—Bũrigã ñero siporãcũa yũhũ. Yure turaro pũriro dopa ta pepigu iiaa. Sohõñari wanigu iiaa. Ohõ dujanique mua. Eropirã yũ mera ta tũyunque mua sã, arĩpũ ĩgu erãre.

³⁹ Eropa arĩtuha ero core merogã wanemo, yeba mereja, Goãmure arĩpũ:

—Ahũ, yũ ñero tariburire iidiabigu iibiricãque. Yũ eropa arĩquerecũ ta yũ gamero dopa iibita. Mũpũ masia. Mũ gamero dopa iique, arĩpũ ĩgu Goãmure.

40 Eropa arĩtuha, urredã ĩgu buherã pohrogue eranijagu erã carĩ oyarãre ĩapũ. Erãre ĩagu Pedrore õpa arĩpũ:

—¿Yuju hora gohra yũ mera ta tũyutamubirari? 41 Ōaro iique mũa. Mũa pepiri mera õarire iidiaraa mũa. Mũa seyaro irire iidiaquererã ta irire bocatũbeaa. Eropirã Goãmũre serẽniguique ñero mũa iibiriboro dopa, arĩ werepũ Jesu.

42 Eropa arĩtuha dipaturi waha, Goãmũre serẽpũ daja:

—Ahũ, yũ ñero tariburire iidiagu iique yũre. Mũ gamero dopa ta iique, arĩpũ ĩgu.

43 ĩgu buherã pohrogue urredã pohrogue dipaturi erapũ daja. Eropa eragu carĩ oyarãre ĩapũ daja. Wũja pũritaricãyoro erãre. 44 Eropigũ dipaturi erãre apicã dipaturi waha, Goãmũ mera wereniguiũ daja. ĩgu ero core ĩgu arĩdiro dopa ta arĩpũ. 45 Eropa arĩtuha ĩgu buherã pohrogue eraa, erãre arĩpũ:

—¿Mũa carĩrã soorã iiri dohpa? arĩpũ ĩgu. Eropa arĩtuha masa erã aricũ ĩagu õpa arĩpũ:

—Iripẽta ãhraa. Dohparagã yũ masũre Goãmũ ĩgu obeodigũre ñerãre orãcoma yũre. 46 Wahgãque. Ina warã. ĩaque. Yũre ĩhaturirãre obu ohõ ahrimi, arĩpũ ĩgu.

Jesure ĩhaturirã ĩgũre peresu iĩnuma

Mr 14.43-50; Lc 22.47-53; Jn 18.2-11

47 ĩgu eropa arĩ wereniguirisubu gũa mera majagu mũrupũ Judapũ erami. Eropirã masa bajarã ñoserimijiri yucũ dũcari opanirã ĩgu mera yujuro mera erama. Erã pahia oparã, erã mũrã sã erã obeonirã árĩma. 48 Negohrare Jesure ĩhaturirãre wiabu õpa arĩ wereseretuhapũ Juda: “Yũhũ wayuporãre mimigu ĩgu ta árĩgũcumĩ mũa ñeabu. ĩgũre yũ mimira pũhrũ ñeaque,” arĩpũ Juda erãre. 49 Eropigũ eragu Jesu pohrogue mata wapurumujumi.

—Buhegũ, ¿ãhriri mũhũ? arĩ ĩgũre wayuporã mimimi.

50 ĩgu eropa mimicũ Jesu õpa arĩmi:

—Yũ mera majagu, ¿duhpigũ õguere ahriri mũhũ? arĩmi ĩgũre.

Eropirã erã Jesure ñeama.

51 Erã eropa iicũ ĩagu Jesu mera majagu ĩgu matamijire tũãwea aĩ, pahĩ opũ pohro majagũre ĩgu gamirore tabe corodijucãmi. 52 ĩgu eropa iicũ ĩagu Jesu ĩgũre weremi.

—Mũ matamijire dibuque. Gajirãre ñosenirã árĩrã, erã ñose gamecũ sĩrirãcoma. 53 Yũ Pagũre yũ itamudorecũ ĩgũpũ bajarã anyuare doce cururire yũ pohro obeobocumi. ¿Irire masibeari mũa? 54 Eropa itamubodiro árĩqueregũ ta ĩgũre yũre itamudoresome yũhũ. Yũ eropa dorebircũ

Goãmũ yare erã gojarapũ arĩdiro dopa ta eropa waroca, arĩmi ĩgũ.

⁵⁵ Eropa arĩtuha masare weremi ĩgũ:

—¿Mũa ñoserimijiri mera, yucu ñucari mera arirã yajari masare iro dopa mũa yũre ñearã arirã iari? Ʋmuri ñucu Goãmũ wihigue yũhũ mũare buhe doacũ, mũa yũre ne ñeabiribũ. ⁵⁶ Dohpaguere mũa yũre eropa iirã i arĩpehreri Goãmũ yare weremuhtanirã erã arĩ gojadiro dopa ta iiaa mũa, arĩmi Jesu erãre.

Ĩgũre eropa ñeacũ ĩarã gũa ĩgũ buherã arĩpehrerã ĩgũre cohã omagã wabũ gũa.

Judio masa oparã Jesure serẽpiñuma

Mr 14.53-65; Lc 22.54-55, 63-71; Jn 18.12-14, 19-24

⁵⁷ Eropi ĩgũre ñeanirã pahia tauro opũ Caifa waĩcũgu ya wihigue aĩ ejañorã ĩgũre. Iri wihi ta masare buherã, mũrã sã gamenereñorã. ⁵⁸ Pedropũ yoarogue erãre ihanũrusiapũ. Eropa ihanũrusiagu Caifa ya wihire cãhmotara sãrirore eja, iri sãriro pohecague ñajaa warũ. Ñajaja, iri wihire corerã surara mera doapũ. “Jesure duhpiicũ ĩagũra,” arĩgũ doapũ Pedro.

⁵⁹ Eropirã pahia oparã, gajirã oparã mera gamenererã Jesure wejẽdorediarã, gũyari mera erã ĩgũre ñero dipuwaja moaborore guñamaariñorã. ⁶⁰ Erã eropa weresãburire guñabocabiriñorã. Eropa guñabocabiriquererã ta masa bajarã ĩgũre eropa weresãmorã amañorã. Eropirã perã ĩgũre weresãmorã erañorã. Ɔpa arĩñorã:

⁶¹ —Ihĩ Ɔpa arĩmi: “Goãmũ wihire cóãmasia. Eropa cóãgu Ʋhrenũ pũhrũ iri wihire dipaturi iigũra,” ĩgũ arĩcũ peebũ gũa, arĩ weresãmaacãñorã Jesure.

⁶² Erã eropa arĩra pũhrũ pahia tauro opũ wahgãñugaja, Jesure serẽpipũ:

—¿Oã mũre weresãquerecũ ta erãre yũhri gamebeari mũhũ? ¿Mũre erã weresãriro dohpa arĩ yũhri gahmeri mũhũ? arĩpũ opũ.

⁶³ ĩgũ eroparĩcũ peequeregu ta Jesu eropa pepicãpũ. ĩgũ eropa yũhribiricũ ĩagũ pahia tauro opũ ĩgũre dipaturi serẽpipũ daja:

—Goãmũ ojocariniquicãgu mera diaye arĩque mũhũ. Mũhũ eropa arĩbiricũ mũre ĩgũ dipuwaja moagũcumĩ. Wereque gũare. ¿Cristo Goãmũ magũ ta ãhriri mũhũ? arĩ serẽpipũ daja.

⁶⁴ ĩgũ eroparĩcũgue ta Jesu yũhripũ:

—Īgu ta āhraa. Muare diaye weregu tiiaa. Puhru yuhu masu Goāmu Īgu obeodigu Goāmu yu Pagu turagu pohro Īgu diayepu doacū ĩarāca mua. Eropirā umaro maja imica weca yu dujaricū sāre ĩarāca, arī yuhripu Jesu.

⁶⁵ Īgu eroparīcū peegu pahia opu, Īgu basi Īgu sañarañe suhrirore yeguecāpu gajirāre “Guatariacāmi,” arīdoregu.

—Īre weresārāre gajirāre gamebeaa pare. Īgu basi Goāmure Īgu ñero wereniguicū peea mari. Eropirā Īgu ñero iira dipuwajare masituhāa mari. ⁶⁶ ¿Eropirā dohpa iirācuri mari dohpaguere ĩre? arī serēpipu Īgu gajirā oparāre.

—Īgu ñeri dipuwaja wejēcāro gahmea, arī yuhriñorā erā.

⁶⁷ Erā eropa arīra puhru Īgu diapore disico ehosū, Īgure pañorā erā. ⁶⁸ Gajirā Īgu cuirire diricāhmota ōpa arī wereyañorā Īgure:

—¿Noa mure pari? Cristo Goāmu beyedigu árīgu ĩabiriqueregu ta wereque guare, arī pañorā erā.

—*Īgure masibea, arī guyañumi Pedro Jesure*
Mr 14.66-72; Lc 22.56-62; Jn 18.15-18, 25-27

⁶⁹ Eropi iri wihi pohro árīri puu ōari puu Pedropu doapu. Īgu eropa doacū ĩago pahia opu pohro majago Īgu pohroguere erago ōpa arīpo:

—Mu sā Jesu Galilea majagu mera āhrabu, arīpo igo.

⁷⁰ Igo eroparīcū peegu Pedro ōpa arīpu:

—¿Dohpa arīmaacāgo iiri muhu? Mu arīgure ne masibeaa yuhu, arīpu Pedro arīpehrerā erā peero.

⁷¹ Igo eropa arīra puhru iri puu maja sāriro disiporo pohroguere wapu Pedro. Ero Īgu arīcū gajigo pohro majago Īgure ĩago, ero arīrāre ōpa arīpo igo sā:

—Jesu Nazare majagu mera āhrami ihī, arīpo igo Pedrore daja.

⁷² Igo eroparīcū peegu Pedro yuhripu:

—Goāmu mera diaye arīgu iiaa. Īgu mu arīgure ne masibeaa yuhu, arī yuhripu Pedro.

⁷³ Eropi merogā puhru ta ero niguinirā Pedro pohroguere waha, Īgure ōpa arīñorā.

—Diaye ta āhraa. Jesu mera majarā mera majagu ta āhraa mu sā. Erā iro dopa ta wereniguia muhu, arīñorā erā Pedrore.

⁷⁴ Erā eroparīcū Pedro yuhripu:

—Diaye ta Goāmu mera arīgu iiaa muare. Yu diaye arībircū Goāmu yure dipuwaja moaporo. Īgu mua arīgure ne masibeaa yuhu, arī yuhripu Īgu erāre.

Īgu eroparīcū ta cāreña wereru. ⁷⁵ Īgu werecū peegu Jesu ĭgure arīrare guñaru. “Cāreña ĭgu wereworo core ‘Jesure masibeeaa,’ arīgūca mūhu. Ūhresubu eropa arīgūca mūhu,” Jesu ĭgure arīrare guñaru Pedro. Eropa guñagu iri sāirore wiria turaro orepu.

27

Pilato pohrogue Jesure aīgāñuma
Mr 15.1; Lc 23.1-2; Jn 18.28-32

¹ Eropirā boyodi merero ta pahia oparā, mūrā sā Jesure erā wejēdoreborore game weretamuñorā. ² Erā eropa weretamura pūhrū ĭgure dihri, Pilato waīcūgu opu pohrogue aīgā, ĭgure oñorā Pilatore. Pilatorpu iri yeba majarā opu árīmi.

Juda Iscariote sīria wañumi

³ Eropigu Jesure erā wejēdorecū ĭagu Judapu Jesure ĭgu ĭhmurare guña turaro bujawerepu. Eropa bujaweregu treinta seri niyuserire ĭgu ñearaserire wiagu wagu, pahia pohrogue, mūrā pohrogue eja, ōpa arīpu:

⁴ —Jesu mūare yu ĭhmudigu ñeri marigu ĭgu árīquerecū ta erā wejēdoreama ĭgure. Eropigu mūare ĭgure ĭhmugu ñero iigu iiaya yūhu. Eropigu i niyuserire mūare wiagu iiaa, arīpu Juda erāre.

Īgu eropa arī werera pūhrū erā yūhriñorā:

—Eropa ta iicuraporo. Mū eropa arīri gūare duhpiburi árībeaa. Mū dihta eropa arī pepia irire, arī yūhriñorā erā ĭgure.

⁵ Erā eropa arī yūhrira pūhrū erā árīri wihi Goāmū wihigue Juda ĭgu niyuserire mehsiripicāpu. Mehsirituha waha wapū. Waha, yuradare dirisiu, ĭgu basi ĭgu wūnūgu tuhbiu, buhrimadija, sīria wapū pare.

⁶ Eropirā pahia oparā niyuserire aīrā ōpa arīñorā:

—I niyurure Goāmū wihi maja comorogue niyeru diburi comorogue mari apimasibeeaa. I niyeru mera ta masure wejēdorema. Eropiro mari doreri marire eropa árīri niyurure dibudorebeaa Goāmū wihigue, arīñorā erā erā basi.

⁷ Erā eropa arīra pūhrū, “Ōpa iirā,” erā arī weretamura pūhrū mátasorori mohmegū ya yebare asūrā wañorā. Īriseri mera asūñorā. Gajipu majarā iri macague eranirā sīricū erāre yaaburi yebare asūñorā. ⁸ Eropirā iri yebare “Di cóari yeba,” arī waīyema masa. Dohpague sāre eropa ta waīcūa. ⁹ I árīpehreri eropa wayoro iribojegue majagu Jeremia ĭgu “Eropa waroca,” ĭgu arīdiro dopa ta. Īgu

Goãmũ ya weremũhtadigu árĩñumi. Ōpa arĩ gojañumi ĩgu: “ ‘Treinta niyeruserire plataserire iripẽta wajayerãra gua ĩgure ñeaborore,’ arĩrãcoma Israe masa. ¹⁰ Eropirã iriseri mera mátasorori mohmegũ ya yebare asũrãcoma erã. Ōpa ta yũre iidoremi Goãmũ,” arĩ gojañumi Jeremia iribojegue.

Pilato Jesure serẽpiñumi

Mr 15.2-5; Lc 23.3-5; Jn 18.33-38

¹¹ Eropi Pilatore erã Jesure ora pũhrũ ĩgũpũ ĩgure serẽpipũ:

—¿Diaye ta judio masa erã opu ta ãhriri mũhũ? arĩ serẽpipũ Jesure.

—Mũ arĩro dopa ta ĩgu ta ãhraa, arĩ yũhripũ Jesu.

¹² Eropa arĩ yũhriquerẽgu ta, pahia oparã, mũrã sã erã weresãcũ yũhribiripũ. ¹³ ĩgu eropa yũhribiricũ ĩagu Pilato serẽpipũ:

—¿I árĩpehreri erã weresãriri peebeari mũhũ? arĩ serẽpipũ ĩgu Jesure.

¹⁴ ĩgu eropa arĩ serẽpiquerẽcũ ta Jesu ne yuju disiro yũhribiripũ. ĩgu eropa yũhribiricũ ĩagu Pilato uca wapũ.

Jesure wejẽdoreñuma

Mr 15.6-20; Lc 23.13-25; Jn 18.38-19.16

¹⁵ Bojori nũcũ Pascua árĩcũ peresu árĩdigũre yu-jugũre masa “ĩgure wiuque,” erã arĩgũre Pilato eropa wiubasamũripũ. ¹⁶ Irisubure Barrabá waĩcũgu peresugue árĩpũ. ĩgure masiñorã masa. ¹⁷ Eropigu erã gamenerecũ Pilato serẽpipũ erãre:

—¿Nihipũre mũare wiubasacuri yũhũ? ¿O Barrabãre o Jesure “Cristo” erã arĩgũre wiubasacuri yũhũ? arĩ serẽpipũ Pilato Jesure wiudianĩagu.

¹⁸ Jesure masa erã mahicũ ĩarã judio masa oparã ĩgure ĩhaturirã iĩñorã. Eropa ĩhaturirã ĩgure oñorã Pilatore. Irire erã ĩhaturirare masigu Pilato Jesure wiudiaripũ.

¹⁹ Eropi Pilato masare ĩgu beyeri pẽro ĩgu doacũ ĩgu marapo ĩgure quere obeopo: “Dohpagã ñamire Jesure quẽgo bũrigã ñero pepiabũ ĩgure ñero iiburire. Eropigu ĩgure ñeri marigũre ne gajiropa iibiricãque mũhũ,” arĩ werebeopo ĩgu marapo Pilatore.

²⁰ Pilato Jesure eropa wiudiaquerecũ ta pahia oparã, mũrã sã masare õpa arĩdoreñorã: “Barrabãpũre wiudoreque. Jesupũre wejẽdoreque,” arĩdoreñorã masare.

²¹ Eropigu Pilato masare serẽpipũ daja:

—¿Oã perãre nihipũre mũare wiubasacuri yũhũ? arĩ serẽpipũ.

—Barrabãpũre wiubasaque gũare, arĩ yũhriñorã.

22 —¿Ihĩ Jesu, “Cristo” erã arĩgũpũre dohpa iigũcuri yũhũ? arĩ serẽpipũ ĩgũ.

—Crusague pabia wejẽque ĩgũre, arĩ yũhriñorã masa árĩpehrerã.

23 —¿Ñehenore ñerire iiari ihĩ mũa eroparĩcũ? arĩpũ ĩgũ.

Ĩgũ eroparĩcũ peerã erã turaro mera gaguinigu-inemoñorã:

—Crusague pabia wejẽque ĩgũre, arĩ gaguiniguñorã daja masa ĩgũre.

24 Erã eropa arĩ gaguiniguicũ peegũ, ĩgũre erã peedia-biricũ ĩagũ, “Masa gua gamequeãbocoma,” arĩgũ, yũhriřũ ta õpa iipũ Pilato. Decore aĩgãridoretuhaja masa erã ĩhuro ĩgũ mojo coepũ. Eropa mojo coegũ õpa arĩpũ:

—Ĩre wejẽra dipuwaja, yaha dipuwaja árĩsome. Mũa ya dipuwaja árĩroca, arĩgũ mojo coepũ.

25 ĩgũ eroparĩcũ peerã árĩpehrerã masa õpa arĩñorã:

—Ĩre gũa wejẽdorera dipuwaja gũa porã sã gũa ya dipuwaja ta árĩporo, arĩñorã masa.

26 Erã eroparĩcũ peegũ Pilato Barrabãre peresugue árĩdigũre wiudorepũ masa erã gamegũre. Eropa iituha Jesupũre yuradari mera tãradore, ĩgũre crusague pabia wejẽdoregũ wiapũ surarare.

27 ĩgũ eropa wiacũ Pilato ya wihigue ĩgũ surara aĩ ejañorã Jesure. Eropirã erã surara árĩpehrerãre Jesu pohrogue gameneoñorã. 28 Eropirã ĩgũ suhrire tuwea aĩ, opũ ya suhriro dopa bejariñere Jesure sãñorã. 29 Eropa sãtuha, pora berore iituha, ĩgũ dipuru weca duhpeoñorã. Eropa duhpeotuha, yucũgũre diayerũ mohsuañorã. Mohsuatuha, õpa arĩ wereyañorã erã ĩgũre ĩgũ pohro merejarã:

—Umupeorã ariqũe. Judio masa opũ õaro árĩporo, arĩ wereyañorã ĩgũre.

30 Eropirã ĩgũre disico ehosũñorã. Erã mohsuadigũre ĩgũre tuãwea aĩ, ĩgũ dipurure pañorã irigũ mera. 31 ĩgũre eropa wereyara pũhrũ erã sãra suhrirore tuwea aĩ ĩgũ ya suhriropũre sãñorã daja. Eropirã crusague pabia wejẽmorã ĩgũre aĩ wiria wañorã.

Erã Jesure crusague pabia wejẽñuma

Mr 15.21-32; Lc 23.26-43; Jn 19.17-27

32 ĩgũre aĩgã, Simo waĩcũgũre Cirene majagũre bocatĩri, ĩgũre Jesu ĩgũ coãra crusare coãtamudorema.

33 Coãgã Gólgota waĩcũrogue ejama. Gólgota arĩro, mari ya mera “Dipu pero” arĩro iiaa. 34 Eropirã vinore suĩri deco mera erã morera decore Jesure orima erã. Iri decore ihriña, ihribirimi ĩgũ.

³⁵ Eropirã ĩġu suhrire tuwea aĩra pũhrũ ĩġure crusague pabiamã erã. Eropa pabiatuha ĩġu suhri mũrare, “¿Noa yañe árĩrocuri iñe?” arĩ masimorã erã basi game deamehtu birama. Eropa iirã Goãmũ yare weremũhtadigũ ĩġu arĩdiro dopa ta iirã iima erã. Őpa arĩ gojañumi ĩġu: “Yaha suhrire erã basi aĩmorã, ‘¿Noa yañe árĩrocuri iñe?’ arĩ masimorã erã basi game deamehtu birama erã,” arĩ gojañumi iribojeguere. ³⁶ Deabiratuha ĩġure ĩhadoacurima erã. ³⁷ ĩġu dipuru weca crusague ōpa arĩ gojarapũre pabia tuma erã ĩġure weresãra wererapũre. “Ihĩ judio masa tauro opũ āhrimi,” erã arĩ gojarapũre pabia tuma.

³⁸ Eropirã perã yajari mũrare Jesu pohro gaji crusarigue pabia tuma erã sãre. Yujugũ ĩġu diayepũ, gajigũre ĩġu copũ pabia tuma erã. ³⁹ Crusari pohro tarigãrã Jesure ĩha, erã dipure yurerã, ñero arĩ wereniguima ĩġure:

⁴⁰ —“Goãmũ wihire cohã, ũhrenũ pũhrũ iri wihire amugũra daja,” arĩ wereniguidigũ árĩribũ mũhũ. Goãmũ magũ árĩġũ mũ basi dijaque. Eropigũ mũ basi itamuque. Eropigũ tari weregũca mũhũ, arĩma masa.

⁴¹ Eropa ta pahia oparã, masare buherã sã eropa arĩ weryama.

⁴² —ĩġu gajirãre taudigũ árĩqueregũ ta ĩġu basi taumasibeami. “Israe masa opũ āhraa,” arĩrimi ĩġu. Eropirã ĩġu basi ĩġu دچارicũ ĩarã ĩġure umupeorãca. ⁴³ ĩġupũ Goãmũre umupeorimi. Eropigũ “Goãmũ magũ āhraa,” arĩrimi ĩġu. ĩġu eropa arĩġũ árĩcũ Goãmũpũ ĩġure itamuporo, arĩ weryama erã.

⁴⁴ Yajari mũra ĩġu pohro erã pabianirã eropa ta ĩġure werya ñero wereniguima erã sã.

Jesu sĩria wañumi

Mr 15.33-41; Lc 23.44-49; Jn 19.28-30

⁴⁵ Eropi goeri boje árĩcũ ũhre hora gohra árĩpehrerogue naitĩa wabũ. ⁴⁶ Eropigũ irisubu naitĩa wari subure Jesu turaro gaguinimi:

—Elí, Elí, ¿lema sabactani? arĩmi ĩġu. Eropa arĩġũ ōpa arĩġũ iimi mari ya mera: “Yũ Goãmũ, yũ Goãmũ, ¿duhpigũ yũre cohãri mũhũ?” arĩġũ iimi.

⁴⁷ ĩġu eroparĩcũ peenirã yujurãyeri ero niguinirã ōpa arĩrima:

—Goãmũ ya weremũhtadigũre Eliare sihugũ iicumi, arĩrima erã.

⁴⁸ Eropigũ yujugũ erã mera majagũ mimi aĩri yũsũ mera vino suĩrire yosotuha, aĩ omagã, yucũgũ ojogorore diritu, Jesure simujumi. ⁴⁹ ĩġu eropa iicũ ĩarã gajirã simujugũre ōpa arĩma:

—Corenique. Elia ïgure ïgu itamucũ ïanirã dohpa mari, arĩma erã.

⁵⁰ Erã eropa arĩra pũhrũ dipaturi Jesu turaro gaguinigu sĩria wami. ⁵¹ ïgu sĩricũ ta Goãmũ wihi majañe suhriro ero erã cãhmotara suhriro deco mera yehguea wayoro. Eropiro yeba sã ñohmebũ. Eropa ñohmecũ utã sã pagayeri sã wahria wabũ. ⁵² Eropirã masa goberi pãricũ, bajarã Goãmũ yarã árĩnirã iribojegue sĩrinirã mura masa wiriañorã. ⁵³ Masa wiriarã iri goberire cóacã òari macague Jerusalengue wañorã erã. Erogue erã wacũ masa bajarã erãre ïañorã.

⁵⁴ Eropirã yeba ñohmecũ ïarã, sĩrinirã mura erã masa wiriacũ ïarã, surara opũ ïgu surara mera uca wama. Erã Jesure crusague árĩgure corerã árĩma. Uca wa, òpa arĩma:

—Diaye ta ãhraa. Ihĩ Goãmũ magũ ta ãhrañumi, arĩma erã.

⁵⁵ Eropirã Galileague Jesu mera arinirã ïgure itamunirã nome árĩma. Yoarogue crusague tuyagure ïhabeo niguibũ gua erã mera. ⁵⁶ Erã nome mera María Magdalena árĩmo. Gajigo María waĩcũgo sã árĩmo. Igo pũ Santiago, José sã pago árĩmo. Gajigo Zebedeo marapo árĩmo.

Jesu dũpũre masa gobegue apiñumi José

Mr 15.42-47; Lc 23.50-56; Jn 19.38-42

⁵⁷ Eropi ñamicague José Arimatea majagu doberi opagu ero árĩmi. ïgu Jesu buhegu árĩmi. ⁵⁸ Eropigu Pilato pohrogue eja, Jesu dũpũre serẽpũ. ïgu eropa serẽcũ peegu Jesu mura dũpũre odorepũ Pilato. ⁵⁹ ïgu eropa dorera pũhrũ Josépũ Jesu mura dũpũre aĩ, diju, òari suhriro gũhrari mariri suhriro mera ïgu dũpũre omapũ. ⁶⁰ Omatuha, José ïgu ya masa gobegue apipũ ïgu dũpũre. Iri gobe erã utãyegue erã seara gobe mama gobe árĩyoro. Iri gobegue apituha, wũariye utãyere taragãpũ iriye mera bihabu. Bihatuha, waha wapũ. ⁶¹ Eropirã María Magdalena, gajigo María mera iri gobegure ïhadoa coreñorã.

Jesure erã apira gobere surara coreñuma

⁶² Eropi gajinũ, Pascua árĩburire erã amuranũ pũhrũ Sabado árĩcũ pahia oparã, fariseo masa sã Pilato pohro gamenereñorã. ⁶³ Gameneretuha òpa arĩñorã erã Pilatore:

—Opũ, irire guñaa gua. ïgu gũyaricũgu Jesu ojocarinigu òpa arĩpũ ïgu: “Uhrenũ pũhrũ masa mũriagũca yũhũ,” arĩpũ ïgu. ⁶⁴ ïgu eropa arĩdigũ árĩcũ ïgu buherãpũ ïgu dũpũre yajabocoma. Eropa yajarã masare òpa arĩbocoma: “Jesu masa mũriami,” arĩbocoma erã. ïgu Jesupũ masare gũyagũ iimi. ïgu buherã sã “ïgu masa mũriami,” arĩrã

guyarã iirãcoma. Eropirã Jesu ïgu guyadiro tauro erã guyaripũ ñetariaroca. Eropa yajari arïgu ùhrenũ gohra mũ surarare coredoreque erã ïgu mũrũre apidirogue, arĩnorã erã Pilatore.

⁶⁵ Pilato yũhripũ:

—Áũ. Yaharã surara coreporo. Eropirã mũa bocatũuropẽ iri gobere ðaro coreque, arĩpũ ïgu erãre.

⁶⁶ ïgu eroparĩcũ erã waha, iri gobere bihariye merague ta pihatuñorã masa erã ñajacũ ïha masimorã. Eropirã surarare iri gobere coredoreñorã.

28

Jesu masa mũriañumi

Mr 16.1-8; Lc 24.1-12; Jn 20.1-10

¹ Eropi judio masa soorinũpũ Sabadonũpũ irinũ taricũ, Domingo árĩcũ ñamiñarigã árĩcũ María Magdalena gajigo María mera Jesu masa gobere ïarã wañorã. ² Eropiro mata yeba turaro ñohme purumujuyoro. Eropa ñohmecũ mari Opũ ïgu anyu ùmarogue aridigũ dijari, masa gobere bihariyere utãyere tarabeo iriye weca doapũ. ³ ïgu anyu bupu miaro dopa ðaro goesirigũ, ïgu suhri yaji poari iro dopa ðaro boreri suhricũgũ arĩpũ. ⁴ ïgu eropa dehyoacũ, surara iri gobere corerã, ùcataria wa, naragã, weca gohrare sĩrinirã iro dopa wañorã. ⁵ Eropigũ anyupũ erã nomere ðpa arĩpũ:

—Yũre güibiricãque. Crusague erã pabiadigũre Jesure mũa amacũ masia yũhũ. ⁶ ïgu dohpaguere ðre marimi. ïgu arĩdiro dopa ta ïgu masa mũria wami. Erã ïgu dũpũre erã apidirore ïarã arique. ⁷ Tuhaja ïgu buherã pohrogue ùmũdiaro waha, ðpa arĩ wererã waque: “Ihĩ Jesu sĩridigũ masa mũriami. Eropigũ mũa core Galileague ïgu wamũhtagũcumĩ. Eroque ïgũre ïarãca mũa,” arĩ wererã waque mũa. I yũ arĩrãre guñaque mũa, arĩpũ anyu erã nomere.

⁸ ïgu eropa arĩra pũhrũ erã nome masa gobegue árĩnirã nome yojaro mera wiria, erã ïarare güiquererã ta, mucubiriri mera Jesu buherãre wererã warã, omañorã. ⁹ Eropa warã nomere Jesu bocatĩripũ:

—¿Noho wahari mũa? arĩ serẽpipũ ïgu. ïgũre ïha erãpũ ïgu pohrogue eja, ïgu guburire ñeha ïgũre umupeoñorã.

¹⁰ —Güibiricãque mũa. Yũ pagũ porãre “Galileague waque,” arĩ wererisa. Eroque yũre ïarãcoma, arĩpũ Jesu erãre.

Masa gobere corerã surara erã ïarare wereñuma

11 Erã nome wererã warisubu surara watope yujurãyeri masa gobere corenirã surara Jerusaléngue pahia oparãre wererã wañorã. Jesu ïgu masa gobegue ïgu mũriarare werepehocãñorã. 12 Erã eropa arĩ werecũ pahia oparã, mürã mera gamenereñorã. Gamenere weretamuñorã. Eropirã surarare gũyadorerã niyerure wajayeñorã.

13 —Ōpa arĩque mũa masare: “Ñami gũa carĩra pũhrũ, ïgu buherãpũ masa gobegue eraa, ïgu dũpũre aĩcãnirã ãhrama,” arĩ wereque masare. 14 Mũa eropa arĩ werecũ Pilatorũ mũa carĩtariarare peecãbocumi. ïgu eropa peecũ, ïgũre wererãra gũa. “Erãre dipuwaja moabiricãque,” arĩ wererãra gũa ïgũre, arĩñorã erã surarare.

15 Erã eropa arĩra pũhrũ surarapũ niyerure ñeha, erãre erã gũyadorediro dopa ta masare wererã wañorã erã. “Jesu buherã aĩcãnirã ãhrama ïgu mũrũ dũpũre,” arĩñorã erã. Eropirã eropa Jesu ïgu dũpũ aĩrare wereniguima judio masa. Dohpague sãre eropa ta arĩ werema erã.

*Jesu ïgu buherãre ïgu yare ïgu iidorerã apiñumi
Mr 16.14-18; Lc 24.36-49; Jn 20.19-23*

16 Eropi gũa Jesu buherã once buherã Galileague waha utãgũgue Jesu ïgu wadoredigũgue wabũ gũa. 17 Erogue eja Jesure ïarã umupeobũ gũa ïgũre. Eropa umupeoquererã ta gũa yujurãyeri “Ihĩ Goãmũ magũ árĩbiribocumi,” arĩ pepiribũ dohpa. 18 ïgũpũ õpa arĩmi gũare:

—I yebaguere, umaro sãre Goãmũ árĩpehrerã tauro turarire omi yũre. 19 ïgu eropa ocũ mũare õpa iidorea: Árĩpehrero majarãre yahare buherã waque erã yaharã erã waboro dopa. Eropirã mari Pagũ waĩ mera, yũ waĩ mera, Espĩritu Santo waĩ mera erãre waĩyeque. 20 Eropirã mũare yũ dorerare erã iipehoburire buheque erãre mũa. Eropirã ire yũ arĩrare guñaque: Árĩpehrerinũri nũcũ mũa mera árĩgũca ne i umũ pehrecũgue, arĩ weremi gũare Jesu.

San Marcos

Ñu waĩyegũ buhenũgañumi

Mt 3.1-12; Lc 3.1-9, 15-17; Jn 1.19-28

¹ Goãmũ magũ Jesucristo ñũ iirare, õari buherire wereri õpa árĩnũgayoro.

² Goãmũ yare weremũhtadigũ Isaia ñũ iribojegue gojadiro dopa ta i wereri ãhraa. Õpa arĩ gojañumi ñũ:

Goãmũ ñũ magũre õpa arĩpũ: “Mũ core mũre wereyubure obeogu iiaa. ³ Eropigũ ñũ masa marirogue árĩgũcumi. Ñũre peerãre weregũ busũro mera arĩ wereniguigũcumi: ‘Mari Opũ ñũ ariburi mare amuro dopa ñũ ariboro core õarã árĩyuque ñũre peemorã,’ arĩ wereniguigũcumi,” arĩpũ Goãmũ, arĩ gojañumi Isaia, Ñu waĩyegũ ñũ masa dehyoaboro coregue.

⁴ Eropigũ Ñu waĩyegũ masa marirogue masare buhemũripũ. Õpa arĩpũ:

—Mũa ñero iirire bujawereque. Dohpaguere õaripũre gohrotoque. Eropirã waĩyenirã árĩque. Mũa eropa gohrotocũ ñagũ mũa ñero iirare Goãmũ cãdijigũcumi, arĩ buhemũripũ ñũ. ⁵ Eropirã árĩpehrero Judea yeba majarã, Jerusalén majarã mera ñũ pohrogue peerã ejañorã. Eropigũ Ñu erãre waĩyepũ Jordán waĩcũriyague. Erã ñero iirare weretarituhacũ ñha ñũ erãre waĩyemũripũ.

⁶ Eropigũ Ñu camello ya gasiro suhrirore suhricũpũ. Waibũgũ ya gasirore ta tuãdiuridacũgũ árĩpũ. Poreroa, mome sã ñũ bari árĩyoro. ⁷ Eropigũ õpa arĩ buhemũripũ:

—Yũ pũhrũre yũ tauro turagũ arigũcumi. Õatariagu ãhrimi ñũ. Ñũ iro dopa õagũ árĩbeaa yũpũ. Eropigũ ñũre pepigũ, “Yũ tamera bu árĩgũ ãhraa yũhũ,” arĩ pepia yũhũ. ⁸ Masare waĩyegũ deco mera waĩyeya yũpũ. Ñũpũ yũ tauro iigũcumi. Mũare Goãmũ yarã iigũcumi ñũ. Espĩritu Santore masa mera árĩniguicũ iigũcumi, arĩ buhepũ Ñu.

Ñu Jesure waĩyeñumi

Mt 3.13-17; Lc 3.21-22

⁹ Eropi irisubure Jesu Nazaregue, Galilea yeba árĩri maca árĩdigũ, dia Jordán waĩcũriyague ejapũ. Ñũ eropa ejacũ Ñu waĩyepũ ñũre. ¹⁰ Ñũ waĩyetuhajacũ Jesu diague niguidigũ, majanũgaja umarogue ñhamujupũ. Umãsi pãrimaa wayoro. Ero pãrimaacũ ta Espĩritu Santo buja iro dopa bejagu

ĩgũ weca dijibejajapũ. ¹¹ Eropiro ɯmarogue wereniguiri busũyoro.

—Mũhũ yũ magũ yũ mahigũ ãhraa. Mũ mera burigã mucubiria, arĩro cariyoro ɯmarogue.

Satana ñerire iidoreriñumi Jesure

Mt 4.1-11; Lc 4.1-13

¹² Irisubure Espiritu Santo Jesure masa mariogue wadorepũ. ¹³ Erogue ejagũ cuarenta nũri gohra árĩpũ. Erogue ĩgũ árĩcũ, Satanapũ Jesu ĩgũ ñero iirire ĩadiagu ñerire iidoreripũ ĩgũre. Eropigũ Jesu waimurã nũgũ majarã watope árĩpũ. Eropirã anyuarũ ĩgũre itamu ĩgũre bari oñorã.

Jesu Galilea yebague buheñumi

Mt 4.12-17; Lc 4.14-15

¹⁴ Eropi Ñure erã peresugue erã biha dohora pũhũ, Jesupũ Galileague õari buherire Goãmũ ĩgũ opũ árĩrĩre weregũ warũ. ¹⁵ Õpa arĩ wererũ:

—Dohpaguere õpa ãhraa: Goãmũ ĩgũ opũ árĩboro merogã duhyaa. Mũa ñeri iirire bujawereque. Eropirã õarire gohrotoque. Õari buherire peeque mũa, arĩ buhemuripũ Jesu.

Jesu wapicũrã wai wejẽrãre ĩgũ mera majarã árĩmorãre sihuñumi

Mt 4.18-22; Lc 5.1-11

¹⁶ Eropigũ Galilea waĩcũriya tũrogue ejagũ, Simore ĩgũ pagũ magũ mera bocaajapũ. Erã wai wejẽdi masa árĩñorã. Erã wejẽdi yucũre mehyurã iĩñorã erã iri ditaru wũari ditarugue.

¹⁷ Erãre arĩpũ Jesu:

—Yũ mera majarã árĩmorã arique mũa. Yũ mera mũa aricũ mũa waire mũa ñeha gameneorã mũa iiro dopa ta, Goãmũ yarã árĩmorãre sihu gameneomorãre iirã árĩcũ iigũra mũare. Yũ mera mũa aricũ eropa iimorãre apigũra mũare. Eropirã yũ mera arique, arĩpũ Jesu.

¹⁸ ĩgũ eroparĩcũ peerã, erã wejẽdi yucũre apicã ĩgũ mera waha wañorã.

¹⁹ Eropirã erã merogã tarigã Santiagore ĩgũ pagũ magũ Ñũ sãre bocañaorã daja. Erãpũ Zebedeo porã árĩñorã. Erã ya dohodirugue erã wejẽdi yucũre amurã iĩñorã. ²⁰ Erã perãre ĩgũ sihubeorũ. ĩgũ sihubecũ pee erãpũ erã pagũre ĩgũre itamurã mera dohodirugue apicã Jesu mera waha wañorã.

Watĩ ñajasũdigũ Jesure bocatĩriñumi

Lc 4.31-37

21 Eropi erã Capernaum waĩcũri macague ejañorã. Eropigu Sabado árĩcũ judio masa erã buheri wihigue buhegu ñajapu. 22 Eropigu ðaro masipehogu buhegu, judio masare erã buherã iro dopa árĩbiripu ĩgu. ĩgu eropa buhecũ iri maca majarã pee uca wañorã. 23 Irisubure iri wihire yujugu watĩ ñajasũdigu árĩpu. Eropigu ðpa arĩ gaguiniguipu Jesure:

24 —Mũhu Jesu Nazare majagu garibobiricãque guare watẽare. ¿Duhpibu ðpa iiri guare? ¿Mũhu guare dederecũ iibu iiri? Goãmu magu mu ðagu árĩcũ gwa masia, arĩ gaguiniguipu ĩgu Jesure.

25 ĩgu eroparĩcũ peegu Jesu turipu watĩre:

—Ejarimaricãque. ĩgure cohã wiria waque, arĩpu Jesu.

26 Eropigu watĩ masure yeba mehmereja tũrucũ iipu. ĩgu gaguiniguicũ ta wiriapu ĩgure. 27 Eropirã árĩpehrerã iri wihi doanirã ĩgu eropa wacũ ĩha ucataria waha ðpa arĩñorã:

—Yaho. ¿Ñehe buheri ãhriri ii? ¿Mama buheri ta ãhriri? ĩgu opu iro dopa ta doremi watẽare. ĩgu dorecũ watẽapu tarinũgabeama ĩgure, arĩ wereniguiñorã iri wihi doarã erã basi.

28 Eropirã bajamenurigã pũhrugã ta, árĩpehrerã Galilea yeba majarã irire ĩgu eropa iirare masipehrea wañorã.

Jesu Simo Pedro mũñecore ðago iĩnumi

Mt 8.14-15; Lc 4.38-39

29 Eropi Jesu sã judio masa erã buheri wihigue árĩnirã wiria wañorã. Erã eropa wiriara pũhrũ Jesu, Santiago, Ñu mera, Simo ĩgu pagu magu Andre sã ya wihigue ñajapu.

30 Irisubure Simo mũñeco nimacũri dorecũgo camague igo oyacũ wereñorã Jesure. 31 Erã eropa werecũ peegu, ĩgu igo pohrogue eja, igo mojtore ñeha, igore tara wahgũ dobopũ. ĩgu tara wahgũ dobocũ ta igore nimacũri taria wayoro. Taricũ pepigo igopũ wahgã erãre bari ejopo.

Jesu bajarã dorecurãre ðarã iĩnumi

Mt 8.16-17; Lc 4.40-41

32 Ñamicague abe ñajara pũhrugue masa árĩpehrerã dorecurãre, gajirã watẽa ñajasũnirãre, pũriri dorecurãre Jesu pohrogue aĩ ejañorã. 33 Eropirã árĩpehrerã iri maca majarã gamenereñorã Jesu árĩri wihi disiporore. 34 Eropigu Jesu bajarã dorecurãre, baja dore oparãre ðarã wacũ iipu. Masa bajarãre watẽare wiupu. Eropigu watẽa Jesu Goãmu magu ĩgu árĩrĩre erã masicũ ĩagu Jesupu erãre irire weredorebiripu.

*Galilea yebague Jesu buheñumi**Lc 4.42-44*

³⁵ Eropigu ñamiñarigã árĩcũ boyoboro core, ĩgu wahgãra pũhrũ masa marirogue ĩgu Pagu Goãmũre serẽgu warũ.

³⁶ ĩgu eropa wacũ ĩarã Simo sã ĩgũre amarã ejañorã.

³⁷ Eropirã ĩgũre bocatĩri õpa arĩñorã:

—Masa árĩpehrerã mãre ahmama, arĩñorã erã ĩgũre.

³⁸ Erã eroparĩcũ peegu õpa arĩpũ Jesupũ.

—I macare buhegu ahrabu yũhũ. Eropirã gaji macari sãre õgã maja macari sãre buherã warã mari. Yũhũ iri macari sãre buhegũra, arĩpũ Jesu.

³⁹ Eropigu árĩpehrero Galilea yebare buhecuripũ. Eropigu macari nũcu erã ya buheri wirigue ñajaja buherũ. Pũriri dorecurã sãre pũririre cóãpũ. Watẽare masare ñajanirãre cohã wiupũ.

*Jesu camĩ boagũre õagu iĩñumi**Mt 8.1-4; Lc 5.12-16*

⁴⁰ Eropĩ gajigu camĩ boagu Jesu pohrogue eja, mereja serẽpũ:

—Mũhũ yũre õagu wacũ iidiagu, yũre õagu wacũ iimasia, arĩpũ camĩ boagupũ Jesure.

⁴¹ ĩgu eroparĩcũ peegu Jesu ĩgũre mojomoro ĩarũ. Eropigu Jesu ĩgu mojoto mera mohmeripũ. Mohmeripũ ta õpa arĩpũ:

—Irire iidiaca. Õagu árĩque mũhũ, arĩpũ Jesu.

⁴² ĩgu eroparĩcũ ta ĩgu camĩ boara yaria wayoro. Õagu warũ ĩgu. ⁴³ ĩgu eropa wacũ ĩagu Jesu ĩgũre turaro mera werẽpũ:

⁴⁴ —Yũhũ mãre õpa iirare gajirãre ne werebircãque. Eropa werebiriqerẽgu ta mũ ðũpũre õaro warare pahire ĩhmugũ waque, “Õagu ãhrimi,” arĩdoregu. Goãmũ doreri Moisere ĩgu apidiro dopa ta iique. Eropigu mirimagũgãre oque pahire mũ õagu warare masare mũ ĩhmuburire, arĩpũ Jesu ĩgũre. Õpa arĩtuhaja waque, arĩpũ ĩgũre.

⁴⁵ ĩgu eropa masare weredorebiriqerẽcũ ta ĩgupũ waha árĩpehreri macari majarãre Jesu ĩgũre õagu wacũ iirare werẽpũ. ĩgu eropa werera pũhrũ Jesu masa bajarã erã árĩroguere wamasibiripũ. Eropigu ĩgu masa bajamerãgã árĩrogue arĩpũ. Erogue ĩgu árĩcũ baja macari majarã ĩgu pohrogue ejañorã.

2*Jesu ðũpũ bũhadigũre õagu wacũ iĩñumi**Mt 9.1-8; Lc 5.17-26*

¹ Bajamenuri pühru Jesu Capernaumgue dujaa wapu. Wihigue igu aricũ masa masiñorã. ² Eropirã masa ero bajarã gamenere iri wihire ɯjuturia waha disiporogue wirinugajañorã. Eropigu Jesu erãre õari buherire werepu. ³ Eropirã gajirã sã Jesu pohro ejariñorã. Erã wapicurã ɯma dupu buhadigure aĩ ejañorã. ⁴ Eropa ejarã masa bajarã aricũ iarã Jesu pohrogue aĩ ñajamasibiriñorã. Eropirã erã dupu buhadigure aĩ muju wihi weca aĩ weasiri ñajaa Jesu igu niguiro weca pihri dijuñorã. “Jesu ihĩ igu dorecurire taricũ iigucumi,” arĩ pepiñorã erã. ⁵ Erã eroparĩ pepicũ masigu Jesupu dorecugure õpa arĩ werepu:

—Mahgu, mu ñero iirare cóãtuhabu, arĩpu Jesu dupu buhadigure.

⁶ Igu eroparicũ peerã erogue doarã judio masare buherãpu erã basi õpa arĩ pepiñorã: ⁷ “Ihĩ eropa arĩ wereniguibiricãporo. Goãmure ñero wereniguigu iimi ihĩ. Igu masu mari iro dopa arĩgu ahrimi igu sã. Eropigu igu mari ñero iirare cóãmasibeami. Goãmu dihta masa erã ñero iirire cóãmasimi,” arĩ pepiñorã erã. ⁸ Erã eropa arĩ pepicũ ïagu, Jesu erã pepirire masigu õpa arĩpu erãre:

—¿Duhpirã mua eropa arĩ pepiri? ⁹ “Mu ñero iirare cóãtuhabu,” yu aricũ pee “Guyaricugu ahrimi,” arãa mua yure masibiriquererã ta. Ihĩ dupu buhadigure “Wahgã-nugajaque,” yu aricũ igu wahgãnugajacũ iarã yu arĩra diaye aricũ masirãca mua. ¹⁰ Yuhu masu Goãmu igu obeodigu arĩgu i yebaguere masa erã ñero iirire cóãmasia yuhu. Mua irire masiboro dopa igure wahgãnugajacũ iigura, arĩpu Jesu judio masare buherãre.

Eropa arĩtuhaja dupu buhadigure õpa arĩpu:

¹¹ —Mure arĩgu iiaa: Wahgãnugajaque. Curique. Mu pũgure aĩ waque mu ya wihigue, arĩpu igure Jesu.

¹² Igu eroparicũ peegu dupu buhadigupu wahgãnugaja, igu pũgure aĩ arĩpehrerã masa erã ihuro wiria waha wapu. Igu eropiicũ iarã erã arĩpehrerã ïhamaria wañorã.

—Goãmu õagu turagu ahrimi. Ne õpa iirire ïabirimurabu mari, arĩñorã erã basi.

Jesu Levire igu mera majagu arĩbure sihuñumi
Mt 9.9-13; Lc 5.27-32

¹³ Eropi dipaturi Jesu ditaru turogue wapu. Eropigu masa bajarã igu pohrogue eja gamenerecũ ïagu igu erãre buhepu. ¹⁴ Eropa iituha, erogue arĩdigu wagu, Levire Alfeo magure igu mohmeri taribugue bocajapu. Gajirã mera oparã ya arĩburire wajasea corerã mera arĩpu Levĩ. Igu bocajagu õpa arĩpu:

—Yu mera majagu árĩbu arique mũhu, arĩpu Jesu Levíre. Īgu eroparĩcũ peegu Levĩpu wahgãnuɓaja Jesu mera waha wapu.

¹⁵ Pũhrũ ĩgu ĩgu buherã mera Leví ya wihire mesague ba doacũ bajarã wajasea corerã “Ñero iirã àhřima,” masa erã arĩrã erã mera ba doañorã. ¹⁶ Erogue erã doara pũhrũ, gajirã judio masare buherã, fariseo masa sã Jesu ñero iirã mera ĩgu bacũ ĩañorã. Eropa ĩarã õpa arĩñorã:

—¿Duhpigũ ñero iirã wajasea corerã mera bahari Jesu? arĩ serẽpiñorã judio masare buherã Jesu buherãre.

¹⁷ Erã eroparĩcũ peegu õpa arĩ yũhripu Jesupu:

—Dorecurã dihta duhurture ahmama. Dorecurã duhurture amaro dopa ta “Ñegũ àhřaa yũhu,” arĩrã yũre amarãcoma. Eropigu “Ñegũ àhřaa,” arĩrã dihtare erã ñero iirare bujaweredore õarĩpũre gohrotocũ ĩigu aribũ yũhu. Erã basi “Õarã àhřaa gũa,” arĩ pepirãpũre itamugu aribiribũ, arĩpu Jesu erãre.

Ba duhurire serẽpiñuma gajirã Jesure

Mt 9.14-17; Lc 5.33-39

¹⁸ Irisubure Ñu buherã, fariseo masa sã Goãmũre umupeomorã ba duhumũriñorã. Eropirã masa Jesu pohro eraa ĩgũre serẽpiñorã.

—Erã Ñu buherã, fariseo masa buherã sã Goãmũ ya árĩburire iirã, ba duhumũrama. ¿Duhpirã mũ buherãpu ba duhubeari? arĩñorã erã Jesure.

¹⁹ Erã eroparĩcũ pee Jesu erãre õpa arĩ yũhripu:

—Õpa àhřaa iri: Mojoto diridigu ĩgu bosenure iicũ ĩgu mera majarã bujowererã ba duhurã iibeama. Īgu mera arĩrã mucubiri barã iima. Eropa ta yũ buherã sã yũ mera arĩrã ba duhumasibeama. ²⁰ Yujunũ Goãmũ yũre aĩcãgũcumĩ. Eropa ĩgu aĩgãra pũhrũ yũ buherã mera arĩsome yũhu. Eropirã irisubugue tamerare yũ buherã ba duhurãcoma, arĩpu Jesu.

²¹ Erã iribojegue maja buheri mera mama buheri mera erã buhe morediacũ ĩagu õpa arĩ werenemopũ Jesu werenigui queori mera:

—Ne mama gasiro suhri gasiro mera mũrañe suhrirore seretu masiya mara. Eropiicũ mama gasiro mari coera pũhrũ mũrañere suhrirore taragameneo, wuatariaro yehgucũ iiaa. Eropa ta mama buherire mũra buheri mera wapi moa buhebircãro gahmea. ²² Eropirã ne igui decore imisĩri decore waibũgu gasiro ajurore mũra ajurore pisãbircãro gahmea. Eropiro igui deco pahmutarirogue mũra ajurore yehgue dija waha. Iri ajuro yehgucũ igui

deco sã cohmo, ajuro sã cohmoa waha. Eropirã igui decore mama ajuro mera pisãro gahmea. Eropiicũ igui deco sã cohmo beaa. Ajuro sã cohmo beaa. Eropa ta mama buheri, mura buheri mera more buhebiricãro gahmea, arĩ buhepu Jesu erãre.

Sabado árĩcũ Jesu buherã trigo pororire turĩũma
Mt 12.1-8; Lc 6.1-5

²³ Gajinu Sabado árĩcũ Jesu sã trigo pohegue ãha taria wañorã. Eroge tariarã igu buherãpu trigo pororire turĩ tari wahgãñorã. ²⁴ Erã eropiicũ ãarã õpa arĩñorã fariseo masa Jesure:

—Peenique guare. ¿Duhpirã mu buherã Sabadonu mari soorinu árĩquerecũ Goãmu igu mohmedorebiririnu mohmeri erã? Mari dorerire tarinugarã iima, arĩñorã erã Jesure.

²⁵⁻²⁶ Erã eroparĩcũ peegu yu buherã tarinugarã iibeama arĩgu õpa arĩpu erãre:

—Iribojegue Davi igu mera majarã mera oaboagu Goãmu wihigue ñaja iri wihi árĩri panre Goãmu ya panre bañumi. Eropigu igu mera majarã sãre badoregu iri panre oñumi. Iri panre pahia dihtare badorera árĩyoro. Goãmu doreri gajirãre iri panre badorebiriyoro. Irisubure Abiata waĩcugu pahia opu árĩñumi. ¿Davi sã irire erã iirare Goãmu yare erã gojarare buhebirari mua? Davi iri panre bagu Goãmure tarinugagu iibiriñumi. Dohpagãre yu buherã sã i trigo yerire turĩ barã Goãmure tarinugarã iibeama, arĩpu Jesu.

²⁷ Eropa arĩtuhaja õpa arĩnemopu:

—Goãmu masare iituhajagu soorinure doreñumi “Masa sooporo,” arĩgu. Eropa iigu masa inure iiburire weregu ãhrimi. Masapu inure erã iiburire wererã árĩbeama. ²⁸ Eropigu yuhu masu Goãmu igu obeodigu inonu soorinu sãre masa erã iiburire doremasia, arĩpu Jesu erãre.

3

Mojoto buhadigu õaro wañumi
Mt 12.9-14; Lc 6.6-11

¹ Gaji Sabado árĩcũ Jesu judio masa erã buheri wihigue eja ñajapu daja. Eropigu mojoto buhadigu sã ero arĩpu. Eropirã iri wihi árĩrã Jesure ãhanuruñorã igure weresãmorã. ² Sabado árĩcũ Jesu mojoto buhadigure igu õagu iicũ ãarã, “Mari soorinure Jesu mohmegu iimi,” arĩ weresãdiañorã Jesure. ³ Eropigu õpa arĩpu Jesu mojoto buhadigure:

—Wahgãnugajaque. Arique õgue, arĩpu.

Ōpa arītuha iri wihi árĩrãre werepũ:

4 —¿Sabado árĩcũ ðarire iicũ ðabeari? ¿Ñerire iicũpũre ðhari mua pepicũ? Sabado árĩcũ masure masucũ ðapũrica. Masure wejẽcũpũre ðabeaa, arĩ werepũ Jesu erãre.

Ígu eropa arĩquerecũ ta yũhribiriñorã. ⁵ Erã eropa yũhribiricũ íagu Jesu erãre ihamehtu erã mera guarũ. Erã ígure peediabiricũ íagu Jesu erã mera bujawerepũ. Eropigu mojoto buhadigure arĩpũ:

—Mũ mojotore sĩsirãbeoque, arĩpũ ígure.

Ígu eroparĩcũ peegu ígu mojotore sĩsirãbeorpũ ígu. Ígu eropiicũ ta ðari mojoto wayoro. ⁶ Ígu ya mojoto ðari mojoto wacũ íarã fariseo masa wiria wañorã. Wiria Herode curu majarã mera gamenere, “¿Dohpa ii ihĩ Jesure wejẽrãcuri?” arĩ weretamuñorã erã erã basi.

Masa bajarã ditaru tũrogue árĩñuma

⁷⁻⁸ Eropi Jesu ígu buherã mera ditaru tũrogue wapũ. Erã erogue wacũ íarã Galilea majarã masa bajarã erã pũhrũ nũrusiañorã. Eropirã Judea yeba majarã, Jerusalén majarã, Idumea yeba majarã, Jordán waĩcũriya gajipũ masegue majarã, Tiro majarã, Sidón majarã ígure íarã wañorã ígu iirare peenjarã. ⁹ Eropirã bajarã árĩñorã Jesu pohrore. Tuucãhmota nũgajacãñorã. Eropigu Jesu ígu buherãre gasirure amuyodorepũ ígu doaborore. ¹⁰ Bajarã dorecurãre ígu ðarã wacũ iicũ íarã gajirã dorecurã sã ígure pẽhrediañorã. ¹¹ Eropirã watẽa ñajasũnirã Jesure íarã ígu pohro mereja arĩñorã:

—Mũhũ Goãmũ magũ ãhraa, arĩ gaguiniguñorã erã ígure.

¹² Eropigu erãre Goãmũ magũ ígu árĩrĩre turaro mera gajirãre weredorebiripũ Jesu.

Jesu ígu buherãre doce gohra beyeñumi

Mt 10.1-4; Lc 6.12-16

¹³ Eropigu Jesu utãgũgue muria ígu gamerãre sihupũ. Ígu eropa sihubeocũ peerã ígu pohrogue ejañorã. ¹⁴ Eropigu doce umare ígu mera majarãre, ígu obeomorãre beyepũ. Gaji macarigue ígu yare buherã wamorãre beyedobopũ Jesu. ¹⁵ Eropigu watẽare erã cóãburire apipũ erãre. ¹⁶⁻¹⁹ Oã árĩñorã doce gohra uma ígu beyenirã. Simo, Santiago Zebedeo magũ, ígu pagũ magũ Ñũ, Andre, Felipe, Bartolomé, Mateo, Toma, Santiago Alfeo magũ, Tadeo, Simo celote ya curu majagũ, Juda Iscariote, oã nũcure Jesu beyedobopũ. Jesu Simore Pedro waĩyerũ. Santiagore, Ñũ mera Boanerges waĩyerũ. Boanerges mari ya mera “bupu

masa" waĩcuma. Juda Iscariote Jesure ĩhaturirãre ĩhmubu áriþu. Erãre beyedobotuha Jesu dijaha wihigue ñaja wapu.

—*Jesu watĩ turari opami, arĩ weresãñuma masa*

Mt 12.22-32; Lc 11.14-23; 12.10

²⁰ Eropi ero dipaturi masa bajarã gamenereñorã daja erã pohro. Eropirã ĩgu ĩgu buherã sã ne bamasibiriñorã.

²¹ Eropirã Jesu acawererã ĩgu iirare peebeoñorã. "Jesu goroweregũ wagu iimi," masa arĩcũ peeñorã. Eropirã ĩgu pohroque eja ĩgure aĩgãridiariñorã.

²² Gajirãþu õpa arĩñorã:

—Beelzebú ĩgure eropa iicũ iicumi. ĩgu watẽare cóãgu Beelzebú watẽa opu turari mera erãre cohãmi, arĩñorã Jerusalengue arinirã judio masare buherãþu.

²³ Erã eroparĩcũ peegu Jesupu erãre sihubeo werenigui queoriñe mera wereþu erãre.

—Watĩ ya turari mera watẽare cóãgu iibea. Watẽa erã basi cóãmasibeama. ²⁴ Eropirã yuju yeba majarã erã basi gamequeãrã iri yeba majarã pehrea wacoma. ²⁵ Eropirã yuju wihi majarã erã basi erã gamequeãrã iri wihi majarã pehrea wacoma. ²⁶ Eropigu ĩgu Satana watẽa opuþu watẽare yure cóãdoregu, ĩgu basi ta gamequeãgu iibocumi. Eropigu ĩgu pehrea wabocumi.

²⁷ Õpa ta ãhraa watĩ turagure tarinugari werediacũ: Wihi opuþe turagure diribigu, yajari masu ĩgu ya wihire ñajaja yajamasibeami. ĩgure ĩgu dirira þuhrũ tamerare ñajaja yajamasimi ĩgure, arĩ wereþu Jesu. Eropa arĩ wereþu watĩre ĩgu tarinugarare weregu. Watĩ turagu arĩquerecũ ta Jesu ĩgure tarinugami watẽare cohã wiugu.

²⁸ Eropigu arĩnemopu Jesu:

—Diaye arĩgu iiaa mũare. Áriþehreri masa erã ñeri iicũ sãre, erã wereniguicũ sãre Goãmũ cãdijimasimi. ²⁹ Eropa cãdijiqueregũ ta Espĩritu Santore erã ñero wereniguicũ iri tamerare ne cãdijisome. Erã eropa arĩra waja eropa dipuwajacũniguicãrã arĩrãcoma, arĩþu Jesu erãre.

³⁰ Jesu Espĩritu Santo turari mera mohmequerecũ erãþu "Watĩ turari mera mohmemi," arĩñorã. Erã eropa arĩra waja Jesu eropa arĩ wereþu erãre.

Jesu acawererã ĩgure sihurã erañuma

Mt 12.46-50; Lc 8.19-21

³¹ Eropirã Jesu pagu porã ĩgu pago mera erañorã. Eropa erarã disiporogue niguirã gajirãre sihudoreñorã ĩgure.

³² Eropirã masa ĩgu pohroque doarã wereñorã ĩgure.

—Mũ pagu mũ pagu porã mera disiporogue sihuma mũre erã, arĩñorã.

33 Erã eroparĩcũ peegu õpa arĩpũ Jesu erãre buhebu:

—¿Noa àhriri yũ pago yũ pagũ porã sã mũa ãacũ? arĩpũ.

34 Eropa arĩgũ ãgũ pohro doarãre ãagũ õpa arĩpũ:

—Oã àhrima yũ pago, yũ pagũ porã dopa árĩrã. 35 Goãmũ gamerire iima oã. Eropa ta iirã yũ pagũ magũ, yũ pagũ mago, yũ pago iro dopa àhrima, arĩ buhepũ Jesu erãre.

4

Jesu oteri masũ queoriñere buheñumi

Mt 13.1-9; Lc 8.4-8

1 Eropi dipaturi ta daja Jesu ditaru turogue buhenugapũ. Eropa erogue buhenugagũ masa bajarã ãgũ pohroque gamenerecũ ãagũ Jesu dohodirugue ñaja buhe payapũ. Eropirã masapũ yebague ditaru turogue niguiñorã ãgure peemorã. 2 Eropigũ Jesu baja werenigui queorire erãre buhepũ.

3 —I queoriñere peeque mũa, arĩpũ erãre.

—Oteri masũ otegu wañumi. 4 ãgũ eropa otecũ gajiyeri ma turo yurimerejayoro. Ero mehmerejarayerire mirimagũ porã ahri bacãñuma. 5 Eropi gajiyeri utãyeri watope yurimerejayoro. Ero utãyeri watope nicu mariñariro árĩquerecũ ta, mata puhriyoro. 6 Eropa puhriarĩquerero, abe ãgũ burigã asicũ, nuguri marinijaro ñaiñaja sãria wayoro. 7 Gajiyeri poracurogue yurimerejayoro. Porapũ puhri tiataria waha oterayeripũre wejẽcãyoro. Eropiro iri dũca mariyoro. 8 Gajiyeri õari yebapũ yurimerejayoro. Oaro puhri dũcacũyoro, gajisari treinta yeri, gajisari sesenta yeri, gajisari cien yeri dũcacũyoro, arĩ buhepũ Jesu.

9 —Irire õaro peeque mũa, arĩnemopũ Jesu.

Jesu ãgũ werenigui queorare ãgũ buherãre wereñumi

Mt 13.10-17; Lc 8.9-10

10 Eropirã puhũ erã seyaro árĩrã, doce buherã gajirã Jesu mera árĩrã iri queorañere masidiarã Jesure serẽpiñorã. 11 Erã eropa serẽpira puhũ Jesu õpa arĩ werepũ:

—Goãmũ masa tauro opũ ãgũ árĩrire, iribojegue majarã erã masibirirare mũare yũ buherãre masicũ iimi Goãmũ. Gajirãpũre eropiibeami ãgũ. Eropigũ erãre werenigui queori mera buhea. 12 Eropirã erã ãaquererã, pee masibeama. Eropirã peequererã ta masisome. Erã masirã õaripũre gohrotoboñuma. Erã eropa gohrotocũ ãagũ erã ñero iirare cóãboñumi Goãmũ. Eropa árĩquerecũ ta erãpũ ne peediabeama, arĩpũ Jesu.

Jesu oteri masũ queoriñere were amuñumi

Mt 13.18-23; Lc 8.11-15

13 Īḡu eroparīra pūhrū, ōpa arīnemopu erāre:

—¿Iñe queoriñere peenibeari mña? ¿Mña iñe queoriñere peebirā dohpa gaji queorire peerācuri mña? arīpu Jesu erāre.

Eropa arītuhaja ōpa arī werepu erāre.

14 —Oteri masu Īḡu oteriyeri ōari buheri iro dopa āhrraa.

15 Eropiro ma turo mehmerejarayeri, ōari buheri iro dopa ta āhrraa. Eropigu masa erā ōari buherire erā peecū ĩagu Satanapu iri ōari buherire masidorebeamī erāre. Mirimagu porā iriyerire erā dote aīdiro dopa ta iimi. 16 Eropi utā watope mehmerejarayeri ōari buheri iro dopa ta āhrraa. Eropirā masa ōari buherire pee, mucubiriri mera mata irire pee aīma. 17 Eropa pee aīquererā ta, utā watope árīrisari, nuguri maririsari iro dopa ta oā masa turabeama. Eropa turabirā yaha ōari buherire erā peera waja gajirā erāre ñero iicū ĩarā yahapure duhucāma. Gajirā erāre ñero iicū irire bocatūbirā yahare duhucāma. 18 Eropi pora watope yurimerejarayeri ōari buheri iro dopa ta āhrraa. 19 Eropirā masa ōari buherire peequererā, i yeba majare wuaro guñaricurā niyerure mahima. Gajino sāre baja gamenemoma. Erā eropiicū iripu ōari buheripure cāhmotaa. Iri eropa cāhmotacū masa Goāmū gamerire iibeama. 20 Eropi ōari yeba mehmerejarayeri ōari buheri iro dopa ta āhrraa. Eropirā masa ōari buherire peerā irire masima. Eropa masirā árīrā Goāmū Īḡu gamero dopa ta iima erā. Yujurāyeri merogā ōarire iima treinta yeri ducacuro dopa ta. Gajirā wecañari ōarire iima sesenta yeri iri ducacuro dopa ta. Gajirā wuaro ōarire iima cien yeri ducacuro dopa ta, arī werepu Jesu erāre.

Jesu sihāgodiru queoriñere buheñumi

Lc 8.16-18

21 Eropa arītuha ōpa arīnemopu:

—Ne, sihāgodirure masa sihāgorā mátasorobu docague buhapibeama. Irirure sehro doca apibeama. Irirure sihāgorā umarogue duhpeoma ōaro boyoweadorerā.

22 Árīpehrerā masa erā masibirirare pūhrū masirācoma. Sihāgodiru boyocū mari ĩhamasiro dopa ta, iribojegue erā masibirirare masirācoma masa. 23 Irire ōaro peeque mña, arīpu.

24 Eropigu erāre arīnemopu daja:

—Merogā masidiarā merogā masirāca. Wuaro masidiarā wuaro masirāca. Eropirā peerā ōaro peenurague. 25 Ōaro peenuragu ōaro masigucumi. Peenurubigu “Merogā peea,” Īḡu arīquerecū ta, iripu dederea waroca ĩgure, arīpu Jesu erāre.

Jesu coye puhri queoriñere buheñumi

²⁶ Jesu eräre werenigui queori mera buhepũ daja:

—Goãmũ ãgũ opu árĩri werediacũ ojorducare otera iro dopa ãhraa. Yujugũ coyere ojorducayeri otemi. ²⁷ Otetuhaja mũraro ta carĩ wahgã ãagũ wamũririmi. Irisubu ãgũ oterayeri puhri wiriaca. “¿Dohpa puhri?” arĩ ãha masibeami irire otedigũ ãgũ basi. ²⁸ Iri otera iri yeba mera iri gamero ducacua. Erapũgã deyomũhta, puhru dipa poro puhri wiria wahaa. ²⁹ Dũca bugatuhajacũ ãagũ iri pororire pehami. “Pearisubuno ta ãhraa,” arĩmi. ãgũ otera iri bugarare ãgũ masibiridiro dopa ta masa Goãmũ yarã erã dohpa wacũ sãre masibeami masa, arĩ buhepũ Jesu.

Mostazayegã queoriñere wereñumi Jesu

Mt 13.31-32; Lc 13.18-19

³⁰ Eropa arĩtuha buhenemopũ:

—¿Goãmũ ãgũ opu árĩri werediacũ ñeheno iro dopa ãhriri mũa pepicũ? Iri werenigui queoriñe mera irire weregura. ³¹ Mostazayegã iro dopa ãhraa Goãmũ ãgũ opu árĩri. Iriyegã ãgũ otecũ miriyegã gohra ãhraa. ³² Eropa árĩquerero iriyegã õaro puhri wiria. Eropiro yucũgũ wuadigũ wahaa. Eropirã irigũ dũpũri paga dũpũri bugacũ ãarã mirimagũ porã iri dũpũrigue suhri suama. Mostazayegã wuatariadigũ bugaro dopa ta umaro majagũ mari Opũre masinũgarã bajamerãgã erã árĩquerecũ ta, puhruquere erã bajarã warãcoma, arĩpũ Jesu.

Queori mera ãgũ buherire wereñumi Jesu

Mt 13.34-35

³³ Eropigũ iri werenigui queori iro dopa baja queorire erã masiopẽ õari buherire buhepũ erãre. ³⁴ Queoriñe mariro werebiripũ erãre. Puhru erã seyaro árĩrãre õaro were amupehocãpũ Jesu ãgũ buherãre.

Jesu miruñere yusudoreñumi

Mt 8.23-27; Lc 8.22-25

³⁵ Eropi irinũ ñamica Jesu ãgũ buherãre õpa arĩpũ:

—Ina sipũ masegue, arĩpũ erãre.

³⁶ ãgũ eroparĩcũ peerã, yebague niguirãre goerisere-tuhajarã dohodirugue ñajaa, Jesure aĩ taribuja wañorã. Eropirã gajirã gaji gasi mera erã puhru taribujañorã. ³⁷ Erã taribujacũ iriyague miruñe burigã weãyoro. Eropiro miruñe ariro pãgũri dohodirure miucãriyoro. Deco turaro ñajayoro. Merogã dũhyayoro erã miriboro. ³⁸ Eropa warisubu Jesu dohodiru auturogue suhri pore wecague carĩgũ iipũ. Eropirã erã ãgũre wahgũñorã.

—Buhegu, ¿muhũ ñabeari? Mirirari iiaa mari, arñorã erã Jesure.

³⁹ Erã eroparĩcũ peegu Jesu wahgã miruñere, pãgúri sãre,

—Yusaque, arĩpu.

Ígu eroparĩcũ ta miruñe pãgúri sã yusudija pehrea wayoro. Ōaro dujayoro. ⁴⁰ Eropigu Jesu arĩpu ígu buherãre:

—¿Duhpirã güimaacãri mua? ¿Mua yũre umupeobeari? arĩpu Jesu erãre.

⁴¹ Eropa wacũ ñarã erã ñhamaria wañorã.

—¿Ñehmũno masũ ãhriri ihĩ miruñe, pãgúri sã yuhriũgu? arñorã erã basi.

5

Watẽa ñajasũdigũre ðagu wacũ iĩnumi Jesu

Mt 8.28-34; Lc 8.26-39

¹⁻² Eropi erã sipũ masegue Gerasa majarã ya yebague taribujajañorã. Eropigu Jesupu dohodirugue sañadigu majanugajapu. Ígu majanugajara puhru, watẽa ñajasũdigũ masa goberi utã goberi watopegue árĩdigũ wiriri ígu pohrogue aripũ. ³ Ígu watẽa mera goroweregu masa goberi watope árĩgu árĩmuriũ. Gajirãpu ígure ñeha comeda wuarida mera dirimasibirimuriñorã. ⁴ Ígu burigã gorowerecũ ñha bajasuburi masa ígure guburi diriri berori mera comedari mera dirimuriñorã. Eropigu ígupũ comedarire nuha tuãtasiricãmuriũ. Eropirã ígu turagu árĩro mera masapu ígure ñeha dirirã bocatiũbiriñorã. ⁵ Eropigu ñami árĩcũ, umũ sãre masa goberi watopegue, utã yucugue sãre, eropa gaguinigu curicãmuriũ ígu. Eropigu utã mera ígu basi dotemuriũ. ⁶ Eropigu yoarogue Jesure ñhabeo ígu pohrogue omagãripũ. Eraa merejapu Jesu core umupeobu.

⁷⁻⁸ —Watẽa, duhuque ígure, arĩpu Jesu.

Ígu ðpa arĩcũ peegu, watẽa ñajasũdigũ ðpa arĩ gaguiniguipũ:

—¿Jesu Goãmu turagu magu, ñehenore iibu iiri muhu yure? Goãmu ígu ñaro serẽa yuhũ mure. Yure ñero iibiricãque, arĩ gaguiniguipũ watẽa ñajasũdigũ Jesure.

⁹ —¿Dohpa waĩcũri muhu? arĩpu Jesu ígure.

—Gua bajarã ãhraa. Eropirã “Bajarã watẽa” waĩcũa, arĩpu Jesure.

¹⁰ Eropigu Jesure turaro serẽpu:

—I yeba árĩrãre gua watẽare gajipugue wadorebircãque, arñorã watẽa masũ mera árĩnirã.

¹¹ Irisubure bajarã yesea árĩñorã erã pohrore. Utãgu gubuye ahma barã iĩñorã. ¹² Ero erã baniguicũ ïarã õpa arĩ serẽñorã watẽa:

—Soã yesea pohrogue wadoreque guare. Erã mera arĩdoreque guare, arĩ serẽñorã watẽa masure ñajanirã.

¹³ Erã eroparĩcũ peegu yesea pohrogue wadorepũ Jesu erãre. Igũ eropa dorecũ watẽa masure duhu yesea dos mil gohra árĩrãpure ñajañorã. Erã pohrogue erã ejara pũhrũ yeseapũ gorowere árĩpehrerã dipaturũgue oma buha, ditarugue yuriñajaa sĩripehrea wañorã.

¹⁴ Yesea erã eropa wacũ ïarã, erãre ïhadibunirãpũ güi omagã wañorã. Macague eja, iri maca majarãre campo majarã sãre erã ïarare weresiripehocãñorã. Erã eropa werẽcũ peerã masapũ bajarã Jesu igũ iirare ïarã arĩñorã. ¹⁵ Eropirã Jesu pohrogue erarã, watẽa ñajasũdigũre, suhri saña, pee masigu igũ ero õaro doacũ ïarã ïha uca wañorã erã. ¹⁶ Eropirã watẽa ñajasũdigũre, yesea sãre erã eropa warare ïanirã gajirãre werepehocãñorã. ¹⁷ Erã eropa werepehocũ peerã ero majarã Jesure turaro mera wadoreñorã.

¹⁸ Eropigu Jesu igũ dohodirugue igũ ñajacũ ïagu “Mũ mera wadiaca,” arĩ bũrigã serẽripũ watẽa ñajasũdigũpũ Jesure. ¹⁹ Igũ eropa arĩquerecũ Jesu igũre werẽpũ:

—Yũ mera aribita. Mũ ya wihigue waha, mũ pohro árĩrãre yũhũ mũ opũ mũre õaro iirare weregu waque. Mũre yũ mojomoro ïarare wereque erãre, arĩpũ Jesu igũre.

²⁰ Igũ eroparĩcũ pee watẽa ñajasũdigũpũ Decapoli waĩcũri macague Jesu igũre õaro iirare werenũgapũ. Igũ eropa arĩ werẽcũ peerã, masa árĩpehrerã pee uca wañorã.

*Jairo magore õago ii, ne behrego sãre õago iĩñumi Jesu
Mt 9.18-26; Lc 8.40-56*

²¹ Eropi dipaturi ta Jesu gajipũ masegue igũ taribujajacũ masa bajarã igũ pohrogue wũariya tũrogue gamenereñorã.

²² Eropigu judio masa erã buheri wihire ïhadibugũ Jairo waĩcũgu erapũ. Jesure ïha, igũ guburi pohro mereja õpa arĩ serẽpũ:

²³ —Yũ mago sĩrigo iiamo. Eropigu igore mũ mojoto mera duhpeogu, igore dore taugu arique. Mũhũ eropiicũ igo masagocumo, arĩpũ igũ Jesure.

²⁴ Igũ eroparĩcũ pee Jesu igũ mera wapũ. Igũ wacũ masa bajarã nũrũsiagãñorã igũre. ²⁵ Eropigo nomeo doce bojori gohra eropa umũri nũcũ behrenĩguigo ero árĩpo. Ero core bajarã duhturuua igore ñero taricũ iĩñorã igore ocoyerã. ²⁶ Eropigo duhturuare igo niyeru árĩpehrerire wajayepituhapo igo ocoyedorego. Erã eropa ocoyequerecũ

igo mūraro ta árĩniguicãpo. Eropigo igo ero core igo árĩdiro tauro ñero wapo. ²⁷ Igo eropa ñero taririsubu Jesu ĩgu masare òarã iirire peerã gajirã wereñorã igore. Eropigo igo Jesu pũhrũ ta masa bajarã watope aripo. Ahri Jesu suhrirore mohmepiñapo. ²⁸ “Yũhũ ĩgu suhriro dihtare mohmepiñago òago dujagoca,” arĩ pepipo igo. ²⁹ Eropi igo mohmepicũ mata igo di wirira purumujudija wayoro. Igo dupũre òari dupũ wacũ pepipo. ³⁰ Eropigu Jesu ĩgu turari mera dorere ĩgu taurare masigu, masa watope maji ĩapũ.

—¿Noa yaha suhrirore mohmepiari? arĩpũ.

³¹ ĩgu eroparĩcũ peerã ĩgu buherãpũ òpa arĩñorã.

—Cũhña ãhraa. Eropirã masa bajarã mure pẽhregãma. “¿Noa yũre mohmepiñari?” arĩgu, ¿dohpa arĩgu iiri mũhũ? arĩ serẽpiñorã ĩgure.

³² Eropigu Jesu ĩgure mohmepidigore amapũ. ³³ ĩgu amaro watope igopũ igo dupũ òaro wacũ pepigo güi, naragã merejapo ĩgu pohro. ³⁴ Eropigo igo diaye ta werepehopo ĩgure. Igo eropa arĩ werera pũhrũ Jesu werepũ igore:

—Mahgo, mũhũ yũre umupeori mera òago dujaa dohpague. Mucubiriri mera waque. Dore mariro árĩque, arĩpũ Jesu igore.

³⁵ Erã òpa arĩ wereniguiro watope ta Jairo ya wihi majarã erañorã,

—Mũ mago sĩaria wahãmo. Eropigu buhegure sihubita pare, arĩñorã.

³⁶ Erã eropa arĩquerecũ ta Jesu Jairore òpa arĩ werepũ:

—Bũjawere pepibita. Yũre guñaque. Umupeoque iri dihtare, arĩpũ ĩgure.

³⁷ Eropa arĩtuha, Santiago, ĩgu pagũ magũ Ñu, Pedro, erã dihtare “Yũ mera arique,” arĩpũ Jesu. ³⁸ Eropigu Jairo ya wihigue ejapũ. Iri wihiguere masa bajarã bũrigã ñehamere orerã iĩñorã. Erã eropa orecũ ĩha erãre arĩpũ Jesu:

³⁹ —¿Ñero arĩ ñehamere orebircãque mũa. Igo majigo sĩribeamo. Carĩgo iimo, arĩpũ Jesu erãre.

⁴⁰ ĩgu eroparĩcũ peerã erã “Eroparĩcãgu iimi ihĩ,” arĩrã ĩgure ĩayeñorã. ĩgũpũ erãre disiporogue wiupehocãpũ. Majigo pagũ sumarã mera, Jesu ĩgu mera majarã igo pohrogue sihuñajapũ. ⁴¹ Eropigu Jesu igo mojtore ñeha arĩpũ igore:

—Talita cumi, arĩpũ ĩgu. Talita cumi mari ya mera “Majigo wahgãque,” arĩdiaro iiaa.

⁴² ĩgu eroparĩcũ ta igo majigo sĩridigo mũro wahgãnũgaja curipo. Doce bojori opago árĩpo igo. Igore ĩgu eropa

iicũ ĩarã ucataria wañorã. ⁴³ Eropigu Jesu irire ĩgu iirare weresiridorebiripũ. Eropiituha igore bari ejodorepũ.

6

*Jesu ya maca majarã Nazare majarã Jesure umupeo-
biriñuma*

Mt 13.53-58; Lc 4.16-30

¹ Eropigu ero árĩdigũ waha wa, ĩgu buherã mera ĩgu ya yebague ejapũ. ² Eropigu Jesu Sabado árĩcũ judio masa erã buheri wihigue buhenugapũ. ĩgu eropa buhecũ masa bajarã ĩgũre ĩha masirã ĩgũre pee uca wañorã. Ōpa arĩñorã:

—¿Dohpa ii masiyuri ihĩ i buherire? ¿Dohpa ii ĩgu deyoro moarire ii masiri? ³ Ihĩ taboa mohmeri masũ María magũ āhrimi. Santiago, José, Juda, Simo, erã tĩgu āhrimi. Eropirã ĩgu pagũ porã nome i maca āhrima. Eropigu ĩgu mari iro dopa árĩgu āhrimi, arĩñorã erã Jesure peenijarã. Eropirã Jesure umupeobiriñorã. ⁴ Erã umupeobiricũ ĩagu ōpa arĩpũ Jesu:

—Árĩpehrerogue Goãmũ yare weremũhtadigũre gajirã umupeoma. Erã eropa umupeoquerecũ ta ĩgu ya maca majarã, ĩgu acawererã, ĩgu ya wihi árĩrã dihta umupeobeama ĩgũre. Eropirã yũre umupeobeaa mũa ohõ yũhũ masadigu árĩcũ ĩarã, arĩpũ Jesu erãre.

⁵ Eropigu iri maca árĩgu Jesu Goãmũ turari mera baja deyoro moarire iimasibiripũ. Dorecurã bajamerãgã dihtare ĩgu mohmepi taupũ erã dorere. ⁶ Eropigu ero majarã Jesure erã umupeobiricũ ĩagu, “¿Dohpa árĩrono mera yũre gamebeari erã?” arĩgu uca wapũ ĩgu. Eropigu Jesu ero pohro árĩri macarigue buhegu waha wapũ.

Jesu ĩgu buherãre buhedore obeoñumi

Mt 10.5-15; Lc 9.1-6

⁷ Eropi Jesu doce ĩgu buherãre sihubeo perãyeri dihta obeopũ erãre macariguere buhedoregu. Eropigu ĩgu dorerire ōpũ erãre watẽare masa ñajanirãre erã cóãburire. ⁸ Erãre obeogu gajinore añadorebiripũ. Doberire, barire, niyerure aĩgãadorebiripũ erãre. Erã tuari yucũ dihtare aĩgãadorepũ erãre. ⁹ Eropigu gaji zapaturire aĩadorebiripũ erãre. Yujuñe ta suhrirore sañadorepũ. Peñe sañadorebiripũ erãre. ¹⁰ Eropigu ōpa arĩ werepũ erãre:

—Árĩpehreri macarigue erã mũare carĩro ocũ, iri wihi ta carĩque. Ne warãgue wiriaque iri wihire. ¹¹ Eropirã gaji macari majarã mũare erã gamebiricũ, erã mũa buherire peediabiricũ ĩha iri macare tari wahgã waque. Eropa

warã, m̄a guburi maja nicure moje siripique m̄a erã ya dipuwajare masicũ iimorã erãre, arĩp̄u Jesu erãre.

¹² Eropirã erã doce buherã waha masare buherã, erã ñero iirare bujaweredoreñorã. Ōarip̄ure iidoreñorã erãre.

¹³ Eropirã bajarã watẽare masare ñajanirãre cóãñorã. Dorecũrãre uyu mera sũrã ðarã wacũ iĩñorã.

Ñu waĩyegũre gajirã wejẽñuma

Mt 14.1-12; Lc 9.7-9

¹⁴ Eropirã Jesu ĩgũ ðaro iirare masa bajarã masiñorã. Eropigũ opũ Herode sã irire peebeopũ. Eropa peebeogũ ðpa arĩ guñapũ ĩgũ Jesure:

—Ñu waĩyem̄uridigũ s̄iridigũ m̄urũ dipaturi masa dehyoagũ iicumi daja ihĩ Jesu. Eropa masadigũ árĩgũ ĩgũ turarire opami ĩgũ deyoro moarire iigũ, arĩ pepiripũ Herode. Jesure “Ñu m̄urũ ta ãhrimi,” arĩ pepiripũ ĩgũ Ñure wejẽdorera p̄hrũ.

¹⁵ Gajirã ðpa arĩ pepiriñorã:

—Elia ãhrimi, arĩ pepiriñorã. Gajirãpũ:

—Goãmũ yare werem̄htadigũ iribojegue majarã dopa ãhrimi ĩgũ, arĩ pepiñorã Jesure.

¹⁶ Erã eropa arĩ pepiquerecũ, Herodepũ Jesu ĩgũ iirare peegũ ðpa arĩ pepipũ:

—Jesu Ñu m̄urũ ta árĩcumi. Ñu dipurure yu tabedigũ masa dehyoagũ iicumi daja, arĩ pepipũ.

¹⁷⁻¹⁸ Ero core Herode ĩgũ pagũ magũ marapo Herodia waĩcũgore ehma igo mera marapocũpũ. ĩgũ eropa iicũ Ñu Herodep̄ure ðpa arĩ wereniguipũ:

—Mũ pagũ magũ marapore marapocũgũ Goãmũ dorerire tarinũgagũ iiaa m̄uhũ, arĩpũ Ñu Herodere.

Ĩgũ eropa arĩra dipuwaja Herode Ñure ñeadore pere-sugue acum̄ripũ. ĩgũre eropa iicũ gamepo ĩgũ marapo Herodia. ¹⁹ Eropigo Herodiapũ Ñure ĩhaturinijago ĩgũre wejẽdorediaripo. Eropiidaquerego ta wejẽdoremasibiripo Herode opũpũ gamebiricũ. ²⁰ Herodepũ “Ñu ðarire iigũ ðagũ ãhrimi,” arĩ pepi Ñure gũipũ. Eropigũ Herode Ñu wereniguirire ĩgũ peegũ guñaturabiripũ. Eropa guñaturabiriqueregũ ta mucubiriri mera ĩgũre peegũ wejẽdorebiripũ ĩgũ Ñure. ²¹ Irisubu ta Herodia igo ĩgũre wejẽdorera ejayoro. Irisubure Herode ĩgũ masa dehyoaranũ árĩcũ ĩgũ gobierno majarãre, ĩgũ surara oparãre, Galilea majarã oparã sãre sihu bosenu iipũ ĩgũ. ²² Eropigo ĩgũ marapo mago bosenu ĩago erago erã ĩhuro baya ĩhmupo. Igo baya ĩhmucũ ĩarã Herode ĩgũ sihunirã

mucubiriñorã. Erã eropa mucubiricũ ïagũ õpa arĩpũ Herode igore:

—Mũ gamerire serẽque yũre. Eropigũ mũ serẽrire mũre ogũra. ²³ Goãmũ mera diaye arãa mũre. Mũ serẽropẽ yahare deco mera ogũra mũre, arĩpũ ïgũ igore.

²⁴ ïgũ eropa arĩcũ peego igo pago pohrogue waha serẽpipõ:

—¿Ñehenore serẽgocuri yũhũ? arĩ serẽpipõ igo pagore.

—Ñũ waĩyegũ dipurure serẽque, arĩpo pagopũ.

²⁵ Igo eroparĩcũ peego umũdiaro mera opũ Herode pohrogue eja arĩpo:

—Dohparagã Ñũ waĩyegũ dipurure tabetadoreque. Eropigũ soropa mera ïgũ dipurure oque yũre, arĩpo igo.

²⁶ Igo eroparĩcũ opũ Herode bũrigã bũjawerepũ. ïgũ masa erã peero, “Mũ serẽrire mũre ogũra,” arĩtuhapũ ïgũ. Eropigũ ïgũ ïgũ eropa arĩrare gũhyasirigũ “Mũre osome,” arĩmasibiripũ igore. ïgũ sihunirã ïhuro “Iibeaã,” arĩmasibiripũ. ²⁷ Eropigũ mata surarare peresu árĩrãre coregũre Ñũ dipurure tabeta aĩgãridorepũ. ²⁸ ïgũ eropa dorecũ peegũ surarapũ waha, ïgũ dipurure tabeta, soropa mera aĩgãripũ. Aĩgã nómeore ïgũ marapo magore ópũ. Eropigo igo iripare ñeha igo pagore o taupo daja.

²⁹ Eropirã Ñũ buherã irire peenijarã erogue waha, ïgũ dũpũre aĩ masa gobegue aĩgã apiñorã.

Jesu cinco mil masare barire oñumi

Mt 14.13-21; Lc 9.10-17; Jn 6.1-14

³⁰ Eropi Jesu ïgũ buhedore obeonirã ïgũ pohrogue duja-jañorã daja. Erã iirare erã buherare wereñorã erã ïgũre.

³¹ Irisubure masa bajarã eropa majiniguirã erãre ne baro iibirĩñorã. Eropigũ õpa arĩpũ Jesu ïgũ buherãre:

—Masa marirogue mari seyaro soonirã warã, arĩpũ erãre.

³² Eropirã erã seyaro gasiru mera masa marirogue wariñorã. ³³ Erã eropa wacũ ïarã masa bajarã erãre masiñorã. Eropa masirã baja macari majarã mague waha, Jesu ïgũ ejaborogue omajatuhãñorã. ³⁴ Erã eropa ejacũ Jesu tuhajapa, gasirugue sañadigũ majanũgajagũ ïgũ bajarã masare ïapũ. Oveja ïhadibugũ moorã iro dopa árĩñorã erã Jesu ïgũ ïacũ. Eropigũ erãremojomoro ïagũ baja buhepũ erãre. ³⁵ Ñamicague doce ïgũ buherã Jesu pohrogue eja õpa arĩñorã ïgũre:

—Ohõ maca marirogue ãhraa. Ñamicague ãhraa. ³⁶ Õgã árĩri macarigue masare wadoreque. Erã baburire asũrã waporõ, arĩriñorã erã Jesure.

³⁷ —Mũa basi ta barire oque erãre, arĩpũ Jesu erãre.

Īḡu eroparīcū peerā ōpa arī yuhriñorā:

—¿Wuaro niyerupūri mera ḡua dohpa ii asūbocuri panre masa bajarā erā baburire? arīñorā erā Jesure.

38 —¿Di nucu pan āhriri ōguere? Īarā waque, arīpu Īḡu erāre.

Īḡu eroparīcū erāpu barire boca ōpa arīñorā:

—Cinco dipuru āhraa pan. Wai perā āhrima, arīñorā.

39 Erā eroparīcū peegu Jesu masare dipa cururi ero taa arīro weca doadorepu masare. 40 Īḡu eroparīcū peerā erā dipa cururi doañorā. Yuju curure cien gohra arīñorā. Gaji curure cincuenta gohra arīñorā. 41 Erā doapehrecū ĩha Jesu cinco dipuru pan dipurure ai, erā perā waire ai, umarogue ĩhamemuju Goāmure “Ōhaa,” arīpu. Eropa arī serētuhā iri pan dipurure nuha Īḡu buherāre ōpu masare gueredoreḡu. Eropiḡu wai perāre gueredorepu arīpehrerāre. 42 Eropirā arīpehrerā baha yapia wañorā. 43 Erā ba dvarare doce puiri gohra sea gameneo uḡtu doboñorā erā wai sāre eropa ta. 44 Eropirā panre banirā uma dihtare queocū cinco mil gohra arīñorā.

Jesu deco weca curiñumi

Mt 14.22-27; Jn 6.16-21

45 Irisubu ta Jesu Īḡu buherāre dohodirugue ñajajadore, gajipu masegue Betsaida yebague Īḡu core taribuja yudorepu. Eropiḡu erā taribuja wara puhru Jesupu masare goerisereru. 46 Goeriseretuhaja utāḡugue muria Īḡu seyaro Goāmure serēḡu waha wapu. 47 Puhru ñamicague arīcū dohodirupu Īḡu buherā wadiru ditaru deco arīyoro. Erā ero payacū Jesu yujugu ta erā taribujaridirogue arīpu. 48 Miruñe dururo weā dujuyoro erāre. Eropiḡu erā ñero tari wejacū ĩhabeoru Jesu erāre. Eropiḡu boyo muririboro core cāreña wahgārisubu erā pohro wagu deco weca cūhrapi wahgā wapu. Erāre Īḡu tarigāripu. 49 Īḡu tarigāquerecū ta, Īḡu deco weca aricū ĩarā ĩha uca wañorā. “Sīridiḡu muru watī āhrimi,” arī pepi gaguiniguiñorā. 50 Erā arīpehrerā Īḡure ĩarā ĩha burigā uca wañorā. Erā eropa ĩha ucacū ĩagu Jesu wereru erāre:

—Ne yure ĩha ucabiricāque. Yuhu ta āhraa. Güibita, arīpu erāre.

51 Eropa arītuha Īḡu erā mera dohodirugue ñaja wapu. Īḡu ñajara puhrugā ta miruñe taria wayoro. Eropa wacū erāpu ucataria wañorā. 52 Īḡu pan dipurure baja iirare guñabiriñorā erā. Īḡure ōaro masibiriniñorā.

Jesu Genesare majarāre dorecūrāre ōarā wacū iñumi

Mt 14.34-36

⁵³ Eropi erã taribujaja, Genesare yebague eja, turogãgue payañorã. ⁵⁴ Eropirã erã dohodirugue árĩnirã erã majacũ ta masapũ Jesure ĩha masiñorã. ⁵⁵ Eropa ĩha masirã árĩpehrerogue erã ya yebague omaja, dorecurãre erã pũyucũ mera aĩgãriñorã. "Jesu erogue ãhrimi," masa erã arĩcũ pee eroguerẽ aĩ ejañorã. ⁵⁶ Eropirã árĩpehrero ĩgu waroguere paga macariguere, mũta macarigãguere, campogue, erã wari mariguere erã masa dorecurãre aĩ apiñorã Jesure coremorã. Eropirã Jesu erã pohro ĩgu ejacũ mohmepiñadialã turaro serẽñorã ĩgure.

—Mũ suhriro ojogoro dihtare mohmepiñadoreque guare, arĩ serẽñorã erã.

Eropirã ĩgu suhrirore mohmepinirã nũcũ õarã wañorã.

7

Masa ñerã wacũ iirire wereñumi Jesu

Mt 15.1-20

¹ Eropi Jerusalengue arinirã judio masare buherã, fariseo masa mera Jesu pohrogue gamenereñorã. ²⁻⁴ Fariseo masa árĩpehrerã, gajirã gua acawererã judio masa mera erã ñecũ sũmarã dorediro dopa ta erã mojotorire coero mariro babirimuriñorã. Eropirã doberi duarã pohrogue wanirã dujajarã erã dorerire iimorã, erã mojotorire coero mariro babirimuriñorã erã. Eropirã baja gaji erã dorerire erã ñecũ sũmarã iidorerire iimuriñorã erã. Tasa parire yujuropa coe, mátasororire coe, comesororire coe, erã iiguaro dopa ta iimuriñorã erã judio masa "Goãmũ eropa gahmemi," arĩrã. Eropirã Jesu pohrogue gamenererã Jesu buherã erã ñecũ sũmarã dorediro dopa ta erã mojo coebiricũ ĩañorã fariseo masa. ⁵ Eropa ĩatuhajarã Jesure serẽpiñorã:

—Mũ buherã mari ñecũ sũmarã mũra erã dorediro dopa ta erã baboro core erã mojo coebeama. ¿Duhpirã mari dorerire iibeari erã? arĩñorã erã Jesure.

⁶ Erã eroparĩcũ peegu werepũ Jesu erãre:

—Masa erã ĩabiropũre ñero iicorerã ãhraa mũa. Goãmũ yare weremũhtadigu Isaia mũare iribojegue diaye ta weremuriñumi. Õpa arĩ gojañumi Goãmũ ya werenigu-irire:

Oã masa yũre õaro wereniguiquererã ne yũre umupebeama. Erã ya sĩporãripũ gajipũgue ãhraa. Yũre ne mahibeama. ⁷ Goãmũ ya doreri werenigui-ibodirore erã ya werenigui dihtare buhema erã. Eropirã yũre umupeo erã sĩbuipeori duhpiburi árĩbeaa yũre, arĩmi Goãmũ, arĩ gojañumi Isaia iribojegue.

⁸ Iri diaye ta áhraa. Goãmũ dorerire iibeaa mũa. Mũa ñecu sũmarã mũa áríricũri dihtare iiaa, arĩpũ Jesu erãre.

⁹ Eropigũ erãre wereniguinemopũ daja:

—Mũa ñecu sũmarã mũa áríricũrire iiduhubirã ta Goãmũ yapũre cohãa mũa. ¹⁰ Iribojegue õpa arĩñumi Moise Goãmũ dorerire: “Mũa pagũ sũmarãre umupeoque. Yujugũ ãgũ pagũ sũmarãre ñero werenigui coredigũ ãgũ wejẽbu árígũcumĩ,” arĩñumi Moise. ¹¹ Moise eropa arĩquerecũ ta, mũarũ masare õpa arĩ weredorea erã pagũ sũmarãre. “ ‘Mũare itamumasibeaa. Mũare yũ oborare Goãmũ ya áriburire opehocãbũ,’ arĩque mũa pagũ sũmarãre,” arĩ weredorea mũa. ¹² Eropa arĩ weredorerã erã pagũ sũmarãre erã umupeobiricũ iiaa mũa erãre. ¹³ Eropirã Goãmũ ãgũ dorerire tarinũgarã iiaa mũa mũa ñecu sũmarã ya doreri dihtare iirã. Gajirãre mũa buheri dihtare peedorea mũa. Baja eropa árírire iiaa mũa, arĩpũ Jesu erãre.

¹⁴ Eropa arĩtuha masare sihubeo õpa arĩpũ daja:

—Mũa árípehrerã peeque yũre. Yũ arĩrire õaro masique mũa. ¹⁵ Mũa disiro ñajaripũ mũa baripũ ñerã wacũ iibeaa. Mũa disiro wiriripũ, mũa wereniguiripũ mũare ñerã áricũ iiaa. ¹⁶ Yũre õaro peeque, arĩpũ Jesu.

¹⁷ Eropa arĩtuha Jesu masa pohro áridigũ waha wihigue ñajaa wapũ. ãgũ eropa ñajacũ ãarã ãgũ buherãpũ ãgũ wererare serẽpiñorã. Erã eropa serẽpicũ peegũ õpa arĩpũ Jesu:

¹⁸ —¿Ne peenibeari mũa sã? Mũa bari disiro ñajaripũ mũare ñerã masa wacũ iibeaa. ¿Irire masibeari? ¹⁹ Iri mũa pepirigue ñajabeaa. Mũa parugue ñajaja taria waha, arĩpũ Jesu.

Eropa arĩgũ “Árípehreri bari õari bari áhraa,” arĩgũ iipũ.

²⁰ Õpa arĩnemopũ:

—Mũa wereniguiripũ, mũa disiro wiriripũ mũa pepiri áhraa. Mũa pepiripũ mũare ñerã masa áricũ iiaa. ²¹ Mũa pepirigue õpa ñeri iinũgaa: Ñero pepiri, nomere gameri, yajari, masare wejẽri, ²² gajigũ marapo mera ñero iiri, gajirã yare turaro ãaribejari, ñetariari iiri, gũyari, ñeri ãaribejari, gajirã gajinore opacũ ãhaturiri, ñero quere wereri, gajirãre tarinũgadiari, pee masibiriri iinũgaa. ²³ Árípehreri i ñeri mũa pepirigue árinũgari mũare ñerire iicũ ñerã áricũ iiaa, arĩpũ Jesu.

Judio maso áribigo Jesure umupeoñumo

Mt 15.21-28

²⁴ Eropigũ Tiro waĩcũri maca pohroque, Sidón waĩcũri maca pohroque wapũ. Eroque ejağũ ero áríri wihigue ñajaa

wapɯ. Eropigɯ gajirāre ĩɣɯ árĩri wihire ne weredorebiripɯ. ĩɣɯ eropa duhridiaqueregɯ ta duhrimasibiripɯ. ²⁵ ĩɣɯ ejacũ pee mata yujugo nomeo ĩɣɯ pohro ejapo. Igo mago watĩ ñajasũdigo árĩpo. Gajirā Jesu iira querere peedigo árĩpo. Igo Jesu pohro eja ĩɣɯ guburi pohro merejapo. ²⁶ Igo judio maso árĩbiga Grecia majago árĩpo. Siro Fenicia árĩyoro igo masa dehyoara maca. Jesu pohro mereja ĩɣɯre turaro serẽpo:

—Watĩre wiubasaque yɯ magore, arĩ serẽpo igo Jesure.

²⁷ Igo eroparĩcũ peegɯ õpa arĩpɯ Jesu igore:

—Negohrare wihi opɯ porā bamɯhtaporo. Erā porā ya barire diayeare ocũ ero wabeaa. Israe masa yare gaji yeba majarāre yɯ omɯhtacũ ero wabeaa, arĩpɯ Jesu igore.

²⁸ —Eropa ta āhraa opɯ. Eropa árĩquerecũ ta barisuburo árĩcũ erā diayea sã yuhridijarire bacohrema. Gaji yeba majago yɯ árĩquerecũ, yɯ sãre itamuque mɯhɯ, arĩpo igo ĩɣɯre.

²⁹ —Mɯhɯ eropa õaro arĩ yuhricũ mɯ magore watĩre wiubasatuhabɯ. ĩago waque, arĩpɯ Jesu igore.

³⁰ ĩɣɯ eroparĩcũ peego waha, igo ya wihigue eja, igo magore camague oyagore watĩ moogoguere eja ĩapo.

Peebigure, wereniguimasibigure õagɯ wacũ iĩnumi Jesu

³¹ Irisuburo Jesu sã Tiro waĩcɯri maca pohroguere árĩdigu waha, Sidón waĩcɯri macare eja tarigã, Decapoli waĩcɯri macare eja tarigã, Galilea waĩcɯri ditarugue ejañorã pare. ³² Eropirã peejabigure, wereniguibigure aĩgãriñorã gajirã Jesu pohrore.

—Mɯ mojoto mera mohmepiñaque ĩɣɯre, arĩ serẽñorã erā ĩɣɯre.

³³ Erā eroparĩcũ peegɯ Jesupɯ peejabigure aĩgã, masa mariroguere aĩ ejapɯ. Erā seyaro árĩñorã. Eropigɯ Jesu ĩɣɯ mujusĩri mera ĩɣɯ gamirire pupɯ. Eropigɯ ĩɣɯ disico mera ĩɣɯ nerore mohmepiñapɯ. ³⁴ Eropiituhaja ɯmaro ĩhamuju sã aĩ õpa arĩpɯ:

—Efata, arĩpɯ Jesu. Efata mari ya mera “Pãgũque,” arĩro iiaa. Eropa arĩɣɯ ĩɣɯre peedoregɯ iipɯ. Eropigɯ wereniguidoregɯ iipɯ.

³⁵ ĩɣɯ eroparĩcũ ta ĩɣɯ peejabigɯ peepɯ. ĩɣɯ nero niriicũ pepigɯ õaro wereniguinɯgapɯ. ³⁶ Eropigɯ Jesu irire ĩanirāre gajirāre weredorebiripɯ. Eropa weredorebiri-querecũ, erāpɯ gajirāre burigã werepehocãñorã. ³⁷ Eropirã masa pee ɯca waha õpa arĩñorã:

—Árīpehreri õaro iimi. Peejabirã sãre õaro peecũ iimi. Wereniguibirã sãre õaro wereniguicũ iimi Jesu, arĩnorã masa.

8

Cuatro mil masare bari oñumi Jesu

Mt 15.32-39

¹ Irisubure daja dipaturi masa bajarã erã gamenerera pũhrũ, bari moorã erã árĩcũ ñagũ Jesu ñgũ buherãre sihubeopũ:

² —Oã masa ùhrenũ gohra yũ mera árĩtuhajama. Erãre bari pehrea waca. Eropigũ erãre mojomoro ñhaa yũhũ.

³ Gajirã erã mera majarã yoarogue arinirã ãhrima. Erã babiriquererã erã ya wirigue dujaacũ gamebirica. Mague warã erã oaboarã turabiribocoma. Eropigũ erãre barire odiaca, arĩpũ Jesu ñgũ buherãre.

⁴ Ñgũ eroparĩcũ ñgũ buherã ñgũre arĩnorã:

—¿Duhpii mari õguere masa mariroguere barire bococuri erãre ejomorã? arĩnorã Jesu ñgũ buherãpũ.

⁵ —¿Di nũcũ dipuru pan dipuru opari mũa? arĩ serẽpipũ Jesu erãre:

—Siete pan dipuru ãhraa, arĩnorã.

⁶ Eropigũ ñgũ masare taa árĩro weca doadorepũ. Tuhanugu siete pan dipurure aĩ, Goãmũre “Õhaa,” arĩ serẽpũ. Eropa arĩ serẽtuhaja pan dipurure nuha ñgũ buherãre ópũ gueredoregũ. ⁷ Eropirã waigã sãre bajamerãgã opañorã erã. Eropigũ waigãre aĩ Goãmũre “Õhaa,” arĩ serẽ, ñgũ buherãre masare gueredorepũ. ⁸ Masa irire barã yapia wañorã. Erã ba ðuharare siete puii gohra aĩ gameneo ùjũtu doboñorã. Erã masa cuatro mil gohra árĩñorã. ⁹⁻¹⁰ Eropiituha Jesu masare goeriserepũ wagũ. Erãre goeriseretuhaja Dalmanuta waĩcũri maca pohroque waha warũ.

Fariseo masa deyoro moariñere ñadiariñuma

Mt 16.1-4; Lc 12.54-56

¹¹ Ero pũhrũ fariseo masa Jesu mera ðuyasorã erañorã. Erã Jesure Goãmũ turari mera deyoro moariñere iidoreriñorã. Ñgũ ii ñhmasibiricũ ñadiariñorã. Ñgũ iimasibiricũ “Goãmũ ñgũ obeodigũ árĩbeamĩ,” arĩdiariñorã. ¹² Erã õpa dorecũ peegũ Jesu turaro bujawere sññaja õpa arĩpũ:

—¿Mũa dohpague majarã duhipirã Goãmũ ñgũ turari mera deyoro moarire ñadiari? Diaye arãa mũare. Dohpague majarã mũare ne deyoro moarire ii ñhmasome yũhũ, arĩpũ Jesu erãre.

¹³ Ōpa arītuha waha dohodirugue ñaja gajipũ masegue waha wapũ ĩgu buherã mera.

Fariseo masa, Herode ya curu majarã sã erã ñeri buherire wereñumi Jesu

Mt 16.5-12

¹⁴ Eropa warã panre cãdijiñorã. Dohodiruguere yujuru ta panrure opañorã erã. ¹⁵ Eropigũ Jesu guhyaro mera werepũ ĩgu buherãre:

—Ōaro iique. Fariseo masa, Herode ya curu majarã sã erã pan bugacũ iiburire òaro iique. Guhya ãhraa iri, arĩ werepũ erãre.

¹⁶ ĩgu fariseo masa sã erã buherire eroparĩcũ pee, ĩgu buherãpũ peewisirã irire erã basi wereniguiñorã.

—Mari panre mari aĩgãribiricũ ĩagu eropa arĩcumi ĩgu, arĩñorã erã basi.

¹⁷ Erã eropa arĩrare masigu òpa arĩpũ Jesu erãre:

—¿Duhpirã mua pan cãdijirare guñari mua? ¿Mua masibeari? ¿Peenibeari mua dohpa? ¿Peediabeari mua?

¹⁸ ¿Cuiricurã arĩquererã ĩabeari mua? ¿Gamiricũquererã ta peebeari mua? ¿Mua yũ iirare guñabeari? ¹⁹ ¿Yũ cinco mil umare cinco dipuru panre yũ nuha orare guñabeari mua? ¿Erã yapi weorare di nucũ puiri pan dipure mua ujutura puirire añari mua? arĩ serẽpipũ Jesu erãre.

—Doce puiri, arĩñorã erã ĩgure.

²⁰ —¿Eropi yũhũ siete pan dipurure cuatro mil masare yũ ora pũhrũ di nucũ puiri ujutura puiri añari mua? arĩpũ Jesu erãre daja.

—Siete puiri, arĩ yũhriñorã erã.

²¹ —¿Eropa irire ĩaquererã ta masibeari mua dohpa? arĩpũ Jesu erãre.

Jesu cuiri deyobigure ĩacũ iĩñumi

²² Eropi erã Betsaida waĩcuri macague erã ejacũ ĩarã, masapũ cuiri deyobigure aĩgãriñorã.

—ĩgure mohmepique, arĩ turaro serẽñorã erã Jesure.

²³ Eropigũ Jesu cuiri deyobigure mojoto ñeha iri maha turogue ĩgure taragãpũ. Aĩ eja ĩgu cuirire purimetupũ disico mera. Eropigũ ĩgu mojoto mera ĩgure mohmepipũ.

—¿Mũhũ ĩacũ dehyori? arĩ serẽpipũ Jesu ĩgure.

²⁴ ĩgu eroparĩcũ ĩgupũ ĩagu òpa arĩpũ:

—Masare ĩhaa. Erãre ĩaquerecũ erã curicũ yucũ iro dopa dehyoma, arĩpũ ĩgu cuiri deyobigupũ.

²⁵ ĩgu eroparĩcũ peegu Jesupũ ĩgu mojotori mera ĩgu cuirire mohmepipũ daja. ĩgu eropa mohmepira pũhrũ cuiri deyobigu ĩgu turaro ĩacũ òaro deyoyoro pare. Eropigu

árĩpehrerire ðaro ĩapũ ĩgũ. ²⁶ Eropĩgũ Jesu ĩgũre ĩgũ ya wihigue omedijugũ ðpa arĩpũ:

—Macague tamerare wabiricãque. Eropĩgũ maca majarãre i yũ iirare gajirãre weresiribiricãque, arĩpũ Jesu ĩgũre.

Jesu ĩgũ diaye ta Cristo árĩrĩre wereñumi Pedro

Mt 16.13-20; Lc 9.18-21

²⁷ Eropi Jesu ĩgũ buherã mera Cesarea Filipino waĩcũri maca pohro árĩri macarigue wanemoñorã. Erogue wagũ Jesu serẽpiñapũ ĩgũ buherãre:

—¿Nihino árĩcuri yũhũ masa erã yũre pepicũ? arĩ serẽpiñapũ ĩgũ.

²⁸ ĩgũ eropa arĩ serẽpiñacũ peerã ĩgũ buherã yũhriñorã:

—“Ñũ waĩyegũ ãhrimi,” arĩma mũre. Gajirã “Elia ãhrimi,” arĩma. Gajirãpũ “Goãmũ yare weremũhtanirã mera majagũ ãhrimi,” arĩma, arĩ yũhriñorã ĩgũ buherã ĩgũre.

²⁹ Erã eropa arĩra pũhrũ Jesu serẽpinemopũ erãre:

—¿Mũapũ mũa pepicũ nihino árĩcuri yũhũ? arĩ serẽpipũ. Pedropũ yũhripũ ĩgũre:

—Mũhũ Cristo Goãmũ ĩgũ obeodigũ ãhraa, arĩ yũhripũ Pedro.

³⁰ ĩgũ eroparĩcũ peegũ Jesu ðpa arĩpũ:

—Yũre “Cristo ãhrimi ĩgũ,” ne arĩ weresiribiricãque gajirãre, arĩpũ erãre.

Jesu ĩgũ sĩriburiñere ĩgũ masa mũriaburiñe sãre weremũhtañumi

Mt 16.21-28; Lc 9.22-27

³¹ Eropĩgũ ĩgũ erãre buhenugapũ ðpa arĩ weregũ:

—Yũhũ masũ Goãmũ ĩgũ obeodigũ ãhraa. Eropĩgũ burĩgã ñero tarigũca. Yũre eropa ta waro gahmea. Mũrã, pahia oparã, marire buherã sã yũre gamebirã yũre wejẽrãcoma. Erã yũre eropa wejẽquerecũ, uñrenũ pũhrũ masa mũriagũca, arĩpũ Jesu erãre.

³² Eropa arĩgũ erã ðaro peeboro dopa ðaro weregũ iipũ erãre. ĩgũ eroparĩcũ peegũ Pedropũ gajipũ ñarĩgã Jesure aĩgã ĩgũre arĩpũ. “Eropa arĩbiricãque,” turaro mera arĩ werepũ. ³³ ĩgũ eropa arĩdorebiricũ peegũ Jesupũ ĩgũ buherãre majinugaja, turipũ Pedrore.

—Satana iro dopa wereniguĩgũ iiaa mũhũ. Eropa arĩbiricãque. Mũ pepiri masa ya ãhraa. Goãmũ ya árĩbeaa, arĩpũ ĩgũ Pedrore.

³⁴ Eropa arĩtuha masare ĩgũ buherã mera sihubeo ðpa arĩpũ:

—Yujugu yu mera majagu árĩdiagu ĩgu gamero iidiarire duhucāgucumi. Eropigu ĩgu yu mera majagu ĩgu árĩri dipuwaja ñero tarigucumi. Ñero tariqueregu yahare iiniguicāgucumi. ³⁵ Yujugu masu ĩgu ya árĩburi dihtare pepigu ĩgu dederea wagucumi. Eropigu gajigu yaha árĩburi dihtare iigu, òari buheri säre iigu, árĩpehrerinari yu mera umarogue òaro árĩgucumi. ³⁶ Yujugu masu i yeba majare árĩpehrerire opaqueregu, peamegue wagu òarire wajatasome. ³⁷ Eropigu i yebague opaburi dihtare guñagu, ĩgu sĩrigu waburire guñabigu ĩgu sĩporã mera peamegue dederegucumi. ³⁸ Dohpaguere ñerã Goãmure gamebirã erã ejatuharo iiri árĩro iiaa. Eropirã yujurãyeri yure, yu buheri säre masiquererã “Masibea,” arĩbocoma guhyasĩrirã. Erã eroparĩcũ ĩagu yu sã erãre guhyasĩrigu “Erãre masibea,” arĩguca. Yũhu masu Goãmũ ĩgu obeodigu òarã anyua mera yu Pagu goesiriri mera dujariguca. Yu dujarigu yu waĩre arĩdia guhyasĩrisãnirãre guhyasĩrisāguca yu sã, arĩ werepu Jesu.

9

¹ Eropa arĩtuhaja òpa arĩnemopũ Jesu:

—Diaye arĩgu tiiaa mũare. Yujurãyeri mũa òguere árĩrã, mũa sĩriboro core Goãmũ ĩgu opu árĩroguere yu ñajacũ ĩarãca, arĩpu Jesu.

Jesu ĩgu dupure gohrotoñumi

Mt 17.1-13; Lc 9.28-36

² Eropi seis nuri puhru Jesu Pedrore, Santiagore, ĩgu pagu magure Ñure utāgugue umadigugue erã dihtare sihu mariapu. Umarogue erã marijara puhru erã ĩhabeoro ĩgu dupure gohrotopũ. ³ Eropiro ĩgu suhri goesiriri suhri òaro boreriñe wayoro. I yeba majarã nome suhri coerã nome ne eropa borerire iimasibeama. ⁴ Mata iribojegue majarã Moise mũru Elia mũru sã dehyoañorã. Eropirã Jesu, Elia, Moise mera weretamucũ ĩañorã erã urerã ĩgu buherã. ⁵⁻⁶ Eropirã erã burigã güiñorã. Eropa güigu dohpa arĩmasibirinijagu òpa arĩpu Pedro:

—Opu, mari ohõ arĩcũ òadiaa. Uhre wihigã iirã. Mu ya wihigã, Moise ya wihigã, Elia ya wihigã iirã, arĩpu ĩgu Jesure.

⁷ Eropiro erã weca erãre imica curu cãhmotayoro. Iri eropa cãhmotacũ ta imica curu pohecague Goãmũ ĩgu wereniguri busuyoro:

—Ihĩ yu magu yu mahigu āhrimi. Peeque ĩgure, arĩri busuro cariyoro.

⁸ Eroparĩcũ peerã Pedro sã maji ĩarã Moiserẽ, Eliare ĩabiriñorã pare. Jesu dihtare ĩañorã. ⁹ Eropi utãgugue erã dijaricũ Jesu erãre werẽpũ:

—Dohparagã yũre eropa warare gajirãre ne werebiricãque. Yũhũ masũ Goãmũ ĩgũ obeodigũ yũ sĩri masa mũriara pũhrũ irire gajirãre wereque mũa, arĩ werẽpũ Jesu.

¹⁰ Eropirã erã ĩgũ dorediro dopa werebiriñorã gajirãre. Eropirã erã, erã basi õpa arĩ serẽpi wereniguiñorã:

—“Yũhũ sĩridi masa mũriara pũhrũ,” ĩgũ arĩgũ ĩduhpigũ eropa arĩri ĩgũ? arĩ wereniguiñorã erã.

¹¹ Eropirã Jesure õpa arĩ serẽpiñorã:

—Cristo Goãmũ beyedigũ ĩgũ ariboro core “Eliare arimũhtaro gahmea,” arĩma masare buherã. ĩDohpa arĩronore eropa arĩri erã? arĩ serẽpiñorã Jesure ĩgũ buherã.

¹²⁻¹³ Jesu yũhripũ:

—Diaye ta ãhraa. Eliare arimũhtadoremĩ Goãmũ árĩpehrerire amumũhtabure. ĩGũ eropa iiborore arĩ gojayura ãhraa Goãmũ yare gojarapũgue. Yũ sãre arĩ gojayuñuma. Yũhũ masũ Goãmũ ĩgũ obeodigũ bajasuburi ñero tarigũca. Gajirã yũre gamebirã yũre ñero iirãcoma. ĩIri sãre masiri mũa? Eropigũ õpa arĩgũra mũare: Elia eratuhami. ĩGũ eracũ erã ĩgũre erã gamero dopa ñero iima. Iribojegue erã arĩ gojayudiro dopa iima ĩgũre, arĩpũ Jesu.

Jesu majigũre õagũ iĩñumi

Mt 17.14-21; Lc 9.37-43

¹⁴ Eropi dijari ĩgũ buherã dujanirã pohrogue eja, bajarã masare ĩapũ. ĩGũ buherãpũ judio masare buherã mera game dũyatorã iĩñorã. ¹⁵ Masa Jesure ĩarã árĩpehrerã ĩhamaria wañorã. Eropirã ĩgũ pohrogue omagã ĩgũ pohrogue eja, “ĩAhrari?” arĩñorã ĩgũre. ¹⁶ “Ahrabũ,” arĩtuhaja erãre serẽpipũ:

—ĩÑehenore game wereniguirã iiri mũa eropa dũyatorã? arĩ serẽpipũ ĩgũ.

¹⁷ ĩGũ serẽpicũ peegũ masa watope niguidigũ werẽpũ ĩgũre:

—Buhegũ, yũ magũre watĩ ñajasũdigũre mũre aĩgãrirabũ. Watĩpũ ĩgũre wereniguidorebeamĩ. ¹⁸ Yũ magũre ĩgũ ñajacũ yebague mehmereja wahami. ĩGũ disirore sumutua, ĩgũ gũcũrĩre cũridihu bũha wamũramĩ ĩgũ. Eropigũ mũ buherãre watĩre yũ magũre ñajadigũre cóãdorerabũ. Erã cóãmasibirama, arĩ werẽpũ ĩgũre.

¹⁹ ĩGũ eroparĩcũ peegũ õpa arĩpũ Jesu masare:

—¿Ne yure umupeobirigohracāri m̄ua? Yoari boje m̄uare buherabu yuh̄u. ¿Dipa boje yuh̄u m̄uare yujuro bojebocuri? Īgure aīgārique, arīp̄u Jesu.

²⁰ Īgu eroparīcū peerā watī ñajasūdiguire Jesu pohro aīgāriñorā. Erā Jesu pohro aī ejacū ta watīp̄u Īgu majiguire mehmerejacū iip̄u. Īgu eropiicū Īgu yebague mehmereja wap̄u. Tūru, naragā, buhacū iip̄u. Eropii Īgu disiro sumutua wap̄u. Jesu Īgu pagure serēpip̄u:

²¹ —¿Dipa boje eropa āhrari Īgu? arī serēpip̄u Jesu majigu pagure.

—Majigugāgue ta Īgu eropa árīnugami, arī yuhrip̄u Īgu pagup̄u. ²² Eropigu watīp̄u Īgure peamegue, diague sāre cóām̄uririmi Īgure wejēdiagu. Eropigu m̄uh̄u itamumasigu mojomoro ĩha itamuque guare, arīp̄u majigu pagup̄u Jesure.

²³ Īgu eroparīcū peegu ōpa arīp̄u Jesu Īgure:

—M̄uh̄u yure umupeocū ĩagu Goām̄u árīpehrerire iipehocāmasimi m̄u ya árīburire iigu, arīp̄u Jesu Īgure.

²⁴ Īgu eroparīcū majigu pagu ōpa arī gaguiniguip̄u:

—M̄ure umupeoa yuh̄u. Ȳu umupeobiricū ĩagu itamuque yure yuh̄u m̄ure umupeoboro dopa, arīp̄u Īgu.

²⁵ Eropiicū masa bajarā erā pohro omagāriñorā. Erā gamenerecū ĩagu Jesu watīre ōpa arī turip̄u:

—M̄uh̄u wereniguimasibiricū iidigu, gamiri bihadigu ĩre duhuque. Eropigu dipaturi Īgure garibobiricāque, arīp̄u Jesu.

²⁶ Īgu eroparīcū peegu majiguire ñajadigu watī gaguinigui, majiguire yebague mehmereja, tūru naragācū ii duhup̄u Īgure. Īgu eropiicū majigup̄u sīrigu dopa wap̄u.

²⁷ —Īgu sīria wami, arīñorā masa bajarā.

Erā eropa arīquerecū ta Jesup̄u Īgu mojtore ñeha Īgure tara wahgū nugup̄u. Īgu tara wahgū nugucū wahgānugajap̄u Īgup̄u.

²⁸ P̄uhr̄u Jesu wihigue ñajajacū ĩarā Īgu buherā erā seyaro serēpiñorā Jesure:

—¿Duhpirā guap̄u majiguire watī opagure cóāmasibirayuri m̄u pepicū? arī serēpiñorā erā.

²⁹ —Īno watīre cóādiarā burigā Goām̄ure serēro gahmea. Eropirā Goām̄ure serēmorā ba duhuro gahmea m̄uare, arī yuhrip̄u Jesu erāre.

Dipaturi ta Jesu Īgu sīriburiñere Īgu masa m̄ariaburiñe sāre wereñumi

Mt 17.22-23; Lc 9.43-45

³⁰ Eropi erogue árīnirā waha Galilea yebague eja, tarigāñorā. Irisubu Jesu Īgu buherāre buhegu iip̄u. Eropigu

erã warore gajirã masicũ gamebiripũ Jesu. ³¹ Erogue ejagũ ïgũ buherãre buherũ. Õpa arĩ buherũ:

—Yũhũ masũ Goãmũ ïgũ obeodiguã ãhraa. Masa yũre ñeha gajirãguere yũre wiarãcoma. Erã wiara pũhrũ yũre wejẽrãcoma erã. Eropa erã wejẽra pũhrũ uñrenũ pũhrũ masa mũriagũca, arĩpũ Jesu.

³² Ìgũ õpa arĩcũ õaro peebiriñorã. Eropirã gũirã ïgũre irire serẽpibiriñorã.

Jesu ïgũ buherãre erã yagũ opũ árĩbure wereñumi
Mt 18.1-5; Lc 9.46-48

³³ Eropi erã Capernaumgue ejara pũhrũ wihigue erã árĩcũ Jesupũ serẽpipũ erãre:

—¿Maguere arirã dohpa arĩ dũyaso wereniguirã iiari mũa? arĩ serẽpipũ erãre.

³⁴ Ìgũ eroparĩcũ erã yũhribiriñorã. Mague arirã õpa arĩ dũyaso wereniguiñorã erã basi:

—¿Nihi ãhriri mari árĩpehrerã wecague? arĩ dũyaso wereniguiñorã erã. Eropirã erã eropa arĩrare Jesure werediabiriñorã. ³⁵ Erã eropa yũhribiricũ ïagũ Jesu doaja ïgũ buherãre sihubeo õpa arĩpũ:

—Árĩpehrerã wecague opũ árĩdiagũ árĩpehrerã ojogoro majagũ árĩro dopa ta erã pohro majagũ árĩro gahmea mũare, arĩpũ Jesu erãre.

³⁶ Eropa arĩgũ majigũgãre erã watope duhudobopũ. Duhudobotuha ïgũgãre aĩ coã õpa arĩ werepũ:

³⁷ —Yahare iidiarã, ïgũgãre bu árĩgũre gamerã yũ sãre gahmea mũa. Mũa eropiirã yũre gamerã, yũre obeodiguã Goãmũ sãre gahmea mũa, arĩpũ Jesu erãre.

Marire ñhaturibiguã árĩgũ mari mera majagũ ãhrimi, arĩ wereñumi Jesu

Mt 10.42; Lc 9.49-50

³⁸ Ero pũhrũ ïgũ buhegũ Ñũ õpa arĩpũ Jesure:

—Buhegũ, yujugũ mũ waĩ mera watẽare cohã wiucũ gũa ñhabũ. Ìgũ mari mera majagũ ïgũ árĩbiricũ ñarã, ïgũre irire iidorebirimũrabũ gũa, arĩpũ ïgũ.

³⁹ Ìgũ eroparĩcũ peegũ Jesu erãre werepũ:

—Eropa arĩbita mũa ïgũre. Yujugũ yũ waĩ mera deyoro moarire iigũ, pũhrũguere yũre ñero wereniguimasibeami.

⁴⁰ Marire ñhaturibiguã árĩgũ, ïgũ mari mera majagũ ãhrimi.

⁴¹ Mũare diaye ta arãa. Yaharã mũa árĩcũ ñarã gajirã mũare itamucũ ïagũ Goãmũ erãre õaro itamugũcumi. Yuju coaru mera decore mũare erã tĩacũ merogã árĩquerẽcũ, erãre õaro iigũcumi Goãmũ erã õaro iira waja, arĩpũ Jesu.

*Ñerire iicũ guhya ãhraa, arĩ buheñumi Jesu
Mt 18.6-9; Lc 17.1-2*

⁴² Eropigu Jesu majigugãre ïgu basi coã aĩ erãre weren-
emopu:

—Ïgã yure umupeogugãre weregura mware: Yujugu ïgã iro dopa árĩgure ñerire iidoredigu, ïgu ñetariaro tarigucumi. Gajigure masa ïgure wunugure wuariye utãye mera dirisiu, wuariyague ïgure cóãcũ ñero wabocumi ïgu. Eropigu ïgã dopa árĩgure ñerire iidoredigupũ wuariyague erã cóãdigu tauro ñero tarigucumi. Ïgu burigã dipuwaja moasũgucumi. ⁴³⁻⁴⁴ Mũ mojoto mera ñero iigu, iri mojotore mũ tabe cóãbodiro dopa iri ñerire duhuque. Irire duhubigu peamegue waguca. Eroguere ne peame yaribea. Eropirã beca sã ãjuquererã ne sĩribeama. Mũ mojotore mũ cóãcũ iri dũca dihta cohmoboya. Eropigu mũpũ epasi árĩqueregu ta pũhrũ Goãmũ mera árĩgũca. Mũ pe mojoto mera árĩgure peamegue ïgu cóãcũ ñetariaro tarigũca. Eropigu iri ñeri iiripũre duhuque. ⁴⁵⁻⁴⁶ Mũ guburu mera ñero iigu mũhũ iri guburu sãre mũ tabe cóãbodiro dopa ta iri ñerire duhuque. Irire duhubigu peamegue waguca. Eroguere ne peame yaribea. Eropirã beca ne sĩribeama. Mũ guburure mũ cóãcũ irisi dihta cohmoboya. Eropigu epasi árĩqueregu ta pũhrũ Goãmũ mera árĩgũca. Mũ pe guburu mera árĩgure mũre peamegue cóãcũ mũ ñetariaro tarigũca. Eropigu iri ñeri iiripũre duhuque. ⁴⁷⁻⁴⁸ Mũ cuiru mera ñero iigu irirure mũ gorawea cóãbodiro dopa ta iri ñerire duhuque. Irire duhubigu peamegue waguca. Eroguere ne peame yaribea. Eropirã beca sã ne sĩribeama. Mũ cuirure cóãcũ iriru dihta cohmoboya. Yujupũ cuiru mariqueregu ta pũhrũ Goãmũ mera árĩgũca. Mũre pe cuiru mera árĩgure peamegue mũre cóãcũ mũ ñetariaro tarigũca. Eropigu iri ñeri iiripũre duhuque.

⁴⁹ “Í yeba árĩrã ñero tarirãca mũa. Peamegue mari ãjucũ marire pũriro dopa ta ñero tarirãca mũa. ⁵⁰ Moa õaro acaa. Moa acabiricũ usuriri iimasiya mara. Moa acabiro iri moa ne õabeaa. Iri moa acabiricũ dohpagohra iimasiya mara. Eropirã moa õaro acaro dopa mũa suarã árĩque. Eropirã gajirã mera õaro mera árĩque.

10

*Erã marasã nomere erã cóãcũ õabeaa, arĩ wereñumi Jesu
Mt 19.1-12; Lc 16.18*

¹ Eropigu ïgu erogue árĩdigu waha, Judea yeba pohrogue eja, dia Jordán waicuriya gajipũ masegue ejarũ. Erogu e ïgu ejacũ iarã masa bajarã ïgu pohrogue gamenereñorã

daja. Erã gamenerecũ ïagu ero core ïgu buhediro dopa ta dipaturi buheru daja. ² ïgu eropa buherisubu fariseo masa erañorã. Jesure ïgu ñero wereniguicũ peediañorã. Eropa peediarã erã Jesure õpa arĩ serẽpiñorã:

—¿Mari marapore cóãcũ õhari? ¿Moise doreripu eropa ta iidone õabeaa. Iri moa acabiricũ reri mu pepicũ? arĩ serẽpiñorã.

³ —¿Dohpa doreyuri Moise mware? arĩ yuhripu Jesu.

⁴ —“Mu marapore cóãdiagu paperapũgue irire gojaque. Eropa gojagu iripũre mu marapore otuhajanijague igore cóãmasia,” arĩ gojañumi Moise, arĩ yuhriñorã fariseo masa.

⁵ Erã eroparicũ peegu õpa arĩ wereru Jesu:

—Mua ñecu sumarã Goãmu dorerire iidiabiricũ ïagu, “Eropa ta wacuraporo,” arĩgu, “Mua marapore cóãmasia,” arĩ gojañumi Moise. ⁶ ïgu eropa arĩ gojara árĩquerẽcũ ta, negohraguere Goãmu mua marasã nomere cóãcũ gamebiriñumi. I yebare ñhacũnugugu umu, nomeo sãre iĩñumi. ⁷ Eropigu umu ïgu pagu sumarãre cohã wiria ïgu marapo mera árĩgucumi. ⁸ Eropirã erã perã árĩquererã ta, yuju dupu iro dopa árĩrãcoma. Eropirã erã perã iro dopa árĩbeamã. Yuju dupu iro dopa ãhrima erã. ⁹ Eropirã Goãmu ïgu doreri mera mojtodirima. Eropirã game cóãbiricãro gahmea erãre, arĩpu Jesu erãre.

¹⁰ Eropa arĩtuha ïgu buherã mera wihigue ñajaa wapu. Wihigue ñajajarã erã marasã nomere cóãrire serẽpinemoñorã daja ïgu buherã. ¹¹ Erã eropa serẽpiñacũ ïgu yuhripu:

—Ïgu marapore cóãdigu gajigo mera marapocugu, ïgu igo gajigo mera ñero iigu iimi. ¹² Eropigo nomeo sã igo marapure cóãgo, gajigu mera marapucugo, ïgu gajigu mera ñero iigo ãhrimo, arĩpu Jesu erãre.

*Majirãgã ya árĩburire Goãmure serẽbasañumi Jesu
Mt 19.13-15; Lc 18.15-17*

¹³ Eropi majirãgãre Jesure mohmepidoremorã erãgãre Jesu pohrogue aĩ erañorã. Erã eropiicũ ïgu buherãpu erãgãre aĩgãrirãre bocatĩri turiñorã. ¹⁴ Erã eropa turicũ ïagu Jesu papũrigu õpa arĩpu erãre:

—Eropa ñacãque. Majirã yu pohrogue ariporo. Waque, arĩbiricãque erãgãre. Erã Goãmure erã opure masima. Eropirã Goãmu ïgu opu árĩroguere oãgã iro dopa pepirã ãhrima eroguere. ¹⁵ Diaye arĩgu iiaa mware. Oãgã Goãmure gamediro dopa ta mua Goãmure gamebirã ïgu pohrogue wasome mua. Mua wabiricũ mua opu árĩsome ïgu, arĩpu Jesu.

16 Eropa arĩtuha Jesu majirãgãre aĩ coãgũ erãre mohmepi erã ðaro árĩburire Goãmũre serẽbasagu ðpa arĩpũ:

—Oãgã ðarã waporu, arĩ serẽbasapũ Goãmũre.

Doberi opagu Jesu mera weretamuñumi

Mt 19.16-30; Lc 18.18-30

17 Eropi Jesu ãgũ mague wacũ, yujugũ masũ omagã wa ãgũ guburi pohro mereja Jesure serẽpirũ.

—Mũhũ buhegu ðagu ãhraa. ¿Yũhũ árĩpehrerĩnũri Goãmũ mera árĩdiagu duhpigũcuri? arĩpũ ãgũ Jesure.

18 ãgũ eroparĩcũ Jesu ãgũre yũhrĩpũ:

—¿Dohpa arĩronore yũre “Õagu” arĩ piyuri mũhũ? Goãmũ yujugũ ta ðagu ãhrĩmi. 19 ãgũ Goãmũ dorerire masia mũhũ. “Masare wejẽbircãque. Gajigu marapo mera árĩbircãque. Yajabita, gũyabita, gajirã yare gũya aĩbita, mũ pagũ sũmarãre umupeoque,” ire doremi Goãmũ. I dorerire iro gahmea mũre, arĩ werepũ Jesu ãgũre.

20 —Buhegu, irire árĩpehrerire majigũgãque ta tari-nũgabirimũribũ yũ, arĩpũ ãgũ Jesure.

21 Jesu ãgũre ãhamehtu mahĩpũ. Eropigu ðpa arĩpũ:

—Merogã duhyaa mũre mũ ipehoboro. Árĩpehrerire mũ yare duaque. Eropigu árĩpehreri mũ wajatarare mojomorocũrãre oque. Mũhũ eropiicũ baja ðari ãmarogue Goãmũ pohroguere árĩyuroca. Tuhajanugu yũ mera majagu árĩbu arĩque, arĩpũ Jesu ãgũre.

22 Wũaro opagu árĩpũ ãgũ. Eropigu Jesu ãgũre eroparĩcũ peegu ãgũ oparire mojomorocũrãre odiabigu, turaro bujawere, suabiri waha wapũ.

23 ãgũ bujawere wacũ ãagu Jesu majinũgaja ãgũ buherãre ãha ðpa arĩpũ:

—Doberi oparã Goãmũ ãgũ opu árĩroguere erã wadiacũ diasã ãhraa, arĩpũ erãre.

24 ãgũ eroparĩcũ peerã erãpũ pee uca waha pee masi-biriñorã. Eropa arĩtuha Jesu dipaturi werepũ erãre:

—Yũ acawererã, árĩpehrerã “Yũ gamero yũ opari mera ta ðaro tarigũca,” arĩ pepirã Goãmũ ãgũ opu árĩroguere erã wacũ diasataria. 25 Camellopũ awĩru gobegãque ãgũ ñajatariwereadiacũ masiya marã ãgũre. Eropa ta doberi opagu ãgũ Goãmũ mera ðaro árĩgũ ãgũ opu árĩroguere ãgũ wacũ diasã ãhraa, arĩ werepũ erãre.

26 ãgũ eroparĩcũ peenijarã ãhamaria wanijarã, erã basi ðpa arĩñorã:

—Yaho. ãgũ arĩro dopa ta diaye arĩcũ ne yujugũ masũre taubiribocumi Goãmũ ãgũ pohro wamorãre, arĩñorã erã erã basi.

27 Erã eroparĩcũ peegu Jesu erãre ñhabeo õpa arĩpũ:

—Masa erã bocatĩuro erã õaro iiri mera tarimasibeama. Goãmũ pohrogue wamasibeama. Goãmũ dihta masare peamegue wabonirãre taumasimi ñgu pohro wamorãre. Ñgu arĩpehrerire õaro iimasipehocãmi, arĩpũ Jesu erãre.

28 Ñgu eroparĩcũ peegu Pedro ñgure õpa arĩpũ:

—Peenique. Guapũ arĩpehreri gũa yare apicãbũ mũ mera wamorã, arĩpũ ñgu Jesure.

29 Ñgu eroparĩcũ Jesu õpa arĩpũ:

—Diaye arĩgu iiaa mũare. Arĩpehrerã õari buherire yaha arĩburire iimorã mũa wirire, mũa pagũ porãre, mũa pagũ sumarãre, mũa porãre, mũa poerire apirã wũaro wajatarãca mũa dohpaguere. 30 Eropirã mũa wirire, mũa pagũ porãre, mũa pagosã nomere, mũa porãre, mũa poerire ero core mũa opadiro tauro dohpaguere baja oparãca mũa ñero tarirã arĩquererã. Eropirã gajirã mũare ñero iirãcoma. Eropirã pũhrũguere arĩpehrerinũri Goãmũ mera arĩrãca. 31 Dohpaguere bajarã oparã arĩnirã irisubure bu arĩrã dujacãrãcoma. Eropirã dohpaguere bajarã bu arĩnirãpũ oparã dujarãcoma daja, arĩ werepũ Jesu erãre.

Dipaturi Jesu ñgu sĩriburiñere, ñgu masa mũriaburiñe sãre wereñumi

Mt 20.17-19; Lc 18.31-34

32 Eropi erã mague majaa, Jerusaléngue majarã iĩñorã. Jesu erã coregã mũhtapũ. Ñgu eropa mũhtacũ ñarã ñgu buherã ñha uca wañorã. Eropirã erã pũhrũ nũrusiarãpũ güiro mera ñgure nũrusiañorã. Eropigu Jesu doce ñgu buherã seyarore sihubeo, masa ñgure iiburire werenũgapũ daja erãre.

33 —Peeque yũre. Dohpaguere Jerusaléngue warã iiaa mari. Erogue masa yũ masure Goãmũ ñgu obeodigure yũre ñeha, pahia oparãre, judio masare buherã sãre yũre orãcoma. Eropirã yũre wejẽdorerãcoma erã. Eropa wejẽdorerã judio masa arĩbirãre orãcoma yũre. 34 Erã eropa ora pũhrũ erã yũre wereya, disico ehosũ tãrarãcoma. Tuhaja yũre wejẽrãcoma. Eropigu yũ sĩrira pũhrũ uhrenũ pũhrũ masa mũriaguca, arĩ werepũ Jesu.

Santiago, Ñũ mera Jesure serẽñuma

Mt 20.20-28

35 Eropi Santiago, Ñũ mera Jesu pohrogã ejarã erã gamerire serẽñorã ñgure. Erã Zebedeo porã arĩñorã. Eropirã õpa arĩñorã:

—Buhegũ, gũa serẽro dopa ta guare iique mũhũ, arĩñorã erã Jesure.

36 —¿Yuhũ duhpiicũ gahmeri mua? arĩpu Jesu erãre.

37 —Mũhu árĩpehrerã wecague opu árĩgu guare mu waĩ mera dorerã acuque. Yujugũre mu diayerũ, gajigũre copũ doboque guare. Mu mera oparã gũa árĩboro dopa iique, arĩ serẽñorã erã Jesure.

38 Erã eroparĩcũ peegu õpa arĩ werepu Jesu:

—Mua ñero tariborore masibiriquererã õpa arĩ serẽa mua yure. ¿Dohpaguere yu ñero tariboro dopa ta mua sã ñero tarirã yujuro bojebocuri mua? ¿Yure erã ñero iiboro dopa mua sãre ñero iicũ yujuro bojemasibocuri mua? arĩ serẽpipũ Jesu erãre.

39 —Yujuro bojerãca, arĩ yuhriñorã.

Erã eroparĩcũ Jesu õpa arĩ werepu:

—Yu ñero tariboro dopa ta mua sã ñero tarirãca. 40 Eropa mua tarimorã árĩquerecũ ta, yu mera doremorãre beyemasibea yuhũ. Irire yuhũ Pagũ amutuhami. Eropirã ĩgu beyenirã dihta yu diayerũ yu copũ doarãcoma, arĩpu Jesu.

41 Santiago, Ñu sã erã oparã árĩburire Jesure serẽcũ gajirã diez buherã peerã, erã mera guañorã. 42 Erã eropa guacũ ĩagu, Jesu ĩgu buherãre sihu gameneo õpa arĩpu:

—Goãmure masibirã oparãpu erã masare dorerã, pũriro mera dorema. 43 Mũarũ ne eropa iisome mua basi. Mua mera majagu opu árĩdiagũ, árĩpehrerã ĩgu mera majarãre itamugu árĩporo. 44 Eropigu árĩpehrerãre doregu árĩdiagũ, erã pohro majagu árĩro dopa ta árĩporo. 45 Eropa árĩgu tiiaa yu sã. Masare dorebiragu arigu iibiribũ. Yuhũ masũ Goãmu ĩgu obeodigu árĩqueregu ta, i yebaguere masare itamugu arigu iibu. Eropigu masa bajarã erã ñero iira dipuwajare sĩribasagu arigu iibu. Eropigu erã peamegue wabonirãre taugu arigu iibu, arĩpu Jesu erãre.

Bartimeore, cuiiri ĩhajabigũre ĩacũ iĩnumi Jesu

Mt 20.29-34; Lc 18.35-43

46 Eropi erã Jericógue ejañorã. Eropirã iri macague árĩnirã Jesu ĩgu buherã masa bajarã mera wañorã. Jesu wari maha tũroque yujugu masũ cuiiri ĩhajabigu doarũ. ĩgu Bartimeo waĩcũgu Timeo magũ arĩpu. ĩgu ma tũroque doagu umuri nũcu masare niyerure serẽmũripũ. 47 Eropigu ero doanijagu masa “Jesu Nazare majagu ahrimi,” erã arĩcũ peepũ. Eropa peenijagu õpa arĩ gaguiniguipũ:

—Jesu, opu Davi mũrũ pãrami masare taubu mojomoro ĩaque yure, arĩ gaguiniguipũ Jesure.

48 ĩgu eropa arĩ gaguiniguicũ peerã masa bajarã Bartimeore “Ejarimaricãque,” arĩ turiñorã. Erã eropa arĩ

turiquerecũ, ĩḡuḡu ĩḡu ero core ĩḡu gaguiniguidiro tauro gaguiniguiḡu daja.

—Jesu, opu Davi muru pãrami masare taubu mojomoro ĩaque yure, arĩ gaguiniguiḡu daja.

⁴⁹ ĩḡu eroparĩcũ peegu Jesupu dujanugaja:

—Sihubeoque ĩḡure, arĩḡu. ĩḡu eroparĩcũ peerã erãḡu ĩḡu cuiiri ĩhajabigũre sihugãñorã.

—Mucubirique. Wahgãnugajaque. ĩḡu mure sihumi, arĩñorã erã ĩḡure Bartimeore.

⁵⁰ Erã eroparĩcũ peegu ĩḡu omasiariñere tuweapi, buhri tarimagã Jesu pohrogue ejanugajaru. ⁵¹ Eropigu Jesu serẽpipu ĩḡure:

—¿Dohpa yahu mure iicũ gahmeri muhu? arĩ serẽpipu Jesu ĩḡure.

—Yu opu, yure cuiiri ĩacũ iique, arĩḡu ĩḡu cuiiri ĩhajabigũḡu.

⁵² —Mu yure umupeonijagu ðagu waha. Eropigu wanisa, arĩḡu Jesu ĩḡure.

ĩḡu eroparĩcũ ta cuiiri ĩhajabigũ ðaro ĩha wapu. ðagu wanijagu Jesu mera mague nurusia wahgã wapu.

11

Jerusaléngue ejañumi Jesu

Mt 21.1-11; Lc 19.28-40; Jn 12.12-19

¹ Eropii erã Jerusaléngue ejaboro coregã, Betfagé maca pohrogã, Betania maca pohrogã ejamuhtañorã. Iri macari utãḡu Olivo waĩcudigu gubuye árĩyoro. Erogue ejaḡu perãre ĩḡu buherãre Jesu obeogu ðpa arĩḡu:

² —Si macague waque. Erogue ejarã mata burrogãre erã dirinugudigugãre bocajarãca. Gajirã erã peyaya marigu árĩcumi. ĩḡure boca ja ĩḡure diriradarire pãa yure aĩḡaribasaque. ³ Mua eropiicũ ĩagu burrogã opu “¿Duhpimorã burrogãre pãri?” ĩḡu arĩcũ peerã ðpa arĩ yuhrique ĩḡure: “Marĩ tĩḡu burrogãre gamebeoniami dohpa. Eropigu dohparagã wiagucumi ĩḡure,” arĩ wereque ĩḡure, arĩ weredore obeopu ĩḡu buherã perãre.

⁴ ĩḡu dorebeonirã waha, wihi pohro árĩri mare burrogãre disiporo erã dirinugudigugãre bocañañorã. Boca ja ĩḡure erã diriradarire pãñorã. ⁵ Eropirã ĩḡure erã pãcũ ĩarã ero niguinirã serẽpiñorã:

—¿Duhpimorã mua diriradarire pãri burrogãre? arĩ serẽpiñorã.

⁶ Erã eroparĩcũ peerã erãḡu Jesu ĩḡu arĩdiro dopa ta wereñorã erãre serẽpirãre. Erã eropa arĩ werecũ peerã

erã ero niguinirãpũ “Aĩgãque,” arĩñorã erãre. ⁷ Eropirã erã burrogãre Jesu pohrogue aĩgã wañorã. Erã aĩ ejara pũhrũ suhri ĩgũgã weca erã peotuhacũ ĩagũ Jesupũ ĩgũgã wecague mũribejapũ wabu. ⁸ Eropirã masa bajarã erã peyari suhrire tuwea aĩ ĩgũ warĩ maha deco sėopi mũhtañorã Jesure umupeorã. Gajirãpũ pũricũri dũpũrire poerigue erã aĩgãrira dũpũrire apimũhtañorã “Ōari maha arĩporo,” arĩrã.

⁹ Eropirã ĩgũ core warã, ĩgũ pũhrũ arirã sã ōpa arĩ gaguiniñorã:

—Īre umupeorã. Ihĩ Goãmũ ĩgũ obeodigu ōaro ariporo.

¹⁰ Mari ñecũ Davi mũrũ opũ ĩgũ arĩdiro dopa ta ōaro ariporo. “Ūmaro majagũ turagũ ãhrimi,” arĩ umupeorã, arĩ gaguiniguĩñorã erã.

¹¹ Eropigu Jesu Jerusalėngue ejapũ. Ejagũ Goãmũ ya wihigue ñajajagũ, iri wihi majare arĩpehrerire ĩapehocãpũ. Īatuhaja “Ñamicague ãhraa. Ūmũñarigã ta ãhraa. Ina warã,” arĩpũ Jesu. Īgũ buherã mera Betaniague waha wañorã.

Jesu higuerağũ waĩcũdigũre sĩridoreñumi

Mt 21.18-19

¹² Eropi gajinũ erã Betaniague arĩnirã Jerusalėngue dujarĩñorã daja. Eropa dujaricũ Jesupũ oaboa wapũ. Eropa oaboagũ yoarogue niguidigũre higuerağũre ōaro pũricũdigũre ĩanijagũ irigũ dũcare amagũ waripũ. ¹³ Dũca mariyoro. Dũcacũrisubu arĩbiriya. Pũri dihta opayoro. ¹⁴ Eropigu dũca maricũ ĩagũ ōpa arĩpũ:

—Irigũ dũcare masa ne dipaturi babiricãporo. Ne dũcacũbircãporo, arĩpũ Jesu.

Īgũ eroparicũ ĩgũ buherãpũ peeñorã.

Jesu Goãmũ wihire Goãmũ mera werenigũiri wihire ĩidoreñumi

Mt 21.12-17; Lc 19.45-48; Jn 2.13-22

¹⁵ Īgũ eropiira pũhrũ erã Jerusalėngue erañorã. Eragũ Jesu Goãmũ ya wihigue ñajapũ daja. Ñajajagũ doberi duarãre, asũrãre bocajagũ cohã wiucãpũ. Eropigu niyerure game gohroto doarã ya mesarire yomemuju aĩ mehpi behomũripũ. Bujare duarã erã doari pėrori sãre eropa ta iipũ. ¹⁶ Eropigu Jesu Goãmũ wihiguere gajinore aĩ ñajadorebiripũ masare. ¹⁷ Eropigu Jesu ōpa arĩ buhepũ erãre:

—Ōpa ãhraa Goãmũ yare erã gojarapũgue: “Yaha wihi Goãmũ mera werenigũiri wihi waĩcũroca. Eropiro arĩpehrero majarãgue yũ mera erã werenigũiri wihi

árīroca,” arī gojañuma Goām̄u wereniguirire. Goām̄u eropa arīquerecū ta, m̄ap̄u i wihire Goām̄u wihire duadoarā bu game yajarā iiaa, arīp̄u Jesu erāre.

18 Īḡu eropa arī buhecū árīpehrerā masap̄u pee ɯcapehrea wañorā. Eropirā pahia oparā, judio masare buherā mera ĩḡure ḡui árīñorā. Eropirā erā ĩḡure wejēburire guñamaañorā. 19 Erā eropiicū ñamicague Jesu ĩḡu buherā mera iri maca árīnirā waha wañorā.

Higueraḡu s̄iria wayoro

Mt 21.20-22

20 Eropirā boyo دچارicū mague majarirā higueraḡure ĩañorā daja. Iriḡu nugurigue s̄irinuga s̄iriadiḡu árīcū ĩañorā. 21 Iriḡure ĩaḡu Pedrop̄u ðpa arīp̄u:

—Buheḡu, ĩaque. Iriḡu higueraḡup̄u m̄u s̄iridorediḡup̄u s̄iria waya, arīp̄u Pedro.

22 Īḡu eroparīcū Jesu werep̄u erāre:

—Goām̄ure umupeoturaque m̄ua. 23 Diaye arīḡu tiiaa m̄uare. M̄ua Goām̄ure ðaro umupeori mera iriḡu ɯtāḡure “Dua aĩ w̄ariyague cóadiḡu árīporo,” m̄ua Goām̄ure arīcū, m̄ua arīdiro dopa ta waroca. “Ȳu serēro dopa diaye ta eropa ĩiḡucumi,” m̄ua arī guñacū, “Goām̄u iisome,” arībiricū, m̄ua serēdiro dopa ta Goām̄u ĩiḡucumi. 24 Eropiḡu irire wereḡura m̄uare. Goām̄u mera wereniguirā, ĩḡure serērā, “Ȳu serēro dopa ta eropa waroca ȳure,” arī guñaque. M̄ua eropiicū ĩaḡu Goām̄u m̄ua serērire oḡucumi. 25 Eropirā Goām̄ure m̄ua serēboro core gajirāre erā m̄uare erā ñero iirare cādijique. Gajirā erā ñero iicū m̄ua guarare duhuque. M̄ua eropiicū ĩaḡu mari Paḡu ɯmaro majaḡu m̄ua ñero iirare ĩḡu s̄a cādijiḡucumi. 26 M̄uare ñero iirare m̄ua cādijibiricū ĩḡu s̄a m̄ua ñero iirare cādijisome, arīp̄u Jesu erāre.

Jesure dorediḡure ĩḡure serēpiñuma pahia oparā, judio masare buherā, m̄urā mera

Mt 21.23-27; Lc 20.1-8

27 Īḡu eropa arīra p̄uhr̄u erā Jerusaléngue wañorā daja. Eropirā Jesu Goām̄u wihigue ĩḡu curicū ĩarā, pahia oparā, judio masare buherā, m̄urā mera ĩḡu pohrogue erarā ĩḡure serēpiñorā:

28 —¿Noa doreri mera irinore ĩḡu iiri m̄uh̄u? ¿Noa m̄ure Goām̄u wihi duanirāre cóadoreari? arī serēpiñorā erā Jesure.

29 Erā eroparīcū Jesu ȳuhr̄ip̄u:

—M̄uap̄ure serēpim̄htaḡura. Õaro m̄ua ȳuhr̄icū ȳu s̄a m̄uare ȳuhr̄iḡura. 30 ¿Ñu masare ĩḡu waĩyecū noano ĩḡure

waïyedoremuriyuri mũa pepicũ? ¿O Goãmũ doreyuri? ¿O masapũ doremuriyuri mũa pepicũ? Yũre wereque, arĩpũ Jesu erãre.

³¹ Īgũ eroparĩcũ peerã erãpũ erã basi game õpa arĩ wereniguiñorã:

—¿Dohpa arĩ yũhrirãcuri mari? “Goãmũ Ñure doredigu árĩñumi,” mari arĩcũ, “¿Goãmũ Ñure ĩgũ dorequerecũ ta duhpĩrã ĩgũ wererare peebirari mũapũ?” arĩbocumi Jesu marire. ³² Oã masapũ “Diaye ta Ñu Goãmũ yare weremũhtadigu árĩmi,” arĩ pepima erã. Erã eropa pepirã, “Ñu ĩgũ waïyecũ Goãmũpũ ĩgũre doredigu árĩbiriñumi,” mari arĩcũ, masapũ mari mera guarãcoma, arĩñorã erã basi.

³³ Eropirã erã Jesure õpa arĩ yũhriñorã:

—Ñure waïyedoredigũre gũa masibea, arĩñorã erã Jesure.

Erã eroparĩcũ õpa arĩpũ Jesu.

—Irisubu tamerare yũ sã mũa serẽpirare werebea mũare. Yũ iirire iidoredigũre werebea mũare, arĩpũ Jesu erãre.

12

Ñerã mohme corerã iira queorire wereñumi Jesu buhebu Mt 21.33-46; Lc 20.9-19

¹ Eropi Jesu queori mera buhenũgapũ daja erãre.

—Yeba opũ árĩñumi. Iri yebare ĩgũ ya iguidarire oteñumi. Otetuha sãrĩrore nugu, iguire erã cũhra bujuburi gobere seañumi. Pohe decogue mũari wihigã sãre iĩñumi ĩhadibuma õaro. Eropigũ gajirãre ĩgũ ya pohe deco mera apiñumi erã mohme corera waja. Eropigũ iri pohere erãre mohme coredoretuhaja gaji yebague waha wañumi ĩgũ. ² Pũhrũ igui ñirisubu árĩcũ pohe opũ ĩgũ pohro majagũre ĩgũ ya pohe mohme corerã pohrogue obeoriñumi. Pohe maja ĩgũ ya oteri dũcare ĩgũ ya sero maja dũcare aĩdoregũ obeoriñumi ĩgũre. ³ Eropirã pohere mohme corerãpũ ĩgũ pohro majagũre ñeha pañuma. Eropiituha ĩgũ ya igui tĩrĩre obiriquererã dujadoreñuma ĩgũre. ⁴ Eropigũ pohe opũ gajigũ ĩgũ pohro majagũre obeoriñumi daja. Eropirã pohere mohme corerãpũ ĩgũre ĩgũ dipurure cami moa ñero iĩñuma ĩgũ sãre. ⁵ Gajigũ ĩgũ pohro majagũre obeocũ ĩgũpũre wejẽcãñuma. Gajirã sãre bajarãre eropa dihta iĩñuma. Gajirãre pa gajirãre wejẽñuma erã.

⁶ Eropigũ pohe opũ magũ dihta dũhyañumi. ĩgũ ta ĩgũ magũ ĩgũ mahigũ árĩñumi. Eropigũ ĩgũ magũre obeoñumi pare erã pohrogue, “Yũ magũpũre umupeorãcoma,” arĩgũ.

⁷ Īḡu õpa arĩ pepiquerẽcũ, erã pohere corerãpũ ĩḡu magu aricũ ĩha, õpa arĩ wereniguiñuma: “Pohe opu magu ãhrimi. Īḡure wejẽcãrã mari. Eropiro i pohe mari ya pohe dujaroca,” arĩ wereniguiñuma erã erã basi. ⁸ Eropa arĩrã ĩḡure ñeha wejẽ, pohe tũrogue aĩgã cóacãñuma erã ĩḡure, arĩpũ Jesu erãre.

Eropa arĩtuhaja Jesu erãre serẽpipũ:

⁹ —Ne, ¿pohe opu dujarigu dohpa iigucuri ĩḡu ya pohere mohme corerãre? arĩpũ Jesu. Õpa iigucumi erãre, arĩpũ. Īḡu erãre wejẽ gajirãpũre pohere mohmedoregucumi, arĩpũ Jesu erãre. ¹⁰⁻¹¹ ¿Goãmũ yare erã gojarapũgue õpa arĩrire irire buhebiriri mũa? Õpa arĩ gojañuma:

Īhĩ Cristo utãye iro dopa ãhrimi. Masa Cristore gamebirãcoma. Erã gamebiriqerẽcũ Goãmũ ĩḡure beye opu acumi. Goãmũpũ ire iimi. Īḡu eropa iicũ ĩarã “Õataria,” arĩ pepia mari, arĩ gojañuma iribojegure. ¿Irire ne buhebiriri mũa? arĩpũ Jesu erãre.

¹² Īḡu eroparĩcũ peerã pahia oparã, judio masare buherã, mũrã mera õpa arĩ pepiñorã: “Jesu i queorire wereḡu ‘Erã ñerã mohme corerã iro dopa ãhrima,’ marire arĩ weresãḡu iicumi,” arĩ pepiñorã. Eropa arĩ pepirã Jesure ñeadiariñorã. Eropa ñeadiaquererã, masapũ Jesure gamerã mari mera guari, arĩrã masare güi árĩñorã. Eropa güirã ĩḡure cohãgã wañorã.

Fariseo masa, Herode ya curu majarã mera gobierno maja wajayerire serẽpiñuma Jesure

Mt 22.15-22; Lc 20.20-26

¹³ Waha, erã mera majarãre yujurãyerire fariseo masare, Herode ya curu majarã sãre Jesure serẽpiñadore obeoñorã daja. Erã Jesure baja serẽpiri mera ĩḡu gajiropa yuhricũ weresãmorã iiriñorã. ¹⁴ Eropirã Jesu pohro eja ĩḡure serẽpiñorã:

—Buheḡu, diaye mũ wereniguigu ḡuyari marigu mũ árĩcũ masia ḡua. Eropigu opu árĩcũ sãre bu árĩḡu ĩḡu árĩcũ sãre mũhũ yujuropa ĩhaa. Eropigu Goãmũ yare diaye mũhũ werea. Masa suçũ sãre erã suçabiricũ sãre queoro werea. Eropigu ḡuare wereque: ¿Roma majagu árĩpehrerã tauro opu árĩḡure, gobierno majare marire wajayero gahmeri mũ pepicũ? ¿Mari doreripu wajayedoreri mũ pepicũ? arĩ serẽpiñorã erã Jesure.

¹⁵ Erã eropa arĩ serẽpicũ peegu erã ḡuyarire erã ñero iidiarire masigu õpa arĩ yuhripũ erãre:

—¿Duhpirã yu ñero wereniguicũ peediari mũa? Doh-paragã niyerusere aĩgãrique irisere ñamorã, arĩpu Jesu erãre.

¹⁶ Īgu eroparĩcũ peerã yujuse niyerusere aĩgãriñorã. Erã irisere aĩ eracũ ĩagu Jesu serẽpipu erãre:

—¿Nihino gohra masu tuhyari isere? ¿Noa waĩ tuhyari isere? arĩ serẽpipu ĩgu.

—César waĩcugu masa tauro opu masu ĩgu waĩ sã tuhyaa irisegue, arĩ yuhriñorã erã.

¹⁷ Erã eroparĩcũ Jesu werẽpu erãre:

—Irisubu tamerare masa tauro opu árĩgu yare ĩgure oque. Goãmũ yare Goãmũpare oque, arĩpu Jesu. Īgu eroparĩcũ pee uca wañorã.

Saduceo masa Goãmũ ĩgu sĩrinirã masurire serẽpiñuma Jesure

Mt 22.23-33; Lc 20.27-40

¹⁸ Eropi yujurãyeri Saduceo masa Jesu pohroguere erañorã. Saduceo masapu “Goãmũ sĩrinirãre masusome,” arĩ pepirã árĩñorã. ¹⁹ Eropirã erã õpa arĩñorã Jesure:

—Buhegu, marire õpa arĩ gojadigu árĩmi Moise: “Yujugu ĩgu tĩgu marapocugu porã mariqueregu ĩgu sĩricũ ĩagu, ĩgu pagu magure ĩgu tĩgu marapo árĩdigore marapocuro gahmea. Eropigu ĩgu tĩgu mũru ĩgu tĩgu ĩgu porãcubodiro dopa ta porãcuro gahmea ĩgu pagu magure. Eropirã ĩgu tĩgu mũru porã iro dopa árĩrãcoma,” arĩdi árĩmi Moise, arĩñorã.

²⁰ Ire erã arĩtuhaja i queorire werenemoñorã Jesure.

—Yujugu porã siete árĩñorã. Eropii erã tĩgupu marapocu, porã marigu ta sĩa wapu. ²¹ Eropigu gajigu ĩgu pagu magu sã ĩgu tĩgu mũru marapo árĩdigore marapocupu. Īgu eropa marapocura puhru ĩgu sã ĩgu tĩgu mũru iro dopa ta porã mariqueregu ta sĩa wapu. Eropigu ĩgu pagu magu ĩgu ĩgu mũru iro dopa porã mariqueregu ta sĩa wapu. ²² Eropa dihta wañorã yujugu porã. Ne porã mariquererã sĩripehrea wañorã. Erã marapo sã erã puhru sĩa wapo pare, erã arĩtuhaja Jesure serẽpiñañorã. ²³ ¿Ne, Goãmũ árĩpehrerã sĩrinirãre ĩgu masucũ nihino marapo gohra árĩgocuri igo? Erã árĩpehrerã igore marapocunirã árĩñorã. ¿Eropigo nihino marapopu árĩgocuri igo? arĩ serẽpiñorã erã Jesure.

²⁴ Jesu yuhripu erãre:

—Goãmũ yare erã gojarapũ wereniguirire ne masibea mũa. Eropirã Goãmũ ĩgu turari sãre ne masibea mũa, arĩpu Jesu. Eropiro mũa pepiripu diaye árĩbeaa. ²⁵ Sĩrinirã mũra erã masa mũriara puhru erã anyua iro dopa ahrima.

Erã uma nome mera marapocubeama eroguere. ²⁶ Sîrinirã erã masa mûriaboropure mûare weregura, arîpu Jesu. Irire Moise ôaro werepehocãnumi. Iri yucugugãgue ûjurisubû árîgu Goãmû ôpa wereñumi Moisere: “Yũhũ Abrahã, Isaa, Jacobo, erã opu ãhraa,” arî wereñumi Goãmû iribojegue. ²⁷ Erã sîrira puhrugue “Erã opu ta ãhraa,” arî wereñumi Goãmû. Eropirã erã sîrinirã mûra îgu masunirã árîrã erã ojocarirã ãhrima. Eropirã “Sîrinirã masasome,” arî pepirã diaye pepibea mûa, arîpu Jesu erãre.

Ôatariariñere doreriñere wereñumi Jesu

Mt 22.34-40

²⁸ Eropigu yujugu judio masa erã buherã mera majagu erã pohrogue eraa, erã game wereniguicũ peepu. Jesu îgu ôaro yuhririre peegu serëpipu îgure.

—¿Goãmû ya doreri ôatariaro doreripu diñe doreripu ãhriri mû pepicũre? arî serëpipu îgu Jesure.

²⁹ Jesu îgure yuhripu:

—Iñe doreriñe ôatariariñe ôpa ãhraa. “Israe masa peeque. Goãmû mari Opu yujugu ta ãhrimi. ³⁰ Bûrigã mûa sîporã mera, mûa turari mera, mûa ôaro guñari mera Goãmure mûa Opure mahique,” arîmi Goãmû. ³¹ Iñe doreriñe puhru gaji doreriñe sã ôataria. “Mû basi mahiro dopa ta mû pohro árîrã sãre mahique,” arîmi Goãmû. Iri pe doreri ta árîpehreri gaji doreri tauro ãhraa, arî werepu Jesu îgure.

³² Îgu eroparicũ judio masare buhegu ôpa arî yuhripu:

—Eropa ta ãhraa, buhegu. Diaye ta arãa mûhũ. Goãmû yujugu ta ãhrimi. Gajigu îgu iro dopa árîgu marimi. Mû arîri diaye ta ãhraa. Goãmure turaro mari sîporã mera, mari turari mera, mari pepiri mera, mari ôaro guñari mera îgure mahiro gahmea. Mari pohro árîrãre mari basi mari mahiro dopa ta, erã sãre mahiro gahmea marire. ³³ Mari Goãmure umupeomorã waimurã wejẽ soemujucũ ôapũrica. I tauro Goãmure masa sãre mari mahicũ ôataria, arîpu îgu Jesure.

³⁴ Îgu pee masiri mera yuhricũ îha Jesu îgure arîpu:

—Merogã duhyaa mure Goãmû mû opure mû masiboro, arîpu Jesu îgure.

Îgure eroparicũ gajirã peerã îgure güirã serëpinemo-diabiriñorã pare.

¿Noano acaweregu ãhriri Cristo? serëpi ñañumi Jesu masare

Mt 22.41-46; Lc 20.41-44

³⁵ Eropigu Goãmû wihigue buhegu ôpa arîpu Jesu:

—“Cristo Davi mure pãrami arigucumi,” arĩ buhema marire buherã. ¿Duhpirã eropa arĩ buheri erã? Erã õaro masiboro duhyania erãre dohpa. ³⁶ Davi igu basi Espiritu Santo igure dorero dopa ta õpa arĩ wereñumi:

Goãmũ yũ opure õpa arãmi. “Ohõ yũ diayerũ yũ mera dorebu doaque. Eropigu mure ihaturirãre mure tarinugabasagũca yũhũ,” arĩmi Goãmũ yũ opure, arĩ gojañumi Davi mure.

³⁷ Eropa arĩ gojagũ Davi mure opũcũrũ Cristore “Yũ opu,” arĩgu. Cristo Davi mure opu ãhrimi. Eropigu Davi mure Cristo ñecũ arĩqueregu opuñumi Cristore, arĩ werepũ Jesu.

İgu eropa arĩ buhecũ bajarã masa mucubiriri mera peeñorã igure.

Jesu masare buherã erã ñero iirire wereñumi

Mt 23.1-36; Lc 11.37-54; 20.45-47

³⁸ Eropigu igu buhenemogu õpa arĩpũ:

—Masare buherã erã ñero iirire õaro ãaque. Eropirã erã iiro dopa iibiricãque. Erã yoari suhri saña erã masa erã ihabeoro cuhrima. Doberi duarogue gajirã umupeori mera erãre bocatĩri serẽcũ gahmema erã. ³⁹ Eropirã mari buheri wiriguere õari doari dihtare doadiama. Eropirã bosenuri arĩcũ sãre oparã erã doari dihtare gahmema erã. ⁴⁰ Eropirã erã wapeweyarã nome erã wajamocũ İha erã ya wirire emacãma erã nomere. Eropa erãremojomoro İabiriquererã erã masa İhurore yoari boje Goãmure serẽma, “Gua Goãmure õaro umupeoa,” arĩ guyarã. Erã eropa iira dipuwaja gajirã tauro dipuwaja moagucumi erãre, arĩpũ Jesu erãre.

Wapeweyo Goãmure igo apirare wereñumi Jesu

Lc 21.1-4

⁴¹ Eropigu Jesu Goãmũ wihi maja erã amuburi niyeru gameneori comoro pohro doapũ. Ero masa erã niyeru sãcũ İapũ. Doberi oparã iri comorogue niyeru pagari sãa tari wahgãmuriñorã. ⁴² Eropigo wapeweyo bũro iri comorogue ahri pesegã sãpo. Pese yuju centavo maja ãhraa. ⁴³ Iriserire igo apicũ İagu Jesu İgu buherãre sihubeo arĩpũ:

—Diaye arĩgu iiaa mure. Igo wapeweyomojomorocũgo niyeru sãri comorogue igo yare sãgo gajirã arĩpehrerã erã sãdiro tauro sãmo igo. ⁴⁴ Gajirã doberi oparã erã wũaro oquerecũ ta erã ya wũaro duhyaa. Igonũmojomorocũgo arĩquerego ta, arĩpehreri igo bari asũborare Goãmũ ya arĩburire opehocãmo, arĩpũ Jesu.

13

—*Goãmũ wihi cóãsũroca, arĩ yuñumi Jesu*
Mt 24.1-2; Lc 21.5-6

¹ Eropigu Goãmũ wihiguere erã wiriacũ ñagu yujugu erã buherã mera majagu õpa arĩpũ:

—Buhegu, ñaque. I wihi Goãmũ wihi maja wiri utã mera erã iira wiri õari wiri ãhraa, arĩpũ ñgu.

² Ñgu eroparĩcũ Jesu werepũ erãre:

—I wihi maja wiri dohpaguere ñaraa mũa. I wihi arĩpehreri mari ñara i utã sã cohmopehrea waroca. Ne yujuye utãye dujasome iri wiri maja, arĩpũ Jesu.

I mũa pehrebore wereñumi

Mt 24.3-28; Lc 21.7-24; 17.22-24

³ Eropi Jesu Olivo waĩcũdigũ utãgũgue Goãmũ wihi diaye maja arĩdigũgue ejapũ. Ero doapũ. Ero Pedro, Santiago, Ñu, Andre mera erã seyaro arĩrã, erã ñgũre serẽpiñorã:

⁴ —Wereque gũare. ¿Dohpãrĩcũ eropa warocuri mũ arĩdiro dopa waro? ¿Pehreburinũ coregãre dohpa wanũgacũ ñarãcuri gũa? arĩ serẽpiñorã erã Jesure.

⁵ Jesu yũhripũ:

—Õaro ii yuque mũa. Eropirã gajirã erã gũyarire peebiricãque mũa. ⁶ Bajarã masa “Cristo ãhraa yũhũ,” arĩ gũyarã arĩrãcoma. Erã eropa gũyacũ peerã masa bajarã Goãmũ yare duhurãcoma.

⁷ Mũa pohrogã gajirã masa erã gamewejẽcũ peerãca. Eropirã yoarogue majarã erã sã erã gamewejẽcũ peebeorãca mũa. Eropa peequererã ta ne irire wũaro bujawere pepibiricãque. Eropa wamũhtaroca. Eropa wacũ pehreburiũ dũhyaniroca dohpa. ⁸ Irisubure yuju yeba majarã gaji yeba majarã mera gamewejẽrãcoma. Eropirã yujugu opũ yarã gajigu opũ yarã mera gamewejẽrãcoma. Eropiro bajasuburi i yeba ñohmeroca. Eropirã bajarã masa oa mera sĩrĩrãcoma. Eropa ñero tariquerecũ i yeba majarãre tauro erã ñero tariboro dũhyaa dohpa. Ñero tarinirãcoma dohpa.

⁹ Õpa wacũ ñarã mũa basi õaro iique. Gajirã mũare ñeha ñero iidorerã orãcoma gajirã oparãre. Eropirã mũa acawererã judio masa erã buheri wirigue sãre mũare parãcoma. Eropirã macari majarã oparã pohrogue, erã tauro oparã pohrogue sãre aĩgãrãcoma mũare mũare dipuwaja moamorã. Eropirã erã mũare erã pohrogue aĩgãcũ yaha buherire wererãca mũa erã sãre. ¹⁰ Eropiro pehrerinũ arĩboro core arĩpehrerãre õari buherire weresũroca. ¹¹ Eropirã mũare dipuwaja moadorerã erã oparã pohrogue erã aĩgãcũ, erã oparãre

mua wereniguiburire wuaro pepibiricãque. Mũare erã serẽpicũ mua yuhriburire Goãmũ mera masirãca. Eropa masirã mua gamero wereniguisme mua. Espiritu Santopũ mũare wereniguicũ iigũcumi. ¹² Irisubure erã tĩrã erã pagũ porãre Jesu yarã erã árĩcũ iha erãre wejẽdorerã oparãre wiarãcoma. Gajigũpũ iũũ tĩgure wejẽdoregũ oparãre wiagũcumi. Eropi erã pagũ sumarã erã porã Jesu yarã erã árĩcũ iha erãre wejẽdoregũ oparãre wiarãcoma. Eropirã erã porãpũ erã pagũ sumarãre erã Jesu yarã árĩcũ iha wejẽdorerã wiarãcoma erã oparãre. ¹³ Yũre mua umupeora dipuwaja mũare masa árĩpehrerã ihatirirãcoma. Eropa mũare erã ñero iiquerẽcũ ta, mũare erã ñero iirare yujuro bojerã, yũre duhubiricũ Goãmũ mũare taugũcumi. Eropigũ iũũ pohrogue mũare opagũcumi.

¹⁴ “Eropirã ñetariagũre Goãmũ yare goroweogũre iãrãca mua. Goãmũ wihigue iũũ niguicũ iãrãca. Ero iũũgũre árĩbiricãro gahmea. Iribojegũe Goãmũ yare weremũhtayugũ Daniel iũũgũre were gojañumi. (Irire buhegu peeporo). Ero iũũ niguicũ iãrã Judea yebague árĩrãpũ utã yucũgũe oma duhrigã waporõ. ¹⁵ Irisubure masa ñero tarirãcoma. Eropirã yojaro mera waporõ. Irisubure erã wiri weca maja pũũrigũe árĩrã wihi pohecaguere erã yare aĩrã wabiricãporõ. ¹⁶ Eropirã irisubure gajirã erã poerigũe árĩrã erã ya suhrire wihigue árĩri suhrire aĩrã dujabiricãporõ. ¹⁷ Irisubure nijiposã nome, erã porã mihrirãre oparã nome sã mojomorocũrã nome dujarãcoma. ¹⁸ Eropirã õpa serẽque Goãmũre: “Puhirõ árĩcũ eropa wabiricãporõ,” arĩ serẽque iũũgũre. ¹⁹ Irinũrire masa ñero tarirãcoma. I yebare iũũ iãacũnugura pũhrũ masa erã ñero tariri árĩmũriyoro. Iri eropa árĩquerecũ ta árĩpehreri pũriri erã ñero taridiro tauro masa ñetariaro tarirãcoma pehrerinũ coregãre. Eropa ñero erã tarira pũhrũ dipaturi eropa ñero tarisome i yeba pare. ²⁰ Eropigũ Goãmũ i ñero taririnũrire bajamenũrigã árĩcũ iigũcumi. Iũũ eropiibiricũ ne yujugũ masa taribiribocumi. Eropigũ iũũ beyenirã erã tariborore bajamenũrigã ñero tarĩre apigũcumi Goãmũ.

²¹ Irisubure gajirãre pee masi iãque. “Õho ãhrimi Cristo,” erã arĩcũ erãre peebiricãque. “Ero ãhrimi Cristo,” erã arĩcũ sãre peebiricãque. ²² “Cristo ãhraa,” arĩ gũyarã, “Goãmũ yare weremũhtarã ãhraa,” arĩ gũyarã árĩcãrãcoma irisubure. Eropirã Goãmũ iũũ beyenirãre gũyarã erã deyoro moarire ii iãmurãcoma. Goãmũ yare erã cõacũ iidiarã iirãcoma erã gũyari masa. ²³ Ire árĩpehrerire

wereyumũhtaa mũare iri eropa waboro core. Eropirã õaro pee masi yuque mũaa, arĩpũ Jesu ĩgu buherãre.

*Jesu i yebaguere ĩgu dujariborore wereñumi
Mt 24.29-35, 42-44; Lc 21.25-36*

²⁴ Eropa arĩtuhagu õpa arĩ werepũ Jesu erãre:

—Irinũri erã ñero tarira pũhũ, abe mũũ majagu, ñami majagu sã boyo duhurãcoma. ²⁵ Erã eropa wacũ, necã dipuru yuhridijariroca. Eropiro umaro maja sã yeba sã bũrigã ñohmeroca. ²⁶ Irisubu ta yũhũ masũ Goãmũ ĩgu obeodigu arigũca. Eropiro umarogue yũ turari mera yũ goesiriri mera umaro maja imica weca i yebaguere yũhũ dujaricũ ĩarãcoma masa. ²⁷ Eropigu yaharã anyuare árĩpehrero i yebaguere obeogũra. Eropirã árĩpehrerogue waha yaharãre yũ beyenirãre gamene-orãcoma yũ pohroge.

²⁸ “Higueragu irigu waricũrĩre ĩarã masia mũaa. Irigu yucũgu pũricũcũ ĩarã, “Bojori merogã dũhyaa,” arĩ masia mũaa. ²⁹ Eropa ta irigu waro dopa ta masique mũaa. I árĩpehreri yũ arĩra iri eropa wacũ ĩarã, “Cristo dujariboro merogã dũhyaa,” arĩ masique mũaa. ³⁰ Diaye ta arĩgu iiaa mũare. Irisubu majarã erã sĩriboro core árĩpehreri yũ arĩdiro dopa waroca. ³¹ Umaro i yeba sã pehrea waroca. Yũ wereniguiripũ ne pehresome. Árĩpehreri yũ arĩdiro dopa ta eropa waha ojogorocũroca.

³² “Irinũre yũ dujariburinũre, iri hora sãre ne masibea yũhũ. Anyua sã irire ne masibeama. Masa sã ne masibeama. Yũ Pagũ dihta yũ dujariburinũre masimi.

³³ “Mũaa sã irinũre masibea. Eropirã õaro guñatura coreque. Goãmũre serẽque. ³⁴ Õpa coreque mũaa. I queoriñe mera irire mũare buhegũra. Wihi opũpũ yoarogue ĩgu curiro dopa ta aũraa i. ĩgu ĩgu waboro coregã ĩgu pohro majarãre ĩgu wihire coredoremi. Yujũyerire ĩgu mohmerire apimi. Yujugũre wihi disiporo ĩhadibudoregũre õaro coredoremi ĩgu dujariborore. ³⁵ Eropigu wahãmi. ĩgu pohro majarãpũ ĩgu dujariburinũre ne masibeama. ĩgu ñamica o ñami deco, cãreña ĩgu wererisubu o boyoro ĩgu aribocumi. Erã õaro ĩhacorebiricũ ĩgu guñaña mariro arigu erãre carĩrãre bococumi. Wihi opũre erã ĩgu dujariburinũre erã masibiro dopa ta mũaa sã yũ dujariburinũre masibea. Eropirã yũre õaro guña coreque. ³⁶ Guñaña mariro yũ eraborore masirã, õaro guña coreque. Yũ dorerire yahare eropa iiniguirã arĩque. Eropirã yũre õaro coreque. ³⁷ Eropigu mũare yũ

arĩro dopa ta árĩpehrerãre eropa arãa. Ôaro guña coreque, arĩpũ Jesu ãgu buherãre.

14

Pahia oparã, Judio masare buherã mera Jesure wejẽdiañuma

Mt 26.1-5; Lc 22.1-2; Jn 11.45-53

¹ Eropi irisubure Pascua bosenu core, bugabiriri pan erã baburinũ core penũ duhyayoro. Irisubure pahia oparã judio masare buherã mera, Jesure guyari mera erã ñeha erã wejẽburire game wereniguiñorã.

² —Bosenu árĩcũ ãgure ñehabiricãrã. Masa gua ãgure ñeacũ ãarã gua gamenerenijarã gamequeãbocoma, arĩrã iñorã erã erã basi.

Nomeo poresuri mera Jesure pipeoñumo

Mt 26.6-13; Jn 12.1-8

³ Eropi Jesu sã Betaniague Simo cami boadi ya wihigue árĩñorã. Iri wihi erã baro watope, yujugo nomeopũ alabastro mera iidirure poresuri nardo waĩcũri dicũdirure aĩrapo. Igo aĩrara wjacũri árĩyoro. Eropigo igo irirure pãgũ Jesu dipuru weca pipeopo. ⁴ Igo eropiicũ ãarã gajirã ùrugã gua wañorã.

—¿Duhpigo igo eropa iisirimaacãri? ⁵ Iri poresurire duaboañumo. Irire duago yuju bojori mohmeri waja wajataboañumo. Eropigo iri niyerure mojomorocũrãre oboañumo igo, arĩñorã erã erã basi. Eropirã igore turiñorã.

⁶ Erã eroparĩcũ peegu Jesu erãre werepũ:

—¿Duhpirã eropa arĩri igore? Garibobiricãque igore. Igo yũre ôaro iimo. ⁷ Mojomorocũrã mua mera eropa árĩniguicãrãcoma. Eropirã mua gamero erãre omasia. Yũpũ i yebare mua mera eropa árĩniguicãsome. ⁸ Igo masiopẽ yũre iiamo. Yũre erã yaaboro core yũ dupũre amuyugo poresuri mera sũhumo yũre. ⁹ Eropigũ diaye mũare arĩgu iiaa. Árĩpehrero i yebaguere, ôari buherire erã wereroguere igo ôpa iirare wererãcoma. Erã eropa arĩ werẽcũ peerã masa bajarã igo iirare guñarãcoma.

Juda Iscariote Jesure ñhaturirãre ãgu ñhmuburire erã mera weretamuñumi

Mt 26.14-16; Lc 22.3-6

¹⁰ Irisubure Juda Iscariote doce buherã mera majagu pahia oparã pohro waha ôpa arĩpũ:

—Yũhũ mũare weregũra Jesu ãgu árĩrore mua ãgure ñeacũ, arĩpũ. ¹¹ Eropirã pahia oparã irire peerã mucu-biriñorã.

—Mũre niyerure orãra, arĩñorã erã Judare. Eropigu Juda Jesure ìhaturirãre ìgu erãre ìhmuburire corenipũ.

Jesu ìgu buherã mera ìgu baturinũ árĩyoro

Mt 26.17-29; Lc 22.7-23; Jn 13.21-30; 1Co 11.23-26

¹² Bũgabiriri panre erã baburinũ bosenu árĩnũgarinũ árĩyoro. Eropiro ovejare Pascua majagu árĩbure erã wejẽrinũ árĩyoro. Irisubure ìgu buherãpũ serẽpiñorã Jesure:

—¿Nohonogue Pascua bosenu mari baburire amudoregu obeori mũhũ guare? arĩñorã ìgũre.

¹³ Erã eroparĩcũ Jesupũ perã ìgu buherã mera majarãre obeopũ.

—Jerusalẽngue waque. Eroque mũa ejacũ deco sorobu tuhpeogu mũare bocatĩrigucumi. ìgu bocatĩricũ ìgu mera waque. ¹⁴ Eropa warã ìgu sihu ñajari wihigue ejarã, wihi opũre õpa arĩque: “¿Nohogue yũhũ, yũ buherã mera Pascua maja barire bagucuri?” arãmi gũa opũ,” arĩque wihi opũre. ¹⁵ Mũa eroparĩcũ peegu umaro maja taribure mari gameri árĩpehleri mera erã amura taribure ìhmugucumi wihi opũ. Eroque mari baburire iique, arĩpũ Jesu erãre.

¹⁶ ìgu eroparĩcũ erã perã ìgu buherã iri macague wañorã. Erã erogue erã ejacũ ìgu arĩdiro dopa ta wayoro. Eropirã erã Pascua árĩcũ baburire amuñorã.

¹⁷ Eropi naidijarisubu Jesu doce ìgu buherã mera erã bari taribugue eroguere ejarũ. ¹⁸ Eropirã erã mesague erã ba doarisubu Jesu erãre werepũ:

—Diaye arĩgu iiaa mũare. Yujugu mũa mera majagu ta yũ mera bagũ ta yũre ìhaturirãre ìhmugucumi, arĩ werepũ Jesu erãre.

¹⁹ ìgu Eropa arĩ werecũ peerã erãpũ burigã bujawererã ìgũre serẽpinũgañorã erã yujurãyeri.

—¿Yũhũ ta árĩbocuri mũre ìhmubu? arĩñorã erã Jesure.

²⁰ —Mũa yũ doce buherã mera majagu ta àhrimi ìgu. Yũ baripare yũ mera yoso bagũ àhrimi yũre ìhaturirãre ìhmubu. ²¹ Iribojegue erã yũre arĩ gojadiro dopa ta yũhũ masũ Goãmũ ìgu obeodigu sĩrigũca. Eropigu yũre ìhaturirãre ìhmudigũpũ ñero tarigucumi. ìgũpũre ìgu masa dehyoabiricũ õapũricãboya. Ñero taribiriboñumi, arĩpũ Jesu erãre.

²² Eropigu Jesu erã mera barisubu panre aĩ Goãmũre “Õhaa,” arĩ serẽpũ. Eropa arĩgu ta irire nuha guerepũ erãre õpa arĩgu:

—Ire aĩ baque. I yũ dũpũ àhraa, arĩpũ Jesu erãre.

²³ Eropa arĩtuha ĩgu ihriripare aĩ, Goãmure “Õhaa,” arĩ serẽpũ. Erãre ĩgu ocũ arĩpehrerã erã irire ihriñorã.

²⁴ —I yũ di ãhraa. Bajarã masa erã ñero iirare cóãbu sĩrigũca. Eropigu yũ dire cóãgũca. Eropa sĩrigũ Goãmũ yũ Pagũ “Masare õaro iigũra,” ĩgu arĩdiro ii ojogorocũgũca. ²⁵ Diaye arĩgũ iiaa mũare. Goãmũ ĩgu opũ arĩrogue mama igui decore yũ ihriboro core, õre igui decore dipaturi ihrinemosome yũhũ, arĩpũ Jesu erãre.

Pedro “Jesure masibea,” ĩgu arĩ gũyaburiñere wereñumi Jesu

Mt 26.30-35; Lc 22.31-34; Jn 13.36-38

²⁶ Eropirã yujuñe erã Goãmũ bayariñere bayatuha, utãgu Olivo waĩcũdigũgue wañorã. ²⁷ Eroque sihu ejagu Jesu erãre werepũ:

—Dohpagã ñami mua arĩpehrerã yure cóãrãca. Mua yure cóãborore õpa ta arĩ gojamũhtañuma Goãmũ yare erã gojarapũgue: “Ovejare ĩhadibugũre erã wejẽcũ waro dopa ta iigũca. Yũ eropa iicũ oveja ĩgu yarã ĩgure cohãgã warãcoma,” arĩmi Goãmũ, arĩ gojañuma. ²⁸ Eropigu Goãmũ ĩgu yure sĩridigũre masura pũhrũ, mua core Galileague wamũhtagũca yũhũ, arĩpũ Jesu erãre.

²⁹ ĩgu eroparĩcũ peegu Pedro õpa arĩripũ:

—Yũ mera majarã arĩpehrerã erã mũre cóãquerecũ yũpũ mũre ne cóãsome, arĩpũ Pedro ĩgure.

³⁰ Jesu yũhripũ:

—Diaye arĩgũ iiaa mũre. Dohpagã ñamire cãreña pesubu ĩgu wereboro core, mũ uhresubu “Yũhũ Jesure masibea,” arĩgũca mũhũ, arĩpũ Jesu ĩgure.

³¹ ĩgu eropa arĩquerecũ Pedro õpa arĩ turaro busũro yũhripũ:

—Mũ mera yure erã wejẽquerecũ ta ne mũre cóãsome yũhũ, arĩ yũhripũ ĩgu Jesure.

Pedro ĩgu eroparĩcũ peerã ĩgu mera majarã ĩgu arĩro dopa ta arĩriñorã erã sã.

Getsemanigue Jesu Goãmure serẽñumi

Mt 26.36-46; Lc 22.39-46

³² Eropii erã Getsemanĩ waĩcũri gorogue wañorã. Eroque ejagu õpa arĩpũ Jesu:

—Ohõ doayũque. Mua ohõ doaropẽ sohõgue Goãmure serẽniguigu wagu iiaa, arĩpũ ĩgu buherãre.

³³ Eropa arĩtuha Pedrore, Santiagore, Ñure sihugãpũ. Eropigu ñero gũinũgapũ Jesu. Eropigu ñero sĩporãcũpũ.

³⁴ Eropa ñero pepigu ĩgu mera majarãre ĩgu sihugãñirãre arĩpũ:

—Buriġã ñero yu sĭporãcũca. Yũre turaro pũriro dopa pepica yua. Sohõñari wanigu iiaa. Ohõ dujanique. Eropirã yu mera ta tũyũque mua sã, arĩpu Jesu erãre.

³⁵⁻³⁶ Eropa arĩtuha ĩgu ero core mero wanemo, yebague mereja, Goãmure arĩpu:

—Ahũ, mũhũ árĩpehrerire iimasia. Eropigu yu ñero tariburire iidiabigu iibiricãque. Yu eropa arĩquerecã ta yu gamero dopa iibita. Mũ basĩ masia. Mũ gamero dopa iique, arĩ serẽpu ĩgu Goãmure.

³⁷ Eropa arĩtuha urredã ĩgu buherã pohroque eranijagu erã carĩ oyarãre ĩapu. ĩha Pedrore arĩpu:

—Simo, ¿carĩgu iiri mũhũ? ¿Yuju hora gohra yu mera tũyũtamubirari? ³⁸ Ōaro iique mua. Mũa pepiri mera õarire iidiaraa mua. Mũa seyaro irire iidiaquererã ta irire bocatũbeaa. Eropirã Goãmure serẽniguicãque ñero mua iibiriboro dopa, arĩpu Jesu Pedrore.

³⁹ Eropa arĩ weretuha dipaturi waha, Goãmure serẽpu daja. ĩgu ero core ĩgu arĩdiro dopa ta arĩ serẽpu daja. ⁴⁰ Serẽtuha dipaturi erã pohroque dujaripu daja. Eropa dujarigu carĩ oyarãre ĩapu daja. Wũja pũritaricãyoro erãre. Eropirã erã Jesu “¿Duhpirã carĩri mua?” erãre arĩcũ yũhrimasibiriñorã. ⁴¹ Eropigu dipaturi ĩgu Goãmure serẽra pũhrũ, erã pohro eraa erãre arĩpu:

—¿Mũa carĩrã soorã iiri dohpa? Iripẽta ãhraa. Si-hajagãriro iiaa. Dohparagã yũre masure Goãmũ ĩgu obeodigũre ñerãre erã oburisubu sihajaa. ⁴² Wahgãque. Ina warã. ĩaque. Yũre ĩhaturirãre ĩhmubu ohõ ahrimi, arĩpu Jesu erãre.

Jesure ĩhaturirã peresu ñeañuma
Mt 26.47-56; Lc 22.47-53; Jn 18.2-11

⁴³ ĩgu eropa arĩ wereniguirisubu Juda doce buherã mera majagu erapu. Eropirã masa bajarã ñoserimijirire, yucure opanirã ĩgu mera yujuro mera erañorã. Erã pahia oparã, judio masare buherã, mũrã sã erã obeonirã árĩñorã. ⁴⁴ Negohrare Jesure ĩhaturirãre obu, õpa arĩtuharũ:

—Yu ĩgu wayuporãre mimigu ĩgu ta árĩgũcumĩ mua ñeabu. ĩgũre yu mimira pũhrũ ñeaque. Eropirã ĩgũre õaro ñeaque ĩgu duhribiriboro dopa, arĩ wereserepu Judapu erãre.

⁴⁵ Eropigu Jesu pohroque eragu mata wa purumujupu:

—Buhegu, ¿ãhriri mũhũ? arĩ ĩgũre wayuporãre mimipu.

⁴⁶ ĩgu eropiicũ ĩarã erã Jesure ñeañorã.

47 Erã eropiicũ ãagu ãgu pohrogue niguinirã mera majagu ãgu matamijire tuãwea aĩ, pahia opu pohro majagure ãgu gamirote tabe corocãpu.

48 Eropigu Jesu õpa arĩpu:

—¿Mua ñoserimijiri mera, yucu ducari mera arirã, yajari masure iro dopa mua yure ñearã arirã iiri? 49 Umuri nucũ Goãmũ wihigue yuhũ mure buhedoacũ, mua yure ne ñeabiribũ. Dohpaguere mua yure eropa iirã i arĩpehleri Goãmũ yare weremũhtanirã erã arĩ gojadiro dopa ta mua yure iiaa, arĩpu Jesu erãre.

50 Eropirã Jesu buherã arĩpehlerã ãgure cohã omagã wañorã.

51 Eropigu yujugu mamũ Jesu puhũ nurusiaripu. Omasiariñe dihta omadigu arĩpu. 52 ãgu sare erã ñeadiacũ ãgu ya omasiariñere cóacã suhri marigu oma duhriã wapu.

Judio masa oparã Jesure serẽpiñuma

Mt 26.57-68; Lc 22.54-55, 63-71; Jn 18.12-14, 19-24

53 Eropii pahia opu pohrogue Jesure aĩ ejañorã. Iri wihiguere arĩpehlerã pahia oparã, mura, judio masare buherã sã gamenereñorã. 54 Eropigu Pedropu Jesu puhũ yoarogue ãha nurusiarpu. Eropa nurusiagu ãgu pahia opu Caifa waicũgu ya wihire cãhmotara sãriro eja, iri sãriro pohecague ñajaa wapu. Eropigu ãgu iri wihire corerã surara mera peame turo sõhma doapu.

55 Eropirã pahia oparã, gajirã oparã mera gamenererã Jesure wejẽdoremorã, guari mera erã ãgure dipuwaja moaborore guñamaariñorã. Erã eropa weresãburire guña bocabiriñorã. 56 Masa bajarã ãgure erã gamero weresãmaacãquererã erã weresãri diaye arĩbiriyo. Gajigu gajiropa arĩ, gajigu sã gajiropa dihta arĩñorã. 57 Eropirã gajirã erogue eja, Jesure weresãñorã:

58 —Ihĩ õpa arĩmi: “Yuhũ i wihire masa iira wihire, Goãmũ wihire cóãgura. Eropa cóãgu uhrenũ puhũ iri wihire dipaturi iigura. Iri wihĩ masa erã iira wihĩ arĩsome,” ãgu arĩcũ gua peebũ, arĩ weresãñorã.

59 Erã eropa arĩ weresãquerecũ ta iri diaye arĩbiriyo. Gajigu gajiropa arĩ gajigu sã gajiropa arĩpu.

60 Erã eropa arĩra puhũ pahia opu erã watope wahgãnũgaja Jesure serẽpipu:

—¿Oã mure weresãquerecũ ta erãre yuhri gamebeari mũhũ? ¿Mure erã weresãrire duhpiã erãre yuhri gamebeari mũhũ? arĩpu ãgu Jesure.

⁶¹ Īḡu eroparīcū peequereḡu ta Jesu eropa pepicāpū. Īḡu eropa yuhribiricū ĩaḡu pahia opū ĩḡure dipaturi serēpipū daja:

—¿Cristo ta āhriri mūhū? ¿Ōaḡu Goāmū maḡu ta āhriri mūhū? arī serēpipū daja ĩḡu Jesure.

⁶² Īḡu eropa arīcūḡue ta Jesu yuhripū:

—Īḡu ta āhraa. Eropirā yūhū masu Goāmū ĩḡu obeodigu yū Paḡu turagū pohro, ĩḡu diayerū yū doacū ĩarāca mūa. Eropirā umaro maja imica watope yū aricū sāre ĩarāca mūa, arīpū Jesu ĩḡure.

⁶³ Īḡu eroparīcū ta pahia opūpū ĩḡu sañarañe suhrirore ĩḡu basi yeguecāpū gajirāre “Guataricāmi,” arīdoreḡu.

—Īre weresārāre gajirāre mari gamebeaa pare. ⁶⁴ Īḡu basi Goāmūre ĩḡu ñero wereniguicū peea mari. Eropirā ĩḡu ñero iira dipuwajare masituhāa mari. ¿Eropirā dohpa iirācuri mari ĩre dohpaguere? arīpū pahia opū gajirā oparāre.

—Īḡu ñeri dipuwaja wejēcāro gahmea, arī yuhriñorā erā arīpehrerā oparā.

⁶⁵ Eropirā erā mera majarā Jesure disico ehosū ĩḡu cuirire diricāhmotacā, ĩḡure pañorā. Patuha ōpa arīñorā ĩḡure:

—¿Noa mūre pari? Īabiriquereḡu ḡuare wereque, arī wereyañorā erā.

Eropirā opū yarā surara Jesure pañorā.

—*Īḡure masibea, arīpū Pedro Jesure*

Mt 26.69-75; Lc 22.56-62; Jn 18.15-18, 25-29

⁶⁶ Eropiḡu Pedro iri wihi maja sāriro pohecague ĩḡu árīcū pahia opū pohro majago erapo. ⁶⁷ Igo Pedro ĩḡu sōhmacū ĩago ĩḡu dihtare ĩhaniguipo.

—Nazare majagū mera Jesu mera mū sā āhrabū, arīpo igo Pedrore.

⁶⁸ Igo eroparīcū peegū Pedropū ōpa arīpū:

—¿Dohpa arīmaacāgo iiri mūhū? Mū arīḡure ne masibeaa yūhū, arīpū Pedro igore.

Igo eropa arīra pūhrū Pedro iri pūhū maja sāriro disiporo pohrogue warū. Eropiḡu ĩḡu ero niguicū cāreña wererū.

⁶⁹ Ero ĩḡu árīcū ĩago dipaturi werepo daja ero arīrāre.

—Ihī Jesu buherā mera majagū āhrimi, arīpo igo.

⁷⁰ Igo eroparīcū peegū Pedro dipaturi arīpū daja.

—Īḡure masibeaa yūhū, arīpū daja.

Eropii merogā pūhrū ta ero niguirā Pedrore ōpa arīñorā daja:

—Diaye ta āhraa. Mūhū Galilea majagū āhraa. Eropiḡu ĩḡu mera majagū ta āhraa mūhū, arīñorā erā ĩḡure.

⁷¹ Erã eroparĩcũ peegu ãgu erãre yũhripũ:

—Diaye ta Goãmũ mera arĩgu iiaa mũare. Yũhu diaye arĩbircũ Goãmũ yũre dipuwaja moaporo. Ìgũre mũa arĩgũre ne masibea yũhu, arĩ yũhripũ ãgu erãre.

⁷² Ìgu eroparĩcũ ta cãreña wererũ daja. Ìgu wererũ peegu Jesu ãgu arĩrare guñapũ. “Cãreña pesubu ãgu wereboro core mũhu yũre uñresubu ‘Jesure masibea,’ arĩgũca mũhu,” Jesu ãgu eropa arĩrare guñapũ Pedro. Eropa guñagũ turaro orepũ.

15

Pilato Jesure serẽpiñumi

Mt 27.1-2, 11-14; Lc 23.1-5; Jn 18.28-38

¹ Eropirã boyorogue mũrã, pahia oparã, judio masare buherã, árĩpehrerã gajirã oparã mera gamenere weretamuñorã erã Jesure iiburire masimorã. Erã basi wereniguituha, Jesure dihri aĩgã Pilato waĩcũgũre opũre oñorã ãgũre.

² Erã aĩ ejacũ ãagũ Pilato ãgũre serẽpipũ:

—¿Diaye ta judio masa opũ añhiri mũhu? arĩ serẽpipũ ãgu Jesure.

—Mũ arĩro dopa ta ãgu ta añhraa, arĩ yũhripũ ãgũre Jesu.

³ Eropirã pahia oparã baja weresãñorã ãgũre. ⁴ Erã eropa arĩ weresãcũ peegu dipaturi serẽpipũ daja ãgũre.

—Oã mũre baja weresãrã iima. ¿Erã eropa arĩ weresãquerecũ yũhribeari mũhu? arĩpũ ãgu.

⁵ Ìgu eroparĩcũ Jesu yũhribiripũ. Eropigu Pilato ãhamaria wapũ.

Jesure wejẽdoreñuma

Mt 27.15-31; Lc 23.13-25; Jn 18.38-19.16

⁶ Bojori nũcu Pascua bosenu árĩcũ peresu árĩdigũre yujugũre masa “Ìgũre wiuque,” erã arĩgũre Pilato eropa wiubasamũripũ. ⁷ Irisubure Barrabá waĩcũgũ peresugue árĩpũ. Ìgu oparãre cóadiarã mera majagũ masare wejẽrã mera majagũ árĩpũ. ⁸ Eropirã masa bajarã Pilato pohroque eja, ãgũre serẽñorã:

—Bojori nũcu mũ iidiro dopa ta iique daja gũare. Yujugũ peresugue arĩgũre gũare wiubasaque daja, arĩñorã erã.

⁹ Erã eroparĩcũ Pilato erãre serẽpiñapũ:

—¿Mũa yagũ opũre judio masa opũre wiucuri? arĩ serẽpipũ Pilato erãre Jesure wiudianijagũ.

¹⁰ Jesure masa erã mahicũ ãarã pahia oparã Jesure ãhaturirã árĩñorã. Eropa ãhaturirã ãgũre wejẽdorerã oñorã Pilatore. Erã ãhaturirire masigu Pilato Jesure wiudiaripũ.

¹¹ Ìgu eropa wiudiaquerecũ ta pahia oparã Jesu mera

masare guacũ iĩñorã. Õpa arĩdoreñorã erãre: “Barrabãre wiuque. Jesure wejẽdoreque,” Pilatore arĩdoreñorã masare. ¹² Eropigu Pilatore Barrabãre erã wiudorera pũhrũ Pilato erãre serẽpipũ daja:

—¿Ihĩ “judio masa opũ” mũa arĩgũpũre duhpigũcuri yũhũ? arĩ serẽpipũ ĩgũ.

¹³ —Crusague pabia wejẽque ĩgũre, arĩ gaguiniguiñorã masa.

¹⁴ —¿Ñehenore ñerire iiari ihĩ mũa eropa arĩ gaguiniguicũ? arĩpũ ĩgũ.

Ĩgũ eroparicũ peerã erã gaguiniguinemoñorã daja.

—Crusague pabia wejẽque ĩgũre, arĩñorã daja.

¹⁵ Erã eropa arĩ gaguiniguicũ peegu Pilato Barrabãre wiudorepũ masare mucubiricũ iidiagu. Eropigu Jesure yuradari mera tãradore, crusague pabia wejẽdoregũ wiapũ surarare.

¹⁶ Eropi surara ĩgũ opũ Pilato wihigue pretorio waicũri wihigue Jesure aĩ ejañorã. ĩgũre aĩ ejatuha erã gajirã surara erã mera majarãre gameneremorã sihubeoñorã. ¹⁷ Eropirã erã opũ ya suhriro dopa bejariñere Jesure sãñorã. Eropa sãtuha pora berore ii ĩgũ dipuru duhpeoñorã. ¹⁸ Eropiituha õpa arĩ wereyañorã erã ĩgũre:

—Umueorã arique. Judio masa opũ õaro árĩporo, arĩ wereyañorã ĩgũre.

¹⁹ Eropirã ĩgũ dipurure yucũgu mera padu, ĩgũre disico ehosũ, gũhyadiaro ĩaro dopa ta mereja ĩgũre ii birañorã.

²⁰ Eropi ĩgũre wereya biratuha, erã sãra suhrirore tuwea aĩ, ĩgũ ya suhriropũre ĩgũre sãñorã daja. Eropirã ĩgũre crusague pabia wejẽmorã aĩ wiria wañorã.

Erã Jesure crusague pabia wejẽñuma

Mt 27.32-44; Lc 23.26-43; Jn 19.17-27

²¹ ĩgũre aĩgã, Simo Cirene majagu pohegue árĩdigu erã pohro ĩgũ eracũ ĩarã surarapũ ĩgũre Jesu ĩgũ coãra crusare coãgãbasadoreñorã. Alejandro, Rufo sã pagũ árĩpũ Simopũ.

²² Waha Gólgota waicũroge ejañorã. Gólgota arĩro mari ya mera “dipu pero” arĩro iiaa. ²³ Eropirã vinore suĩri deco mera erã morera decore Jesure oriñorã. Iri decore ihribiripũ ĩgũ. ²⁴ Eropirã ĩgũ suhrire tuwea aĩra pũhrũ crusague Jesure pabiañorã. Erã pabiatuhaja ĩgũ suhri mũrare “¿Noa yañe árĩrocuri iñe?” arĩ game deabirañorã.

²⁵ Jesure erã pabiara pũhrũ uñre hora duhyayoro goeri boje ejaboro. ²⁶ Eropirã crusague õpa arĩ gojarapũre pabia duhtuñorã. “Ihĩ judio masa opũ aħrimi,” erã arĩ gojaturapũ árĩyoro. Iri erã gojaturapũ Jesure erã weresãra árĩyoro.

²⁷ Eropirã perã yajari murare Jesu pohro gajimijirigue crusarigue erã pabiatuñorã erã sãre. Yujugu ïgu diayeru, gajigure ïgu copu pabiatuñorã. ²⁸ Erã eropiicũ iribojegue Goãmu yare weremuhtanirã gojadiro dopa ta eropa wayoro. Õpa arĩ gojayuñuma: “ ‘Dorerire tarinugarã mera majagu ãhrimi,’ arĩ pepima masa ïgure,” arĩ gojañuma iribojeguere.

²⁹ Eropirã crusari pohro tarigãrã Jesure ïha, erã dipurure yurerã, ïgure ñero arĩ wereniguñorã.

—Muhu ta “Goãmu wihire cohã, uhrenu puhru iri wihire amugura daja,” arĩdigu árribu muhu. ³⁰ Mu basi dijaque. Eropigu mu basi tarique. Eropigu tari wereguca muhu, arĩ wereyañorã erã.

³¹ Erã iro dopa ta pahia oparã sã judio masare buherã sã ïgure eropa wereyañorã. Eropa arĩ wereyarã õpa arĩñorã erã basi:

—Ïgu gajirãre taudigu árĩqueregu ta ïgu basi tarimasi-beami. ³² “Israe masa opu ãhraa,” arĩrimi ïgu. Eropirã ïgu basi dijaricũ ïarã ïgure umupeorãca, arĩ wereyañorã.

Yajari mura sã ïgu pohro erã pabianirã eropa ta ïgure ñero arĩ wereyañorã.

Jesu sïria wañumi

Mt 27.45-56; Lc 23.44-49; Jn 19.28-30

³³ Eropi goeri boje árĩcũ uhre hora gohra árĩpehrerogue naitia wayoro. ³⁴ Eropigu irisubure ero naitiarisubu Jesu turaro gaguiniguipu:

—Eloi, Eloi, ¿lama sabactani? arĩpu ïgu. Ire arĩgu mari ya mera õpa arĩgu iipu: “Yu Goãmu, yu Goãmu, ¿duhpigu yure cohãri muhu?” arĩgu iipu ïgu Pagure.

³⁵ Ïgu eroparĩcũ peenirã yujurãyeri ero niguinirã õpa arĩriñorã:

—Goãmu yare weremuhtadigure Eliare sihugu iicumi, arĩriñorã erã.

³⁶ Eropigu yujugu erã mera majagu mimi aĩri yusu mera vino suĩrire yosotuha aĩ omagã, yucugu ojogoro diritu, Jesure simujuripu. Eropa iigu õpa arĩpu:

—Corenique. Elia ïgure itamucũ ïanirã dohpa mari, arĩpu ïgu gajirãre.

³⁷ Ïgu eropa arĩra puhru dipaturi Jesu turaro gaguinigu sïria wapu. ³⁸ Ïgu sïricũ ta Goãmu wihi majañe suhriro ero erã cãhmotara suhriro gasiro deco mera yehguea wayoro.

³⁹ Ïgu eropa sïricũ ïagu surara opu Jesu pohro niguidigu õpa arĩpu:

—Diaye ta ãhraa. Ihĩ Goãmu magu ta ãhrañumi, arĩpu ïgu.

⁴⁰ Eropirā yoarogue ïhaniguinirā nome sã árĩñorā Jesure ïhaniguirā. Erā nome mera María Magdalena árĩpo. Gajigo María waĩcugo sã árĩpo. Igopu José ĩgu pagu magu Santiago erā pago árĩpo. Gajigo Salomé waĩcugo árĩpo. ⁴¹ Erā nome Jesu yare ðaro peerā nome árĩñorā. Erā Galilea yeba ĩgu árĩcũ ĩgure itamumuriñorā. Erā nome mera bajarā gajirā nome sã árĩñorā. Jerusalengue Jesu mera arinirā nome árĩñorā.

Jesu dũpũre masa gobegue apiñuma

Mt 27.57-61; Lc 23.50-56; Jn 19.38-42

⁴²⁻⁴³ Eropii irinũ ĩgu sĩriranũ Sabado core judio masa soorinũ core majanũ árĩyoro. Eropiro Pascua maja árĩburire erā amurinũ árĩyoro. Irinũ ñamica árĩcũ José Arimatea majagu güiro mariro Pilato pohrogue ejařu. Jesu dũpũre serẽgu ejařu. José oparā mera majagu oparā erā umupeodigu árĩřu. Eropigu Goãmu ĩgu opu árĩburire coregu iipũ. ⁴⁴ Eropigu José Jesu dũpũ mũrarore ĩgu Pilatore serẽcũ Pilatorũ peegu, pee uca warũ. “¿Jesu sĩrituhayuri?” arĩ pepiřu. Eropigu surara opũre sihu ðpa arĩřu ĩgure:

—¿Jesu sĩaia wayuri? arĩ serẽpiřu ĩgure.

⁴⁵ ĩgu eroparĩcũ surara opu yũhriřu:

—Sĩaia wami, arĩřu.

Ĩgu eroparĩcũ Pilato Josere odorepu Jesu dũpũ mũrũre. ⁴⁶ ĩgu odorera pũhrũ José ðariñe suhrirore asũpu. Asũtuha, Jesu dũpũre aĩ diju, iri suhriro mera omapũ. Omatuhaja erā utãyegue seara gobegue ĩgu dũpũre apiřu. Apituha iri gobe pohro árĩriye utãyẽ wũariyere taragã tubiha nugucãřu. ⁴⁷ Eropirā María Magdalena, María José pago Jesure ĩgu apidirore ïañorā.

16

Jesu masa mũriañumi

Mt 28.1-10; Lc 24.1-12; Jn 20.1-10

¹ Eropirā erā soorinũ Sabadonũ taricũ María Magdalena, María Santiago pago, Salomé mera poresurire asũñorā Jesu dũpũre sũmorā. ² Eropirā Domingo boyorogã Jesure erā yaara gobegue wañorā erā. ³ Warā ðpa arĩñorā:

—¿Iri gobere erā biharayere noa marire pãgũbasarãcuri mari ñajaborore? arĩñorā erā erā basi.

⁴ Iri gobegue ejařā iri gobere biharayere utãyere erā pãgũ nugurayere ïañorā. Wũariye utãyẽ árĩyoro. ⁵ Eropã ïarā iri gobeguere ñajañorā. Eropã ñajajarā mamũre diayepũ

doagure boreri suhricugure ñañorã. Ìarã ìha ùca wañorã.
 6 Erã ùcacũ õpa arĩpũ ìgũ:

—Ûcabiricãque. Crusague erã pabiadigure Jesu Nazare majagure amaraa mũa. Masa m̀riatuhami. Õre marimi. Erã ìgũ dupure apidirore ìaque. Ìatuhaja ìgũ buherãre Pedro sãre õpa arĩ wererã waque. 7 “Ìgũ mũa core Galileague wamũhtagucumi. Eroque ìgure ìarãca mũa. Ero ìgũ arĩdiro dopa ta mũa ìgure ìarãca,” arĩ wererã waque, arĩ werepũ mamũ erãre.

8 Ìgũ eroparĩcũ erã gũi, naragã, masa gobe pohro árĩnirã omagã wiria wañorã. Eropa gũirã gajirãre werebiriñorã.

Jesu María Magdalenare dehyoañumi

Jn 20.11-18

9 Eropii Domingo árĩcũ Jesu ìgũ masa m̀riara pũhrũ María Magdalenare dehyoamũhtapũ. Igo siete watẽa ñajasũdigo árĩpo. Jesu ìgũ sĩriboro core igore watẽare cóãpũ. Eropigũ igopure dehyoamũhtapũ ìgũ ìgũ masa m̀riara pũhrũre. 10 Jesu igore dehyoara pũhrũ igo ìgũ mera majarãre werego wapo. Erã ìgũ sĩrirare bujawererã orerã árĩñorã. 11 “Cristo ojocariami. Ìgure ìabũ,” igo arĩquerecũ peediabiriñorã.

Jesu ìgũ buherãre dehyoañumi

Lc 24.13-35

12 Pũhrũ perã Jesu buherã mera majarã campogue wiri marirogue wañorã. Erã eropa waniguicũ Jesu gajiropa bejagũ guhyaro dehyoapũ erãre. 13 Ìgũ eropa dehyoara pũhrũ, waha gajirã Jesu yarãre wereñorã. “Gũa Jesure ìabũ,” erã arĩ werecũ erã peediabiriñorã daja.

Jesu ìgũ yare buhedoregũ obeoñumi ìgũ buherãre

Mt 28.16-20; Lc 24.36-49; Jn 20.19-23

14 Pũhrũ once ìgũ buherã mesa pohrogue erã doacũ erãre dehyoapũ ìgũ. Eropigũ ìgure ìanirã “Jesu masa m̀riapũ,” arĩ erã werecũ peediabirirare erãre turipũ Jesu. Ìgure õaro umupeobiriri dipuwaja erãre turipũ. 15 Erãre turituha õpa arĩpũ:

—Ì yeba árĩpehreroguerẽ masare árĩpehrerãre õari buherire buherã waque. 16 Yure umupeorãre erã waĩyenirãre erã peamegue wabonirãre taugucumi Goãmũ. Eropirã yure umupeobirã Goãmũ ìgũ dipuwaja moamorã, peamegue wamorã árĩrãcoma. 17 Eropirã yure umupeorã yũ turari mera õpa iirãcoma: Yũ turari mera watẽa masare ñajasũnirãre cóarãcoma. Eropirã mama disirore wereniguirãcoma. 18 Eropirã añare ñeacũ, árĩpehreri

nimare erã ihricũ pũrisome erãre. Eropirã dorecũrã weca erã mojotorire erã mohmepi ñeacũ õarã warãcoma, arĩpũ Jesu ãgũ buherãre.

Jesu ɯmarogue mɯria wañumi

Lc 24.50-53

¹⁹ Eropa arĩ weretuha mari Opũ Jesu ɯmarogue mɯria warũ. Erogue ejagu Goãmũ diayepũ doapũ ãgũ mera opũ árĩgũ. ²⁰ Eropirã ãgũ buherãpũ árĩpehrerogue ñari buherire Goãmũ masare ãgũ tauburire buherã wañorã. Erã eropa buhecũ mari Opũ erãre itamupũ. Deyoro moarire ãgũ turari mera iimasicũ iipũ erãre masare ãgũ ya buherire peedoregũ. "Eropa ta árĩporo," arãa yũhũ. Iripẽta ãhraa.

San Lucas

1-2 Opũ Teófilo, mure ipũre gojabeogũ iiaa yũhũ. Jesu gũa mera árĩnigũ ĩgũ iirare gajirã gojanũgamũhtatuhanirã árĩma. Negohraguere Jesure ĩanirã, ĩgũ yare buhenirã erã arĩ werediro dopa ta gajirã irire gojanũgamũhtatuhanirã árĩma. ³ Eropigũ i árĩpehrerire õaro masipehodiagũ yũ sã erã arĩ wererare buhebũ. Eropigũ yũ sã irire õaro gojadiaa mũa buheburi árĩburire. ⁴ Jesu yare buherã mure weretuhanirã árĩma. "Iri queoro ãhraa," õaro mũ arĩ masiborore ipũre mure gojabeogũ iiaa.

Ñu waĩyeri masũ ĩgũ masa dehyoaburire anyu werepũ Zacariare Ñu pagũ árĩbure

⁵ Herode Judea yeba majarã opũ ĩgũ árĩcũ, Zacarĩa waĩcũgũpũ pahĩ árĩpũ. Zacarĩa ya curupũ pahia curu Abías ya curu árĩyoro. Zacarĩa marapo sã pahĩ Aarón mũru pãrameo árĩturiagogue árĩpo. Igoũ Elisabet waĩcũgo árĩpo. ⁶ Erã perã Goãmũ dorerire iipehorã erã árĩcũ ĩagũ, "Ûmũri nũcũ õarire iirã ãhrima," arĩ pepidi árĩmi Goãmũ erãre. ⁷ Elisabet ne porã marigo árĩpo. Eropigo igo Zacarĩa mera porã mari muñucãpo.

⁸ Pahia Goãmũ wihigue Goãmũ ya umupeoburire mohmerã mũmũri nũcũ erã gohrotomũriñorã. "Zacarĩa ya curu majarã dohpaguere iiporo," erã arĩra pũhrũ ĩgũ pahia erã iidiro dopa ta Goãmũ ya umupeoburire mohmegũ arigu iipũ. ⁹ Pahia erã iiguaro dopa ta inciensore soebure beyerã irisubure Zacariare beyeñorã. Eropigũ ĩgũ Goãmũ wihigue ñajaa wapũ soegũ wagũ. ¹⁰ Goãmũ wihi pohecague ĩgũ árĩrisubu, inciensore ĩgũ soerisubu árĩpehrerã masapũ disiporogue Goãmũ mera serẽniguiñorã. ¹¹ Irisubure Goãmũ yagũ anyu incienso soero diayepũ dehyoanũgajapũ Zacariare. ¹² ĩgũ anyu eropa dehyoacũ ĩagũ Zacarĩa ĩgũre ĩha, uca wa, gũia wapũ. ¹³ Eropa ĩgũ gũicũ ĩagũ anyu ĩgũre werepũ:

—Zacarĩa, gũibita. Goãmũ mũ serẽrare peeami. Eropigo mũ marapo Elisabet porãcũgocumo. Mũ magũ masa dehyoagũcumi. ĩgũ eropa dehyoacũ Ñu waĩyeque ĩgũgãre. 14-17 "Ĩgũ õagũ ãhrimi. Turagũ ãhrimi," arĩ pepigũcumi Goãmũ mũ magũre. ĩgũ masa dehyoara pũhrũ vinore, siburire ihsosome. Eropigũ ĩgũ, ĩgũ masa dehyoara pũhrũ ta Espĩritu Santo árĩri mera õaro turagũ árĩgũcumi ĩgũ. Eropigũ bajarã Israe masare Goãmũ mari Opũre õaro

gamecũ iigucumi ĩgu. Goãmu yare buhegu Elia Goãmu yare weremũhtadigu mari Opũ ariborore ĩgu buhediro dopa ta Goãmu ĩgu turari mera mu magu sã buhegucumi. Eropa buhegu erã pagu sumarã erã porã mera erã õaro game mahi árĩcũ iigucumi. Eropigu dorerire tarinũgarãre õaro erã umupeori mera yãhrĩcũ iigucumi. Eropa buhegu mari Opũ ariboro core ĩgu yarã árĩmorãre amuyugucumi ĩgu. Eropigu ĩgu masa dehyoara pũhrũ mũhũ mucubirigũca. Gajirã sã bajarã mucubirĩrãcoma, arĩpũ anyu Zacariare.

18 ĩgu eroparĩcũ peegu Zacariapũ serẽpipũ anyure.

—Yũhũ, yũ marapo mera gũa mũrã ãhraa. ¿Eropigu mũ arĩra diaye árĩcũ dohpa masigũcuri yũhũ? arĩpũ ĩgu.

19 ĩgu eroparĩcũ anyupũ ĩgũre werepũ:

—Yũhũ Gabriele waĩcũgu ãhraa. Goãmu pohro árĩgu ãhraa yũhũ. Goãmu i õari querere weredoregu, mũ pohro yũre obeoami. Yũ werediro dopa ta diaye waroca. 20 Yũ eropa arĩquerecũ ta yũre peediabeaa mũhũ. Eropigu mũhũ dohpaguere wereniguibigu dujagũca. Mũ magu ĩgu masa dehyoara pũhrũ wereniguigũca daja, arĩpũ anyu Zacariare.

21 Disiporogue masa Zacariare corerã iĩnorã. “¿Duhpigũ ĩgu Goãmu wihigue árĩgu mata wiriribeari?” arĩ, corerã iĩnorã masa ĩgũre. 22 Eropigu ĩgu i wihigue árĩdigu wiria, erã mera wereniguimasibiripũ. “Goãmu ĩgũre dehyoacumi,” arĩ pepi, masiĩnorã erã. Eropigu ĩgu wereniguimasibigu árĩgu ĩgu mojotori mera masare wereniguipũ.

23 Goãmu wihĩ ĩgu mohmeri pehrecũ, ĩgu dujaa wapũ ĩgu ya wihigue. 24 Pũhrũ ĩgu marapo Elisabet majigũre ne bocagãrigo iipo. Eropigo igo cinco aberi gohra masa pohro wabiripo. 25 Ōpa arĩpo igo: “Dohpaguere yũre Goãmu itamumi pare. Yũ porã marigo árĩgo gũhyasũuro taribũ yũhũ. Goãmu yũ porã maririre cohãmi yũre,” arĩ pepipo igo.

Jesu ĩgu masa dehyoaburire werepũ anyu Mariare

26-27 Elisabet seis aberi igo nijipo arĩra pũhrũ, Goãmupũ anyure Gabriele waĩcũgũre nómeo õago pohrogue obeopũ. Igo Nazare waĩcũri maca Galilea arĩri yeba arĩpo. Eropigo igo María waĩcũgo José mera mojoto diribo arĩpo. Josépũ iribojegue majagu mũrũ Davi mũrũ pãrami arĩpũ. 28 María pohrogue ejaqu anyu werepũ:

—María, ¿ãhriri mũhũ? Goãmu mũ mera árĩgu ãhrimi. Eropigu mũre õaro iigu iimi. Árĩpehrerã nome gajirã nome tauro õaro iimi mũre, arĩpũ anyu igore.

29 ĩgu eroparĩcũ peego, igo turaro guña pepipo. Anyu ĩgu wererare pepigo “¿Dohpa arĩgu yũre eropa arĩcuri?”

arĩ guñapo igo. ³⁰ Igo eropa arĩ guñacũ ñagu anyu werepũ igore:

—María, mure Goãmũ turaro mahimi. Eropigo güibita. ³¹ Peeque. Majigure bocagoca mũhũ. Eropigu mũ magu masa dehyoagucumi. Ñgure Jesu waĩyegoca. ³²⁻³³ Ñgu turatariagu arĩgucumi. Eropirã ñgure “Goãmũ umaro majagu magu ãhrimi,” arĩrãcoma masa. Eropigu mũ magu ñecũ mũrugue Davi mũrũ Israe masa erã opu ñgu arĩdiro dopa ta mũ magu sãre apigucumi Goãmũ. Eropigu arĩpehrerinũri ñgu Israe masare doregucumi. Eropiro ñgu opu arĩripũ ne pehresome, arĩpũ anyu.

³⁴ Ñgu eroparĩcũ Mariapũ serẽpipo:

—¿Duhpi umũ mera arĩbiriquerego ta porãcubocuri yũhũ? arĩpo igo.

³⁵ Igo eroparĩcũ anyupũ werepũ:

—Espíritu Santo mure porãcũcũ iigucumi. Eropiro Goãmũ ñgu turari imica curu iro dopa ta cãhmotaroca mure. Eropirã “Goãmũ magu, ñerire iibigu ãhrimi,” arĩrãcoma masa mũ magure. ³⁶⁻³⁷ Goãmũ arĩpehrerire iimasimi. Eropigo mũ acawerego Elisabet bũro arĩquerego ta majigure bocãmo igo sã. Igo porãcugocumo umũgãre. Masa igore “Porã marigo ãhrimo,” erã arĩdigo bũro dohpague seis aberi wahaa igo majigure bocara pũhrũ, arĩpũ anyu Mariare.

³⁸ Ñgu eroparĩcũ María yũhripo:

—Yũre peeque. Mari Opu ñgu pohro majago ãhraa yũhũ. Mũ arĩdiro dopa ta yũre eropa waporu, arĩpo igo.

Igo eropa arĩra pũhrũ anyu waha warũ.

María Elisabere ñago wapo

³⁹ Irinũrere María utã yucũ arĩri yebague Judea yeba arĩri macague umũdiaro waha wapo. ⁴⁰ Erogue ejago Zacarĩa ya wihi ñaja, “¿Ahriri?” arĩpo igo Elisabere. ⁴¹ Igo eroparĩcũ Elisabet igo peecũ ta, igo magupũ niji suhrirogue arĩdigu ñohmepũ. Elisabet Espĩritu Santo arĩri mera õaro pepigo wapo. ⁴² Eropigo turaro mucubiriri mera wereniguipo.

—Arĩpehrerã nome tauro õaro iimi Goãmũ mure. Mũ magu sãre õaro iimi Goãmũ. ⁴³ Cue, yũ Opu pago yũ pohro aricũ õaro iimi yũre Goãmũ. ⁴⁴ Mũhũ yũre “¿Ahriri?” arĩcũ, yũ magupũ niji suhrirogue arĩgũ mucubiriri mera ñohmeacumi yũre. ⁴⁵ “Goãmũ ñgu arĩdiro dopa ta iipehogucumi,” arĩgo mucubirigo ãhraa mũhũ, arĩpo Elisabet Mariare.

⁴⁶ Igo eroparĩcũ María yũhripo:

Goāmũ ðagũ, turagũ āhrimi, arāa. Yũhũ ðaro sīporācũa.
⁴⁷ Goāmũ yũre peamegue wabodigore itamugũ
 āhrimi. Eropigũ dohpaguere yũre ðaro mucubiriri
 mera árĩcũ iimi. ⁴⁸⁻⁴⁹ Yũre bu árĩgore ĩgũ ĩgũ
 pohro majagore guñadi āhrami. Goāmũ turatariagũ
 ðari dihtare yũre itamumi. Eropirā “Igore Goāmũ
 ðaro iimi,” árĩpehrerā masa dohpaguere eropa arĩ
 wereniguirācoma yũre. Goāmũ ñeri marigũ āhrimi.
⁵⁰ Árĩpehrerinũri árĩpehrerā ĩgure umupeorāre ĩgũ
 mojomoro ĩagũ āhrimi. ⁵¹ Goāmũ ĩgũ turari mera
 iigũ āhrimi. “Gajirāre tarinũgaa yũhũ,” arĩrāre
 tarinũgadi árĩmi ĩgũ. ⁵² Oparāre erā dorero arĩrāre
 cóadi árĩmi ĩgũ. Eropigũ bu arĩrāpũre ĩgũ opará
 iro dopa ta apidi árĩmi. ⁵³ Oaboanirāre ĩgũ ðari
 barire ódi árĩmi. Eropigũ baja opanirāpũre gajino
 moorā wacũ iidi árĩmi ĩgũ. ⁵⁴⁻⁵⁵ Mari ñecũ sumará
 mũrāre “Masare ðaro iigũra,” ĩgũ arĩ werediro dopa
 ta iipehodi árĩmi Goāmũ. Eropigũ ĩgũ pohro majarā
 Israe masare ĩgũ itamudi árĩmi. Mari ñecũ sumará
 mũrāre, Abrahā mũrũre árĩpehrerā ĩgũ acawererā
 ĩgũ pũhrũ arĩrā sāre Goāmũ árĩpehrerinũri eropa
 mojomoro ĩaniguigũ árĩmũridi árĩmi. “Masare
 ðaro iigũca,” erāre ĩgũ werepirare cādijibiridi árĩmi
 Goāmũ, arĩpo María.

⁵⁶ Ʋrerā abe gohra Elisabet mera āhri, igo ya macague
 goe dujaa wapo María.

Ñu masa dehyoapũ

⁵⁷ Elisabet igo niji wahgũra pũhrũ igo magũ masa de-
 hyoapũ. ⁵⁸ Eropirā Goāmũ igore ĩgũ eropa ðaro iicũ igo
 ya maca majarā igo acawererā sã igo mera mucubiriñorā.
⁵⁹ Ocho nũri ĩgũ masa dehyoara pũhrũ, ĩgũ pagũ sumará
 ĩgũgāre gasiro merogā wiri aĩdorerā wañorā. Eropa erā
 iirisubu erā mera majarā Zacaría waĩyediariñorā ĩgũgāre
 ĩgũ pagũ waĩre. ⁶⁰ Erā eropa waĩyediaquerecũ ta ĩgũ
 pagopũ ðpa arĩpo:

—Ĩgũ pagũ waĩre waĩyebeaa. Ñu waĩyerāca ĩgũgāre,
 arĩpo igo.

⁶¹ —Mũ acawererā ne yujugũ Ñu waĩcugũ marimi,
 arĩñorā erā igore.

⁶² Eropirā erā mojotori mera werenigui Zacariare
 serēpiñorā erā.

—¿Mũca dohpa waĩyediari mũ magure? arĩ serēpiñorā
 ĩgũre.

⁶³ Erã eroparĩcũ ĩgu pagu gojaburimijire serẽbeo, ñeha, gojapu: “Yu magu Ñu waĩcumi,” arĩ gojapu Zacarĩa. ĩgu eropa arĩ gojacũ erãpu Ʃca wañorã. ⁶⁴ ĩgu eropa arĩ gojara puhru ĩgure wereniguicũ iipũ Goãmu. Eropigu ĩgu wereniguimasipu daja.

—Goãmu turagu, ðagu ãhrimi, arĩpu ĩgu.

⁶⁵ ĩgu eropa arĩ wereniguicũ peerã ero majarã Ʃca wañorã. Eropirã i arĩpehrerire Judea yeba majarãre utã yucu watope arĩrãre masa weresiriñorã. ⁶⁶ Arĩpehrerã irire peerã guñañorã. “Goãmu turarire ĩgugã opami. ¿Eropigu ñehmũno arĩgucuri ĩgugã?” arĩ pepiñorã masa.

Zacarĩa Goãmure umupeorũ

⁶⁷ Eropigu ĩgu pagu Zacarĩa Espĩritu Santo arĩri mera ðaro pepigu arĩgu Goãmu yare werepũ:

⁶⁸ Mari Israe masa Goãmure umupeorã. ĩgu yarã ãhraa mari. Eropigu mari pohrogue arigu, marire itamugu ðaro taumi. ⁶⁹ Eropigu Goãmu turagure marire peamegue wabonirãre ðaro taubure obeomi. Marire ðaro taubu ĩgu acaweregu Davi mũru ãhrimi. Davipu Goãmu pohro majagu arĩmuriñumi. ⁷⁰ Iribojegue ĩgu ya weremuhtanirã mera Goãmu ĩgu marire taubure obeoburire wereyumuripu. ⁷¹ Marire ĩhaturirã marire ñero erã iidiacũ ĩagu “Mũare itamugura,” arĩ apiñumi Goãmu marire. ⁷² Mari ñecu sumarã mũrare, “Mũare mojomoro ĩagu itamugura. Mũare yũ wererare guñağura,” arĩ apiñumi Goãmu mari ñecu sumarãre. Iribojegue ĩgu eropa arĩdiro dopa ta marire dohpaguere iimi. ⁷³⁻⁷⁵ Eropigu Abrahãre ðpa arĩmuriñumi: “Mũ acawererã puhru arĩrã erãre ĩhaturirã arĩcũ cóagura. Eropigu mũ acawererãre itamugura. Eropirã erã güibirã ta yũ dorerire iimasima. Eropigu erã ñerire yũ cóãcũ, erã yũ ĩhuro mũuri nũcu ðarã arĩniguirãcoma,” arĩ werepimuriñumi iribojegue Goãmu mari acaweregu Abrahãre, arĩpu Zacarĩa.

Eropa arĩtuha ĩgu magugãre ðpa arĩpu:

⁷⁶⁻⁷⁷ —Mahgu, mũre ðpa arĩrãcoma masa:

“Goãmu turatariagu yare wereniguigu ãhrimi,” arĩrãcoma mũre. Eropigu mũhu mari Opũ core wayugũca. Eropa wagu ðpa arĩ wereguca. “Goãmu mũa ñerire cóãgu, peamegue wabonirãre taugũcumi mũare,” arĩ wereguca. Eropa arĩ weregu mari Opũ ĩgu ariborore weremuhtayugu iiguca mũhu. ⁷⁸ Goãmũpu marire turaro mojomoro ĩagu marire ðaro iigu

árĩgu, ĩgu marire peamegue wabonirãre taudiami. Marire taugu arigu Cristo mari pohro arigucumi. ⁷⁹ Árĩpehrerã mari peamegue wabonirãre taudiami ĩgu. Eropigu Goãmure mari masibirã árĩcũ ĩagu marire masicũ iidiami ĩgu. Eropigu mari ðaro yujuro mera mari árĩborore weregucumi marire, arĩpu Zacarĩa.

⁸⁰ Eropi Ñu Zacarĩa magu ðaro bugapu. Eropigu Goãmure turaro mahipu. Eropigu yoari boje masa marirogue árĩmũripu. Te Israe masare buhenugagu sã erogue ta árĩmũripu.

2

Jesu masa dehyoapu

Mt 1.18-25

¹ Irisubure árĩpehreri yebari majarã tauro opu Augusto árĩpehrerãre queodorepu. ² Oã masare erã ne queonugarisubu árĩcũ Cirenio waĩcugu Siria yeba majarã opu arĩpu. ³ Eropirã árĩpehrerã erã ñecu sumarã iribojegue majarã ya macarigue erã waĩre gojapeorã wañorã. ⁴ José sã Nazaregue Galilea árĩri yeba árĩri macague árĩnirã waha, Judea yebague Belén waĩcũri macague ejañorã. Opu Davi iribojegue majagu ĩgu masa dehyoadiro árĩyoro Belén. José Davi mũru pãrami árĩgu Beléngue wapu ĩgu waĩre gojapeogu wagu. ⁵ Eropigu ĩgu María ĩgu mojoto diribo árĩcũ erogue igo mera ĩgu waĩre gojapeodoregu wapu. Igo pu majigũre bocatuhadigogue árĩpo. ⁶ Eropigo Beléngue ejago igo niji wahũpo. ⁷ Erogue masa erã carĩri wihi ne sihabiriyoro erãre. Eropirã erã wecua ya wihigue carĩrã wañorã. Eropigo igo ĩgu ne dehyoagugãre porãcutuha ĩgugãre suhriro mera oma, wecua erã bari coro weca ĩgũre pihripeopo.

Anyua ovejare ĩhadiburãre dehyoañorã

⁸ Iri ñamire iri maca tũrogue campogue ovejare ĩhadiburã erã yarã ovejare ĩhadiburã iĩñorã. ⁹ Eropigu Goãmũ ĩgu obeodigu anyu erãre dehyoapu. ĩgu eropa dehyoacũ Goãmũ ĩgu gosesiriri erãre boyoweayoro. Eropa wacũ ĩarã, ovejare ĩhadiburã gũia wañorã. ¹⁰ Erã eropa wacũ anyu erãre werepu:

—Ñari quererere mũare weregu ahraa. Árĩpehrerã masare mucubiricũ iiroca i quere. Eropirã gũibiricãque mũa. ¹¹ Dohpagã ñamire opu mũru Davi ya macague mũare peamegue wabonirãre taubu, Cristo Goãmũ ĩgu obeodigu mari Opu masa dehyoatuhami. ¹² Eropigu suhriro mera

omadigu wecua bari coro weca erã pihripeodigu mua bocagu igu ta arigucumi, arĩ werepu anyu erãre.

¹³ Igu eroparicũ ta bajarã umaro majarã arĩmũhtadigu anyu mera bayapeoñorã. Ōpa arĩ bayapeoñorã erã:

¹⁴ Goãmure umaro majagure umupeorã. Eropirã Goãmũ igu mahirã güiro mariro gamequeãro mariro ñaro arĩporo, arĩ bayapeoñorã anyua.

¹⁵ Eropa bayatuhaja umarogue erã mũriara pũhrũ ovejare ñhadiburãpu erã basi game wereniguiñorã:

—Ire Goãmũ igu marire wererare Belengue ina ñarã warã, arĩñorã erã erã basi. ¹⁶ Eropa arĩrã yojaro mera wañorã erã. Mariare, Josere bocaia, majigugãre wecua erã bari coro weca pihripeodigure ñañorã erã. ¹⁷ Ovejare ñhadiburã igure ñatuha anyu majigugãre igu wererare wereñorã gajirãre. ¹⁸ Erã eropa arĩ werecũ ta arĩpehrerã erãre pee uca wañorã. ¹⁹ I arĩpehrerire Mariãpu guña pepipo. ²⁰ Eropirã ovejare ñhadiburãpu anyu igu werediro dopa arĩcũ ñañorã. “Goãmũ turagu ãhrimi,” arĩ mucubiriñorã. Eropa arĩ mucubiri dujaa wañorã.

Goãmũ wihigue Jesu pagu sumarã igure aĩgãñorã

²¹ Yuju semana pũhrũ majigure gasiro merogã wiri aĩrire erã iidoreranũ arĩcũ erã igugãre Jesu waĩyeñorã. Jesure ne igo bocaboro core anyupu “Jesu waĩyeque igure,” arĩ werepipũ. Eropirã igugãre Jesu waĩyeñorã.

²² Goãmũ doreri Moise igu werediro dopa ta iimorã, José, María mera Jerusalengue wañorã. Erogue María porãcura pũhrũ ñago igo dupũ arĩrore ñhmurã wañorã. Eropa warã erã Jesure aĩgã wañorã. Igugãre Goãmure “Ígã mũ yagu arĩbu ãhrimi,” arĩ ñhmurã warã iññorã. ²³ Ōpa iññorã Goãmũ yare erã gojarapũ dorero dopa ta. “Arĩpehrerã mua porãre ne dehyoarãre Goãmure ñhmuque. ‘Ígã mũ yagu arĩbu ãhrimi,’ arĩ ñhmuque,” arĩ doremuriñumi Goãmũ igu yare gojarapũgue. ²⁴ Eropa ñhmutuha Goãmũ igu dorediro dopa ta mirimagugãre erã asũtuhaja Goãmũ wihigue apirã wañorã. Ōpa doreñumi Goãmũ igu yare gojarapũgue: “Buja borerãre perã oque Goãmure. O erã maricũ buja borewĩjigãrãre oque yare umupeomorã,” arĩ doreñumi Goãmũ. Eropirã igu dorediro dopa iññorã José María mera.

²⁵ Jerusalengue Simeón waĩcugu arĩpu. Igu ñagu, Goãmure umupeogu arĩpu. Goãmũ Israe masare itamuburire coregu iipu. Eropigu Simeón Espĩritu Santo igu mera arĩcũ ñaro pepigu arĩpu. ²⁶ Eropigu “Mũ sĩriboro core Goãmũ igu obeobure Cristore ñagũca mũhũ,” arĩ weremũhtarũ Espĩritu Santo igure Simeore. ²⁷ Eropigu

Espíritu Santo ĩgũre dorecũ Goãmũ wihigue ñajaa warũ. ĩgũ ñajara pũhrũ Jesu pagũ sũmarã ĩgũgãre aĩ ñajaañorã Goãmũ ĩgũ gojarapũ dorera dopa ta iirã. ²⁸ Simeónpũ ĩgũgãre coã aĩ, Goãmũre umupeo, “Õhaa,” arĩ ĩgũ mera wereniguipũ. Õpa arĩpũ ĩgũ Goãmũre:

²⁹⁻³² Opũ, dohpague tamerare masare peamegue wabonirãre taubure obeoa mũhũ. ĩgũ judio masa árĩbirãre buhegũ mũre õaro masicũ iigũcumĩ erãre. Masare taubure Israe masũre mũhũ apiyoro. Mũ eropa iirare árĩpehrerã masirã, “Israe masare õaro iimi Goãmũ,” arĩrãcoma masa. ĩgã marire taubu ãhrimi. Eropigũ mũ yãre arĩdiro dopa ĩgãre ĩatuhabũ. Eropigũ dohpaguere õaro mucubirigũ sĩrigũca, arĩpũ Simeón.

³³ Simeón ĩgũgãre arĩrare peerã ĩgũ pagũ sũmarãpũ pee uca wañorã. ³⁴ Eropigũ Simeón erãre “Õaro árĩque mũa,” arĩgũ ĩgũ Jesu pago Marĩare werepũ:

—Goãmũ ĩgãre beyedi árĩmi. ĩgũ eropa beyedigũ árĩcũ judio masa bajarã ĩgũre tarinũgarãcoma. Eropa iirã erã peamegue warãcoma. Eropigũ judio masare bajarãre taubure beyedi árĩmi Goãmũ ĩgãre. ĩgũ Goãmũ turarire ii ĩhmugũ ĩgũ árĩquerecũ masa bajarã ĩgũre ñero arĩ wereniguirãcoma. ³⁵ Erã eropa iicũ gajirã erã ñero guñarire masirãcoma. Eropigo mũhũ turaro bujaweregoca, arĩdocaritamupũ Simeón Marĩare.

³⁶ Ero Goãmũ yare wereniguigo Ana waĩcũgo árĩpo. Igo Fanuel mago árĩpo. Aser mũrũ ya curu majago árĩpo. Bũro gohra árĩpo. Igo ero coregue siete bojori dihta igo marapũ mera árĩniripo. ³⁷ Eropigo ochenta y cuatro bojori gohra wapeweyo árĩmũriipo igo. Eropigo umũre, ñami sãre Goãmũ ya árĩburire iibo, ba duhu, Goãmũ mera werenigui, Goãmũ wihire ne wiriabiripo. ³⁸ Simeón ĩgũ wereniguigo watope igo erã pohro erago, mucubirigo Goãmũre, “Õhaa,” arĩpo. Eropigo Jerusalén majarãre taubure corerãre igo Jesu dehyoarare werepo erã árĩpehrerãre.

José, María mera Jesu mera Nazaregue dujaañorã daja

³⁹ Goãmũ ĩgũ dorero dopa ta iituhaja, erã ya macague Nazaregue dujaañorã. Galilea yeba árĩyoro iri maca. ⁴⁰ Eropigũ Jesu õaro bũga turagũ warũ. Eropigũ ĩgũ õaro pee masigũ árĩpũ. Eropigũ ĩgũre Goãmũ õaro iipũ.

Jesu mama mahmũa wahgãrigũ Goãmũ wihigue buhepũ

⁴¹ Bojori nũcũ Jesu pagũ sũmarã Jerusaléngue Pascua bosẽre ĩarã wamũriñorã. ⁴² Jesu doce bojori ĩgũ

opacũ erã iidiro dopa ta erã árĩpehrerã Jerusaléngue wañorã. ⁴³ Eropirã bosenu pehrecũ erã erã ya macague dujaa wañorã daja. Erã eropa dujaaquerecũ ta Jesupu Jerusaléngue dujacãpu. Īgu pagu sumarã ĩgu erogue dujarare masibiriñorã. ⁴⁴ “Īgu mari mera majarã mera árĩcumi,” arĩ pepiriñorã erã. Eropirã erã yujunu gohra Jesu mariro wañorã mague. Eropirã erã Jesure erã acawererã watope amariñorã. ⁴⁵ Ne bocabiriñorã. Eropirã Jerusaléngue ĩgure amarã dujañorã daja.

⁴⁶ Īhrenu puhru ĩgure Goãmu wihigue bocañañorã. Eropirã Jesure judio masare buherã watope bocañañorã. Īgu erãre pee serēpi doapu. ⁴⁷ Erã árĩpehrerã Jesure peerã ñaro masigugã ĩgu árĩcũ ĩarã, erã ĩhamaria wañorã. ⁴⁸ Īgu pagu sumarã sã erogueru Jesure ĩarã ĩhamaria wañorã. Eropigo ĩgu pago ĩgure ñpa arĩpo:

—Mahgu, ¿duhpigu eropa iiari mũhu guare? Mu pagu, yũhu, “Īgu dederea wañumi,” arĩã ahmaa gna mũre, arĩpo igo magure.

⁴⁹ Igo eroparĩcũ ĩgu ĩgu pagu sumarãre werepu:

—¿Duhpirã yure ahmari mũa? Yu Pagu yure ĩgu dorediro dopa ta iigu iiaa. ¿Irire masibeari mũa? arĩpu ĩgu.

⁵⁰ Īgu eropa arĩquerecũ erã peemasibiriñorã.

⁵¹ I árĩpehreri ĩgu iirare Mariãpu ñaro guñapo. Eropigu Jesu Nazaregue dujaa wapũ. Īgu pagu sumarãre ñaro yũhriгу árĩmũripũ. ⁵² Eropigu Jesu buga, ñaro pee masigu wapũ. Eropirã Goãmu masa sã “Ōagu ãhrimi,” arĩ ĩañorã ĩgure.

3

*Ñu waĩyeri masũ masare Goãmu yare werepu
Mt 3.1-12; Mr 1.1-8; Jn 1.19-28*

¹ Irisubure erã tauro opu árĩgu Tiberio waĩcugu ĩgu opu arĩra puhru quince bojori wayoro. Eropigu Poncio Pilato waĩcugu Judea yeba majarã opu arĩpu. Eropigu Herode waĩcugu Galilea yeba majarã opu arĩpu. Īgu pagu magu Felipe Iturea yeba majarã, Traconite majarã sã erã opu arĩpu. Eropigu Lisania waĩcugu Abilinia yeba majarã opu arĩpu. ² Eropirã Ana, Caifa mera pahia oparã arĩñorã. Oã árĩpehrerã erã árĩrisubure Ñu Zacarĩa magu masa marirogue árĩgure Goãmũpu ĩgu ĩgu yare weredorepu. ³ Eropigu Jordãn waĩcũriya turo arĩri yeba árĩpehrerogue Ñu ñpa arĩ weregu wapũ:

—Mua ñeri iirire bujawereque. Dohpaguere ðarire gohrotoque. Eropirã waïyenirã árïque. Mua eropa iicũ ïagu Goãmu mua ñerire cóãgucumi, arï weremuripũ ïgu.

⁴ Ñu eropa wereniguigu Isaia iribojegue majagu Goãmu ya weremuhadigu ïgu gojadiro dopa ta iigu iipũ. Òpa arï gojayañumi Isaia Ñu iiburire:

Masa marirogue werenigui gaguiniguigu òpa arïgucumi: “Mari Opũ ïgu ariburi mare amuro dopa ðarã árïyuque mua ïgure peemorã. ⁵ Dipa gobericurore mari diaye maja maha iidiro dopa ta, mua ñero iirire duhuque. ⁶ Mua eropa iicũ Goãmu muare peamegue wabonirãre ïgu taucũ ïarãca árïpehleri yeba majarã,” arïgucumi ïgu gaguinigui weregurũ, arï gojamuriñumi Isaia iribojeguere Ñu ïgu árïboro coregue.

⁷ Masa bajarã Ñu pohro erarã ïgu erãre waïyecũ gameñorã erã. Eropigu ïgu erãre werepũ:

—Mua ñero iiricurã ãhraa mua. Goãmure “Gua ñeri dipuwaja moabiricãporo,” arïrã ¿mua yure waïyedorerã ahriri? ⁸ ïgu mua ñero iira dipuwaja moabiricũ òpa iique mua. Diaye mua ñero iirire bujawererã árïrã, ðarire gohrotorã árïrã, ðarire iique mua. “Abrahã mari ñecu murũ árïmuripũ. Eropirã mari Goãmu mera ðatuhajaa,” arï pepibiricãque. Muare arïgu tiaa. Abrahã pãramerã mua árïri duhpihuri árïbeaa. Goãmupũ gamegu i utãyeri mera gajirãre iimasimi Abrahã acawererãre. Eropiro Abrahã acawererã mua árïri bu gohra ta ãhraa. ⁹ Òpa ãhraa: Mari masa yucũ iro dopa ta ãhraa. Goãmupũ come opagu iro dopa ta ãhrimi. Eropigu ñeri ducacuri yucure tabe cóã, iri nuguri sãre tabetagucumi. Tabetatuhaja, peamegue cóãgucumi ïgu iri yucure iri nuguri sãre. Eropa ta iigucumi mua sãre ïgure gamebirãre, arïpũ Ñu masare.

¹⁰ ïgu eroparicũ peerã masapu ïgure serëpiñorã:

—¿Dohpa iirãcuri gua? arïñorã erã Ñure.

¹¹ —Peñe suhriro opagu suhriro moogure yujuñe oque. Eropirã mua bari oparã gajirã sãre oque, arïpũ Ñu.

¹² Bajamerãgã oparã yare wajasea corerã sã waïyedorerã erañorã. Eropirã Ñu pohro erarã ïgure serëpiñorã:

—Buhegu, ¿guapũ dohpa iirãcuri? arïñorã.

¹³ —Mua oparã erã doreropẽ ta masare niyerure wajaseaque. Guyari mera aïnemobita, arï yuhripũ Ñu erãre.

¹⁴ Gajirã surara ïgure serëpiñorã daja.

—¿Guapũ dohpa iirãcuri? arïñorã erã ïgure daja.

—Masare erã niyerure emabiricãque. Eropirã iri niyerure guya emabiricãque. Mũa wajatarire iarã mucubirique, arĩ yuhripũ Ñu erãre.

¹⁵ Masa Cristore Goãmũ ïgũ obeobure corerã iĩnorã. Eropirã õpa arĩ pepinũgañorã erã Ñure. “Ihĩ Ñupũ Cristo árĩbocumi,” arĩ pepiriñorã erã. ¹⁶ Erã eropa arĩ pepicũ peegũ Ñu árĩpehrerãre wererũ:

—Yũ tauro turagũ arigucumi. Õatariagũ àhrimi ïgũ. Ïgũ iro dopa árĩbeaa yũpũ. Eropigũ ïgũre pepigũ, “Yũ tamera bu árĩgũ àhraa,” arĩ pepia yũhũ. Mũa ñero iirare bujawerera pũhrũ yũpũ mũare deco mera waĩyeabũ. Ïgũpũ yũ tauro iigucumi. Espíritu Santore ogucumi masa mera árĩniguibure. Eropigũ ïgũ ñerire soewearo dopa ta ïgũ arigupũ mũa ñerire coeweagucumi. ¹⁷ Yũ pũhrũ arigũ trigo gasirire cóãgũ iro dopa àhrimi. Gasiri cóãgũ ïgũ ya sihburu mera árĩpehreri trigo yeri gasirire sũha weami. Eropa sũha weara pũhrũ trigo yeri gohrapũre ïgũ diburi wihigue apigucumi. Ïgũ sũha weara gasiripũre ïgũ soegucumi. Eropa ii beyegucumi yũ pũhrũ arigũ. Õarire gohrotonirãpũre ïgũ mera árĩniguicũ iigucumi. Erã ñero iirare bujawerebirãpũre peamegue yaribiriri peamegue cóãgucumi, arĩ wererũ Ñu.

¹⁸ Bajarãre ïgũ eropa arĩ wereri mera masare õari buherire wererũ Ñu. ¹⁹ Eropigũ opũ Herodepũ ïgũ pagu magũ Felipe marapore ïgũ emara waja, wũaro ñerire ïgũ iira waja Ñu ïgũ sãre wereripũ. ²⁰ Ïgũ eropa arĩ wererũ Herodepũ Ñure peresu iipũ dipaturi ñerire iigu daja. Eropa iigu ïgũ ñerire iira dipuwajacũgũ árĩnemopũ.

Ñu Jesure waĩyepũ

Mt 3.13-17; Mr 1.9-11

²¹ Ñure erã peresu iiboro core gajirã masare Ñupũ waĩyegũ iipũ. Erãre waĩyegũ Jesu sãre waĩyepũ. Eropigũ Jesu diague niguigũ Goãmũre ïgũ serẽrisubu mũsĩ pãrimaa waya. ²² Eropa pãrimaara pũhrũ Espíritu Santo buja iro dopa bejagũ Jesu weca dijariipũ. Ïgũ dijariicũ umarogue werenigũro cariyoro:

—Mũhũ yũ magũ yũ mahigũ àhraa. Mũ mera õaro mucubiria, arĩro cariyoro mũmarogue.

Jesu ñecũ sũmarã iribojegue majarã árĩñorã

Mr 1.1-17

²³ Jesu ïgũ buhenũgarasubure treinta bojori opapũ ïgũ. “Ïgũ José magũ àhrimi,” arĩ pepiriñorã masa. Josépũ Elí magũ árĩñumi. ²⁴ Elí Matat magũ árĩñumi. Matat Leví magũ

árĩñumi. Leví Melqui magu árĩñumi. Melqui Jana magu
 árĩñumi. Jana José magu árĩñumi. ²⁵ José Matatías magu
 árĩñumi. Matatías Amós magu árĩñumi. Amós Nahúm
 magu árĩñumi. Nahúm Esli magu árĩñumi. Esli Nagai magu
 árĩñumi. ²⁶ Nagai Maat magu árĩñumi. Maat Matatías
 magu árĩñumi. Matatías Semei magu árĩñumi. Semei Josec
 magu árĩñumi. Josec Judá magu árĩñumi. ²⁷ Judá Joanán
 magu árĩñumi. Joanán Resa magu árĩñumi. Resa Zorobabe
 magu árĩñumi. Zorobabe Salatíe magu árĩñumi. Salatíe
 Neri magu árĩñumi. ²⁸ Neri Melqui magu árĩñumi. Melqui
 Adi magu árĩñumi. Adi Cosam magu árĩñumi. Cosam
 Elmadam magu árĩñumi. Elmadam Er magu árĩñumi. ²⁹ Er
 Josué magu árĩñumi. Josué Eliezer magu árĩñumi. Eliezer
 Jorim magu árĩñumi. Jorim Matat magu árĩñumi. ³⁰ Matat
 Leví magu árĩñumi. Leví Simeón magu árĩñumi. Simeón
 Judá magu árĩñumi. Judá José magu árĩñumi. José Jonam
 magu árĩñumi. Jonam Eliaquim magu árĩñumi. ³¹ Eliaquim
 Melea magu árĩñumi. Melea Mena magu árĩñumi. Mena
 Matata magu árĩñumi. Matata Natán magu árĩñumi.
³² Natán Davi magu árĩñumi. Davi Isai magu árĩñumi. Isai
 Obed magu árĩñumi. Obed Booz magu árĩñumi. Booz
 Salmón magu árĩñumi. Salmón Naasón magu árĩñumi.
³³ Naasón Aminadab magu árĩñumi. Aminadab Admin
 magu árĩñumi. Admin Arni magu árĩñumi. Arni Esrom
 magu árĩñumi. Esrom Fares magu árĩñumi. Fares Judá
 magu árĩñumi. ³⁴ Judá Jacobo magu árĩñumi. Jacobo Isaa
 magu árĩñumi. Isaa Abrahã magu árĩñumi. Abrahã Taré
 magu árĩñumi. Taré Nacor magu árĩñumi. ³⁵ Nacor Serug
 magu árĩñumi. Serug Ragau magu árĩñumi. Ragau Peleg
 magu árĩñumi. Peleg Heber magu árĩñumi. Heber Sala
 magu árĩñumi. ³⁶ Sala Caina magu árĩñumi. Caina Arfaxad
 magu árĩñumi. Arfaxad Sem magu árĩñumi. Sem Noé magu
 árĩñumi. Noé Lame magu árĩñumi. ³⁷ Lame Matusalem
 magu árĩñumi. Matusalem Enoco magu árĩñumi. Enoco
 Jared magu árĩñumi. Jared Mahalaleel magu árĩñumi.
 Mahalaleel Caina magu árĩñumi. ³⁸ Caina Eno magu
 árĩñumi. Eno Sete magu árĩñumi. Sete Adán magu árĩñumi.
 Adán Goãmu iidigu árĩñumi.

4

*Watĩ ñerire iidoreripu Jesure
 Mt 4.1-11; Mr 1.12-13*

¹ Jesu Espiritu Santo igu dorero dopa ta iipehogu árĩgu,
 igu Jordán waicuriyague buharapu. Igu eropa buharacu
 Espiritu Santopu igure masa marirogue wadorepu.

² Eroque ejaqu cuarenta nuri gohra árĩpu. Eropigu watĩpu Jesure ñerire iicũ gameripu. Eropigu ñerire iidoreripu ĩgure. Irinurire ne Jesu babiripu. Eropigu irinuri pehrero gohra ĩgu oaboapu.

³ ĩgu eropa oaboacũ ĩagu watĩ opa arĩpu Jesure:

—Mũhu Goãmu magu árĩgu opa ĩhmuque. Iyere utãyere bari poyacũ iique, arĩripu Jesure.

⁴ ĩgu eroparĩcũ peegu Jesu gamebiripu. Opa arĩ yũhrĩpu:

—Goãmu yare erã gojarapũ opa aħraa: “Masare bari mera dihta ojocaribiro gahmea. Árĩpehreri Goãmu ya ĩgu ya wereniguri mera sãre árĩro gahmea,” arĩmi Goãmu, arĩpu Jesu watĩre.

⁵ ĩgu eropa arĩra pũhru watĩpu ĩgure utãgu wecague aĩ mũriagu merogã pũhru ĩgu árĩpehreri macari majare Jesure ĩhmu purumujupu. ⁶ Eropa ĩhmuqu opa Jesure arĩpu:

—Árĩpehreri i macari ĩgu yure ora aħraa. Eropigu yu gamegure omasia. Eropigu i macarire, i macari majarã doreri sãre, erã opari mera mure ogura. ⁷ Yure “Mũhu yu opu aħraa,” arĩ umupeoque. Mu eroparĩcũ i macarire árĩpehreri macarire mure ogura, arĩ wereripu watĩ Jesure.

⁸ Jesu opa arĩ yũhrĩpu ĩgure:

—Mure umupeobeaa. Opa aħraa Goãmu yare erã gojarapũ: “Mu Opu Goãmu dihtare umupeoque. ĩgu ya doreri dihtare iique,” arĩ gojañuma Goãmu yare, arĩpu Jesu watĩre.

⁹⁻¹¹ ĩgu eropa arĩra pũhru Jerusalengu watĩpu ĩgure aĩgãpu. Eroque eja Goãmu wihĩ wecague aĩ mũrijapu ĩgure. Aĩ ejatuhaja ĩgure opa arĩripu:

—¿Diaye ta Goãmu magu gohra ta aħriri mũhu? Goãmu yare erã gojarapũ opa aħraa:

Goãmu ĩgu yarã anyuare mure ĩhadibudoregucumi. Eropirã erãpu mure ĩhadiburãcoma muge utãyere weca mehbejari arĩrã, arĩ gojañuma Goãmu yare erã gojarapũ.

Erã mure eropa ĩhadibumorã árĩcũ mũhu Goãmu magu ta árĩgu õgue buhrimaa dija ĩhmuque yure. Mure erã itamucũ ĩhmuñata yure, arĩripu watĩ Jesure.

¹² ĩgu eroparĩcũ peegu gamebiripu Jesu. Opa arĩ yũhrĩpu ĩgure:

—Goãmu yare erã gojarapũ opa aħraa: “Mu opu Goãmu ĩgu arĩrare, ‘¿Diaye ta aħriri?’ arĩ masidiarã, Goãmure ii ĩhmodoremaabiricãque,” aħraa Goãmu yare erã gojarapũ, arĩpu Jesu watĩre.

13 Eropigu watí árīpehreri ñerire Jesure iidoreripũ. Jesu ĩgu gamebircũ ĩagu ĩgure merogã duhupũ.

Galilea yeba Jesu buhenũgarũ

Mr 4.12-17; Mt 1.14-15

14 Pũhrũ Jesu Galileague dujaa wapũ. Eropigu ĩgu Espĩritu Santo turari mera iipũ. ĩgu eropiicũ ĩarã ero árīpehrero majarã masa ĩgu iira quere peeñorã. 15 Judio masa buheri wiri Jesu sã buhemũripũ. Eropirã árīpehrerã masa ĩgure õaro wereniguiñorã.

Nazare majarã Jesure ne umupeobiriñorã

Mt 13.53-58; Mr 6.1-6

16-17 Pũhrũ Nazaregue Jesu ĩgu bugadoirogue ta ejapũ. Eroque eja, Sabado árīcũ ĩgu eropa iinigiuro dopa ta ĩgu judio masa erã buheri wihigue ñajajapũ. Ero ĩgu Goãmũ yare erã gojarapũre buheddiagũ niguirũ. ĩgu eropa niguiicũ ĩarã ero majarãpũ Goãmũ yare weremuhtadigũ Isaia ĩgu gojarapũre ĩgure oñorã. Iripũre Jesu i wererire bocagu buhepũ:

18 Goãmũ Espĩritu Santo yũ mera árīgu yare doremi. ĩgu mojomorocũrãre õari buherire weredoregu obeomi yare. Eropigu ñero sīporãcũrãre õaro mucubircũ iidoregu yare obeomi. Eropigu peresugue árīrã sãre erãre ĩgu tauborore weredoregu obeomi yare. Cuirĩ ĩhajabirã erã õaro ĩhajaburire, gajirã erã ñero iibirarãre wiubure yare obeomi. 19 “Mari Opũ ĩgu yarãre peamegue wabonirãre ĩgu tauburinũri ãhraa,” yare weredoregu obeomi, arĩ buhepũ Jesu.

20 Eropa buhetuha Jesu iripũre bihacã, wihi majarãre wiatuha, doapũ. ĩgu doacũ ĩarã ero árīpehrerã ĩgure ĩhanũrũñorã. 21 Erã eropa iicũ ĩgu erãre werenũgarũ:

—I dohparagã ta yũ buhediro dopa Goãmũ ĩgu arĩdiro dopa sihajaro iiaa, arĩpũ Jesu.

22 ĩgu eropa wereniguiicũ peerã “Ihĩ õagu ãhrimi,” arĩ pepiñorã. Eropirã erã ĩgu õaro wereniguirire peerã uca wañorã. Eropirã õpa arĩñorã erã erã basi:

—Cuenta, ¿José magũ árībeari ihĩ? arĩñorã erã erã basi.

23 Erã eroparīcũ masigu Jesu werepũ erãre:

—Iribojegue majarã erã eropa wereniguidiro dopa ta mũa sã yare õpa arĩdiarã ãhraa: “Mũhũ duhturu árīgu mũ basi ocoyeque mũhũ duhturu árīrĩre ii ĩhmuboro dopa ta. Mũhũ Goãmũ ĩgu obeodigu árīgu mũ basi ĩgu turari mera ii ĩhmuque gũare. Capernaumguere Goãmũ turari mera ii ĩhmuayoro mũhũ. Ohõ mũ ya macague sãre gũare ii ĩhmuque. Diaye ta mũ Goãmũ ĩgu obeodigu árīrĩre gũa

masiboro dopa ii ñhmuque,” arĩdiaa mũa yũre. ²⁴ Ire weregura muare. Goãmũ ya weremuhtagure ñgu ya yeba majarã umupeobeama. Eropirã yũre umupeobeaa mũa ohõ yũ bugadigu arĩquerecũ. ²⁵ Eropigu diaye arĩgu iiaa muare. Iribojegue majarã sãre Goãmũ ya weremuhtanirãre erã ya yeba majarã erãre umupeobiriñuma. Eropiro Elia Goãmũ yare weremuhtadigu ñgu arĩrasubure uñre bojori gaji bojori deco gohra ne deco aribiriyorõ. Eropiro arĩpehrerogue sãre ne bari mariyorõ. Irisubure ñgu ya yeba majarã Israe majarã bajarã wapeweyarã arĩquerecũ ta Goãmũ erãre Eliare itamudoregu obeobiriñumi. ²⁶ Ñgu ya yeba majarãre itamudorebiriqueregu gaji yeba Sidõn yeba arĩri maca Sarepta waĩcũri maca majagore itamudoregu Eliare obeoñumi Goãmũ. ²⁷ Pũhrũ Goãmũ ya weremuhtadigu Eliseo ñgu ñgu arĩrisubure Israe yebague bajarã cami boarã erã arĩquerecũ ta ne yujugũ Israe majagure ñgu ya yeba majagure õagũ iibiriñumi Eliseo. Ñgu ya yeba majagure õaro iibigu ta gaji yeba majagu Naamán Siria majagu dihtare õagũ iinũmi ñgu. Eropigu judio masa erã umupeobirira waja, judio masa arĩbirã dihtare itamuñumi Goãmũ, arĩpũ Jesu erãre.

²⁸ Ñgu eroparĩcũ peerã arĩpehrerã iri wihi arĩrã guataria wañorã. ²⁹ Eropirã erã wahgãnũgaja Jesure tara wiria, iri maca tũro arĩri tũhrũgue ñgure tumedijudiarĩnorã. ³⁰ Erã eropa iidiaquerecũ ta Jesu erã watope waha wapũ.

Watĩ ñajasũdigũ Jesure bocatĩripũ

Mr 1.21-28

³¹ Pũhrũ Jesu Galilea yeba arĩri macague Capernaum waĩcũri macague eja, Sabado arĩcũ masare buhepũ. ³² Ñgu opũ iro dopa ta ñgu buhecũ peerã masa uca wañorã. ³³ Iri wihi watĩ ñajasũdigũ arĩgu turaro gaguiniguipũ:

³⁴ —Mũhũ Jesu Nazare majagu guare garibobita mũhũ. ¿Dohpa iibu iiri guare? ¿Mũhũ guare dederecũ iibu iiri? Yũhũ masia Goãmũ magũ mũ õagũ arĩrire, arĩ gaguiniguipũ Jesure.

³⁵ Ñgu eroparĩcũ peegu Jesu turipũ watĩre:

—Ejarimaricãque. Duhuque ñgure, arĩpũ Jesu.

Ñgu eropa arĩra pũhrũ watĩpũ masũre yebague mehmereja tũrucũ iipũ. Ñgu eropa iira pũhrũ wiria wapũ. Ñgu masũpũ õagũ dujapũ. ³⁶ Ero arĩrã arĩpehrerã ñgu eropa wacũ ñha uca wañorã. Eropirã erã basi õpa arĩ wereniguĩnorã:

—¿Ñeheno buheri ãhriri i õpa wacũ iiri? Turaro mera opũ iro dopa ta ihĩ watĩ ñajasũdigũre taumi. Eropirã

erã watëa ĩġu dorero dopa ta masare duhuma, arĭ wereniguiñorã erã erã basi.

³⁷ ĩġu eropa iicũ ĩarã iri yeba arĭpehreroguere masa Jesu ĩġu eropa iirare weresiriñorã.

Jesu Simo Pedro mũñecore ðago iipũ

Mr 8.14-15; Mr 1.29-31

³⁸ Judio masa buheri wihire wiria, Simo ya wihigue ñajajapũ Jesu. Ero Simo mũñeco dorecũgo iipo. Turaro nimacũri arĭyoro. Eropirã erã igo dorecũcũ wereñorã Jesure. ³⁹ Erã werera pũhrũ ĩġu igo pohro eja, nimacũrire taridorepũ. ĩġu eropa taridorera pũhrũ igore nimacũri tahria wayoro. Mata ðago wapo. Igo eropa wago wahgã doaja, igo ta erãre barire ejopo.

Bajarã dorecũrãre ðarã iipũ Jesu

Mr 8.16-17; Mr 1.32-34

⁴⁰ Abe ñajara pũhrũ arĭpehrerã masa ĩġu pohro arirã dorecũrãre Jesu pohroque aĩ ejañorã. Dorecũrã baja gajiropa arĭri dorere opañorã. Eropigũ Jesu ĩġu mojotori mera erã weca ñapeo, arĭpehrerãre erã dorere ðaro taricũ iipũ. ⁴¹ Watëa ñajasũnirã sãre Jesu watëare wiriadorepũ. Erã wiricũ ðpa arĭ gaguinigiñorã:

—Mũhũ diaye ta Goãmũ magũ ãhraa, arĭñorã erã Jesure.

Jesu Goãmũ ĩġu obeodigũ ĩġu Cristo arĭcũ watëa ĩġure masiñorã. Eropigũ Jesu irire gajirãre werenidorebiripũ.

Galilea yeba buhepũ Jesu

Mr 1.35-39

⁴² Boyomũrircũ Jesu iri maca arĭdigũ waha, masa mariroque ejapũ. ĩġu eropiicũ ĩarã masa ĩġure ahma, bocajarã, ðpa arĭñorã:

—Gũa ya maca dujaque. Wabita, arĭriñorã erã Jesure.

⁴³ Erã eropa arĭquerecũ ta ĩġupũ erãre ðpa yũhrĩpũ:

—Goãmũ ĩġu opũ arĭrĩre ðari buherire gaji macari sãre buhediaa yũhũ. Goãmũ yũre obeomi irire werebure, arĭpũ Jesu erãre.

⁴⁴ Eropigũ Galilea yeba maja wiri, judio masa buheri wirigue ĩġu buhe curipũ.

5

Jesu ĩġu buherãre bajarã waire bocacũ iipũ

Mt 4.18-22; Mr 1.16-20

¹ Gajinũ Jesu Genesare waĩcũri ditaru tũroque ejapũ. Ero ĩġu arĭcũ ĩarã bajarã masa Goãmũ yare peediarã ĩġure nũrusia ejañorã. Õaro ujutũri nũgajañorã masa bajarã.

² Peeru gasiru imiporo payari gasire Jesu ĩapũ. Iri gasi

majarã wai wejênirã majanugaja, erã wejêdi yucure coerã iinõrã. ³ Eropigu Jesu Simo yarugue ñajapũ. Ñajatuha iriru dohodirure dia turo taramujupidorepũ. Eropigu dohodirugue doa, masare buhebeo doapũ. ⁴ Buhetuha, Jesu Simore õpa arĩpũ:

—Deco ñari sĩwuique. Eropirã mũhũ, mũ wapi mera mũa wejêdi yucure mehyuque wai ñeamorã, arĩpũ Jesu.

⁵ Īgu eroparĩcũ peegu Simo Jesure yũhripũ:

—Opũ, wai wejêbutahmuarabũ gua dohpagã ñamire. Eropiiquererã ta waire wejêbiraca gua. Eropa wejêbiriiquererã ta mũ dorero dopa ta mehyu ñarãra, arĩ yũhripũ Simo.

⁶ Eropa arĩtuha erã mehyuñorã. Erã eropa mehyucũ irigu wejêdigure bajarã wai ñajañorã. Bajarã erã ñajacũ wejêdigũ yehguea wariyoro. ⁷ Eropa wacũ ñarã erã gajiru majarã erã mera majarãre sihubeoñorã.

—Mũa sã itamuque guare, arĩ sihubeoñorã Simo sã.

Erã eropa itamura pũhrũ peeru gasiru õaro miriparo bocañorã waire. ⁸ Simo Pedro eropa wai bajarã ñajacũ ñagu, Jesu pohro mereja, ĩgure werepũ:

—Yũ opũ, mũ mera árĩbogũ árĩbeaa yũhũ. Ñegu ãhraa. Eropigu yũre duhuque, arĩpũ Simo Jesure.

⁹ Īgu árĩpehrerã ĩgu mera majarã sã wai bajarã ñajacũ ñarã, uca wañorã erã sã. ¹⁰ Perã Simo mera majarã Zebedeo porã Santiago ĩgu pagũ magũ Ñũ mera, erã sã ĩha uca wañorã. Eropa ucacũ ñagu Jesu Simo Pedroro werepũ:

—Gũibita. Dohpaguere waire ñeha gameneogu mũ árĩro dopa ta Goãmũ yarã árĩmorãre sihu gameneogu árĩguca mũhũ, arĩpũ Jesu Simore.

¹¹ Īgu eropa arĩra pũhrũ erã erã gasire imiporo taramujupicã, erã ya árĩpehrerire ero ta apicã, Jesu mera waha wañorã.

Jesu camĩ boagũre õagu wacũ ĩpũ

Mt 8.1-4; Mr 1.40-45

¹² Jesu gaji maca ĩgu árĩcũ camĩ boagu ĩgu pohrogue erapũ. Eropigu ĩgu Jesure ñagu mereja turaro serẽpũ:

—Opũ, mũhũ yũre õagu ĩidiagu yũre õagu iimasia mũhũ, arĩ serẽpũ.

¹³ Īgu eropa arĩra pũhrũ Jesu ĩgure mohmerĩñagu õpa arĩpũ:

—Irĩre ĩidiaa. Dohpaguere õagu árĩque mũhũ, arĩpũ.

Īgu eroparĩcũ ta ĩgu camĩ boara mũra yaria wayoro. ¹⁴ Eropigu Jesu ĩgure dorepũ:

—I yu mure òpa iirare gajirãre ne werebircãque. Mu ya dũpũre òarare pahire ihmũgu waque, “Òaro àhrimi,” arĩdoregu. Tuhajanugu Moiserẽ Goãmũ ìgu apidiro dopa ta iique. Eropigu Goãmũ wihigue mirimagũre asũwahgã apique mu dore tarirare masa árĩpehrerã masimaja òaro, arĩpũ Jesu cami boadigũre.

¹⁵ “Werebita,” ìgu arĩquerecũ ta árĩpehrerogue masa ìgu iirare weresiripehoñorã. Erã eropa quere peerã masa bajarã Jesu pohrogue ejañorã. Dorecũrã òarã wadiarã erã sã ìgu pohrogue ejañorã. ¹⁶ Erã eropa ejaquerecũ ta Jesu masa marirogue Goãmũ ìgu Pagũre serẽgu waha wapũ.

Jesu dũpũ buhadigũre òagu wacũ iipũ
Mt 9.1-8; Mr 2.1-12

¹⁷ Gajinũ Jesu ìgu buhecũ fariseo masa, judio masare buherã sã ero doañorã. Erã árĩpehrerã Galilea macari majarã, Judea macari majarã, Jerusalén majarã árĩñorã. Eropigu Jesu Goãmũ turari mera dorecũrãre òarã iipũ.

¹⁸ Irisubu bajamerãgã uma dũpũ buhadigũre oyariñe mera coã erañorã. Eropirã ìgũre Jesu pohro apidiarã, wihigue aĩ ñajariñorã erã ìgũre. ¹⁹ Eropã ñajadiaquererã masa bajarã árĩcũ erã ìgũre aĩ ñaja masibiriñorã. Eropirã ìgũre wihi wecague aĩ mũrija, miri gobe aĩ wea iri gobegue dũpũ buhadigũre oyariñe mera pihri dijuñorã Jesu pohro árĩrã watope. ²⁰ “Jesu ihĩ ìgu dorecũrire taricũ iigũcumĩ,” arĩ pepiñorã erã. Erã eroparĩ pepicũ masigu Jesupũ dorecũgũre òpa arĩ werepũ:

—Mahgu, mu ñero iirare yuhũ cóãtuhabu, arĩpũ dũpũ buhadire Jesu.

²¹ Ìgu eroparĩcũ peerã fariseo masa, judio masare buherã sã erã basi òpa arĩ pepiriñorã: “Ihĩ eropa arĩ wereniguirĩ mera Goãmũre ñero arĩgu iimi. Ìgu masu mari iro dopa árĩgu ìgu masa erã ñerire cóãmasibeamĩ. Goãmũ dihta masa erã ñeri iirire cóãmasimĩ,” arĩ pepiriñorã erã.

²² Jesu erã pepirire masigu òpa arĩpũ:

—¿Duhpirã eropa arĩ pepirĩ mũa? ²³ “Mu ñeri iirire yu cóãtuha,” yu arĩcũ, “Gũyagu àhrimi,” yũre arãa mũa masibiriquererã ta. “Wahgãnũgajaque. Curique,” yu arĩcũ yu arĩra diaye árĩri árĩcũ mata masirãca mũa. ²⁴ Yuhũ masu Goãmũ ìgu obeodigu i yeba majarã erã ñeri iirire cóãmasia yuhũ. Mũa ire masiboro dopa òpa ta ìgu wahgãnũgacũ iigũra, arĩpũ Jesu.

Eropa arĩtuha dũpũ buhadigũre òpa arĩpũ:

—Mũre arĩgu iiaa. Wahgãnũgajaque. Mũ oyarañere aĩgãque. Mũ ya wihigue waque, arĩpũ ìgũre.

25 Īḡu eroparīcū ta mata árīpehrerā erā ĭhuro wahḡānugaja, Īḡu oyarañere aī Īḡu ya wihigue waha wapu. Eropa wagu Īḡu Goāmure umupeogu mucubiriri mera ōaro wereniguipu. 26 Īḡu eropiicū ĩarā masapu árīpehrerā ĩha uca wañorā. Goāmure umupeorā mucubiriri mera ōaro wereniguiñorā:

—Dohpagāre gajiropa árīrire ĩabu gua, arīñorā erā.

Jesu Levíre sihupu

Mt 9.9-13; Mr 2.13-17

27 Eropiituha waha, Leví waīcugure Īḡu mohmeri taribugue Īḡu árīḡure bocajapu Jesu. Levípu oparā ya árīburire masare wajasea coreḡu árīpu. Eropa bocajagu ĩḡure ōpa arīpu:

—Yu mera majagu árību arique, arīpu ĩḡu Levíre.

28 Īḡu eroparīcū Levípu árīpehreri ĩḡu mohmerare duhucā, Jesu mera waha wapu.

29 Puhru Leví ya wihi Jesu ya árīburire bosenu iirā iñorā. Ero bajarā wajasea corerā, gajirā Leví sā mera ba doañorā.

30 Erā mera Jesu ĩḡu doacū ĩarā bajamerāḡā fariseo masa, judio masare buherā mera gua ũrugā Jesu buherāre arī duyasoñorā:

—¿Duhpirā ñero iirā wajasea corerā mera bahari muu? arī turiñorā erā.

31 Erā eroparīcū peegu Jesu yuhripu erāre.

—Dorecubirā duhturure amabeama. Dorecūrā dihta duhturure ahmama. Dorecūrā duhturu amaro dopa ta “Ñerā āhraa,” arīrā yure amarācoma. 32 Eropigu “Ñerā āhraa,” arīrā dihtare erā ñero iirare bujaweredore, ōaripure gohrotocū iigu aribu yahu. Erā basi “Ōarā āhraa gua,” arī pepirāre itamugu aribiribu yahu, arīpu Jesu.

Ba duhurire Jesure serēpiñorā gajirā

Mt 9.14-17; Mr 2.18-22

33 Eropirā bajamerā masa Jesure ōpa arī serēpiñorā:

—Ñu buherā bajasuburi Goāmu ya árīburire iimorā ba duhuma. Eropi erā bajasuburi Goāmu mera wereniguima. Fariseo buherā sā erā iro dopa ta iima. ¿Duhpirā mu buherāpu Goāmu ya árīburire ba duhubeari erā? arīñorā erā Jesure.

34 Erā eroparīcū Jesu erāre ōpa arī yuhripu.

—Ōpa āhraa iri: Mojoto diridigu ĩḡu bosenu iicū ĩḡu mera majarā bujawererā ba duhunirā árībeama. Īḡu mera árīrā mucubiriri mera barā iima. Eropa ta yu buherā sā yu mera árīrā ba duhumasibeama. 35 Yujunū yure Goāmu

aĩcãgucumi. Eropa ĩgu aĩra pũhrũ yũ buherã mera árisome yũhũ. Irisubugue ta yũ buherã ba duhurãcoma, arĩpũ Jesu.

³⁶ Iribojegue maja buheri mama buheri mera erã buhemoresũdiacũ ĩagu õpa arĩ werenemopũ Jesu erãre.

—Ne mama suhrirore miri gasirogã yehgue aĩ, mũrañe suhrirore seretuma masiya mara. Mari eropa seretura pũhrũ mama gasirore mari coecũ, mũra gasiro áriro tara gameneo yehgueacũ iiaa. Eropirã mũra buheri mama buheri mera wapimoa buhebircãro gahmea. ³⁷ Eropirã ne igui decore imisĩri decore waibũgu gasiro ajurore, mũra ajurore diyebircãro gahmea. Eropa iicũ igui deco pahmuro mũra ajurore yehgue dija wahaa. Iri ajuro yehguecũ igui deco iri ajuro sã cohmoa wahaa. ³⁸ Eropirã igui deco mama decore mama ajuro mera diyero gahmea. Eropa ta mama buheri mũra buheri mera buhebircãro gahmea. ³⁹ Vino deco mũra decore masa erã ihrira pũhrũ mama decore gamebeama erã. Õpa arĩma masa. “Vino mũra deco mama decore õatarinũgaa,” arĩma masa, arĩpũ Jesu erãre.

6

Sabado árĩcũ Jesu buherã trigo pororire turĩñorã
Mt 12.1-8; Mr 2.23-28

¹ Gajinũ Sabado árĩcũ Jesu ĩgu buherã sã trigo pohegue ĩha tariañorã. Erogue tariarã, ĩgu buherãpũ trigo pororire turĩ, gasiri cohro bañorã iriyerire. ² Erã eropa iicũ ĩarã bajamerãgã fariseo masa erãre serẽpiñorã:

—¿Duhpirã mũa Sabado mari soorinũ árĩquerecũ ta mohmeri? Mari dorerire tarinũgarã iiaa, arĩñorã fariseo masa.

Erã eroparĩcũ peegu Jesupũ “Yũ buherã iri dorerire tarinũgarã iibeama,” arĩgu õpa arĩpũ erãre:

³⁻⁴ —Iribojegue Davi ĩgu mera majarã mera oaboagu Goãmũ wihigue ñaja, iri wihi áriri panre bapũ. Eropa bagũ ĩgu mera majarã sãre badoregũ iri panre ópũ. Iri pan pahia dihtare badorera árĩriyoro. Goãmũ doreri iri panre gajirãre badorebiriyo. ¿Davi irire ĩgu eropa iirare Goãmũ yare erã gojarapũgue buhebirari mũa? Davi i panre bagũ Goãmũre tarinũgagu iibiriñumi. Dohpagãre yũ buherã sã i trigo yerire turĩ barã Goãmũre tarinũgarã iibeama. ⁵ Yũhũ masũ Goãmũ ĩgu obeodigu inonũ soorinũ sãre masa erã iiburire doremasia, arĩpũ Jesu.

Mojoto bũhadigu õagu wapũ

Mt 12.9-14; Mr 3.1-6

⁶ Gajinũ Sabado árĩcũ Jesu judio masa buheri wihigue ñaja buhepũ masare. Ero mojoto diayepũ bũhadigu

árīpū. ⁷ Ero árīrā sã bajamerāgã masare buherã, fariseo masa sã Jesure ïhanuruñorã ïgure weresãdiarã. Ōpa arī pepiñorã: “Sabadonũ árīcũ ihĩ masure ōagũ iibocumi Jesu. ïgũ eropiicũ ‘Mari soorinũ Jesu mohmegũ iimi,’ arī weresãrãra,” ari pepiñorã. ⁸ Jesu erã pepirire masigũ, mojoto buhadigũre ōpa arīpū:

—Wahgãnuɗaque. Ohõ arique, arīpū ïgure.

ïgũ eropa arīra puhrũ mojoto buhadigupũ wahgãnuɗaja, ero niguipũ. ⁹ Eropigũ Jesu erãre serēpipũ.

—Mũare serēpigura: ¿Mari soorinũ árīcũ ōarire iicũ ōabeari? ¿Ñerire iicũpũre ōhari? ¿Soorinũ árīcũ masure masucũ ōhari? ¿O soorinũ árīcũre masure wejēcũpũre ōhari? arīpũ Jesu erãre.

¹⁰ Eropa arīgũ Jesu erãre ïhametupeho, mojoto buhadigũre ōpa arīpũ daja:

—Mũ mojotore sīsirãbeoque, arīpũ ïgũ.

ïgũ eroparīcũ ta mojoto buhadigupũ sīsirãbeo, ōari mojoto wayoro. ¹¹ ïgũ eropa iicũ ïarã erã ïgũ mera turaro guañorã.

—¿Dohpa iirãcuri mari ïre? arīñorã erã basi.

Jesu ïgũ buherãre doce gohra ïgũ apimorãre beyepũ
Mt 10.1-4; Mr 3.13-19

¹² Irinũrere Jesu utãgũgue Goãmũre serēgũ mũria wapũ. Eroque árīgũ, ñamire Goãmũ mera werenigui butahmua wapũ. ¹³ Boyorogue ïgũ buherãre ïgũ pohro sihubeopũ. Sihubeotuha erã mera majarãre doce gohra ïgũ apimorãre beyepũ. ¹⁴ Oã árīñorã Jesu ïgũ beyenirã: Simore Jesu Pedro piyudigũ, Simo pagũ magũ Andre, Santiago, Ñũ, Felipe, Bartolomé, ¹⁵ Mateo, Toma, Santiago árīñorã. Santiagopũ Alfeo magũ árīpũ. Eropirã Simo celote ya curu majagũ árīgũ, ¹⁶ Juda Santiago pagũ magũ sã, Juda Iscariote sã árīñorã ïgũ beyenirã. Juda Iscariotepũ Jesure ïhaturirãre ïhmubu árīpũ.

Jesu bajarã masare buhepũ
Mr 4.23-25

¹⁷ Eropii Jesu ïgũ buherã mera utãgũ weca árīnirã di-jaricũ, bajarã gajirã ïgũ buherã mera ōari puũgue niguiñorã erã. Gajirã masa sã bajarã árīñorã. Erã árīpehrero Judea yeba macari majarã, Jerusalén majarã, Tiro waĩcũri maca majarã, Sidón waĩcũri maca majarã, wũariya tũro árīri macari majarã ïgũ pohrogue eranirã árīñorã. ¹⁸ Erã Jesu buherire peerã erarã, erã dorecũrere taudorerã erarã árīñorã. Watẽa ñajasũnirã sã ïgũ pohrogue eraa, ōarã

wañorã. ¹⁹ Jesu ïgu turari mera ðarã wacũ iipũ erãre. Eropirã erã árïpehrerã ïgure mohmepïñarã erañorã.

Jesu mucubiririre, bñjawereri sãre buherũ

Mt 5.1-12

²⁰ Pũhrũ Jesu ïgu buherãre ïha, wererũ:

—Mũa mojomorocũrãrũ Goãmũ ïgu opũ árïroguere warãca mũa. Eropirã mũa mucubirirãca.

²¹ “Dohpaguere mũa oaboarãrũ yapirã árĩrãca. Eropirã mucubirirãca.

“Mũa dohpaguere bñjawere orerãrũ mucubirimorã ãhraa. Eropirã pũhrũguere ïayerãca. Eropirã mucubirirãca.

²² “Yũhũ masũ Goãmũ ïgu obeodigũ ãhraa. Eropirã yaha árĩburire mũa iiri dipuwaja gajirã mũare ïhaturicũ mũarũ mucubirirãca. Mũare erã cóacũ sãre mucubirirãca. Mũare erã ñero wereniguiquerecũ ta, “Ñerã ãhrima,” mũare arĩquerecũ ta mũarũ mucubirirãca. ²³ Mũare erã eropa iinirãre ãmarogue mũa ejacũgue Goãmũ mũare wũaro ðaro iigũcumĩ. Eropirã turaro mucubirirã árĩque. Õaro sĩporãcũrã árĩque. Mũare ïhaturirã ta erã acawererã mũra iribojegue majarã eropa ta ñero iimuriñuma Goãmũ yare weremũhtanirãre.

²⁴ “Eropirã mũa dohpaguere baja oparãrũ i yebaguere mũa ðaro árĩtuhabu. Eropirã ñero tarirã árĩrãca mũa.

²⁵ “Dohpaguere yapirãrũ mũa oaboarãca. Mũa eropa arĩrã ñero tarirãca.

“Dohpaguere mũa mucubirirã árĩrãrũ pũhrũguere bñjawere orerãca. Eropirã ñero tarirãca.

²⁶ “Goãmũ yare weremũhtarã ãhraa,” arĩ gũyarãre “Õarã ãhrima,” arĩriñuma bajarã iribojegue majarã. Mũa mera majarãre eropa ta “Õarã ãhrima,” arĩbocoma masa. Eropa arĩnirã árĩrãrũ ñero tarirãca mũa sã, arĩ buherũ Jesu.

Mũare ïhaturirã erã arĩquerecũ erã sãre mahique

Mt 5.38-48; 7.12

²⁷ Eropigũ ðpa arĩ buhenemopũ Jesu:

—Yũre peediarãre, mũare arĩgu tiiãa. Mũare ïhaturirã erã arĩquerecũ erã sãre mahique. Mũare ïhaturirãre ðaro iique. ²⁸ Mũare ñero árĩdorera erã arĩquerecũ ta ðadoreque erãre. Mũare ñero iirã erã arĩquerecũ ta, “Erã sã ðaro árĩporo,” arĩ serẽbasaque Goãmũre. ²⁹ Yujugu mũa wayuporã pacũ, “Gajipũ sãre padiagu paque,” arĩque ïgure. Mũa weca majañe suhrirore ïgu emacũ mũa camisa sãre ocãque ïgure. ³⁰ Mũare serẽgũre ïgu serẽropẽ ta oque ïgure. Mũa yare ïgu aĩcũ ïgure dipaturi serẽpibita irire.

³¹ Gajirã mũare ðaro iicũ gahmea mũa. Erãre mũa ðaro iicũ

gamero dopa ta ðaro iique erã sãre. Erã ðaro iibiriquerecũ ta m̄ar̄p̄ erãre ðaro iique.

³² “M̄are umupeorã dihtare m̄a umupeocũ iri ne duhpiburi árĩbeaa. Ñerã sã eropa ta iima. ³³ Eropirã m̄are ðaro iinirã dihtare m̄a ðaro iicũ iri sã ne duhpiburi árĩbeaa. Irire ñerã sã iima. ³⁴ Eropiro gajirãre wayurã “Yure wiaque,” arĩcũ m̄a wayuri sã ne iri duhpiburi árĩbeaa. Ñerã sã gajirãre wayurã ero p̄hr̄ wiapehodor-erã ohoma. ³⁵ Eropirã m̄ar̄p̄ m̄are ìhaturirãre mahi umupeoque. Eropirã erãre ðaro iique. Eropirã m̄a yare mahibirã ta wayuque erãre. M̄a eropa iicũ Goãm̄ m̄are ðaro iigucumi. Goãm̄p̄ ìgure umupeobirã sãre, ñerã sãre ðaro iimi. Eropa ta iique m̄a sã. M̄a eropa iirã w̄aro wajatarãca. Eropirã Goãm̄ turatariḡ umaro majaḡ porã árĩrãca. ³⁶ Mari Paḡ umaro majaḡ ìḡ mojomoro ìadiro dopa ta m̄a sã masare mojomoro ìaque.

Gajirãre “Ñerã àhrima,” arĩbircãque, arĩp̄ Jesu
Mt 7.1-5

³⁷ Eropiḡ erãre werenemop̄:

—Gajirãre “Ñerã àhrima,” arĩrã erã iirare werew̄abiricãque. M̄a eropa arĩ werew̄abiricũ Goãm̄ m̄a sãre “Ñerã àhrima,” arĩsome. Gajirã m̄are erã ñero iirare, erã ñero arĩra sãre cãdijique. M̄a eropa cãdijicũ ìaḡ Goãm̄ m̄a sãre m̄a ñero iirare cãdijigucumi. ³⁸ Gajinore oparã gajirãre oque. M̄a eropa ocũ Goãm̄ m̄are ogucumi. Eropa oḡ m̄are ðaro queoro w̄aro ogucumi. Õaro wajayegucumi. Gajirãre m̄a orañep̄ ta m̄a sãre Goãm̄ ogucumi, arĩp̄ Jesu erãre.

³⁹ Eropa arĩtuha Jesu buhenemoḡ ðpa arĩp̄ werenigui queori mera:

—Cuirì ìhajabirã erã seyaro erã basi game tuagãrã erã perãgue ta mehtuha yuriñaja warãcoma gobegue. Eropa ta erã cuirì ìhajabirã iro dopa ta Goãm̄ yare masibirã sã gajirãre buhediarima. Eropirã erã erã buherã sã peamegue warãcoma. ⁴⁰ Buherã erãre buhegure masitarinugabeama. Eropirã árĩpehrerã buherã erãre ðaro buhepehora p̄hr̄ erãre buheḡ iro dopa ta masirãcoma. Eropirã erãre buherã masibirã árĩbircãporo, arĩp̄ Jesu.

⁴¹ Eropa arĩtuha gajì buheri mera buhep̄ daja:

—Mari werenigui queori mera buhecũ ðpa iirã àhraa m̄a: M̄a acawereḡ ìḡ cuirugue miri pogañegã mehñajacũ iri pogañegãre ðaro ìhaa m̄a. M̄ yaru cuirup̄re w̄arimijiro árĩquerecũ irimijip̄re ne pepibea m̄a. Eropirã miri pogañegãre m̄a ìaro dopa ta m̄a

acaweregu ĩgu ñero iiripure ðaro ĩhaa mua. Mwapu mua ñero iirire turaro iiquererã ta irire eropa pepicãa. ¿Dohpa árirono eropa ãhriri mua? ⁴² Õpa arĩ wereniguia mua acawererãre: “Acaweregu, mu ñerire iigu iica. Eropigu iri ñerire duhucãque,” arĩ wereniguia mua. Eropa ĩgu ñerire duhudorequererã mwapu iri ñerire iirã duhubea. ¿Duhpirã mua ñerire iiquererã ta irire eropa pepicãri mua? Masa erã purupure ñero ii corerã ãhraa mua eropa iirã. Mua ñero iiripure duhumãhtaque. Mua eropa iira puhru mua acaweregure “Mu ñero iirire duhucãque,” arĩ weremasia, arĩ buhepu Jesu.

Masa erã wereniguirire peerã erã árircirire masia mari, arĩ werepu Jesu

Mt 7.17-20; 12.34-35

⁴³ Eropigu buhenemogu ðpa arĩ werenemopu erãre werenigui queori mera:

—Yucugu ðadigu ñerire ducacubeaa. Eropiro ñedigu sã ðarire ducacubeaa. ⁴⁴ Yucugu ducare masirã “Irigu ducã ta ãhraa,” arĩ masia mari. Poracudigu higuera dipure ducacubeaa. Eropiro aña poragu igui tõrre ducacubeaa. ⁴⁵ Eropa ãhrima masa sã. Õagu ĩgu pepiri ðari ãhraa. Eropigu ĩgu ðarire wereniguimi yucugu ðadigu irigu ðarire ducacuro dopa ta. Ñegure ĩgu pepirigue ñeri ãhraa. Eropigu ĩgu ñerire wereniguimi yucugu ñedigu irigu ñerire ducacuro dopa ta. Mari pepirigue iri árĩro dopa ta wereniguia mari, arĩpu Jesu.

Pe wihi iira queori werepu Jesu

Mt 7.24-27

⁴⁶ Eropigu erãre werenemopu:

—Mua yure “Opu,” arãa. Eropa arĩquererã ta yu dorerire iibea mua. ¿Duhpirã eropa iibeari mua? ⁴⁷ Árĩpehrerã yure gamerã yu wereniguirire peema. Eropirã yu dorerire tarinugabeama. Õpa ãhrima yure tarinugabirã: ⁴⁸ Wihi ðaro nugudi iro dopa ta ãhrima erã. ĩgu ãhcãri goberire seha, wihire nugunugami. Iri wihi ðaro ĩgu ãhcãro nugura wihi árĩro dia miricũ turaro deco turaquerecũ iri wihi ðaro turaniguia. ⁴⁹ Eropirã yu wereniguirire peenirã arĩquererã ta yu dorerire iibirãpu wihire ðaro nugubigu iro dopa ãhrima. Iri wihire wecagã nugu, ðaro iinugabeami. ĩgu eropa iira wihi árĩro dia miricũ deco turacũ iri wihi mata cohro yuhria wahaa. Eropiro iri wihi cohmopehrea wahaa, arĩpu Jesu.

7

Surara opu pohro majagure igu dorecucũ Jesu ðagu iipu igure

Mt 8.5-13

¹ Iri queori masare weretuha Jesu sã Capernaumgue ejañorã. ² Ero árĩgu cien surara opu árĩgu igu pohro majagure turaro mahipu. Īgu pohro majagu dorecugu árĩgu sĩriro pohrogue arĩpu. ³ Eropigu Jesu igu iirare peegu, judio masa mũrãre sihu Jesu pohrogue obeopu opupu.

—Yũ pohro majagure dorecugure ðacũ iigu arique, arĩ weredoregu obeopu opu mũrãre.

⁴ Erã Jesu pohrogue ejarã, ðpa arĩ bũrigã serẽñorã igure:

—Surara opu guare mũ pohro obeoami. “Yũ pohro majagure dore taubasagu ariporo,” arĩ weredoregu obeoami. Īgu opu ðagu ahrimi. Īgu eropa arĩcũ itamuque igure. ⁵ Mari ya maca majarãre igu mahimi. Eropigu igu guã buheri wihire guã iira waja wajayemi, arĩñorã mũrã Jesure wererã.

⁶ Erã eropa arĩ werecũ peegu Jesupu erã mera wapu. Surara opu ya wihi pohro igu ejabu iicũ gohra opupu igu mera majarãre Jesure ðpa arĩ weredoregu obeopu:

—Opu, ðaroca. Aribita. Ōagu arĩbeaa yũhũ. Yaha wihi mũre ñajaridorebuno arĩbeaa yũhũ. ⁷ Eropigu mũ pohro wabirabu. Yuju diaye ta mũ turari mera dorebeoque. Mũ eropiicũ yũ pohro majagu ðagu wagucumi. ⁸ Yũre yũ weca arĩrã gajirã oparã dorema. Eropigu yũ sã surarare dorea. Yujugure “Waque,” yũ arĩcũ igu wahami. Gajigure “Arique,” yũ arĩcũ igu ahrimi. Yũ pohro majagure “Ire iique,” yũ arĩcũ irire igu iimi. Eropigu mũ sã mũ dorero dopa ta igu dorecugu tarigucumi, arĩ weredorepu surara opu.

⁹ Jesu irire peegu, uca wa, bajarã masare igu mera nũrsiarãre majinuga wereru:

—Diaye ta mũare arĩgu iiaa. Ihĩ surara opu Israe masu arĩbiriqeregu Goãmure bũrigã umupeomi. Īgu pohro majagure yũ ðagu wacũ iiburire masituhami. Israe masare ne sihĩ iro dopa umupeorãre ñanibeeaa, arĩpu Jesu.

¹⁰ Īgu eropa arĩra pũhrũ surara opu Jesu pohro igu obeonirã erã opu ya wihigue dujaa wañorã. Dujaja dorecudigure ðagu igu arĩcũ ñañorã erã.

Jesu wapeweyo magure masupu

¹¹ Pũhrũ ñari Naín waĩcũri macague Jesu wapu. Īgu buherã bajarã masa sã igu mera wañorã. ¹² Iri macare ñajaro pohro igu ejacũ sĩridigure masa aĩ wiriñorã yaarã

warã. Sîridigũ pago wapeweyo árîpo. Yujugũ ta árîgũ igo magũ sîria wapũ. Eropirã ero majarã masa bajarã igo mera wañorã. ¹³ Igo eropa wacũ ïagũ Jesu igore mojomoro ïapũ.

—Orebita, arîpũ Jesu igore.

¹⁴ Eropa arîgũ sîridigũ ïgũ masa porere eja mohmepipũ. ïgũ eropa mohmepicũ ïarã iri porere coãrãpũ nuãgajañorã.

—Mahgũ, yũhũ mũre õpa arãa. Wahgã doajaque, arîpũ Jesu.

¹⁵ ïgũ eroparîcũ ta sîridigũ mũrũ wahgã doaja, wereniguiipũ. Eropigũ Jesu ïgũre ïgũ pagore wiapũ.

¹⁶ Eropirã erã árîpehrerã gũirã warã Goãmũre umupeo õpa arîñorã:

—Goãmũ yare weremũhtagũ masitarigũ dohpague tamereare mari watope ãhrimi, arîñorã erã.

—Goãmũ marire ïgũ yarãre itamugũ eratuhami, arîñorã gajirã.

¹⁷ Eropirã árîpehrerã Judea yeba majarãre ero tũro árîri macari majarãre Jesu ïgũ iirare masa weresiripehoñorã.

*Ñu waïyeri masũ ïgũ buherãre Jesure serẽpidorepũ
Mt 11.2-19*

¹⁸ Eropi Jesu ïgũ iirare ïarã Ñure peresu árîgũre wereñorã ïgũ buherã. Eropa erã wercũ peegũ perãre ïgũ pohro sihubeo, ¹⁹ Jesure serẽpidoregũ obeopũ Ñu. Õpa arî serẽpidorepũ:

—“Yũ pũhrũ gajigũ arigũcumi,” ¿Ñu ïgũ arîdigũ ta ãhriri mũhũ? ¿O gajigũre corerãcuri gũa? arî serẽpidorepũ Ñu perã ïgũ buherãre.

²⁰ Eropi erã Jesu pohro eja, serẽpiñorã ïgũre:

—Ñu waïyeri masũ mũre õpa serẽpidoregũ obeoami gũare. “Yũ pũhrũ gajigũ arigũcumi,” ¿Ñu arîdigũ ta ãhriri mũhũ? ¿O gajigũre corerãcuri gũa? arî serẽpiñorã erã Jesure.

²¹ Irisubu ta bajarã dorecũrãre, watẽa ñajasũnirãre, cuiri ïhajibirãre õarã iipũ Jesu. ²² Eropigũ Ñu ïgũ obeonirãre Jesu yũhripũ:

—Dohpaguere mũa ïarare mũa peerare Ñure wererã waque: Õpa arîque: “Jesu mera cuiri ïhajibirã ïhama. Curimasibirã cuhrima. Cami boanirã õarã wahama. Peejabirinirã peea wahama. Sîrinirã masa wahama,” arî wereque. Eropirã mojomorocũrãre õari buherire yũ wererare wereque ïgũre. ²³ Eropa arî weretuhaja õpa arî wereque Ñure: “Yũre peegũ ‘Diaye ta ãhraa,’ arîgũ ïgũ mucubirigũ ãhrimi, arîmi Jesu,” Ñure arî wererã waque, arîpũ Jesu.

24 Ñu buherã erã wara pũhrũ Jesupũ Ñu árĩricũrire werenũgarpũ bajarã masare:

—Mũa masa marirogue Ñu pohroque warã, ero majare taare miru weãcũ ĩarã ejabiribũ mũa. 25 Ōari suhricũgu sãre ĩabiribũ mũa. Ōari suhricũrã waja pagarire suhri sañarã oparã ya wirigue ãhrima. 26 Masa marirogue ejarã Goãmũ yare weremũhtadipure ĩarã ejabũ. Diaye ta Ñu Goãmũ yare weremũhtagũ ãhrimi. Gajirã Goãmũ yare weremũhtanirã tauro árĩgu ãhrimi Ñupũ. 27 Iribojegue Goãmũ yare erã gojarapũ Ñure õpa arĩ wereyuyoro:

Mari pagũ ĩgu magure õpa arĩpũ: “Mũ core mũre wereyubure obeogu ĩaa,” arĩmi Goãmũ, arĩ go-
jañuma iribojeguerẽ Ñure.

28 “Diaye arĩgu ĩaa. Masa árĩpehrerã tauro ãhrimi Ñu. Isubure ĩgu eropa árĩquerẽcũ ta mũmaroguerẽ Goãmũ ĩgu opũ árĩroguere árĩpehrerã docanũgagupũ Ñu tauro árĩgũcumĩ, arĩpũ Jesu masare.

29 ĩgu eroparĩcũ peerã masa, wajasea corerã mera Ñu ĩgu waĩyenirã árĩrã õpa arĩ pepĩñorã Goãmũre: “Goãmũ diaye iigu ãhrimi,” arĩ pepĩñorã erã. 30 Fariseo masapũ, judio masare buherã sã Ñu ĩgu waĩyenirã árĩdiabirinirã árĩñorã. Eropirã Goãmũ erãre ĩgu itamudiarire erã gamebiriñorã.

31 Eropigu Jesu dipaturi werepũ:

—¿Dohpague majarã masa ñehmarano iro dopa ãhriri mũa pepicũ? 32 Erã majirã iro dopa ãhrima. Erã majirã doberi duarogue bira doarã, õpa arĩ dũyasoma erãgã erã basi: “Mũa bayaburire tarisu gũa purirabũ. ¿Duhpirã mũa mucubiri bayarã aribirari? Eropirã gũa bũrigã ñehamere orerabũ. ¿Mũapũ duhpirã gũa mera orebirari?” arĩma dũyasorã. Erã majirã arĩ dũyasorã iro dopa ta iirã õpa arãa mũa dohpague majarã. 33 Ñu waĩyeri masũ Goãmũ ya árĩburire ba duhugũ, vinore ihribirimi. ĩgu eropa ihribiricũ ĩarã “Pee masibigu ãhrimi,” arĩrabũ mũa ĩgure.

34 Yũpũ masũ Goãmũ ĩgu obeodigu árĩgu yũhũ baha ihria. Yũ eropa iicũ ĩarã õpa arãa mũa yũpũre: “Ĩaque. Ihĩ wũaro bagũ merericũgu sã ãhrimi. Wajasea corerã ñero iirã erã wapicũgu ãhrimi ĩgu,” arãa mũa yũre. 35 Eropa masibiriquererã ta gũa iirare ĩarã, Goãmũ masirire gũa opacũ masirãca mũa, arĩ werepũ Jesu erãre.

Fariseo masũ Simo waĩcũgu ya wihi arĩpũ Jesu

36 Fariseo masũ Simo waĩcũgu ĩgu ya wihigue badoregu sihupũ Jesure. ĩgu eropa sihucũ Jesu ĩgu ya wihigue eja, erã bari mesague doajapũ. 37-38 Iri macaguere ñeri iigo árĩpo.

Jesu fariseo masu ya wihigue igu arĩcũ igo peepo. Eropa peego alabastro mera iidirure poresuri dicadirure aĩ, Jesu purupu eranugara puhru orepo. Eropa orego, Jesu guburire igo codeco mera webo, igo poari mera niucóapo. Igu guburi bojocũ iha igo igu guburire mihmi, iri poresuri mera pipeopo. ³⁹ Igo eropa iicũ iagu fariseo masu Jesure sihudigu igu basi opa arĩ pepiripu: “Igo igure mohmepiñago ñerire iigo ahrimo. Ihĩ Jesu Goamu ya weremuhtagu arĩgu irire masiboñumi,” arĩ pepiripu. ⁴⁰ Igu eropa arĩ pepirire masigu Jesu werepu igure:

—Simo, dohpague tamerare mare werediaa, arĩpu Jesu.

—Buhegu, yure dohpa arĩ werediari muhu? arĩ yuhripu Simo.

⁴¹ Igu eroparĩcũ Jesupu opa arĩ buhebu yuhripu:

—Opure perã wajamorã arĩñuma. Yujugu wuaro wajamogu quinientos niyuseri wajamoñumi. Gajigupu merogã cincuenta niyuserire wajamoñumi. ⁴² Eropirã erã wajamorire erã wajayegohrabiricũ iagu igu erã wajamorire cãdijicãñumi. ¿Igu eropiicũ dohpague tamerare nihipu erã opure mahitarinugayuri ma pepicũ? arĩ serẽpupu Jesu.

⁴³ Simo yuhripu:

—Õbaa, wuaro wajamodigu merogã wajamodigu tauro igu opure mahibocumi, arĩpu Simo.

—Diaye yuhria muhu yure, arĩpu Jesu.

⁴⁴ Eropa arĩtuha igure pipeodigore maji iha, Jesu Simore werenemopu:

—Igore iaque muhu. Ma ya wihire yuhu ñajarara puhru ya guburi coeburi decore obirabu muhu. Igo pu igo ya codeco mera yaha guburire coemo. Puhru igo ya poari mera tucoemo. ⁴⁵ Mupu yure bocatĩri mimibirabu. Igo pu ohõ ya doaropẽ ya guburire mihmimo. ⁴⁶ Mupu ya dipurure yu mera pipeobirabu. Igo pu ya guburire poresuri mera pipeoamo. ⁴⁷ Eropa arĩgu mare weregu ta iiaa. Igo igo ñero iira baja gohra ahraa. Eropigu igo ñero iirare cãdijiabu. Yu eropa iicũ igo turaro mahiamo yure. Erã ñero iirare merogã bujawere guñarãpu merogã yure cãdijidorema. Eropirã erã ñero iirare merogã cãdijisũnirã merogã mahima yure, arĩpu Jesu Simore.

⁴⁸ Eropa arĩtuha igu igore werepu:

—Dohpague tamerare ma ñero iirare cohãbu, arĩpu Jesu.

⁴⁹ Igu eroparĩcũ peerã Jesu mera doarã erã basi opa arĩ wereniguiñorã:

—Ihĩ diaye ta “Ñerire cóagu iiaa,” arĩmi. ¿Dohpa arĩguño ahriri igu ñero iirare cóagu? arĩñorã erã erã basi.

⁵⁰ Eropigu Jesu nomeore opa arĩ werepu:

—Yure m̄u umupeoc̄i m̄ure peamegue wabodigore taua. Güiro mariro waque, ar̄ip̄a Jesu igore.

8

Nome Jesure itamuñorã

¹ P̄hr̄u paga macarigue m̄uta macarigãgue sãre eja, Goãm̄u ìgu op̄u ár̄irire, ðari buherire werep̄u Jesu. Doce ìgu buherãp̄u ìgu mera ár̄iñorã. ² Eropirã nome sã watëa ñajasünirã nome, dorecünirã nome, Jesu ðarã ìgu iinirã ìgu mera ár̄iñorã. María waïcũgo Magdalena erã ar̄i piyudigo Jesu mera curipo. Igo siete watëare Jesu ìgu cóadigo ár̄ipo. ³ Juana sã Cuza waïcũgu Heroderere itamudigu marapo sã Jesu mera curipo. Susana waïcũgo sã gajirã nome mera baja erã gajino opari mera ìgure itamuñorã.

Jesu oteri mas̄u queorire werep̄u

Mt 13.1-9; Mr 4.1-9

⁴ Eropi baja macari majarã Jesu pohrogue gamenereñorã. Erã gamenerera p̄hr̄u Jesu ìgu werenigui queori mera erãre werep̄u buhebu:

⁵ —Oteri mas̄u otegu wañumi. Ìgu eropa otecũ gajiyeri ma t̄uro yuri merejayoro. Eropirã iriyerire masa c̄radiuñuma. Eropirã mirimaḡu porã bajarã ahri iriyerire bañuma. ⁶ Eropi gajiyeri utã watope yuri merejayoro. Erore yeba deco mariyoro. Eropiro iriyeri puhri wiriri niguri ñañia wayoro. ⁷ Gajiyeri pora yuc̄u watope yuri merejayoro. Pora yuc̄up̄u puhri tiataria wa, oterayerip̄ure wejēcãyoro. ⁸ Gajiyeri ðari yeba yuri merejayoro. Óaro puhri d̄ucac̄uyoro. Eropiro baja d̄ucac̄uyoro, ar̄ip̄u Jesu.

Eropa ar̄ituha ðpa ar̄inemop̄u:

—Ire ðaro peeque m̄ua, ar̄ip̄u ìgu.

Jesu werenigui queori mera ìgu buherire werep̄u

Mt 13.10-17; Mr 4.10-12

⁹ P̄hr̄u ìgu buherã iri werenigui queorire masidiarã, Jesure serëpiñorã:

—¿I queori mera dohpa ar̄i buhegu iiri m̄uh̄u? ar̄i serëpiñorã erã. ¹⁰ Erã eropar̄icũ Jesu ȳahr̄ip̄u:

—Goãm̄u ìgu op̄u ár̄irire iribojegue majarã erã masibirirare m̄uare masicũ iimi Goãm̄u. Gajirãp̄ure eropa ilbeam̄u ìgu. Eropigu erãre werenigui queori mera buhea. Ȳu eropa iicũ erã ȳu buherire peequererã masisome, ar̄ip̄u Jesu ìgu buherãre.

Jesu oteri mas̄u queorire were amup̄u ìgu buherãre

Mt 13.18-23; Mr 4.13-20

¹¹ Eropa ar̄ituha erãre werenemop̄u:

—Ōpa arī werea i werenigui queorire: Oteriyeri ōari buheri iro dopa āhraa. ¹² Eropiro ma turo yuri merejariyeripū ōari buheri iro dopa āhraa. Eropiro masa erā ōari buherire peecū ĩagū watīpū ahri, iri buherire masidorebeamī masare. Ĩgū eropa iibiricū erā Goāmure umupeoboñuma. Erā eropa umupeocū ĩagū Goāmupū erāre peamegue wabonirāre tauboñumi. ¹³ Utā weca yuri merejarayeri ōari buheri iro dopa āhraa. Eropirā masa ōari buherire pee, mucubiriri mera irire pee aīma. Eropa pee aīquererā ta utā weca árīri yucū nuguri mariri yucū iro dopa ta oā masa sā turabeama. Eropa turabirā yaha ōari buherire erā peera dipuwaja gajirā erāre ñero iicū ĩarā yahapūre duhucāma. ¹⁴ Eropi pora yucū weca yurimerejarayeri ōari buheri iro dopa āhraa. Eropirā masa ōari buherire peequererā ta, i yeba majare wūaro pepirā, niyerure gamerā, i yeba majare gahmema erā. Eropirā iripū ōari buherire cāhmotaa. Iri cāhmotacū masa Goāmū gameripūre iibeama. ¹⁵ Eropi ōari yeba yurimerejarayeri ōari buheri iro dopa āhraa. Eropirā masa ōari buherire ōaro mera pee peenurucāma. Eropirā duhuro mariro Goāmū ĩgū gamero dopa ta ōarire iima, arīpū Jesu.

Jesu sihāgodiru queorire buherpū

Mr 4.21-25

¹⁶ Eropa arītuha gajī queori mera buherpū Jesu.

—Ne sihāgodirure masa sihāgora pūhrū mátasoro doca dibubeama. Eropirā irirure cama doca dibubeama. Ūmarogue irirure duhpeomi wihigue ñajarā erā ōaro ĩha ñajama ōaro. ¹⁷ Mari iiraguere Goāmure duhmasiya mara. Pūhrūguere árīpehreri masisūroca. Sihāgodiru ñamire boyoro dopa ta iribojegue erā masibirirare masirācoma māsa.

¹⁸ Eropirā mūa peerā ōaro peenurūque. Ōaro peenurūgū, ōaro masigūcumī. Peenurūbigū “Merogā pee,” ĩgū arīquerecū iripū dederea waroca ĩgūre, arīpū Jesu.

Jesu acawererā ĩgūre sihuñorā

Mt 12.46-50; Mr 3.31-35

¹⁹ Pūhrū Jesu pagū porā erā pago mera ĩgū pohrogue warā iiriñorā. Masa bajarā árīcū ĩgū pohro ejabiriñorā.

²⁰ Eropigū yujugū Jesure werepū:

—Mū pago mū pagū porā mera disiporogue niguima. Mūre ĩarā ahrañorā, arīpū ĩgū Jesure.

²¹ ĩgū eroparīcū ōpa arī werepū Jesu árīpehrerāre buhebu:

—Goāmū buherire peerā, irire tarinūgabirā erā ta āhrima yū pago yū pagū porā iro dopa árīrā, arīpū Jesu erāre.

Jesu miruñere yusudorepɸ

Mt 8.23-27; Mr 4.35-41

²² Gajinɸ Jesu iŋɸ buherã mera dohodirugue ñaja

—Ina, taribujarã, arĩ, erã árĩpehrerã iriru mera ditarugue taribuja wañorã.

²³ Eropa taribujagɸ carĩa wapɸ iŋɸ. Erã eropa taribujarisubu turaro miruñe ariyoro. Miruñe aricã págúri wahgã, erãre miucãriyoro. Eropa waro mirimaja gɸhya árĩyoro erãre. ²⁴ Eropa wacũ ñha ɸca wa, Jesu pohro waha, iŋɸre wahgũñorã.

—Buhegɸ, mari mirimorã iiaa, arĩñorã erã. Erã eroparĩcũ Jesupɸ wahgã, miruñere “Iripẽta weã duhuque,” arĩpɸ. Eropa arĩgɸ págúrire “Yusuaque,” arĩpɸ. Iŋɸ eroparĩcũ ta miruñe taria wayoro. Eropiro págúri sã yusɸ dija wayoro.

²⁵ Eropa wara pɸhrɸ Jesu erãre õpa arĩpɸ:

—¿Mɸa yure umupeobeari?

Erãpɸ gũi, ñha ɸca, õpa arĩ wereniguiñorã erã basi:

—Cue, ¿ñehmɸno masɸ ãhriri ihĩ? Miruñe, págúri sã iŋɸ dorecũ tarinɸgabeea iŋɸre, arĩñorã erã basi.

Watẽa ñajasũdigure õagɸ iipɸ Jesu

Mt 8.28-34; Mr 5.1-20

²⁶ Eropirã erã gajipɸ masegue Gerasa majarã ya yebague taribujajañorã. Iri yeba Galilea yeba diaye árĩyoro. ²⁷ Ero Jesu iŋɸ majajanɸgarisubu ero majagɸ watẽa ñajasũdigɸ iŋɸ pohrogue aripɸ. Iŋɸ yoari boje goroweregɸ suhri marigɸ árĩgɸ, iŋɸ wihiguere ne árĩbirimuripɸ. Eropigɸ masa goberi ɸtã goberi watope árĩpɸ iŋɸ. ²⁸⁻²⁹ Eropirã bajasuburi watẽa iŋɸre ñearo mera iŋɸ burigã gorowerecũ ñha masa iŋɸre bihadoboriñorã. Eropigɸ iŋɸ peresugue árĩgɸ iŋɸ mojotorire guburire comedari mera erã diridigɸ árĩqueregɸ, iŋɸ iridarire nuapɸ. Eropirã watẽapɸ iŋɸre masa marirogue aĩgãñorã. Eropigɸ iŋɸ Jesure ñhametu turaro gaguinigui, Jesu pohro merejarɸ. Iŋɸ eropa iicũ ñagɸ Jesupɸ watẽare dorepɸ:

—Ihĩ mera árĩbiricãque. Waque watẽa, arĩpɸ.

Iŋɸ eroparĩcũ peegɸ watẽa ñajasũdigɸpɸ turaro gaguinigui, serẽpipɸ Jesure:

—Jesu, ɸmaro majagɸ Goãmɸ magɸ, ¿ñehenore iibu iiri mɸhɸ yure? Yure ñero iibiricãque, arĩpɸ watẽa ñajasũdigɸpɸ.

³⁰ Iŋɸ eroparĩcũ Jesupɸ serẽpipɸ iŋɸre:

—¿Ñehmɸno waĩcari mɸhɸ? arĩpɸ.

Bajarã watẽa iŋɸ mera árĩñorã. Eropigɸ õpa arĩpɸ erãre opagɸ.

—Watëa bajarã waĩcua gua, arĩpu watëa ñajasũdigupũ.

³¹ —Ûhcãri gobegue guare wadorebita, arĩ, turaro serẽñorã watëapũ.

³² Irisubure ero utãgu gubuye bajarã yesea barã iĩñorã. Erã ero bacũ ïarã watëa õpa arĩ serẽñorã Jesure:

—Soã yesea pohrogue wadoreque guare. Erã mera áridoreque guare, arĩ serẽñorã watëa masure ñajanirã.

Erã eropa arĩ serẽcũ peegu Jesu erãre yesea pohrogue wadorepũ. ³³ Ìgu eropa wadorera pũhrũ watëapũ masũ mera árinirã waha, yesea pohrogue ejañorã. Erã pohrogue erã ejara pũhrũ yeseapũ gorowere dipaturugue omabuha, ditarugue yuriñaja miri sĩripehrea wañorã.

³⁴ Yeseare ïhadibunirãpũ yesea eropa miricũ ïarã, gũi omagã wañorã. Eropã omagãrã macague eja, iri maca majarãre campo majarã sãre erã ïarare weresiripehocãñorã.

³⁵ Erã eropa werera pũhrũ masa ïarã wañorã. Eropirã Jesu pohro eja, watëa ñajasũdigũ murũ ïgu suhri sañadigũ pee masigũ ïgu ero õaro doacũ ïañorã erã. Iri áripehrerire ïarã erã gũi áriñorã. ³⁶ Watëa ñajasũdigũ murũ ïgu õaro áricũ ïanirã gajirãre erã ïarare wereñorã. ³⁷ Eropã pee ero majarã Gerasa yeba majarã áripehrerã bũrigã Jesure gũiñorã. Eropirã ïgure wadoreñorã. Erã eropa wadorecũ Jesu dohodirugue ñajapũ wabu. ³⁸ Watëa ñajasũdigũ murũpũ Jesu ïgu waborore ïha turaro ïgure serẽripũ:

—Mũ mera wadiaca, arĩ serẽripũ.

³⁹ Ìgu eroparĩcũ Jesu ïgure yũhrĩpũ:

—Mũ ya macague waque. Eropã wagũ Goãmũ mũre õaro iirare wereque gajirãre, arĩpũ Jesu.

Ìgu eropa arĩra pũhrũ ïgu ya macague ejagu Jesu ïgure õaro iirare áripehrerãre ïgu ya maca majarãre werepũ.

Jairo magore õago iipũ. Eropã áricũ ne behrego sãre õago iipũ Jesu

Mt 9.18-26; Mr 5.21-43

⁴⁰ Sipũ masegue Jesu dipaturi ïgu taribujajacũ ïarã masa bajarã ïgure corenirã bocatĩri serẽñorã ïgure. ⁴¹⁻⁴² Ero buheri wihi opũ Jairo waĩcũgu Jesu pohro eja, ïgu guburi pohro merejapũ. Ìgu mago sĩrigo iipo. Igo yujugo ta áriño doce bojori opago áriño. Eropigũ ïgu ïgu ya wihigue Jesure sihgãpũ. “Áũ,” arĩ, ïgu mera wapũ Jesu sã.

Ìgu eropa wacũ masa bajarã ïgure nũrusiarã cũriro iĩñorã ïgure. ⁴³ Eropigo yujugo nomeo doce bojori gohra duhuro mariro eropã behrego ero áriño. Ero corere duhturuare igo ya niyeru mera áripehrerire wajayeripo igo ocoyedorego. Erã eropã ocoyequerecũ ta muraro ta di

waniguicāyoro igore. ⁴⁴ Eropigo igo Jesu pūhrū ahri, ĩḡu suhriro ojogorore igo ñeacū igore di wiriniguicāra pehrea wayoro. ⁴⁵ Igo eropa ñeañacū Jesu pepiḡu serēpirū.

—¿Noa yu suhrirore mohmepiari? arīpū ĩḡu.

Árīpehrerā “Mohmepibea,” arīñorā. Eropirā Pedro sã õpa arī yūhriñorā:

—Buheḡu, cūhña āhraa. Eropirā masa bajarā mure pēhrecāma. ¿Duhpiḡu eropa arī serēpiri mūhū? arīñorā erā Jesure.

⁴⁶ Erā eroparīcū Jesu yūhriḡu:

—Dohparagã yu turari mera yujugore dore yūhū cóārare masia. Eropiḡu yure igo ñeañarare masia, arīpū ĩḡu.

⁴⁷ ĩḡu eroparīcū peego igo duhrimasibigo, naragāgo Jesu pohro merejapo. Eropigo árīpehrerā masa erā peero igo arīpo Jesure:

—Yūhū ñeañabū mure. “Īḡure ñeañacū yu dore taria waroca,” arīgo mure ñeañabū. Yu mure eropa ñeañago mata õago wahabū, arīpo. ⁴⁸ Igo eropa arītuhajacū Jesu igore werepū:

—Mahgo, yure mū umupeori mera õago dujaa dohpaguere. Mucubiriri mera waque, arīpū igore.

⁴⁹ ĩḡu eropa arīrisubu Jairo ya wihi árīḡu wereḡu erapū.

—Mū mago sīria wahámo. Eropiḡu ihī buheḡure sihubita pare, arīpū ĩḡu.

⁵⁰ ĩḡu eroparīcū peegū Jairore õpa arī werepū Jesu:

—Būjawerebita. Yure umupeoque. Iri dihtare iique. Mū eropa iicū õago wagocumo, arīpū Jesu.

⁵¹ Eropa arītuha Jairo ya wihigue eja, Pedrore, Ñure, Santiagore, dorecūgo pagū sumarāre añ ñajapū. Gajirāpūre Jesu ñajadorebiripū. ⁵² Ero árīpehrerā masa erā ñehamere orerā iññorā. Jesu erāre arīpū:

—Orebiricāque. Iogō sīribeamo. Carīgo iimo, arīpū ĩḡu.

⁵³ ĩḡu eroparīcū erāpū igo sīridigo arīcū masirā “Eroparīcāḡu iimi ihī,” arīrā Jesure ĩayeñorā. ⁵⁴ Eropiḡu Jesu igo mojtore ñeha, arīpū igore:

—Majigo, wahḡāque, arīpū.

⁵⁵ ĩḡu eropa arīcū igo sīridigo arīquerego igo sīporā goecū masa wapo. Irisubu ta wahḡānūgajapo igo. Igo eropa wahḡāra pūhrū Jesu igore barire odorepū. ⁵⁶ Igore eropa ĩḡu masacū ĩarā igo pagū sumarā ĩhamaria wañorā. Eropiḡu Jesu irire gajirāre weredorebiripū.

9

Jesu doce ĩḡu buherãre buhedoreḡu obeopu
Mt 10.5-15; Mr 6.7-13

¹ Eropi Jesu doce ĩḡu buherãre sihubeo, ĩḡu turarire ópu ĩḡu erãre. Watẽare erã cóãburire, dorecũrãre erã õarã iiburire ópu ĩḡu turarire erãre. ² Eropa iituha erãre Goãmu ĩḡu opu árĩrire buhedoreḡu, dorecũrãre õarã iidoreḡu obeopu erãre. ³ Ópa arĩ dorepu Jesu erãre:

—Mũa warã gajinore aĩbircãque. Tuadire, ajure, barire, niyerure aĩbircãque. Yujuñe suhriro ta sañaque. Peñe sañabita. ⁴ Árĩpehrerogue mũare erã carĩro ocũ iri wihi ta dujanique. Ne warãgue wiriaque iri wihire. ⁵ Gaji macari majarã mũare erã gamebircũ ĩarã iri macare tarigã waque. Eropa warã mũa guburi maja nicure moje siripique mũa erãre erã ya dipuwajare ĩhmumorã, arĩpu Jesu.

⁶ ĩḡu eropa arĩra puhrũ ĩḡu buherãpu waha, árĩpehreri macarigue masare õari buherire were curiñorã. Eropirã dorecũrãre õarã wacũ iĩñorã.

Jesu ĩḡu iirare Herode peepu
Mt 14.1-12; Mr 6.14-29

⁷ Eropi Herode Galilea yeba majarã opu Jesu ĩḡu iirare peebeopu. “¿Noa ãhriri ĩḡu Jesu?” arĩquereḡu ne masibiripu. Yujurãyeri ópa arĩñorã Jesure. “Ñu waĩyedi mũru dipaturi masa deyogu iicumi. Eropigu Jesu erã arĩḡu ĩḡu ta ãhrimi,” arĩriñorã gajirã. Erã eroparĩcũ peegu Herode Jesure dohpa arĩ masibiripu. ⁸ Eropirã gajirã “Ĩḡu Elia mũru dohpague dehyoagu iimi,” arĩriñorã. Gajirãpu “Goãmu ya weremũhtanirã mera majagu arĩcumi daja masa mũrigu,” arĩriñorã Jesure. ⁹ Erã eropa arĩ wereniguiquerecũ ta ópa arĩ pepipu Herode: “Ñu dipurure tabetadoreḡu wejẽtuhabu ĩḡupure yuhũ. ¿Eropigu masa erã werewũagu nihino arĩbocuri ĩḡu?” arĩ pepi ĩḡu Jesure ĩadiaripu.

Jesu masa bajarãre barire ópu
Mt 14.13-21; Mr 6.30-44; Jn 6.1-14

¹⁰ Eropi Jesu ĩḡu obeonirã ĩḡu pohrogue dujaja, erã iirare wereñorã Jesure. Erã weretuhacũ Jesu erã dihtare Betsaidague sihu waripu. ¹¹ ĩḡu erã dihtare sihuquerecũ erã warare masirã, masa bajarã nurũsiagãñorã. Jesu ĩḡure erã nurũsijacũ ĩagu ĩḡu bocatĩri serẽpu erãre. Eropigu ĩḡu Goãmu ĩḡu opu árĩrire erãre were, dorecũrãre õarã iipu.

¹² Ñamicague doce ĩḡu buherã ĩḡu pohrogue eja, Jesure wereñorã:

—Ohõ masa marirogue ãhraa. Õ majaro maja wirigue oã masare obeoque. Carĩmorã erã batuburire amadoreque erãre, arĩñorã erã Jesure.

13-14 Erã eroparĩcũ Jesu yãhrĩpũ erãre:

—Mũa basi barire oque erãre, arĩpũ.

Ïgũ eroparĩcũ peerã erã yãhriñorã:

—Cinco pan dipurure, perã ta wai sãre iripẽta opaa mari. Oã masa bajarã erã baburire asũmasiya mara marire, arĩñorã ïgũ buherã.

Bajarã masa erã áricũ eropa arĩñorã ïgũ buherã. Eroguere cinco mil uma áriñorã. Eropigũ Jesu werẽpũ ïgũ buherãre:

—Yujurãyeri cururi cincuenta gohra doadoreque. Gaji curu sãre erã nũcũ ta doadoreque, arĩpũ Jesu ïgũ buherãre.

15 Ïgũ eroparĩcũ ïgũ buherã ïgũ dorero dopa ta iĩñorã. Áripehrerã masare doadoreñorã. 16 Doadoretuha Jesu cinco pan dipurure, perã wai mera aĩ, umarogue ïhamemuju, Goãmũre “Õhaa,” arĩpũ. Ïgũ eropa arĩra pũhrũ pan dipurure nuha, ïgũ buherãre masare gueredoregũ ópũ. 17 Eropirã erã áripehrerã masa baha yapia wañorã. Erã ba dũharare doce puiro gohra aĩ gameneo ujutudoboñorã ïgũ buherã.

Mũhũ Cristo Goãmũ ïgũ obeodigũ ta ãhraa, arĩpũ Pedro Mt 16.13-19; Mr 8.27-29

18 Yujunũ Jesu yujugũ ta Goãmũre serẽgũ iipũ. Ïgũ wereniguirisubu ïgũ buherã ïgũ pohrogue áriñorã. Eropigũ Jesu serẽpipũ erãre:

—¿Nihino áricuri yũhũ, masa erã pepicũ? arĩ serẽpipũ.

Ïgũ eroparĩcũ peerã ïgũ buherã yãhriñorã:

19 —“Ñu waĩyedigũ mũrũ áribocumi,” arĩma mũre. Gajirã “Elia mũrũ áribocumi,” arĩma. Gajirã, “Goãmũ ya weremũhtanirã mera majagũ iribojegue majagũ masa mũriadi áribocumi,” arĩma, arĩ yãhriñorã ïgũ buherãpũ ïgure.

20 Erã eropa arĩra pũhrũ Jesu erãre serẽpipũ daja:

—¿Mũapũ pepicũ nihino áricuri yũhũ? arĩ serẽpipũ daja.

—Mũhũ Cristo Goãmũ ïgũ obeodigũ ta ãhraa, arĩ yãhrĩpũ Pedro.

Jesu ïgũ sãriburiñere werẽpũ Mt 16.20-28; Mr 8.30-9.1

21 Eropi Pedro “Cristo ãhraa mũhũ,” ïgũ arĩrare ne gajirãre Jesu weredorebirĩpũ. 22 Eropa weredorebirituhagu õpa arĩpũ:

—Yuhũ masũ Goãmu ãgu obeodigu burigã ñero tarigũca. Eropã ta tariro gahmea yũre. Eropirã pahia oparã, murã, judio masare buherã mera yũre gamebirã wejẽrãcoma. Erã wejẽra puhũrũ uhrenũ puhũrũ masa muriagũca, arĩpũ Jesu erãre.

²³ Puhũrũ arĩpehrerãre õpa arĩ werepũ Jesu:

—Yujugũ yũ mera majagũ arĩdiagũ, ãgu gamero iidiarire duhucãgũcumi. Eropigu yahagũ ãgu arĩri dipuwaja ñero tarigũcumi. Ñero tariqueregũ ta yahare iiniguigu arĩgũcumi. ²⁴ Yujugũ masũ ãgu ya arĩburi dihtare pepigu dederea wagũcumi. Eropigu yaha arĩburi yũ gameri dihtare iigu arĩpehrerinũri yũ mera umaroguere õaro arĩgũcumi. ²⁵ Yujugũ masũ i yeba majare arĩpehrerire opaqueregũ peamegue wagũ õarire bocasome. ²⁶ Yujurãyeri yũ buherire werediarã, “Jesu yagũ ahraa,” arĩdiarã guhyasĩrirãcoma. Erã eropa iicũ ãagũ yũ sã erãre eropa iirãre guhyasĩrisãgũca. Yuhũ Goãmu ãgu obeodigu õarã anyua erã goesiriri mera, yũ Pagũ ãgu goesiriri mera dujarigũ yũre guhyasĩrinirãre guhyasĩrisãgũca yũ sã. ²⁷ Diaye arĩgũ tiiaa mũare. Dohpague yujurãyeri mũa õgue arĩrã mũa sĩriboro core Goãmu ãgu opu arĩcãgue ãarãca, arĩpũ erãre.

Jesu dupũre gohrotopũ

Mt 17.1-8; Mr 9.2-8

²⁸ Eropi ocho nũri irire ãgu werera puhũrũ Jesu Pedrore, Ñure, Santiagore erã dihtare sihupũ. Eropi waha, Goãmu mera wereniguirã wañorã. Utãgũre mũria wañorã erã. ²⁹ Goãmũre ãgu serẽrisubu Jesu ãgu diapo gohrotoa wayoro. Eropiropi ãgu suhri cuimijuri suhri õaro boreri suhri wayoro. ³⁰ Eropã warisubu perã uma ãgu pohro dehyoañorã. ãgu mera wereniguirã iĩñorã. Erã iribojegue majarã Elia mũrũ, Moise mũrũ sã arĩñorã. ³¹ Erã umaro maja goesiriri mera dehyoañorã. Jesu merogã Jerusalengue ãgu sĩriborore erã Jesu mera wereniguirã iĩñorã. ³² Pedro ãgu mera majarã sã wũja meretaria carĩrã iĩñorã. Eropã carĩquererã ta uca wahgã, Jesu goesiriri ãha, perã ãgu mera wereniguirã sãre ãañorã. ³³ Moise Elia mera erã warisubu Pedro Jesure õpa arĩpũ:

—Opu, mari õre arĩcũ õadiaa. Uhre wihigã gohra iirã. Mũ ya wihigã, Moise ya wihigã, Elia ya wihigã iirãca, arĩpũ Pedro.

Eropã arĩqueregũ ta ãgu arĩrare ne masibiripũ. ³⁴ ãgu eropa arĩ wereniguirisubu erãre imica curu cãhmotayoro. Eropã cãhmotacũ ãarã erã gũia wañorã. ³⁵ Eropiropi imica curu pohecague Goãmu ãgu wereniguirã busuyoro:

—Ihĩ yu magu yu beyedigu āhrimi. Ōaro peeque ĩgure, arĩri busuyoro imica pohecague.

³⁶ Eropa arĩra pũhrũ Jesu dihtare ĩañorã erã. Pũhrũ erã ĩarare gajirãre werebiriñorã. Ne yujugure werebiriñorã dohpa irisubure.

Jesu watĩ ñajasũdigure ðagu iipũ

Mt 17.14-21; Mr 9.14-29

³⁷ Gajinũ erã utãgugue erã دچارicũ bajarã masa Jesure bocatĩriñorã. ³⁸ Eropigu erã mera majagu Jesure piyupũ:

—Buhegu, mũre turaro ire serẽdiaa yũhũ. Yu magu yujugu ta āhrimi. Eropigu ĩgure ĩabasaque mũhũ.

³⁹ Watĩ ñajasũ gorowereniguicãmi. Iri watĩ ĩgure ñeha, gaguiniguicũ ii, tũru naragãcũ ii, sumutua wacũ iimũraa. Eropigu ihĩ watĩ yu magure ñero taricũ ii, ne duhudiabeami ĩgure. ⁴⁰ Mũ buherãre iri watĩre cóãdoregu turaro serẽrabũ. Yu eropa serẽquerecũ ta erã irire ne cóãmasibirama, arĩpũ ĩgu Jesure.

⁴¹ Ĩgu eroparĩcũ Jesupũ ðpa arĩpũ ero árĩrãre:

—Dohpague majarã mũa ñerã āhraa. ¿Yũre ne umupeo-birigohracãri? Yoari boje mũare buherabũ. ¿Dipẽ yoari boje yũre garibori mũa? arĩ turipũ Jesu.

Eropa arĩtuha watĩ ñajasũdigũ pagure ðpa arĩpũ:

—Mũ magure aĩgãrique, arĩpũ.

⁴² Ĩgu eropa arĩra pũhrũ ĩgu magu Jesu pohrogue ĩgu aririsubu watĩ ĩgure yebague mehmereja, tũru naragãcũ iipũ. Ĩgu eropa iicũ Jesu watĩre cóãpũ. Ĩgu eropa cóãcũ watĩ ñajasũdigũ ðagu warũ. Eropigu Jesupũ ĩgugãre wiarũ ĩgu pagure. ⁴³ Árĩpehrerã masa Goãmũ turari mera ĩgu ðagu wacũ iirire ĩarã, uca wañorã.

Dipaturi Jesu ĩgu sĩriburiñere werepũ

Mt 17.22-23; Mr 9.30-32

Masa Jesu ĩgu iirare ĩha uca wacũ Jesupũ ĩgu buherãre ðpa arĩ werepũ:

⁴⁴ —Dohparagã yu wereburire cãdijibiricãque mũa. Yũhũ masũ Goãmũ ĩgu obeodigu āhraa. Masa yũre ñeha, gajirãguere yũre wiarãcoma, arĩpũ Jesu.

⁴⁵ Ĩgu eropa arĩquerecũ ta erãpũ ĩgu wererire ðaro peebiriñorã. Ĩgu wererare erãre masiya mariyoro. Irisubu ta Goãmũ erãre irire masidorebirinipũ. Eropirã erã güirã irire ĩgure serẽpibiriñorã.

Jesu buherã erã mera majagure opu acudiarĩñorã

Mt 18.1-5; Mr 9.33-37

⁴⁶ Pũhrũ Jesu buherã werenigui dũyatorã iĩñorã:

—¿Mari mera majagu nihinopu opu ñajagucuri? arĩ duyasorã iĩnorã erã erã basi.

⁴⁷ Erã eroparĩcũ Jesupu erã pepirire masigu, majigure ĩgu pohro aĩnugu, ĩgu buherãre wereru:

⁴⁸ —Yaha arĩburire iimorã opa arĩgugãre bu arĩgure gamerã yu sãre gahmea mua. Eropirã yure gamerã, yure obeodigu sãre gahmea mua. Mua mera majagu mua pohro majagu arĩgu ĩgu sã opu ta arĩgucumi, arĩpu Jesu.

Marire ĩhaturibigu arĩgu mari mera majagu aħrimi, arĩ wereru Jesu

Mt 9.38-40

⁴⁹ Pũru Ñu Jesure opa arĩ wereru:

—Buhegu, mu waĩ mera watĩ ñajasũnirãre taricũ iiami yujugu. ĩgure guã ĩabu. ĩgu mari mera majagu ĩgu arĩbircũ ĩarã ĩgure irire iidorebirimurabu guã, arĩpu Ñu Jesure.

⁵⁰ ĩgu eroparĩcũ Jesu Ñure gajirã ĩgu buherã sãre opa arĩ wereru:

—Eropa arĩbircãque mua ĩgure. Marire ĩhaturibigu arĩgu, ĩgu mari mera majagu aħrimi, arĩpu Jesu.

Jesu Santiagore, Ñu sã erã wererire gamebiripu

⁵¹ Irisubure Jesu ĩgu umusigue ĩgu waboro coregã “Jerusalengue wagura,” arĩpu ĩgu. Eropa arĩgu wagu iipu.

⁵² Eropirã Jesu core ĩgu obeonirã waha, Samaria yeba maja macague eja, ero Jesu ĩgu ejaborore amuyudiarĩnorã.

⁵³ Jesu Jerusalengue wabu iipu. Erogue ĩgu wabu arĩcũ peerã, iri maca majarã ĩgure gamebiriĩnorã. ⁵⁴ Irire peerã Ñu, Santiago mera wereĩnorã Jesure:

—Opu, mu gamecũ umaro maja peame mera mure gamebirinirãre wejedorerãra Elia muru ĩgu iidiro dopa ta, arĩnorã erã ĩgure.

⁵⁵ Erã eroparĩcũ maji ĩha turipu erã perãre:

—Eropa arĩbircãque. Espĩritu Santo yarã aħraa mua. Dohpague mua pepiro dopa ta ĩgupu pepibeami. Yũhu masu Goãmu ĩgu obeodigu i yebaguere arigu peamegue wabonirãre taugu aribu. Masare erã dederecũ iigu aribiribu, arĩ wereru Jesu.

⁵⁶ Eropa arĩ weretuha gaj macague Jesu sã carĩrã waha waĩnorã.

Gajirã Jesu mera wariĩnorã

Mt 8.19-22

⁵⁷ Maha erã wacũ, yujugu masu Jesure wereru:

—Mu mera yũhu wadiaa noho mu wadiaro, arĩpu ĩgu.

⁵⁸ ĩgu eropa arĩra pũru Jesu yũhripu:

—Yũ mera aricũ diasaa ãhraa. Nũgũ majarã diayea erã carĩburi toreri opama. Mirimagũ porã sã erã ya suhri opama. Yũ masure Goãmũ ãgũ obeodigũpũre sooro mara. Ne yaha wihi mara. Eropirã yũ mera árĩrã ñero tarirãca mũa, arĩ yũhripũ Jesu.

⁵⁹ Pũhrũ gajigũre Jesu sihupũ:

—Yũ mera majagũ árĩbu arique, arĩpũ.

Ãgũ eroparĩcũ ãgũ yũhripũ Jesure:

—Opũ, yũhũ yũ pagũ sĩricũ yaanigũ wagũra. Pũhrũ mũ mera wagũra, arĩpũ ãgũ.

⁶⁰ ãgũ eroparĩcũ Jesu werepũ:

—Yũre gamebirã sĩrinirã iro dopa ta ãhrima. Erãpũ sĩrinirãre yaaporo. Eropigũ mũpũ Goãmũ ãgũ opũ árĩrire õari buherire buhegũ arique, arĩpũ Jesu ãgũre.

⁶¹ Eropigũ gajigũ Jesure õpa arĩpũ:

—Opũ, mũ mera wagũra. Yũ acawererãre goeriserenigũ wanigũra dohpa, arĩpũ ãgũ Jesure.

⁶² ãgũ eroparĩcũ werepũ Jesu ãgũre:

—Mohmebu mohmediabigũ ãgũ duhpibu árĩbeami. ãgũ iro dopa árĩgũ õpa ãhrimi: “Goãmũ yare iidiaa,” arĩqueregũ irire ne iibeami. ãgũ Goãmũ yagũ árĩbodigũ árĩbeami, arĩpũ Jesu.

10

Jesu setenta buherãre buhedoregũ obeopũ

¹ Pũhrũ Jesu gajirã ãgũ buherãre setenta buherãre beye, macarigue ãgũ waboro core obeoyupũ. Yujuyeri macarire perã dihta obeopũ ãgũ. ² Eropa obeogũ õpa arĩ werepũ erãre werenigũ queorire buhegũ:

—Ojodũca baja iri bugatuhajacũ baja árĩcũ baja mohmeri ãhraa. Mohmeri masapũ bajamerãgã ãhrima. Eropa ta õari buherire peemorã bajarã árĩcũ wũaro ãhraa mari mohmeri. Iri eropãrĩquerecũ ta mari masare buhemorã bajamerãgã ãhraa. Eropirã õari buherire buhemorãre gajirãre ãgũ obeomorãre Goãmũre serẽque mũa. ³ Waque mũa. Mũare yũ obeogũ oveja iro dopa árĩrãre mũare yeea guarã iro dopa ta ñerã árĩrã watopegue obeogũ iiaa. ⁴ Niyeru ajure, paga aju sãre, zapature aĩbircãque. Mũa mague curirã gajirãre bocajarã wereniguibircãque. Diaye ta taria waque. ⁵ Árĩpehri wirire mũa ñajari wirire i wihi majarãre, “¿Ãhriri mũa?” arĩmũhtaque. ⁶ Iri wihi majarã õaro mera árĩrã gamequeãro mariro erã árĩcũ õadoreque erãre. Õaro mera erã árĩbircũ iri wihi majarãre irire õadorebita. ⁷ Yuju wihi ñajanũgarã erã

ōaro árĩcũ iri wihi ta dujaque. Iri wihi majarã mware erã ejorire baha ihrituque. Mohmegure ĩgu wajatarire aĩro gahmea. Eropirã mwa erãre buhera waja erã bari orire aĩque mwa sã. Eropirã yuju wihi ta mwa ejara wihi ta ñajarã, iri macare gajirã ya wirigue árĩcuribiricãque. ⁸ Macaguere mwa ejarã ero majarãpũ mware gamerã árĩcũ erã bari ejori árĩcũ baque. ⁹ Ero majarã dorecurãre òarã iique. Eropirã òpa arĩque ero majarãre: “Goãmũ mari Opũ dohpaguere ĩgu árĩborore wererã iiaa mware,” arĩque erãre. ¹⁰ Gaji macague mwa ejacũ erãpũ mware gamebiribocoma. Erã gamebiricũ ĩarã iri maca decogue waha, òpa arĩque erãre. ¹¹ “Gua nicu imicare guburi maja imicare wejēsiri cóarã iiaa mwa guare gamebiriri dipuwaja ĩhmurã,” arĩque. “Eropirã ire guña arĩque,” arĩque. “Goãmũ mari Opũ dohpaguere ĩgu árĩborore mware wererã arirabũ,” arĩque erãre. ¹² Mware diaye yũhũ arĩgu iiaa. I mũũ pehrecũguere Sodoma majarã mura burigã dipuwajacurãcoma. Erã eropa árĩquerecũ ta tauro mware gamebirãpũ dipuwajacurã árĩrãcoma, arĩpũ Jesu.

*Gaji macari majarã Goãmũre tarinũgarã árĩñorã
Mt 11.20-24*

¹³ Pũhrũ Jesu òpa arĩpũ macari majarãre:

—Corazín majarã, mwa ñero tarirãca. Betsaida maca majarã mwa sã ñero tarirãca. Mwa ya macaguere Goãmũ ĩgu turari mera deyoro moarire iirabũ yũhũ. Mwa pee-birabũ. Iribojegue Tiro waĩcũri macare, Sidón waĩcũri maca sãre ĩgu turari mera iri deyoro moarire yũ ii ĩhmucũ ĩarã ero majarãpũ erã ñero iirire bujawereboañuma. Eropa iirã òaripũre gohrotoboañuma. Mata erã bujawererã erã bujawererĩ suhrire saña, erã basi pea witũ mera mohsiripeoboañuma erã ñerire bujawererire ĩhmumorã. Mwarũ eropa iibea. ¹⁴ Eropĩgu mware arĩgu tiiaa. Goãmũ ĩgu dipuwaja moarinũ árĩcũ Tiro majarã mura, Sidón majarã mura tauro mwarũre mwa ñeri dipuwaja dipuwaja moagũcumi ĩgu. ¹⁵ Capernaum majarã, mwa ejatuharo mera Goãmũ pohrogue wadiaribũ. Eropirã mwa Goãmũ yarũre iidiabiricũ mware Goãmũ peamegue cóagũcumi, arĩpũ Jesu.

¹⁶ Eropa arĩtuha ĩgu buherãre wererũ:

—Mware peerã yũ sãre peema. Mware gamebirã yũ sãre gamebeama. Eropirã yũre gamebirã, erã yũre obeodigu sãre gamebeama, arĩpũ Jesu erãre.

Setenta buherã dujarañorã

¹⁷ Pũhrũ setenta buherã mucubiriri mera dujarañorã:

—Opu, mu waĩ mera mu turari mera watẽare masaguere gua wiridorecũ erãpu guare yuhriama, arĩnorã erã Jesure.

¹⁸ Erã eroparĩcũ Jesu yuhripu erãre:

—Umarogue miariñe dijariro dopa ta watĩ ĩgu dijaricũ ĩabu. ¹⁹ Peeque. Muare yu turarire ohabu yuhu. Eropirã añare, corebare, watĩ marire ĩhaturigũre arĩpehleri ĩgu turari sãre mua tarinũgaburire muare ohabu yuhu. Eropirã erã muare ñero iimasibeama. ²⁰ Yu eropa oquerecũ ta watẽa muare erã tarinũgabiricũ ĩarã iri dihtare mucubiribita. ĩpũre mucubirique. Umarogue Goãmu yarã erã waĩre ĩgu gojaturipũgue mua waĩre ĩgu gojatura arĩcũ masirã, iripũre mucubirique mua, arĩpu Jesu erãre.

Jesu mucubiripu

Mt 11.25-27; 13.16-17

²¹ Irisubure Espĩritu Santo Jesure bũrigã mucubiricũ iipu. Eropigu Jesu õpa arĩpu ĩgu Pagũre:

—Ahu, muhu umaro majarã tauro opu, i yeba majarã tauro opu ahraa. I mu buherire “Masituhaja gua,” arĩrãre masicũ iibeaa. Mu yare masipehobirãpũre masicũ iibabu muhu. Mu eropa iicũ ĩagu “Õataria,” arãa yuhu mure. Eropa ta ahraa, ahũ. Erã masibirãpũre erã masicũ gahmeabu muhu, arĩpu Jesu.

Eropa arĩtuha gajirãre õpa arĩpu:

²² —Yu Pagũ arĩpehlerire yu iiburire apimi yũre. Yu Pagũ dihta yũre masimi. Yu dihta ĩgũre masia. Yu beyenirã sã ĩgũre masima yu masidorenirã arĩrã. Erã nucũ ta yu Pagũre masia gua, arĩpu Jesu.

²³ ĩgu eropa arĩra pũru erã seyaro erã arĩcũ Jesu ĩgu buherãre õpa arĩpu:

—I arĩpehlerire ĩarã mucubirirã ahraa mua. ²⁴ Diaye ta ahraa. Bajarã Goãmu ya weremũhtanirã, yebari majarã oparã sã dohpague mua ĩarire ĩadiariñorã erã sã. Eropirã mua peeri sãre peediarĩnorã. Erã eropa masidiaquerecũ ta Goãmu erãre masidorebiripu irisubugũre, arĩpu Jesu.

Õagu Samaria majagu queorire werẽpu Jesu

²⁵ Irisubu ta judio masare buhegu Jesu pohro eraa, Jesure ĩgu ñero wereniguicũ iidiaripu:

—Buhegu, ¿yu arĩpehlerinũri Goãmu mera arĩdiagu dohpa iigũcuri yuhu? arĩ serẽpĩpu ĩgu Jesure.

²⁶ ĩgu eroparĩcũ Jesu yuhripu ĩgũre:

—¿Dohpa arĩ irire wereri Goãmu yare erã gojarapũgue? ¿Goãmu ĩgu arĩ gojarapũguere ĩgu mera õaro arĩdiarire dohpa arĩri mu pepicũ? arĩpu Jesu ĩgũre.

²⁷ ĩgu eroparĩcũ ĩgu yuhripu:

—Ōpa arĩñumi Goãmũ: “Turaro mũ sĩporã mera, mũ turari mera, mũ ðaro guñari mera Goãmũre mahique. Eropigu mũ basi mahiro dopa ta mũ pohro árĩrã sãre mahique,” arĩ apiñumi Goãmũ marire, arĩpũ ĩgu Jesure.

²⁸ ĩgu eroparĩcũ Jesu yũhripũ:

—Diaye ta arãbũ mũhũ. Irire iique. Eropigu arĩpehrerinuri Goãmũ mera árĩgũca mũhũ, arĩpũ ĩgũre.

²⁹ ĩgu masare buhegũpũ “Ihĩ Goãmũ ya dorerire iipehogu ãhrimi,” masa ĩgũre erã arĩ pepicũ gamepũ. Eropa gamegũ ĩgu Jesure ðpa arĩ serẽpinemopũ:

—¿Noa ãhriri Goãmũ yũre mahidoregũ? arĩpũ ĩgu.

³⁰ ĩgu eroparĩcũ Jesupũ ðpa arĩ yũhripũ Samaria majagu ĩgu iirare weregũ:

—Yujunũ Jerusaléngue árĩdigũ Jericógue wagũ maha ĩgu curicũ yajari masa ĩgũre ñeañorã. Eropa ñearã ĩgu suhrirore tuwea aĩ, ĩgũre turaro pañorã. Eropa parã sĩrimerejacũ gohra duhuñorã ĩgũre. ³¹ Irisubu ta pahi iri mague aripũ. Eropa arigũ erã padigure ĩaqueregũ ta maha gajipũ masepũ ĩgũre ĩhatarigã wapũ. ³² Eropi Goãmũ wihi mohmegũ sãmojomorocũgũ pohro eja ĩgũre ĩha gajipũ masepũ tarigã wapũ. ³³ Erã eropiiquerecũ Samaria majagũpũ ero waha yoañarirogue ĩha ĩgũremojomoro ĩapũ.

³⁴ Eropigu ĩgumojomorocũgũ pohro eja, igui deco vino uyu mera morera deco mera ĩgu camire pisũpũ. Pisũtuhaja suhri gasiro mera diricãhmotapũ ĩgu camire. Tuhaja, ĩgũre ĩgu yagu burro weca duhpeo, carĩri wihigue aĩ ejarũ ĩgũre. Ero árĩgũ ĩgu Samaria majagu ðaro ĩhadibupũ ĩgũre.

³⁵ Gajinũ ĩgu carĩri wihi opũre pese niyerusere oho, ðpa arĩpũ: “Ĩre ĩhadibuque. Iseri sihabiricũ dipaturi dujarigu wajayepehogura,” arĩpũ Samaria majagu wihi opũre, arĩpũ Jesu.

³⁶ Eropa arĩtuha judio masare buhegũre serẽpipũ Jesu:

—¿Oã urerã umamojomorocũgũ pohro tarianirã nihinopũ árĩyurimojomorocũgũre mahigu? arĩpũ Jesu.

³⁷ ĩgu eroparĩcũ buhegũpũ Jesure yũhripũ:

—Mojomorocũgũre itamudigu arĩñumi ĩgũre mahigu, arĩpũ ĩgu Jesure.

—Mũ sã masare eropa ta iigu waque, arĩpũ Jesu buhegũre.

Marta, María sã pohro Jesu curipũ

³⁸ Eropi Jesu ĩgu buherã mera wacũ, gajĩ macague erã curicũ, Marta waĩcũgo erãre igo ya wihi ñajaridorepo.

³⁹ ĩgu ñajara pũhrũ igo pagũ mago María waĩcũgo ĩgu guburi pohro doa ĩgu buherire peepo. ⁴⁰ Igo eropa iicũ

ĭago Marta igo mohmeri baja árĭcũ ĭago guapo. Eropigo igo Jesure werepo:

—Opũ, ¿yũhũ yujugo ta mohmecũ yũre yũ pagũ mago igo itamubiricũ ôhari mũ ĭacũ? Iгоре yũre itamudoreque, arĭpo Marta Jesure.

⁴¹ Igo eroparĭcũ Jesu yũhripũ:

—Marta, baja mũre mohmeri árĭcũ wũaro pepia mũhũ.

⁴² Goãmũ ĭgũ yare peedoremi. María ôarire iibo irire beyemo. Eropigũ yũre igo peecũ, “Mohmetamugo waque,” arĭbeaa igore, arĭpũ Jesu Martare.

11

Jesu Goãmũre serēburire buhepũ

Mt 6.9-15; 7.7-11

¹ Yujunũ Jesu ĭgũ Pagũre Goãmũre serēgũ iipũ. ĭgũ serētuhacũ yujugũ ĭgũ buherã mera majagũ ôpa arĭpũ:

—Opũ, Ñũ ĭgũ buherãre ĭgũ buhediro dopa ta Goãmũre serērire gũa sãre buheque mũhũ, arĭpũ ĭgũ Jesure.

² ĭgũ eroparĭcũ peegũ Jesu erãre werepũ:

—Ôpa arĭ Goãmũre serēque: “Gũa Pagũ, mũaro majagũ mũhũ ôagũ ãhraa. Dohpaguere árĭpehrerã weca opũ ãhraa. Ũmaroguere mũ dorero erã iiro dopa ta i yeba majarã sã iiporo. ³ Eropigũ mũmũri nũcũ gũa baburire oniguicãque gũare. ⁴ Gajirã erã gũare ñero iirare gũa cãdijiro dopa ta mũ sã gũa ñero iirare cãdijique. Eropigũ gũa ñeri iiborare cãhmotaque. Gũa ñeri iiborare tauque,” arĭ serēque Goãmũre, arĭpũ Jesu erãre.

⁵ Pũhrũguere ĭgũ buherãre ôpa arĭ buhepũ werenigui queori mera:

—Yujugũ ñami deco ĭgũ acaweregũ wihigue waha, ĭgũre serēpũ: “Acaweregũ, mũreru pan dipure oque yũre. ⁶ Gajigũ yũ acaweregũ curigũ aridigũ dohparagã yaha wihi erami. Eropiro ĭgũre yũ oburi mara,” arĭpũ ĭgũ ĭgũ acaweregũre.

⁷ ĭgũ eroparĭcũ ĭgũ acaweregũ wihi pohecague árĭgũ yũhripũ: “Yũre garibobita. Disiporo bihadiro ãhraa. Yũhũ, yũ porã mera carĭgũ iiaa. Wahgãro bejabirica yũre mũre barire obudi,” arĭpũ ĭgũ acaweregũ. ⁸ ¿Dohpa warocuri serēgũpũre? Diaye arãa mũare. ĭgũ acaweregũ árĭqueregũ ta barire obudigũ wahgãbiripũ. ĭgũ eropa wahgãdiabiriquerecũ ta bari serēgũpũ gũhyasĩribigũ ĭgũ yoari boje serēniguicũ árĭpehreri ĭgũ serēro dopa ta pũhrũ wahgã ogũcumi. ⁹ Eropigũ ire mũare weregũ iiaa: Goãmũre mari Pagũre serēque. Eropa serērã mũa serērire bocarãca.

Goãmure eropa serēniguicāque. Mũa eropa iicũ ĩgu ogucumi. ¹⁰ Árĭpehrerã Goãmure serērã aĩrãcoma. Eropirã erã serērare bocarãcoma. Eropigu árĭpehrerã Goãmure eropa serēniguirãre ĩgu erãre ogucumi.

¹¹ “¿Mũa porã mũare erã pan serēcũ utāyepure obocuri mũa? Obiriboya. ¿Erã mũare erã waire serēcũ añapure obocuri erãre? Obiriboya. ¹² ¿Eropirã mũa porã cãreña diuri serēcũ corebapure obocuri mũa? Obiriboya. ¹³ Mũa ñerã árĭquererã ta mũa porãre òarire omasia mũa. Eropigu Goãmupũ mũa tauro òarire ohomi mũare. ĩgu mari Pagũ umaro majagu ĩgu Espíritu Santore ogucumi ĩgure serērãre, arĭpũ Jesu ĩgu buherãre.

—*Jesu watĩ turarire opami, arĩ weresãñorã masa*
Mt 12.22-30; Mr 3.20-27

¹⁴ Irisubure Jesu watĩre cóãgu iipũ. Watĩpũ werenigui-masibigu árĭcũ iipũ masure. Eropigu watĩ masure Jesu cóãcũ masupũ wereniguinugapũ. ĩgu wereniguicũ peerã masa bajarã ĩhamaria wañorã. ¹⁵ Erã eropa ucaquerecũ ta gajirãpũ òpa arĩñorã:

—*Īhĩ Jesu watẽare cóãgu Beelzebú waĩcugu watẽa opũ ĩgu turari mera cohãmi, arĩñorã gajirã.*

¹⁶ Gajirã “Mũhu Goãmũ ĩgu obeodigu árĭgu Goãmũ turari mera deyro moarire ii ĩhmuque guare,” arĩriñorã. ¹⁷ Erã eropa dorecũ peegu erã pepirire masigu, erãre òpa arĩ werenigui queori werepũ Jesu:

—*Watĩ ya turari mera watẽare cóãbeaa yũhũ. Yuju maca majarã erã basi gamequeãrã, iri maca majarã pehrea wabocoma. Eropirã yuju wihi majarã erã basi gamequeãrã, iri wihi majarã pehrea wabocoma. ¹⁸ Eropigu Beelzebú watẽa opupũ ĩgu turari mera ĩgu watẽare yũre cóãdoregu ĩgu basi ĩgu yarãre cóãbocumi. Eropirã erã sã wapehrea waboñuma. Mũa yũre òpa arãa. “Īgu Beelzebú turari mera watẽare cohãmi,” mũa yũre arĩ weresãa. ¹⁹ Mũa mera majarã sã watẽare cohãma. Eropirã erã “Beelzebú ĩgu turari mera erãre cohãa,” arĩbeama. “Goãmũ ĩgu turari mera watẽare cohãa,” arĩma. Eropirã mũa yũre “Watĩ turari mera watẽare cohãmi,” mũa arĩra diaye árĭbircũ mũa mera majarã wererãcoma. ²⁰ Eropigu yupũ watẽare cóãgu Goãmũ ĩgu Espíritu Santo turari mera iiaa. Yũ eropa cóãcũ ĩarã òpa arĩ masirãca mũa: “Goãmũ ĩgu opũ árĭri i yebaguere árĭtuhaja dohpaguere,” arĩrãca, arĭpũ Jesu.*

²¹ —*Watĩ turagu tarinugari werediacũ òpa ãhraa, arĭpũ Jesu. —Wihi opũ turagu ĩgu moja mera ĩgu wihire ĩhadibucũ ĩgu yare gajirã aĩmasibeamã. ²² ĩgu eropa*

ĩhadibuquerecũ ta gajigu turatarigu ĩgure gamequeã, ĩgure tarinũga, ĩgu mojore emacã, ĩgu yare aĩcã gajirãre gueremi. "Watĩ turagu arĩquerecũ yũhũ turatariagu aħraa," arĩgu iipũ Jesu i queori mera. ²³ Yujugu yũre gamebigu yũre ĩhaturigu aħrimi. Yujugu yũre itamubigu yũre teboricacũ iigu iimi, arĩ buhepũ Jesu.

*Watĩ dipaturi masũguere ñajara queorire werepũ Jesu
Mt 12.43-45*

²⁴ Eropigu ĩgu dipaturi werenigui queori mera õpa arĩ buhepũ:

—Yujugu watĩ masũ mera arĩdi waha deco mariri yeba cuhri, ĩgu sooborore amaripũ. Eropa bocabigu õpa arĩ pepipũ: "Masũ yũ cóãdi mera dipaturi arĩgu wagũra," arĩ pepipũ ĩgu. ²⁵ Eropa arĩgu ĩgu dujaa waha, ĩgu cóãdigure ta masũre bocapũ daja. ĩgure bocaboro core masũpũ õagu ñeri marigu arĩpũ. ²⁶ Eropigu watĩ gajirã siete watẽare ĩgu tauro ñerãre sihugu wapũ. ĩgu eropa sihucũ erã arĩpehrerã watẽa masũ mera arĩñorã. Eropigu masũpũ ero core yujugu watĩre opagu ñetariagu arĩripũ. Dohpaguepũre bajarã watẽare opagu arĩgu, ero core ĩgu arĩdiro tauro ñegũ dujarũ, arĩpũ Jesu.

Jesu mucubirire werepũ

²⁷ Irire ĩgu eroparĩcũ masa watope arĩgo Jesure arĩpo busũro mera:

—Mũre porãcũdigo, mũre mihudigo mucubirigo aħrimo, arĩpo Jesure.

²⁸ Igo eropa arĩtuhacũ peegu Jesu igore yũhripũ:

—Goãmũ wereniguirire peerã ĩgu dorerire iirãpũ erã arĩrãcoma mucubirĩrã, arĩpũ Jesu igore.

Masa ñerã Jesure Goãmũ turari mera deyoro moarire iidoreriñorã

Mt 12.38-42; Mr 8.12

²⁹ Eropi bajarã masa Jesu pohro erã eracũ, ĩgu erãre werenemopũ:

—Dohpague majarã ñerã aħrima. Yũ diaye arĩgu arĩcũ mũa masidiarã Goãmũ turari mera deyoro moarire iidoreeraa yũre. Mũa eropa dorequerecũ ta Jona iribojegue majagu ĩgu iira dihtare ii ĩhmugũcumi Goãmũ masare. ³⁰ Jona Goãmũ yare weremũhtadigu arĩgu ĩgu Ninive majarãre ĩgu masicũ iidiro dopa ta yũhũ Goãmũ ĩgu obeodigu masicũ iiaa dohpague majarãre. ³¹ Dipuwaja moarinũ arĩcũ iribojegue majago opo bũro sur majago bũro igo bũro wahgãnũga mũare dohpague majarãre weresãgocumo. Igo Salomo opũ ĩgu masirire peediago yoarogue aridigo

Salomore peego aripo. Dohpaguere mua watopere Salomo tauro masigu āhrraa. Yuhu mua mera árĩquerecũ mua yu masirire peediabeaa. Mua eropa peediabirira waja igo opo buro muare “Ñerã āhrrima,” arĩ weresãgocumo. ³² Eropa ta dipuwaja moarinu árĩcũ Ninive maca majarã mura sã muare dohpague majarãre “Ñerã āhrrima,” arĩ weresãrãcoma erã. Jona erãre Goãmu yare igu werecũ peerã, erã ñerire bujawere, ðarire gohrotonirã árĩñorã erãpu. Dohpaguere mua watopere Jona tauro árĩgu āhrraa yuhu. Yuhu Goãmu yare werequerecũ mua ñero iirare bujawerebeaa. Eropirã Ninive majarã mura muare ñerire bujawerebirãre weresãrãcoma, arĩ werepu Jesu.

Masa erã pepiro dopa iima, arĩ werepu Jesu

Mt 5.15; 6.22-23

³³ Eropigu buhenemogu ðpa arĩpu erãre:

—Masa sihãgodirure sihãgorã dibubeama. Irirure sihãgorã mátasoro docague dibubeama. Irirure umarogue duhpeomi wihigue ñajarirã erã iha ñajama ðaro. ³⁴ “Mari cuiri mari dupure sihãgodiru iro dopa ta āhrraa,” arĩ werediacũ ðpa āhrraa. Mua pepiro dopa ta iiaa. Mua ðaro mera pepirã árĩrã ðarire iiaa. Mua ñero pepirã árĩrãpu ñeri dihtare iiaa. ³⁵ Eropirã ðaro iique. Mua pepirigue ñero árĩbircãporo. ³⁶ Tuhaja mua pepirigue ðari árĩcũ, ñeri ne maricũ ðari dihtare pepirãca. Mua pepirigue ðari árĩcũ mua ðarire iirãca, arĩ buhepu Jesu.

Fariseo masare, judio masare buherã sãre Jesu tuhri werepu

Mt 23.1-36; Mr 12.38-40; Lc 20.45-47

³⁷ Jesu igu buhetuhajacũ iagu fariseo masu igure igu ya wihigue badoregu sihupu. Eropigu Jesu igu ya wihigue ñaja, erã baro erã mera doajapu. ³⁸ Igu eropa doajacũ fariseo masupu Jesure ihanurugu judio masa mojo coenigu-iro dopa ta igu mojo coebircũ iagu ðpa arĩ pepipu: “Cuena. ¿Ihĩ duhpigu gua iro dopa mojo coebeari?” arĩ pepipu. ³⁹ Igu eropa arĩ pepicũ masigu Jesu igure werepu:

—Mua fariseo masa mua dorero dopa ta mua ihririparire, soropari sãre mua coeweaa mua ðarire iirire ii ihmudiarã. Eropa coequererã ta mua siporãripure coebeaa. Eropirã mua árĩricuri mua pepiripure ne ðarire gohrotobeaa. Mua pepiriguere gajirã yare yajadiarire ñeri dihta āhrraa. ⁴⁰ Pee masibirã āhrraa mua. Goãmu mua dupure iigu muare pepiri sãre iipu. ¿Irire masibeari mua? ⁴¹ Eropirã mua Goãmu ya árĩburire iidiarã mua pepirire ðarire gohrotomuhtaque. Mua eropa iira puhru ðarire iirã árĩrãca.

42 “M̄ua fariseo masa ñero tarirāca. Bari ōaro s̄uriburi sarire aĩ deara p̄hr̄u diez quēri iiaa. Tuhaja yujuquē ta Goām̄u wihigue aĩgā apia Goām̄u dorero dopa ta. Eropa iri dorerire iiquererā ta diaye iirire, Goām̄ure gamerire m̄ua ne guñabeaa. D̄ucare m̄ua aĩrare merogā Goām̄u wihire apicū ōhaa. Eropa iirā ōpa iinemoque: Diaye iirire, Goām̄ure gameri sāre iique m̄ua.

43 “M̄ua fariseo masa ñero tarirāca. Buheri wihigue árĩrā ōari doari dihtare gahmea m̄ua. Doberi duarogue masa m̄uare ōaro umupeori mera bocatĩri serēcū gahmea m̄ua.

44 “M̄ua judio masare buherā, fariseo masa sã m̄ua guyaricurā āhraa. Ñero tarirāca m̄ua. Masa gobe dibura gobe iro dopa ta āhraa m̄ua. Iri gobe pohro masa tarigārā pohecague boanirā árĩcū masibeama. Eropa ta masa m̄ua pohro árĩrā m̄ua pepirigue ñeri árĩcū masibeama erā, arĩp̄u Jesu erāre.

45 Īgu eroparĩcū peegu judio masare buherā mera majagu Jesure werep̄u:

—Buhegu, irire arĩgu, gua sāre ñero arĩgu iica m̄uh̄u, arĩp̄u Īgu Jesure.

46 Īgu eroparĩcū Jesu ȳhrip̄u:

—Diaye ta āhraa. M̄ua masare buherā sã ñero tarirāca. M̄ua gajirāre erā bocatĩubiririre iidorea erāre. Eropa dorequererā m̄uap̄u erāre ne merogā itamubeaa iri dorerire erā iiboro dopa.

47 “Eropirā m̄ua ñero tarirāca. Goām̄u yare werem̄htanirā m̄ura ya masa goberire ōaro amuraa m̄ua erāre umupeoro dopa ta iirā. M̄ua eropa iiquerecū ta iribojegue majarā m̄ua acawererāp̄u erāre wejēñuma. 48 Erāp̄u Goām̄u ya werem̄htanirāre erā wejēdiro dopa ta m̄ua sã iiboya. Eropirā dohpaguere erā masa goberire amuraa m̄ua. Eropa amurā m̄ua acawererā erāre wejērare guñaa m̄ua. Erā eropa wejērare guñarā “Ōaro iinuma,” arĩraa m̄ua, arĩp̄u Jesu.

49 “Eropigu Goām̄u Īgu masiri mera ōpa arĩ wereyuñumi: “Yahare werem̄htamorāre ȳu buherire buhem̄htamorā sāre obeogura erāre. Eropirā erā ȳu obeorāre gajirāre wejē, gajirāre ñero iirācoma,” arĩyuñumi Goām̄u, arĩp̄u Jesu. 50-51 I yebare Goām̄u ĩhacūnugura p̄hr̄u Caĩp̄u Abelre wejēñumi. Ero p̄hr̄u Goām̄u yare werem̄htanirāre wejēñuma. P̄hr̄u Zacariare m̄ua acawererā m̄ura ta ĩgure wejēñuma. Īgu Goām̄u wihi pohro Goām̄u ya árĩburire waimurā soeburi mesa pohro árĩcū m̄ua acawererā ĩgure wejēñuma. Árĩpehrerā erāre erā wejēra dipuwaja dohpague majarā dipuwajacurācoma.

Eropa ta āhraa. Mũare ta arĩgu iiaa. Árĩpehrerã erãre erã wejẽra dipuwajare dohpague majarãre Goãmũ dipuwaja moagũcumĩ.

⁵² “Mũa masare buherã, mũa ñero tarirãca. Goãmũ masirire ĩgu gojarare opaquererã ta gajirãre werebeaa mũa. Mũa basi Goãmũ yare peebeaa. Eropirã gajirã ĩgu yare erã peediaquerecũ ta irire mũa erãre peedorebeaa, arĩpu Jesu erãre.

⁵³⁻⁵⁴ ĩgu eroparĩcũ peerã judio masare buherã, fariseo masa sã ĩgu mera guarã ĩgure ñero werenĩguĩnorã. Eropirã Jesu ĩgu ñero arĩ yũhricũ peediarã, erã serẽpinũrũnorã ĩgure weresãdiarã.

12

Erã gũyarire Jesu werepu

¹ Eropĩ Jesu pohro masa bajarã gohra gamenereñorã. Cũhña taricãyoro. Ero Jesu ĩgu buherãre õpa arĩ werepu:

—Õaro guña masique mũa. Fariseo masa erã pan bugacũ iiburire ĩarã õaro masique. Erã gũyarire weregu iiaa.

² Masa erã yayasãrare pũhrũ masirãcoma. Erã dibura sãre gajirã masirãcoma. ³ Eropiro gajirã peebiroque mũa werenĩguirare õaro masicũ Goãmũ weregũcumĩ. Bihara taribugue gajigure erã yayarogã erã arĩrare masa bajarã watope masicũ iigũcumĩ Goãmũ.

Masa erã gũibure werepu Jesu

Mt 10.26-31

⁴ Eropigu Jesu werenemopũ erãre:

—Diaye arĩgu iiaa mũare. Masure wejẽrã wejẽtuha dipaturi erã wejẽdigure ñero iimasibeama. Eropirã mũare wejẽdiarãpũre gũibiricãque. ⁵ Dohpaguere mũa gũibure mũa umupeobure weregura. Goãmũpũre gũĩ umupeoque. ĩgu mũa sĩrira pũhrũ peamegue cóãmasimi mũare. Eropa ta āhraa. Diaye arĩgu tiiaa. Goãmũpũre gũĩ umupeoque.

⁶ Cinco mirua waja marima. Eropa waja mariquerecũ ta erãgãre Goãmũ ĩhadibumi. Ne cãdijibeami erãre. Mirua tauro Goãmũ ĩhadibumi mũapũre. ⁷ Eropigu mũa poari sãre ne yuju poadagã dũhyaro mariro masipehomi Goãmũ. Eropa ta mũa arĩricuri sãre masipehomi. Eropa masigu mũare ĩhadibuniguicãmi. Miruare ĩgu mahiro tauro mũapũre mahimi Goãmũ. Eropirã ĩgure umupeorã gũibiricãque mũa, arĩpu Jesu.

Jesure mũa umupeorire wereque masare, arĩpu Jesu

Mt 10.32-33; 12.32; 10.19-20

⁸ Eropĩ Jesu werenemopũ:

—Mũare arĩgu iiaa. Yujugu “Jesu yagu āhraa,” masare ĩgu arĩ werecũ ĩagu yũhu Goãmũ ĩgu obeodigu sã “Ĩgu yahagu āhrimi,” arĩgũca Goãmũ yarã anyuare. ⁹ Yujugu masare güigu yũre “Jesucristore masibea,” masare arĩ weregure yũ sã “Ĩgure masibea,” arĩ weregũca anyuare.

¹⁰ “Yũ masure Goãmũ ĩgu obeodigure ñero arĩ erã wereniguicũ iri ñerire Goãmũ cãdijimasimi. Eropa cãdijiqueregu ta Espĩritu Santopare erã ñero arĩ wereniguicũ irire ne Goãmũ cãdijisome.

¹¹ “Mari buheri wirigue oparã pohro gajirã mũare aĩ ñaja weresãrãcoma. Erã eropa weresãcũ mũa arĩ cãhmotaburire ne wũaro pepibircãque. ¹² Irisubu ta Espĩritu Santo mũa wereburire mũare weregũcumi, arĩpu Jesu.

Doberi opũ queorire werepu Jesu

¹³ Eropi masa watope arĩgu Jesure õpa arĩ werepu:

—Buhegu, gua pagu ĩgu sĩrira pũru ĩgu ya arĩra guare dujaa. Eropigu yũ tĩgure irire yũ sãre queoro dũca wadoreque, arĩpu ĩgu Jesure.

¹⁴ ĩgu eroparĩcũ Jesu yũhripũ:

—Ne irinore dũca wabuno arĩbeaa yũhu, arĩpu Jesu ĩgure.

¹⁵ Eropa arĩtuha Jesu arĩpehrerãre werepu:

—Õaro iique mũa. Doberire, gajino sãre gametari-bircãque. Baja opaquererã ta iri mera ta mucubirituha-jabea mari, arĩpu Jesu.

¹⁶ Eropa arĩtuha Jesu erãre i queori mera werepu:

—Doberi opũ õari yebare oparũ. Eropiro iri yebare ĩgu oteri õaro dũcacũyoro. ¹⁷ Eropigu ĩgu, ĩgu basi õpa arĩ pepiripũ: “Iri dũca yũhu diburi wihire ne sihajosome. ¹⁸ Dohpaguere õpa iigũra. I wihi dohpague yũ dibumũhtara wihire cóãcã, dohpague mũra wihi tauro mama wihipũre wũari wihi iigũra. Iri wihire yaha oteri dũcare, arĩpehrerire dibugũra. ¹⁹ Yũ eropa iira pũru õpa arĩ pepigũra yũ basi: ‘Yũ arĩpehreri opagu āhraa. Õaro soogũra. Eropigu baha, ihri, mucubirigũra,’ arĩ pepigũra yũ basi,” arĩ pepiripũ ĩgu basi. ²⁰ ĩgu eropa arĩ pepiquerecũ Goãmũ ĩgure werepu: “Mũhu ne pee masibigu āhraa. Dohpagã ñami ta mũhu sĩrigũca. Mũ eropa wacũ mũ ya mũ mahira dederea waroca mũre,” arĩpu Goãmũ ĩgure, arĩpu Jesu masare.

²¹ Irire arĩgu masare õpa arĩ werepu Jesu:

—Eropa ta warãcoma doberi oparã erã Goãmure guñabirã. Baja doberire, niyerure erã ya arĩburi dihtare

diburã, Goãmure guñabirã erã mojomorocurã iro dopa árĩrãcoma erã Goãmũ ĩgu ĩacũ. Eropigu Goãmũ erãre ĩhasuabeami, arĩpu Jesu.

Goãmũ ĩgu porãre ĩhadibumi, arĩpu Jesu

Mt 6.25-34

²² Eropi Jesu ĩgu buherãre õpa arĩ werepu:

—Ire mũare arĩgu iiaa: Mũa barire, suhri sãre wũaro guñaricubiricãque. ²³ Goãmũ mũare deyoro moagu bari dihtare bamorãre suhri sañamorã dihtare iibiriĩnumi mũare. Mũa iri dihtare guñacũ gamebeami. ²⁴ Mirimagũ porãre Goãmũ ĩgu ĩhadiburire masique. Erã poeri moorã àhriima. Eropiro erã bari dihuri wiri erãre mara. Goãmũpu erãre erã baburire ohomi. Mirimagũ porã tauro mũapũre mahimi Goãmũ. Eropigu mũa sãre ĩhadibugũcumĩ ĩgu. ²⁵ Wũaro mũa pepiri mera iri mũare pagarã wacũ iibea. Eropiro mari wũaro pepiri duhpiburi árĩbeaa. ²⁶ ¿Eropirã wũaro mũa pepiri duhpiburi árĩbiriquerecũ ta, duhpirã mũa baburire, mũa ihriburire, mũa sañaburire wũaro guña bujawere pepiri mũa?

²⁷ “Nũgu maja gorire pepique. Iri gori ne iiro mariro õari goricua. Iri gori õari suhri iro dopa õari gori dehyoa. Salomo opu mũru õari suhri opagu ĩgu árĩquerecũ ta iri goripu ĩgu ya suhri tauro õari dehyoa. ²⁸ Iri gorire õari gori gocũ iimi Goãmũpu. ĩgu eropa iiquerecũ ta iri goripu bajamenurigã árĩra pũhrũ ñaidija pehrea wahaa. Merogã àhri gajinu peamegue soe cóacãma. Iri eropa mata pehrequerecũ ta iri gorire iri õari gori árĩcũ iimi Goãmũ. Eropigu Goãmũ iri gorire ĩgu õari gori árĩcũ ĩgu iidiro dopa ta tauro mũa sãre õaro iigũcumĩ. Suhrire ogũcumĩ. Daberogã Goãmũre umupeoa mũa. ²⁹ Eropirã mũa baburire, mũa ihriburire wũaro guñabiricãque. ³⁰ Goãmũre masibirãpu i yeba majarãpu irire eropa amaniguicãma. Mari Pagu mũmaro majagu árĩpehreri mũa gamerire masimi. ĩgu eropa masicũ mũa ya árĩburire wũaro guñabiricãque. ³¹ Goãmũ mũa opu ĩgu árĩborore gamemũhtaque mũa. Mũa eropa iira pũhrũ Goãmũpu mũa gameri dahyacũ ogũcumĩ, arĩpu Jesu.

Umarogue mari baja opaa, arĩ masia mũa, arĩpu Jesu

Mt 6.19-21

³² Eropigu erãre werenemopũ:

—Yũ mahirã, bajamerãgã árĩquererã güibiricãque mũa. Goãmũ ĩgu opu árĩrore ĩgu mera mũa árĩcũ gahmemi ĩgu. ³³ Eropirã mũa yare duapehoque. Irire duacã, iri niyerure mojomorocurãre oque. Eropirã mũmaro maja Goãmũ ya árĩburire mohmeque. Eropa iirã mũmaro maja mũa wajatari

ne pehresome. Ʋmarogue mũa ya árĩri ne pehrebeaa. Eroguere mũa yare aĩmasibeami yajari masũ. Eropirã mega sã irire tuamasibeama. ³⁴ Ʋmarogue mũa ya árĩcũ Goãmũ ya dihtare pepirãca mũa, arĩpũ Jesu.

Jesu ĩgu dujariborore coredorepũ ĩgu yarãre

³⁵⁻³⁶ Eroparĩtuhaja erãre werenemopũ daja:

—Mũa yare amuyunirã iro dopa árĩrã yahare eropa iiniguirã árĩrã coreque yũ dujariborore. Mohme corerã erã opũ mojoto diriri bosenugue ĩgu wacũ ĩgu dujariborore erã cohrema. Erã eropa corero dopa ta yũ dujariborore coreque mũa sã. Opũ ĩgu ya wihigue eraa, disiporore ĩgu dotecũ peerã erã mata pãgũ acuma ĩgure. ³⁷ Mohme corerã erã opũ eracũ ĩgu gamero dopa ta iiyurã árĩrã mucubirirã árĩrãcoma. Erã eropa iicũ ĩagu erã opũpũ mohme coregu iro dopa gohrotogũcumi. Eropigu mohme corerãre doadore, ĩgu erãre barire duhpeogũcumi. ³⁸ ĩgu erarisubu ñami deco árĩcũ, o boyorogue árĩquerecũ mohme corerãpũ ĩgu erarisubure ĩgure ðaro corerã árĩrã, mucubirirã árĩrãcoma erã. ³⁹ Ire guñaque mũa. Wihi opũ yajari masũ ĩgu eraborore masigu, ĩgu yajari masure coregu ñajadorebiriboñumi. ⁴⁰ Eropirã mũa sã coreque. Yũhũ masũ Goãmũ ĩgu obeodigu guñaña mariro arigũca. Eropirã yahare eropa iiniguirã árĩrã yare coreque mũa, arĩpũ Jesu erãre.

Gajigu mohme coregu ĩgu opũre ĩgu umupeopũ. Gajigupũ umpeobiripũ, arĩ werepũ Jesu

Mt 24.45-51

⁴¹ ĩgu eroparĩcũ Pedropũ serẽpipũ Jesure:

—Opũ, ¿i queorire weregu guare arĩgu iiri? ¿O arĩpehrerãre eropa arĩri? arĩpũ Pedro.

⁴² ĩgu eroparĩcũ Jesu werenigui queoriñe mera ðpa arĩ buhepũ erãre:

—Mohme coregu ĩgu opũre umupeogu pee masigu ðpa ta àhrimi. Opũ curigu wagu, mohme coregure ĩgu wihire apimi. ĩgu apigupũ doregu árĩgũcumi. Eropigu barisubu árĩcũ gajirã mohmeri masare barire gueremi. ⁴³ Eropigu opũ ĩgu ya wihigue dujarami. ĩgu opũ eracũ mohme coregupũ ĩgu opũ ĩgu dorediro dopa ta iipehodigu árĩgu, ĩgu mucubirigu árĩgũcumi. ⁴⁴ Diaye arĩgu iiaa mũare. ĩgu eropa iicũ ĩagu ĩgu opũ arĩpehreri ĩgu yare ĩhadibugu apigũcumi ĩgure daja. ⁴⁵ Ñegu mohme coregupũ ðpa ta àhrimi. “Yũ opũ yoja deyobeami,” arĩmi. Eropa arĩgu gajirã mohme corerãre umare, nome sãre pami. Eropigu wũaro baha, ihri, meremi. ⁴⁶ ĩgu eropa iirisubu

guñaña mariro ĩgu opu dujaragucumi. ĩgu dujararinure ne masibeami mohme coregu. Eropa dujaragu ñegu ĩgu iirare pee ĩgure ñero dipuwaja moagucumi. Eropigu Goãmure tarinuganirãre ĩgu cóãdiroque ĩgure cóãgucumi.

47 “Eropigu mohme coregu ĩgu opu gamerire masigu áriqueregu ta irire ĩgu iibiricũ, ĩgu ðaro ĩgu mohmibiricũ, ĩgu opupu ĩgure burigã dipuwaja moa pagucumi ĩgure. 48 Gajigu mohme coregupu ĩgu opu gamerire masibigu áricũ ĩgu opupu ĩgure daberogã ñari ĩgu eropa árii dipuwajare pagucumi. Goãmũ ĩgu gamerire masicũ iimi masare. Eropiro masigure yuhriro gahmea. Eropiro ðaro masigure ðaro yuhriro gahmea, arĩpu Jesu.

Jesu masare game dũca waricũ iimi

Mt 10.34-36

49 Eropa arĩtuha Jesu erãre wereru daja:

—Peame soewearo dopa ta yuhu i yebare masa erã ñero iirire cóãgu arigu iibu. Dohpague ta masa arĩpehreri ñeri marirã áricũ burigã gahmea yuhu. 50 Yuhu ñero tariguca. Yu eropa ñero tariburire coregu, ñero siporãcua yuhu. 51 ¿Dohpa arĩ pepiri mua yure? Yuhu i yebaguere buhegu aricũ yu buheri mera “Masa ĩhaturisome pare,” ¿arĩ pepiri mua? Eropa arĩbeaa. Mũare arĩgu iiaa. Masa yu buherire peerã, pe curu erã basi game dũca warirãcoma. Yujurãyeri yu buherire peerãcoma. Gajirãpu irire gamebirã erãre ĩhaturirãcoma. Eropirã yujuro mera arĩsome masa. 52 Eropirã yuju wihi majarã sã cinco masa yu buherire peerã, pe curu erã basi game dũca warirãcoma. Yuju curu urerã, gaji curu perã arĩrãcoma. 53 ĩgu pagu ĩgu magure ĩhaturigucumi ĩgu yaha buherire peecũ. Gajigu magu sã ĩgu pagure ĩhaturigucumi. Eropigo igo pago igo magore ĩhaturigocumo. Gajigo mago sã igo pagore ĩhaturigocumo. Eropigo igo mũñeco igo bepre ĩhaturigocumo. Gajigo bepo sã igo mũñecore ĩhaturigocumo. Eropa warãcoma yaha buherire erã peecũ, arĩpu Jesu.

Jesu “Mũa yu iirire ĩaquererã yure masibea,” arĩ wereru Jesu masare

Mt 16.1-4; Mr 8.11-13

54 Eropi Jesu masare bajarãre ðpa arĩ wereru daja:

—Abe ñajarogue imica cururi ĩarã, “Mata deco ariroca,” arãa mua. Mũa eropa arĩra puhru deco ahraa. 55 Eropirã surgue miruñe aricũ “Asirinũ áriroca,” arãa mua. Mũa eropa arĩra puhru irinu asia. 56 Mũa guyaricurã ahraa. Yebare ĩarã, umarore ĩarã “Õpa waroca,” arĩ masia mua. Õarinũ arĩborore, ñerinũ arĩboro sãre masia mua. ¿Eropa

õaro masiquererã ta, duhpirã dohpague yu Goãmũ turari mera yu mũare ãhmuquerecũ ta ne irire õaro masibeari mũa? arĩpũ Jesu.

Mũare ãhaturigu mera mũa gamequeãrãre mũa basi amique, arĩ wererũ Jesu

Mt 5.25-26

⁵⁷ Eropa arĩtuhaja õpa arĩ werenemorũ:

—¿Mũa diaye iiburire masibeari mũa dohpa? ⁵⁸ Gajigu mũre weresãgu wagu dipuwaja moadoreri wihigue wadorebocumi. Erogue ejaboro core “Dipaturi mũre eropa iisome,” arĩ game amique. Mũhũ ãgũre amubiricũ mũre ãgu dipuwaja moadoreri wihigue aĩgãbocumi mũre. Eropigu dipuwaja moadoregũpũ mũre surarare ãgu wiacũ, mũre surara peresu iirãcoma. ⁵⁹ Mũre arĩgu iiaa. Ne erã wajayedorerare mũ wajayepohocũgue wirigũca mũhũ, arĩpũ Jesu.

13

Mũa ñeri iirare bujawere, õarire gohrotoque, arĩ buherũ Jesu

¹ Irisubure bajamerãgã masa Jesure õpa arĩ wereñorã:

—Galilea majarã Goãmũre waibũgũre wejẽ, erã soe muju umupeorisubu Pilatorũ erãre wejẽpũ. ãgu eropa wejẽcũ waibũgũ di mera masa di morera wayoro, arĩ wereñorã erã Jesure.

² Erã eropa weretuhajacũ Jesu yũhrĩpũ:

—¿Galilea majarã Pilato ãgu wejẽnirã mũrãre dohpa arĩ pepiri mũa? ¿Erã eropa sĩrirã gajirã Galilea majarã tauro ñerã arĩra dipuwaja sĩriyuri? ³ Arĩbeaa. Mũare arĩgu tiiaa. Mũapũ ñerire bujawerebirã, õaripũre gohrotobirã, mũa sã sĩrirã peamegue warãca. ⁴ Eropirã sohõ arĩnirã diez y ocho masa Siloé waicũri wihi umari wihi erã weca yuribeja wejẽpehoyoro. ¿Eropa wa sĩrirã gajirã Jerusalén majarã tauro ñerã arĩra dipuwaja sĩriyuri mũa pepicũ? ⁵ Arĩbeaa. Mũare arĩgu tiiaa. Mũa ñerire bujawerebirã õaripũre gohrotobirã, mũa sã sĩrirãca. Eropirã peamegue warãca, arĩpũ Jesu erãre.

Higueragu dũca maridigu queorire wererũ Jesu

⁶ Eropa arĩtuhaja, Jesu i queori mera wererũ erãre:

—Pohe opũ ãgu pohegue ãgu higueragũre opapũ. Eropigu ãgu irigu dũcare amagu waripũ. Vocabiripũ. ⁷ Vocabiriniyagu ãgu iri pohe mohmegũre wererũ. “Peeque yũre. Uhre bojori gohra higueragu dũcare amaraa. Dũca mara. Irigu dũca maricũ irigũre pa cóãcãque. Irigu

yaha pohe árĩcũ gajigure otemasibea,” arĩpũ pohe opũ mohmegũre. ⁸ Īgũ eroparĩcũ peegũ mohme coregũ òpa arĩpũ: “Opũ, irigũ yuju bojori gohra niguiniporo. Yũhũ irigũ gubuyere seatu nujatu iigũra. Tuhaja waibũgũ gũra mera iri gobere yaagũra. ⁹ Yũ eropa iira pũhrũ irigũre gaji bojori dũcacũcũ òaroca. Dũca maricũ mũhũ padoregũca,” arĩpũ mohme coregũ pohe opũre, arĩ werepũ Jesu.

Sabadonũ Jesu dorecũgore òago iipũ

¹⁰ Irisubure Sabadonũ Jesu judio masa buheri wihigue buhegũ iipũ. ¹¹ Ero pũriri dorecũgo diez y ocho bojori gohra pũriri dorecũgo árĩpo. Eropigo opatũ niguigo árĩgo, diaye niguimasibiripo. ¹² Igo eropa árĩcũ ĩagũ Jesu igore ĩha, piyupũ:

—Noméo, mũ dorecũri pehrea wahabũ, arĩ piyupũ Jesu.

¹³ Īgũ piyura pũhrũ igore ĩgũ mohmepicũ mata igo diaye niguigo wapo. Eropa wago “Goãmũ turagũ, òagũ āhrimi,” arĩ Goãmũre umupeopo igo. ¹⁴ Jesu igore Sabadonũ árĩcũ ĩgũ òago igore iicũ ĩagũ iri buheri wihi opũpũ ĩgũ mera guarũ. Eropa guagũ ĩgũ masare òpa arĩpũ:

—Seis nũri āhraa mari mohmerinũri. Eropirã mũa dore òarã árĩdiarã irinũrire taudorerã arique. Sabadonũre mari soorinũre irire iibiricãro gahmea, arĩpũ wihi opũ.

¹⁵ Īgũ eroparĩcũ Jesu òpa arĩ yũhrĩpũ:

—Mũa gũyaricũrã āhraa. Mũa wecũare, burro sãre oparã Sabadonũ árĩquerecũ erã diriradare pã, erãre aĩ buha ihridorea. ¹⁶ Dohpague igore Abrahã mũrũ acaweregore watĩ diez y ocho bojori gohra igore dorecũcũ iimi. ¿Sabadonũ árĩcũ igore òago iidorebeari mũa? arĩpũ Jesu.

¹⁷ Īgũ eroparĩcũ erãpũ gũhyasĩuro wañorã. Eropirã gajirãpũ árĩpehreri Jesu iirare ĩha mucubiriñorã.

Mostaza coye queorire werepũ Jesu

Mt 13.31-32; Mr 4.30-32

¹⁸ Eropigũ Jesu werepũ daja:

—¿Goãmũ masa tauro opũ ĩgũ árĩri werediacũ ñeheno iro dopa āhriri mũa pepicũ? I werenigui queoriñe mera weregũra yũhũ. ¹⁹ Mostazayegã iro dopa āhraa. Iriyegãre oteri masũ yujugũ ĩgũ ya pohegue otemi. Īgũ otera pũhrũ òaro puhria. Eropiro yucũgũ wũadigũ wahaa. Eropa wacũ mirimagũ porã bajarã irigũ dũpũrigue suhri suama. Eropa ta umaro majagũ mari Opũre masirã bajamerãgã erã árĩmũhtaquererã pũhrũguere erã bajarã warãcoma, arĩpũ Jesu.

*Pan buğari queorire werepũ Jesu**Mt 13.33*

²⁰ Eropigu dipaturi Jesu werenigui queoriñe mera buhepũ:

—¿Goãmũ masa tauro opũ ĩgu árĩri werediacũ ñeheno iro dopa ãhriri mũa pepicũ? ²¹ Pan buğacũ iiburi iro dopa ãhraa. Yujugo nomeo panre iigo pan buğacũ iiburi pohgare merogã moremo trigo pohga mera. Igo eropa iicũ pan buğacũ iiburi pohga merogã árĩquerero trigo pohgare ðaro seyapehrea wahaa. Eropa ta ɯmaro majagũre mari Opũre bajarã masa masirãcoma, arĩpũ Jesu.

*Miri disiporogã queorire werepũ Jesu**Mt 7.13-14, 21-23*

²² Eropi Jesu paga macarigue, mũa macarigãgue buhegã, Jerusalengue ejabu iipũ. ²³ ĩgu eropa warisubu masũ Jesure ðpa arĩ serẽpipũ:

—Opũ, ¿bajamerãgã dihtare peamegue wabonirãre Goãmũ taugucuri erã ĩgu pohro waboro dopa? arĩpũ ĩgu Jesure.

Ĩgu eroparĩcũ Jesu werenigui queoriñere buhegu ðpa arĩ werepũ:

²⁴ —Yũ mũare ðpa arãa: Bajarã Goãmũ pohrogue wadiaquererã wamasisome. ĩgu pohro waburi miri disiporogã ñajaro dopa ãhraa. Eropirã mũa i disiporogãre turaro ñajadiarã iro dopa ta ĩgu yare iique. ²⁵ ðpa iigucumi Goãmũ bajarã masare. ĩgu wihi opũ iro dopa ãhrimi. Wihi opũ wahgã, disiporore bihagucumi. ĩgu eropa iicũ disiporogue mũa niguirã disiporo biharisere doterãca. Doterã ðpa arĩrãca. “Opũ, disiporore pãgũque guare.” Mũa eroparĩcũ wihi opũpũ yũhrigucumi. “Mũa aridirore masibea yũhũ. Eropigu mũare masibea,” arĩ yũhrigucumi, ²⁶ ĩgu eroparĩcũ mũa yũhrirãca. “Mũa mera gua baha, ihribũ. Gua ya maca buhebũ mũhũ,” arĩrãca mũa. ²⁷ Mũa eroparĩcũ ĩgu pũ yũhrigucumi. “Mũa aridirore masibea. Árĩpehrerã mũa ñeri iinirã yũ pohro aribiricãque,” arĩgucumi wihi opũ. ²⁸ Eropi Abrahãre, Isaare, Jacobore, árĩpehrerã Goãmũ ya weremuhtanirãre Goãmũ ĩgu opũ árĩrore erã arĩcũ ĩarã, mũa disiporogue cóãnirã árĩrã buřigã orerãca. Eropirã mũa turaro bujawererã, mũa gũcũrire cũridihurãca. ²⁹ Irisubure norte majarã, sur majarã, abe mũririro majarã, abe ñajaro majarã Goãmũ ĩgu opũ árĩroguere eja, mesa pohro doarãcoma. ³⁰ Dohpague arĩrã pohro majarã arĩrã irisubure oparã

árĩrãcoma. Eropirã dohpaguere “Oparã ähraa,” arĩrã irisubure pohro majarã árĩrãcoma, arĩpũ Jesu.

Jerusalén majarãre burigã mahipũ Jesu

Mt 23.37-39

³¹ Irisubure bajamerãgã fariseo masa Jesu pohroque ejarã, ïgũre wereñorã:

—Herode mũre wejẽdiami. Eropigũ gajipũ waque mũhũ, arĩñorã erã ïgũre.

³² Erã eroparĩcũ Jesupũ yũhripũ:

—Herode gũyaricũgũ ährimi ïgu. Õpa arĩ wereque ïgũre: “Jesu watẽare cóãgũ iimi. Eropigũ dorecurãre õarã iigũ iimi. Irire dohpagãre, ñamigã sãre iigũcumi. Eropigũ ñamigã core mohmetugũcumi,” arĩ wereque Herodere. ³³ Eropigũ dohpagãre, ñamigãre, ñamigã core sãre Jerusalengue curigũ wagũra. Ero yũre Goãmũ yare weremũhtagũre wejẽrãcoma masa. Goãmũ yare weremũhtagũre erã wejẽbupũre Jerusalengue árĩro gahmea. Eropigũ yũre i maca ta dujaro gahmea.

³⁴ “Mũa Jerusalén majarã, mũa acawererã mũra Goãmũ ya weremũhtanirãre wejẽmũrinirã árĩma. Eropirã Goãmũ obeonirãre utã mera deamũrinirã árĩma. Cãreña bũro igo porãre igo quẽdũpũri mera igo coã oyaro dopa ta bajasuburi opadiaribũ mũare. Mũapũ irire yũre ne gamebiribũ. ³⁵ Dohpaguere mũa árĩri maca cóãra maca árĩroca. Diaye arĩgũ tiiaa mũare. Pũhrũ dujarigũca daja yũhũ. Eropa yũ dujaricũ ïarã mũa yũre Goãmũ turari mera arigũ “Õaro arĩporo,” arĩrãca. Yũre mũa irire arĩboro core dipaturi yũre ïasome mũa, arĩpũ Jesu.

14

Dorecũgũre õagũ iipũ Jesu

¹ Gajinũ erã soorinũ Sabadonũ árĩcũ fariseo masa oparã mera majagũ ya wihigue Jesu bagũ wapũ. Iri wihi árĩrã ïgũre ïhanũrusiañorã. ² Eropigũ ñigagũ bijigũ ïgu pohroque ejarũ. ³ Eropigũ Jesu judio masare buherãre, fariseo masa sãre serẽpipũ:

—¿Mari soorinũre dorecũgũre õagũ iidoreri Goãmũ yare erã gojarapũ? arĩpũ Jesu.

⁴ ïgu eropa arĩ serẽpiquerecũ ta erã yũhribiriñorã. Erã yũhribiricũ ïagũ Jesu ñigagũ bijigũre õagũ iipũ. Tuhanugũ, “Waque,” arĩpũ ïgũre. ⁵ Eropa iituhagũ erãre serẽpipũ daja:

—¿Múa yagu burrore o mua yagu wecure gobegue yuhridijadigure mata aĩ wiubeari mua mari soorinu árĩquerecũ? arĩpu Jesu.

6 Īgu eropa arĩquerecũ ta erã ĩgu serẽpirire yuhrimasibiriñorã daja.

Mojoto dirirogue sihubeonirãre werepu Jesu

7 Fariseo masu ya wihi árĩgu iri wihi majagu ĩgu sihubeonirã oparã doarire erã beyemũhtacũ ĩapu Jesu. Eropa ĩatuha ire werepu árĩpehrerãre:

8 —Mojoto diriri bosenu árĩcũ ĩgu mũare sihubeocũ, ĩgu ya wihigue eja oparã doarire beye doabiricãque. Múa tauro guhyadiarãre sihubeoñumi iri wihi opu. ⁹ Īgu eropa iicũ mua oparã doarire doacũ “Oã guhyadiarãre mua doarire oque,” mũare arĩbocumi wihi opu. Īgu eroparĩcũ mua guhyasũuro dujarãca. Eropirã bu árĩrã doarire doarã warãca. ¹⁰ Eropirã wihi opu mũare sihubeocũ, bu árĩrã doarire doamũhtaque. Múa eropa iicũ wihi opu mũare oparã doarĩpũre “Doarã arĩque,” arĩgũcumi ĩgu mũare. Múa eropa wacũ gajirã ĩgu sihubeonirãpu mũare umupeori mera ĩarãcoma. ¹¹ Yujugu ĩgu basi “Opu ãhraa,” arĩ pepigu bu árĩgu arĩgũcumi. Eropigu gajigu “Bu árĩgu ãhraa,” arĩ pepigu, gajirãre tarinũgadiabigu opu arĩgũcumi, arĩpu Jesu erãre.

¹² Eropa arĩtuha Jesu wihi opũre werepu:

—Mũhu bosenu iigu mũ pohro árĩrãre, mũ pagu porãre, mũ acawererãre, doberi oparãre sihubiricãque. Mũhu erãre sihucũ mũre erã sã sihu gamerãcoma daja. Eropa sihu gamerã mũre erã wajamorire wajayerãcoma. ¹³ Mũhu bosenu moagu mojomorocũrãre, curimasibirãre, yujupu guburu poyanirãre, cuiri ĩhajabirãre sihubeoque. ¹⁴ Mũ eropa iicũ ĩagu Goãmũ mũre õaro iigũcumi. Erãpu mũre erã sihura wajamorire wajayemasibeama. Eropigu õarã sĩrinirã erã masa mũriarisubu árĩcũ Goãmũpu mũre wajayegũcumi, arĩpu Jesu wihi opũre.

Wũari bosenu iira queorire werepu Jesu

¹⁵ Īgu eroparĩcũ peegu gajigu bari mesa pohro doadigu Jesure werepu:

—Goãmũ ĩgu opu árĩro ĩgu bari mesa pohro doarã turaro mucubirirã árĩrãcoma, arĩpu ĩgu Jesure.

¹⁶ Īgu eroparĩcũ Jesu i queorire werepu ĩgure:

—Wũari bosenu iigu bajarã masare sihubeopu. ¹⁷ Īgu sihubeora pũhrũ bosenu árĩrinũ gohra mohme coregure ĩgu sihubeonirãre weredoregu obeopu. “Ma, árĩpehrerire

bosenu maja árĩburire amutuhama. Eropigu mũare si-hubeomi," arĩ weredorepu mohme coregure. ¹⁸ Mohme coregu ĩgu eropa arĩ werequerecũ ta, ĩgu sihunirãpu "Wamasibirica," arĩñorã erã. ĩgu sihumũhtadigu õpa arĩ werepu mohme coregure. "Dohparagã yebare asũabu. Eropigu iri yebare ĩagu wabu iiaa. Eropigu wamasibirica. Umupeoque yure. Yure masiya mara, arĩque," arĩpu ĩgu sihumũhtadigupu mohme coregure. ¹⁹ Gajigupu õpa arĩpu: "Wecũare pe mojtocu majarã dohparagã ta asũabu. Eropigu wecũare queo ĩagu wabu iiaa. Eropigu wasome. Yure wamasiya mara," arĩpu ĩgu sã. ²⁰ Gajigupu õpa arĩpu: "Yũhũ dohpagã mojoto dihriabu. Eropigu iri bosenure wamasibirica," arĩpu ĩgu mohme coregure. ²¹ ĩgu eroparĩcũ mohme coregupu dujaa wa, ĩgu opure erã arĩrare werepehoru. ĩgu eropa arĩ werecũ ĩgu opu turaro gua, õpa arĩpu mohme coregure. "Yojarõ mera maca árĩri marigue, mojomorocurã erã árĩri marigue waque. Eropigu mojomorocurãre, curimasibirãre, cuiiri ihajabirãre, poyari masare yojaro mera aĩgãrique erãre," arĩpu opu. ²² Pũhrũ mohme coregu werepu ĩgu opure: "Opu, mũ dorediro dopa ta masare sihuabu. Yũ eropa sihuquerecũ ta gajirã sã iri taribure sihajarãcoma," arĩpu mohme coregu. ²³ ĩgu eroparĩcũ opu ĩgure dorepu: "Campogue waque. Ero paga marigue, mũta marigãgue árĩrãre yaha wihigue aridoreque yaha wihi õaro mũjtũrimaja õaro. ²⁴ Diaye arĩgu iiaa mũre. Oã yũ sihumũhtanirã yũ barire ne merogã basome," arĩpu opu, arĩ werepu Jesu.

Jesu mera wacũ diasã ãhraa

²⁵ Irisubure bajarã masa Jesu mera wañorã. Eropigu Jesu erãre maji ĩha werepu:

²⁶ —Yujugu yũ buhegu árĩdiagu gajirã tauro yũpũre mahiro gahmea. ĩgu pagure, ĩgu pagore, ĩgu marapore, ĩgu porãre, ĩgu pagũ porãre ĩgu basire ĩgu mahiro tauro yũpũre mahiro gahmea. ²⁷ Yujugu yũ buhegu árĩdiagu yahare eropa iiniguigu árĩgucumi. Eropigu ĩgu yahagu ĩgu árĩri dipuwaja ñero tariqueregu ta yũre pihri-some. Eropa ñero taridiabigu yũ buhegu árĩmasisome. ²⁸ Ire masiyuro gahmea mũare. Õpa ãhraa iri: Wihi iigu ĩgu mũari wihi ĩgu iiboro core wihi wajacũburire queomũhtanimi. Eropa iigu ĩgu wihire pehoborore masimi ĩgu. ²⁹ Wajacũburire queobigu iri wihire iipehobiribocumi. Eropirã ĩgure ĩarã wereyabocoma. ³⁰ "Ihĩ ĩgu wihire iigu bocatiũbirañumi," arĩ wereyabocoma. ³¹ Opu sã gajigu opu yarã mera erã gamewejẽborõ core, ĩgu yarã surarare ĩgu

gamewejëdoreboro core, ïgu yarã surarare queogucumi. “¿Yũhũ diez mil surara mera gajigu veinte mil surara opagu mera gamewejëgu wagu bocatïubocuri?” arï pepigu queogucumi ïgu. ³² Eropa queogu “Bocatïusome,” arïgu, gajigu opu ïgu surara mera gamewejëgu arigu yoarogue ïgu aricũ ta, “Bocatïusome,” arïgũpũ “Gamewejëbiricãrã,” arïdoregu obeobocumi ïgu pohro majagure. ³³ Eropirã yũ buherã árïdiarã mũa iiburire mũare masiyuro gahmea. Eropirã mũa gamerire duhudiabirã yũ buherã árïmasibea mũa, arï werepũ Jesu.

Goãmũ yare iiniguïro gahmea, arï werepũ Jesu
Mt 5.13; Mr 9.50

³⁴ Eropigu erãre werenemopũ:

—Moa ðaro acari ãhraa. Iri moa ñeri wacũ dipaturi ðari iimasiya mara. ³⁵ Iri moa mera duhpimaja masiya mara. Iri eropa árïcũ iri moare cóãro gahmea. Eropirã mũa Goãmũ yare iiniguïbirã ne duhpimorã árïbeaa. Ire ðaro peeque mũa, arïpũ Jesu.

15

Oveja dederedigure bocara queorire werepũ Jesu
Mt 18.10-14

¹ Eropa gajinũ bajarã wajasea corerã gajirã “Ñerã ãhrima,” erã arïrã mera Jesure peerã arïñorã. ² Erã eropa iicũ ïarã fariseo masa judio masare buherã sã Jesure ïhaturirã ðpa arïñorã erã basi:

—Ihï ñerã mera wapicumi. Eropigu erã mera bahami, arï wereniguïñorã erã erã basi.

³ Erã eropa arï wereniguicũ Jesu i queori mera ðpa arï buhepũ erãre:

⁴ —¿Cien oveja opu yujugu oveja dederea wacũ ïagu dohpa iigucuri ïgu? Õpa iigucumi. ïgu noventa y nueve ovejare erã bari campogue api, dederedigure amagu wagucumi. Ovejare bocagugue dujarigucumi. ⁵ ïgure bocagu mucubirigucumi. Eropigu ïgure ïgu weca coãpeo ⁶ ïgu ya wihigue aï dujaa wagucumi. Aï dujaja, ïgu pohro árïrãre, ïgu acawererãre sihu gameneogucumi. “Yũ oveja dederedigure bocabũ. Eropirã yũ mera mucubirique,” arïgucumi ïgu erãre. ⁷ Oveja dederedigure ïgu bocadiro dopa ta ðpa arïgu iiaa mũare. Yujugu ñerire iigu ïgu ñerire bujawerecũ ðaripure gohrotocũ ïarã Goãmũ pohro árïrã burigã mucubirima. Gajirãpũ bajarã masa ðpa arï pepima: “Ñero iibea yũpũ. Eropiro yũ ñeri bujawereburi mara,”

arĩ pepirima. Erã eropa arĩ pepicũ ãarã umaro majarã Goãmũ pohro árĩrã mucubiribeama, arĩpũ Jesu.

Niyeruse dedererare bocara queorire werepũ Jesu

⁸ Eropa arĩtuha gaji queori mera werenemopũ:

—¿Diez niyeruseri waja pagariseri opago yujuse dederecũ duhpibocuri igo mũa pepicũ? Ōpa iigocumo igo. Sihãgodirure sihãgo, wihire oha, õaro amapehogocumo. Irisere bocagogue duhugocumo. ⁹ Irisere bocatuha, igo pohro árĩrãre, igo acawererãre sihupehogocumo. “Niyeruse yahase dederasere bocabũ. Eropirã yũ mera mucubirique,” arĩgocumo igo. ¹⁰ Diaye arĩgu iiaa mũare. Eropa ta yujugu ñerire iigu ãgu ñerire bũjawerecũ õarire gohrotocũ Goãmũ yarã anyuapũ bũrigã mucubirirãcoma. ãgu dederebodigu dederebeamĩ pare. Eropirã turaro mucubirirãcoma, arĩpũ Jesu.

Magũ dederedigu pagũ pohro dujajara queorire werepũ Jesu

¹¹ Eropa arĩtuha Jesu gaji queori mera werepũ daja:

—Bugũ porã perã árĩñorã. ¹² Dũhyagupũ õpa arĩpũ ãgu pagũre: “Ahũ, mũ sĩrira pũhũ yũre mũ oburire yũre opurumujuque,” arĩpũ ãgu ãgu pagũre. ãgu eroparĩcũ erã pagũ perãgue ta ãgu porãre guerepũ ãgu oparare. ¹³ Bajamenurigã pũhũ dũhyagupũ ãgu ya árĩpeherrerire aĩ, yoarogue gaji yebague waha wapũ. Ero eja ãgu ya niyerure iisiripehocãpũ. ¹⁴ ãgu iisiripehora pũhũ iri yebare ne bari marinũgayoro. Eropigu oaboapũ. ¹⁵ Eropigu iri yeba maja mohmerire amapũ. ãgu mohmerire bocacũ ãgu opũ yesea coregu acupũ ãgũre. ¹⁶ Eropigu ãgu yeseare ejo, erã barire badiaripũ ãgu sã. ãgu eropa badiaquerecũ ta ero majarã ãgũre barire obiriñorã. ¹⁷ Eropi ãgũre ero guñari ariyoro pare. “Yũ pagũre mohme corerãpũ pagari barire opacoma. Erã ba dũhari sã pagari árĩca. Erã õaro árĩrisubu yũpũ ohõ árĩgu oaboagu iiaa. ¹⁸ Dohparagã yũ pagũ pohro dujagũra. Yũ pagũ pohrogue ejagu õpa arĩgũra ãgũre: ‘Ahũ, Goãmũre ñero iiabũ. Mũ sãre ñero iiaa. ¹⁹ Ñegũ ãhraa. Eropigu mũ magũ diaye dopa ãabita yũre pare. Mũre mohme corerã dopa ta ãaque yũre,’ arĩgũra yũ pagũre,” arĩ pepipũ ãgu. ²⁰ Eropa arĩ pepigu wahgãnũgaja, ãgu pagũ pohrogue dujaa wapũ. Erogue ãgu ejadigu ãgu dujaricũ ãgu pagupũ ãgũre yoarogue ãgu árĩcũ ta ãgu magũre ãha masipũ.

“ãgu eropa eracũ ãagu ãgu magũre mojomoro ãapũ. Mojomoro ãagu ãgũre oma bocatĩri pabua, ãgu wayuporãre mimipũ ãgu pagũ ãgu magũre. ²¹ “Ahũ, Goãmũre ñero

iiabũ. Mũ sãre ñero iica. Ñegũ ãhraa yũhũ. Eropigu mũ magũ diaye dopa ãabita yũre pare,” arĩpũ ãgũ ãgũ pagũre. ²² ãgũ eroparĩcũ peequeregũ ta ãgũ pagũpũ mohme corerãre sihupũ. “Yojaro, õariñe suhrirore aĩgãrique. Eropirã yũ magũre sãque. Sãtuha ãgũ mojtore sãri berore sã, ãgũ guburire zapature sãque. ²³ Sãtuha diicũgũ wecũre wejẽque. Bosenu iirã. ²⁴ Ihĩ yũ magũ sĩrigũ dopa ta waha wami. Eropa waqueregũ ta dohpaguere ojocarimi ãgũ. Dederedigũ dopa árĩdigũre dohpaguere bocabũ. Eropirã bosenu iirã,” arĩpũ ãgũ pagũ. ãgũ eropa arĩra pũhrũ bosenu iinũgañorã erã.

²⁵ “Trisubure ãgũ tĩgũpũ pohegue arĩpũ. Pohegue árĩdigũ dujarigũ wihi pohro eragũ, erã bayarire peepũ ãgũ. ²⁶ Peegũ yujugũ mohme coregũre sihubeo ãgũre serẽpipũ ãgũ: “¿Dohpa iirã bayarã iiari?” arĩpũ ãgũ mohme coregũre. ²⁷ “Mũ pagũ magũ dujarami. ãgũ õagũ dujaracũ mũ pagũ diicũgũre wecũre wejẽdoreami,” arĩ yãhrĩpũ mohme coregũ. ²⁸ ãgũ eropa arĩ werecũ ãgũ tĩgũpũ bũrigã guagũ wihigue ñajabiripũ. ãgũ eropa ñajabiricũ ãagũ ãgũ pagũ wiriri, “Ñajarique,” arĩ turaro sihuripũ ãgũ magũre. ²⁹ “Peeque, ahũ. Yũhũ yoari boje mũre mohme coregũ dopa ta itamurabũ. Eropigu mũ dorerire ne yujusubu tarinũgabirimũrabũ. Yũhũ mũre mohme corequerecũ ta yũpũre ne obirabũ mũhũ. Ne yujugũ waibũgũre obeaa mũhũ yũre yũ mera majarã mera yũ bosenu iicũ. ³⁰ Eropigu ihĩ mũ magũpũ ñerã nome mera mũ yare iisiripehodigu arĩmi. Irire iisiripehotuha, ãgũ wihigue ãgũ dujaracũ diicũgũ wecũre wejẽabũ mũhũ ãgũ babure,” arĩpũ ãgũ tĩgũ ãgũ pagũre. ³¹ “Mahgũ, mũhũ yũ mera arĩpehrerinũri ãhraa. Eropiro arĩpehreri yaha mũ ya dihta ãhraa. ³² Mũ pagũ magũpũ sĩridigũ dopa ta wahãmi marire. Eropi ãgũ dohpaguere ojocarigũ ãhrimi. ãgũ dederedigũ dopa ta wahãmi. ãgũ eropa wara pũhrũ dohpaguere ãgũre bocabũ. Eropiro ãgũ dujaracũ mari bosenu ii mucubiricũ õhaa,” arĩpũ ãgũ ãgũ magũre, arĩpũ Jesu erãre iri queorire weregũ.

16

Niyeru dibu coregũ queorire Jesu werepũ

¹ Eropi i queorire ãgũ buherãre werepũ Jesu:

—Doberi opũ ya niyerure dibu coregũ niyerure ãgũ õaro dibubiricũ ãagũ gajigũpũ weresãpũ doberi opũre. “ãgũ mũ ya niyerure iisirigũ iimi,” arĩ weresãpũ ãgũre. ² ãgũ eropa weresãcũ pee niyeru dibu coregũre sihubeopũ. Eropigu ãgũ eracũ ãagũ ãgũre opũ werepũ. “Gajigũ mũ yaha

niyerure iisiririre wereami yũre. Eropigu yahare dibugu dohpaguere árísome mũhũ. Eropigu yahare mũ iirare werepeho gojaque. Mũre cóãgu iiaa,” arĩpu ĩgu opu ĩgũre. ³ ĩgu eropa arĩra pũhrũ ðpa arĩ pepipũ dibu coregu ĩgu basi: “Yũ opu yũre cóãbu iicumi. Yũhũ turabeaa. Eropigu turaro mohmerire bocatĩubeaa. Eropigu gajirãre niyeru serẽgu gũhyasĩutariaro tarigũca yũhũ. ¿Eropigu dohpa iigũcuri yũhũ? ⁴ Dohpague tamerare yũ iiburire masia yũhũ. ðpa yũ iicũ yũ mohmeri maricũ erã yũ itamurã árĩrãcoma. Eropirã erã ya wirigue ñajadorerãcoma yũre,” arĩ pepipũ ĩgu. ⁵ Eropa arĩ pepigu ĩgu árĩpehrerã ĩgu opũre waja-monirãre sihubeopũ. Sihubeotuha eramũhtagũre ðpa arĩ serẽpipũ ĩgu. “¿Yũ opũre dipẽ wajamori mũhũ?” arĩpu ĩgu. ⁶ ĩgu eroparĩcũ wajamogũpu yũhripũ. “Cien tambore uyuere olivo waĩcũdigũ maja uyuere wajamoa ĩgũre,” arĩ yũhripũ ĩgu. ĩgu eropa arĩ werẽcũ dibugũpu ðpa arĩ werẽpu. “Ohõ ãhraa mũ wajamorire gojaturapũ. Doaque. Eropigu mũ wajamorire deco mera aĩ, deco mera gojatuque,” arĩpu niyeru dibugu wajamogũre. ⁷ Eropa arĩtuhaja gajigu wajamogũre serẽpipũ ĩgu. “¿Mũca dipẽ wajamori?” arĩpu daja. “Cien aju trigo ajure wajamoca yũhũ,” arĩpu wajamogu dibugũre. “Ohõ ãhraa mũ wajamorire gojaturapũ. Mũ wajamorire ochenta goja amuque,” arĩpu dibugu. ⁸ ĩgu eropa ðaro gũyamehrecũ ĩagu “Ihĩ gũyamehregũ árĩcumi,” arĩ pepipũ ĩgu opu niyeru dibugũre. Inũ majarã Goãmũ gamebirã erã yare gũya amurare erã niyerure erã diburare Goãmũ yarã tauro masicoma erã, arĩpu Jesu.

⁹ Eropa arĩtuha Jesu werenemopũ:

—Eropigu mũare arĩgu tiiaa. Mũa oparire, i yeba majare mojomorocũrãre mũa ocũ, erãpu mũare mahirãcoma. Mũa eropa iicũ mũa opara pehrera pũhrũ umũsigue mũa ejacũ erogue mũare ðaro mahirãcoma.

¹⁰ “Bu árĩrã ya mohmerire queoro iirã oparã ya mohmeri sãre queoro iirãca. Bu árĩrã ya mohmerire queoro iibirã oparã ya sãre queoro iibirãca. ¹¹ Eropirã i yebague mũa opari mera mũa ðaro iibirã Goãmũ mũare iidoreri sãre ðaro iisome mũa. ¹² Eropirã gajigu yare mũa ðaro iibasabiricũ ĩagu mũa ya árĩburire osome mũare.

¹³ “Yujugu Goãmũpũre guñagu bũrigã gohra niyerupũre guñabeami. Niyerupũre bũrigã guñagu Goãmũpũre guñabeami. Eropigu niyeru dihtare gamegu árĩgu Goãmũpũre mucubiricũ iibeami. Goãmũ sãre niyeru sãre yujuro mera gametarima masiya mara mũare. Niyerure gametarigu Goãmũpũre umupeomasibeami, arĩpu Jesu.

14 Īḡu eroparīcū peerā fariseo masapū ĭḡure wereyañorā. Erāpū niyerure gametariñorā. Eropirā wereyañorā. 15 Erā wereyacū peegu Jesu erāre werepū:

—Masa erā ĭhurore mūa ōaro iiraa. Mūa eropa iicū, “Ōarā diaye ta iirā āhrima,” arīrima masa mūare. Goāmupū mūa pepirire masimi. Masa “Ōatariama,” erā arīrāre Goāmupū gajiropa arī pepimi, arīpū Jesu.

Goāmū ĭḡu dorerire, ĭḡu opū árīrīre werepū Jesu

16 Eropa arītuhaja ōpa werenemopū Jesu:

—Ñu waīyegū ĭḡu eraboro core Moiserē ĭḡu apira doreri mera Goāmū marire doreami. Goāmū ya weremūhtanirā mūra erā gojara sã eropa ta árīribū marire dorera. Dohpaguepūre Ñu ōari buherire, Goāmū opū ĭḡu árīrīre buhemi. Īḡu eropa buhecū pee masa erā ejatuharo, erā turari mera Goāmū erā opū árīcū gahmema.

17 “Goāmū Moiserē ĭḡu apira dorerire erā ĭḡu yare gojara sãre “Iri duhpiburi árībeaa,” ne arīsome. Ūmūsi, yeba sã pehrequerecū Goāmū ĭḡu werediro dopa ta iipehogucumi, arī werepū Jesu.

Marapore cóārīre werepū Jesu

Mt 19.1-12; Mr 10.1-12

18 Eropa arītuhaja ōpa arīnemopū Jesu:

—Masū ĭḡu marapore cóāḡū, gajigo mera marapocūḡu ĭḡu igo mera ñero iigū iimi. Tuhaja masū gajigū ĭḡu cóādigo mera marapocūḡu ĭḡu sã igo mera ñero iigū iimi, arīpū Jesu.

Doberi opū, gajigū Lázaro queorire werepū Jesu

19 Eropa i queori werepū Jesu:

—Yujugū doberi opū árīñūmi. Suhri wajacurire sañagū árīñūmi. Eropigū ūmūri nācū ōari dihtare bagū, baja opañūmi ĭḡu. 20 Eropigū irisubure gajigū árīñūmi. Īḡu mojomorocūḡu Lázaro waīcūḡu árīñūmi. Īḡu ĭḡu dūpūre baja camicūḡu árīñūmi. Eropirā gajirāpū ĭḡure doberi opū ya wihi disiporo aīgā apimūriñūma. 21 Eropigū mojomorocūḡupū doberi opū ĭḡu ba dūharire gamemūriñūmi. “Ba dūhari mera yapigūca yāhū,” arī pepimūriñūmi ĭḡu. Ero oyarisubu diayea ĭḡu pohro eja ĭḡu camire neremūriñūma. 22 Eropigū mojomorocūḡu sīria wañūmi. Īḡu sīria wacū, Abrahā pohrogue paraíso waīcūrogue anyua ĭḡure aī mūriañūma. Eropigū doberi opū sã ĭḡu pūhrū sīria wañūmi. Īḡu sīricū ĭḡure yaañūma. 23 Eropiro doberi opūre peamegue ejagū būrigā teboricūñūmi. Eropigū peamegue árīḡū ūmūsigue árīḡure Abrahāre ĭhamujūñūmi. Lázaro mūrū sãre ĭañūmi.

24 Īatuha ĭġu Abrahāre sihubeoñumi. “Ahū, Abrahā, mojomoro ĩaque yure. Peamegue yūhu ñero tarigū iica. Yū eropa wacū Lázarore yure obeoque. Eropigū ĭġu decore ĭġu mujusīru mera yoso, yū nerore deco mera nehoporo. Irire yūsuporo ĭġu,” arīriñumi doberi opū mūrū. 25 ĭġu eroparīquerecū Abrahāpū ĭġure wereñumi: “Mahgū, ojo-carigū árĭġu árĭpehrerire ōarire opabū mūhū. Lázaropū ūmuri nūcū ñero tarimi. Dohpaguere mū ñero taricū ĭġupū ōġuere mucubiriri mera árĭcāġū iimi. 26 Eropiro mari watope ūhcāri waya āhraa. Eropirā ōre árĭrā eroguerē wamasibeama. Tuhaja erogue árĭrā ōre aridiaquererā ta ōġuere arimasibeama,” arīñumi Abrahā doberi opū mūrū. 27 ĭġu eroparīcū doberi opū ōpa arīnemoñumi: “Acaweregū, turaro serēa mūrē. Lázarore yū pagū ya wihigue obeoque. 28 Yūhū yuju mojoto majarā pehrerā pagū porācūa. Lázaro erāre wereporo. Ōre erā ñero tariroguere aribiricāporo,” arīñumi ĭġu. 29 ĭġu eroparīcū Abrahāpū yūhriñumi: “Goāmū dorerire Moise ĭġu apirare, Goāmū weremūhtanirā erā gojarare opama mū pagū porā. Eropirā mū pagū porā irire ta peeporo,” arīñumi Abrahā. 30 ĭġu eroparīcū doberi opūpū yūhriñumi: “Ahū, Abrahā, irire opaquererā ta ōaro peesome. Lázaro sīridigū masadigū erā pohro ĭġu ejacū ĩarā erāpū erā ñero iirire bujawere, ōaripūre gohrotorācoma. Eropirā ōarire iirācoma yū pagū porāpū,” arīñumi doberi opū mūrū. 31 ĭġu eroparīcū Abrahāpū wereñumi: “Mū pagū porā Moise ĭġu apirapū ĭġu wererare, Goāmū yare weremūhtanirā erā wererare pee-birā āhrima. Eropirā Lázaro mūrū sīridigūgue masadigū ĭġu árĭquerecū ta erā Goāmū yare peesome,” arīñumi Abrahā, arī werepū Jesu masare.

17

Ñerire iicū ġūhya āhraa

Mt 18.6-7, 21-22; Mr 9.42

¹ Eropi Jesu werepū ĭġu buherāre:

—Mūare ñeri iidoreri baja āhraa. Eropirā masa ñerire iima. Iri eropa árĭquerecū ta masure ñerire iidoreġupū ñetariaro tarigūcumi. ² Gajĭġure masa ĭġu wūnūġure wūariye utāyere dirisiu, wūariyague ĭġure cóācū ñero wabocumi ĭġu. Eropigū oāġā mera majarāre ñerire iidoredigūpū wūariyague erā cóādĭġu tauro ñero tarigūcumi. ĭġure būrigā dipuwaja moasūġūcumi. ³ Ōaro iique mūa. Mūa acaweregū ñero ĭġu iicū ĩarā, “ĭbĭta,” arĭque ĭġure. Eropirā ĭġu ñero iirire ĭġu bujawerecū,

ōarire gohrotocũ mũapũ ĩgũ ñeri iirire cãdijique. ⁴ Eropigu mũa acaweregũ yujunũ ta siete suburi mũare ĩgũ ñero iibocumi. ĩgũ eropa iicũ yujuyerisubure mũare, “Yũ ñero iirire bujawerea. Ōarire gohrotogu iiaa,” ĩgũ arĩcũ iri nũcu suburi ĩgũ ñero iirire cãdijique, arĩpũ Jesu.

Goãmũre umupeorire werepũ Jesu

⁵ Eropi Jesu buherã ĩgũre ōpa arĩñorã:

—Goãmũre gũare ōaro umupeonemocũ iique, arĩñorã Jesure.

⁶ Erã eroparĩcũ Jesu yũhripũ:

—“Goãmũre diaye ta iigu ãhrimi,” mũa arĩ umupeorã miriyegã mostazaye pẽgã mũa umupeoquererã irigu sicómoro waĩcudigũre ōpa iimasia: “Irigũ yucũgũ irigu basi tara duhagãporo. Wũariyague yuriñajaporo,” arĩmasia mũa. Mũa eroparĩcũ irigu yucũgũpũ mũa dorero dopa ta waroca, arĩpũ Jesu.

Mohme coregũ ĩgũ mohmerire werepũ Jesu

⁷ Pũhrũ i werenigui queoriñere werepũ Jesu:

—Mũare mohme coregũ poheguere tãra, mohmemi. ĩgũ ovejare ĩhadibumi. ¿ĩgũ eropa mohme ĩgũ dujaracũ ĩarã dohpa arĩbocuri mũa ĩgũre? “Yojaro arique. Mũ bari ohõ ãhraa,” ¿arĩbocuri mũa? ⁸ Eropa arĩbeaa mũa. ĩgũre ōpa arãa mũa: “Yũ baburire iique. Eropigu yũ baha ihricũ yũre coreque. Yũ pũhrũ mũ sã baha ihrique,” arãa mũa mohme coregũre. ⁹ Mohme coregũ ĩgũ mũa mohmedorerire ĩgũ iicũ ĩgũre “Ōhaa,” arĩbeaa mũa. ĩgũre mũa dorero dihtare iigu iicumĩ ĩgũ. ¹⁰ Mũa sã ĩgũ iro dopa ta ãhraa. Goãmũ ĩgũ dorediro dopa ta iipehorã ōpa arĩ pepique mũa. “Gũa mohme corerã dihta ãhraa. Gũare ĩgũ dorero dihtare iibũgũ,” arĩ pepique mũa, arĩpũ Jesu ĩgũ buherãre.

Diez gohra camĩ boarãre ōarã iipũ Jesu

¹¹ Gajinũ Jerusaléngue Jesu wagũ iipũ. Eropa wagũ Samaria yeba, Galilea yeba deco tarigãpũ. ¹²⁻¹³ Gaji macague wari mague ĩgũ curicũ diez camĩ boarãpũ ĩgũre bocatĩriñorã. Eropirã yoañarirogue niguirã ta piyuñorã:

—Jesu, opũ, gũare mojomoro ĩaque, arĩñorã.

¹⁴ Erã eroparĩcũ erãre ĩha, werepũ Jesu:

—Pahire mũa dũpũrĩre ōaro warare ĩhmurã waque, arĩpũ erãre.

ĩgũ eropa arĩra pũhrũ erã warisubu erã dũpũ ōarã wañorã. ¹⁵ Eropigu yujugũ erã mera majagũ ĩgũ dũpũ ōari dũpũ wacũ ĩagũ, Jesu pohroque maji dujariripũ. Eropa dujarigũ turaro mera Goãmũre umupeopũ. “Goãmũ turagũ,

ōagũ āhrimi," arĩ umupeopũ ĩgũ. ¹⁶ Eropa arĩgũ ĩgũ Jesu guburi pohro mereja "Ōhaa," arĩpũ. Īgũpũ Samaria majagu arĩpũ. ¹⁷ Īgũ eropa iira pũhrũ Jesu ōpa arĩ werepũ:

—Diez āhrama masa ōarã wanirã. ¿Gajirã nueve duhyarãpũ nohogue arĩcuri erã? ¹⁸ Ihĩ gaji yeba majagu dihta Goãmũre "Ōhaa," arĩgũ dujarami. ¿Duhpirã gajirãpũ aribirari? arĩpũ Jesu.

¹⁹ Eropa arĩtuha Jesu merejadigũre arĩpũ.

—Wahgãnũgajaque. Waque. Mũ Goãmũre umupeogu ōagũ wahabũ mũhũ, arĩpũ Jesu ĩgũre.

Goãmũ ĩgũ opũ árĩborore werepũ Jesu

Mt 24.23-28, 36-41

²⁰ Irisubure bajamerãgã fariseo masa Jesure serẽpiñorã:

—¿Dohpãricũ Goãmũ opũ árĩnũgagũcuri? arĩ serẽpiñorã erã.

Erã eroparĩcũ Jesu yũhripũ:

—Goãmũ ĩgũ opũ árĩnũgacũ mũa ĩhamasibea.

²¹ "Goãmũ ĩgũ opũ árĩri ohõ āhraa," arĩmasibea. "Sohõgue āhraa," arĩmasibea. Goãmũ ĩgũ opũ árĩri masa erã pepirigue āhraa, arĩpũ Jesu fariseo masare.

²² Eropa arĩtuha Jesu ĩgũ buherãre ōpa arĩ werepũ:

—Pũhrũ yũhũ masũ Goãmũ ĩgũ obeodigu yũ i yebague dujariburire bũrigã gamerãca mũa. "Īgũre yujunũ gohra mari ĩacũ ōaboaya," arĩ quererã ta yũre ĩanisome mũa. Eropa mũa gamequerecũ ta irisubure arisome yũhũ.

²³ Gajirã mũare ōpa arĩrãcoma. "Īgũre ĩaque. Īgũ Cristo āhrimi. Sihire ĩaque. Cristo āhrimi," arĩrãcoma mũare. Erã eropa arĩquerecũ ta erãre peebiricãque.

²⁴ Bupu umarore guñaña mariro miaro dopa ta guñaña mariro arigũca yũhũ masũ Goãmũ ĩgũ obeodigu dujarigu.

²⁵ Ire yũ ĩboro core yũhũ turaro ñero tarigũca. Eropirã yũre dohpague majarã gamesome.

²⁶ Noé ĩgũ árĩrasubu majarã erã árĩmũridiro dopa ta yũhũ masũ Goãmũ ĩgũ obeodigu yũ dujariboro coregã eropa ta árĩrãcoma masa.

²⁷ Noé ĩgũ árĩrasubure árĩpehrerã masa eropa baha, ihri ĩĩnuma. Eropirã mojoto dirimũriñuma. Noé wũadiru dohodirugue ĩgũ ñajaboro core Goãmũ erãre ĩgũ miupehoboro core iri árĩpehrerire masa mũraro ta ĩiniguicãmũriñorã.

Eropa arĩroca yũ dujaricũ sãre. ²⁸ Lote ĩgũ árĩrasubu majarã sã erã árĩdiro dopa ta yũ dujaricũ árĩrãcoma masa. Lote ĩgũ árĩrasubure masa baha, ihri, asũ, dua, ote, wirire ĩĩnuma.

²⁹ Erã eropa ĩirisubu ĩgũ ya macare Sodoma waĩcũri maca Lote ĩgũ waranũ umaro maja peame ũju dijari erãre wejẽpehocãyoro.

³⁰ Yũhũ masũ Goãmũ ĩgũ

obeodigu yuhũ guñaña mariro yũ dujaricũ eropa ta waroca irisubure.

³¹ “Irisubure yujugu ïgu ya wihi weca maja pũgue áriũ wihi pohecague ïgu yare aĩgu ñajabiricãporo pobero mera duhriboro dopa. Eropigu pohegue áriũ sã irisubure ïgu ya wihigue piharibiricãporo. ³² Lote marapo igo warare guñaque. ³³ ïgu ya áriburi dihtare yujugu guñagu peamegue wagucumi ïgu. Yaha áriburipare yujugu guñagu áripehrerinuri Goãmũ mera õaro áriũgucumi, arĩpũ Jesu.

³⁴ “Yuhũ mũare werea. Irisubure yũre umupeorãre beye gameneodoregũca. Eropigu eropa wari ñamire yuju camare perã carĩcũ yujugure yũre umupeogure aĩrãcoma yũ mera áribure. Gajigu yũre umupeobigu ero dujagucumi. ³⁵ Eropa ta nome perã erã ya ojudũcare erã biucũ yujugore aĩrãcoma. Yujugo ero dujagocumo. ³⁶ Eropigu perã poheguere mohmerã áriũcũ yujugure aĩrãcoma. Yujugu ero dujagucumi, arĩpũ Jesu.

³⁷ ïgu eroparĩcũ ïgu buherãpũ serẽpiñorã.

—¿Nohogue eropa warocuri? arĩ serẽpiñorã erã.

Erã eroparĩcũ Jesu yãhripũ:

—Masa erã ñeri erã iiniguirogue, erogue Goãmũ erãre erã ñeri dipuwaja moagucumi, arĩpũ Jesu.

18

Wapeweyo igo dipuwaja moadorera queorire werepũ Jesu

¹ Eropi Jesu erãre Goãmũre serẽburire weregu õpa arĩpũ:

—Mũa Goãmũre serẽrã coreque ïgu yãhriborore. Yoari boje corequererã ta bujawerebiricãque. ïgure serẽrã duhubita, arĩpũ Jesu.

² ïgu eropa arĩrare buhebu i queori mera werepũ erãre:

—Gaji macague masare dipuwaja moadoregu áriũpũ. ïgu Goãmũre umupeobiripũ. Eropigu masa sãre umupeobiripũ. ³ Eropigo wapeweyo sã erogue áriũpo. Igo ïgu pohrogue dũrũro curigo õpa arĩpo: “Yũre ñaturigure dipuwaja moadoreque mũhũ. Yũre arĩ cãhmotaque,” arĩ serẽniguicãpo igo ïgure. ⁴ Igo eroparĩcũ ïgu bajasuburi “Iisome yuhũ,” arĩripũ igore. ïgu eropa arĩquerecũ ta igo bajasuburi ïgure eropa serẽniguicãgo garibotariaro iipo. Igo garibocũ ñagu õpa arĩpũ ïgu basi. “Yuhũ Goãmũre masa sãre umupeobea. ⁵ Yũ eropa umupeobigu arĩquerecũ ta igopũ yũre garibotaricãmo. Yũre eropa garibogo yũre gariboreacũ iicumo yũre. Igo eropa arĩ weresãniguicũ igore ñaturigure dipuwaja moadoregũra,” arĩpũ dipuwaja moadoregu, arĩpũ Jesu.

⁶ Eropa arĩgu Jesu erãre werenemopu:

—Eropa arĩpu ĩgu ñegu dipuwaja moadoregu. ĩgu eropa arĩrare guñaque mua. ⁷ ĩgu tauro Goãmupu ĩgu yarãre umuri nucu ĩgure serẽrãre itamugucumi. ⁸ Muare arĩgu tiaa. Goãmũ erãre mata iigucumi erã serẽrare. ¿ĩgu eropa yuhrigu ĩgu arĩcũ ta yuhu masu Goãmũ ĩgu obeodigu i yebague dujarigu, Goãmũre umupeorãre ĩgure serẽrãre bocagucuri yuhu? arĩpu Jesu.

Perã Goãmũ mera erã wereniguira queorire werepu Jesu

⁹ Eropi gaji queori mera werepu Jesu. “Guapu ðarã ãhrra. Gajirãpu ñero iirã ãhrima,” arĩ pepirãre i queori mera ðpa arĩ werepu:

¹⁰ —Goãmũ ya wihigue perã uma Goãmũ mera wereniguirã wañorã. Yujugu fariseo masu arĩpu. Gajigu wajasea coregu arĩpu. ¹¹ Eropigu fariseo masupu nugaja, ðpa arĩ serẽ niguipu Goãmũre: “Yuhu guya yajaricugu, diaye iibigu, nome mera ñero iigu arĩbeaa. Gajirã iro dopa arĩbeaa. Ihĩ wajasea coregu iro dopa ñegu arĩbeaa. Eropigu mũre Goãmũre ðhaa, arãa. ¹² Yuhu semanari nucu mũ ya arĩburire iigu pesubu ba duhua. Eropigu diez niyuserire wajatagu yujuse mũre ohoa,” arĩpu fariseo masu Goãmũre. ¹³ Eropigu wajasea coregupu yoarogue niguigu muhri siunugaja, ĩgu ñerire bujawere, umarogue iabiripu. ĩgu ñerire bujaweredigu arĩgu ĩgu coretibi pa, wereniguipu Goãmũre: “Goãmũ, yuhu ñegu ãhrra. Eropigu mũhu yure mojomoro ãaque,” arĩpu ĩgu Goãmũre. ¹⁴ Eropigu muare arĩgu iiaa. Ihĩ wajasea coregupu ĩgu wihigue ĩgu dujagu ĩgu ñerire Goãmũ mera cóãdigu dujapu. Gajigu fariseo masu ĩgu ñerire cóãdigu arĩbiripu. “Yuhu ðagu ãhrra,” arĩgu Goãmũ ĩgu ãacũ ñegu arĩmi. “Yuhu ñegu ãhrra. Eropigu yu ñerire bujawerea,” arĩgũpũre Goãmũ ðagu iigucumi ĩgure, arĩpu Jesu.

Majirãgã ya arĩburire Goãmũre serẽbasapu Jesu
Mt 19.13-15; Mr 10.13-16

¹⁵ Eropi masa erã porã majirãgãre Jesure mohmepiñadoremorã ĩgu pohrogue aĩ erariñorã. Erã eropiicũ ãarã Jesu buherã erãgãre aĩrarãre turiñorã. ¹⁶ Erã eropa turicũ ãagu Jesu majirãgãre sihubeopu ĩgu pohrogue. Sihubeo ðpa arĩpu ĩgu ĩgu buherãre:

—Majirãgã yu pohrogue ariporo. “Waque,” arĩbita erãgãre. Erãgã Goãmũre erã opu iro dopa pepima. Eropirã Goãmũ ĩgu opu arĩroguere oãgã iro dopa pepirã ãhrima eroguere. ¹⁷ Diaye arĩgu iiaa muare. Oãgã Goãmũre erã gamediro dopa ta mua Goãmũre gamebirã ĩgu pohrogue

wasome mua. Mua wabiricũ mua opa árisome igu, arĩpu Jesu.

Doberi opagu Jesu mera wereniguipu
Mt 19.16-30; Mr 10.17-31

¹⁸ Igu eropa arĩra pũhrũ judio masa oparã mera majagu Jesure serẽpi erapu.

—Ne ðagu, buhegu ãhraa mũhu. ¿Yu arĩpehrerinuri Goãmũ mera arĩdiagũ dohpa iigũcuri yũhu? arĩpu igu.

¹⁹ Igu eroparĩcũ Jesu yũhripũ:

—¿Dohpa arĩronore yũre “Õagu,” arĩ piyuri mũhu? Goãmũ dihta ðagu ãhrimi. ²⁰ I Goãmũ dorerire masia mũhu. “Gajigu marapo mera arĩbiricãque. Masare wejẽbiricãque. Yajabiricãque. Gũyabiricãque. Mũ pagũ sũmarãre umupeoque,” arĩ doremi Goãmũ. Eropigu irire iigu mũhu, arĩpu Jesu.

²¹ Igu eroparĩcũ igu Jesure yũhripũ:

—Iri arĩpehrerire majigugãgue ta iibu yũhu, arĩpu igu.

²² Igu eroparĩcũ peegu Jesu igure ðpa arĩ werepu:

—Yujuũe dihta dũhyaa mũre mũ iiboro. Arĩpehreri mũ yare duagu waque. Eropa iigu arĩpehreri niyeru mũ wajatarire mojomorocũrãre oque. Mũ eropa iicũ wũaro mũ ya ðari mũhu opaburire umaroguere Goãmũ pohroguere arĩroca. Eropa iituha yũ mera majagu arĩbu arique, arĩpu Jesu igure.

²³ Igu eroparĩcũ peegu igupu baja doberi opagu arĩgu irire mojomorocũrãre odiabigu, turaro bũjawere waha wapũ. ²⁴ Igu eropa bũjawerẽcũ ãagu Jesu ðpa arĩ werepu gajirãre:

—Doberi oparãre Goãmũ igu opa arĩroguere erã wacũ diasataria. ²⁵ Camello waĩcũgu waibũgupu igupu awiru gobegãgue igu ñajacũ masiya mara igure. Eropa ta doberi opagu Goãmũ mera ðaro arĩgu igu opa arĩroguere wacũ diasataria, arĩpu Jesu.

²⁶ Igu eroparĩcũ igure peerã ðpa arĩñorã:

—Cue. Mũ arĩro dopa ta diaye arĩcũ, ne yujugu masure Goãmũ taubiribocumi igu pohro waborore, arĩñorã erã Jesure.

²⁷ Erã eroparĩcũ Jesu yũhripũ:

—Masa erã bocatũuro erã ðaro iira mera Goãmũ pohroguere wamasibeama. Goãmũpu masare peamegue wabonirãre taumasimi. Igu arĩpehrerire ðaro iimasipehocãmi, arĩpu Jesu erãre.

²⁸ Igu eroparĩcũ Pedro igure ðpa arĩpu:

—Peenique. Gua árĩpehreri gua yare apicãbu mu mera warã, arĩpu ĩgu Jesure.

²⁹ ĩgu eroparĩcũ Jesu õpa arĩpu:

—Diaye mũare arĩgu iiaa. Árĩpehrerã mua Goãmu yare iimorã mua wirire, mua marasã nomere, mua pagu porãre, mua pagu sumarãre, mua porãre mua apinirã mua wuaro wajatarãca dohpaguere. ³⁰ Mua apidiro tauro wajatarãca. Eropirã mua sĩrira puhru árĩpehrerinari Goãmu mera árĩrãca mua, arĩpu Jesu erãre.

Dipaturi Jesu ĩgu sĩriburiñere ĩgu masa mũriaburiñere werepu

Mt 20.17-19; Mr 10.32-34

³¹ Eropi doce ĩgu buherã dihtare aĩgã erãre werepu:

—Peeque yure. Dohpaguere mari Jerusalengue warã iiaa. Eroque yure Goãmu ĩgu obeodigure Goãmu ya weremuhtanirã iribojegue erã werediro dopa ta eropa waroca yure. ³² Ero masa yure ñeha, judio masa árĩbirãre orãcoma yure. Yure erã ora puhru erã yure wereya, ñero arĩ, disico ehosũrãcoma. ³³ Eropirã yure tãratuhaja wejẽrãcoma yure. Eropigu yu sĩrira puhru uhrenu waboro masa mũriagũca yuhu, arĩpu Jesu erãre.

³⁴ ĩgu eroparĩcũ ĩgu buherã ĩgu wererire õaro pee masibiriñorã. Goãmu irire erãre masicũ iibirinipu dohpa.

Cuiri ĩhajabigũre ĩhajacũ iipu Jesu

Mt 20.29-34; Mr 10.46-52

³⁵ Eropi Jesu sã Jericó waĩcari maca pohrogue ejañorã. ĩgu wari maha turogue yujugu masu cuiri ĩhajabigu doapu. Niyeru serẽgu iipu. ³⁶ Eropigu masa bajarã ĩgu pohro aricũ peegu serẽpipu ero árĩrãre.

—¿Duhpirã masa bajarã tarigãri? arĩ serẽpipu ĩgu.

³⁷ —Jesu Nazare majagu arigu iimi, arĩñorã gajirã ĩgure.

³⁸ Erã eropa arĩ werecũ peegu ĩgu gaguiniguĩgaru:

—Jesu, opu Davi mũru pãrami masare taubu, yure mojomoro ĩaque, arĩ gaguiniguĩpu Jesure.

³⁹ ĩgu eroparĩcũ ĩgu pohro árĩrãpu “Ejarimaricãque,” arĩ turiñorã ĩgure. Erã eropa arĩ turiquerecũ ta ĩgu ero core ĩgu gaguiniguĩdiro tauro gaguiniguĩnemopu daja.

—Opu Davi mũru pãrami, yure mojomoro ĩaque, arĩ gaguiniguĩpu ĩgu.

⁴⁰ ĩgu eropa gaguiniguicũ peegu Jesupu nũgaja, “Si-hubeoque ĩgure,” arĩpu. ĩgu eroparĩcũ erãpu cuiri ĩhajabigũre sihgũñorã. Erã eropa sihgũcũ ĩgu Jesu pohrogue ĩgu ejacũ Jesupu ĩgure serẽpipu:

⁴¹ —¿Dohpa yu iicũ gahmeri mũhu? arĩpu Jesu.

—Yũ Opũ, yũre ãacũ iique, arĩpũ cuiiri ãhajabigu.

42 —Ãaque pare. Yũre umupeonijagu, õagu wahaa mũhũ, arĩpũ Jesu ãgũre.

43 ãgu eroparĩcũ ta cuiiri ãhajabigu õaro ãha wapũ. Eropa õagu wanijagu ãgu Jesu mera wapũ. “Goãmu turagu ãhrimi,” arĩ umupeopũ ãgu. Eropirã masa bajarã cuiiri ãhajabiridigu ãgu õagu wacũ ãarã, “Goãmu õagu, turagu ãhrimi,” arĩ umupeoñorã erã sã.

19

Zaqueo Jesure bocatĩripũ

1 Eropii Jesu Jericogue eja, iri macague tarigãbu iipũ.

2 Doberi opũ Zaqueo waĩcũgu wajasea corerã opũ ero arĩpũ. 3 Eropigu ãgu Jesure “¿Nihino arĩcuri?” arĩ ãha masibu Jesure ãadiaripũ. Eropa ãgu ãadiaquerecũ ta ãgu yebagũgã arĩcũ masa bajarã ãgũgãre cãhmotacãñorã.

4 Eropigu ãgu masare omatarigã wa, sicómoro waĩcũdigu yucũgũgue mũribejapũ Jesure ãabu. Pũhrũ ñarigã Jesu irigu pohro tarigãbu iipũ. Eropigu Zaqueo irigũgue coregu iipũ. 5 ãgu eropa corero watope Jesupũ irigu gubuye ejanũgaja, Zaqueore ãhamuju ãgũre werepũ:

—Zaqueo, dohpaguere mũ ya wihi dujagũra. Eropigu duru dijarique, arĩpũ Jesu.

6 ãgu eroparĩcũ Zaqueopũ mũmũdiaro mera dijari, mucubiriri mera ãgu ya wihigue aridorepũ Jesure. 7 ãgu eropa bocatĩricũ ãha, masa arĩpehrerã erã basi õpa arĩ werenigũñorã:

—Ihĩ Jesu ñegũ ya wihigue curigu wadiami, arĩ werenigũñorã arĩpehrerã masa erã basi.

8 Zaqueopũ bocatĩrituha ero nigui, Jesure werepũ:

—Opũ, peeque yũre. Arĩpehreri yahare deco mera mojomorocũrãre ogũra. Eropigu yũhũ gajigũre cien niyuserire gũya aĩdigũ arĩgu, cuatro cientos niyuserire wajayenemogũra ãgũre, arĩpũ Zaqueo Jesure.

9 ãgu eroparĩcũ Jesupũ werepũ ãgũre:

—Dohpagãre mũre mũ ya wihi arĩrã sãre peamegue wabonirãre Goãmu tautuhami. Mũ sã Abrahã mũrũ acaweregũ ta ãhraa. 10 Yũhũ masũ Goãmu ãgu obeodigu peamegue wabonirãre amagu arigu iibũ. Eroguẽ wabonirãre õaro taugũ arigu iibũ, arĩpũ Jesu Zaqueore.

Niyuseri oroseri queorire werepũ Jesu

11 Eropi ãgũre peerãre Jesu queori mera werepũ daja. Merogã dũhyayoro Jerusalẽngue ãgu ejaboro. Eropirã ãgũre peerã õpa arĩ pepiñorã: “Goãmu dohpaguere opũ

árĩnugabu iimi," arĩ pepiriñorã erã. ¹² Erã eropa arĩ pepicũ Jesu i queorire õpa werepũ erãre:

—Yujugũ gaji yebague yoarogue wabu iĩnumi. Eroguere ero majagũ erã tauro opũ árĩgũ ãgũre ãgũ ya maca majarã opũre acucũ wabu iĩnumi. Pũhrũ ãgũ ya wihigue dujarabu iĩnumi. ¹³ Nere ãgũ waboro corere diez mohme corerãre sihubeoñumi. Eropa sihubeogũ, ãgũ erãre yujurãyerire yujuse niyeruse orosere oñumi. Otuha wereñumi erãre: "Yũ maricũ i niyeru mera mũa wajatanemoburire amaque," arĩñumi ãgũ mohme corerãre. ¹⁴ ãgũ ya yeba majarãpũ ãgũre gamebiriñuma. Eropa gamebirã ãgũ opũ árĩbu wara pũhrũ gajirãre ãgũre weredorerã oboeñuma. "Mũhũ gũa opũ árĩcũ gamebeaa gũa," arĩñuma erã weredorenirãpũ. ¹⁵ Eropa erã gamebiriqerrecũ ta pũhrũ erã opũ ñajañumi ãgũ. Eropa opũ ñajatuha, ãgũ ãgũ ya wihigue dujariñumi. Eropa dujaragũ ãgũ mohme corerãre ãgũ niyeru mera erã wajatanemorare masibu, erãre sihubeoñumi. ¹⁶ ãgũ eropa sihubeora pũhrũ, eramũhtagũ ãgũre wereñumi: "Opũ, mũ niyeruse, mũ yũre orase mera diez seri wajatanemoabu yũhũ," arĩñumi mohme coregũ ãgũ opũre. ¹⁷ "Õaro iiabũ mũhũ. Õagũ mohme coregũ ãhraa. Mũ merogã mera yũ dorero dopa iipehogũ árĩgũ dohpague diez macari majarã erã opũ árĩbu wagũca mũhũ," arĩñumi opũ mohme coregũre. ¹⁸ ãgũ pũhrũ eragũ ãgũ mera majagũ õpa arĩñumi: "Opũ, mũ niyeruse, yũre mũ orase mera cinco seri wajatanemoabu yũ sã," arĩ wereñumi ãgũ opũre. ¹⁹ "Cinco macari majarã opũ wagũca mũhũ," arĩñumi ãgũ opũ ãgũre. ²⁰ ãgũ eropa arĩra pũhrũ gajigũ mohme coregũ eraa werepũ: "Opũ, mũ niyeruse ohõ ãhraa. Suhri gasiro mera oma, irisere dihbuabũ. ²¹ Mũhũ turaro mohmedoregũ ãhraa. Eropigũ gajirãre mohmedorequeregũ oteri moogũ árĩqueregũ ta mũ dihta iri dũcare aĩa. Eropigũ mũre gũiabũ," arĩñumi ãgũ opũre. ²² "Mũ yũre eropa arĩgũ ñegũ ãhraa. Yũre mũ eropa arĩri dipuwajare dipuwaja moagũra yũhũ. Yũhũ mũre turaro mohmedoregũ árĩcũ mũhũ yũre masia. Gajirã yare yũhũ aĩcũ yũhũ otebirira árĩquerecũ iri dũcare yũ aĩgũ árĩcũ masituhabũ mũhũ. ²³ ¿Yũ eropa árĩcũ ãaqueregũ duhpigũ yũ orasere niyeru diburi wihigue dibubirari mũhũ? Irire erã wayura waja wajatanemoboaya mũhũ. Irire mũ iicũ dujaragũ wajatanemoboaya yũ sã," arĩñumi erã opũ. ²⁴ Eropa arĩtuha ãgũ pohro niguirãre doreñumi: "Niyeruserere emaque ãgũre. Diez seri opagũre oque," arĩñumi ãgũ opũ. ²⁵ ãgũ eroparĩcũ erãpũ wereñuma ãgũre: "Opũ, diez seri opagũ baja opatuhami," arĩñuma erã

ĩgure. ²⁶ Erã eroparĩcũ opũ yũhriñumi: “Mũare arĩgũ iiaa. Árĩpehrerã wũaro oparãre onemogũra. Moorãpũre merogã erã opaquerecũ ta erãre emagũra. ²⁷ Dohpague tamerare yũre ìhaturirãre yũre erã opũ árĩdorebirinirãre yũ pohro aĩgãrique. Eropirã yũ ìaro wejẽcãque erãre,” arĩñumi opũ ìgũ mohme corerãre, arĩ werepũ Jesu.

Jerusaléngue ejapũ Jesu

Mt 21.1-11; Mr 11.1-11; Jn 12.12-19

²⁸ Eropa arĩtuha Jesu gajirã core Jerusaléngue wagũ iipũ. ²⁹ Jerusaléngue ejaboro coregã Olivo waĩcũdigũ utãgũ gubuyegue ejañorã pe maca árĩroque. Yuju maca Betfagé gaji maca Betania waĩcũyoro. Eroque ejagũ ìgũ buherã mera majarãre perãre obeogũ Jesu òpa arĩpũ:

³⁰ —Si macague waque. Ero ejarã, burrogãre erã dirinugudigũre bocajarãca. Gajirã ìgũre ne peyanibeama dohpa. Ìgũre bocarã, ìgũre diriradare pã, aĩgãribasaque yũre. ³¹ Mũa eropa iicũ ìagũpũ “¿Duhpirã burrore pãri?” ìgũ arĩcũ peerã òpa arĩ yũhrique ìgũre: “Mari tĩgũ burrore gamebeoniami dohpa,” arĩ wereque ìgũre, arĩ weredore obeopũ ìgũ buherãre perãre.

³² Ìgũ eroparĩcũ erã perãpũ ìgũ obeodiroque ejañorã. Erã eropa ejaçũ Jesu árĩpehreri ìgũ erãre arĩdiro dopa ta eropa wayoro. ³³ Eropirã burrogãre erã pãcũ ìgũgã oparã serẽpiñorã erãre:

—¿Duhpimorã diriradare pãri burrogãre? arĩ serẽpiñorã erã.

³⁴ —Mari tĩgũ burrogãre gamebeoniami, arĩ yũhriñorã erã.

³⁵ Eropirã ìgũgãre burrogãre Jesu pohroque aĩ ejañorã. Ìgũgãre aĩ ejatuhaja erã weca maja suhrire ìgũ weca duhpeoñorã. Eropirã ìgũ weca Jesu ìgũ mũribejacũ itamuñorã erã Jesure. ³⁶ Jesu ìgũ weca ìgũ peyagũ wacũ erã masa erã weca suhri sañari suhrire tuwea aĩ mague seõpi mũhtañorã ìgũ core. ³⁷ Eropirã Jerusalén pohroque eja, Olivo waĩcũdigũ دچارiri mague ejañorã. Eroque ejarã Jesu buherã bajarã árĩpehrerire ìgũ deyoro moarare, ìgũ õari ìgũ iirare erã ìarare guña mucubiri Goãmũre õaro wereniguĩũgañorã. Goãmũre “Õagũ, turagũ àhrimi,” arĩ gaguĩniguiñorã. Eropirã bũrigã gaguĩnigui Goãmũre umupeo òpa arĩñorã:

³⁸ —Ìre umupeorã. Ihĩ Goãmũ ìgũ obeodigũ, mari Opũ õaro arĩporo. Ūmaro majarã õaro arĩporo. Goãmũ ìgũ turagũ arĩcũ árĩpehrerã masiporo, arĩ umupeoñorã erã.

³⁹ Erã eroparĩcũ peerã fariseo masa bajamerãgã erã watope árĩrã Jesure wereñorã:

—Buhegũ, mũ buherãre ejarimaricãdoreque, arĩñorã erã.

⁴⁰ Erãre yũhripũ Jesu:

—Mũare arĩgũ tĩaa. Oã yũre umupeorã erã werenigu-ibiricũ utãyeripũ yũre umupeoro dopa ta gaguiniboca, arĩpũ Jesu erãre fariseo masare.

⁴¹ Eropa arĩtuha Jesu Jerusalén pohroge eja, iri macare ãhabeogũ orepũ. ⁴² Ōpa arĩpũ ĩgũ:

—Jerusalén majarã, dohpague tamerare mũare ðaro árĩburire mũa masicũ ðatariaboya. Eropa árĩquerecũ mũa dohpaguere irire ne peediabirabũ. Eropigũ Goãmũ mũare irire masidorebirimi. ⁴³ Mũare ãhaturirã mũa árĩri macare cãhmotarãcoma. Eropa iirã erã mũare wiriaro iisome. ⁴⁴ Irisubu erã mũa ya macare cóãpehorãcoma. Mũare mũa porã sãre wejẽrãcoma. Mũare ãhaturirã ðaro weasirirãcoma mũa ya macare. Goãmũ peamegue wabonirãre mũare ĩgũ taubure yũre mũa masidiabirabũ. Mũa masidiabirira dipuwaja mũare ãhaturirãre Goãmũ cóãdoregũcumĩ mũa ya macare, arĩpũ Jesu Jerusalén majarãre.

Goãmũ wihigue ejapũ Jesu

Mt 21.12-17; Mr 11.15-19; Jn 2.13-22

⁴⁵ Eropi Jerusaléngue ejagũ, Jesu Goãmũ wihigue ñaja wapũ. Eropigũ doberi duarãre iri wihigue bocajagũ, erãre cohã wiucãpũ. Ōpa arĩpũ ĩgũ erãre:

⁴⁶ —Goãmũ yare erã gojarapũ ðpa ãhraa: “Goãmũ arĩmi: Yaha wihi Goãmũ mera wereniguirĩ wihi waĩcũroca,” arĩñuma ĩgũ yare erã gojarapũ. ĩgũ eropa arĩquerecũ ta mũapũ i wihire Goãmũ wihire duadoarã bu game yajarã ĩaa, arĩpũ Jesu.

⁴⁷ Ūmũri nũcũ Goãmũ wihigue Jesu buherũ. Eropirã pahia oparã, judio masare buherã mera, masa oparã sã, ĩgũre erã wejẽburire guñamaañorã. ⁴⁸ Masa árĩpehrerã ĩgũre eropa peenigui, ĩgũ buherire ðaro peenũrũã árĩñorã. Erã eropa ðaro peenũrũcũ Jesure wejẽdiarãpũ ĩgũre erã wejẽburire bocabiriñorã.

20

Jesure doredigũre ĩgũre serẽpiñorã

Mt 21.23-27; Mr 11.27-33

¹ Gajinũ Goãmũ wihigue Jesu masare ðari buherire buhegũ ĩpũ. ĩgũ eropa buhecũ pahia oparã, judio masare buherã, mũrã mera ĩgũ pohroge erarã, ĩgũre serẽpiñorã:

² —Wereque guare. ¿Noa doreri mera eropa iiri mahu? ¿Nihino mare Goamu wihigue arinirare coadoreari? arinora era Jesure.

³ Era eroparicu Jesu yuhripu erare:

—Yuhu mapare serepimuhtagara. Wereque ya sare. ⁴ ¿Nu masare igu waıyecı nihinopu igure waıyedoremariyuri ma pepicu? ¿Goamu doreyuri? ¿O masapu doremariyuri? arı serepipu erare.

⁵ Igu eroparicu erapu era basi game wereniguihora:

—¿Dohpa arı yuhriracuri mari? “Goamu Nure doredigu arımi,” mari arıcu, “¿Goamu Nure igu dorequerecu ta duhpirı igu wererare pebirari ma?” arıbocumi Jesu marire.

⁶ Oa masapu “Diaye ta Nu Goamu yare weremuhadigu arımi,” arı pepima era. Era eropa arı pepira maripu “Nu igu waıyecı Goamupu igure dorebiridigu arımi,” mari arıcu masapu marire utı mera dearıcoma, arı wereniguihora era era basi. ⁷ Eropa arı wereniguituha era Jesure yuhrıhora:

—Nure waıyedoredigure gua masibea, arıhora era.

⁸ Era eroparicu Jesu yuhripu:

—Irisubu tamerare ya sa yare doredigure werebea mare, arıpu igu erare.

*Nera mohme corera iira queorire werepu Jesu
Mt 21.33-44; Mr 12.1-11*

⁹ Eropi Jesu queori moa opa arı buhenugapu masare:

—Yeba opu arınumi. Igu ya pohere iguire oteñumi. Ote-tuha, iri pohere gajirare deco mera apiñumi era mohme corera waja. Eropa apıgu erare iri pohere ihadibudoretuhaja gajı yebague waha wañumi. Yoari boje deyobiriñumi.

¹⁰ Eropıgu igui nırisubu arıcu pohe opu igu pohro majagure pohere mohme corera pohrogo obeoñumi. Pohe maja igu oteri dıcare igu ya sero majare aıdoregu obeoriñumi. Eropıra pohere mohme corerapu igu pohro majagure bocatıri pañuma igure. Eropıra era igure iguitırıre obıriquerera dujadoreñuma igure. ¹¹ Eropıgu pohe opu gajıgu igu pohro majagure iri pohe maja dıcare aıdoregu obeoriñumi daja. Eropıra pohere mohme corera igu sare pa ñero iñuma igure. Eropa iituha igu iri dıcare obıriquerera dujadoreñuma daja. ¹² Igure era eropa iira puhru gajıgu pohro majagure obeoriñumi daja. Eropıra mohme corera daja igure cami moa, iri pohe turo coacñuma igure.

¹³ “Era eropa iira puhru pohe opu opa arı pepiriñumi: “¿Dohpa igıcuri yuhu? Opa iigura. Yuhu ya magure ya mahıgure obeogara. Era igure umupeobocoma,”

arĩ pepiriñumi pohe opũ. ¹⁴ Eropirã ĩgu magũre ĩgu obeodigu ejacũ ĩarã mohme corerãpũ erã basi õpa arĩ wereniguiñuma: "Ihĩ pohe opũ magũ aħrimi. ĩgũre wejẽrã. Eropiro i pohe mari ya pohe dujaroca," arĩriñuma erã erã basi. ¹⁵ Eropa arĩtuha pohe opũ magũre ñeha pohe tũro aĩgã, wejẽcãñuma ĩgũre. ¿Ne pohe opũ dujaragũ dohpa iigũcuri ĩgu ya pohere mohme corerãre? arĩpũ Jesu.

—Õpa iigũcumi erãre. ¹⁶ ĩgu pohere mohme corerãre wejẽgũ, gajirãpũre pohere mohme coredoregũcumi, arĩ yũhripũ Jesu ĩgu basi.

ĩgu eroparĩcũ peerã masapũ õpa arĩñorã:

—Marire eropa wabiricãporo, arĩñorã erã.

¹⁷ Erã eroparĩcũ Jesupũ erãre ĩha serẽpipũ:

—¿Goãmũ yare erã gojarapũre õpa arĩra dohpa arĩro iiri mũa pepicũ?

Ihĩ Cristo utãye iro dopa ta aħrimi. Masa Cristore gamebirãcoma. Erã ĩgũre gamebiriqerercũ Goãmũ ĩgũre beye erã opũ erãre taubu acumi, arĩ gojañuma.

¹⁸ Yũre gamebirãpũ yũ dipuwaja moamorã árĩrã ñero tarirãcoma, arĩpũ Jesu erãre.

*Oparã ya wajare wajayeburire gajirã serẽpiñorã Jesure
Mt 21.45-46; 22.15-22; Mr 12.12-17*

¹⁹ ĩgu eroparĩcũ peerã judio masa buherã, pahia oparã sã "Jesu iri pohe opũ queori mera 'Erã ñerã mohme corerã iro dopa aħrima,' arĩgu marire weresãgũ iicumi ĩgu," arĩ pepiñorã erã.

Eropa arĩ pepirã erã Jesure ñeadiariñorã. Eropa ñeadiquererã ta masa Jesure gamerã mari mera guari arĩrã erã masare gũi arĩñorã. ²⁰ Eropa gũirã Jesure erã ñeaburisubure corerã ĩgũre ĩhanũrũñorã. ĩgu ñero arĩ yũhricũ ĩadiarã iiriñorã ĩgũre weresãmorã. Eropirã Jesure gajino serẽpidorerã obeoñorã gũyarãre. Erãre diaye iirã dopa wereniguidoreñorã. Jesu ñero ĩgu werenicũ peerã iri yeba majagũ opũre peresu iidoremorã iiriñorã. ²¹ Eropirã erã Jesure serẽpiñorã:

—Buhegu, diaye wereniguigu, gũyari marigu mũ árĩcũ gũa masia. Eropigu opũ árĩcũ sãre ĩgu bu árĩgu ĩgu árĩcũ sãre yujuropa ĩhaa mũhũ. Mũhũ Goãmũ yare diaye mũ buhecũ sãre gũa masia. ²² Wereque gũare: ¿Roma majagũ árĩpehrerã tauro opũ árĩgũre gobierno majare marire wajayero gahmeri mũ pepicũ? ¿Mari doreripũ irire wajayedoreri? arĩñorã erã Jesure.

²³ Erã eroparĩcũ Jesu erã ñero iidiarire masigu erãre werepũ:

—¿Duhpirã yu ñero wereniguicũ peediarì mua?
 24 Dohparagã niyerusere aĩrique. Irisere ñarã, arĩpu.

Irisere erã aĩ eracũ ñagu õpa serẽpipu Jesu:

—¿Nihino gohra waĩcugu masu tuhyari irisere? ¿Noa waĩ tuhyari? arĩ serẽpipu Jesu erãre.

—César, masa tauro opu waĩ ñgu masu sã tuhyami iriseguere, arĩ yuhriñorã erã.

25 Erã eroparicũ Jesu werẽpu:

—Irisubu tamerare masa tauro opuere ñgu yare oque. Goãmũ yapuere Goãmũre oque, arĩpu Jesu erãre.

26 Eropirã masa erã peero Jesure ñero arĩ wereniguicũ iimasibiriñorã erã. Eropirã erã Jesu yuhririre peerã erã peemaria wañorã. Eropa peemariarã, ejarimaria wañorã.

Saduceo masa Goãmũ ñgu sĩrinirã masurire serẽpiñorã Jesure

Mt 22.23-33; Mr 12.18-27

27 Eropi bajamerãgã Saduceo masa Jesu pohrogue erañorã. “Goãmũ sĩrinirãre masusome,” arĩ pepirã árĩñorã Saduceo masa. Eropirã erã õpa arĩñorã ñgure:

28 —Buhegu, marire õpa arĩ gojañumi Moise: “Yujugu ñgu tĩgu marapocugu porã mariqueregu ta ñgu sĩricũ ñagu ñgu pagu magure ñgu tĩgu marapo árĩdigore marapocuro gahmea. Eropa iigu ñgu tĩgu muru ñgu porãcubodiro dopa ta porãcuro gahmea ñgu pagu magure. Eropirã ñgu tĩgu muru porã iro dopa árĩrãcoma,” arĩpu Moise, arĩñorã erã.

29 Irire arĩtuha i queorire werenemoñorã erã Jesure:

—Yujugu porã siete árĩñorã. Erã tĩgupũ marapocu porã marigu ta sĩria wapũ. 30 Eropigu gajigu ñgu pagu magu sã ñgu tĩgu marapo árĩdigore ta marapocupu. Ñgu eropa marapocura puhrũ ñgu tĩgu muru iro dopa ta ñgu sã porã mariqueregu ta sĩria wapũ. 31 Eropigu ihĩ pagu magu sã ñgu tĩgu muru iro dopa ta porã mariqueregu sĩria wapũ. Eropa dihta wañorã yujugu porã gohra. Ne porã mariquererã ta sĩripehrea wañorã. 32 Erã marapo sã erã puhrũ sĩria wapo pare, arĩ, Jesure serẽpiñorã: 33 ¿Ne, Goãmũ árĩpehrerãre sĩrinirãre ñgu masucũ nihino marapo gohra árĩgocuri igo? Erã siete árĩpehrerã igore marapocunirã árĩñorã. ¿Eropigo nihino marapo gohra árĩgocuri igo? arĩ serẽpiñorã erã.

34 Erã eroparicũ Jesu yuhripũ:

—I yeba majarã uma nome mera marapocuma. 35 Erã eropa iiquerecũ ta umusi majarãpu eropa árĩbeama. Dohpaguere masare umare, nome sãre diaye iirãre Goãmũ õarã iigucumi. Erã erã sĩrira puhrũ masa mũriarãcoma Goãmũ pohrogue. Eropirã erã eroguere marapocubeama.

36 Eropirã erã anyua iro dopa ta ne sĩrisome daja.

Erā Goām̄ ĩḡu masunirā árīrā, Goām̄ porā āhrima. ³⁷ Dohpaguere sīrinirā erā masa m̄riaborop̄are m̄are wereḡara. Irire masia m̄a ĩḡu Moise ĩḡu arī gojarare. “Iri yuc̄uḡague ũjudiḡue árīḡu Goām̄ ōpa arī weremi ȳre,” arī gojañumi Moise. “Ȳh̄u Abrahā, Isaa, Jacobo erā op̄a ta āhraa,” arī weremi Goām̄ ȳre,” arī gojañumi Moise. ³⁸ Erā sīrira p̄hr̄gue “Erā op̄a ta āhraa,” arīñumi Goām̄. Eropirā erā sīrinirā m̄ra ĩḡu masunirā árīrā erā ojocarirā āhrima. Árīpehrerā masa sīriquererā ojocarirā āhrima Goām̄ ĩḡu ĩac̄ũ, arīp̄u Jesu erāre.

³⁹⁻⁴⁰ ĩḡu eroparīc̄ũ erāp̄u dipaturi Jesure serēpidiabiriñorā. Eropirā bajamerāḡā judio masare buherā ōpa arīñorā:

—Buheḡu, m̄h̄u ōaro ȳh̄riab̄u, arīñorā erā ĩḡure.

Cristo Davi m̄r̄u op̄u āhrimi, arī werep̄u Jesu
Mt 22.41-46; Mr 12.35-37

⁴¹ P̄hr̄u Jesu ōpa arī werep̄u masare:

—“Cristo Davi m̄r̄u p̄arami árīḡuc̄umi,” arī buherima m̄are buherā. ¿Duhpirā erā eropa arī buheri? ⁴² Davi m̄r̄u ĩḡu basi Salmo ĩḡu gojarap̄ūḡue ōpa arī gojañumi: Goām̄ ȳu op̄are ōpa arāmi: “Oh̄o ȳu diayep̄u dorebu doaque. ⁴³ Eropiḡu m̄re ĩhaturirāre m̄re tarin̄gabasaḡara ȳh̄u,” arīmi Goām̄ ȳu op̄are, arī gojañumi Davi m̄r̄u.

⁴⁴ Eropa arī gojaḡu Davi m̄r̄u op̄uc̄ñumi Cristore. ¿Eropiḡu Davi m̄r̄u Cristo ñec̄u m̄r̄u árīquereḡu ta duhpiḡu Davip̄u Cristore op̄uc̄yuri? Cristo Davi m̄r̄u op̄u āhrimi, arī werep̄u Jesu.

Masare buherā erā ñero iirire werep̄u Jesu
Mt 23.1-36; Mr 12.38-40; Lc 11.37-54

⁴⁵ Masa bajarā watope Jesup̄u ĩḡu buherāre ōpa arī werep̄u:

⁴⁶ —Masare buherā erā ñeri iirire ĩarā ōaro pee masique. Eropirā erā iro dopa iibiricāque. Erā yoari suhri sañama masa erāre ĩaboro dopa. Doberi duarogue gajirā umupeori mera bocat̄iri serēc̄ũ gahmema erā. Eropirā erā mari buheri wiriguere oparā ōari doari dihtare doadiama erā. Eropirā bosen̄ri árīc̄ũ s̄are oparā erā doarigue dihtare doadiama. ⁴⁷ Erā wapeweyarā nome erā wajamoc̄ũ ĩha erā ya wirire eh̄mama erā nomere. Eropa erāre mojomoro ĩabiriquererā erā masa erā ĩhurore yoari boje Goām̄re serēma, “Ḡ̄a Goām̄re ōaro umupeoa,” arī ḡ̄yarā. Erā eropa iira dipuwaja Goām̄re erāre gajirā tauro dipuwaja moaḡuc̄umi, arīp̄u Jesu erāre.

21

Wapeweyo Goãmũ wihigue igo apirare werepũ Jesu
Mr 12.41-44

¹ Eropa arĩ weretuha Jesu Goãmũ wihi maja erã amuburi niyeru gameneori comoro pohrogue ìha doapũ. Iri comorogue doberi oparã erã niyeru sãcũ ãapũ Jesu.

² Eropa ãagũ wapeweyo mojomorocũgo igo pesegã igo oparaserigãre igo sãcũ sãre ãapũ. ³ Irire ãatuha õpa arĩ werepũ:

—Diaye arĩgũ iiaa mũare. Igo wapeweyo mojomorocũgorũ ii comorogue igo yare sãgo gajirã árĩpehrerã erã sãdiro tauro sãmo igoa. ⁴ Gajirã doberi oparã erã wũaro oquerecũ ta erãpũre erã ya wũaro dũhyaa. Igorũ mojomorocũgo árĩquerego ta árĩpehreri igo bari waja árĩborare opehocãmo igoa, arĩpũ Jesu.

—Goãmũ wihi cóãra wihi árĩroca, arĩpũ Jesu
Mt 24.1-2; Mr 13.1-2

⁵ Eropi gajirã Goãmũ wihire ãarã õpa arĩñorã:

—Õari utã mera iira wihi, õari wihi ãhraa. Masa Goãmũ wihire erã ora sã õari ãhraa, arĩ wereniguirã iñorã.

Erã eroparĩcũ Jesu werepũ erãre:

⁶ —I wihi majare dohpaguere ãaraa mũa. Gajinũ árĩcũ i wihi maja árĩpehreri mari ãara, i utã sã cohmopehrea waroca. Ne yujuye utãye dujasome, arĩpũ Jesu erãre.

I mũũ pehreburiũre werepũ Jesu
Mt 24.3-28; Mr 13.3-23

⁷ Ìgũ eroparĩcũ peerã erãpũ serẽpiñorã ãgũre:

—Buhegũ, ¿dohpárĩcũ eropa warocuri mũ arĩdiro dopa waro? ¿Pehreburiũ coregãre dohpa wanũgacũ ãarãcuri gũa? arĩ serẽpiñorã erã ãgũre.

⁸ Jesu yũhripũ erãre:

—Õaro iyuque mũa. Eropirã gajirã mũare erã gũyarire peebiricãque. Bajarã masa “Cristo ãhraa yũhũ,” arĩ gũyarã árĩrãcoma. Eropa arĩ gũyarã “Dohpaguere pehreburiũ merogã dũhyaa,” arĩrãcoma. Erã eroparĩcũ erãre peebiricãque. ⁹ Eropirã mũa pohrogã gajirã masa gamewejẽcũ, masa erã oparãre cóãcũ peerãca. Eropirã yoarogue majarã sã eropa iicũ peebeorãca. Mũa irire peerã gũibiricãque. Pehreburiũ core õpa wamũhtaroca. Eropa wamũhtacũ pehreburiũ dũhyaniroca dohpa, arĩpũ Jesu.

¹⁰ Eropa arĩtuha õpa arĩ werenemopũ:

—Irisubure yuju yeba majarã gaji yeba majarã mera gamewejẽrãcoma. Eropirã yujugũ opũ yarã gajigũ opũ yarã mera gamewejẽrãcoma. ¹¹ Eropiro bajasuburi i yeba

ñohmeroca. Eropirã masa bajarã oa mera sïri, árïpehrero majarã masa dorecūrãcoma. Eropirã umaro majare deyoro moarire guhyadiarire masa ïarã, ïha uca warãcoma. Eropa wacũ mupũ güibiricãque.

12 "I árïpehreri eropa waboro core, yaharã mua árïri dipuwaja gajirã mware ñeha ñero iirãcoma. Eropirã mari judio masa buheri wirigue mware weresã, peresu iirãcoma mware. Erã eropa iicũ macari majarã oparã pohrogue erã tauro oparã pohrogue sãre mware aïgārãcoma erã mware dipuwaja moadorerã. 13 Erã eropa mware aïgãcũ mupũ erãre õari buherire wererãca. 14 Erã oparã pohrogue mware erã aïgãcũ erã oparãre mua yuhriborore wuaro guñabiricãque mua. 15 Yuhũ mware wereniguicũ iigura. Mware eropa itamugũ pee masirire, õari wereniguiri sãre mua iicũ iigura. Mua eropa iicũ mware ïhaturirãpũ mua wereniguirire pee bocatũmasisome. "Iri diaye árïbeaa," arï yuhrimasisome. 16 Irisuburi mua yaharã árïcũ ïha mua pagũ sumarã, mua pagũ porã, mua acawererã, mua mera majarã sã mware oparãre wejedorerã orãcoma mware. Erã eropa iicũ mware ïhaturirã mua mera majarãre gajirãre wejērãcoma. 17 Eropirã yaharã mua árïcũ ïarã, árïpehrerã mware ïhaturirãcoma. 18 Mware eropa iicũ mupũ ne dederesome. 19 Eropirã erã mware ñero iiquerẽcũ ta mware erã ñero iirare yujuro bojerã yure duhubiricũ Goãmũ mware taugũcumi. Eropigũ ïgu pohrogue mware opagũcumi.

20 "Eropirã bajarã surara Jerusalenguere erã cãhmotacũ ïarã, Jerusalenre erã cóãborore merogã duhyacũ masirãca mua. 21 Eropa wacũ ïarã Judea yeba árïrãpũ utã yucugue oma duhriporo. Eropirã Jerusalen árïrã sã waporo. Eropirã campo árïrã Jerusalenguere wabiricãporo daja. 22 Irinũri dipuwaja moarinũri árïpehreri Goãmũ yare erã gojarapũ erã arïdiro dopa ta eropa waroca. 23 Goãmũ oã masare turaro dipuwaja moacũ árïpehrerogue i yebaguere ñero tarirãcoma. Eropa wacũ nijiposã nome, erã porãre mihrirãre oparã nome sãmojomorocūrã nome dujarãcoma irisubure. 24 Gajirã i maca majarãre gamewejērãcoma. Eropirã gajirã i maca majarãre árïpehreri yebarigue aïgã peresu iirãcoma. Eropirã judio masa árïbirã Jerusalenre ñero iirãcoma. Eropirã erã tarinugarãcoma. Judio masa árïbirãre "Iripẽta árïque," Goãmũ ïgu arïcũgue Jerusalenre ãhri duhurãcoma, arï werepũ Jesu.

Jesu i yebague ïgu dujariborore werepũ

Mt 24.29-35, 42-44; Mr 13.24-37

25 Eropigũ erãre werenemopũ:

—Irisubure abe umu majagu, ñami majagu, necã sã guhyaro gohrotoa warãcoma. Árïpehrerã i yeba majarã, “Cue, sïrirãca,” arï pepirãcoma. Wuariya turaro busarire pãguri sãre turaro güirãcoma. ²⁶ Irisubure umaro maja sã yeba sã burigã ñohmeroca. Eropa wacũ ñarã masaru i yeba pehrebore corerã burigã güirãcoma dedereri arïrã. ²⁷ Irisubu ta yuhu masu Goãmu ñgu obeodigu Goãmu ñgu turari mera, ñgu gosesiriri mera umaro maja imica weca i yebaguere yu dujaricũ ñarãcoma masa. ²⁸ Yu eropa arïra wanugacũ ñarã güibiricãque. Eropirã guñatura umarogue ñhamujuque. Irisubure Goãmu mware ñgu tauboro merogã duhyaroca, arïru Jesu.

²⁹ Eropa arïtuha i queori mera erãre werepu Jesu:

—Higueragu baja gaji yucu sã iri yucu waricurire pepique mua. ³⁰ Iri yucu puricacũ ñarã, “Bojori merogã duhyaa,” arï masia mari. ³¹ Eropa ta i árïpehreri yu arïra iri eropa wacũ ñarã, “Goãmu ñgu opu árïburisubu merogã duhyaa,” arï pepirãca mua. ³² Mware diaye arïgu iiaa. Irisubu majarã erã sïriboro core árïpehreri yu arïra eropa waroca. ³³ Umaro i yeba sã pehrea waroca. Yu wereniguiripu ne pehresome. Árïpehreri yu arïdiro dopa ta eropa waha ojogorocuroca.

³⁴ “Yu dujariburinure ne masibea mua. Eropirã ñaro arïyuque. Bosenurire pagari iiniguibiricãque. Eropirã merebiricãque. I yeba maja iiburire wuaro pepibiricãque. Mware yu arïdiro dopa ta ñarã, guñaña mariro i yebaguere yu aricũ ne ucasome. ³⁵ Yuhu masare beyegu arigu guñaña mariro ariguca. Waibugu guñaña mariro ñgu weradague ñgu mehsihajaro dopa ta irinu waroca masare árïpehrerã i yeba majarãre. I yeba majarã “Eropa waroca,” erã arïbiririnu eropa waroca. ³⁶ Murpu ñaro guñatura coreque. Eropirã Goãmure ire serënguicãque: “Pehrerinu eropa wacũ yure itamuque. Turarire oque yure ñaro yu tariboro dopa. Eropigu Cristore mu obeogure güiro mariro yuhu ñgure bocatiricũ iique yure,” arï serëque Goãmure, arïru Jesu.

³⁷ Eropi irinurire Goãmu wihigue Jesu buhemuripu. Ñamiri nucu buhetuhajagu Olivo waicudigugue waha irigugue arïboyotahmuamuripu. ³⁸ Boyocũ árïpehrerã masa ñgure Goãmu wihigue peerã wamurïñorã.

22

Pahia oparã, judio masare buherã mera wejediañorã

Jesure

Mt 26.1-5, 14-16; Mr 14.1-2, 10-11; Jn 11.45-53

¹ Eropi irisubure bugabiriri pan erã baburi bosenu merogã duhyayoro. Iri bosenu Pascua waicayoro. ² Eropirã pahia oparã, judio masare buherã mera Jesure wejëdiarã, erã wejëborore guñamaañorã. Jesure wejëdiaquererã ta masapure güiñorã guari arĩrã.

³ Eropi Judapu watĩ ñgure ñero iidorecũ yuhripũ ñgure. Juda doce Jesu buherã mera majagu arĩripũ. ⁴ Eropigu pahia oparãre, Goãmũ wihi majarã surara oparã mera sãre weretamugũ wapu. Erã pohrogue eja, erãre Jesure ñgu ñhmuborore weretamupu erã mera. ⁵ Ñgu erãre eroparĩcũ pee erã mucubiri, “Mũre niyeru wajayerãca,” arĩñorã erã Judare. ⁶ Erã eroparĩcũ, “Áũ, mũare ñgure ñhmugũra,” Juda arĩpu. Eropigu masa erã ñabiririsubu Jesure ñhaturirãre ñgu ñhmuborore corenipũ.

Jesu ñgu buherã mera ñgu baturinu arĩyoro

Mt 26.17-29; Mr 14.12-25; Jn 13.21-30; 1Co 11.23-26

⁷ Bugaririri panre erã baburinu bosenu arĩnugarinu arĩyoro. Eropiro Pascua majagu arĩbure ovejare erã wejërinu arĩyoro. ⁸ Irisubu ta Pedro, Ñu sãre Jesu werepu:

—Bosenu mari baburire amurã waque, arĩpu Jesu erãre.

⁹ —¿Nohonogue mari baburire amudoregu obeori mũhũ guare? arĩ serëpiñorã erã.

¹⁰ Erã eroparĩcũ Jesu yuhripũ:

—Jerusalengue waque. Erogue mũa ejacũ deco sorobu tuhpeogu mũare bocatĩrigucumi. Ñgu bocatĩricũ ñgu mera waque. ¹¹ Eropa warã ñgu sihu ñajari wihigue ejarã, wihi opure õpa arĩque: “¿Nohogue yũhũ, yũ buherã mera Pascua maja barire barãcuri?” arãmi buhegu,” arĩque wihi opure. ¹² Mũa eroparĩcũ peegu wũari taribure, umaro maja taribure, mari gameri mera erã amura taribure ñhmugucumi wihi opu. Erogue mari baburire iique mũa, arĩpu Jesu erãre.

¹³ Ñgu eroparĩcũ erã iri macague wañorã. Erogue erã ejacũ erãre ñgu arĩdiro dopa ta eropa wayoro. Eropirã erã Pascua arĩcũ baburire amuñorã.

¹⁴ Erã barisubu arĩcũ Jesu doce ñgu buherã mera ba doapu. ¹⁵⁻¹⁶ Erogue erã barogue doagu Jesu erãre werepu:

—Mũare arĩgu iiaa. I Pascua bosenure mari iiaa Goãmũ ñgu yarãre ñgu taurare guñarã. Pũhrũ Goãmũ ñgu opu arĩrogue ñgu yarãre tautuhagucumi. Ñgu eropa tauboro

core inuno majare dipaturi basome yũhũ. Eropigu dohpague yũ ñero tariboro core i Pascua maja barire mũa mera turaro badiabũ, arĩpũ Jesu.

17-18 Eropa arĩgũ Jesu ihriripare aĩ, Goãmũre “Õhaa,” arĩ serẽ, erãre werepũ:

—Mũare arĩgũ tiiaa. Goãmũ ĩgũ opũ árĩrogue ĩgui decore ihriboro core ne dipaturi ihrisome yũhũ. Eropirã iri vinore aĩ mũa basi ihrique, arĩpũ Jesu.

19 Eropa arĩtuha panre aĩ, Goãmũre “Õhaa,” arĩpũ. Eropa arĩtuha irirure nuha guerepũ erãre. Irirure gueregũ ta erãre werepũ:

—I yũ dũpũ ãhraa. Yũ dũpũ yũre ĩhaturirãre erã oburi dũpũ árĩroca. Mũa ñeri iira wajare cóãbu sĩrigũca yũhũ. Eropirã mũa yũre guñaburire ire baque, arĩpũ Jesu.

20 Eropa batuha eropa ta erãre ihriripa sãre ópũ. Eropigu erãre werepũ:

—Mũa ñeri iirare cóãbu sĩrigũca. Eropigu yũ dire cóãgũca. Eropa sĩrigũ yũ Pagũ Goãmũ “Masare õaro iĩgũra,” ĩgũ arĩdiro ii ojogorocũgũca.

21 “Dohpague peeque mũa. Yũre ĩhaturirãre ĩhmubu yũ mera ohõ doami. 22 Goãmũ ĩgũ arĩdiro dopa ta yũhũ masũ Goãmũ ĩgũ obeodigu sĩrigũca. ĩgũ eropa sĩridorequerecũ ta yũre ĩhaturirãre ĩhmudigũpũ ñetariaro tarigũcumi, arĩpũ Jesu.

23 ĩgũ eroparĩcũ erãpũ erã basi ópa arĩ serẽpiñorã:

—¿Jesure ĩhaturirãre ĩhmubu mari mera majagũ nihino arĩcuriba? arĩ serẽpiñorã erã basi.

“¿Mari mera majagũ nihinopũ opũ árĩgũcuri?” arĩ wereniguiñorã Jesu buherã

24 Pũhrũ Jesu buherã ópa arĩ dũyasoñorã:

—¿Mari mera majagũ nihipũ árĩgũcuri opũ? arĩ wereniguiñorã erã basi.

25 Erã eropa arĩ wereniguicũ peegu Jesu erãre werepũ:

—Goãmũre masibirã oparãpũ erã masare dorerã pũriro mera dorema. Eropirã oparãre “Erã masare õaro itamurã ãhrima,” arĩrima gajirã erãre. 26 Mũapũ eropa oparã árĩdiasome mũa basi. Mũa mera majagũ mũa tĩgũpũ mũa pagũ magũ iro dopa árĩporo. Mũa mera majagũ opũ árĩdiagũ gajirã itamugũ árĩporo. 27 ¿Nihino ãhriri opũ mũa pepicũ? ¿Ba doagũpũ opũ ãhriri? ¿O barire duhpogũpũ opũ ãhriri? Ba doagũ ta árĩcumi opũ. ĩgũ eropa árĩquerecũ ta yũpũ pohro majagũ iro dopa ta mũare itamugũ ahrabũ.

28 “Masa erã yũre ñero iiquerecũ ta mũapũ yũre duhubirabũ. 29 Eropigu yũ Pagũ ĩgũ yũre opũ acudiro dopa ta

mua sãre oparãre acugura yũhũ. ³⁰ Yũ opũ árĩcũ mua sã yũ bari mesa ta baha ihrirãca. Eropirã mua oparã doarire doarãca. Mua ero doarã Israe masare doce cururi majarãre beyerãca ðarã sãre ñerã sãre, arĩpũ Jesu ïgũ buherãre.

Pedro “Jesure masibea,” ïgũ arĩ gũyaburiñere wereñumi Jesu

Mt 26.31-35; Mr 14.27-31; Jn 13.36-38

³¹ Eropa arĩtuhaja Pedrore Jesu ðpa arĩ werepũ:

—Simo Pedro yũre peeque. Watĩ Satana mũare árĩpehrerãre gamegũ Goãmũre serẽrami. Mua yũre duhu ïgũ yare iicũ gamegũ serẽrami. Trigo pohe opũ ïgũ trigo gasirire cõãgũ puri siriro dopa mũare goroweodiami.

³² ïgũ mũare eropa gamequerecũ yũpũ mũre Goãmũre serẽbasabũ. Yũre mũ umupeo duhubiriburire serẽbasabũ Goãmũre. Eropigũ mũhũ yũ mera majagũ dipaturi árĩgũ mũ acawererãre yaharãre guñaturacũ iique mũhũ, arĩpũ Jesu Pedrore.

³³ ïgũ eroparĩcũ Pedro yũhripũ:

—Opũ, mũre erã peresu iiquerecũ ta, yũhũ mũ mera majagũ árĩniguigũca. Mũre erã wejẽquerecũ ta mũ mera majagũ árĩniguigũca, arĩpũ Pedro.

³⁴ Jesu yũhripũ:

—Pedro, mũre arĩgũ iiaa. Dohpagã ñami cãreña ïgũ wereboro core uhresubu “Jesure masibea,” arĩgũca mũhũ gajirãre, arĩpũ Jesu Pedrore.

Jesure erã ñero iinũgaboro merogã duhyayoro

³⁵ Eropa arĩtuha Jesu ïgũ buherãre werepũ:

—¿Sohõ árĩrasubure mua niyeru aju moorã, suhri diyeri aju moorã, zapatu moorã mũare yũ obeorasubure gajino duhyari mũare? arĩ serẽpipũ Jesu.

—Ne gajino guare duhyabirabũ, arĩ yũhriñorã erã.

³⁶ —Irisubure mũare duhyabiriquerecũ ta dohpaguepũre suhri diyeri ajure, niyeru aju sãre oparã irire aĩque. Eropirã mũare matamijiri maricũ ïarã mua suhrire duarã irimijire asũque. ³⁷ Ire mũare arĩgũ iiaa. Goãmũ yare erã gojarapũ erã arĩdiro dopa ta yũre eropa waro gahmea. Òpa arĩñuma iripũgue. “ ïgũ dorerire tarinũgarã mera majagũ ãhrimi,” arĩrãcoma masa,” arĩ gojañuma yũre, arĩpũ Jesu. Erãpũ arĩñorã:

³⁸ —Ïaque opũ. Pemiji matamijirire opaa gũca, arĩñorã ïgũ buherã.

—Iripẽta árĩca, arĩ yũhripũ Jesu.

Getsemanĩque Jesu Goãmũ mera wereniguipũ

Mt 26.36-46; Mr 14.32-42

³⁹ Eropi Jesu ĩgu ero core ĩgu iiguadiro dopa ta Olivo waĩcũdĩgu utãgũgue waha wapũ. ĩgu eropa wacũ ĩgu buherã ĩgu mera wañorã. ⁴⁰ Eroque ejagu ĩgu erãre werepũ:

—Goãmure serẽque mua ñerire iibiriboro dopa, arĩpũ erãre Jesu.

⁴¹ Eropa arĩtuha ĩgu seyaro merogã yujugu ta wanemo, mereja Goãmũ mera werenĩguipũ:

⁴² —Ahũ, yũ ñero tariburire iidiabigu iibircãque. Yũ eropa serẽquerecũ ta yũ gamero dopa iibita. Mũpũ masia. Mũ gamero dopa ta iique, arĩ serẽpũ Jesu Goãmure.

⁴³ ĩgu eropa arĩ serẽcũ umarogue aridigu anyu Jesure dehyoapũ ĩgure itamugũ. ⁴⁴ Eropigu Jesu ñero siporãcũ turaro mera Goãmũ mera werenĩguipũ. Eropiro ĩgu ñajasiri guari di wiriro dopa ĩgure wiridijayoro.

⁴⁵ Goãmũ mera werenĩguituha wahgãnũgaja, ĩgu buherã pohrogue dujaa wapũ. ĩgu dujacacũ ĩgu buherã bũrigã bujawererã arĩrã carĩrã arĩñorã. ⁴⁶ Eropigu Jesu erãre õpa arĩ werepũ:

—¿Duhpirã carĩri mua? Wahgãque. Goãmure serẽque mua ñeri iibiriburire, arĩpũ Jesu erãre.

Jesure ĩhaturirã ĩgure peresu iĩnorã
Mt 26.47-56; Mr 14.43-50; Jn 18.2-11

⁴⁷ ĩgu eropa arĩ werenĩguirisubu masa bajarã erañorã. Juda doce buherã mera majagu arĩdigu masare mahtagãridigu arĩpũ. Eropigu ĩgu Jesu pohro eraa, ĩgu wayuporãre mimipũ ĩgure. ⁴⁸ ĩgu eropa mimicũ Jesupũ ĩgure serẽpipũ:

—Juda, ¿yũ masure Goãmũ ĩgu obeodigũre yũre ĩhaturirãre ĩhmugũ yũ wayuporãre mimiri mũhũ? arĩpũ Jesu.

⁴⁹ ĩgu eropa arĩra pũhrũ Jesu buherã masa Jesure erã ñeaburire masirã ĩgure serẽpiñorã:

—Opũ, ¿gũa matamijiri mera erãre gamequeãsi? arĩñorã erã.

⁵⁰ Erã eropa arĩra pũhrũ yujugu Jesu buherã mera majagupũ pahia opũ pohro majagũre ĩgu matamiji mera ĩgu gamirore diayerũ arĩri gamirore tabe coro dijucãpũ.

⁵¹ ĩgu eropa iicũ ĩagu Jesu õpa arĩpũ:

—Iibita, arĩpũ.

Eropa arĩtuha pohro majagu gamiro arĩrañere mohmeripũ. ĩgu eropa iicũ pohro majagupũ mũraro ta dujarũ daja. ⁵² Eropa iituha pahia oparãre, Goãmũ wihi surara oparãre, mũrã sãre ĩgure ñeamorãre Jesu serẽpipũ:

—¿Múa matamijiri mera, yucu ducari mera arirã yajari masure iro dopa ta yure ñearã arirã iari? ⁵³ Umuri nucu Goãmú wihigue múa mera yu árícú, múa yure ñeabiribú. Eropa aríquerecú ta dohpague múa ñerã yanú ta áhraa. Watí ĩgú tarinugaburisubú árĩro iiaa, arĩpú Jesu.

“Jesure masibea,” arĩpú Pedro

Mt 26.57-58, 69-75; Mr 14.53-54, 66-72; Jn 18.12-18, 25-27

⁵⁴ Erã Jesure ñeatuha pahia opu ya wihigue aĩgãñorã erã ĩgure. Erã aĩgãcú Pedro yoarogue erãre ĩhanurúsiarú. ⁵⁵ Opu ya wihigue ejacú, iri wihire cãhmotara sãriro pohecague õari goro deco peame dihuñorã gajirã. Erã dihucú ĩagu Pedro peame pohro doarã mera doarú. ⁵⁶ ĩgú peame boyorogue doacú yujugo pohro majago ĩgure õaro ĩhanurú gajirãre õpa arĩ werepú:

—Ihĩ sã ĩgú mera ta áhrami, arĩpo igo.

⁵⁷ Igo eroparícú Pedro yuhripú:

—Nomeo, ĩgure ne masibea yuhú, arĩripú Pedro.

⁵⁸ Puhru ñari gajigu Pedroro ĩha, õpa arĩ werepú:

—Mú sã erã mera majagu ta áhraa, arĩpú ĩgú.

—Ne, árĩbeaa, arĩripú Pedro.

⁵⁹ Yuju hora puhru gajigu gajirãre õpa arĩ werepú:

—Diaye ta áhraa. Ihĩ Galilea majagu áhrimi. Diaye ta Jesu mera áhrami ihĩ sã, arĩpú ĩgú gajirãre.

⁶⁰ ĩgú eroparícú Pedro yuhripú:

—Mú arĩgure ne masibea yuhú, arĩ yuhripú.

ĩgú eropa arĩ wereniguirisubú cãreña werepú. ⁶¹ ĩgú werecú mari Opu Jesu wihi pohro árĩdigú Pedroro maji ĩarú. ĩgú eropa ĩacú Pedropú Jesu ĩgú arĩrare guñarú. “Dohpagã ñami cãreña ĩgú wereboro core, uhresubú múhú, ‘Yuhú Jesure masibea,’ arĩgúca múhú,” Jesu ĩgú arĩrare guñarú Pedro. ⁶² Eropigu Pedro erogue wiriri, turaro orepú.

Jesure wereya, pañorã erã

Mt 26.67-68; Mr 14.65

⁶³ Eopirã Jesure corerã surara ĩgure wereya, pañorã.

⁶⁴ Eropa parã ĩgú cuirire diricãhmota, ĩgure serẽpiñorã:

—¿Noa mure pari? ĩabiriqueregú ta wereque guare, arĩ wereyañorã erã.

⁶⁵ Eopirã baja gají ñero arĩ wereyañorã erã ĩgure.

Jesure opu serẽpipú

Mt 26.59-66; Mr 14.55-64; Jn 18.19-24

⁶⁶ Eopirã boyorogue ta murã, pahia oparã, judio masare buherã sã gamenererã. Erã eropa gamenererore gajirã erã pohroge Jesure aĩgãñorã.

67 —Wereque guare. ¿Goãmũ beyedigũ Cristo ãhriri mũhũ? arĩ serẽpiñorã erã Jesure.

Erã eroparĩcũ Jesu yũhripũ:

—Mũare yũ werecũ sãre yũre peesome mũa. ⁶⁸ Mũare yũ serẽpicũ yũre yũhrisome mũa. Eropirã yũre wiwsome mũa.

⁶⁹ Mũa yũre wiubiriquerecũ ta pũhrũ ñari umari nũcu yũhũ masũ Goãmũ ïgũ obeodigũ Goãmũ yũ Pagũ turagũ ïgũ diayerũ doagũ árĩgũca, arĩpũ Jesu.

⁷⁰ ïgũ eroparĩcũ erã árĩpehrerã serẽpiñorã daja dipaturi:

—¿Eropa arĩgũ “Yũhũ Goãmũ magũ ãhraa,” arĩri mũhũ? arĩñorã erã.

—Mũa arĩro dopa ïgũ ta ãhraa, arĩ yũhripũ Jesu erãre.

⁷¹ ïgũ eroparĩcũ õpa arĩ erã basi wereniguĩñorã erã:

—Ïre weresãrãre gajirãre mari gamebeaa pare. Erã nũcu ta sihajama. ïgũ Goãmũre ïgũ ñero wereniguicũ mari basi ta mari peea. Eropirã ïgũ ñero iira dipuwajare masituhã, arĩñorã erã erã basi.

23

Pilato Jesure serẽpipũ

Mt 27.1-2, 11-14; Mr 15.1-5; Jn 18.28-38

¹ Eropa arĩtuha erã árĩpehrerã wahgãnũgaja, Jesure Pilato waĩcũgũ opũ pohrogue aĩgãñorã. ² Aĩ ejarã Jesure weresãnũgañorã:

—Ihĩ mari ya yeba majarãre ñero iidorecũ peeabũ. Mari opũre Césare ihĩ wajayedorebeami. Eropigũ ïgũ “Yũhũ opũ ãhraa. Cristo ãhraa yũhũ,” arĩ wereniguimi ïgũ basi, arĩ weresãñorã erã Jesure.

³ Erã eropa arĩ weresãra pũhrũ Pilato Jesure serẽpipũ:

—¿Diaye ta judio masa opũ ta ãhriri mũhũ? arĩpũ ïgũ Jesure.

—Mũ arĩro dopa ta ïgũ ta ãhraa, arĩ yũhripũ Jesu.

⁴ ïgũ eroparĩcũ Pilato pahia oparãre, masa sãre wererũ:

—Ïre gajino waja dipuwaja mara, arĩpũ ïgũ.

⁵ ïgũ eropa arĩquerecũ ta erã turaro weresãnemoñorã:

—Ïgũ, ïgũ buheri mera masare gamequeãcũ iimi. Galilea yeba ïgũ irire iinũgami. Eropa iinũgatuha árĩpehrero Judea yebague irire ïgũ iimi, arĩ weresãñorã erã.

Herode waĩcũgũ opũ Jesure serẽpipũ

⁶ Erã eropa arĩ weresãcũ peegũ Pilatorũ serẽpipũ:

—¿Ihĩ Galilea majagũ ãhriri? arĩpũ ïgũ.

⁷ —Ero majagũ ta ãhrimi, arĩ yũhriñorã gajirã.

Erã eropa yũhricũ peegũ Pilatorũ Jesu ïgũ arĩri yebare masigũ opũ Herode ïgũ ya yeba majagũ ïgũ arĩcũ masipũ.

Irire masigũ Jesure Herode pohro obeopũ. Irisubure Herode Jerusalén árĩpũ. ⁸ Ero core Herode Jesure peemũripũ. Ĩgũ eropa peera pũhrũ ĩgũre bũrigã ĩadiaripũ. Jesu ĩgũ deyoro moarire ĩgũ ii ĩhmucũ ĩadiaripũ ĩgũ. Eropigũ ĩgũ Jesure ĩagũ mucubiripũ. ⁹ Eropigũ baja serẽpipũ Jesure. Ĩgũ eropa serẽpiquerecũ ta Jesupũ ne yũhribiripũ ĩgũre. ¹⁰ Pahia oparã, judio masare buherã sã Herode pohro nũgaja turaro Jesure weresãñorã. ¹¹ Erã eropa arĩ weresãra pũhrũ Herode ĩgũ surara mera wereya, Jesure ñero iĩñorã. Eropa wereyarã, õariñe suhrirore opũ yañe dopa bejariñere sãñorã erã Jesure. Eropa wereyatuha, iri suhrirore tuwea aĩ Pilato pohro obeoñorã daja. ¹² Irinũre Herode, Pilato mera õaro erã basi game iinũgarã árĩnũgañorã. Ero corere erã basi game ĩhaturirã árĩriñorã.

Masa Jesure wejẽdoreñorã

Mt 27.15-26; Mr 15.6-15; Jn 18.39-19.16

¹³ Eropi Pilato pahia oparãre, gajirã oparãre, masa sãre ĩgũ sihubeocũ gamenereñorã. ¹⁴ Erã gamenerecũ ĩagũ õpa arĩpũ erãre:

—Ĩre yũre aĩgãrirã, “Ĩgũ masare ñero iidoremi,” arĩraa mũa yũre. Dohpague mũa ĩhuro ĩre serẽpipehoabu daja. Yũ eropa serẽpira pũhrũ mũa ĩgũre weresãcũ ñeri dipuwaja mara yũ ĩacũ. ¹⁵ Herode sã “Ĩgũre ne ñeri dipuwaja mara,” arãmi. Eropa arĩgũ dipaturi ĩre ohõ dujuami daja. Eropiro ĩre wejẽdorero mara. Mũa sã irire ĩha masia. ¹⁶ Eropigũ ĩgũre tãraradari mera tãradoregũca yũhũ. Erã eropa tãrara pũhrũ ĩgũre wiugũra, arĩripũ Pilato.

¹⁷ Bojori nũcũ Pascua bosenũri nũcũ peresu árĩdigũre yu-jugũre masa gamegũre Pilato eropa wiubasamũripũ. Eropa iiro gameyoro ĩgũre. ¹⁸ Eropirã Pilato “Jesure wiugũra,” ĩgũ arĩcũ peerã árĩpehrerã masa õpa arĩ gaguinigiũñorã:

—Ĩgũ Jesure wejẽque. Gũa yagũ árĩbure Barrabãpũre gũare wiubasaque, arĩ gaguinigiũñorã masa.

¹⁹ Ero Barrabãpũ Jerusalengũe oparãre ĩgũ cóãdorera dipuwaja, ĩgũ gajirãre wejẽra dipuwaja peresu iĩñorã ĩgũre. ²⁰ Pilato Jesupũre wiudiaripũ. Eropigũ ĩgũ masare ĩgũ wiabure serẽpi ĩapũ daja. ²¹ Ĩgũ Jesure eropa wiudiaque-recũ ta erã ĩgũre arĩñorã daja:

—Crusague pabia wejẽque ĩgũre. Wejẽcãque ĩgũre, arĩ gaguiniñorã erã.

²² Erã eroparĩcũ Pilato uñresubu waro gohra õpa arĩripũ daja erãre:

—¿Ñehenore ñerire iari ĩgu mua eropa arĩ gaguiniguicũ? Ne ĩgure ñeri dipuwaja mara. Eropigu ĩgure wejẽdoremasibea. ĩgure tãraradari mera tãradoregũca. Iripẽta iidoregũca. Eropigu ĩgure wiugũca, arĩripũ Pilato.

²³ ĩgu eroparĩcũ ta erã turaro mera gaguininemo, Jesure crusague wejẽdoreñorã. Erã eropa arĩ gaguinicũ peegu Pilato erã gamero dopa ta iidorepũ. ²⁴ Eropigu erã arĩro dopa ta Pilato Jesure wejẽdorepũ. ²⁵ Eropa doregũ masa serẽdigure wiupũ. ĩgu peresugue árĩgure, masare gamewejẽcũ iidigure, masare wejẽdigure Pilato Barrabãpũre wiupũ. Eropigu masa erã gamero dopa ta Pilato Jesure crusague wejẽdorepũ.

*Erã Jesure crusague pabia wejẽñorã
Mt 27.32-44; Mr 15.21-32; Jn 19.17-27*

²⁶ Eropirã erã Jesure wejẽrã warã, aĩgãñorã. Erã eropa warisubu Simo waĩcũgũ Cirene majagu pohegue ejadigu erapũ. Jerusaléngue ĩgu eracũ ĩarã Jesure aĩgãrã ĩgure bocatĩri, ñeha, crusare ĩgure coãtamudoreñorã Jesu pũhrũ.

²⁷ Eropirã masa bajarã Jesure ĩhanũrusiañorã. Eropirã gajirã nome ĩgure erã eropa iicũ ĩarã turaro ore nũrusiañorã. ²⁸ Erã orecũ peegu Jesu erãre maji ĩha õpa arĩpũ:

—Jerusalén majarã nome yũre orebircãque. Mua basi, mua porã ya árĩburire oreque. ²⁹ Gajinũri árĩcũ masa õpa arĩrãcoma. “Porã marirã nome dohpaguere mari árĩcũ õatariaboaya,” arĩrãcoma masa. ³⁰ Irisubure utãgure õpa arĩ wereniguirãcoma masa. “ĩgu utãgũ gua weca yuri bejaporo. Gũare wejẽcãporo,” arĩrãcoma masa. ³¹ Masa yũre dipuwaja marigure erã õpa iicũ, ñeri dipuwaja oparãpũ ñetariaro warãcoma, arĩpũ Jesu.

³² Gajirã perã dorerire tarinũgarã erã árĩcũ erã sãre Jesu mera erã wejẽmorãre aĩgãñorã erã. ³³ Erã aĩgã dipu pero waĩcũrogue eja crusague Jesure pabiañorã. Eropirã gajirã perã sãre yujugure ĩgu diayepũ gajigure ĩgu copũ crusariguere pabiañorã. ³⁴ Erã eropa iicũ Jesu õpa arĩpũ:

—Ahũ, oã dohparagã erã ñero iirire cãdijique erãre. Erã erã eropa iirire masibeamã. Eropigu iirire cãdijique, arĩpũ Jesu ĩgu Pagure.

Eropirã surara Jesu suhri mũrãre “¿Noa yañe árĩrocuri iñe?” arĩ game bira wajatañorã. ³⁵ Eropirã masa ero niguirã erã ĩaro judio masa oparã Jesure wereyañorã:

—ĩgu gajirã masare sĩribonirãre taurapũ. Eropigu ĩgu Cristo Goãmũ ĩgu beyedigũ árĩgũ ĩgu basi tariporo, arĩ wereyañorã erã.

³⁶ Surara sã ĩgure wereyañorã. Jesu pohro ejarã, vino sũĩrire erã oriñorã. ³⁷ Irire iirã õpa arĩñorã erã:

—Mũhũ judio masa erã opũ árĩgũ ta, mũ basi tarique, arĩñorã erã.

³⁸ Eropi ĩgũ weca õpa arĩ gojarapũre pabia tuñorã: “Ihĩ judio masa tauro opũ árĩgũ ãhrimi,” arĩ gojaturapũ árĩyoro. Griego ya mera, Roma majarã ya mera, judio masa ya mera gojarapũ árĩyoro.

³⁹ Gajigũ ĩgũ mera erã pabia tudigũ ĩgũ ñero arĩ werenĩguipũ Jesure:

—¿Mũhũ Cristo arĩbeari? Mũ basi, gũa sãre tauque, arĩpũ ĩgũ Jesure.

⁴⁰ ĩgũ eroparĩcũ peegu ĩgũ mera majagupũ ĩgure yũhrĩpũ:

—Eropa arĩbircãque. ¿Duhpigũ Goãmũre umupeobeari mũhũ? Marire yujuro mera dipuwaja moama erã.

⁴¹ Marĩpũre mari ñeri dipuwajare dipuwaja moarã diaye iirã iima erã. Ihĩpũ ñerire iibiriñumi, arĩpũ gajigũ tarĩnũgagupũ.

⁴² Eropa arĩgũ ĩgũ Jesure õpa arĩpũ:

—Jesu, mũhũ opũ árĩrogue árĩgũ yũ sãre guñaque, arĩpũ ĩgũ Jesure.

⁴³ —Mũre ire arãa. Dohpagãre yũ mera paraíso waĩcũrogue yũ mera árĩgũca, arĩpũ Jesu ĩgure.

Jesu sĩria wapũ

Mt 27.45-56; Mr 15.33-41; Jn 19.28-30

⁴⁴ Eropi goeri boje gohra arĩcũ arĩpẽhrerogue uñre hora gohra naitĩa wayoro. ⁴⁵ Naitĩaro arĩrisubu Goãmũ wihĩ majañe suhriro cãhmotara suhriro deco mera yehguea wayoro. ⁴⁶ Eropigũ Jesu turaro gaguĩnipũ:

—Ahũ, yũ sĩporãre mũre wiaa mũ dibuboro dopa, arĩ gaguĩnipũ Jesu.

Eropa arĩtuha sĩria wapũ.

⁴⁷ Eropa wacũ ĩagũ surara opupũ “Goãmũ turagũ ãhrimi,” arĩ, “Ihĩ Jesu diaye ta õagũ ãhrañumi,” arĩpũ ĩgũ.

⁴⁸ Eropirã ero gamenererã iri eropa wacũ ĩarã, Jesu ĩgũ sĩricũ ĩarã, erã ya wihigue dujaa wañorã. Dujaa wa, bujawereri mera waha wañorã. ⁴⁹ Árĩpẽhrerã Jesu mera majarã, Galileague ĩgũ mera arinirã nome sã yoarogue Jesure ĩhu niguiñorã.

Jesu dũpũre masa gobegue apiñorã

Mt 27.57-61; Mr 15.42-47; Jn 19.38-42

⁵⁰⁻⁵¹ Irisubure José waĩcũgũ ero árĩpũ. Judea yeba Ari-matea waĩcũri maca majagũ arĩpũ. Eropigũ ĩgũ õagũ, diaye ĩgũ árĩgũ, Goãmũ ĩgũ opũ arĩnũgaburire coregũ arĩpũ.

Eropigu ïgu judio masa oparã mera majagu árïqueregu ta Jesure erã wejẽdorecã gamebiriripũ ïgu. ⁵² Eropigu Pilato pohrogue eja, Jesu murũ dũpũre serẽpũ. ⁵³ Serẽtuha Jesu dũpũre aĩ diju, õari suhriro mera ïgu dũpũre omapũ. Eropa omatuha masa gobegue utãyegue erã seara gobegue apipũ ïgu dũpũre. Iri gobere ne yujugu sïridigũre yaanibiriñorã dohpa. ⁵⁴ Irinũ Sabadonũ maja árïburire erã amuyurinũ árïyoro. Sabado judio masa soorinũ árïboro merogã duhyayoro.

⁵⁵ Eropirã Galileague Jesu mera arinirã nome masa gobegue José wacũ ïarã nurusiañorã. Masa gobegue eja, iri gobere ïha, Jesu dũpũre ïgu apirare ïañorã. ⁵⁶ Pũhrũ erã ya wihigue dujaa wañorã. Poresurire ïgu dũpũre sũburire amuñorã erã. Eropirã Sabado árïcũ Goãmũ ïgu dorerire Moiserẽ ïgu apirare iri dorero dopa ta erã sooñorã.

24

Jesu masa mũriapũ

Mt 28.1-10; Mr 16.1-8; Jn 20.1-10

¹ Domingo árïcũ boyorogue erã nome erã poresuri erã amurare aĩ Jesu masa gobe pohrogue aĩgãñorã. ² Iri gobegue ejarã, iri gobere biharaye utãyere erã pãgũ nugurayere ïañorã. ³ Eropa ïarã erã iri gobegue ñaja wañorã. Jesu dũpũpũre ne bocajabiriñorã erã. ⁴ ïgu dũpũre bocabirã, “¿Dohpa wayuri?” arĩ pepiñorã erã. Erã eropa arĩ pepi erã werenigui amaro gohra perã uma gosesiriri suhricurã erã pohro niguiñorã. ⁵ Ero erã niguicũ ïha, nome güirã merejañorã. Eropirã umapũ erãre wereñorã:

—¿Duhpimorã sïridigũ murũ ïgu árïdirore ahmari mũa? Dohpague ïgu ojocarigu ãhrimi. ⁶ ïgu õre marimi. Masa mũriatuhami. ¿Sohõ árïrasubure Galileague mũa mera árïgu ïgu arĩrare guñari mũa? ⁷ “Yũ masare Goãmũ ïgu obeodigũre wiarãcoma ñerãre. Erã yũre crusague pabia wejẽrãcoma erã yũre. Eropigu yũ sïrira pũhrũ uhrenũ pũhrũ masa mũriagũca yũhũ,” ¿mũare ïgu arĩrare guñari mũa? arĩñorã umapũ.

⁸ Erã eroparïcũ peerã, nomepũ ïgu arĩrare guñañorã. ⁹ Erã eropa arĩra pũhrũ erã dujaa wañorã. Once buherãre gajirã sãre irire werepehoñorã. ¹⁰ Erã nomepũ María Magdalena, Juana, María Santiago pago árïñorã. Erã nome gajirã nome sã árïñorã Jesu buherãre eropa wererã nome. ¹¹ Erã eropa arĩ werequerecũ ta Jesu buherãpũ “Erã diaye arïbiribocoma. Eropa arïcãrã iima oã nome,” arĩ pepiriñorã. Eropirã erã nomere peediabiriñorã.

12 Erã eroparĩcũ peegu, Pedropu masa gobegue omagã, ãagu wapu. Iri gobegue eja, ãgu muhmereja ãhame acupu. Jesure erã omara gasiro dihtare ãapu. “¿Dohpa wayuri?” arĩ pepigu ãgu wihigue dujaa wapu.

Emaus waĩcũri maca maja mague Jesu dehyoapu
Mr 16.12-13

13 Irinũre perã Jesu buherã mera majarã Emaus waĩcũri macague warã iĩnorã. Jerusalenre once kilõmetros yoaro ãhraa Emaure ejaro. 14 Emaugue waha, árĩpehreri Jesure eropa warare wereniguigãrã iĩnorã. 15 Erã eropa arĩ werenirisubu Jesupu erã watope erã mera wapu. 16 Eropirã ãgure ãaquererã ta erã ãgure ãha masibiriĩnorã.

17 —¿Mũa curirã warã dohpa arĩ werenigui bujawererã iiri mũa? arĩpu Jesu.

Ãgu eroparĩcũ erã dujanũgañorã bujawererã. 18 Eropigu Cleofa waĩcũgupu Jesure yũhripu:

—¿Dohpaguere Jerusalenre erã iirare mũ dihta masibeari? arĩ serẽpipu ãgu.

19 —¿Dohpa wahãri Jerusalenre? arĩpu Jesu.

Ãgu eroparĩcũ Cleofa yũhripu:

—Jesure Nazare majagure erã iirare arĩrã iiaa. ãgu Goãmu yare weremuhtagu árĩrimi. Eropirã ãgu werenigu-irire peerã, ãgu iira sãre ãarã, “Turagu ãhrimi,” arĩ pepirima masa. Goãmu sã eropa arĩ pepicumi. 20 Mari pahia oparã, gajirã oparã mera ãgure wejedorerã gajirãre ohama. Erã eropa ocũ gajirãpu ãgure crusague pabia wejẽama. 21 “Roma majarãre cóãbu Israe masa opu árĩbu ãhrimi,” arĩ pepiribu gũa ãgure. Dohpagã mera uhrenũ wahaã ãgu sãrira puhrũ. 22 Bajamerãgã gũa mera majarã nome guare ucacũ iiaa. Boyoro Jesu ãgu masa gobegue erã eja, 23 ãgu dupure erã bocabirañorã. Dupure bocabiri erã dujara wereama. “Guare anyua dehyoama. Jesu ojocariapu,” arĩ wereama nomepu. 24 Erã eroparĩcũ gajirã gũa mera majarãpu iri gobegue eja nome erã arĩdiro dopa ta ãañorã. Erã sã Jesu mũrũre ãabirañorã, arĩpu ãgu Jesure.

25 ãgu eropa arĩra puhrũ Jesu werepu erãre:

—Mũa ne peebirã ãhraa. ¿Goãmu yare weremuhtanirã mũra erã arĩrare õaro peebeari mũa? 26 Cristo opu árĩboro core ãgu umarogue ãgu mũriaboro core ãgure ñero tariro gahmeabu. ¿Irire masibeari mũa? arĩpu Jesu erãre.

27 Eropa arĩgu Goãmu yare erã gojarapũguere erã ãgure gojayurare Jesu werepehocãpu erãre. Moise mũrũ ãgu gojarare Jesu werenũgapu. Eropigu árĩpehrerã Goãmu yare weremuhtanirã erã gojara sãre erãre werepehocãpu.

28 Erã erã wari macague erã ejacũ Jesupũ erãre tarigãgu dopa iipũ. 29 Īgu eropa iiquerecũ ta erãpũ ĩgũre wadore-biriñorã.

—Gua mera dujaque. Ñamicague ãhraa. Nairo iica, arĩñorã erã Jesure.

Eropigũ Jesu erã mera wihigue ñaja wapũ. 30 Pũhrũ ĩgu erã mera erã bari mesague doaja, panre aĩ, Goãmũre “Õhaa” arĩpũ. Eropa arĩgu iri panre nuha aĩ erãre ópũ. 31 Īgu eropa iicũ ĩarã erã Jesure ĩha masiñorã pare. Erã ĩha masira pũhrũ ĩgu dederea wapũ. 32 Īgu eropa dederecũ erã erã basi õpa arĩ wereniguiñorã:

—Mague ĩgu marire wereniguirisubu Goãmũ ĩgu gojarare ĩgu wereniguirisubu mari sĩporã mera õaro mucubiriri mera pepiabũ mari, arĩñorã erã basi.

33 Eropa arĩtuha erã mata Jerusaléngue dujaa wañorã. Eroque eja, once buherãre, gajirã mera gamenererãre bocañorã. 34 Erã ejacũ, once buherã õpa arĩñorã erãpũre:

—Diaye ta mari Opũ masa mũriadi ãhrami. Simo Pedro ĩgũre ĩapũ, arĩñorã erã.

35 Erã eroparĩcũ peerã Emaus wari maha wanirã sã erã ĩarare wereñorã:

—Jesu ĩgu panre nuha guare ĩgu ocũ ĩha masiabũ gua, arĩñorã gajirãre.

Jesu ĩgu buherãre dehyoapũ

Mt 28.16-20; Mr 16.14-18; Jn 20.19-23

36 Erã eropa arĩ wererisubu mata Jesupũ erã pohro dehyoanũgajapũ.

—¿Ãhriri mua? arĩpũ ĩgu erãre.

37 Īgu eroparĩcũ erã “Sĩridigũ mũrũre ĩarã iiaa mari,” arĩ pepi, turaro guĩñorã. 38 Erã eropa guicũ ĩagu ĩgu erãre wẽrepũ:

—¿Duhpirã guiri mua? ¿Duhpirã yũre ĩarã “I diaye árĩbeaa, arĩri mua? 39 Yũ mojotorire yũ guburi sãre ĩaque. Mũa irire ĩarã, yũre ĩha masirãca. Yũre mohmepique. Mohmepirã masirãca mua. Sĩridigũ mũrũ dũpũ moomi. Yũpũ dũpũca, arĩpũ Jesu.

40 Eroparĩgu ĩgu mojotorire, ĩgu guburire ĩhmupũ erãre.

41 Īgu eropa ĩhmuquerecũ ta erã bũrigã mucubiri uca warã “I diaye árĩbeaa,” arĩ pepiniñorã dohpa. Erã eropa arĩ pepicũ masigu Jesu erãre serẽpipũ:

—¿Õre bari ãhriri? arĩpũ ĩgu.

42 Īgu eroparĩcũ waimũ mupudigũre mome imisĩri sãre õñorã ĩgũre. 43 Irire aĩ erã ĩhuro Jesu bapũ. 44 Batuha Jesu werepũ erãre:

—Sohõ mari árĩrasubu mũa mera árĩgu yũhũ mũare werediro dopa ta dohpaguere yũre eropa wahabũ. Goãmũ doreri Moise marire ĩgu apira ĩgu eropa arĩ gojadiro dopa ta yũre eropa wahabũ. Goãmũ yare weremũhtanirã, Salmopũre gojanirã sã iribojegue erã yũre arĩ were gojayudiro dopa ta dohpague yũre eropa wahabũ. Eropa ta waro gahmeabũ, arĩpũ Jesu.

⁴⁵ Eropa arĩtuha Goãmũ yare erã arĩ were gojarare ĩgu buherãre masicũ iipũ Jesu erãre.

⁴⁶ —Goãmũ yare erã gojara õpa arĩyoro: “Cristo ñero tarigũcumi. Eropigu mũhrenũ pũhrũ ĩgu sĩrira pũhrũre ĩgu masa mũriagũcumi. ⁴⁷ ĩgu masa mũriara pũhrũ árĩpehneri yeba ĩgu yarã Goãmũ yare buherãcoma. ‘Mũa ñerire bujawererã Jesucristo mera mũa ñerire cãdijirã árĩrãca,’ arĩ wererãcoma masare. Eropa weremorã Jerusalén werenũgarãcoma,” arĩ gojañumi Goãmũ yare erã gojarapũ, arĩpũ Jesu.

⁴⁸ Eropa arĩtuhaja õpa arĩ werenemopũ:

—Mũapũ i árĩpehnerire ãanirã ãhraa. Eropirã gajirãre wererãca. ⁴⁹ Goãmũ “Īgũre mũare obeogũra,” ĩgu arĩdigũre yũpũ mũare obeogũra. Eropirã Jerusaléngue ĩgu Espĩritu Santo mũare ĩgu eraburire coreque mũa. ĩgu mũare turarire ogũcumi, arĩpũ Jesu ĩgu buherãre.

Jesu mũarogue mũria warũ

Mr 16.19-20

⁵⁰ Eropa arĩtuha Jesu erãre Jerusalén árĩrãre Betaniague aĩgãpũ. Erogue eja, Jesu ĩgu mojotori mera sĩmuju, “Õaro árĩque,” arĩpũ erãre. ⁵¹ Eropa arĩtuha erãre api, mũarogue mũria warũ. ⁵² ĩgu mũriara pũhrũ erã ĩgũre umupeo, “Õagũ, turagũ ãhrimi,” arĩ, Jerusaléngue bũrigã mucubiriri mera dujaa wañorã. ⁵³ Ero ãhri mũmuri nũcũ erã Goãmũ wihigue Goãmũre serẽmũriñorã. “Mũhũ õagũ ãhraa,” arĩ umupeoniguicãmũriñorã erã ĩgũre. Eropa ta árĩporo. Iripẽta ãhraa.

San Juan

Ñu waĩcũgũ ipũre gojadigũ Jesucristore ĩamũriĩnumi. Jesucristo i yebare buhecũ Ñu ĩgũ buhegũ árĩmũriĩnumi. Eropigũ Jesu sĩridigũ masa mũria ĩgũ Pagũ pohro mũriara pũhrũgue Ñu ipũre gojaĩnumi.

Cristo masũ ta árĩnũgaĩnumi

¹ Negohraguere i yeba árĩboro coregue ta Cristo mata árĩmũhtamũrituhapũ. ĩgũ Goãmũ mera árĩpũ. Eropigũ ĩgũ Goãmũ ta árĩcãgũ iipũ. ² Matague ta Cristo Goãmũ mera árĩpũ. ³ Eropigũ i yebare, Ʃmũsire árĩpehrerire ĩhacũnugudorepũ Goãmũ ĩgũre. Eropigũ masa sãre ĩhacũnugudorepũ ĩgũre. Eropigũ irire ĩhacũnugupehopũ ĩgũ Jesucristo. Eropiro irire ĩgũ ĩhacũnugupehobiricũ i ne mariboya. ⁴ Cristo ojocaririre ogũ ãhrimi. Boyocũ mari mari basi õaro mari ĩha masiro dopa ta, ĩgũ mari Pagũre õaro ĩha masicũ iimi marire. Eropigũ i yebare eragũ mari Pagũre masicũ iimi masare. ⁵ I yeba majarã erã guĩaricũri naitĩfaro iro dopa ñeri ãhraa. Jesucristo boyogoro dopa ta masa pohro eragũ erã Goãmũ yare masicũ iimi. Eropiro naitĩfariĩe, boyoriĩere ne tarinũgabiro dopa ta Cristore ñeripũ ne tarinũgabiriyoro.

⁶⁻⁷ Goãmũ Ñu waĩcũgũpũre obeomũhtapũ Cristore quere aĩgã weremũhtadoregũ. ĩgũ obeodigũ Ñupũ eraa guare masare Cristo ĩgũ ariburire weremi. ⁸ Ñupũ Cristo árĩbirimi. Eropa árĩbiriqueregũ ta ĩgũ Cristore masare wereyumũhtagũ árĩmi. ⁹ Cristo boyogoro dopa ta árĩgũ árĩpehrerã masare Goãmũre masicũ iibu i yebaguere aridigũ árĩmi. Diaye ta ãhraa. ĩgũ masare masicũ iigũ ta ãhrimi.

¹⁰ Eropigũ Cristo i yebare árĩdigũ árĩrimi. I yebare ĩhacũnugudigũ árĩpũ. ĩgũ eropa árĩquerecũ ta i yeba majarã ĩgũre ne ĩha masibirinirã árĩma. ¹¹ ĩgũ ya yeba ĩgũ masa dehyoadigũ árĩrimi. ĩgũ ya yeba ĩgũ masa dehyoadigũ árĩquerecũ ta ĩgũ ya yeba majarãpũ ĩgũre ne gamebirinirã árĩma. ¹² Erã eropa gamebiriquerecũ ta árĩpehrerã ĩgũre gamerãpũre erãre Goãmũ ĩgũ porã árĩcũ iimi. ĩgũre umupeorãre árĩpehrerã Goãmũ ĩgũ porã árĩcũ iimi. ¹³ Erã Goãmũ porã ta ãhrima. Eropirã masa erã gamero Goãmũ porã wabeama. Goãmũ gamero mera ĩgũ porã wahama.

14 Eropigu Cristo ĩgu masu ĩgu árĩnugara puhrũ mari mera árĩmi ĩgu. ĩgu eropa árĩcũ ĩarã masare mahigu, diaye majare ĩgu wereniguigu árĩcũ gũa masibu. ĩgu dihta Goãmu magu árĩgu turagu árĩmi. ĩgu eropa árĩgu árĩcũ gũa masibu. 15 Ñu waĩyegu ĩgu buherogue Cristo eracũ ĩha õpa arĩ gaguiniguimi gũare weregu:

—Sihĩ ahrimi yũ muare weredigu. ĩgu yũ puhrũ masa dehyoadigu ahrimi. Eropa árĩqueregu ta yũ tauro turagu ahrimi. ĩgu yũ masa dehyoaboro coregue árĩtuharũ. Eropigu ĩgu yũ tauro ahrimi. Yũhu muare eropa arĩ weredigu ta ahrimi ihĩ, arĩmi Ñu gũare.

16 ĩgu Cristopũ õagu turaro masare mahigu árĩgu marire árĩpehrerãre õaro iiniguicãmi. 17 Goãmu dorerire Moisepu apĩmuhtapu marire. Jesucristopũ Goãmu masare ĩgu mahirire buhegu árĩmi. Goãmu ĩgu diaye wereniguiri sãre buhegu árĩmi ĩgu. 18 Masa ne Goãmure ĩabeama. ĩgure mari ĩabiriquerecũ ta ĩgu magu ĩgu turaro mahigu yujugu ta árĩgupu ĩgu Pagure marire masicũ iimi.

Gajirã Ñu waĩyegure serẽpiñuma

Mt 3.11-12; Mr 1.7-8; Lc 3.15-17

19 Judio masa oparã Jerusalén árĩrã pahiare, Goãmu wihi mohmerã sãre Ñu pohrogue obeoñorã. “¿Nihino ahriri muhu?” arĩ serẽpidorerã obeoñorã erãre. Erã eropa arĩ serẽpirã ejacũ õpa arĩ weremi Ñupu. 20 Ne yayaro mariro weremi. Diaye ta werepehocãmi gũyaro mariro.

—Yũhu Cristo Goãmu ĩgu masare taudoregu ĩgu obeodigu árĩbeaa, arĩmi ĩgu.

21 ĩgu eroparĩcũ erãpu ĩgure dipaturi serẽpima daja:

—¿Muhu Cristo árĩbigu Eliapu ahriri? arĩma.

—Árĩbeaa yũhu, arĩmi ĩgu.

—¿Gua coredigu Goãmu yare weremuhtagupu ahriri muhu? arĩma erã.

—Árĩbeaa yũhu, arĩmi Ñu.

22 ĩgu eroparĩcũ erã ĩgure dipaturi serẽpima daja.

—Gũare serẽpidorenirãre gũa õaro wereboro dopa gũare wereque daja. ¿Nihinopũ ahriri muhu? ¿Dohpa árĩgũno ahriri muhu? arĩma erã Ñure.

23 Erã eroparĩcũ õpa arĩ yũhrimi:

—Masa marirogue õpa arĩ gaguiniguigu ahraa yũhu. Goãmu ya weremuhtadigu Isaia murũ ĩgu werediro dopa ta werea yũ sã: “Mari Opũ ĩgu ariboro core õarã árĩyuque ĩgure peemorã,” arĩ masare wereyu gaguiniguigu ahraa yũhu, arĩmi Ñu erãre

24 Ñure serēpirā fariseo masa erā obeonirā árīma.
 25 Eropirā erā Ñure serēpima daja:

—¿Muhũ Cristo, Elia Goãmũ ya weremuhtagũ gua coregũ árĩbiriqeregũ ta duhpigũ masare Goãmũ ya árĩburire waĩyeri muhũ? arĩma erā.

26 Erā eroparĩcũ yũhrimi ĩgũ.

—Yũ deco mera masare Goãmũ ya árĩburire waĩyea. Gajigupũ mua masibigupũ mua watope árĩtuhami. 27 ĩgupũ yũ pũhrũ arigũ yũ tauro turagũ āhrimi. Ōatariagũ āhrimi. ĩgũ iro dopa árĩbeaa yũpũ. Eropigũ ĩgũre pepigũ, “Bu árĩgũ āhraa yũhũ,” arĩ pepia, arĩmi Ñu erāre.

28 Eropa arĩ wereniguima erā Betaniague, dia Jordán waĩcũriya gajipũ masegue, Ñu ĩgũ masare ĩgũ waĩyerogue.

—*Jesu Goãmũ ĩgũ obeodigũ cordero iro dopa āhrimi, arĩ wereñumi Ñu masare*

29 Gajinũ Jesu Ñu pohro ĩgũ aricũ ĩagũ Ñu ōpa arĩmi gũare:

—Īaque. Ihĩ Goãmũ ĩgũ obeodigũ ĩgũ cordero iro dopa āhrimi. Cordero mari ñeri iira dipuwajare sĩriro dopa ihĩ sĩrigũ i yeba majarāre erā ñero iirare cóagũcumĩ ĩgũ. 30 Ihĩ ta āhrimi yũ ōpa arĩdigũ: “Yũ pũhrũ arigũ yũ tauro turagũ āhrimi. Yũhũ masa dehyoaboro core ĩgũ matague ta árĩtuhapũ. Eropigũ ĩgũ yũ tauro turami,” yũ arĩdigũ ihĩ ta āhrimi. 31 Yũpũ ĩre Goãmũ magũ ĩgũ árĩrire masibirinibũ. Eropa masibiriqueregũ ta deco mera waĩyegũ arigũ iibũ yũ acawererā Israe masa ĩre erā masiborore, arĩmi Ñu.

32 Eropa arĩtuha Ñu werenemomi:

—Espĩritu Santo umarogue buja iro dopa bejagũ Cristo weca دچارimi. ĩgũ weca ĩgũ dujanugacũ ĩabũ. 33 ĩgũ weca dujanugajacũ ĩha ĩgũre ĩha masibũ. ĩgũ yũre masare deco mera waĩyedore obeodigũ Goãmupũ ōpa arĩ weremuhtatuhami yũre: “Espĩritu Santo dijari ĩgũ weca dujanugajagũ ĩgũ ta árĩgũcumĩ. ĩgupũ Espĩritu Santore masa mera eropa árĩniguicũ iigũ árĩgũcumĩ,” arāmi Goãmũ yũre. ĩgũ yũre eropa werebircũ ĩha masibiriboya ĩgũre. 34 Dohpaguere ĩgũre ĩha masituhaa yũhũ. Eropa ĩha masigũ “Diaye ta Goãmũ magũ ta āhrimi,” arāa yũhũ muare, arĩ weremi Ñu.

Jesu buherā ĩgũ ne sihunuganirā árĩñuma

35-36 Gajinũ Ñu mera gua perā ĩgũ buherā ĩgũ mera gua niguicũ, Jesu gua pohro tari wahgāgũ iimi. ĩgũ eropa tari wahgācũ ĩagũ Ñu dipaturi ōpa arĩmi gũare:

—Īaque. Ihĩ Goãmũ ĩgu obeodigu cordero iro dopa árĩgu āhrimi, arĩmi Ńu.

³⁷ Īgu eroparĩcũ gua perã ĩgu buherãpũ irire peerã Jesure nũrusiagãbũ. ³⁸ Gua eropa nũrusiagãcũ ĩagu Jesu guare maji ĩha, serẽpimi:

—¿Nohogue wahari mũa? arĩmi ĩgu guare. Īgu eroparĩcũ gua sã ĩgure serẽpibũ.

—Buhegu, ¿nohogue āhriri mũhũ? arĩ serẽpibũ gua ĩgure.

³⁹ —Yũ mera arinijarã, ĩarã arique, arĩmi guare Jesu.

Īgu eroparĩcũ guapũ ĩgu árĩroque ĩarã wabũ. Irisubu ñamicague cuatro hora árĩbũ. Eropirã iri ñamire ĩgu mera dujabũ gua.

⁴⁰ Gua perã Ńure peerã, Jesure nũrusiagãrã yũ mera majagu Andre mera árĩbũ. Andrepũ Simo pagũ magũ arĩmi.

⁴¹ Eropigu ĩgu mata ĩgu tĩgure ahma boca, õpa arĩ werepũ ĩgure:

—Mesiare Goãmũ marire taubure Goãmũ ĩgu obeodigure bocabũ gua, arĩpũ Andre Simore. Mesia ero majarã ya mera arĩrã, Cristo arĩrã iima.

⁴² Eropa arĩtuha ĩgu Simore Jesu pohro aĩgãmi. Īgu pohro erã ejacũ ĩagu Jesupũ Simore õpa arĩmi:

—Mũhũ Simo waĩcũgu Jona waĩcũgu magũ āhraa. Dohpaguere mũre Cefa waĩyegũra, arĩmi Jesu Simore. Cefa ero majarã ya mera arĩrã, Pedro arĩma. Eropigu Pedro waĩcũmi pare.

Felipere, Natanae sãre sihuñumi Jesu

⁴³ Gajinũ Jesu “Galilea yebague ina warã,” arĩmi guare. Eropigu erogue eja ĩgu Felipere bocatĩri õpa arĩmi:

—Yũ mera majagu árĩbu arique, arĩmi Jesu.

⁴⁴ Felipepũ Betsaida majagu árĩmi. Īgu, Andre, Pedro mera yuju maca majarã árĩma. ⁴⁵ Eropigu Felipe Natanaere ahma, boca õpa arĩ weremi:

—Goãmũ dorerire Moise ĩgu gojarapũgue ĩgu weredigure, gajirã Goãmũ yare weremũhtanirã sã erã weredigure gua bocabũ. Jesu Nazare majagu José magũ ĩgu ta árĩcũmi, arĩmi ĩgu Natanaere.

⁴⁶ —Nazareguere ne yujugu õagu marimi, arĩmi Natanaerpũ.

—Īagu arique mũhũ, arĩmi Felipe.

⁴⁷ Eropi Natanae Jesu pohro ĩgu ejacũ ĩagu Jesupũ õpa arĩmi Natanaere:

—Ihĩ dohpague arigu diaye ta õagu judio masũ gohra āhrimi. ĩgure ne guyari mara, arĩmi Natanaepũre.

48 Īgũ eroparĩcũ peegũ Natanae ĩgũre serẽpimi:

—¿Duhpigũ yũre õaro masiri mũhũ? arĩmi.

—Felipe, ĩgũ mũre ĩgũ sihuboro core, higuerağũ doca mũ arĩcũ ĩhabũ yũhũ mũre, arĩmi Jesu ĩgũre.

49 Īgũ eroparĩcũ Natanaepũ õpa arĩmi ĩgũre daja:

—Buheğũ, diaye ta mũhũ Goãmũ magũ ta ãhraa. Mũhũ Israe masa gũa opũ árĩbu ãhraa, arĩmi Natanae.

50 Īgũ eroparĩcũ peegũ õpa arĩ yũhripũ Jesu:

—Higuerağũ doca yũ mũre ĩarare masigũ yũre “Goãmũ magũ ãhraa,” arĩ umupeoa mũhũ yũre. ¿Iri ta mũre umupeocũ iiri? Mũre yũ eropa ĩara tauro Goãmũ turari mera yũ iicũ ĩagũca mũhũ, arĩmi Jesu Natanaere.

51 Eropa arĩgũ õpa arĩ werenemomi:

—Diaye ta mũre arĩgũ iiaa. Yũhũ masũ Goãmũ ĩgũ obeodigũ ãhraa. Ëmarogue Goãmũ yarã anyua erã yũ weca erã دچارicũ, erã mũriacũ sãre ĩagũca mũhũ, arĩmi Jesu ĩgũre.

2

Caná waĩcũri macague erã mojoto diriri bosenuğue Jesu ĩagũ wañumi

¹ Ëhrenũ pũhrũ Caná Galilea árĩri macague mojoto diriri bosenu árĩbũ. Eropigo Jesu pago iri wihigue arĩmo. ² Jesu gũa ĩgũ buherã sã erã mojoto dirirogue sihubeonirã árĩbũ.

³ Iri bosenu maja vino pehrecũ Jesu pago ĩgũre weremo:

—Dohpaguere vino pehrea wahabũ erãre, arĩmo igo Jesure.

⁴ Igo eroparĩcũ peegũ Jesu õpa arĩmi:

—Meho, ¿duhpigo irire yũre wereri mũhũ? Masa erã yũre masiboro dũhyania dohpa, arĩmi Jesu ĩgũ pagore.

⁵ Īgũ eroparĩra pũhrũ ĩgũ pagopũ mohme corerãre weremo.

—Yũ magũ ĩgũ dorero dopa ta iique mũa, arĩmo igo.

⁶ Irisubuguere gũa acawererã judio masa Goãmũ yare iimorã masare erã dũpũre eropa coeniguicãdorema. Eropi iri wihi seis gohra máta sorori, deco dicũri sorori árĩbũ. Iri deco Goãmũ yare iimorã erã coeri deco árĩbũ. Iri soroburire ochenta o cien litros sihabũ decore. ⁷ Eropigũ erã mohme corerãre doremi Jesu:

—I soroburire deco mera pisãnemo ujutu dobopehocãque, arĩmi Jesu.

Īgũ eroparĩcũ erãpũ õaro ujutu dobopehocãma iri soroburire.

⁸ Erã eropa iira pũhrũ Jesu erãre doremi daja:

—Dohpaguere iri decore waa aĩ, sihu bosenu iigure tĩarã waque, arĩmi.

Ĩgu eroparĩcũ peerã iri decore waa aĩgã, sihu bosenu iigure tĩama erã.

⁹ Erã tĩacũ ĩgupu iri decore vino poyara decore ihriñami. Iri vinore “¿Noho majare aĩgãrayuri erã?” arĩ pepipu ĩgu. ĩgu eropa masibiriqerrecũ ĩgure mohme corerãpu iri vinore tĩanirãpu masima. Sihu bosenu ĩgu eropa masibirinijagu, mojoto diridigure sihubeo ¹⁰ õpa arĩ weremi:

—Gajirã masa õari decore vino decore tĩamũhtamurima. Masa erã õaro ihrira pũru ñequeyari vino decopure tĩama erã. Mũpu õari vino decore dihbu, pũrugue guare tĩaa, arĩmi sihu bosenu ĩgu mojoto diridigure.

¹¹ Caná Galilea árĩri macague decore vino ĩgu poyacũ iira ne Goãmu turari mera ĩgu deyoro moanũgara árĩbu. Eropa ĩgu gajirãre ĩgu turarire ii ĩhmúmi Jesu. ĩgu eropa ii ĩhmura pũru gua ĩgu buherã ĩgure umupeoba.

¹² Pũru Jesu, ĩgu pago, ĩgu pagu porã, gua ĩgu buherã mera Capernaumgue sihugã wami. Eroque ejarã bajamenurigã dujabu gua.

Jesu Goãmu wihiguere ejañumi

¹³ Pascua árĩcũ gua judio masa bosenu árĩboro merogã duhyanijabu. Eropigu Jesu gua mera Jerusalengue wami.

¹⁴ Eroque ejaqu ĩgu Goãmu wihigue ñajajagu, wecuare, ovejare, bujare duarãre bocajami. Eropigu niyeru gohrotorã erã mesarigue erã doacũ bocajami. ¹⁵ Eropa bocajagu yuradari mera tãraridari ii, erãre árĩpehrerãre disiporogue tãranuru wiumi. Eropigu niyeru gohrotorã erã ya mesarire yomemuju mehpicãmi. Erã niyeru turi sãre mehsiripicãmi. ¹⁶ Eropa iituha bujare duarãre õpa arĩmi:

—Mua yarã bujare aĩgãque. Yu Pagu ya wihire doberi duari wihi iibiricãque, arĩmi Jesu erãre.

¹⁷ ĩgu eropa iicũ ĩarã gua ĩgu buherãpu Goãmu ya gojarapũ erã arĩrare guñabu. Õpa arĩ gojanirã árĩma. “Goãmu, mu wihire turaro mahia. Eropa mahigu mu wihire ñero erã iicũ ĩagu turaro bujawerea yũhu,” arĩ gojarare guñabu gua Jesu ĩgu buherãpu.

¹⁸ Jesu ĩgu eropa iira pũru judio masa oparã ĩgure serẽpima:

—¿Duhpigu mũhu oãre Goãmu wihigue árĩrãre cohã wiuari? Goãmu irire mũre iidoregu árĩcũ Goãmu turari mera ii deyoro moaque gua ĩaburire, arĩma erã Jesure.

¹⁹ Erã eroparĩcũ Jesu yãhrimi:

—I wihire mũa cóăcũ, ăhrenũ pũhrũ tuhajagũa yũhũ, arĩmi Jesu erăre.

²⁰ —Ăhrenũ i wihire iisome mũhũ. Cuarenta y seis bojori gohra eră iira wihi ăhraa i wihi, arĩ yũhrima eră Jesure.

²¹ Jesu ĩgũ eropa arĩrare eră ôaro pee masibirima. Jesu i wihire arĩgũ ĩgũ dũpũ waburire arĩgũ iirimi. ²² Eropi ĩgũ sĩrira pũhrũ, ĩgũ masa mũriara pũhrũ gũa ĩgũ buherăpũ ĩgũ eropa arĩrare guñabũ. Goămũ yare eră gojarapũre, Jesu ĩgũ werera săre guña, “Iri diaye ta ăhraa,” arĩbũ gũa.

Ărĩpehreră eră guñarire Jesu masiñumi

²³ Pascua bosenu ărĩcũ Jesu Jerusalengue ărĩmi. Ero ĩgũ ărĩcũ masa bajară Goămũ turari mera ĩgũ deyoro moarire ii ĩhmucũ ĩară ĩgũre umupeoma. ²⁴ Eră eropa umupeoquerecũ ta Jesu masa eră guñarire ôaro masigũ, “Yũre eropa umupeoniguicărăcoma,” arĩ pepibiridi ărĩmi. ²⁵ ĩgũ masa eră guñarire ôaro masĩmi. Eropa masigũ masa ĩgũre eră pepirire serėpibirimi.

3

Jesu Nicodemo mera weretamuñumi

¹ Iri maca majagũ Nicodemo waĩcũgũ, judio masa opară mera majagũ ărĩmi. ĩgũ fariseo masa ya curu majagũ ărĩmi. ² Eropigũ ĩgũ yuju ñami ĩgũ Jesu pohro ahri ĩgũ mera weretamũpũ:

—Buhegũ, mũhũ Goămũ ĩgũ buhedoredigũ ĩgũ obeodigu mũ ărĩcũ gũa masia. Goămũ mũre ĩgũ itamubiricũ mũpũ ĩgũ turari mera ne deyoro moarire ne iibiriboaya. Mũhũ bajasuburi Goămũ turari mera ii ĩhmua, arĩpũ Nicodemo Jesure.

³ ĩgũ eroparĩcũ Jesu werepũ:

—Diaye mũre arĩgũ iiaa. Ne masa dehyoagũ iro dopa dipaturi masa dehyoagũ dihta Goămũ yagũ ărĩmasimi. Mũ să eropa ta ărĩmasia, arĩpũ Jesu.

⁴ —Yăho. ¿Bugũpũ dohpa ii dipaturi masa dehyoabocuri ĩgũ? ĩgũ pago niji suhriroguere ñajaa, dipaturi masa dehyoa masiya mariboca ĩgũre, arĩpũ Nicodemo.

⁵ ĩgũ eroparĩcũ Jesu yũhrĩpũ:

—Diaye ta arĩgũ iiaa mũre. Ne masa dehyoagũ iro dopa ta deco mera, Espĩritu Santo ĩgũ turari mera dipaturi masa dehyoagũ dihta Goămũ yagũ ărĩmasimi. ⁶ Nome nijipo să nome ărĩră, majirăgăre masa dehyoacũ iima. Espĩritu Santopũ masare Goămũ poră ărĩcũ iimi. ⁷ “Ne masa dehyoagũ iro dopa ta dipaturi masa dehyoagũ dihta Goămũ yagũ ărĩmasimi,” yũ ărĩcũ ne pee gorowerebita. ⁸ Espĩritu

Santo masare Goãmũ porã ĩgũ iicũ iiri miruñe iro dopa ãhraa. Miruñe iri arirogue ahraa. Iri ariro caricũ mari peea. Eropa peequererã ta iri aridirore, iri waro sãre ne masibea. Eropa ta iimi Espiritu Santo masare Goãmũ porã ĩgũ, arĩpũ Jesu Nicodemore.

⁹ —Mũ eropa arĩrire ðaro masibea, arĩpũ Nicodemo.

¹⁰ ĩgũ eroparĩcũ peegũ ðpa arĩpũ Jesu:

—¿Mũhũ judio masare buhegũ árĩqueregũ ta, duhpigũ yũ arĩrire peebeari? ¹¹ Diaye mũre arĩgũ iiaa. Gũa masirare, gũa ĩarare gũa werea. Gũa eropa werequerecũ ta ne mũa gũa acawererã judio masa ne peediabiribũ. ¹² I yeba majare yũ werenigui queoñaquerecũ ta “Diaye ta ãhraa,” arĩbeaa mũa. Eropa arĩbirã Goãmũ yare yũ werecũ sãre “Diaye ta ãhraa,” arĩsome mũa.

¹³ “Ne yujugũ ãmarogue Goãmũ pohrogue wagũ ne dipaturi dujarisome. Yũhũ Goãmũ ĩgũ obeodigũ yũ dihta ãmarogue árĩdigũ i yebaguere aribũ. Eropigũ yũ dihta Goãmũ yare mũare weremasia. ¹⁴ Iribojeguere masa mariroguere Moise mũrũ añare come mera erã wéadigũre yucũgũ erã nugudigũgue duhsiupũ. Yucũgũgue ĩgũ duhsiudiro dopa ta yũre Goãmũ ĩgũ obeodigũre eropa ta yũ sãre duhsiurãcoma. ¹⁵ Yũre erã eropa iicũ árĩpehrerã yũre umupeorã árĩpehrerinũri Goãmũ mera árĩniguirãcoma, arĩpũ Jesu.

Goãmũ árĩpehrerãre mahimi, arĩ gojañumi Ñũ

¹⁶ Eropa arĩtuha ðpa arĩnemopũ Jesu:

—Goãmũ árĩpehreri yeba majarãre turaro mahimi. Eropigũ yũre ĩgũ magũre yujugũ ta árĩgũre Goãmũ obeomi árĩpehrerã yũre umupeorã peamegue erã wabiriborore. Eropirã árĩpehrerinũri Goãmũ mera árĩrãcoma erã. ¹⁷ Goãmũ yũre ĩgũ magũre masare dipuwaja moadoregũ obeobirimi i yebaguere. Eropigũ masare peamegue wabonirãre taubure yũre obeomi.

¹⁸ “Yũre Goãmũ magũre umupeorãre ne dipuwaja moasome Goãmũ. Yũre umupeobirãpũre Goãmũ dipuwaja moadoretuhami. Masa yũre Goãmũ magũre yujugũ ta árĩgũre erã umupeobirira dipuwaja, dipuwaja moagũcumi Goãmũ erãre. ¹⁹ Yũhũ Goãmũ magũ i yebaguere arigũ boyoriñe ðaro ĩha masicũ iro dopa ta Goãmũ yare ðaro masicũ iiaa masare. Yũ eropa masicũ iicũ ĩarã yũre umupeobirã yũre gamebeama. Erã ñerire iiripũre turaro gahmema. Erã eropa gameri dipuwaja erãre dipuwaja moagũcumi. ²⁰ Árĩpehrerã ñerire iirã erã ñero iirire duhudiabeama. Eropirã boyoro iiriñe deyoro moaro dopa

ta erã ñero iirare deyoro moari arĩrã yũre gamebeama. ²¹ Ōarire iirãpũ yũre, yũ buheri sãre gahmema. Goãmũ yare erã iirire yũ ðaro deyoro moacũ guhyasĩribeama erã. Eropiro yũre boyoro iro dopa árĩgũre gahmema, arĩ werepũ Jesu.

Dipaturi Ñu waĩyegũ Jesure wereñumi

²² Pũhrũ Jesu guare ĩgũ buherãre Judea yebague sihugã wami. Eroque ejagũ ero majarã mera bajamenurigã duja, Goãmũ ya árĩburire waĩyemi erãre. ²³ Ñu sã masare waĩyegũ iipũ Enón waĩcũri macague. Enón waĩcũri maca Salim waĩcũri maca pohro árĩbũ. Ero wũaro dia árĩbũ. Ero eropa árĩcũ ero majarã masare waĩyegũ iipũ Ñu. ²⁴ Erã ĩgũre peresu iiboro core Enóngue masare waĩyegũ iipũ Ñu.

²⁵ Irisubure Ñu buherã mera majarã bajamerãgã judio masa mera waĩyerire wereniguirã duyasoñorã. ²⁶ Tuhaja erã Ñu pohroque eja irire wereñorã.

—Buhegũ, dia Jordán waĩcũriya gajipũ masegue mũ mera árĩdigũ “Īgũ ta Cristo ta árĩgũcumĩ,” mũ arĩdigũpũ dohpague masare waĩyegũ iimi. Īgũ eropa iicũ árĩpehrerã ĩgũ pohroque wahama pare, arĩñorã erã Ñure.

²⁷ Erã eroparĩcũ peegũ Ñu yũhrĩpũ:

—Īgũ dorerire ĩgũ opacũ Goãmũ ĩgũre odi árĩmi. ²⁸ “Cristo árĩbeaa yũhũ,” yũ arĩcũ mũa peeabũ. Eropa Cristo árĩbiriqereregũ ta ĩgũ core wereyubure Goãmũ ĩgũ obeodigũ ãhraa yũhũ. ²⁹ Ōpa ãhraa iri: Mojoto diridigo igo marapũ mera árĩgo wahamo. Mojoto diridigũ mera majagũpũ diridigũ ĩgũ marapocũcũ ĩagũ ĩgũ werenicũ peegũ turaro mucubirimi. Eropigũ mojoto diridigũ mera majagũ ĩgũ mucubiridiro dopa ta yũ sã Cristo mera masa erã wacũ ĩagũ ðaro mucubiria. ³⁰ Cristopũre umupeoro gahmea masare. Yũpũre umupeobiricãro gahmea masare, arĩ yũhrĩpũ Ñu.

Goãmũ magũ ũmarogue aridigũ ãhrimi, arĩ wereñumi
Ñu

³¹ Eropa arĩtuhagũ ðpa arĩnemopũ Ñu.

—Ũmarogue aridigũ árĩpehrerã nemoro turagũ ãhrimi. Mari masa i yeba majarã ãhraa. Eropirã i yeba majare wereniguia mari. Ũmarogue aridigũpũ árĩpehrerã nemoro turagũ ãhrimi. ³² Īgũ ĩarare, ĩgũ peerare ĩgũ weremi. Īgũ eropa werequerecũ ta masa ĩgũre ne peediabeama. ³³ Ũmarogue aridigũ ĩgũ wererire masa peerãpũ, “Goãmũ diaye árĩgũ tiimi,” arĩrã iima erã. ³⁴ Ihĩ

Cristore Goãmũ ïgu obeodigure Espíritu Santo ya turarire opehoñumi Goãmũ. Eropigu ïgu Goãmũ ya werenigu-irire wereniguimi. ³⁵ Goãmũ ïgu magure turaro mahimi. Eropigu árïpehrerire, árïpehrerã sãre erã opu árïdoremi Goãmũ ïgu magure. ³⁶ Goãmũ magure umupeorãpu umuri nucu Goãmũ mera árïniguicãrãcoma. ïgu magure tarinugarãpu Goãmũ pohro wasome. Eropirã umuri nucu umaroguere árïsome. Eropigu Goãmũ erãre turaro dipuwaja moagucumi, arïpu Ñu masare.

4

Jesu Samaria majago mera weretamuñumi

¹ Jesu Ñu nemoro bajarã ïgu buherã ïgu opacũ, Ñu nemoro masare ïgu waïyecũ fariseo masa peeñorã. ² Erã eropa peebeoquerecũ ta Jesupu ïgu basí masare waïyebirimi. Gua ïgu buherãpu masare waïyebu. ³ Fariseo masa erã eropa masicũ peegu Jesupu Judea yeba árïdigu Galilea yebague sihu dujaa wami guare.

⁴ Galileague warã gua “Samaria yebare tarigã warãca,” arïbu gua. ⁵ Eropa tarigã Samaria yebague árïri macague Sica waïcuri macague ejabu. Iri maca pohro iribojegue Jacobo muru ïgu magu José murure ïgu ora yeba árïyoro. ⁶ Ero Jacobo muru ïgu deco ihrira gobe árïbu. Eropigu Jesupu yoarogue aridigu, ïgu oëtaria wagu iri gobe pohro doajami. Irisubu ïgu ero doajarisubu goeri boje gohra árïbu. ⁷⁻⁸ Gua ïgu buherãpu macague gua barire asürã wara puhru yujugu ta ïgu erore dujadoami. Eropigo Samaria majago iri gobegue igo deco waago eracũ Jesu igore deco serëpu:

—Deco oque yure, arïpu.

⁹ —Muhu judio masu ãhraa. Yuru Samaria majago ãhraa. ¿Duhpigu yure decore serëri muhu? arïpo igo Jesure. Judio masa Samaria majarãre game ïadiabirã árïñorã. Eropigo igo eropa arïpo Jesure.

¹⁰ Igo eropa arïra puhru Jesu igore werepu:

—Mure Goãmũ ïgu itamudiarire masigo árïgo, mure decore serëgure masigo árïgo, muru yurure serëboaya. Ma eropa serëcũ gaji decore oboaya yuhu mure. Iri decopu ojocaríniguicãcũ iiri ãhraa, arïpu Jesu igore.

¹¹ ïgu eroparicũ peego igo yuhripo ïgure:

—Ne mure sorobu mara. I gobe sã ùhcãri gobe ãhraa. ¿Eropigu i ojocaricũ iiri decore nohogue waabocuri muhu? ¹² Gua ñecu muru Jacobo iribojegue majagu muru i gobere guare apimuripu. ïgu, ïgu porã, ïgu ejorã sã i decore

ihrimuriñorã. “Gaji decore oboaya yũhũ,” mũ arĩgu, ¿Jacobu tauro turagu ãhriri mũhũ eropa arĩ pepigu? arĩpo igo.

¹³ Igo eroparĩcũ Jesu yũhripũ:

—Árĩpehrerã i decore ihrirã dipaturi ñemesiburãcoma.

¹⁴ Yaha decopũre ihrirã ne dipaturi ñemesibusome. Eropirã yaha decore ihrirã Goãmũ mera eropa árĩniguirãcoma. Maũ dipagãgue eropa deco wiriniguero dopa ta yaha deco ne pehresome, arĩpũ Jesu.

¹⁵ Īgu eroparĩcũ nomeopũ òpa arĩpo:

—Ne dipaturi yũ ñemesibubiriboro dopa iri decore oque yũre. Eropigo dipaturi òguere ne deco waasome, arĩpo igo.

¹⁶ Igo eroparĩcũ Jesu igore wererũ:

—Irisubu tamerare mũ marapũre sihugo waque. Si-hutuha ògue arique ĩgu mera, arĩpũ Jesu igore.

¹⁷ —Marapũ marigo ãhraa yũhũ, arĩpo igo.

—Diaye ta arãa mũhũ. ¹⁸ Mũhũ cincosuburi marapũcũ-tuharibũ. Eropigu dohpague mũ mera árĩgu mũ marapũ gohra árĩbeamĩ. Eropigo “Marapũ marigo ãhraa,” arĩgo, diaye ta arãa mũhũ, arĩpũ Jesu igore.

¹⁹ Īgu eroparĩcũ peego òpa arĩpo igo:

—Ne, Goãmũ yare weremũhtagũ ãhraa mũhũ yũ pepicũ.

²⁰ Gũa ñecũ sũmarã mũra irigu utãgũgue Goãmũre umu-peomuriñorã. Eropirã mũapũ judio masa “Jerusalẽngue masare Goãmũre umupeoro gahmea,” arĩmũribũ mũa judio masa, arĩpo igo.

²¹ Igo eroparĩcũ Jesu yũhripũ:

—Nomeo, yũpũre penique. Pũhrũguere irigu utãgũgue, Jerusalẽngue sãre mari Pagũre umupeosome mũa.

²² Mũapũ mũa umupeorire masibea. Masare taubupũ judio masũ ãhrimi. Eropirã gũa judio masapũ gũa umupeogũre masia.

²³ Dohpague pũhrũgue sãre Goãmũre diaye umupeorã erã òaro pepiri mera ĩgũre umupeorãcoma. Eropa mari umupeocũ gahmemĩ Goãmũ.

²⁴ Goãmũ dũpũ marigu ta ĩgu árĩcũ masa ĩgũre ĩabeama. Eropiro ĩgũre umupeori mera erã òaro pepiri mera ĩgũre òaro diaye umupeoro gahmea masare, arĩpũ Jesu igore.

²⁵ Īgu eroparĩcũ igo yũhripũ:

—Mesia, “Cristo,” erã arĩgũpũ, masare taubu ĩgu ariburire masia yũhũ. Īgu arigu marire árĩpehrerire buhepehogũcumĩ, arĩpo igo.

²⁶ —Yũhũ ta ãhraa Cristo, arĩpũ Jesu igore.

²⁷ Īgu eropa arĩ weretamurisubu gũapũ ĩgu buherãpũ erabũ. Jesu nomeo mera ĩgu wereniguicũ ĩarã uca

wacarabũ. Eropa ¼acaquererã ta “¿Dohpa gahmeri mũhũ? ¿Dohpa arĩri mũhũ igore?” arĩ serẽpiñabiribũ. ²⁸ Eropigo nomeo igo sorobure ero duhudobocã, macague waha wamo. Eja masare werego õpa arĩpo:

²⁹ —Yũ iirare werepehogure ãarã arique mũa. ¿Ïgu diaye ta Cristo árĩbocuri? Ìarã arique mũa, arĩpo igo.

³⁰ Igo eroparĩcũ iri maca majarã Jesure ãarã arimorã iima.

³¹ Irisubure gũa Jesu buherã ãgure turaro badoreribũ.

—Buhegu, baque, arĩribũ gũa.

³² —Gajiropa árĩri barire opaa yũhũ. Irire mũa masibea, arĩmi ãgu gũare.

³³ Ìgu eroparĩcũ peerã gũa basi õpa arĩ wereniguibũ:

—¿Gajirã ãgure barire otuhayuri? arĩbũ gũa basi. Gũa eroparĩcũ Jesu weremi:

³⁴ —Masapu basũama. Yũre obeodigu ãgu gamerire iigu sũaa yũpũ. ³⁵ “Wapicũrã aberi dũhyaa mari dũca aĩboro,” pohe opu ãgu arĩ pepimi. Mũapu “Goãmũ yare gũa masare wereboro dũhyania,” arĩ pepibiricãque. Diaye arĩgu iiaa mũare. Dohpague tamerare masare wererã waque. Masare ãaque. Dohpague tamerare yũ buherire masa erã peeburisubuno árĩro tiiaa. ³⁶ Dũcare aĩrãre erã wajayero dopa ta, yaharã árĩmorãre aĩnirãre yahare buhenirãre wajayegura yũhũ. Erã eropiira waja õaro wajayegura erãre. Erã eropa buhecũ peerã yũ buherire peenirã yaharãpũ Goãmũ mera ¼mũri nũcũ árĩrãcoma. Eropirã erãre buhemũhtanirã, pũhrũ yaharã árĩcũ iirã sã yujuropa mucubirima. ³⁷ “Yujugu otemũhtagu ãhrimi. Gajigũpũ dũcare aĩgu ãhrimi,” arĩmũriñorã iribojegure. Iri diaye ta ãhraa. Erã eropa arĩdiro dopa ta yujurãyeri yahare weremũhtarã ãhrima. Gajirã yahare buhe yaharã árĩcũ iirã ãhrima. ³⁸ Pohe opu ãgure mohmerã erã otebirinirã árĩquerecũ ta erãre dũcare aĩdoregu obeomi. Eropa ta masare buhemũhtabirinirã mũa árĩquerecũ ta erã yũre umupeocũ iidoremorãre obeoa mũare. Gajirãpũ erãre buhemũtatuhama. Erã buhenirãguere dipaturi buhenemorã, yaharã árĩcũ iirãca mũapu. Eropirã buhemũhtarãpũ erã itamuro mera gajirãre yaharã árĩcũ iirãca, arĩmi Jesu gũare.

³⁹ Irisubure Samaria majago, “Yũ iira mũrãre ãgu werepehoami,” igo arĩcũ peerã Samaria majarã bajarã Jesure umupeoma. ⁴⁰ Eropirã Samaria majarã Jesu pohro ejarã, “Gũa mera dujanique,” arĩma ãgure. Erã eroparĩcũ gũa penũ ãgu mera ero dujanibũ. ⁴¹ Gajirã sã bajarã Jesure peerã umupeoma. ⁴² Õpa arĩma masa nomeore:

—Nere m̄ arĩrare peerã Jesure umupeonũgarabũ. Doh-pague tamerare ĩgu wereniguirire gua basi peerã ĩgure õaro umupeoa. Eropirã ĩgure peerã i yeba majarãre peamegue wabonirãre taubu diaye ta ĩgu árĩcũ, dohpague gua masia, arĩma masa Samaria majagore.

Opũ magũre dorecũgure õagũ wacũ iĩnũmi Jesu

⁴³ Penũ pũhrũ Jesu guare Galileague sihu wami daja. ⁴⁴ Neguere õpa arĩmũrimi guare Jesu: “Goãmũ ya weremũhtagure ĩgu ya yeba majarã ĩgure umupeobeama,” arĩmũrimi Jesu. ⁴⁵ Eropirã gua Galileague ĩgu mera ejacũ ero majarã ĩgure õaro bocatĩrima. Ero core Jerusaléngue bosenu árĩcũ Jesu ĩgu iirare ĩanirã arĩma erã.

⁴⁶ Eropi Caná Galilea árĩri macague ĩgu decore vino wacũ ĩgu iira macague waha wabũ gua ĩgu mera daja. Caná pohro árĩri maca Capernaum waĩcũri maca opũ magũ dorecũgũ iipũ. ⁴⁷ Eropigũ Jesu Judea árĩdigũ ĩgu Galileague ejari querere peepũ. Iirare peegũ Jesu pohrogue erami.

—Yũ magũ sĩrigũ iiami. Eropigũ ĩgure õagũ wacũ iigu arique, arĩ yojaro mera sihumi ĩgure.

⁴⁸ ĩgu eroparĩcũ peegũ Jesu yũhrimi:

—Goãmũ turari mera yũ deyoro moarire ĩabirã, ne yũre umupeobeaa m̄, arĩmi Jesu.

⁴⁹ ĩgu eroparĩcũ peegũ opũrũ õpa arĩmi:

—Opũ, yũ magũ ĩgu sĩriboro core arique, arĩmi ĩgu Jesure.

⁵⁰ —Dujaaque. M̄ magũ ojocarigũcumi, arĩmi Jesu.

ĩgu eroparĩcũ peegũ, “ĩgu arĩdiro dopa ta ojocarigũcumi yũ magũ,” arĩgu opũ dujaa wami. ⁵¹ Eropa dujaniguigũre ĩgu pohro majarã ĩgure bocatĩri wereñorã.

—M̄ magũ masa wahãmi, arĩ wereñorã erã ĩgure.

⁵² —¿Noho gohra abe árĩcũ õagũ wahãri ĩgu? arĩ serẽpirũ ĩgu pohro majarãre.

—Cãrũre goeri boje pũhrũgã ta nimacũri tahriabũ ĩgure, arĩñorã erã ĩgure.

⁵³ Erã eroparĩcũ õpa arĩ pepipũ ĩgu: “Jesu yũre ‘M̄ magũ masa wahãmi,’ arĩ werera pũhrũ ta nimacũri tahria waya,” arĩ pepipũ opũrũ. “Diaye ta arãnũmi yũre,” arĩgu, ĩgu arĩpehrerã ĩgu acawererã mera Jesure umupeoñorã.

⁵⁴ Jesu Judea árĩdigũ Galileague ĩgu ejara pũhrũ opũ magũre ĩgu õagũ wacũ ĩgu iira mera marĩ queocũ pesubu Goãmũ ĩgu turari mera ii ĩhmũmi Jesu.

5

Curimasibigũre õagũ wacũ iĩnũmi Jesu

¹ Puhru judio masa Goãmure gũa umupeori bosenu árĩcũ gũa Jesu mera Jerusaléngue ejabu daja. ² Ero maca ñajari disiporo oveja waĩcũri disiporo pohro guhari gobe árĩbũ. Gũa judio masa ya mera Betesda waĩcũri gobe árĩbũ. Iri deco gobe pohro cinco gohra tiaya mariri tari dipabu árĩbũ. ³ Iri tari dipabugue bajarã dorecũrã oyarãre íabũ. Cuiiri íhajabirã, curimasibirã, gõari marirã, erã iri gobe pohro oyama. Deco ñohmeborore corerã iĩñorã. ⁴ Erogue dijarigu iri gobe maja decore yujuyerisuburi ñohmecũ iipũ anyu. Iri gobe maja deco ígu ñohmera puhru ñaja guhamũhtagupũ õagũ wapũ. Dohpa árĩri dorere opagũ õagũ wapũ. ⁵ Eropigu ero yujugũ dorecũgu oyami. Ígu treinta y ocho bojori gohra dorecũgu árĩpũ. ⁶ Ero ígu oyacũ íagu ígu eropa yoari boje ígu dorecũcũ masimi Jesu ígure. Eropa masigu ígure serẽpimi:

—¿Õari dũpũ dore marigu árĩdiari mũhũ? arĩmi Jesu ígure.

⁷ Ígu eroparĩcũ dorecũgupũ yũhrimi:

—Iri deco ñohmecũ yũre decogue aĩ acugũ marimi. Iri decogue yũ ñajadiaquerecũ ta gajirãpũ yũ core yuu ñajamũhtama, arĩmi ígu Jesure.

⁸ —Wahgãnũgajaque. Mũ omasiariñere aĩ, mũ guburi mera cũhrapi wahgã waque, arĩmi Jesu ígure.

⁹ Ígu eroparĩcũ ta dorecũgupũ wahgãnũgaja ígu omasiariñere aĩ waha wami. Irinũ Sabado gũa judio masa soorinũ árĩbũ. ¹⁰ Ígu eropa õagũ wadigu ígu omasiariñere aĩgãcũ íarã judio masa gũa oparãpũ dorecũdigure õpa arĩ wereñorã:

—Dohpagãre Sabadonũ mari soorinũ árĩquerecũ mũ yañe omasiariñere aĩ wahgãa mũhũ. Eropa iigu mari dorerire tarinũgagu iiaa, arĩñorã erã ígure.

¹¹ —Yũre yũ dorecũrre taudigupũ õpa arãmi yũre, arĩpũ dorecũdigupũ. “Mũ omasiariñere aĩ, mũ guburi mera cũhrapi wahgãque,” arãmi yũre, arĩ yũhrípũ dorecũdigu mũrupũ erãre judio masa oparãre.

¹² —¿Iriire mũre eropa arĩdigupũ nihino ãhriri ígu? arĩ serẽpiñorã erã ígure.

¹³ Ero bajarã masa erã árĩcũ íagu Jesupũ waha wadigu arĩmi. Eropigu dorecũdigupũ ígure õagũ wacũ iidigu ígu waĩre masibirípũ. ¹⁴ Puhru Goãmũ wihigue gũa ígure bocatĩricũ Jesu ígure weremi:

—Peenique mũhũ yũre. Dohpaguere õaro dũpũcũa mũhũ. Ñerire iinemobiricãque. Dipaturi iinemogu mũ dorecũdiro tauro wagũca, arĩmi Jesu ígure.

15 Īḡu eropa arīra pūhrū dorecūdigū judio masa oparā ĭḡure serēpinirā pohroḡue eja, werepū erāre:

—Jesu waīcūḡu yūre ḡaḡu wacū iiami, arī werepū ĭḡu.

16 Eropi Sabado árīcū Jesu dorecūḡure ĭḡu dorere ĭḡu taucū masirā judio masapū ĭḡure ñero iinūḡañorā. Eropirā erā ĭḡure wejēdiariñorā.

17 Eropa ñero erā iidiarire masigū Jesupū weremi erāre:

—Yū Pagū dohpaguere mohmenimi. Yū sā eropigū mohmenigū iiaa, arī weremi ĭḡure ñero iidiarāre.

18 Īḡu eroparīcū judio masa ḡua oparā ĭḡu mera turaro guarā, ero core erā arīdiro tauro ĭḡure wejēdiañorā. Sabadonūre erā soorinūre ĭḡure ḡaḡu iicū ĭarā erā guañorā. Eropa guarā Goāmūre ĭḡu “yū Pagū,” ĭḡu arīcū peerā erāpū tauro guañorā. “ ‘Yū Pagū,’ arīḡu Jesu ĭḡu basi ‘Goāmū mera yujuro mera āhraa,’ arī ḡuñacumi ĭḡu,” arī pepiñorā judio masa ḡua oparā.

Jesu “Goāmū ĭḡu obeodigū āhraa yūhū,” arī masare wereñumi

19 Eropi Jesu erāre weremi:

—Diaye mūare arīḡu iiaa. Yūhū Goāmū magū yū gamero iigū iibeaa. Yū Pagū ĭḡu iirare ĭaḡu irire iiaa. 20 Yū Pagū yūre ĭḡu magūre mahimi. Eropigū ĭḡu iirare yūre ii ĭhmupehomi. I dohpaguere ĭḡu turari mera yū iira tauro ĭḡu ḡajire iidoreḡucumi yūre. Īḡu eropa iidorecū ĭḡu turari mera ii ĭhmugūca ĭḡure yūhū. Eropa yū ii ĭhmucū ĭha ũcarāca mūa. 21 Yū Pagū sīrinirāre ĭḡu masuro dopa ta yū sā yū gamerāre masuḡra. 22-23 Ne yū Pagupū masa erā ñeri iira dipuwaja, ĭḡu basi dipuwaja moaḡu moabeami. Yūpūre irire erā ñeri iira dipuwaja dipuwaja moabure apimi. Erā ĭḡure umupeodiro dopa ta yū sāre umupeoborore eropa apimi. Eropirā yūre ĭḡu magūre umupeobirā yū Pagū sāre umupeobeaa mūa. Īḡu āhrimi yūre obeodigū, arīmi Jesu.

24 Eropa arītuha ḡpa arī werenemomi:

—Diaye mūare arīḡu iiaa. Yū wereniguirire peerā yūre obeodigūre umupeorā ũmūri nūcū ũmaroḡue eropa árīniguičārācoma. Eropigū erāre dipuwaja moasome yūhū. Eropirā erā peameḡue wabonirā tarirācoma.

25 Diaye ta mūare arīḡu iiaa. Peameḡue wamorā yūre Goāmū magūre erā peeburisubu dohpague āhraa. Pūhrū sāre erā yūre peerācoma daja. Eropa peerā peenūrūrāpū Goāmū mera eropa árīniguirācoma. 26 Goāmū yū Pagupū erāre eropa árīniguičū iigū āhrimi. Eropigū yūre ĭḡu magūre erāre eropa árīniguičū iibure árīdoremi ĭḡu yūre.

27 Eropigū yūhū masū Goāmū ĭḡu obeodigū árīcū ĭḡu

masare dipuwaja moadorerire apimi yure. ²⁸ Ire peerã, pee ucabiricãque mua. Gajinũguere árĩpehrerã sĩrinirã masa goberigue árĩrã yu wereniguicũ peerãcoma. ²⁹ Eropa pee wahgãrã òarire iinirã mura umuri nucũ Goãmũ mera árĩmorã masa muriarãcoma. Ñeri iinirã murapu ñerire erã iira dipuwaja peamegue warãcoma, arĩ weremi Jesu.

³⁰ Eropa arĩtuha òpa arĩ werenemomi:

—Yu gamero ne gajinore iibea. Ne yu basi yu gamero iibea. Yure obeodigu ìgu gamero dopa ta iia. Eropigu ìgu arĩdiro dopa ta dipuwaja moaa. Eropigu masare yuhu dipuwaja moagu diaye ta iia. ³¹ “Yuhu Goãmũ magu ìgu obeodigu àhraa,” yu basi arĩ werecũ, “Mu werenigui ne diaye árĩbeaa,” arĩbocamua. ³² Gajigu àhrimi yure weregu. Ìgu Goãmũ àhrimi. Ìgu yure werera diaye ta àhraa. Irire yu òaro masia. ³³ Mua gajirãpũre Ñure yure serẽpidore obeobũ. Eropigu ìgu sã diaye ta weremi mure. ³⁴ Masare yure “Goãmũ ìgu obeodigu àhrimi,” arĩ weremorãre amabeaa yuru. Eropa amabiriqueregu ta Ñu masu ìgu árĩquerecũ ta “Yure diaye ta weremi,” arãa. Mua yure umupeoburire, mua peamegue wabonirã mua tariburire yure ìgu werera “Diaye ta àhraa,” arĩ weregu iia. ³⁵ Ñu mure buhemũhtagu bajamenũrigã buhemi mure. Ìgu eropa buhecũ peerã bajamenũrigã mucubiriribu mua. ³⁶ Ñu yu árĩricũre weremi mure. Ìgu wereri mera yu árĩricũre masiquererã yu iirire ìarã tauro masirãca. Goãmũ yu Pagu ìgu turari mera ìgu yure iidorerare dohpague iigu iia. Ire yu iicũ ìarã diaye ta Goãmũ ìgu obeodigu yu árĩcũ masirãca mua. ³⁷ Eropiro yu Pagu yure obeodigu ìgu basi yuhu ìgu obeodigu árĩrĩre arĩ weremi mure ìgu yare erã gojarapũgue. Ìgu eropa arĩ werequerecũ ta ìgu wereniguirire ne peebeaa mua. Eropi mua ìgure ne ìabeaa. ³⁸ Yure Goãmũ ìgu obeodigũre mua ne peediabeaa. Eropirã mua ne Goãmũ yare gamebeaa. ³⁹ Goãmũ yare erã gojarapũre mua òaro buhea. Eropa buherã “Gua ipũre buherã umuri nucũ Goãmũ mera eropa árĩniguirãca,” arãa mua. Iripũ ta yure werea. ⁴⁰ Iripũ yure werequerecũ ta murapu yure gamebeaa. Umuri nucũ Goãmũ mera mua árĩniguiburire yuhu ogu árĩquerecũ yure gamebiribu mua, arĩ weremi Jesu erãre.

⁴¹ Eropa arĩtuha òpa arĩnemomi:

—Yure masa erã umupeorire amabeaa yuhu. ⁴² Eropa amabiriqueregu ta Goãmũre mua mahibiricũ masia yuhu. ⁴³ Goãmũ yu Pagu ìgu dorero dopa ta yu ariquerecũ ta mua yure gamebeaa. Gajigũpũre Goãmũ ìgu obeobiridigu

ĩḡu árĩquerecũ ta ĩḡuḡure gamerãca mũa. ⁴⁴ Gajirã masa mũare erã umupeocũ gahmea mũa. Goãmũ mũa mera ĩḡu mucubirire gamebeaa mũa. ĩḡu dihta Goãmũ gohra ährimi. Eropa gamebirã yũre peebeaa mũa. Yũre umupeobeaa mũa. ⁴⁵ Mũare yũ Pagũguere ne weresãsome yũhũ. Irire pee masique mũa. Moise ĩḡu gojarapũḡu mũare weresãroca. “Iripũ maja dorerire ipehorã, Goãmũ pohro warãca mũa,” arĩripũḡu mũare weresãroca. ⁴⁶ Moise ĩḡu gojarapũ yũḡure weremũhtayoro. Eropirã iripũre õaro umupeorã yũ sãre umupeoboaya mũa. ⁴⁷ Moise ĩḡu gojarapũre mũa õaro peebirã, yaha wereniguiri sãre peesome mũa, arĩmi Jesu erãre.

6

Cinco mil umare masare bajarã gohrare bari oñumi Jesu Mt 14.13-21; Mr 6.30-44; Lc 9.10-17

¹ Eropa ĩḡu buhera ḡuhrũ Galilea waĩcũri ditaru gajipũ masegue ḡua Jesu mera taribuja wabũ. Galilea ditaru ta Tiberia waĩcũbũ. ² Ero core Galilea yeba Jesu dorecũrãre ĩḡu õarã ĩḡu iicũ masa ĩanirã árĩma. Erã eropa ĩanirã árĩrã Jesu ĩḡu taribujacũ ĩarã masa bajarã ĩḡure nũrũsia taribujama. ³ Eroque eja, ḡua ĩḡu buherã ĩḡu mera utãḡugue mũria, doabũ. ⁴ Irinũ Pascua waĩcũri bosenu árĩboro judio masa bosenu árĩboro merogã duhyabũ. ⁵ Eroque doagu, Jesu masa bajarã ĩḡu pohro erã aricũ ĩhabeomi. Eropa ĩhabeogu Felipe serẽpimi Jesu:

—¿Oã masa erã baburire nohogue asũrãcuri mari? arĩ serẽpimi.

⁶ Jesu ĩḡu basi ĩḡu iiburire masiquereḡu ta Felipe serẽpi ĩami, “¿Dohpa yũhrigũcuri?” arĩḡu. ⁷ ĩḡu eropa serẽpicũ Felipeḡu yũhrimi:

—Doscientos niyerupũri waja mera mari asũquerecũ ta, masare yujurãyerire mũtarigã barire mari guerequerecũ ta ne sihasosome, arĩmi Felipe Jesure.

⁸ ḡua mera majagu Andreḡu Simo Pedro pagũ magũḡu Jesure weremi.

⁹ —Cinco pan dipuru, perã wai ihĩ majigu ohõ opami. Iri pan dipurugã ĩḡu opaquerecũ ta masapũ bajarã gohra ährima. Eropiro i merogã bari ne sihasosome, arĩmi Andre.

¹⁰ —Masare doadoreque mũa, arĩmi Jesu ḡuare ĩḡu buherãre.

Ero mũtarigã taacuro árĩbũ. ḡua doadorecũ masa árĩpehrerã doajapehrea wama taa weca. Ũma dihtare queocũ cinco mil gohra árĩma. ¹¹ Erã eropa doajacũ ĩagu Jesupũ panre aĩ Goãmũre “Õhaa,” arĩmi. Eropa arĩtuha

guare ĩgu buherãre gueredoremi. ĩgu eropa gueredorecũ guapu erã doarãre guere wahgãbu. Perã wai sãre aĩ guere wahgãbu. Áripehrerãre erã sihajaro barire guerebu. ¹² Eropirã masa erã yapicũ ĩagu Jesu guare doremi:

—Erã ba duharire aĩque. Eropirã iri barire ne dedeosome, arĩmi.

¹³ ĩgu eroparĩcũ guapu cinco pan dipuru duhyarare gua gameneocũ doce puiri gohra wiribu. ¹⁴ Eropirã masa Jesu Goãmu turari mera iri deyoro moariñere ĩgu iicũ ĩarã õpa arĩma:

—Diaye ta ãhraa. Ihĩ Goãmu ya wereniguigu i yebague aridigu mari coredigu ta ãhrimi, arĩma erã.

¹⁵ Eropirã erã Jesure erã opu arĩbure acudiarima. Jesu irire masigu dipaturi yujugu ta utãugue waha wami.

Jesu deco weca curiñumi

Mt 14.22-27; Mr 6.45-52

¹⁶ Ñamicague gua ĩgu buherã dihta ditarugue buhabu. ¹⁷ Eroguere buhaja dohodirugue ñaja, Capernaum waĩcari macague taribujabu. Gua eropa taribujacũ ñamigue arĩbu. Eropigu Jesu gua pohrogue arinibirimi dohpa. ¹⁸ Miruñe turaro aricũ gua taribujariyaguere pãgũri wahgãbu. ¹⁹ Cinco kilõmetros gohra gua taribujara puhru Jesu gua pohrogue arimi. Deco weca nigui wahgãricũ ĩabu gua ĩgure. Eropa gua pohro ĩgu aricũ ĩarã gua gũibu. ²⁰ Gua gũicũ ĩagu ĩgu guare weremi:

—Ne yure ĩha ucabiricãque. Guñaturarã arĩque. Yuhu ta ãhraa, arĩmi Jesu.

²¹ ĩgu eroparĩcũ peerã gua ĩgure mucubiriri mera bocatĩri ñajadorebu. ĩgu ñajara puhrugã gua wara yebaguere taribujajabu.

Masapu Jesure amañuma

²²⁻²⁴ Gajinu masa ero dujanirãpu gamenerenugañorã daja Jesure corerã. Iri ñamire gua yaru mera gua dihta taribujacũ ĩanirã arĩma erã. Jesu gua mera ĩgu wabiricũ sãre ĩanirã arĩma erã. Eropa gamenererã Jesure bocabiriñorã. Bocabiri ero pohro Tiberiague ariri gasi tuhajacũ ĩañorã. Jesu Goãmure “Õhaa,” arĩ, masare ĩgu bari guerediro pohroñarigue arĩyoro. Eropirã Jesu gua sã maricũ ĩarã, iri gasigue ñaja, Capernaumgue guare nurusia taribujajama. Jesure ahma nurusiagãrã iima erã.

Yuhu ojocaririre ogu, bari iro dopa arĩgu ãhraa, arĩ wereñumi Jesu masare

²⁵ Ditarure taribuja, gña árĩrogue eja, Jesure bocajanijarã erã serẽpima ïgure:

—Buhegu, ¿dohpárĩcũ ahrari mũhũ õguere? arĩ serẽpima erã ïgure.

²⁶ Erã eropa arĩ serẽpicũ, Jesu erãre weremi:

—Diaye arĩgu iiaa mũare. Deyoro moarire yũ iiquerecũ ta yũpũre umupeobeaa mũa. Yũre umupeobiriquererã ta yũre ahmaa mũa. Yũ mera pagari baha, mũa yapinirã árĩrã yũre amagãrirã iiaya daja. ²⁷ Bari ne árĩniguibeaa. Pũhrũ pehrea wahaa iri. Eropirã irire eropa amaniguibiricãque. Gaji bari gajiropa árĩri baripũre amaque mũa. Iri barire amarã mũari nũcũ Goãmũ mera árĩrãca. Eropiro iri bari tamera ne pehrebeaa. Iri barire yũhũ masũ Goãmũ ïgu obeodigu mũare ogũra. Goãmũ yũ Pagũ yũre irire odoregu ãhrimi. ïgu obeodigu yũ árĩrĩre ïhmutuhami mũare, arĩmi Jesu.

²⁸ ïgu eroparĩcũ erã serẽpima ïgure:

—¿Goãmũ iidorerire iimorã dohpa iirãcuri gña? arĩ serẽpima erã.

²⁹ —Ire Goãmũ mũare iidoremi: “Yũre ïgu obeodigure umupeoque,” arĩ doremi Goãmũ, arĩmi Jesu.

³⁰ ïgu eroparĩcũ peerã erã õpa arĩma:

—Goãmũ ïgu obeodigu mũ árĩgu ïgu turari mera ii ïhmuque gũare mũre gña õaro umupeoborore. ¿Ñehenore iibocuri mũhũ? ³¹ Mari ñecũ sũmarã mũrague iribojegue majarã masa marirogue mana waĩcũri dipurure bamũriñorã. Goãmũ yare erã gojaripũgue õpa arĩ wereyoro: “ïgu erãre mũmaro maja dijuri barire omũripũ erã baburire,” arĩ gojañuma Goãmũ yare erã gojarapũgue. ¿ïgu eropa iidiro dopa ta iigu iiri mũ sã? arĩma erã.

³² Erã eroparĩcũ Jesu weremi erãre:

—Diaye mũare arĩgu iiaa. Moisepũ iri mũmaro maja barire mũa acawererãre obiriñumi. Yũ Pagupũ mũmaro maja barire diaye maja barire mũare ogũ ãhrimi. ³³ Goãmũ ïgu bari mũmaro dijari árĩpehreri yeba majarãre ojocaririre omasia, arĩmi Jesu.

³⁴ —Opũ, mũari nũcũ iri barire oque gũare, arĩma erã.

³⁵ Erã eroparĩcũ peegu Jesu weremi erãre:

—Yũpũ ojocaririre ogũ bari iro dopa árĩgu ãhraa. Mari ya barire barã matagã ta oaboa wahaa mari. Ihriri sãre mari ihrira pũhrũgã ta ñemesibua daja. Yũre gamegũpũ, yũre umupeogũpũ, ne oaboabigu ñemesibubigu iro dopa ïgu õaro árĩri ne pehresome ïgure. ³⁶ Mũapũ yũre ïaquererã ta umupeonibeaa dohpa. Irire ta mũare wererabũ yũhũ.

³⁷ Árípehrerã yu Pagu yarã árĩmorãre ĩgu añirãpu yure gamerãcoma. Eropigu yure gamerãre ne cóãsome yuhũ. ³⁸ Umarogue arigu yu gamero iigu arigu iibiribu. Yure obeodigu ĩgu gamero dopa ta iigu aribu. ³⁹ Ita árĩbu yure obeodigu ĩgu gameri gohra: Árípehrerã yaharã árĩmorã yure ĩgu onirãre yu dedeobiricũ gahmemi. Yure obeodigu pehrerinũ árĩcũ erãre yu masucũ gahmemi. ⁴⁰ Árípehrerã yure Goãmu magure ĩarã, yure umupeorã umuri nucu ĩgu mera erã árĩcũ gahmemi yu Pagu. Eropigu pehrerinũ árĩcũ erãre masugura, arĩmi Jesu.

⁴¹ “Yuhũ umarogue ariri bari iro dopa árĩgu ãhraa,” ĩgu árĩcũ peerã judio masa gũa oparãpu ĩgu mera guarã, erã basi Jesure ñero arĩ wereniguima.

⁴² —¿Ihĩ Jesu José magu árĩbeari? ĩgu pagu, ĩgu pago sãre mari masia. ¿Eropa árĩqueregu ta duhpigu “Umarogue aribu,” arĩ wereniguiri ĩgu? arĩ guama erã.

⁴³ Erã eroparĩcũ peegu Jesu weremi erãre:

—Mũa basi yure ñero arĩ wereniguibiricãque. ⁴⁴ Yu Pagu yure obeodigupu masare yure gamecũ iimi. ĩgu eropiibiricũ masapu yaharã árĩmasibiriboñuma. Pehrerinũ árĩcũ yaharãre masuguca yuhũ. ⁴⁵ Goãmu ya weremũhtanirãpu òpa arĩ gojañuma: “Goãmu erãre buhegucumi,” arĩ gojañuma. Árípehrerã yu Pagu ĩgu buherire peerã ĩgure yãhrirã yure gahmema. Eropirã yaharã ãhrima.

⁴⁶ “Yu Pagure ne yujugu masu ĩabeami. Yuhũ Goãmu ĩgu obeodigu dihta yu Pagure ĩabu. ⁴⁷ Diaye arĩgu ĩiaa mũare. Yure umupeogu árĩpehrerinuri yu Pagu mera árĩniguigucumi. ⁴⁸ Yũpu ojocaririre ogu bari iro dopa árĩgu ãhraa. ⁴⁹ Mũa ñecu sumarã mũrague masa marirogue manare bamuriñorã. Eropa irire baquererã ta sĩa wañorã. ⁵⁰ Umarogue ariri baripure masu bagu ne sĩrisome. ⁵¹ Yuhũ umarogue ariri bari ojocaririre ori bari iro dopa árĩgu ãhraa. I barire bagu umuri nucu yu Pagu mera eropa árĩniguigucumi. I bari ojocaririre ori bari iro dopa árĩri yu dũpu ta ãhraa. Árípehreri yeba majarã Goãmu mera eropa erã árĩniguiburire yu dũpũre ogura. Eropa ogu sĩriguca, arĩmi Jesu.

⁵² ĩgu eroparĩcũ peerã judio masapu òpa arĩ wereniguima erã basi:

—¿Ihĩ dohpa ii ĩgu dũpũre baburi ogucuri? arĩma erã erã basi.

⁵³ Erã eroparĩcũ peegu Jesu weremi:

—Diaye arĩgu ĩiaa mũare. Yuhũ Goãmu ĩgu obeodigu ãhraa. Yu dũpũre babigu, yu dire ihribigu Goãmu mera

árísome. ⁵⁴ Yũ dũpũre bagũre, yũ dire ihrigure, pehrerinu árĩcũ masugũra. ⁵⁵ Yũ dũpũ diaye ta bari gohra iro dopa āhraa. Yũ di diaye ta ihriri gohra iro dopa āhraa. ⁵⁶ Yũ dũpũre bagũ yũ dire ihrigũ yũ mera mucubiriri mera árĩniguigũcumĩ. Eropigũ yũhũ ĩgũ mera mucubiriri mera árĩniguigũca. ⁵⁷ Yũ Pagũ yũre obeodigũ eropa árĩniguicãmi. Eropa árĩniguigũ yũ sãre eropa árĩniguicũ iimi. Eropirã yũre eropa árĩniguigũre masa barã, Goãmũ mera ũmaroguere eropa árĩniguirãcoma erã sã. ⁵⁸ Ita āhraa ũmarogue ariri bari. Mari ñecũ sũmarã mũra erã bara mũra iro dopa árĩbeaa i bari. Erãpũ iri barire baquererã ta sĩria wañorã. I baripũre bagũ ũmaroguere eropa árĩniguicãgũcumĩ, arĩmi Jesu.

⁵⁹ Capernaum judio masa gũa buheri wihi Jesu buhegũ, eropa weremi.

Jesu ĩgũ buherire peerã ũmarogue eropa árĩniguirãca mari, arĩ gojañumi Ñu

⁶⁰ ĩgũ eropa wereniguicũ peerã bajarã gũa watope árĩrã Jesure gamerã, ĩgũre nũrusianirã õpa arĩ wereniguima:

—I buheri diasaa āhraa. Eropirã mari peediabiriñaria, arĩ wereniguima erã erã basi.

⁶¹ Erã eroparĩcũ Jesupũ erã wereniguirire masimi. Eropa masigũ ĩgũ erãre serẽpimi:

—¿I buherire peerã guari mũa? ⁶² ¿Yũhũ masũ Goãmũ ĩgũ obeodigũ ũmarogue dujaa wacũ dohpa wabocuri mũa?

⁶³ Masũ ĩgũ sĩporãre opagũ ojocarimi. ĩgũ dũpũpũ ĩgũre ojocaricũ iibeaa. Masũre ĩgũre ĩgũ sĩporã ojocaricũ iro dopa ta yũ buheripũ mũare Goãmũ mera eropa árĩniguicũ iiaa. ⁶⁴ Gajirã mũa mera majarã ne yũre umupeobeama, arĩmi Jesu.

Negohraguere Jesu ĩgũre umupeobiribonirãre masituhajapũ. ĩgũre ĩhaturirãre wiabu sãre mata masituhapũ. Eropa masigũ “Gajirã mũa mera majarã yũre umupeobeama,” arĩmi Jesu gũare.

⁶⁵ Eropa arĩtuhaja õpa werenemomi:

—Õpa arĩ wererabũ mũare. “Yũ Pagũpũ masare yũre gamecũ iimi. ĩgũ eropa iibiricũ masapũ yaharã árĩmasibiriboñuma,” mũare arĩrabũ, arĩmi Jesu.

⁶⁶ ĩgũ eropa arĩ buhecũ peerã bajarã Jesure gamenirã mũra ĩgũre cohã, ĩgũ mera dipaturi wabirima. ⁶⁷ Erã eropa iicũ ĩagũ Jesu gũare doce ĩgũ buherãre serẽpimi:

—¿Mũa sã yũre cóãcãrãcuri? arĩ serẽpimi gũare.

⁶⁸ ĩgũ eroparĩcũ Simo Pedro yũhrimi ĩgũre:

—Opu, guare gajigu buhegu marimi. Mu buherire peerã Goãmu mera eropa árĩniguirãca gua. Mu buheri dihta irire werea guare. ⁶⁹ Eropirã gua mure umupeoa. Eropa muhu òagu, Goãmu magu ìgu obeodigu mu árĩcũ gua masia. Eropirã mure cóãsome gua, arĩmi Simo Pedro Jesure.

⁷⁰ Ìgu eroparĩcũ peegu Jesu weremi guare:

—Yupu muare doce majarãre beyebu. Yujugu mua mera majagu watĩ yagu árĩbu àhrimi, arĩmi guare ìgu buherãre.

⁷¹ Eropa arĩgu Judare Simo Iscariote magure arĩgu iimi. Judapu doce gua mera majagu Jesure ìhaturirãre wiabu arĩmi.

7

Jesu pagu porã ìgure peediabiriñuma

¹ Pũhrũ gua mera Jesu Galilea yeba curigu wami. Judea yeba majarã judio masa ìgure wejediañorã. Erã eropa wejediacũ masigu ìgu iri yebare wabirimi. ² Judio masa mũta wirigã gua iiburinu bosenu merogã duhyabu. ³ Eropirã Jesu pagu porã ìgure werema:

—Judeague bosenure ìagu waque. Ero mu yarãre deyoro moarire ii ìhmugu waque muhu. ⁴ Masare deyoro moarire ii ìhmudiagu mure dibubiricãro gahmea. Deyoro moarire ìgu arĩgu arĩpehrerã erã ìhuro iique, arĩma erã.

⁵ Ìgu pagu porã arĩquererã ta Jesure “Goãmu magu àhrimi,” arĩbirima. Eropirã eropa arĩma erã ìgure. ⁶ Erã eropa arĩra pũhrũ Jesu weremi erãre:

—Masa yure erã òaro masiburisubu duhyania dohpa. Mũapu bosenure ìadiarã waque. ⁷ Ero majarã muare ìhaturibeama. Yũpũre erã ñeri iirare yũ werecũ yure ìhaturima. ⁸ Mua seyaro bosenu árĩcũ waque. Yũpũre yũ waburisubu duhyania dohpa. Eropigu yũpu bosenure ìagu wanibea dohpa, arĩmi Jesu erãre.

⁹ Eropa arĩgu ìgu Galilea dujami.

Mũta wirigã erã iirinũri bosenu árĩcũ wañumi Jesu Jerusaléngue

¹⁰ Bosenugue Jesu ìgu pagu porã erã wara pũhrũ Jesu sã gua mera erã pũhrũ wami. Eropa wagu masa erã ìabiririsubu wami. ¹¹ Bosenu arĩrã judio masa gua oparã ìgure amañorã:

—¿Nohogue árĩcuri ìgu? arĩ serẽpiñorã.

¹² Eropirã masa bajarã Jesure werewñañorã. Gajirã, “Ìgu òagu àhrimi,” arĩñorã. Gajirãpu, “Ìgu ñegu àhrimi. Masare guyagu àhrimi,” arĩ werewñañorã.

¹³ Eropa arīquererã judio masa gua oparãre güirã, masa erã ñabirogue Jesure werewuañorã.

¹⁴ Gua erogue ejara pührü bosenü deco Jesu Goãmü wihigue ñajaja buhemi. ¹⁵ Īgu eropa buhecã judio masa uca wa õpa arĩma:

—¿Ihĩ buherogue buhebigü árīqueregü ta duhpigü õaro masipehori ĩgü? arĩma erã ĩgüre.

¹⁶ Erã eroparĩcũ Jesu weremi erãre:

—Yü buheri yaha werenigüiri árĩbeaa. Yüre obeodigü ya werenigüiripü ähraa i buheri. ¹⁷ Goãmü gamerire iidiarã yü buherire “Goãmü werenigüiri ta ähraa,” arĩ masirãcoma. Yü buheri yaha werenigüiri dihta árĩbircũ sãre masirãcoma. ¹⁸ Yujugü ĩgü gamero ĩgü masiri mera buhegü árĩgü “Yü dihtare umupeoque,” arĩgü ährimi ĩgü. Yüre obeodigüpare müa umupeocũ gahmea yurü. Yü eroparĩcũ peerã, “Diaye ta werenigüimi ĩgü. Ne güyabeami,” arĩ masirãca müa.

¹⁹ “Goãmü dorerire Moise mürapü apimürĩñumi müare. Īgü eropa apiquerecũ ta müa árĩpehrerã iri dorerire ne yühribeaa. ¿Duhpirã yüre wejẽdiari müa? arĩmi Jesu judio masare.

²⁰ —Mü goroweregü ähraa. Müre wejẽdiarã marima, arĩ yührima erã Jesure. Erã eroparĩcũ Jesu yührimi:

²¹ —Yühu soorinü yujusubu Goãmü ĩgü turari mera dorecugüre ĩgü dorere yü cóãcũ müa ĩha uca wabü. ²² Mari ñecü sumarã iribojegue majarãpü erã dũpüre merogã gasirogãre wiri aĩrã erã árĩdiro dopa ta Moise wiridoreñumi. Īgü eropa dorecũ majirãgãre ocho nuri erã masa dehyoara pührü soorinü árīquerecũ ta erã dũpüre merogã erã gasirogãre wiri aĩmüria müa. ²³ Mari soorinü árĩcũ majirãgãre erã dũpüre merogã gasirogãre wihria müa Moise doreri iimorã. ¿Müa sã soorinü irire iiquererã ta irinü dorecugüre yü taucũ duhpirã yü mera guarĩ müa? ²⁴ Yü iirare müa õaro masibiriboro core, yüre ñero pepibircãque. Müa õaro masira pührü yüre müa ñero pepicũ diaye ta árĩroca, arĩmi Jesu.

Jesu negohraguere ĩgü aridirore wereñumi

²⁵ Īgü eropa arĩ werera pührü bajamerãgã Jerusalén majarã õpa arĩ wereniñorã:

—¿Ihĩ mari oparã erã wejẽdiagü árĩbeari? ²⁶ Eropigü ĩgüre erã wejẽdiaquerecũ ta árĩpehrerã masare buhegü iimi ĩgü. Eropirã ĩgüre wejẽdianirã árīquereerã ta eropa ñacãma. Eropa ñacãrã ĩgüre “Īgü diaye ta Cristo Goãmü ĩgü obeodigü ährimi,” ¿arĩ pepibocuri oparãpü? Maripü masia.

Cristo árĩbiribocumi. ²⁷ Ihĩ Jesu ĩgu aridirore gua masia. Cristopu ĩgu árĩcũ ĩgu aridirore masiya mara. Eropigu Cristo gohra árĩbeami Jesu, arĩ werewuañorã erã Jerusalén majarã.

²⁸ Erã eropa arĩrare masigu, Jesu õpa turaro busuro werenigui buhemi Goãmũ wihi:

—Yure õpa arĩ pepia mũa: “Īgure masia gua. Eropirã ĩgu aridiro sãre masia,” arĩ pepiraa mũa yure. Mũa eropa arĩ pepiquererã ta yũ gamero aribirabu. Yure obeodigu gohrare masibea mũa. Yure obeodigu diaye árĩgu, diaye iigu aħrimi. ²⁹ Īgu ta yure obeomi. Eropigu ĩgu pohrogue aribũ. Eropigu yũhũ ĩgure masia, arĩmi Jesu judio masare.

³⁰ Īgu eroparĩcũ peerã ĩgure ñeadiarima. Erã eropa ñeadiaquerecũ ta Jesu ĩgu ñero tariburisubu árĩbiriyo dohpa. Eropirã erã ĩgure ñeamasibirima. ³¹ Gajirã masapu bajarã ĩgure umupeoma. Õpa arĩma:

—“Cristo bajasuburi Goãmũ turari mera deyo moarire ii ĩhmugucumi,” erã arĩ werediro dopa ta ihĩ Jesupu bajasuburi Goãmũ turari mera ii ĩhmumi. Árĩpehrerã gajirã tauro Goãmũ turari mera ii ĩhmumi ĩgu. Eropigu Cristo Goãmũ ĩgu obeodigu ta aħrimi Jesu, arĩma Jesure ne umupeonũgarãpu.

Fariseo masa Jesure peresu iidoreñuma

³² Masa Jesure eropa arĩ wereniguicũ peerã pahia oparã, fariseo masa mera Jesure ñeadorerã obeoriñorã surarare.

³³ Eropigu Jesu masare õpa arĩmi:

—Bajamenurigã mũa mera árĩnigũca. Eropigu puhruñarigã yure obeodigu pohro wagũca. ³⁴ Yũ árĩborore mũa wamasibea. Eropirã yure amaquererã ta ne bocasome mũa, arĩmi Jesu masare.

³⁵ Īgu eroparĩcũ peerã erã judio masa õpa arĩ wereniguiñorã:

—¿Ihĩ eropa arĩgu nohogue wagucuri mũa pepicũ? ¿Griego masa pohrogue judio masa wasirinirã pohrogue erã árĩri macarigue Griego masaguere buhegu wabocuri ihĩ? ³⁶ “Yũ árĩborore mũa wamasibea. Eropirã mũa yure amaquererã ta ne bocasome,” ĩgu arĩgu ¿dohpa arĩronore ĩgu eropa arĩri? arĩ wereniguiñorã judio masa erã basi.

Ojocaricũ iriyarire wereñumi Jesu

³⁷ Bosenu ojogorocurinu irinu guhyadiarinu gohra árĩro iibu. Irinu Jesu ero nigui, turaro mera weremi masare:

—Ñemesiburã decore turaro gamero dopa arĩrã umuri nucũ Goãmũ mera turaro árĩdiarã yure serẽque. Mũa

eropa serēcũ ĩḡu yarã árdoreḡura mũare. ³⁸ Yũre umupeorãre õpa arĩ gojañuma Goãmũ yare erã gojarapũḡue: “Erã sĩporãriḡuere ojocaricũ iiri deco eropa árĩniguiçãroca,” arĩ gojañuma, arĩ turaro weremi Jesu masare.

³⁹ “Erã sĩporãriḡuere ojocaricũ iiri deco eropa árĩniguiçãroca,” arĩḡu “Yũre umupeorã Espĩritu Santore oparãcoma” arĩḡu iimi Jesu. ĩḡu umarogue ĩḡu mũarianibiricũ dohpa Espĩritu Santopũ arinibirimi dohpa erãre.

Judio masa dũca wariñuma pe curu

⁴⁰ Jesu ĩḡu eroparicũ peerã, masa bajarã õpa arĩ wereniḡuima:

—Ihĩ diaye ta Goãmũ yare weremũhtagũ mari coreḡiḡu ta ãhrimi, arĩ wereniḡuima.

⁴¹ Õpa arĩma gajirã sã:

—Ihĩ Cristo marire taubu ãhrimi, arĩma.

Gajirãpũ õpa arĩma:

—Cristo árĩḡu Galilea majagũ árĩsome ĩḡu. Ihĩ Jesupũ ero majagũ ta ãhrimi. ⁴² Cristo Davi mũrũ pãrami gajisubũ majagũ arĩḡu árĩbocumi. Eropiḡu Davi ya maca mũraro Belén waĩçuri maca masa dehyoagũcumi Cristopũ. Eropa ta arĩ werea Goãmũ yare erã gojarapũ. Ihĩ Jesupũ Belén macague masa dehyoabiripũ. Eropiḡu ĩḡu Goãmũ ĩḡu obeoḡiḡu Cristo gohra árĩbeami, arĩrima erã.

⁴³ Eropirã Jesure peenirã gajirã umupeo gajirãpũ umupeobirã árĩnjarã game dũca warima pe curu. ⁴⁴ Eropirã bajamerãḡã Jesure ñeadiarima. Eropa ñeadiaquererã ta ĩḡure ñeabirima.

Judio masa oparã Jesure ne umupeobiriñuma

⁴⁵ Eropirã surara pahia oparã pohroḡue fariseo pohroḡue dujaa wañorã daja. Erã dujajacũ ĩarã erã surarare serēpiñorã:

—¿Duhpirã Jesure ñeagãribirari mũa? arĩñorã.

⁴⁶ —Ĩḡu õatariaro wereniḡiḡu ãhrami. Gajirã ĩḡu iro dopa wereniḡuirã ne marima, arĩ yũhriñorã surara erãre.

⁴⁷ Erã eroparicũ fariseo masapũ õpa arĩ wereñorã:

—¿Mũare ĩḡu ḡuyacũ, “Diaye ta arĩḡu iimi,” arãri mũa sã? ⁴⁸ Mari oparã Jesure ne umupeobeama. ḡua sã eropirã ĩḡure umupeobea. ⁴⁹ Oã masa Goãmũ dorerire Moiserẽ ĩḡu apirare masibeama. Eropa masibirã árĩrã Jesure umupeoma. Erã eropa umupeori dipuwaja mari Pagũ Goãmũ erãre dipuwaja moagũcumi, arĩñorã fariseo masa.

⁵⁰ Nicodemo fariseo masũ Jesure weretamugũ ejadiḡu ero árĩpũ erã mera. Erã eroparicũ peegũ õpa arĩpũ ĩḡu erãre:

⁵¹ —Jesu ĩġu ñero iirare masibea mari. Eropa masibirã ĩġu marire wereboro core ĩġure dipuwaja moamasibea mari. Eropa masibiriquererã ta ĩġure dipuwaja moarã, mari ya dorerire tarinugarã iiaa mari, arĩpũ Nicodemo erãre.

⁵² ĩġu eroparĩcũ peerã õpa arĩ yũhriñorã erã:

—¿Mũ sã ĩġu iro dopa ta Galilea majagũ ta ãhriri? Goãmũ ya erã gojarapũre buhepehoque. Eropa buhegũ, “Goãmũ yare weremuhtagũ ne yujugũ Galilea majagũ marimi,” arĩ masigũca muhũ, arĩ yũhriñorã erã Nicodemore.

⁵³ Erã eropa arĩra pũhrũ erã ya wirigue dujaa wañorã.

8

Ɛmũ mera ñero iidigore judio masa oparã dipuwaja moadiariñuma

¹ Jesupũ ĩġu seyaro utãgũgue Olivo waĩcũdigũgue waha wami. ² Gajinũ Goãmũ ya wihigue gũa wabũ daja. Jesu ejacũ ĩarã masa bajarã ĩġu pohro gamenerema. Erã gamenerecũ ĩġupũ doanijagũ erãre buhenugarũ. ³ ĩġu eropa buhero watope judio masa buherã, fariseo masa mera iri wihigue nomeore aĩ ñajajama. Igo marapũcuquerego gajigũ mera igo ñero iicũ bocañañorã erã igore. Eropa bocajarã igore Goãmũ wihigue aĩ ñajama erã igore dipuwaja moadorerã. Aĩ ñajatuha árĩpehrerã gũa ĩaro igore duhu nuguma. ⁴ Duhunugu õpa arĩma Jesure.

—Buhegũ, igo marapũcũgo árĩquerego gajigũ mera ñero iigo iicũ bocajabũ. ⁵ Moise dorerire õpa ãhraa: “Ɛmũ mera ñero iidigore utã mera dea wejẽcãque,” arĩyoro Goãmũ doreri. ¿Mũca dohpa arĩ pepiri ire? arĩ serẽpima erã Jesure.

⁶ Jesu ĩġu ñero wereniguicũ peediarã iirima erã ĩġure weresãmorã. Erã eropa serẽpiquerecũ ta Jesupũ muhmu-siu dija, yebague ĩġu mujusĩru mera gojami. ⁷ Eropigũ erã eropa serẽpiniguicũ peegũ Jesupũ wahgã doaja, erãre weremi:

—Mũa mera majagũ ñero iibigũ árĩgũ igore utã mera deanugaroporõ, arĩmi Jesu.

⁸ Eropa arĩtuha dipaturi muhrisiu dija, yebague gojami daja. ⁹ Irire peerã igore aĩ ñajarinirãpũ erã ñeri iirare guñarã, erã tĩrãpũ wiria wamuhtama. Erã pũhrũ erã mera majarã sã wiriapehrea wama. Eropigo nomeo dihta Jesu pohro dujanugamo. ¹⁰ Eropigũ Jesu wahgã doaja, igore serẽpimi.

—¿Nohogue ãhriri erã? ¿Mũre dipuwaja moadianirã mariri dohpaguere? arĩmi igore.

¹¹ —Marima, opũ, arĩ yũhrimo igo.

—Yũ sã dipuwaja moabeaa mũre. Waque. Eropigo ñerire iinemobiricãque, arĩmi Jesu igore.

Jesu i yeba majarãre boyoro iro dopa Goãmure masicũ iimi, arĩ gojañumi Ñu

¹² Dipaturi Jesu iri wihigue árĩrãre weremi:

—Boyoro iro dopa yũhũ i yeba majarãre Goãmure masicũ iiaa. Yũre umupeogu Goãmũ mera eropa árĩniguicãgũcumi. Eropigu ĩgu boyorogue árĩgu dopa ta õarire guñagũcumi. Eropigu ĩgu ñerire guñadiabeami, arĩ weremi Jesu.

¹³ ĩgu eroparĩcũ peerã fariseo masapũ õpa arĩma.

—Mũhũ mũ basi mũ árĩricũre eropa arĩ werenigui-maacãgu iiaa. Mũ õpa arĩ wereniguiri ne waja mara, arĩma erã Jesure.

¹⁴ Erã eroparĩcũ Jesu yũhrimi:

—Yũhũ, yũ aridirore masia. Yũ waboro sãre masia. Mũapũ ne irire masibea. Eropigu yũ basi yũ árĩricũre werequeregu iri yũ werera diaye ta ãhraa. ¹⁵ Mũa sihajaro mũa sã ĩara dihtare masia mũa. Eropirã mũa yũre werewũaa. Yũhũ mũa iro dopa ta werewũabeaa. ¹⁶ Masa erã árĩricũre ĩagu yũhũ yujugu ta ĩhamasibea. Yũ tamera yũre obeodigu mera masia. Eropigu yũhũ masa erã árĩricũre diaye ta ĩha masia. ¹⁷ Mũare doreri erã gojarapũ õpa arĩ werea: “Masa perã erã yujuro mera erã werecũ erã wereri diaye ta ãhraa,” arĩ were gojañuma. ¹⁸ Yũre weregu mera gũa perã ãhraa. Yũhũ, yũ árĩricũre werea. Eropigu yũ Pagũ sã weremi yũre. ĩgu ta ãhrimi yũre obeodigu, arĩmi Jesu.

¹⁹ —¿Nohogue ãhriri mũ Pagũ? arĩ serẽpima erã.

—Yũre mũa masibea. Yũ Pagũ sãre masibea. Yũre masirã, yũ Pagũ sãre masiboaya, arĩ yũhrimi Jesu erãre.

²⁰ Jesu erãre buhegu eropa arĩ wereniguimi Goãmũ wihigue erã niyeru apiri comoro pohro. ĩgu ñero tariburisubu ejabiribũ dohpa. Eropirã erã mera ĩgu árĩquerecũ ta ĩgure ñeabirima.

Yũ waboroguere mũapũ wamasisome, arĩñumi Jesu

²¹ Dipaturi masa mera gũa árĩrisubu Jesu erãre weremi daja:

—Yũ aridirogue wagũca. Yũ wara pũhrũ yũre amarãca mũa. Yũ waboroguere mũapũ wamasisome. Eropirã mũa ñeri dipuwajacũrã sĩrirãca, arĩ weremi Jesu.

²² “Yũ waboroguere mũapũ wamasisome,” ĩgu arĩcũ peerã,

—¿Ihĩ ĩḡu basi wejẽ s̄irigucuri eropa arĩḡu? arĩma judio masa erã basi.

²³ Erã basi erã eroparĩcũ Jesu weremi erãre:

—Mũapũ i yeba majarã ãhraa. Yũpũ umaro majagũ ãhraa. I yeba dehyoanirã ãhraa mũapũ. Umarogue aridigu ãhraa yũpũ. ²⁴ Mũare yũ árĩricurire yũ werecũ “Diaye árĩbeaa,” mua arĩrã, mua ñeri dipuwajacurã s̄irirãca mua. Eropigũ “Mua ñeri dipuwajacurã s̄irirãca,” arĩrabũ mũare, arĩmi Jesu erãre.

²⁵ —¿Noano ãhriri mũhũ? arĩ serẽpima erã.

—Neguere yũ mũare arĩdiro dopa ta ãhraa yũhũ.

²⁶ Mũare yũ wereburi wũaro duhyania. Eropiro mua ñeri dipuwajare mũare yũ wereboro wũaro duhyaa dohpa. Eropigũ yũre obeodigũre yũ peerare i yeba majarãre werea. Ĩḡu werera diaye ta ãhraa, arĩmi Jesu erãre.

²⁷ “Yũre obeodigu,” ĩḡu arĩcũ peerã “Mari Pagũ árĩcumi,” arĩ pepibirima erã. ²⁸ Erã eropa arĩ pepibiricũ ĩagũ Jesu weremi erãre:

—Yũre masure Goãmũ ĩḡu obeodigũre mua crusa mera pabia aĩ wahgũ nugurãca. Mua eropa iirã, “Ĩḡu Goãmũ ĩḡu obeodigu ta ãhrimi,” arĩ masirãca yũre. Eropirã yũ gamero dopa ta iibigu yũ árĩrire masirãca. Eropirã yũ Pagũ ĩḡu yũre ĩḡu buhera dihtare weregũ yũ árĩcũ sãre masirãca mua. ²⁹ Eropigũ yũre obeodigũpũ yũ mera ãhrimi. ĩḡu gamerire umũri nũcũ iiniguia. Eropigũ ĩḡu yũre ne cóãbeami, arĩmi Jesu.

³⁰ ĩḡu eroparĩcũ peerã masa bajarã ĩḡure umupeoma.

Goãmũ porãre, ñerire iirã sãre wereñumi Jesu

³¹ Eropirã gajirã judio masa Jesure umupeoma. Eropigũ Jesu erãre weremi:

—Yũ dorerire iipehorã árĩrã, diaye ta yũ buherã ãhraa mua. ³² Eropirã diaye ta masirãca mua. Diaye árĩrire masirã, ñero iirire duhumasirãca. Eropirã pohro majarã wiunirã iro dopa árĩrãca mua, arĩmi Jesu erãre.

³³ ĩḡu eroparĩcũ peerã erã õpa arĩ yũhrima daja:

—Guapũ iribojegue majagũ mũrũ Abrahã pãramerã árĩturiarãgue ãhraa. Eropirã ne gajirã pohro majarã árĩbeaa gũa. Eropigũ “Pohro majarã wiunirã iro dopa árĩrãca,” arĩḡu ¿dohpa arĩḡu eropa arĩri mũhũ? arĩ serẽpima erã Jesure.

³⁴ Erã eroparĩcũ peegũ Jesu õpa arĩmi erãre:

—Diaye mũare arĩḡu iiaa. Árĩpehrerã ñerire iirãpũ erã ñeri iirire duhumasibeama. Eropiro iri ñeripũ erãre dorea. Eropa árĩrã árĩrã pohro majarã iro dopa ãhrima erã.

³⁵ Pohro majagupũ ĩgu opũ magũ iro dopa árĩbeami. Doreri opabeami. Iri wihi majagu magupũ umuri nũcu diaye ta ĩgu pagũ doreri opami. ³⁶ Yũhũ Goãmu magũ ãhraa. Eropigu ĩgu doreri opaa. Eropirã mua ñerire yũ duhucũ iinirã árĩrã diaye ta ñerire duhunirã árĩrãca mua. ³⁷ Abrahã murũ pãramerã árĩturiarã mua árĩcũ masia. Eropa árĩquererã ta yũ wereripũre peediabeaa mua. Eropirã yũre wejẽdiaa mua. ³⁸ Yũ Pagũ ĩgu yũre masicũ iirare werea mũare. Yũ eropa werequerecũ ta mua pagũ ĩgu doreripũre iiaa mua sã, arĩmi Jesu erãre.

³⁹ —Abrahã murũ iribojegue majagu gũa pagũ murũ arĩmuripũ, arĩ yũhrima erã.

Erã eroparĩcũ Jesu yũhrimi:

—Abrahã murũ porã árĩrã ĩgu iidiro dopa ta iiboaya mua. ⁴⁰ Goãmu yũre diaye ĩgu wererire mũare yũ werequerecũ ta yũre wejẽdiaa mua. Abrahã murũ ne eropa iibiridi arĩmi. ⁴¹ Mũa pagũ ĩgu iidiro dopa ta iiaa mua, arĩmi Jesu erãre.

Ĩgu eroparĩcũ erã yũhrima:

—Mojoto diribiridigo porã árĩbeaa gũa. Yujugu ta ãhrimi gũa pagũ. ĩgu ta ãhrimi Goãmu, arĩma erã.

⁴² Erã eroparĩcũ Jesu yũhrimi:

—Goãmu mera majagu árĩdigũ ta õguere aribũ yũhũ. Eropirã Goãmu mua Pagũ ĩgu árĩcũ yũre mahiboaya mua. Yũ gamero aribiribũ yũ tamera. Yũ Pũ Goãmu ĩgu obeocũ aribũ õguere. ⁴³ ¿Duhpirã yũ wereniguirire peebeari mua? Yũ wererire yujuro bojebeaa mua. Eropirã peebeaa mua. ⁴⁴ Mũa pagupũ watĩ ãhrimi. Eropirã watĩ ĩgu gameripũre iidiaa mua. I yeba negohraguere árĩnũgacũgue, dohpague sãre ĩgu masare wejẽgu ãhrimi. ĩgũre diaye maja ne mara. Eropigu ĩgu ne diaye majare wereniguibeami. ĩgu negohraguere gũyanũgadigu arĩmi. Eropigu ĩgu eropa gũyaniguigu arĩgu, gũyarire weremi. ⁴⁵ Yũpũ diaye majare werea mũare. Eropa yũ werecũ peebeaa mua. ⁴⁶ “Mũhũ ñero iigu ãhraa,” arĩmasibeaa mua yũre. ¿Diaye mũare yũ werequerecũ ta duhpirã peebeari mua? ⁴⁷ Goãmu porãpũ ĩgu wereniguirire peema. ĩgu porã árĩbirã ĩgu wereniguirire peebeama, arĩmi Jesu erãre.

Abrahã murũ ĩgu árĩboro core Cristo árĩmũhtatuhañumi

⁴⁸ ĩgu eroparĩcũ peerã judio masa ĩgũre õpa arĩma:

—“Mũhũ Samaria majagu ãhraa. Eropigu watĩ mera goroweregũ ãhraa mũhũ,” gũa arĩra diaye ta ãhraa, arĩma erã Jesure.

⁴⁹ Erã eroparĩcũ peegu õpa arĩ yũhrimi Jesu:

—Goroweregu áríbeaa yuhũ. Yũ Pagure umupeoa. Mũapũ yũre umupeobea. ⁵⁰ Yũre masa erã umupeorire amabeaa yuhũ. Yũ Pagupũ yũre umupeocũ gahmemi masare. Īgu tamera yũ árĩricũre õaro ĩha masigu eropa ta umupeodoremi. Eropigu yũ Pagũ erã yũre gamebiriri dipuwaja, dipuwaja moagũcumi. ⁵¹ Diaye mũare arĩgu iiaa. Yũ dorerire iigu umũri nũcũ Goãmũ mera eropa árĩniguicãgũcumi, arĩmi Jesu.

⁵² Īgu eroparĩcũ peerã õpa arĩma erã:

—Dohpague tamerare mũ watĩ mera goroweregu árĩcũ gũa õaro masia. Abrahã mũrũ sĩria wañumi. Goãmũ yare weremũtanirã sã sĩria wañuma iribojegue. Eropigu “Yũ dorerire iigu umũri nũcũ Goãmũ mera eropa árĩniguigũcumi,” arĩgu, ¿dohpa arĩgu eropa arĩri mũhũ? ⁵³ ¿Gũa ñecũ mũrũ tauro turari mũhũ? Īgu, Goãmũ ya weremũtanirã sã sĩria wañuma iribojegue. ¿Mũrũ nihino ãhriri eropa arĩ wereniguigu? Mũ eropa arĩro dopa áríbeaa mũhũ, arĩma erã.

⁵⁴ Erã eroparĩcũ peegu Jesu werenemomi:

—Yuhũ yũ basire umupeodereri duhpiburi áríbeaa. Yũ Pagupũ yũre umupeodoregu ãhrimi ĩgu. “Gũa Pagũ” mũa arĩgupũ yũ Pagũ ta ãhrimi. ⁵⁵ Mũapũ yũ Pagure ne masibeaa. Yuhũ ĩgũre masia. “Īgũre masibeaa,” arĩgu mũa iro dopa ta gũyaricũgu árĩboaya yuhũ. Diaye ta ĩgũre masia. Eropigu ĩgu dorerire iiaa. ⁵⁶ I yebaguere yũ árĩboro coregue mari ñecũ mũrũ Abrahã mũrũ masimũhtatuhãmũriñumi yũre. Eropa masigu ĩgu mucubirimãriñumi, arĩmi Jesu.

⁵⁷ Īgu eroparĩcũ erã yũhrima:

—Abrahã mũrũ iribojegue majagu ãhrimi. Mũrũ cincuenta bojori opanibeaa. ¿Eropigu mũhũ ĩgu mũrũre duhpigu ĩha masiboyuri? arĩma judio masa ĩgũre.

⁵⁸ —Diaye mũare arĩgu iiaa. Abrahã ĩgu árĩboro coregupũ árĩmũhtatuhabũ, arĩmi Jesu erãre.

⁵⁹ Īgu eroparĩcũ peerã erã utãyerire aĩ ĩgũre deadiarima. Erã eropa deadiaquerecũ ta Jesupũ Goãmũ wihigue árĩdigu duhri wiria wami.

9

Cuiri ĩhajabigũre õaro ĩagu wacũ iĩñumi Jesu

¹ Jesu gũa ĩgu buherã mera mague tariarã gajigũre cuiri ĩhajabigũre bocajabũ. Īgu ne masa dehyoagũgue ta cuiri ĩhajabigu árĩpũ. ² Gũa sã ĩgũre ĩarã serẽpibũ Jesure.

—Buhegu, ¿ihĩ duhpigu cuiri ĩhajabigu masa dehyoayuri? ¿Ñerire iimũriyuri eropa wagu? ¿O ĩgu pagũ sũmarã erã

ñero iira dipuwaja eropa wayuri ïgu? arĩ serëpibũ gũa Jesure.

³ Gũa eroparĩcũ peegu õpa arĩ yũhrimi:

—Ihĩ ïgu pagu sumarã sã erã ñerire iira sã ïgure cuiri ïhajibiricũ iibea. Goãmũpũ ïgure cuiri ïhajibiricũ iimi. ïgure ïacũ iibu masare ïgu turarire ii ïhmuburire apimi Goãmũ. ⁴ Yũre obeodigu ïgu apirare yũre iiro gahmea dohpaguere. Ñamiguere mari mohmemasibiro dopa ta pũhrũgue yũre obeodigu ïgu apirare iimasibea yũhũ. ⁵ I yebaguere i yeba majarãre Goãmũre masicũ iiaa, arĩmi Jesu.

⁶ Eropa arĩtuha yebague disico ehomepimi. ïgu disico ehomepirare nicu mera mohmore nijagu, cuiri ïhajibigũre ïgu cuirire sũmi. ⁷ Eropa sũgu õpa arĩmi Jesu:

—Siloé waĩcũri gobegue mũ cuirire coegu waque, arĩmi Jesu. Siloé ero majarã ya mera arĩrã obeora gobe arĩrã iima.

Jesu ïgu cuiri coedoredigũpũ waha, coetuhaja, cuiri ïagũgue dujajapũ ïgu ya wihigue. ⁸ ïgu dujajacũ ero majarã ïgure ïañorã. Ero core niyeru serëdigũ ïgu árĩcũ ïanirã ïgure õpa arĩñorã erã basi:

—¿Ihĩ sohõ árĩdigũ niyeru serëdoadigu árĩbeari? arĩñorã erã.

⁹ —Ïgu ta ãhrimi, arĩñorã gajirã.

—Ïgu árĩbeamĩ. Eropa árĩbiriqũregũ ta ïgu iro dopa ta bejagu ãhrimi, arĩñorã gajirã.

Erã eroparĩcũ peegu cuiri ïhajibiridigũpũ õpa arĩpũ:

—Ïgu ta ãhraa yũhũ, arĩpũ erãre.

¹⁰ ïgu eroparĩcũ masa ïgure serëpiñorã:

—¿Cuirĩ ïhajibiridigu árĩdigũ dohpa ii ïhari mũhũ? arĩ serëpiñorã erã ïgure.

¹¹ —Jesu waĩcũgu disicore nicu mera mohmore yũ cuirire sũami. Yũre sũtuhaja “Siloé waĩcũri gobegue mũ cuirire coegu waque,” arãmi yũre. ïgu eroparĩcũ coegu ejabu yũhũ. Eropa yũ coera pũhrũ yũ cuirĩ õaro dehyoabu yũre, arĩ werepũ ïgu masare.

¹² —¿Mũre eropa iidigu nohogue árĩcũri ïgu? arĩñorã erã.

—Ûba. Noho árĩgu árĩcumĩ, arĩpũ ïgu

Cuirĩ ïhajibiridigũre fariseo masa serëpiñuma

¹³ Eropa arĩ wereniguituha erã cuirĩ ïhajibiridigũre fariseo masa pohrogue aĩ ejañorã. ¹⁴ Irinũ Jesu dihta nicure mohmore cuirĩ ïhajibigũre õagu iiranũ Sabadonũ árĩbũ. Irinũ gũa soorinũ árĩbũ. ¹⁵ Eropirã fariseo masapũ ïgure serëpiñorã daja.

—¿Dohpa ii ïhari mũhũ? arĩ serëpiñorã erã.

—Nicu mera yu cuirire sũami. Eropigu yu cuirire coera puhru ihaa yuhũ, arĩ werepu iġu erãre.

¹⁶ —Īġu mari soorinu mari mohmedorebiririnure mohmeami. Eropigu iġu Goãmu yagu árĩbeami, arĩnorã gajirã fariseo masa.

Gajirãpu òpa arĩnorã:

—Ñerire iigu árĩġu òpa ìre òagu wacũ iimasibeami. Eropigu iġu òagu árĩbocumi, arĩnorã gajirã Jesure.

Eropirã erã, erã basi pe curu dũca wariñorã. ¹⁷ Eropirã dipaturi erã cuiri ihajabiridigure serẽpinemoñorã daja.

—¿Mure mu cuirire òaro iidigure dohpa arĩ pepiri muhu Jesure? arĩnorã erã iġure.

—Īġu diaye ta Goãmu yare weremũhtagu àhrimi, arĩpu cuiri ihajabiridigupu.

¹⁸ Negohraguere judio masa òpa arĩ pepiriñorã. “Ihĩ cuiri ihajabiridigu árĩbeami,” arĩ pepiriñorã. Eropa arĩ pepirã cuiri ihajabigu pagu sumarãre sihubeoñorã erã. ¹⁹ Sihubeo iġu pagu sumarãre serẽpiñorã fariseo masa oparã.

—¿Ihĩ diaye ta mu magu àhriri? ¿Mata iġu cuiri ihajabigu masa dehyoari? ¿Diaye ta cuiri ihajabiridigu árĩqueregu dohpa ii ihari dohpaguere? arĩ serẽpiñorã erã iġu pagu sumarãre.

²⁰ —Ihĩ ġua magu ta àhrimi. Eropigu mata cuiri ihajabigu masa dehyoami iġu. ²¹ Irire masiquererã ta iġu ìarare, iġure ìacũ iidigu sãre masibea gũa. Gũa magure serẽpique. Buġu àhrimi iġu. Īġu basi weremasimi iġu, arĩnorã iġu pagu sumarã.

²² Judio masa oparã ero coreguere òpa arĩtuhañorã:

—“Jesu ta Cristo mari taubu àhrimi,” arĩrãre mari buheri wirigue ñajadoresome gũa, arĩmuriñorã judio masa gũa oparã.

Erã eroparĩcũ peenirã cuiri ihajabigu pagu sumarãpu judio masa oparãre ġui arĩnorã. ²³ Eropa ġuirã “Buġu àhrimi iġu. Īġure ta serẽpique,” arĩnorã erã judio masa oparãre.

²⁴ Puhru judio masa oparã dipaturi cuiri ihajabiridigure sihubeoñorã. Sihubeo òpa arĩnorã iġure:

—Goãmu mera diaye wereque muhu. Jesure iġu ñeri iigu iġu árĩcũ gũa masia. Eropigu diaye wereque guare, arĩnorã judio masa cuiri ihajabiridigure.

²⁵ Erã eroparĩcũ peegu òpa arĩ yuhripu iġu:

—Jesure iġu ñeri iigu iġu árĩcũ masibirica yuhũ. Yujuñe ta masia yuhũ. Iribojeguere cuiri ihajabigu arĩmurihu yuhũ. Dohpaguepuere ihaa yuhũ. Iri dihtare masia yuhũ, arĩ yuhripu cuiri ihajabiridigupu erãre.

26 —¿Dohpa iiari ĩġu mure? Mu cuirire ĩhajadoreġu dohpa iiari ĩġu mure? arĭ serĕpiñorã erã daja.

27 —Irire ta muare weretuharabugũ yũhũ. Yu eropa arĭ werequerecũ ta mua ne peediabeaa yũre. ¿Dohpa ĩdiarã yũ dipaturi werecũ peediari mua? ¿Mua sã ĩġu buherã arĭdiari? arĭpũ ĩġu erãre.

28 ĩġu eroparĭcũ peerã erã ĩġure turiñorã.

—Mũhũ Jesu buheġu ãhraa. Ġapũ Moise buherã ãhraa.
29 Diaye ta Goãmũ Moisere wereniguimuriñumi. Jesure obeodigũre ġua masibeaa, arĭñorã erã cuiri ĩhajabiridigũre.

30 Erã eroparĭcũ yũhriũ ĩġu:

—¿ĩġure obeodigũre mua masibiricũ, yũre ĩacũ iidigũ arĭġu Goãmũ ĩġu obeodigũ arĭbiribocuri ĩġu? 31 Goãmũ ñeri iigũre ĩġu serĕrire peebeamĩ. Iri tamerare mari masia. Ñerire iigũre peebiriquereġu ta Goãmũre umupeogũre, ĩġu dorerire iigũre ĩġu serĕrire peemi Goãmũ.
32 Negohragũre i yeba arĭñugacũguere, mata masa dehyoagũre ta cuiri ĩhajabigũre ne yujugũpũre ĩhajacũ iigũ marimũriũ. 33 Eropiġu Jesu Goãmũ ĩġu obeodigũ arĭbiġu yũre ĩacũ iibiriboñumi, arĭpũ ĩġu erãre.

34 Erãpũ õpa arĭ yũhriñorã:

—Mũhũ mata ñegũ arĭmũriya. ¿Eropa arĭiquereġu ta ġuare buheri mũhũ? arĭñorã judio masa oparã.

Eropa arĭtuha erã ĩġure cohã wiuñorã.

Jesu yare gamebirã cuiri ĩhajabirã iro dopa ãhrima, arĭ wereñumi Jesu

35 Eropiġu cuiri ĩhajabigũre erã cohã wiurare Jesu peemi. Eropa peegũ cuiri ĩhajabiridigũre ġua bocajacũ, ĩġure serĕpimi.

—¿Masũre Goãmũ ĩġu obeodigũre umupeori mũhũ? arĭmi Jesu.

36 —Opũ, ¿noa ãhriri ĩġu? ĩġure masiġu umupeogũra, arĭmi cuiri ĩhajabiridigũpũ Jesure.

37 —ĩġure ĩhatuhabũ mũhũ. Dohpagũre mũ mera wereniguigũ ĩġu ta ãhraa yũhũ, arĭmi Jesu cuiri ĩhajabiridigũre.

38 —Opũ, mure umupeoa yũhũ, arĭmi cuiri ĩhajabiridigũpũ.

Eropa arĭġu ĩġu Jesu pohro mereja ĩġure umupeomi.

39 ĩġu eropa umupeocũ ĩagũ õpa arĭmi Jesu masare:

—Õarã, ñerã sã erã iirare masicũ iibu aribũ yũhũ. Cuiiri ĩhajabirã erã ĩabiro dopa ta yũ Pagũre masibirã ãhrima. Eropa masibirãre yũ Pagũre masicũ iigũ aribũ yũhũ. “Ġua

ōaro masia," arī pepinirā sāre ōaro erā masibirirare masicū iigu aribu yuhū, arīmi Jesu.

⁴⁰ Īgu eroparīcū peerā bajamerāgā fariseo masa ĭgure ōpa arīma:

—“Cuirī ĩhajabirā erā ĩhamasibiro dopa ta masibea mūa sā,” ĩarīri mūhu gūare? arīma fariseo masa Jesure.

⁴¹ Erā eroparīcū Jesu ōpa arīmi:

—“Cuirī ĩhajabirā erā ĩha masibiro dopa ta diaye ōaro masibea gūa,” mūa arīcū dipuwaja mariboya. “Gūa ōaro masirā āhraa,” mūa arīrā āhraa. Eropirā yure peediabirira dipuwaja mūare dipuwaja āhraa dohpaguere, arīmi Jesu erāre.

10

Oveja ĩhadibugū queoriñere wereñumi Jesu

¹ Pūhrū queoriñe mera werenigui queogu buhebu ōpa arīmi Jesu gūare gajirā masa sāre:

—Diaye arīgu iiaa mūare. Oveja diburi sāriro disiporo ñajabigūpu gajipūgue ñajagūpu yajari masū āhrimi. ² Disiporo ñajagūpu ovejare ĩhadibugū āhrimi. ³ Disiporo coregū disiporo pāgūmi ovejare ĩhadibugū ĭgu ñajariborore. Ovejare ĩhadibugū eracū ĭgu wereniguirire peerā āhrima ĭgu oveja. Erāre sihugū, erā wāi mera sihubeomi ĭgu. Eropigū erāre sāriroque arīrāre sihu wiu-nigui disiporogue. ⁴ Īgu yarāre arīpehrerāre sihu wiu erāre mūtanūgajami. Ovejapū ĭgu wereniguirire masirā, ĭgure nūrusiama. ⁵ Gajigū erā masibigū nūrusiabeama erā. Eropirā gajirā erā wereniguirire peerā, gūi omagā wahama, arīmi Jesu masare.

⁶ Iri ĭgu werequerecū ta irire peerā masibirima erā.

Jesu ovejare ōaro ĩhadibugū iro dopa ĭgu yarāre ōaro ĩhadibumi

⁷ Eropigū dipaturi Jesu erāre gūa sāre weremi daja:

—Diaye mūare arīgu iiaa. Ovejare diburi sāriro disiporo iro dopa āhraa yuhū. ⁸ Arīpehrerā yū core arinirā gūyarire buherā yajari masa iro dopa āhrima. Erā eropa arīquerecū ta oveja iro dopa arīrā yaharāpu gajirāre ne pee wahgābeama. ⁹ Yū ovejare diburi sāriro disiporo iro dopa āhraa. Iri disiporo ñajarā iro dopa ta āhrima yure umupearā. Eropigū erāre peamegue wabonirāre taugūra. Ovejare cāhmotari sāriro erā cāhmotaro dopa ta yū tau-nirāre cāhmotagūca. Eropirā erā gamerire oparācoma, arīmi Jesu.

¹⁰ Eropa arītuha ōpa arīnemomi:

—Muare guya buherã ovejare yajari masa iro dopa ãhrima. Gajirã yajadiarã wejëdiagãrima. Oveja iro dopa árĩrã yaharã árĩpehrerĩnuri Goãmũ mera árĩcũ iigu aribũ yũpũ. Eropigu yaharã umuri nũcu erã õaro árĩcũ iibu aribũ yũpũ. ¹¹ Ovejare õaro ãhadibugũ iro dopa árĩgu ãhraa yũhũ. Ovejare õaro ãhadibugũ sĩribu árĩqueregu ta igũ ovejare cãhmotaniguigũcumĩ. Yaharã Goãmũ mera erã eropa árĩniguiburire sĩrigũca. ¹² Igũ mohmeri masũpũ õaro ovejare ãhadibugũ árĩbeami. Eropirã oveja igũ yarã árĩbeama. Eropigu nũgu majagu diaye ovejare ñeagu igũ aricũ ãagu igũ mohmeri masũpũ ovejare cóãcã gũĩ omagã wahami. Igũ eropa cohãpigãra pũhrũ, nũgu majagu diaye igũ ovejare igũ ñeacũ ãarã ovejapũ omasirigã wahama. ¹³ Igũ mohmeri masũpũ igũ wajatari dihtare gahmemi. Eropigu igũ ovejare õaro ãhadibudiabeami, arĩmi Jesu.

¹⁴ Eropa arĩtuha õpa arĩnemomi queoriñe mera:

—Ovejare õaro ãhadibugũ iro dopa ãhraa yũhũ. Eropigu yaharãre masia yũhũ. Eropirã yaharã sã yũre masima. ¹⁵ Eropa ta yũ Pagũ sã yũre masimi. Eropigu yũ sã yũ Pagũre masia. Yaharã Goãmũ mera erã árĩniguiburire sĩrigũca. ¹⁶ Gajirã oveja gaji sãriro majarã iro dopa árĩrã gajirã masa sã yaharã árĩrãcoma. Erã sãre aĩguca. Eropirã yũ wereniguirire pee wahgãrãcoma erã sã. Eropirã yaharã árĩpehrerã yuju curu ta árĩrãcoma. Eropigu yũ dihta yaharãre ãhadibugũca, arĩmi Jesu.

¹⁷ Eropa arĩtuha õpa arĩnemomi daja:

—Yaharã Goãmũ mera erã árĩniguiburire sĩrigũca yũhũ. Yũ sĩrira pũhrũ masa mũriaguca. Yũ eropa iibu árĩcũ yũ Pagũ yũre mahimi. ¹⁸ Yũ wejëdorebircũ yũre wejëmasibiriboñuma erã. Yũ gamero mera yũre wejërãcoma. Eropigu yaharã Goãmũ mera erã ya árĩburire sĩrigũca. Sĩrimasia yũhũ. Eropigu masa mũriamasia. Yũ Pagũ yũre irire ta iidoremi, arĩmi Jesu.

¹⁹ Igũ eroparĩcũ peerã judio masa pe curu dũca warima daja. Gajirã gajiropa pepi, gajirã sã gajiropa pepinirã arĩma.

²⁰ —Igũ watĩre opami. Eropigu goroweregu ãhrimi. ¿Duhpirã igũre dipaturi peeri mũa? arĩma gajirã bajarã judio masa.

²¹ Gajirãpũ õpa arĩma:

—Watĩ mera goroweregu árĩgu eropa õaro arĩ werenigu-ibiriboñumi. Cuirĩ ãhajibigũre ãacũ iimasibiriboñumi watĩre opagu. Eropa árĩgu árĩgu igũ watĩre opabeami, arĩma gajirã judio masa.

Judio masa Jesure gamebiriñuma

²² Gajinu Jerusaléngue bosenu iirã iima dipaturi judio masa. Goãmu wihire erã Goãmu ya árĩburire erã apiri bosenu árĩbu. Irisubu yura wahgũro árĩbu. ²³ Irinu Salomo waĩcũri taribugue Goãmu wihigue árĩri taribure Jesu gũa mera ihacurigu iimi. ²⁴ Iri taribugue igu árĩcũ ĩarã judio masa igu pohrogue gamenere igure serẽpima daja:

—Yoatariari boje gũare õaro werebeaa mũhu. Diaye gũare õaro were purumujuque. ¿Cristo Goãmu igu obeodigu ta áhriri mũhu? arĩma erã igure.

²⁵ Erã eroparĩcũ peegu õpa arĩ yũhrimi Jesu:

—Mũare weretuhabu yũhu. Yu eropa werequerecũ ta yũre peebeaa mũa. Yu Pagu igu dorero dopa ta igu turari mera ii ihmurabu mũare. Eropa iigu yu Cristo árĩrire ta mũare ihmugu iirabu. ²⁶ Yu eropa ii ihmquerecũ ta yũre peebeaa mũa. Mũapu yaharã árĩbeaa. Eropirã gajigu yarã oveja iro dopa árĩrã yũpũre peebeaa mũa. ²⁷ Oveja erãre ihadibugure erã peediro dopa ta yaharã yũre peema. Eropigu erãre masia yũhu. Eropirã erã yu mera wahama. ²⁸ Eropigu umuri nucũ Goãmu mera árĩcũ iiaa erãre. Eropirã erãpu peamegue wasome. Eropigu yaharãre yu ihadibucũ gajirãpu ne yũre emamasibeama erãre. ²⁹ Yu Pagu yaharãre yũre odigu yu tauro turami. Eropirã yu Pagu sã yaharãre igu ihadibucũ gajirã igu sãre ne emamasibeama. ³⁰ Yũhu, yu Pagu mera yujungu ta áhrra, arĩmi Jesu judio masare.

³¹ Igu eroparĩcũ peerã judio masapu igure deaburi utãre dipaturi aĩma daja. ³² Erã eropa iicũ ĩagũ Jesu erãre serẽpimi:

—Yu Pagu igu turari mera baja deoro moarire ii ihmurabu mũare. ¿Ñehenore iira dipuwaja utã mera deadiari mũa yũre? arĩ serẽpimi.

³³ Igu eroparĩcũ peerã õpa arĩma erã:

—Goãmu turari mera mu ii ihmuri dipuwaja mũre utã mera dea wejẽdiabeaa gũa. Goãmure mu ñero wereniguri dipuwaja mũre utã mera dea wejẽdiaa gũa. Masu árĩqueregu ta mũhu “Goãmu áhrra yũhu,” mu arĩri dipuwaja mũre utã mera dea wejẽdiaa gũa, arĩ yũhrima erã.

³⁴ Erã eropa arĩ yũhricũ peegu Jesu erãre weremi:

—Mũa sãre “Goãmarã,” arĩ piyumi Goãmu. Eropa ta arĩ gojañuma igu dorerire erã gojarapũgue. ³⁵ Goãmu yare erã gojarapũ queoro árĩcũ mari masia. “Gũyari áhrra,” iripũre arĩmasibeaa mari. Eropigu igu yare pepirãre diaye ta igu “Goãmarã,” arĩ piyumi. ³⁶ Goãmu yũre beyenijagu i yebaguere obeomi. Eropigu “Yũhu Goãmu magu áhrra,”

yü arîra dipuwaja “Goãmure ñero wereniguigü iimi Jesu,” arãa müa yure. ¿Duhpirã yure eropa arîri müa? ³⁷ Yü Pagü ïgü gamero dopa ta ïgü turari mera yü ii ïhmubiricü tamerare yü buherire “Diaye ta ãhraa,” arîbiriboya müa. ³⁸ Yü Pagü ïgü turari mera yü ii ïhmuquerecü ta yurpüre umupeodiabiriboca müa. Eropa umupeodiabiriquererã ta ïgü turari mera yü ii ïhmucü ïarã yü iirare “Diaye ta ãhraa,” arîque müa. Müa eropa arîrã, yü Pagü mera gúa yujuro mera árîcü masirãca müa. Eropirã yuhü, yü Pagü mera yujuro mera yü árîcü masirãca müa. Eropirã peerãca müa, arîmi Jesu erãre.

³⁹ ïgü eroparîcü erã ïgüre dipaturi ñeadiarima. Erã eropa ñeadiacü ïgü duhri wiria wami.

⁴⁰ Eropa wiriadigügue ta Ñü masare ïgü waïyemühtadirogue Jordán waïcüriya sipü majasegue gúa dipaturi wabü daja. Erogue dujacãbü. ⁴¹ Eropirã masa bajarã ïgüre ïarã erama. Õpa arîma erã erã basi:

—Ñü waïyegurü Goãmü turari mera deoro moarire ii ïhmubirimi. Eropa ii ïhmubiriquerecü ta árîpehreri Jesure ïgü wererapü diaye ta ãhraa, arîma masa erã basi.

⁴² Eropirã masa erogue bajarã umupeoma Jesure.

11

Lázaro waïcügü sîria wañumi

¹ Eropi Judea yebague Betania waïcüri maca majagü Lázaro waïcügü arîmi. Iri maca ïgü pagü porã nome María, Marta mera arîma. ² Maríapü Jesure poresuri mera sûbo, igo poari mera ïgüre tucoebodigo árîmo. Igo tîgü Lázaropü dorecügü iipü. ³ Eropirã erã nome gajirãre Jesure weredorerã obeoñorã.

—Opü, mü mahigü dorecügü iimi, arî weredorerã obeoñorã Lázaro pagü porã nome.

⁴ Erã gúa pohrogue eraa, iri querere werecü peegü õpa arîmi Jesu güare.

—Dohpaguere Lázaro ïgü dorecüri sîriburi árîbeaa. Goãmü turarire masare ïhmuburire dohpaguere ïgü dorecümü. Eropirã yü turari opagü árîcü sãre masa ïarãcoma, arîmi Jesu.

⁵ Jesu Martare, igo pagü mago, Lázaro sãre turaro mahími. ⁶ Eropigü Lázaro ïgü dorecürire peequeregü ta ero Jesupü penü dujanimi. ⁷ Penü pührü Jesu õpa arîmi güare ïgü buherãre.

—Dipaturi Judea yebague dujaa warã daja, arîmi güare.

⁸ —Buhegu, cārūgā ta mure judio masa utā mera dea wejēdiama. ¿Duhpigū dipaturi dujadiari mūhu? arībū guā īgure.

⁹ Guā eroparīcū peegu īgu erā wejēmasibirirare weregu, werenigui queori mera guare ōpa arīmi:

—Wūaro guñaricūbiricāque. Yujunare doce horari gohra āhraa. Abe umū majagu árīcū ōaro ihaa mari. Eropirā umure curirā ne cohresome mari. ¹⁰ Naitīaro curirā cohrema. Abe umū majagu maricū ōaro iabeama erā, arīmi Jesu.

¹¹ Eropa arīgu guare werenemomi.

—Mari mera majagu Lázaro carīgu iicumi. Īgu eropa carīquerecū ta yūhu īgure wahgūgu wagura, arīmi guare.

¹² —Opū, Lázaro carīgu árīgu tarīgucumi, arībū guā.

¹³ Guā eropa arīquerecū ta Jesupū “Carīgu iicumi,” arīgu, “Sīria wami,” arīgu iidigu árīmi. Īgu “Lázaro carīgu iicumi,” arīcū peerā “Lázaro soogu iicumi,” arī pepiribū guapū. ¹⁴ Guā eropa arī pepicū masigu Jesu guare diaye weremi.

—Lázaro sīria wañumi. ¹⁵ Yū mariro īgu sīricū ōapūricāa. Eropirā mūa yūre umupeonemorāca. Ina ta. Mari iarā warā īgu pohroque, arīmi Jesu.

¹⁶ Toma sūhrūadigu erā arīgupū ōpa arīmi guare:

—Mari sā Jesu mera warā. Īgure wejērā mari sāre wejēporo, arīmi Toma.

Jesu “Eropa árīniguicācū iigu masare masugu āhraa,” arīñumi

¹⁷ Eropi guā erogue ejara pūhrū ero majarā ōpa arī werema Jesure:

—Wapicūrinū taria Lázaro mūrūre masa gobegue erā apira pūhrū, arī werema īgure.

¹⁸ Betaniapū Jerusalén pohrogā uhre kilómetros yoaro dujabū. ¹⁹ Eropirā judio masa bajarā Martare, María sāre ñehamere orerā eranirā árīma Lázaro īgu sīrira pūhrū. ²⁰ Eropigu Jesu mera guā ejaboro pohro árīcū peego Martapū guare bocatīrigo eramo. Igo bocatīrigo wacū Mariapū igo ya wihi dujadigo árīmo. ²¹ Eropa bocatīrigo Marta ōpa arīmo Jesure:

—Opū, yū tīgu īgu sīriboro core mūhu ohō árīcū īgu sīribiriboañumi. ²² Dohpague sāre Goāmure mū serēcū īgu mū serēro dopa ta iigucumi, arīmo Marta Jesure.

²³ —Mū tīgu masagucumi, arīmi Jesu igore.

²⁴ —I yeba pehrerinū īgu masa mariaborore masia yūhu, arīmo igo.

²⁵ Igo eroparīcū Jesu weremi daja:

—Yuhũ sīrinirāre masacũ iigu āhraa. Masare yũ mera eropa árīniguicũ iigu āhraa. Yũre umupeogu sīriqueregu ta eropa árīniguicāgucumi. ²⁶ Eropirā árīpehrerā Goāmũ mera árīniguirā yũre umupeorā peamegue wasome. ¿Ire masiri mũhũ? arĩmi Jesu igore.

²⁷ —Opũ, masia yuhũ. “Cristo Goāmũ magu i yebague arigucumi,” erā arīdigũ mũ árīcũ masia yuhũ, arĩmo Marta Jesure.

Lázaro ĩgu masa gobe pohro Jesu oreñumi

²⁸ Marta eropa arĩtuha igo pagũ magore Mariare sihugo wamo.

—Marire buhegu mari ya macare eranijagu iiami. Mũre sihuami, arĩ yayarogã arĩ werepo Mariare.

²⁹ Igo eroparĩcũ peego María pobero mera wahgãñugaja, gũa pohrogue arĩmo Jesure ĩago arigo. ³⁰ Erã ya macague ejanibiricarabũ dohpa. Marta gũare igo bocatĩridirogue árīnibũ gũa. ³¹ Judio masa iri wihi Mariare ñehamere orerã iinirã arĩma. Eropirã igo pobero mera wahgã wacũ ĩarã erã igore nũrusiagãnirã arĩma. “Igo tĩgu mũrũre erã apira gobegue orego wago iicumo igo,” arĩ pepinirã árĩrima erã. Eropa arĩ pepirã igore nũrusiagãnirã arĩma.

³² Eropigo María gũa pohrogue erago, Jesure ĩha, ĩgu guburi pohro merejamo.

—Opũ, yũ tĩgu ĩgu sīriboro core mũhũ ohõ árīcũ ĩgu sīribiriboañumi, arĩmo igo ĩgũre.

³³ Eropigu igo judio masa igo mera arinirã sã erã orecũ ĩagu Jesupũ turaro bũjawere ñero sīporãcumi.

³⁴ —¿Lázaro mũrũre nohogue opari mũa? arĩ serẽpimi Jesu.

—Opũ, ĩagu arique, arĩ sihugãma erã.

³⁵ Erã eroparĩcũ peegu Jesu oremi.

³⁶ ĩgu orecũ ĩha judio masa õpa arĩma erã basi:

—Lázaro mũrũre Jesu bũrigã mahirañumi, arĩma.

³⁷ Gajirãpũ õpa arĩma:

—Cuirĩ ĩhajabigũre ĩacũ iigu āhrimi ihĩ Jesu. ¿Eropigu Lázaro ĩgu sīriboro core masumasibiriboayuri? arĩma gajirã.

Lázarore masuñumi Jesu

³⁸ Eropigu Jesu dipaturi turaro bũjaweremi. Eropirã árīpehrerã Lázaro mũrũ masa gobegue ejabũ. Utãyegue árĩri gobegue ĩgu dũpũ mũraro erã sī acura gobegue árībũ. Eropi iri gobegue wũariye utãyera mera erã bihara gobegue árībũ.

³⁹ —Utãyere aĩ weaque, arĩmi Jesu.

Īḡu eroparīcū peego Marta sīridiḡu muru pagu mago ōpa arīmo:

—Opu, dohpague wapicarinu wahaa Īḡu sīrira pūhru. Eropiro Īḡu dūpu mūraro urī arīca, arīmo Jesure.

⁴⁰ —“Yure umupeogo Goāmu turarire ĩagoca,” mure arīrabu, arīmi Jesu Martare.

⁴¹ Īḡu eropa arīra pūhru erā utāyere ai weama. Erā eropa ai weara pūhru Jesu umarogue ĩha Goāmure ōpa arīmi:

—Ahū, yure mu peetuhabu. Irire mu iicū masiḡu mucubiria mure. ⁴² Yure mūhu umuri nucu peenigiua. Irire masia. Eropa masiquereḡu ta yūhu mu obeodigū arīcū ōre niguirā erā masiburire mure eropa arīḡu iiaa.

⁴³ Eropa arītuha Jesu turaro gaguiniguimi:

—Lázaro, arique, arī gaguiniguimi ĩḡu.

⁴⁴ Īḡu eroparīcū sīridiḡu mūrūpu ĩḡu mojotorire ĩḡu guburi sāre suhri gasiri mera erā diridiḡu, ĩḡu dipurure suhri gasiri mera erā omadigū masa gobegue wiririmi.

—Īḡure dirirare pāque ĩḡure, arīmi Jesu

Judio masa oparāpu Jesure ñeadiariñuma

Mt 26.1-5; Mr 14.1-2; Lc 22.1-2

⁴⁵ Īḡu eropa masucū ĩarā bajarā judio masa mera majarā María mera arīnirā Jesure umupeoma. ⁴⁶ Gajirāpu erā mera majarā fariseo masa pohrogue eja, Jesu ĩḡu iirare wereñorā erāre. ⁴⁷⁻⁴⁸ Eropirā pahia oparā, fariseo masa oparā sā gamenere, erā basi ōpa arī wereniguiñorā.

—Jesu bajasuburi deyoro moarire ii ĩhmumi. Īḡu eropa iicū, “Irire iibita,” mari arībiriḡu arīpehrerā masa ĩḡure umupeo, ĩḡu mera wabocoma. Eropirā Roma majarā oparā Goāmu wihire cóādorerā obeorācoma erā yarā surarare. Mari ya yeba sāre emarācoma erā. Mari ya yeba majarā Jesure erā opu erā apicū ĩarā Roma majarā oparā guarā ñero iirācoma marire. ¿Eropa iirā dohpa iirācuri dohpague? arī wereniguiñorā erā erā basi.

⁴⁹ Erā eropa arīquerecū ta gajigū Caifa waīcūḡu iri bojorire pahia opu arīḡu erāre werepu.

—Mūapu ne masibea. ⁵⁰ Judio masa arīpehrerā mari ya arīburire yujūḡu masu ĩḡu sīricū ōhaa. Īḡu sīribiriḡu mari arīpehrerā judio masa pehrea waboca. Irire mūa masibea, arīmi Caifa erāre.

⁵¹ Eropa arīḡu ĩḡu gamero eropa arībiriñumi. Pahia tauro opu ĩḡu arīcū judio masa ya arīburire Jesu ĩḡu sīriborore Goāmūpu Caifare eropa arī weredoreñumi. ⁵² Jesu ĩḡu sīrigū judio masa ya dihta sīribiriñumi. Sīrigū arīpehrerā Goāmu porā i yeba arīpehrero arīrā sāre erā ya arīburi

sāre sīriñumi Jesu. Erā yuju curu árīboro dopa sīriñumi. ⁵³ Caifa eroparīcū peerā erā “¿Jesure dohpa ii wejērācuri mari?” arī wereniguirā īgure wejēmōrā iīñōrā.

⁵⁴ Īgure erā wejēdiacū masigu Jesu bajarā judio masa watope dipaturi curigu wabirimi. Eropigu masa marirogā Efraín waīcūri macague gware sihu wami. Gware iri maca sihu dujanimi Jesu.

⁵⁵ Irisubure Pascua bosenu gua judio masa bosenu árīboro merogā dūhyabū. Eropirā bosenu core masa bajarā gaji macari majarā masa Jerusaléngue gamenerema. Pascua majare erā baboro core Goāmū ya árīburire erā basi coemorā ejanirā árīma. ⁵⁶ Eropirā erā Jesure amarā iīñōrā. Erā eropa amacū īarā Goāmū wihigue árīrā ōpa arī wereniguiñōrā:

—¿Bosenure īagu aribiribocuri Jesu mūa pepicū? arī wereniguiñōrā erā basi.

⁵⁷ Eropirā pahia oparā, fariseo masa sā ōpa arī were-doreñōrā masare:

—Jesu īgu árīrore mūa masirā wereque gware. Īgure ñeamorā iiaa gua, arīñōrā oparā masare.

12

María Jesu guburire poresuri mera pipeoñumo
Mt 26.6-13; Mr 14.3-9

¹ Pascua bosenu seis nūri gohra dūhyacū Jesu gua īgu buherā mera Betaniague ejabū. Lázaro Jesu īgu masudigu iri maca majagu árīmi. ² Gua ejara pūhrū Jesu sā gua ya bari árīburire iima gajirā. Eropirā Lázaro, Jesu, gua mera mesare dojabū. Gua eropa dojara pūhrū Marta barire peomo gware. ³ Eropigo María poresuripure nardo waīcūri goripure yuju kilo deco aīgāri, Jesu guburire pipeomo. Pipeotuha igo poari mera tucoemo. Igo eropa pipeora pūhrū iri wihi ōaro poresu sehya wabū. ⁴ Igo eropa iicū īha gua mera majagu, Jesure īhaturirāre wiabu Juda Iscariotepū ōpa arīmi:

⁵ —¿Duhpigo iri poresuri eropa iisiriri igoa? Irire igo duaboañumo. Irire duago yuju bojori mohmeri wajapure wajataboañumo. Eropigo mojomorocūrāre oboañumo igo, arīmi īgu.

⁶ Judapū mojomorocūrāre itamudiabiriñumi. Īgu gua ya niyeru dibugu árīqueregū ta yajaricugū árīmi. Eropigu īgu gua ya niyeru sāre yujuyerisuburi aīmūrimi. Eropigu iri niyerure aīdiagū árīgu, eropa arīñumi īgu Maríare.

⁷ Īgu eroparīcū peegū ōpa arīmi Jesu:

—Eropa arĩbita igore. Igo poresurire yũre igo duarare yũre pipeoamo yũre erã yaaboro core yũ dupũre amuyugo. Mojomorocurãpũ mũa mera eropa árĩniguicãrãcoma. Eropirã mũa gamero erãre omasia mũa. ⁸Yũpũ i yebaguere eropa árĩniguicãsome, arĩmi Jesu.

Pahia oparã Lázarore wejẽdiañuma

⁹ Eropirã Jesu ĩgũ Betaniague árĩcũ peerã judio masa bajarã ĩgũre ĩarã arima. ĩgũ dihtare ĩarã aribirima. Lázaro sĩridigũ Jesu ĩgũ masudigũre ĩgũ sãre ĩarã arirã iima. ¹⁰ Erã ĩarã ejarare pahia oparã masirã Lázarore wejẽdiañorã. ¹¹ Lázaro sĩridigũ Jesu ĩgũ masudigũ árĩcũ ĩarã bajarã masa Jesure umupeoma. ĩgũ eropa masucũ ĩarã bajarã judio masa erã pahia erã buheripũre cóãma. Erã eropa cóãcũ ĩarã pahia oparãpũ guataria wa, Lázaro sãre wejẽdiañorã.

Jerusaléngue ejañumi Jesu

Mt 21.1-11; Mr 11.1-11; Lc 19.28-40

¹² Pascua bosenu erã iicũ bajarã masa Jerusaléngue ĩarã wanirã árĩma. Gajinũ Jerusaléngue Jesu ĩgũ waburire masa peenirã árĩma. ¹³ Eropirã bejepũre aĩgã, ĩgũre bocatĩrirã wama. Eropa bocatĩrirã õpa arĩ gaguiniguima erã.

—Ĩre umupeorã. Ihĩ Goãmũ ĩgũ obeodigũ õaro ariporo. Ihĩ judio masa mari opu ta ãhrimi, arĩ gaguiniguima erã.

¹⁴ Jesu burrogã ĩgũ bocadigũ weca peyami. ĩgũ eropiigu Goãmũ yare erã gojarapũ werediro dopa ta iimi. Õpa arĩ gojañumi Goãmũ yare weryumũhtadigũgue.

¹⁵ Jerusalén waĩcũro majarã gũibiricãque mũa. ĩaque. Mũa opu burrogã weca peyagãrimi, arĩ weremũhtañumi Goãmũ yare erã gojarapũgue.

¹⁶ Irire gũa ĩgũ buherã õaro masinibiribũ. Eropa masibiriquererã ta umarogue Jesu ĩgũ mũriara pũhrũ gũa erã gojara mũrare guña boca pee masibũ. Õpa arĩ pepibũ: “Goãmũ yare erã gojarapũgue Jesure weremũhtañuma. Eropiro Goãmũ yare erã gojarapũ arĩdiro dopa ta sihajabũ Jesure,” arĩ pepibũ gũa basi.

¹⁷ Lázarore erã apira gobegue árĩgũre Jesu ĩgũ piyucũ ĩgũre ĩgũ masucũ ĩanirãpũ weresiriniguinirã árĩma masare. ¹⁸ Eropirã Lázarore Jesu ĩgũ masurare erã peenirã árĩrã masa bajarã Jesure bocatĩrirã wama. ¹⁹ Erã Jesure eropa umupeocũ ĩarã fariseo masa erã basi õpa arĩñorã.

—Árĩpehrerã Jesu yarã dihta warã iima dohpaguere. Eropirã mari dohpa iimasibeea erãre, arĩñorã fariseo masa erã basi.

Bajamerãgã Griego masa Jesure amagãriñuma

²⁰ Eropi bosenu Goãmũ wihigue Goãmũre umupeorã eranirã mera majarã bajamerãgã griego masa árĩñorã.
²¹ Eropirã erã Felipe pohrogue erañorã. Felipepũ Bet-saida waĩcũri maca Galilea yeba árĩri maca majagũ árĩmi. Eropirã ĩgũ pohrogue erarã õpa arĩñorã ĩgũre:

—Jesure ĩadiaca gũa, arĩñorã erã.

²² Erã eroparĩcũ peegũ Felipe Andreguere weregũ wapũ. Eropirã erã perã Jesure werema. ²³ Erã werera pũhrũ Jesu gũare weremi:

—Yũhũ masũ Goãmũ ĩgũ obeodigũ ãhraa. Yũre árĩpehrerã umupeoburisubu árĩro iiaa dohpaguere. Dohpaguere yũ sĩriburisubu árĩro ta iiaa. ²⁴ Diaye mũare arĩgũ iiaa. Oteriyere yebague yaabiricũ, iriyere otebiricũ yujuye ta dujaroca. Eropiro iriyere mari otera pũhrũ bajayeri dũcasiua. Eropa ta yũ sĩrira pũhrũ yũre erã yaara pũhrũ bajarã masare Goãmũ mera eropa árĩniguiomorãre ĩigũca yũhũ. ²⁵ I yeba mũa árĩrire wũaro pepiboca mũa. Eropa pepirã Goãmũre guñabirã peamegue warãca mũa. I yeba mũa árĩrire eropa pepicãrã, Goãmũ mera eropa árĩniguirãca. ²⁶ Yahare iidiarã, yũ buherire õaro peeque mũa. Mũa eropa iirã mũa sã yũ árĩboroguere árĩrãca. Yahare ĩigũre yũ Pagupũ umupeogũcumi, arĩmi Jesu gũare.

Jesu ĩgũ sĩriburiñere wereñumi

²⁷ Õpa arĩnemomi gũare.

—Dohpaguere yũhũ ñero sĩporãcũa. ¿Yũ Pagũre dohpa arĩgũcũri yũhũ? “¿Ahũ, yũ ñero tariborore tauque,” ¿arĩbocuri yũhũ? Irire arĩbeaa yũhũ. Ñero taribu ta i yebaguere aribũ. Eropiro yũ ñero tariburisubu dohpaguere ãhraa, arĩ weremi Jesu gũare ĩgũ buherãre.

²⁸ Eropigũ õpa arĩmi ĩgũ Pagũre:

—Ahũ, mũ turagũ árĩrire dohpaguere ĩhmuque masare, arĩmi Jesu ĩgũ Pagũre.

ĩgũ eroparĩcũ mũarogue wereniguiro caribũ.

—Turagũ yũ árĩrire masare ĩhmutuhabũ. Dohpaguere eropiĩgũ dipaturi ĩhmugũca masare, arĩro caribũ.

²⁹ Eroparĩcũ peerã ero niguirã masa bajarã õpa arĩma:

—Bupu árĩcumi eropa bũsũgũ, arĩma masa.

—Anyu Jesure weregũ iiami, arĩma gajirã masa.

³⁰ Õpa arĩmi Jesupũ:

—Mũarogue yũre peedorero eropa bũsubiro carabũ. Mũarũre peedorero eropa carabũ. ³¹ Dohpaguere i yeba majarã erã ñeri iira dipuwaja dipuwajacũrãcoma. I yeba majarã erã opũre watĩre Goãmũ cóãgũcumi. ³² Eropigũ

crusague yure erã aĩ wahgũ nugucũ bajarã masare yaharã árĩmorãre iiguca yũhũ, arĩmi Jesu.

³³ Eropa arĩgu crusague ĩgu sĩriborore weregu iimi Jesu masare. ³⁴ ĩgu eroparĩcũ peerã masapu ĩgure òpa arĩma:

—Goãmũ yare erã gojarapũ òpa arãa: “Cristo árĩpehrerinuri árĩgucumi,” arĩ gojañuma. ¿ĩgu eropa arĩ gojacũ mure masure Goãmũ ĩgu obeodigure dohpa arĩronore mure wejẽ crusague aĩ wahgũrãcuri masa? ¿Goãmũ ĩgu obeodigu noa àhriri ĩgu? ¿Cristo árĩbeari mũhũ? arĩ serẽpima erã Jesure.

³⁵ Erã eroparĩcũ òpa arĩ yũhrimi Jesu:

—Boyoriñe iro dopa árĩgu masare Goãmũ yare òaro masicũ iiaa yũhũ. Pũhrũñarigã mũa mera árĩsome yũhũ. Mũare yũ buhecũ dohpaguere peeque ñerire mũa iibiriburire, Goãmũ mera mũa eropa árĩniguiburire. Yũ buherire peebirã naitĩfaro curirã iro dopa erã waborore masibeama. ³⁶ Eropigu boyoriñe iro dopa ta árĩgu yũhũ ta àhraa. Eropigu mũare buhegu Goãmũ yare òaro masicũ iiaa mũare. Dohpaguere yũ waboro core yure umupeoque. Eropa umupeorã yaharã árĩrãca mũa, arĩmi Jesu.

Eropa arĩ weretuha waha wami erãre duhri wahgãgu.

Judio masa Jesure umupeobiriñuma

³⁷ Bajasuburi Goãmũ turari mera erãre Jesu ĩgu deyoro moarire ii ĩhmuquerecũ ta judio masa bajarã ĩgure ne peediabirima. ³⁸ Goãmũ yare erã gojarapũ Isaia mũru ĩgu gojadiro dopa ta eropa iirã iima erã. Òpa arĩ gojañumi Isaia: Goãmũ, mũa buherire gũa werecũ masa peediabeama. Mũa turarire erãre mũhũ ii ĩhmuquerecũ ta irire “Diaye árĩbeaa,” arĩma erã, arĩ gojañumi Isaia Goãmũ yare gojarapũgue.

³⁹ Erã eropa peediabiricũ ĩagu Goãmũ erãre masibiricũ iĩñumi. Iri sãre Isaia òpa arĩ gojañumi daja:

⁴⁰ Cuirĩ ĩhajabirã iro dopa árĩcũ iidi árĩmi Goãmũ erãre. Eropigu ĩgu yare masibiricũ iidi árĩmi erãre. Eropirã ĩgu turarire erã ĩaquererã ta erã ĩarare masibirinirã árĩma erã. Eropirã ĩgu buherire peequererã ta irire masibirinirã árĩma erã. Goãmũ yare masirã erã ñerire cóådoreboñuma. Eropigu erãre tauboñumi ĩgu, arĩ gojañumi Isaia Goãmũ yare erã gojarapũgue.

⁴¹ Isaia Cristo turarire masiyudigu eropa arĩ gojamũhtañumi.

⁴² Gajirã Jesure erã umupeobiriquerecũ ta judio masa sã oparã mera majarã sã bajarã Jesure umupeonirã árĩma. Eropa erã umupeoquererã ta erã fariseo masare gũirã

gajirã masare Jesure erã umupeorire werebirinirã árĩma. Irire erã werecã peerã gua judio masa buheri wihigue erãre ñajadorebiriboñuma fariseo masapũ. ⁴³ Goãmure mucubiricũ iidiaquererã ta erã tauro masapũre mucubiricũ iidianirã árĩma erã. Eropirã erã Jesure ne umupeorã “Jesu yarã ãhraa,” arĩ gajirãre werediabirinirã árĩma.

Jesu wererire erã peediabiriri dipuwaja masa dipuwajacũrãcoma, arĩ wereñumi Jesu

⁴⁴ Masa bajarã gua pohro gamenerenirãre Jesu turaro busuro mera weremi:

—Yũre umupeogu yũ dihtare umupeobeami. Yũre obeodigu sãre umupeomi ãgu. ⁴⁵ Eropirã yũre masirã yũre obeodigu sãre masima. ⁴⁶ Yũhũ boyoriñe iro dopa ta árĩgu yũhũ Goãmũ yare buhegu ahraa i yebaguere. Eropigu Goãmũ yare mũare masicũ iiaa. Yũre umupeogu naitĩaro wagũ iro dopa ñerire iiniguisme. Yũre umupeogu diaye pepigũcumi. ⁴⁷ Gajirã yũ wererire peequererã ta irire yũhribeara. Erã eropa yũhribiriquerecũ ta, erã yũhribirira dipuwaja moasome yũpũ dohpa. I yebaguere dipuwaja moagu arigu aribiribũ yũhũ. I yeba majarãre peamegue wabonirãre taugu arigu aribũ yũhũ. ⁴⁸ Yũre gamebigure yũ wereri sãre gamebigure dipuwaja moari árĩroca. ãgu yũre peebirira dipuwaja i mũmũ pehrecũ dipuwajacũgũcumi. ⁴⁹ Yũhũ yũ gamero werebeaa. Yũ Pagũ yũre obeodigapũ yũre weredoremi. Eropiro yũ wereripũ ãgu ya wereniguirĩ ãhraa. ⁵⁰ ãgu ya wereniguirire peerã Goãmũ mera eropa árĩniguirãca mũa. Eropigu yũ Pagũ ãgu weredorediro dopa ta werea mũare, arĩmi Jesu guare.

13

Jesu ãgu buherãre guburire coeñumi

¹⁻³ Eropi Pascua bosenu coregã árĩbũ. Iri ñamire Jesu gua ãgu buherã mera iri bosenure babu árĩmi. Eropigu i yebare ãgu wiriaborore ãgu Pagũ pohro waburire merogã dũhyacũ masidigu árĩmi Jesu.

Gua barisubu Judare watĩ doretuhadigu árĩmi ãgu pepirigue. Eropigu ãgure Simo Iscariote magure Jesure ãhaturirãre iri ñamire ãgu wiaburire doretuhadigu árĩmi. Jesu ãgu yarãre i yeba árĩrãre bũrigã mahidigu árĩmi. Eropigu ãgu mahirare ãhmubu gua guburire coemi. ãgu Goãmũ pohrogue ãgu arirare, pũhũ ãgu mũmarogue ãgu mũariaburi sãre masidigu árĩmi. ãgu Pagũ Goãmũ ãgure árĩpehrerã weca opu ãgu apira sãre masidigu árĩmi.

⁴ Eropā masiqueregū wahgānugaja, ĩgū suhriro weca ma-
jañere tuwea suhriro gasiro mera ĩgū paru yũjũre dirimi.

⁵ Dirituha soropa mera decore pisã, gũare ĩgū buherãre gũa
guburire coenugami. Gũare coetuha ĩgū dirira gasiro mera
tucœmi gũa guburire.

⁶ Gajirã buherãre coegã, Simo Pedroguere ejami. ĩgū
guburire ĩgū coeboro core, Pedropũ ĩgũre õpa arĩmi:

—Opũ, ¿yũ guburire coebu iiri mũhũ? arĩmi Jesure Pedro.

⁷ —Dohparagã yũhũ mũre iiburire masibeaã mũhũ.
Eropa masibiriqeregū ta pũhrũ masigũca, arĩmi Jesu
ĩgũre.

⁸ —Yũ guburire ne coesome mũhũ, arĩmi Pedro.

—Mũre yũ coebiricũ yahagũ árisome mũhũ, arĩmi Jesu.

⁹ —Opũ, yũ guburi dihtare coebiricãque. Yũ guburire, yũ
mojotorire, yũ dipuru sãre coeque, arĩmi Pedro.

¹⁰ ĩgũ eroparicũ Jesu õpa arĩmi:

—Yujugũ masũ guhagũ ĩgũ dũpũre õaro tucoepehomi.
Eropiro ĩgũre dipaturi tucoema masiya mara. ĩgũ guburi
dihtare coero gahmea. Áripehrerã mũa ñeri iirare coenirã
mũa áriquerẽcũ ta yujugũ mũa mera majagũ ĩgũ ñerire
coeya marigũ áhrimi, arĩmi Jesu.

¹¹ Jesu ĩgũre ĩhaturirãre wiabure masituhãñumi. Eropa
masigũ “Yujugũ mũa mera majagũ ĩgũ ñerire coeya marigũ
áhrimi,” arĩñumi ĩgũ.

¹² Gũa guburire coetuha, suhrirore sañatuha, doajami
daja ĩgũ doadiro ta. Tuhaja õpa arĩmi gũare:

—¿Dohparagã yũhũ mũare iirare masiri mũa? ¹³ Mũa
yũre “Buhegũ,” arĩ piyurã, “Opũ,” arĩ piyurã diaye ta
arĩrã iiaa yũre. Mũare buhegũ, mũa opũ diaye ta
áhraa yũhũ. ¹⁴ Eropirã yũhũ mũare buhegũ, mũa opũ
áriqeregũ ta mũa guburire yũ coecũ mũa sã mũa mera
majarãre guburire coeque. ¹⁵ Dohparagã mũa iiburire
mũare ĩhmuabũ. Mũa mera majarãre mũa itamuburire
mũare ĩhmuabũ. Mũare yũ iidiro dopa ta mũa sã iique.

¹⁶ Diaye mũare arĩgũ ta iiaa. Mũa yũ pohro majarã dopa
árĩrã yũ tauro árĩbeaa. Mũare buhedore yũ obeorã áhraa
mũa. Eropirã yũ tauro árĩbeaa mũa. Eropa iigũ ta “Yũ
iidiro dopa ta iique,” arãbũ yũhũ mũare. ¹⁷ Ire mũa masirã,
yũ dorerire iirã, mucubirirã árĩrãca mũa.

¹⁸ “Mũare áripehrerãre eropa arĩbeaa. Yũ beyenirãre
masia yũhũ. Goãmũ yare erã gojarapũ arĩdiro dopa ta
eropa waroca. “Yũ mera bagũ ta yũre wejẽdiami,” arĩ
gojañuma Goãmũ yare erã gojarapũgue. ¹⁹ ĩgũ yũre eropa
wiaboro core ire wereyugũ iiaa mũare. Yũre ĩgũ eropa iira
pũhrũ “Jesu ta Cristo Goãmũ ĩgũ obeodigũ áhrimi,” mũa

arĩburire ire mũare wereyugu iiaa yũhũ. ²⁰ Diaye ta mũare arĩgu iiaa. Yũ obeonirãre gamegu yũ sãre gahmemi ĩgu. Eropigu yũre gamegu yũre obeodigu sãre gahmemi ĩgu, arĩmi Jesu guare ĩgu buherãre.

*Juda Jesure ĩhaturirãre ĩgu wiaborore wereñumi Jesu
Mt 26.20-25; Mr 14.17-21; Lc 22.21-23*

²¹ Eropa arĩ weretuha Jesu turaro bujaweremi. Eropa bujaweregu ðpa arĩ weremi ĩgu guare.

—Diaye mũare arĩgu iiaa. Yujugu mũa mera majagu yũre ĩhaturirãre wiagũcumi, arĩmi Jesu.

²² ĩgu eroparĩcũ peerã Jesure wiabure masibirã, gũa game ĩhamehtubũ. ²³ Yũhũ ĩgu buherã mera majagu Jesu ĩgu mahigupũ ĩgu pohro doabũ. ²⁴ Eropigu Simo Pedro yũre ĩgu mojoto mera sĩpu serẽpidoremi Jesure ĩgure wiabure: ²⁵ Eropigu yũpũ Jesu pohro doadigu serẽpiñabũ ĩgure:

—Opũ, ¿nĩhire arĩgu iiri mũhũ? arĩbũ yũhũ.

²⁶ —Iru panrure mohwa aĩ, yũhũ yoso ogu ĩgu ta ãhrimi yũre wiabu, arĩmi Jesu.

Eropa arĩtuha iriru panrure ĩgu mohwarañere yosotuha Judare Simo Iscariote magure omi. ²⁷ Eropigu panre ĩgu ora pũhrũ watĩpũ Judare ñero iidoredigu árĩmi. Eropigu Jesu ĩgure ðpa arĩmi:

—Mũa iiburire yojaro mera ii purumujuque mũhũ, arĩmi Jesu Judare.

²⁸ ĩgu eroparĩcũ peerã gũa mesague doanirã Jesu Judare ĩgu arĩrare masibiribũ. ²⁹ Yujurãyeri gũa ðpa arĩ pepiribũ: “Juda gũa niyerure dibugũ ãhrimi. Eropigu bosenu gũa baburire asũdoregu obeoami Jesu Judare. Mojomorocũrãre niyerure odoregu iiami Jesu,” arĩ pepiribũ gũa yujurãyeri. ³⁰ Eropigu Juda iri panre ñeatuha wiria wami. ĩgu wiriarasubure ñami árĩbũ.

Mama doreriñere wereñumi Jesu ĩgu buherãre

³¹ ĩgu wiriara pũhrũ guare ðpa arĩmi Jesu:

—Dohpague tamerare yũhũ masũ Goãmũ ĩgu obeodigu yũ turagu árĩrire ĩhmugũcumi Goãmũ masare. Eropigu Goãmũ ĩgu turagu árĩrire ĩhmugũca yũpũ. ³² Eropigu Goãmũ turarire yũ ĩhmucũ ĩgu yũ turari sãre dohparagã ĩhmu purumujugũcumi. ³³ Yũ porã, yũre peeque. Bajamenũrigã mũa mera árĩniũca. Yũre amarãca mũa. Eropigu judio masare yũ arĩdiro dopa ta mũa sãre arãa. “Yũ waborore mũapũ wamasibea,” erãre yũ arĩdiro dopa ta mũa sãre werea. ³⁴ Mama doreriñere mũare weregũra. Mũa mera majarãre mahique mũa. Mũare yũ mahidiro dopa ta mũa mera majarãre mahi umupeoque. ³⁵ Eropirã

m̄aa mera majarāre m̄aa mahicũ ĩha gajirā yaharā m̄aa arĩcũ ĩha masirācoma, arĩmi Jesu.

*“Jesure masibea,” Pedro ĩgu arĩburire wereñumi Jesu
Mt 26.31-35; Mr 14.27-31; Lc 22.31-34*

³⁶ ĩgu eroparĩcũ Simo Pedro Jesure serēpimi:

—Op̄, ¿nohogue waḡcuri m̄ah̄? arĩmi Pedro. ĩgu eroparĩcũ Jesu ȳhrimi:

—Ȳ waboroguere dohpaguere ȳ mera wamasibea m̄ah̄. Dohpaguere wamasibiriquereḡ ta p̄hr̄ ȳ pohro waḡca, arĩmi Jesu Pedore.

³⁷ Pedro arĩmi:

—Op̄, ¿duhpigu dohpaguere m̄ mera wamasibiribocuri ȳh̄? Ȳre erā wejēdiaquerecũ ȳh̄ m̄re duhusome. Itamuḡca, arĩmi Pedro Jesure.

³⁸ —¿M̄ eropa arĩgu diaye ta ȳre itamuḡcuri? Diaye m̄re wereḡ iiaa. “Jesure masibea,” arĩḡca m̄h̄ gajirāre. Ʋhresubu eropa arĩḡca cāreña ĩgu wereboro core, arĩmi Jesu Pedore.

14

*Jesu Goām̄ pohrogue wari maha iro dopa āhraa ȳh̄,
arĩ wereñumi*

¹ P̄hr̄ Jesu ḡare ōpa arĩ weremi:

—Ne bujawere w̄aro guñaric̄biricāque. Goām̄re “Diaye ta ĩgu āhrimi,” arĩ umupeoque. Eropirā ȳ s̄are eropa umupeoque. ² Ȳ Paḡ ĩgu arĩroguere baja wiri āhraa. M̄aa arĩborore amuyuḡ waḡra. Iri diaye ta āhraa. Eropigu m̄are irire werea. ³ Eropigu m̄aa arĩborore amutuha, dujariḡra ȳh̄. Eropigu ȳ pohrogue m̄aa arĩmorāre aĩgu ariḡra ȳh̄ daja. ⁴ Eropirā ȳ waburi mare masia m̄aa, arĩmi Jesu ḡare ĩgu buherāre.

⁵ —Op̄, m̄ waborore masibea ḡaa. ¿Eropirā dohpa ii m̄ waburi mare masirācuri ḡaa? arĩ serēpimi Toma Jesure.

⁶ ĩgu eropa arĩ serēpicũ Jesup̄ ȳhrimi:

—Goām̄ pohrogue wari maha iro dopa arĩgu tiiaa ȳh̄. Eropigu diaye arĩr̄ire wereḡ arĩc̄ḡ tiiaa ȳh̄. Eropigu umaroguere ojocar̄niguicũ ĩgu arĩgu tiiaa ȳh̄. Eropirā ȳre umupeorā dihta ȳ Paḡ pohrogue warācoma. ⁷ Nere ȳre masirā arĩr̄ā, ȳ Paḡ s̄are masiboaya m̄aa. Dohpaguere ĩḡre ĩhaa m̄aa. Eropirā ĩḡre masituhabu m̄aa, arĩmi Jesu.

⁸ ĩgu eroparĩcũ Felipe ōpa arĩmi:

—Op̄, mari Paḡre ĩhmuque ḡare. Iripēta gahmea ḡaa, arĩmi ĩgu.

⁹ Īḡu eroparĩcũ Jesu weremi:

—Felipe, ¿yoari boje yu mera árĩquereḡu ta, mu masinibeari yũre? Yũre ĩaḡu yu Pagu sãre ĩatuhami. “Eropiḡu mari Pagure ĩhmuque ḡuare,” ¿duhpigũ eropa arĩri muhu yũre? ¹⁰ Yu Pagu mera yujugũ ta āhraa yũhu. Irire “Diaye árĩbeaa,” ¿arĩḡu meje iiri muhu? Muare wereḡu yu gamero wereḡu iibeaa. Yu Pagure werebasagu iiaa. Eropiḡu ĩḡu yu mera árĩḡu ĩḡu turari mera ii ĩhmumi. ¹¹ Yũhu, yu Pagu mera yujugũ ta āhraa. Yu eroparĩcũ irire “Diaye ta āhraa,” arĩ pepique mua. Irire “Diaye ta árĩbeaa,” arĩdiarã, Goãmu turari mera deyro moarire yu ii ĩhmurire ĩaque. Eropa ĩara puhrũ yu Pagu mera yu yujugũ ta arĩrĩre “Diaye ta āhraa,” arĩ pepique mua. ¹² Diaye muare arĩḡu iiaa. Yũre umupeoḡu yu iidiro dopa ta iigũcumi. Eropiḡu ĩḡupũ yu tauro iigũcumi. Yu Pagu pohrogue wabu iiaa dohpaguere. Eropiḡu yũre umupeoḡu yu tauro Goãmu turari mera ii ĩhmugũcumi. ¹³ Eropiḡu yũre umupeorãre erã yu waĩ mera serẽropẽ ta iigũra. Eropa iigũ yu Pagu ĩḡu turarĩre ii ĩhmugũca. ¹⁴ Yũre umupeorã mua árĩcũ mua serẽropẽ ta iigũra, arĩmi Jesu.

Espĩritu Santore muare obeoḡura, arĩ wereñumi Jesu

¹⁵ Eropa arĩtuha ḡuare õpa arĩnemomi:

—Yũre mua mahirã, yu dorerire iipehorãca. ¹⁶ Yu Pagure serẽḡura. Yu eropa serẽcũ yu Pagupũ gajigure muare itamubure muare obeoḡucumi. Eropiḡu ĩḡu muare itamubupũ umari nuca mua mera árĩḡucumi. ¹⁷ Īḡu diaye majare wereḡu Espĩritu Santo āhrimi. I yeba majarãpu Espĩritu Santore masibeama. Eropirã ĩḡure opamasibeama. Īḡu ta mua mera árĩḡucumi. Eropirã mua ĩḡure oparãca. Eropirã ĩḡure masia mua. ¹⁸ Muare cóasome yũhu. Mua mera árĩbu dujarigũca yũhu daja. ¹⁹ Merogã duhyaa yu waboro. Yu wara puhrũ i yeba majarã yũre umupeobirĩnirã yũre dipaturi ĩasome. Muapũ yũre ĩarãca. Yu ojocarĩcũ mua sã umari nuca Goãmu mera ojocarĩrãca. ²⁰ Irĩnu yu dujariburĩnũre yũhu, yu Pagu mera yujugũ ta yu árĩcũ masirãca mua. Eropirã yu mera mua árĩcũ mua mera yu árĩcũ sãre masirãca mua. ²¹ Yu dorerire iigũ yũre mahiḡu ta āhrimi. Eropiḡu yũre mahiḡure yu Pagupũ mahiḡucumi. Eropiḡu yu sã ĩḡure mahiḡuca. Eropiḡu ĩḡure yũre õaro masicũ iigũca, arĩmi Jesu ḡuare ĩḡu buherãre.

²² ḡua mera majagũ gajigũ Juda waĩcũḡu arĩmi Iscariote arĩbiḡu. Őpa arĩmi ĩḡu Jesure.

—Opu, ¿dohpa iigucuri muhu guare eropa arigu? ¿I yeba majarãre mure masicũ iibigu dohpa iigucuri muhu gua dihtare mure masicũ iigu? arĩ serẽpimi Juda.

²³ Igu eroparicũ Jesu yahrimi:

—Yure mahirã yu dorerire ðaro iima. Erã eropa iicũ yu Pagupu erãre mahigucumi. Eropirã erã mera arĩrã arĩrãca gua. ²⁴ Yure mahibigu yu dorerire iibeami. Eropiro yu wereri mua peerapu yu wereniguri arĩbeaa. Yure obeodigu ya wereniguiripu ahraa. Igu yu Pagu ta ahrimi.

²⁵ Mua mera arĩnigu ire muare wereniguigu iiaa. ²⁶ Pahrũ yu serẽcũ yu Pagu Espiritu Santore obeogucumi muare. Eropigu Espiritu Santopu muare itamubu arigu, muare buhepegucumi igu. Eropigu muare yu wererare guñacũ iigucumi igu.

²⁷ Muare ðaro arĩcũ iiguca yuhu. Yuhu ðaro arĩdiro dopa ta ðaro arĩcũ iiguca muare. I yeba majarã erã iidiro dopa iisome yuhu. Yu tamera diaye ðaro arĩcũ iiguca muare. Bujawere wuaro guñaricubiricãque mua. Eropirã güibiricãque mua. ²⁸ “Yuhu waguca. Eropigu mua mera arĩbu dujariguca daja,” muare yu eropa arĩ werẽcũ peetuhabu mua. Irire masirã arĩrã mucubiriboaya mua. Yure mua diaye mahinirã arĩrã mucubiriboaya mua. Yu Pagupu yu tauro turami. Eropirã igu pohrogue yu waborore mua masira pahrũ yure mahirã mucubiriboaya mua. ²⁹ Yure mua umupeoburire yu waborore wereyugu iiaa muare.

³⁰ “I yeba majarã opu watĩ doregu iimi dohpaguere. Eropigu igu eropa dorecũ yuhu mua mera wereniguituboro merogã dũhyaa. Igu yu tarinugamasibeami. ³¹ Yure yu Pagu igu dorero dopa ta iiaa yuhu. Eropa ta iiaa yuhu yu Pagure yu mahirire i yeba majarã erã masiburire.

“Wahgãnugajaque. Ina warã, arĩmi Jesu guare igu buherãre.

15

Jesu iguiru iro dopa ahraa, arĩ wereñumi

¹ Eropigu werenigui queori mera buhegu guare ðpa arĩmi Jesu:

—Yuhu iguiru diaye majaru iro dopa arigu ahraa. Yu Pagupu iguirure ihadibugũ iro dopa arigu ahrimi.

² Iguirure iri dũpuri gamesuriro dopa ta mua yaharã yu mera ahraa. Dũca mariri dũpurire iguirure ihadibugũ igu peha cõaro dopa ta yu Pagu igu gamerire iibirãre cohãmi. Dũcacuri dũpurire iguirure ihadibugũ igu amuro dopa ta yu Pagu igu gamerire iirãre itamugucumi igu “Yu gamerire

iinemoporo," arĩḡu. ³ Yu wererire peerã, "Diaye ta ãhraa," arãa mua. Eropiḡu yu Paḡu mua ñeri iirare cóãtuhami. ⁴ Yure gamesuriro dopa ta yu mera majarã árĩque mua. Eropiḡu mua mera árĩḡuca. Iguiru dũpuri iguiru mera gamesuribiro árĩro iri dũpuriḡu dũca mara. Eropa ta yu mera majarã õaro árĩbirã sã yu Paḡu gamerire iimasibea mua.

⁵ Iguirure iri dũpuri gamesuriro dopa ta mua yaharã yu mera ãhraa. Iri dũpuri iguirure õaro gamesuriro árĩro dũcacua. Mua sã yure õaro gamesurirã yu Paḡu gamerire iiaa. Yure gamesurirã árĩbirã ĩḡu gamerire iimasibea mua. ⁶ Ñeri dũpuri turira dũpuri ĩḡu cóãboro dopa ta yu mera majarã árĩbirãre yu Paḡu cóãḡucumi. Iri dũpuri ñaicũ ĩha iguirure ĩhadibugũ iri dũpuri aĩ gameneo peamegue soecãḡucumi. Eropa ta iḡucumi Goãmũ yu mera majarã árĩbirãre.

⁷ "Yu mera majarã árĩrã yu buherire cãdijibiriboca mua. Eropa cãdijibirã mua gameropẽ ta yure serẽque. Eropiḡu mua serẽropẽ ta ogura. ⁸ Yu Paḡu gamerire mua iirã árĩcũ ĩarã, "Oã Jesu yarã ãhriima," arĩ masirãcoma gajirã masa. Eropirã mware ĩarã yu Paḡure umupeorãcoma. ⁹ Yu Paḡu ĩḡu yure mahidiro dopa ta yu sã mware mahia. Eropirã yu mahiri mera árĩque mua. ¹⁰ Yu Paḡu ĩḡu dorerire iiaa yũhũ. Eropiḡu ĩḡu mahiḡu árĩniguiia yũhũ. Eropa ta mua sã yu dorerire iirã yu mahirã árĩniguiicãrãca mua.

¹¹ "Ire mware wereabũ yu mera mua õaro mucubiriborore. Eropirã turaro mucubirirãca mua. ¹² Õpa dorea mware: Mware yu mahidiro dopa ta mua mera majarãre mua sã mahique. ¹³ Yujugũ masũ ĩḡu mera majagũ yañe árĩborañe sirĩḡu ĩḡu mera majagũre burĩḡã mahiami gajirã mahidiro tauro. ¹⁴ Eropirã yu dorerire iirã yu mera majarã ãhraa mua. ¹⁵ Diaye ta mua yu mera majarã gohra ãhraa. Mua eropa árĩrã árĩcũ árĩpehrerire yu iirare werea mware. Pohro majagũ ĩḡu opu iiburire masibeami ĩḡu. Eropiḡu "Yu pohro majarã bu árĩrã ãhraa mua," arĩbea mware. Yu Paḡu ĩḡu yure wererare mware werepehoabũ. Eropa wereḡu "Yu mera majarã ãhraa mua," mware arãa dohpaguere. ¹⁶ Mũarũ yure beyebiribũ. Yũrũ mware beyebũ yu Paḡu gamerire mua iimorãre. Mua eropa iicũ mua eropa iiri ne yuju diaye gohra árĩsome. Mua eropa iicũ yure mua umupeocũ yu Paḡu mua serẽropẽ ta mware ogucumi. ¹⁷ Ire mware dorea yũhũ: Mua basi game mahi umupeoque, arĩmi Jesu.

Jesure ĩḡu yarã sãre i yeba majarã ĩhaturirire wereñumi Jesu

18 Eropigu guare werenemomi daja:

—I yeba majarã muare erã ihaturicũ iarã ire guñaque mua: “Guare eropa ihaturiboro core Jesupure ihaturinugatuhama erã,” arĩ guñaque. 19 I yeba majarã gohra mua árĩcũ, erã mera majarãre erã mahidiro dopa ta mua sãre mahiboañuma erã. I yeba majarã mera mua árĩnicũ muare beyebũ. Eropirã dohpaguere i yeba majarã gohra árĩbeaa mua. Mua eropa árĩbircũ iarã i yeba majarã muare ihaturima. 20 Mua yaharã árĩrã “Yu tauro árĩbeaa,” muare yu arĩrare guñaque mua. Eropa yu mera majarã árĩrã yu ñero tariboro dopa ta ñero tarirãca mua sã. Yure ñero iinirã ta mua sãre ñero iirãcoma. Yu buherire yuhrinirã ta mua buheri sãre yuhrirãcoma. 21 I yeba majarã yure obeodigure masibeama. Eropirã yure umupeorã mua árĩcũ ñero iirãcoma erã muare.

22 “Erãre yu buhegu aribircũ erã yure gamebirira dipuwaja mariboaya. Dohpaguere erãre yu buhera pũhrũ “Ñeri dipuwaja mara guare,” arĩmasibeama erã. 23 Yure ihaturigu yu Pagu sãre ihaturimi. 24 Goãmũ turari mera gajirã erã ne iibirirare ii ihmubũ. Eropiro erãre irire yu ii ihmubircũ erã peebirira dipuwaja mariboaya. Goãmũ turari mera yu ii ihmurare erã ñara pũhrũ yure yu Pagu sãre ihaturima erã. 25 Eropa ihaturirã Goãmũ yare erã gojarapũ matague ta erã arĩ gojadiro dopa ta iirã iima erã. Ōpa arĩ gojañuma: “Erãre yu ñero iibiriquerecũ ta yure ihaturima erã,” arĩ gojañuma matague ta Goãmũ yare erã gojarapũgue, arĩmi Jesu.

26 Eropigu werenemomi daja:

—Yu pũhrũgue muare itamubu, yu Pagu mera árĩgu muare yu obeobu Espiritu Santo ta ahrimi. Īgu diaye majare weregũ ta ahrimi. Eropigu ĩgu arigu yu árĩricurire weregucumi muare. 27 Muare yu buhenugacũgue mua sã yu mera umuri nucũ árĩbũ. Mua sã yu árĩricurire wererãca, arĩ weremi Jesu guare.

16

1 Eropa arĩtuha guare ōpa arĩ werenemomi:

—Pũhrũ yu buherire yu sãre mua cóãbiriburire ōpa weregura muare. 2 Mari buheri wirigue mua ñajadiacũ ñajadoresome muare yaharã mua árĩri dipuwaja. Eropirã muare gajisubu wejẽ “Goãmũ gamerire iirã iiaa,” arĩ pepirãcoma gajirã. 3 Yu Pagure, yu sãre erã masibeama. Eropa masibirã muare ñero iirãcoma erã. 4 Eropirã muare erã ñero erã iicũ iarã, “Erã ōpa iiboro core ta Jesu guare weremũhtayutuhami,” arĩ guñarãca mua. Mua eropa arĩ

guñaburire dohpaguere ire weremähtagu iiaa müare, arĩ weremi Jesu.

Espíritu Santo ĩgu iiburire wereñumi Jesu

Eropa arĩtuha õpa arĩ werenemomi:

—Neguere müa mera árĩgu ire müare werebiribũ.

⁵ Dohpaguepäre yäre obeodigu pohrogue wagũca. “¿Nohogue wagũcuri mühũ?” arĩ ne yujugu yäre serẽpibea müa yäre. ⁶ Eropa serẽpibiriquererã ta yũ waborore müare werecũ müa ñero sĩporãcua. ⁷ Müa ñero sĩporãcũquerecũ müare õpa diaye ta werea: Yũ wara pũhrũ müare õacãroca. Yũ ẽmarogue wabiricũ müare itamubupũ aribiribocumi. Eropa wagũ eja müare ĩgure obeogũca yũhũ. ⁸ Yũ eropa obeocũ ĩgu arigũcumi. Eropa eragu i yeba majarãre ñerire iirã erã árĩcũ masicũ iigũcumi ĩgu. Eropigu õaro árĩricũburire buhegũcumi ĩgu. Eropigu Goãmũ ĩgu dipuwaja moaborore weregũcumi masare itamubupũ. ⁹ Yüre umupeobirã ährima i yeba majarã. Eropigu itamubupũ masa erã ñero iiricũrere erãre masicũ iigũcumi. ¹⁰ Yũ Pagũ pohrogue wagũca. Yũ eropa wara pũhrũ masa yäre ñanisome. Eropigu itamubupũ arigu õaro árĩricũri sãre buhegũcumi. ¹¹ I yeba majarã opũre watĩre Goãmũ dipuwaja moadoretuhami. Eropigu Goãmũ masare ĩgu dipuwaja moaburi sãre weregũcumi itamubupũ.

¹² “Wũaro ähraa müare yũ wereburi. Yũ eropa werenemodiaquerecũ ta ire yũ werecũ dohparagã masisome müa. ¹³ Yũ eropa werenemobiricũ Espíritu Santopũ irire werenemogu arigũcumi. ĩgu ĩgu gamero müare weresome. Yũ Pagũ ĩgu weredorerare müare weregũcumi. Eropigu müare diaye majare werepehogũcumi. Eropiro pũhrũgue waburire müare masicũ iigũcumi ĩgu. ¹⁴ Eropigu ĩgu yare müare weregũcumi. Eropa weregu yäre umupeocũ iigũcumi müare. ¹⁵ Árĩpehreri yũ Pagũ ya sã yaha ähraa. Eropigu “Espíritu Santo yahare weregũcumi,” arãbũ müare, arĩ weremi Jesu.

Bujawererã árĩquererã ta pũhrũ mucubirirãca müa, arĩ wereñumi Jesu

¹⁶ Eropa arĩtuha õpa arĩ werenemomi gũare daja:

—Bajamenũri yäre ñasome müa. Eropirã pũhrũgã ta daja müa yäre ñarãca, arĩmi Jesu.

¹⁷ ĩgu eroparĩcũ peerã, gũapũ bajamerãgã õpa arĩ wereniguibũ gũa basi:

—“Bajamenũri yäre ñasome müa. Eropirã pũhrũgã ta daja müa yäre ñarãca,” arĩgu ¿dohpa arĩgu eropa arãri marire? Eropigu “Yũ Pagũ pohrogue wagũca,” ¿dohpa

arironore eropa arāri ĩgu? ¹⁸ “Bajamenuri pũhrũ,” arĩgu ĩdohpa arĩgu eropa arāri ĩgu? ĩgu wererare ōaro pee masibea mari, arĩbũ gũa basi.

¹⁹ Gũa eropa arĩ wereniguicũ Jesu ĩgure gũa serēpidiarire masigu gũare ōpa arĩ weremi:

—“Bajamenuri yũre ĩasome mũa. ĩEropirã pũhrũgã ta yũre ĩarãca daja,” yũ arĩrare serēpidiari mũa? ĩIrire yũ arĩrare masibeari mũa? ²⁰ Diaye mũare arĩgu ĩiaa: Yũhũ sĩricũ ĩarã mũa orerãca. Eropirã bũrigã bũjawererãca. Yũre umupeobirinirãpũ mucubirirãcoma. Mũarũ bũjawerenirã árĩquererã pũhrũ mucubirirãca mũa. ²¹ Ōpa āhraa iri: Nomeo niji wahgũgo igo ñero tariburisubu āhraa. Eropigo igo turaro bũjaweremo. Eropa bũjawerequerego, igo magũgã dehyoacũ ĩago mucubirimo. Eropigo igore pũrirare guñabeamo igo pare. ²² Eropa ta mũa dohpaguere bũjawererãca. Pũhrũ mũa yũre ĩarãca daja. Eropirã mũa turaro mucubirirãca. Mũa eropa mucubiririre gajirã mũare bũjawerercũ iimasisome.

²³ “Irinũ yũre mũa ĩarinũre yũre serēpisome mũa. Yũ Pagũpũ mũa serērire ogũcumi. Diaye ta mũare arĩgu ĩiaa. Yũre mũa umupeocũ ĩagu yũ Pagũre yũ waĩ mera mũa serērire ĩgu mũare ogũcumi. ²⁴ Yũ ōpa waboro core mũa yũre waĩpeo Goãmũre serēnibiribũ mũa. Dohpaguere yũre waĩpeo Goãmũre serēque. Mũa eropa serēcũ mũare ĩgu ogũcumi mũa turaro mucubiriburire, arĩmi Jesu gũare.

Ñerãre Jesu ĩgu tarinũgarire wereñumi ĩgu buherãre

²⁵ Eropa arĩtuha ōpa arĩnemomi:

—Werenigui queori mera mũare weremũrabũ. Eropa werequeregũ ta pũhrũ mũare werenigui queori mera weresome pare yũhũ. Yũ Pagũpũre mũa ōaro peeboro dopa weregũra mũare. ²⁶ Irinũre mũa ya árĩburire mũare serēbasasome yũhũ. Yũre umupeorã yaha waĩ mera mũa basi ĩgure serērãca. ²⁷ Mũa yũre mahirã āhraa. Eropirã yũ Pagũ pohrogue yũ aridigu árĩcũ “Diaye ta āhraa,” arãa mũa. Eropa arĩrã mũa árĩcũ ĩagu, yũre mahirã mũa árĩcũ ĩagu yũ Pagũ sã mũare mahimi. ĩgu eropa mahicũ mũa ĩgure serērãca. ²⁸ Yũ Pagũ pohro árĩdigu árĩgu i yebaguere aribũ yũhũ. Eropigu dohpaguere i yebague árĩdigu árĩgu yũ Pagũ pohrogue dujagũca daja, arĩmi Jesu.

²⁹ ĩgu eroparĩcũ gũa ĩgu buherã ōpa arĩbũ:

—Dohpague tamerare werenigui queori mariro wereniguigũ ōaro diaye wereniguigũ ĩiaa mũhũ gũare. ³⁰ Mũhũ ōaro masipehogũ mũ árĩcũ gũa dohpague ta ōaro masia. Eropirã gajirã mũre buhemasibeamã. Eropirã irire

gua dohpaguere ðaro masia. Gua irire ðaro masirã árĩrã Goãmũ pohrogue mũ aridigu árĩcũ “Diaye ta ãhraa,” arãa, arĩbu gua Jesure.

³¹ Gua eroparĩcũ Jesu yũhrimi gũare:

—Dohpaguere “Diaye ta ãhraa,” ¿arĩri mũa pare?

³² Pũhrũñari mũa ya wirigue wasirirã yũre cóãrãca mũa. Mũa eropa cóãquerecũ ta yũ Pagupũ yũ mera ãhrimi. Eropigu yũhũ yujugu ta árĩbeaa. ³³ Ire mũare wereyubu yũre mũa guñaturari mera mũa ðaro árĩboro dopa. I yeba árĩrisubu Goãmũre gamebirã pohrogue mũa árĩcũ mũare ñero iirãcoma erã. Erã eropa iiquerecũ ta guñaturaque mũa. I yeba majarã erã ñero iirare tarinũgagũ ãhraa yũhũ. Eropirã yũre guñatura mucubirique mũa, arĩmi gũare ĩgu buherãre.

17

Jesu ĩgu buherã ya árĩburire ĩgu Pagũre Goãmũre serẽbasañumi

¹ Eropa arĩ weretuha Jesu umarogue ĩhamuju ðpa arĩ wereniguimi Goãmũre ĩgu Pagũre:

—Ahũ, dohpaguere mũ werediro dopa ta yũre erã ñero iiburisubu ejanijaro iiaa. Yũre mũ magũre erã masare umupeocũ iique. Mũ eropa iicũ masare mũre umupeocũ iigũra yũ sã. ² Árĩpehrerã tauro opũ apibũ mũhũ yũre. Eropigu mũ yũre onirãre mũ mera eropa árĩniguicũ iigũca mũhũ. ³ Mũ dihta Goãmũ gohra ãhraa. Yũhũ Jesucristo mũ obeodigu ãhraa. Eropirã árĩpehrerã mũre masirã, yũ sãre masirã mari mera umaroguere eropa árĩniguicãrãcoma, arĩmi.

⁴ Eropa arĩgu ta ðpa arĩnemomi Goãmũre:

—I yebaguere mũ iidorerare iipehoabũ yũhũ. Eropa iigu masare mũ turagu árĩrĩre ĩhmuabũ yũhũ. ⁵ I yeba árĩboro core mũ mera yũ árĩcũ ðaro turari opabũ. Eropigu dohpaguere mũ árĩroque irire yũ ðaro turagu árĩrĩre ĩhmuque.

⁶ “I yeba árĩrãre yũre mũ onirãre mũre masicũ iiabũ. Mũ onirã mũ yarã ãhrima. Eropigu erãre ohabũ mũhũ yũre. Eropirã mũ dorerire iiaa erã. ⁷⁻⁸ Yũre mũ wererare erãre buheabũ. Yũ buhecũ peerã yũ buherire gahmeama erã. Eropirã diaye ta mũ pohro aridigu yũ árĩcũ masima erã. Eropirã mũ obeodigu yũ árĩcũ sãre “Diaye ta ãhraa,” arĩ pepima erã.

⁹ “Erã ya árĩburi mũre serẽgu iiaa. Gajirã ya árĩburipũre serẽgu iibeaa yũhũ. Yũre mũ onirã mũ yarã ãhrima. Eropigu erã ya árĩburire serẽgu iiaa mũre. ¹⁰ Erã

árīpehrerã m̄ yarã āhrima. Eropirã m̄ yarãp̄ yaharã āhrima. Ȳre umupeorã ȳ turaḡu árīrire ĩhmuma erã masare.

¹¹ “Dohpaguere i yebaguere dujasome ȳh̄. M̄ pohro wabu iiaa. Ȳ eropa waquerecã ta dohpaguere ȳre m̄ onirã i yebaguere dujama. Ah̄, m̄h̄ ðaḡu āhraa. Ȳre m̄ onirãre m̄ turari mera ĩhadibuque. M̄ eropa dibucã mari yujuḡu ta árīdiro dopa ta yuju curu ta árīrãcoma erã sã. ¹² Erã mera árīḡu m̄ turari mera erãre ðaro ĩhadibuab̄. Yujuḡu tamera peamegue waḡucumi m̄ yare erã gojarap̄u werediro dopa ta.

¹³ “Dohpaguere m̄ pohrogue wabu iiaa. Eropiḡu i yeba i árīpehrerire m̄ yarãre werea ȳ mera erã ðaro mucubiriborore. ¹⁴ M̄ yare wereab̄ erãre. Erã ȳ iro dopa ta i yeba árīwajamorã árībeama. Eropirã i yeba majarãp̄u erãre ĩhaturima. ¹⁵ “I yeba árīrãre, yaharãre añaque,” arībeaa. Eropa arībiriq̄ureḡu erãre ðaro ĩhadibuque watī ñerire iidoreri erãgue arīḡu. ¹⁶ I yeba majaḡu árībeaa. Erã sã ȳ iro dopa ta i yeba árīwajamorã árībeama. ¹⁷ Yaharãre m̄ buheri mera ðarã árīcã iique erãre. M̄ wererip̄u diaye ta āhraa. ¹⁸ I yebaguere ȳre m̄ obeodiro dopa ta ȳp̄u yaharãre m̄ yare buhedoreḡu obeoa. ¹⁹ M̄ gamerire iibu árīḡu, s̄ribu árīḡu erã ya árīburire s̄ribu āhraa. Eropa s̄ribu āhraa ȳh̄ yaharã sã m̄ gamerire diaye erã ðaro iiburire.

²⁰ “Yaharãre dohpague árīrã dihtare itamuque,” arī serēbeaa ȳh̄. Yaharã gajirãre erã buhera p̄hr̄u gajirã sã ȳre umupeorãcoma. “Erã sãre itamuque,” arãa ȳh̄. ²¹ Yaharã árīpehrerã erã yuju curu árīboro dopa itamuque. Ȳh̄ m̄ mera yujuḡu ta āhraa. Mari yujuḡu árīdiro dopa ta erã mari mera yuju curu ta árīporo. Yujuro mera ta árīporo m̄ obeodiḡu ȳ árīrire árīpehrerã masa “Diaye ta āhraa,” erã arīburire. ²² Ȳre m̄ ora turarire yaharãre ohab̄. Iri turarire oparã yujuḡu ta mari árīdiro dopa ta erã sã yuju curu ta árīrãcoma. ²³ Ȳh̄ erã mera āhraa. Eropiḡu m̄h̄ ȳ mera āhraa. Mari eropa árīrã árīcã mari yarã diaye ta ðaro yuju curu ta árīrãcoma. Yuju curu erã árīcã ĩarã m̄ obeodiḡu ȳ árīrire i yeba majarã masirãcoma. Eropirã ȳre m̄ mahidiro dopa ta yaharã sãre m̄ mahirire masirãcoma masa.

²⁴ “Ah̄, i yeba árīboro core ȳre mahib̄ m̄h̄. Eropa mahiḡu ȳ turaḡu árīrire ĩhmub̄ m̄h̄. Eropiḡu ȳre m̄ onirã ȳ mera erã árīcã gahmea ȳ turaḡu árīrire erã masiboro dopa. ²⁵ Ah̄, m̄h̄ ðaḡu āhraa. I yeba majarã ñerã m̄re masibeama. Ȳp̄u m̄re masia. Eropirã ȳh̄ m̄ obeodiḡu árīcã masima yaharãp̄u. ²⁶ M̄re erãre

masicũ iiabũ. Pũhrũ sãre mũre erãre masicũ iigũca yũre mũ mahidiro dopa ta gajirãre erã mahiburire. Eropigu yaharã mera árĩgũca, arĩmi Jesu mari Pagure.

18

Jesure peresu iĩnuma

Mt 26.47-56; Mr 14.43-50; Lc 22.47-53

¹ Īgũ eropa arĩra pũhrũ Jesu gũa sã ĩgũ buherã Cedrón waĩcũriyare taribuja, Olivo waĩcũri gorogue ejabũ.

² Bajasuburi iri gorogue Jesu mera gũa gameneremũribũ. Eropigu Juda Jesure ĩhaturirãre wiabu iri gorore masĩmi.

³ Eropa masigũ pe curu surara mera aridi árĩmi ĩgũ. Yuju curu surara gohra árĩma. Gaji curu surara Goãmũ wihire corerã árĩma. Pahia oparã, fariseo masa erã obeonirã árĩma surara. Eropa arirã sihãri dipurure, eropãrĩcũ yucũ mojcũma erã. ⁴ Iri gorogue gũa pohrogue erã erara pũhrũ Jesu ĩgũ ñero tariborore masigũ, erãre bocatĩri serẽpimi:

—¿Noare amarã iiri mũa? arĩmi Jesu.

⁵ —Jesu Nazare majagũre ahmaa, arĩ yũhrima erã.

—Īgũ ta ãhraa yũhũ, arĩmi Jesu.

Judapũ Jesure ñeadoregũ erã mera árĩmi. ⁶ Eropirã Jesu “Īgũ ta ãhraa yũhũ,” ĩgũ arĩcũ erãpũ Ʃca wa yebague dusirimaagã mehmereja wama. ⁷ Erã eropa wacũ ĩagũ dipaturi serẽpimi Jesu:

—¿Noare amarã iiri mũa? arĩmi.

—Jesu Nazare majagũre amarã iiaa gũa, arĩ yũhrima erã daja.

⁸ —Īgũ ta ãhraa, arĩrabũgũ yũhũ mũare. Eropirã yũre ñearã oãre yũ mera majarãre peresu iibiricãque, arĩmi Jesu.

⁹ Eropa gũare mahigũ ne yujugũre dederecũ iibirimi. Eropa iigũ ero core Goãmũre ĩgũ arĩdiro dopa ta iigũ iimi ĩgũ. “Yũre mũ onirãre ne yujugũre dedeobiribũ,” ĩgũ arĩdiro dopa ta iigũ iimi Jesu. ¹⁰ Eropi Simo Pedro matamijire opagũ irimijire tuãwea aĩ, pahia opũ pohro majũre Malco waĩcũgũre ĩgũ gamirore pacoro medijucãmi. Diayerũ maja gamirore pacoro medijucãmi ¹¹ Īgũ eropa pacorocũ ĩagũ Jesu õpa arĩmi:

—Mũ matamijire dibuque. Yũ Pagũ ĩgũ yũre ñero taridorero dopa ta ñero tarigũra, arĩmi Jesu Pedrore.

Pahia tauro opũ pohrogue Jesure aĩgãñuma erã

Mt 26.57-58; Mr 14.53-54; Lc 22.54

¹² Īgũ eropa arĩtuhacũ ta surara, erã opũ mera, Goãmũ wihire corerã surara sã Jesure ñeha ĩgũre dirima.

13 Dirituha Ana waĩcũgu pohrogue aĩgãmũhtama erã. Anapũ Caifa mũñecũ árĩmi. Caifapũ iri bojorire pahia tauro opũ árĩmi. 14 “Judio masa ya árĩburire yujugũ masũ sĩricũ õhaa,” arĩdigũ árĩmi ĩgu Caifapũ.

—*Jesure masibea, arĩñumi Pedro*

Mt 26.69-70; Mr 14.66-68; Lc 22.55-57

15 Eropigu yũhũ Simo Pedro mera Jesure yoañarirogue nũrusiabũ. Yũpũ pahia opũ ĩgu ĩha masigu árĩbũ. Eropigu Jesu pũhrũ, opũ árĩri wihi árĩri sãriro pohecague ñajaa wabũ. 16 Pedropũ disiporo dujanũgajami. Eropigu maji wiriri disiporo coregore serẽbasabũ Pedrore aĩ ñajabu. Yũ eropa serẽpiñacũ igo Pedrore ñajaridoremo. Igo ñajaridorera pũhrũ yũhũ Pedrore aĩ ñajaa wabũ. 17 Yũ eropa aĩ ñajajacũ ĩago disiporo coregorũ Pedrore serẽpimo:

—¿Jesu buherã mera majagu árĩbeari mũhũ? arĩmo igo Pedrore.

—Árĩbeaa yũhũ, arĩ yũhrimi Pedropũ.

18 Ero core ero majarã pohro majarã, surara mera erã sõhmaburi peamere dihunirã árĩma. Yũsaa árĩbũ. Eropirã erã iri peame tũro sõhma niguima. Erã sõhmacũ ĩagu Pedro sã sõhmagũ wami.

Pahia tauro opũ Jesure serẽpi ĩañumi

Mt 26.59-66; Mr 14.55-64; Lc 22.66-71

19 Eropi pahia tauro opũ árĩgu Jesu ĩgu buherire, gũa ĩgu buherã sãre serẽpi ĩapũ Jesure. 20 ĩgu eropa arĩ serẽpicũ Jesupũ yũhripũ ĩgũre:

—Árĩpehrerãre buhegu erã core niguibũ. Eropa buhegu mari buheri wiri Goãmũ wihi sãre masa gamenererogue eropa buhe niguicãbũ. Duhrijagu ne buhebirabũ yũhũ. 21 ¿Duhpigũ yũre serẽpiri mũhũ? Serẽpidiagu yũre peenirãre serẽpique. Yũ wererare erã masima, arĩ yũhripũ Jesu.

22 ĩgu eroparĩcũ surarapũ ero niguidigu ĩgu mojoto mera Jesure papũ.

—Eropa arĩbircãque pahia tauro opũre, arĩpũ surara Jesure.

23 ĩgu eroparĩcũ Jesu õpa arĩpũ:

—Ñero arĩ yũ wereniguirare wereque yũre. ¿Diaye majare yũ mũare werequerecũ duhpigu pari mũhũ yũre? arĩpũ Jesu surarare.

24 Pũhrũ Ana Jesure erã diridigũre Caifa pahia tauro opũ pohrogue obeopũ.

—*Jesure masibeeaa, dipaturi arĩñumi Pedro*

Mt 26.71-75; Mr 14.69-72; Lc 22.58-62

²⁵ Eropi Simo Pedro peame turo sōhma niguigu iimi. Eropa ĩgu sōhma niguicũ ĩarã ero majarã ĩgure serẽpima.

—¿Mũ sã Jesu buherã mera majagu arĩbeari? arĩ serẽpima erã Pedrore.

—Árĩbeaa yũhũ, arĩ yũhrimi Pedro.

²⁶ Eropigu pahia tauro opu pohro majagupu Pedro ĩgu gamiro pacorodigu acaweregupu Pedrore serẽpimi:

—¿Jesure erã ñearasubu yũ arĩcũ mũ sã erã mera arĩsabũ? arĩ serẽpimi ĩgu Pedrore.

²⁷ —Yũhũ ĩgu mera arĩbirabũ, arĩ yũhrimi Pedro. ĩgu eroparĩcũ ta cãreña weregu carimi.

Jesure Pilato serẽpiñumi

Mt 27.1-2, 11-14; Mr 15.1-5; Lc 23.1-5

²⁸ Ñamiñarigã arĩcũ Caifa ya wihigue arĩnirã Jesure aĩ wiria, iri maca majarã opu Pilato ya wihigue aĩgã wama erã. Eropa waquererã ĩgu ya wihiguere ñajabirima. Pascua arĩcũ erã bamorã arĩrã õpa arĩma: “Judio masũ arĩbeamĩ Pilato. Eropirã mari i wihigue judio masũ arĩbigũ arĩri wihire ñajarã, mari dorerire tarinũgarãca. Eropirã mari ñajacũ ĩarã ñerã dopa ĩabocoma marire. Eropirã marire bosenu barire marire badorebiribocoma,” arĩma. Eropa arĩrã opu ya wihire ñajabirima Jesure aĩgãñirãpũ.

²⁹ Erã ñajabiricũ ĩagu Pilato erã pohrogue wihi disiporogue wiriranũgaja, erãre serẽpimi:

—¿Ñehenore ĩre weresãdiari mũa? arĩ serẽpimi Pilato erãre.

³⁰ —Ihĩ õagu ĩgu arĩcũ mũre ĩgure obiriboaya. Ñegu ãhrimi ĩgu, arĩ yũhrima erã.

³¹ Erã eroparĩcũ Pilato õpa arĩmi:

—Mũa basi ĩgure aĩaque. Eropirã mũa ya doreri arĩro dopa ta ĩgure dipuwaja moaque, arĩmi Pilato erãre.

—Gua judio masapu masure wejẽdoremasibeeaa, arĩma erã Pilatore. Eropa arĩrã Jesure wejẽdoremorã iima.

³² Erã eropa wejẽdorecũ Jesupu crusague ĩgu sĩriborore ero core ĩgu werediro dopa ta eropa wabũ. ³³ Erã eropa arĩra pũhrũ Pilatorũ wihigue maji ñaja, Jesure sihubeo ĩgure serẽpipũ:

—¿Judio masa erã opu ta ãhriri mũhũ? arĩ serẽpipũ.

³⁴ Jesu yũhripũ ĩgure.

—¿Mũ guñaro yũre eropa arĩ serẽpiri mũhũ? ¿O gajirã mũre erã wererare peenijagu yũre serẽpigũ iiri mũhũ? arĩpũ Jesu Pilatore.

35 —Judio masu áríbeaa yuhũ. Mu ya yeba majarã, pahia oparã sã, mure wiama yure. ¿Ñehenore ñero iiri muhũ erã eropa mure dipuwaja moadiacũ? arĩpũ Pilato.

36 —Yu opu árĩri i yeba maja áríbeaa. Yuhũ i yeba majarã opu árĩcũ, yaharã yure itamuboñuma judio masare ñeadorebirã. Yu opu árĩri i yeba maja áríbeaa, arĩpũ Jesu Pilatore.

37 —¿Eropigu opu áhraa arĩri muhũ eropa arĩgu? arĩpũ Pilato.

—Mu arĩro dopa ta opu ta áhraa. Masa opu árĩbu masa dehyoabu yuhũ. Eropigu i yebague arĩgu erã opu árĩbu aribũ. Diaye majare weregu aribũ. Árĩpehrerã diaye árĩrire peediarã yu wererire peema, arĩpũ Jesu.

38 —¿Ñeheno áhriri diaye árĩri? arĩpũ Pilato.

Judio masa Jesure wejẽdoreñuma

Mt 27.15-31; Mr 15.6-20; Lc 23.13-25

Eropa arĩtuha Pilato judio masa pohro maji dujaa wa erãre weremi:

—Íre ne gajino dipuwaja mara. ³⁹ Bojori nũcu Pascuanũ árĩcũ yujugũ peresu árĩgure mũa wiudorea. ¿Eropigu íre Jesure ta mũa opu árĩbupure mũare wiubasacuri yuhũ? arĩmi Pilato judio masare.

⁴⁰ Ígu eroparĩcũ peerã erã judio masa õpa arĩ gaguinigu-ima:

—Ígure wiubiricãque. Barrabápure guare wiubasaque, arĩ gaguiniguima judio masa Pilatore. Barrabápũ ya-jaricũgu árĩdigũ árĩpũ.

19

¹ Erã eropa arĩ gaguiniguira puhũ Pilato Jesure tãradorepũ. Eropirã ígu yarã surarapũ ígure tãrañorã.

² Tãratuha pora bero iituha, Jesure ígu dipuru weca duh-peoñorã. Duhpeotuha, oparã ya suhrirone ígure sãñorã.

³ Eropirã ígu pohro nũgaja õpa arĩñorã erã õpa arĩ wereyarã:

—Õaro arĩporo. Judio masa opu õaro arĩporo, arĩ wereya erã mojotori mera ígure pañorã.

⁴ Eropigu Pilato dipaturi waha, judio masare weremi:

—Peeque mũa. Íre ñeri dipuwaja mara. Eropigu irire mũa masiburire ígure mũa pohro aĩgãribu iiaa, arĩmi Pilato.

⁵ Ígu eropa arĩra puhũ Jesu pora berore peyadigu, oparã ya suhrironore sañadigu wihigue árĩdigũ wiririmi. Ígu wiriricũ Pilato õpa arĩmi:

—Íaque. Ihĩ ta áhrimi ígu, arĩmi Pilato.

⁶ Īḡu eropa arītuhacũ peerã pahia oparã, surara Goãmu wihi ïhadibu corerã sã Jesure ïarã gaguiniguima:

—Crusague wejẽque ĩḡure. Crusague pabia wejẽque ĩḡure, arĩ gaguiniguima erã.

—Īḡure ne ñeri dipuwaja mara. Eropirã mua basi ta ĩḡure aĩḡãque. Eropirã mua basi ta ĩḡure crusague pabia wejẽque, arĩmi Pilato erãre.

⁷ —Īḡu, ĩḡu basi “Goãmu magu ãhraa,” arĩmurami. Īḡu eropa arĩra waja gua doreripũ ĩḡure wejẽdorea, arĩma erã Pilatore.

⁸ Erã eroparĩcũ peegu ucataria Pilatorũ. ⁹ Eropigu dipaturi ĩḡu wihigue Jesure aĩ majiñajagu Jesure serẽpipũ daja:

—¿Nohogue majagu ãhriri mũhu? arĩpũ Pilato Jesure.

Īḡu eropa arĩ serẽpiquerecũ ta Jesu ĩḡure ne yũhribiripũ:

¹⁰ Īḡu yũhribiricũ ïagu Pilato ĩḡure serẽpinemopũ:

—¿Yũre yũhribeari mũhu? Yũhu mũre peresu árĩḡure wiumasia. Eropigu mũre crusague pabia wejẽdoremasia yũhu. ¿Irire masibeari mũhu? arĩpũ Pilato Jesure.

¹¹ Īḡu eroparĩcũ Jesu yũhripũ daja:

—Goãmu mũre dorebircũ ne iimasibiriboaya mũhu. Eropigu yũre ïhaturirãre wiadigupũ mu tauro ñero dipuwajacugucumi, arĩpũ Jesu Pilatore.

¹² Īḡu eroparĩcũ peegu Pilatorũ ĩḡure wiudiaripũ. Īḡu eropa wiudiaquerecũ ta dipaturi judio masapũ gaguiniguima:

—Jesu “Opũ ãhraa,” arĩḡu mari tauro opũ árĩḡure Roma majagure ïhaturigũ iimi ĩḡu. Eropigu ĩḡure wiugũ mu sã mari tauro opũ árĩḡure ïhaturigũ ãhraa, arĩ gaguiniguima judio masa Pilatore.

¹³ Erã eroparĩcũ peegu Jesure wihigue árĩḡure aĩ wiriri, ĩḡu dipuwaja moadoregu ĩḡu doari pẽro doajami Pilatorũ. Īḡu dipuwaja moadorero judio masa ya mera gabata waĩcũro empedrado waĩcũbu. ¹⁴ Irinũ Pascuanũ bosenu árĩcũ gua baburi gua amurinũ árĩbũ. Irisubu goeri boje core árĩbũ. Doajatuha Pilato masare õpa arĩ weremi:

—Ihĩ ta ãhrimi mua opũ, arĩmi ĩḡu.

¹⁵ Īḡu eroparĩcũ peerã judio masa gaguiniguima daja:

—Sĩriporo ĩḡu. Sĩriporo ĩḡu. Crusague pabia wejẽque ĩḡure, arĩ gaguiniguima erã.

—¿Mua opũ árĩquerecũ ta ĩḡure crusague pabia wejẽdiari mua? arĩmi Pilato erãre.

Īḡu eroparĩcũ õpa arĩ yũhrima pahia oparã:

—Mari árĩpehrerã tauro opũ Roma majagu ãhrimi. Gajigu opũ marimi marire, arĩ yũhrima pahia oparã.

¹⁶ Erã eropa arĩ wereniguira pũhrũ Pilato Jesure crusague pabia wejẽdoregũ wiami erãre pare.

Jesure pabia wejẽñuma erã

Mt 27.32-44; Mr 15.21-32; Lc 23.26-43

Eropirã surara Jesure aĩ wiriama. ¹⁷ Erã aĩ wiriacũ Jesupũ crusare ãgũ basi aĩ coã, dipu pero waĩcurogue ejami. Gũa judio masa ya mera Gólgota waĩcũbũ. ¹⁸ Eroque eja erã Jesure crusague pabiamã. Eropirã gajirã perã sãre yujugũ ãgũ diayepũ, gajigure ãgũ copũ pabiamã erã. Eropigũ Jesu erã deco árĩmi. ¹⁹ Pilato taboamijire goja, crusague Jesu weca pabia tuodorepũ ãgũ gojaramijire. Ōpa arĩ gojara árĩbũ: “Ihĩ Jesu Nazare majagũ, judio masa tauro opũ ãhrimi,” arĩ gojara árĩbũ irimijire. ²⁰ Irimijire gojagũ judio masa ya mera, Roma majarã ya mera, Griego ya mera gojara árĩbũ. Eropiro Jesure crusague erã pabianugudiro maca pohrogã árĩbũ. Eropirã bajarã judio masa Pilato ãgũ gojarare ãha buhema. ²¹ Eropirã pahia oparã iri buhetuhaja ōpa arĩrã wañorã Pilatore:

—“Ihĩ judio masa opũ ãhrimi,” arĩ gojabita. Gũa opũ árĩbeamĩ ãgũ. Eropigũ ōpa arĩ goja amuque mũhũ. Ihĩ “Judio masa opũ ãhraa,” arĩ yujugũ ta ãgũ basi ta eropa arĩ pepigũ ãhrimi, arĩ goja amuque, arĩñorã pahia oparã.

²² Pilatopũ yũhripũ erãre:

—Yũ gojarare ne yũ goja amusome, arĩpũ Pilato erãre.

²³ Jesure erã pabiarã pũhrũ wapicũrã surarapũ Jesu suhri mũrãre erã basi game gueremorã iima. Erã eropa guerediaquerecũ ta ãgũ suhriro yoari suhriro dohori mariri suhriro árĩbũ. Iri suhriro suara suhriro árĩbũ. ²⁴ Iri suhriro eropa árĩcũ ãarã ōpa arĩma erã basi:

—Iñe suhrirore yeguesiribiricãrã. Yujugũ dihta aĩporo. Eropirã ãne suhriro aĩbure masimorã deabirãrã mari, arĩma erã basi.

Eropa deabirãrã Goãmũ yare erã gojarapũ erã gojadiro dopa ta eropa iirã iima erã. “Yũ suhrirore erã basi guerema. Eropirã yaha suhrirore aĩbure masidiarã deabirãma erã,” arĩ gojañuma Goãmũ yare erã gojarapũgue. Erã gojadiro dopa ta eropa iima erã.

²⁵ Jesu pago, Jesu bũamo María Cleofa marapo, María Magdalena mera Jesu crusa pohrogã ãha niguima. ²⁶ Eropigũ ãgũ pago, yũhũ ãgũ mahigũ sã ãgũ pohrogã gũa niguicũ ãagũ ãgũ pagore yãre weremi:

—Dohpaguere ihĩ mũ magũ árĩbu ãhrimi, arĩmi Jesu ãgũ pagore.

²⁷ Eropa arĩtuha yãre ōpa arĩ weremi ãgũ:

—Dohpaguere igo mũ pago árĩbo ãhrimo, arĩmi Jesu yãre.

Īḡu eropa arīra pūhrū Jesu pagore yaha wihigue aī opamuribū.

Jesu sīria wañumi

Mt 27.45-56; Mr 15.33-41; Lc 23.44-49

²⁸ Īḡu eropa arī werera pūhrū árīpehreri Goāmū ĭḡure mohmedoreḡu ĭḡu apirare iipehogu árīḡu masipū Jesu. Eropa masiḡu Goāmū yare erā gojarapū iribojegue erā arī wereyudiro dopa ta ōpa arīmi Jesu:

—Ñemesibuca yure, arīmi Jesu.

²⁹ Ero vino sūiri deco dicuri sorobu ero doabū. Eropirā ero árīrā Jesu eroparīcū pee mimi aīri yasure deco mera erā yosora yasure yucugū hisopo waīcudigū ojogoro dirituma. Eropirā aī muju Jesu disiro sītuma. ³⁰ Iri decore Jesu mimituha ōpa arīmi:

—Iripēta árīca, arīḡu ta ĭḡu dipurure muhmusiudija sīria wami.

Yujugū surara Jesu patore gubuye gohra ñoseñumi ñoserimiji mera

³¹ Irinū Pascua bosenu core árībū. Iri bosenu gūa baburire gūa amurinū árībū. Eropirā gajinū Sabado árīcū iri ōari bosenu árīcū crusarigue sīrinirāre judio masa apidiabirima. Irinū ta bosenu gūa judio masa bosenu wūari bosenu árīro iibū. Eropirā erā sīrinirā mura irinū crusarigue árīcū gamebirima. Eropirā pabianirā murare erā ñigagū gōarire panuadorerā judio masa serēñorā Pilatore erāre sīri purumjudorerā. Erā eropa iira pūhrū erā dūpū murare aīdijumorā iima. ³² Erā eropa dorecū surarapū crusari pohrogue eja, yajaricugure copū árīḡu ñigagure panuama: Gajipū árīḡu sāre eropa ta iima erā. ³³ Eropa iiquererā Jesu ñigagure panuabonirā ĭḡu pohro eja ĭḡu sīridigū árīcū ĭha panuabirima.

³⁴ Eropa panuabirā yujugū surara ĭḡu patore gohra gubuye ĭḡure ñosemi. Īḡu eropa ñosecū mata ĭḡu di, deco mera wiribū. ³⁵ Īḡu eropa wacū ĭabū yūhū. Yūhū ipūre gojagū diaye mūare werea. Diaye yū wereri árīcū masia yūhū. Mūare irire werea mūa sā Jesure mūa umupeoburire. ³⁶ Goāmū yare erā gojarapū werediro dopa ta eropa wabū. “Īḡu gōare ne yuju gōare panuabirima,” erā arī gojadiro dopa ta Jesu ñigagū gōare ne yuju gōa panuabirima. ³⁷ Eropiro gajipū sā Goāmū yare erā ōpa arī gojayudiro dopa ta wabū: “Īḡure erā ñosedigū murare ĭarācoma erā,” erā arī gojadiro dopa ta gūa Jesure erā ñosedigū murare ĭabū.

Jesu dũpũre masa gobegue yaañuma

Mt 27.57-61; Mr 15.42-47; Lc 23.50-56

³⁸ Īgu sīrira pũhrũ José Arimatea majagu Jesu dũpũ mũrarore aĩ dijubu Pilatore serēgu ejapu. Josēpu gajirã judio masare güigũ, Jesure umupeogu ĩgu árĩrire werebiridigu árĩmi. Eropigu ĩgu dũpũ mũrarore ĩgu serēra pũhrũ Pilatorũ ĩgu dũpũre aĩdorepu. Īgu aĩdorecũ José crusa pohro eraa Jesu dũpũ mũrarore aĩgã wami. ³⁹ Nicodemo sã ĩgu poresurire mohmorerare treinta kilo nũcũrire aĩgãrimi Jesu dũpũ ĩgu amuburire. Yucũgu di pohga, mirra waĩcũri poresuri, yucũgu pohga mera árĩyoro ĩgu mohmorera. Īgu Jesu mera ñami weretamudigu árĩmi. ⁴⁰ Eropirã erã perã Jesu dũpũ mũrarore aĩma. Judio masa sīrinirãre yaaro dopa ta ĩgu dũpũ mũrarore poresuri sũra pũhrũ suhri gasiri mera omama. ⁴¹ Crusague Jesure erã pabia wejēdiro pohro pohe árĩbu. Iri pohegue masa gobe utãyegue erã seara gobe árĩbu. Iri gobere ne yujugu sīridigũre cóañibirima dohpa. ⁴² Pascuanũ bosenu maja gua judio masa baburire amurinũ árĩbu. Eropirã iri gobe pohrogã crusa árĩcũ ero apima erã Jesu dũpũ mũrarore.

20

Jesu masa mũriañumi

Mt 28.1-10; Mr 16.1-8; Lc 24.1-12

¹ Domingo ñamiñarigã árĩcũ, boyoboro coregã María Magdalena Jesu masa gobegue ejapo. Erogue ejago iri gobere erã biharayere gajipu tunuguraye árĩcũ ĩapo igo. ² Eropa ĩadigo árĩgo gua pohrogue omagãrimo igo. Simo Pedro mera perã árĩbu gua. Eraa õpa arĩ weremo guare igo.

—Mari Opu dũpũ mũrarore aĩcãnirã ãhrama. Eropirã ĩgũre erã apidirore mari masibeaa, arĩmo igo guare.

³ Igo eroparĩcũ peerã, yũhũ Pedro mera gua perã masa gobegue ĩarã wabũ gua. ⁴ Eropa ĩarã warã gua perã omagãabũ. Eropa omarã, yũhũ Pedrore omatarigãgu masa gobegue ejamũtabũ. ⁵ Erogue ejagu muhmumereja ĩha acubũ iri gobere. Eropa ĩha acugũ ĩgũre erã omara gasiro seyarore ĩabũ. Eropigu iri gobere ñajabiribũ. ⁶ Yũ eropa ĩara pũhrũgue Simo Pedro sã erami. Eraa masa gobegue ñajaa, ĩgu dũpũ mũrarore erã omara suhri gasirire ĩami ĩgu. ⁷ Eropigu Jesu dipurure erã omara gasiro sãre ĩami daja. Iri gasiro boje oyaro, yeguera gasiro árĩbu. ⁸ Eropigu yũ sã masa gobegue ñajabũ. Jesu ĩgu maricũ ĩagu “Diaye ta Jesu masa mũriañumi,” arĩ pepibũ yũhũ. ⁹ Iri gobegue gua waboro core Goãmũ yare erã gojarapũ Cristo sīriburire erã

wererare ðaro gũa masinibiribũ. Dohpaguepure iri gobere yũ ãara pũhrũ, “Diaye ta Jesu masa mũriañumi,” arĩ pepibũ yũhũ. ¹⁰ Eropa ãatuhajarã gũa wihigue dujaa wabũ.

Jesu María Magdalenare dehyoañumi

Mr 16.9-11

¹¹ Eropi masa gobe disiporo María niguigo ore niguipo. Eropa orequerego ta muhmumereja igo ãhame acupo masa gobere. ¹² Eropa ãhame acugo perã anyuare boreri suhricũrãre Jesu ãgũ oyadiro mũrarogue erã doacũ ãapo igo. Yujugũ ãgũ dipuru oyadiro doapũ. Gajigũ ãgũ guburi oyadiro doapũ. ¹³ Erãre igo ãacũ erãpũ igore serẽpiñorã:

—Nomeo, ¿dohpa árironore orego iiri mũhũ? arĩñorã erã.

—Yũ Opũ dũpũ mũrarore aĩcãnirã ãhrama. Eropigo erã apidirore masibea yũhũ, arĩpo igo.

¹⁴ Eropa arĩtuha, majinũgaja nijago Jesure ero niguigure ãapo igo. Eropa ãaquerego ta Jesure ãha masibiripo igo.

¹⁵ —Nomeo, ¿dohpa árirono orego iiri mũhũ? ¿Noare amago iiri mũhũ? arĩpũ Jesu igore.

“Íhĩ i pohere ãhadibugũ ãhrimi,” arĩ pepiripo igo Jesure. Eropa arĩ pepigo õpa arĩpo igo:

—Mũhũ ãgũ dũpũ mũrarore aĩdigũ árĩgũ wereque mũ apidirore yũre. Mũ werera pũhrũ aĩgora ãgũ dũpũ mũrarore, arĩpo igo ãgũre.

¹⁶ Igo eropa arĩra pũhrũ Jesu õpa arĩpũ:

—María, arĩpũ.

Ígũ eropa piyucũ peego, majiñabeo igo Hebreo ya mera õpa arĩpo:

—Rabuni, arĩpo igo Jesure. Rabuni, erã ya mera arĩrã “Buhegũ,” arĩma.

¹⁷ Jesu arĩpũ:

—Yũ Pagũ pohrogue mũrianibea dohpa yũhũ. Yũ eropa mũrianibiricũ yũre mohpiñabiricãque. Eropigo gajirã yaharã pohrogue waque. Erã pohrogue ejago õpa arĩ wereque: “Jesu õpa arĩdoremi mũare: ‘Yũ Pagũ pohrogue wabu ãiaa. Mũa Pagũ sã ãhrimi ãgũ. Goãmũ pohrogue wabu ãiaa. Mũa yagũ Goãmũ sã ãhrimi ãgũ,’ arãmi Jesu,” arĩ wereque erãre, arĩpũ Jesu Marĩare.

¹⁸ Ígũ eropa arĩra pũhrũ Marĩa Magdalena gũare Jesu buherã pohrogue eraa weremo gũare:

—Mari Opũre ãabũ yũhũ, arĩ Jesu igore gũare weredorerare weremo igo.

Jesu ãgũ buherãre dehyoañumi

Mt 28.16-20; Mr 16.14-18; Lc 24.36-49

19 Irinu soorinu ñamicague gúa Jesu buherã gúa acawer-erãre judio masare güirã, gúa ya wihigue biha ñaja doabu gúa. Gúa eropa doacũ Jesu gúa watope dehyoanugaja õpa arĩmi:

—¿Ähriri mua? arĩmi.

20 Eropa arĩtuha ïgu mojotorire, ïgu patore sãre guare ïhmúmi. Eropirã gúa ïgure gúa opure masa mæriadigure ïarã mucubiribu. 21 Dipaturi Jesu guare õpa arĩmi daja:

—Õaro árĩque mua. Yu Pagu ïgu yure obeodiro dopa ta yu sã muare obeoa, arĩmi guare.

22 Eropa arĩtuhaja guare ïgu purisãmi. Eropa purisãgu Espiritu Santore gúa ñeaburire ïhmugu iimi. ïmutuhaja õpa arĩmi:

—Dohpaguere Espiritu Santore ñeaque mua mua mera árĩbure. 23 Masa erã ñeri dipuwajare bujawerecũ ïarã, “Mua ñero iirare cohãa,” arĩmasia mua erãre. Erã bujawerebicũ ïarã, “Mua ñeri iirare cóãbiribu,” arĩmasia mua, arĩmi Jesu guare ïgu buherãre.

Jesure masa mæriadigure Toma ïañumi

24 Jesu gúa watope ïgu dehyoacũ Toma sãhruadigu erã arĩgu gúa mera marimi irisubure. 25 ïgu eropa maricũ gúa ïgu mera majarã ïgure werebu.

—Mari Opure gúa ïabu, arĩ wereribu gúa ïgure.

Gúa eropa arĩ werequerecũ ta õpa arĩmi Toma:

—Ïgu mojotorire erã pabiara guberire ïabigu iri guberire yu mujusĩru mera puñabigu “Diaye ta masa mæriañumi,” ne arĩsome. Eropigu ïgu patore gubuye árĩri gobere yu mojoto mera sĩ acubigu, “Diaye ta masa mæriañumi,” ne arĩsome yuhũ ïgure, arĩmi Toma.

26 Yuju semana puhru gúa ïgu buherã gúa ya wihigue árĩbu. Irisubure Toma gúa mera arĩmi. Iri wihi bihara wihi árĩbu. Bihara wihi árĩquerecũ ta Jesu ñaja, gúa watope dehyoanugaja õpa arĩmi:

—¿Ähriri mua? arĩmi.

27 Eropa arĩtuha ïgu Tomare weremi:

—Ïaque yu mojotorire. Eropi mu mujusĩru mera yu mojotorire erã pabiara guberire puñaque. Eropigu mu mojoto mera yu patore gubuye árĩri gobere sĩ acuñaque. “Diaye árĩbeaa,” arĩbiricãque. “Diaye ta ähraa,” arĩque muhũ, arĩmi Jesu Tomare.

28 ïgu eropa arĩra puhru Toma yãhrimi:

—Muhũ yu Opu ähraa. Muhũ yahagu Goãmu ähraa, arĩmi Toma Jesure pare.

29 —Yure mu ïara puhru yure “Diaye ta ahraa,” arãa. Gajirãpu yure ïabiriquererã ta “Diaye ta ahraa,” arï umupeorãcoma. Eropirã erã turaro mucubirirã arïrãcoma, arïmi Jesu Tomare.

Jesure masa erã masiburire ipüre gojañumi Ñu

30 Eropigü baja gajï sãre Goãmü ïgü turari mera ii ïhmümi Jesu gúa mera arïgü. Irire ïgü iirare ipüre gojapehobirabü yuhü. 31 Eropa gojapehobiriqueregü ta ipü yu wererare gojagü, “Jesu ta Cristo Goãmü ïgü obeodigü ahrimi. ïgü diaye ta Goãmü magü ahrimi,” müa arï masiburire gojabü. Eropirã müa ïgüre umupeorã Goãmü mera müa eropa arïniguiburire gojabü ipüre.

21

Jesu siete ïgü buherãre dehyoañumi

1 Puhru Tiberia waïcari dïtaru turo dipaturi guare ïgü buherãre dehyoami daja. Guare dehyoagu õpa iimi ïgü daja. 2 Simo Pedro, Toma suhrüadigü erã arïgü, Natanae Galilea yeba arïri maca Canã waïcari maca majagü, gúa perã Zebedeo porã, gajirã sã perã gúa oã nücu gamenere arïbü.

3 Gúa eropa gamenerera puhru Simo Pedro õpa arïmi:

—Wai wejëgü wagu iiaa, arïmi ïgü.

—Gúa sã mü mera warãra, arïbü gúa ïgüre.

Eropa arïtuha buha wabü. Eropirã dohodiru mera wabü. Iri ñamire gúa õaro boyotahmuquererã ne yujugü waimüre wejëbircarabü. 4 Boyodiji merejacü Jesu imiporo ïgü niguicü ïarïbü gúa. Eropa ïaquererã ïgüre ïha masibiricarabü gúa. 5 Eropigü guare õpa arï serëpimi:

—Ne, ¿wai wejëari müa? arïmi Jesu.

—Ne wejëbirabü, arï yuhribü gúa.

6 —Dohodiru diayepü wejëdire mehyuque. Iripü mehyurã wai wejërãca, arïbeo niguimi guare. ïgü eroparïcü peerã ïgü arïdiro dopa ta mehyübü. Gúa mehyura puhru bajarã wai ñajama. Bajarã wai ñajacü ïarã wejëdigüre dohodirugue aïsã turabircarabü gúa. 7 Eropigü yuhü Jesu ïgü mahigü Pedrore werebü:

—Mari Opü ahrimi sihï imiporo niguigü, arïbü Pedrore.

Yu eroparïcü Jesu ïgü arïcü masigü, Simo Pedro ïgü suhrirore sañami. Wai wejëbü ïgü suhrirore tuweadigü arïmi. ïgü suhrirore sañatuha diague yuriñajami. 8 Eropirã gajirã gúa buherã dohodirugue arïbü. Cien metro yoaro diaguere payabü gúa. Eropirã wejëdigüre wai bajarã ñajadigüre dohodiru mera taramajaabü gúa. 9 Turogue

tuhajarã pea niti dihta gose oyari peame weca waire ïgu mupunugupidigure ïabu gua. Panru sãre ïabu gua.

¹⁰ Gua eropa ïacũ Jesu guare õpa arĩmi:

—Dohparagã mua wejẽnirãre bajamerãgã aïgãrique, arĩmi guare.

¹¹ ïgu eroparĩcũ Simo Pedro Jesu mera árĩgu ïgu sã dohodirugue ñaja, wejẽdire tara majaami imiporogue. Pagarã wai ñajanirã ciento cincuenta y tres wai árĩma. Bajarã wai ñajaquererã wejẽdire ne yehguebirima.

¹² —Banirã arique, arĩmi Jesu guare.

—¿Noano áhriri mũhu? arĩ serẽpiñabiribu gua ïgure. Gua Opu ïgu árĩcũ masibu gua. ¹³ Eropigu Jesu peame pohrogue eja, panre aï guare gueremi. Wai sãre gueremi.

¹⁴ Eropigu Jesu ïgu masa mũriara pũhrũ imiporo dehyoagu uhresubu guare ïgu buherãre dehyoagu iimi.

Jesu Simo Pedro mera weretamuñumi

¹⁵ Gua bara pũhrũ Jesu Simo Pedrore serẽpimi:

—Simo, Jona magu, ¿õãre mũ mahiro tauro yũre mahiri mũhu? arĩmi Simo Pedrore.

—Opu, mũre mahia yũhu. Mũre yũ mahirire masia mũhu, arĩ yũhrimi Simo Pedro.

Jesu arĩmi:

—Eropigu ovejagãre mari ejodiro dopa ta yaharãre buheque mũhu, arĩmi Jesu.

¹⁶ Eropa arĩtuha dipaturi ïgu Simo Pedrore serẽpimi daja:

—Simo, Jona magu, ¿yũre mahiri mũhu? arĩmi Jesu.

—Opu, mũre mahia yũhu. Mũre yũ mahicũ masia mũhu, arĩ yũhrimi Simo Pedro.

Jesu arĩmi daja:

—Ovejare ïhadibugũ ovejare ïgu õaro ïhadiburo dopa ta yaharãre õaro ïhadibuque, arĩmi Jesu Pedrore.

¹⁷ Eropa arĩtuha dipaturi Simo Pedrore serẽpimi:

—Simo, Jona magu, ¿diaye ta yũre mahiri mũhu? arĩmi Jesu daja.

Uhresubu ïgu eropa serẽpicũ peegu Simo Pedro turaro bujoweremi.

—Opu, mũhu masipehoa. Mũre yũ mahicũ masia mũhu, arĩmi Simo Pedro.

—Ovejare mari ejodiro dopa ta yaharãre buheque mũhu.

¹⁸ Diaye mũre arĩgu iiaa. Mũhu mamũ árĩgu mũ suhrire saña, mũ gamerogue curimuribu mũhu. Eropa arĩdi arĩqueregũ ta pũhrũ mũhu bugũ árĩcũ, mũ mojotorire síbeocũ gajigu mũre mũ suhrire sãgucumi. Eropigu mũ wadiabirogue mũre aïgãgucumi, arĩmi Jesu Simo Pedrore.

19 Eropa arĩgũ Simo Pedro dohpa wa ĩgũ sĩriborore wereyugũ iimi. Eropigũ Simo Pedro sĩrigũ Goãmũre, “Ōagũ, turagũ āhraa,” masa erã arĩcũ ĩgũ iiborore wereyugũ iimi. Eropigũ Pedro mera weretamutuhagũ ōpa arĩmi Jesu ĩgũre:

—Diaye ta yũ buhediro dopa iique mũhũ, arĩmi Jesu Pedrore.

Jesu ĩgũ mahigũ ipũre gojadigũ árĩmi

20 ĩgũ eroparĩcũ Pedropũ yũre Jesu ĩgũ mahigũre erãre yũ nũrusiacũ ĩami ĩgũ. Yũpũ ĩgũ ĩagũpũ ero core Jesu pohrogã badoagũ ĩgũre ōpa arĩdigũ árĩbũ. “Opũ, ¿mũre ĩhaturĩrãre wiabupũ nihino arĩcuri ĩgũ?” arĩ Jesure serẽpidi árĩbũ yũpũ. Eropa yũre ĩagũ Pedro serẽpimi Jesure:

21 —Opũ, ¿ĩhĩ Ñupũ dohpa wagũcuri? arĩ serẽpimi:

22 —Ire mũre werebeaa. I yebaguere yũ dujariboro core ĩgũre árĩniguicũ yũ iicũ irire masibea mũhũ. Eropigũ ĩgũ waborore guñabita mũhũ. Diaye ta yũ buhediro dopa iique mũpũ, arĩmi Jesu Pedrore.

23 Irire ĩgũ yũre Ñure wererare peerã árĩpehrerã Jesu yarã weresiririma. Irire weresirirã ōpa arĩrima erã: “Jesu ĩgũ mahigũ buhegũ sĩrisome,” arĩ weresiririma yũre Jesu yarã erã basi. Erã eropa arĩquerecũ ta “Ĩgũ sĩrisome,” arĩgũ iibirimi Jesu. “I yebaguere yũ dujaricũ ĩgũre árĩniguicũ yũ iicũ irire masibea mũpũ,” arĩmi Jesu Pedrore.

24 Jesu buhegũ ire weregũ, ipũre gojagũ āhraa yũhũ. Eropirã i wereri diaye ta arĩcũ masia mari.

25 Baja gaji sãre Jesu iimi. ĩgũ iirare mari gojapehocũ iripũri gojarapũri baja tariari pũri waboya. Eropiro iripũrire mari dibucũ sihabiriboya i yeba. Ujuturia waboya yũ pepicũ. Iripẽta āhraa.

Jesu buhedore ĩġu apinirã erã iirare wereripũ ãhraa

—*Espíritu Santo arigucumi, arĩnumi Jesucristo ĩġu buherãre*

¹⁻² Teófilo, ero core yu gojamũhtarapũ mera Jesu ĩġu iirare, ĩġu buherare mure weretuhabu. Te umarogue ĩġu mũriarare weretubu. Jesu ĩġu mũriaboro core ĩġu Espíritu Santo turari mera dorepũ ĩġu apinirãre. Erã ĩġu beyenirã árĩnorã. ³ Eropi Jesu ĩġu crusague ĩġu sĩrira pũhrũ yujuyerisuburi dũpũcũġu dehyoapũ ĩġu apinirãre. Cuarenta nũri pũhrũ dehyoatupũ. Eropigũ ĩġu ĩġu basi ojocarigũ árĩrire ĩhmupũ erãre. Eropa dehyoagũ Goãmũ mari Pagũ ĩġu opũ árĩrire õari buherire werepũ erãre.

⁴ Gajisubu Jesu ĩġu apinirã mera árĩġu õpa arĩ erãre werepũ:

—Jerusalén ta árĩnique dohpa. “Espíritu Santore mure obeogũra,” yu Pagũ ĩġu arĩdigũre corenique. Irire ĩġu eropa arĩrare mure wereabu yũhũ. ⁵ Nũ mure waĩyegu deco mera mure waĩyemi. Yũpũ ĩġu iira tauro iĩgũra mure. Espíritu Santo mũa mera ĩġu árĩniguicãcũ iĩgũra mure, arĩpũ Jesu.

Jesu umarogue mũriara

⁶ Eropi gajisubu utãġugue Olivo waĩcũdigũgue Jesu erãre dehyoacũ erã serẽpiĩorã ĩġure:

—Opũ, ĩi Israe yebare mari ya yebare dohpãrĩcũ ġuare dipaturi doreburire apibocuri mũhũ ġuare? ĩDohpãrĩcũ mari acawererã gohrare opũ acugũcuri mũhũ? arĩnorã ĩġure. ⁷ Erã eroparĩcũ peegu Jesu õpa arĩpũ:

—Mari Pagũ dihta irinũrire mũa ya yebare mũa õaro árĩborore apimasimi. Irinũrire mure masiya mara. ⁸ Eropirã mure Espíritu Santo ĩġu eracũ Goãmũ ya turarire oparãca mũa. Iri turarire mũa oparã Jerusalén majarãre, árĩpehrerã Judea majarãre, Samaria majarãre, árĩpehreri yeba majarãre õari buherire buherãca mũa yaha árĩburire. Yu sĩrirare, yu masa mũriarare erãre buherãca mũa, arĩ werepũ Jesu erãre.

⁹ Eropa arĩ weretuhaja, Jesu umarogue mũria wapũ. Erã ĩġure erã ĩhanũrũsia mujucũ imica cururi pohecague ñaja dedere mũria wapũ. ¹⁰ Eropirã erã Jesu ĩġu mũriagũre erã ĩhanũrũsia mujurisubu perã anyua boreri suhricũrã Jesu

ĩḡu apinirã pohro dehyoanũgajañorã. ¹¹ Eropirã erãre õpa arĩñorã:

—Mũa Galilea majarã, ¿duhpirã ãhamuju niguirã iiri mũa? Ihĩ Jesu umarogue mũriagu, ĩḡu mũriadiro dopa ta dipaturi arigũcumi daja, arĩ wereñorã anyua.

Jesu ĩḡu apinirã Judare gohrotobure beyeñorã

¹² Eropiira pũhrũ Jesu yarã utãḡugue Olivo waĩcũdigugue árĩnirã dijari, Jerusalẽngue dujajañorã. Irigũ utãḡu yuju kilómetro wecañari Jerusalén ejaboro pohro árĩyoro.

¹³ Dujaja erã umarogue erã árĩri taribugue mũria wañorã. Oã árĩñorã erã: Pedro, Ñu, Santiago, Andre, Felipe, Toma, Bartolomé, Mateo, Santiago, Simo, Juda árĩñorã. Santiagopũ Alfeo magũ árĩpũ. Simopũ celote waĩcũri curu majagũ árĩpũ. Judapũ Santiago acaweregũ árĩpũ. ¹⁴ Eropirã bajasuburi oã árĩpehrerã, nome mera, María Jesu pago mera, Jesu pagũ porã mera õaro gamenere, turaro mera Goãmũre mari Pagũre serẽmũriñorã.

¹⁵ Eropi irinũrire masa bajarã ciento veinte ejaboro gohra gamenereñorã. Eropigũ Pedropũ ĩḡu mera majarã Cristo yarã watope nũgaja, werepũ erãre.

¹⁶ —Yũ acawererã, Goãmũ iribojegue ĩḡu arĩdiro dopa ta eropa wahaa. Irire Espĩritu Santo Davire weredoreñumi Juda mũrũ eropa warare. Juda Jesure ñeha wejẽmorãre ĩhmudi árĩmi. ¹⁷ Juda mũrũ mari mera Jesu yare ii, gũa mera majagũ ta árĩrimi. ¹⁸ Judapũ ĩḡu Jesure ĩhmura wajare iri niyerure ĩḡu wiara pũhrũ ĩḡu basi wejẽ sĩripũ. Eropigũ yuhridija wa, ĩḡu gũramisida yehguea sĩria wapũ. ĩḡu wiara niyeru mũra mera gajirã merogã yebare asũñorã.

¹⁹ Eropirã árĩpehrerã ohõ Jerusalén majarã masipehrecãma Juda mũrũ ĩḡu ñero warare. Eropa masirã ĩḡu niyeru mera erã asũra yebare Acældama di cóãri yeba waĩcũa, arĩma iri yebare. ²⁰ Iribojegue erã arĩ gojadiro dopa ta eropa wahãmi Juda mũrũ. Salmo waĩcũripũgue õpa arĩ gojañuma:

Ĩḡu árĩdirore cóãdiro árĩporo. Eropirã gajirã ĩḡu árĩdirore árĩbircãporo, arĩ gojañuma.

Ohõ sãre õpa arĩ gojañuma:

Gajigũ ĩḡu mohmerare gohrotogũ árĩḡũcumi, arĩ gojañuma Salmogue, arĩpũ Pedro.

²¹⁻²² “Eropirã mari yujugũ beyerã Juda mũrũre gohrotobure. Ñu waĩyegũ ĩḡu masare buherasubu árĩdigũre, Jesu mera mari mera árĩdigũre beyero gahmea mari mera majagũ árĩbure. Jesu masa mũriacũ sãre ĩadigũre beyero gahmea. Eropa beyera pũhrũ Jesu ĩḡu masa mũriarare mari mera buheḡũcumi, arĩ werepũ Pedro ĩḡu acawererãre

Cristo yaräre. ²³ Īḡu eroparĩcũ peerã perãre beyedoboñorã erã. Yujugũ José Justo waĩcũḡure beyeñorã. Īḡu Barsabá erã arĩ piyugũ árĩpũ. Eropirã gajigũre Matia waĩcũḡure beyeñorã. ²⁴⁻²⁵ Erã perãre beyedobotuhaja, erãre Goãmũre õpa arĩ serẽñorã:

—Mũhu ḡua Opũ árĩpehrerã masa erã pepirire masia. Oã àhrima ḡua perã beyerã. Juda mũrũre gohrotobure nihi mũ gameḡure beyeque. Juda mũrũ Jesure cóadigũ peameḡue wadigũ árĩmi. Eropigũ ĩḡure gohrotogũ Jesu ĩḡu apidigũ árĩḡucumi. Eropigũ ḡua mera õari buherire buheḡucumi, arĩñorã erã Goãmũre.

²⁶ Eropa arĩrã ta utã mera deamũriñorã beyemorã. Matia yañe õaro wiricũ, Matiapũ Jesu ĩḡu apinirã once apinirã mera majagũ dujapũ.

2

Espíritu Santo ĩḡu yarã mera árĩnũḡapũ

¹ Eropii Pentecoste waĩcũrinũ árĩũ erã yujuro mera árĩpehrerã yuju wihi gamenereñorã. ² Irisubure ta miruñe burigã ariro dopa ta umarogue busũro cariyoro. Ero eropa busũro caricũ peeñorã árĩpehrerã iri wihigũe gamenere árĩrã. ³ Eropiro peame porãrigã dopa bejari erã árĩpehrerã dipu wecare dehyoayoro. Iri peame porãrigã nediru dopa bejari dehyoayoro. ⁴ Eropigũ Espíritu Santo erapũ erãre ĩḡu turarire ogũ arigũ. Eropirã Espíritu Santo erãre ĩḡu itamuropẽ erãpũ gajirã yare õaro wereniguinũḡañorã.

⁵ Irinũrire Jerusalén bajarã judio masa eranirã árĩñorã. Goãmũre umupeorã erarã árĩñorã. Erã macari nũcu majarã árĩñorã. ⁶ Eropirã umarogue busucũ peerã masa bajarã Jesu buherã pohrogue gamenere wahḡañorã. Masa nũcu yare Jesu buherã erã wereniguicũ peeñorã. Erã eropa wereniguicũ peerã, erã pee uca wañorã.

⁷⁻⁸ —Yaho, ¿Duhpirã oã Galilea majarã árĩquererã õaro mari yare wereniguiri? Erã mari masa dehyoadirogue árĩnirã iro dopa ta wereniguirã iima, arĩñorã erãpũ.

⁹⁻¹⁰ Árĩpehrerã mari yare dohpaguere wereniguirã iima. Partia majarã, Media majarã, Èlam majarã, Mesopotamia majarã, Judea majarã, Capadocia majarã, Ponto majarã, Asia majarã, Frigia majarã, Panfilia majarã, Egipto majarã, Africa majarã, Cirene majarã, Romague arirã àhraa mari. Yujurãyeri judio masa àhraa mari. Gajirã judio masa árĩbirã judio masa ya buheripũre buherãḡue àhraa mari. ¹¹ Creta majarã Arabia majarã sã mari mera àhrima. Eropirã oã mari yare erã wereniguicũ peea mari. Erã mari

ya mera Goãmũ turari mera ïgũ ðaro iirare wererã iima, arĩ wereniguiñorã masa erã basi.

¹² Erã eropa arĩrã ƣca wañorã. Erã ïarare erã peerare ðaro masibiriñorã.

—¿Dohpárirono oã gajirã ya mera Goãmũ yare eropa ðaro wereniguiuri mũa pepicũ? arĩ game serẽpiñorã erã erã basi.

¹³ Eropirã gajirã wereyañorã.

—¿Dohpa oã siburi ihrinijarã mererã iiri? arĩ wereyañorã gajirã erã basi.

Pedro masare werepũ

¹⁴ Eropigũ Pedro once Jesu ïgũ apinirã mera wahgãnũgaja, masare werepũ:

—Mũa Judea majarã, árĩpehrerã Jerusaléngue árĩrã, ire yũ werecũ ðaro peeque mũa. ¹⁵ Mũa pepiri diaye árĩbeaa. Dohpagueere nueve ãhraa. Ƥmũgue ãhraa. Eropirã oã merebeama. ¹⁶ Oã Goãmũ iribojegue ïgũ werediro dopa ta iirã iima. Irire Joere Goãmũ ya weremãhtadigũre ïre weredoreñumi Goãmũpũ.

¹⁷ Ojogorocũrinũ árĩcũ ðpa árĩroca: Yũhũ Espĩriture masare árĩpehrerãre obeogũra. Eropirã mũa porã Goãmũ yare wererãcoma. Eropirã mũa mera majarã mamarã Goãmũ deyoro moarire ïarãcoma. Eropirã mũa mera majarã mũrãpũ quẽrire quẽrãcoma. ¹⁸ Eropigũ yũ pohro majarãre yũ Espĩriture obeogũra. Eropirã erã yahare wererãcoma. ¹⁹ Eropigũ yũ turari mera iigũca ƣmũsigue. Yebague sãre yũ turari mera irire ïhmũgũca. Eropigũ di mera, peame mera, imica mera ïhmũgũca yũ turarire. ²⁰ Yũ eropiicũ abe ƣmũ majagũ naitã wagũcumi. Ñami majagũ abe diagũ gũhyaro wagũcumi. Òpa waroca Cristo mũa opũ ïgũ dujariburinũ, yũ arĩranũ core. Irinũ ïha ƣca warãca mũa. Eropiro irinũ gũhyarinũ árĩroca. ²¹ Eropiro ðpa árĩroca: Árĩpehrerã masa Cristore erã ñerire cóãdore serẽnirãre ïgũ erãre peamegue wabonirãre taugũcumi Goãmũ, arĩ gojañumi Joe, arĩpũ Pedro masare.

²² “Mũa Israe masa yũhũ werecũ peeque, arĩpũ daja. Jesu Nazare majagũpũ Goãmũ ïgũ obeodigũ árĩmi. Jesure “Goãmũ obeodigũ ãhrimi,” masa erã arĩ masiboro dopa Jesu Goãmũ turari mera deyoro moarire masare ii ïhmucũ iidi árĩmi Goãmũ Jesure. Mũa irire masia. ²³ Mũa Jesure wejẽdorecũ Goãmũ iribojegue ïgũ “Eropa waroca,” ïgũ arĩdiro dopa ta eropa wahabũ. Eropirã mũa Jesure crusague wejẽdorerã wiabũ ïgũre masa ñerãre.

²⁴ Goãmũpũ Jesu sĩridigũre masuami. Eropigũ dipaturi ne

sĩrisome ĩġu. ĩġu sĩri wajabeami. Eropa ojocarinigucĩbu ģhrimi. ²⁵ Őpa arĩĩnumi Davi iribojegue majagũ Cristo ĩġu arĩbodirop dopa ta:

Yũ Opũ, yũ mera ģhraa mũhũ. Őmũri nũcu Goĩmũ yũ Opũ yũ pohro mũhũ ģrĩcũ ĩamũrabũ yũhũ ġũibiriboro dopa. ²⁶⁻²⁷ Mũhũ Goĩmũ yũ sĩporĩre sĩrinirĩ erĩ ģrĩroguere ne cĩĩsome. Yũre mũ mahigure ñerogue yũ sĩporĩre cĩĩsome mũhũ. Yũhũ mũ pohro majagũ mũre umupeogu ģhraa. Yũ dũpũre boadoresome mũhũ. Eropĩġũ bũrigĩ mucubiria. Mucubiriri mera werenigũia. Eropĩġũ mũre Goĩmũre bũrigĩ umupeogu ģrĩġũ ġũiro mariro ōaro ģrĩcĩa. ²⁸ Yũre dipaturĩ ojocarĩcũ ĩĩġuca mũhũ. Yũ mera mũhũ ģrĩcũ bũrigĩ mucubiria, arĩ ġoġaĩnumi Davi Cristo ĩġũ arĩbodirop dopa ta, arĩpũ Pedro.

²⁹ “Acawererĩ, ōpa ōaro wereġũra mũare Davire mari acawereġũ mũrũre, iribojegue majagũre, arĩnemopũ daja Pedro. ĩġũ Davi sĩria waĩnumi. Eropĩġũ ĩġũre erĩ yaara ġobe dohpaguere ģrĩnia. Eropĩġũ “Yũ dũpũre boadoresome mũhũ,” arĩ ġoġagũ ĩġũ basi waĩpeo wereġũ ĩibiriĩnumi. ³⁰⁻³¹ Iribojegue Goĩmũ Davire ōpa arĩĩnumi: “Diaye ta arĩġũ ĩiaa. Mũ pĩramerĩ ģrĩturiarĩ mera majagũ mũ ĩiro dopa ta ĩ maca majarĩ weca opũ ģrĩġũcumĩ,” arĩĩnumi Goĩmũ Davire. Davi Goĩmũ yare wereyugũ ģrĩĩnumi. Eropĩġũ Cristore Goĩmũ ta opũ acuborore masĩġũ, Cristo ĩġũ masa mũriaborore weremũhtatuhaĩnumi Davipũ. Őpa arĩ wereĩnumi ĩġũ: “Ĩġũ sĩrinirĩ erĩ ģrĩroguere ģrĩwajosome. ĩġũ dũpũ ero boasome,” arĩĩnumi Davi. ³² ĩre Jesucristore Goĩmũ masuami. ĩġũ masudĩġũre ġũa ģrĩpehrerĩ ĩabũ. ³³ Eropĩġũ Cristo ũmarogue mari Pagũ diayepũ ģrĩcumĩ doreġũ ģrĩġũ. Eropĩġũ ĩġũ Pagũ “Espĩritu Santore yebague obeoġũra,” arĩpũ ĩġũre. Eropĩġũ Cristopũ Espĩritu Santore dohpaguere obeomĩ ġũare. Eropĩrĩ Espĩritu Santore ĩġũ ġũare obeorare ĩarĩ ĩiaa mũa. Eropĩrĩ mũa pee. ³⁴ Davipũ Jesu ĩġũ mũriadirop dopa ta ũmaroġũre mũriabiriĩnumi. Eropĩġũ ĩġũ ĩġũ basi ōpa arĩĩnumi:

Goĩmũ arĩmi yũ Opũre: “Ohĩ yũ diayepũ doaque mũhũ. ³⁵ Eropĩġũ mũre ĩhaturĩrĩre mũre tarĩnũġabasagũra yũhũ mũ pohro majarĩ dopa ģrĩmorĩre,” arĩmi Goĩmũ yũ Opũre, arĩ ġoġaĩnumi Davi.

³⁶ “Eropĩrĩ ģrĩpehrerĩ Israe masa ire ōaro masĩque mũa. ĩhĩ Jesure mũa crusague wejĩdĩġũre mũa opũ acuami Goĩmũpũ. ĩġũre mũare taubure Cristore apĩami Goĩmũ, arĩ werepũ Pedro masare.

³⁷ Īḡu eroparĩcũ peerã buriḡã bujawere, güirã masapu Pedro sãre serẽpi ãañoã:

—Gua acawererã, ¿dohpa iirãcuri gua? arĩ serẽpi ãañoã erã.

³⁸ Erã eropa arĩ serẽpi ãacũ yuhripu Pedro sã.

—Mua ñero iirire bujawererã árĩque. Ōarire gohrotoque. Eropirã Jesu waĩ mera waĩyenirã árĩque mua árĩpehrerã. Mua eropa iicũ mua ñerire cãdijigucumi Goãmũ. Mua eropa iicũ Espĩritu Santo mua mera árĩḡucumi. Goãmũ Īḡu Espĩritu Santore eropa ocãḡucumi mũare. ³⁹ Mũare, mua porãre, mua pãramerã árĩturiarãre yorogue majarãre, árĩpehrerã Goãmũ mari Opu Īḡu beyenirãre “Diaye ta ita-mugura mũare,” arĩ apiñumi Goãmũ, arĩpu Pedro masare.

⁴⁰ Eropa arĩtuhaja baja werenemopu Pedro. Eropigu turaro mera werẽpu erãre.

—I yeba majarãre erã ñero iira dipuwaja dipuwaja moagucumi Goãmũ. Eropirã mũapu Goãmũ yarã árĩque. Mua eropa árĩcũ Īḡu mũare dipuwaja moasome, arĩpu Pedro masare.

⁴¹ Īḡu eroparĩcũ peerã bajarã Īḡu wereniguirire õaro peeñoã. Eropigu Īḡu sã erãre waĩyepu. Eropirã Goãmũ yarã mera majarã tres mil masa wanemoñoã. ⁴² Eropirã erã masa Cristo Īḡu apinirã mera mũuri nũcu árĩmuriñoã. Eropirã erã buherire mũuri nũcu peemuriñoã. Erã barire game guere, Goãmũre serẽ, Cristo Īḡu apinirã mera õaro árĩcãñoã erã.

Jesu yarã ne árĩnũgarã erã árĩricurire werẽpu Luca

⁴³ Eropii Goãmũ Īḡu turari mera deyro moarire ii ĩhmuñoã Īḡu apinirã. Erã eropa iicũ ãarã masa árĩpehrerã ĩha uca wañoã. ⁴⁴ Eropirã árĩpehrerã Jesure umupeorã gamenere, õaro árĩcãñoã. Eropirã erã yare game gueremuriñoã. ⁴⁵ Erã yare dua, árĩpehrerãre gajinore moorãre erã nũcu omuriñoã erã. ⁴⁶ Eropirã mũuri nũcu erã Goãmũ wihigue gameneremuriñoã. Árĩpehrerã yujurãyeri erã wirigue yujuyeri cururi mucubiriri mera gamenere bamuriñoã. ⁴⁷ Erã eropa gamenererisubu “Goãmũ õagũ ãhrimi,” arĩ umupeomuriñoã. Eropirã gajirã masa erãre gametarimuriñoã. Eropigu mũuri nũcu Goãmũ gajirãre Īḡu yarã wacũ iimuripu.

3

Curimasibigu õagũ waru

¹ Ñamicague tres árĩcũ Goãmũre serẽrisubu árĩcũ Pedro, Ñu mera Goãmũ wihigue warã iñoã. Iri wihi disiporo

yujugu umu doapu. ² Umari nucu iri wihi disiporo oari disiporo waicuri disiporo gajira igure aigari duhudoboora. Igu umuru ne masa dehyoagugue ta curimasibigu ariru. Eropigu igu iri disiporo pohro doagu niyerure seremuriru iri wihire najarae. ³ Eropii Pedro, Nu iri wihigue era ejanugajacu curimasibiguru erare iha, niyerure sereru. ⁴ Eropira era Pedro, Nu mera igure iha, Pedropu opa ariru: —Guare iaque muhu, ariru Pedro igure.

⁵ Igu eroparicu peegu erare iha “Niyerure oracoma yure,” aru pepiriru. ⁶ Igu eropa aru pepiquerecu ta Pedro igure opa aru wereru:

—Niyerure opabeaa yuhu. Opabiriqueregu ta ire iigura yuhu mare. Jesucristo Nazare majagu igu turari mera curique muhu, ariru Pedro curimasibigure.

⁷ Eropa arigu ta igu mojtore diayeru maja mojtore neha, igure tarawahgu nuguru. Irisubu ta curimasibigu igu guburire, igu nigarire turari najayoro. ⁸ Iri eropa najara puhru igu wahganugajapu. Eropigu igu waha buhrama maria “Goamu turagu oagu ahrimi,” igu aru mucubiridiro mera era mera Goamu wihigue najaarpu pare. ⁹ Igu eropa curicu, “Goamu oagu ahrimi,” aru gaguiniguicu masa aripehrera igure iaora. ¹⁰ Eropira masa igure iha masiora. “Ihi iri wihi maja disiporo oari disiporo pohro igu niyerure sero doagu ahrimi,” ariora era. Eropira igu eropa curicu iar ihamaria waora.

Pedro Goamu wihigue masare buheru

¹¹ Eropii curimasibiridigu Pedro sare igu duhubirisubu, masa aripehrera ihamaria wara Pedro sa pohro omaga, gamenereora. Era Goamu wihigue arira Salomo waicuripugue ariora. ¹² Era eropa gamenerera puhru Pedropu wereru erare.

—Mua Israe masa, iduhpira ire iha ucari? iduhpira guare mua ihanurari? Guaru gua ya turari mera, Goamure gua umupeori mera, gua ejatuharo ire curicu iibirabu gua. Jesu irire iiami. ¹³ Mari necu samara maria Abrahā, Isaa, Jacobo maria Goamure umupeomarioora. Era umupeodiguru Goamuru igu magure Jesure turagu, oagu igu aricu ihmumurimi. Mua Jesure ihatirirare ohabu. Eropigu Pilato igure igu peresugue wiudiacu maru igure igu wiucu gamebirabu. Pilatore Jesure ohabu mua. ¹⁴ Pilato igure wiudiarami. Maru Jesure oagure, oaro iigure gamebiru gajigure masa wejediguru wiudoreabu mua. ¹⁵ Eropira Jesure mari ojocaricu iigure wejebu mua. Igu siricu Goamu igure masuami. Igu masudigure gua iabu.

¹⁶ Eropirã gua ïgure umupeorã ãhraa. Gua eropa umupeocũ ïagu ïre mua dohpague ïagure mua ïha masigure Jesupũ ïgu turari mera ïgu curicũ iiami.

¹⁷ “Yu acawererã, mari oparã mera Jesure ðaro masibiriquererã ïgure wejẽabũ mua. Irire masia yuhũ. ¹⁸ Iribojegue majarã Goãmũ yare weremũhtanirã Goãmũ erãre ïgu weredoreldiro dopa ta wereñuma erã sã. “Cristo ñero tarigũcumĩ,” arĩ wereyuñuma erã. Erã eropa arĩ werediro dopa ta eropa wabũ dohpaguere. ¹⁹ Eropirã dohpaguere mua ñero iirare bujawererã árĩque. Õaripũre gohrotoque. Cristore umupeoque. Mua eropa iicũ mua ñerire cãdijigũcumĩ Goãmũ. Eropigũ mũare mucubiririnũre apigũcumĩ ïgu. Eropirã ðaro siñajarãca. ²⁰ Eropigũ Goãmũ Cristore ïgu beyedigũre mũare obeogũcumĩ daja. Cristo Jesu ta ãhrimi. ²¹ ïgu Jesu Goãmũ pohrogue árĩcumĩ dohpa. Iribojegue Goãmũ ïgu yare weremũhtanirãre wereyudoreñumi ïgu iiburire. ïgu werediro dopa ta árĩpehrero amugũ iicumĩ. ïgu amutuhaja Cristore obeogũcumĩ daja. ²² Moise irire weregũ ðpa arĩñumi: “Mari mera majagũre mari acaweregũre Goãmũ yare weremũhtagure Goãmũ mari Opũ obeogũcumĩ mũare. Yũre ïgu obeodiro dopa ta obeogũcumĩ ïgu sãre. Eropirã mũare ïgu werecũ peep-ehrecãrãca mua. ²³ Õpa árĩroca. Árĩpehrerã ïgure peebirã, ïgu dorerire iibirã ïgu cóãnirã árĩrãcoma. Goãmũ yarã mera majarã árĩsome erã,” arĩmũriñumi Moise iribojeque.

²⁴ “Árĩpehrerã Goãmũ yare weremũhtanirã nũcũ, Samue ïgu pũhrũ árĩrã sã i dohpague warire wereyuñuma. ²⁵ Mari ñecũ sumarãre iribojegue majarãre “Masare ðaro iigũra,” arĩ weremũriñumi. ïgu erãre werediro dopa iimi marire dohpaguere. Eropigũ Abrahãre ïgu arĩldiro dopa ta mari sãre arĩ weregũ iĩñumi. Õpa arĩ wereñumi Goãmũ Abrahãre: “Árĩpehreri yeba majarãre ðaro iigũra. Õpa irire iigũra: Mũ acaweregũ pũhrũ árĩgũpũ masare ðaro iibasagũcumĩ yũre,” arĩñumi Goãmũ Abrahãre. ²⁶ Maripũre Goãmũ Jesure ïgu magũre ïgu masudigũre mari pohrogue obeomũhtami mari ñero iirare cóãbure. Eropa iigũ ïgu mũare ðaro iiami, arĩpũ Pedro erãre.

4

Pedro, Ñu mera oparãre weretamuñorã

1-3 Īḡu eropa wereniguisubu pahia, Goām̄u wihire corerā surara op̄u, saduceo masa sã erāre peeñorā. Ōpa buhep̄u Pedro Ñu mera masare:

—Jesu ĩḡu s̄irira p̄uhr̄u masa m̄uria wami. Īḡu eropa masa m̄uriacũ ĩarā, p̄uhr̄u mari sã ĩḡu yarā mari masa m̄uriaborore masia mari, arĩ werep̄u Pedro sã. Erā eroparĩcũ peerā, oparāp̄u erā mera guañorā. Eropa guarā naimerecũ ĩarā erā Pedrore, gajirā Jesu apinirā sãre ñeha, peresu iñorā. ⁴ Oparā eropa gamebiriq̄uerecũ ta masa bajarā Goām̄u yare Pedro sã buherire peerā “Diaye ta āhraa,” arĩ pepiñorā erā. Eropirā Jesu yarā bajarā wañorā. Erā ũma dihtare queocũ Jesure umupeorā cinco mil masa árĩñorā.

⁵ Eropii gajin̄u iri maca majarā m̄urā, oparā, judio masa buherā mera Jerusalengue gamenereñorā. ⁶ Eropiḡu pahia op̄u Ana waĩcuḡu ero árĩp̄u. Īḡu acawererā sã árĩñorā. Caifa, Ñu, Alejandro, gajirā mera Ana acawererā árĩñorā.

⁷ Eropirā erā Pedro sãre erāre gamebeocũ, surarap̄u peresugue erāre aĩwiu oparā watopegue erāre aĩ ejañorā. Erā eropa iira p̄uhr̄u oparā serēpi ĩañorā Pedro sãre.

—¿Noa ya turari mera m̄ua curimasibigure ðaḡu iiri? ¿Noa āhriri m̄uare irire iidoreḡu? arĩ serēpi ĩañorā erā.

⁸ Erā eroparĩcũ peeḡu Espiritu Santo ĩḡu itamuraire ðaro opaḡu werep̄u Pedro erāre.

⁹ —M̄ua oparā, m̄ua m̄urā, ¿ḡua curimasibigure ḡua ðaḡu iirare serēpi ĩarā iiri m̄ua ḡuare? ¹⁰ Ire masique m̄ua árĩpehrerā, Israe masa. Ire Jesucristo eropa iiami. Jesu Nazare majaḡu, m̄ua crusague wejēdiḡu, Goām̄u masudiḡu, ĩḡup̄u ihĩ curimasibigure ðaḡu wacũ iiami. Eropirā ĩre dohpaguere m̄ua ĩhuro ĩḡu curicũ ĩhaa m̄ua. Ōpa āhraa Goām̄u yare erā gojarap̄ugue Cristore wereyuro: ¹¹ “Ihĩ Cristo ũtāye iro dopa ta Goām̄u beyediḡu āhrimi. Īḡu Goām̄u beyediḡu árĩquerecũ masa ĩḡure gamesome. ĩḡure erā gamebiriq̄uerecũ Goām̄u ĩḡure op̄u acuami árĩpehrerāre dorebure,” arĩ gojañumi iribojegue. ¹² Ne gajiḡu masare peamegue wabonirāre tauḡu ne marimi. I yebaguere Jesu dihta masare tauḡu āhrimi. Ne gajirā ĩḡu iro dopa árĩrā ne marima, arĩ werep̄u Pedro erāre.

¹³ Īḡu eropa arĩ werera p̄uhr̄u, Pedro Ñu mera buheya marirā erā árĩcũ ĩarā, ḡũiro mariro erā buhecũ ĩarā, m̄urā, oparā, judio masa buherā mera pee ũca wañorā. Eropirā Jesu iro dopa erā buhecũ ĩarā, ōpa pepiñorā erā. “Pedro, Ñu sã diaye ta Jesu mera majarā ta āhrima oā,” arĩ pepiñorā erā. ¹⁴ Eropiḡu curimasibiridiḡu Pedro sã mera

árīpū. Īgu, īgu ōagu árīcū ĩañorā mūrā, oparā, judio masa buherā mera. Eropirā erā Pedro säre “Ñero iirā iiaa,” arī weresāmasibiriñorā. ¹⁵ Eropa weresāmasibirā oparā erā gamenereri taribugue árīrāre Pedro säre wiriadoreñorā. ¹⁶ Erā wiriara pūhrū erā basi weretamuñorā.

—¿Oāre dohpa iirācuri mari? arī wereniguiñorā erā.

Ōpa arī wereniguinemoñorā:

—Pedro, Ñu mera Goāmū turari mera curimasibigūre curicū iinirā āhrama. Eropirā Jerusalén majarā árīpehrerā erā eropa ōaro iirare masiama. Eropirā maripū “Eropa iibirama erā,” arīmasibea mari. ¹⁷ Eropirā Jesu īgu buherare gajirāre buhedorebircārā erāre gajirā erā buherire gameri arīrā, arī wereniguiñorā erā erā basi.

¹⁸ Eropa arī wereniguituha Pedro säre sihubeo ōpa arīñorā:

—Jesu īgu buherare ne buhebircāque gajirāre. Irire ne wereniguibircāque, arīriñorā erāre.

¹⁹ Erā eroparīcū peerā Pedro Ñu mera ōpa arīñorā erāre:

—Mua ōpa arīcū mūare yūhrirā Goāmūpūre tarinūgārā iiboca gua. ¿Nihi yapūre gua werecū gahmeri mua? ¿Mua yapūre gua iicū gahmeri mua? ¿Goāmū yapūre gua iicū gahmeri mua? ²⁰ Guapūre gua ĩarare, gua peerare guare yayasāma masiya mara masare, arī yūhrīpū Pedro Ñu mera.

²¹ Erā eroparīcū peerā oparāpū dipaturi doreriñorā daja erāre.

—Jesu īgu buherare mua buherā ñero tarirāca mua, arīriñorā oparā erāre.

Erāre “Ñu, Pedro mera ñero iirā iima,” arīmasibiriñorā erā. Eropirā masapū curimasibiridigū īgu ōagu wacū ĩarā, “Goāmū diaye ta ōagu āhrimi,” arīñorā masa. Erā eroparīcū peerā oparāpū Pedro säre dipuwaja moamasibiri, erāre wiuñorā. ²² Curimasibigū ōagu erā iidigū cuarenta bojori opagu árīpū.

Jesu yarā erā güibiriburire serēñorā Goāmūre

²³ Eropii, Pedro Ñu mera erā mera majarā pohrogue eja, pahia oparā, mūrā erāre erā arīrare wereñorā. ²⁴ Erā eroparīcū peerā erā árīpehrerā yujuro mera mari Pagūre Goāmūre serēñorā.

—Gua Opū, mūhu ūmarore, yebare, diarire iigu, árīpehrerāre ojocaricū iigu āhraa mūhu. ²⁵ Mū Espiritu Santo gua ñecūre Davi mūrūre mū pohro majagūre ōpa weredoreyoro mū arīdiro dopa ta:

¿Duhpirā judio masa árībirā guari? Pee masibirā āhrima masa. ²⁶ Baja macari majarā oparā gamenere,

mari Opu Goãmure, igu opu acudigu Cristo sare ihaturi, ñero iidiana erã, arĩ weredoreyoro muhu Davire iribojeguere.

²⁷ Eropa ta ahraa, arĩ serẽnemoñorã Goãmure. I macare Herode, Poncio Pilato, judio masa arĩbirã, judio masa mera mu beyedigure Jesure ðagu mu pohro majagure wejedia gamenereama. ²⁸ Irisubu mu gamediro dopa ta "Eropa waroca," mu arĩdiro dopa ta iiana erã. Mu masiri mera eropa wereyoro muhu. ²⁹ Eropigu, gua Opu, erã guare "Mua buheri waja ñero tarirãca," erã arĩrare guñaque muhu. Guare itamuque. Eropigu guare mu pohro majarãre güiro mariro mu buherire weredoreque guare. ³⁰ Muhu mu turari mera dorecurãre ðarã iique. Eropigu mu buherire güiro mariro werecũ iique guare. Eropigu mu deyoro moarare Jesu mu pohro majagu igu turari mera ii ihmudoreque guare. Eropigu dorecurãre ðarã gua wadrecũ mu turari mera itamuque guare, arĩ serẽnorã erã mari Pagure.

³¹ Erã eropa arĩ serẽra puhru, erã gamenereri wihi ñohmemaa wayoro. Ero eropa ñohmecũ ta Espiritu Santo igu turari mera guñaturarã wacũ iipu erãre. Eropa warã, Espiritu Santo igu dorediro dopa ta iinorã. Güiro mariro Goãmu yare wereñorã erã.

Jesu yarã erã yare dũca wañorã

³²⁻³³ Eropirã Goãmu igu turari mera erã Jesu igu apinirã ðpa arĩ wereñorã masare: Jesure Goãmu masudigure gua ñabu, arĩ wereñorã erã masare. Eropigu Goãmu erã arĩpehrerãre ðaro itamumuripu. Eropirã Jesure umupeorã bajarã arĩñorã. Erã yujuropa ta pepirã arĩmuriñorã. Eropirã erã erã yare erã doberire "Yaha dihta ahraa," ne arĩbiriñorã. Erã arĩpehrerã erã yare gajinore moorãre erã mera majarãre dũca wamuriñorã. ³⁴ Eropirã erã mera majarã mojomorocurã marimuriñorã. Erã mera majarã yeba oparã, wiri oparã erã yare duamuriñorã. ³⁵ Eropa duarã erã wajasearare erã aigãri, Jesu igu apinirãre omuriñorã. Eropirã erãpu irire erã mera majarãre dũca wamuriñorã. Arĩpehrerã opabirãre dũca wañorã. ³⁶ Irisubure yujugu erã mera majagu José waicugu arĩpu. Jesu igu apinirã Josére Bernabé wañeñorã. Igu wañ Bernabé "Masare mucubiricũ iigu ahrimi," arĩma Griego ya mera. Igu Leví ya curu majagu Chipre nuguro majagu arĩpu. ³⁷ Eropigu igu poeri opagu arĩgu irire duapu. Eropigu igu wajasearare Jesu igu apinirãre opu igu gajirãre gueredoregu.

5

Ananía ĩgu marapo Safira mera guyapu

¹ Gajirã sã Bernabé iro dopa iimuririñorã. Erã Ananía waĩcugu, ĩgu marapo Safira waĩcugo árĩñorã. Eropigu Ananía erã ya poerire duapu ĩgu. ² Eropa duaqueregu ta ĩgu wajasearare ĩgu basi aĩpu. ĩgu marapo sã ĩgu eropa iirare masipo. Eropigu erã wajasea duharare aĩgãri, Jesu ĩgu apinirãre ópu Ananíapu. Eropa ogu, “Opehogu iiaa,” arĩripu ĩgu. ³ ĩgu eropa iicũ ĩagu Pedro ĩgure wereru.

—Ananía, watĩ mure guyadorecũ muhu guyabu Espiritu Santore. Eropigu mua ya poerire dua, mu wajasearare mu basi aĩbu ahrabu muhu. ⁴ Mu duaboro core mua ya poeri árĩribu. Eropiro mu duara puhru mu ya wajatari ta ahrabu. ¿Eropigu dohpa árironore eropa guyarĩ muhu? Muhu gua dihtare guyabeaa. Goãmu sãre guyabu muhu, arĩpu Pedro ĩgure.

⁵ ĩgu eroparĩcũ peegu ta, Ananíapu mehmereja, sĩaria wapo. Eropirã árĩpehrerã ĩgu eropa warare masirã, burigã güiñorã. ⁶ ĩgu sĩaria puhru mamarã ahri, ĩgu dupure suhri mera oma, disiporogue aĩgã, yaañorã ĩgure.

⁷ Eropii uhre hora puhru Ananía muru marapo ĩgu sĩrirare masibigo Pedro pohrogue ñajapo. ⁸ Eropigu Pedro igore ópa arĩpu:

—¿Mua ya poerire duanijarã dipẽ wajatari mua? arĩpu ĩgu. Eropigo igo igo marapu muru ĩgu arĩrañepẽ ta, “Iripẽta wajatabu gua,” arĩ wereripo igo sã. ⁹ Eropigu Pedro igore wereru:

—¿Duhpirã mua yujuro mera Goãmu Espiriture guya ĩhadiari mua? Peeque dohpaguere. Mu marapu murure yaanirã ta ahrima daja. Mu sãre mu dupure aĩrã ahrima, arĩpu Pedro.

¹⁰ ĩgu eropa arĩ wereru ta igo mehmereja, sĩaria wapo. Eropirã mamarã iri wihire ñajarã, igo ya dupu murarore aĩ wiria wañorã. Aĩgã, igo marapu muru dipaba yaañorã. ¹¹ Eropirã Jesu yarã árĩpehrerã gajirã irire peerã sã, güitariacãñorã.

Jesu ĩgu apinirã Goãmu turari mera ii ĩhmuñorã

¹² Eropirã masa watope Jesu ĩgu apinirã bajasuburi Goãmu turari mera deyoro moarire ii ĩhmumurĩñorã. Eropirã erã Salomo waĩcũri taribugue óari taribugue gameneremurĩñorã. ¹³ Eropirã gajirã erãre güirã, erã pohrogue wabiriñorã. Eropa güiquererã erãre Jesu ĩgu apinirãre, “Óarã ahrima oã,” arĩñorã masa. ¹⁴ Eropirã uma, nome bajarã Jesure umupeonugañorã. ¹⁵ Eropirã

erã dorecũrãre aĩgãri, omasiariĩne mera pũtãpi apigãnorã Pedro waburi mague erãre. Eropirã dorecũrãre õarã wacũ gamerã Pedro erãre ĩgu ñapeocũ gameñorã erã aĩgãnirãpũ. Erãre ĩgu ñapeobiricũ Pedro erã weca ĩgu watĩ merejariĩne dihtare gameñorã erã. Iri dihtare gameñorã erã erã õarã waboro dopa. ¹⁶ Eropirã Jerusalén pohro árĩri macari majarã sã, dorecũrãre, watẽa ñajasũnirã sãre aĩgãriñorã. Eropirã erã árĩpehrerã erã dũpũ õaro wañorã.

Oparãpũ Jesu ĩgu apinirãre ñero iidoreñorã

¹⁷ ĩgu eropa iicũ ĩarã pahia opũ, ĩgu mera majarã mera Pedro sãre peyocũpũ. Pahia opũ mera majarã saduceo masa árĩñorã. ¹⁸ Pedro sã iirare peerã erã guatarirã Jesu ĩgu apinirãre ñehadore, peresu iĩñorã. ¹⁹ Eropiira pũhrũ iri ñami ta Goãmũ ĩgu anyu pãgũpũ erãre peresugue árĩrãre. Tuhajanugu erãre wiriridore õpa arĩ werepũ anyu:

²⁰ —Goãmũ wihigue waque. Iri wihigue árĩrã Goãmũ masare ĩgu tauburire, iri õari buherire wereque masare, arĩpũ anyu erãre.

²¹ ĩgu eroparĩcũ peerã ñamigã ñari Goãmũ ya wihigue ñaja, masare buheñorã erã.

Irinũ ta pahia opũ, ĩgu mera majarã, Israe masa oparã mera gamenere, Jesu ĩgu apinirãre peresugue árĩrãre aĩgãridoreripũ surara oparãre. ²² Eropirã surara oparã peresugue doarãpũre aĩgãrirã wariñorã. Erãre bocabiriñorã. Bocabiri dujaa wañorã daja. ²³ Dujaja wereñorã erã oparãre.

—Peresugue árĩri disiporori bihara disiporori ãhrabũ. Eropirã erã iri disiporori pohro peresu iinirãre corerã niguiama. Eropa ĩabũ gũa. Eropirã gũa disiporore pãgũcũ, masa marabũ, arĩ wereñorã erã.

²⁴ Erã eroparĩcũ peerã, surara Goãmũ wihire corenirã opũ, pahia oparã mera irire pee uca wa, “¿Dohpa waha ojo-gorocũrãcuri erã eropa iirã?” arĩ pepiñorã erã. ²⁵ Eropigu erã pohroque gajigu ahri, erãre werepũ.

—Mũa peresu iinirã Goãmũ wihigue ãhrama. ĩarã waque bu. Iri wihigue masare buherã iama erã, arĩ werepũ.

²⁶ ĩgu eroparĩcũ pee, surara opũ, ĩgu surara mera waha, Jesu ĩgu apinirãre dipaturi ñeagãriñorã daja. Eropa ñearã erãre surara turibiriñorã. Eropirã erãre pabonirã árĩquererã, masare gũirã pabiriñorã erãre. “Oãre mari pacũ gajirã masapũ utã mera dearãcoma marire,” arĩ pepiñorã erã surarapũ. ²⁷ Eropirã erãre aĩgãri, oparã core duhudoboñorã erãre. Erã eropa aĩ eraa dobocũ pahia opũ erãre turipũ.

28 —Mũare gua weretuhabu. Jesu yare buhebiriçaque, arĩrabu gua mũare. Gua eropa arĩquerecũ ta mũapu arĩpehrerã Jerusalén majarãre buhea mũa. Jesu ĩgu sĩrira waja, gũare dipuwajacucũ iidiarã iica mũa, arĩpu pahia opu.

29 ĩgu eroparĩcũ peegu Pedropu gajirã Jesu ĩgu apinirã mera yũhrĩpu.

—Goãmu ĩgu dorerapure iimũhtarãra. Eropirã puhru Goãmu gamecũ masa erã dorerire iirãra. ³⁰ Goãmu mari acawererã iribojegue majarã opu Jesure masudĩ arĩmi. ĩgu ta aħrimi mũa crusague pabia wejėdigu. ³¹ Jesure masura puhru Goãmu ĩgure “Oagu aħrimi,” arĩ, ĩgu diayeru doadoremĩ Jesure ĩgu Pagupu. Eropigu Jesu masa opu, masare masugu arĩgu, Israe masare erã ñeri iirare bujawererã arĩdoregu, erã ñerire cóadiami Jesu. ³² Eropirã guapu Jesu ĩgu iirare ĩanirã arĩrã irire werea gua. Espĩritu Santo irire ĩhmugu arĩgu weremi ĩgu sã. ĩgure Espĩritu Santore Goãmu oboami. Arĩpehrerã Goãmu dorerire iirãre ĩgu Espĩritu Santore ohomĩ, arĩ werepu erãre.

³³ ĩgu eroparĩcũ peerã oparãpu guatariacãñorã. Eropirã erã Jesu ĩgu apinirãre wejėdiariñorã. ³⁴ Irisubure erore Gamalie fariseo masu ero arĩgu erãre wejėdoregu iibirĩpu. ĩgu oparã mera majagu, dorerire buhegu ĩgu arĩcũ, masa erã umupeogu arĩpu. Eropigu ĩgu Jesu ĩgu apinirãre merogã corecoregu gajipugue erãre aĩgãdorepu surarare. ³⁵ Erã eropa aĩgãra puhru ĩgupu werepu masare.

—Mũa Israe masa, oãre mũa iiburire õaro pepique mũague wejėri arĩrã. ³⁶ Guñaque Teuda mũurure. ĩgu, ĩgu basi “Masare tarinugagu aħraa yũhu,” arĩmi masare. Eropirã masa bajarã cuatrocientos masa ĩgu mera majarã dujama. Eropirã gajirãpu ĩgure wejėnirã arĩma. ĩgu sĩricũ ĩha ĩgu buherire buhenirãpu wasiria wanirã arĩma. Eropirã erã dohpaguere marima. ³⁷ Puhru masare erã queorisubu arĩcũ Galilea majagu Juda waĩcugu masare ĩgu buhecũ ĩgu mera masa bajarã dujama. ĩgu sã sĩria wadi arĩmi. Eropii ĩgu yarã arĩpehrerã wasiria wanirã arĩma erã sã. ³⁸ Eroparĩgu dohpaguere mũare ire arĩgu iiaa. Eropa ĩacãque oãre Jesu yare wererãre. Eropii i buheri oã erã ya buheri Goãmu ya buheri arĩbiro, pehrea waroca. ³⁹ Goãmu ya buherĩpu arĩro, ne pehresome. I buheri Goãmu ya arĩcũ ne ire ne dederecũ iimasibea mũa. Mũa ire dederecũ iidiarã Goãmu mera gamequearã iiboca mũa, arĩpu Gamalie erãre.

ĩgu eropa arĩ werecũ peerã, “Diaye ta aħraa,” arĩ, peeñorã oparã. ⁴⁰ Eropirã erã Jesu apinirãre sihubeo, erã

eracũ ĩarã erãre tãrañorã. "Jesu yare buhebiricãque mũa," arĩtuhaja, erãre wadoreñorã.

⁴¹ Eropa wadorecũ peerã erã oparã pohroque árĩnirã waha wañorã. Jesu ya árĩburire ñero tarirã burigã mucubiriñorã Jesu ĩgu apinirã. ⁴² Eropirã umuri nũcu erã ya wirigue, Goãmũ wihigue sãre Jesucristo yare buhe weremuriñorã erã.

6

Siete itamumorãre beyeñorã Jesu yarã

¹ Irinurire Jesure umupeorã bajarã wañorã. Eropirã griego masa judio masa mera gameturiñorã erã Jesu yarã dihta árĩquererã. Griego masa wapeweyarã nomere umuri nũcu erã barire òaro erã guerebiricũ ĩarã judio masare turiñorã. ² Eropirã Jesu ĩgu apinirã, docepu Jesure umupeorãre árĩpehrerãre erã pohroque sihubeo, òpa arĩ wereñorã:

—Gũa Goãmũ yare buherã ãhraa gũa. Barire guere-morãno árĩbeaa gũa. ³ Eropirã mũa gũa acawererã, siete umare, gajirã "Òarã," erã arĩrãre, Espĩritu Santo oparãre amaque. Erãpũre barire gueredoreque mũa. ⁴ Eropirã guapu umuri nũcu Goãmũre serẽ Goãmũ yare buherãca, arĩñorã Jesu apinirã erã Jesure umupeorãre.

⁵ Erã eroparĩcũ peerã, "Áu, eropa ta iirã," arĩñorã erã árĩpehrerã Jesure umupeorã. Eropirã Estebanre Cristore umupeogũre, Espĩritu Santo turarire wũaro opagũre beyeñorã erã. Gajirã sãre beyeñorã. Filipere, Prócorore, Nicanore, Timore, Parmenare, Nicolare bari gueremorãre beyeñorã erã. Nicolapu judio masũ árĩbigũ Antioquía majagu judio masa buherire gamegũ erã mera ñajadigũ árĩpu. ⁶ Erã beyenirãre Jesu ĩgu apinirã pohro aĩ erañorã gajirã Jesu yarãpu. Erã eropa aĩ eracũ ĩarã erã Goãmũre serẽbasañorã. Eropirã erã beyenirã weca erã mojotorire duhpeoñorã Goãmũ turarire orã.

⁷ Eropirã iri yeba majarã Goãmũ yare masipehrenijarã iĩñorã. Eropirã Jerusalengue árĩrã Jesure umupeorã bajarã wanemoñorã daja. Eropirã pahia sã bajarã Jesu yarã wañorã.

Gajirã Estebanre ñeañorã

⁸ Eropigu Esteban Goãmũ turarire opagu árĩpu. ĩgu Goãmũ òaro iigu árĩpu. Eropigu ĩgu Goãmũ turari mera deyoro moarire ii ĩmupu masa erã ĩaro. ⁹ Judio masa erã buheri wihi majarã ĩgũre ĩhaturiñorã. Eropirã ĩgu mera game dũyasonũgañorã. Erã Liberto waĩcurã arĩñorã. Eropirã erã Cirene majarã, Alejandría majarã,

Cilicia majarã, Asia majarã mera bajarã árĩñorã erã Esteban mera d̃ỹasorã. ¹⁰ Esteban masigu dopa ta, Espĩritu Santore w̃aro opagu ta ĩgu wereniguicũ peerã erã yujuro bojebiriñorã ĩgure. ¹¹ Eropa yujuro bojebirã erã gajirãre ahma g̃ỹadore, wajayeñorã erãre. Erã eropa g̃ỹadorecũ òpa arĩ weresãñorã erã Estebanre:

—Ihĩ Goãmure ĩgu ñero wereniguicũ, Moiserẽ ĩgu ñero wereniguicũ sãre gua peeabu, arĩ weresãriñorã erã g̃ỹarãpũ gajirãre.

¹² Erã eroparĩcũ peerã masa, judio masa buherã, murã sã ĩgu mera guañorã. Eropirã erã Estebanre ñeha erã oparã pohro aĩgãñorã ĩgure. ¹³⁻¹⁴ Eropirã erã gajirãre g̃ỹanemodoreñorã. Òpa arĩñorã erãpũ:

—Ihĩ ımuri nucũ Goãmũ wihire, ĩgu doreri sãre ñero wereniguigũ àhrimi. Peeabu gua ĩgure ĩgu òpa arĩcũ. “Jesu Nazare majagu Goãmũ wihire cóagucumi. Eropigu ĩgu Moise dorerare marire ĩgu wererare gohrotogucumi Jesu,” arãmi Esteban gua peecũ, arĩ g̃ỹa weresãriñorã erã. ¹⁵ Eropirã árĩpehrerã ero doarã Estebanre òaro ñhamehtu, ĩgu diapore ñañorã erã. Anyu iro dopa deyoyoro ĩgu diapo.

7

Esteban Jesu yare werepũ

¹ Eropii pahia opũ serẽpipũ Estebanre.

—¿Oã erã arĩri diaye ta àhriri? arĩ serẽpipũ ĩgu Estebanre. ² ĩgu eroparĩcũ peegu, Estebanpũ erãre òpa arĩ werepũ:

—Acawererã, murã, gua pagũ sũmarã, peeque. Abrahã mari ñecũ murũ iribojegue majagu Mesopotamiague ĩgu árĩcũ, Harãngue ĩgu árĩboro core, Goãmũ turagu gosesiriro dopa ĩgure Abrahãre dehyoañumi. ³ Eropa dehyoagu Goãmũ wereñumi ĩgure. “Mũ ya yebare mũ acawererã mera árĩbircãque. Eropigu gajĩ yebague waque. Mũ eropa wacũ mure iri yebare ñhmugura yũhũ,” arĩpũ Goãmũ Abrahãre. ⁴ ĩgu eroparĩcũ peegu Abrahã sã Caldea majarã ya yeba árĩrã wañuma. Pũ Harãngue ejañuma. Eroque eja árĩñuma. Eropigu ĩgu pagũ ĩgu sĩrira pũhrũ i yeba dohpague mũa arĩri yeba Goãmũ ta árĩdoreñumi Abrahãre. ⁵ ĩgure eropa árĩdorequeregu Goãmũ Abrahã ĩgu arĩri yebare òaro gohra apibirimuriniñumi ĩgure. Ne merogã apibiriniñumi. Eropigu Abrahã ĩgu porã marigu árĩquerecũ ta Goãmũpũ ĩgure òpa arĩ wereñumi. “Mure mũ pãramerã gajĩ turi majarãguere i yebare ogũra,” arĩñumi Goãmũ Abrahãre. ⁶ Eropa arĩgu ta òpa arĩ werenemoñumi Goãmũ Abrahãre. “Mũ pãramerã gajĩ turi

majarãgue gajì yebague waha, erogue gajirà pohro árìrà erã pohro majarã árìràcoma erã. Eropirà cuatrocientos bojori gohra ero majarã ñero iirãcoma mụ pãramerã árìturiarãguere. ⁷ Eropigụ ero majarãre erã eropa iira waja dipuwaja moagura yuhụ. Yuhụ eropiira pùhrụ mụ pãramerã i yeba erarãcoma daja. Eropirà i yeba yu dorerire iirãcoma erã,” arĩñumi Goãmụ Abrahãre. ⁸ Eropa arĩgụ Goãmụ “Yu arĩdiro dopa ta iigura,” arĩgụ Abrahã ìgụ guñaburire òpa apiñumi ìgure. Merogã gasirogãre ìgụ dúpure wiri aĩdoreñumi ìgure, ìgụ eropa arĩ wereraguere guñadoregụ. Eropiira pùhrụ Abrahã Isaare porãcũñumi. Ocho nuri pùhrụ merogã gasirogãre wiri aĩñumi Isaa dúpụ sãre. Pùhrụ Isaa Jacobore ìgụ porãcũra pùhrụ wiri aĩñumi ìgụ dúpụ sãre. Eropigụ Jacobo doce gohra porãcũñumi. Erã docepụ mari cururì nęcụ oparãgue árĩmuriñuma.

⁹ “Eropirà erã Jacobo porã mari ñęcụ sũmarã mura Josere erã pagụ magure peyocũmuriñuma. Ìgure cohã, duacãñuma Egiptogue warãre. Eropigụ Josere Goãmụ itamumuriñumi. ¹⁰ Ìgụ ñero taricũ ìagụ Goãmụ ìgure itamumuriñumi. Ìgụ eropa itamucũ Josepụ òaro pee masigụ wañumi. Eropigụ faraõ Egipto majagụ opupụ Josere ìgụ gamecũ iĩñumi Goãmupụ. Ìgụ eropiicũ faraõpụ Josere Egipto majagụ opụ, ìgụ ya wihi majagụ opụ apiñumi.

¹¹ “Eropii irisubure ta Egiptogue, Canaa waĩcari yeba sã ne deco aribiriyoro. Eropirà ero majarã ñero tariñuma. Eropirà Canaague árìrà Jacobo porã mari ñęcụ sũmarã mura bari bocabirimuriñuma. ¹² Eropigụ Egiptogue trigo árìcũ peegụ, Jacobo ìgụ porãre erogue bari asũdoregụ ne obeogụ iĩñumi. ¹³ Pùhrụ Egiptogue erã ejacũ José ìgụ tĩrãre wereñumi. “Mua pagụ magụ ta àhraa yuhụ,” arĩñumi erãre. Eropigụ José acawererãre ne ìagụ iĩñumi opụ faraõ waĩcagụ. ¹⁴ Pùhrụ José ìgụ tĩrãre erã pagụ Jacobore sihudoregụ obeoñumi. Ìgụ acawererã setenta y cinco masa árĩñuma irisubu. ¹⁵ Ìgụ magụ ìgụ sihubecũ peegụ Jacobo Egiptogue wañumi ìgụ magụ pohrogue. Ìgụ magụ pohro àhrì, pùhrụ sĩria wañumi pare. Eropirà ìgụ porã mari ñęcụ sũmarã mura erogue sĩripehrea wañuma erã sã. ¹⁶ Eropirà Siquẽ waĩcari yebague erã dúpure aĩ, masa goberigue seatuha yaañuma erã dúpure. Abrahã ìgụ asũra yebague árìyoro iri yeba erãre yaara yeba. Ero core Abrahã iri yebare Hamor porãre asũyuñumi niyeru mera.

¹⁷ Eropigụ Goãmụ Abrahãre “I yebare ogura mure,” arĩmuriñumi. “Iri yebare ogura,” ìgụ arĩrasubu ejacũ Abrahã pãramerã Israe masa bajarã masa wañuma. Egipt-

togue árĩñuma. ¹⁸ Egipto yeba erã árĩnicũ, gajigu opu ñajañumi. Eropigu ĩgu opupũ José murure masibiriñumi. ¹⁹ Eropigu ĩgu mari acawererãre ñero iidia, erã porãre wejẽdia, erã porãre wejẽ cóãcãdoreñumi erãre. Eropigu mari ñecũ sumarãre ñero iĩñumi opu faraõpũ. ²⁰ ĩgu eropiirisubu Moise árĩbupũ masa dehyoañumi. ĩgu õagu, Goãmũ õaro ĩhasuagu árĩmuriñumi. Eropirã ĩgu pagu sumarã urerã abe gohra õaro ĩhadibuñuma ĩgugãre. ²¹ Moisere dibunemomasibiricũ ĩgure erã cóãra puhũ opu mago ĩgure boca aĩ majaa, igo magũ iro dopa ta dibuñumo ĩgure. ²² Eropirã Egipto majarã õaro masirã yare buheñuma Moisere. Eropigu guiro mariro wereniguũ opu iro dopa iigu árĩñumi Moise.

²³ “Eropigu Moise cuarenta bojori ĩgu opaboro core ĩgu acawererãre Israe masare ĩadiagu erã pohrogue curigu wañumi. ²⁴ Eropa curigu ejagu Egipto majagu Moise acaweregure ĩgu ñero iicũ Moise ĩañumi. Eropa ĩagu ĩgu acaweregure itamuñumi Moise. ĩgu acaweregure itamugu Egipto majagupũre pa wejẽcãñumi ĩgu. ²⁵ Eropirũ Moise õpa arĩ pepiriñumi. Yũ acawererã erã acaweregure yũ itamucũ ĩarã, ‘Goãmũ marire õaro taricũ iidoregu oboeñumi ĩre,’ yũ acawererã yũre arĩ pepirãcoma,” arĩ pepiriñumi Moise. Erãpũ ne eropa pepibiriñuma. ²⁶ Gajinũ Moise ĩgu acawererãre perã erã basi gamequeãrãre ĩapũ. Eropigu ĩgu erãre bosariñumi. “¿Mũa basi árĩquererã gamequeãri mũa?” arĩñumi Moise erãre. ²⁷ ĩgu eroparĩcũ peegu yujugu ĩgu acaweregure ñero iigu Moisere tuubeoñumi. “Mũhũ guũ opu árĩbeaa. Guare doregu árĩbeaa mũhũ. ²⁸ ¿Carũre Egipto majagure mũ wejẽdiro dopa ta yũ sãre wejẽdiagu iiri mũhũ?” arĩñumi ĩgu Moisere. ²⁹ ĩgu eroparĩcũ pee uca wa Moise oma duhrigã waha wapũ. Madián waĩcũri yebague waha wañumi. Erogue nomeore boca perã porãcũñumi.

³⁰ “Eropii Moise cuarenta bojori gohra ero ĩgu árĩra puhũ Sinaĩ waĩcũdigũ utãgu pohro masa marirogue ĩgu árĩcũ anyu ĩgure dehyoañumi. ³¹ Eropa irigugã ãjucũ ĩagu Moise ĩha uca wañumi. Iri peamere pohrogã õaro ĩgu ĩagu wacũ gohra Goãmũ ĩgure wereñumi. ³² “Goãmũ ãhraa yũhũ. Mũ ñecũ sumarã, Abrahã, Isaa, Jacobo erã Goãmũ ãhraa yũhũ,” arĩñumi Goãmũ Moisere. ĩgu eroparĩcũ peegu Moisepũ naragãñumi. Ne ĩha wahgũbiriñumi. ³³ Eropigu Goãmũ wereñumi ĩgure. “Dohparagã yũ pohro nigũgu ĩaa mũhũ. Eropigu guhyadiaro mera mũ zapature tuweaque. ³⁴ Yaharã masa Egiptogue erã ñero taricũ ĩabũ. Erã sĩwererire peeabũ. Eropigu erãre itamugu ahrabũ. Erã

eropa wacũ ñagũ waque mũ sã. Egiptogue mũre obeogũra erãre itamudoregũ,” arĩñumi Goãmũ Moisere.

³⁵ “Erãpũ mari acawererã Israe masa Moisere gamebirituhajañuma. “Mũhũ gua opũ árĩbeaa. Mũhũ guare doregũ árĩbeaa,” Moisere eropa arĩrã gamebirã iituhajañuma. Eropa erã Moisere gamebiriqerrecũ Goãmũ ñgũre Egiptogue obeoñumi mari acawererãre, Israe masare itamubure, erãre dorebure. Ñgũ eropa obeogũ anyupũre ñgũre yucũgũgue dehyoadigũre itamudoreñumi ñgũre. ³⁶ Moise ta mari acawererãre Israe masare Egiptogue árĩrãre wiudigũ árĩñumi. Eropigũ Egiptogue eja, ihĩ Moise Goãmũ turari mera ii ñmunũgañumi. Eropigũ wũariya diariyague eropa ta iĩñumi daja. Pũhrũguere masa marirogue sãre cuarenta bojori gohra Goãmũ turari mera deyoro moarire ii ñmumũriñumi ñgũ erãre. ³⁷ Ihĩ Moisepũ mari acawererãre Israe masare weremũriñumi. “Yũ iro dopa ta Goãmũ yare weremũhtabure Goãmũ obeogũcumi. Eropigũ ñgũ mũa mera majagũ mũa acaweregũ árĩgũcumi. Ñgũ eropa eracũ ñgũre ðaro peeque mũa,” arĩmũriñumi Moise erãre. ³⁸ Moise masa marirogue mari acawererã Israe masa mera arĩmũriñumi. Eropigũ mari ñecu sũmarã iribojegue majarã mera árĩñumi ñgũ. Eropa árĩgũ Sinaí waĩcũdigũ Ʃtãgũgue ñgũre weredigũ anyu mera árĩñumi. Erogue Goãmũ ñgũ dorerire aĩdigũ árĩñumi Moise.

³⁹⁻⁴⁰ “Iri dorerire Ʃtãgũgue Moise waha aĩrisubu mari ñecu sũmarã mũra Egiptogue dujadarã Moisere tarinũgañuma. Erã ñgũre gamebiriñuma. Eropa gamebirã Aarõre Moise ñgũre õpa arĩñuma: “¿Ñgũ Moise marire Egiptogue aĩgãridi dohpa wayuri ñgũ? Masibirica mari. Eropigũ goãmarã wéanirãre iique mari yarã arĩmorã. Eropirã mũ wéanirã marire doreri mari wadiari maha marire aĩgãrãcoma,” arĩñuma erã. ⁴¹ Eropa arĩra pũhrũ erã wecũre oro mera wéañuma. Eropa iituhaja, erã waimũrãre wejẽ, erã wéadigũ pohro aĩgãri umupeoñuma ñgũre. Eropirã erã erã iidigũre wecũre ñarã, mucubiri, bosenu iĩñuma. ⁴² Eropigũ Goãmũ erã wéadigũre erã umupeocũ ñagũ, erãre cóãcãriñumi. “Erã yũre cóãrã gajirã Ʃmaro majarãpũre umupeo curaporo,” arĩgũ cohãgã wariñumi. Goãmũ yare weremũhtanirã õpa arĩ gojañuma Goãmũ wereniguirire:

Mũa Israe masa, yũre ñe ñero iiabũ. Masa marirogue cuarenta bojori gohra árĩrã waimũrãre mũa wejẽnirãre mũa soenirãre yũre mũa obodiro dopa ta umupeorabũ mũa. Eropirã yũpũre umupeobirabũ mũa. ⁴³ Eropirã mũa Molo waĩcũgũre umupeorã árĩrã, ñgũre umupeori

wihire iibũ mũa. Eropirã “Refa gũa goãmũ ãhrimi,” arĩrã ĩgũ necãmũ mũa wéadigũre mũa umupeoabũ daja. Erã wéanirãre mũa iinirãre mũa umupeoabũ. Mũa eropa iira waja mũare Babilonia sipũgue cóãbeogũra yũhũ, arĩñumi Goãmũ ĩgũ ya weremũhtanirã mera.

44 “Eropirã masa marirogue Goãmũ masa mera ĩgũ árĩri wihire waimũrã gasiri wihire opamũriñuma mari ñecũ sũmarã iribojegue majarã. Iri wihi Goãmũ masa mera ĩgũ werenigũiri wihi árĩyoro. Iri wihigue Goãmũ dorerire ĩgũ gojara mijiri utã mijiri árĩyoro. Iri wihire Goãmũ ĩgũ werediro dopa ta Moiserẽ ĩgũ ĩhmũdiro dopa ta ii ĩhacũdoreñumi Goãmũ Moiserẽ. 45 Pũhrũgue majarã mari ñecũ sũmarã Josué mera iri wihire aĩgãriñuma mari árĩri yebague erarã. Erã iri yebaguere Goãmũ ĩgũ apira yebaguere erã eraboro core iri yeba majarã mũrare Goãmũ cóãcãñumi. Irisubure Goãmũre umupeori wihire waimũrã gasiri wihire opamũriñuma mari ñecũ sũmarã. Ne Davi mũrũ ĩgũ árĩcũgue opatuñuma iri wihire. 46 Eropigũ Davi mũrũ Goãmũre mucubiricũ iĩñumi. Eropigũ Goãmũ ya wihi árĩburire iidiagu Davipũ serẽriñumi Goãmũre. 47 ĩgũ eropa serẽquerecũ ta Salomopũ Davi magũpũ Goãmũ ya wihire iĩñumi. 48 ĩgũ eropa iiquerecũ ta Goãmũpũ masa erã iira wihiguere árĩbeamĩ. Ōpa arĩñumi Goãmũ werenigũirire weremũhtadigũ:

49 Ūmarogue yũ doaro ãhraa. Ero doagu dorea yũhũ. Eropiro yebapũ yũ guburire duhpeoro iro dopa ta ãhraa. Yũhũ turatariagu ãhraa. Yaha wihi árĩborore iimasibea mũa. Goãmũ yũ árĩcũ yũ árĩburi wihire mũa iimasibea. 50 Yũ basi i yebare árĩpehrero iibũ yũhũ, arĩmi Goãmũ, arĩ gojañumi Goãmũ yare weremũhtadigũ, arĩpũ Esteban. 51 Eropigũ ōpa werenemopũ Esteban erãre:

—Mũa ne yũhridiabrã ãhraa. Goãmũ yare peequererã, ĩgũre yũhridiabeaa. Espĩritu Santore tarinũgataria mũa. Mũa ñecũ sũmarã erã iidiro dopa ta iiaa mũa. 52 Mũa ñecũ sũmarã árĩpehrerã Goãmũ ya weremũhtanirãre ñero iĩñuma. Erã Goãmũ yare weremũhtanirãpũ “Pũhrũ ōagu Goãmũ yare weremũhtagũ arigũcumĩ,” arĩ erã wererã árĩcũ peeñuma mũa ñecũ sũmarã mũra. Eropa arĩ werenirã mũrare wejẽmũriñuma. Eropirã “Ōagu,” erã arĩgũre mũa sã dohpaguere ĩgũ ya curu majarã árĩquereerã ta ĩgũre wejẽabũ. 53 Goãmũ dorerire anyuapũ wereriñuma mũare. Eropirã mũa iri dorerire opariyoro. Eropirã iri dorerire tarinũgabũ mũa, arĩ werenigũitupũ pare Esteban.

Erã Estebanre utãyeri mera dea wejẽñorã

⁵⁴ Īḡu eroparīcū peerā erāpḡ buriḡā guañoṛā. Eropa turaro guarā, ḡuhyarā wañoṛā. ⁵⁵ Erā eropa guaquerēcū ta ĩḡu Espīritu Santo ĩḡu dorero dopa ta iipehogu árīḡu, ĩḡu turarire ōaro opagḡ árīḡu, ũmarogue ĩhamemuju Goāmḡ gosesirire ĩapḡ Esteban. Jesu Goāmḡ diayerḡ ĩḡu niguicū ĩapḡ ĩḡu. ⁵⁶ Eropa ĩagḡ ōpa arīpḡ

—Ūmarogue merogā ero tuweamaacū Jesu Goāmḡ obeodigḡ Goāmḡ diayerḡ ĩḡu niguicū ĩhaa yḡhḡ, arīpḡ Esteban.

⁵⁷ Īḡu eroparīcū peerā ta erā buriḡā gaguinigui, erā gamirire bihacā, yujuro mera ĩḡu pohrogue omagā, ĩḡure ñeañoṛā. ⁵⁸ Ñehatuhaja, ĩḡure aīḡā, iri maca turo pohrogue cóañorā ĩḡure. Eropirā ũtāyeri mera dea wejēcāñoṛā erā ĩḡure. Erā eropa wejēboro core ĩḡure ũtāyeri mera deamorā erā weca maja suhrire tuwea, mamure Saulo waīcḡure iri suhrire opabasadoreñoṛā erā.

⁵⁹ Eropigḡ Esteban erā ĩḡure ũtāyeri mera dea wejērisubu ōpa arīpḡ.

—Jesu yḡ Opḡ, yḡ sīporāre aīḡue, arīpḡ.

⁶⁰ Eropigḡ ĩḡu mereja ōpa arīpḡ:

—Opḡ Jesu, oā dohpague ñero erā yure iirire erāre dipuwaja moabita mḡhḡ, arīpḡ Esteban.

Eropa arītuhajagḡ ta sīria warḡ ĩḡu.

8

¹ Eropigḡ Esteban ĩḡu sīricū ĩagḡ, “Ōhaa,” arīpḡ Saulo.

Saulopḡ Jesu yarāre ñero iipḡ

Eropirā irinure ta Jesu yarāre Jerusaléngue árīrāre ñero iinḡañoṛā Jesure gamebirāpḡ. Erā eropa ñero iicū Jesu yarā Judea yebague, Samaria yebague yoarogue duhrisirigā wañoṛā. Jesu ĩḡu apinirā dihta wabiriñoṛā. ² Eropirā gajirā Goāmure umupeorā Esteban dupḡ mḡrarore yaa, buriḡā oreñoṛā erā. ³ Saulopḡ Jesu yarāre ñetariaro iimḡriripḡ. Īḡu erā ya wirigue ñaja, ũmare, nomere ñeha, peresugue bihadobomḡripḡ.

Samariague Jesu yare buhepḡ Felipe

⁴ Eropirā yoarogue wasirinirā Jesu yarāpḡ Jesu yare buheñoṛā. ⁵ Eropigḡ Felipe Samaria waīcḡuri macague eja, Jesu yare buhepḡ iri maca majarāre. ⁶ Īḡu eropa buhecū ero majarā ōaro peeñoṛā. Eropirā Goāmḡ turari mera deyoro moarire ĩḡu ii ĩhmucū ĩañoṛā erā. Eropa ĩarā ĩḡure ōaro peeñoṛā erā. ⁷ Bajarā watēa ñajasūnirāre ĩḡu pohro erā eracū ĩagḡ watēapure wadorepḡ ĩḡu. Watēapḡ buriḡā gaguinigui, duhugā waha wañoṛā erāre. Eropigḡ bajarā

dupu buhanirāre, curimasibirāre dupu ðarā iimuripu.
 8 Īgu eropa iicū ĩarā iri maca majarā bajarā masa mucu-
 biriñorā.

9 Irisubure Simo waĩcugu iri maca majagu yee arĩpu,
 Eropigu yeea erā iirare ii ihmumuripu Samaria majarāre.
 Īgu eropa ii ihmucū ero majarā ĩha uca wa ĩgure
 guhyadiaro mera ĩarā arĩñorā.

—Yuhu masipehogu āhraa, arĩpu Simopu erāre.

10 Īgu eropa iicū ĩarā masapu ðpa arĩmuririñorā:

—Ihĩ Goāmu ya turari opagu āhrimi. Goāmu iro dopa
 turagu āhrimi, arĩmuririñorā masa erā oparā mera. Erā
 arĩpehrerā ðaro peeñorā ĩgure.

11 Īgu yeea erā iiri ĩgu purisiriri mera yoari boje
 ii ihmumuripu erāre. Īgu eropa ii ihmucū ĩarā erā
 uca wamuriñorā. Eropirā erā ĩgure umupeomuriñorā.

12 Felipepu erā ĩgure eropa umupeoquerecū Goāmu ĩgu opu
 arĩrire, Jesucristo yare ðari buherire werepu. Īgu eropa
 werecū erā ĩgure ðaro peeñorā. Erā eropa ðaro peecū ĩagu
 ũma, nome mera waĩyeru Felipe. 13 Eropigu Simo ĩgu yee
 sã Felipe ðaro peepu. Eropigu ĩgu sãre waĩyeru. Īgu
 eropa iira puhru Felipe mera dujapu ĩgu. Felipepu Goāmu
 turari mera ii ihmucū ĩagu, dorecurā ðarā ĩgu iicū ĩagu
 Simo ĩha uca wamuripu.

14 Eropirā Samaria majarā Goāmu yare erā burigã gamecū
 peebeomuriñorā Jerusalengu arĩrã Jesu ĩgu apinirāpu.
 Erā eropa peebeorā Pedore, Ñu sãre obeoñorā Samariague.

15 Erogue erā ejara puhru Pedro sã Goāmure serēbasañorā.
 “Oã Samaria majarā mre umupeorā mu Espĩritu Santore
 opaporo,” arĩ, serēbasañorā erā Goāmure. 16 Erā Samaria
 majarā Jesucristo waĩ mera waĩyesũnirā arĩñorā. Iri di-
 htare masiñorā erā. Eropirā Espĩritu Santore opabiriniñorā
 dohpa. 17 Eropigu Pedro Ñu mera Samaria majarāre
 erā mojotorire erā weca duhpeora puhru Espĩritu Santore
 oranugañorā erā.

18 Eropigu Pedro sã erā ya mojotori mera erā duhpeora
 puhru Espĩritu Santo eracū ĩapu Simo yeepu. Eropa ĩagu
 arĩgu, erā turarire gamegu niyeru mera wajayediaripu.

19 Ōpa arĩripu Simo:

—Yu sãre oque i turarire. Yu sã yu mojotori mera masa
 weca duhpeodiaca Espĩritu Santore erā ñeaboro dopa.
 Eropigu i yu iiburi wajare wajayediaa, arĩripu Simo erāre.

20 Īgu eroparĩcū peegu Pedro ðpa arĩpu.

—Mu niyeru mera Goāmu ya turarire mu asũdiara waja
 mu niyeru mera ta peamegue waque muhu. 21 Goāmu mu

pepirire masimi. Mũhũ ñegũ árĩnia. Eropirgũ ire gũa iirire iimasibea mũhũ. I mũ iirino árĩbeaa. ²²⁻²³ Bũrigã peyocua mũhũ. Eropigũ mũ ñeri iirire ne duhumasibea mũhũ. Eropigũ ire mũhũ ñero iirare bujawereque mũhũ. Goãmũre mũ ñero pepirire ero diaye ta serẽque mũhũ. Mũhũ eropa iicũ ïagũ ïgũ mũ ñerire cãdijibocumi, arĩ werepũ Pedro ïgũre.

²⁴ ïgũ eroparĩcũ peegũ Simo yũhripũ ïgũre.

—Yũre serẽbasaque mũa Goãmũre mũ arĩdiro dopa yũ wabiriboro dopa. Iri waja peamegue wadiabeaa yũhũ, arĩpũ Simo ïgũre.

²⁵ Ero pũhrũ Pedro Ñũ mera Goãmũ yare wereñorã. “Jesu ïgũ masa mũriacũ ïabũ gũa,” arĩ, Samaria yeba árĩri macari majarãre õari buherire buheñorã. Erãre Goãmũ yare buhetuhaja Jerusaléngue dujaa wañorã.

Felipe Etiopía yeba majagũre buherũ

²⁶ Eropii Goãmũ ïgũ obeodigũ anyu Felipere werepũ:

—Dohpaguere õdoca surgue waque. Jerusalén pohro árĩri mague Gazague wari mague waque, arĩ werepũ anyu Felipere. Iri maha masa marirogue árĩyoro.

²⁷ ïgũ eroparĩcũ peegũ ïgũpũ iri mague waha wapũ. Pũhrũ iri mague yujugũ masũre bocatĩribu iipũ. ïgũ bocatĩribu árĩpũ Etiopía yeba majagũ opũ. Eropigũ Candace waĩcũgo Etiopía majago opo bũro yare niyerure árĩpehrerire ïhadibugũ árĩpũ. Eropigũ ïgũ Jerusaléngue mari Pagũre umupeogũ ejadi árĩpũ. ²⁸ ïgũ ya macague tũrudiru mera dujaagũ irirugue waqueregũ ta buhegu iipũ. Goãmũ yare weremũhtadigũ Isaia ïgũ gojarapũre buhegu iipũ.

²⁹ Eropigũ Espiritupũ Felipere õpa arĩ werepũ.

—Sihĩ tũrudirugue wagũ pohrogue waque, arĩpũ Espiritu Santo ïgũre.

³⁰ ïgũ eroparĩcũ peegũ, Felipepũ tũrudiru pohrogue omagã, Isaia ïgũ gojarare Etiopía majagũ ïgũ buhecũ peerpũ. Eropa peegũ Felipe serẽpipũ ïgũre.

—¿Mũ buherire masiri mũhũ? arĩpũ ïgũ.

³¹ ïgũ eroparĩcũ peegũ Etiopía majagũ õpa arĩ yũhripũ:

—Gajigũ yũre weretaugũ maricũ õaro masibea yũhũ. Ohõ yũre weredoagu ariqũe yũhũ dipaba, arĩ yũhripũ ïgũ Felipere.

—Áũ, arĩ, doajapũ ïgũ pohro. ³² Eropii Goãmũ yare Etiopía majagũ ïgũ buheripũ õpa árĩyoro:

Ovejare erã ñeha wejẽdiro dopa ta ïgũ sãre ñeha wejẽrãcoma masa. Eropigũ ovejagãre ïgũ poare erã

seacũ ĩgu gaguiniguibiro dopa ta ĩgu masu sã ejari mariro árĩgucumi. ³³ ĩgure erã wereyarãcoma. Eropirã ĩgu ĩgu ñero iibiriquerecũ ta erãpũ ñero iirãcoma ĩgure. ĩgu i yebague ĩgu árĩcũ erã ĩgure wejërãcoma. Eropigu ĩgu porã marigu sĩa wagucumi, arĩ gojara árĩyoro.

³⁴ Iripũ eroparĩcũ ĩagu, Etiopía majagu Felipere serẽpirũ:

—Wereque yũre. ¿Ōpa Isaia ĩgu arĩgu nihino árĩcuri ihĩ? ¿Isaia ĩgu basi weregu iicuri? ¿O gajigure weregu iicuri? arĩ serẽpirũ Etiopía majagu.

³⁵ ĩgu eropa serẽpi ĩacũ peegu Felipe iripũre ĩha, Jesu yare werepũ Etiopía majagure. ³⁶ Eropirã erã iriru mera waha, maugãgue ejañorã.

—Īaque. Ohõ maugã ãhraa. I maugãgue yũre waĩyeque, arĩpũ Etiopía majagu.

³⁷ —Jesure muhu ðaro umupeocũ ĩagu mũre waĩyegura, arĩpũ Felipe ĩgure.

—Jesure umupeoa yũhu. ĩgu Cristo Goãmu magu ãhrimi. Irire ðaro masia yũhu, arĩpũ Etiopía majagu.

³⁸ Eropa arĩgu ta ĩgu tũrudiru autugure yaudorepũ. Iriru yusumerejara pũhrũ wiriañorã erã. Wiria waha, iriyagãgue eja, ñumu wiri nũgajañorã. Ero ñumunũgaja, Felipepũ ĩgure waĩyepũ. ³⁹ Waĩyetuhaja erã majajanũgajacũ Goãmu ĩgu Espĩritu Felipere aĩgã wapũ. ĩgu eropa wara pũhrũ Etiopía majagu ðaro mucubirigu ĩgu ya yebague dujaa wapũ. ĩgu eropa iira ujutuyacũ ne dipaturi Felipere ĩabiripũ. ⁴⁰ Felipepũ eropa iituhaja Azotogue ejapũ. Eropigu baja macarire ðari buherire buhepũ masare. Pũ Cesareague buhetumũripũ.

9

Saulo Jesucristore ĩagu ĩgure umupeonũgarũ

¹ Irisubure Saulo Jesu yarãre ĩhaturigu, “Erãre wejẽgura,” arĩgu, ĩgu opu pohrogue wapũ. ² Eroque ejagu ĩgu gojarapũrire serẽpũ pahia opu. Ōpa arĩpũ:

—Damasco maca maja wirigue mari buheri wirigue Jesu yarãre, umare, nomere yũhu erãre bocaia, ñeha dihri, Jerusalengue aĩgãrigura. Iri wirigue árĩrãre yũ erãre ñeaburipũre paperapũre yũre goja oque, arĩ serẽpũ pahia opu.

³ Iripũre aĩtuhaja, waha, ĩgu Damasco pohro ĩgu ejabu iicũ gohra umaro maja goesisiri medijuyoro ĩgure.

⁴ Eropa goesisiri medijucũ ta ĩgu yebague mehmerejagu, wereniguicũ peepũ.

—Saulo, Saulo, ¿duhpigu mũhũ yũre ñero iiri? arĩro cariyoro.

⁵ —Opũ, ¿nihino āhriri mũhũ? arĩpũ Saulo.

—Yũhũ mũ ñero iigu ta āhraa arĩpũ Jesu. Mũhũ yũ mera guagu yũre yũhribigu, mũ basi ta ñero tariaa, arĩpũ Jesu Saulore.

⁶ Īgu eroparĩcũ Saulo güiri mera naragānijagu õpa serẽpipũ:

—Opũ, ¿dohpa yũhũ iicũ gahmeri mũhũ? arĩpũ Saulo.

Īgu eroparĩcũ õpa arĩpũ Jesu ĩgũre:

—Wahgānũgajaque mũhũ. Macague waque. Iri macague ejacũ ero majagu mũ iiburire weregũcumi mũre, arĩpũ Jesu Saulore.

⁷ Īgu eroparĩcũ Saulo mera majarãpũ ĩgu wereniguiiri dihtare peeñorã. Jesupũre ĩabiriñorã. Īgu eropa wacũ ĩarã güirã erã wereniguimasibiriñorã. ⁸ Eropigu Saulo yebague oyadigu wahgānũgaja, ĩgu ĩacũ ĩgu cuiiri deyobiriyoro. Eropirã erã ĩgu mojtore ñeha, Damascogue tũã wahgã wañorã erã ĩgũre. ⁹ Eropigu ĩgu ũhrenũ gohra ne ĩabiri, babiri, ne ihribiripũ.

¹⁰ Eropii Jesu ĩgu buhegu Ananía waĩcũgu Damasco arĩpũ. Eropigu Jesu dehyoapũ Ananiare. Eropa dehyoagu piyupũ ĩgũre:

—Ananía, ¿āhriri? arĩpũ Jesu ĩgũre.

—Āhraa yũ, arĩ yũhripũ Ananía ĩgũre.

¹¹ Īgu eroparĩcũ Jesu ĩgũre wererũ.

—Diaye waĩcũri mague waque. Eropa wagu Juda ya wihigue Tarso majagũre Saulo waĩcũgũre amaque. Īgu Goãmũre serẽniguigu iicumi. ¹² Eropigu quẽro dopa ta ĩgu ĩarare ĩagu iicumi eroguere. Őpa arĩĩre ĩagu iicumi. Mũhũ mũ mojtore ĩgu weca duhpeo, ĩgu cuiiri õaro wacũ ĩagu iicumi ĩgũre dehyoarare, arĩpũ Jesu Ananiare.

¹³ Īgu eroparĩcũ peegũ Ananiapũ õpa arĩpũ:

—Opũ, ĩgu mũ yarãre õarãre Jerusalén majarãre ñero iiapũ. Bajarã masa yũre eropa arĩ wereama. ¹⁴ Eropigu õre ĩgu arĩpehrerã mũre umupeorãre peresu iigu arigu iiapũ. Pahia oparã ĩgũre eropa iidoreañorã, arĩpũ Ananía Jesure.

¹⁵ Īgu eropa arĩquerecũ Jesupũ wererũ ĩgũre.

—Īgu Saulopũ yũ beyedigu āhrimi. Īgu yaha buherire baja macari majarãre, oparãre, Israe masa sãre buhegũcumi. ¹⁶ Eropigu bajasuburi yahare ĩgu buheri waja ĩgu ñero tarigũcumi. Irire ĩgũre masicũ iigũra. Eropigu waque mũhũ, arĩpũ Jesu Ananiare.

17 Īḡu eropa arīra pūhrū Ananíarū, waha eja, Saulo ĭḡu árīri wihigue űajaja warū. űajaja, ĭḡu mojtore Saulo weca duhpeo, werepū ĭḡure:

—Acawereḡu Saulo, mari Opū Jesupū mague mure dehyoadiḡu yure obeoami mū cuirī mū ĭaboro dopa. Espírītu Santore mū opaboro dopa, ĭḡu dorediro dopa mū ĭaboro dopa yure obeoami mū pohrogue, arī werepū Ananía Saulore.

18 Īḡu eroparīcū ta ĭḡu cuirire wai nūturī dopa bejarire ĭḡu cuirire cohrodijacū ĭarū pare Saulo. Īḡu eropa ĭatuhara pūhrū ĭḡu wahḡānūḡajacū ḡajigūpū waīyerū ĭḡure. 19 Eropiḡu ĭḡu, ĭḡu bara pūhrū turagū warū.

Saulo Damascogue Jesu yare buhenūḡarū

Eropii bajamenūri Damascogue Jesu yarā mera árīmūripū Saulo. 20 Eropiḡu irisubure ta ĭḡu judio masa buheri wiri árīḡu, Jesu yare buhepū masare. “Jesu Goāmū magū ta āhrimi,” arī werepū Saulo. 21 Īḡu eropa werecū ĭarā árīpehrerā ĭḡure peerā űca wañorā.

—Īhī Goāmū yarāre Jesure umupeorāre űero iidigū āhrimi. Eropiḡu ĭḡu erāre űeha, dihri, pahia oparāre odiadigū árīrimi. Eropiidiagū ōḡuere aridigū árīrimi, arīñorā masa ĭḡure peerā.

22 Erā eroparīquerecū Saulo ḡūiro mariro turaro mera buhenūḡarū. Judio masare Damasco majarāre ōaro werepū. “Īhī Jesu diaye ta Cristo marire taubu āhrimi,” ĭḡu arī werecū erāpū ĭḡure “ḡūyagū iimi ihī,” arīmasibiriñorā ĭḡure.

Saulo duhri wahḡāpū judio masare

23 Eropirā bajanūri pūhrū judio masa ĭḡure wejēdiañorā. Eropirā erā basi gamenere ĭḡure erā wejēburire wereniḡuiñorā. 24 Eropirā ĭḡure wejēdiarā, iri maca maja disiporore űmure űami sāre coremūriñorā. Saulo wiricū ĭha wejēmorā coreñorā. Erā eropa wejēdiaquerecū Saulo erā wejēdiarire masipū ĭḡu mera majarā mera. 25 Eropirā űamigue Saulo buherā ĭḡure puibu wūari puibu mera aīsā, iri maca maja sāriro pūrūpūḡue duhudijucāñorā ĭḡure.

Saulo Jerusalén árīpū

26 Eropiḡu Saulo Jerusalēḡue eḡagū, erogue Jesu yarā mera ĭḡu árīdiaripū. Īḡu eropa árīdiacū erā ĭḡure “Jesure umupeoḡu árībeamī ihī,” arīñorā. ĭḡure ḡūi arīñorā. 27 Erā eropa ḡūiquerecū ta Bernabēpū ĭḡure aīḡāpū Jesu ĭḡu apinirā pohrogue. Eropiḡu Saulo mague Jesure ĭḡu ĭarare, Jesu mera ĭḡu wereniḡuirare, Damascogue ḡūiro mariro

Jesu yare ĩgu buhenugare werepũ Bernabépu. ²⁸ ĩgu eropa werera pũhrũ Saulo erã mera ñajagu, Jerusalengue erã mera árĩmũripũ. ²⁹ Eropigu ĩgu güiro mariro Jesu yare buhepu. Eropigu ĩgu judio masare Jesu yare weretarinugagu ĩpu. Erã judio masa griego masa ya wereniguirã árĩñorã. Eropirã Saulo ĩgu eropa weretarinugari waja ĩgure wejẽdiañorã. ³⁰ Erã eropa wejẽdiacũ ĩarã, Saulo mera majarã Jesu yarãpu ĩgure Cesareague aĩduhrigã waha wañorã. Eroque ĩgure sihu árĩniguirĩ Tarsogue obeoñorã erã ĩgure.

³¹ Eropi árĩpehrerogue Judea yebague, Galilea yebague, Samaria yebague Goãmu yarã ðaro árĩmũriñorã. Irisubure ne masa ñero iibirimũriñorã erãre. Eropirã ðaro buheñorã erã. Eropirã erã Goãmure gũhyadiaro ĩañorã. Espĩritu Santo erãre ĩgu itamucũ erãpu Jesure umupeorã bajarã wañorã.

Pedro Eneare ðagu wacũ ĩpu

³² Eropii Pedro árĩpehreri macarigue wagu, Jesu yarã Lida majarã pohrogue sãre ejarũ ĩgu. ³³ Eroque ejarũ Enea waĩcũgure bocajaru. Enea ðupu buhadigu árĩgu, ocho bojori gohra erã pũtãpidi oyamũripũ.

³⁴ Eropigu Pedropũ ĩgure ðpa arĩpu:

—Enea, Jesucristo ðagu árĩcũ iimi mũre. Wahgãnugaque. Mũre pũtãpira gasirore amuque, arĩpu Pedro ĩgure.

Ĩgu eroparĩcũ ta ĩgu wahgãnugaja waha wapu. ³⁵ Eropirã árĩpehrerã Lida majarã, Sarón majarã ĩgure ĩarã, erã erã ñeri iirare duhu, Jesure umupeoñugañorã.

Dorca waĩcũgore masupu Pedro Jesu turari mera

³⁶ Eropii Jope waĩcũri macague Jesure umupeogo Tabita waĩcũgo árĩpo. Igo waĩ Tabita griego ya wereniguirĩ mera Dorca ãhraa. Igo ðarire iigo baja omũripo masare. ³⁷ Eropigo irisubure igo dorecu wahgũ, sĩria wamũripo. Igo sĩricũ ĩarã, erã igo ðupu mũrarore ðaro coe, umaro maja taribugue apiñorã igore. ³⁸ Lida waĩcũri maca Jope pohrogue árĩyoro. Ero eropa árĩcũ Jesure umupeorã Jope maca majarã Pedro Lidague ĩgu árĩcũ peebeoñorã. Eropa peebeorã perã umare obeoñorã Pedro pohrogue. ĩgu pohrogue ejarã wereñorã Pedrorẽ erã.

—Yojaro mera waque gũa arĩrogue, arĩ wereñorã erã.

³⁹ Erã eroparĩcũ peegu erã mera waha wapu ĩgu. Eroque ĩgure erã aĩ ejara pũhrũ umaro maja taribugue sĩridigo pohro aĩmũria wañorã ĩgure. Pedro árĩcũ ĩha árĩpehrerã wapeweyarã nome orerã ĩgu pohro ejanugamũriñorã.

Tabita erã mera árĩnigogue baja suhrire iibasamuripo. Eropirã erã igo eabasara suhri murare ãhmuñorã Pedrore. ⁴⁰ Pedro erãre iri taribugue árĩrãre wiriadorepũ. Erã wiriara pũhrũ ãgũ mereja, Goãmũre igore serẽbasapũ. Eropigũ igo dũpũ murarore maji ãha,

—Tabita, wahgãque, arĩpũ ãgũ.

Ãgũ eroparĩcũ ta igopũ ãha wahgũ, Pedrore ãha, wahgã doajapo. ⁴¹ Igo eropa wahgã dojacũ ãha, ãgũ igo mojtore ñeha tarawahgũ nugupũ igore. Eropigũ ãgũ ero majarãre Jesu yarãre, wapeweyarãre sihubeo, igore ojocarigore wiapũ erãre. ⁴² ãgũ eropa iira pũhrũ árĩpehrerã Jope majarã irire masirã bajarã masa Jesure umupeonũgañorã. ⁴³ Pũhrũ Jopegue Simo waimurã gasire amugũ mera bajanuri Pedro ãgũ mera árĩpũ.

10

Pedro Corneliore Jesu yare werenũgarũ

¹ Irisubure Cesareague Cornelio waĩcũgũ árĩgũ. ãgũ cien surara opũ árĩpũ. Erã surarapũ erã ya curu Italiano waĩcũyo ro. ² Cornelio ãgũ ya wihi majarã mera mari Pagure umupeorã, guhyadiaro ãarã árĩñorã. Eropigũ ãgũ judio masa mojomorocũrãre itamugũ baja gajinore omuripũ. Eropigũ ãgũ umuri nũcũ mari Pagure serẽmaripũ. ³ Eropii ñamicague tres árĩcũgue Goãmũ yagũ anyu ãgũre dehyoapũ. Eropa dehyoagũ Cornelio pohroque ñajajapũ.

—Cornelio, arĩ piyupũ anyu ãgũre. ⁴ Eropigũ Cornelio ãgũre ãha gũigũ õpa arĩpũ:

—Opũ, ¿ñehenore gahmeri? arĩpũ ãgũ.

—Masare mũ orare, mari Pagure mũ serẽniguirare Goãmũ peeami. ⁵ Eropigũ Jopegue mũ umare obeoque. Erogue Simo Pedro waĩcũgũ ãhrimi. ãgũre aĩgãridoreque mũ umare. ⁶ ãgũ gajigũ Simo waimurã gasiri amugũ pohro, wũariya tũro árĩri wihi ta ãhrimi, arĩpũ anyu Corneliore.

⁷ Anyu eropa arĩtuhaja, wiria waha wapũ. ãgũ wiriara pũhrũ Cornelio perãre ãgũre itamurãre yujugũ ãgũ surara mera majagũre sihupũ. Surarapũ Goãmũre umupeogu árĩgũ, umuri nũcũ Corneliore itamudigũ árĩpũ. ⁸ Eropigũ Cornelio erãre werepeho, Jopegue obeopũ erãre.

⁹ Eropi gajinũ Jopegue erã warisubu goeri boje gohra árĩcũ Pedropũ wihi wecague Goãmũre serẽgũ wapũ. ¹⁰ Eropigũ ãgũre oa pũricũ badiapũ. Eropigũ gajirã barire erã moarisubu ãgũpũ dehyoacũ ãapũ. ¹¹ Ũmarore pãrimaacũ, wũari gasiro wapicũrisubu pepuri ojogorori dirira gasiro dijaricũ ãapũ. ¹² Iri gasiro pohecague bajarã

waimurã nuḡu majarã, yebague paha curirã, mirimagu porã majarã arĩñorã. ¹³ Irire ĩḡu ĩara puhrũ, Pedrore wereniguiro caricũ peepũ.

—Pedro, wahgãnuḡajaque. Oãre wejẽ baque, arĩro cariyoro ĩḡure.

¹⁴ ĩḡu eroparĩcũ peequereḡu ta Pedro õpa arĩpu:

—Opũ, ne erãre babeaa yuḡu. Ñerãre, Goãmu ĩḡu badorebirinirãre ne babirimurabũ yuḡu, arĩpu Pedro.

¹⁵ Eropiḡu Pedro dipaturi wereniguiro caricũ peepũ.

—Goãmu, “Õarã åhrima,” ĩḡu arĩnirãre “Ñerã åhrima,” arĩbircãque muḡu erãre, arĩro cariyoro Pedrore.

¹⁶ Eropii uḡresubu eropa arĩ wereniguiro puhrũ iri gasiro umarogue muria wayoro daja. ¹⁷ Eropiḡu Pedro burigã guña “¿Dohpa arĩdiari iiri yure eropa dehyoaro?” arĩ pepipu ĩḡu ĩḡu basi. ĩḡu eropa pepirisubu Cornelio uma ĩḡu obeonirãpu Pedro ya wihigue ejañorã. “¿Simo ya wihi nohogue åhriri?” arĩ, erã serẽpira puhrũ ĩḡu ya wihigue ejañorã erã. ¹⁸ Eropirã erã serẽ ĩha purumujuñorã. “¿Simo Pedro waĩcuḡu i wihire åhriri?” arĩ serẽpi ĩañorã erã.

¹⁹ Eropiḡu Pedro ĩḡu pepirisubu Espĩritu Santo ĩḡure werepu:

—Īaque. Urerã uma mure amarã iima.

²⁰ Wahgãnuḡajaque. Dijaque. Erã mera waque. “¿Dohparĩri?” arĩ pepibigu ta waque õaro mera. Yuḡu erãre õguere obeoabũ, arĩpu Espĩritu Santo Pedrore.

²¹ ĩḡu eroparĩcũ peegu Pedro erã pohrogue dija wa,

—Īaque. Ohõ åhraa yuḡu mua amagãrigu. ¿Duhpirã arirã iiari mua yu pohro arirã? arĩpu Pedro erãre.

²² ĩḡu eroparĩcũ ta erãpu õpa arĩñorã.

—Cornelio cien surara opu, õarire iigu, mari Pagure guhyadiaro mera umupeogu, arĩpehrerã judio masa “Õagu” erã arĩḡu mure sihuḡãridoreḡu obeoami guare. Goãmu õagu anyu Corneliore mure sihudoreapu. Opa arãpu: “Pedrore mua ya wihigue aĩḡãridoreque mu umare. Eropii ĩḡu mure wereḡucumi,” arĩ, sihudoreapu anyu Corneliore, arĩ wereñorã Cornelio Pedrore ĩḡu sihudorenirãpu.

²³ Erã eroparĩcũ Pedropũ erãre ñajaridore, bari oho, ĩḡu ya wihigue carĩdorepu erãre. Eropiḡu gajinu Pedro wahgã, erã mera waha wapũ. Eropirã gajirã Cristo yarã Jope majarã Pedrore wapicugãñorã.

²⁴ Gajinu erã Cesareague ejañorã. Eropiḡu Corneliopũ ĩḡu acawererãre, ĩḡu mera majarã sãre sihu gameneo, Pedrore corepu. ²⁵ Eropiḡu Pedro Cornelio ya wihi pohrogue ĩḡu aricũ ĩagu Corneliopũ ĩḡure bocatĩri wiria, ĩḡu guburi

pohro merejapu. ²⁶ Īgu eropa iicũ Pedropu ĩgure aĩ wahgũnugupu.

—Niguique mahu. Yu sã mu iro dopa ta arĩgu aħraa. Goãmu arĩbeaa, arĩpu Pedro ĩgure.

²⁷ Īgu eropa arĩtuhajara puhru Cornelio ĩgure aĩñaja wapu ĩgu ya wihigue. Eroque ñajajagu masa bajarã iri wihigue gamenere ĩgure corerãre ĩapu Pedro. ²⁸ Eropigu Pedro erãre werepu:

—Judio masu arĩqueregu ta gaji curu majarã mera arĩgu gua dorerire tarinugagu iiaa yuhu. Irire ðaro masia mu. Eropigu gaji curu majarãre “Ñerã aħrima,” arĩdorebirami Goãmu. Opa arĩ wereami ĩgu yure. ²⁹ Īgu eroparĩcũ peegu õguere mu pohroguere aħrabu. Mu yure sihubeocũ “Ne wasome,” arĩbirabu. ¿Dohpa arĩronore yuhu õgue aricũ gahmeari mu? arĩpu Pedro erãre.

³⁰ Īgu eroparĩcũ peegu Cornelioru ðpa arĩpu:

—Tres arĩcũ i horano gohra ta mari Pagu yagu anyu yure dehyoami. Wapicarinu wahaa ĩgu yure dehyoara puhru. Irinu ta mari Pagure yu serẽniguirisubu cuim-ijuri suhricugu yu pohro dehyonugajami. ³¹ Eropigu ĩgu yure ðpa arãmi: “Cornelio, mahu mari Pagu mera mu serẽcũ ĩgu peeami. Eropigumojomorocurãre erã gamerire mu ocũ ĩagu mari Pagu mu mera mucubirigu itamugucumi. ³² Eropigu Jopegue mu umare obeoque Simo Pedro waĩcugure mu pohroque erã aĩgãricũ. ĩgu gajigu Simo waimarã gasiri amugu ya wihi, wuariya turo pohro arĩri wihi aħrimi ĩgu. ĩgu mu pohro eragu mure weregucumi,” arĩ wereami ĩgu yure. ³³ ĩgu eroparĩcũ peegu yu umare mure aĩgãridoregu obeoabu yuhu. Eropigu ðaro iigu aħraya mahu gua pohroguere. Eropirã gua arĩpehrerã õre mari Pagu ĩgu ĩhabeoro arĩrã iiaa gua. Arĩpehrerire mari Pagu Goãmu mure ĩgu weredorera peediarã, cohreabu gua, arĩpu Cornelio Pedroru.

Pedro Jesu yare werepu Cornelio ya wihi majarãre

³⁴ ĩgu eroparĩcũ peegu, Pedro ðpa arĩ werepu:

—Dohpague masia pare. Diaye ta aħraa. Goãmu yujuropa ta ðaro iimi marire. ³⁵ Eropigu arĩpehreri macari majarã Goãmure guhyadiaro erã ĩacũ, õarire erã iicũ, Goãmupu erãre mucubirimi. ³⁶ Goãmua gua judio masa pohro Jesucristore obeomi. Masa Goãmua mera ðaro erã arĩboro dopa Jesupu ðari buherire weremi. Iri buherire mu masia. Jesucristopu arĩpehrerã masa opu aħrimi. ³⁷ Ñu waĩyegu “Mu ñerire bujawereque. Eropirã waĩyenirã arĩque,” masare ĩgu eropa arĩ werera puhru

Galileague ðari buherire Jesupu werenugami. Puhru Judea yebague iri buherire werepehomi. ³⁸ Ihĩ Jesu Nazare majagure Goãmupu igu turarire, Espiritu Santo mera igu iimasiburire odi arĩmi Jesure. Eropigu Jesu ðaro iigu wami. Eropa wagu watẽa ñajasunirãre, ñero tarirãre, arĩpehrerãre ðarã wacũ iimi. Mari Pagu Jesu mera arĩdi arĩmi. ³⁹ Judea yeba, Jerusalén sare arĩpehreri igu iirare gua ĩabũ. Puhru erã crusague pabia wejẽma igure. ⁴⁰ Eropigu uhrenu waboro Goãmu igure masudi arĩmi. Eropigu Jesure igu masura puhru gajirãre dehyoacũ iidigu arĩmi mari Pagu. ⁴¹ Irisubu Jesure arĩpehrerã ĩabirima. Guare bajamerãgãre dehyoami. Mari Pagu igu gamerãre, Jesure ĩamorãre iribojegue Goãmu guare beyepu. Guapu Jesu igu siridi masara puhru igu mera baha, ihribũ. ⁴² Eropigu igu guare doremi ðpa arĩgu: "Masare wereque. Yuhu Jesu arĩpehrerã ojocarirãre, sirinirãre erãre dipuwaja moabu yu arĩcũ iiami yure Goãmu. Eropirã irire wereque," arĩ doremi Jesu guare. ⁴³ Arĩpehrerã Jesure erã umupeocũ ĩagu Goãmu erã ñerire cãdijigucumi. Irire arĩpehrerã Goãmu ya weremuhtanirã iribojegue majarã wereyuñuma, arĩ werepu Pedro.

Judio masa arĩbirã Espiritu Santore opanugañorã

⁴⁴ Iri arĩpehrerire igu eropa arĩ wererisubu, arĩpehrerã irire peerã mera Espiritu Santo arĩnugamuripu. ⁴⁵⁻⁴⁶ Eropirã erã judio masa arĩbirã peeyamariri wereniguiri mera mucubiriri mera wereniguinugañorã. Erã ya wereniguiri mera "Goãmu turagu, ðagu ahrimi", arĩrã iĩnorã. Erã eroparĩcũ peepu Pedro igu acawererã judio masa mera. Eropirã Espiritu Santo judio masa arĩbirã mera igu arĩnugacũ ĩarã judio masapu uca wañorã. Eropigu Pedro ðpa arĩ werepu judio masare:

⁴⁷ —Mari iro dopa ta Espiritu Santore opama oã sã. Erã eropa opacũ ĩarã oãre waĩyedoremasia mari, arĩpu Pedro erãre.

⁴⁸ Eropa arĩtuhaja Jesu waĩ mera judio masa arĩbirãre waĩyedorepu Pedro. Erã eropiira puhru "Gua mera baja-menurigã dujanique," arĩñorã erã Pedro sare.

11

Pedro Jerusalén majarãre Jesu yarãre werepu

¹ Eropii judio masa arĩbirã sã Goãmu yare erã ðaro gamecũ Jesu igu apinirãpu erã acawererã Judeague arĩrã mera peebeoñorã. ² Eropirã Pedro Jerusalengue igu dujajacũ ĩarã judio masa Jesu yarã bajamerãgã igure ðpa

arĩñorã: ³ —¿Judio masa árĩbirã pohro duhpigu ejari mũhũ? ¿Dohpa árĩronore erã mera bahari mũhũ? arĩ turiñorã erã Pedrore.

⁴ Erã eroparĩcũ peegu Pedro ĩgu iirare werepehopũ erãre.
⁵ Ōpa arĩ werepũ:

—Yũhũ Jopegue árĩgu Goãmure serēgu iibũ. Eropigu yure ōpa dehyoabũ. Yũhũ ĩacũ wũari gasiro wapicũrisubu pepũri dirira gasiro ũmarogue yũ pohrogue dijaricũ ĩabũ.
⁶ Eropigu iri gasirore ōaro ĩabũ “¿Ñeheno iri gasiroguere āhriri?” arĩbũ. Eropigu ĩabũ iri gasiroguere árĩrãre. Waimurã nũgu majarãre, yebague paha curirãre, mirimagũ porã majarãre ĩabũ. ⁷ Eropigu Goãmũ ĩgu yure werenigu-irire peebũ. “Pedro, wahgãnũgaque. Wejẽ baque oãre,” arĩgu carimi yure. ⁸ ĩgu eroparĩcũ peegu ōpa arĩbũ yũhũ. “Opũ, ne erãre babeaa yũhũ. Ñerãre Goãmũ badore-birinirãre ne babirimurabũ yũhũ,” arĩbũ yũpũ. ⁹ Eropigu ũmarogue yure dipaturi wereniguigu carimi daja. “Goãmũ ĩgu ‘Ōarã āhrima,’ ĩgu arĩrãre ‘Ñerã āhrima,’ arĩbircãque mũhũ,” arĩgu carimi yure. ¹⁰ Eropigu ũhresubu ĩgu eropa arĩ wereniguira pũhrũ iri gasiro dipaturi mũria wabũ daja. ¹¹ Yũ eropa ĩarisubu ta ũrerã ũma gua árĩri wihigue ejanirã árĩma. Erã Cesarea majagu ĩgu obeonirã árĩnirã árĩma. ¹² Eropigu Espĩritu Santopũ yure erã mera wadoregu “ ‘Erã ñerã āhrima,’ arĩbircãque erãre,” arĩ weremi ĩgu yure. Eropirã oã seis mera yũ acawererã mera Cesarea majagu ya wihigue ñajajabũ gua. ¹³ Eropigu ĩgu guare ōpa arĩ weremi. “Anyu yaha wihi dehyoacũ ĩabũ yũhũ. Ōpa weremi yure. ‘Jopegue Simo waĩcũgure aĩgãridoreque. ¹⁴ ĩgu mũare mũ acawererã mera mũare árĩpehrerãre peamegue wabonirãre mũa tariborore weregũcumĩ,’ arĩmi anyu yure,” arĩ weremi yure Cesarea majagu. ¹⁵ Eropii yũhũ erãre wereniguirisubu Espĩritu Santopũ erã mera árĩnũgami marire ĩgu iimũhtadiro dopa ta. ¹⁶ Eropigu Jesu ĩgu wererare guñabũ yũhũ. Ōpa arĩ weremi ĩgu: “Ñũ mũare waĩyegu deco mera waĩyemi. Yũpũ iri tauro iigũra mũare. Pũhrũ Espĩritu Santore mũa mera árĩniguicũ iigũra,” arĩ weremi. ¹⁷ Eropigu Jesucristo mari Opũre mari umupeocũ ĩagu Goãmũ ĩgu Espĩritu Santore ohãmi marire. Eropigu Goãmũ marire ĩgu Espĩritu Santore ĩgu odiro dopa ta judio masa árĩbirã sãre ĩgu ohãmi. Goãmũ ĩgu eropa iicũ ĩagu ĩgure tarinũgamasibea yũhũ, arĩpũ Pedro erãre judio masare Jesu yarãre.

¹⁸ ĩgu eroparĩcũ peerã, erã ĩgure ne arĩnemobiriñorã.

Īgure erā turimasibiriñorā. Eropirā erā Goāmure mucubirirā,

—Goāmū ðagū, turagū āhrimi, arīñorā.

Ōpa arīnemoñorā erā:

—Judio masa árībirā sā erā ñerire bujawererā árīrā Goāmū ĩgū taunirā árīrācoma. Eropa ĩgū taunirā árīrā erā sā ũmuri nꝑꝑ ĩgū mera árīniguirācoma, arīnemoñorā erā.

Antioquía gajirā Jesu yarā árīñorā

¹⁹ Eropii Estebanre erā wejēra pūhrū masa Jesu yarāre ñero iñorā. Erā eropa iicū ĩarā Jesu yarā duhrisirigā wañorā. Eropirā erā Feniciague, Chipregue, Antioquíague waha, judio masa dihtare Goāmū yare wereriñorā erā.

²⁰ Gajirāpū Jesu yarā mera majarā Chipre majarā, Cirene majarā Antioquíague eja, judio masa árībirāre Jesu yare buheñorā Goāmū erāre ĩgū tauboro dopa. ²¹ Eropigū mari Opū erāre itamupū. Eropirā masa bajarā Jesure umupeo, ðaripure gohrotoñorā.

²² Eropii “Antioquía majarāgue Jesure gamecoma,” arī peebeoñorā Jerusalén majarā Jesu yarā. Erā eropa peebeora pūhrū Jerusalén majarā Bernabé waicūgure Antioquíague obeoñorā. ²³ Eropigū ĩgū Antioquíague ejaḡ, Goāmū itamuri mera judio masa árībirā ĩgū yarā erā wacū ĩagū, būrigā mucubiripū. Eropigū ĩgū ero majarāre ōpa arī werepū:

—Jesure eropa umupeoniguicāque. ĩgū yare ne duhubiricāque, arī werepū ĩgū árīpehrerāre erāre.

²⁴ Bernabé ðagū árīḡ, Espíritu Santore wꝑaro opagū árīḡ, Jesu doreldiro dopa iḡḡ árīḡ Jesure ðaro umupeodigū árīpū. Eropirā ĩgū buhera pūhrū bajarā masa Jesure umupeoñorā.

²⁵ Pūhrū ĩgū Tarso waicūri macague Saulore amagū wapū. ²⁶ Erogue ĩgure bocajapū. ĩgū bocajara pūhrū Antioquíague aḡḡpū Saulore. Erogue erā ejara pūhrū yuju bojori gohra erā Goāmū yarā mera gamenere, bajarā masare buhemuriñorā erā. Eropirā Antioquíague Cristo yarā Cristiano waicūnūgañorā.

²⁷ Irisubure Goāmū ya weremūhtarā Jerusalén árīnirā waha, Antioquíague ejañorā. ²⁸ Eropigū erā mera majagū Agabo waicūḡ Jesu yarā watope niguḡ, Espíritu Santo ĩgū turari mera werepū erāre. “Árīpehreri yebaguere būrigā oanū waroca,” arī wereyupū ĩgū. Irisubure bari maririsubu árīcū árīpehrerā weca opū Claudio árīpū. ²⁹ Eropirā Jesu yarā árīpehrerā erā oparopē erā acawererāre odiarā erā basi game wereniguiñorā. “Judea yeba majarāre Jesu yarāre niyerure obeorā,” arīñorā erā basi.

³⁰ Erã eropa arĩra pũhrũ Bernabé Saulo mera erã iri niyerure aĩgãbasañorã. Eroque ejarã Judea majarãre Jesu yarãre wiañorã iri niyerure.

12

Pedrore peresu iĩñorã

¹ Irisubu opũ Herode yujurãyerire Jesu yarãre ñero iinũgapũ. ² Eropigu ĩgu Ñũ tĩgũre Santiagopũre matamiji mera ĩgu wejẽdorecũ gajigũpũ ĩgũre wejẽpũ. Santiagore ĩgu wejẽcũ judio masa mucubiriñorã. ³ Erã mucubiririre Herode masigu, “Eropa dihta iicũ gahmema erã,” arĩgu Pedro sãre peresu iipũ. Irinũrere bũgabiriri pan erã bari bosenu Pascua arĩyoro. ⁴ Eropigu Herode Pedrore ñeha, peresu iipũ. Eropigu diez y seis surarare ĩhadibudorepũ ĩgũre. Wapicũrã surara ĩgũre ĩhadibumũriñorã. Pũhrũ wapicũrã erã gohrotonirã ĩgũre ĩhadibumũriñorã. Eropa ta iĩñorã erã diez y seis surara. Herodepũ Pascua pũhrũ Pedrore peresugue arĩgũre masa core duhudobodiaripũ ĩgũre wejẽdorebu. ⁵ Eropigu Pedro peresugue arĩpũ. ĩgu erogue arĩcũ ta Jesu yarãpũ Goãmũre bũrigã serẽbasañorã ĩgũre.

Goãmũ peresugue arĩgũre Pedrore wiupũ

⁶ Iri ñamire ta Pedro comedari peda mera erã diridigu perã surara watope carĩgu iipũ. Eropirã perã surara disiporo coreniguiñorã ĩgũre. Eropigu iri ñami boyoro Herode Pedrore judio masa core duhudobodiaripũ ĩgũre wejẽdorebu. ⁷ Eropigu Goãmũ anyupũ Pedro carĩgu pohro ĩgu niguicũ ĩgu peresu arĩri taribu boyopehrea wayoro. Eropigu anyu Pedro pohro niguigu ĩgu patorere puucarepũ ĩgũre.

—Duru wahgãque, arĩpũ ĩgu Pedrore. ĩgu eroparĩcũ ta ĩgu mojotorire erã dirira comedari pãrisiri dija wayoro.

⁸ Eropigu anyu ĩgũre werepũ:

—Mũ ya suhrire sañaque. Mũ zapatu sãre sañaque, arĩpũ ĩgu.

Ĩgu eroparĩcũ Pedropũ ĩgu arĩro dopa ta iipũ.

—Mũ weca majañe suhrirore saña, yũ mera arique, arĩpũ anyu.

⁹ ĩgu eroparĩcũ iri taribugue arĩdigũ wiria anyu pũhrũ waha wapũ ĩgu. Eropa waqueregũ ta õpa arĩ pepiripũ ĩgu. “¿I diaye arĩbiricuri? ¿O quẽgũ iicuri yũhũ?” arĩ pepiripũ ĩgu. ¹⁰ Eropirã erã ĩgu arĩri taribu pohro niguirã surarare tarigã, gajirã yoañariro niguirã sãre tarigã, wũari disiporogue ejañorã. Iri disiporo macague wari mare

cāhmotayoro. Iri biharise irise basi pāricũ erã wiriañorã. Wiria wa erã mague waha wañorã. Anyupũ waha wapũ. Eropigu Pedro yujugũ ta dujapũ. ¹¹ Eropa ïgũ anyu ïgũ wara pũhrũ ïgũ iirare Pedro masipũ pare. Ōpa arĩ pepipũ ïgũ. “Anyu Goãmũ ïgũ obeodigu peresugue árĩgure yũre wiugũ erami. Dohpague irire masia ïgũ eropa iirare. Judio masapũ yũre erã ñero iidiarare Goãmũpũ erãre iidorebirami. Eropigu yũre Herode ïgũ peresu iidigure wiuami,” arĩ pepipũ Pedro.

¹² ïgũ eropa arĩ pepira pũhrũ María Ñu pago ya wihigue ejapũ Pedro. Ñupũ Marco waĩcũgũ árĩpũ. Iri wihigue masa bajarã gamenere, Goãmũre serẽrã iĩñorã. ¹³ Eropigu Pedro disiporore eraa dotepũ. Rode waĩcũgo pohro majago ïgũ dotecũ peego, ïago ejapo igo. ¹⁴ Eropigo Pedro igore piyucũ peego ïgũ wereniguirire pee masi, bũrigã mucubiri disiporore pãgũbiripo. Eropa mucubirigo ïgure pãgũbodio cãdija wapo. Pedro ero niguicũ ta igo majinũgaja oma ñaja wapo.

—Pedro disiporogue erami, arĩ werego ñajapo. ¹⁵ Eropirã iri wihi árĩrã igo eroparĩcũ peerã,

—Eropa arĩmaacãgo iiaa mũhũ, arĩñorã erã igore.

—Diaye ta āhraa. Diaye ta arĩgo iiaa, arĩpo igo. Igo eroparĩcũ peerã,

—ïgũ árĩbircumi. ïgũ sĩporã mũraro eraro iica, arĩñorã erãpũ.

¹⁶ Erã eropa arĩrisubu Pedro disiporore eropa ta dotenigu-icãpũ. ïgũ eropiicũ peerã, erã disiporore pãgũ, ïgure ïha, uca wañorã. ¹⁷ Eropigu Pedro ïgũ mojoto mera “Ejarimaricãque,” arĩgũ, Goãmũ peresugue ïgure ïgũ wiurare werepũ erãre.

—Ire wereque Santiagore gajirã Jesu yarã sãre, arĩpũ Pedro.

Eropa arĩ weretuhaja, ïgũ gajipũgue tarigã waha wapũ.

¹⁸ Eropii boyodijiricũ surara Pedrore ïhadibunirã ïgũ dohpa ii wiriarare ne masibiriñorã. Eropa masibirã uca wañorã. ¹⁹ Eropigu Herode Pedrore amadoreripũ. Eropigu ïgũ surarare peresu corerãre ïgũ serẽpira pũhrũ erãre wejẽdorepũ Herodepũ. Eropii Herode Judeague árĩdigũ waha Cesareague árĩgũ waha wapũ.

Herode sĩa wapũ

²⁰ Ero pũhrũ Tiro waĩcũri maca majarã mera Sidón waĩcũri maca majarã mera sãre Herode guarũ. ïgũ eropa guacũ ïarã iri macari majarãpũ Herode mera amurã wañorã. ïgũ erã mera ïgũ guarare wereniguirã wañorã.

Ejaa Herodere ĩaboro core Herode itamugu Blasto waĩcugu mera weretamuñorã. Eropirã erã ĩgu Blasto ĩgu itamuri mera Herode pohro ejañorã. ĩgu pohro ejarã õpa arĩñorã:

—Mari õaro árĩrã. Mari basi ĩhaturibircãrã, arĩ serẽñorã erã Herodere.

Erã ya yeba majarã Herode ya yeba barire bocamariñorã. Eropirã Herode erãre ĩhaturicũ gamebiriñorã erã. ²¹ Eropigu Herode erã ĩgure ĩarinũ ĩgu queoranũ árĩcũ, opu ĩgu sañari suhri õari suhrire sañamuripu ĩgu. Eropigu ĩgu ĩgu doaro doanijagu, masare werenigui ĩhmumuripu. ²² ĩgu eropa werenigui ĩhmucũ peerã masapu gaguiniguiñorã:

—Ihĩ wereniguigu masu árĩbeami. Goãmu ãhrimi, arĩ gaguinigumuririñorã erã Herodere.

²³ Erã eropa arĩra pũhrũ Goãmu ĩgu anyu Herodere dore õpu. “Goãmu árĩbeaa yũhũ,” ne arĩbiripu Herode. ĩgu eropa arĩbirira dipuwaja anyu ĩgu dorecucũ ĩpu. ĩgu eropa dorecucũ ĩgure beca ba wejẽcãñorã.

²⁴ Eropii Jesu yarã masa bajarãre Jesu ya buherire buheñorã.

²⁵ Eropirã Bernabé, Saulo mera Jesu yarãre itamupehohuja Jerusalengue árĩnirã Antioquíague dujaa wañorã. Eropirã Nũre Marco waĩcugure erã aĩgãñorã erã mera.

13

Jesu yarã Bernabére Saulo mera Goãmu yare buhedore obeoñorã

¹ Irisubure Antioquíague Jesu yarã gamenererã mera majarã, Goãmu yare weremuhtarã árĩñorã. Masare buherã ta árĩñorã erã sã. Bernabé, Simo Negro waĩcugu, Lucio Cirene majagu, Manaén, Saulo mera erã árĩñorã. Manaénpu opu Herode murũ mera erã perã yujuro mera ta masanirã árĩñorã. ² Eropirã erã Goãmu yare erã buherisubu, erã ba duhurisubu, Espĩritu Santopũ werepu erãre:

—Bernabére, Saulo mera apique yũ gamero dopa iimorãre. Irire iimorãre beye apigu iiaa erãre, arĩpu Espĩritu Santo.

³ ĩgu eroparĩcũ erãpu ba duhu Goãmure serẽ, Bernabé weca Saulo weca erã mojotorire duhpeoñorã. Eropa duhpeorã erãre buhedorerã obeoñorã.

Chipregue Jesu ĩgu apinirã buheñorã

⁴ Eropirã erã Espĩritu Santo ĩgu obeonirã árĩrã, Seleuciague eja, iri macare tarigã, Chipre waĩcari nũgurogue ejañorã erã. ⁵ Eropirã Salamina waĩcari peramague

ejañorã. Iri maca judio masa buheri wirigüe Goãmũ yare werenũgañorã erã. Eropigũ Ñu Marco sã erã mera waha, erãre itamupũ.

⁶ Eropirã erã iri nũgũro ojogoro maja. Pafu waĩcũri macagüe ejarã, yeere bocañaorã erã. Ìgũ judio masu Barjesu waĩcũgũ árĩpũ. Barjesu griego ya mera Elima erã arĩ piyugũ árĩpũ. “Goãmũ yare weremũhtagũ ãhraa yũhũ,” arĩ masare gũyaniguicãgũ árĩpũ ìgũ. ⁷ Eropigũ ìgũ Sergio Paulo waĩcũgũ mera majagũ árĩpũ. Sergio Paulopũ iri nũgũro majarã opũ masipehogũ árĩpũ. Eropigũ Goãmũ yare peediagũ erãre Bernabé, Pablo mera bocatĩripũ ìgũ. ⁸ Eropigũ Elima yeepũ erãre buhedorebiriripũ. Ìgũ Sergio Paulo Jesu yare ìgũ umupeocũ gamesãbiriripũ yeepũ. Sergio Paulore Goãmũ yare ìgũ peecũ cãhmotadiaripũ. ⁹⁻¹⁰ Ìgũ eropa buhedorebiriquerecũ ta Saulo, Pablo waĩcũgũ Espĩritu Santore òaro opagũ árĩgũ yeere òaro ìadihupi ìgũre werepũ:

—Mũhũ gũyaricũgũ, ñegũ, watĩ ìgũ dorerire iigũ, òarire ìhaturigũ ãhraa mũhũ. ¿Duhpigũ mari Opũ yare “Ñeri ãhraa. Gũyari ãhraa,” eropa arĩniguicãri mũhũ? ¹¹ Mũhũ eroparĩra waja Jesu mari Opũ mũre ìgũ pẽhrecũ cuirĩ ìhajabigũ árĩgũca mũhũ. Eropigũ bajamenũrigã mũhũ inũrire ìarisome, arĩpũ Pablo.

Ìgũ eroparĩcũ ta ìgũ yeepũ imica iro dopa árĩrĩre ìamũhtagũ, naitĩaro dihtare ìapũ ìgũ. Eropigũ ìgũre tuã curibure amapũ ìgũ. ¹² Ìgũ eropa wacũ ìagũ, Sergio Paulopũ Jesu yare “Diaye ta ãhraa,” arĩ masipũ. Mari Opũ yare ìgũ pee, uca wa, Jesure umupeonũgapũ.

Pablo Bernabé mera Antioquía Pisidia yebagüe arĩri macagüe arĩñorã

¹³ Eropi Pablo sã Pafogue arĩnirã dohodiru mera waha, Pergegüe ejañorã. Perge Panfilia yebagüe ãhraa. Erogue eja, Ñu Marcopũ erãre cohã wahgã, Jerusalengüe waha wapũ. ¹⁴ Erãpũ Pergegüe arĩnirã waha, Antioquíagüe ejañorã. Antioquía Pisidia yebagüe ãhraa. Erogue ejarã, Sabadonũ árĩcũ erã judio masa buheri wihigüe ñajaja, erogue doañorã. ¹⁵ Eropirã iri wihi majarã oparã Goãmũ dorerire, Moisegüe marire ìgũ apirare, Goãmũ yare weremũhtanirã erã gojarare erã buhera pũhrũ erã sihubeoñorã Pablo sãre.

—Acawererã, ¿masare mũa werediarã iiri? Irire werediarã wereque dohparagã, arĩñorã iri wihi majarã oparã.

16 Erã eroparĩcũ peegu, Pablo wahgãnuḡaja, “Werenigu-ibiricãque,” arĩḡu ĩḡu mojoto mera paatupu. Erã ejari-maricũ ĩha, ĩḡu õpa arĩpu:

—Israe masa, mua mari Pagure umupeorã, peeque. 17 Mari ñecu sumarã mura Goãmure umupeomuriñuma. Erã murare Goãmũ beyemuriñumi. Eropirã erã mari ñecu sumarã yoari boje Egiptogue árĩmuriñuma gajirã árĩquererã. Eroque erã árĩcũ Goãmũ õaro iimuriñumi erãre. Eropirã bajarã masa pore árĩñuma erã. Õpa iĩñumi erãre. Erãre Egiptogue árĩrãre ĩḡu turari mera aĩ wiuñumi Goãmũ. 18 ĩḡu eropa wiura puhrũ erã cuarenta bojori gohra masa mariroque curimuriñuma. Eroque ĩḡure erã tarinuḡacũ Goãmũ eropa ta pepicãñumi. 19 Eropiḡu Canaa waĩcũri yebaguere siete cururi majarãre cóãtuhaja, Goãmũ iri yebare oñumi Israe masapũre. 20 Iri yebare otuhaja cuatrocientos cincuenta bojori gohra masare doremorãre apimuriñumi Goãmũ Israe masare.

—“Goãmũ ĩḡu apinirã Samue ĩḡu árĩcũḡue árĩtumuriñuma. Samuepu Goãmũ yare weremũhtagu árĩmuriñumi. 21 Samue árĩrisubu Israe masapu erã opu árĩbure amamuriñuma. Eropirã Goãmure serẽmuriñuma. Erã eropa serẽcũ ĩaḡu Goãmũ Saulore apimuriñumi. Saulo Cis magũ árĩñumi. Benjami ya curu majagu árĩñumi. Eropiḡu cuarenta bojori gohra erã opu árĩbure apiñumi Goãmũ ĩḡure. 22 Eropiḡu Goãmũ Saulore ĩḡu cóãra puhrũ Davire apimuriñumi ĩḡu. Õpa arĩñumi Goãmũ Davire. “Davi Isaí magure bocabu yũhũ. ĩḡure mucubiria yũhũ. ĩḡu yũ gamerire iipehogucumi,” arĩñumi Goãmũ. 23 Ihĩ Davi ĩḡu pãrami árĩturiagu aħrimi Jesu. Goãmũ Jesure apidiḡu árĩmi Israe masare itamubure. “Masare õaro iigũca,” arĩñumi Goãmũ. ĩḡu arĩdiro dopa ta iidi árĩmi ĩḡu Jesu. 24 ĩḡu eropa iiboro core Jesu ĩḡu ariboro core Ñu waĩyegu õpa arĩ buhepu: “Mua ñerire bujawereque. Õaripũre gohrotoque. Eropirã waĩyesũnirã árĩque,” arĩ buhepu Ñu árĩpehrerã Israe masare. 25 Eropiḡu Ñu ĩḡu buhetuboro core, ĩḡu sĩriboro core õpa arĩ weremũripu. “¿Nihino aħriri yũhũ mua pepicũ? Iriboḡue majagu Goãmũ yare weremũhtadiḡu árĩbeaa yũhũ. Cristo árĩbeaa yũhũ. Gajigu aħraa. Cristo yũhũ árĩbiriquerẽcũ yũ puhrũ yũ tauro turagupu arigućumi. ĩḡupu õatariagu aħrimi. ĩḡu iro dopa árĩbeaa yũhũ,” arĩ werepu Ñu masare, arĩpu Pablo.

26 “Acawererã, Abrahã pãramerã, árĩpehrerã mari Pagure guhyadiaro ĩarã, marire i ĩḡu tauborore wereri

buherire obeodi árīmi mari Pagu. ²⁷ Jerusalén majarã erã oparã mera Jesu erãre taugu ĩgu árĩcũ masibirinirã árĩma. Sabadonuri árĩcũ Goãmu yare weremũhtanirã erã gojarare buhequererã ta Jesure masibirinirã árĩma. Eropa masibirã Jesure wejẽdoreñorã. Eropa iirã Goãmu yare weremũhtanirã erã gojadiro dopa ta iirã iĩnorã. ²⁸ ĩgure erã wejẽboro core erã Jesure weresãriñorã. ĩgu ñerire iibiriquerecũ ta erã Pilatore Jesure wejẽdoremorã serẽnorã. ²⁹ Eropirã iribojegue majarã erã gojadiro dopa ta Jesure iituhaja, ĩgure crusague árĩgure aĩdiju, masa gobegue utãyegue erã seara gobegue apiñorã erã ĩgure. ³⁰ Eropa erã ĩgure wejẽquerecũ ta Goãmu masudi árĩmi ĩgure. ³¹ Eropirã Galileague arinirã Jerusaléngue ĩgu mera ejanirã bajaranuri ĩgure sĩri masa deyodigure ĩañorã. Eropirã dohpaguere ĩgure erã ĩarare masare werema erã.

³²⁻³³ Eropa masare wereniguigu õpa arĩ werenemopu daja Pablo:

—Eropirã õari buherire werea guã mũare. Goãmu mari ñecũ sumarãre “Masare õaro iigũca,” iribojegue ĩgu arĩdiro dopa ta dohpaguere marire erã acawererãre iiami. Irire ĩgu wererare õpa iiami ĩgu. Goãmu Jesure masudi árĩmi. Eropirã Jesure ĩgu masurare werea guã mũare. Salmopũgue iribojegue ĩgu õpa arĩ gojadiro dopa eropa wayoro Jesure: “ ‘Mũhu yu magu añraa. Dohpagãre mure dehyoacũ iiabũ,’ arĩmi Goãmu ĩgu magure,” arĩ gojañumi iribojegue. ³⁴ Eropigu Goãmu Jesure ĩgu masuburire dipaturi ĩgu sĩribiriborore weregu õpa arĩ were gojadoreñumi Salmopũgue: “Davire yũhu mojomoro ĩadiro dopa ta diaye ta õaro iigũra mũa sãre,” arĩ gojadoreñumi. ³⁵ Eropigu gaji Salmo sãre õpa ta arĩ wereñumi: “Goãmu mũa õagu ĩgu dupure boadorebirabu mũhu,” arĩ gojañumi. ³⁶ Eropigu Davi Goãmu ĩgu gamediro dopa ta ĩgu árĩrasubũ majarãre itamumuriñumi. Pũhrũ ĩgu sĩria wañumi. ĩgu sĩrira pũhrũ ĩgu pagu sumarãre erã iidiro dopa ta yaañuma ĩgu sãre. Eropigu ĩgu boa wañumi. ³⁷ Eropigu ihĩ Jesu Goãmu ĩgu masudigũpu ne boabiridi árĩmi. ³⁸ Eropirã mũa, yu acawererã, ire masique: Goãmu mũa ñerire ĩgu cóãborore mũare ire werea guã. Jesupu mũa ñerire cóãbu añrimi. ³⁹ Eropigu ĩgure umupeorãre erã ñero iirare cãdijicãgũcumĩ ĩgu. Moiserẽ ĩgu apira dorerire mũa iira mera Goãmu pohrogue wasome mũa. Eropigu iri dorerire iiri mera taridiarãre erã ñerire cóãsome Goãmu. ⁴⁰ Eropirã õaro iique. Mũa õaro iibiricũ Goãmu ya weremũhtanirã erã gojadiro dopa ta mũare waroca. Õpa arĩ gojañuma:

⁴¹ Peeque mũa queoricurã. Yũre ĩhaturirã añraa mũa.

Yü öpa iicü güique müa. Eropirã peamegue waque. Müa árĩrinürire müare ii ïhmugara. Yü eropa ii ïhmucü ïaquererã “Diaye ta ähraa,” arĩsome müa. Gajigü irire müare ïgu öaro werequerecü ta “Diaye ta ähraa,” arĩsome müa, arĩ gojañumi Goãmü yare weremühtadigü, arĩ werepü Pablo erãre.

⁴² ïgu eropa arĩ werera pührü judio masa buheri wihigue erã wiriara pührü judio masa árĩbirãpü erãre serëñorã.

—Gaji semanague Sabado árĩcü ire buheba daja guare, arĩ serëñorã erã Pablöre.

⁴³ Eropirã iri wihigue árĩnirã wiria, judio masa bajarã, judio masa árĩbirã sã Pablo, Bernabé sã mera wañorã. Judio masa árĩbirã judio masa yare buherã árĩñorã. Erã erã mera wacü Pablo Bernabé mera öaro wereñorã erãre. “Goãmü müare mahimi. Eropirã ïgüre umupeorã árĩniguicãque,” arĩ buheñorã erã.

⁴⁴ Eropirã gaji semanare Sabado árĩcü árĩpehrerã Jesu yare peediarã gamenereñorã. ⁴⁵ Eropirã judio masapü bajarã masa Jesu yare peediarã gamenerecü ïarã guañorã. Eropa guarã, erã gajiropa arĩ werenigui, Pablöre ñero quere goroweñorã. “Müare ïgu buheri diaye árĩbeaa,” arĩñorã erã. ⁴⁶ Erã eroparĩcü peerã, Pablo, Bernabé mera erãre quere goroweonirãre güiro mariro wereñorã.

—Goãmü ïgu dorediro dopa ta müare judio masare buhemühtarabü gua. Müapü irire gamebirituhabü. Ümüri nücü Goãmü mera árĩniguicü sãre gamebirituhabü müa. Eropirã guapü judio masa árĩbirãpüre buhenügarãca.

⁴⁷ Öpa ta doreñumi mari Opü guare:

Müa judio masa árĩbirãre buherã erãre Goãmü yare öaro masicü iirãca müa. Eropigü müa yoarogue árĩrãre müa buhecü peerãre erãpüre peamegue wabonirãre taugüca yuhü, arĩ wereñumi Goãmü guare ïgu yare gojarapügue, arĩ werepü Pablo, Bernabé mera.

⁴⁸ Erã eroparĩcü peerã judio masa árĩbirãpü mucu-biriñorã. “Mari Opü yapü öari ähraa,” arĩñorã erã. Eropirã Goãmü ïgu gamenirã, ümüri nücü ïgu mera erã árĩniguiborore ïgu odianirã Jesure umupeonügañorã.

⁴⁹ Eropirã mari Opü Cristo yare iri yebague werepehoñorã.

⁵⁰ Erã eropa iicü ïarã judio masa süabiria wañorã. Erogue mari Pagure umupeorã nome, öarã nome árĩñorã. Eropirã judio masa Pablo sãre ñero wereniguiñorã. Erã eropa wereniguicü peerã erã nome Pablo mera Bernabé mera guañorã. Eropirã iri maca majarã oparã sã erã mera guañorã. Eropa quarã ero majarã ñero iñorã Pablo sãre. Erã eropiira, pührü Pablo sãre erã ya yebague árĩrãre cohã

wiucãñorã. ⁵¹ Erã eropa iicũ ïarã, Pablo Bernabé mera erã guburi maja nicure pasiripiñorã iri maca majarã erã ñeri wajare ïhmurã. Eropa iituhaja erã Iconiogue waha wañorã. ⁵² Eropirã erã Jesu yarã wũaro mucubiri, Espiritu Santo wũaro ïgũ dorediro dopa iirã iinorã.

14

Pablo Bernabé mera Iconiogue árĩñorã

¹ Eropirã Iconiogue árĩrã Pablo Bernabé mera judio masa buheri wihigue ñaja, Jesu yare wereñorã. Eropirã judio masa bajarã Jesure umupeonũgañorã. Eropirã judio masa árĩbirã sã Jesure umupeonorã. ² Judio masa Jesu yare peediabirãpũ judio masa árĩbirãre Jesu yarã mera erã guacũ iinorã daja. Erã eropa iicũ judio masa árĩbirã ñero pepiñorã Jesu yarãre. ³ Erã eropa pepicũ ïarã Jesu yarãpũ Pablo sã erogue yoari boje árĩrã, gũiro mariro mari Opũ yare õari buherire buheñorã. Goãmũ masare ïgũ mahirire buheñorã. Erã eropa buherisubu Goãmũ turari mera deyoro moarire ii ïhmuñorã, "I buheri diaye ta ãhraa," arĩ ïhmurã. ⁴ Eropirã iri maca majarã deco mera judio masa yare gamerã dujañorã. Deco mera ta Jesu yare gamerã sã dujañorã. Erã pe curu dũca wariñorã. ⁵ Eropirã Jesu yare gamebirãpũ judio masa sã árĩbirã, judio masa sã erã oparã mera gamenere Jesu ïgũ apinirãre ñero iidariñorã. Utã mera dea wejẽdiariñorã erãre. ⁶ Erã eropa iidarire masirã, Pablo, Bernabé mera Licaonia yebague duhriã waha wañorã. Iri yeba árĩri macari tari wahã Listra waĩcũri macare Derbe waĩcũri maca sãre ejañorã. ⁷ Erogue ejarã, õari buherire buheñorã daja erã.

Listrague Pablora utã mera deañorã

⁸ Eropii Listrague curimasibigũ doapũ. ïgũ ne masa dehyoagũgue ta curimasibiridigũ árĩpũ. ⁹⁻¹⁰ Eropigũ ïgũ Pablo ïgũ buhecũ peepũ. ïgũ peerisubu Pablopũ ïgũ dihtare ïapũ. ïgũre ïanũrũ õpa arĩ pepipũ: "Ihĩ Jesure umupeomi. Eropigũ 'Jesu yũre dũpũ õacũ iimasimi,' arĩ pepigũ iicumi," arĩ pepipũ Pablo curimasibigũre. Eropa pepigũ turaro mera õpa arĩpũ Pablo ïgũre:

—Wahãnũgajaque, arĩpũ Pablo ïgũre.

ïgũ eroparĩcũ peegũ ta curimasibigũpũ buhrimanũgaja, wapũ. ¹¹ Pablo ïgũ eropa iicũ ïarã masa gaguiniguiñorã. Erã Licaonia ya mera õpa arĩ gaguiniguiñorã:

—Goãmarã masa dopa bejarã umarogue árĩrã mari pohroque dijarama, arĩ gaguinĩñorã erã.

¹² Eropirā erā Bernabére “Mari goām̄ Zeus āhrimi,” arī piyuñorā. Eropirā Pablo buhem̄tadiḡu op̄u iro dopa ĩgu árĩcũ ĩarā “Mari goām̄ Hermes āhrimi,” arī piyuñorā erā ĩḡure. ¹³ Eropirā Zeure umupeorā ya wihi iri maca t̄uro pohro árĩyoro. Eropiḡu Zeus yarā erā pahip̄u iri wihigue árĩḡu macague ñajariri disiporo pohrogue wec̄are, gori amurare aĩḡarip̄u. Iri mera Pabl̄ore Bernabére “Mari goāmarā āhrima,” arī umupeodiariñorā. Eropirā erā wec̄are soemuju Pabl̄ore, Bernabére umupeodiariñorā. ¹⁴ Erā eropa iidiacũ ĩarā Pablo, Bernabé mera erā basi erā ya suhrire yehguen̄gañorā erā bujawererire masare ĩhmurā. Erā yehguen̄gara p̄hr̄u masa watope omagā, gaguiniguñorā erā.

¹⁵ —M̄ua õpa iibiricāque. Ḡua sã m̄ua iro dopa ta masa āhraa. M̄ua õpa iiri ne duhpiburi árĩbeaa. Eropirā m̄uare õarire buherā ahrab̄u. Õpa iire duhdorerā arirā iiab̄u. Oã m̄ua goāmarāre m̄ua wéanirāre ñerāre cóacāque. Eropirā Goām̄ure ojocariḡup̄ure umupeoque. Goām̄up̄u umarore, yebare, w̄uariyare, árĩpehrerire, árĩpehrero majarāre ĩigu āhrimi. ¹⁶ Eropiḡu ĩgu iribojegue árĩpehreri macari majarā erā gamero iirare eropa ĩacãnumi. ¹⁷ ĩgu eropa ĩacãquereḡu ĩgu árĩric̄urire ĩhmumi marire. ĩgu masare õarire ii, deco aricũ ii, d̄ucare oo, masare barire oniguimi. ĩgu eropa ocũ masa mucubirima. Eropa ta ĩgu árĩric̄urire ĩhmumi masare, arĩp̄u Pablo, Bernabé mera.

¹⁸ Eropirā erā eroparĩcũ peequererā ta masa wec̄are wejē soemuju erāre umupeodiariñorā. Eropa erā umupeodiacũ ĩarā erāre eropa iidorebiriñorā Pablo sã. Erā eropa iire duhudiabiriquererā duhuñorā.

¹⁹ Eropii gajirā judio masa Antioquía majarā, Iconio majarā sã Listrague ejañorā. Erogue ejarā, Pabl̄ore ñero wereniguñorā ero majarāre. Erā eropa wereniguicũ peerā masa ĩgu mera guan̄gañorā. Eropa guarā masap̄u utā mera deañorā Pabl̄ore. Utā mera ĩḡure deatuhaja, “Ihĩ s̄iria wahámi,” arĩrā, iri maca t̄uro pohrogue ĩḡure taragā mehpicā, waha wañorā. ²⁰ Erā eropiiquerecũ Jesu yarā Pablo pohro erā gameneren̄gajacũ gohra Pablo masa wahgān̄gaja, erā mera macague waha wap̄u. Eropirā gajin̄u ĩgu Bernabé mera Derbegue wap̄u.

²¹ Eropirā erā erogue erā õari buherire bajarā masare erā werera p̄hr̄u, erā Listrare eja daja iri macare tarigā, Iconiore eja daja iri macare tarigā, Antioquía Pisidia yebague árĩri macare ejañorā daja. ²² Iri macarigue ejarā, ero majarā Jesu yarāre õari buherire wereñorā daja. Erāre

õaro sīporācūcū iīñorā. Eropirā Jesure umupeodorenigucārā õpa arī wereñorā erāre.

—Goāmū árīroguere mari wadiarā, buringā marire ñero tariro gahmea, arī wereñorā erā.

²³ Eropirā macari nūcū majarāre Jesu yarāre erā oparā árīmorāre apiñorā Pablo Bernabé mera. Eropirā erā ba duhura pūhrū Goāmūre serēñorā.

—Opū, oā mū yarāre ñhadibuque, arī serēbasañorā erā Goāmūre erā umupeogure.

Pablo Bernabé mera Antioquíague erā árīmūhtara macague dujaa wañorā

²⁴ Erā eropa iira pūhrū erā Pisidia yebague tariara pūhrū waha wañorā Panfilia yebague. ²⁵ Eropirā Pergeguere erā buhetuhaja Atalia waīcūri macague buha wañorā. ²⁶ Eropirā iri macague eja, Antioquíague dujaarā, dohodiru mera waha wañorā. Iri maca coregue erā árīnicū Jesu yarā Goāmū yare buhedorerā Pablo sāre obeoñorā. Eropa obeorā Goāmūre õpa serēñorā:

—Goāmū, mū mahiri mera oāre ñhadibuque, arī serē, obeoñorā erā.

Eropirā erā buhedorerare buhepehonirā árīrā Pablo Bernabé mera dujaniñorā iri macare. ²⁷ Eropirā erā Antioquíague erā dujajara pūhrū Goāmū yarā mera gamenere, Goāmū ĩgū turari mera erā iirare werepehoñorā erā. Judio masa árībirā sã Goāmū yarā erā warare wereñorā erā. ²⁸ Eropirā Pablo sã eroguere Jesu yarā mera yoari boje árīcāmūriñorā.

15

Jerusaléngue Jesu yarā gamenereñorā

¹ Eropi Judea yeba majarā bajamerāgā Antioquíague ejarā, Jesu yarāre õpa arī buhenūgañorā erā.

—Goāmū ĩgū dorerire Moiserere apīgū õpa arī apimūriñumi. Árīpehrerā erā dūpūre miri gasirogā erā wiri aīborore were apimūriñumi Moiserere. Mūa irire iibiricū Goāmū mūare tausome, arī buheñorā erā ero majarāre.

² Erā eropa arī buhecū peerā Pablo Bernabé mera gamebiriñorā. Iri buherire buringā game dūyasoñorā Judea yeba majarā mera. Erā eropa game dūyasora pūhrū Jesu yarāpū Pablora, Bernabére, gajirā ero majarā sāre Jerusaléngue obeoñorā. Judea yeba majarā erā buherire Jesu ĩgū apinirāre Jesu yarā oparā sāre serēpi ĩadorerā obeoñorā Pablo sāre.

³ Eropirã Jesu yarã erãre erã obeocũ waha, Fenicia yebare eja tarigã, Samaria yebague ejañorã. Iri macarigue ejarã, judio masa árĩbirã Goãmũ yare erã gemenugarare wereñorã erã ero majarãre. Erã eropa werecũ peerã ero majarã Jesu yarã bũrigã mucubiriñorã.

⁴ Eropirã erã Jerusaléngue ejacũ ñarã ero majarã Jesu yarã Jesu ñgũ apinirã, ñgũ yarã oparã mera mucubiriri mera òaro bocatĩriñorã erãre. Eropirã Pablo, Bernabé gajirã mera Goãmũ ñgũ turari mera erã iirare wereñorã Jerusalén majarãre. Judio masa árĩbirã Jesu yarã erã wara sãre wereñorã erã. ⁵ Erã eropa werequerecũ erogue fariseo masa Jesu yarã bajamerãgã árĩñorã. Eropirã erã eroguererã wahgãñugaja, òpa wereñorã.

—Erãre judio masa árĩbirãre erã dũpũre miri gasirogãre wiriro gahmea. “Goãmũ Moisererã ñgũ dorerare iique mũa sã,” arĩro gahmea erãre, arĩñorã erã fariseo masa.

⁶ Erã eroparĩcũ pee, Jesu ñgũ apinirã, Jesu yarã oparã mera irire amudiarã, gamenereñorã. ⁷ Eropirã erã yoari boje erã wereniguirã pũhrũ Pedro wahgãñugaja, werepũ erãre.

—Acawererã, iribojegue yãhũ mũa mera árĩgũre Goãmũ òpa iidoregũ yũre apimi. Ñgũ yũre òari buherire judio masa árĩbirãre weredoregũ apimi. Erãre Jesure umupeodoregũ yũre erãre buhedoremi. ⁸ Eropigũ Goãmũ masa erã pepirire masimi. Eropigũ ñgũ judio masa árĩbirãre ñgũ yarãre ñgũ iirare ñhmubu ñgũ Espĩritu Santore ohãmi erãre marire ñgũ iidiro dopa ta. ⁹ Eropã ogũ ñgũ marire erã sãre yujuropa ta òaro iimi. Erã ñgũre umupeocũ erã ñerire cadijimi ñgũ. ¹⁰ Maripũ Moise dorerire yujuro bojebearã. Mari ñecũ sũmarã mũa sã irire yujuro bojebirimũriñũma. ¿Eropã mari yujuro bojebiriquerã duhpĩrã Jesu yarãre judio masa árĩbirãre irire Moise dorerire iidorediari mũa? ¿Duhpĩrã Goãmũ judio masa árĩbirãre ñgũ yarã wacũ ñgũ iirare “Ero wabeaa,” arĩri mũa? ¹¹ Eropã arĩbirã mari òpa pepia. Dohpaguere judio masa árĩbirã iro dopa ta mari sãre mari Opũ Jesu mahiri mera Goãmũ taugũcumĩ, arĩpũ Pedro erãre.

¹² Ñgũ eroparĩcũ peerã árĩpehrerã ejarimaria wañorã. Eropirã Pablo Bernabé mera judio masa árĩbirã watope Goãmũ turari mera erã ii ñhmurare wereñorã erãre. ¹³ Eropã erã weretuhajara pũhrũ Santiago sã werepũ.

—Acawererã, peeque yũre. ¹⁴ Goãmũ judio masa árĩbirãre ñgũ yarã árĩmorãre ñgũ ne iirare weretuhajami Pedropũ. ¹⁵ Iribojegue Goãmũ ya weremũhtanirã erã

werediro dopa ta eropa wahabũ judio masa árĩbirãre. Õpa arĩ Goãmũ wereniguirire gojañuma erã iribojegure:

¹⁶ Iribojeque Davi mũrũ ya curu majarã erã oparã árĩra pehrea wabũ. Pũhrũ dujarigũca yũhũ. Eropigũ dipaturi ĩgũ ya curu majagũre opũ acugũca. ¹⁷ Yũ eropa acura pũhrũ árĩpehrerã judio masa árĩbirã yũre erã opũre gamerãcoma erã. “Yaharã árĩque,” yũ arĩ sihubeorãpũ yũre gamerãcoma. ¹⁸ Eropa ta arĩmi mari Opũ. Iribojegue ĩgũ ire masare weremũripũ, arĩ gojañuma Goãmũ ya weremũhtanirã.

¹⁹ “Eropigũ òpa pepia yũhũ, arĩpũ daja Santiago. Judio masa árĩbirãre Goãmũ yare ne gamenũgarãre baja iidorebircãrã mari. ²⁰ Eropirã erãre goja, obeorã mari. Õpa arĩ gojabeorã. “Goãmarã wéanirãre erã umupeora barire babircãque. Eropirã nome mera ñero iibircãque. Nome sã ũa mera ñero iibircãque. Eropirã wũnũgu mohwejẽnirãre waimũrãre babircãque. Dire ihribiricãque,” iripẽta arĩ were gojabeorã. Iri doreri Moise apira doreri sã ãhraa. ²¹ Yoari boje judio masa buheri wirigue Sabado árĩcũ Goãmũ Moisere ĩgũ apira dorerire buhemũrima masa. Eropii árĩpehreri macarigue Moise dorerire buhemũrima masa. Eropirã yũ arĩdiro dopa ta judio masa árĩbirãre Jesu yarãre were gojabeocũ, judio masapũ pee, “Gũa iiguari ta ãhraa,” arĩrãcoma, arĩpũ Santiago.

Judio masa árĩbirãre erã gojarapũ obeoñorã

²² Eropirã Jesu ĩgũ apinirã, Jesu yarã oparã árĩpehrerã Jesu yarã mera Santiago arĩrare peerã, “Eropa ta iirã,” arĩñorã. Tuhajanugu erã mera majarãre beyeñorã erã obeomorã. Antioquíague Pablo, Bernabé mera erã wamorãre erã beyeñorã. Eropirã erã Judare, Sila mera beyeñorã erã obeomorã. Judapũ Barsabá peñe waĩcũpũ. Erã beyerã acawererã Jesu yarã erã umupeonirã árĩñorã. ²³ Erãre erã beyera pũhrũ Jesu yarã gojabeorapũre obeoñorã erã mera. Õpa arĩ gojañorã erã:

—Jesu ĩgũ apinirã, Jesu yarã oparã, mũa acawererã Jesu yarã mera gũa òadorea mũare. Árĩpehrerã judio masa árĩbirã Antioquíague, Siriague, Ciliciague árĩrãre mũare Jesu yarãre òadorea gũa. ²⁴ Gũa mera majarã mũa pohrogue ejarã, mũare baja dorerire iidoreañorã. Eropirã mũare gariboañorã. Erã Goãmũ dorerire Moisere ĩgũ apiraguere, mũa dũpũ merogã gasirogãre wiriri sãre iidoreañorã. Gũapũ erãre irire buhedorerã obeobirabũ. ²⁵⁻²⁶ Eropirã gũa árĩpehrerã mũa pohrogue obeomorãre

gua beyeabu. Mari mera majaräre, mari mahiräre, Pablo, Bernabé mera Cristo Jesu mari Opu yare güiro mariro erä buhecü bajasuburi gajirä eräre wejëbocuriñorä. Erä eropa wejëbocuricü merogä mera tarimariñorä erä. Erä Pablo, Bernabé mera gua beyeniräre dohpaguere obeoa. ²⁷ Eropirä Juda, Sila mera mua pohrogue obeoa. Gua gojabeorare eräpu müare wereräcoma. ²⁸ Espiritu Santo igu guñaro dopa ta gua sä pepia. Öpa ähraa iri: Gaji doreriguere apibea müare. I doreri dihtare apiräca müare. ²⁹ Goämarä wëaniräre erä umupeora barire babiricäque. Dire ihribiricäque. Wunugü mohwejeniräre waimaräre babiricäque. Eropirä nome mera ñero iibiricäque. Nome sä uma mera ñero iibiricäque. I gua eropa dorera iibirä öarire iirä iica mua. Iripëta ähraa müare gua werediari, arï gojabeoñorä Jesu yarä Jerusaléngue ärirä.

³⁰ Iripüre gojatuhaja, wiañorä Antioquíague waräre. Erä wiara puhru waha, Antioquíague ejañorä. Erä erogue ejara puhru bajarä masare gamenedore, erä gojarapüre wiañorä eräre. ³¹ Iripüre erä buhera puhru, iri öarire erä werebeorare peerä, öaro mucubiriñorä. ³² Juda, Sila mera Goämü yare weremähtarä ärñorä. Eropirä yoari boje Jesu yaräre Goämü eräre igu weredorerare wereñorä. Erä eropa werecä peerä, Jesu yaräpu mucubiri öaro siporäcñorä. ³³ Eropirä Juda, Sila mera erogue bajamenurigä erä ärira puhru erä dujaricü, ero majarä erä goeriserecü, "Öaro waque mua," arñorä Antioquía majarä. Eropirä Juda säre obeoniräre öadorebeoñorä. Erä eropa ärira puhru Juda waha wapü. ³⁴ Silapü dujapü Antioquíague. ³⁵ Eropirä Pablo Bernabé sä bajamenuri dujañorä iri maca ta daja. Eropirä erä gajirä bajarä mera Jesu yare buhe wereñorä.

Dipaturi Pablo öari buherire buhecurigu wapü daja

³⁶ Eropii bajamenuri puhru Pablo werepü Bernabére.

—Ina, äripehreräre mari buhenuganiräre ihacurirä warä daja, arïpu Pablo.

³⁷ Eropigu Bernabépu Nüre erä mera aigädiaripu. Nü Marco peñe waicüpu. ³⁸ Pablopü igure aigädiabiripu. Ero core igu erä mera Panfliague ejagu eräre cohä dujaa wapü. Eropigu igu erä iirire yujuro bojebiri dujaa wapü. Igu eropa yujuro bojebiricü ñagü Pablo dipaturi igure aigädiabiripu. ³⁹ Igu aigädiabiricü ñagü Bernabé Pablo mera erä basi perä bürigä arï game erä basi purumujucäñorä. Erä eropa ärira puhru Bernabépu Chipre waicuri nügarogue Marcure aitaribuja wapü. ⁴⁰ Pablopü Sila mera waha wapü. Eropirä

erã buherã waboro core Jesu yarã erãre obeorã, “Goãmu mũare ðaro ñhadibuporo,” arĩnorã. Erã eropa arĩra pũhrũ, Pablo Sila mera waha wapũ. ⁴¹ Eropa warã, Siria yeba, Cilicia yeba sãre eja, erogue Jesu yarãre ðaro sĩporãcũ iri erã mucubiricũ iĩnorã erã.

16

Timoteo Pablo Sila mera wapicũgãrũ

¹ Erã eropa iira pũhrũ Pablo sã Derbegue, Listrague ejañorã. Erogue ejagu Timoteore bocajapũ. Timoteo Jesu yagu árĩgu, judio maso magũ árĩpũ ĩgu. ĩgu pago sã Jesu yago ta árĩpo. ĩgu pagupũ Griego masũ árĩpũ. ² Eropirã Lистра majarã, Iconio majarã, Jesu yarã Timoteore masa “Õagu ãhrimi,” arĩ weremuriñorã. ³ Eropigu Pablo Timoteore aĩgãdiapũ. Eropirã iri yeba majarã judio masapũ Timoteo pagũ griego masũ ĩgu árĩcũ masiñorã. Eropigu Pablo judio masare guari arĩgu, Timoteo dũpũre miri gasirogã wiri aĩpũ. Judio masa doreri iri arĩro dopa ta iipũ ĩgũre. ⁴ ĩgu eropa iira pũhrũ waha erã ejari macari majarãre erã gojabeorapũ majare wereñorã. Iripũ Jesu ĩgu apinirã, Jesu yarã oparã mera Jerusaléngue arĩrã erã gojabeorapũ árĩyoro. Eropirã erã iri dorerire ðaro wereñorã ero majarã Jesu yarãre. ⁵ Erã eropa werecũ peerã, Jesu yarãpũ Jesure umupeonemoñorã. Eropirã Jesu yarã mũmũri nũcũ bajarã wanĩguicãñorã.

Pablo quẽroque Macedonia majagũre ĩapũ

⁶⁻⁷ Eropigu Asia yebaguepũre ðari buherire buherã wadorebiripũ Espĩritu Santo erãre. Eropirã erã Frigia yebare taria, Galacia yebare taria, Misia yeba tũro pohro ejañorã. Bitinia yebapũ wadiariñorã erã. Eropigu Espĩritu Santopũ erãre eroguerẽ wadorebiripũ. ⁸ ĩgu eropa dorerã pũhrũ erãpũ Misia yebare tarigã, Troague erañorã. ⁹ Erogue ĩgu erara pũhrũ iri ñamire õpa quẽpũ Pablo. Macedonia yeba majagu ĩgu pohro nigũicũ ĩapũ ĩgu. “Gũare Macedonia yeba majarãre itamugũ arique,” arĩ, sihupũ ĩgu Pablore. ¹⁰ ĩgu eropa quẽra pũhrũ wahgã, gũa yare amutuhaja, Macedoniague waha wabũ gũa. “Goãmu iri yebare ðari buherire buhedoregu iimi marire,” arĩ pepibũ gũa.

Pablo, Sila mera Filipogue árĩpũ

¹¹ Eropirã gũa Troague árĩrã dohodiru mera Samotracia waĩcũri nũgũroque taribujabũ gũa. Eropirã gajinũ Neápoligue wabũ gũa. ¹² Iri macare taria, Filipogue Roma

majarã ya macague ejabu gua. Iri maca Macedonia yeba áriiri maca áribu. Guhyadiari maca áriiro iibu. Eroguere bajamenurigã gua áribu. ¹³ Eropirã Sabado áricã gua iri maca turo pohrogue, dia weca pohrogue ejabu. Ero Goãmu mera erã wereniguiro áribu. Ero doarã ero gamenererã nome mera weretamubu gua. ¹⁴ Yujugo guare peego Tiatira majago Lidia waicugo árimo. Eropigo igo õari suhri wajacuri suhrire duago árimo. Mari Pagu Goãmu sare umupeogo árimo. Eropigu Pablo igu wererire õaro peecũ iimi Goãmu igore. ¹⁵ Eropii igore igo ya wihi majarã mera waĩyemi Pablo. Igu eropa waĩyera puhru õpa arimo igo:

—“Jesu yago ahraa,” arãa mua sã yure. Eropirã yaha wihi ñajarinique mua. Yu mera dujanique, arimo igo guare.

Igo eroparicũ peerã igo ya wihi dujanibu gua. ¹⁶ Gajinu Goãmu mera erã wereniguirogue gua wacũ watĩ ñajasũdigo bocatirimo guare. Igo gajirã pohro majago arimo. Eropigo igo masare “Õpa waroca mure,” arĩ wereyugo arimo. Irire masare werego wuaro wajatabasamo igo oparãre. ¹⁷ Eropigo Pablo mera gua wacũ, guare nurusia, gaguiniguimo igo.

—Oã Goãmu turatarigu igu itumurã ahrima. Mari sirira puhru Goãmu marire igu õaro tauborore werema erã, arĩ gaguiniguimo igo.

¹⁸ Bajanuri eropa arĩ garibomo Pablore. Igo eropa arĩ gaguiniguicũ daja Pablo gamebigu maji iha, õpa arimi watire:

—Jesucristo turari mera dorea mure. Iгоре duhuque. Wanisa muhu, arimi Pablo.

Igu eroparicũ ta watipu waha wapu.

¹⁹ Watĩ igore eropa wara puhru igo õago dujago masa erã waburire werego áribirimo pare. Eropirã igo oparãpu niyerure igo wajatabigo igo wacũ ñarã, erã Pablo Sila mera ñeama. Nehatuhaja, erãre taragãma iri maca decogue oparã pohrogue. ²⁰ Eropa aigãrã, dipuwaja moadorerã pohrogue erãre apima erã õpa arirã:

—Oã judio masa mari ya macare gariborã iima. ²¹ Erã mari dorerire cóãdorerã, gaji buherire buherã iima. Mari ya dorerire tarinugacũ iidiarã iima. Mari Roma majarã arirã oã erã wereripure iimasibea mari. Eropirã erã buherire mari gamebea, arima igo oparã dipuwaja moadorerãre.

²² Erã eroparicũ peerã masa bajarã Pablo sã mera guatariacãma. Eropirã dipuwaja moadorerãpu Pablo Sila sã ya suhrire erã yehgue cóara puhru muta yucugã mera tãadorema erãre. ²³ Burigã erã tãrara puhru

peresu iima eräre. Erã eropa peresu iira pũhrũ peresure coregũre õaro ìhadibudoreñorã erã. ²⁴ Erã eropa dorera pũhrũ eräre coregũpũ iri wihi poheca maja taribugue eräre apĩ, taboamiji goberigue sũhacu erã guburire bi-hacãpũ. ²⁵ Ñami deco Pablo, Sila mera Goãmũre serẽ ìgũre bayapeoñorã. Erã eropa bayacũ peeñorã gajirã peresugue árĩrã. ²⁶ Erã eropa bayacũ ta iri wihi bũrigã ñohmeyoro. Ero eropa ñohmecũ yujuro mera árĩpehreri disiporori pãrimaapehrea wayoro. Peresugue árĩrãre erã diriradari sã pãrisiri dija wayoro. ²⁷ Eropa wacũ ìagũ, iri wihire coregũpũ wahgã, ìgũ ñoserimijire aĩbeo, ìgũ basi ñosediaripũ. ²⁸ Ìgũ eropa iicũ ìagũ Pablo ìgũre bũrigã gaguinigui õpa arĩpũ.

—Mũ basi ñero iibiricãque. Árĩpehrerã õre ãhraa gũa, arĩpũ ìgũ eräre coregũre.

²⁹ Ìgũ eroparĩcũ peegũ eräre coregũpũ sihãgodore, erã pohrogue omagã Pablo, Sila guburi pohrogue naragã mere-japũ ìgũ. ³⁰ Eropigũ ìgũ eräre iri taribugue árĩrãre aĩ wiria, serẽpipũ eräre.

—¿Dohpa iigũcuri yũhũ Goãmũ ìgũ yũre taucũ gamegũ? arĩ serẽpipũ ìgũ.

³¹ —Jesucristore umupeoque mũhũ. Mũ acawererã sã ìgũre umupeoporo. Mũa eropa iicũ Goãmũ mũare taugũcumi ìgũ pohro mũa waboro dopa, arĩ wereñorã erã.

³²⁻³³ Erã eropa arĩrisubu ñami deco pũhrũgã árĩyoro. Erã eropa arĩra pũhrũ eräre coredigũ ìgũ ya wihigue aĩgãpũ eräre. Ìgũ ya wihigue aĩja, erã camire coepũ ìgũ. Ìgũ eropa coetuhajara pũhrũ ìgũ acawererã mera Goãmũ yare buhepũ Pablo sã. Eräre ìgũ buhera pũhrũ waĩyepũ. ³⁴ Eräre waĩyetuhajara pũhrũ eräre coredigũ Pablo sãre bari peopũ. Eropirã ìgũ ìgũ acawererã mera õari buherire erã peera pũhrũ bũrigã mucubiriñorã. Goãmũre masinũgañorã.

³⁵ Boyodiji merecũ ìarã oparãpũ erã surarare peresugue obeoñorã Pablo sãre wiudorerã. ³⁶ Erã eropa wiudorera pũhrũ iri wihire coregũpũ Pablo sãre werepũ.

—Oparã mũare wiudoreañorã. Eropirã gũiro mariro wirique, arĩpũ ìgũ Pablo sãre.

³⁷ Eropa erã wiudiaquerecũ ta Pablo werepũ surarare:

—Gua ñero iibirabũ. Eropirã gua ne dipuwaja mara. Bu gohra ta erã oparãpũ masa bajarã erã ìhurore yucũ mera tãrama gũare. Gua Roma majarã gua árĩquerecũ ta gũare tãrama. Tãratuhaja peresu iima gũare. Eropirã dohpaguere masa erã ìabiro wiudiana gũare, gũare erã

ñero iirare guhyasiuro tariri, arĩrã. Oparã erã basi ta ahri aĩ wiuurã ariporo guare, arĩpũ Pablo surarare.

³⁸ Īgu eropa arĩ werecũ peerã dujaa wereñorã oparãre surarapũ. Erã eropa arĩ werera pũhrũ Pablo Sila mera Roma majarã erã árĩcũ masirã oparãpũ güi árĩñorã. ³⁹ Eropirã erã Pablo sã pohro ejarã, õpa arĩñorã:

—Ñero iiabũ gua mũare. Ne eropa dipaturi iisome, arĩñorã oparã Pablo sãre.

Eropa arĩtuhaja oparã erãre peresugue aĩ wiu, erã ya macare wiridoreñorã. ⁴⁰ Eropirã Pablo Sila mera peresugue árĩnirã wiri, Lidia waĩcũgo ya wihigue eja, Jesu yarãre bocatĩriñorã. Eropirã erã Jesu yarãre õaro wereñorã. Õaro sĩporãcũcũ iĩñorã erãre. Erã eropa iira pũhrũ Pablo Sila mera waha wañorã.

17

Tesalónica majarã guañorã Jesu yarã mera

¹ Eropirã erã Anfĩpoligue eja taria, Apoloniague eja taria, Tesalónicague ejañorã erã. Ero judio masa buheri wihi árĩyoro. ² Eropigũ Pablo iri buheri wihigue wapũ ĩgu iiguaro dopa ta gaji macarigue árĩgu. Erogue eja, uñre semana gohra erã soorinũre Sabadonũre Goãmũ yare iribojegue erã gojarare masare buhe, irire erã mera wereniguiũ Pablo. ³ Eropigũ ĩgu Goãmũ yare werepũ õpa arĩgu:

—Judio masa, mũa Opũ mũa coregu Cristo árĩpũ masa ya árĩburire ñero taribu. Eropigũ ĩgu sĩa waha masa mũariapũ. Eropigũ ihĩ Jesu yũhũ arĩ weregu, ĩgu Cristo gohra ta aħrimi marire taubu. Īgu ta aħrimi mũa coregu. Eropa ta werea Goãmũ yare erã gojarapũ, arĩ werepũ Pablo.

⁴ Īgu eroparĩcũ peerã bajamerãgã ero árĩrã “Diaye ta aħraa,” arĩñorã. Eropirã erã Pablo sã mera wañorã. Eropirã gajirã sã griego masa bajarã Goãmũre umupeorãpũ, Pablore peerã erã mera majarã nome sã, bajarã oparã nome sã, ĩgũre peerã Jesu yarã dujañorã. Eropirã Pablo sã mera wañorã. ⁵ Judio masapũ erã eropa iicũ ĩarã erãre ĩhaturiñorã. Eropirã erã ñerãre mohmebirãre bajarãre sihu gameneo, õpa arĩdoreñorã: “Pablo ĩgu mera majarã mera ñero iirã iima,” arĩ gaguiniguidoreñorã erãre iri maca majarãre. Eropa gaguiniguirã árĩpehrerã iri maca majarãre guacũ iĩñorã Pablo sã mera. Eropirã erã judio masa Jasõ ya wihigue ñaja Pablo sãre amariñorã erãre masaguere omorã. ⁶ Eropa amarã erãre bocabiriñorã. Eropirã Jasõre, gajirã Jesu yarã sãre ñeha tarawiriañorã erãre. Oparã pohrogue aĩ eja, õpa arĩ weresãñorã erã.

—Pablo sã masare árĩpehreroguere garibotariañorã. Eropirã dohpaguere mari ya macaguere eratuhajama. ⁷ Eropigũ ihĩ Jasõ erãre ãgu ya wihigue ñajaridoreami. Erã árĩpehrerã mari weca opũ Roma majagũ ãgu dorerire tarinũgama. “Gajigũ mũa opũ ãhrimi. Jesu ãgu ta ãhrimi,” erã erĩcũ mari opũ César dorerire tarinũgama erã, arĩ weresãñorã judio masa erã oparãre.

⁸ Erã eropa arĩ weresãcũ peerã, árĩpehrerã masa, oparã sã gua “¿Dohpa wahari?” arĩ pepiñorã. ⁹ Eropirã oparã Jasõre, ãgu mera majarã sãre niyerure wajayedore, wiucãñorã.

Pablo Sila mera Bereague ejañorã

¹⁰ Iri eropa wacũ iri ñami ta mata Jesu yarã Pablo sãre dihbu obeocãñorã Bereague. Erogue eja judio masa buheri wihigue ñaja wañorã. ¹¹ Judio masa Berea majarãpũ Tesalónica majarã tauro Goãmũ yare õaro peerã árĩñorã. Eropirã erã Jesu yare erã peera pũhrũ “¿Diaye ta ãhriri?” arĩ masidiarã, Ʃmũri nũcũ Goãmũ yare erã gojarapũre eropa buheniguicãñorã erã. ¹² Eropirã erã bajarã Jesure umupeoñorã. Griego masa sã, Ʃma, oparã nome mera Jesure umupeoñorã. ¹³ Eropirã Pablo Bereague Goãmũ yare ãgu buhecũ sãre peebeo Tesalónica majarã judio masa Bereague ejañorã. Erogue ejarã, Berea majarãre quere goroweoñorã. Pablo sã mera guacũ iĩñorã erã. ¹⁴ Erã eropa iicũ ãarã Jesu yarã Pablõre yojaro mera wũariya tũrogue obeoñorã. Eropigũ Sila, Timoteo mera Bereague ta dujañorã. ¹⁵ Eropirã gajirã Pablõre Atenague aĩgã soñorã. ãgũre sotuhaja maji dujaa wañorã. Erogue ejarã,

—Yojaro mera waha, wapicũrã waque Pablõre, arĩ wereñorã Silare, Timoteo sãre. Eropa arĩ weredorepũ Pablo erãre.

Pablo Atenague árĩpũ

¹⁶ Eropigũ Pablo Atenague coregũ iipũ Sila, Timoteo sãre. Eropigũ Atena majarã erã goãmarã wéanirãre bajarã erã opacũ ãagũ Pablo bũrigã bũjawerepũ erã mera. ¹⁷ Eropa bũjaweregũ judio masa buheri wihigue judio masa mera dũyaso wereniguipũ ãgu. Eropigũ daja judio masa árĩbirã mera sãre wereniguipũ ãgu. Erã yujurãyeri Goãmũre umupeorã árĩñorã. Eropigũ Pablo iri maca deco Ʃmũri nũcũ ãgu pohrogue eropa curimaji ñajarã mera wereniguipũ. ¹⁸ Gajirã epicũreõ yare buherã, estoico yare buherã sã Pablo mera wereniguĩñorã.

—¿Ihĩ wereniguiri pehrebũgũ dohpa arĩ wereniguigũ iiri ãgu? arĩñorã erã.

Pablo Jesu yare, ĩġu masa m̄uriarare ĩġu werecũ peerã õpa arĩ pepiriñorã erã masa. “Īġu gajirã goãmarãre wereġu iicumĩ,” arĩ pepiriñorã erã. ¹⁹ Erã peera puhru erã wereniguirogue Areópago waĩcurogue Pablöre aĩġãñorã.

—I buheri, mama buherire m̄hu dohpague wererare masidiaa ġua. ²⁰ M̄ buheri gajiropa ãhraa. Eropirã ġua irire masidiaa, arĩñorã erã Pablöre.

²¹ Árĩpehrerã Atena majarã umuri n̄cu mama buherire wereniguidiañorã. Eropirã irire peediañorã. Gaji yeba majarã sã Atenague erarã eropa dihta iidiañorã. Eropirã Pablo ĩġu wererire peediañorã erã.

²² Eropigũ Pablo Areópago waĩcuro wahġãñugaja õpa arĩ werepũ:

—Atena majarã, bajarã goãmarã wéanirãre m̄ua b̄rigã umupeocũ masia yũhũ. ²³ I maca m̄ua ya macare goãmarã wéanirãre m̄ua umupeori gororire ĩhacuriabũ yũhũ. Eropa ĩhacurigu yũ sã yuju gorogue m̄ua goja apirare buheabũ. “Goãmũ, mari masibigũ yare umupeori goro ãhraa,” arĩ gojarare buheabũ m̄ua irire apiroguere. M̄ua ĩġure masibiriquererã ĩġure umupeoabũ m̄ua. Īġure ta m̄ua masibigure wereġu iiaa yũhũ m̄uare.

²⁴ “Goãmũ árĩpehreri yebare, yeba maja sãre deyoro moañumi. Īġu umarore, yebare opu árĩġu ĩġu masa erã iira wiri árĩbeami. ²⁵ Eropigũ ĩġu mari árĩricurire oġu mari itamurire gamebeami. Īġu mojomorocũ ġu árĩbeami.

²⁶ “Īġu yujugũ um̄u mera árĩpehreri yeba majarãre masare iĩñumi. Eropigũ árĩpehreri yebaguere marire apiñumi ĩġu. “Ipẽ yoari boje õguere árĩrãcoma,” arĩġu queo apiñumi marire. ²⁷ “Erã amarã yũre bocarãcoma,” arĩ pepiñumi Goãmũ. Eropigũ Goãmũ yoarogue árĩbeami. Mari mera ta ãhrimi. Õpa arĩ gojañumi gajigũ. ²⁸ “Marire árĩcũ iimi ĩġu. Īġu maricũ mariboya mari sã. Eropigũ masa n̄cure eropa árĩniguicãmi ĩġu,” arĩ gojañumi. M̄ua mera majarã iribojegue majarã bayarire õaro gojarã erã gojara ãhraa iri. “Mari sã Goãmũ porã ãhraa,” arĩ gojañorã erã. ²⁹ Eropirã mari ĩġu porã árĩrã, goãmarã wéanirãre, oro, plata, utã mera m̄ua gamero m̄ua iinirãre “Goãmũ ãhrimi,” arĩ pepibiricãque m̄ua. ³⁰ Iribojegue masa masibirã erã árĩnicũ erã ñero iiquerecũ ta Goãmũ eropa ĩacãniñumi. Eropa iiquereġu dohpaguepũre árĩpehreri yeba majarãre erã ñerire bujaweredoremi Goãmũ. ³¹ Puhru ĩġu queorinũ árĩpehreri yeba majarãre diaye ta beyegũcumĩ Goãmũ õarãre, ñerãre. Īġu beyedore ĩġu apidiro dopa Jesupũ beyegũcumĩ. Jesure s̄iridigũguere masupũ ĩġu. Eropa

masugu "Ihĩ yu apidigu āhrimi," arĩ, ĩhmuḡu iipũ Goãmu masare, arĩ werepũ Pablo Atena majarãre.

³² Ĩḡu eroparĩcũ sĭrinirã masa mũriarare ĩḡu wereniguicũ peerã gajirã ĩḡure wereyañorã.

Gajirãpũ ðpa arĩñorã:

—Dipaturi ire mũ werecũ ḡua peediaa daja, arĩñorã erã Pablore.

³³ Erã eropa arĩra pũhrũ Pablo waha wapũ. ³⁴ Eropirã bajamerãgã ĩḡu mera árĩrã Jesure umupeonũgañorã. Dionisio Areópago majagu oparã mera majagu Jesure umupeonũgapũ. Dámari waĩcũgo sã, gajirã mera Jesure umupeonũgapo.

18

Pablo Corintogue árĩpũ

¹ Eropigu Pablo Atenague árĩdigũ waha Corinto waĩcũri macague ejarũ. ² Erogu ejaḡu judio masũ Aquila waĩcũḡure bocajapũ ĩḡu. Arĩpehrerã weca opũ Claudio waĩcũḡu judio masare Romague árĩrãre ĩḡu cóãcũ Aquilapũ ĩḡu marapo Priscila mera waha, Corintogue ejarũ. Aquilapũ Ponto waĩcũri yeba masa dehyoadigu árĩpũ. Eropirã erã Corintogue árĩcũ Pablo erã pohrogu ejarũ. ³ Aquila sã suhri wirire iirã árĩñorã. Pablo sã suhri wirire iigu ta árĩpũ. Eropigu ĩḡu erã mera mohme ero dujarũ. ⁴ Eropigu Pablo Sabado árĩcũ semanari nũcũ judio masa erã buheri wihigue judio masare, judio masa árĩbirã sãre Goãmu yare werepũ.

—Ihĩ ĩḡu wereniguri diaye ta āhraa, arĩñorã masapũ erã peera pũhrũ.

⁵ Eropigu Sila, Timoteo mera Macedoniague árĩnirã Pablo pohrogu ejañorã. Erogu erã ejara pũhrũ, Pablo suhri wiri mohmerire duhucã mũuri nũcũ judio masare buhemũripũ.

—Jesucristo marire taubu mari coredigu ta āhrimi, arĩ werepũ erãre.

⁶ Ĩḡu eropa arĩ buhequerecũ ta judio masapũ ĩḡure peediabirĩñorã. Eropirã erã ñero quere goroweoñorã ĩḡure. Erã eropa iicũ Pablo erãre ĩḡu turibodiro dopa ta, ĩḡu suhri maja mera pasiri mehripũ.

—Mũa ya dipuwaja peamegue warãca. Goãmũ ĩḡu dorediro dopa ta mũare buherabũ yũhũ. Mũapũ yũre peediabirabũ. Dohpaguere yũpũ judio masa árĩbirãre buheḡu wagũra, arĩpũ Pablo judio masare.

⁷ Ĩḡu eropa arĩra pũhrũ ĩḡu erogue árĩdigũ waha, Tito Justo waĩcũḡu ya wihigue ejarũ. Justo Goãmũre umupeogu árĩpũ. Ĩḡu ya wihipũ judio masa buheri wihi pohro árĩyoro.

⁸ Eropirã Crispo waĩcũḡu iri buheri wihi opũ, ĩḡu marapo,

erã porã mera mari Opũ Jesure umupeoñorã. Eropirã gajirã Corinto majarã bajarã Goãmũ yare peerã, Jesure umupeoñorã. Erã eropa umupeorã árĩcũ erãre waĩyerũ. 9-10 Yuju ñami Goãmũ quẽroque werepũ Pablöre. Ĩgure õpa arĩpũ:

—Mũ mera ähraa. I macare yaharã bajarã ährima. Eropirã gajirã masa mũre ñero iimasibeama. Eropigu güibita mũhũ. Eropigu yahare bũrigã wereque. Eropa pepibircãque, arĩ werepũ Goãmũ Pablöre.

¹¹ Eropigu yuju bojori õaro gaji bojori deco gohra ero majarãre Goãmũ yare buhe, árĩmũripũ Pablo.

¹² Ĩgu eropa árĩrisubu Galiõ waĩcũgu Acaya yeba majarã opũ ĩgu árĩcũ, judio masa árĩpehrerã yujuropa ta Pablöre ñero weresãrã erañorã. Ĩgure ñeha dipuwaja moadorerã pohrogue aĩgãñorã erã Galiõ pohrogue. ¹³ Aĩgã õpa arĩ weresãñorã ĩgure:

—Ihĩ masare Goãmũre umupeodoregu i yeba maja doreripũre cóãdoremi, arĩ weresãñorã judio masa dipuwaja moadorerãre.

¹⁴ Erã eropa arĩ weresãcũ peegu Pablopũ erãre werediaripũ. Eropigu Galiõ opũpũ judio masare werepũ.

—Ihĩ ñerire iidigu árĩcũ gũa Romano majarã ya dorerire tarinũgagu árĩcũ, mũare yũhriboaya yũhũ. ¹⁵ Mũa ya doreripũre ihĩ tarinũgagu ĩgu árĩcũ mũa basi ire amuque. Ire masibea yũhũ mũa mera, arĩ werepũ ĩgu judio masare.

¹⁶ Eropa arĩgu ta erãre Pablöre weresãñirãre ĩgu ya taribuge árĩrãre cohã wiucãpũ ĩgu. ¹⁷ Ĩgu eropa cohã wiura pũhrũ árĩpehrerã iri wihi árĩrã Sóstenere judio masa buheri wihi opũre Jesu yagure ñeha, dipuwaja moadorerã pohrogue pañorã ĩgure. Erã eropa pacũ ĩagu Galiõ eropa ĩacãpũ.

Pablo Antioquíague dujaa wapũ daja

¹⁸ Eropigu Pablo Corintogue yoari boje árĩdigũ “Wagu ĩiaa,” arĩ goeriserepũ ĩgu Jesu yarãre.

Ĩgu eropa arĩra pũhrũ ĩgu Priscila, Aquila mera Siria yebague árĩri macague taribuja wapũ. Cencrea waĩcũri macague erã taribujara pũhrũ Pablo Goãmũre “Õpa mũre iibasagũra,” ĩgu arĩrare iituhajagu árĩpũ. Eropigu eropa iigu judio masa erã iiro dopa ta ĩgu poarire wũapehocãdorepũ. ¹⁹ Eropirã erã Efeso waĩcũri macague eja, Priscilare, Aquila sãre apipũ Pablopũ. Erãre ero api, ĩgũpũ judio masa erã buheri wihigue wapũ. Iri wihigue eja, Goãmũ yare werepũ. Eropa weregu judio masa mera

dũyaso wereniguipũ. ²⁰ Īgu eropa werera pũhrũ ĩgũre erã mera dujadoreriñorã erã. Erã eroparĩquerecũ,

—Dujabeaa mũa mera, arĩpũ Pablo erãre. ²¹ Eropa arĩgu ta,

—Jerusaléngue yũre waro gahmea. Bosenũre ĩagu wabu iiaa. Eropigũ wagũ iiaa. Goãmũ gamecũ dipaturi dujariboca, arĩpũ erãre.

Īgu eropa arĩtuhaja Efesogue árĩdigũ taribuja wapũ. ²² Eropigũ Cesareague taribujaja tarigã, Jerusaléngue ejarũ. Erogue eja, ero majarã Jesu yarãre “¿Ne ãhriri mũa?” arĩ, erãre ĩha taria Antioquíague ejarũ daja. ²³ Ero bajamenũri árĩpũ. Ero árĩdigũ tariapũ. Galacia yeba árĩri macarigue, Frigia yeba árĩri macarigue dipaturi eja, iri macari majarãre Jesu yarãre buhe ðaro mucubiricũ iipũ.

Apolo waĩcũgu Efesogue buhepũ

²⁴ Irisubure, judio masũ Apolo waĩcũgu, Alejandría maca majagu Efesogue ejarũ. Īgu ðaro weremehregũ arĩpũ. Eropigũ ĩgu Goãmũ ĩgu gojarare ðaro masipũ. ²⁵ Gajigu ĩgũre Goãmũ yare weretuhamũripũ. Eropigũ ĩgu Ñu waĩyegũ ĩgu buheri dihtare masipũ. Eropa árĩqueregu ĩgu bũrigã mucubiriri mera Jesu yare ðaro buhepũ. ²⁶ Eropigũ judio masa erã buheri wihigue ĩgu gũiro mariro erãre buhenagapũ. Īgu eropa buhecũ erã peera pũhrũ Priscila Aquila mera ĩgũre erã mera aĩgãñorã. Goãmũ yare ðaro ðiaye ðaro ĩgu werepehobiricũ ĩarã ðiaye werepehocãñorã erã ĩgũre. ²⁷⁻²⁸ Eropigũ ĩgu Apolopũ Acaya yebague ĩgu wadiacũ Jesu yarã ĩgũre “Õaro waque,” arĩ, erã gojarapũrire oñorã ĩgũre. Iripũri Acayague árĩrã Jesu yarãre Apolore ðaro bocatĩridoreripũri arĩyoro. Eropigũ Apolo erogue ejagu ero majarãre Jesure umupeorãre Goãmũ mahiri mera ðaro itamupũ. Judio masare iri maca árĩrãre ðpa arĩ werepũ:

—Goãmũ ĩgu obeodigu mũa coredigu ãhrimi Jesu. Cristo gohra ãhrimi, arĩ werepũ judio masare gajirã masa erã ĩaro.

Īgu eroparĩcũ, Goãmũ wereniguiri gojarapũre ðaro queroro werecũ erã pee “Diaye árĩbeaa,” arĩmasibiriñorã erã. Eropigũ Jesu mahiri mera Jesure umupeorãre ĩgu ðaro itamupũ erãre Apolo.

19

Pablo Efesogue wapũ

¹ Corintogue Apolo ĩgu árĩrisubu, Pablopũ utã yucũgue mũri taria, Efesogue ejarũ. Erogue eja, yujurãyeri Jesu

yarãre bocajapũ. ² Erãre ïgu bocajara pũhrũ ïgu erãre serẽpi ïapũ.

—¿Mũa Jesure umupeora pũhrũ mũapũ Espĩritu Santore opañgari? arĩ serẽpi ïapũ Pablo.

Ïgu eroparĩcũ peerã ïgure õpa arĩ wereñorã erã:

—“Espĩritu Santo ãhrimi,” arĩ ne werebirama gũare, arĩ wereñorã erã.

³ Erã eropa arĩ werera pũhrũ Pablo erãre serẽpi ïapũ daja:

—¿Noa ya buherire mũa peera pũhrũ waĩyeari mũare? arĩpũ ïgu daja.

—Ñũ ya buherire gũa peera pũhrũ waĩyeama gũare, arĩ wereñorã erã.

⁴ Erã eroparĩcũ peegũ õpa arĩpũ Pablo:

—Masa erã ñeri iirare erã duhucũ ïagũ waĩyepũ Ñũ. Eropiro ïgu waĩyeripũ erã ñeri iirare erã duhurare masare ïhmuburi árĩyoro. Eropigũ gajino sãre werenemopũ Ñũ. “Yũ pũhrũ aribure ïgure umupeoque mũa,” arĩpũ Ñũ masare. Eropa arĩgũ Jesure ta umupeodoregũ iipũ, arĩ werepũ Pablo erãre.

⁵ Ïgu eroparĩcũ erã peera pũhrũ, Jesu waĩ mera waĩyepũ erãre. ⁶ Eropigũ Pablo erã yujurãyeri weca ïgu mojotorire ïgu duhpeocũ, Espĩritu Santopũ erapũ erãguere. Ïgu eropa erara pũhrũ erãpũ peeyamariri yare werenigui, Goãmũ yare wereñorã. ⁷ Erã árĩpehrerã doce ¼ma erã árĩñorã.

⁸ Pũhrũ Pablo judio masa erã buheri wihigue ñaja, urerã abe gohra gũiro mariro Goãmũ ïgu opũ árĩrare were, werenigui pũ erã mera. Ïgure erã eropa peera pũhrũ “I diaye ta ãhraa,” arĩñorã erã. ⁹ Gajirãpũ peediabirĩñorã. Eropirã erã masa erã peeuro iri õare buherire ñero arĩ werenigui ïhmuñorã. Erã eroparĩcũ peegũ Pablopũ Jesu yarãre sihu wiria, gajipũgue waha wapũ. Waha, Tirano waĩcũgũ ya buheri wihigue ¼mũri nũcũ masare Goãmũ yare werepũ ïgu. ¹⁰ Pe bojori gohra buherũ erãre. Ïgu eropa buhecũ árĩpehrerã Asia yeba majarã judio masa, judio masa árĩbirã mera mari Opũ Jesu yare peeñorã. ¹¹ Eropigũ Goãmũ turari mera Pablo bajasuburi deyoro moarire ii ïhmupũ. ¹² Pablo ïgu suhri gasirore, ïgu suhrirore ïgu dũpũ pẽhrera gasirore dorecũrãre aĩgãñorã gajirãpũ. Masa dorecũrã iri suhrirore pẽhrerã õarã wañorã. Eropirã watẽa ñajasũnirã iri suhrirore erã pẽhrera pũhrũ watẽa wiria wañorã erãre.

¹³⁻¹⁴ Gajirã judio masa eropa curiniguirã watẽare cóarã judio masa yea árĩñorã. Esceva waĩcũgũ siete ïgu porã árĩñorã. Escevapũ judio masũ pahia opũ arĩpũ. Eropirã erã Pablo ïgu iĩdiro dopa ta Jesu turari mera watẽare

cóãdiariñorã. Eropirã watëa ñajasüdigure boca watëare doreriñorã erã.

—Jesu Pablo ïgu weregu ïgu turari mera dorea mware. Duhuque ïre, arĩriñorã erã. ¹⁵ Watëare erã wadorera pühru, watëapu masugure opa arĩñorã erãre.

—Jesure masia. Pablo sãre masia. Mwapure masibea, arĩñorã watëa erãre.

¹⁶ Erã eroparĩcũ ta watëa ñajasüdigupu burigã erãre ñehamaa wapu. Eropigu erãre ñetariaro iipu. ïgu eropa iira pühru suhri marirã, camicurã oma wiriañorã erã iri wihire watëa cóãdiarãpu. ¹⁷ Erã eropa iira pühru árĩpehrerã Efeso majarã, judio masa, judio masa árĩbirã mera irire pee, güitariacãñorã erã. Eropirã mari Opu Jesu yare wereyaro mariro wereniguiñorã masapu.

¹⁸ Eropirã masa bajarã Jesure umupeorã erã ñero iirare wererã ariñorã. ¹⁹ Erã mera majarã bajarã yea árĩñorã. Eropirã erã erã gojarapũrire purisiriri wereripũrire erogue aĩgãri, masa erã ïaro iripũrire soe cóãcãñorã erã. Iripũri wajacurare erã queocũ, árĩpehreripũri cincuenta mil plata árĩripũri wajacuriyoro iripũri. ²⁰ Eropirã Goãmu yare gamerã bajarã wañorã. Goãmu turari mera ïgu yarã wañorã.

²¹ Erã eropa wara pühru Pablo opa arĩ pepipu: “Macedonia yeba ejamuhta, iri yebare taria Acaya yebaguere ejagura. Iri yebare yu ejara pühru Jerusalengue wagura. Iri macare yu ejara pühru Romague ïagu wagura,” arĩ pepipu Pablo. ²² Eropigu perãre ïgure itamurãre ïgu core obeomuhtarpu Macedonia yebague. Timoteo Erasto sã árĩñorã erã. Eropigu Pablopupu yujugu ta dujapu Asia yebague.

Efesogue masa gua gaguiniguñorã

²³ Irisubure Efesogue Jesu yare gajirã gamebirã Pablo sãre ñhaturiñorã. ²⁴ Yujugu platare mohmegu Demetrio waĩcugu árĩpu. ïgu plata mera erã goãmo Artemisa waĩcugo umupeori wihi wéara wirire muta wirigãre iigu árĩpu. Eropigu ïgu gajirã plata mohmerã mera erã wéanirãre wuaro dua wajatamuriñorã erã. ²⁵ Eropigu Demetrio gajirã plata mohmerãre sihu gameneo, werepu erãre.

—Peeque mu. I mohmeri mera mari wéanirã mera wuaro mari wajatarare masia mu. ²⁶ Ihĩ Pablo ïgu iirare ïgu buhera sãre masia mu. Opa arĩ buhemi ïgu: “Goãmarã wéanirã masa erã iinirã ojocarirã árĩbeama,” arĩ weremurami ïgu. ïgu eroparĩcũ peerã, Efeso majarã, árĩpehrero Asia yeba majarã sã ïgu buherare “Diaye ta ahraa,” arãñorã irire. ²⁷ Eropa arĩrã mari mohmerire mari

wéarare masa gamesome. Eropirā mari goāmo wuago Artemisa ya wihire cóābocoma. Eropirā árīpehrerā Asia yeba majarā, árīpehreri yeba majarā igore umupeosome pare. Eropirā masa igore masibirā mari wéarare asūsosome, arīpū Demetrio erāre.

²⁸ Īgu eroparīcū peerā burigā gua, gaguiniguīñorā:

—Artemisa Efeso majarā yago goāmo turago āhrimo, arī gaguiniguīñorā erāpū.

²⁹ Erā eropa gaguiniguicū Efeso majarā árīpehrerā sā gaguiniguitaria wa pee masiri pehrea wañorā. Eropa warā Gayore, Aristarco säre ñeha, masa erā gamenererogue erāre taragāñorā. Gayo, Aristarco mera Macedonia majarā árīñorā. Pablo mera curirā árīñorā. ³⁰ Erāre ñeacū ĩha Pablopū masa pohro weregū wadiaripū. Jesu yarāpū ĩgure wadorebiriñorā. ³¹ Eropirā gajirā sā iri yeba majarā oparā, Pablo mera majarā árīrā erā pohro majarāre weredoreñorā Pablore:

—Masa erā gamenererogue wabiricāque, arī were-doreñorā oparā Pablore.

³² Eropirā ero gamenererā mera majarāpū bajarā “¿Duhpimorā mari gamenererā iiri?” arī masibiriñorā. Eropirā erā gaguiniguinemoñorā. Ipūgue árīrā gajiropa arī gaguiniguī, gajirā sā gajiropa arī gaguiniguīñorā.

³³ Eropirā judio masapū Alejandro waīcūgure masare were-doreriñorā. Eropigū Alejandro “Ejarimaricāque,” arīgū ĩgu mojoto mera paatupū. “Oā gūare judio masare turirā iima,” arī pepigū judio masare cāhmotadiagū wereniguiripū.

³⁴ Īgu eropa wereniguīdiaquerecū judio masū ĩgu árīcū ĩarā masa árīpehrerā yujuro mera pe hora gaguiniguīñorā.

—Artemisa, Efeso majarā yago mari goāmo turago āhrimo, arī, gaguiniguīñorā erā.

³⁵ Erā eropa arī gaguiniguicū ĩagū Efeso majarā oparāre itamugū masare “Ejarimaricāque,” arī, werepū erāre.

—Mūa Efeso majarā peeque. Mari Efeso majarā turago Artemisa ya wihi corerā mari árīcū árīpehreri yeba majarā masima. Eropirā igo wéarare ũmarogue dijaridigore diburā mari árīcū säre masima masa. ³⁶ Eropirā “I diaye árībeaa,” arīmasibeama. Eropirā guabiricāque mūa. Ōaro pepique mūa. ³⁷ Oā mūa ñeagārirā mari goāmōre ñero arī wereniguibirama. Eropirā erā goāmarā ya wiriguere ñaja, yajabirama. Eropirā ōaro iique mūa.

³⁸ Demetrio, plata mohmerā mera oāre mūa ñearāre weresādiarā, dipuwaja moaropūre wereporo erā. Erā oparāre oāre weresāmasima. ³⁹ Mūa gajino iidiarā, ōaro mera irire gamenere iique. Mūa iiro dopa iinemobiricāque.

40 Dohpagāre m̄ua gua, gaguinirare mari oparā peerā, erā marire weresābocoma. “Marire cóarā iicoma,” arī pepirācoma oparā marire. Eropirā mari arī gaguiniguirare erāre ōaro diaye weremasibea mari, arīp̄u oparāre ita-muḡup̄u masare. 41 Erop̄a arī weretuhaja, “Iripēta āhraa. Waque,” arīp̄u iḡu masare.

20

Macedonia yebague sāre, Grecia yebague sāre Pablo ejaḡu

1 Erā eropa wara p̄hr̄u, Pablop̄u Jesu yarāre sihu gameneo werep̄u. Weretuhaja, mojoto ñeha, goeriserep̄u. Goeriseretuhaja, Macedoniague waha wap̄u. 2 Eroque eja were, ero majarā Jesu yarāre mucubiricū iip̄u iḡu. Erāre weretuhaja, Greciague ejaḡu iḡu. 3 Erore iḡu ūrerā abe gohra árīp̄u. Ero árīḡu Siria yebague taribuja wadiarip̄u. Eropirā judio masa duhri, iḡure ñeadiariñorā. Irire pee Pablo gaji mague Macedonia wari mague waha wap̄u. 4 Erop̄a waḡu Asiague ta ejaḡu. Ero Berea majaḡu Sópater waic̄uḡu Pabl̄ore wapic̄uḡāp̄u. Eropirā Tesalónica majarā Aristarco, Segundo sã iḡure wapic̄uḡāñorā. Eropirā Asia majarā Tíquico, Trófimo sã Asiague iḡure wapic̄uḡāñorā. Derbe majaḡu Gayo waic̄uḡu Timoteo sã iḡu mera wañorā. 5 Iḡu mera majarā iḡu core core waha, Troa waic̄uri macague iḡure coreñorā. 6 Erā eropa corecū buḡabiriri panre bari bosenu p̄hr̄u ḡap̄u Filipogue árīnirā dohodiru mera waha, cinco n̄uri taribujarā Troague ḡua ejaḡu. Siete n̄uri gohra árīb̄u ḡua eroguerere.

Troague Pablo curiḡu wap̄u

7 Soorin̄u árīcū Jesu yarā gamenere panre duhpeñorā Goām̄u yare bocatīrimorā. Erā eropa iiboro core Pablo erāre buhep̄u. Eropiḡu Pablo gajin̄up̄ure wabu árīḡu yoari boje iḡu buhep̄u. Ñami deco mera buhe duhubu iirip̄u. 8 Eropirā erā ūmaro maja taribugue baja dipu sihāgori dipu árīri taribugue gamenereñorā. 9 Pabl̄ore erā peerisubu mam̄u Eutico waic̄uḡu ventana weca m̄uribejaja doap̄u. Eropiḡu Pablo erāre yoari boje buhenemocū iḡu mam̄ure w̄ja ariyoro. Eropiḡu iḡu carīa wa ūhre caya wecague doadiḡu majimadija wap̄u. Iḡu eropa yuhridijara p̄hr̄u erā iḡure s̄riadiḡuḡuere aīwahḡū doboñorā. 10 Erā eropa iicū iaḡu Pablo dijari, mam̄ure papeop̄u. Iḡu eropa iira p̄hr̄u Jesu yarāre werep̄u iḡu:

—Sīporā ñebiricāque. Sīribeam̄i ihī. Ojocarimi, arīp̄u Pablop̄u.

11-12 Īḡu eroparīcǎ mamupǎ sīridigupǎ masa wapǎ. Īḡu masacǎ ĩha erǎ mucubiritaria wañorǎ. Eropa mucubirirǎ ɔmaro maja taribugue mǎria, panre duhpeoñorǎ bocatīrimorǎ. Erǎ eropa iira pǎhrǎ yoari boje Pablo erǎre buhepǎ daja. Boyoboro coregǎ erǎre buheduhupǎ. Buhetuhajacǎ waha wapǎ Pablo.

Pablo Troague árīdigu waha, Miletogue ejapǎ

13 Pablo core dohodiru mera Asogue ḡapǎ ejamǔtabǎ. Pablopǎ mague wadiami. Pablo ĩḡu arīdiro dopa ta Asogue ĩḡure ḡua bocatīribǎ. 14 Īḡure ḡua bocatīricǎ, ḡua mera ñajami dohodirugue. Iriru mera waha, Mitilenegue ḡua ejabǎ. 15 Eroguere eja taria ḡajinǎ Quíore tariabǎ ḡua. ḡajinǎ Samogue ejabǎ ḡua. ḡua carīra pǎhrǎ ḡajinǎpǎre Miletogue ejabǎ pare ḡua. 16 Pablo Pentecostenǎ gohra Jerusaléngue erejadiami. Eropigǎ Asia yebague yoari boje árīdiabirimi. Eropigǎ Efesore diaye taria, Miletogue ejatuhajabǎ ḡua.

Pablo Efeso majarǎ Jesu yarǎ oparǎre werepǎ

17 Eropigǎ Pablo Miletogue árīḡu, Goǎmǎ yarǎ Efeso majarǎ Jesu yarǎ oparǎre sihubeomi ĩḡu. 18 Eropa ĩḡu sihubeora pǎhrǎ erǎ Pablo pohrogue erama. Erǎ eracǎ ĩagǎ erǎre Pablo weremi.

—Asiague ne eragǎ mǎa mera yǎ iirare masia mǎa. 19 Mǎa mera árīḡu ne ḡajiropa arīro mariro Jesu mari Opǎ yare iimǎribǎ yǎhǎ. Eropigǎ mǎare mojomoro ĩabǎ. “Mǎare tarinḡaa,” arībirimǎribǎ yǎhǎ. Judio masa erǎ yǎre ñero iiquerecǎ ta Goǎmǎ yare iimǎribǎ yǎhǎ. 20 Eropigǎ mǎa ðaro waburi dihtare mǎare buhepohocǎbu yǎhǎ. Masa erǎ ĩaro mǎa wirigue sǎre buhebǎ yǎhǎ. 21 Eropigǎ judio masare, judio masa árībirǎ sǎre yujuropa ta buhebǎ yǎhǎ. “Mǎa ñerire bujawereque. Goǎmǎ yare gohrotoque. Eropirǎ Jesu mari Opǎre umupeoque,” arī weremǎribǎ yǎhǎ. 22 Eropigǎ Espírītu Santo ĩḡu dorediro dopa ta dohpaguere Jerusaléngue wagǎ iiaa. Yǎ erogue wagǎ yǎ ḡajiropa waborore masibea yǎhǎ. 23 Ōpa arǎmi Espírītu Santo yǎre: “Jerusaléngue mǎhǎ ñero tarigǎca. Eropirǎ mǎre peresu iirǎcoma,” arǎmi Espírītu Santo yǎre. Dohpaguere yǎ ejara macari nǎcǎgue eropa arī wereama yǎre. Jerusaléngue wagǎ Espírītu Santo ĩḡu werera dihtare masia. 24 Eropigǎ ðari buherire, Goǎmǎ ĩḡu mahiri buherire werebu áhraa yǎhǎ. Jesu mari Opǎ ĩḡu ya árīburire iipehodiaa yǎhǎ. Ire iigǎ árīḡu, yǎ sīriborore ḡuibea yǎhǎ.

25 “Eropigu mua mera árigu Goãmu igu opu árĩrare weremuribu yuhu muare. Mua yu eropa arĩ buhenirãre ne dipaturi muare ãasome yuhu. Ire masia yuhu. 26-27 Eropa masigu dohpagãre ire werea muare. Árĩpehreri Goãmu yare werebu yuhu muare. Eropirã árĩpehrerã mua mera majarã Goãmu yare gamebirã erã árĩcũ yaha dipuwaja árĩbeaa. 28-29 Mua basi õaro iique. Eropirã mua Jesu yarãre Espĩritu Santo muare igu ìhadibudorerare ìhadibuque. Ovejare ìhadiburã ovejare erã ìhadiburo dopa ta Goãmu yarã sãre ìhadibuque mua. Goãmu magu igu sĩrigu igu di cóaro mera Goãmu erãre igu yarã árĩmorã iidi árĩmi. Yuhu õre wara pũru gajirã ñerãpu mua pohro ahri erã buheri mera muare goroweo dũca waricũ iirãcoma. Eropirã Jesu yarãre õaro ìhadibuque. 30 Pũruquere gajirã mua mera majarã ta Jesu yarãre guya, gaji buherire peedorerãcoma. Erã eropa peedorecũ erã peerãcoma. 31 Eropirã õaro iique mua. Ùmuri nũcu, ñamiri nũcu mojomoro ìari mera buhemuribu yuhu muare. Ùhre bojori gohra õaro buhebu mua árĩpehrerãre. Irire yu buhera õaro guñaniguicãque mua.

32 “Dohpaguere yu wara pũru Goãmu muare ìhadibugucumi. Igu mahiri buherire mua buherã õaro árĩrãca mua. Goãmu igu buheri mera muare igu yarãre õaro itamumasimi. Eropigu igu yarã dihtare igu iidiadiro dopa ta mua tamerare õaro iigucumi. 33 Mua niyeru oparire, mua suhri opari sãre “Yũre oque,” arĩbirimuribu. 34 Yu basi mohme wajatabu yaha árĩburire. Eropigu yu gamerire, yu mera majarã erã gameri sãre yu mohme wajatara mera aĩmuribu. Yuhu eropa iirare masia mua. 35 Mari õpa bũrigã mohmerã gajino moorãre itamuro gahmea marire. Ire muare ii ìhmumuribu yuhu. Jesu mari Opu igu arĩrare guñaque mua. “Igu ocũ ñeadigu tauro odigũpu mucubirimi,” arĩpu Jesu igu basi, arĩ weremi Pablo Jesu yarãre.

36 Eropa arĩtuhaja Pablo erã mera mereja, Goãmure serẽma. 37 Igu eropa serẽtuhajacũ erã árĩpehrerã Pablore pabua wayuporã mimi ore goeriserema. 38 “Muare dipaturi ãasome yuhu,” igu arĩcũ peerã bũrigã bũjowerema erã. Eropirã erã igure tuunũrsia buhama peramague. Eroque igure ìhanũrsiama gua wacũ.

21

Pablo dipaturi Jerusaléngue waru

1 Jesu yarãre “Wagu iiaa,” arĩ, dohodiru mera, Cos waĩcũri nũgurogue diaye waha taribujabũ gua.

Gajinũ Roda waĩcũri nũgurogue taribujaja, taria, Pátara waĩcũri macague ejabũ gua. ² Pátara árĩrã, Feniciague waburidirure dohodirure bocajabũ gua. Eropirã iriru mera wabũ gua. ³ Eropa warã Chipre waĩcũri nũgurore diaye ta ĩha tariabũ gua. Copũ dujabũ iri nũguro. Iri nũgurore taria, Siria waĩcũri yebague ejabũ gua. Eropirã dohodiru maja doberire dohodiru majagũ Tiro waĩcũri maca ĩgu durimujucũ, ero payanibũ. ⁴ Ero Jesu yarãre ĩarã, siete nũri gohra dujanibũ gua iri maca ta. Eropirã ero majarã Jesu yarã Espĩritu Santo ĩgu werediro dopa ta erã Pablore Jerusalẽngue wadorebiririma. ⁵ Erã eropa arĩquerecũ iri macare siete nũri gua árĩra puhũ, waha wabũ daja. Gua waboro coregã árĩpehrerã Jesu yarã, erã marasã nome mera, erã porã mera, maca tũro pohro guare ĩhadujarã wama. Eropirã árĩpehrerã gua imiporogue eja, mereja Goãmũre serẽbũ. ⁶ Gua eropa serẽra puhũ, “Warã iiaa,” arĩ, erãre pabuatuhaja goeriseretuhaja waha wabũ gua. Gua wacũ ĩhanũrusia, erãpũ majaa wama erã ya wirigue.

⁷ Tiro waĩcũri macare maja tariabũ gua. Eropirã Tolemaidague tuhajabũ gua. Ero ta wũariyare watubũ. Iri macare eja, Jesu yarãre “Acawererã, ¿ãhriri mũa?” arĩ, yujunũ erã mera árĩribũ. ⁸ Eropirã iri maca ma buharo árĩcũ gajinũ daja Pablo mera mague wabũ gua Cesarea waĩcũri macague warã. Erogue eja, õari buherire weregũ Felipe waĩcũgu ya wihigue ejabũ. Eropirã ĩgu mera dujabũ gua. Felipe Jesu yarã erã siete beyenirã mera majagũ árĩmi. ⁹ Eropigũ ĩgu wapicũrã nome pagũ árĩmi. Erã nomepũ Goãmũ yare wererã nome árĩma. ¹⁰⁻¹¹ Erogue gua bajamenũri gua árĩra puhũ, Agabo waĩcũgu Goamũ yare weremũhtagũ Judeague árĩgu guare ĩagũ erami. Eropigũ ĩgu Pablo yadare tuãdiuridare aĩ, ĩgu basi ĩgu guburire, ĩgu mojotorire diri ĩhmu wereyũmi.

—Õpa arĩmi Espĩritu Santo. “Idare opagũ Jerusalẽngue ĩgu ejacũ, judio masa eropa ta dirirãcoma ĩgure. Dirituhaja, judio masa árĩbirãre orãcoma erã ĩgure,” arĩmi Espĩritu Santo, arĩ wereyũmi Agabo.

¹² ĩgu eroparĩcũ peerã, gua Cesarea majarã mera Pablore burigã mahibũ. ĩgure “Jerusalẽngue wabiricãque,” arĩribũ. ¹³ Gua eroparĩcũ Pablopũ yũhrimi:

—¿Dohpa arĩ orerã iiri mũa? Yũpũre bũjawerecũ iiaa mũa. Erã yure peresu iicũ õaroca. Yũhu Jerusalẽngue Jesu mari Opũ yare yũ iira waja yũ sĩricũ õaroca, arĩmi Pablo guare.

¹⁴ “Wabeaa,” ĩgu arĩcũ peediarã iiribũ gua. ĩgu “Wagũra,” ĩgu arĩcũ, eropa pepicãbũ gua. Õpa arĩbũ:

—Mari Opu ĩgu gamero dopa ta iiporo, arĩbu gua.

¹⁵ Irire weretamutu, gua yare ahmu, waha wabu daja Jerusalengue warã. ¹⁶ Erogue gua wacũ bajamerãgã Cesarea majarã Jesu yarãpu gua mera wama. Eropirã Jerusalengue eja erã mera majagu Mnasón waĩcũgu ya wihigue ejabu gua. Mnasón Chipre majagu ĩgu yoari boje Jesu buhegu árĩmi. Eropirã ĩgu ya wihi gua árĩguri wihi árĩbu. Eropirã Jerusalengue ejabu gua.

Pablo Santiagore ĩagu wapũ

¹⁷ Jerusalengue gua ejacũ, ero majarã Jesu yarãpu “¿Er-arari?” arĩ, mucubiriri mera bocatĩrima guare. ¹⁸ Gajĩnu Pablo gua mera Santiagore ĩagu ejami. Gua erogue ejacũ ero árĩpehrerã Jesu yarã oparã árĩma. ¹⁹ Eropĩgu Pablo erãre ĩgu mojoto ñeara pũru judio masa árĩbirãre ĩgu buherare werepehomi. Goãmu ĩgu itamuri mera ĩgu iirare werepehomi Pablo Jesu yarãre. ²⁰ ĩgu eropa arĩ werecũ peerã,

—Goãmu ðagu, turagu ãhrimi, arĩ umupeoma erãpu. Eropa arĩtuhaja erã Pablora ðpa arĩ werema.

—Acaweregu, dohpaguere bajarã judio masa Jesure umupeorã ãhrima. Mũhu irire masia. Eropirã erã ðpa arĩ pepima: “Goãmu ĩgu dorerire, Moisegue marire ĩgu apirare marire iipehoro gahmea,” arĩrã iima. ²¹ Õpa arĩnemoma erã. “Gajĩpũgue árĩrãre judio masa árĩbirã watope árĩrãre judio masare Goãmu Moiserere ĩgu apirare ‘Iibiricãque,’ arĩ doremi Pablo,” arãma ð majarã judio masa mũre. “Pablo judio masa porãre mari dorero dopa miri gasirogãre wiri aĩdorebeamĩ,” arãma erã mũre. “Judio masa erã iidorerire Pablo duhudoremi,” arĩ i sãre werewũama mũre. ²² Eropirã mũhu ðre eracũ peerã erã gamenererãcoma mũre turimorã. Eropĩgu ðpa iiro gahmea mũre. ²³ Mũre gua dorero dopa ta iique. Dohpague ðre wapicũrã uma Goãmũre umupeorã “Õpa iirãra,” arĩrã ãhrima. ²⁴ Erã mera waque. Eropirã Goãmũ Moiserere ĩgu dorediro dopa ta erã basi Goãmũ yare iiburire iimorã erã ñeri iirire coerã iima. Mũ sã eropa ta iique. Eropa iigu erã eropa iira wajare wajayeque mũpu. Mũhu eropa wajayera pũru erã poarire wũadoremasima erã. Mũ eropa iicũ ĩarã masa mũre erã arĩra iri guyara árĩcũ masirãcoma erã árĩpehrerã. Goãmũ Moiserere ĩgu apira dorerire iigu mũ árĩcũ masirãcoma erã. ²⁵ Judio masa árĩbirã Jesu yarãpũre gua gojarapũre obeotuhajabu. Õpa arĩ gojabu gua. “Goãmarã wéanirãre umupeora barire, dire, wũnũgu mohwejenĩrã waimũrãre babiricãque mũa. Eropirã nome mera ñero iibiricãque.

Nome sã uma mera ñero iibiricãque,” arĩ were gojabu gua gojarapũre, arĩma erã Pablöre.

Goãmũ wihigue judio masa Pablöre ñeañorã

²⁶ Erã eropa arĩ wereniguira pũhrũ gajinu Pablorũ wapicũrã uma mera erã basi Goãmũ yare iimorã erã ñeri iirire coemorã, Goãmũ wihigue ñaja wañorã. Iri wihigue ñajajagu, erãre werepũ Pablo: “I nũcu nũri duhyaa maa coeboro,” arĩ werepũ ĩgu wapicũrãre. Eropirã erã coeturinu erã nũcu Goãmũre waimũrãre erã oburinu árĩbũ.

²⁷ Eropii erã coepethodiro merogã duhyacũ gohra Goãmũ wihigue Pablo ĩgu árĩcũ Asia yeba majarã judio masapũ ñañorã ĩgũre. Eropa ñarã gajirãre iri wihi árĩrãre Pablo mera guacũ iĩñorã erã. Eropa guarã judio masa Pablöre ñeha õpa arĩ gaguiniguĩñorã:

²⁸ —Maa gua acawerẽrã Israe masa guare itamurã arique. Ihĩ ãhrimi. Moise dorerire i wihi sãre cóadore buhemi árĩpehrerãre. Eropigu ĩgu Goãmũ wihiguere judio masa árĩbirã sãre añajadi ãhrami. Eropigu i wihire ñeri mariri wihire ĩgu goroweoadi ãhrami, arĩ gaguiniguĩñorã judio masa Asia yeba majarã ero majarãre.

²⁹ Ero core Jerusalén Pablo Trófimo mera ĩgu árĩcũ judio masa ñañorã. Trófimo Efeso majagu judio masũ árĩbiridigu árĩmi. ĩgu eropa árĩcũ masirã õpa arĩ pepiñorã erã: “Pablo Trófigore Goãmũ wihire añajagu iicumi,” arĩ pepiñorã judio masa.

³⁰ Masare erã eropa arĩ were erã gaguiniguira pũhrũ iri maca majarã árĩpehrerã burigã guañorã. Bajarã omagãri, Goãmũ wihi árĩgũre Pablöre ñeha tarawiria wañorã. Tuhajanugu iri wihi disiporore bihañorã erã ĩgũgue ñajariri arĩrã. ³¹ Eropirã erã ĩgũre wejẽmorã iiriñorã. Erã eropa iicũ ñarã gajirãpũ wererã wañorã surara opũre.

“Árĩpehrerã Jerusalén majarã gamenere gua, gaguiniguirã iiami,” arĩ wererã wañorã surara opũre. ³² Erã eroparĩcũ peegũ opũpũ ĩgu surarare, erã dorerã sãre gameneo, erã mera Pablöre wejẽdiarã pohrogue omagã ejañorã. Surara erã ejacũ ñarã Pablöre panirã pa duhuñorã.

³³ Eropigu surara opũ Pablo pohrogue eja, ĩgũre ñeha, peda comeda mera diridorepũ. Erã dirituhajacũ ñha, opũ Pablöre serẽpipũ masare:

—¿Nihino ãhriri ihĩ? ¿Ñeheno dipuwaja ĩgũre eropa iiri maa? arĩ serẽpipũ ĩgu erãre.

³⁴ ĩgu eropa serẽpicũ peerã masapũ “Õpa iiami ĩgu,” arĩ, gajirã sã gajiropa arĩ, gaguiniguĩ wereñorã surara opũre. Erã eropa gaguiniguicũ surara opũ õaro peebiripũ. Eropigu ĩgu surara ya wihigue Pablöre aĩgãdorepũ. ³⁵ Iri

wihigue eja, Pablo m̄riariñere ĩgu m̄riacũ masapu ĩgure padiarã cãhmotañorã. Erã eropa iicũ surarapu ĩgure aĩcoã m̄ria wañorã. ³⁶ Masa bajarã erãre n̄rusia, gaguinigui n̄rusiañorã.

—Īgure wejẽcãque, arĩ gaguiniguiñorã erã Pablore.

Pablo “Ne masare ñero iibea yũhũ,” arĩ werepũ

³⁷ Eropii Pablore iri wihigue erã peresu iiboro core, Pablopũ opũre serẽpipũ.

—Yũhũ mũ mera weretamudiaca, arĩ serẽpipũ Pablo.

—¿Mũhũ griego masa yare wereniguiiri? ³⁸ ¿Sohõ árĩdigũ, Egipto majagu árĩbeari mũhũ? Īgu masare ĩgu oparãre cóãdoregũ, cuatro mil masa gamewejẽrãpũre masa marirogue aĩgãaru. ¿Īgu árĩbeari mũhũ? arĩpũ opu Pablore.

³⁹ Īgu eroparĩcũ peegu Pablo yũhripũ.

—Īgu árĩbeaa yũhũ. Judio masũ ãhraa. Tarso Cilicia yeba árĩri maca masa dehyoabu yũhũ. Bu árĩri maca majagu árĩbeaa yũhũ. Yũhũ oã masa mera wereniguidiaa, arĩpũ Pablo ĩgure.

⁴⁰ Īgu eroparĩcũ peegu opũpũ wereniguidorepũ masa mera. Eropigu Pablo m̄riariñegue nigui, ĩgu mojotori mera “Ejarimaricãque,” arĩpũ masare. Īgu eropa iicũ ĩarã, ejarimaripehrea wañorã. Erã ejarimaripehrecũ ĩha, Pablo judio masa ya mera werepũ erãre.

22

¹ Yũ acawererã, yũ iirare weregura mũare. Yũhũ werecũ peeque mũa, arĩpũ Pablo.

² Īgu eroparĩcũ Pablo judio masa ya mera ĩgu wereniguiicũ peerã masa ejarimariro dujañorã. Eropigu Pablo erãre werepũ:

³—Yũhũ judio masũ ta ãhraa. Tarso waĩcũri maca, Cilicia yeba árĩri maca masa dehyoabu yũhũ. Eropigu i maca ta Jerusalén ta masabu yũhũ. Eropigu yũre Gamalie waĩcũgu buhemũrimi yũre. Eropigu yũhũ mari ñecũ sumarã mũra dorerire õaro buhebũ. Dohpaguere Goãmũre mũa umupeoro dopa ta yũ sã umupeoniguiã. ⁴ Eropigu Jesure umupeorãre ñero iimũricarabu yũhũ. Yujurãyeri erãre wejẽcãmũricarabu yũhũ. ðmare, nome sãre ñeha, peresu iimũribũ yũhũ. ⁵ Pahia opu, mũrã mera yũ eropa arĩri “Diaye ta ãhraa,” arĩ weremasima mũre. Erã gojaripũrire Jesu yarãre ñeadoreburipũrire yũre gojabasama. Mari acawererãre Damasco majarãre iripũre ĩhmubu iiribũ Jesu yarãre ñeabu. Erãre ñeha, aĩgãri peresu iibu iiribũ.

Jerusaléngue eräre aĩgãdiaribũ eräre dipuwaja moabu, arĩpũ Pablo.

Pablo Jesu yagũ ãgũ warare werepũ

⁶ Eropã arĩtuhaja õpa werenemopũ:

—Jesu yaräre ñeari masũ wadigũ árĩqueregũ goeri boje árĩcũ, Damascogue yũ ejaboro pohro gohra árĩcũ amarogue gosesiri medijubũ yũre. ⁷ Ero eropa wacũ yebague mehmerejagarabũ yũhũ. Yũ mehmerejara pũhrũ wereniguigũ carimi yũre. “Saulo, ¿duhpigũ yũre ñero iiri mũhũ?” arĩgũ carimi yũre. ⁸ “Opũ, ¿nihino ãhriri mũhũ?” arĩ serẽpibũ yũhũ. “Yũhũ Jesu Nazare majagu, mũ ñero iigũ ta ãhraa yũhũ,” arĩ yũhrimi ãgũ yũre. ⁹ Yũ eropa wacũ yũ mera majarã boyorore ãama. Eropirã yũ mera ãgũ wereniguicũ peebirima erã. ¹⁰ “Opũ, ¿dohpa iigũcuri yũhũ?” arĩ serẽpibũ Jesure. “Wahgãnũgajaque. Damascogue waque. Ero mũhũ wacũ, mũre árĩpehreri yũ iidoreburire gajigũ weregũcumĩ mũre,” arĩmi ãgũ yũre. ¹¹ Bũrigã ero cuimijuro wacũ yũ cuiiri boboa wacarabũ yũhũ. Eropirã yũ mera majarã yũ mojtore ñeha, Damascogue tuã wahgãma yũre.

¹² “Ero Ananía waĩcũgũ, Goãmũre umupeogu, marire Goãmũ dorerire iipehogũ árĩmi. Ero majarã judio masa árĩpehrerã erã umupeogu árĩmi. ¹³ Eropigũ ãgũ yũ pohro eranũgara yũre weremĩ. “Acaweregũ Saulo, ãaque dipaturi daja,” arĩmi ãgũ. ãgũ eropa arĩra pũhrũ dipaturi ãabũ yũhũ daja. Eropigũ ãgũre ãabũ yũhũ. ¹⁴ Yũ eropa ãacũ ãgũ Ananía yũre weremĩ. “Mari Pagũ ãgũ gamerire õaro masibure iribojegue beyetuhapũ mũre. Eropigũ ‘Yũ magũ õagũre ãha peegũcumĩ,’ arĩ weremũhtapũ mũre mari Pagũ iribojegue mũ árĩboro core. ãgũ ãhrimi mari ñecũ sumarã mũra erã umupeodi. ¹⁵ Eropigũ mũ ãarare mũ peerare weregũca árĩpehrerãre. ¹⁶ Eropirã dohpaguere yoari boje árĩbircãrã. Wahgãnũgajaque. Eropigũ waĩyedigũ árĩque. Jesure mũ serẽcũ mũ ñerire cóãgũcumĩ,” arĩmi ãgũ yũre, arĩpũ Pablo.

Pablo judio masa árĩbirãre ãgũ buherare werepũ

¹⁷ ãgũ eropa arĩtuhaja Pablo masare werenemopũ:

—Eropa iituhaja yũhũ Jerusaléngue dujari, Goãmũ wi-higue Goãmũre serẽgũ ejabũ. ¹⁸ Yũhũ ero árĩcũ yũ Opũ Jesu yũre dehyoami. Eropã dehyoagu yũre weremĩ. “Jerusalén majarã yahare mũ werecũ peediabeama. Eropigũ duru gajipũgue waque,” arĩmi yũ Opũ Jesu yũre. ¹⁹ ãgũ eroparĩcũ peegũ werebũ ãgũre: “Opũ, mũ yaräre judio masa buheri wiri árĩrãre yũ ñeha para sãre, peresugue eräre iimũrirare masima Jerusalén majarã. ²⁰ Eropigũ mũ yare weregũre

Estebanpure erã wejěcũ ĩagu õaro iirã wejěma, arĩribu. ĩgure erã wejěcũ erã ya suhrire opabasabu yuhũ. Iri sãre masima i maca majarã,” arĩ werebu yuhũ Jesure. ²¹ Yu eroparĩcũ peegu yu Opũ yure weremi: “Yoarogue judio masa árĩbirãre buhebure obeogura mure. Eropigu waque mũhũ,” arĩmi yure yu Opũ, arĩpũ Pablo masare.

Surara opũ Pablo mera weretamupũ

²² ĩgu weremũhtara dihtare õaro peeriñorã masa. Eropa peequererã judio masa árĩbirã pohro Jesu Pablora ĩgu obeoburire ĩgu werecũ peerã erã gua gaguiniguĩgañorã daja.

—Ihĩ dohpague tamerare sĩricuraporo, arĩ gaguiniguĩñorã erã.

²³ Eropirã erã gaguiniguinemo, guari mera erã suhrire wejěsiribeo, nicu mera deañorã. ²⁴ Erã eropa iicũ ĩha surara opũ surara ya wihigue Pablora aññajadorepũ ĩgu surarare. Eropigu surara opũ “¿Duhpirã Pablo mera gua eropa siari gaguiniguirã iiri masa?” arĩ serẽpidiaripũ. Pablora irire serẽpibu, yuradari mera tãradoreripũ ĩgure. ²⁵ ĩgu tãradorequerecũ ĩgure erã dirira pũhrũ, ĩgu pohro árĩgure surarare werepũ Pablo.

—Yuhũ Roma majagu ãhraa. Eropirã “Ñero iigu ãhrimi,” yure arĩmasibea mũa. Eropirã yuradari mera tãramasibea mũa, arĩpũ Pablo ĩgure.

²⁶ ĩgu eroparĩcũ surara ĩgu opũre weregu wapũ.

—Ihĩ Roma majagu ãhrimi. Eropigu õaro iique ĩre, arĩ werepũ ĩgu ĩgu opũre.

²⁷ ĩgu eropa arĩra pũhrũ surara opũpũ Pablora serẽpigu wapũ.

—¿Diaye ta mũhũ Roma majagu ãhriri? Wereque yure irire, arĩpũ ĩgu.

—Ĩgu ta ãhraa yuhũ, arĩ yuhripũ Pablo.

²⁸ ĩgu eroparĩcũ peegu opũpũ ĩgure werepũ.

—Yuhũ Roma majagu árĩdiagu niyeru wũaro wajayebu, arĩpũ ĩgu.

—Yuhũ Roma maja macague masa dehyoabu. Eropigu Roma majagu ãhraa, arĩpũ Pablo.

²⁹ ĩgu eroparĩcũ peerã ĩgure tãrabonirã waha wañorã. Eropigu Pablo Roma majagu ĩgu árĩcũ masigu, ĩgure comedari mera erã dirirare guĩagu, gũĩ árĩpũ surara opũ.

Pablo judio masa opũre werepũ

³⁰ Eropigu surara opũ judio masa Pablora erã weresãrara õaro masidiarũ. Eropa masidiagu gajinũgue comedarire ĩgure ĩgu pãdorera pũhrũ pahia oparãre, judio masa

erã murã mera gameneredorepũ surara opũ. Īgũ eropa gameneredorera pũhrũ ĩgũ erogue Pablora aĩgã, erã core duhudobopũ ĩgũre.

23

¹ Eropigũ Pablo judio masa murã oparãre ĩabocatĩunũgaja wererũ:

—Acawererã, Goãmũ ĩgũ ĩaro umuri nũcu õaro iiniguicãbũ yũhũ, arĩpũ Pablo.

² Īgũ eroparĩcũ peegũ árĩpehrerã pahia weca árĩgũ opũ Ananíapũ Pablo disirore padorepũ. ³ Īgũ pohro niguirãre padorepũ. Īgũre erã para pũhrũ Pablo Ananíare turipũ.

—Masa erã ĩaro dihtare õaro iigũ ãhraa mũhũ. “Goãmũ dorerire tarinũgagu iiaa,” yũre arĩqueregũ ta yũre padorea mũhũ. Eropa padoregũ mũpũ dorerire tarinũgagu iica, arĩpũ Pablo ĩgũre.

⁴ Īgũ eroparĩcũ peerã Pablo pohro niguirã õpa arĩñorã ĩgũre:

—Goãmũ ĩgũ beyedigũ pahia opũre ñero wereniguibiricãque mũhũ, arĩñorã erã Pablora.

⁵ Erã eroparĩcũ peegũ Pablo arĩnemopũ:

—Acawererã, ĩgũ, ĩgũ pahia weca opũ ĩgũ árĩrire masibirabũ yũhũ. Eropigũ eroparĩmaacãbũ yũhũ. Goãmũ ya erã gojarapũ õpa arĩ werea ĩgũre: “Mũa maca majarã opũre ñero arĩ wereniguibiricãque,” arĩ gojara ãhraa, arĩpũ Pablo erãre.

⁶ Eropirã ero pe curu majarã arĩñorã. Yuju curu saduceo masa arĩñorã. Gaji curupũ fariseo masa arĩñorã. Pe curu erã arĩcũ masigũ, Pablo erãre busũro mera wererũ:

—Acawererã, yũhũ fariseo masũ ãhraa. Fariseo masũ magũ ta ãhraa yũ sã. “Sĩrinirã masa mũriarãcoma,” yũ arĩ wereri dipuwaja yũre ñero iidiaa mũa, arĩpũ Pablo.

⁷ Īgũ eroparĩcũ peerã fariseo masa, saduceo masa erã basi gameturiñorã. Eropirã erã basi pe curu dũca wariñorã. ⁸ Saduceo masa õpa arĩrã arĩñorã: “Sĩrinirã masa mũriasome. Espĩritua anyua sã ne marima,” arĩrã arĩñorã. Eropirã fariseo masapũ erã arĩro dopa arĩbiriñorã. Eropirã Pablo “Sĩrinirã masa mũriarãcoma,” ĩgũ arĩcũ erã erã basi gameturiñorã. ⁹ Eropa gameturirã, bũrigã gaguiniguĩñorã. Eropirã fariseo masa mera majarã judio masa buherã wahgãnũgaja, tuhri, wereñorã:

—Ihĩ Pablo ñero iibirami. Eropigũ Espĩritu, o anyu diaye ĩgũ mera wereniguigũ arĩbocumi. Eropirã ĩgũre dipuwaja moarã Goãmũre ĩhaturirã arĩboca mari. Eropiibiricãque, arĩñorã erã.

¹⁰ Erã eropa arĩra pũhrũ erã árĩpehrerã gameturi, bũrigã guañorã. Erã eropa bũrigã guacũ ĩha gũisãpũ Pablora surara opũpũ. “Pablora patasiricãrãcoma,” arĩgu ĩgu ya wihigue aĩgãridoregu ĩgu masa watope ĩgu surarare obeopũ.

¹¹ Gaji ñami Jesu mari Opũ Pablo pohro dehyoa, werepũ ĩgũre:

—Gũibiricãque. Dohpague õre Jerusalẽngue yaha buherire wereabũ mũhũ. Eropigu Romague sãre õpa ta iigu waque, arĩpũ mari Opũ Pablora.

Judio masa Pablora wejẽdiariñorã

¹² Gajinũ ñamiñarigã árĩcũ judio masa bajamerã gamenereñorã.

—Õpa iirã, arĩñorã. Pablora wejẽcãrã. Eropirã ĩgũre mari wejẽboro core ihribiricãrã. Babiricãrã. ĩgũre wejẽbirã oa mera sĩrirã. ĩgũre mari wejẽbiricũ Goãmũ marire wejẽporo, arĩñorã erã.

¹³ Erã eropa arĩrã cuarenta weca ñari judio masa arĩñorã. ¹⁴ Erã eropa arĩ wereniguira pũhrũ erã pahia oparãre, mũrã sãre wererã wañorã:

—Pablora gũa wejẽboro core barire babeaa gũa. ¹⁵ Eropirã mũa, mari mũrã mera õpa arĩ sihubeoque. “Pablora dipaturi serẽpidiaca,” arĩbeoque surara opũre. Mũa eropa arĩra pũhrũ surara opũre aĩgãridoreque Pablora. Eropirã Pablo ĩgu õre ĩgu eraboro pohro gohra árĩcũ ĩgũre wejẽrãca gũa, arĩñorã erã pahia oparãre.

¹⁶ Eropigu Pablo tĩgo magũ erã eropa arĩ wereniguicũ peepũ. Erã eroparĩcũ peegu waha, surara ya wihigue Pablora weregu ñajapũ. ¹⁷ ĩgu eropa werera pũhrũ Pablopũ yujugu surarare sihubeo, werepũ ĩgũre.

—Ihĩ mamũre mũ opũ pohrogue aĩgãque. Ihĩ mũ opũre werediagu iimi, arĩpũ Pablo.

¹⁸ ĩgu eroparĩcũ peegu surarapũ Pablo tĩgo magũre ĩgu opũ pohrogue aĩ eja, werepũ.

—Peresugue árĩgu Pablopũ yũre sihubeo, ĩre mamũre mũ pohrogue aĩgãridoreami. Ihĩ mũre weregu arĩgu iiami, arĩpũ surara ĩgu opũre.

¹⁹ ĩgu eroparĩcũ peegu opũpũ mamũre ĩgu mojtore ñeha tũãgã, masa marirogue ĩgũre serẽpi ĩapũ.

—¿Dohpa arĩbu iiari mũhũ yũre? arĩpũ ĩgu Pablo tĩgo magũre.

²⁰ ĩgu eropa serẽpicũ peegu õpa arĩ werepũ.

—Judio masa yujuro mera, “Õpa iirã,” arĩ, werenigu-iama. Ñamigãre judio masa oparã pohrogue mũre Pablora

aĩgãdorerãcoma. “Mũrã dipaturi Pablöre serẽpidiama,” arĩ gũyarãcoma. ²¹ Eropirã cuarenta weca ñari masa ĩgũre wejẽdiarã mague duhrinijarã corerãcoma. Erã ĩgũre wejẽboro core barire basome. Eropirã ihrisome. “Īgũre mari wejẽbircũ, Goãmũ marire wejẽporo,” arãma erã erã basi. Eropirã dohpaguere mũre Pablöre aĩgãridorerã erãpũ duhri coretuhajama Pablöre wejẽmorã. Eropigũ erã wererã eracũ erãre yũhribita mũhũ, arĩ wererũ mamũ surara opũre.

²² Īgũ eroparĩcũ peegũ surara opũ õpa arĩpũ:

—Yũre mũ wererere gajirãre werebircãque, arĩ wererũ mamũre. Eropa arĩtuhaja mamũre “Wahanisa,” arĩpũ.

Pablöre opũ Feli waĩcũgũ pohrogue obeopũ

²³ Eropigũ surara opũ perã ĩgũ surarare sihugã, erãre dorepũ:

—Doscientos surarare, setenta cabayu peyarãre, doscientos ñoseri mijiri oparãre Cesareague wamorãre erã yare amudorerã waque. Eropirã dohpagã ñami nueve árĩcũ mũa waborore coreque. ²⁴ Eropirã Pablöre cabayuare ĩgũ peyamorãre amubasaque. Opũ Feli pohrogue, Cesareague õaro sorã waque ĩgũre, arĩpũ surara opũ.

²⁵ Eropa arĩtuhaja papera gojarũ. Őpa arĩ gojarũ ĩgũ: ²⁶ “Yũhũ Claudio Lisia mũre turagũ opũ Felire õadoreã. ²⁷ Judio masa ĩre ñehã, wejẽrama. Eropigũ ĩgũ Roma majagũ ĩgũ árĩcũ masigũ, yũ surara mera ĩgũre itamugũ ejabũ. ²⁸ Eropigũ ĩgũre erã weresãrãre masidiagũ judio masa oparã pohro aĩgãbũ ĩgũre. ²⁹ Eropigũ ĩgũ judio masa ya doreri dihtare ĩgũ tarinũgacũ, mari ya dorerire ĩgũ tarinũgabircũ ĩagũ, ĩgũre peresugue apidiabirabũ. Ñehẽ dipuwaja sĩriro marã ĩgũre. ³⁰ Eropigũ judio masa ĩgũre wejẽdiarã, erã duhri corecũ ĩagũ gajigũ wereami yũre. Īgũ eropa werera pũhrũ Pablöre dohpaguere mũ pohro obeogũ iiaa. Eropigũ ĩgũre weresãnirãre ĩgũ ñero iirare mũre weredoretuhajabũ yũhũ,” arĩ gojarũ surara opũ.

³¹ Eropirã surara erã opũ ĩgũ dorediro dopa ta iĩnorã. Iri ñamire Antĩpatri waĩcũri macague Pablöre aĩ ejañorã.

³² Gajinũ gajirã surara cabayua weca peyabirã iri macã ta dujariñorã erã ya macague. Gajirã surara cabayua peyarã dihta ĩgũre aĩ tarigãñorã. ³³ Pũ Cesareague aĩ ejañorã Pablöre. Eropirã surara opũ ĩgũ obeorapũre opũ Felire wiañorã. Eropirã Pablöre aĩ ejañorã opũ pohrogue. ³⁴ Erã eropa wiara pũhrũ iripũre ĩgũ ĩara pũhrũ ĩgũ gajirãre serẽpi ĩapũ:

—¿Di yeba majagũ ãhriri ihĩ Pablo? arĩ serẽpi ĩapũ.

—Cilicia yeba majagu āhrimi, arī wereñorā ĩgure.

³⁵ Erāre serēpituhaja, Feli Pablore werep̄a:

—Mure weresānirā ōre erā eracū m̄a wererire peeḡara, arīp̄a Feli Pablore.

Īgu eropa arīra p̄hr̄u Herode ya wihigue ĩgure ap̄ip̄a. Eropigu ĩgu ūmare ĩgure coredorep̄a ĩgu op̄a.

24

Pablo “Ñero iibirab̄a,” arī werep̄a Felire gajirā weresāra p̄hr̄u

¹ Cinco n̄ari p̄hr̄u Ananía pahia op̄a, judio masa erā murā, dorerire weremehreḡu Tértulo waĩc̄uḡu mera Cesareague ejañorā. Eropirā erā Pablore weresādiarā, op̄a Feli pohrogue ejañorā. ² Eropigu Pablore erā gamenererogue erā aĩ ejara p̄hr̄u Tértulo ĩgure weresān̄ugap̄a. Eropa weresān̄ugaḡu ōpa arīp̄a Felire:

—M̄uh̄u ōaro masiḡu, ḡua op̄a m̄uh̄u ōaro dorecū ḡua i yeba majarā ōaro árĩc̄ā ḡua gamequeāro mariro. M̄u doreri mera ōarip̄are gohroto iiaa i yeba. ³ Eropirā ḡua ōaro árĩc̄ārā mucubiria. Eropirā m̄u mera ōaro mucubiria. ⁴ Dohpague merogā mure gariboḡara ȳuh̄u. Merogā m̄u mera weretamudiaca. Ḡuare peenique dohpa. ⁵ Ihĩ ḡuare garibotariami. Árĩpeh̄reri yebari majarāgue judio masare erā gua gaguiniguicū iimi ihĩ. Eropigu masa erā basi game-turicū iimi ihĩ. “Oparāre cóārā,” arīrā mera majagu āhrimi ihĩ. Eropigu nazareno waĩc̄uri curu op̄a āhrimi. ⁶ Eropigu Goām̄u wihire ñero ĩgu iidiacū ĩarā ḡua ñeab̄u ĩre. Ḡua ñeara p̄hr̄u ḡua ya dorerire ĩgu tarin̄ugaḡu árĩc̄ū ĩgure dipuwaja moadiarab̄u ḡua. ⁷ Eropa moadiaquerecū surara op̄up̄a Lisia waĩc̄uḡu ĩgure ḡuare turaro mera emacāmi. ⁸ P̄hr̄u ĩgure weresānirāre m̄u pohrogue wadoreami Lisia. Īgu eroparĩcū peerā ahrab̄u ḡua. M̄u tamera ĩre serēpiḡu, árĩpeh̄rerire ĩgu ya dipuwajare masiḡuca m̄uh̄u, arīp̄a Tértulo Felire.

⁹ Īgu eropa arīra p̄hr̄u gajirā judio masa Tértulo ĩgu arĩdiro dopa ta “Diaye ta āhraa,” arĩñorā erā s̄a. ¹⁰ Erā eropa arī weresāra p̄hr̄u op̄a Feli Pablore weredorep̄a. Ōpa arī werep̄a Pablo:

—Baja bojori i yeba majarāre m̄u dorerare masia ȳuh̄u. Eropigu ȳu iirare mure wereḡu mucubiria. ¹¹ Doce n̄ari ta wahaa Jerusaléngue Goām̄ure ȳu umupeora p̄hr̄u. M̄uh̄u i diaye árĩc̄ū masidiaḡu gajirāre serēpi ĩaque. ¹² Judio masa ȳure Goām̄u wihiguere boca erā ñeacū masare arī gaguiniguiḡu iibirab̄u. Eropigu “Oparāre cóāque,” arīgu

iibirabu. Eropigu judio masa buheri wirire, erã ya maca sãre ne ñero iibirimurabu. ¹³ Eropirã yure weresãnirãpũ erã weresãrare “Õpa iiami ihĩ,” arĩ weremasibeama mure. ¹⁴ Dohpague yũ iirare weregura mure. Matague ta gua ñecu sũmarã erã umupeodiro dopa ta Goãmure umupeoa yũ sã. Eropigu Goãmũ yare iiaa Jesu ya õari buheri iri arĩro dopa ta. Oã “Jesu ya gũyabirari ãhrra,” arĩ wereniguima oã judio masa. Eropigu Goãmũ doreri, Moiseguere ãgu apirare iri sãre umupeoa yũhũ. Eropigu Goãmũ ya weremũhtanirã erã gojara sãre umupeoa yũhũ. ¹⁵ Oã gajirã judio masa mera ta “Goãmũ árĩpehrerã masare sĩrinirãre õarã, ñerã mera erã masa mũriacũ iigũcumi,” erã arĩ pepiro dopa ta yũ sã eropa ta arĩ pepia. ¹⁶ Eropigu dipuwaja mara yũhũ. Goãmũ irire masimi. Eropirã masa sã irire masima. Eropigu diaye ta werea yũhũ mure.

¹⁷ “Gaji bojore gajipũgue yũhũ curigu árĩgu dujarabu Jerusalẽgue. Yũ acawererã Jerusalẽn majarã mojomorocũrãre niyeru ogu arigu iiaabu. ¹⁸ Dujara, Goãmure umupeobu ãgu ya wihigue ejarabu. Eropigu Goãmũ ãgu coedorero dopa yũ basi iira pũhrũ waibũgure odiarabu Goãmure umupeobu. Erogue yũ árĩcũ oã judio masa yure bocama. Erã bocacũ gajirã yũ mera majarã marama. Gua gaguiniguirã marama. ¹⁹ Eropirã gajirã judio masa Asia yeba majarã ero ãhrrama. Erã yũ ñero iicũ ãanirã árĩrã weresãrã ariporo õguere. ²⁰ Oã õgue árĩrãpũ judio masa oparã gamenererogue yũ árĩcũ ãanirã yũ erogue ñero iirare masirã, erã sã weresãporo. ²¹ Gaji tamerare yure erã weresãmasima: Erã mera árĩgu õpa arĩ bũrigã gaguiniguibũ yũhũ: “‘Sĩrinirã masa mũriarãcoma,’ yũ arĩra waja dipuwaja moaa mũa,” arĩbũ erãre, arĩ werepũ Pablo Felire “Ñero iibiribũ,” arĩgu.

²² ãgu eropa arĩ werera pũhrũ Feli õpa arĩ werepũ Pablore:

—Dohpaguere iripẽta ãhrra. Surara opu Lisia ãgu erara pũhrũ mure yũ iiborore masigũca yũhũ, arĩpũ Feli Pablore. Felipũ Jesu yarã erã iirare õaro masipehogũ árĩpũ.

²³ Eropa arĩtuhaja, Pablore coregure surarare Feli õaro ãhadibudorepũ peresugue árĩgu duhriri arĩgu. Eropa ãhadibudorequeregu õaro iidorepũ ãgure. Eropigu merogã õpu ãgu curiborore. Pablo mera majarãre ãgure peresugue árĩgure itamudoregu eropa dorepũ Feli.

²⁴ Bajamenũri pũhrũ Feli ãgu marapo Drusila waĩcũgo mera ahri, Pablore sihuõrã daja. Feli marapopũ judio maso arĩpo. Pablore erã sihura pũhrũ, Jesucristore ãgu umupeorire Pablopũ werepũ erãre. ²⁵ Eropa weregũ,

ōarire, ōaro guñamasirire, ñerire gamebiririre, pehrerinu árĩcũ masare Goãmũ dipuwaja moaborore werepũ Pablo. Īgu eropa arĩ werecũ peegu Feli güigu, Pablöre werepũ:

—Dohpaguere waque. Pũru yũre mohmeri maricũ sihugũra daja, arĩpũ Pablöre.

²⁶ Eropa arĩgu, Pablo ĩgũre niyeru ocũ gameripũ Feli. Eropigu ĩgu niyerure gamegu, bajasuburi Pablöre sihu, ĩgu mera wereniguimũripũ Feli. Niyerure ĩgu wajayecũ ta Pablöre wiuboñumi gajisubu arĩgu. ²⁷ Pe bojori pũru Porcio Festo waĩcũgu Felire gohrotogu árĩpũ. Eropigu Felipũ opũ arĩgu judio masare mucubiricũ iidiapũ. Eropigu ĩgu Palöre peresu árĩdorepũ dohpa.

25

Festore Pablo ĩgu iirare werepũ

¹ Eropii Festo iri yebague uhrenũ ĩgu opũ ñajara pũru, Cesareague árĩdigũ waha, Jerusalengue ejapũ. ² Ero ĩgu ejacũ ĩha pahia oparã, judio masa oparã mera Pablöre erã weresãrare wereñorã Festore. ³ Pablo ĩgu mague wacũ iri mague ĩgũre cohre, wejẽdiariñorã ĩgũre erã. Jerusalén mague aricũ gameriñorã ĩgũre wejẽmorã. Eropirã erã ōpa Festore upũtu serẽriñorã:

—Pablöre ōguere Jerusalengue obeoque, arĩ serẽriñorã erã Festore Pablöre wejẽdiarã.

⁴ Erã eroparĩcũ peegu, Festo werepũ erãre:

—Dohpaguere Pablo Cesareague peresu aħrimi. Dohpaguere yũhũ erogue wabu iiaa. ⁵ Pablo ĩgu ñero iigu árĩcũ, mũa oparã Cesareague yũ mera waha, ĩgũre weresãque, arĩpũ Festo.

⁶ Eropigu Festo ocho o diez nũri erã mera ĩgu árĩra pũru Cesareague dujaa wapũ. Gajinũ ĩgu dipuwaja moadoreri wihi doagu, Pablöre aĩgãridorepũ. ⁷ Eropirã Pablo Festo pohrogue ĩgu eracũ, judio masa Jerusalengue arinirãpũ Pablo pohro nigui, ĩgũre bũrigã weresãnũgañorã. Eropa weresãquererã “Ihĩ ĩgu ñero iicũ ĩabũ,” arĩ weresãmasibiriñorã. ⁸ Erã eropa arĩ weresãra pũru Pablo ĩgu iirare werepũ:

—Judio masa erã dorerire, Goãmũ wihi maja dorerire, Roma opũ ĩgu dorerire ne tarinũgabirabũ, arĩpũ Pablo.

⁹ Festopũ judio masare mucubiricũ iidiagu, Pablöre serẽpipũ.

—¿Jerusalengue wadiari mũhũ? Mũ iirare yũre erogue weregũca mũhũ, arĩpũ Festo Pablöre.

¹⁰ Īgu eroparĩcũ Pablo yũhripũ:

—Arīpehrerā weca opu īgu ya wihi dipuwaja moadoreri wihi āhraa dohpaguere. I wihiho ta ohō sã āhraa. Eropigu yu iirare ohō ta amu purumujuque. Judio masare yu ñero iibirirare ðaro masia muhu. ¹¹ Ñerire iigu dorerire tarinugagu arīgu “Yure wejēbiricāque,” arībiriboaya. Eropigu oã weresāripu guyarī iri arīcū yure weresānirāre yure omasibea muhu. Yu iirare arīpehrerā weca opure Césare weregu wadiaca yuhu, arīpu Pablo.

¹² Īgu eroparīcū peegu Festopu ðaro masi wererāre serēpituhaja, wereru Pablore.

—Muhu arīpehrerā weca opure mu iirare mu werediaca, īgu pohroque Romague obeorāra mure, arīpu Festo Pablore.

Pablo opu Agripare īgu iirare wereru

¹³ Festo opu ñajara puhruque opu Agripa, Berenice waicugo mera Cesareague Festore iarā ejañorā.

—¿Ne, erarari mu sã? arīñorā erā Festore bocatīri serērā. ¹⁴ Ero bajamenurīgā erā arīra puhru Festo wereru Agripare Pablore erā iirare.

—Ōre Feli īgu peresu iidigu āhrimi. ¹⁵ Eropirā Jerusalēngue yu wacū judio masa erā pahia oparā, erā marā mera ire weresāma. “Īgu ya dipuwajare wejēque īgure,” arī serēama erā yure. ¹⁶ Erā eroparīcū peegu yu ōpa wereabu: “Gua Roma majarāpu peresu erā iinirāre masare eropa ta ocābirimuribu. Eropigu īgure osome mure. Gua ñeadigure īgure weresānirā guare werenigu-iboro core īgure dipuwaja moamasibea gua. Īgu basi sã īgu iirare īgu werenibiricū īgure dipuwaja moamasibea gua,” arābu erāre. ¹⁷ Eropigu ōre erā weresārā eracū īagu yoari boje iibirabu yuhu. Eropigu gajinure masa dipuwaja moadoreri wihi yu doagu, erā weresādigure sihubeoabu. ¹⁸ Eropirā iri wihi īgu eracū iarā īgure ihaturirā wahgānugajama. Erā eropa wahgānugajacū īagu ñetariaro arī weresārācoma arī pepirabu yuhu erāre. Īgure weresādiaquererā weresāmasibirama erā. ¹⁹ Eropirā ire Goāmu yare īgu werera dipuwaja judio masa īgure ihaturiamā. “Jesu waicugu īgu sīridigu masa mariadi arīmi,” arī īgu werera waja weresāma ire. I dihtare weresāma. ²⁰ Ire masibigu īgure ðaro serēpi īabu. “¿Jerusalēngue wadiacuri yu mera? Eroque wereque mu iirare yure,” arīrabu īgure. ²¹ Yu eroparīcū peegu īguru wadiabirami. “Yu iirare arīpehrerā weca opure werediaca,” arāmi īgu yure. Īgu eropa arīra puhru ohō ta īgure coredoreabu arīpehrerā weca opu pohro īgure yu obeoboro core, arīpu Festo Agripare.

22 —Yū basi peediaca ĩġure, arĭpū Agripa Festore.

—Ñamigā ta ĩġure peegūca mūhū, arĭ yūhripū Festo.

23 Eropirā gajinū árĭcū Agripa, Berenice mera masa dipuwaja moadoreri wihigue eja, “Oparā āhraa gūa,” arĭrā gūhyadiaro ii ĩhmuñorā erā, surara oparā, iri maca majarā oparā mera. Eropa ii ñajarā iri wihiguere ñajañorā. Erā ñajajara pūhrū Pablora sihubeopū Festo. 24 Eropigū Festo ōpa werepū:

—Opū Agripa, mūa árĭpehrerā i wihire gamenererā peeque. Ōre ihĭ bajarā judio masa erā weresāgū āhrimi. Jerusaléngue Cesareague sāre erā ĩġure weresāma. “Īġure wejēque,” eropa arĭniguicārā iima erā. 25 Erā eropa arĭquerecū ta ōpa arĭ pepia yūhū. Ihĭ ne ñero iidigu árĭbeamī. ¿Ñehe dipuwaja mari wejēbocuri ĩġure? Eropigū árĭpehrerā weca opūre César Augustore ĩġū iirare ĩġū werediacū árĭpehrerā opū pohroque obeogūra ĩre. 26-27 Eropigū ihĭ ĩġū iirare masibirinica yūhū dohpa. Eropa masibirinigū mari opūre were gojamasibirica. Eropigū mūare ĩġū werecū peedoregū iiaa dohpaguere. Opū Agripa, dohpague tamerare ihĭ āhrimi mū serēpi ĩabu. Mū serēpi ĩatuhaja mari masira pūhrū ĩre erā weresārare ōaro were gojagūra. Ihĭ ĩġū ñero iirare yū masibiriqueregū ta opū pohroque ĩġure yū obeocū ōabeaa. Eropigū dohpaguere erā weresārare ōaro masidiagū iiaa, arĭpū Festo erāre.

26

Pablo Agripare ĩġū iirare werepū

1 Īġū eropa arĭra pūhrū Agripa Pablora arĭpū:

—Mū basi ta wereque, arĭpū ĩġū Pablora. Īġū eropa arĭra pūhrū Pablora, “Ejarimaricāque,” arĭġū ĩġū mojotorire aĭ wahgūbeo, ĩġū iirare werenūgarū:

2 —Opū Agripa, yūre judio masa erā weresārare, yū iirare mūre weregū, dohpaguere ōaro sĭporācūa. 3 Gūa judio masa gūa iiricūrire, gūa buheri sāre mūhū ōaro masicū tamerare mucubiria yūhū. Eropigū mūhū yūre ōaro peeque, arĭnūgarū Pablo.

Pablo Jesu yagū ĩġū árĭboro core ĩġū árĭricūrare werepū

4 Eropa arĭtuhajagū ōpa arĭnemopū ĩġū:

—Mamū árĭġū yū árĭricūrare árĭpehrerā judio masa masima. Ūmūri nūcū yū masa dehyoara pūhrū yaha yebaguere, Jerusaléngue sāre yū árĭrare masima erā. 5 Negohraguere fariseo masū árĭribū. Eropigū fariseo masa erā dorerire, erā iirinore yūhū iipehodigū árĭcū erā masima. Erā mūre werediarā, irire weremasima

erã. ⁶ I dipuwaja ta yũre weresãmurima. Gua ñecu sumarãre “Sĩrinirãre masugura,” Goãmũ ĩgu arĩ apirare “Diaye ta ãhraa,” yũ arĩri waja oã yũre weresãmurima. ⁷ Yũ acawererã judio masa, árĩpehrerã doce cururi majarã Goãmũ masare ĩgu masuborore mucubiri cohrema. Eropirã Goãmũre umupeoniguicãma. Eropa corerã árĩrã yũ iiro dopa ta iima erã sã. Opũ Agripa, eropa yujuropa gua iirã árĩquerecũ ta erãpũ yũhũ ĩgu masuborore ii coreri waja yũre weresãmurima judio masa. ⁸ ¿Duhpirã sĩrinirãre Goãmũ ĩgu masuborore peediabeari mũa judio masa? arĩ werepũ Pablo.

Pablo Jesu yarãre ĩgu ñero iirare werepũ

⁹ Eroparĩtuhaja õpa werenemopũ:

—Jesu Nazare majagũre ĩanibigu dohpa ñeri dihtare iidiaribũ yũhũ ĩgu yarãre. ¹⁰ Eropigu Jerusalengue eropa iimuriribũ yũhũ. Pahia oparã yũre erã dorera pũhrũ bajarã Jesu yarãre peresu iimuribũ yũhũ. Eropigu oparã erãre erã wejẽdorecũ, wejẽmuribũ yũ sã. ¹¹ Bajasuburi árĩpehreri judio masa erã buheri wirigũe Jesu yarãre ñero iidoremuricarabũ. Eropigu Jesu yarã Jesure erã cóacũ iidiaribũ yũhũ. Erã mera burigã guabũ yũhũ. Eropigu gaji macarigũe sãre erãre ñero iigu ejamuricarabũ yũhũ, arĩ werepũ Pablo.

Pablo Jesu yagũ ĩgu warare werepũ

¹² Eropa arĩtuhaja õpa werenemopũ:

—Eropigu Damascogue Jesu yarãre ñero iidiagu ejaribũ. Erãre yũhũ ñero iidiacũ ĩarã pahia oparã yũre wadorema. ¹³ Õpa árĩbũ, opũ Agripa: Goeri boje árĩcũ gohra mague yũ wacũ umaro maja gosesiriri, abe umũ majagu tauro yũre yũ mera warã sãre gosesiribũ. ¹⁴ Gua árĩpehrerã yebague mehmerejabũ. Judio masa ya mera yũre ĩgu wereniguicũ peebũ. “Saulo, Saulo, ¿duhpigu mũhũ yũre ñero iiri? Mũhũ yũ mera guagu yũre yũhribigũ, mũ basi ñero taria,” arĩmi yũre. ¹⁵ “Opũ, ¿nihino ãhriri mũhũ?” arĩ serẽpibũ yũpũ. “Yũhũ Jesu ta ãhraa mũ ñero iigu. ¹⁶ Wahgãnũgajaque mũhũ. Yũ pohro majagu mũre iibu dohpague dehyoa yũhũ. Dohpagãre mũhũ yũre ĩarare, pũhrũ mũre yũ ĩhmuburi sãre gajirãre weredorebu apigũca mũre. ¹⁷ Judio masare, judio masa árĩbirã sãre mũre buhedoregũ obeogũra. Erã pohro mũ árĩcũ, mũre erã ĩhaturicũ mũre itamugũra. ¹⁸ Yahare erãre masicũ iique mũhũ. Eropigu erã ñerire duhucũ iique mũhũ. Õaripũre gohrotocũ iique erãre. Watĩre erãre gamebircũ iique mũhũ. Eropigu Goãmũ yapũre iicũ iique mũhũ erãre. Mũhũ eropa iicũ erã yũre

umupeorācoma. Erā eropa umupeocū ĩagu erā ñeri iirare cādijigusa. Eropirā erā Goāmū ĩgu beyenirā mera majarā mera árĩrācoma. ĩgu oburire opamorā árĩrācoma erā," arĩmi Jesu yure, arĩ werepū Pablo.

Pablo ĩgu iirare ĩgu mohmerire werepū

¹⁹ Eroparĩtuhaja õpa werenemopū:

—Opū Agripa, umaro maja yū peerire tarinugabiribū. ²⁰ Damascogue buhemũtabū. Pũhrū Jerusalén buhebu daja. Pũhrū Judea yeba, judio masa árĩbirā pohrogue sãre masare erā ñero iirare bujaweredore, Goāmū yare gamedorebū. “Õarire mũa iicũ ĩarā mũa ñeri iirare mũa bujawererare gajirā masirācoma,” arĩgu, erãre õarire iidoregū buhebu. ²¹ Goāmū ya wihi yū árĩcũ yū eropa arĩ wereri waja judio masa yure ñeha wejẽdiarima. ²² Eropigū umuri nũcū Goāmū ĩgu itamuro mera eropa buheniguicãa. Eropigū dohpaguere mũa árĩpehrerãre oparãre bu árĩrã sãre ĩgu yare weregū iiaa. Iribojegue majarā Goāmū yare weremũtanirā Moise mera erā wereyudiro dopa ta werea yū sã. Õpa arĩ wereyuñorã erã: ²³ “Cristo Goāmū ĩgu obeodigupū ñero tarigucumi. Eropigū sĩrigū masa mũriamũtagū árĩgucumi ĩgu. Eropigū masare ĩgu itamuborore judio masare judio masa árĩbirã sãre masicũ iigucumi,” arĩ wereyu gojamuriñuma iribojegue majarã. Yū sã erã werediro dopa ta werea, arĩ werepū Pablo Agripare.

Pablo Agripare Jesu yagu iidiaripū

²⁴ ĩgu eropa arĩ werera pũhrū Festo ĩgure bũrigã gaguinigui werenigupū:

—Pablo, mũhū goroweregū āhraa. Mũhū baja buhegu goroweregū wahaa, arĩ gaguinigupū Pablöre.

²⁵ ĩgu eroparĩcũ peegu õpa yũhripū Pablo Festore:

—Opū, goroweregū árĩbeaa yũhū. Yū wereri diaye ta āhraa. Eropigū yũhū ire gũhyadiaro mera arãa. ²⁶ Opū Agripapū i yū wererire õaro masimi. Eropigū yũhū ĩgure gũiro mariro werea. I wererire árĩpehrerã masa masima. Eropigū árĩpehreri ire yū arĩrare opū Agripa ĩgu masicũ masia yũhū, arĩpū Pablo Festore.

—ĩgu eropa arĩtuhaja õpa arĩpū Agripare:

²⁷ —Opū Agripa, Goāmū ya weremũtanirã erã wererare peea mũhū. Erã wererire mũ peecũ masia yũhū, arĩpū Pablo Agripare.

²⁸ —¿Ire yure weregū merogã mũ wereri Jesu yagu yū wacũ iidiagu iiri mũhū? arĩpū Agripa Pablöre.

²⁹ ĩgu eroparĩcũ Pablo yũhripū.

—Merogã wereniguigu o yoari boje wereniguigu mua árîpehrerãre yuhu árîro dopa ta Jesu yarã árîcũ gahmea. Irîre serêbasaa Goãmure. Eropigu yu iro dopa ta peresugue mua árîcũ tamerare gamebeaa yuhu, arîpu Pablo.

30-31 Īgu eropa arîra puhru Agripa, Festo, Berenice árîpehrerã gajirã mera wahgãnuga wiria, erã basi wereniguiñorã:

—Ihĩ Īgu iira waja ne peresu iimasibea mari. ¿Eropirã mari ñeheno dipuwaja ĩgure wejêbocuri? arĩ wereniguiñorã erã erã basi.

32 —Ihĩ “Árîpehrerã weca opure yu iirare werediaca,” ĩgu arĩbiricũ mari wiuboaya ĩgure peresugue árĳgure, arîpu Agripa Festore.

27

Pablo ĩgure weresãrare Romague weregũ wapu

1 Pablöre Italiague árîpehrerã weca opu pohrogue dohodiru mera obeorã, ĩgu mera gajirã peresu árîrã sãre obeoñorã. Eropirã Julio waĩcugure erãre ĩhadibudorerã obeoñorã erã. Julio cien surara opu árĳpu. Īgu ya curu Augusto yarã surara waĩcuñorã. ² Yu sã Pablöre wapicugãbu. Eropirã Adramitio waĩcuro majaru dohodiru mera ñajabu gua. Iriru Asiague waburidiru árĳbu. Ñajatuhaja, iriru mera wabu. Aristarco Tesalónica waĩcuri maca majagu gua mera wami. Tesalónica Macedonia yeba árĳbu. ³ Gajĩnu gua Sidóngue ejabu. Erogue ejaгу Julio Pablöre ðaro iimi. Eropigu Pablöre ĩgu mera majarã pohrogue ĩagu wadoremĩ. Eropigu Pablo mera majarã ĩgure ĩgu gamerire erã ocũ “Oaroca,” arĩmi Julio. ⁴ Dohodirugue ñajarã daja gua taribujacũ burigã miruñe guare gajipugue weãtaribujubu. Eropirã Chipre waĩcuri nuguro cãhmotarogue diayepu wabu gua. ⁵ Pu Ciliciare taria, Panfilia sãre taria, Mira waĩcuri macague Licia yebague árĳri macague tuhajabu gua.

⁶ Erogue ejarã, Alejandriague aridirure, Italiague wadirure dohodirure bocabu. Eropigu surara opu guare irirugue wadoremĩ. ⁷ Bajanuri dabero waro waha, “Ñe yeboca,” arĩ, waha, Gnido waĩcuri maca diaye ejabu gua. Erogue eja taria, miruñe burigã weã, gua wadiadirore guare weãbeobiribu. Eropirã gua copugue majipa wabu. Eropirã Creta waĩcuri nuguro iri nuguro cãhmotari masepu gua taribuja waha, Salmón waĩcuri ñore tariabu gua. ⁸ Erogue tari, iri nuguro pohro waha, “Ñe yeboca,” arĩ

waha, “Ōari peramaha” waĩcurogue tuhajabu. Peramaha Lasea waĩcũri maca pohrogue árĩbu.

⁹ Erogue gua yoari boje árĩra pũhrũ, gua waboropũ guhyataribu. Eropiro erã ba duhurinu bosenu tarira pũhrũ, Pablo dohodiru majarãre weremi.

¹⁰ —Peeque mua. Ba duhurinu bosenu pũhrũ mari wacũ marire mirimaja guhyataria. Iru dohodiru, dohodiru maja, mua doberi sã mari mera majarã sã mari dedereboca warã, arĩrimi Pablo.

¹¹ Īgu eroparĩquerecũ surara opũ dohodiru opũpũre peegu, autugu sãre peegu, Pablo ĩgu wereripũre peedia-birimi wadiagu. ¹² Erã payari peramaha puhiró árĩcũ ōari payari peramaha árĩbiribu. Ero eropa árĩri peramaha árĩcũ dohodiru majarã bajarã wadiarã, Fenicegue mũriadiarima puhiró waboro core. Fenice Creta waĩcũri nũgũro maja peramaha árĩro, miruñe ero aridirogue abe mũririroguepũ copũgue diayepũgue sãre ĩhabeo miruñe aricũ ōaro cãhmotari maca árĩbu. Ero eropa árĩri peramaha árĩcũ masirã erã erogue yuju puhĩbũgu árĩrisubu árĩdiarima.

Wũariyague miruñe, deco wũaro ariyoro

¹³ Eropii docapũ surgue daberogã miruñe arinũgabũ. “Dohpagãre ōarinũ mari waburinu ãhraa,” arĩ pepiriñorã erã. Miruñe ero aricũ erã comeyere tarawahgũ, Creta nũgũro pohrogã mũriabũ gua. ¹⁴ Eropii pũhrũñari miruñe gohroto noreste waĩcũri miruñe bũrigã weãbu. ¹⁵ Eropiro dohodirure miruñe bũrigã weã erabu. Miruñe ero weãbeoro wamasibiri, majipa, miruñe mera wabu gua. ¹⁶ Clauda waĩcũri nũgũrogã pohrogue docapũgue waha, iri nũgũrogã guare merogã cãhmotabu. “Marire yebo ãhraa,” arĩrã erore dohodiru majaru miridirugã gasirure ōaro tarapeo diribu gua. ¹⁷ Irirure dohodirugue gua tarasã diripehora pũhrũ wũarida mera erã waĩñea peoma. Libia yeba tũro pohro árĩri imipororire “Iriru gasiru dohodiru iri mehtuhajari,” arĩrã gũi árĩma erã. Eropirã erã miru ñeari suhrire erã aĩdijura pũhrũ dohodiru dihtare miruñe weãbeobũ. ¹⁸ Miruñe, deco mera bũrigã aribu. Gajinu sãre miruñe mũraro ta daja aricũ ĩarã erã erã doberire diague duhrimeyura pũhrũ taribujabu gua. ¹⁹ Gajinu dohodiru majare diague cóãma erã erã basi. ²⁰ Bajanũri ñĩpirinũri árĩcũ, abe mũmũ majagu necã sã ne deyobirima. Eropiro bũrigã miruñe aribu. Eropirã “Miria wahaa mari. Eropirã sĩria warãca,” arĩ pepiribu gua.

²¹ Eropigu Pablo yoari boje erã ba duhura pũhrũ ĩgu erã core nũgaja, weremi erãre.

—Mũare yu werecũ peebirabu mũa. “Cretague árĩrã mari wacũ gũhya árĩca,” yũhu arĩcũ peebirabu mũa. Yũre peerã, iru maja árĩpehrerire dedeobiriboaya mũa. ²² Eropigu dohpague mũare werea. Guñaturaque. Eropirã güibiricãque. Árĩpehrerã mari tarirãca. Iru dohodiru dihta marire wahribasaroca. ²³ Dohpagã ñamire Goãmũ anyu yũre dehyoami. Goãmũ yagu ãhraa yũhu. Eropigu ïgũre umupeoa yũhu. Anyupu yu pohro arigu wereami. ²⁴ “Pablo, güibita. Árĩpehrerã weca opũre mũ iirare mũre werero gahmea. Goãmũ õagũ ãhrimi. Eropigu ïgũre mũ serẽro dopa ta dohpague mũa mera majarã sãre itamugũcumi,” arãmi yũre anyu. Eropirã güibirãta mũa. ²⁵ Anyu yũre ïgũ arĩdiro dopa ta eropa waroca. Goãmũre umupeoa yũhu. Eropigu ïgũ werediro dopa ta “Diaye ta ãhraa,” arĩ pepia yũhu. ²⁶ Marire nũgurogue miruñe weãbeo cóãroca, arĩ weremi Pablo erãre.

²⁷ Yuju ñami pe semana pũhrũ wũariya Adria waĩcũriya miruñe gũare bũrigã weãbu. Irisubure ñami deco dohodiru majarã ɯmapũ “Tũrogue ãhraa mari,” arĩ pepima erã. ²⁸ Erã eropa arĩ pepirã yurada nũcũdiru comerure dihri, duhmiumediju queoñama. Treinta y seis metro gohra ãhcãbu. Mero ta waha, queoma daja. Irisubure veintisiete metro gohra ãhcãbu. ²⁹ Eropirã ɯtãre mehtuhajari arĩrã dohodiru auturogue wapicũriye comeyerire dirimiu dijuma erã diague dabero wacũ gamerã. Eropirã “Yojaro boyoporo,” arĩrã, bũrigã serẽma erã. ³⁰ Dohodiru majarã ɯmapũ erã dihta duhririma. Erã miridirugãre dohodiru majarure diague taradijupo dohodiru ïguiru come dipure erã dijudio dopa ta iirima erã miridirugã marire ïhari arĩrã. ³¹ Erã eropa duhridiaquerecũ Pablo erã eropa iicũ masigu surara opũre, ïgũ surara mera weremi:

—Oã, ɯma miridirugã mera erã wacũ mũa árĩpehrerã sĩrirãca, arĩmi Pablo.

³² ïgũ eroparĩcũ peerã surarapũ miridirugãre diriridarire wirita, irirure cóãcãma.

³³ Boyoboro coregã Pablo erãre badoremi.

—Pe semana gohra mũa ne babeaa. ³⁴ Eropirã dohpaguere barã arique. Eropigu mũare badorea. Mũa ojocaridiarã baque. Árĩpehrerã mũa tarirãca, arĩmi Pablo erãre.

³⁵ ïgũ eropa arĩra pũhrũ Pablo panre aĩ, árĩpehrerã erã pohro Goãmũre “Õhaa,” arĩ, duhpeo, irire bami ïgũ. ³⁶ ïgũ eropa bacũ ïha erã sĩporã turarã waha, árĩpehrerã erã sã bama. ³⁷ Gũa árĩpehrerã doscientos setenta y seis masa dohodirugue árĩbu gũa. ³⁸ Eropirã erã árĩpehrerã yapia

waha “Iru dohodiru n̄c̄u árīca,” arī, baja trigo barire diague cóama daja.

Dohodiru imiporogue mehbejayoro

³⁹ Boyocū dohodiru majarā ɯma n̄ɣurore ĩarā, “Ōpa waīc̄uri n̄ɣuro āhraa i n̄ɣuro,” arī ĩha masibirima. Eropirā erā dipatūgure imiporo árīc̄ū ĩarā, “Mari iritūgugue warā, erogue mehmejaboca imiporogue,” arīma erā. ⁴⁰ Eropa arīrā, come dipure diriridarire writa medijucāma erā. Erā eropa iira p̄hr̄u dohodiru ĩguiru maja suhriro aī wahgū nuguma diaye miruñe weābeocū gamerā. ⁴¹ Eropiro dohodirup̄ ĩguirup̄ imiporogue sīmaja merejamasibirib̄u. Eropiro auturore b̄rigā p̄gūri pamehtucū iriru auturo wahria wab̄u.

⁴² Eropa wacū ĩarā ōpa arīma surara.

—Iru miricū mari peresu iinirā t̄rogue baatuhaja duhricārācoma. Eropirā erāre wejēpehocārā, arīrima surara.

⁴³ Eropiḡu surara op̄p̄u Pablora wejēdiabiḡu árīpehrerā peresu árīrāre wejēdorebirimi. Eropiḡu árīpehrerā baamasirāre surara op̄u mata t̄rogue baatujadoremi. ⁴⁴ Eropirā gajirā dohodiru maja wahrira mijiri mera yu-urīñaja, iri mijiri weca peya baa majama. Ḡua eropa ĩirā ḡua árīpehrerā t̄rogue tuhajab̄u ōaro.

28

Pablo Malta waīc̄uri n̄ɣuro árīp̄u

¹ Eropii iri n̄ɣurogue ḡua árīpehrerā majajan̄gajara p̄hr̄u iri n̄ɣuro waīre masib̄u. Malta waīc̄uri n̄ɣuro árīb̄u. ² Iri n̄ɣuro majarā masa ōarā árīrā, ōaro iima ḡuare. Eropirā deco ḡua weera p̄hr̄u yusatariab̄u ḡuare. Eropirā ero majarāp̄u peame dihutuhaja, ḡuare s̄hmadorema. ³ Pablo peare aīḡari aītīami. ĩḡu aītīara p̄hr̄u iri pea pohecague árīdiḡu añā coñorpore wiriḡu, Pablo mojoto curītuhajami yahawearo mariro. ⁴ ĩḡu curītuhajacū ĩarā, iri n̄ɣuro majarā erā basi wereniguima:

—Ihī masa wejēdiḡu árībocumi. Eropigo mari turago dipuwaja moago ɯmaro majago ĩḡure dipuwaja moago, ojocaridorebeamo. ĩḡu w̄ariyague miriḡu tarituhajadiḡu árīrami. Dohpaguere igop̄u ĩḡure ojocaridorebeamo, arīrima erā basi.

⁵ Eropiḡu Pablo añare peamegue wejēsiri mehpeomi. ĩḡu añā p̄ribirimi. ⁶ “Bijiroca,” arīrā, corerima erā. Ne bijibirib̄u ĩḡure. “ĩḡu sīria waḡucumi,” arīrā erā ĩha corerima. ĩḡure p̄ribirimi. Yoari boje ero bijibiricū ĩarā,

ĭgure pūribiricū ĭarā, gajiropa pepirima erā. “Ihī goāmarā mera majagu ārībocumi,” arīrima erā.

⁷ Erā baa tuhajadiro pohro Publio waīcugu ya poeri ārību. ĭgu iri nūguro majagu opu ārīmi. Eropirā ĭgu guare ōaro iicū ũhrenu gohra ĭgu ya wihigue ārību gu. ⁸ Publio pagu yojorocu, nimacuricugu ārīmi. Eropigu ĭgu camague oyami. Eropigu Pablo dorecugu ya taribugue űaja, Goāmure serē, ĭgu mojotorire ĭgu weca duhpeo, ōagu wacū iimi ĭgure. ⁹ ĭgu ōagu wacū ĭarā ārīpehrerā gajirā iri nūguro majarā dorecūrāre Pablo pohrogue aīgārima. Erā eropa aī eracū ĭagu Pablo erāre ōarā wacū iimi erā sāre. ¹⁰ Pūhrū erā baja sāre waja mariro oma. Guā waboro coregā ārīpehreri guā gamerire, guā warā guā baburire dohodirugue durisābasama erā.

Pablo Romague ejaru

¹¹ Ūrerā abe iri nūgurogue guā ārīra pūhrū dohodiru mera wabu guā daja. Iriru dohodiru ĭguiru perā goāmarā Cástro, Pólux waīcūrā erā wéanirā niguima. Alejandriague aridiru ārību iriru. Puhirópē iri nūgurogue iriru dohodiru payabu. ¹² Waha, Siracusa waīcūri macague ejarā, ũhrenu gohra iri macare ārību guā. ¹³ Iri macare wiri waha, Regio waīcūri macague ejabu guā. Gajinu surgue miruñe ahri guare weābeobu. Penū pūhrū Puteoli waīcūri macague ejabu. ¹⁴ Erogue Jesu yarā bajamerāgā guare bocatīrima.

—Yuju semana gohra guā mera dujaque, arīma erā guare.

Erā eroparīcū peerā yuju semana gohra erā mera dujanibu. Pūhrū mague majaa, Romague ejabu guā pare. ¹⁵ Ero majarā Jesu yarāpu guā ejarare peerā, Apio waīcūrogue doberi duarogue guare bocatīrima. Gajirā Jesu yarā “Ūhre wihi” waīcūrogue guare bocatīrima erā sā. Erā eropa bocatīricū ĭagu Pablo mucubiriri mera Goāmure “Ōhaa,” arī, ōaro siñaja wami. ¹⁶ Romague guā ejara pūhrū erā peresu erā iinirāre ero majagu peresu corerā opure weremi. Eropirā Pablopure yujugu ta apima ero majarā oparā. Eropigu ĭgure yujugu surara coremi.

Pablo Romague buheru

¹⁷ Ūhrenū pūhrū Pablo judio masa buherā mera gamenerebu, erāre sihumi. Erā gamenerera pūhrū ĭgu erāre weremi:

—Acawererā, mari acawererāre, mari ñecu sūmarā erā iimūrirare, marire erā buhera sāre tarinūgabirimūrabu yūhu. Yū eropa tarinūgabiriquerecū ta Jerusalén yure ñehama Asia majarā judio masa. Erā eropa iira pūhrū Roma majarāre yure peresu iidorema erā. ¹⁸ Erā eropa

iicũ Roma majarã yũre serẽpi, yũhũ ñero iibigu yũ árĩcũ yũre “Dipuwajacũgũ àhrimi,” arĩmasibirama. “¿Ñehe dipuwaja dipuwaja wejẽbocuri mari ìgũre?” arãma erã yũre. Eropirã yũre serẽpirãpũ yũre wiudiarama. ¹⁹ Judio masapũ yũre wiudorebirama. Eropigu yũ acawererãre judio masare weresãdiabiriqueregũ ta, “Árĩpehrerã weca opũre yũ iirare diaye werediaca yũhũ,” arĩ serẽabũ. Judio masa yũre erã wiudorebircũ ìagũ “Roma majagũ opũre weregũ waro gahmea yũre,” arãbũ. ²⁰ Eropii mũare ire werediagũ sihuabũ. Cristo marire taubu judio masa erã coredigũ ìgũ yare yũ wereri waja yũhũ peresugue àhraa. Eropigu irire mũare werebu sihuabũ, arĩmi Pablo judio masa oparãre.

²¹ Ìgũ eroparĩcũ peerã erãpũ ìgũre werema.

—Judio masa mũare quere wereripũrĩre guare ne obeo-birama. Eropirã erogue arinirã sã gũa acawererã guare mũ eropa warare werebirimũrama. Erã “Ìgũ ñero iigu àhrimi,” arĩ mũare werebirimũrama. ²² Mũa ya curure árĩpehrerogue masa erã ñero wereniguicũ gũa masia. Eropa masirã mũ buherire mũ werecũ peediaa gũa, arĩma erã ìgũre.

²³ Eropa arĩtuhaja, “Gajinũ árĩrã,” arĩma erã. Gajinũgue Pablo mera gameneremũhtanirã tauro masa bajarã ìgũ árĩroguere erama. Ñamiñarigã Goãmũ ìgũ opu árĩrãre òari buherire ìgũ buhenũga, pũ ñamigue buhe duhũmi. Goãmũ dorerire Moisegue ìgũ apirare, Goãmũ ya weremũhtanirã erã gojarare buhemi. Eropa buhegũ, erãre Jesure masicũ iidiagũ iirimi Pablo. ²⁴ Yujurãyeri ìgũ buherire gamema. Eropirã gajirãpũ peediabirima. ²⁵ Eropirã erã basi pe curu game dũca warĩ wama. Erã wiriaboro core Pablo Isaia ìgũ wereniguirare weremi. Òpa arĩmi erãre:

—Isaia Goãmũ yare weremũhtadigu ìgũ werera diaye ta àhraa. Mari ñecũ sũmarãre weregũ árĩgũ Espĩritu Santo Isaiare òpa arĩ were gojadoreñumi:

²⁶⁻²⁷ Ire oãre weregũ waque: “Dipu bũrirã àhraa mũa.

Eropirã yahare peediabeaa mũa. Gamiri toyobirã dopa ta peediabeaa mũa. Eropirã yahare peequererã peesome mũa. Mũa eropa árĩbirã òaro peeboaya mũa. Eropirã òaripũre gohrotoboaya mũa. Eropigu mũare peame wabonirãre tauboaya yũhũ,” arĩmi Goãmũ, arĩ gojañumi Isaia, arĩmi Pablo erãre.

²⁸ Ìgũ eropa arĩra pũhrũ Pablo werenemomi:

—Ire masique mua. Goãmu buherire masare igu õaro taurire judio masa arĩbirãre buherãca gua. Erãpu peerãcoma, arĩmi Pablo judio masare.

²⁹ Igu eroparĩcũ peerã judio masa irire erã basi buringã game dũyaso wiriama.

³⁰ Pe bojori gohra Pablo igu eropa wajayeniguiiri wihigue arĩpu. Ero arĩgu, arĩpehrerã igu ya wihigue warãre mucubiriri mera bocatĩrimuripu igu. ³¹ Eropigu igu güiro mariro Goãmu igu opu arĩrare, mari Opu Jesucristo ya sãre buhemuripu. Igu eropa buhequerecũ ta ne gajirã igure “Buhebircãque,” arĩbiriñorã.

Romanos

Pablo Roma majaräre Jesu yaräre gojabeoñumi

¹ Yũhũ Pablo mũare Roma majaräre gojabeoa. Yũhũ Jesucristo pohro majagũ ähraa. Eropigũ õari buherire buhedoregũ apimi ãgũ yũre.

² Iri õari buherire iribojegue Goãmũ “Õpa masare õaro iigũra,” arĩ wereyuñumi ãgũ yare weremũhtanirã merague. Erã irire gojañuma. ³ Iri buheri ta ãgũ magure wereri ähraa. ãgũ Jesucristo masa dehyoagũ árĩgũ Davi mũru pãrami árĩturiagũ árĩdigũ árĩmi. ⁴ ãgũ ta Goãmũ magũ ãgũ árĩrire ãhmudigũ árĩmi Goãmũ ãgũ Espĩritu Santo mera. Eropigũ ãgũ Jesu sĩrira pũhrũ Goãmũ ãgũ turari mera ãgũre masa mũriacũ iidigũ árĩmi. Eropigũ Jesucristo diaye ta Goãmũ magũ ãgũ árĩrire ãhmudigũ árĩmi masare. ãgũ Goãmũ magũ ta mari Opũ Jesucristo ährimi. ⁵ ãgũ ta gũare mojomoro ãagũ gũaũ magure wereri ähraa. ãgũ Jesucristo masa dehyoagũ árĩre ãgũ yare buhedoregũ obeomi árĩpehrero majaräre ãgũ yare pee masi, Jesucristore erã umupeocũ iimoräre. ⁶ Eropirã mũa sã Jesucristo yarã árĩmorã ãgũ beyenirã ähraa.

⁷ Mũare Goãmũ ãgũ mahiräre, ãgũ yarã árĩmoräre iidi árĩmi ãgũ mũare. Eropigũ mũare Romague árĩrãre ipũre gojabeoa. Eropigũ Goãmũ mari Pagũ mari Opũ Jesucristo mera mũare õadorea. ãgũ itamuri mera õaro árĩque mũa.

Pablo Romaguere ãagũ wadiarica, arĩ gojañumi

⁸ Ire weremũhtagũra mũare. Árĩpehrerogũere Jesucristore mũa umupeora querere werema. Erã eropa arĩ werecũ peerã “Õhaa,” arĩ serẽa yũhũ Goãmũre. Jesucristo ãgũ itamuro mera eropa arĩ serẽbasaa. ⁹ Goãmũre serẽgũ mũa ya árĩburire árĩpehrerinũri serẽbasaniguicãa. Mũa ya árĩburire eropa yũ serẽbasaniguicũ Goãmũ masimi. ãgũ dorerire turaro mohmea ãgũ magũ ya buherire buhegũ. ¹⁰ Eropa serẽgũ Goẽrã judio masa árĩbirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabũ yũhũ. Eropa bajasuburi wadiaqueregũ ta wamasibirimũrabũ yũhũ. ¹¹ Goãmũ yare mũare buhediacã Jesure mũa umupeonemoburire. Eropigũ mũare bũrigã ãdiaca yũhũ. ¹² Jesucristore umupeorã ähraa mari. Eropigũ mũare ãdiaca Jesucristore mari umupeori mera pepũri majarã

mari game mucubiricũ iiborore. ¹³ Үм acawererã, ire mũa masicũ gahmea. Gajipugue õari buherire yм buhera pұhrм gajirã mũa acawererã judio masa árїbirã Jesure umupeoama. Erã umupeodiro dopa ta mũa mera majarã sã erã umupeoborore mũa pohrogue wadiarabм yұhм. Eropa bajasuburi wadiaqueregм ta wamasibirimұrabм yұhм. ¹⁴ Árїpehrerãre õari buherire buhero gahmea yұre. Wұari maca majarãre, noho gamero árїrãre, masirãre, masibirã sãre buhebu árїgм iiaa yұhм. ¹⁵ Eropa arїgм, árїgм mũa sãre Roma majarãre õari buherire бұrїgã buhediaa.

Õari buherire masa peerã Jesure umupeonұgama, arї gojañumi Pablo

¹⁶ Õari buherire peerã masa Jesure umupeonұgama. Eropigм árїpehrerãre Jesure umupeorãre Goãmм їgм turari mera erã peamegue wabonirãre tuami. Ёgұre umupeorã õaro waborore masigм iri buherire õari buherire buhegм gұhyasiuro taribeaa. Iri buherire judio masapұre buhemұhtanirã árїma. Pұhrм judio masa árїbirã sãre gұa buheabм. ¹⁷ Iri buheri õpa werea: Jesucristore umupeiorãre “Ñeri marirã õarã àhrima,” arї їhami Goãmм. Jesucristore umupeorã dihtare eropa arї їhami Goãmм. Ёgм eropa arї їarire iribojegue erã arї gojadiro dopa ta arãa: “ ‘Õarã àhrima,’ arї їgм їarã Goãmұre ‘Diaye ta iigм àhrimi,’ arї umupeorã àhrima. Eropa umupeorã árїpehrerinұri Goãmм mera árїrãcoma,” arї gojañuma.

Masa erã ñero iiri mera dipuwajacұrã àhrima, arї were gojañumi Pablo

¹⁸⁻¹⁹ Ёgм árїricұrere masare õaro masicũ iipм Goãmм. Eropirã їgұre їgм árїrere masicũ diasabeaa masare. Ёgм árїrere masare masicũ iiquerecũ masapм erã ñerire iirã Goãmұre masidiabeama. Erã iri ñeri iiri mera gajirãre Goãmм yare peebiricм iima erãpм. Eropigм Goãmм ұmarogue árїgм masa árїpehrerã erã їgұre tarinұgarire, eerã ñero iiri sãre їagм eerã eropa iiri dipuwaja guami. Eropa їgм guarire masicũ iimi erãre. ²⁰ Goãmм ұmaro majagм їgм árїrere turagм їgм árїrere mari їabiriquerecũ ta, їgм basi їgм árїrere masicũ iimi їgм marire. I yebare їgм iira pұhrм árїpehrerire їgм їhacұnugurare їarã, “Goãmм їgм iira ta àhraa. Ёgм turagм ta àhrimi,” arї guñama masa. Eropirã “Goãmм àhrimi,” arї masima masa árїpehrerã. Eropirã masa “Goãmм àhrimi,” arї masiquererã eropa ñerire iiniguicãrã, dipuwajacұma. “Mұre masibirabм. Eropigм ñerire iiabм,” masa arїmasisome

Goãmure. ²¹ Goãmũ ĩgu árĩricurire masiquererã ta erã ĩgure umupeobeama. "Mũhu Goãmũ, turagu ta ãhraa," arĩbeama. Eropirã ĩgu erãre ðaro iiquerecũ ta "Õhaa," arĩbeama ĩgure. Eropirã pee masibirã árĩrã, ñeri dihtare pepima erã. ²² "Pee masirã ãhraa," arĩquererã ta pee masibirã wahama erã. ²³ Eropa warã Goãmure eropa árĩniguĩgure ðagure umupeobeama. Eropa umupeobirã "Goãmũ ãhrimi," erã arĩrãpũre erã wéanirãpũre umupeonũgama erã. Eropirã masare, mirimagũ porãre, pĩruare, waimũrãre wéanũgu umupeoma erã, "Mari Goãmũ ãhrimi," arĩrã.

²⁴ Erã eropiicũ ĩagu "Erã gamero dopa ta ii curaporo," arĩgu Goãmũ erãre cohãmi. ĩgu eropa cóãra pũhrũ, erã ñeri dihtare ùaribejarã erã basi ñeri dihtare iiniguicãma. ²⁵ Eropirã Goãmũ yare peebiri, gũyaripũre ðaro peema. Goãmũ yapũre gũyari iro dopa ta wacũ iima erã. "Diaye ta Goãmure árĩpehrerãre iidĩgure umupeoro gahmea," mari arĩquerecũ erãpũ ĩgure umupeobeama. Eropa Goãmũ gohrare umupeobirã ĩgu iirapũre umupeoma erã.

²⁶ Erã eropiiniguicãcũ ĩagu "Erã gamero ñerire ii curaporo," arĩgu Goãmũ cohãmi erãre. Eropirã erã mera majarã nome marapũcũrã nome iro dopa árĩbeama. Eropirã erã nome seyaro ñero iima erã basi. ²⁷ Erã iro dopa ta árĩrã ɸma sã nomere gamebirã erã basi ta erã dũpũrũre ùaribejarã ãhrima. Eropirã erã basi ta erã ñero iira dipuwaja erã dũpũre ñero goroweoma.

²⁸ Eropa Goãmure masidiabirã ĩgure gamebirira dipuwaja Goãmũ "Erã gamero ii curaporo," arĩgu erãre cohãmi. ĩgu eropa cóãcũ erãpũ ñerire guñanigui, ñerire ùaribejarire iiniguicãma. ²⁹ Eropirã erã bũrigã ñero iiniguima. Nome mera ñero iiniguirã, erã ñerire ùaribejaniguirã, gajirã yare gametarirã, gajirãre ñero iiniguirã, gajirã gajinore opacũ ĩhaturirã, masare wejẽrã, game dũyasorã, gũyaricũrã, masare ĩhaturirã, ñeri quere iirã ãhrima erã. ³⁰ Gajirã erã iibiriquerecũ ta ñero arĩ werewũarã, Goãmure ĩhaturirã, gajirãre papũro yũhrirã, "Gua tamera gajirãre tarinũgarã ðarã ãhraa," arĩ pepirã, gajirãre eropa arĩ weremaacãrã, gaji ñerire iinũgarã, erã pagũ samarãre tarinũgarã ãhrima. ³¹ Pee masibirã ãhrima. Erã werediro dopa ta iibirã, masare ne umupeobirã, erãre ñero iirare ne cãdijibirã, ne gajirãre mojomoro ĩabirã ãhrima. ³² Eropa árĩrãre Goãmũ erãre dipuwaja moa peamegue cóãgũcumĩ ĩgu erãre. Eropa ĩgu cóãburire masiquererã erã ñerire iiniguicãma. Eropirã gajirã erãre

ĩhacũcũ, erã iiro dopa ta ñero iicũ ãarã “Gua iiro dopa ta iima,” arĩ mucubirima.

2

Masare erã ñero iira dipuwaja moadoregu irire diaye ta iigucumi Goãmũ, arĩ were gojañumi Pablo

¹ Erã eropa ñerire iicũ ãarã gajirã õpa arĩbocoma: “Erã ñetariarã ãhrima. Goãmũ erãre dipuwaja moaporo,” arĩbocoma. Eropa arĩrãre õpa arĩ werediaca. Mũa sã erã iiro dopa ta iiaa. Eropirã “Erã ñetariarã ãhrima,” gajirãre arĩ werewũabiricãro gahmea mũare. Eropa arĩ wererã mũa basi ta erã ñerire iiro dopa ta iirã dipuwajacurãca. Iri ñerire masiquererã iirã mũa ñero dipuwajacurãca. ² “Goãmũ diaye ta dipuwaja moagu ãhrimi,” arĩ masia mari. Árĩpehrerãre ñerire iirãre dipuwaja moagucumi. ³ Eropigu mũa ñero iira dipuwaja árĩcũ mũa sãre dipuwaja moagucumi. “Gajirã dipuwajacurãcoma,” arĩ werewũarã, “Gũapũre dipuwaja moasome,” arĩ pepiboca mũa. Árĩbeaa. Mũa sãre mũa ñero iira pũhrũ dipuwaja moagucumi. ⁴ Goãmũ mũare mojomoro ãagu mata dipuwaja moabeami. Eropirã “Goãmũ yũ mera guabeami,” arĩ pepiboca mũa ñerire iira pũhrũ. Árĩbeaa. Goãmũ mũare mojomoro ãagu mata mũa ñero iira pũhrũre dipuwaja moabeami. Mũa ñero iirire bujawerecũ ãadiagu, ãgũre mũa yũhricũ gamegu mata dipuwaja moabeami. ⁵ Eropa mata dipuwaja moabiriqueregu. mũa Goãmũre peebiriniguicãcũ, mũa ñero iirire bujawerebircũ ãagu dipuwaja moagucumi. Mũa eropa ñero iiniguirãre ãgu dipuwaja moarinũ árĩcũ bũrigã dipuwaja moagucumi mũare Goãmũ. Irinũre Goãmũ masare dipuwaja moacũ árĩpehrerã ãarã “Diaye ta erã ya dipuwaja ãhraa,” arĩ masirãcoma. ⁶ Eropigu árĩpehrerã nũcũ erã ñero iira dipuwajare dipuwaja moagucumi Goãmũ. Eropigu erã õarire iirã sãre õarire erãre ogucumi. ⁷ Yujurãyeri õarire iima. Erã õarã árĩdiarã, Goãmũ ãgu gamero dopa iidiarã mũmũri nũcũ Goãmũ mera árĩdiarã ãhrima. Erã tamerare mũmũri nũcũ ãgu mera erã árĩborore iigucumi Goãmũ. ⁸ Gajirãpũ erã iro dopa árĩbeama. Erã erã gamero iirã árĩcãma. Diaye majare gamebirã ñerire iiniguirã ãhrima. Goãmũ erã mera turaro guagucumi. ⁹ Árĩpehrerã ñerire iirã ñero tarirãcoma. Judio masare eropa wamũhtaroca. Eropirã judio masa árĩbirã sãre eropa ta waroca. ¹⁰ Árĩpehrerã õarire iirãpũre “Õaro mũa iiaa,” arĩ ãagucumi Goãmũ. Eropirã erãpũ Goãmũ mera õaro

mera árĩrãcoma. Judio masare eropa ta wamũhtaroca. Eropiro judio masa árĩbirã sãre eropa ta waroca.

¹¹ Goãmũ mari iirare ĩagũ queoro beyemi árĩpeherrerãre. Judio masare, judio masa árĩbirãre Goãmũ yujuropa ĩhami marire. ¹² Gajirã Moise dorerire erã mooquerecũ erã ñerire iicũ erãre dipuwaja moagũcumi Goãmũ. Iri doreri oparãpũ ñerire erã iicũ erã dorerire erã tarinũgari waja dipuwaja moagũcumi Goãmũ erã sãre. ¹³ Moise dorerire peequererã ta yũhribirãre “Ōarã àhrima,” arĩbeamĩ Goãmũ. ĩgũ dorerire iirãpũre “Ōarã àhrima,” arĩ ĩhami Goãmũ. ¹⁴ Judio masa árĩbirã Moise dorerire mooquererã erã pepiro mera õarire iirã Goãmũ dorerire iirã iima. Eropirã Moise dorerire gojarapũre mooquererã erã, erã pepirigue iri dorerire opama. ¹⁵ Eropirã Goãmũ dorerire erã pepirigue diaye opama. Eropa oparã ñerire ii mata erã ñero iirare masima erã basi. Eropigũ ñerire iidigũ, “¿Duhpigũ ñerire iiaiyuri yũhũ?” arĩ pepimi ĩgũ. Eropigũ õari sãre ĩgũ iirare masimi ĩgũ. ¹⁶ Eropigũ Goãmũ Jesucristore ĩgũ obeocũ masa erã iirare ĩagũcumi. Masa erã iiricũrere gajirãre werebirirare erã duhrare Jesucristo masipehogũ ĩgũ erã iiricũrere ĩagũcumi. Eropa ta ĩha beyegũcumi, arĩ buhea yũhũ ĩgũ ya õari buherire buhegũ.

Goãmũ Moisere ĩgũ apira dorerire were gojañumi Pablo

¹⁷ Mũarũ judio masa árĩrã, Goãmũ Moisere ĩgũ apira dorerire umupeorã árĩrã, “Goãmũ yarã àhraa gũa,” arĩ pepiraa mũa. ¹⁸ Eropirã Goãmũ dorerire masirã árĩrã, ĩgũ gamerire masia mũa. Eropa masirã árĩrã “Ōarire gũa iiborore beyemasia,” arĩ pepiraa mũa. ¹⁹ Eropa arĩ pepirã õpa arĩ pepinemoa mũa judio masa: “Gajirã ne masibirãre õaro masicũ iiaa gũa. Erãre gũa buhebiricũ ne Goãmũre masibiriboñuma. Eropirã ñerire ne duhubiriboñuma,” arĩ pepiraa mũa. ²⁰ Eropirã “Pee masibirãre õarire buhea gũa judio masa. Majirãgã sãre buherã àhraa gũa,” arĩ pepiraa mũa. Eropirã “Goãmũ dorerire oparã diaye árĩrere masipehoa gũa,” arĩ pepiraa mũa. ²¹ ¿Mũa eropa arĩ pepirã árĩquererã ta duhpirã mũarũ mũa buhediro dopa ta iibeari? ¿Gajirãre yajadorebiriquererã duhpirã mũarũ yajari? ²² ¿Gajigũ marapo mera ñero iidorebiriquererã duhpirã mũarũ gajigũ marapo mera ñero iiri? “Goãmũ àhrimi,” erã arĩ wéanirãre umupeorire doorã árĩquererã ¿duhpirã Goãmũ gohrapũre õaro umupeobeari mũarũ? ²³ “Goãmũ Moisere ĩgũ apira dorerire opaa gũarũ,” arĩrã árĩquererã ta ĩgũ dorerire tarinũgaa mũa. Eropa tarinũgarã Goãmũre erã umupeobiricũ iirã iica mũa

gajirãre. ²⁴ Eropã ta werea Goãmũ yare erã gojarapũgue: "Judio masa árĩbirãpũre ñero Goãmũre wereniguicũ iiaa mũa judio masapũ," arĩ gojañuma Goãmũ yare erã gojarapũgue.

²⁵ Mũa judio masa Goãmũ dorerire iiniguirã árĩrã gasiro merogã wiri aĩsũnirã circuncisiõn iinirã árĩcũ õapũrica. Īgũ dorerire iibiricũ mũa judio masa árĩricũri duhpiburi árĩbeaa. ²⁶ Eropiro judio masa árĩbirã merogã gasirogãre wiri aĩsũbirinirã erã árĩquerẽcũ ta Goãmũ dorerire erã iirã árĩcũ ĩagũ, "Yaharã masa ta ãhřima," arĩ ĩabocumi Goãmũ erãre. Judio masapũre ĩgũ eropa arĩ ĩadiro dopa ta judio masa árĩbirã sãre eropa ta arĩ ĩabocumi. ²⁷ Bajarã judio masa Goãmũ yare gojarapũre Moise dorerire opaquererã irire iibeama erã. Eropirã gajirã judio masa árĩbirãpũ Moise dorerire opabiriquererã gasiro merogã wiri aĩsũbirinirã árĩquerera Goãmũ dorero dopa ta iima. Eropã iirã árĩrã judio masare erã ñero iirire masicũ iirã iima. ²⁸ "Gũa judio masa Goãmũ yarã ãhřaa," arĩ pepiraa mũa. Eropigũ Goãmũ yagũ gohra árĩgũre weregũra mũare. Īgũ dũpũpũre merogã gasirogãre wiri aĩsũdigũ árĩqueregũ ta Goãmũre umupeobigũ árĩgũ diaye ta Goãmũ yagũ árĩbeami. Judio masũ gohra árĩbeami. ²⁹ Espĩritu Santore opagũpũ, ĩgũre yũhřigũ ĩgũ ta judio masũ gohra Goãmũ yagũ gohra ãhřimi. Eropirã Goãmũ yarã gasiro merogã wiri aĩsũnirã dihta árĩbeama. Erã Espĩritu Santo mera erã pepirigue õari mera gohrotorã ãhřima Goãmũ yarã. Eropã árĩrãre "Õarã ãhřima," arĩ ĩhami Goãmũ. Masa erãre eropa arĩ ĩabiriquerẽcũ ta eropa arĩ ĩhami Goãmũpũ erãre.

3

¹ Yũ eropa arĩquerẽcũ judio masa erã árĩricũri, gasiro merogã wiri aĩsũnirã erã árĩri õapũricãa. ² Judio masa erã árĩri yuju diaye gohra árĩbeaa. Goãmũ ĩgũ wereniguiri judio masare were apimũhtatuhañumi. Erã ĩgũ yare erã gojarapũre opamũhtañuma. Eropirã judio masa erã árĩcũ õapũricãa erãre. ³ Eropirã bajarã judio masa Goãmũre erã pebiriquerẽcũ ta ĩgũ werera diaye ta ãhřaa. Eropigũ ĩgũ arĩ werediro dopa ta iigũcumĩ ĩgũ. ⁴ Eropã ta ãhřaa. Árĩpehrerã masa erã gũyaricũrã erã árĩquerẽcũ ta Goãmũpũ ne gũyabeami. Īgũ yare gojarapũgue eropa ta arĩ gojara ãhřaa: Diaye ta eropa ta arĩ wereniguigũ ãhřaa mũhũ Goãmũ. Eropirã masa mũre ne weresãmasibeama, arĩ gojañuma iribojegũre.

⁵ Masa erã pepiri mera õpa arĩ pepimaacãbocoma: "Mari ñeri iiri árĩcũ, Goãmũ ĩgũ õari iiripũ deserea. Eropiro

mari ñeri iiri mera Goãmũ ĩgu ðaro iiri deserecũ ĩgu marire mari ñeri iiri dipuwaja moagũ queoro iibeami," arĩ pepimaacãbocoma. ⁶ Eropa árĩbeaa. Mari ñeri iirapũ ðari árĩcũ Goãmũ mari ñeri iira waja dipuwaja moamasibiriboañumi.

⁷ Masapũ gũyaricurã áhřima. Goãmupũ ne gũyari marigũ áhřimi. Gũyari marigũ ĩgu árĩcũ ðaro masia mari. Eropirã masa yujurãyeri ðpa arĩ pepirima: "Gũa gũyari mera Goãmũ ĩgu diaye árĩripũ deserea. Eropiro gũa gũyaripũ ðha áhřaa. ¿Eropiro gũa gũyari ðacũ duhpigu gũa gũyari waja dipuwaja moabocuri gũare Goãmũ?" arĩ pepimaacãma yujurãyeri erã basi. ⁸ Eropirã ðpa arĩ gũyama yujurãyeri gũare: "Mari ñerire iiri mera Goãmũ ĩgu ðagũ árĩripũ deserea. Eropirã ñerire iiro gahmea," arĩma. "Pablo sã eropa ta arĩ buhemi," arĩ gũya weresãma erã gũare. Erã eropa arĩ gũyari dipuwaja Goãmũ erãre dipuwaja moagucumi. Eropa ta iiporo erãre.

Árĩpehrerã ñeri iira dipuwajacurã áhřaa mari, arĩ gojañumi Pablo

⁹ ¿Eropirã dohpa pepiri mũa? ¿Mari judio masa gajirã tauro ðarã árĩcuri? Árĩbeaa mari. Judio masa, judio masa árĩbirã sã árĩpehrerã dipuwajacurã áhřaa mari. Eropa ta áhřaa yũ árĩpehrerãre arĩ buhediro dopa ta. ¹⁰ Eropa ta arĩ gojara áhřaa Goãmũ yare erã gojarapũgue sã. Òpa arĩ gojañuma:

Ne yujugũ masũ ðagũ marimi. ¹¹ Mari árĩpehrerã masa peediabirã dihta áhřaa. Eropirã árĩpehrerã mari masa Goãmũre ne guñabeaa. ¹² Eropirã mari Goãmũ yare gamebirã árĩpehrerã ñerire iirã áhřaa. Ne yujugũ ðarire iigu marimi. ¹³ Mari wereniguirĩ, ñeri dihta wiria mari disirore. Bũřigã gũyaricua. Eropa wereniguirã aña gũcurire ĩgu pũriri wiuro dopa ta pũriro mera wereniguiwiua mari. ¹⁴ Eropirã mari gajirãre ñero wereniguirã, papũro wereniguirã áhřaa. ¹⁵ Eropirã mata guarã masare mata wejã mari. ¹⁶ Eropirã noho mari waro, masare ñero ii, ñero taricũ iiaa mari gajirãre. ¹⁷ Eropirã gajirã masa mera ðaro árĩbeaa mari. ¹⁸ Eropirã Goãmũre ne umupeobeaa, arĩ gojamuriñuma iribojeguerẽ mari masare.

¹⁹⁻²⁰ Eropirã ðpa masia mari: "Mari masa ñerã áhřaa," eropa arĩ gojarã judio masa sãre Moise doreri iirã sãre arĩ wereniguimuriñuma. Eropirã árĩpehrerã mari judio masa sã "Gũa tamera ñeri dipuwaja mara gũare," arĩmasibeaa. Goãmũ doreripũre mari masa ne iibeaa. Eropirã iri dorerire iibirã Goãmũ mera ðamasibeaa mari.

Īḡu dipuwaja moamorā āhraa. Eropiro mari ñerā árĩrĩre ĩḡu doreripu masicũ iiaa marire. Iri dorerire masirā “Gua iiricari ñeri āhraa,” arĩ masia.

Jesucristore ðaro umupeocũ Goãmũ marire “Õarā āhrima,” arĩ ĩhami, arĩ gojañumi Pablo

²¹ Dohpaguere Jesucristore umupeorāre “Dipuwaja moorā, ðarā āhrima,” arĩ ĩhami Goãmũ pare. Īḡu eropa arĩ ĩaborore Goãmũ yare weremuhtanirā Moise sã weremuhtañuma. Eropigu masare erā ñero iira wajare ĩḡu taurare weremi marire Goãmũ. Moise dorerire mari iira mera mari ñerire taubeami. Õpa āhraa: ²² Árĩpehrerā Jesucristore umupeorāre, ĩḡu yare peerāre, “Õarā āhrima,” arĩ ĩhami Goãmũ. Erā ñero iira dipuwajare taumi. Eropa iigu árĩpehrerāre yujuropa ðaro iimi. ²³ Mari masa árĩpehrerā ñerire iirā āhraa. Eropirā Goãmũ ĩḡu gamero dopa ne iibea mari. ²⁴ Mari eropa iiquerecũ Goãmũ árĩpehrerā masare ĩḡu mojomoro ĩadigu árĩmi. Eropigu Jesucristo mari masa ñeri iirare wajayebasadi árĩmi. Īḡu eropa iira pũhrũ “Dipuwaja moorā āhrima,” arĩ ĩhami Goãmũ Jesure umupeorāre. Waja gamero mariro mari ñerire cohāmi. ²⁵ Iribojegue majarā erā ñero iirare ĩagũ Goãmũ mata dipuwaja moabiriñumi erāre. Īḡu eropa dipuwaja moabigu erā ñero iirare bu gohra pepicāḡũ iibiriñumi. Eropigu erā ñerire cãdijibu ĩḡu Jesucristore obeodigu árĩmi árĩpehrerā masa erā ñeri dipuwajare sĩribasabure ĩḡu di cóābure. Eropigu mari masa Jesucristore umupeocũ Goãmũ mari ñeri iirare cãdijigucumi. Eropa iigu “Īḡu diaye iigu āhrimi,” marire arĩ masicũ iidi árĩmi. ²⁶ Īḡu magure obeodigu árĩmi dohpague majarā sã erā ñeri iira dipuwajare wajayebasabure. Eropiidigu árĩmi “Īḡu ðaro diaye iigu āhrimi,” mari masa arĩ masiborore. Jesure umupeorāre “Õarā āhrima,” ĩḡu arĩ ĩaborore eropiidi árĩmi.

²⁷ Eropirā dohpaguere mari ejatuharo “Õarā āhraa mari,” ne arĩmasibea mari. “Moise dorerire iirā ðarā āhraa,” iri sãre arĩmasibea mari. Õpa arĩmasia mari: “ ‘Diaye ta yũ ñerire ĩḡu cohāmi,’ mari Jesucristore arĩ umupeocũ, ‘Õarā āhrima,’ arĩ ĩagucumi marire Goãmũpu,” arĩmasia mari. ²⁸ Õpa masia mari: Moise dorerire mari iiquerecũ, iri mera “Õarā āhrima,” Goãmũ arĩ ĩabeami marire. Jesucristore mari umupeocũ ĩagũ marire “Õarā āhrima,” arĩ ĩhami ĩḡu.

²⁹ Goãmũ judio masa opu dihta árĩbeami. Judio masa árĩbirā opu sã āhrimi. ³⁰ Eropa árĩḡũ Goãmũ yujugu ta

árĩġu, árĩpehrerã wecague opu ährimi. Eropa árĩġu judio masa Jesure erã umupeocũ, “Erã dipuwaja moorã ährima,” arĩ ïagucumi. Eropiġu judio masa árĩbirã sãre Jesure erã umupeocũ, erã sãre “Dipuwaja moorã ährima,” arĩ ïagucumi Goãmũ. ³¹ ¿Eropirã Jesucristore umupeoturã Goãmũ Moiserẽ ĩġu dorerire cóãrã iibocuri mari? Irire cóãbeaa mari. Jesure umupeorã tamera Goãmũ dorerire diaye ta iirã iiaa mari.

4

Abrahã Goãmũre ĩġu umupeorare were gojañumi Pablo

¹ Mari ñecũ árĩmũhtadiġu Abrahã Goãmũre “Diaye iigu ährimi,” arĩ umupeomariñumi ĩġu sã. ĩġu eropa umupeori mera ðañumi Goãmũ mera. ² Abrahã ðaro ĩġu iiquerecũ “Õagũ ährimi,” arĩ ïanibirimariñumi Goãmũ ĩġure. ĩġu Goãmũre umupeocũ tamerare “Õagũ ährimi,” arĩ ïamariñumi ĩġure. Eropiġu ĩġu ejatuharo ðarire iiqueregũ ta ñegũ árĩniġu “Yũ tamera ðagũ ähraa,” arĩmasibiriñumi Abrahã Goãmũ ĩġu ïacũ. ³ Goãmũ yare gojarapũ ðpa ähraa: “Abrahã Goãmũ ĩġure arĩrare ðaro ĩġu peecũ, ĩġure ĩġu umupeocũ ïha Goãmũ ĩġure ‘Õagũ ñeri iira dipuwaja moogu ährimi ĩġu,’ arĩ ïañumi ĩġure,” arĩ gojara ähraa. ⁴ Õpa ähraa: Mari masare yuju diaye wajayebeama. Mari ðaro mohmera waja marire wajayema. Goãmũrũ eropa iibeami. ⁵ Mari gamero ðarire iiro mariro mari Jesucristore umupeocũ ïha marire yuju diaye ĩġu ðarire ocãmi. Eropiġu marire “Õarã ährima,” arĩ ïhami marire Jesucristore umupeorãre. Ñerire iinirãre erã ñeri iira dipuwaja maricũ iigu ährimi. Eropirã masa Jesucristore umupeocũ ïagũ “Dipuwaja moorã ährima,” arĩ ïhami Goãmũ erãre. ⁶ Masa erã gamero mera ðaro iirare Goãmũ ïabeami. Erã ĩġure umupeocũ tamerare ïhami. ĩġure umupeorãre “Õarã ährima,” arĩ ïhami. ĩġu eropa arĩ ïadigũrũ ĩġu mucubirire ðpa arĩ gojañumi Davi mũrũ iribojegue majagũ:

⁷ Erã ñerire ĩġu cãdijinirã tauro mucubirima.

⁸ “Õarã ährima. Erã ñero iirare ġuñasome yũhũ,” arĩmi Goãmũ erãre. Eropirã bũrigã mucubirima, arĩ gojañumi Davi.

⁹ Judio masare merogã gasirogãre wiri aĩsũnirã dihtare erã ñero iirare cãdijibeami Goãmũ. Judio masa árĩbirã sãre erã ñero iirare cãdijimi ĩġu. Dipaturi Abrahãre ġuñaque mũa. ĩġu Goãmũre umupeocũ ïagũ ĩġu ñero iirare

cādiji, “Ōagũ āhrimi,” arĩñumi Goãmũ. ¹⁰ ¿Dohpárĩcũ eropa arĩyuri Goãmũ Abrahãre mũa pepicũ? Ĩgũ merogã gasirogãre ĩgũ wiri aĩboro coregue ta ĩgũre “Ōagũ āhrimi,” arĩ ĩañumi Goãmũ. Eropigũ gasirogãre wiri aĩgũ ĩgũ ñerire cóãtuhadigũgue wiri aĩñumi. ¹¹ Eropigũ gasiro merogã wiri aĩboro coregue Goãmũre umupeonũgatuhãñumi Abrahã. Ĩgũ eropa umupeocũ “Ōagũ āhrimi,” arĩ ĩañumi Goãmũ ĩgũre. Eropa ĩgũ umupeorire, ĩgũ yagũ ĩgũ árĩrĩre ĩhmudoregũ Goãmũ ĩgũ dũpũre merogã gasirore wiri aĩdoreñumi. Eropigũ Abrahã ĩgũ gasirogã wiri aĩboro core Goãmũpũ “Ōagũ āhrimi,” arĩ ĩatuhãñumi ĩgũre. Eropigũ Abrahã Goãmũre “Diaye ta iigũ āhrimi,” ĩgũ arĩ umupeodiro dopa ta árĩpehrerã Goãmũre eropa arĩ umupeorãre “Ōarã āhrima,” arĩ ĩhami Goãmũ. Eropigũ judio masa árĩbirãre gasirogã wiri aĩsũya marirã sãre “Ōarã āhrima,” arĩ ĩhami Goãmũ. Eropirã erã Abrahã pãramerã iro dopa ta dujama. ¹² Erã iro dopa ta judio masa sã gasirogã wiri aĩsũnirã sã, Goãmũre erã umupeorã árĩrã Abrahã pãramerã diaye ta āhrima. Ĩgũ gasirogã wiri aĩboro coregue, Goãmũre umupeo ĩgũ mera ðañumi. Eropirã ĩgũ umupeodiro dopa Goãmũre umupeorã ðaro āhrima Goãmũ mera.

Goãmũ Abrahãre ĩgũ werepira diaye ta árĩcũ masiñume Abrahã, arĩ gojañumi Pablo

¹³ Iribojegue ðpa arĩñumi Goãmũ Abrahãre: “I yebare mũre, mũ pãramerã árĩturiarã sãre ogũca,” arĩ werepiñumi Goãmũ Abrahãre. Moise dorerire Abrahã ðaro iira waja eropa arĩbiriñumi Goãmũ ĩgũre. Abrahãpũ Goãmũre “Diaye ta iigũ āhrimi,” arĩ umupeora pũhũ eropa arĩ werepiñumi. Ĩgũ eropa arĩ umupeocũ ĩagũ Goãmũ ĩgũre “Ōagũ āhrimi,” arĩ ĩañumi. ¹⁴ Goãmũ oburire Moise dorerire iirã dihta aĩbeama. Erã dihta aĩcũ mari Goãmũre umupeori ñehe árĩburi árĩbiriboya maripũre. Eropiro Goãmũ ĩgũre umupeorãre “Mũare ogũca,” ĩgũ arĩ werepira duhpiburi árĩbiriboya. ¹⁵ Goãmũ Moiserẽ ĩgũ apira dorerire iirã bocatũbeaa mari. Ĩgũ dorerire mari pee tarinũgara waja, dipuwaja moasũmorã āhraa mari. Iri doreri maricũ tamera ĩgũ dorerire tarinũgaro mariboya.

¹⁶ Eropirã Goãmũre umupeorã dihta ĩgũ oburire aĩrãcoma. Abrahã Goãmũre “Diaye ta iigũ āhrimi,” arĩ umupeomũriñumi. Eropirã árĩpehrerã Abrahã Goãmũre umupeodiro dopa ta umupeorã ĩgũ pãramerã iro dopa dujama. Eropigũ “Ire mũre mũ pãramerã sãre ogũca,” Goãmũ Abrahãre arĩgũ árĩpehrerãre ĩgũre umupeorãre

arĩgu iĩñumi. Eropirã Moise dorerire iirã dihta Goãmũ ĩgu oburire aĩsome. Árĩpehrerã Abrahã iidiro dopa Goãmũre umupeorã erã ĩgu oburire waja mariro aĩrãcoma. ¹⁷ Irire Abrahãre ĩgu arĩdiro dopa ta arĩ gojañuma iribojegure: “ ‘Baja yebari majarã ñecũ árĩbu apibũ mũre,’ arĩ, apĩpũ Goãmũ Abrahãre,” arĩ gojañuma iribojegue ta. Eropĩgu ĩgu Goãmũre “Diaye ta iigu ãhrimi,” arĩ umupeomũriñumi. ĩgu eropa umupeocũ Goãmũre umupeorã ñecũ iĩñumi Goãmũ ĩgũre. Goãmũpũ sĩrinirãre masugu, árĩpehrerire ĩhacũnugudigu ãhrimi.

¹⁸ “Baja macari majarã mũ pãramerã árĩturiarã árĩrãcoma,” arĩmũriñumi Goãmũ Abrahãre. Goãmũ ĩgu eroparĩcũ Abrahãpũ porã marigu árĩqueregu, “Diaye ta ãhraa,” arĩ pepimũriñumi. ¹⁹ Eropĩgu cien bojori opagu árĩqueregu, ĩgu marapo sã bũro ne porã marigo árĩquerecũ, “Porãcũsome guã,” arĩ ne pepibiriñumi Abrahã. Eropĩgu Goãmũ ĩgũre arĩ werepira “Diaye ta ãhraa,” arĩ pepiñumi Abrahã. ²⁰ “Goãmũ ĩgu arĩdiro dopa ta ne iisome,” arĩ ne pepibiriñumi Abrahã. Eropĩgu ĩgu Goãmũ ĩgũre werepirare ðaro peeñumi. ĩgu eropa arĩrãre peenijagu, “Goãmũ turagu ãhrimi,” arĩ umupeogu iĩñumi. Eropĩgu Goãmũre “Diaye ta iigu ãhrimi,” arĩ umupeonemoñumi ĩgu. ²¹ “Goãmũ ĩgu arĩdiro dopa ta ðaro iigũcumi,” arĩ pepi ðaro masiñumi Abrahã. ²² ĩgu eropa masicũ, Goãmũre ĩgu umupeocũ ĩha Goãmũpũ “Dĩpuwaja moogu ãhrimi,” arĩ ĩañumi Abrahãre. Eropa ta arĩ gojañuma Goãmũ yare erã gojarapũgue.

²³ Abrahã Goãmũre ĩgu umupeora pũhrũ Goãmũ ðaro ĩañumi ĩgũre, arĩ gojañuma. Eropa gojarã “Mũa sãre Goãmũre umupeorãre ðaro ĩagũcumi,” arĩ mari sãre gojajuñuma. ²⁴ Irire mari masiburire gojañuma. Eropĩgu Goãmũre “Diaye ta iigu ãhrimi,” mari arĩ umupeocũ “Dĩpuwaja moorã ãhrima,” arĩ ĩagũcumi Goãmũ mari sãre. ĩgu tamera mari Opũ Jesu ĩgu sĩricũ masudigu ãhrimi. ²⁵ Jesupũ mari ñeri iira dipuwaja sĩridigu árĩmi. ĩgu sĩrira pũhrũ masa mũriadigu árĩmi ĩgu Goãmũ marire “Dĩpuwaja moorã, ðarã ãhrima,” arĩ ĩgu marire ĩaburire.

5

“Dĩpuwaja moorã ãhrima,” Goãmũ ĩgu arĩ ĩacũ ðpa waroca marire, arĩ gojañumi Pablo

¹ Jesucristore mari umupeoturacũ ĩagu “Dĩpuwaja moorã, ðarã ãhrima,” arĩ ĩhami Goãmũ marire. ĩgu eropa arĩ ĩacũ Goãmũ mera mari ðaro árĩcũ iimi marire mari Opũ

Jesucristo. ² Eropirã mari ïgure umupeocũ ïagũ Goãmũ marire mahigũ, marire aĩmi ïgũ mera mari õaro árĩboro dopa. Goãmũ tamera õatariagũ àhrimi. Eropigũ ïgũ iro dopa ta õarã árĩcũ iigũcumĩ ïgũ marire. ïgũ eropiiburire õaro masia mari. Eropirã mucubiria. ³ Eropirã ñero tariquererã mucubiria mari. Ñero tarirã irire yujuro bojemasia mari. Eropa yujuro bojerã ñero tariquererã õaro Goãmũre guñaturarã wahaa mari. Eropirã Goãmũ yare duhubeaa mari. ⁴ Mari eropa árĩcũ ïagũ, "Õaro iibũ mũa," arĩgũcumĩ Goãmũ marire. ïgũ marire eroparĩcũ, marire ïgũ tauborore õaro masia mari. Eropirã ñero tarirã sã mucubirimasia mari. ⁵ Eropigũ Goãmũ marire Espĩritu Santore obeomi mari mera árĩdoregũ. Eropigũ Espĩritu Santopũ mari mera árĩgũ Goãmũ marire eropa mahinigucãrĩre masicũ iimi. Eropirã "Goãmũ õaro taugũcumĩ marire," arĩ "ïgũ mera árĩnigucãrãca," arĩ masia mari.

⁶ Eropigũ ero core mari ñeri iirare mari basi mari cóãmasibiricũ ïagũ, ïgũ queodiro sihajacũ mari ñerã árĩra dipuwaja Cristo sĩripũ. ⁷ Mari masa gajigũ ya árĩburire sĩribasadiabeaa. Õagũ árĩgũre yujugũ sĩribasabocumi gajisubũ arĩgũ. ⁸ Maripũ ñerã mari árĩquerecũ Jesucristo sĩribasadi árĩmi mari ya árĩburire. ïgũ eropiicũ Goãmũ turaro marire ïgũ mahirare masia mari. ⁹ Mari ya árĩburire ïgũ sĩricũ, ïgũ di cóãcũ, Goãmũpũ marire "Dipuwaja moorã àhriima," arĩ ïhami. ïgũ eropa arĩ ïara pũhrũ dohpaguepũre marire peamegue wabonirãre taumi Jesucristo. Eropigũ ïgũ yarã marire ïgũ iira pũhrũ marire dipuwaja moasome Goãmũ. ¹⁰ Eropirã Goãmũre gamebirã mari árĩquerecũ ta ïgũ magũ sĩrigũ mari ñeri iira dipuwaja wajayebasadigũ árĩmi. Eropa wajayebasagũ ïgũ Pagure Goãmũre guabiricũ iimi ïgũ mari mera. Eropirã ïgũ yarã wahaa mari. Dohpague tamerare tauro õaro iigũcumĩ marire. ïgũ yarã mari árĩcũ, Jesu ïgũ masa mũriara mera marire peamegue wabonirãre õaro taugũcumĩ ïgũ. ¹¹ Pũhrũgue mari tariborore mucubiria mari. Goãmũpũre guña mucubiria. Mari Opũ Jesucristo mari ñeri dipuwaja ïgũ sĩrira pũhrũ Goãmũ yarã àhraa mari. Eropirã mucubiria.

Adánre Cristo sãre wereñumi Pablo Roma majarãre

¹² Jesucristo taunirã árĩrã õpa masia mari: Adán ïgũ ñerire iinũgarasubugue i yebare ñeri árĩnũgayoro. Ñeri árĩnũgacũ masa sĩrinũgañuma. Mari árĩpehrerã ñerire iiaa. Eropirã árĩpehrerã mari ñerã árĩri waja sĩrirãca. ¹³ Goãmũ ïgũ dorerire Moiserẽ apiboro core diaye ta i

yeba majarã ñerire iimuriñuma. Eropa ñerire iiquerecũ iri doreri maricũ ĩgu doreri tarinugari waja dipuwaja moamasibiriñumi dohpa. ¹⁴ ĩgu eropa dipuwaja moamasibiriquerecũ ta Adãnpũ ĩgu pũhrũ árĩrã iri doreri mariquerecũ ta sĭrimuriñuma. Moise ĩgu árĩboro core iri doreri mariquerecũ ta masa sĭrimuriñuma. Gajirã ñerire iirã Adãn ĩgu ñero iimuridiro dopa gohra iibirimuriñuma. Eropiibiriquererã erã sã sĭrimuriñuma. Eropigu Adãn ñerire iinugadigu árĩñumi i yebare. Yoara pũhrugue i yeba arigu Jesucristopũ ðarire iinugadigu árĩmi.

¹⁵ Adãn ĩgu iira Jesucristo iira dopa árĩbeaa. Adãn yujugu ta ĩgu ñeri iira dipuwaja bajarã masa sĭrinugañuma. Goãmũpũ marire mahigu Jesucristore obeodigu árĩmi. Eropigu Jesucristopũ ĩgu yujugu ta mari ya árĩburire sĭribasagu mari bajarã ĩgu yarã Goãmũ mera umuri nũcu árĩniguiborore iidi árĩmi. ¹⁶ Eropigu Goãmũ masare ĩgu mojomoro ĩadiro Adãn ĩgu Goãmũre tarinugadiro dopa árĩbeaa. Adãnpũ ĩgu yujugu ta ñerire ĩgu iira dipuwaja árĩpehrerã masa dipuwaja opama. Erã eropa dipuwaja opaquerecũ, masa wũaro erã ñerire iiquerecũ dohpaguere masare mojomoro ĩagu Goãmũ erã ñerire cohãmi. Eropa cóãgu “Dipuwaja moorã, ðarã àhrima,” arĩ ĩhami ĩgu Jesucristo sĭrira mera. ¹⁷ Adãn yujugu ta ĩgu dipuwaja mera ta árĩpehrerã masa sĭrimorã dihta wañuma. Goãmũ ĩgu iirañepũ ðataria. Dohpaguere masare mojomoro ĩagu Jesucristo ĩgu yujugu sĭrira mera iri ñeri dipuwaja cóãgu marire “Õarã àhrima,” arĩ ĩhami. Eropirã árĩpehrerã ĩgu eropa arĩ ĩanirã ĩgu mera ðaro árĩniguicãrãcoma.

¹⁸ Yujugu Adãn ĩgu ñerire iinugacũ árĩpehrerã ñerire iinugañuma. Erã eropiicũ ĩagu Goãmũ erãre “Dipuwajacũrã àhrima,” arĩ ĩañumi. Gajigu Jesupũ ĩgu ðarire ĩgu iicũ masa erã ñeri iira dipuwaja sĭribasacũ, árĩpehrerã mari ñeri dipuwaja cóãdigu árĩmi Goãmũ. Mari ñerire ĩgu cóãnirã árĩcũ “Õarã àhrima,” arĩ ĩagucumi Goãmũ marire. Eropirã árĩpehrerinuri ĩgu mera árĩniguicãrãca mari. ¹⁹ Yujugu Adãn Goãmũre tarinuga nugañumi. ĩgu eropiicũ bajarã masa ñerire iiricũrã wañuma. Jesucristopũ Goãmũ ĩgu dorediro dopa iipũ. ĩgu eropiicũ bajarã masa ĩgu ñerire cóãnirã warãcoma. Erã eropa wacũ “Õarã àhrima,” arĩ ĩagucumi Goãmũ erãre. ²⁰ Goãmũ ĩgu dorerire Moisere apiñumi árĩpehrerã masa erã ñero iirare erã masiburire. Mari masa bũrigã ñerire mari iiquerecũ Goãmũpũ marire bũrigã mahimi. Eropa mahigu Jesucristo sĭrira mera mari ñerire cóãdigu árĩmi. ²¹ Ero core mari árĩpehrerã mari

ñeri iira dipuwaja sîrimorã árîmüriribũ. Goãmũ marire turaro mahigũ mari Opũ Jesucristore ïgũ obeocũ ïgũ marire ñeri dipuwaja marirã wacũ iimi dohpaguere. Eropirã erã “Dipuwaja moorã ährima,” Goãmũ ïgũ marire arĩ ïacũ mari árîpehrerinuri ïgũ mera eropa árînguicãrãca.

6

Cristo yarã ñerire iiniguibeama, arĩ gojañumi Pablo

¹ ¿Goãmũ eropa marire mahicũ ïarã dohpa iirãcuri mari mũa pepicũ? ¿Goãmũre marire mahicũ iinemodiarã ñerire iinemorãcuri mari? ² Árîbeaa. Ñerire iibiricãrã mari. Jesucristo marire sîribasadi árîmi mari ñerire cóãgũ. Eropirã Cristo yarã árîrã marire ñerire iibiricãro gahmea. ³ Eropa ta Jesucristo yarã mari árîrire masa erã ïha masiborore deco mera waïyesũbũ. Jesu mari ñeri iira dipuwaja sîridigũ árîmi. Eropirã ïgũ yarã árîrã, waïyesünirã árîrã mari ñeri iirare duhucãbũ. ⁴ Mari waïyeri õpa ïhmua: Jesucristo sîrira mera mari ñerã árîdiro pehrea. Eropa wacũ mari Pagũ ïgũ turari mera Jesucristo sîridire masudiro dopa iri turari mera marire õaripũre gohrotomi. Eropirã õarire iirã wahaa.

⁵ Eropirã Cristo yarã árîrã Cristo sîrira mera mari ñerã árîdiro pehrea. Eropirã mari ñeri iirare duhua mari. Eropirã Cristo yarã árîrã ïgũ masa müriara mera õaripũre gohrotorã ähraa mari. Iri diaye ta ähraa. ⁶ Jesucristo crusague sîrigũ mari ñerã árîrare pehrecũ iidi árîmi. Mari ñeri ñaribejarire duhumasicũ iidi árîmi dipaturi mari ñerire iibiriboro dopa. ⁷ Mari ñeri ñaribejarare cóãnirã árîrã ñerire iiniguirã árîsome pare mari. Irire mari masia. ⁸ Eropirã mari gohrotonirã árîrã mari Jesucristo mera õarire iinugarã árîrãca. “Iri diaye ta ähraa,” arĩ pepia mari. ⁹ Ire mari masia: Cristo ïgũ sîri, masa müriara pũhrũ dipaturi sîrisome. ïgũ sîribodirore tarituhadigũ árîmi. ¹⁰ Eropigũ Cristo yujusubũ sîrigũ, masa ñerire cóãgũ sîrimi. ïgũ masa müriadigũ dohpaguere Goãmũ gamerire iigu ährimi. ¹¹ “ïgũ iidiro dopa ta yũ sã ähraa,” arĩ pepique mũa: “Jesucristo mari ñerire cóãdiro dopa ta mari sã mari ñerire cohãa. Ñerire iibirã Jesu yarã árîrã Goãmũ gamerire iimorã árîrã tiiaa mari,” arĩ pepique mũa sã.

¹² Eropirã ñeri iiniguirã árîbiricãque. Eropirã ñerire ñaribejabiricãque. ¹³ Ñerire iirã árîbiricãque. Mũa peamegue wabonirãre Jesucristo ïgũ taunirã ähraa. ïgũ eropa iinirã árîrã õpa arîque Goãmũre: “Mũhũ, yũ Opũ ähraa. Eropigũ yũhũ mũa gamero dopa iigu, mũa dorerire

iiniguicãgũca umuri nũcu pare,” arĩque Goãmure. Eropirã ðarire iirã Goãmũ ĩgu gameri dihtare iirã árĩque mũa. ¹⁴ Dohpaguere Goãmũ mera ðaro árĩborore Moise doreri mũare dorebeaa. Jesucristo mũa ya árĩburire sĩribasara mera Goãmũ mera ðarã āhraa. Eropiro mũa ñeripũ mũare dorebeaa pare. Eropirã ñerire iiniguisme pare mũa.

Mũa ñerire iiniguicũ iri ñeri mũa opũ iro dopa āhraa, arĩ gojañumi Pablo

¹⁵ ¿Yũ eroparĩcũ dohpa arĩ pepiri mũa? ¿Jesucristo yarã árĩrã, Moise dorerire umupeobirimorã árĩrã, ñerire iiniguibocuri mari? Ñerire iiniguibiricãrã. ¹⁶ Mũaare doregũ mũa opũ āhrimi. Eropirã ĩgu pohro majarã āhraa mũa. Eropa ta ñerire iiniguirã mũa árĩcũ iri ñeri mũa opũ iro dopa āhraa. Eropirã ñerire duhumasiya mara mũare. Eropirã peamegue wamorã āhraa mũa eropa iirã. Goãmure ðaro yũhrirã árĩrã tamera ĩgu pohro majarã āhraa. Eropirã ĩgu yarã ðarire iirã āhraa mũa. Irire masia. ¹⁷ Iribojegue ñerire iiniguirã mũa árĩcũ, iri ñeri mũare doremũriyoro. Dohpaguepũre ðari buherire peerã, Jesure umupeorã, Goãmũ dorerire ðaro iirã wahabũ mũa. Eropa árĩrã Goãmure “Ōhaa,” arĩro gahmea. ¹⁸ Eropa warã dohpaguere ñerire doresũrã árĩbeaa mũa. Eropirã Goãmũ doresũrã árĩrã ðarire iiaa. ¹⁹ Irire mũare ðpa arĩ gojaa mũa ðaro peeboro dopa. Iribojegue ñerire iipehorã, ñerire iiniguicãrã mũa árĩdiro dopa ta dohpaguepũre ðarire iiniguicãrã árĩque mũa. Eropirã Goãmũ gameri dihtare iirãca mũa.

²⁰ Iribojeguere ñeri dihtare iirã árĩrã, ðaripũre iibirimũriyoro mũa. ²¹ Irisubure ñerire iira waja ðarire bocabiriyoro mũa. Iri mũa ñeri iirare guñarã dohpaguere guhyasĩrica mũa. Iri ñerire mũa iira dipuwaja peamegue wabonirã árĩribũ. ²² Dohpaguepũre Jesucristo mũare ñeri doresũnirãre wiucãmi pare. Eropirã Goãmũ dorerire iirã wahabũ mũa. Eropirã Goãmũ gameri dihtare iirã árĩrãca. Eropirã árĩpehrerinũri Goãmũ mera árĩrãca. ²³ Ñerire mari iira dipuwaja peamegue wabonirã āhraa mari masa árĩpehrerã. Mari eropa arĩquerecũ Goãmũpũ mari Opũ Jesucristore mari umupeocũ ĩagũ, árĩpehrerinũri ĩgu mera árĩcũ iigũcumĩ. Waja mariro marire eropa iigũcumĩ.

7

Moise dorerire were gojanemoñumi Pablo

¹ Yũ acawererã, Goãmũ Moiserẽ ĩgu dorerare ðaro masia mũa. Masure iri doreri ĩgu ojocaribusu dorea. ĩgu sĩrira

pũhrũ ĩgũre dorebeaa iri. Iri sãre masia mũa. ² Ōpa ãhraa: Nomeore igo marapũ mera dihta ářĩdorea Moise ĩgũ doreripũ. Iri eropa dorequerecũ ta igo marapũ sĩrira pũhrũ igoũ gajigũ mera marapũcũmasimo. Eropo ta arĩ werea iri doreri. ³ Eropigo igo marapũ arĩquerecũ ta gajigũre marapũcũgo, ñero iigo iimo igoa. Igo marapũ ĩgũ sĩrira pũhrũgue ta gajigũre marapũcũgo, Moise dorerire tarinũgabeamo igo. Eropigo ñero iigo iibeamo igo.

⁴ Eropo ta mũa sã yũ acawererã, Jesucristo sĩrira mera Jesu yarã warã, iri doreri iiri mera Goãmũ yarã wabeaa mũa. Eropirã sĩrinirã mũrare iri doreri mera dorebiro dopa ta mũa sãre iri doreri dorebeaa. Mũa Cristo ya curu majarã ãhraa. Eropirã dohpaguere ĩgũ yarã ãhraa mũa. ĩgũpũ ĩgũ sĩrira pũhrũ masa mũriadigũ arĩmi Goãmũ gamerire mari iiboro dopa. ⁵ Jesucristo yarã arĩbirirasubuguere ñerire mari uaribejarire iimuribũ. Eropirã Moise dorerire mari masira pũhrũ iri dorerire tarinũgadiaribũ. Eropo tarinũgã ñerire iirã, mari peamegue wamorã ta arĩmũrribũ. ⁶ Dohpaguere Cristo yarã arĩrã iri doreri docague arĩbeaa pare mari. Goãmũ ĩgũ mera õaro mari arĩborore iri dorerire iidorebeami pare. Espĩritu Santo mari mera arĩgũ marire õarire gohrotocũ iimi. Eropirã Goãmũ gamerire iirã mari iribojegue maja doreri gojara mera arĩmasibeeaa pare.

Mari ñeri iidiarire were gojañumi Pablo

⁷ ¿Eropirã Goãmũ Moisere ĩgũ dorerare dohpa arĩ pepibocuri mari? ¿Iri doreri ñeri arĩcuri mũa pepicũ? Arĩbirica. Iri ĩgũ doreri ta ñerire yũre masicũ iibũ. Eropirã ĩgũ doreri maricũ ñerire mari iirare masibiriboya mari. ĩgũ doreri õpa arãa: “Gajirã yaguere turaro uaribejabiricãque,” arãa Moise doreri. Iri eroparĩbiricũ, gajirã yare uaribejariñe iri ñeri arĩcũ masibiriboya mari. ⁸ Eropigũ iri dorerire yũ masira pũhrũ gajirã yare bũrigã uaribejamuribũ. Iri dorerire masibirinigũ gajirã yare bũrigã yũ uaribejara iri ñeri arĩcũ masibiriboya yũhũ. ⁹ ĩgũ dorerire yũ masiboro core eropa pepicãnibũ dohpa. Dipuwajacũborore guñabiriribũ. Eropigũ ĩgũ dorerire yũ masira pũhrũ yũ uaribejari ñeri arĩcũ masibũ yũhũ. Eropigũ yũ dipuwajacũborore masibũ. ¹⁰ Iri doreri mera mari Goãmũ mera õaro arĩbonirã arĩquerecũ mari iri doreri mera dipuwajacũrã dederebonirã arĩribũ. ¹¹ ĩgũ Goãmũ Moisere dorerare masira pũhrũ tarinũgadiaribũ. Ñerire uaribejagũ arĩcũ iri ñeri yũre goroweobũ. Ñerire iirã iri dorerire tarinũgara waja dipuwajacũmorã arĩribũ

mari. Eropirã iri doreri tarinũgari mera peamegue dederebonirã árĩribũ.

¹² Eropiro Moise doreri Goãmũ ya õari ãhraa. Eropiro queoro árĩro iiaa. ¹³ ¿Eropa árĩquerero iri õari doreripũ peamegue marire wacũ iiri mua pepicũ? Wadorebeaa. Mari ñeri iiri dipuwaja marire peamegue ñero wacũ iiaa. Ĩgu dorerire mari masira pũhrũ iri dorerire tarinũgarã, “Ñerire iiaa mari,” arĩ masia. Eropirã mari ñerã árĩrĩre masirã mari peamegue waboro sãre masia mari. Eropirã ĩgu dorerire masirã, mari tarinũgara iri ñeri árĩcũ masia mari.

¹⁴ Moise doreri Goãmũ ĩgu apira iri árĩcũ masia mari. Irire masiquererã maripũ ñeri ùaribeja iirã i õaripũre iibeaa. Eropirã ñerire iiniguirã ãhraa. ¹⁵ Mari õarire iidiaquererã iibeaa mari. Eropirã mari ñerire iidiabiriquererã ta iiniguicãa. Eropirã mari iirire pee masibeaa mari. ¹⁶ Eropirã ñerire iidiabiriquererã ñerire iiaa mari. Iri ñerire iidibirã Moise ĩgu dorerire “Õari doreri ãhraa,” arĩdiarã iiaa. ¹⁷ Eropirã “Yũ basi ñerire dipaturi iisome pare,” arĩquererã ta ñerire iiniguia. Mari pepirigue árĩripũ ñerire marire iicũ iiaa. ¹⁸ Õarire turaro iidiaquererã ta, ne bocatũbirica. Eropirã õpa masia. Ñeripũ marire goroweomũraa. Mari pepirigue ñeri dihta ãhraa. Ne õari mara. ¹⁹ Õari mari iidiaripũre ne iibeaa. Ñerire mari iidibiriripũre iiaa. ²⁰ Eropirã “Yũ basi ñerire dipaturi iisome pare,” arĩquererã ta ñerire iiaa daja. Mari pepirigue árĩripũ marire ñerire iicũ iiaa.

²¹ Eropiro õpa wahaa marire. Õarire mari iidiaquerecũ ta mari ùaribejari mari pepiri ñeri ãhraa. Eropirã õaripũre iibeaa mari. ²² Goãmũ dorerire mari turaro yũhridiarica. ²³ Eropirã mari ire masia: Goãmũ dorerire gamequererã mari ñeri pepiri mari ùaribejari ãhraa marire. Mari ñeri pepiri tarinũgaa mari õari iidiaripũre. Eropirã mari ñerire duhumasibeaa.

²⁴ Eropa ñerire duhumasibirã ñero dujaa mari. ¿Mari ñeri ùaribejarire duhuboro dopa, mari ñeri pepiri marire dorebiriboro dopa noa marire taugũcuri? ²⁵ Jesucristore mari guñaturacũ ĩgũpũ mari ñerire iibiriboro dopa taugũcumi. Ĩgu mari Opũ mari ñeri ùaribejarire tau-tuhajadi árĩmi. Ĩgu eropiicũ Goãmũre “Õhaa,” arãa mari. Eropirã dohpaguere mari Goãmũ dorerire yũhridiarã ãhraa. Eropa yũhridiaquererã ta mari pepirigue ñero pepiri ãhraa dohpa. Mari eropa árĩrãre Jesucristo marire taumi.

8

Espíritu Santore oparã erã árĩricũre were gojañumi Pablo

¹ Dohpaguere Jesucristo yarãre erã dipuwajacuboro mara. Erã ñerire erã ùaribejarire iiniguibeama. Eropirã Espiritu Santo ïgũ dorero dopa ta iiniguicãma erã. ² Eropigũ Jesucristo yarã mari árĩcũ Espiritu Santo ñero iirire duhucũ iimi marire. Eropigũ Espiritu Santo árĩpehrerinũri Goãmũ mera árĩcũ iimi marire. Ñerire marire duhucũ iigũ, marire peamegue wabonirãre taumi. ³ Moise dorerire mari gamero iirã ne bocatĩusome. Eropirã iri doreri mera mari Goãmũ mera õaro árĩmasibiribũ. Mari eropa árĩrã árĩquerecũ ta õpa Goãmũ marire õarã árĩcũ iidigũ árĩmi. Irire mari ñeri dipuwajare wajayebasabure ïgũ magũre obeodigũ árĩmi. ïgũ magũ mari iro dopa ta dũpũcũdigũ árĩmi. Eropigũ wajayebasagũ mari pepirigue ñeri árĩrĩre cóãdigũ árĩmi. ⁴ Marire eropa ta iidigũ árĩmi Goãmũ ïgũ dorerire õarire ïgũ turari mera mari iiboro dopa. ïgũ dorerire iirã árĩrã mari ùaribejarire iibea mari. Eropirã Espiritu Santo ïgũ itamuri mera ïgũ dorero dopa ta iiaa mari.

⁵ Erã gamero ñerire iidiarã, ñeri dihtare ùaribejama. Espiritu Santo ïgũ dorero dopa ta iiniguirãpũ õari dihtare iidiana erã. ⁶ Erã gamero ñeri dihtare iidiarã, iri dihtare ùaribejarã peamegue warãcoma. Espiritu Santo ïgũ gamerire turaro iidiarãpũ árĩpehrerinũri Goãmũ mera árĩrãcoma. Eropirã erã õaro árĩcãrãcoma. ⁷ Erã gamero iirã Goãmũre gamesũribirã àhrima. Erã Goãmũ dorerire ne yũhribeama. ïgũ dorerire ne yũhrimasosome erã. ⁸ Eropirã erã gamero iirã Goãmũre ïhasũacũ iimasibeama.

⁹ Mũapũ mũa gamero iibea. Espiritu Santo mũa mera árĩcũ ïgũ gamerire iiaa. Eropirã Espiritu Santore moorãpũ Cristo yarã árĩbeama. ¹⁰ I mũmũre masa ñerire iira dipuwaja mari árĩpehrerã sĩrimorã dihta àhraa. Mũa sĩrimorã árĩquererã ta Cristo yarã mũa árĩrã ïgũ mera eropa árĩniguirãca mũa. Goãmũ mũare "Õarã àhrima," ïgũ arĩ ïacũ ïgũ mera eropa árĩniguirãca mũa. ¹¹ Goãmũ Jesure masudigũ árĩmi. Eropa masudigũ árĩgũ, Espiritu Santo mũa mera ïgũ árĩniguicũ mũa sĩrira pũhrũ Goãmũ mũa sãre masugũcumi. Eropa masugũ õaro árĩcũ iigũcumi mũare. Jesure ïgũ masudiro dopa ta eropa masugũcumi mũare.

¹² Yũ acawererã, "ïgũ eropa ta iigũcumi," arĩrã mari gamero iibiricãrã. ¹³ Mari gamero ñerire iirã, peamegue wamorã árĩcãrã tiiaa mari. Espiritu Santo ïgũ itamuri mera

mari ñeri iiricũre duhurã, árĩpehrerinũri Goãmũ mera árĩrãca.

¹⁴ Árĩpehrerã Espíritu Santore yũhrirã Goãmũ porã ta ãhrima. ¹⁵ Espíritu Santo mari mera ĩgu árĩnũgacã Goãmũ porã árĩnũgabũ mari. Eropigũ ĩgu porã árĩcũ marire dipuwaja moasome. Peamegue wadoresome. Eropirã gũibeaa mari iribojeguere mari gũidiro dopa. ĩgu porã árĩrã, Espíritu Santo ĩgu itamuri mera dohpaguere “Ahũ,” arãa mari Goãmũre mari Pagũre ¹⁶ Eropigũ Espíritu Santo mari pepirigue õpa masicũ iimi: “Diaye ta Goãmũ porã ãhraa mari,” marire arĩ masicũ iimi ĩgu. ¹⁷ Eropirã ĩgu porã árĩrã, Goãmũ árĩpehrerire ĩgu porãre “Ogũra,” ĩgu arĩrãre maripũ oparãca. Jesucristo mera irire oparãca mari. Cristo yare mari iira waja gajirã mera ñero tarinirã árĩrã, mari ĩgu mera ɸmarogue õaro árĩcãrãca. Eropirã Goãmũ ĩgu porãre “Ogũra,” ĩgu arĩrãre oparãca mari.

¹⁸ Dohpaguere i yebare ñero taria mari. Pũhrũguere ɸmaroguere õaro árĩcãrãca. Eropirã dohpaguere ñero tarirã wũaro bũjawere pepibiricãque. Mari ñero tarirapũ pehrea waroca. Pũhrũ õaro árĩcãrãca Goãmũ pohrogue. Eropirã mucubirirãca mari. Iri mucubiriripũ ne pehresome marire. ¹⁹ Eropirã Goãmũ porã Goãmũ pohrogue õaro árĩrãcoma. Mari eropa wacũ, árĩpehreri Goãmũ ĩgu ĩhacũnugura sã mama dihta gohroto pehrea waroca. ²⁰ Dohpaguere ĩgu ĩhacũnugura árĩpehreri ñero taria. Iri gamero eropa wabiriyoro. Adán ñeri iinũgara pũhrũ Goãmũ ĩgu ĩhacũnugurare ñero wacũ iinũmi. Eropigũ Goãmũ ĩgu ĩhacũnugurare eropa ta ñero árĩdoreniinũmi dohpa. Pũhrũ ĩgu ĩhacũnugurare õaripũre gohrotogũcumi daja ĩgu. ²¹ Eropigũ Goãmũ ĩgu ĩhacũnugura boapehreaborare õaripũre gohrotogũcumi. Goãmũ porãre õarã erã gohroto dopa ta, i ɸmũ maja ĩgu ĩhacũnugura sãre árĩpehrerire õari dihta gohrotogũcumi. ²² Ire mari masia: Ñerire masa iinũgara pũhrũ árĩpehreri Goãmũ ĩgu ĩhacũnugura ñeri wayoro. Eropiro Goãmũ õarire ĩgu gohrotoborore corero iiaa. ²³ Maripũ Espíritu Santore oparã ãhraa. ĩgu yarã mari wacũ Goãmũ Espíritu Santore mata omi marire. ĩgu ĩhacũnugura iro dopa ta mari sã ñero taria. Eropirã õaripũre gohrotoborore bũrigã gamerã cohrea. Eropirã ĩgu porã mari ĩgu pohro waboro sãre bũrigã gamerã cohrea mari. Mama dũpũre ĩgu marire ĩgu oboro sãre bũrigã gamerã cohrea. ²⁴ Mari eropa corerã árĩcũ, ĩgu ta marire peamegue wabonirãre taugũcumi. ĩgu pohrogue árĩnirã árĩrã ĩgu pohrogue mari waborore corebiriboya mari. Marire ĩgu tautuhara pũhrũ árĩcũ

irire corenemobiriboya. ²⁵ Eropirã ĩabiriquererã ta dohpa, Goãmũ marire ĩgu tauborore corerã eropa corenigua õaro vojaro mariro.

²⁶ Eropirã mari Goãmũre õaro guñaturabirã ĩgu gamerire õaro masibirã árĩcũ ĩha Espĩritu Santo marire itamumi. Eropirã Goãmũre queoro serẽmasibiriquerẽcũ Espĩritu Santopũ mari ya árĩburire Goãmũre serẽbasami. Marire mojomoro ĩagu mari ya árĩburire Goãmũre serẽbasami. ²⁷ Goãmũ ĩgu gamero dopa ta, mari Jesu yarã árĩborore serẽbasami ĩgu Espĩritu Santo. ĩgu eropa arĩ serẽbasacũ Goãmũ mari pepirire masipehogũ árĩgu Espĩritu Santo ĩgu serẽrare masimi.

Cristo ya turari mera ñeri iirire tarinũgarãca mari, arĩ gojañumi Pablo

²⁸ Ire masia: Árĩpehrerã Jesure mahirã mari árĩcũ ĩgu gamerire iimorãre beyepũ ĩgu marire. Eropa beyegu Goãmũ eropa ĩhadibuniguicãmi marire. Eropigu mari ñero taricũ ĩagu Goãmũpũ marire õaro wacũ iigucumi. ²⁹ Goãmũ marire ĩgu yarã árĩmorãre matague ta mari ne masa dehyoaboro coregue ta guñatuhapũ. Eropa guñagu ĩgu magũ ĩgu õagu árĩro dopa ta marire õarã árĩrare guñapũ. ĩgu magũ iro dopa marire árĩdorepũ bajarã masa ĩgu magũre mari tĩgũcuborore. Eropigu árĩpehrero marire eropa wara mera marire õarã gohrotocũ iimi. ³⁰ Matague ta ĩgu yarã ĩgu árĩdorenirã mari árĩcũ, ĩgu porã mari árĩmorã sãre beyepũ marire. Eropigu marire ĩgu beyenirãre "Dipuwaja moorã, õarã ãhrima," arĩ ĩhami. Marire ĩgu eropa "Õarã ãhrima," arĩ ĩagu ĩgu mera umaroguere õaro árĩcũ iigucumi.

³¹ Irire masirã õpa pepia mari: Goãmũ marire ĩgu mahinirãre, ne gajirã ĩhaturirã bocatũbeama. ³² Goãmũ mari ya dipuwaja sĩribure ĩgu magũre obeodigu árĩmi. "Yũ magũre mahia. Eropigu ĩgũre obeobeaa," arĩbiridi árĩmi. Eropigu mari ya árĩburire ĩgu magũre obeodigu árĩgu Jesucristo mera árĩpehrerire õari dihtare ogucumi ĩgu marire. ³³ Goãmũ beyenirã mari árĩcũ, ĩgu marire "Dipuwaja moorã, õarã ãhrima," arĩ ĩhami. Mari ĩgu eropa arĩnirã árĩcũ, gajirã marire "Ñerã ãhrima," ne arĩ weresãmasibeama. ³⁴ Cristo mari ya dipuwajare sĩrira pũhrũ masa mariadi árĩmi. Eropigu Goãmũ diayepũ dohpaguere ĩgu ãhrimi dorebu. Eropigu ĩgu mari ya árĩburire diaye ta umũri nũcũ serẽbasagu iimi Goãmũre. Eropirã gajirãpũ ne marire "Erã ñeri iira dipuwaja moaque," arĩmasibeama. ³⁵ Cristo marire ĩgu burigã mahicũ gajirãpũ

“Eräre ne mahibiricãque,” arĩmasisome ïgure. Eropigu mari ñero tariquerecũ ta, mari güiquerecũ ta, gajirã marire erã ñero iiquerecũ ta, mari oaboaquerecũ ta, suhri marirã mari arĩquerecũ ta, gũhyaro marire arĩquerecũ ta, marire erã wejẽquerecũ ta, Cristo marire eropa mahinigu-icãgucumi. ³⁶ Goãmũ yare erã gojarapũ marire eropa waburire werero õpa arĩ werea:

Goãmũ, mũ yarã gũa árĩri waja erã wejësũmorã ta árĩniguirã tiiaa gũa. Oveja erã wejẽmorã erã árĩro dopa ta, gũa sãre eropa ta wahaa, arĩ gojañuma Goãmũ yare erã gojarapũgue.

³⁷ Eropirã mari ñero tariquererã ta, Cristo marire mahigu ïgũ itamuri mera, turaro mera ñerire tarinũgarãca mari. ³⁸⁻³⁹ Goãmũ marire ïgũ mahirare ïhmudi árĩmi mari Opũ Jesucristo mari ya árĩburire sĩricũ. Eropigu ïgũ marire buriã mahigu ne duhusome. Mari sĩricũ sãre, mari ojocaricũ sãre mahi duhusome. Dohpaguere, pũhrũgue sãre, marire ïgũ ne mahi duhusome. Eropirã anyua, watẽa oparã umaro majarã, i yeba majarã oparã, ñerã deyobirã sã marire Goãmũre “Mũ yarãre mahibiricãque,” arĩrã, bocatĩusome. Eropiro ne yujugũ ne yujuñe ïgũ ïhacũnugura marire ïgũpũre mahi duhudoreri ne mara. Marire ïgũ ne mahi duhusome.

9

Judio masa Goãmũ ïgũ beyenirã ãhrima, arĩ gojañumi Pablo

¹⁻² Yũ acawererã Israe masare guñaqu buriã bujawerea. Cristore gamebeama erã. Eropigu ñero siporãcũ pepia yũhũ. Iri yũ eropa arĩri diaye ta ãhraa. Yũhũ Cristo yagu ãhraa. Eropigu mũare diaye arĩgu iiaa. Espiritu Santo yũ mera árĩcũ dohpaguere yũ acawererãre yũ arĩri iri diaye árĩcũ õaro masia yũhũ. ïgũ yũre irire õaro masicũ iimi. ³ Israe masa yũ acawererã, yaha curu majarã Jesucristore gamebirã peamegue warãcoma, arĩ guñaricũa. Eropigu yũhũ erãre peamegue wamorãre taumasigu õpa arĩboya Goãmũre. “Erã ya dipuwajare yũpũre peamegue wadoreque,” arĩboya. Eropigu “Erã ya dipuwajare yũpũre cóãporo Cristo,” arĩboya. Yũ eropa arĩborañe wajaye masiya mara erã ya dipuwajare. ⁴ Erã yũ acawererã Goãmũ yare õarire mata opamũhtanirã árĩma. Israe mũrũ pãramerã árĩturiarã ãhrima. Eropigu Goãmũ ïgũ porã erã árĩburire mata apiñumi Goãmũ erãre. Eropigu Goãmũ ïgũ goesiriri mera erã watope árĩñumi. Eropiro arĩpehrerire ïgũ masare õaro iiburire weremũriñumi

eräre. Eropigu Moisere İgu dorerare mata apimũhtañumi Israe masare. Eropirã Goãmure umupeoburi wihire iimũhtañuma erã. Eropigu eräre İgu ðaro itamuborore weremuriñumi Goãmũ. ⁵ Gũa ya cururi gohra doce cururi ãhraa. Eropirã gũa ñecu sumarã Abrahã sã murgue, erã pãramerã árĩturiarãgue ãhraa gũa Israe masa. Eropigu Cristo masa dehyoanijagu gũa acaweregu Israe masũ gohra árĩmi Cristo. İgu Goãmũ ta ãhrimi. Eropigu İgu árĩpehrerã weca opu ãhrimi. Árĩpehrerinuri İgure ðaro umupeorã mari. Eropa ta iirã.

⁶ Israe murũ İgu pãramerã árĩturiarã árĩquererã árĩpehrerã Goãmũ yarã gohra árĩbeama. Eropirã árĩpehrerã Goãmũ ðaro oburire opamorã árĩbeama. Eropirã Israe masare “Õaro iigura,” arĩdigũ árĩqueregu Goãmũ eräre árĩpehrerãre ðaro iibiricũ İarã “Goãmũ İgu arĩdiro dopa ta iibeami,” arĩ pepibiricãro gahmea. ⁷ Őpa ãhraa: Gajirã Israe masa Abrahã pãramerã árĩturiarã erã árĩquerecũ ta, “Abrahã pãramerã gohra yaharã gohra ãhrima,” arĩ İabeami Goãmũ eräre. Eropigu Őpa arĩñumi Goãmũ Abrahãre. “Mũ magũ Isaa pãramerã árĩturiarã erã tamera diaye ta mũ pãramerã árĩturiarã árĩrãcoma,” arĩmuriñumi Goãmũ Abrahãre. ⁸ İgu eropa arĩ werecũ ire masirãca mari: Árĩpehrerã Abrahã pãramerã erã masa dehyoara puhũ, mata Goãmũ porã wasome erã. Goãmũ İgu arĩ werepirare ðaro peerã İgure umupeorãpu erã dihta árĩrãcoma Goãmũ porã. Eropirã erã ta ãhrima Abrahã pãramerã árĩturiarã gohra. ⁹ Őpa arĩñumi Goãmũ Abrahãre: “Gaji bojori inosubu ta yũ dujaricũ mũ marapo Sara majigũgãre opagocumo mũ magũre,” arĩñumi Goãmũ Abrahãre. Eropa ta arĩ werepiñumi İgure Abrahã magũ Isaa masa dehyoaborore. Eropigu İgu magũ Isaa masa dehyoañumi. ¹⁰ Puhũ Isaa Rebeca mera marapocũcũ igo uma perã suhrũanirã porãcũñumo. Erã pagũ Isaa gũa ñecu murũ arĩñumi. ¹¹⁻¹² Eropirã erã porã erã masa dehyoaboro core, ðarire, ñeri sãre erã iibiricũ ta Goãmũ erã pago árĩbore Őpa arĩmuriñumi: “İgu pagũ magũpu İgu tĩgure doregũcumi. Eropigu İgu opu árĩgũcumi,” arĩmuriñumi igore igo porãcũboro core. Goãmũ İgu gamero dopa ta beyemi İgu. Eropa árĩgu, árĩgu İgu dehyoaboro core Jacobore Esaũ pagũ magũ árĩgũre opu árĩbure beyemuriñumi. Eropigu masa erã iirire İaboro core İgu gamero dopa ta İgu yarã árĩmorãre beyemi. ¹³ Eropa ta arĩ gojañuma İgu yare erã gojarapũgue: “Jacobopũre mahimuriũ. Eropigu Esaũpũre mahibirimuriũ,” arĩmi Goãmũ, arĩ gojañuma

iribojeguere.

¹⁴ ¿Iriire peerā dohpa arī pepibocuri mari? “¿Erā iiricūrire ĩaboro core yujugure eropa beyegu Goāmū queoro iibeami,” ¿arī pepibocuri?” Árĩbeaa. Queoro iigu ta āhrimi. ¹⁵ Ōpa arĩñumi Goāmū Moise säre: “Yū gamegū dihtare mojomoro ĩagura,” arĩmuriñumi ĩgu Moisere. Eropigū yujugure ĩgu gamero beyegu queoro iigu iimi Goāmū. ¹⁶ Eropirā mari gamero Goāmure marire mojomoro ĩadoremasibea mari. Eropirā mari ōarire iira waja säre ne mojomoro ĩabeani ĩgu. ĩgu gamero dopa ta mojomoro ĩhami. ¹⁷ Eropigū eropa ta ĩgu gamero dopa iĩñumi Egipto majarā opu säre. Ōpa arĩñumi Goāmū ĩgure faraõre: “Egipto majarā opu árĩbure apigū iibu mure yū turarire árĩpehreräre ĩhmubure. Eropigū árĩpehreri yeba majaräre, yure erā masiborore opu acugū iibu yūhū mure,” arĩñumi Goāmū ĩgure, arī gojara āhraa Goāmū yare erā gojarapūgue. ¹⁸ Eropigū ĩgu gameräre mojomoro ĩhami ĩgu mari masare. Eropigū ĩgure erā gamebircū ĩagu ĩgu gamero eräre yūhribircū iimi ĩgu. Eropigū Goāmū ĩgu gamero dopa ta iimi.

¹⁹ ĩgu eropiigu árĩcū ĩarā ōpa arĩboca mūa: “¿Goāmū eräre ĩgure yūhribircū iidigu duhpigu ero pūhrū erā ĩgure yūhribirira dipuwaja moayuri eräre?” arī papūri serēpiboca mūa. ²⁰ Eropa arĩbircāque. Mari masa bu árĩrā āhraa. Goāmū mera papūrimasibea. Mátasoro wéagore “¿Duhpigo yure eropa iiri mūhū?” iri soro arī serēpimasibea. Eropa ta mūa sã Goāmure ĩgu gamero iigure “¿Duhpigu eropa iiri mūhū?” arī serēpimasibea. ²¹ Mátasoro wéago máta mera igo gamero dopa iimo. Eropigo ōarire dibuburi sorore iimasimo igo. Iri máta mera ta bu árĩri dibuburi soro säre iimasimo igoa. Igo iiro dopa ta Goāmū sã ĩgu iidiaro dopa ta iimi.

²² Eropigū Goāmū peamegue ĩgu cóāmoräre erā ñero iirare ĩha guagu, eräre dipuwaja moadiaqueregū ta yoari boje erā ñeri iirire eropa ĩacānimi. Árĩpehreräre ĩgu turarire ĩhmubu, mata eräre dipuwaja moanibirimi. ²³ Eropa ta iimi marire ĩgu mojomoro ĩaräre, ĩgu ōatariagu ĩgu árĩrire, ĩgu turari säre marire masidorebu. Matague ta marire, “Eräre mojomoro ĩagura yūhū. Yū ōarire ogura eräre,” arī apiñumi Goāmū marire. ²⁴ Eropirā maripu ĩgu beyenirā árĩrā iiaa. Eropirā ĩgu beyenirā judio masa dihta árĩbeama. Judio masa árĩbirā sã āhrima ĩgu beyenirā. ²⁵ Eropa ta āhraa judio masa árĩbiräre Goāmū yare Osea waĩcugū ĩgu ōpa arī gojadiro dopa ta:

Ero coregue yaharã árĩbirinirãre pũhrũ erãre “Yaharã ãhrima,” arĩgũra. Eropigũ ero coregue yũ mahibirinirãre pũhrũgue erãre “Yũ mahirã ãhraa mũa,” arĩgũra, arĩpũ Goãmũ. ²⁶ “Yaharã árĩbeaa mũa,” Goãmũ ãgũ arĩra yeba majarã Goãmũ ojocarinigucãgũ porã ta árĩrãcoma, arĩ gojamũhtamũriĩnumi Osea iribojegure.

²⁷⁻²⁸ Eropigũ iribojegue majagũ Isaia Israe masare õpa wereĩnumi: “Mari Opũ i yeba majarãre bajarã masare vojaro mera diaye ta dipuwaja moa purumujugũcumi. Eropirã wũariya maja imipayeri iro dopa Israe masa bajarã gohra erã árĩquerecũ ta bajamerãgã tarirãcoma erã,” arĩmũriĩnumi Isaia. ²⁹ Eropigũ dipaturi ta wereyugũ õpa arĩ gojaĩnumi Isaia:

Mari Opũ árĩpehrerã weca opũ bajamerãgã mari mera majarãre taubigũ, marire judio masare árĩpehrerãre dederecũ iiboĩnumi ãgũ. Sodoma majarãre, Gomorra majarã sãre ãgũ dedeopehocũ iidiro dopa ta mari sãre dederecũ iiboĩnumi ãgũ, arĩ gojamũriĩnumi Isaia.

Judio masa õari buherire gamebirima, arĩ gojaĩnumi Pablo

³⁰ Eropa ta ãhraa. Eropirã ire masique mũa: Judio masa árĩbirãpũ Goãmũre amabiriquererã ãgũre bocama. Jesucristore erã umupeocũ, “Õarã ãhrima,” arĩ ãhami Goãmũ erãre. ³¹ “Goãmũ dorerire Moisere ãgũ apirare mari iicũ ãgũ marire õarã ãagũcumi,” arĩriĩnorã judio masapũ. Eropa ãgũ dorerire erã iiquerecũ ta Goãmũ ãha suabirimũripũ erãre. Eropirã õarã árĩdiaquererã bocatĩubirimũriĩnorã. ³² Erã Jesucristore umupeoro mariro erã gamero Moise dorerire iidiarima Goãmũ mera õaro árĩdiarã. Eropirã Cristore erã ñeri iirare cóãbure gamebirã Goãmũ pohrogue ne ejasome. ³³ Eropa ta arĩ gojamũhtaĩnuma Goãmũ ãgũ magũre wereyurire:

Õtãye iro dopa árĩgũre, yũ beyedigũre dohpague Jerusalengue apigũ iiaa. ãgũre umupeobirã, ãgũre tarinũgarã yũ pohrogue ne ejasome. Eropirã ãgũre umupeorãpũ ãgũ mera õaro mucubiriniguirãcoma. Yũ pohro warãcoma, arĩmi Goãmũ, arĩ gojaĩnuma Goãmũ yare erã gojarapũguere.

10

¹ Yũ acawererã, Israe masare Goãmũ ãgũ tauborore burigã gahmea yũhũ yũ sĩporã mera. Eropigũ Goãmũ erãre ãgũ tauburire serẽbasaa yũhũ. ² Diaye ta erã Goãmũ gamerire iidiarima. Eropa iidiaquererã ta ãgũ gamerire masibeama. ³ Eropirã Goãmũ erãre õacũ iiburire masibeama. Eropa masibirã erã gamero õarire iiquererã

bocatūbirima. Erã eropiicã, erã Goãmũ Jesucristore umu-peodorediro dopa erã iibiricã, ĩgũpũ erãre “Ōarã àhrima,” arĩ ĩabirimi. ⁴ Cristore umupeorãre “Dipuwaja moorã, ōarã àhrima,” arĩ ĩhami Goãmũ. Eropirã “Mari ñeri iira dipuwaja Goãmũ tauboro dopa Moise dorerire iiro gahmea daja,” arĩ pepibiricãro gahmea. Cristore umupeorã ĩgũ mera taria.

⁵ Moise iribojegue majagũ õpa arĩ gojañumi: “Goãmũ dorerire mari ðuhyaro mariro iipehocũ Goãmũ marire ‘Dipuwaja moorã, ōarã àhrima,’ arĩ ĩagũcumi,” arĩ gojañumi ĩgũ. ⁶ ĩgũ eropa arĩ gojaquerecũ ta dohpaguere masa Cristore erã umupeocũ Goãmũ erãre “Ōarã àhrima,” arĩ ĩhami. Iri buheri “Cristore umupeoque,” i arĩ buheri õpa arĩ werea: “Ōpa arĩ pepibiricãque mũa: ‘¿Noa Cristore umaroguere árĩgũre aĩdijugũcuri marire ĩgũ buhecũ daja?’ arĩ pepibiricãque mũa. Cristo eratuhadigũ árĩmi marire taugũ eragũ i yebaguere. ⁷ Eropirã daja ‘¿Noa sĩrinirã pohroguere Cristore masu aĩgãribocuri?’ arĩ pepibiricãque mũa. ĩgũ sĩridigũ masa mariadigũ árĩmi,” arĩ werea i buheri. ⁸ Eropiro õpa arĩ werea Goãmũ yare erã gojarapũgue: “Goãmũ ya buherire mari amacũ ĩgũ buheri ohõ àhraa. ĩgũ buherire masituhaa mũa. Eropirã ĩgũ buherire wereniguimurabũ,” arĩ gojañuma. Iri buherire “Cristore umupeoque,” arĩ buherire masare werea gũa. ⁹ Iri buheri õpa arĩ werea: “Jesu yũ opũ àhrimi,” arĩ mari disiro mera werecũ, “Goãmũ Jesure sĩridigũre diaye ta masuñumi,” arĩ mari pepicũ ĩha Goãmũ marire peamegue wabonirãre taugũcumi. ¹⁰ Jesure mari umupeocũ ĩha Goãmũpũ marire “Ōarã àhrima,” arĩ ĩagũcumi. Eropigũ gajirãre “Yũhũ Jesucristore umupeoa,” mari arĩ werecũ ĩha ĩgũ marire peamegue wabonirãre taugũcumi.

¹¹ Ōpa arãa Goãmũ yare erã gojarapũ: “ĩgũre umupeorã, ĩgũre erã umupeorare ne bujaweresome. ‘ĩgũre umupeobiricũ ðaboya yũre,’ ne arĩsome,” arĩyoro Goãmũ yare erã gojarapũgue. ¹² Judio masare, judio masa árĩbirã sãre Goãmũ yujuro mera ta itamumi. Mari Opũ árĩpehrerã tauro opũ àhrimi ĩgũ. Eropigũ árĩpehrerãre ĩgũre serẽrãre itamugũcumi ĩgũ. ¹³ Eropa ta arĩ gojañuma Goãmũ yare gojarapũgue õpa arĩ gojarã: “ ‘Yũ ñerire cóãque. Eropigũ yũre tauque,’ masa erã serẽcũ erãre peamegue wabonirãre mari Opũ taugũcumi,” arĩ gojañuma. ¹⁴ Eropirã masa Cristore “Diaye ta marire taugũ àhrimi,” arĩ umupeobirã ĩgũ eropa serẽmasibeamã erã. Eropirã ĩgũ buherire Jesucristo erãre tauburi buherire peebirã ĩgũre umupeo-

masibeama. Eropirã ïgu buherire erãre weregu maricũ Goãmure erã masisome. ¹⁵ Eropirã ïgu buherire weremorãre erã obeobiricũ ïgu buherire weremasibeama. Õpa arĩ gojañuma Goãmũ yare erã gojarapũgue: “Õari buherire marire õarã wacũ iiburi buherire weremorã erã eracũ ïarã õaro mucubiria mari,” arĩ gojañuma iribojegure.

¹⁶ Eropa arĩquerecũ ta masa bajarã Jesucristo yare õari buherire peediabeama. Eropa ta arĩ gojamuriñumi Isaia: “Opũ, erãre mari wererare ne peediabeama,” arĩ weremuriñumi Isaia Goãmure. ¹⁷ Eropirã masa Jesucristo yare õari buherire peerã peeñarã Cristore umupeoma.

¹⁸ Eropigu ire serẽpidiaca mũare: ¿Israe masa Jesucristo yare peebiriyuri mũa pepicũ? Yuju diaye ta erã peemuriñuma. Eropa ta áhrra Goãmũ yare erã gojarapũ sãre:

Goãmũ yare wererã árĩpehreroguerere weresirirã wama. Eropirã árĩpehrero majarãgue ïgu yare peema, arĩ gojañuma iribojegue.

¹⁹ Dipaturi mũare serẽpidiaca daja: ¿Israe masa peequererã õaro masibiriyuri mũa pepicũ? Masiriñuma. Masiquererã Jesucristore umupeodiabiriñuma. Erã eropa peediabiricũ gaji yeba majarã Goãmũ yarã wahama. Irire werenemogu Moise ïgu arĩrare weremũhtagura: Õpa arĩ gojañumi ïgu:

Õpa arĩ weremi Goãmũ Israe masare: “ ‘Bu árĩrã áhrima,’ mũa arĩ ïanirãre yaharã árĩmorã iigura. Yu eropiicũ mũapũ erãre ïhaturirãca. Eropigu mũare erã mera guacũ iigũca yũhũ, arĩ weremi Goãmũ,” arĩ gojañumi Moise.

²⁰ Isaia sã doyarõ mariro õpa arĩmuriñumi:

Õpa arĩmi Goãmũ: “Yũre amabirãpũ yũre bocama. Eropigu yũre masibirãre erãre yũre masicũ iibũ yũhũ,” arĩmi Goãmũ, arĩ gojañumi Isaia. Judio masa árĩbirã Goãmũ yarã erã waburire weregu eropa ari gojañumi.

²¹ Israe masa pũre õpa ari gojañumi Isaia: “Õpa arimi Goãmũ: ‘Mũa ñeri iirare bũjawereque yaharã wamorã, arimuriribũ erãre. Erãpũ yũre tarinũgarã yũre yũhribirimurima,’ arimi Goãmũ,” arĩ gojañumi Isaia.

11

Yujurãyerire Israw masare taugũcumĩ Goãmũ, ari gojañumi Pablo

¹ ¿Eropigu Israe masare Goãmũ igu beyenirãre erã tarinũgacũ erãre cóãpehocãyuri igu mũa pepicũ? Áribeaa.

Eräre cóãbirimi ĩġu. Yũ sã Israe masu, Abrahã pãrami árituriagu ãhraa. Eropigu Benjami ya curu majagu ãhraa. ² Iribojegue Goãmu Israe masare beyemuriñumi. ĩġu eropa beyenirãre cóãbeami. Goãmu yare erã gojarapũ Elia ĩġu iirare werea. Iripũ Israe masare Elia Goãmure ĩġu arĩ weresãrare masica mua. Őpa arĩ weresãñumi ĩġu: ³ “Opũ, erã Israe masa mu yare weremuhtanirãre wejẽpehocãma. Eropirã mre umupeori mesarire cóãpehocãma. Eropigu erã watope yũ dihta mu yagu dujaa dohpaguere. Yũ eropa áricũ ĩarã yũ sãre wejẽdiana dohpaguere,” arĩñumi Elia Goãmure. ⁴ ĩġu eroparicũ peegu ōpa arĩ yũhriñumi Goãmu Eliare: “Mũhu yahagu yujugu ta áribeaa. Siete mil uma yaharã áhrima dohpaguere. Erãre dihbuabu yũhu. Erã sã yũre ōaro umupeoma. Baal waicũgu wéadigũre ne umupeobirimurama erã sã. Eropigu gũibita mũhu,” arĩñumi Goãmu Eliare iribojeguere. ⁵ Irisubure Elia ĩġu árĩrisubure ĩġu yarã árĩmorãre Goãmu ĩġu dibudiro dopa ta dohpague sãre bajamerãgã Israe masare ĩġu yarã árĩmorãre dihbumi. Goãmu erãre mojomoro ĩagu dihbumi. ⁶ Őarire erã iicũ ĩagu dibubirimi. Erãre mojomoro ĩagu dibugũ beyemi. “Őarire mua iira pũhrũ muare beyegũra,” arĩġu, ĩġu diaye ta erãre mojomoro ĩagu iibiriboñumi. Őarire erã iira pũhrũ erãre ĩġu beyecũ erãre wajatari árĩboya. Őarire erã iibiriquerecũ ta erãre diaye ta mojomoro ĩagu Goãmu beyemi erãre. ⁷ Eropa iri ōpa ãhraa: Israe masare Goãmu erãre, “Őarã áhrima,” ĩġu arĩ ĩacũ gamequererã ta erã yujuro bojebeama. Goãmu ĩġu basi ĩġu beyenirãpũ ōarã wahama ĩġu mera. ĩġure yujuro bojebirãpũ ĩġu yare peediabeama. ⁸ Eropa ta arĩyoro Goãmu yare erã gojarapũ: “Goãmu ĩġure gamebirãre ĩġu yare peebiricũ iimi. Eropigu diaye árĩrire erã peequerecũ erãre ōaro peebiricũ iimi Goãmu. Eropa ta árĩniguicãma dohpague sãre,” arĩ gojañuma iribojeguere.

⁹ Eropigu ōpa arĩñumi Davi mũrũ iribojegue majagu Goãmure:

Erã Israe masa erã bosenuri mucubiririnuri iirã ñero iima erã. Erã eropa iicũ ĩagu dipuwaja moaque mũhu erãre. ¹⁰ Erãre ōaro peebiricũ iique mũhu. Eropirã eropa dipuwajacũrã árĩniguicãporo erã. Eropirã eropa bujawereniguicãrãcoma, arĩñumi Davi Goãmure.

Judio masa árĩbirãre peamegue wabonirãre taugũcumi Goãmu, arĩ gojañumi Pablo

¹¹ ¿Judio masa Cristore erã gamebiricũ ĩagu Goãmu erãre cóãcãyuri mua pepicũ? Cóãgohracãbiriñumi. Eropa erã

Cristore erã gamebircũ dohpaguere judio masa árĩbirãpũ Goãmũ ĩgũ taumorã wahama. Dohpaguere ĩgũ yarã iimi Goãmũ erãre. ĩgũ eropiicũ ĩarã yujurãyeri judio masapũ erãre ĩhacũ erã sã Jesucristore umupeodiana. ¹² Judio masa erã Goãmũre tarinugacũ judio masa árĩbirãpũ Goãmũ ĩgũ õari buherire peema. Eropirã árĩpehrero majarã judio masa árĩbirã Goãmũ taumorã wañorã õaro warã. Pũhrũ judio masapũ Cristore erã umupeonũgara pũhrũ tamerare i yeba majarãre õatariaro waroca.

¹³ Dohpaguere mũare judio masa árĩbirãre werebu iiaa. Cristo apimi yũre mũare judio masa árĩbirãre buhebure. Eropa buhegũ bu gohra iigũ iibeaa. ¹⁴ Yũre eropa buhedoredigũ árĩgũ masare weremũra. Yũ acawererãre judio masare mũa Jesucristo umupeorare ĩhacũcũ iidiagũ werea. Goãmũ taunirã mũa árĩcũ ĩarã erã sã Cristore gahme ĩgũ taumorã wabocoma, arĩgũ werea. ¹⁵ Dohpaguere judio masare Goãmũ boje apigũ, gajirãguere õari buherire Goãmũ weredoremi ĩgũ mera erã õaro árĩmorãre. Eropiro judio masare ĩgũ boje apicũ õaro wahabũ i yeba majarãre judio masa árĩbirãre. ĩgũ eropiidiro tauro judio masa sãre ĩgũ yarã árĩmorãre ĩgũ iicũ tamerare õatariaro waroca i yeba majarãre. Goãmũ mera erã õaro árĩcũ bajarã masa Jesure umupeorãre peamegue wabonirãre taugũcumi. ¹⁶ Ōpa ãhraa: Abrahã gũa ñecũ mũrũ Goãmũ mera õaro ĩgũ árĩdiro dopa ta ĩgũ pãramerã árĩturiarãgue sã Goãmũ mera õaro árĩrãcoma Cristore umupeorã árĩrã.

¹⁷ Yujurãyeri erã eropa árĩrã árĩquerecũ ta gajirã erã acawererãpũre judio masare Goãmũ boje apinimi dohpa. Judio masa Goãmũ ĩgũ beyemũhtanirã olivo waĩcũdigũ otedigũ dũpũri iro dopa ãhrima. Mũa judio masa árĩbirã ĩgũ beyemũhtanirã árĩbirã nũgũ majagũ dũpũri iro dopa ãhraa. Olivo otedigũ dũpũrire yujuyeri dũpũri ĩgũ tabe cõãdiro dopa ta gajirã judio masapũre Goãmũ cõãmi. Eropa cõãgũ ĩgũ yarã árĩbirã wacũ iimi erãre. ĩgũ cõãra dũpũrire gaji dũpũrire nũgũ majagũ dũpũrire gohroto tuhboro dopa, Goãmũ judio masare judio masa árĩbirã mera gohrotomi. Eropa gohrotogũ mũare judio masa árĩbirãre ĩgũ yarã wacũ iimi. ¹⁸ Mũare ĩgũ eropa gohrotocũ, "Judio masa tauro õarã ãhraa pare gũa," arĩ pepibircãque. Ire guñaque: Judio masapũre beyemũhtapũ Goãmũ. Mũapũ erã pũhrũ Goãmũ yarã árĩrã mũa sã Goãmũ õari oburire opaa. Eropirã "Judio masa tauro õarã ãhraa," arĩ pepibircãque.

¹⁹ Mũa judio masa árĩbirãpũ õpa arĩboca: "Yujurãyeri dũpũrire ĩgũ cõãdiro dopa ta Goãmũ judio masare cõãmi yujurãyerire. Eropa cõãgũ ĩgũ gaji dũpũrire gohroto

ĩgu tuhdiro dopa ta ĩgu yarã mari wamorãre apimi," arĩboca mũa judio masare tarinũgadiarã. ²⁰ Ōpa ãhraa. Erã Jesure umupeobirira dipuwaja cóãpũ Goãmũ erãre. Eropĩgu mũa sãre Jesure mũa umupeobiricũ ĩgu yarã árĩmorãre mũare apibiriboañumi. Eropirã "judio masa tauro ðarã ãhraa gũa," arĩ pepibiricãque mũa. Eropa arĩbirã ta Goãmũre ðaro umupeoque. ²¹ Mũhtari dũpũri iro dopa judio masa Goãmũ yarã árĩmũhtañuma. Iri gohroto tuhra dũpũri iro dopa ta erã pũhrũ mũa Goãmũ yarã wabũ. Eropĩgu Goãmũ ĩgu yarã árĩmũhtanirã ĩgũre umupeobiricũ ĩagu cóãpũ erãre. ĩgu erãre eropiidiro dopa ta mũa sãre cóãgũcumĩ mũa ĩgũre umupeobiricũ. Eropirã Goãmũre ðaro umupeoque mũa. ²² Goãmũ mũare ðaro iigu ĩgu árĩcũ masique mũa. Eropirã gũhyadiaro mera, ĩgu dipuwaja moagu ĩgu árĩcũ sãre masique mũa. ĩgũre umupeobirãre ĩgu dipuwaja moagũcumĩ. Eropa árĩqueregũ ta mũa ĩgũre umupeoniguicũ mũare ðaro iigũcumĩ ĩgu. ĩgũre umupeobiricũ ñeri dũpũrire ĩgu tabe cóãdiro dopa ta mũa sãre cóãgũcumĩ Goãmũ. ²³ Masapũ erã tabe cóãra dũpũrire tuhumasibeamã daja. Goãmũpũ árĩpehrero iimasigu ãhrimi. Eropĩgu judio masa ĩgu cóãnirã Cristore erã umupeodiacũ Goãmũ ĩgu yarã árĩcũ iigũcumĩ daja erãre. ²⁴ Mũa judio masa arĩbirã Goãmũ yarã arĩbirimũriyoro. Eropa arĩbirã mũa árĩquerecũ ta Goãmũ mũare ĩgu yarã arĩcũ iigũcumĩ. Eropĩgu ĩgu beyemũhtanirã mũa arĩbiriquerecũ ta ĩgu yarã árĩcũ mũare iidiami ĩgu. Eropĩgu judio masare ĩgu beyemũhtanirãpũre ĩgu yarã árĩcũ ĩgu tauro iidiaagũcumĩ.

Pũhrũ Israe masare taugũcumĩ Goãmũ, arĩ gojañumi Pablo

²⁵ Yũ acawererã, ire masa erã masibirirare mũare weregũra. Mũa ðpa arĩboca: "Dohpaguere gũa dihtare beyemi Goãmũ. Gũapũ masipehocãa," mũa arĩ pepiboca. Mũa irire arĩ pepibiriboro dopa ire weregũra mũare. Ōpa ãhraa masa erã masibirira: Dohpaguere bajarã judio masa Goãmũre peediabirã ãhrima. Eropirã bajarã judio masa arĩbirãre Goãmũ ĩgu queodiropẽ ĩgu yarã wacũ iigũcumĩ. Ero pũhrũ judio masapũ ĩgũre gamerãcoma daja. ²⁶ Erã eropa gamecũ árĩpehrerã Israe masare Goãmũ taugũcumĩ erã peamegue wabonirãre. Goãmũ yare erã gojarpũgue eropa ta arĩ gojañuma:

Jerusalén waĩcũri macague judio masa ya macague erãre taubu arigũcumĩ. Eropĩgu Jacobo mũrũ pãramerã árĩturiarãre erã ñerire ĩgu cóãgũcumĩ. ²⁷ Eropĩgu

eräre taugu iribojegue yu arĩ eräre werepirare iigucumi, arĩmi Goãmũ, arĩ gojamuhtañuma Goãmũ yare erã gojarapũgue.

28-29 Dohpaguere erã judio masa Cristo yare umupeobirã Goãmũre gamebeama. Erã eropiicũ dohpaguere mũapũ judio masa árĩbirãpũ Cristore umupeonugabũ. Judio masapũre Goãmũ beyemuhtañumi. Goãmũ igũ arĩ werepidiro dopa ta masare igũ beyediro dopa ta diaye iimi igũ. Eropigũ judio masa ñecũ sumará mũra igũ beyenirã erã árĩcũ dohpague erã árĩturiarã sãre igũ mahimi. ³⁰ Iribojegue mũa sã Goãmũre tarinuganirã árĩriyoro. Dohpaguere judio masa Goãmũre erã tarinugacũ ñagu igũ mũapũre mojomoro ñagu taumi. ³¹ Dohpaguere judio masa igũre tarinugarã áhriima. Erã eropa árĩquerecũ ta Goãmũ dohpamasapũre Goãmũ beyemuhtañumi. Goãmũ igũ arĩ werepidiro dopa ta masare igũ beyediro dopa ta diaye iimi igũ. Eropigũ judio masa ñecũ sumará guere mũare mojomoro ñadiro dopa ta erã sãre pũhrũ mojomoro ñagucumi. ³² Ōpa áhria: Árĩpehrerã masare Goãmũ igũre erã tarinugara waja yujuro mera dipuwajacũdoremi. Eropigũ árĩpehrerã erã dipuwajacũrã erã árĩcũ iha árĩpehrerãre yujuro mera mojomoro ñagucumi igũ.

³³ Ōatariagu áhrimi mari Goãmũ. Turatariagu áhrimi. Ōaro masipehogũ áhrimi igũ. Eropiro igũ guñarire, igũ iiburire marire ōaro masiya mara. ³⁴ Ōpa arĩ gojañuma Goãmũ yare erã gojarapũgue: “Goãmũ mari Opũ igũ guñarire ne masa ōaro masibeama. Eropirã masa igũre ‘Ōpa iique,’ arĩ weremasibeama. ³⁵ Eropirã masa Goãmũre erã gajino ora pũhrũ ‘Igũ marire wajamomi,’ arĩ masiya mara masa,” arĩ gojañuma iribojeguere. ³⁶ Goãmũ árĩpehrerire iidi árĩmi. Eropigũ igũ turari mera árĩpehrerire árĩcũ iidoredi árĩmi igũ. Eropiro árĩpehreri igũ iiburi áhria. Eropirã árĩpehrerinũri igũre umupeorã mari. Eropa ta iirã mari.

12

Goãmũ gamerire marire iiniguicãdoreñumi Pablo

¹ Goãmũ marire turaro mojomoro ihami. Igũ eropa mojomoro ñagu árĩcũ ñarã, yu acawererã, mũa basi ta Goãmũ gamerire iiniguicãrã árĩque. “Mũhũ yu opũ áhria,” arĩque igũre. Eropirã ōaripũre gohrotonirã, ñeri marirã árĩque. Eropa ta iiro gahmea marire Goãmũre umupeorãre. Mũa eropa árĩrã árĩcũ igũ mucubirigucumi. Eropigũ mũare

irire burigã iidorea. ² I yeba majarã erã gamero dopa ta pepibiricãque mua. Eropirã mua pepiriguere Goãmũ gamerire gohrotoque mua. Eropirã ðaripure gohrotonirã árĩrãca mua. Eropa gohrotorã Goãmũ muare ãgu iidorerire masirãca mua.

³ Goãmũ yure mojomoro ãagu muare buhedoregu beyemi yure. Eropigu árĩpehrerãre muare ðpa dorea yũhũ. "Õatariagu ãhraa yũhũ," arĩ pepibiricãque. Eropa pepicãque. Jesucristore mua umupeorã "Goãmũ yure ãgu itamuro mera iimasia yũhũ ãgu yare," arĩ pepique. ⁴ Õpa arĩ werenemogura yũhũ: Mari mojotori, guburi, cuiiri, árĩpehreri mari dũpũ árĩri baja ãhraa. Mari dũpũ árĩri sã yuju dũpũ árĩquerero gajiropa árĩri mohmeri opaa. Mari dũpũ mari Jesu yarã iro dopa ãhraa. Cristo dũpũ iro dopa árĩrã yuju curu ta ãhraa mari. ⁵ Mari eropa árĩcũ ãagu gajiropa árĩri dihta mohmerire apimi Goãmũ marire. Eropirã bajarã masa árĩquererã ta Cristore umupeorã árĩrã ãgu dũpũ iro dopa yuju curu ãhraa mari.

⁶ Eropigu marire mari nũcure gajiropa árĩri mohmerire mari iimasiburire ãgu turari mera apidigu árĩmi. ãgu eropiicũ maripũ ãgu apirare ðaro iiro gahmea. Eropirã Jesu yarã ðpa game itamuporo: Yujurãyerire Goãmũ ãgu yare weretaumasimorãre apidi árĩmi. Eropirã erã Cristore erã masiropẽ ãgu yare ðaro weretauporo gajirãre. ⁷ Gajirãre Goãmũ yarãre erã itamumasimorãre apidi árĩmi. Eropirã erãpũ masare ðaro mera itamuporo. Gajirãpũre Goãmũ yare buhemorãre apidi árĩmi. Eropirã erã masare ðaro buheporo. ⁸ Gajirãre masare mucubiricũ iimorãre apidi árĩmi. Eropirã irire ðaro iiporo. Gajirãre erã ya erã gamerire omorãre apidi árĩmi. Eropirã gajinore orã, ðaro mera mucubiriri mera oporo. Eropirã gajirãre doremasi-morãre apimi. Erã dorerã ðaro mera doreporo. Eropigu daja mojomorocũrãre itamumasimorãre apidi árĩmi. Erãre itamurã mucubiriri mera itamuporo, arĩ werea muare.

Jesu yarã árĩrã ðpa iirã ãhrima, arĩ gojañumi Pablo

⁹ Gajirãre mahi umupeorã, diaye ta mahi umupeoque. Eropirã ñero iirire doorã árĩque mua. Eropirã ðaripure gameniguicãque. ¹⁰ Mua pagũ porãre mua umupeoro dopa ta Jesu yarã mua mera majarã sãre umupeoque. Eropirã mua mera majarã erã gameripũre itamumũhtaque. Pũhrũ mũ yare iique.

¹¹ Goãmũ gamerire iirã ne tebircãque. Eropirã mari Opũ ãgu dorediro dopa ta ðaro mucubiriri mera iique.

¹² Goãmũ muare peamegue wabonirãre ãgu taunirã ãhraa mua. Irire masirã mucubirique mua. Eropirã ñero tarirã

Cristo yare duhuro mariro yujuro bojeque m̄ua. Eropirã Goãm̄ure eropa serēniguicãque.

¹³ Gajino Jesu yarãre duhyacũ ãarã oque erãre. Eropirã m̄ua ya wirigue masa erã ejacũ õaro s̄iporãc̄u erãre bocat̄irique.

¹⁴ M̄uare ñero iirãp̄ure erã õaro árĩburire serēque Goãm̄ure. Eropa õadorerã erãre ujapeobiricãque.

¹⁵ Gajirã mucubiricũ ãha erã mera m̄ua sã mucubirique. Gajirã orecũ ãha erã mera oreque.

¹⁶ M̄ua mera majarã mera õaro árĩque m̄ua. Eropirã “Gajirã tauro õaḡu ãhraa,” arĩ pepibiricãque. Bu árĩrã mera sãre õaro árĩque. Eropirã “Masitarinũgarã ãhraa ḡua,” arĩ pepibiricãque.

¹⁷ Gajirã m̄uare ñero iiquerecũ ta, erãre ñero ii gamebiricãque. Eropirã õarire iique. Eropirã õarã m̄ua árĩr̄ire árĩpehrerã masa ãha masirãcoma. ¹⁸ M̄ua masiropẽ turaro mera õarire iique árĩpehrerã mera m̄ua õaro árĩcãboro dopa. ¹⁹ M̄ua yu mahirã, yu acawererã, gajirã m̄uare erã ñero iiquerecũ ta erã iro dopa ñero ii gamebiricãque. “Erã ñero iira dipuwaja Goãm̄up̄u dipuwaja moaḡucumi,” arĩ guñarã ñero ii gamebiricãque erãre. Goãm̄u yare erã gojarapũgue eropa ta arĩ gojañuma: “Ȳup̄u masa erã ñero iira dipuwaja moaḡu ãhraa. Eropiḡu diaye ta dipuwaja moaḡura, arĩmi mari Op̄u,” arĩ gojara ãhraa. ²⁰ Eropirã õpa iique m̄ua: M̄uare ãhaturidiḡu ãgu oaboacũ ãarã ejoque ãgure. ãgu ñemesibucũ deco t̄iaque ãgure. Eropa iirã m̄uare ãhaturidiḡu ãgu ñero iirare ḡuhyas̄iricũ iirãca. ²¹ Eropirã gajirã m̄uare erã ñero iiquerecũ m̄up̄u erãre ñero ii gamebiricãque. Eropirã erãre õaro iique. Eropa iirã ñerip̄ure tarinũgarã iirãca m̄ua.

13

¹ Árĩpehrerã oparãre Goãm̄u dihta apimi. Eropiḡu m̄ua tauro oparã sãre Goãm̄u ta beye apidiḡu arĩmi. ãgu eropa apinirã erã árĩcũ ãarã árĩpehrerã m̄ua erãre yuhrique. ² Mari tauro oparã árĩrãre tarinũgarã Goãm̄u ãgu apinirãre tarinũgarã iirãca mari. Eropa tarinũganirãre Goãm̄up̄u dipuwaja moaḡucumi. ³ Óarire iirãre güicũ iimorã árĩbeamã oparã. Ñerire iirãp̄ure güicũ iirã ãhrima oparã. Eropirã õarire iique m̄ua oparãre m̄ua güibiriburire. Eropa iirã güisome m̄ua. Óarire m̄ua iicũ, op̄up̄u “Óarire iiab̄u,” arĩḡucumi m̄uare. ⁴ Oparã Goãm̄ure itamurã ta ãhrima m̄ua õaro árĩcãborore. Erã eropa árĩquererã ta erã dorerire tarinũgarãp̄ure dipuwaja moamorã ta ãhrima.

Árīpehrerã ñerire iinirãre dipuwaja moadoregu Goãmũ erãre apidi árīmi. ⁵ Eropirã mari oparãre yuhrique. Goãmũ ĩgu dipuwaja moaborore güiro mera yuhrique. Eropirã umupeori mera “Ôaro iiro gameca yure,” arĩ pepiri mera ôaro yuhrique erãre. ⁶ Mũa oparãre iri mohmerire apidi árīmi Goãmũ. Eropirã iri mohmerire erã iicũ ĩarã mũa oparã ya árīburire wajaseabasaa mũa erãre.

⁷ Árīpehrerãre mũa oparãre ôaro yuhrique. Eropirã oparã erã wajaseadorerare wajayeque mũa. Eropirã oparã gajire wajayedorecũ sãre wajayeque. Eropirã árīpehrerã oparãre umupeoque, arãa yuhũ mũare.

⁸ Gajirãre wajamobiricãque. Erãre mahi umupeoro gahmea. ĩgu pohro árĩgure mahigu Goãmũ dorerire iipehocãgu àhrimi. Eropirã mũa pohro árĩrã sãre mahiro gahmea. ⁹ Ôpa arãa Goãmũ doreri: “Gajigu marapo mera ñero iirã árībiricãque. Masare wejëbiricãque. Yajabiricãque. Gajirãre guya ñeri quere iibiricãque. Gajirã yare turaro ñaribejabiricãque,” arĩ werea ĩgu doreri. Gaji ĩgu doreri sã àhraa. Iri eropa árĩquerecũ ta yujuñe dorerĩnere mũare werebu iiaa. Ôpa àhraa: “Mũ basi mahiro dopa ta mũa pohro árĩrãre mahique,” arĩ werea ĩgu doreri. Mũa pohro árĩrãre mahirã Goãmũ dorerire árīpehrerire yuhrirã tiiaa. ¹⁰ Gajirãre mahirã erãre ñero iisome. Eropirã erãre mahi umupeorã Goãmũ dorerire yuhripehorã àhraa mũa.

¹¹ Eropa gajirãre mahique ôpa masirã: Jesu marire ĩgu dujariboro merogã duhyanijaa. ĩgure mari ne masinugarã ôpa arĩ pepiribu: “Yoara puhrugue marire taugu arigucumi Jesu,” arĩ pepiribu. Mari eropa arĩ pepiquerecũ ta merogã duhyaa Jesu marire ĩgu taugu ariboro. Eropirã carĩrã iro dopa árībiricãque. ĩgu yare ôaro guñanurugue. Jesu ariboro corere ôaro pee masi yuque. ¹² Dohpaguere ñerã erã iirinuri árĩro iiaa. Cristo ĩgu aririnu iri ñeri pehreroca. ĩgu ariboro merogã duhyaa. ĩgu ariboro merogã duhyacũ ĩarã ñerire iibiricãrã mari. Eropirã Goãmũ gameripure iirã mari. Eropa Goãmũ yare iirã ñeripure duhucãrãca mari. ¹³ Eropirã ôaripure iirã. Eropa iirã bosenuri árĩcũ mari ñaribejarire ñeri iibirabiricãrã. Eropirã merebiricãrã. Eropirã nome mera ñero iibiricãrã. Gajirã mera game ĩhaturirã árībiricãrã. Nome sã ñuma mera ñero iibiricãporo. ¹⁴ Eropirã mari Opũ Jesucristo ĩgu itamuri mera ĩgu gamero dopa ta ôaro árĩcãque. Eropirã mũa ñaribejarire ñerire ne iibiricãque.

Mua acawererãre Jesu yarãre "Ñero iirã iima," arĩ werewuabiricãque, arĩ gojañumi Pablo

1 Jesure umupeogure, Jesu gamerire ïgu òaro masinibiricũ dohpa, ïgure òaro bocatĩrique. Eropa bocatĩrirã Jesu gamerire ïgu masinibiricũ ïarã ïgu masibiririre dũyasobiricãque ïgure. ²⁻³ Gajirã "Goãmũ árĩpehrerire badoremi marire," arĩ pepima. Eropirã gajirãpũ òaro masinibirã "Waibũgu dihipũre bacũ Goãmũ gamebeamĩ," arĩ pepima. Eropirã oterĩ dihtare bahama. "Dihire bamasia," arĩrã, "Dihire bamasibea," arĩrã sã erã Jesucristore umupeorã árĩcũ ïha Goãmũ òarã ïhamĩ erãre. Eropirã "Árĩpehrerire Goãmũ badoremi," arĩrãpũ "Iri dihire bamasibea," arĩrãre ïhaturibiricãporo. Eropirã dihire babirãpũ dihire barãre "Ñero iirã iima," arĩ werewuabiricãporo. ⁴ Mũa Jesure umupeorã yujugũ dorero doca ãhraa mũa. Mũa eropa árĩcũ ïarã mũa basi game werewuamasibea. Jesucristo mũa Opũ ïgu gamerire mũa iibiricũ ïagu ïgu dihta irire weresãmasimi. Mũa òaro iicũ sãre irire ïgu weremasimi mũare. Eropigũ ïgu dorerire iirãre òarire bocatĩucũ iigucumi mari Opũ.

⁵ Yujurãyeri yujunũre "Irinũ dihta soorinũ gamenere Goãmũre umupeorinũ ãhraa," arĩ pepima. Gajirãpũ "Ûmũri nũcu gamenere Goãmũre umupeoro gahmea," arĩ pepima. Eropigũ òpa werea mũare yũhũ: Mũa nũcu mũa pepirire "¿Dinũ ãhriri mari gamenere umupeorinũ? ¿Dinũ árĩbeari?" arĩ pepi masique mũa. ⁶ Gajigũ yujunũ iimi ïgu Goãmũre umupeoburinũre. Eropigũ umũri nũcu gamenere umupeobiriqueregũ, Goãmũre òaro umupeomi ïgu sã. Eropigũ árĩpehrerire bagũ sã "Õhaa," arĩ serẽmi Goãmũre. Eropigũ ïgu sã Goãmũre umupeogu ta ãhrimi. Eropigũ gajinore babi sã ïgu sã umupeomi Goãmũre. Eropigũ ïgu sã Goãmũre "Õhaa," arĩ serẽmi.

⁷ Mari gameri dihtare iirã árĩmasibea mari. Cristo ãhrimi mari Opũ. Eropigũ mari ojocaricũ, mari sĩricũ mari Opũ ãhrimi ïgu. ⁸ Dohpague mari ojocaripõ Cristo yare iimorã dihta ãhraa mari. ïgu yarã ãhraa. Mari sĩrira pũhrũgue sãre ïgu yarã árĩniguicãrãca. Eropigũ mari ojocaricũ mari sĩricũ sãre Cristo mari Opũ ta ãhrimi. ⁹ Eropa ta ãhraa. Cristo sĩri, masa mũria, ojocarimi sĩrinirã sãre erã opũ árĩbu.

¹⁰ ¿Duhpirã mũa acaweregũre Jesu yagũre "Ñero iigu iimi," arĩ werewuadiari mũa? ¿Duhpimorã mũa acaweregũre curadiupidiari mũa? Mari árĩpehrerã Cristo core mari niguicũ ïgupũ mari iirare masipehogũ, mari iirare

ĩagũcumĩ. Ĩgũ eropa ĩabu ĩgũ árĩcũ mũa acaweregũre “Ñerire iigũ āhrimi,” arĩ werewũabiricãque. ¹¹ Goãmũ yare erã gojarapũgue õpa arĩ gojañuma:

Õpa arĩmi mari Opũ: “Yũhũ ojocarigũ āhraa. Iri diaye ta āhraa. Eropirã árĩpehrerã yure gamerã, gamebirã sã yũ core merejarãcoma. Eropirã árĩpehrerã ‘Mũhũ turagũ gũa Goãmũ ta āhraa,’ arĩ, yure umupe-orãcoma,” arĩmi mari Opũ, arĩ gojañuma.

¹² Eropigũ mari árĩpehreri mari iirare Goãmũ serẽpigũcumĩ. ¿Duhpirã eropa iiarĩ? arĩ serẽpigũcumĩ. Ĩgũ eropa serẽpicũ yũhrirãca mari.

Mũa acaweregũ ñero dujacũ iibiricãque mũa, arĩ gojañumi Pablo

¹³ Eropirã mari mera majarã sãre “Ñerã āhrima,” arĩ werewũabiricãrã. Eropirã mari acaweregũre Jesu yagũre ñero dujacũ iibiricãrã. Ĩgũ Goãmũ yare duhucũ iibiricãrã. ¹⁴ Yũhũ Jesucristo yagũ āhraa. Eropigũ õpa õaro masia yũhũ: “Árĩpehreri Goãmũ ĩgũ badorera āhraa,” arĩ masia. Gajigũpũ eropa arĩmasibeamĩ. Ĩgũpũ gajinore bagũ “Ñero iigũ iiaa,” arĩ pepimi. Eropiro ĩgũ irire arĩ pepiqueregũ bagũ diaye ta dipuwajacũgũ dujami. ¹⁵ Iri diaye ta āhraa. Mũa dihire mũa bacũ mũa acaweregũ “Iri Goãmũ badorebirira āhraa,” arĩgũpũ ĩhacũbocumi mũare. Eropigũ irire bagũ, “Ñero iigũ iica yũhũ,” arĩ wũaro guñaricũbocumi ĩgũ. Eropirã mũa bari mera ĩgũ ñero pepicũ ĩha irire dipaturi babiricãro gahmea mũare. Mũhũ mũraro ta bagũ mũ acaweregũre umupeosome. Mũa acaweregũ yañe árĩborañe sãre sĩridi arĩmi Jesucristo. Eropirã mũa irire badiaquererã mũa acaweregũre Goãmũ yare duhucũ iibiricãque. Eropirã irire babiricãque. ¹⁶ “Ire gũa eropa iicũ õapũricãca,” mũa arĩ pepiquerecũ gajirã mũare ĩha werewũabocoma. Erã eropa werewũacũ ĩarã dipaturi irire iinemobiricãque gũare werewũari arĩrã. ¹⁷ Goãmũpũ mari opũ āhrimi. Ĩgũ eropa árĩcũ, mari badiari mari ihridiari sã eropa árĩcãro iiaa. Bu gohra āhraa. Eropiro mari Opũ ĩgũ dorerire õarire mari iicũ iri õari gohra árĩro tiiaa. Eropiro gajirã mera mari õaro árĩcãcũ õari gohra árĩro iiaa. Eropiro Espĩritu Santo ĩgũ itamuri mera mari mucubiricũ õari gohra árĩro iiaa. ¹⁸ Eropa ta Cristo yare õarire iicũ ĩarã Goãmũ sã, masa sã “Õaro iiabũ mũhũ,” arĩrãcoma.

¹⁹ Eropa ta iirã mari tamera mari õaro árĩcãborore, mari basi mari game itamuburire. Eropa iiricũrã Jesure umupeonemorãca. ²⁰ Eropirã mũa bari mera Jesu yarãre

Goãmũ yare duhucũ iibiricãque. Gajigu Jesu yagu “Goãmũ badorebirira bari ãhraa,” ïgu arĩra barire mũa bacũ ïagu ïgũpũ Goãmũ yare duhubocumi. Eropirã irire babiricãque. Diaye ta árĩpehreri bari Goãmũ ïgu badorera bari ãhraa. Iri eropa árĩquerecũ gajigu “Iri barire Goãmũ badorebeami,” arĩ pepimi. Eropigu mũa iri barire bacũ ïagu ïgũpũ ïhacũ babocumi ïgu sã. Eropa bagũ “Ñero iigu iiaa,” arĩ pepi Goãmũ yare duhubocumi. Eropirã marire ïgu ïhacũ bacũ iirã mari sã ñero iirã tiiaa. Eropirã iri barire babiricãro gahmea marire. ²¹ Waimurã dihire mũa bacũ vinore mũa ihricũ ïagu, gajigu Jesu yagu ïabocumi. Eropa ïagu ïhacũ babocumi daja. “Irire bagũ ñero iigu iica yũhũ,” arĩ pepibocumi. Eropa arĩ pepigu tamera bagũ ñero iigu iimi. Eropirã ïgu ñero ïgu iibiriborore waimurã dihire, vino sãre mũapũ ba duhucũ ðacãroca. Jesure ïgu umupeo duhubiriborore iibiricãro gahmea marire. ²² Eropirã mũa baburire, ihriburire game dũyasobiricãque. “Árĩpehreri barire Goãmũ marire badoredigu árĩmi,” arĩ pepirã irire Goãmũ dihtare wereque. “Ñerire iibigu, ðaro iigu iica,” ïgu pepirigue arĩ masigu mucubirigu ãhrimi. ²³ Gajigũpũ iri barire bagũ, “Ñero iigu iiboca yũhũ,” arĩ pepigu árĩqueregu iri barire bagũ, dipuwajacũgũ ãhrimi ïgu. ïgu ta “Ire bagũ diaye ta ðarire iigu iiaa,” ïgu pepirigue arĩmasibeami. Eropa arĩmasibigu irire bagũ, ïgu bara waja dipuwajacũmi ïgu. “Ðarire iigu iiaa,” arĩmasibirinijagu irire iigu dipuwajacũgũ ãhrimi.

15

Mari pohro árĩrãre ðaro umupeorã, arĩ gojañumi Pablo

¹ Eropirã Jesucristore ðaro mari umupeorãpũ, ðaro umupeoturabirãre itamuro gahmea. Eropirã mari ya árĩburi dihtare iibiricãro gahmea. ² Mari pohro árĩrãre erã gamero dopa ta iiro gahmea erã ðaro árĩcãborore. Goãmũre erã ðaro guñaturanemoburire iiro gahmea. ³ Jesucristo sã ïgu ya dihtare iibiridi árĩmi. Eropa ta arãa Goãmũ yare erã gojarapũ. ðpa arĩ gojañuma: “Cristo ðpa arĩmi Goãmũre: ‘Mũpũre ñero wereniguibonirã yũpũre ñero wereniguima,’ arĩmi Cristo Goãmũre,” arĩ gojañuma iribojeguerẽ. ⁴ Iribojegue erã Goãmũ yare gojañuma mari ðaro buheborore. Eropirã iri erã gojarapũre buherã sĩporã turarã wahaa mari. Eropa buherã ñero tarirã yujuro bojerãca. ⁵ Goãmũ mũare turacũ iigu sĩporã turacũ iigu mũare game ðaro árĩcãcũ iiporo Jesucristo ïgu gamediro dopa ta. ⁶ Eropa ta iiporo ïgu mũa árĩpehrerã yujuro mera

Goãmure umupeoborore, mari Opu Jesu Pagure “Õagu àhrimi. Turagu àhrimi,” mua arĩborore.

Judio masa árĩbirãre òari buherire werenugama, arĩ gojañumi Pablo

⁷ Cristo ìgu mũare iidiro dopa ta mua mera majarãre òaro game bocatĩrique. Mua eropiicũ ìarã “Diaye ta Goãmure òagu masa yujuro mera òaro árĩcãcũ itamugu àhrimi,” arĩ ìarãcoma masa. ⁸ Mũare ire arĩgu iiaa: Ìgu Pagu ìgu arĩ werediro dopa diaye ta iigu ìgu árĩcũ ìhmugu, judio masare itamubu aridigu árĩmi Cristo i yebaguere. Eropigu Goãmũ Abrahã sãre arĩ werepidiro dopa ta iigu aridigu árĩmi. ⁹ Masare Cristo ìgu itamucũ ìgu Pagu Goãmũ mojomoro ìagu iidigu árĩmi erãre. Ìgu eropa mojomoro ìacũ ìarã judio masa árĩbirã sã Goãmure “Õagu àhrimi. Turagu àhrimi,” arĩ umupeoma dohpaguere. Erã sãre ìgu yarã árĩcũ iigu aridigu árĩmi Cristo. Goãmũ yare erã gojarapũgue eropa ta arĩ gojañuma:

Cristo òpa arĩmi ìgu Pagure: Judio masa árĩbirã watope mũre umupeogura. “Goãmũ òagu àhrimi,” arĩgura. Eropigu erã watope bayagu mũ ya árĩburire bayagura, arĩmi Cristo ìgu Pagure, arĩ gojañuma iribojeguere.

¹⁰ Eropirã òpa arĩ gojañuma daja:

Goãmũ ìgu beyenirã mera judio masa mera game mucubirique mua sã judio masa árĩbirã, arĩ gojañuma iribojeguere.

¹¹ Eropirã òpa arĩ gojañuma daja:

Judio masa árĩbirã árĩpehrerã Goãmure umupeoporo. Eropirã árĩpehrero majarã ìgure “Õagu àhrimi. Turagu àhrimi,” arĩ umupeoporo, arĩ gojañuma.

¹² Eropigu Isaia mũrũ sã òpa arĩ gojañumi:

Davi pagu Isai mũrũ pãrami árĩturiagu arigucumi. Eropa arigu judio masa árĩbirã tauro opu árĩgucumi ìgu. Eropirã erãpu ìgure umupeorã erãre peamegue wabonirãre ìgu tauborore masirãcoma, arĩ gojajuñumi iribojeguere.

¹³ Goãmũ marire taugu árĩbu òaro mũare mucubiricũ iiporo. Eropigu Jesure mũa guñaturacũ mũare òaro árĩcãcũ iiporo ìgu. Mũare ìgu eropiicũ “Ìgu pohro mari warãca,” arĩ mucubiri masinemorãca mua Espĩritu Santo ìgu turari mera, arãa yũhũ mũare.

¹⁴ Yũ acawererã, òaro mera mũare guña. Mua òarã àhraa. Eropirã Jesu yare òaro masia. Eropa masirã mua mera majarãre game òaro were, buhemasia. ¹⁵ Mua eropa

masirã mũa árĩquerecũ ta ipũguere mũare güiro mariro irire õaro werepehobũ yũhũ erãgue cãdijiri arĩgu. Goãmũ yũre mahigu mũare buhedoregu apimi yũre. Eropigu ĩgu apidiro dopa ta mũare guñacũ iigu iiaa. ¹⁶ Yũre ĩgu apicũ Jesucristo yare õari buherire judio masa árĩbirãre buhea yũhũ. Eropa buhecũ peerã judio masa árĩbirã Jesure umupeorãcoma. Erã eropa umupeocũ ĩagu Goãmũ erãre “Õarã ãhrima,” arĩ ĩagucumi. Eropigu erãre gamegucumi. Eropigu Espĩritu Santopũ Goãmũ yarã wacũ iigucumi erãre.

¹⁷ Eropigu Jesucristore umupeogũ árĩgu Goãmũ yũre buhedore apirare mucubiriri mera werea masare. ¹⁸⁻¹⁹ Judio masa árĩbirãre Cristo itamuri mera erãre yũ buhecũ peerã, Cristore umupeoma. Eropirã masa árĩbirãre buhea yũhũ. Eropa buhecũ peerã judio masa árĩbirã Jesure umupeorãco yũ õaro iiricũrire ĩarã, Goãmũ turari mera yũ deyoro moarare ĩarã, Espĩritu Santo ĩgu turari mera erã Cristore umupeoma. I árĩpehrerire mũare diaye werediaca. Gajirã erã iirare werebeaa. Jerusalẽgue ne yũ buhenãgara pũhrũ árĩpehreri macarigue buhe curibũ. Yoarogue, Iliria yebague sãre Jesucristo ya buherire õari buherire buhegu ejabũ. ²⁰ Eropigu Cristo yare masibirã dihtare õari buherire turaro buhediabũ. Yũ mera majarã erã buhenirãguere buhediabiribũ. ²¹ Eropa arĩ gojañuma Goãmũ yare erã gojarapũguere. Õpa arĩ gojañuma:

Iribojegue ĩgũre ne masibirinirã ĩgũre masirãcoma. Eropirã ĩgũre ne peebirinirã ĩgu yare õaro peerãcoma, arĩ gojañuma Goãmũ yare erã gojarapũgue.

Pablo Romague ĩgu waborore wereñumi

²² Eropigu árĩpehrero majarãre buhegu árĩgu baja-suburi mũa pohro wadiaqueregu ta wamasibirimurabũ. ²³ Dohpaguere i yebaguere a árĩbirã Jesure umupeorãcoyũ mohmeri pehrea wahaa. Eropa pehrecũ ĩagu baja bojori mũa pohro wadianiguigu árĩgu, mũa pohrogu wagũra. ²⁴ Eropigu Espaãague wagũ mũare ero ĩhatari wahgãgũra. Eropigu mũa mera mucubirigũra. Eropigu mũa mera arĩdigũ wagũ mũa yũre itamuri mera wagũra daja. ²⁵ Dohpaguere Jerusalẽgue wanibu iiaa. Ero majarãre yũ acawererãre Jesu yarãre niyeru sonigu wagũ iiaa. ²⁶ Macedonia majarã, Acaya majarã, õaro mera Jesu yarã Jerusalẽgue árĩrãre mojomorocũrãre niyerure obooama erãre itamurã. Eropigu erãre oboorare sogũ wagũ iiaa. ²⁷ Iri niyerure orã õaro mera ohãma. Erã eropiicũ õapũrica yũ pepicũ. Erãre judio masa árĩbirãre,

gua judio masapu Goãmũ yare buhemũtabũ. Eropirã erãre ĩgu tauboro sãre buhemũtabũ gua judio masa erãre. Gua eropa buhecũ ĩagu, Macedonia majarã, Acaya majarã mera judio masapũre Jerusalén majarãre itamucũ õapũrica yũre. Erãre erã buhera waja ãhraa iri niyeru yũ pepicũ. ²⁸ Eropigũ Jerusalén majarãre iri niyerure yũ ora pũhũ Españague wagũca. Eroque wagũ mũare ĩhatari wahgãgũra. ²⁹ Eropigũ mũa pohroque yũ wacũ Cristo yare yũ mũare buhecũ Cristo marire õaro sĩporãcũcũ iigũcumi.

³⁰ Mũa, yũ acawererã, mari Opũre Jesucristore umupeoa. Eropirã Espĩritu Santo ĩgu turari mera gajirãre umupeoca mũa. Mũa eropiirã árĩrã yũ sãre turaro serẽbasaque Goãmũre. ³¹ Õpa arĩ serẽbasaque: Judea yeba majarã Jesure umupeobirã yũre erã ñero iidiacũ Goãmũ yũre itamuboro dopa serẽque. Eropirã Jerusalén majarãre iri niyerure yũ ocũ erã irire mucubiriri mera erã ñeaboro dopa serẽque. ³² Mũa eropa serẽcũ Goãmũ gamecũ mucubiriri mera mũa pohroque wagũca. Eropigũ mũa mera árĩgũ mucubiriri mera soogũra. ³³ Goãmũ marire õaro árĩcãgũ ĩgũ mũa mera árĩporo. Eropa ta iiporo.

16

Pablo õadoreñumi

¹ Mari acawerego Febe waĩcũgo mũa pohroque wabo iimo. Igo Cencrea waĩcũri macague Jesu yarãre itamugo ãhrimo. ² Eropigo bajarãre yũ sãre itamugo ãhrimo igo. Eropirã mũa igo mera yujuro mera mari Opũre umupeorã ãhraa. Eropirã igore õaro mera bocatĩrique. Eropa ta iiro gahmea marire Jesu yarãre. Eropirã igore igo gamerire gajino dũhyacũ igore oque mũa.

³ Aquila, ĩgu marapo sã Priscila sã õaporo. Jesucristo yare yũ buhecũ erã sã yũ mera mohmeama. ⁴ Erãre mero wejẽbocurima gajirã erã yũre wejẽdiacũ itamuri waja. Eropigũ erã mera mucubiria yũhũ. Eropirã judio masa árĩbirã Jesu yarã árĩpehrerã erã sã erã mera mucubirima. ⁵ Eropirã Aquila ya wihi gamenererã sã Jesu yarã õaporo. Yũ mahigu Epenéta sã õaporo. ĩgu Asia majagu ero árĩgu Cristore umupeomũhtadigũ árĩmi. ⁶ María sã õaporo. Igo mũa mera turaro mohmeapo. ⁷ Yũ acawererã Andrónico, Junia sã õaporo. Peresu yũ árĩcũ erã ta yũre wapicũnirã ãhrama. Eropirã yũ core Cristore umupeonũgañorã erãpũ. Gajirã Jesu ĩgu apinirãpũ erãre “Diaye ta õarã ãhrima,” arĩ wereniguima.

⁸ Amplia sã yu mahigu Jesu yagu ahrimi. Igu õaporo. ⁹ Eropigu Urbano sã õaporo. Igu sã mari mera Cristo ya arĩburire mohmeami. Eropigu yu mahigu mera majagu Estaqui õaporo. ¹⁰ Eropigu Apele sã õaporo. Igu diaye ta õaro Jesucristore umupeomi. Igu iiricũrire ãarã irire masia mari. Eropirã Aristóbulo ya wihi majarã arĩpehrerã igu marapo igu porã sã õaporo. ¹¹ Yu acaweregu Herodiõn õaporo. Eropirã Narciso ya wihi majarã Jesu yarã õapehrecãporo. ¹² Eropirã Trifena, Trifosa sã õaporo. Erã nome mari Opu Jesu mohmerire iama. Mari mahigo Pãrsida sã õaporo. Igo mari Opu Jesucristo yare turaro mohmemo. ¹³ Eropigu Rufo mari Opu Jesure õaro umupeogu, igu yare õaro iigu õaporo. Igu pago sã õaporo. Igo yu pago iro dopa ta arĩgo ahrimo. ¹⁴ Asĩncrito, Flegonte, Herma, Patroba, Herme, gajirã Jesu yarã erã mera majarã sã õaporo. ¹⁵ Eropirã Filólogo, Julia, Nereo, igu pagu mago sã Olimpa, gajirã erã mera majarã sã Jesu yarã õaporo.

¹⁶ Eropirã mua mera majarãre bocatĩrirã mucubiriri mera mojoto ñeaque. Arĩpehrerã Jesu yarã arĩpehrero majarã muaere õadorema.

¹⁷ Yu acawererã, mua mera yujurãyeri muaere game ãhaturicũ iirã game dũca waricũ iirã arĩcoma. Eropirã muaere Jesu ya buherire goroweoma. Eropirã eropa iirãre õaro iique goroweori arĩã. Eropa arĩãre wapicubiricãque. ¹⁸ Eropa iirã mari Opu Jesucristo yare iibeama. Ñerire erã uaribejari dihtare iima. Eropirã õaro wereniguirã iro dopa guyama masibirãre erã. Erã eropa guyacũ erãre õaro peenũrũma. Eropirã erãre wapicubiricãque mua. ¹⁹ Muapu Jesure õaro yũhrirã ahraa. Irire arĩpehrerã masima. Eropa õaro mua yũhrirã mua arĩcũ pee mucubiria yũhũ. Eropigu õaro mua iiborore masicũ gahmea yũhũ. Eropigu ne ñeri sãre mua iibiricũ gahmea yũhũ. ²⁰ Eropigu Goãmũ marire õaro arĩcãcũ iigu merogã pũhrũ watĩre tarinũgagu iibasagũcumi muaere. Mari Opu Jesucristo õaro muaere itamuniguicãporo.

²¹ Timoteo yu mera majagu muaere õadoremi. Yu acawererã Lucio, Jasõ, Sosĩpate muaere õadorema.

²² Yũhũ Tercio ipũre gojabasagu ahraa Pablöre. Yũhũ Jesu yagu arĩgu mua Jesu yarãre õadorea.

²³ Gayo ya wihi arĩcãgu iiaa yũhũ Pablo. Igu ya wihigue Jesu yarã gamenerema Goãmũre umupeomorã. Igu sã muaere õadoremi. Eropigu Erasto i maca majarã oparãre niyeru dibubasagu muaere õadoremi. Mari acaweregu Jesu yagu Cuarto sã muaere õadoremi.

²⁴ Mari Opu Jesucristopu mware arıpehreräre ðaro iiporo. Eropu ta iiporo.

Pablo Goãmure umupeori mera gojatuñumi

²⁵⁻²⁷ Mari Opu Jesucristo ya buheri mera ðari buheri mera Goãm mware igure guñaturanemocũ iimasimi. Iribojegue iri ðari buheri ne masa masibiriri buheri arıriyoro. Dohpaguere Goãm yare weremũhtanirã erã gojara mera iri buherire masidoregu iimi. Yu sã irire buhea. Iri buherire arıpehrero majarã dohpaguere masima. Goãm eropa arıniquicãgu dorero dopa ta erã masima. Iri buherire igu ta weredorepu masa igure erã yuhriborore, igure erã umupeoboro sare. Eropirã igure "Diaye ta ðagu, turagu ahrimi," arı umupeorã. Igu yujugu ta Goãm ðaro masipehogu ahrimi. Jesucristo igu itamuri mera Goãmure eropa umupeoniguicãrã mari. Eropu ta iirã. Iripeta ahraa.

1 Corintios

Pablo Goãmũ yarãre Corinto majarãre gojabeoñumi

1-2 Yũhũ Pablo, Jesucristo yare ãgũ buhedore apidigu ãhraa. Goãmũ ãgũ gamero dopa ta Jesu ãgũ apibure yũre beyepũ ãgũ. Sostene Jesu yagũ mari acaweregũ mera mũare Goãmũ yarãre Corinto majarãre gojabeoa gũa. Jesucristo mera majarã mũa árĩcũ Goãmũ yarã árĩmorãre beye aĩdi árĩmi Jesucristo mũare. Eropirã árĩpehrero majarã gajirã mari Opũ Jesucristore serẽrã árĩrã, erã sã Goãmũ yarã ta ãhrima. Jesucristopũ erã opũ mari Opũ sã ãhrimi. ³ Eropirã Goãmũ mari Pagũ, mari Opũ Jesucristo mera mũare õadoreã. ãgũ itamuri mera õaro árĩque mũa.

Jesucristopũ mũare õaro iibasadigu árĩmi Goãmũre, arĩ gojañumi Pablo

⁴ Jesucristo mũare õaro iibasadigu árĩmi Goãmũre. ãgũ eropa iicũ ãagũ, Goãmũre yũ mahigure, Õhaa," arãa yũhũ mũuri nũcũ. ⁵ Cristo yarã mũa árĩcũ ãagũ Goãmũpũ mũare õaro árĩcũ iimi. Eropigu ãgũpũ ãgũ yare mũare gajirãre weremorãre iimi ãgũ. Eropigu ãgũ, ãgũ yare õaro masicũ iimi mũare. ⁶ "Cristo mũare õaro iigũcumĩ," mũare gũa arĩ werediro ta wahabũ mũare Cristo yarã mũa wacũ. ⁷ Eropigu árĩpehreri ãgũ ya árĩburire mũa iimasicũ iimi Goãmũ mũare. Eropiro ne dũhyabeaa mũare. Mari Opũ Jesucristo i yebague ãgũ dujariborore mũa corerisubũ Goãmũpũ mũare eropa itamuniguicãgũcumĩ. ⁸ Eropigu Jesucristopũ mũa ãgũre umupeoniguicũ iigũ ãhrimi. ãgũ eropa árĩgũ árĩcũ mũapũ i mũũ pehrecũ mũa ñeri iira dipuwaja moorã árĩcũ iigũcumĩ. ⁹ Goãmũ "Õpa iigũra," ãgũ arĩdiro dopa ta ãgũ iimi. Eropigu ãgũ, ãgũ magũ mari Opũ Jesucristo mera yujuro mera árĩmorãre marire beyedi árĩmi.

Jesu yarã Corinto majarã erã game dũca warirare Pablo arĩ gojañumi

¹⁰ Yũ acawererã, mari Opũ Jesucristo ãgũ dorero mera mũare burigã serẽbu iiaa: Mũa basi game dũca waribiricãro gahmea. Eropirã mũa basi game dũca waribiricãro gahmea. Yuju curu ta árĩque mũa. Eropirã yujuropa ta õaro árĩniguicãque. Eropa iirã mũa iiburire pepirã, yujuropa iique mũa. ¹¹ Yũ acawererã, mũa basi game dũyasorã iiaoro mũa. Eropa arĩ wereama Cloé ya wihi majarã yũre. ¹² Gajirã mũa mera majarã õpa arãñorã: "Pablo ya

curu majarã ähraa gua," arĩ wereniguayoro gajirã mua. Eropirã gajirã "Apolo ya curu majarã ähraa gua," arãyoro gajirã. Eropirã gajirãpũ daja, "Pedro ya curu majarã ähraa gua," arãyoro mua. Eropirã gajirãpũ daja, "Gua tamera Cristo ya curu majarã ähraa gua," arãyoro mua. ¹³ Mua eropa arĩquerecũ ta yũhũ õpa werea muare: Cristo ya curu majarã yuju curu ta ähraa mari. Eropirã mari basi yujurãyeri dũca warimasibea mari. Yuju curu ta árĩrã iiaa mari. Yũhũ Cristo árĩbeaa. Īgũ iidiro dopa mua ya dipuwajare crusague sĩridigũ árĩbeaa. Eropigũ muare gajigũ waĩyegũ yaha waĩ mera waĩyebemi. Cristo ya waĩ mera waĩyecumi muare. ¹⁴ Muare mua mera majarã sãre waĩyebiribũ yũpũ. Crispore, Gayo sãre erã dihtare waĩyebũ yũhũ. "Pablo waĩyenirã dihta ähraa," arĩmasibea mua. Eropigũ gajirãre waĩyebiridigũ yũ árĩgũ "Õhaa," arĩ pepia Goãmure. ¹⁵ Bajarã masare waĩyedigũ yũ árĩcũ "Pablo ya waĩ mera ĩgũ waĩyemi guare," arĩboaya mua. Eropa arĩrã Jesucristore umupeobirã mua yũpũre umupeoboaya. Eropigũ irire gamebirabũ. ¹⁶ Estéfana ya wihi majarã sãre waĩyebũ yũhũ. Erã nũcũ ta waĩyebũ yũhũ. Gajirã yũ waĩyenirãre guñabirica. ¹⁷ Cristo yũre obeogũ, gajirãre waĩyebure apibirimi ĩgũ yũre. Ōari buherire werebupũre apimi ĩgũ yũre. Iri õari buheri "Cristo ĩgũ crusague sĩriñumi," arĩ buheri masare gohrotori buheri ähraa Goãmũ yare erã iiburire. Eropigũ yũhũ irire buhegũ gajigũ õaro masitarigũ iro dopa buhebeaa. Masa erã masiri mera buhebeaa. Yũhũ eropa yũ ejatuharo mera buhecũ mua õari buheripũre umupeobiriboaya.

Goãmũ ĩgũ turarire ĩgũ masiri sãre opagũ ährimi Cristo, arĩ gojañumi Pablo

¹⁸ Peamegue dederemorãpũ iri buheri "Cristo crusague ĩgũ sĩridi árĩmi," arĩ buherire peerã õpa arĩma: "Pee masibirã ya buheri ähraa," arĩmaacãma. Maripũ Cristo ĩgũ taumorã árĩrã õpa arãa: "'Crusague ĩgũ marire sĩridi árĩmi,' arĩ buheri tura ähraa. Iri buheri mera Goãmũ marire gohrotomi," arãa mari. ¹⁹ Eropa ta arĩñumi Goãmũpũ ĩgũ yare erã gojarapũgue:

Eropirã i yeba majarã masare "Õaro masirã ähraa," erã basi arĩrãre erã masiripũ duhpiburi árĩbeaa, arĩ ĩhmuğũca yũhũ, arĩñumi Goãmũ.

²⁰ Eropirã i yeba majarã õaro masirã duhpimorã árĩbeama. Erã pepiro dopa buherã sã duhpimorã árĩbeama. Dohpaguere wereniguimehrerã sã duhpimorã árĩbeama. I yeba majarã "Õaro masirã ährima," arĩnirã

erã árĩquerecũ ta “Pee masibirã erã àhrima,” arĩ ìhmumi Goãmũ erãre. ²¹ Goãmũ tamera òaro masigu àhrimi. Ìgũ eropa árĩcũ i yeba majarã erã ya masiri mera Goãmũ yare ne masisũya mariroca erãre. Goãmũ “Erã masiri mera yũre masisome,” ìgũ arĩdiro dopa ta eropa wahabũ erãre. Òpa arĩñumi: “Yaha òari buherire werēcũ masa yũre masirãcoma,” arĩñumi. Eropigu “Iri buheri pee masibirã ya buheri àhraa,” gajirã arĩquerecũ, gajirãpũre erã òari buherire peerãpũre Goãmũ taumi. Cristore erã umupeocũ ìagũ “Erãre peamegue wabonirãre taugũra,” arĩmũhtapũ.

²² Judio masa deyoro moarire ii ìhmudorema erã iri buherire umupeoboro core. Eropirã griego masa judio masa árĩbirã árĩrãpũ erã pepiro dopa buhecũ gahmema.

²³ Maripũ “Jesucristo mari ñeri iira dipuwaja crusague sĩridi árĩmi,” arĩ buherire buhea mari. Iri buherire peerã judio masapũ gamebeama. Eropirã iri buherire judio masa árĩbirãpũ “Pee masibirã ya buheri àhraa,” arĩma. ²⁴ Goãmũ ìgũ yarã árĩmorã ìgũ beye aĩnirãpũ iri buherire pee òpa arĩ masima: “Goãmũ masipehogũ turagũ àhrimi. Cristo marire sĩribasara mera marire peamegue wabonirãre Goãmũ taumi,” arĩ masima. Erã judio masa, judio masa árĩbirã sã eropa arĩ masima Jesu yarã árĩrã.

²⁵ Goãmũ òaro masipehogũ àhrimi. “Goãmũ pee masibigu àhrimi,” masa arĩ pepiquerecũ ta i yeba majarã tauro òaro masipehogũ àhrimi. Eropigu “Turabigu àhrimi,” masa arĩ pepiquerecũ ta erã wecague turatarinũgagũ àhrimi ìgũ. ²⁶ Yũ acawererã, Goãmũ mũare ìgũ beyeboro core mũa arĩmũhtarare guñaque. I yeba majarã “Òaro masirã àhrima,” erã arĩnirã watopegue Goãmũ mũare bajamerãgã dihtare beye aĩdi árĩmi. Eropirã masa tĩrã oparã sã arĩnirã bajamerãgã àhraa mũa Jesu yarã. ²⁷ I yeba majarã “Pee masibirã àhrima,” erã arĩnirã watopepũre mũare Goãmũ beye aĩdi árĩmi. Eropa beyedi árĩmi “Òaro masirã àhrima,” erã arĩnirã erã masibirã dujaboro dopa. Eropigu i yeba majarã “Turabirã, doyarã àhrima,” erã arĩnirãre Goãmũ aĩdigũ árĩmi doyarãpũ erã doyarã dujaro dopa.

²⁸ Masa erã ìadiabirãre “Duhpimorã árĩbeama,” arĩma. Erã eropa arĩnirãre bu árĩrãre Goãmũ ìgũ yarã árĩmorãre aĩdigũ árĩmi mũare. Eropa aĩgu i yeba majarã oparãre, gũhyadiarãre, “Gũapũ bu árĩrã àhraa,” erã arĩcũ iĩgu iimi Goãmũ erãre. ²⁹ Ìgũ eropa iicũ i yeba majarã ne yujugũ ìgũ gamero mera “Yũ tamera turagũ, òaro masigu àhraa,” arĩ tarinũgamasibeami Goãmũ ìgũ ìacũ. ³⁰ Goãmũpũ marire Jesucristo yarã árĩcũ iimi. Ìgũ yarã árĩrã mũmũri nũcu Goãmũ mera árĩrãca mari. Jesucristopũ Goãmũre òaro

masicũ iimi marire. Eropigũ mari ñerire cóãgũ marire òarire gohrotocũ iigũ àhrimi. Eropigũ marire peamegue wabonirãre taubu àhrimi. ³¹ Ìgũ eropa iicũ Goãmũ yare erã gojarapũ ìgũ arĩ gojadiro dopa ta eropa wahaa. Òpa arĩ gojañuma: “Yũ gamero masipehogũ àhraa,” arĩgũ irire arĩbircãporo. Òpa arĩporo: ‘Mari Opũpũ masipehogũ ta àhrimi,’ arĩporo ìgũ,” arĩ gojañuma Goãmũ yare erã gojarapũgue.

2

Cristo crusague ìgũ sĩrira buheri àhraa i, arĩ gojañumi Pablo

¹⁻² Yũ acawererã, mũa pohro wabu òpa arĩ pepibũ yũpũ: “Erã mera árìgũ Jesucristo crusague sĩridigũ waĩpeo ìgũre erã masiburi dihtare buhegũra erãre,” arĩ pepibũ mũare. Eropigũ mũa pohro árìgũ Goãmũ yare mũare buhebũ. Goãmũ yare mũare buhegũ, weretarinũgagũ iro dopa “Masitarigũ àhraa,” arĩ buhegũ iibiribũ. ³ Eropigũ mũa mera árìgũ bu árìgũ iro dopa árìbũ yũhũ. Eropigũ yũre umupeorĩ arĩgũ doyañariro dopa buhebũ yũhũ. ⁴ Eropigũ Goãmũ yare buhegũ “Masipehoa yũhũ,” arĩgũ weretarinũgagũ iro dopa buhebiribũ. Ìgũ yare buhecũ Espĩritu Santo ìgũ turari mera mũare iri buherire umupeocũ iimi. ⁵ Eropa ta arĩ buhebũ yũhũ mũare masa erã gamero erã ya masiripũre mũa gamebiriboro dopa. Goãmũpũre mũa umupeoburire eropa arĩ buhebũ yũhũ “Goãmũ turagũ àhrimi,” mũa arĩboro dopa.

Espĩritu Santopũ Goãmũ ìgũ árìricũrre buhemi marire, arĩ gojañumi Pablo

⁶ Eropirã Goãmũ ya buherire Jesure òaro umupeorãguere werea gũa. Iri buheri masiri ta àhraa. I mũmũ maja masa erã gamero erã masiri iro dopa árìbeaa i mũare gũa buheri. I yebare dorerã ya masiri sã árìbeaa. Erã masiri i mũmũ mera pehrero iiaa. ⁷ Goãmũ ya masiripũre werea. Iribojegue i buherire ne masisũya mariyoro. Negohraguere mari òaro árìborore Goãmũ arĩ pepituhajamũripũ. Marire peamegue wabonirãre ìgũ tauborore, ìgũ mera mari árìboro sãre “Masare eropa ta iigũra,” arĩ pepiyupũ. ⁸ Ìgũ masare òaro arĩ pepirare i mũmũre dorerã masibiriñuma. Iri òaro masirã, mari Opũre Goãmũ magũ gohrare crusague pabia wejẽbiriboañuma erã. ⁹ Erã eropa masibirirare Goãmũ yare erã gojarapũgue òpa àhraa:

Árìpehrerã Goãmũre mahirã ya árìburire Goãmũ òaro amubasayutuhapũ. Iri ìgũ amubasarapũre masare

masima masiya mara. Ne gajino iro dopa ãaya mara irire, arãa Goãmũ yare erã gojarapũgue.

¹⁰ Iri eropa arĩquerecũ ta Espĩritu Santopũ Goãmũ yare, masisũya marirare masicũ iimi marire. Árĩpehreri Goãmũ yare ĩgũ pepira sãre Espĩritu Santo masipehomi. Eropa masigũ ĩgũ marire irire masicũ iimi.

¹¹ Ne gajirãpũ masũ ĩgũ pepirire masibeama. Masupũ ĩgũ seyaro ĩgũ guñarigue ĩgũ pepirire masimi. Eropa ta masa Goãmũ ĩgũ pepirire ne masibeama. Espĩritu Santo dihta ĩgũ pepirire masimi. ¹² Eropirã mari Jesu yarã árĩrã erã i umũ majarã Jesu yarã árĩbirã erã pepiro dopa pepibea. Goãmũ ĩgũ Espĩriture ohomi maripũre ĩgũ pepiro dopa mari pepiburire. ĩgũ marire õaro ĩgũ orare masicũ iimi Espĩritu Santopũ. ¹³ Eropirã Goãmũ yare mũare buherã, masa ya masiri mera gũa gamero buhebeaa gũa. Espĩritu Santo ĩgũ gamero dopa ĩgũ gũare wereniguidoreripũre mũare buhea. Eropa buherã Espĩritu Santo gamero dopa Goãmũ yare õaro buhea gũa ĩgũ yarãre.

¹⁴ Espĩritu Santore opabirãpũ irire Espĩritu Santo yare erãre buhecũ, “Pee masibirã wereniguiri ãhraa,” arĩma erã. Eropirã gamebeama. Espĩritu Santo ĩgũ itamuro mariro ĩgũ yare masima masiya mara masare. Eropirã erã ĩgũ yare ne masibeama. ¹⁵ Espĩritu Santore oparãpũ Goãmũ yare õaro masima. Gajirãpũ erãre “Pee masibirã ãhrima,” arĩmasibeama Espĩritu Santore oparãre. ¹⁶ Õpa arãa Goãmũ yare erã gojarapũgue: “Ne yujugũ ĩgũ gamero mera mari Opũ ĩgũ guñarire masigũ ne marimi. Eropirã ĩgũre masa ne buhemasibeama,” arãa ĩgũ yare erã gojarapũgue. Maripũ Cristo yarã árĩrã, Cristo iro dopa masia.

3

Jesu yarã yujuro mera Goãmũ mohme corerã ãhrima, arĩ gojañumi Pablo

¹⁻² Үũ acawererã, mũare buhegũ Espĩritu Santore õaro yũhrirãre yũ buhediro dopa buhemasibiribũ mũapũre. Mũa pepiri Espĩritu Santo opabirã pepiro dopa árĩbũ. Cristo yarã mũa arĩquererã ta ĩgũre õaro yũhrirã árĩbirã majirãgã erã pee masibiro dopa ta Goãmũ yare õaro pee masibiribũ mũapũ dohpa. Eropa mũa pee masibiricũ ĩagũ Goãmũ yare õarire buhenemomasibiribũ mũare. Eropigũ majirãgãre apĩco dihtare mari oro dopa ta diasabiriri buheri dihtare buhebũ daja mũare. Dohpague sãre mũraro ta masinibea dohpa mũa. ³ Õpa iirã iiaa mũa Espĩritu Santore yũhribirã. Mũapũ mũa mera majarãre ĩadiabirã,

erã gajinore opacũ ãhaturirã, mũa basi yujurãyeri cururi Yũ acawererã, mũare buhegu Educa warirã iiaa. Eropirã Espiritu Santore opabirã Cristore gamebirã iro dopa iirã iiaa mũa. Eropirã Goãmũ yare õaro peebeaa mũa. ⁴ Ōpa ãhrayoro mũa. “Pablo ya curu majarã ãhraa gũa,” arãyoro mũa yujurãyeri. Eropirã gajirã mũa mera majarãpũ “Apolo ya curu majarã ãhraa gũa tamera,” arãyoro mũa. Eropa arĩ duyasorã Espiritu Santore opabirã iro dopa arĩ wereniguia mũa.

⁵ ¿Yũhũ Pablo, Apolo mera duhpimorã ãhriri gũa mũa pepicũ? Áríbeaa. Goãmũre mohme corerã ãhraa gũa. Gũare ĩgu iidorero dopa iimorã ãhraa. Eropirã gũa mũare buhecũ peerã Jesucristore umupeonũgabũ mũa. ⁶ Ōari buherire buherã pohegue mohme corerã iro dopa ãhrima mari werenigui queori mera buhecũ. Pohegue ĩgu otemũhtadiro dopa ta yũhũ mũare Goãmũ yare buhemũhtabũ. Eropigu gajigu ĩgu pohere ãhadiburo dopa ta Apolopũ yũ pũhrũ mũare buhenũrusiami. Gũa eropa buhequerecũ ta pohe maja yucũre iri buagacũ ĩgu iidiro dopa ta Goãmũpũ mũare ĩgu yare masinemocũ iimi. ⁷ Eropigu yũ buhemũhtadi áríqueregu ta bu árígu ãhraa. Eropigu Apolo yũ pũhrũ buhenemodi sã bu árígu ta ãhrimi. Goãmũ tamera õagũ ãhrimi. ĩgũpũ mũare ĩgu yarã áricũ ĩgũre masinemocũ iimi. Eropirã Goãmũpũre umupeoro gahmea mũare. ⁸ Otemũhtagu pũhrũ pohere ãhadibugũ yujuro mera mohme corerã ãhrima erã. Eropirã erã nũcu erã mohmediropẽ ta wajatama erã. Eropa ta ãhraa gũa Apolo mera. ⁹ Eropirã gũa Goãmũ yare mohme corerã ãhraa. Eropa gũa mohme corerã Apolo yũ mera majagu ãhrimi. Mũarũ Goãmũ ya pohe iro dopa ta ãhraa. Mũa eropa áricũ Goãmũ ya pohe iri maja yucũre ĩgu buganemocũ iidiro dopa ta mũare ĩgu yare masinemocũ iimi ĩgu.

Eropigu Goãmũ mũare ĩgu yarãre õarã áricũ iigu iimi. Eropirã mũa Goãmũ mohmeri wihi iro dopa ãhraa mũa gaji werenigui queori mera werediacyũ. ¹⁰ Yũre Goãmũ ĩgu itamuro mera yũpũ wihi iimehregũ borari ĩgu nugumũhtaro dopa ta Jesucristo yare mũare buhemũhtabũ. Eropigu iri weca gajigu ĩgu peoturia mũriaro dopa ta gajigu yũ pũhrũ buhenemogu iimi. Eropa buhenemogu õaro gũhyadiaro mera Goãmũ yare buhero gahmea ĩgũre. Queoro buhero gahmea. ¹¹ Wihire iirã borarire nugumũhtabiricũ wihi iima masiya mara. Eropa ta Cristore buhebircũ ĩgu yarã wacyũ iima masiya mara. Cristo mari ya dipuwajare sĩribasarare mũare buhetuhajabũ. Eropirã mũa Jesucristore umupeorã Goãmũ yarã watuhajabũ. Mũa eropa árirãguere

gaji buherire buhema masiya mara mua Goãmũ yarã wamorãre. ¹²⁻¹⁵ Goãmũ yarãre buhenemorã ãhrima. Erã watope gajirã queoro buhema. Gajirã queoro buhebeamã. Queoro buheri oro, plata, waja pagari utãyeri iro dopa ãhraa. Queoro árĩbiriri buheripũ yucũ, taa, ñaira pũri iro dopa ãhraa. I mũmũ pehrerinũri árĩcũ Jesucristo dujarigũ mari buhera queoro árĩcũ ãhmugũcumi. Mari buherare soeñagũ iro dopa ta queoro árĩcũ ãhmugũcumi. Eropiro oro, plata, waja pagari utãyeri soecũ ãjũbiro dopa ta mari buhera queoro ta árĩro dujaroca ãgũ ãacũ. Eropa mari queoro buhenirã mari árĩcũ ðaro mari buhera waja wajayegũcumi. Eropa ta yucũ, taa, ñaira pũri soecũ ãjũpehrero dopa ta mari buhera queoro árĩbiro pehreroca ãgũ ãacũ. Eropigũ queoro buhebirinirã mari árĩcũ ãagũ marire wajayesome. Erã eropa árĩrã erã wajatabiriquerecũ Goãmũ erãpũre taugũcumi. Eropirã eropa queoro ðaro buhebirinirã merogã mera tarirãcoma. Eropirã wihi ãjũrisubu tariro dopa tarirãcoma.

¹⁶ Mua Jesu yarã mera Espĩritu Santopũ mua mera ãhrimi. Eropirã mua Goãmũ ya wihi iro dopa ãhraa. ¿Irire masibeari mua? ¹⁷ Eropirã mua Goãmũ ya wihi árĩro dopa árĩrã ãgũ yarã gohra ãhraa. Eropigũ ãgũ yarãre yujugũ ãgũ goroweocũ Goãmũ peamegue dedeogũcumi ãgũpũre.

¹⁸ Irire ðaro masique mua. Mua basi pee wisibiricãque. I mũmũ maja buherire opagũ “Masitarinũgagũ ãhraa,” arĩ pepibocumi. Eropa arĩ pepigũ mua mera majagũ árĩgũ, “Yũhũ Goãmũ masiri mariro pee masibigũ ãhraa,” arĩ pepiporo ãgũ. ãgũ eropa arĩ pepigũ diaye ta ðaro masigũ wagũcumi. ¹⁹ I mũmũ maja masa erã gamero erã basi masiri “Bu gohra ta ãhraa,” arĩ pepimi Goãmũ. Eropa ta werenemoa Goãmũ yare erã gojarapũ. Õpa arĩ gojara ãhraa: “Erã gamero masirã erã pepiri mera ‘Õpa iirãra,’ erã arĩrare gajiropa wacũ Goãmũ iimi,” arãa Goãmũ yare erã gojarapũ. ²⁰ Eropi gajipũgue õpa arãa daja: “Masa erã gamero ‘Masipehorã ãhraa,’ erã arĩ pepiri duhpiburi árĩbiricũ masimi mari Opũ Goãmũpũ,” arãa Goãmũ yare erã gojarapũgue. ²¹⁻²² Eropirã “Pablo ya curu majarã ãhraa gũ,” arĩrã, “Apolo ya curu majarã ãhraa gũ,” arĩrã, “Pedro ya curu majarã ãhraa gũ,” arĩrã arĩbiricãque mua pare. Gũ árĩpehrerã mua ya árĩburire iirã dihta ãhraa. Goãmũ árĩpehreri mua ya árĩburire otuhajadigũ árĩmi. ãgũ ãhacũnugurare mua ya árĩburire odigũ árĩmi mũare. Mũare ojocaricũ iimi mua ya árĩburire. Eropigũ sĩricũ sãre iigũcumi mua ya árĩburire. Dohpague mua árĩrire, pũhrũgue mua árĩburi sãre ogũcumi. Eropirã árĩpehreri

mera āhraa. ²³ Eropirā m̄ap̄u Cristo yarā āhraa īgu ya árīburire iimorā. Eropigu Cristop̄u Goām̄u yagu āhrimi īgu ya árīburire iibu. Eropirā “Gua tamera Pablo ya curu majarā āhraa,” arībiricāque m̄ua pare.

4

Cristo īgu yare īgu buhedoregu īgu apinirā erā mohmerire werep̄u Pablo

¹ Ōpa arī pepique m̄ua yure, Apolo sāre: Eropa ta erā Cristore mohme corerā āhrima. Eropirā “Masa erā masibirirare Goām̄u yare buhedore īgu apinirā āhrima,” arī pepique m̄ua. ² Yujuḡu īgu ya árīburire iidore apinirāre īgu gamero dopa ta ii corero gahmea erāre. Yū sāre eropa ta ii corero gahmea Cristo īgu gamerire. ³ M̄ua yure werew̄uquerecū eropa pepicāa yūh̄u. Gajirā masa erā yure werew̄uacū sāre eropa pepicāa yūh̄u. Yū iirire ĩarā “I ōari āhraa. I ñeri āhraa,” arī beyemasibea m̄ua yure. Yū basi árīqueregu yū iirire ōaro beyemasipehobea yū sã. ⁴ Ōpa arī pepia yūh̄u. “Mari Op̄u yure īgu apidiro dopa īgu gamerire ipehorab̄u yūh̄u,” arī pepia yūh̄u. Yū ōpa arī pepiquerecū ta yū arī pepiri diaye árībiriboca. Mari Op̄u Cristo dihta yū iiric̄urire ĩagu ōaro masimi yū īgu yare ōaro iicū. ⁵ Eropirā mari Op̄u īgu dujariboro core masare erā iirare arī werew̄uabiricāque. Īgu dujarigu masa erā iirare iribojegue gajirā erā masibirirare Cristo deyoro moaḡucumi. Eropirā mari iidiarare īgu masicū iiḡucumi gajirā masare. Irisubu ta mari n̄uc̄ure īgu yare mari iidiro dopa ta “Irire ōaro iiab̄u,” arīḡucumi Goām̄u marire.

⁶ Yū acawererā, yūh̄u Apolo mera gua árīric̄urire wereb̄u yūh̄u m̄uare buhebu. Eropa wereb̄u Goām̄u īgu yare īgu gojarap̄u īgu arīdirore m̄ua tarin̄ugabiriboro dopa. Eropa tarin̄ugabirā árīrā m̄ua yujurāyerire umupeobiricāque. M̄ua eropa iibirā árītarin̄ugadiarā iiaa. ⁷ M̄ua eropa iibiriboro dopa gua iirare wereb̄u m̄uare. M̄ua eropa tarin̄ugadiaquererā m̄ap̄u gajirā tauro ōarā árībeaa m̄ua. Goām̄u m̄uare īgu ora dihtare opaa m̄ua. Eropirā īgu m̄uare masicū iira dihtare masia m̄ua. ¿M̄ua gamero oparā, m̄ua bocat̄uro masirā árībiriquererā ta, duhp̄irā “Masipehorā āhraa,” arīri m̄ua? Eropa arīrā “Goām̄u ḡuare obirimi. Eropigu ḡuare masicū iibirimi,” arīdiarā dopa ta iiaa m̄ua.

⁸ M̄ap̄u “Árīpehrerire opaa gua. Ḡuare ñehe duhyabeaa,” arīraa m̄ua. Eropirā gua m̄ua pohro árībiricū ōpa arī pepiraa: “Oparā iro dopa masirā āhraa gua,” arī

pepiraa mua. Diaye ta oparã iro dopa mua masipehorã áricũ muare òatariaboya. Mua eropa áricũ mua mera gua sã oparã iro dopa masipehorã áriboya. “Masirã áhraa gua,” arĩ pepirã, ¿òaro arĩ pepiri mua? Òaro pepibea yu ãacũ. ⁹ Òpa arĩ pepia yu tamera: Goãmu guare Jesu ãgu yare buhedore apinirã doca maja curu apimi guare. I yeba majarã masa, anyua sã gua ñero taricũ guare ãamurima eropa wacũ. ¹⁰ Cristo yare gua buhecũ ãarã, “Pee masibirã áhrima,” arĩma masa guare. ¿Muaru Cristo yare òaro pee masirã áhriri mua? “Turabirã, bu árirã áhrima,” arĩma masa guare. ¿Muaru òaro turarã áhriri mua? Mua basire umupeoa. Guarure masa ne umupeobema. ¹¹ Guaru dohpaguere ñero tarirã, oaboarã, ñemesiburã, ñeri suhricurã, wiri moorã áhraa. Eropirã guare gajirã umupeobirã, guare pabiramurima. ¹² Eropirã gua buheniguiquererã teboricurã árirã gua áriburi majare gua baburi sãre mohmea. Eropirã gajirã guare erã ñero wereniguiquerecũ ta guaru Goãmure òaro erã áriburire serēbasaa. Eropa iirã gajirã guare ñero iimorã erã nuruquerecũ ta eropa pepicãa gua. ¹³ Eropirã “Ñero iirã áhrima,” guare erã werewuquerecũ ta guaru erãre òaro wereniguia erã òaro áriburire. Eropirã erã burigã dohoma guare. Iribojegue eropa iinugama. Dohpague sãre muraro ta iima guare.

¹⁴⁻¹⁵ Muare òari buherire buhemuhtabu. Eropa buhecũ mua peecũ Jesucristo muare ãgu yarã wacũ iidi árimi. Eropa muare buhedigu mua pagu iro dopa ta wahabu yuhu. Bajarã muare Cristo yare buherã erã áriquerecũ ta muare buhemuhtagu yuhu yujugu ta áhraa. Eropigu yuhu yujugu ta mua pagu iro dopa áhraa. Eropigu muare guhyasiricũ iibu ire gojagu iibea. Yu porã yu mahirãre muare werebu ire gojaa yuhu. ¹⁶ Eropigu ire turaro muare werebu iiaa yuhu. Yure ãhacũque mua sã.

¹⁷ Mua eropa iicũ gamegu mua pohro Timoteore obeogu iiaa. ãgu yu magu iro dopa yu mahigu mari Opu Jesucristo yagu áhrimi. Eropigu Cristo gamero dopa iiniguigu áhrimi ãgu. Timoteo mua pohro eagu Jesucristo yare yu iidiro dopa muare guñacũ iigucumi mua sã eropa iiboro dopa. Jesu yarã pohrogue noho wagu Jesucristo yare erã iiburire buheniguicãa. ¹⁸ Yujurãyeri mua mera majarã oparã áridiarã òpa arãñorã: “Pablo mari pohrogue arisome,” arĩ pepirañorã erã. ¹⁹ Goãmu gamecũ mua pohrogue dohparagã ta eaguca. Eropa eagu erã oparã áridiarã mua mera majarã erã eropa arĩrare ãagura. Eropigu erã Goãmu turari opacũ ãagura yuhu. ²⁰ Goãmu mari Opu áhrimi. Mari

arĩ weretarinũgaquerecũ ta ĩgu yare mari iibiricũ mari wereniguiri duhpiburi árĩbeaa. ĩgu turari mera ĩgu gamero dopa iicũ gahmemi. ²¹ ¿Mũa pohrogue mũa ya dipuwaja dipuwaja moagu yũ wacũ gahmeri mũa yũre? ¿O mũa õaro iira waja mucubiriri mera waro gahmeri mũa yũre?

5

Corinto majarã erã ñeri iirare werepũ Pablo

¹ Gajirã õpa arĩ querecũma guare: Yujugu mũa mera majagu ĩgu buamore ta marapocu waĩcũmi. Eropa ta arĩ werema masa guare. Erã eroparĩcũ peemaria wahabu. Gajirãpũ Goãmũre masibirã árĩquererã erãpũ eropa iirã árĩbeama. ² Mũa mera majagu ĩgu eropa iiquerecũ ta mũapũ “Õatariarã ãhraa guã,” arĩ pepiraa. ¿Duhpirã ĩgu eropa ñeri iirare masiquererã ta guhyasĩrisãbeari mũa ĩguere? Eropa ñero iiguere mũa Jesu yarã mera majagũre cóãcãque mũa. ³⁻⁴ Yũhũ mũa mera árĩbiriqueregu ta yũ guñari mera mũa mera árĩgu iro dopa ãhraa yũhũ. Eropigu mũa mera árĩgu yũ árĩbodiropo dopa ta ñero iiguere ĩgu eropa ñero iira dipuwaja, dipuwaja moadoretuhaa yũhũ. Jesucristo ĩgu dorero mera ta eropa iidorea. Eropa mũa Jesu yarã gamenererã yũ guñabeori merague yũhũ mũa mera árĩcũ, mari Opũ Jesu ĩgu turari mera ⁵ ĩguere ñero iiguere cóãque. Watĩ mera ĩgu ñero tariborore apique. Eropa ta cóãque ĩguere ĩgu ñero tariri mera ñerire ĩgu ãaribejarire ĩgu gohrotoboro dopa. Mari Opũ Jesucristo ĩgu dujaririnũ ñero iidigu mũrũ Jesu mera ĩgu õaro tariboro dopa dohpaguere ĩguere eropa apinique, arãa yũhũ.

⁶ “Õaro ãhraa guã,” mũa arĩquererã ta ñero iirã iica mũa. Ñero iigu ĩgu ñerire mũa eropa ãacãrã, árĩpehreri ñeri mũare ii ĩhmucũ árĩpehrerã ñero iirãca. Eropiro árĩpehreri ñeri sehya wa mũa árĩrogue. Panre bugacũ iiri pohga õaro seyanũgajaro dopa ta iri ñeri õaro seyaroca mũaguere. ¿Irire masibeari mũa? ⁷ Yũ acawererã judio masa Pascua árĩcũ ovejare wejẽmũrima erã ñeri iira dipuwajare Goãmũre cãdijidorerã. Oveja sĩridiro dopa ta Cristo mari ñeri dipuwajare sĩribasadi árĩmi. ĩgu eropa sĩribasarañe mera mũa ñerire cóãñirã ãhraa. Irire guñarã mũapũ ñero iiguere mũa mera majagũre cóãque ñeri mũa watope mariboro dopa. ⁸ Iribojegue ñerire ĩhacũ iinirã árĩribũ mari. Eropirã dohpaguere mari ñerire cóãñirã árĩrã mari ñerire ãaribejaro mariro, ñero iiro mariro árĩrã. Iribojegue mari ñerire iimũridiro dopa ta iibiricãrã.

Eropirã diaye maja òaro wereniguirì mera, òaro iiricuri mera árĩrã pare.

⁹ Mũare yu gojabeorapũre nome mera ñero iirã, ñerire iimajiñajarã mera ne wapicũdorebiriribũ. ¹⁰ Eropa arĩgu “Jesu yarã árĩbirã mera árĩbiricãque,” arĩbiribũ. Eropigu “Nome mera ñero iirã mera, gajinore turaro gamenemocãrã mera, yajaricurã mera, goãmarã wéanirãre umupeorã mera árĩbita,” arĩbeaa. I yebare eropa árĩrã mariro Jesure gamebirã mariro mari dihta árĩmasibeeaa. Árĩpehrerogue àhrima erãpu ta. ¹¹ Eropigu mũare gojabeogu òpa arĩ doreribũ: “Mũa mera majarã Jesu yarãpu erãpu ñerire iicũ ìha erãpũre wapicũbiricãque,” arĩ goja doreribũ. Eropirã mũa mera majagu “Jesu yagu àhraa,” ìgu arĩgu árĩqueregu ta nome mera ñero iigu, gajinore turaro gamenemogu, goãmarã wéanirãre umupeogu, ñero quere moa coregu, merericugu, yajaricugu ìgu árĩcũ ìgupũre wapicũbiricãque. Eropirã eropa iigu mera ne babiricãque. ¹²⁻¹³ Jesu yarã árĩbirãpũre Goãmũpu dipuwaja moagucumi. Eropigu Jesu yarã árĩbirãre erã ñero iiri dipuwaja moadoregu arĩbeaa yũhũ. Eropa iibiricãro gahmea yũre. Eropa arĩquerecũ ta mari Jesu yarã watope mari ñero iira dipuwajare moaro gahmea mari basire. Eropirã mũa Jesu yarãpu mũa mera gamenererã mũa basi mũa iirare ìha masiro gahmea mũare. Eropirã yujugu mũa mera majagu ìgu ñero iicũ ìarã ìgũre dipuwaja moadorero gahmea mũare. Eropirã Goãmũ yare gojarapũgue arĩdiro dopa mũarũ mũa mera majagũre ñero iigũre dipuwaja moaro dopa iirã ìgũre cóãque.

6

Jesu yarãre weresãrare werepũ Pablo

¹ ¿Mũa basi game dũyatorire duhpĩrã Jesu yarã árĩbirã pohrogue amudorerã wahari mũa? Jesu yarãre mũa mera majarãre weresãdiarã gajirã Jesu yarãre irire werero gahmea mũare. Eropirã Jesu yarãpu amubasaporo. ² Pehrerinũ árĩcũ mari Jesu yarãpu mari árĩpehrerã masa erã iirare beyerãca. ¿Irire masibeari mũa? Eropirã pehrerinũ árĩcũ masa árĩpehrerãre beyemorã árĩrã, dohpague sãre amumasia mari. Eropirã dohpague gajiropa wacũ sãre amumasia mari. ³ Anyua erã iira sãre beyerãca mari. ¿Irire masibeari mũa? Mari eropa anyuare beyemorã árĩrã diaye ta dohpague sãre Jesu yarã erã iirare ìarã beyemasica mari. ⁴ ¿Eropirã duhpĩrã mũa mera majarãre weresãdiarã Jesure gamebirã, “Bu árĩrã” mũa arĩrã pohrogue amudorerã wahari mũa? ⁵ Ire arĩgu iiaa mũa gũhyasiuro

mua tariborore. Mua duyasorire werebu ðaro masigu áricumi mua watopere, yu arãa. ⁶ Ígu eropa áriquerecũ ta mua mera majagu Jesu yagu gajigu ígu acaweregure weresãdiagu Jesu yarã árĩbirãre beyedoregu wahami.

⁷ Masare beyegu pohroque mua acawererãre weresãrã Goãmu gameripure tarinugarã iiaa mua. Gajigu mua mera majagu muare ñero ígu iicũ eropa ñacãboaya mua. Jesu yarã árĩbirãre mua weresãbiriborore mua acaweregure muare ígu ñero iirare mua eropa ñacãcũ ðatariaboaya. Jesu yagu muare ígu yajacũ ígure mua weresãboro core ígu muare yajarare mua eropa ñacãcũ ðaboaya. ⁸ Mua eropiibea. Gajirãre ñero iirã ãhraa mua sã. Yajarã ta ãhraa mua sã. Jesu yarã mua acawererã erã áriquerecũ ta erãre ñero iirã, yajarã iiaa mua.

⁹ Eropã iirã Goãmu ígu opu áriroguere wamasibeama. ¿Irire masibeari mua? Pee wisibiricãque mua. Õpa iirã Goãmu pohroguere wasome: Gajirã nome mera ñero iirã, goãmarã wéanirãre umupeorã, gajigu marapore marapocurã, gajigu marapu mera ñero iirã nome, uma seyaro erã dũpuri mera ñero iirã, nome sã eropa ta iirã, ¹⁰ yajarã, gajinore turaro gamenemorã, merericurã, gajirã masare ñero quere moa corerã, gũyari mera yajarã ne Goãmu ígu opu áriroguere wamasibeama. ¹¹ Iribojeguere mua yujurãyeri eropa iirã árĩyoro. Eropã iinirã mua áriquerecũ ta dohpaguere mua ñero iirare cóãtuhami Jesucristopũ. Eropã ígu taunirã mua áricũ ígu yarã árĩmorã iimi Goãmu muare. Eropã iigu “Õarã áhrima,” arĩ íhami ígu muare. Eropã ta iimi muare mari Opũ Jesucristo mera, Espíritu Santo mera.

Mari dũpũ ðarire iiburi dũpũ árĩro iiaa, arĩ gojañumi Pablo

¹² “Goãmu iidorebirira árĩpehleri iimasiri ãhraa yũre, arĩmi Pablo,” arãa mua yũre. Yu iimasipehoqueregu ta, yu iiri yũre gajirã sãre itamubiricũ íha irire iibea. Eropã ta árĩpehleri iimasiri ãhraa yũre. Eropã iimasiqueregu ta yujuyerisuburi irire eropa iipogu duhumasibiriboca, arĩgu irire iisome yũhũ. ¹³ Mari bari mari paru maja árĩburi ta ãhraa. Eropiro “Mari paru bari dicũburidiru paru ãhraa,” arãa mua yujurãyeri. Mua eropa arĩquerecũ ta puhũ Goãmũpũ mari barire mari paru sãre iri pehrea wacũ iigucumi. Eropirã mua yujurãyeri “Mari dũpũpũ mari ñaribejari iiburi dũpũ ãhraa,” arĩraa mua. Eropã árĩbeaa. Mari dũpũ ñaribejari iiburi dũpũ árĩbeaa. Mari dũpũpũ mari Opũ ya árĩburire iiburi dũpũ ãhraa. Eropigu mari Opũpũ mari mera áhrimi mari ígu yare ðaro iiboro dopa.

¹⁴ Eropigu Goãmũ ĩgu turari mera mari Opũ Cristo dupũ murarore masupũ. Eropa ĩgũre masudiro dopa ta mari dupũ sãre masugucumi ĩgu.

¹⁵ ¿Mũa ya dupũ Cristo ya dupũ árĩri iro dopa árĩcũ masibeari mũa? ¿Cristo ya dupũ árĩri iro dopa árĩrã nomeo ñero iiricũgo mera mari árĩcũ õhari mũa pepicũ? Ōabirigohracãca. ¹⁶ Ñego mera yujugũ igo mera árĩcũ ĩgu dupũ igo ya dupũ mera árĩro yuju dupũ iro dopa ta ãhraa. ¿Irire masibeari mũa? Eropa arĩ gojara ãhraa Goãmũ yare erã gojarapũgue. Ōpa arãa: “Nomeo mũũ mera árĩrã perã árĩquererã yuju dupũ iro dopa wahama,” arĩ gojamũriĩnumi. ¹⁷ Mari Opũ ĩgu yarã mera ãhrimi. Eropigu yujugũ ĩgu mari Opũ mera perã árĩquererã yujugũ iro dopa ãhrima erã guñari mera.

¹⁸ Eropirã nome mera ñero iirire, mũa mera ñero iirire ãaribejabiricãque. Irire mũa ãaribejabiriboro dopa ta irire duhrigã waque. Gaji ñerire mari iira mari dupũrire mari goroweobea. Nomeo mera ñero iigupũ ĩgu dupũre ñetariaro goroweomi. ¹⁹ Espĩritu Santore marire ohomi Goãmũ. Eropigu mari dupũ mera wihicũmi Espĩritu Santo. ¿Irire masibeari mũa? Eropirã mũa dupũ mũa ya dupũ gohra árĩbeaa. Goãmũ ya dupũ ãhraa. ²⁰ Mũa ĩgu yarã árĩmorãre mũa ñeri dipuwajare wajayedigu árĩmi Cristo. Eropirã ĩgu yarã árĩrã mũa dupũ mera Goãmũ ĩgu gamero dopa ta iique. Eropa iirã Goãmũre umupeorã iiaa mũa. Eropirã gajirã sãre ĩgũre umupeocũ iirã iiaa.

7

Mojoto diririre werepũ Pablo

¹ Dohpaguere mũa yũre serẽpi gojarare yũ sã mũare yũhrigũra. Masũ marapo maricũ sãre õhaa yũ ĩacũ. ² Iri eropa árĩquerecũ ta ero mũa árĩro baja ãaribejari ãhraa. Eropirã mũa erã nũcũ nome marapocũporo gajirã nome mera erã ñero iibiriboro dopa. Eropirã nome sã erã nũcũ marapocũporo gajirã mũa mera erã ñero iibiriboro dopa. ³ Eropigu marapocũgũre ĩgu marapore õaro iiro gahmea. Igo marapũ sãre eropa ta iiro gahmea. ⁴ Marapocũgo igo dupũ igo ya dihta árĩbeaa. Igo marapũ ya sã ãhraa ĩgu ĩhadiburo dopa. Igo marapũ sãre ĩgu dupũ ĩgu ya dihta árĩbeaa. Ĩgu marapo ya sã ãhraa igo ĩhadiburo dopa ta. ⁵ Mũa perã árĩburire “Iibiricãrã,” arĩbita. Gajisubũ mũa perã Goãmũ mera mũa wereniguidiarã “I nũcũ nũri duhũnirã dohpa, Goãmũ mera wereniguirã dohpa,” yujuro mera eropa arĩrã duhumasia mũa. Mũa eropa duhũra pũhrũgã mũa dipaturi mũa eropa árĩniguidiro dopa ta árĩque daja

watĩ ñero mũare iidorebiriboro dopa. “Gajirã mera ñero iiboca,” arĩrã mũa basi duhubita. Mũa árĩmũhtadiro dopa ta árĩniguicãque daja.

6 Ire mũare dohpague yũ arĩrare arĩgu mũare dore gohrari mera dorebeaa. Eropa weregu iiaa mũa iiburire mũa masima õaro. 7 “Uma marapocũporo,” arĩquerecũ, árĩpehrerã mũa yũ iro dopa ta marapo marirã mũa árĩcũ õaboaya yure. Mũa eropa árĩcũ gamequerecũ ta Goãmũ mari árĩpehrerãre yujuropa iimasiburire apibeami. Yujurãyerire marapocũmasiburire marapũcũmasiburire apimi Goãmũ. Eropigu ĩgu gajirãpũre marapocũmasibiriburire marapũcũmasibiriburire apimi.

8 Eropigu marapo marirãre, marapũ marirãre, wapewe-yarãre õpa arãa: Marapo marirã, marapũ marirã mũa árĩmasirã, yũ árĩro dopa árĩcũ õhaa. 9 Eropa árĩmasibirã turaro nomere gahmema. Irire turaro Ɂaribejarã diaye ta marapocũcãporo. Nome sã marapũcũporo. Mũa eropa Ɂaribejarã mũa marapocũcũ õapũricãa. Eropiro marapũcũcũ sãre õapũricãa.

10 Mũa marapocũrãre, marapũcũrã nomere õpa dorea: Yaha doreri gohra árĩbeaa i. Mari Opũ Cristo ire doredi árĩmi. Mũa nomepũ mũa marapũ sũmarãre cóãbircãque.

11 Mũa marapũ sũmarãre cóãrã, marapũ marirã dujaque. Dipaturi mũa marapũ árĩdigũ mera ahmu õaro árĩbircũ daja marapũ marirã dujaque. Eropirã mũa Ɂma sã mũa marasã nomere cóãbircãque.

12 Eropigu mũa sãre gajirã sãre õpa arãa yũhũ. Mari Opũ ĩgu dorediro árĩbeaa i. Yũhũ ĩgu apidigupũ õpa arãa mũare: Yujurãyeri mũa mera majarã Jesu yarãpũ Jesure umupeobirã nomere marapocũrã ãhraa. Eropigu õpa arĩ werea mũare: Mũa marasã nome mũa mera erã dujadiacũ erã nomere cóãbircãque mũapũ. 13 Eropirã yujurãyeri mũa mera majarã nome Jesu yarã nome Jesure umupeobirã mera marapũcũrã nome ãhraa. Mũa marapũ sũmarã mũa mera erã dujadiacũ erãre cóãbircãque.

14 Mũa marapũ sũmarã Jesure umupeobirã erã árĩquerecũ ta Jesu yarã nomere erã marapocũcũ, Goãmũ õarã Ɂma iro dopa ĩhami erãre. Eropirã mũa Ɂmapũ Jesu yarã mũa árĩcũ mũa marasã nome Jesure umupeobirã nome árĩbocoma. Erã eropa árĩquerecũ ta mũa mera erã nome marapũcũcũ Goãmũ õarã nome iro dopa ĩhami erãre. ĩgu eropa ĩabircũ mũa porã Jesure umupeobirã porã iro dopa árĩboũuma. Eropigu mũa porã sãre õarã iro dopa ĩhami Goãmũ. 15 Eropirã mũa Ɂmapũre mũa marasã nome Jesure umupeobirã nome erãpũ mũare cóãcũ õaroca.

Mua nome sãre mua marapu sumarã Jesure umupeobirã erãpu mware cóãcũ òaroca. Mari òaro dujacũ gahmemi Goãmũ. Eropirã erã eropa cóãdiacũ “Yũ mera dujaque,” erãre arĩdorebeami Goãmũ. Eropirã mua erã marasã nome erã marapu sumarã árĩbeaa pare. ¹⁶ Mua uma mua marasã nome mua mera dujaquerecũ erã peamegue wabiriborore Jesure umupeocũ iimasibiriboca. Mua nome sã eropa ta Jesucristore umupeocũ iimasibiriboca mua marapu sumarãre. Eropirã erã mware cóãdiacũ òaroca.

¹⁷ Òpa ta iiro gahmea mware: Árĩpehrerã mua mari Opũ Cristo mware ìgũ arĩdorero dopa ta árĩque. Goãmũ mware ìgũ apirare iique mua. Irire árĩpehrero Jesu yarã gamenererãre eropa doreniguica yũhũ. ¹⁸ Jesu yarã mua árĩboro core circuncisión iinirã gasiro mero wiri aĩnirã árĩrã eropa ta dujaque. Eropirã Jesu yarã mua árĩboro core gasiro merogã wiri aĩbirinirã árĩrã mua árĩro dopa ta dujaque. ¹⁹ Dohpaguere gasiro mero wiri aĩnirã mua árĩcũ duhpiburi árĩbeaa. Irire iibirinirã mua árĩcũ sãre gajiropa wasome. Goãmũ dorerire mari iicũpũre iri tamera òhaa. ²⁰ Eropirã Goãmũ Jesu yarã mware ìgũ aĩcũ irisubu mua árĩmũhtadiro dopa ta dujaque.

²¹ Goãmũ mware Jesu yarã aĩboro core gajirã pohro majarã mua árĩcũ òaroca. Eropa ta dujanique. Mua Opũ ìgũ mware wiudiacũ wirique mua. Mua wiricũ sãre òaroca mware. ²² Òpa arĩ pepique mua: “Yũhũ masũ pohro majagũ wiribiriqueregũ ta dohpaguere Jesu yagũ árĩgũ, ìgũ wiudigũ iro dopa àhraa ìgũ yare iiboro dopa,” arĩ pepique. Eropa ta gajirã Goãmũ Jesu yarãre aĩcũ masa pohro majarã mua árĩbiriquererã òpa arĩ pepique: “Dohpaguere Jesu pohro majagũ àhraa yũhũ,” arĩ pepique. ²³ Mari ñeri dipuwajare mari ìgũ yarã árĩmorãre wajayetuhadi árĩmi Cristo. Eropirã ìgũ dorero dopa iique. Mua iiburire masa dorebircãporo. ²⁴ Eropirã yũ acawererã, Jesu yarã árĩmorã Goãmũ mware ìgũ aĩcũ irisubu mua árĩmũhtadiro dopa ta dujaque. Eropa dujarã Goãmũ mera òaro árĩque.

²⁵ Dohpaguere marapo marirãre, marapu marirã sãre werediaa mware. Yũ wereburi mari Opũ weredorediro gohra árĩbeaa. Eropa árĩbiriquerecũ yũhũ ìgũ mojomoro ìadigũ, ìgũ itamudigũ árĩcũ mua yũ wererire òaro mera peerãca. Òpa werea mware. ²⁶ Dohpaguere mari ñero tarirã iica. Eropirã mua árĩro dopa mua dujacũ òhaa yũre. ²⁷ Eropirã mwarũ marapocũrã, marapũcũrã sã eropa ta dujaque. Erãre cóãbircãque. Marapo marirã, marapu marirã sã mua árĩrã eropa ta dujaque. Marapore o marapũre amabita. ²⁸ Eropa yũhũ mware arĩquerecũ

“Marapocugura,” arĩcũ gajiropa árĩbeaa umare. Eropirã mũa nome sãre marapucudiacũ ðaroca. Õpa ãhraa. Irisubu ñero taririsubu marapocurã, marapucurã mũare teboricuburi dujaroca. Eropigũ mũare eropa teboricuri arĩgũ, marapo marirã, marapũ marirã dujaque, arãa yũhũ.

²⁹ Yũ acawererã, eropa arĩgũ òpa arĩdiagũ iiaa. Mari ñero tariboro merogã duhyaa. Eropirã dohpaguere marapo marirã Goãmũ yare erã ðaro mohmemasiro dopa ta, ðaro mohmero gahmea marapocurã sãre. Eropirã marapucurã nome sãre eropa ta Goãmũ yare ðaro mohmero gahmea.

³⁰ Eropirã mari ñehamere orequererã Goãmũ yare mohmeboropũre guñaro gahmea. Bosenũ árĩrã mucubiriquerẽ Goãmũ yare mohmeboropũre guñaro gahmea. Mari asũrare opaquererã irire guñabiricãro gahmea. Goãmũ yare mohmero gahmea. ³¹ I yeba dohpague árĩro dopa pehrero iiaa. Eropirã i yeba majare iiburire wũaro guñabiricãro gahmea.

³² Mũa gajinore wũaro mũa guñaricucũ gamebeaa yũhũ. Marapo marigũ Jesu yagũ árĩgũ mari Opũ Jesu yare igũ gamerire guñaniguimi. ³³ Marapocugurũ Jesu yagũ i yeba maja sãre igũ marapo gamerire guñami. ³⁴ Eropigũ peñe guñami. Marapũ marigo mari Opũ Jesu yare iiburire guñaniguimo. Eropa guñago igo igo dupũ, igo pepiri mera ta mari Opũ yago ðaro árĩdiamo. Marapucugopũ i yeba majare igo marapũ gameripũre burigã iidiamo.

³⁵ Ire mũare arĩgũ iiaa mũare itamubu. Teboricuri dorerire mũare cãhmotadiabeaa. Eropa cãhmotadiabiriqueregũ ta ðaro mũa iicũ gahmea. Eropigũ baja guñaricãro mariro Jesu mari Opũ igũ gameri dihtare mũa turaro iidiacũ gahmea yũhũ.

³⁶ Mũa mera majagũ igũ mago igo bũro wacũ ãagũ marapucudoreporo igũ igore. “Igre ðaro iibeaa. Marapucuro gahmea igore,” arĩ pepigũ igũ arĩdiro dopa ta nomesoporo. Eropigo igo marapucumasimo. Eropa igore marapucudoregũ ñero iibeami. ³⁷ Gajigurũ igũ magore “Marapucubiricãporo,” arĩbocumi. Yujugũ umũre wereyudiro mariro, yujuñe ta pepigũ arĩgũ, “Igo marapucubiricãporo,” arĩgũ ðaro iimi. ³⁸ Eropigo igũ mago marapucudoredigo ðaro wagocumo. Ìgũ mago marapucudorebiridigopũ gajigo tauro ðaro wagocumo dohpaguere ñero taririsubu arĩcũ.

³⁹ Marapucugore igo marapũ mera árĩniguicãdoremi Goãmũ. Igo marapũ sĩrira pũhrũ igo gajigũ mera igo gamegũ mera marapucumasimo daja. Jesure umupeogure marapucuro gahmea igore. ⁴⁰ Igo marapũ marigo dujago

tauro ðaro mucubirigo árġocumo igo. Eropa ta arġ pepia yurp. Eropa arġgu Espġritu Santo ġgu gamero dopa ta arġgu iiaa.

8

Goāmarā wéanirāre erā umupeomorā waimurā wejē erā apira barire Jesu yarā asū baburire werepū Pablo

¹⁻⁴ “Gua tamera ðaro masia,” arġ pepiraa mūa. Eropa arġ pepirā mūa masiri mera gajirāre masitarinugadiarā iiaa mūa. Eropa iirā gajirāre itamubeaa mūa. Gajirāre umupeori mera mahirāpū erāre itamua erā Jesucristore umupeonemoboro dopa. “Masipehocāa yūhū,” arġbiricāro gahmea marire. Eropa arġrā ðaro masibeaa mari. Eropirā “Ōaro masinibirica dohpa,” arġ pepiro gahmea marire. Mari Goāmure mahirāpūre marire masicū iimi.

Eropiġu goāmarā wéanirāre umupeorā erā pohro apira barire “¿Mari bamasicuri?” arġ wereġura mūare: Goāmarā wéanirā ne duhpimorā árġbeama. Diaye ta erā wéanirāre ne sġporāri mara. Eropiġu Goāmū yujugu ta āhrimi. Gajirā goāmarā marima. Ire mari masia. ⁵ Gajirā masa ōpa arġma. “Mari goāmarā bajarā āhrima. Erā mari oparā āhrima,” arġ pepirima. “Ūmūsiguere, i yeba sāre goāmarā āhrima,” erā arġquerecū ta maripūre yujugu ta Goāmū gohra āhrimi. ⁶ ġgu mari Pagū árġpehrerāre, árġpehrerire árġdorediġu āhrimi. Eropirā ġgu ya árġburire iimorā āhraa mari. Eropiġu mari Opū Jesucristo yujugu ta āhrimi. ġgu árġpehrerire mari Pagūre ġhacūnugubasadiġu āhrimi. ġgu yarā árġmorāre iipū ġgu marire. Eropirā ġgu mera eropa árġniguirāca mari.

⁷ Yū arġdiro dopa ta eropa arġquerecū gajirā Jesu yarā irire masibeama. Iribojegue erā goāmarā wéanirāre umupeorā “Ōā goāmarā ojocarirā āhrima,” arġ pepimūriñorā. Irisubuguere eropa arġponirā árġrā dohpague sāre erā wéanirāre erā apira barire barā “Goāmarāre umupeorā iiaa,” arġ pepirima. Eropirā iri barire barā, “Mari ñero iirā iiaa,” arġ pepirima ðaro masibirā. Eropirā “Ñerire iirā iiaa,” arġ pepiquererā erā irire iicū erā pepiri gajiropa waca. ⁸ Eropiġu ōpa arġ werea mūare: Iri barire mari bacū mari babiricū sāre Goāmū mera ðaro árġcū iibeaa marire. Irire mari babirā ñero iibeaa. Mari irire barā sā gajirā tauro ðarā árġbeaa mari, arġ werea yūhū. ⁹⁻¹⁰ Eropa mūare werequerecū ðaro iique mūa. Iri barire barā mūa árġcū gajirā Jesu yarā mūare ġabocoma. Mūare ġarāpū ðaro masinibirā “Iri barire barā Goāmure umupeobeama,” arġ pepirā árġrācoma. Eropa arġ pepiquererā mūare ġhacū erā

sã babocoma. Iri barire eropa barã “Ñero iirã iiaa mari,” arĩ pepirãcoma erã. Erã eropa arĩ pepicũ erãpũre ñero iicũ iiboca mũa. Eropirã õaro iique. ¹¹ Mũapu masirã árĩrã, “Gũa iri barire gũa bacũ õaroca,” mũa arĩ pepirã árĩrã gajirã õaro masibirinirãre ñero iicũ iiboca mũa mũaare erã ñhacũcũ. Erã ya árĩburi sãre sĩridi árĩmi Cristo. Eropirã mũa bari mera mũa Cristo yarãre mũa acawererãre ñero iicũ iirã erãre goroweoboca mũa. ¹² Õaro masibirãre mũa acawererãre erã arĩ pepiro dopa iibiricũ erã pepiri gajiropa wacũ iiboca mũa. Eropa iirã Cristo sãre ñero iirã iiaa mũa. ¹³ Eropigu wéanirãre erã ora barire yũ bagũ yũ acaweregũre ñero iicũ iiboca yũhũ. Jesu yarã erã ñero iicũ gamebeaa. Eropigu yũhũ “¿Erãre ñero iicũ iiri?” arĩgũ, iri barire ne dipaturi basome yũhũ.

9

Pablo Jesu ñgũ apidigu ñgũ árĩrare werepu

¹ Jesu ñgũ yare buhedore ñgũ apidigu ãhraa. Eropigu gajirã ñgũ apinirã erã iiro dopa ta iimasia yũ sã. Jesu ñgũ apidigu ta ãhraa yũ sã. Mari Opũ Jesure ñadigu ta ãhraa yũ sã. Eropirã Jesu yare yũ buhecũ mũapu irire õaro peenirã árĩrã ñgũ yarã wahabũ mũa. Mũa eropa ñgũ yarã wara pũhrũ Jesu ñgũ apidigu yũ árĩrare masituhabũ mũa. ² Gajirã yũre werewũarã “Ñgũ Jesu ñgũ apidigu árĩbeamĩ,” arĩbocoma. Erã eropa arĩquerecũ ta mũapu eropa arĩmasibea. Mũaare yũ buhera pũhrũ Jesu yarã warã, “Jesu ñgũ apidigu ãhrimi,” arĩ yũre masituhaa mũa. Eropirã gajirã erã werewũaquerecũ ta mũapu ñgũ apidigu yũ árĩricũre mũa masia.

³ Yũre werewũarãre õpa ta arĩ yũhrigũra. ⁴ Mũaare yũ buheri waja yũ baburire, yũ ihriburire yũre oro gahmea mũaare. ⁵ ¿Eropigu marapocũgũ árĩgũ yũ marapo Jesu yago igo árĩcũ igo mera aĩ curimasibiribocuri yũhũ mũa pepicũ? Gajirã Jesu ñgũ apinirã, Jesu pagũ porã, Pedro sã erã marasã nome mera erã curiro dopa ta yũ sã curimasiboaya. Yũ eropa curicũ yũ marapocũgũ árĩcũ, igo sãre barire oboaya mũa. ⁶ Yũhũ Bernabé mera mũaare õari buherire gũa buhequerecũ ta gũare ne gajinore obeaa mũa. Eropirã gũa basi ta gũa baburire mohme wajatabũ gũa. Gajirã Jesu apinirãpũre erã buheri waja oayoro mũa. ¿Gũa dihta eropa buherã, waja mariro buhero gahmeri mũa pepicũ? ⁷ Yujugũ surara ñgũ mohmecũ ñgũ oparã ñgũ árĩburire wajayemũrima. Ñgũ basi wajayebeamĩ. Barire otegũ sã ñgũ otera dũcacũcũ irire ta tea aĩ bamasimi. Eropigu

ovejare ìhadibugũ ìgũ eforã apĩcore aĩmasimi ihribu ìgũ sã. ⁸ Eropã arĩgũ masa erã doreri dihtare mũare werebeaa. Goãmũ ìgũ dorerigue ìgũ arĩra sãre mũare weregũ iiaa. ⁹ Ìgũ dorerire erã gojarapũgue õpa arĩ werea: “Wecũ trigo yerire ìgũ guburi mera ìgũ suhri wearisubu ìgũ badiacũ ìgũ disirore cãhmotabiricãque,” arĩyoro Moise dorerigue. Goãmũ eropã doregũ wecũare ìhadiburire arĩgũ iibiriñumi. ¹⁰ Eropã doregũ gũare Goãmũ yare buherãre itamudorerore weregũ iĩñumi marire buhebu. Pohere séanirã sã iri dũcare aĩnirã sã erã mohmera pũhrũ, dũcacũrisubu iri dũca wajataborore cohrema. Eropã mohmerãre barire oro gahmea marire. ¹¹ Mũare Goãmũ ya buherire õari buherire buhebu gũa. ¿Gũa eropã buheri waja mũapũre gũare barire obiro gahmeri mũa pepicũ? Oro gahmea mũare. Mũa ocũ õaboaya gũare. Eropã árĩquerecũ mũa obirimũribũ gũare. ¹² Eropã gũare obirã árĩquererã ta gajirã buherã mũare irire odorecũ mũa erãpũre ohayoro. Erã mũare odorecũ gũapũ erã tauro odoremãsiboaya mũare turaro gũa buheri waja.

Eropã dorebonirã árĩquererã ta gũapũ “Gũare oque,” ne arĩbiribũ. “Cristo ya buherire gamebiribocoma gũa dorecũ,” arĩrã gũare dũhyaquerecũ ta mũare ne odorebiribũ. ¹³ Masa Goãmũre umupeorã Goãmũ wihigue bari aĩ apima. I wihi mohmerã iri barire aĩ bahama. Eropirã Goãmũre erã umupeori mesa pohro mohmerã waibũgũre erã soedigũre masa erã aĩ apidigũre merogã aĩ bahama erã sã. ¿Irire masibeari mũa? ¹⁴ Eropã erã iidiro dopa ta õari buherire buherãre erã buhera waja oro gahmea erã baburire. Eropã ta iidorepũ mari Opũ Jesu. ¹⁵ Eropigũ mũare serẽbodi árĩqueregũ ta yũhũ gajinore ne serẽbiribũ mũare. Eropigũ ire dohpaguere gojagũ gajinore waja gamebu gojagũ iibeaa. Mũare ne waja seadiabeaa. Sĩribũ árĩqueregũ ne waja gamesome yũhũ mũare. Waja mariro buhegũ sũaa. Eropigũ mũare iri buhera waja ne wajata basome.

¹⁶ Õari buherire buhedoregũ apimi yũre Goãmũ. Irire buheri masũ arĩgũ tĩaa yũhũ. Õari buherire buhebigũ ñero waboaya yũhũ. Eropigũ iri buherire buhegũ “Gajirã masitarinũgagũ ãhraa,” arĩbodigũ ne arĩbeaa yũhũ. ¹⁷ Õari buherire yũ gamero buhegũ yũ buheri waja wajaseaboaya yũhũ. Yũ gamero buhebeaa. Goãmũ ìgũ yare buhedoregũ apimi yũre. ¹⁸ Õari buherire buhegũ mũare yũ buhera waja serẽmasiboaya yũhũ. Eropã serẽmasiqueregũ ne gajinore serẽbigũ waja mariro iri buherire buhea mũare. Yũhũ eropã iigu arĩgũ “Õaro wajatagũca Goãmũ mera,” arãa. Iri

ta āhraa yu wajatari.

¹⁹ Eropigu yuhu masare buhegu erā yu buherire peediacū ōpa iigu iiaa Jesu yarā erā waboro dopa. Ne masa pohro majagu árībiriqeregu ta árīpehrerāre pohro majagu iro dopa iiaa yuhu erā yu buherire peediacū iigu. ²⁰ Eropigu yu acawererā judio masa mera árīgu, judio masa iiro dopa ta iiaa yuhu yu buherire erā peediacū iigu. Goāmū īgu dorera Moisere īgu apira yure iri dorebiriqerēcū ta, iri doreri dihtare umupeorā mera árīgu erā dorerire umupeogu iro dopa ta āhraa yu sã. Eropa ta iiaa yuhu erā yu buherire erā peediacū iigu Jesu yarā erā waboro dopa. ²¹ Moise dorerire umupeobirā mera árīgu iri dorerire umupeobigu iro dopa ta iiaa. Yu buherire erā peediacū eropa ta iigu iiaa yuhu erā Jesu yarā erā waboro dopa. Eropa iiqueregu Goāmū dorerire umupeoniguia. Cristo dorerire iiaa. ²² Eropigu ōaro masibirā mera árīgu erā iro dopa ta āhraa. “Masipehogu āhraa,” ne arībeaa yuhu erāre. Eropa ta iiaa yuhu erā sã Jesu yarā erā waboro dopa. Eropigu árīpehrerā masa erā árīricuro dopa ta iiaa yuhu erāre yu buherire peediacū iigu. Yujurāyeri Jesu taurā erā waboro dopa iiaa. ²³ Eropa iiaa ōari buherire árīpehrerā erā ōaro peeburire. Erā eropa peera puhru Jesucristo erāre peamegue wabonirāre taumi. Eropigu yuhu erā mera ōaro mucubiriborore eropa iiaa.

²⁴ Mũare werenigui queori mera ōpa werea. Omabirarā erā omarā árīpehrerā omama. Erā eropa omapehrequerēcū ta buriḡā omaturagupu omajamũhtami. Eropa ejamũhtagu wajatami. Eropirā erā buriḡā omadiro dopa ta mũa sã Goāmū gamerire buriḡā iique mũa wajataboro dopa. ²⁵ Árīpehrerā omamorāpu yu dũpũre gajiropa iiri arīrā gajinore duhcāma erā omaboro core. Eropa ta iima erā pũri berore erā wajataboro dopa. Iri pũri bero erā dipuru peyama masa erā wajatarare ĩaboro dopa. Eropiro erā eropa ii erā wajatara bero mata pehrea wahaa. Mari sã Goāmū yare ōaro buhemorā gajinore duhcārā mari wajataboro dopa. Iri mari wajatari tamera ne pehrebeaa. ²⁶ Eropigu omabiragu īgu noho gamero omaro dopa iibeaa yupu. Yu gamero iimaacābeaa. Goāmū gamerire masigu iiaa gajirāre itamuboro dopa. ²⁷ Eropigu yu gamero dopa iibeaa. Yu ĩaribejari yure dorebeaa. Masa erā Goāmū mera taricū itamuburi dihtare iiaa. Eropa iibigu gajirāre Goāmū yare buhedigu yu árīquerēcū ta Goāmū yure “Ōaro iibũ,” arībiribocumi.

“Goãmũ ährimi,” erã arĩ goãmarã wéanirãre umupeodirebiripũ Pablo

¹ Eropirã yũ acawererã, ire masique mũa. Mari ñecũ sũmarã mũra iribojegue majarã árĩpehrerã mũrague mera Goãmũ árĩmuriñumi. Īgũ imica curu mera erãre wamũhtañumi. Erã ĩgũre eropa mũrũsia wahgãrã wũariya deco diariya waĩcũriya eja õaro taribuja wañuma. ² Erã árĩpehrerã imica curu doca árĩnirã wũariya taribujanirã Moise yarã wañuma. ³ Eropirã erã árĩpehrerã mũmaro maja dijuri barire bamuriñuma. Goãmũ ĩgũ orire bamuriñuma. ⁴ Eropa barã erã árĩpehrerã Goãmũ ĩgũ ori deco sãre ihrimuriñuma. Irisubugue erã ihriburi decore Goãmũ ĩgũ apira utãyegue iri decore wiridoreñumi. Erã iri deco ihridiro dopa Cristo iri utãyeyero dopa ĩgũ ta erãre ojocariro odi árĩñumi. Īgũ erã mera árĩmuriñumi. ⁵ Erã eropa wanirã erã árĩquerecũ ta erã mera majarã bajarã ñero erã iicũ ĩagũ Goãmũ erãre ĩhasuabiriñumi. Eropigũ erãre masa marĩroque boacũ iĩñumi Goãmũ.

⁶ Erãre eropa wara marire gũisãburi ähraa erã iidiro dopa ta mari ñerire mũaribejabiriborore. ⁷ Eropirã goãmarã wéanirãre erã umupeodiro dopa iibita mũa. Wecũre erã wéadigũre erã umupeodirore Goãmũ yare erã gojarapũ werero õpa arãa: “Masa erã ba doaja ihrituha, wahgãnũgaja, bosenu iĩñuma,” arĩ gojamuriñumi iribojeguerẽ. ⁸ Pũhrũ gajirã erã mera majarã nome mera ñero iĩñuma. Erã iidiro dopa iibiricãro gahmea marire. Erã eropa ñero iira dipuwaja yujunũ ta erã veintitrés mil gohra masa sĩria wañuma. ⁹ Gajisubugue gajirã erã yujurãyeri Goãmũ erã gamero dopa iicũ gamerã õpa ĩgũre arĩ turiñuma. “Mari Opũ itamumasibeami marire,” arĩñuma Goãmũre turirã. Eropa arĩ turirã ĩgũre guacũ iĩñuma. Erã iidiro dopa iibiricãro gahmea marire. Erã eropa iira dipuwaja Goãmũ erãre añaa mera cũri wejẽdoreñumi. ¹⁰ Gajisubũ daja erã mera majarã gajirã ñerã erã basi Goãmũ iirare dũyasocũ anyu masare wejẽgũpũ erãre wejẽñumi. Eropirã erã iidiro dopa iibiricãro gahmea.

¹¹ Eropa iĩñumi Goãmũ marire buhebu. Maripũ pehrerinũ coregã árĩrã ähraa. Mari eropa árĩrã árĩcũ iribojegue majarã erã eropa warare Goãmũ gojadoreñumi marire gũisãgũ. ¹² Eropirã mũapũ “Yũ tamera õaro iiaa yũhũ,” arĩ pepirã árĩrã õaro iique ñerire iiri arĩrã. ¹³ Mari árĩpehrerã yujugũ dũhyaro mariro yujuyerisuburi ñerire guñaa. Eropa guñarã iri ñerire iidiaa. Mari eropa iidiaquerecũ ta Goãmũpũ marire itamuniguicãgũ iimi. Īgũ arĩdiro dopa ĩgũ ährimi. Eropigũ marire iri

ñerire iidiarare tarinugacũ itamumi. Marire guñaturacũ iimi. Eropa guñaturarã warã iri ñerire iidiasome. Eropirã árĩpehreri ñeri iidiaquererã iri ñerire tarinugarãca.

¹⁴ Eropirã mũa yũ mahirã yũre peeque. Ne merogã goãmarã wéanirãre ne umupeobiricãque. ¹⁵ Mũa ðaro pee masirã mũa árĩcũ mũare werea. Eropirã yũ arĩri diaye árĩcũ masique mũa. ¹⁶ Mari gamenere bocatĩrirã Goãmũre “Õhaa,” arĩra pũhrũ iri vino deco dicũripare ihria mari. Eropa ihrirã “Cristo mari ya ñero iira dipuwajare ãgũ di cõara mera ãgũ mera árĩrã ãhraa mari,” arĩ masia. Eropirã panrure mari Cristo yarã nuha barã iiaa mari. Eropa barã “Mari ya árĩburire ãgũ dũpũ crusague sĩrira mera mari ãgũ mera árĩrã yuju dũpũ iro dopa ãhraa mari,” arĩ masia. ¹⁷ Eropirã mari yujuru panrure nuha baro dopa árĩpehrerã mari Cristo yarã yuju dũpũ iro dopa ãhraa. Eropirã yuju curu ta ãhraa.

¹⁸ Moise dorerire iirã erã iirire guñaque mũa. Goãmũ wihigue erã waibũgũre wejẽ soema Goãmũre umupeomorã. Erã eropa wejẽ soera pũhrũ erã soedigũre bahama. Eropa barã yuju curu ta Goãmũ yarã árĩrã ta iima. ¹⁹ Õpa ta arĩgũ goãmarã wéanirã diaye ãhřima, arĩbeaa. Goãmarã marima, arãa. Eropirã goãmarã wéanirã eropárĩcãrã iima. Eropiro goãmarã wéanirã pohrogue erã apira bariũ bu gohra ta ãhraa. Iri bari bacũ marire gajiropa iibeaa, arãa yũhũ. ²⁰ Yũhũ eropa arĩqueregũ ta iri barire mũa bacũ gamebirica. Õpa ãhraa iri: Jesu yarã árĩbirã goãmarã wéanirã pohrogue waibũgũre wejẽburire apirã Goãmũre umupeobeama. “Gũa goãmarãre umupeorã iiaa,” arĩrã watẽapũre umupeorã iima erã. Erã eropa umupeocũ erã umupeori wihigue erã mera mũa batamurã watẽa mera árĩrã iro dopa iirã iica mũa. Mũa eropa iicũ tamerare ne gamebeaa. ²¹ Bocatĩrirã vino deco dicũripare ihrirã panrure nuha barã “Cristo mera ãhraa,” arãa mari. Mari eropa iirã árĩrã, watẽa yapũre ihri, bamasibeaa mari. Eropirã goãmarã wéanirã pohro apira barire erãre umupeorã mera iri barire batamumasibeaa mari.

²² Mari Opũ ãgũ yarãre mahimi. Eropirã eropa barã watẽa yarã iro dopa iirã ãgũre guacũ iirãca. ãgũ guacũ mũa turabeaa ãgũ dipuwaja cãhmotaboro dopa.

Goãmũ ãgũ gameri dihtare iique, arĩ gojañumi Pablo

²³ “Goãmũ iidorebirira árĩpehreri iimasiri ãhraa yũre,” arĩboca mũa. Mũa iiri ñeri iri árĩbiriquerecũ ta irire iirã gajirãre itamubiriboca mũa. Eropirã Jesure umupe-onemocũ iibiriboca mũa gajirãre. ²⁴ Mari ya ðaro árĩburi

dihtare iibiricãro gahmea. Gajirã ya árĩburi sãre õaro itamuque mũa.

25-26 Eropirã gajirãre itamuburire õpa iique: Bari duaroguerẽ barire asũrã warã “¿I bari goãmarã wéanirã pohrogue erã apira bari áhriri?” arĩ, serẽpiñabiricãque. “¿Ñerire iiri?” arĩrã, serẽpiñaboca mũa. Goãmũ yare gojarapũgue õpa áhrra: “I yeba árĩri árĩpehreri Goãmũ ya áhrra,” arĩ gojañuma. Eropirã iri barire “Goãmũ badorebirira bari áhrra,” arĩbiricãque.

27 Jesure umupeobigu mũare badoregũ ãgũ sihucũ wadiarã waque. Eropa warã mũare ãgũ ejorire baque. “¿I bari goãmarã wéanirã pohro erã apira bari áhriri?” arĩ serẽpiñabita. 28 Gajigu ero árĩgu õpa arĩbocumi mũare: “I bari goãmarã wéanirãre erã wejẽ apira dihi áhrra,” arĩbocumi ãgua. ãgũ eropa arĩ werẽcũ iri bari tamerare babita. Mũare eropa arĩ weredigu “Iri barire barã ñerire iirã iica,” arĩ pepibocumi. ãgũ eropa arĩ pepibiriboro dopa “Babita,” arãa yũhũ mũare. 29 Eropa arĩgu mũa ya árĩburire werẽgũ iibeaa. Mũare iri barire weredigu ya árĩburipũre arĩgu iiaa mũare. Irire mũa bacũ ãha mũare ãhacũ ãgũ sã babocumi. ãgũpũ eropa bagũ “Ñero iigu iiaa,” arĩ pepibocumi. Eropirã “¿Eropa iibocuri ãgũ?” arĩ iri barire babita.

“Babita,” yũ arĩcũ õpa arĩ yũhriboca mũa yũre: “¿Dohpa árĩrono gajigu gajiropa pepiri arĩrã gũa gamero iimasi-biribocuri gũa? 30 Goãmũre gũa ‘Õhaa,’ gũa arĩra pũhrũ gũa bacũ gajigu irire gũa barare guare weresãmasibeami,” arĩboca mũa yũre. Yũpũ õpa yũhria. 31 I árĩpehrerire mũare yũ wererare werẽgũ õpa arĩgu iiaa mũare: Õmũri nũcũ mũa mohmerã, barã, ihrirã, árĩpehrerire iirã irire Goãmũ ya árĩburi dihta iique. Eropirã árĩpehrerã masa Goãmũre “Õagũ, turagũ áhrimi,” erã arĩ umupeoboro dopa iique. 32 Ne mũa iiri mera judio masare, judio masa árĩbirãre, Goãmũ yarã sãre goroweobiricãque. 33 Õpa iiaa yũpũ. Masa árĩpehrerã erã suaboro dopa iiaa árĩpehreri mera. Eropigu yũ gamero dopa iiniguicãbeaa yũa. Gajirã masa ya árĩburipũre õaro iiaa. Erãre Jesucristore umupeoborore eropa iiaa. Erã ãgũre umupeora pũhrũ erãre peamegue wabonirãre taugũcumi.

11

1 Cristo gajirã ya árĩburire árĩpehrerire iimi. Eropirã Cristore yũ ãhacũdiro dopa ta mũa sã yũ iidiro dopa ta yũre ãhacũque.

Corinto majarã erã gamenererogue nome erã iiborore werepũ

² Mũare yũ árĩpeherrerire buherare, buhe turiarare guñapeo waĩcuabũ. Eropa guñarã mũare yũ arĩrare yũ iidorediro dopa ta ii waĩcuabũ mũa. Eropa iirã õaro iiaa mũa. ³ Dohpaguere i sãre mũa masicũ gahmea: Árĩpeherrerã Ʃma opũ Cristo àhrimi. Eropigũ nomeo opũ Ʃmũ àhrimi. Eropigũ Cristo opũ, ãgũ Pagũ Goãmũ àhrimi. ⁴ Mũa Goãmũre umupeo gamenerecũ yujugũ Goãmũre serẽgũ dipuru bũa serẽgũ õaro ãgũ opũre umupeogũ iibeami. Goãmũ yare weretaugũ sã dipuru bũagũ ãgũ opũre umupeobeami ãgũ sã. Eropirã Ʃmarũ Goãmũre serẽrã dipu bũabiricãporo. ⁵ Eropigo nomeopũ dipuru bũabigo Goãmũre serẽgo igo marapũre umupeogo iibeamo. Goãmũ yare werego sã dipuru bũabigo eropa ta igo sã umupeobeamo. Eropirã nomepũ Goãmũre serẽrã dipu bũaporo. Dipuru bũabigo igo poarire erã õaro wũapehodigo iro dopa ta àhrimo igo. ⁶ Dipuru bũadiabigore igo poarire seapehporo. “Yũ poarire sea wũapehodiabeaa. Guhyasĩriboca,” arĩgo igo dipurure bũaporo. ⁷ Mũa Ʃmarũ Goãmũ iro dopa oparã àhraa. Eropirã Goãmũ õagũ, turagũ, ãgũ arĩricũrire ãhmuma erãpũ. Eropirã erã dipu bũabiricãporo. Nomepũ “Gũa oparã Ʃma àhrima,” arĩ ãhmuma. Eropirã erãpũ dipure bũaporo. ⁸ Goãmũ Ʃmũre iigũ, nomeo ya dũpũ mera Ʃmũre iibiriñumi. Nomeopũre iigũ, Ʃmũ ya dũpũ mera igore iĩñumi. ⁹ Eropigũ Ʃmũre iigũ sã nomeo yagũ árĩbure iibiriñumi. Nomeopũre iigũ Ʃmũ yago árĩbore iĩñumi Goãmũ igore. ¹⁰ Eropirã mũa Goãmũre umupeorã gamenerecũ nome dipure bũaporo anyua sã erã ãhasuaboro dopa. Eropa bũarã “Ʃma gũa oparã àhrima,” arĩ ãhmurã iima. ¹¹⁻¹² Goãmũ nomeore iigũ, Ʃmũ dũpũ maja mera iĩñumi. Dohpaguere Ʃma masa dehyoarã nome dũpũgue masa dehyoama. Eropiro Ʃmũ ãgũ arĩmũhtabiricũ nome mariboñuma. Eropi nome maricũ Ʃma sã mariboñuma. Eropirã erã Jesu yarã arĩrã, Ʃma seyaro nome seyaro arĩmasibeama. Goãmũpũ árĩpeherrerire apidi arĩmi. I yeba arĩrire i yeba iiburire apidi arĩmi.

¹³ ¿Mũa basi dohpa pepiri? ¿Nomeo igo dipuru bũabigo, Goãmũre igo serẽcũ õhari mũa pepicũ? Õabeaa. ¹⁴ Eropirã Ʃmũ ãgũ poa ñapo ãgũ ómacũ ãha masa werewũama. Árĩpeherrerã masa irire masima. ¹⁵ Nomeopũ poa ñapo ómago arĩcũ õapũrica. Igo poari igo dipuru bũari iro dopa ta àhraa. Iri sãre árĩpeherrerã masima. ¹⁶ Mũa mera majagũ ire yũ wererare dũyasodiagũ õpa masiporo ãgũ: Irire yũ arĩdiro dopa ta eropa dihta iiniguicãa mari. Gajirã Jesu yarã

sã erã gamenererogue eropa dihta iiniguicãma.

Bocatĩrirã erã barisubu goroweoñorã Corinto majarã

¹⁷ Dohpaguere mũare gajinore werebu, “Õaro iirã áhraa,” arĩbeaa yũhũ mũare. Mũa gamenererã õaro iirã iibeaa. Eropirã mũa gamenererore goroweorã iiaa. ¹⁸ Õpa arĩ weremũhtagura mũare: Mũa gamenererogue eropa game dũyatorã mũa basi yujurayeri cururi dũca wariayoro mũa. Gajirã yũre irire erã eropa arĩ werecũ “Diaye ta árĩca,” arĩ pepia yũhũ. ¹⁹ Eropa dũca warirã õpa arĩca mũa: “Dũca wari wiriaro gameca marire Jesu yarã gohra árĩrãpũre ãhmuborore,” arĩca mũa basi. ²⁰ Mũa basi gamenere barã mũa yujuro árĩbirã mari Opũ Jesucristo dorediro dopa diaye ta bocatĩrirã iibeaa. ²¹ Mũa gamenere barã yujurãyeri mũa seyaro bamũhta, ihrimũhta gajirãre corero mariro. Mũa eropiicũ gajirã oaboa wahama. Gajirãpũ merea wahama. ²² ¿Mũa seyaro badiarã duhpirã mũa ya wirigue babeari? ¿Eropirã duhpirã dohpaguere Goãmũ yarã gamenererore “Duhpiburi árĩbeaa,” arĩdiari? ¿Eropirã duhpirã Jesu yarãre mojomorocũrãre bari moorãpũre mũa gũhyasiũro taricũ iiri? ¿Dohpa arĩ weregũcuri yũhũ mũare? Õaro iirã iiaa mũa, arĩbeaa yũhũ.

Goãmũ yare bocatĩrirã diaye erã iiburire werepũ Pablo

²³ Goãmũ yare bocatĩriburire mari Opũ Jesu weremi yũre. Eropa ãgũ wererare yũpũ mũare irire werebũ. Iri õpa áhraa: ãgũre ãhaturĩrãre Juda ãgũ sihurisubu iri ñami ta mari Opũ Jesucristo panrure aĩ, ²⁴ Goãmũre “Õhaa,” arĩpũ. ãgũ eropa arĩra pũhrũ iriru panrure nuha, ãgũ buherãre guerepũ. Eropa gueregũ õpa arĩpũ: “I yũ dũpũ áhraa. Mũa ya árĩburire sĩrigũca. Yũre mũa guñaburire yũhũ dohpaguere mũare ãhmuro dopa aĩ baque,” arĩpũ Jesu mari Opũ. ²⁵ Erã bara pũhrũ ãgũ panrure aĩdiro dopa ta ihriripare aĩgũ õpa arĩpũ: “Mũa ñeri iirare cóãbu sĩrigũca. Eropa iigũ yũ dire cóãgũca. Yũ di cóãra mera Goãmũ masare ‘Mũa mera amugũra,’ ãgũ arĩdiro ojogorocũroca. Ipa dicũre ihrirã yũ di cóãrare guñarãca. Ire ihrirã mũa yũre guñaburire yũhũ mũare ãhmudiro dopa iique,” arĩpũ Jesu. ²⁶ Yũ werediro dopa ta iru panrure mũa barã, ihririre ihrirã, Jesu mari Opũ mari ya árĩburire ãgũ sĩrirare ãhmurã iiaa mũa. Eropa ãhmuniguirãca mũapũ ne ãgũ i yebague ãgũ dujaracũgue.

Goãmũ yare bocatĩrimorã õpa iique, arĩ gojañumi Pablo

²⁷ Mũa Goãmũ yare bocatĩrimorã gamenere baha, ihrirã, umupeoro mariro gũhyadiaro mariro iirã dipuwajacũrãca.

Eropa iirã mari ya áriburire Jesucristo ïgu ðupure ïgu di cóãra sãre wereyaro dopa iirã iiaa mũa. ²⁸⁻²⁹ Õpa arĩ guñaro gahmea: “Mari Jesu yarã gamenererã yuju curu yuju ðupũ iro dopa ãhraa. Mari Jesucristo yarã ãhraa,” arĩ guñaro gahmea. Irire queoro guñabirã, mari iri panrure baha, ihriripare ihrirã queoro iibirã mari dipuwajacũmorã áriřãca. Eropirã mari bocatĩriboro core mari áriřicũrire guñamũhtarõ gahmea ñero iiri arĩrã. Eropa iira pũhrũ bocatĩri ihri bamasia mari. ³⁰ Eropa guña amubirira waja bajarã mũa mera majarã dorecurã áriřcoma. Erã yujurãyeri turabirã áriřcoma. Eropirã gajirã erã eropa iira dipuwaja sĩa wañuma. ³¹ Erã baha, ihriboro core erã áriřicũrire õaro guña, erã ñeri iirire duhunirã, erã ñeri dipuwajare dipuwajacũbiriboñuma. ³² Mari Opũpũ marire ïgu yarãre dipuwaja moagu mari ñeri iirire duhucũ iigu iimi. Jesure gamebirãre ïgu dipuwaja moaboro dopa marire dipuwaja moabiriborore eropa iimi. Mari peamegue wabiriborore dohpaguere marire dipuwaja dabero moami mari Opũ.

³³ Eropirã yũ acawererã, bocatĩrimorã gamenererã, mũa basi corenique. ³⁴ Eropirã mũa mera majarã oaboarã, erã ya wihigue bamũtaporo. Eropirã bocatĩrimorã õaro gamenere baque mũa ñero dipuwajacũrã wabiriborore. Gajinore werediarabũ mũare. Pũhrũ yũ basi ejagu mũare weregũra irire.

12

Goãmũ ya áriburire mari mohmeburire apigu marire irire iimasicũ iimi Espĩritu Santo, arĩ gojañumi Pablo

¹ Yũ acawererã, õpa mũare weregu ire mũare masicũ gahmea. Goãmũ ya áriburire mari mohmeburire apigu marire áriřehrerãre irire iimasicũ iimi Espĩritu Santo.

² Mũa Jesu yarã áriñibirã gajiropa áriři buherire pee nũrũrã áriřã, mũapũ goãmarã wéanirãre umupeoyoro. Noho mũa bocarãre wereniguibirãre umupeoyoro. Irire masia mũa. ³ Eropa áriñirã mũa áriřcũ dohpaguere õpa arĩ werediaca mũare. Espĩritu Santo itamuri mera wereniguirã “Jesu ñero waporõ,” ne arĩmasibeama. Eropirã Espĩritu Santo itamuri mariro wereniguirãpũ “Jesu áriřehrerã wecague opũ mari Opũ ãhrimi,” arĩmasibeama.

⁴ Goãmũ ya áriburire mohmemasiburi baja ãhraa. Irire marire iimasicũ iigũpũ yujugũ ta ãhrimi. ïgu Espĩritu Santo ãhrimi. ⁵ Eropiro Goãmũ ya áriburire iimasiri mera mari mohmeburi baja ãhraa. Irire mari iiburire doregu yujugũ ta mari Opũ Jesu ãhrimi. ⁶ Mari ïgu yarã ïgu ya áriburire iimasiri mera mari mohmeri yujuropa ta

árĩbeaa. Iri mohmeri òaro wacũ iigu yujugu ta Goãmũ àhrimi. ⁷ Espíritu Santo marire Jesu yarã nũcure mari iimasiburire apigu Goãmũ turarire ihmugũ iimi. Òpa ta iimi ìgũ Jesu yarãre árĩpehrerã mari òaro mohmeboro dopa. ⁸ Yujurãyerire òaro masiri mera werecũ iimi Espíritu Santo ta. Eropigu gajirãre Goãmũ yare òaro buhecũ iimi ìgũ Espíritu Santo. ⁹ Eropigu gajirãre “Mari Goãmũ mera òaro iimasia,” arĩ Goãmũre guñaturacũ iimi Espíritu Santo ta. Eropa iigu gajirãre turarire Espíritu Santo ta ohomi ìgũ. Iri turarire ìgũ ocũ erãpũ dorecũrãre òarã wacũ iima. Espíritu Santo yujugu ta árĩgũ iri turarire ohomi. ¹⁰ Eropigu ìgũ gajirãre deyoro moarire iimasicũ iimi ìgũ. Eropa iigu Goãmũ yare òaro weretaumasicũ iimi ìgũ gajirãre. Eropa iigu gajirã Jesu yarãre buherire òaro beyemasicũ iimi ìgũ. Eropa masirã watĩ ya buheri árĩcũ masima erã. Espíritu Santo gohra ya iri buheri árĩcũ sãre masima erã. Eropigu gajirãre erã peeyamarirã yare wereniguimasicũ iimi ìgũ. Eropigu peeyamarirã yare erã wereniguicũ gajirãre weretaumasicũ iimi. ¹¹ Iri árĩpehrerire iimasirire apigu ta Espíritu Santo ta yujugu ta àhrimi. Ìgũ gamero dopa ta marire yujurãyerire mari mohmeburire apimi.

Cristo yarã árĩrã yuju curu ta àhraa mari, arĩ gojañumi Pablo

¹² Werenigui queori mera mũare weregura: Mari dũpũ yuju dũpũ árĩquerecũ ta, mojotori, cuiiri, guburi, gamiri, ìri tamera baja àhraa mari dũpũre árĩri. Eropa àhraa mari Cristo yarã. Bajarã árĩquererã ta yuju dũpũ iro dopa ta yuju curu ta àhraa ìgũ mera. ¹³ Eropirã Cristo yarã árĩrã ìgũ dũpũ iro dopa yuju curu ta àhraa mari. Judio masa, judio masa árĩbirã, pohro majarã, pohro majarã árĩbirã, baja cururi árĩquererã ta yujugu árĩgũ ìgũ dũpũ iro dopa yuju curu ta àhraa mari. Espíritu Santo yujugu ta árĩgũ ìgũ turari mera waĩyesũnirã marire yuju curu Cristo yarã árĩcũ iimi. Eropirã mari árĩpehrerã yujugu Espíritu Santore opaa Cristo ya curu majarã árĩrã.

Eropirã mari Cristo yarã yuju dũpũ iro dopa àhraa. ¹⁴ Mari dũpũ yuju dũpũ árĩquerecũ ta mojotori, cuiiri, guburi, gamiri iri mari dũpũ árĩri baja àhraa. ¹⁵ Mũ guburo wereniguiri guburo árĩro òpa arĩboya mũre gajiropa arĩro: “Mũ mojoto árĩbeaa yũhũ. Eropiro mũ dũpũ maja árĩbeaa yũhũ,” arĩboya. Mũ guburo eropa arĩquerero ta mũ dũpũ maja árĩro ta iiaa. ¹⁶ Mũ gamiro wereniguiri gamiro árĩro òpa arĩboya mũre: “Mũ cuiuru árĩbeaa yũhũ. Eropiro mũ dũpũ majaru árĩbeaa yũhũ,” arĩboya. Mũ gamiro eropa arĩquerero ta mũ dũpũ maja gamiro árĩro ta iiaa.

17 ¿Mari dũpũ cuiru dihta árĩcũ dohpa peebocuri mari? Masiya mara. ¿Eropirã mari dũpũ gamiro dihta árĩcũ dohpa ii wĩji pepibocuri mari? Masiya mara. 18 Eropa árĩbeaa mari dũpũ. Ōpa ãhraa. Mari dũpũ árĩrinore árĩpehrerire Goãmũ ĩgũ gamero dopa ta apidi árĩmi mari dũpũre. 19 ¿Mari dũpũ árĩri maricũ dohpa waboyuri mari dũpũ? Mariboya. 20 Mari dũpũ ōpa ãhraa: Yuju dũpũ árĩquerecũ ta mari dũpũ árĩri baja ãhraa. Eropa ta mari Jesu yarã yuju dũpũ iro dopa árĩquererã bajarã ãhraa mari basi game itamumorã.

21 Eropiro mũ cuirupũ mũ mojtore “Mũ itamucũ gamebeaa,” arĩmasibea. Eropiro mũ dipuru mũ guburire “Mũ itamucũ gamebeaa,” arĩmasibea. 22 Gaji mari dũpũ árĩrĩre “Bu árĩñariri ãhraa,” mari arĩripũre ƣpũtũ gahmea mari. 23 Eropirã gaji mari dũpũ árĩrĩre “Bu árĩñariri ãhraa,” arĩ pepia. Eropirã irire ōaro deyoporo arĩrã ōaro ahmua. Eropirã gaji mari dũpũ árĩrĩre mari gũhyasĩrisãrĩre ōaro ahmua ōaro árĩboro dopa. 24 Gaji mari dũpũ árĩrĩre mata ōari deyoripũre eropa amubeaa mari. Goãmũ mari dũpũ árĩri yujuñe gajĩñere gamebircũ iibiridi árĩmi. ĩgũ mari dũpũ árĩrĩre árĩpehrerire ōaro amudigũ árĩmi yuju dũpũ ōaro dũpũcũburire. Eropa ĩgũ “Bu árĩñariri ãhraa,” mari arĩripũre mari ōaro gamecũ iimi. Eropa ta ne yujugũre Jesu yagũre “Bu árĩgũ ãhrimi,” arĩmasibea mari. 25 Eropa ta árĩdoredi árĩmi Goãmũ mari dũpũ árĩri yujuro mera iri basi game itamuboro dopa. 26 Mari dũpũ árĩri yujuñe ñero taricũ gaji mari dũpũ árĩri sã ñero taria. Eropiro mari dũpũ árĩri yujuñe ōaro árĩcũ mari dũpũ árĩpehrero ōaro pepia.

27 Eropa arĩgũ ōpa arĩdiagũ iiaa mũare: Mũapũ Cristo ĩgũ dũpũ iro dopa árĩrã yuju curu ta ãhraa. Eropirã árĩpehrerã mũa ĩgũ dũpũ árĩri iro dopa ãhraa ĩgũ yarã árĩrã. 28 Eropigũ Jesu yarã gamenererã watope mari game itamuburire apidigũ árĩmi Goãmũ marire. Ōpa apipũ ĩgũ marire: Yujurãyeri gũare buhedoregũ Cristo apimũhtadigũ árĩmi. Ero pũhrũ gajirãre ĩgũ yare weretaumorãre apidi árĩmi. Ero pũhrũ gajirãre Jesu yarãre buhemorãre apidi árĩmi. Eropigũ gajirãre deyoro moarire iimorãre, gajirãre dorecurãre erã taricũ iimorãre, erã pũhrũ gajirãre masare itamumorãre, gajirãre oparã árĩmorãre apidi árĩmi. Ero ojogoro peyamarĩrã yare wereniguimorãre apidigũ árĩmi marire. 29 Eropa ĩgũ apicũ árĩpehrerã yujuropa iimorã árĩbeaa mari. Mari árĩpehrerã Jesucristo yare buhedore ĩgũ apinirã árĩbeaa mari. Eropirã Goãmũ ĩgũ yare weretaurã mari árĩpehrerã árĩbeaa. Eropirã árĩpehrerã

masare buherã árĩbeaa. Eropirã mari árĩpehrerã deyoro moarire iimasirã árĩbeaa mari. ³⁰ Eropirã mari árĩpehrerã dorecurãre taumasirã árĩbeaa mari. Eropirã mari árĩpehrerã peeyamarirã yare wereniguimasimorã árĩbeaa. Eropirã gajirã erã wereniguirire weretaumasi-morã mari árĩpehrerã árĩbeaa. ³¹ Eropirã Goãmũ ya árĩburire mohmemasiburiñere gamerã õaripure turaro gameque mũa. Eropigu árĩpehreri yũ arĩra tauro õaro mũa iiburire dohpaguere weregura yũhũ.

13

Gajirãre erã õaro mahiburire, umupeoburire wereñumi Pablo

¹ Peeyamarirã yare masa ya wereniguirire, anyua ya sãre wereniguimasiquererã ta gajirãre mahibirã, duhpimorã árĩbiriboya mari. Eropiro mari wereniguri sã eropa bũsumaacãboaya mari gajirãre mahibirã árĩrã.

² Goãmũ yare õaro weremũhtamasiquererã ta gajirãre mahibirã bu árĩmaacãrã árĩboya mari. Eropirã masa erã masibirirare Goãmũ yare árĩpehreri masiri masipeho-quererã ta gajirãre mahibirã, bu árĩmaacãrã árĩboya mari. Goãmure õaro umupeotariri mera utãgu “Gajipugue waporo,” arĩrã wadoremasicquererã, mari gajirãre mari mahibirã bu árĩrã árĩboya. ³ Mari yare árĩpehrerire mojomorocurãre oquerecũ ta erãre mahibiricũ iri mari ora duhpiburi árĩbiriboya. Eropirã Goãmũ ya árĩburire mari iira dipuwaja mari dupure gajirãpũ soequerecũ ta, gajirãre mari mahibiricũ iri duhpiburi árĩbiriboya.

⁴ Gajirãre mahirã mata guabeaa erã mera. Erãre mahirã õaro iiaa. Eropirã gajirãre mahirã erã marire opanemocũ ãhaturibea. Eropirã mari mahigu mera árĩrã “Mũ tauro árĩgu ãhraa yũhũ,” arĩrã iibea mari. Gajirãre mahirã, “Erãre masitarinũgaa,” arĩ pepibea. ⁵ Eropirã gajirãre mahirã erãre umupeori mera queoro iiaa mari. Gajirãre mahirã mari ya árĩburi dihtare guñabeaa. Erã ya õaro árĩburi sãre guñaa. Eropirã erãre mahirã disitĩri wereniguibea mari. Eropirã marire erã ñero iicũ sãre erã mera guawajabeaa mari. ⁶ Gajirãre mahirã erã ñero iirire mucubiribea mari. Diaye majapure erã iicũ ãarã bũrigã mucubiria erã mera. ⁷ Gajirãre mahirã erã ñeri iicũ gajirãre ne quere moabeaa. Eropirã gajirãpũ erãre erã werewuacũ peequererã ta irire peediabeaa mari. Õari dihtare peediaa mari. Gajirãre mahirã “Õarire iirãcoma,” arĩ cohrea mari erãre. Gajirãre mahirã erã iira mera mari ñero tariquererã ta erãre mahi duhusome mari.

⁸ Gajirãre game mahiri ne pehresome. Goãmũ yare weretauripũ pũhrũ duhpiburi árĩsome. Peeyamarirã ya wereniguiri sã pehrea waroca. Goãmũ yare masitariri wajamariroca pũhrũgue. Mari masipehora pũhrũgue duhpiburi gohra árĩsome iri. ⁹ Dohpaguere Goãmũ yare mari merogã masia. Eropirã mari ãgũ yare wererã mari merogã weremasia. ¹⁰ Pũhrũgue ta mari masipehorãca. Eropiro mari merogã masira duhpiburi árĩsome. Irisubugue masipehorãca.

¹¹ Iri õpa ãhraa: Majigũ árĩgũ majigũ dopa werenigu-iribũ yũhũ. Eropigũ majigugã dopa pepiribũ. Eropigũ bugũ wagũ majigũ iro dopa árĩrare duhcãbũ. Eropa ta pũhrũguere mari dohpaguere merogã masirare duhura pũhrũ masipehorãca. ¹² Diuru õaro masũre deyocũ iibiro dopa ta dohpaguere õaro masipehonibea dohpa mari. Pũhrũ Goãmũre mari õaro ãhamasirãgue mari masipehorãca. Dohpaguere mari merogã dihta masia dohpa. Goãmũ marire ãgũ masipehodiro dopa ta pũhrũ mari sã õaro masipehorãca.

¹³ Eropirã dohpaguere mari iimasiburi ãhreñe dujaroca. Goãmũre “Diaye ta árĩgũ ãhrimi,” arĩ umupeoniguirãca. Eropirã marire ãgũ mera õaro árĩniguiburire mucubiri coreniguirãca. Eropirã gajirãre game mahiniguirãca. Goãmũre umupeori, ãgũ mera árĩborore mucubiri coreri tauro ãhraa game mahiripũ.

14

Peeyamarirã yare wereniguirire wereñumi Pablo

¹ Eropirã gajirãre game mahirã árĩque mũa. Eropirã Goãmũ ya árĩburire mũa mohmemasiburire Espĩritu Santo ãgũ apirare turaro gameque. Goãmũ yare mũa weremasi-buri tamerare burigã gameque mũa. ² Peeyamarirã yare wereniguigũ Goãmũ dihta peeborore wereniguimi. Eropa arĩ wereniguigũ masa peeborore wereniguigũ iibeami ãgũ. ãgũ eropa arĩ wereniguicũ peerã masapũ ne peebeama ãgũre. Masa erã masibiririre Espĩritu Santo ãgũ turari mera wereniguigũ iimi ãgũ. ³ Goãmũ yare weretaugupũ masapũ peeburire weremi. Eropa weregũ ãgũ masare itamugũ iimi ãgũ. Eropigũ erãre Jesucristore umupeonemocũ iimi. Eropigũ ãgũ erã ñero taricũ ãgũ erãre õaro sĩporãcũcũ iimi. ⁴ Peeyamarirã yare wereniguigũ ãgũ basi dihtare Jesucristore umupeonemocũ iimi. Gajirãre Jesucristore umupeonemocũ iibeami. Goãmũ yare weretaugupũ gajirãre Jesu yarã gamenererãre Jesucristore umupeonemocũ itamumi ãgũ.

⁵ Peeyamarirã yare árîpehrerã mua wereniguicũ ðaboya yu pepicũ. Eropa árîquerecũ ta Goãmũ yare mua weretaucũ tamerare turaro gahmea. Goãmũ yare weretaugũ peeyamarirã yare wereniguigu tauro ðagu ãhrimi. Eropa árîquerecũ ta peeyamarirã yare wereniguigu ïgu wereniguirire gajigu ïgu weretaucũ ïgu sã ðagu dujami. ïgu wereniguirire weretaugu Jesu yarã gamenererãre Jesucristore umupeonemocũ iimi. ⁶ Eropigu, yu acawererã, yuhũ mua pohrogue peeyamarirã yare wereniguigu wagu muare itamumasibiriboya yuhũ. Goãmũ ïgu yure wererare weregu itamua. ïgu yare Espiritu Santo yure masicũ iirare buhegu muare itamugu iiaa.

⁷ Peeyamarirã ya wereniguigu ïgu wereniguiiri mari peebiro ðpa iro dopa ãhraa. Tarusure purirã, mari buamutẽriñere irire mari queoro iibiricũ, iri bayarire gajirãre masima masiya mara. ⁸ Eropigu cornetare purigu surara árïgu erã gamewejẽboro corere queoro ïgu puribiricũ gajirã surarapu masisome erã gamewejẽboro gamenererore. Eropirã erã gamewejẽboro core erã wejẽburi mojore amuyubirã ãhrima erã. ⁹ Eropa ta mua sã peeyamarirã yare wereniguicũ peerã gajirã irire peebeama. Eropa peebiricũ mua wereniguiiri duhpiburi árîbeaa erãre. ¹⁰ I yebare baja wereniguiiri árïca. Eropirã irire wereniguirã erã basi erã eropa wereniguirire ðaro peema. ¹¹ ïgu ya wereniguirire yu peebiricũ ïagu irire wereniguigũpu "Gajirã yare wereniguimi," arï pepicumĩ yure. Eropigu yu sã eropa ta arï pepica ïgure. ¹² Eropirã mua peeyamarirã yare wereniguirã, Espiritu Santo ïgu yare mohmemasi apira mera turaro mohmediaraa mua. Irire eropa iidiarã Jesu yarã gamenererãre ðaro itamuburipure burigã mohmediaque mua.

¹³ Eropigu peeyamarirã yare wereniguigu "Yu wereniguirire gajirãre ðaro weretaumasiburire itamuque yure," Goãmure arï serẽporo ïgu. ¹⁴ Peeyamarirã ya mera Goãmure serẽgu yu pepiri mera serẽgu iiaa. Eropa serẽgu yu pepirire masibigu yu wereniguirire masibea. Eropa iigu gajirãre itamubeaa yuhũ. ¹⁵ Ire masirã, ðpa iirãca mari: Espiritu Santo ïgu turari mera peeyamarirã ya mera Goãmure serẽrãca. Eropirã gajisubu ðaro masi pepirã gajirã erã ðaro peeboro dopa erã ya mera Goãmure serẽrã iri sãre serẽrãca mari. Espiritu Santo ïgu turari mera peeyamarirã ya mera Goãmũ yare bayarãca. Eropirã gajisubu ðaro masi pepi gajirã erã ðaro peeboro dopa erã ya mera Goãmure bayarãca. ¹⁶ Mari eropa iibiricũ peeyamarirã ya mera wereniguirã Espiritu Santo

ĩḡũ turari mera Goãmũre, “Ōagũ turagũ áhrimi,” mari arĩquerecũ ta gajirã ne peebeama. Erã eropa peebirã “Diaye ta áhraa,” arĩmasibeama. ¹⁷ Peeyamarirã ya mera Goãmũre “Ōhaa,” arĩmasia mari. Mari eropa arĩri ôaro árĩquerecũ ta gajirã peebeama. Eropirã erãre Jesucristore umupeonemocũ itamubeaa mari. ¹⁸ Árĩpehrerã mũa tauro yũpũ peeyamarirã yare wereniguia. Eropigũ Goãmũ yũre eropa wereniguimasigũ ĩḡũ iicũ ĩḡũre “Ōhaa,” arãa yũhũ. ¹⁹ Eropa wereniguigũpũ yũ árĩquerecũ Jesu yarã gamenererã watope peeyamarropa peebirã “Diaye ta áirã ya mera yoari boje yũ wereniguiquerecũ duhpiburi árĩbeaa erãre. Yũhũ masa erã ôaro peemasiboro dopa buheḡũ merogã yũ buhequerecũ ta iri tamera ôapũrica erãre.

²⁰ Yũ acawererã, majirãḡã pee masibirãḡã iro dopa árĩbircãque mũa. Mũrã erã pee masirã árĩro dopa árĩque mũa. Eropirã ne masa dehyoarã erã ñeri iirire erã masibiro dopa ta árĩque mũa. ²¹ Goãmũ yare erã gojarapũ ôpa áhraa Goãmũ wereniguirire: “Gajirã ya queo wererãre oã masare yahare weredoreḡura. Eropigũ gaji yeba majarã masare ôarire yahare weredoreḡura oã masare. Yũ eropa weredorequerecũ ta erã yũre peesome yũ wererire,” arĩmi Goãmũ mari Opũ, áhraa Goãmũ yare erã gojarapũḡue. ²² Peeyamarirã yare wereniguirĩ Goãmũre umupeobirãre erãre ĩhmuri áhraa. Eropiro peeyamarirã yare wereniguirĩ Jesu yarãpũre Goãmũ turarire ĩhmuri árĩbeaa. Eropiro Goãmũ yare wereripũ Jesure gamebirãre Goãmũ turarire ĩhmuri árĩbeaa. Goãmũ yare wereripũ Jesu yarãpũre Goãmũ turarire ĩhmuri áhraa. ²³ Eropirã mũa Jesu yarã gamenerecũ, peeyamarirã yare mũa árĩpehrerã wereniguicũ, Goãmũ yare masibirã gajirã Jesure umupeobirã sã ñajari peebocoma. Mũa eropa wereniguicũ peerã, erã mũare “Cue, goroweorã wahama,” arĩbocoma erã. ²⁴ Árĩpehrerã mũa Goãmũ yare mũa werecũ tamera Goãmũ yare masibigũ, Jesure umupeobigũ sã ñajari peegũ, ĩḡũ ñero iirare masigũcumĩ ĩḡũ. Eropigũ ĩḡũ ñeri iirare bujawerebocumi ĩḡũ. ²⁵ Eropigũ ĩḡũ árĩricũrĩre ĩḡũ pepiri sãre ḡuñagũcumĩ ĩḡũ. Eropigũ mereja Goãmũre “Yũ opũ áhrimi,” arĩḡũ umupeogũcumĩ. Eropigũ “Goãmũ diaye ta mũa mera áhrimi,” arĩḡũcumĩ ĩḡũ mũare Goãmũ yare werecũ peegũ.

Mũa gamenererã ôaro iique goroweoro mariro, arĩ gojañumi Pablo

²⁶ Eropigũ, yũ acawererã, mũare ire arĩḡũ iiaa: Mũa gamenerecũ yujurãyerĩ mũa mera majarã Goãmũ yare

bayadiama. Eropirā mũa gajirā buhediaa. Eropirā gajirā Goãmũ mũare ĩgu wererare werediaa. Eropirā mũa gajirā peeyamarirā yare wereniguidiaa. Eropirā mũa gajirā ĩri wereniguirire weretaudiaa. Mũa eropa iirā gajirāre erā Jesucristore umupeonemoboro dopa ĩrire iique. ²⁷ Eropirā peeyamarirā yare mũa wereniguirā mũa perā o Ƴrerā, erā nũcũ ta wereniguique mũa gamenererisubu. Eropirā yujurāyeri wereniguique. Mũa eropa wereniguicũ, yujugu mũa mera majagu mũa wereniguirire gajirāre weretauporo. ²⁸ Mũa wereniguirire weretaubu maricũ mũa gamenererogue peeyamarirā yare wereniguibiricāque. Eropirā mũa seyaro peeyamarirā yare Goãmũ mera wereniguique. ²⁹ Eropirā Goãmũ yare werediarā perā o Ƴrerā ĩripēta wereque mũa. Mũa eropa werecũ gajirā mũare peerā mũa wererire Goãmũ ya árĩcũ ōaro masiporo. Eropirā Goãmũ ya árĩbiricũ säre ōaro masiporo. ³⁰ Eropigu Espĩritu Santo Goãmũ yare gajigũre ero doagũre ĩgũre wererĩ ocũ, ĩgu sã Jesu yarāre werediami. ĩgu werediacũ ĩha Goãmũ yare weremũhtagũpũ werenigui duhuporo. ³¹ Eropirā mũa árĩpehrerā Goãmũ yare wererā, yujurāyeri wereque mũa árĩpehrerā gajirā erā ōaro peeboro dopa, erā ōaro mucubiriboro dopaa. ³² Eropirā Goãmũ yare wererā árĩrā, ōaro pee masirā, ōaro peenānugu wereniguirā árĩque. ³³ Goãmũ ĩgu yarā erā gamenererogue erā game wisicũ gamebeamĩ ĩgu. Goroweoro mariro erā ōaro árĩcũ gahmemĩ ĩgu. Eropirā ōaro iique mũa árĩpehrerogue Jesu yarā gamenererā.

³⁴ Árĩpehrero Jesu yarā gamenererore nomere wereniguibiricāro gahmea. Erā nomere maripũ wereniguidorebeaa. Goãmũ yare erā gojarapũ sã arĩro dopa ta nomere mũare ōaro yũhrirā nome arĩro gahmea. Eropirā mũa gamenererore nome masare werebiricāporo. ³⁵ Jesu yarā erā gamenererore nome erā wereniguicũ ōabeaa. Eropigo gajinore masidiago nomeo igo ya wihigue ta igo marapũre serēpiporo.

³⁶ Ire yũ wereburi ōaro masique mũa. Goãmũ yare weremũhtarā árĩbeaa mũa. Eropirā ĩgu yare peenirā mũa dihta árĩbeaa. Gajirā sã ĩgu ya buherire opama. ³⁷ Mũa mera majagu “Yũ tamera Goãmũ yare weregu āhraa,” arĩ pepibocumi. Eropa arĩ pepigu ĩ yũ mũare gojarare “Goãmũ dorerĩ ta āhraa,” arĩ masiporo ĩgu. Eropigu gajigu, “Espĩritu Santo iimasiburire ĩgu apirare ōaro opaa yũhũ,” arĩ pepibocumi. Eropa arĩ pepigu ĩgu sã ĩ yũ mũare gojarare “Goãmũ ya dorerĩ ta āhraa,” arĩ masiporo. ³⁸ ĩrire ĩgu masidiabiricũ yũ gojarare “Diaye árĩbeaa,” ĩgu arĩcũ ĩgũre

duhucãque. Peebircãque ïgure.

³⁹ Eropirã yu acawererã, Goãmu yare weremasiburire burigã gameque mua. Eropirã mua mera majarã mua gamenererogue peeyamarirã ya erã wereniguidiacũ, "Wereniguibircãque," arĩbircãque erãre. ⁴⁰ Eropa iirã òaro iique. Eropirã gamenererã òaro game, goroweoro mariro iique mua.

15

Cristo ïgu masa mũriarare werepu Pablo

¹ Dohpaguere yu acawererã, òari buherire yuhũ mũare wererare mũare guñacũ iidiaca. Iri buherire òaro peebu mua. Eropa peerã iri buherire umupeonijarã òaro ãhraa mua. ² Mua eropa umupeocũ irire mua cóãbircũ Cristo mũare peamegue wabonirãre taugũcumi. Mua eropa peera pũru Cristo yare mua duhucãcũ iri mua peera duhpiburi arĩbiriboya.

³ Òpa arĩ weremũhtagura mũare. Bu gohra arĩbeaa. Mũare buhegu yure Cristo ïgu wererare òpa arĩ werebu: Goãmu yare erã arĩ gojayudiro dopa ta mari ñeri wajare Cristo sĩripũ. ⁴ Eropigu Goãmu yare erã arĩ gojayudiro dopa ta Cristo ïgu sĩrira pũru gajirã ïgure erã yaara pũru uhrenũ waboro ïgu masa mũriapũ. ⁵ ïgu eropa masa mũriara pũru Pedrore dehyoapũ. ïgu eropa dehyoara pũru ïgu buherãre doce mera majarãre dehyoapũ daja. ⁶ Erãre dehyoara pũrũre yujusubu ta quinientos weca arĩrãre ïgu yarãre dehyoapũ daja. Gajirã ïgure ïanirã sĩrituhañorã. Gajirã ïgu ïanirã bajarã erã mera majarã arĩnirã dohpaguere arĩnima. ⁷ Pũru Cristo Santiagore dehyoapũ daja. Eropa ïgu dehyoara pũru arĩpehrerã ïgu buhedore apinirãre dehyoapũ daja.

⁸ Arĩpehrerã gajirãre ïgu dehyoara pũru yu sãre dehyoami daja. Majigugã queoro masa deyobigugã ïgu masa dehyoanũrsiadiro dopa ta yu sã Jesure umupeo nũrsiagu ãhraa. Yu eropa arĩcũ erã pũrũre dehyoami Jesu yu sãre. Yure ta ïgu dehyoatumi pare. ⁹ Ero coregue Jesu yarãre ñero iiribũ. Eropa iidigu arĩgu gajirã Jesu ïgu apinirã arĩpehrerã erã docague gohra ãhraa yuhũ. Eropigu dohpague sãre Jesu ïgu buhedore ïgu apibodigu arĩbiriribũ yuhũ. ¹⁰ Eropa arĩqueregu ta Goãmu ïgu yure mahicũ dohpaguere Jesu ïgu apidigu ãhraa yu sã. Eropigu ïgu yure mahicũ dohpaguere ïgu gamerire iipehoa. Eropigu ïgu yure mahicũ ïgu yagu eropa arĩcãgu iibeaa. Arĩpehrerã gajirã ïgu apinirã tauro yũpũ turaro mohmeabũ. Eropa mohmegũ

yū gamero iri mohmerire iibirabū. Goāmū yūre mahigu yūre itamuami. ¹¹ Yūhū mūare ōari buherire buhegū yū árīcū erā mūare buherā árīcū sāre yujuropa āhraa. Gūapū ire buherā árīquererā ta bu gohra árīrā iiaa. Gūa buheripū bu árīri árībeaa. Eropirā mūapū i buherire ōaro peabū.

Sīrinirā mūra erā masa mūriaborore werepū Pablo

¹² Cristo ĩgū sīrira pūhrū ĩgū masa mūriarare gūa buhequerecū “Sīrinirā mūra ne masa mūriabeama,” arīma mūa mera majarā yujurāyeri. ¿Dohpa arīrono eropa arīri erā irire? ¹³ Ōpa masiporo erā. Sīrinirā mūrare Goāmū masa mūriacū iibigu Cristo sāre ne masa mūriacū iibiriboñumi. ¹⁴ Eropigu Cristo ĩgū masa mūriabiricū ōari buherire gūa werera ne waja mariboya. Mūa ĩgūre umupeori sā waja mariboya. ¹⁵ Masa mūriari maricū gūapū Goāmū yare wererā gūyarā iiboya. Sīrinirā mūra erā masa mūriabiricū Goāmūpū Cristore masa mūriacū iibiriboñumi. ĩgū eropa iibiricū gūa “Goāmū Cristore masa mūriacū iipū,” arīrā gūyarā iiboya. ¹⁶ Sīrinirā mūrare Goāmū masubigu, Cristo sāre ĩgū masubiriboñumi. ¹⁷ Eropiro Cristo ĩgū masa mūriabiricū ĩgūre mūa umupeori waja mariboya. Eropiro mūa ñeri dipuwajacurā árīboya dohpa peamegue wamorā. ¹⁸ Masa mūriariñe maricū Cristo yarā mūra sīrimūhtanirā mūra peamegue wamorā árīboñuma. ¹⁹ Cristore mari umupeora pūhrū mari sīrirāgue mari masa mūriamasibirimorā árīrā árīpehrerā masa tauro mojomorocurā árīboya maripū. Eropirā ĩgūre umupeorā bu gohra árīrire umupeorā iiboya mari.

²⁰ Eropa árībeaa. Diaye ta Goāmū Cristore ōaro masa mūriacū iicādi arīmi. Cristo ĩgū masa mūriara pūhrū mari sā sīrirāgue masa mūriamorā ta āhraa. ĩgū eropa masa mūriagu, Cristo masa mūria gubuyecūñumi marire. ²¹ Ōpa ta āhraa i: Adán masū árīmūhtadigu ĩgū ñerire iinūgara pūhrū masa sīrinūgañuma. Eropigu gajigu masū Jesucristo ōarire ĩgū iira pūhrū sīrinirā mūra masa mūriamasima. ²² Adán yarā árīnūrusiarāgue mari árīpehrerā sīrirāca. Eropa ta Cristo yarā mari árīcū mari sīrira pūhrū marire masa mūriacū iigūcumi Goāmū. ²³ Yujurāyeri cururi marire Goāmū sihurisubu masa mūriarāca. Cristo marire árīmūhtadigu masa mūriamūhtapū. Pūhrū ĩgū i yebague dujaricū ĩgū yarā sā masa mūriarācoma. ²⁴ Irisubu ta i ūmū pehrerinū árīroca. Eropigu árīpehrerā ñerā oparāre, dorerāre, turarāre Cristo cóagūcumi. ĩgū eropa iira pūhrū árīpehrerā weca opū ĩgū árīrare wiagūcumi Goāmūre mari Pagūre. ²⁵ ĩgū wiaboro core mari Pagū

Cristore ìhaturirãre ìgu tarinugapehoboro core Cristo tamera árípehrerã weca opu árígucumi. Eropa iibu ta áríro gahmea ìgure. ²⁶ Ìgure ìhaturirãre ìgu cóãra puhru síririñe sãre pehrecũ iigucumi ìgu. ²⁷ Goãmũ yare gojarapũgue òpa àhraa: “Árípehrerã weca dorebure apipu Goãmũ Cristore. Árípehreri sãre apipu ìgure.” Eropa ta arãa Goãmũ yare erã gojarapũgue. “Árípehrerã weca dorebure apipu Goãmũ Cristore,” arĩ gojagu, “Goãmũ weca doregu Cristo àhrimi ìgu,” arĩdiabiriñumi. Goãmũpu Cristore eropa apiñumi. ²⁸ Árípehrero Goãmũre ìhaturirãre ìgu cóãra puhru árípehrerã weca doregu Cristo Goãmũ magu ìgu árituhagu ìgu opu árírare Goãmũre ìgure apidigũpũre wiagucumi. Eropiigucumi “Goãmũpu árípehrerã weca opu árípehreri opu gohra àhrimi,” árípehrero árípehrerã arĩmasiboro dopa.

²⁹ “Sírinirã masa mũriasome,” arĩma gajirã. ¿Erã arĩri diaye áricũ duhpimorã gajirã masa sírinirã mũra ya áriburire erã waĩyebasanirã àhriri mũa pepicũ? Sírinirã mũra masa mũriabiricũ erã ya áriburire gajirã waĩyebasara duhpiburi áribiriboya.

³⁰ Guaru gũa buheri dipuwaja umuri nucũ gajirã guare erã ñero iidiacũ guhya àhraa gũa sãre. Guare eropa guhyaquerecũ ta masa mũriari áricũ masirã eropa buheniguicãa gũa. ³¹ Mari Opu Jesucristo yarã mũa áricũ ìgure umupeonemorã mũa wacũ yũpu turaro mucubiri pepia yũhũ mũare. Iri diaye ta àhraa. Eropigu “Yũre noho erã gamerinũ wejẽmaja guhya àhrima,” yũ aricũ iri sã diaye ta àhraa. ³² Efeso majarã guarã òari buherire yũ buhera waja yũre pama. Masa mũriariñe maricũ Jesu yagu yũ áribiricũ, yũ ñero tarira waja duhpiburi áribiriboya. Sírinirã mũra erã masa mũriabiricũ òpa arĩboya mari: “Puhruñari sírirãca. Dohpa wasome mari. Eropirã bania, ihrirã, mari gamero dopa iirã,” arĩboya mari.

³³ Eropa arĩ guyarire pepibiricãque mũa. “Ñerãre wapicũrã, òarire mũa iirare cãdijirãca mũa,” arĩma masa. Iri diaye ta àhraa. ³⁴ Òarire pepirã arĩque mũa. Eropirã òarire iirã arĩque daja. Eropirã ñerire iinemobiricãque daja. Gajirã mũa mera majarã ne Goãmũre masibeama. Mũa guhyasĩriburire mũare eropa arãa.

Sírinirã mũra erã masa mũriaborore werenemopũ Pablo

³⁵ Eropi mũa mera majagu òpa arĩ serẽpibocumi yũre: “¿Dohpa ii sírinirã mũra masa mũriarãcuri? ¿Dohpa bejari dupũcũrã masa mũriarãcuri? arĩ serẽpibocumi yũre.

³⁶ Eropa arĩ serẽpigũ pee masibigu àhrimi. Oteriyere

mari oterã iriye boacã gohra puhri wiria. Boabiricã ne puhri wirimasibea. Iriye masia mũa. ³⁷ Puhritaridigu yucuguguerere otebeaa mari. Dipayeri dihtare otea mari. Iriyeri trigo yeri árĩro áhri, o gajiyeri árĩro árĩca. ³⁸ Iriyerire mari otera pũhrũ Goãmũpũ ĩgu gamediro dopa ta iriyerire buga mũriacũ iimi. Eropigu ojodũcayerire ojodũcaũu wacũ iimi ĩgu. Trigo yerire trigo sari wacũ iimi. Eropa ta puhridoremi Goãmũ. ³⁹ Árĩpehrerã dũpũcũri yujuropa deyobea. Masa dũpũpũ yujuropa ta áhraa. Waimũrã dũpũ sã gajiropa ta dehyoa. Mirimagũ porã dũpũ sã gajiropa ta dehyoa. Eropirã wai sã gajiropa ta dũpũcũma. ⁴⁰ Eropirã umaro majarã sã áhrima. Eropirã i yeba majarã sã áhrima. Eropirã umaro majarã dũpũ gajiropa dehyoma. Eropiro i yeba majarã umaro majarã iro dopa árĩbeama. ⁴¹ Őpa ta áhraa. Abe umũ majagũ gosemi. Eropi ñami majagũ sã boje áhrimi ĩgu sã. Yuju diaye ta boyomi. Eropirã necã sã gajiropa bejari goesirima. Necã majarã sãre mari ĩacũ gaji dipu daberogã goesiriri dipu dehyoa. Eropiro gaji dipu turaro goesiriri dipu dehyoa. ⁴² Eropa ta áhrima sĩrinirã mũra erã masa mũriacũ. Masũ ĩgu dũpũre mari yaara pũhrũ ĩgu dũpũ boa waroca. Eropiro gaji dũpũ gajiropa árĩri dũpũ umari nũcũ ojocariburi dũpũ masa mũriaroca. ⁴³ ĩgu dũpũre mari yaacũ sĩridigũ dũpũ ñeri dũpũ áhraa. Goãmũ ĩgũre masucũ ĩgu dũpũ ōatariari dũpũ árĩroca. Eropiro ĩgu dũpũ mari yaara dũpũ turari mariri dũpũ áhraa. Eropiro Goãmũ ĩgũre ĩgu masucũ dũpũ turatariari dũpũ árĩroca. ⁴⁴ I yeba maja dũpũre mari yaarãca. ĩgu sĩridigũ mũrũ ĩgu masa mũriacũ ĩgu dũpũ umaro maja dũpũ ta árĩroca. I yeba maja dũpũre mari opaa dohpaguerere. Pũhrũ umaro maja dũpũ sãre oparãca.

⁴⁵ Eropa ta arĩ werea Goãmũ yare erã gojarapũgue: "I yeba árĩmũhtadigũ Adán waĩcũgũ Goãmũ ĩgũre iicũ ojocarigũ waũumi," arĩ gojaũuma. Adán iro dopa árĩgũpũ ujutũyagũpũ Cristopũ ojocaririre ogũ áhrimi. ⁴⁶ I yeba maja dũpũ árĩmũhtara dũpũ áhraa. Pũhrũgue umaro maja dũpũ árĩroca. ⁴⁷ Őpa ta áhraa: Árĩmũhtadigũ Adánpũ i yeba maja nicu mera Goãmũ ĩgu iira dũpũre dũpũcũũumi. ĩgu pũhrũ aridigũpũ Cristopũ umaro majagũ árĩpũ. ⁴⁸ Nicu mera dũpũcũmũhtadigũ Adán árĩdiro dopa ta mari árĩpehrerã nicu mera iira dũpũcũrã áhraa mari. Eropirã umarogue aridigũ Jesucristo ĩgu árĩdiro dopa ta ĩgu yarã árĩpehrerã ĩgu iro dopa dũpũcũrãca mari. ⁴⁹ Mari Adán iro dopa ta dũpũcũrã árĩrã pũhrũ Cristo iro dopa dũpũcũrãca.

⁵⁰ Yũ acawererã, mũare ire werediaa: I yeba maja dũpũ di mera diro mera árĩri dũpũ Goãmũ ĩgũ opũ árĩroguere umaroguere ne wasome. Mari dũpũ boaburi dũpũ ãhraa. Eropiro umarogue umari nũcũ mari árĩboroguere i dũpũ wasome. ⁵¹⁻⁵² Iribojeguere masa erã masibirirare dohpaguere mũare werediaa: Mari mera majarã yujurãyeri sĩrisome. Eropirã mata erã dũpũre gohrotorã árĩrãcoma. Corneta ĩgũ puriturinũ eropa ta waroca marire. Ōpa waroca: Corneta bũsũra pũhrũ sĩrinirã mũrare Goãmũ masugũcumi umari nũcũ erã árĩmorãre. Eropirã dũpũre gohrotonirã árĩrãca mari sã. ⁵³ Dohpaguere mari dũpũ boaburi dũpũ ãhraa. Eropigũ mari Goãmũ mera árĩniguicãburire mari dũpũre gohrotogũcumi Goãmũ. Eropigũ mari sĩriburi dũpũre gohrotogũcumi mari ne sĩribiriburi dũpũpũre. ⁵⁴ Mari dũpũre ne boabiriburi dũpũre gohrotogũcumi. Eropigũ marire sĩribiriburi dũpũre eropa árĩniguiburi dũpũre gohrotogũcumi. Iri eropa marire gohrotocũ iribojegue Goãmũ yare gojarapũgue arĩ gojadiro dopa ta eropa waroca: Goãmũ sĩririñere cóãcãmi. ⁵⁵ Dohpaguere ne dipaturi sĩrisome. Eropiro sĩririñe mera dipaturi mari ñero tarisome. ⁵⁶ Mari ñeri iira waja árĩcũ tamera sĩririñe mera ñero tarirãca. Eropiro Goãmũ doreri mari iimasibirira waja dipuwajacũa mari. Eropa dipuwajacũrã peamegue mari masa wamorã ãhraa. ⁵⁷ Mari eropa árĩquerecũ ta mari Opũ Jesucristopũ marire peamegue wabiricũ iimi. ĩgũ eropa iigũ árĩcũ masirã Goãmũ mera mucubiri "Ōhaa," arãa mari.

⁵⁸ Eropirã yũ acawererã, yũ mahirã, Cristore mũa umu-peorire duhubiricãque. Eropirã gajirã mũare õari buherire erã cóãdorecũ ne cóãbiricãque irire. Eropirã umari nũcũ mari Opũ Jesucristo ĩgũ iidorerare õaro iiniguicãque mũa. Mari Opũ Jesucristo yare mari iicũ bu gohra ta ne árĩbeaa. Ire masirã ĩgũ iidorerire õaro iiniguicãque mũa.

16

Gajirãre Jesu yarãre Corinto majarã niyeru erã oburire werepũ Pablo

¹ Dohpaguere gajirãre Jesu yarãre mũa niyeru oburire weregũra mũare. Galacia yeba majarãre Jesu yarãre yũ dorediro dopa ta mũa sã iique. ² Semanari nũcũ soorinũ árĩcũ árĩpehrerã mũa Jesu yarãre gajirãre mũa oburi niyerure merogã gameneoque. Merogã oparã merogã oque. Eropirã wũañariro oparã wũañariro oque. Semanari nũcũ mũa eropa iique mũa pohroque yũ ejacũ mũa obeoburi niyeru opayutuhaboro dopa. Eropigũ erogue ejagũ iripẽ

niyeru wahasõ arĩripũre gojabasagura. ³ Eropigu iripũre iri niyeru aĩgãmorãre mũa beyenirãre ogura. Eropa otuhagu Jesu yarãre mũa obeoburi niyerure aĩgãmorãre erãre obeogura Jerusalengue. ⁴ Iri macaguere yũ iiburi árĩcũ yũ sã waguca. Yũ eropa wacũ yũ mera ta erã sã warãcoma iri niyeru orã warã.

Ĩgu erogue curiborore werepũ Pablo

⁵ Macedonia yeba majarãre ĩhatari wahgãguca yũhũ erãre. Tariagu mũa pohro Corintogue ejaguca. ⁶ Erogue ejagu mũa mera bajamenuri árĩboca yũhũ gajisubu iigu. Yoañariri boje puhiró dihta mũa mera árĩboca yũhũ. Eropirã gajipugue yũ wacũ mũa sã yure itamubeomasia. ⁷ Mũare bajamenurigã ĩdiabirica yũhũ. Eropigu Goãmu gamecũ yoañariri boje mũa mera árĩguca yũhũ. ⁸ Eropa árĩdiaqueregũ ta pentecoste bosenu árĩcũgue Efeso árĩniguca dohpa. ⁹ Ohõ Efesogue dohpaguere mari Opũ Jesu yare peediarã bajarã aħrima. Erã eropa árĩrã árĩcũ erãre werea. Yũhũ erãre eropa werecũ yure ĩdiabirã bajarã aħrima. Eropigu Efesogue árĩniguca dohpa.

¹⁰ Timoteo yũ iro dopa ta mari Opũ yare iimi. ĩgu eropa iigu árĩcũ mũa pohrogue ĩgu ejacũ õaro mera ĩgure bocatĩri, ĩgu mera õaro mucubiriri mera árĩque mũa. ¹¹ Eropirã ĩgure tarinugabiricãque mũa. Eropirã ĩgu mũare goeriserecũ õaro mera ĩgure itamuque ĩgu yũ pohrogue dujaricũ. Gajirã Jesu yarã mera gũa ĩgure corerã iiaa. Eropirã õaro mera itamubeoque ĩgure.

¹² Apolo mari acaweregũ Jesu yagu mũare ĩgu ĩagu wacũ turaro gamerabu. Eropigu ĩgure wadorerabu gajirã Jesu yarã mera ĩgu waborore. Yũ eropa wadorequerecũ ta ĩgu dohpaguere wadiabeami. Eropigu pũhrũ ĩgure iiri maricũ mũa pohrogue wagucumi ĩgu daja.

Pablo õadoretupũ

¹³ Õaro pee masiyurã árĩque mũa. Cristore umupeorã duhubiricãque. Õaro guñaturarã árĩque. Eropirã Goãmu ya turari mera turarã árĩque mũa. ¹⁴ Árĩpehrerore iirã gajirãre mahiri mera irire iique.

¹⁵ ¿Estéfana ĩgu ya wihi majarã mera guñari mũa? Erã Acaya yeba majarã õari buherire peemũhtarã, iri yebare Cristore umupeomũhtanirã árĩma erãpũ. Eropirã gajirãre mari acawererãre Jesu yarãre erã õaro itamuniguicãma. ¹⁶ Eropigu erã iro dopa árĩrãre, gajirãre Cristo yare itamurãre mũa õaro yũhricũ gahmea yũhũ. ¹⁷ ĩgu Estéfana, Fortunato, Acaico sã yũ pohrogue eratuhama. Ohõ erã

árĩcũ w̃aro mucubiria ỹhũ. M̃aa maricũ m̃aa mera mucubirimasibiribũ ỹhũ. Eropigũ erã eracũ mucubiria ỹhũ. ¹⁸ Erã mera árĩgũ ðaro s̃iporãcũgũ wahabũ ỹhũ. M̃aa sãre eropa ta mucubiricũ iiañuma ỹ p̃epicũ. M̃aa pohrogue erã dipaturi wacũ daja erãre ðaro umupeoque m̃aa. Eropirã gajirãre erã iro dopa árĩrã sãre umupeoro gahmea m̃are.

¹⁹ Asia majarã Jesu yarã m̃are ðadorema. Eropirã Aquila, Priscila, erã ya wihi gamenererã mera Cristo ĩgũ mahiri mera m̃are w̃aro ðadorema. ²⁰ Õ majarã Jesu yarã árĩpehrerã m̃are ðadorema. M̃aa mera majarãre bocatĩrirã ðaro mera mojoto ñeaque.

²¹ Ỹhũ Pablo, ỹ basi i dihtare gojaa. M̃are ðadorea.

²² Mari Opũ Jesucristore gajigũ ĩgũ mahibiricũ, Goãmũ ĩgũre dipuwaja moaporo. Mari Opũ duru dujariporo.

²³ Mari Opũ ĩgũ mahiri mera m̃are ðadorea. ²⁴ M̃are árĩpehrerãre b̃urigã mahia Jesucristo mera. Eropa ta árĩporo. Iripẽta ãhraa.

2 Corintios

Õpa gojabeoñumi Pablo Corinto majarãre

¹ Yũhũ Pablo Jesucristo yare ïgũ buhedore ïgũ apidigu ãhraa. Mari Pagũ ïgũ gamero dopa ta apimi yãre Jesu. Yũhũ, mari acaweregũ Tímoteo mera mũare Goãmũre umu-peorãre Corinto majarãre gojabeoa. Árĩpehrerã Jesucristo yarãre Acaya majarãre mũa sãre gojabeoa. ² Eropirã Goãmũ mari Pagũ, mari Opũ Jesucristo mera mũare õadoreo. Ìgũ itamuro mera õaro árĩque mũa.

Pablo ïgũ ñero tarirare õpa arĩ wereñumi

³ Mari Opũ Jesucristo Pagũ Goãmũ marire mojomoro ïhami. Eropigũ ïgũ dihta marire árĩpehrerinũri õaro sĩporãcũcũ iimi. “Õatariagũ ãhrimi ïgũ,” arãa mari. ⁴ Mari ñero taricũ ïagũ marire ïgũ yarãre itamumi ïgũ gajirãre mari itamuboro dopa. Eropirã gajirã erã ñero taricũ erãpũre itamuro gahmea marire. Goãmũ marire ïgũ itamuro dopa ta mari sã erãre itamurã. ⁵ Cristo yarã mari árĩrã ïgũ ñero taridiro dopa ta mari sã bũrigã ñero taria. Mari ñero taridiro dopa ta ïgũ itamurire wũaro opaa. ⁶ Gũapũ mũare itamurã ñero taria. Eropirã Cristo mera mũa õaro árĩboro dopa gũa mũare werera dipuwaja gajirã ñero iima guare. Gũa ñero tariquerecũ Cristo guare itamumi. Eropirã Cristo guare itamucũ gũapũ mũa sãre itamumasia. Eropirã gũa ñero taridiro dopa ta mũa sã ñero tarirã õaro mera yujuro bojerãca. ⁷ Õaro mera mũa yujuro bojerã árĩborore gũa masia. Gũa ñero taridiro dopa ta ñero taria mũa sã. Eropirã Goãmũ ïgũ itamuri mera gũa yujuro bojediro dopa ta mũa sã yujuro bojerãca.

⁸ Gũa acawererã, dohpaguere ire mũa õaro masicũ gũa gahmea. Asia yebaguere ñetariaro taribũ gũa. Gũa gamero iirã ne bocatĩubiriboya. Õpa arĩ pepiribũ gũa: “Ne bocatĩusome mari. Eropirã mari sĩrirãca,” arĩ pepiribũ gũa. ⁹ Eropirã “Marire wejẽcãrãcoma,” arĩ pepiribũ gũa. Gũa eropa ñero taribũ Goãmũ dihtare gũa guñaturaboro dopa. Ìgũpũ sĩrinirãre masugũ ãhrimi. Eropa ïgũre guñaturarã gũa gamero gũa bocatĩubirirare masia. “Goãmũ ta marire itamumi,” arãa pare. ¹⁰⁻¹¹ Gũare guhyaquerecũ ta ïgũ itamuro mera taribũ. Pũhrũgue sãre dipaturi guare taugũcumi. Mũa sã guare itamumorã mũa Goãmũre serẽbasacũ sãre ïagũ ïgũ guare taugũcumi. “Ìgũ ta guare taugũcumi,” arĩ masia mari. Eropirã ïgũ guare taucũ ïarã,

ĩgũre “Õhaa” arĩrãca mũapũ. Mũa bajarã serẽrare ĩgu yũhricũ ĩarã “Õhaa, diaye ta ãhraa,” arĩrãca mũa bajarã Goãmũre.

Pablo Corintogue ĩgu wadiarare wereñumi

¹² Eropirã gũa iirare guñarã mucubiriri mera õpa arĩ pepia gũa: I yebare Goãmũ ĩgu itamuro mera ñeri mariro õari mera masare wapicũ buhebũ. Mũa sãre õaro wapicũ buhebũ. Õpa iirã gũa masiri mera iibiribũ. Goãmũ guare ĩgu mahicũ ĩgu turari mera eropa iibũ gũa. ¹³⁻¹⁴ Eropirã õaro were mũare gojabeorã diaye ta werebũ mũare õaro mũa masiburire. Dohpague guare õaro masinibea gũa. Gũa árĩricũre mũa turaro masicũ gahmea gũa. Eropirã mari Opũ Jesucristo dujaricũ gũa mera mucubirirãca mũa. Mũa mera gũa mucubiridiro dopa ta mũa sã gũa mera mucubirirãca.

¹⁵⁻¹⁶ Eropa arĩ pepigũ Macedonia yebague wagũ mũa pohroque wamũhtadiarabũ. Eropigũ mũare ĩhatariwahgãboya. Eropigũ erogue ejadigũ dujarigũ dipaturi mũa mera bajamenũrigã árĩboya yũhũ. Eropirã pesubu mũa mera yũ árĩcũ ĩarã turaro mucubiriboya mũa. Mũa pohroque yũ árĩcũ ĩanirã Judea yebague yũ wacũ ĩarã yũre itamuboya mũa. ¹⁷ “Wagũra,” yũ arĩcũ peenirã árĩrã, yũ wabiricũ ĩarã “Pablo Jesure umupeobirã ĩro dopa guyagũ iĩñumi,” ¿arĩ pepiri mũa? “‘Wagũra,’ arĩqueregũ ĩgu gamero mari pohro aridiabiriñumi ĩgu,” ¿arĩ pepiri mũa yũre? “‘Ĩgu arĩdiro dopa iibeami,” ¿arĩ pepiri mũa? ¹⁸ Eropa arĩ guyagũ iibeaa yũhũ. Eropigũ “ĩigũra,” arĩgu yũ arĩdiro dopa ta diaye ta iiaa yũhũ. ĩrire masimi Goãmũ. ¹⁹ Yũhũ, Sila, Timoteo mera Jesucristo Goãmũ magũ yare mũare werebũ. ĩgu Jesucristo “ĩigũra,” arĩgu, diaye ta iigu ãhrimi. Goãmũ ĩgu arĩdiro dopa ta Cristo iimi. ²⁰ Árĩpehreri ĩgu Pagũ ĩgu masare “Õpa õaro iigũra,” arĩ wererare Cristo iipehocãdi árĩmi. ĩgu eropa iigu árĩcũ gũa ĩgu yare gajirãre werea Goãmũre erã umupeoboro dopa. ²¹ Cristo yarã marire árĩniguicũ iigu Goãmũ ta ãhrimi. Eropigũ ĩgu yare weremorãre marire apimi ĩgu. ²² Eropigũ ĩgu yarã mari árĩcũ ĩagũ ĩrire marire masicũ iimi ĩgu. Eropigũ ĩgu Espĩritu Santore mari mera arĩdoremi ĩgu. Mari mera árĩcũ ĩha Goãmũ ĩgu marire õaro iiburire masia mari.

²³ Dohpaguere yũhũ mũa pohro wabirirare diaye ta weregũra mũare. Yũ wereri diaye árĩcũ Goãmũ masimi. ĩgu ta yũ pepirire masimi. Mũa ñero iira dipuwaja turidia-bigũ mũa pohroguere wadiabiribũ. Erãre bũjawerecũ iiri,

arĩgu mũa pohroguere Corintoguere wabiribũ. ²⁴ Eropirã “Mũare dorerã ãhraa guã,” arĩrã iibeaã. Eropirã “Õpa Cristore umupeoro gahmea mũare,” arĩrã iibeaã guã. Mũa Cristore õaro umupeotuhabũ. Mũare umupeonemocũ iirã mũa õaro mucubirirã árĩcũ iidiaca guã.

2

¹ Wabigu õpa arĩ pepibũ: “Dipaturi erãre bujawerecũ iidiabeaa. Eropigu dohpaguere wabeaa,” arĩ pepibũ. ² Mũare bujawerecũ iidiabeaa. Mũa bujawerecũ ãagu yũũ mucubiririboyã. Eropirã yũre mucubiricũ iimorã árĩbiriboyã mũa sã. ³ Eropigu mũa pohroguere wabiribũ. Wabigu mũa árĩricũre amuboro dopa mũare gojabeobũ. Mũa yũre mucubiricũ iibonirã árĩquererã ta yũre bujawerecũ iiboyã mũa mũa pohroguere yũ wacũ. Mũa mera yũ mucubiricũ mũa sã yũ mera mucubirirãca. Irire masia yũũ. Eropigu mũa mera bujawerediabigu “Wabeaa,” arĩ, carta gojabeobũ. ⁴ Eropigu mũare gojagu wũaro pepigu ñero sĩporãcũgu, turaro co deco wiriri mera mũare gojabeobũ. Eropa gojagu mũare bujawerecũ iidiabiribũ. Mũare yũ bũrigã mahirare mũare masicũ iidiagu mũare eropa gojabeobũ.

Erã mera majagu ãgu ñero iirare cãdijidoreñumi Pablo Jesu yarãre

⁵ Mũa mera majagu ãgu ñero iira mera yũre bujawerecũ iimi ãgu. Mũare ãgu turaro bujawerecũ iidiro dopa ta yũ sãre wũaro bujawerecũ iimi ãgu. ãgu marire eropa bũrigã bujawerequerecũ ta wũatariaro dipuwaja moadorebeaa dohpaguere. ⁶ Bajarã mũa mera majarã ãgu ñero iira dipuwaja moatuhãnorã. Iripẽta dipuwaja moa duhuro gahmea ãgũre. ⁷ ãgũre mũa dipuwaja moaniguicũ bũrigã bujawerebocumi ãgu. Eropigu Cristo yare duhubocumi. Eropirã ãgu ñero iirare cãdijique mũa. ãgũre itamuque ãgu õaro sĩporãcũboro dopa. ⁸ Eropirã ãgũre õaro iique mũa ãgũre mũa mahirare ãgu masiboro dopa. Mũa eropa iicũ bũrigã gahmea yũũ. ⁹ Ero core mũare gojabeogu “¿Diaye ta yũre yũhrirãcuri?” arĩ pepigu gojabeobũ mũare. Yũre mũa yũhricũ ãdiagu gojabeobũ. ¹⁰⁻¹¹ Dohpaguere ãgu ñero iirare mũa cãdijicũ ãagu yũ sã ãgu ñerire cãdijigũra. Yũre ñero iibirimi ãgu. Mũapũre ñero iidi árĩmi. ãgu eropa iidigu árĩquerecũ ta ãgu ñero iirare cãdijia yũ sã. Mũare õaro itamudiagu Cristo ãgu ãhabeoro ãgu ñero iirare cãdijia. Irire cãdijia Satana marire ãgu tarinũgabiriboro dopa. ãgu mari ñerire iicũ gahmemi. Irire õaro masia. Eropirã Jesu

yarã erã ñeri iirare guñaniguibea mari Satana yapure iiri arĩrã.

Troa waĩcũri maca árĩgu Titore bocabigu wũaro bujawere pepiñumi Pablo

¹² Eropigu Troa waĩcũri macague Cristo yare buhegu ejaribũ. Eroque yũ ejacũ bajarã masa õari buherire peediarã árĩma. Mari Opũ ĩgu itamuri mera ĩgu yare yũ buherire peerã bajarã masa árĩma. ¹³ Eropa árĩquerecũ ta mari acaweregu Titore bocatĩribirinijagu wũaro bujawere pepigu erore árĩmasibiribũ, Eropigu ero majarãre goeris-eretuhagu Macedonia yebague waha wabũ ĩgure amagu.

Goãmũ marire tarinugacũ iimi, arĩ gojañumi Pablo

¹⁴ Goãmũre mucubiriri mera “Õhaa,” arãa. Goãmũ ñerire árĩpehrerire tarinugagu añrimi. Cristo yarã mari árĩcũ ĩagu marire tarinugacũ iimi. Poresudiro poresu sehyaboro dopa ta añraa mari. Poresu sehyaro dopa ta Goãmũ dorero mera árĩpehreroguere Cristore masicũ iiaa mari. Eropa ĩgure masirã erã õaro pepima. ¹⁵ Cristo yarã arĩrã masare Cristore guñacũ iiaa mari. Mari eropiicũ ĩha Goãmũ mucubirimi. Masare Cristore guñacũ iicũ erã ĩgu árĩrĩre masima. Goãmũ ĩgu taumorã Cristo árĩrĩre masima. Gajirã erã peamegue wamorã sã Cristo árĩrĩre masima mari mera. ¹⁶ Cristo árĩrĩre masirã erã peamegue wamorãpũ peamegue erã waborore masima erã. Goãmũ ĩgu taumorãpũ árĩpehrerinũri ĩgu mera erã árĩburire masima. Eropirã ire Cristo yare mari mari gamero mera buhe ojogorocũmasibea. Goãmũ ĩgu itamuri mera ta mari ĩgu yare buhe ojogorocũmasia. ¹⁷ Bajarã gajirã Goãmũ yare buhemaacãma niyerure wajatadiarã. Guapũ erã iro dopa ta iibea. Guvaro mariro Cristo ĩgu turari mera ĩgu yare buhea gua. Goãmũ guare ĩgu obeerã arĩrã ĩgu ĩhurore õaro buhea gua.

3

“Õpa ĩguũra,” Goãmũ ĩgu arĩ werepirare tama buherire wereñumi Pablo

¹ ¿Dipaturi gua árĩricũrĩre mũare wererã iiri gua mũa pepicũ? Gajirã mũare erã buheboro core erã buheri queoro árĩrĩre masidiarã erã gojarapũre serẽmũtabũ mũa erãre. ¿Guare masituhaquererã ta iripũnore serẽri mũa guare? ¿O gajirã pohroque gua buherã warã iripũnore guare aĩgãro gahmeri mũa pepicũre? ² Iripũnore gamebeaa gua. Mũapũre õari gohrotonirãre árĩpehrerã gajirã ĩarã mũare gua õaro buherare masirãcoma. Mũare gua buhecũ

Cristore umupeorã ĩḡu yarã árĩnũgabũ mũa. ³ Cristo yarã mũa árĩcũ ĩarã masa mũare Goãmũ ya buheri gohrare ḡua queoro buherare masituhama. Mũaare buherã Goãmũ yagũ Espĩritu Santo ĩḡu itamuri mera buheabũ. ĩḡu Goãmũ ojocarĩḡu gohra āhrimi. ḡua eropa buhecũ peerã Cristore õaro gahmeabũ mũa. Eropa gamerã mũa árĩcũ gajirã mũare ĩarã Cristo yarã mũa árĩrire õaro masima. Eropa masirã mũare Goãmũ ya buheri gohrare ḡua queoro buherare masima masa.

⁴ Eropa wacũ masia ḡua Goãmũre ḡuñaturari mera. Cristo ĩḡu itamuri mera eropa ḡuñaturaniguia mari. ⁵⁻⁶ “ḡua gamero i mohmerire iiaa ḡua,” arĩmasibea. Goãmũ ĩḡu itamuri mera ire iiaa ḡua.

Eropĩḡu dohpaguere ĩḡu wererire õari buherire Goãmũpũ õaro ḡuare buhemasicũ iimi. Eropa buherã iribojegue ĩḡu doreri Moisere ĩḡu apira dorerire buhebeaa. Espĩritu Santo mera mari Goãmũ mera õaro árĩburipũre buhea ḡua. ĩḡu dorerare mari gamero mera ne bocatĩubeaa. Eropa mari bocatĩubirira dipuwaja peamegue waboya mari. Espĩritu Santopũ mari Goãmũ mera árĩpehrerinũri õaro árĩniguicũ iimi. Õari buheri buhecũ peeñanirãre õaro árĩniguicũ iimi.

⁷ Goãmũ ĩḡu dorerire utãmijirigue gojanijagũ Moisere apĩñumi. ĩḡu eropa apira pũhrũ ĩḡu árĩro gosesiriri dehyoamũriyoro Moisere “Goãmũ ĩḡu apira õari āhraa,” arĩro dopa. Eropiro Moise diapo bũrigã gosesiriyoro. Cuimiju árĩyoro. Pũhrũ ĩḡu gosesiriri pehrerĩsubu ĩḡu árĩquerẽcũ ta masa ĩḡure ne ĩamehtumasibiriñuma. Iri dorerire ĩḡu apira pũhrũ iri dorerire ĩbirã masa dipuwajacurã peamegue wamorã wañuma. Eropiro iri doreri masare peamegue wadorequerero ta, Goãmũ ĩḡu árĩro gosesiriri mera árĩnũgayoro. ⁸ Iri doreri tauro õari buheripũ “Jesuscristo masare taumi,” arĩ buheri õataria. Iri buherire gajirãre mari buhecũ erã õaro peecũ Goãmũ ta erã mera árĩḡucumi ĩḡu Espĩritu Santo mera. Eropiro iribojegue maja doreri tauro Cristo ya buheripũ õataria. ⁹ Goãmũ Moisere apira doreri iribojegue maja masare peamegue wadoreyoro. Eropa dorequerero Goãmũ ĩḡu gosesiriri mera árĩnũgayoro. Iri tauro õari buheripũ Goãmũ ĩḡu turari mera āhraa. Iri buheri mera õarã wahama masa Goãmũ ĩḡu ĩacũ. ¹⁰ Iribojegue Goãmũ ĩḡu doreripũ turari árĩquerero dohpaguere bu gohra ta āhraa. Õari buheripũ iri tauro turatariari āhraa. Iri buheri mera umaroguere mari wamasia. ¹¹ Iribojegue Goãmũ ĩḡu doreri Moisere ĩḡu apira doreri Goãmũ gosesiriri mera

árĩnugaquerero ta pehreburi árĩyoro. Ōari buheripũ “Jesu marire taugũcumi,” arĩ buheripũ árĩniguicãroca. Eropiro “Iri doreri tauro ōari buheripũ ōataria,” arĩ masia mari.

¹² Irire eropa masirã, gũiro mariro ōari buherire ōaro werepehocãa gũa. ¹³ Moise gũa iro dopa árĩbiriñumi. Īgũre Goãmũ ĩgũ gosesiriri pehorerore yũ acawererã masiri arĩgũ dopa ĩgũ diapore suhri gasiro mera cãhmotacãñumi Moise. ¹⁴ Moise ĩgũ diapore ĩgũ cãhmotacũ Goãmũ gosesiririre ĩgũ ōarire erã ñecũ sũmarã ĩhamasibiridiro dopa ta erã dohpaguere ōari buherire ōaro masibeamã. Goãmũ wererire iribojegue erã gojarapũrĩre erã buherã ne masibeamã erã Israe masapũ. Cristore gamebirã masisome erã. Īgũre umupeorã tamera ĩgũ yare masirãcoma. ¹⁵ Dohpague sãre Israe masa Goãmũ dorerire Moiserẽ ĩgũ apirare buhequererã, erãre cãhmotaro dopa ta ne masibeamã erã. ¹⁶ Erã mari Opũre Jesucristore erã gamecũ ĩgũ ta erãre masicũ iimi. Iri cãhmotariñere aĩro dopa ta mari Opũ marire ĩgũ yare ōaro masicũ iimi. ¹⁷ “Mari Opũ,” arĩrã Espĩritu Santore arĩrã iiaa. Mari Opũ ĩgũ Espĩritu Santo mari mera ĩgũ árĩcũ ĩgũ yarã ãhraa. Eropa arĩrã “Iribojegue maja dorerire iiro gahmea Goãmũ yarã árĩmorã,” arĩbeaa mari. ¹⁸ Eropirã Jesu yarã arĩrã, Jesucristo ĩgũ ōarire ĩhmurã iiaa mari. Eropigũ mari Opũ Espĩritu Santo marire gohrotocũ iimi. Īgũ eropa iicũ Cristo ōagũ árĩdiro dopa ta ōarã warã iiaa mari sã.

4

¹ Goãmũ gũare mojomoro ĩagũ, ōari buherire weremorãre apimi gũare. Īgũ eropa apicũ masirã ĩgũ yare buherã duhudiabeaa. ² Masa ĩabiro ñerire iicoreri gũhyasĩuri ãhraa. Irire gũapũ ne iibeaa. Īgũ yare buherã gũyarire buhebiribũ. Eropirã gũa Goãmũ yare ne gohrotobeaa. Eropa iibirã ōari buherire ōaro diaye buhea gũa Goãmũ ĩgũ ĩhuro arĩrã. Gũa eropa árĩricũrĩre árĩpehrerã ōaro masima gũare ĩarã gohra. ³ Gũa iri buherire ōari buherire werea. Gũa irire buhequerecũ ta gajirã masibeamã. Eropa masibirãpũ peamegue wamorã ãhrima. ⁴ Satana ñegũ i yeba majarã opũ erãre Goãmũ yare masibiricũ iimi. Cuirĩ ĩhajabirã erã ĩhajabiro dopa ta masibirã wacũ iimi erãre. Ōari buherire Cristo ĩgũ turarire erã masibirã wacũ iimi ĩgũ erãre. Cristo Goãmũ ĩgũ árĩricũrĩre opami. Īgũ Cristo Goãmũ gohra ta ãhrimi. ⁵ Gũa buherã “Gũapũre umupeoque,” arĩ buhebeaa. Ōpa arĩ buhea gũa: “Jesucristopũ ãhrimi mari Opũ,” arĩ buhea gũa. Gũapũ Jesure yũhrirã ãhraa. Eropirã mũare itamurã

ãhraa gua. ⁶ Negohraguere õpa arĩ dorepũ Goãmũ i umũ naitĩaro árĩcũ: “Boyoro árĩque,” ãgũ arĩcũ boyoa wayoro. Eropigũ dohpaguere ãgũ ta iri turari mera marire masicũ iimi boyoro árĩro dopa. Eropa marire masicũ iigũ ãgũ õaro árĩricũre marire masicũ iimi. Jesucristore masirã ãgũ Pagũ ãgũ õaro árĩricũre masia mari.

Cristo turari mera mari ãhraa, arĩ gojañumi Pablo

⁷ Eropa masirã árĩrã, Goãmũ ãgũ turarire gajirãre masicũ iiaa. Eropa iirã árĩquererã ta turabirã ãhraa guapũ. Mátoro mata wahrirasoro iro dopa ta gua sã turabirã ãhraa. Gua eropa turabirã árĩquererã ta gua masare Goãmũ yare werecũ ãarã, gua gamero mera iimasibirirare ãarã õpa arĩ masirãcoma erã. “Goãmũ turari mera eropa arĩ wereniguima marire,” arĩrãcoma masa. Eropirã Goãmũpũre umupeorãcoma. ⁸ Árĩpehrerã gajirã guare ñero iiquererã ta Goãmũ guare taucũ erã guare tarinũgabeama. Eropirã gua gariborequererã ta ne Goãmũ yare buhe duhudiabeaa. ⁹ Guare erã ñero iinigu-iquerẽcũ ta Goãmũ guare eropa itamuniguicãmi. Guare erã pamehpiquerẽcũ ta ãgũ itamuri mera sĩribeaa gua. ¹⁰ Erã wejẽsũmorã árĩcãrã tiiaa gua Cristo i yebaguere ñero ãgũ taridiro dopa ta. Erã wejẽsũmorã árĩquererã eropa árĩniguirã tiiaa gua sã Cristo ãgũ ojocaririre ãhmumorã. ¹¹ Eropirã umuri nũcũ gajirã guare wejẽmaja guhya ãhrima Cristo yarã gua árĩri dipuwaja. Õpa ta ñero tariquererã árĩniguia gua Cristo ãgũ ojocaririre ãhmumorã. ¹² Eropirã mũare gua buheri dipuwaja guare gajirã wejẽmaja guhya ãhrima. Gua buherire mũa peenirãpũ umuri nũcũ Goãmũ mera árĩmorã ãhraa.

¹³ Goãmũ yare erã gojarapũ õpa ãhraa: “Goãmũre umupeobũ. Eropigũ ãgũ yare werebũ,” arĩ gojañumi iribojegue majagũ. Gua sã yujuropa ta ãhraa. Goãmũre umupeorã ãgũ yare werea. ¹⁴ I sãre õaro masirã ãgũ yare werea gua. Cristo ãgũ sĩrira pũhrũ Goãmũ ãgũre masudi árĩmi. Eropigũ Cristo yarã mari árĩcũ ãagũ ãgũ mari sãre masugũcumi. ãgũ eropa masura pũhrũ ãgũ pohrogue aĩgãgũcumi marire. ¹⁵ Eropirã mũare itamudiarã ñero taria gua. Eropirã Cristo yarã mũa bajarã warã, bajarã mũa Goãmũre mucubiriri mera umupeorãca. ãgũre “Õhaa,” arĩrãca.

¹⁶ Mũa eropa umupeocũ ãarã, gua ñero tariquererã ta bujawerebeaa. Eropirã Cristo yare were duhubeaa. Gua dũpũ umuri nũcũ turabiri wahgãro iiaa. Eropa turabiri wahgãquererã ta õaro sĩporãcua Jesucristore guñaturari mera. ¹⁷ Dohpaguere ñero tariquererã ta pũhrũ ñero

tarisome. Eropirã Cristo yare were duhubeaa. Iri ñero mari tariri pehrea waroca. Eropirã marire merogã ñero tariro gahmea. Eropa mari ñero tarinirã árĩrã, pũhrũguere wũaro mucubiriri mera árĩniguirãca Goãmũ mera. Eropirã mari ñero taridiro tauro bũrigã mucubiriri mera eropa árĩniguirãca. ¹⁸ Eropirã mari ïarire dohpaguere mari warore guñanũrũbeaa. Mari ïabiriripũre pũhrũ mari Goãmũ mera árĩniguirũre guñanũrũca. Mari dohpaguere ïari pehrea waroca. Mari ïabiriripũ árĩniguirãroca.

5

¹ I sãre masia mari: Wihire mari cóãdiro dopa ta mari dũpũre cóãrãca. Eropigũ mama wihi iibodiro dopa ta Goãmũ mama dũpũre ïũgũcumĩ. Eropigũ iri dũpũre marire ogũcumĩ. Eropirã ẽmaroguere eropa árĩniguirãca iri dũpũ mera. Irire masirã ñero tariquererã Goãmũ yare duhubeaa. ² Eropirã iri dũpũre ẽmaro maja dũpũre turaro gamerã, mari eropa coreniguirã iiaa. ³ Suhrĩrore turaro mari sañadiaro dopa ta iri dũpũre turaro gahmea mari. Eropa ta cohrea mari iri dũpũ marirã árĩdiabirã. ⁴ Dohpague maja dũpũre cóãdiabirĩquererã ẽmũri nũcũ Goãmũ mera mari árĩburi dũpũre bũrigã gahmea mari. Eropirã i mari dũpũ sĩriburi dũpũ iri árĩcũ masirã, mama dũpũ mera Goãmũ mera eropa árĩniguidiaa mari. ⁵ Mari ïgũ mera árĩniguirũrore amuyudi árĩmi Goãmũpũ. Eropa amuyugũ ïgũ Espĩritu Santore omũhtami marire. Eropigũ ïgũ Espĩritu Santo mari mera árĩcũ ïha marire Goãmũ ïgũ iiborore, “Diaye ta ãhraa,” arĩ masia mari.

⁶ Eropirã Goãmũ mera sĩporã turarã ãhraa. Gũiro mariro ãhraa mari. I sãre mari masia. I dũpũ mari árĩmũhtara dũpũ mera árĩrã, mari Opũ pohro árĩnibeeaa. ⁷ Ɛmaro majare Goãmũ sãre mari ïabirĩquererã ta “Ɛgũ diaye ta ãhrimi,” arĩ masia mari. Eropirã ïgũre umupeoa. ⁸ Eropirã mari Goãmũ pohro waborore masia. Mari dũpũre i yeba maja dũpũre cóãrã mari Opũ mera ẽmarogue mari árĩdiaa. ⁹ Eropirã Cristore mucubiricũ iidiaa mari. I yeba maja dũpũ mera árĩrã ïgũre mucubiricũ iidiaa mari. Ɛmarogue árĩrã sã ïgũre mucubiricũ iidiaa. ¹⁰ Árĩpẽhrerã Cristo pohrogue mari wacũ ïagũ ïgũ mari iirare beyegũcumĩ. Eropiro mari iira masisũroca. Eropigũ marire õarire mari iira wajare ogũcumĩ. Ñerire mari iira waja sãre ogũcumĩ. ïgũ eropa beyegũ árĩcũ masirã ïgũre mucubiricũ iidiaa mari.

Goãmũre mari mera õaro árĩcũ iimi Cristo, arĩ gojañumi Pablo

11 Eropirã guhyadiaro mera mari Opure umupeoro gahmea marire. Īgu marire eropa beyeburire masirã, Cristo yare masicũ iiaa gua masare. Erãre gũisãrã, Īgure umupeocũ iidiaa gua. Gua ðarã árĩrĩre Goãmu ðaro masimi. Gua eropa iirire mua sãre ðaro masicũ gahmea yũhũ. 12 Dipaturi gua ðarã árĩrĩre mũare wererã iibea. "Gajirãre tarinũgaa," arĩmaacãnirãre mua wereburire eropa wererã iiaa gua mũare. Erã basi eropa arĩ pepirãpu erã pepiriguere ñerã, guyaricũrã árĩquererã ta masa erã ĩhuro dihtare ðarã iro dopa iirima. Eropirã mua guare mucubiriboro dopa, "Õaro iirã iima," gajirãre mua guare arĩ cãhmotaburire i árĩpehrerire mũare were gojarã iiaa. 13 ¿Gua ðpa arĩ wererã pee masibirã àhriri gua mua ĩacũ? Masa guare ĩarã pee masibirã iro dopa ĩhama guare. Goãmu yare gua werecũ ĩarã eropa ĩabocoma guare. Erã eropa arĩ ĩabonirã árĩquererã ta pee masirã ta àhraa gua mũare eropa itamumorã. 14 Cristo Īgu guare mahicũ ĩarã masare eropa itamua. Īgu eropa mahicũ ĩarã Īgu yare eropa buheniguia gua. Marire mahigu yujugu ta Cristo mari árĩpehrerã ya ñeri dipuwajare sĩridi árĩmi. Eropigu árĩpehrerã mari ñeri dipuwajare sĩrimorã árĩnirãre sĩribasadi árĩmi. Irire guñarã Īgu yare iiniguia gua. 15 Árĩpehrerã mari ñeri dipuwajare sĩridi árĩmi Īgu mari gamero dopa mari iibiriboro dopa. Eropigu Īgu gameripure iidoregu sĩridigu árĩmi Īgu. Maripure Goãmu pohrogue mari ejaborore eropa sĩridi árĩmi. Īgupũ mari ya árĩburire sĩrira pũhrũ masa mũriadi árĩmi. Eropirã mari gamero dopa mari ñaribejarire iibirã Īgu yare iiro gahmea pare marire. 16 Eropirã dohpaguere Jesure gamebirã gajirã erã árĩricũrĩre ĩha werewũaro dopa ne arĩ ĩabeaa gua. Iribojeguere gua Cristore eropa ĩaquererã dohpaguere Īgure ðaro masia. 17 Eropirã árĩpehrerã Cristo yarã warã ðaripure gohrotoa mari. Iribojegue mari gamero mari árĩrĩre duhucãa mari. Dohpaguepũre ðaripure corerã iiaa mari.

18 Goãmũpu marire ðarire gohrotocũ iimi. Iribojegue mari Goãmũ mera ðaro árĩbirimũrĩribũ. Eropigu Jesucristo mari ñeri iira dipuwaja sĩribasara mera Goãmũ marire Īgu mera ðaro árĩcũ iidi árĩmi. Eropa iigu guare Īgu yare buhedoregu apimi. Eropa buherã, gajirãre Goãmũ mera erã ðaro árĩcũ iiaa gua sã. 19 Õpa arĩ masare weredoremi Goãmũ guare: "Mari masa Īgu mera ðaro árĩbirinirã árĩquerecũ Goãmũ Cristo sĩrira mera marire Īgu mera ðaro árĩcũ iimi. Eropigu Cristore mari umupeocũ ĩagu mari ñeri dipuwajare dipuwaja moabeami Goãmũ

marire,” arĩ weredoremi Goãmũ guare. ²⁰ Eropirã Cristo yare weremorã ĩgu obeonirã ãhraa gũa. Goãmũ ĩgu basi mũare ĩgu werebodiropã dopa ta guapũ mũare õpa arĩ werea: Cristore werebasarã iiaa. Eropirã mũare werea. Goãmũre mũa ĩhaturirare iripẽta duhuque. ²¹ Cristo ĩgu ñerire iibiriquerecũ ta Goãmũ ĩgũre mari ñeri dipuwajare sĩridoredi árĩmi. Eropa iigu mari ñeri dipuwajare dipuwaja moadi árĩmi Goãmi ñeri dipuwajare dipuwaja moabeami Goãmũ marire,” arĩũ Jesucristore. ĩgu eropa iidi árĩmi Cristo yarã mari wacũ, Goãmũ iro dopa õarã mari árĩboro dopa.

6

¹ Goãmũ eropa iigu ĩgu mũare ĩgu õaro mojomoro ĩarare ĩhmumi. Eropirã Goãmũ yare mohmebasarã árĩrã ire turaro mũare iidorea gũa. Goãmũ õaro iirare õari buherire mũa peediropã dopa ta iique mũa. Mũa peediropã dopa ta mũa iibiricũ mũa peera duhpihuri árĩbeaa. ² Õpa arĩmi Goãmũ ĩgu yare erã gojarapũgue:

beami Goãmũ marire,” arĩ Mũare yũ õaro iiburinũri árĩcũ mũa serẽrire pee yãhrigũra. Eropigu mũare peamegue wabonirãre yũ tauburinũri árĩcũ itamugũra, arĩmi ĩgu.

Peeque mũa. Dohpaguere Goãmũ masare ĩgu õaro iiburinũri ãhraa. Dohpaguere masa Jesucristore umupeoburinũri ãhraa Goãmũ erãre tauboro dopa. Eropirã dohpaguere ĩgũre umupeoro gahmea, arĩ werea gũa.

³ “¿Õari buheripũre gamebiribocuri?” arĩrã, ne merogã gajirãre ñero iibea gũa. Gajirãre ne ñero arĩ werenĩguibeaa. ⁴ Irire iibirã Goãmũ pohro majarã gũa árĩrire mũare masicũ iidiaa. Eropirã ĩgu yare buherã õpa ãhraa gũa: Ñero tarĩrã gajino moorã bocatũua. Guare erã ñero iiquerecũ ta guaro mariropã ãhraa. ⁵ Õpa ñero taribũ gũa: Masa guare pacũ, peresu erã iicũ, masa bajarã guare wejẽdiarã erã gaguiniguicũ peerã ñero taribũ gũa. Gũa turaro mohme oẽarã sã, wũja pũriquerecũ ta carĩbirã sã, oaboarã sã ñero taribũ. ⁶ Eropirã õaro árĩricũri mera diaye buhebũ. Eropirã Goãmũ yare buherã õaro masiri mera buhebũ mũare. Eropirã ne guabiribũ gũa. Eropirã õaro mera buhebũ gũa mũare. Eropa iirã Goãmũ pohro majarã gũa árĩrire ĩhmurã iibũ gũa mũare. Espĩritu Santo ĩgu itamuri mera eropa ta Goãmũ pohro majarã gũa árĩrire ĩhmurã iibũ gũa mũare. Eropirã diaye mũare gũa mahicũ ĩarã ĩgu pohro majarã gũa árĩrire masia mũa. ⁷ Eropirã õari buherire diaye mũare werecũ ĩarã, Goãmũ

turari mera gua iicũ ĩarã, ĩgu pohro majarã gua árĩrire masia mũa. Őaripu árĩpehreri gua iira gua mojo iro dopa āhraa gua ōaro cãhmotaboro dopa. Iri ōarire iirã gua watĩre cãhmotarã iiaa. Eropirã iri ōari gua iira mera gua ĩgũre tarinũgaa. ⁸ Eropã iirã gajirã gũare umupeoma. Gajirãpũ gũare umupeobeama. Gajirã ōaro werenĩguima gũare. Gajirãpũ ñero arĩ werenĩguima gũare. Diaye gua werequerecũ ta “Gũyarã āhrima,” arĩ weresãma gajirã gũare. ⁹ Gajinũrire gũare masirã dopa iima. Gajinũrire gũare masibirã dopa iima. Gũare erã wejẽdiaquerecũ ta ojocarinia gua. Erã burĩgã panirã árĩquererã ta ojocaria gua. ¹⁰ Gua yujuyerinũri bujawererã árĩquererã ta, eropa mucubirinĩguia. Mojomorocũrã árĩquererã ta erãre ōari buherire buherã erãre wũaro doberire gua obodiro dopa ta iirã iiaa erãre. Gajino moorã árĩquererã ta, diaye ta Goãmu yare opapehocãa gua.

¹¹ Corinto majarã, yũ acawererã, mũare ōaro mera werepeho gojabũ gua mũare. Mũare turaro mahirã eropa werebũ. ¹² Gũapũ mũare mahi duhubirabũ. Mũapũ gũare mahibiriñaria. ¹³ Eropĩgu yũ porãre yũ werebodiro dopa ta mũare weregũra: Mũare gua pepĩdĩro dopa ta mũa sã eropa ta ōaro pepĩque gũare. Eropirã gũare mahique mũa.

Cristore umupeobirãre wapicũdorebiriñumi Pablo

¹⁴ Eropirã Cristore umupeobirã mera eropa wapicũnĩguibiricãque. Erã mera majagũ árĩbita. Yujuro mera árĩbeaa mũa. Őarire iĩgu, ñerire iĩgu mera ōaro árĩmasibeami. Boyoro iro dopa árĩrã Goãmũre gamerã āhrima. Naitĩaro iro dopa árĩrã Goãmũre gamebirã āhrima. Eropirã erã perã game wapicũmasibeama. ¹⁵ Eropĩgu Cristo watĩ mera yujuro pepibeami. Eropĩgu Cristo yagũ, Cristore umupeobĩgu mera ōaro game wapicũmasibeami. ¹⁶ Goãmũre umupeori wĩhĩgue goãmarã wẽanirãre mari apicũ queoro wabeaa. Eropã ta Cristo yarã Cristore gamebirã mera wapicũnĩguicũ queoro wabeaa. Erã pe curu majarã yujuro mera erã árĩmasibeama. Goãmu wĩhi iro dopa āhraa mari. ĩgu wĩhi árĩro dopa ta mari mera āhrimi ĩgu. Őpa arĩñumi Goãmu ĩgu yare erã gojarapũgue: Erã mera ta árĩgũra yũhũ. Eropĩgu erã watope ta eropa árĩnĩguigũra. Yũhũ Goãmu erã opu árĩgũra. Eropirã erãpũ yaharã masa árĩrãcoma, arĩñumi ĩgu.

¹⁷ Eropĩgu ōpa arĩnemoñumi ĩgu mari Opu:

Erã ñerã mera ne dujabita. Eropirã erãre wapicũbita. Yũre gamebirã yare ñerire ne iibiricãque. Eropĩgu yũpũ mũare wapicũgũra. ¹⁸ Eropĩgu mũa pagu

árĩgura. Mũapũ yũ porã árĩrãca, arĩñumi mari Opũ turatariagu.

7

¹ Yũ acawererã, yũ mahirã, mũare ire weregura: I árĩpehrerire Goãmũ marire ĩgu eropa arĩ werecũ ĩarã árĩpehrerire mari dũpũre goroweorire duhurã. Eropirã mari pepiri sãre goroweorire duhurã. Eropirã Goãmũre õaro umupeori mera ñero iiro mariro árĩrã mari.

Pablo mucubiriri mera wereñumi Corinto majarãre

² Õaro gũare mahique. Ne merogã mera ñero iibiribũ gũa mũare. Eropirã gũa buheri mera mũare ñero iicũ ne iibiribũ gũa. Ne yujugũre mũa mera majagũre gũyari mera waja gamebiribũ. ³ Eropã arĩgu “Dipuwajacurã ãhraa mũa,” arĩgu iibeaa mũare. Mũare mahia gũa. Irire mũare weretuhabũ. Ojocarirã yuju curu ta ãhraa mari. Mari sĩrira pũhrũgue sãre yuju curu ta árĩrãca mari. ⁴ Õaro mũa iirare masia yũhũ. Eropigu mũare guñabeogũ mucubiria. Eropirã gũa ñero taririsubure mũa õaro iira querere pee burĩgã mucubiribũ yũhũ.

⁵ Eropi Macedonia yebague gũa ejara pũhrũ, erogue ejarã ne soobiribũ gũa. Eroguere ñero taribũ gũa. Gajirã gũa mera game dũyasoma. Eropirã “Cristo yare duhubocoma,” arĩrã Cristo yarãpũre wũaro guñaricũbũ gũa. ⁶ Gũa eropa ñero taricũ Goãmũpũ gũare õaro sĩporãcũcũ iimi. ĩgu marire bũjawererãre mucubiricũ iigu ãhrimi. Eropigu Tito gũa pohrogue ĩgu dujariro mera gũare mucubiricũ iimi Goãmũ. ⁷ Tito ĩgu eracũ ĩarã mucubiribũ. Iri dihtare mucubiribiribũ. Mũare ĩgu õari quere werecũ sãre turaro mucubiribũ. Yũre mũa ĩadiarare weremi gũare. Yũre mũa bũjawerera sãre weremi ĩgu. Yũre “Goãmũ yare iigu iimi Pablo,” mũa gajirãre arĩ werera sãre weremi ĩgu. ĩgu eropa arĩcũ peegu turaro mucubiribũ yũhũ.

⁸ Ero core yũhũ mũa ñero iirare were gojabeorapũ mera mũare merogã bũjawerrecũ iiribũ. Eropã iidigu árĩqueregu ta “Iri carta mera ñero iibũ,” arĩbeaa. Iripũre mũa buhera pũhrũ bũjawereyoro mũa. Eropigu ne gojabeora pũhrũ ta “¿Ñero iiari yũhũ?” arĩ pepiribũ. Eropã arĩqueregu ta “Ñero iibũ,” arĩbeaa dohpaguere. ⁹ Dohpague tamerare mucubiria yũhũ. Mũa bũjawererare peegu mucubiribeaa. Mũa bũjawererã õaripũre gohrotorapũre peegu mucubiria yũhũ. Mũa ñero iirare bũjawerrecũ ĩagu Goãmũpũ mũare õarire gohrotocũ iidi arĩmi. Eropirã mũare bũjawerrecũ iirã ñero ii goroweorã iibiribũ gũa mũare. ¹⁰ Eropirã Goãmũ

ĩgu gamero dopa ta bujawererã, mari ñerire bujawere ðaripure gohrotorãca. Eropa ta mari bujawerecũ ĩagu mari peamegue wabonirãre taumi Goãmu. Eropiro mari eropa bujawerecũ ðha ãhraa marire. Cristore gamebirãpũ erã bujawerequererã erã ñerire duhubirã peamegue wamorã árĩnima. ¹¹ Mũapũ Goãmu ĩgu gamero dopa ta bujawereayoro. Mũa eropa bujawererã ðpa iirã waĩcuabu mũa: Dohpaguere ñerire iirãre eropa ĩacãbirã waĩcuabu mũa. Ne iri ñerire gamebirigohracãyoro mũa. Erã ñeri iira mera guayoro. Erãre ñerire iirire duhudorerã waĩcuabu mũa. Eropirã erã ñerire güirã waĩcuabu mũa erã iro dopa iiri arĩrã. Eropirã yure mahirã yure ĩadiayoro mũa. Eropirã ñeri iigũre dipuwaja moayoro. Iri árĩpeherrerire mũa iira mera iri ñeri dipuwaja marirã mũa árĩrĩre ĩhmuabu mũa guare. ¹² Iribojegue ñero iigũre mũare were gojabeoqueregũ ta ĩgũre itamubu eropa arĩ gojabeobiribũ yũhũ. ĩgu ñero iidigu sãre itamubu eropa arĩ gojabeobiribũ. Mũapũre itamubu iripũre gojabeobũ. Goãmu ĩgu ĩhurore guare ðaro umupeoa mũa. Irire mũa umupeorare mũa ðaro gunãboro dopa iripũre gojabeobũ mũare. ¹³ Eropirã Tito mũa iira quere guare werecũ peerã buřigã mucubiria gũa.

Tito sã mũa mera turaro mucubiricũ ĩha gũa sã mucubiribũ. ĩgũre mũa ðaro mera bocatĩricũ peerã, mũa mera ĩgu mucubirirare peerã, gũa sã ðaro mucubiribũ. ¹⁴ Negohraguere mũa pohro ĩgu waboro corere mũa mera yũ mucubirirare, ðarã mũa árĩrãre werebũ ĩgũre. Eropirã yũ arĩdiro dopa ta ðaro iayoro mũa ĩgũre. Eropigu ĩgũre yũ arĩrãre guhyasĩribirabũ. Titore mũare gũa werera diaye ta árĩbũ dohpaguere ĩgu ĩadiro dopa ta. ¹⁵ Mũa pohrogue ĩgu ejacũ umupeori mera bocatĩriayoro mũa. Eropirã guhyadiaro mera ĩarã tarinũguro mariro mũa yũhrirã árĩcũ ĩapũ ĩgu. Eropigu mũare mahinemogu iimi ĩgu. ¹⁶ Dohpaguere ðaro yũhrirã Goãmu ĩgu gamero dopa ta mũa ðaro mũa iipehorã árĩcũ ðaro masia yũhũ. Eropa masigu buřigã mucubiria.

8

Cristo yarã árĩrã gajirãre eropa ocãro gahmea marire, arĩ gojañumi Pablo

¹ Gũa acawererã, ire mũare masicũ gahmea gũa. Cristo yarã Macedonia yeba majarã Goãmu mahiri mera ĩgu mojomoro ĩari mera erã iirare mũare weregũra. ² Erã ñero tariquererã ta, niyeru moorã árĩquererã ta mahiro mariro eropa ocãma gajirãre. Cristo mera turaro mucubirirã árĩrã,

erã gajirãre ôaro mera erã oparire eropa ocãma. ³ Mũare arĩgu iiaa. Erã erã oparopẽ orã, tauñariro oma. Erã gamero oma erã. ⁴ Goãmũ yarãre mojomorocũrãre turaro itamudiarã, erãre erã obeerire aĩdorema guare. ⁵ “Ipẽ orãcoma erã,” arĩ guã pepidiro tauro oma erã. Ôpa iima erã: Negohraguere niyerure erã oboro core mari Opũ ĩgu gamerire iidiarã árĩtuhama. Eropirã Goãmũ ĩgu gamero dopa ta guã sãre umupeori mera yũhrinirã árĩma. Eropa iirã árĩrã erã niyeru sãre oma. ⁶ Erã eropa ocũ ĩarã Titore guapũ ôpa arĩbũ: “Erãre mũ buhenugadiro dopa ta Corinto majarã sãre erã mojomorocũrãre oburire wereque,” arĩbũ guã ĩguare. Mũa sã gajirãre mojomoro ĩarã mũa itamuboro dopa eropa arĩbũ ĩguare. ⁷ Eropirã mũapũ árĩpehrerire ôaro iirã árĩtuhaa. Cristore diaye ta ôaro umupeoa mũa. Eropirã ĩgu yare ôaro werea. Eropirã Goãmũ yare ôaro masia mũa. Eropirã Goãmũ ĩgu gamero dopa ta turaro iidiaa. Eropirã guare mahia mũa. Eropa ta ôaro iirã árĩtuhaa mũa. Mũa eropa ôaro iirã árĩquerecũ ta merogã duhyania mũa iipehoburi. Mojomorocũrã tamerare mũa mojomoro ĩacũ gahmea guã. Eropirã erãre mũa ôaro mera wũaro ocũ gahmea guã.

⁸ Eropa arĩgu mũare doregohragũ iibea yũhũ. Eropa arĩ weregu iiaa mũare. Gajirã mojomorocũrãre erã turaro itamura mũare weregu iiaa. ¿Mũa diaye ta gajirãre mojomoro ĩhari? arĩ masidiagu iiaa. ⁹ Mari Opũ Jesucristopũ marire ĩgu mojomoro ĩarare masia mũa. ĩri diaye ta ãhraa. ĩgu umaroguere wũaro opagu árĩqueregu ta i yebaguere arigu mojomorocũro wapũ. Eropigu mũa ya árĩburire sĩrigũ sã mojomorocũro wapũ. Ôpa ta wapũ mũapũ mũa wũaro opaboro dopa, ĩgu mera mũa ôaro árĩniguicãborore.

¹⁰ Mũare weregu iiaa. Ôpa pepia yũpũ: Yuju bojori wahaa mũa mojomorocũrãre odiara pũhrũ. Mũapũ mojomorocũrãre odiamũhtaribũ. Eropirã erãre omũhtabonirã árĩbũ mũa. ¹¹ Eropirã mũa odiarare dohpaguere oho ojogorocũque. Mũa odiamũhtadiro dopa ta dohpaguere ôaro opehoque. Eropirã pagari oparã árĩrã wũaro oque. Merogã oparã árĩrã merogã oque. ¹² Bũrigã mũa odiari mera irire mũa orare Goãmũ mucubirigũcumi. Eropirã ôaro mũa omasiopẽ oque. Mũa oropẽ ta mucubirigũcumi. Mũa opabirirare mũa ocũ gamebeamĩ ĩgu.

¹³ “Mojomorocũrãre oque,” arĩgu erãre wũaro opadoregu iibea. Eropigu mũapũre mojomorocũrã dujacũ iidia-beaa. ¹⁴ Mũare yujuro mera opadoregu eropa arĩgu iiaa. Dohpaguere mũapũ wũaro opaa. Eropa oparã gajinore

mooräre omasia m̄ua. P̄uhr̄u m̄uare gajino moocũ erã sã m̄uare omasima. M̄ua eropa game orã yujuropa oparãca árĩpehrerã Cristo yarã. ¹⁵ Eropã ta ãhraa Goãm̄u yare erã gojarapũ: “W̄uaro aĩḡu sã gajiḡu tauro opabeami. Merogã aĩḡu sãre ne merogã d̄uhyabeaa,” arãa Goãm̄u yare erã gojarapũ.

Tito ĩḡu mera majarã mera Corintogue wañumi

¹⁶ Eropi m̄uare ȳu itamudiro dopa ta Tito sã m̄uare itamudiami. Goãm̄ur̄u ĩḡu itamudiacũ iimi ĩḡure. ĩḡu eropa iicũ ĩaḡu “Õhaa,” arãa Goãm̄ure. ¹⁷ Titore ḡua m̄ua pohrogue wadorecũ ĩḡu õaro mera ȳuhriami. Eropiḡu ĩḡure m̄ua pohrogue ḡua wadoreboro coregue ta m̄ua pohroguere “Waḡura,” arĩ guñatuhadi ãhrami ĩḡu.

¹⁸ ĩḡu gajiḡu Jesu yaḡu mera wapimoa obeobu ḡua. Tito mera majaḡu árĩpehrerã gajirã Jesu yarã erã umupeogu ãhrimi. Õari buherire õaro ĩḡu mohmeḡu árĩcũ ĩarã ĩḡure õaro umupeoma. ¹⁹ Eropirã Jesu yarã ĩḡure ta gahmeama ḡua mera curibure. Iri niyerure mojomorocurã pohrogue ḡua aĩcũ ḡua mera curibure gahmeama ĩḡure. Iri niyerure m̄ua gameneorare ḡua mojomorocurãre orã wacũ ĩarã mojomorocurãr̄u “Marire mari Op̄u itamugu iimi,” arĩrãcoma. Ḡua eropa ocũ, erãre burigã mari itamudiarare masirãcoma. ²⁰ Eropirã i niyerure w̄uaro Jesu yarã erã odorere ḡua aĩrã õaro ĩhadiburãca erã orare ḡuare weresãri arĩrã. ²¹ Mari Op̄u ĩḡu ĩhabeoro diaye õaro iidiaa ḡua. Eropirã masa erã ĩhuro sãre õaro iidiaa.

²² Eropã iimorã gajiḡure mari acawereḡure obeorãca Tito sã mera. Ḡua ĩḡu mera obeoḡure bajasuburi gajirãre ĩḡu õaro itamucũ ĩab̄u ḡua. Eropiḡu dohpaguere m̄ur̄u gajirãre m̄ua itamudiacũ ĩaḡu ero core ĩḡu iidiro tauro õaro m̄uare itamudiami. ²³ Tito sãre m̄uare wereḡura. ĩḡu ȳu mera majaḡu ãhrimi. M̄uare ȳu itamucũ ĩḡu ȳu mera mohmeḡu ãhrimi. Gajirã ĩḡu mera wamorã Jesu yarã erã beyenirã erã obeorã ãhrima. Erã Cristo yare iima gajirã Cristore erã umupeoboro dopa. ²⁴ Erã eropa árĩrãre mahiri mera õaro erãre bocatĩrique m̄ua. M̄ua eropa iicũ ĩarã gajirã Jesu yarãr̄u õarã m̄ua árĩricurire masirãcoma. Mari obeonirãre “Õaro mera bocatĩrirãcoma Corinto majarã,” arĩ weretuhab̄u ḡua mera majarãre. M̄ua eropa õaro bocatĩricũ ĩarã ḡua werera diaye árĩcũ ĩha masirãcoma gajirã Jesu yarã.

9

Jesu yarãre mojomorocurãre erã oburire wereñumi Pablo

¹ Eropirã Goãmũ yarãre mũa itamuborore mũa oburire masituhaa mũa. ² Gajirãre mũa itamudiarire masia yũ sã. Eropa masigũ Macedonia majarãre õpa arĩ werebũ: “Corinto majarã Jesu yarãpũ gajirãre itamudiatuhama. Yuju bojori taria erã itamudiadiro,” arĩ weretuhabũ erãre mũare. Mũa eropa itamudiacũ peerã bajarã erã sã mojomorocũrãre itamudiana. ³ Mũa mojomorocũrãre oborare gajirãre werequeregũ “Iri niyerure gameneobiribocoma yũ ejaboro core,” arĩ pepia mũare. Eropigũ dohpaguere oãre mari acawererãre mũa pohrogue obeomũhtagũ iiaa. Mojomorocũrãre mũa oburire gameneo mũa opayuboro dopa oãre obeomũhtagũ iiaa. ⁴ Erãre obeobigũ Macedonia yeba majarã mera mũa pohrogue yũ ejagũ, mũa oburire mũa opabiricũ ãagũ gũhyasĩrisãboya yũhũ mũare. “Mojomorocũrãre orãcoma,” yũhũ mũare arĩra pũhrũ mũa obiricũ ãagũ gũhyasĩrisãboya yũhũ mũare. Mũa sã gũhyasĩriboya. ⁵ Eropigũ mũa pohrogue yũ ejaboro core erãre mari acawererãre obeomũhtagũ iiaa. “Mojomorocũrãre wũaro orãca,” mũa arĩrãre mũa opayuboro dopa erãre obeomũhtagũ iiaa. Mũa oburire mũa game-neocũ erãpũ mũare weresererãcoma. Eropigũ yũpũ eja mũa oburire mũa opayutuhacũ ãha mucubiriri mera mũa odiarare masigura. Mũare gũa odorera árisome iri.

⁶ Eropirã ire guñaque mũa: Bajameyerigã otedigũ bajamegã dũcare aĩgũcumi. Bajayeri otedigũ baja dũca Eropigũ mũa pohrogue yũ ejaboro core erãre mari acawererãre obeomũhtagũ iiaa. “Mojomorocũrãre wũaro orre aĩgũcumi. Eropa ta ãhraa mojomorocũrãre mari ocũ. Merogã mari ocũ, Goãmũ merogã ogũcumi marire. Wũaro mari ocũ wũaro marire ogũcumi. ⁷ Eropirã yujurãyeri mũa “Ipẽ ogũra,” arĩ oque. Mahĩnari obiricãque. “Marire odoreama,” arĩro mariro oque. Mucubiriri mera orãre gahmemi Goãmũ. ⁸ ãgũpũ mũa gameri tauro mũare ogũcumi. Eropirã áripehrerire mũa gameri dũhyarire opapehorãca. Eropirã gajirãre mũa oburi sã õaro sihajaroca mũa opari. ⁹ Eropa ta ãhraa Goãmũ yare erã gojarapũ:

Mojomorocũrãre wũaro ohomi ãgũ. Õaro mera masare itamuniguimi ãgũ, ãhraa ãgũ yare erã gojarapũ.

¹⁰ Eropiro oteri dũcacũra pũhrũ oteri masũ ãgũ oteburi coyere ohomi Goãmũ. Pũhrũ ãgũ oterare dũcacũcũ iimi ãgũ baburire. Mojomorocũrãre mũa wũaro ocũ oteri masũre ãgũ coyere oro dopa ta mũa sãre wũaro ogũcumi Goãmũ. Eropa ta mũare ogũcumi mojomorocũrãre mũa onemoboro dopa. ¹¹ Eropa ta ãhraa. Wũaro ogũcumi gajirãre wũaro mũa eropa oniguicãboro dopa. Eropirã mũa iri niyerure

odorerare gua ocũ erã ñearãpũ mucubiriri mera Goãmũre “Õhaa,” arĩrãcoma. ¹² Eropirã mojomorocũrãre Goãmũ yarãre orã, erãre itamurã iiaa mũa. I dihtare iibea mũa. I sãre iirã iiaa mũa. Mũa eropa orã bajarã masa Goãmũre mucubiriri mera “Õhaa,” arĩcũ iirãca mũa. ¹³ Eropa mũa gajirãre itamucũ ãarã, Goãmũre umupeori mera wereniguirãcoma masa. Eropirã erãre gajirã sãre wũaro mũa ocũ ãarã Goãmũre “Õatariagũ àhrimi,” arĩrãcoma masa. Eropa arĩrãcoma Cristo ya buherire ðari buherire mũa ðaro yũhricũ ãarã. ¹⁴ Eropirã Goãmũ ãgũ mojomoro ãadiro dopa ta mũa sã erãre mojomoro ãacũ erãpũ mũare gamerãcoma. Eropa gamerã mũare serẽbasarãcoma Goãmũre. ¹⁵ Goãmũ marire ðatariaro iigũcumi. ãgũ eropa iiborore masirã “Õataria,” arãa mari ãgũre.

10

Jesu ãgũ apidigũ ãgũ árĩrire wereñumi Pablo

¹ Dohpagueere yũhũ Pablo mũare weregũra. Cristopũ ne guabigũ, masare ðaro iigũ árĩñumi. ãgũ iidiro dopa ta yũ sã mũare werediaa ðari mera. Yujurãyeri mũa mera majarã ðpa arãyoro yũre. “Mari mera árĩgũ eropa pepicãgũ bu árĩgũ iro dopa árĩmi Pablo. Eropa árĩqueregũ ta gajipũgue árĩgũ marire doyarõ mariro turibeomi,” arãyoro mũa yujurãyeri yũre. ² Eropigũ mũare ire burigã dorea: Mũa pohrogue yũ ejacũ ðaro iique mũa, “¿Pablo gũare turiri?” arĩrã. Yujurãyeri yũre ðpa arãyoro: “ãgũ, ãgũ gamero, Goãmũ dorebiriqũrecũ iimi,” arãyoro mũa yũre yujurãyeri. Eropa arĩrã tamerare turiboca yũhũ. ³ Gũa sã i yeba majarã ta árĩrã iiaa. Eropa árĩquererã ta i yeba majarã erã gamero iiro dopa ta iibea gũa. ⁴ Surara erã tarinũgaro dopa ta gũapũ ñerire tarinũgadiaa. Surara erã mojo oparo dopa ta gũa sã mojo opaa. Gũa mojo i yeba majarã erã masiri, erã wereniguitarinũgari, erã turari árĩbeaa. Gũa mojo Goãmũ ya turaripũ àhraa. Iri turari mera masa Goãmũre erã umupeodorebirirare duhcũ iiaa gũa. Eropirã erã gamero erã masirire iri duhpiburi árĩbiriicũ masicũ iiaa gũa iri turari mera. ⁵ Eropirã árĩpehrerã erã gamero pepirare Goãmũre erã masidorebirirare duhcũ iiaa gũa. Eropirã iri turari mera Goãmũre gamebirãre Cristore ðaro yũhrirã erã árĩcũ iiaa gũa. Cristo ãgũ gamero dopa ta erãre pepicũ iiaa gũa. ⁶ Eropirã gajirã mũa mera majarã Cristore tarinũgacũ ãarã erãre dipuwaja moamorã árĩrãca gũa. Mũa ðaro yũhrira pũhrũ Cristore tarinũgarãpũre eropa dipuwaja moamorã árĩrãca gũa.

⁷ Yũ árĩricuri dihtare masia mũa. Yũ pepiripũre ne ma-sibea mũa. “Cristo yarã áhraa,” arĩrã árĩrã õpa masique mũa: Gũa sã mũa iro dopa ta Cristo yarã ta áhraa. ⁸ “Mari Opũ ya buherire õari buherire buhedoregũ apimi gũare,” arĩgũ bajasuburi mũare iri dihtare eropa arĩ werequeregũ ta gũhyasĩrĩbeaa yũhũ. Gũare eropa buhedoregũ mũare itamumorãre apimi gũare. Mũare goroweomorãre apigũ iibirimi gũare. ⁹ I yũ gojabeoripũre mũa ìha Ƴcacũ game-beaa yũhũ. ¹⁰ Yujurãyeri mũa mera majarã õpa arãyoro: “Pablo gojabeogũ pũriro dihta gojabeomi marire. Eropa arĩqueregũ ta mari mera arĩgũ eropa arĩcãgũ áhrimi. Bu arĩgũ iro dopa áhrimi. Eropiro ìgũ marire werenigui-ri duhpiburi arĩbeaa,” arãyoro mũa yujurãyeri. ¹¹ Eropa arĩrãre õpa arĩ weregũra: Mũa arĩdiro dopa ta iibea gũa. Mũare gũa arĩ gojabeodiro dopa ta eropa ta arĩ wererãca mũa pohro arĩrã. Eropirã “Õpa iirãca,” gũa arĩ gojabeodiro dopa ta eropa ta iirãca mũa pohro arĩrã sã.

¹² Yujurãyeri mũa mera majarã “Õaro masipehorã áhraa gũa,” arĩ wereniguimaacãma erã basi. Erã game ìha bocatĩrĩrã “Maripũ õatararã áhraa,” arĩma erã. Eropa arĩmaacãrã “¿Gajirã õarã iro dopa áhriri mari?” arĩbeama erã basi. Gũapũ erã iro dopa iisome. ¹³ Goãmũ gũare ìgũ buhedore ìgũ apira dihtare werea gũapũ mũare. Gajirã erã mohmerare “Ìibũ gũapũ,” arĩrã iibea. Goãmũ mũa sãre buhedoregũ gũare apimi. ¹⁴ Eroparĩrã gũyarã iibea gũa. Õari buherire Cristo yare mũare buhemũhtarã ta ejabũ gũa. Eropirã Goãmũ gũare buhedore ìgũ apira dihtare wererã iiaa mũare. ¹⁵ Eropirã gajirã mũare itamucũ ìha “Gũapũ irire iibũ,” ne arĩbeaa gũa. Cristore mũa umupeonemocũ iiburipũre gahmea gũa. Eropa gamerã mũare buhenemodiaa gũa. Eropa gũa buherã Goãmũ ìgũ apirañe pẽta buhediaa gũa mũare. ¹⁶ Eropa buhediaa mũa ya yeba core majarãre õari buherire peebirãre õari buherire wererã waboro dopa. Eropa warã gajirã erã buhera pũhrũ ejarã, “Gũapũ erãre buhemũtabũ,” arĩsome gũa.

¹⁷ Goãmũ yare gojarapũgue õpa áhraa: “Mari iirire ìarã mucubiribiricãro gahmea. Mari Opũ ìgũ iiripũre ìarã mucubiriro gahmea. Iripũre gajirãre werero gahmea,” arĩ gojara áhraa. ¹⁸ Masa erã basi “Gũapũ iiabũ,” erã arĩcũ ìha mucubiribeami Goãmũ. Mari Opũ Cristo Goãmũre “Oã õaro iima,” ìgũ arĩrãpũre sũami Goãmũ.

11

“Jesu ìgũ apĩnirã áhraa gũa,” arĩ gũyarãre wereñumi

Pablo

¹ Yũ basi yũ árĩricũre weregũ pee masibigu iro dopa weregũ iiaa, arĩ pepia. Yũ árĩricũre mũare weregũ guhyasĩriñaria. Yũ eropa arĩ werecũ peenique mũa yũre dohpaguere. ² Goãmũ mũare ĩgũ mahiro dopa ta turaro mahia yũ sã mũare. Nómoe gajigu umũ mera igo ñero iibigo igo yujugũre ta gamedigo iro dopa mũa Cristo dihtare gamecũ gamerabu yũhũ mũare. ³ Eropa gamequeregũ “Erã Cristo yare cóãbocoma,” arĩ guñaricũa mũare. Gajirã ñerã mũare gũyarã, gajiropa arĩri buherire gamecũ iibocoma mũare. Pĩru ĩgũ masiri mera Evare gũyacũ igo Goãmũre tarinũgañumo iribojeguere. ĩgũ eropa iidiro dopa ta dohpaguere ñerã mũare gũyarã, Cristore mũa õaro umupeorire goroweobocoma. Eropigu mũare gũisãa. ⁴ Erã gũa mũare buhediro dopa ta buhebiriquerecũ mũa peeraa. Eropirã erã “Õpa árĩdi árĩmi Jesu,” erã gamero gajiropa arĩ werequerecũ ta peea mũa. Watĩ ĩgũ pepiro dopa arĩ erã werequerecũ ta peea mũa. Mũare gũa weregũ Espĩritu Santo gohra ãhrimi. ĩgũpũre erã werebiriquerecũ ta mũare gũya buherãre peea mũa. Erã gajiropa árĩri buherire erã buhecũ õari buherire erã buhebiriquerecũ ta irire peea mũa. ⁵ Erã “Jesu ĩgũ apinirã ãhraa,” arĩnirã yũre masitarinũgabeama. “Erãre doca merebeaa,” arĩ pepia yũhũ. ⁶ Õaro weretarinũgagũ árĩbiriboca yũhũ. Õaro weretarinũgabiriqueregũ Goãmũ yare õaro masia. Yũ eropa masirire bajasuburi mũare masicũ iibũ.

⁷ Õari buherire Goãmũ yare mũare buhegũ ne waja gamebiribũ. Mũare itamudiagũ waja gamebiribũ. Bu árĩgũ iro dopa árĩbũ yũhũ. ¿Yũ eropa waja gamebiricũ õabeari mũa pepicũ? ⁸ Mũare yũ buhecũ gaji macari majarã Jesu yarã yũre itamura. Erã eropa orare ñeabu mũare itamubu. Mũa yũre oborare erãpũ yũre oma. ⁹ Mũa mera árĩgũ gajino yũre duhyaquerecũ ta mũare niyerure ne serẽbiribũ. Mari acawerã Macedonia yeba majarã Jesu yarã árĩpehrerã yũ gamerare aĩ erama yũre. Iribojeguere mũare ne garibobiribũ yũhũ. Pũhrũgue sãre mũare ne garibosome. ¹⁰ Cristo diaye ĩgũ werediro dopa ta yũ sã mũare dohpaguere diaye weregũ iiaa. Árĩpehrero Acaya yeba árĩrãre i mũare yũ serẽbirirare eropa wereniguigũra. ¹¹ ¿Mũare yũ serẽbirirare gajirãre yũ eropa wereniguicũ peerã dohpa pepiri mũa? “Pablo gũare eropa arĩ weregũ gũare umupeobigu iimi,” ¿arĩ pepiri mũa? Árĩbeaa. Mũare umupeoa. Goãmũ irire masimi.

¹² Waja mariro yũ mũare buhenũgadiro dopa ta buhe ojo-

gorocugura. "Jesu ĩgu apinirã áhraa," arĩ guyanirãre yure tarinugacũ iibiriboro dopa waja mariro buheniguigura. Erãpu "Gua sã Pablo iro dopa Jesu yare buherã áhraa," arĩma. Eropa árĩbeama. Yurpu waja mariro buhea. Erãpu waja gamerã buhema. ¹³ Erã diaye ta Jesu ĩgu apinirã gohra árĩbeama. Erãre ne apibiriñumi ĩgu. "Jesu ĩgu apinirã áhraa," arĩ guyarã gua iro dopa árĩrima erã. ¹⁴ Erã eropa iicũ ĩagu ĩhamariabeaa yuhũ. Satana sã anyu Goãmũ yagu õagu iro dopa dehyoacumi masare. ¹⁵ Eropigu erã Satanare itamurã õarã Goãmure itamurã iro dopa erã iicũ ĩagu, ĩhamaria wabeaa yuhũ. Dohpaguere erã eropa iiquerẽcũ ta pehrerinũ árĩcũ árĩpehreri erã ñero iira dipuwaja dipuwaja moagucumi Goãmũ erãre.

Ĩgu ñero tarirare wereñumi Pablo

¹⁶ Dipaturi mũare ire weregura. Ne "Pee masibigu áhrimi," yure arĩbircãque. Yu eropa arĩdorebiriquerẽcũ ta yure mũa eropa arĩ pepicũ õaroca yure. "Pee masibigu áhrimi," arĩ yure pepiquererã ta peenique mũa yure. Merogã yu árĩricurire yu basi werecũ peenique mũa. ¹⁷ Mũare eropa weregu guhyasĩriñaria yuhũ. Pee masibigu iro dopa iigu iiaa, arĩ pepia. Mari Opũ Jesu yure irire "Eropa wereque," arĩbirimi. ¹⁸ ĩgu eropa arĩbiriquerẽcũ ta ire weregura mũare. Erã gamero "Õarã áhraa," arĩmaacãrã erã árĩcũ ĩagu yu sã yu árĩricurire mũare weregura. ¹⁹ Mũarpu eropa arĩmaacãrãre peerã mucubiriri mera ĩhaa mũa erãre. ¿Õaro masirã áhriri mũarpu eropa peerã? ²⁰ Mũare erã pohro majarã moacũ, mũa yare erã emacũ eropa ĩacãa mũa. Eropirã mũare erã docapicũ mũa wayuporãre erã pacũ eropa pepicãa mũa. ²¹ ¿Õapũricãri mũare erã eropiicũ? Cue, ¿turatarĩarã áhriri erã? Guarpu erã iro dopa turarã árĩbeaa. Eropirã erã iro dopa ñerire iibeaa.

Erã iro dopa arĩbiriqerẽgu ta erã "Õpa árĩrã áhraa," erã arĩcũ peegu yu sã eropa arĩ wereboca. Dipaturi guhyasĩriqerẽgu ta õpa arĩgura mũare. ²² Erã "Hebreo masa áhraa," arĩma gajirãre tarinugadiarã. Hebreo masu ta áhraa yu sã. "Israe masa mari Pagu ĩgu beyenirã áhraa," arĩma daja erã. Erã iro dopa ta ĩgu beyedigũ ta áhraa yu sã. "Abrahã pãramerã áhraa," arĩma daja erã gajirãre tarinugadiarã. Erã iro dopa ta Abrahã pãrami ta áhraa yu sã. ²³ "Cristo yare itamurã áhraa," arĩma daja erã. Yu sã Cristo yare itamugũ ta áhraa. Erã tauro Cristo yare õaro iiaa yuhũ. Eropa yu basi arĩ wereniguigu guhyasĩriñaria yuhũ. Pee masibigu iro dopa wereniguigu iiaa, arĩ pepia yu

basi. Erã tauro mohmebũ yũhũ Cristo yare iigũ. Bajasuburi erã tauro Cristo yagũ yũ árĩri dipuwaja peresu iima yũre gajirã. Erã tauro bajasuburi tãrama masa yũre. Erã tauro Cristo yare yũ iira dipuwaja masa yũre wejẽdiarima. Eropigũ merogã mera taribũ yũ sĩribodirore. ²⁴ Cinco suburi judio masa yũre ñeama. Yũre erã ñeari nũcũ suburi treinta y nueve suburi yũre tãrama. ²⁵ Ʋhresubu gajirã yũre ñeama. Eropa ñearã erã tamera yũre ñero yucũgũ mera pama. Gajisubu yũre gajirã Ʋtã mera deama. Ʋhresubu dohodiru mera Ʋtãyegue mehtuhaja miribũ. Eropigũ yujunũ, yuju ñami taboamiji wecague wũariya decoguere baa payabũ. ²⁶ Bajasuburi macariguere buhe curigũ ejabũ. Yũ eropa buhe curicũ gũhyatariacãbũ yũre. Yũre mirimaja gũhya árĩbũ. Yũre yajamaja gũhya árĩma. Yaha yeba majarã judio masa, judio masa árĩbirã sã yũre ñero iimaja gũhya árĩma. Macarigue, masa marirogue, wũariyague sãre yũre sĩrimaja gũhya árĩbũ. “Mũ mera majarã ãhraa,” arĩ gũyarã sã yũre ñero iimaja gũhya árĩma. ²⁷ Cristo yare iibu bũrigã mohmebũ. Eropa mohmegũ ñero wabũ. Bajasuburi wũja yũre ñero pũriquerẽcũ ta eropa mohmeniguicãmũribũ. Ñero oaboamũribũ. Eropiro yũre ñemesibumũribũ. Bajasuburi barire bocabirimũribũ. Yũhũ yũsaro sãre pepimũribũ. Suhri sañaburi sã ne marimũribũ yũre.

²⁸ Eropa ñero tarigũ ta Ʋmũri nũcũ gajirã Cristo yarãre, mũa sãre bũrigã guña. ²⁹ Eropigũ Cristo yagũ igũ turabiricũ ãagũ bũjawerea yũhũ. Gajirã Cristo yagũre ñero iidorebocoma. Erã eropa iicũ ãagũ Cristo yagũre gũhyasĩrisãgũ, erã ñero iidorerã mera guaa yũhũ. ³⁰ Werediabiriqueregũ ta yũ árĩricũrire werẽgũ, yũhũ turabigũ yũ árĩrire mũa masiboro dopa mũare werẽgũ. ³¹ Goãmũ mari Opũ Jesu Pagũ Ʋmũri nũcũ mari umupeobu igũ ta mũare yũ gũyabiricũ masimi. Ire mũare diaye werẽgũ. ³² Damasco waĩcũri macague yũhũ Jesu-cristo yare buhecũ ãagũ árĩpehrerã masa tauro opũ Areta waĩcũgũ igũ doca árĩgũ opũ yũre ñeadiaripũ. Eropa ñeadiagũ iri maca maja sãriro disiporori nũcũ surarare coredoreripũ. ³³ Erã eropa corero watope ta yũ mera majarã wũari puibugue yũre duhusã iri sãriro pũrũpũgue yuju gobegue yũre duhu dijuma. Erã eropa duhu dijura pũhrũ duhrigã wabũ.

12

Cristo ãgũre ãhmurare wereñũmi Pablo

¹ Yũ árĩricũrire mucubiriri mera yũ werecũ duhpiburi árĩbeaa. Duhpiburi árĩbiriquerecũ ta werenemogũra mũare. Mari Opũ Jesu ĩgũ yũre ĩhmurare ĩgũ yũre masicũ iirare weregũra mũare. ² Őpa ĩhmunũgami ĩgũ yũre: Catorce bojori gohra wahaa yũre Cristo yagũre Ʃmarogue ĩgũ aĩ mũariara pũhrũ. Ʃmarogue necã wecague yũre aĩ mũriami. Yũ sĩporã dihtare ĩgũ aĩgãcũ masibea yũhũ. O yũ dupũ sãre ĩgũ aĩgãcũ sãre ne masibea yũhũ. Goãmu dihta irire masimi. ³⁻⁴ Eropigũ paraĩso waĩcũroque yũre aĩ mũrijami. Irire masia yũhũ. Yũ sĩporã dihtare ĩgũ aĩgãcũ masibea yũhũ. O yũ dupũ sãre ĩgũ aĩgãcũ masibirica. Goãmu dihta irire masimi. ĩgũ eropa aĩ mũriacũ ejagũ eroguere ĩgũ wererire peebũ. Iri yũ peerare masa ne masibea. Iri wererire gajirãre weredorebirimi yũre. ⁵ Erogũre ĩgũ yũre eropa wererare mũare weregũ, “Yũhũ yujugũ ta gajirãre tarinũgagũ ãhraa,” arĩboya yũhũ. Eropigũ irire werebeaa yũhũ. Yũ masibirira dihtare yũ turabirira dihtare mucubirigũ mũare weregũra. ⁶ “Gajirãre tarinũgaa yũhũ,” mũare arĩ werediacũ yũ arĩra diaye árĩboca. Eropigũ eropa arĩ weregũ eropa arĩmaacãbiriboya yũhũ. Eropa árĩbiriqũregũ ta “Őpa gajirãre tarinũgaa,” arĩ weresome yũhũ mũare, gũhyadiaro yũre ĩhari arĩgũ. Yũ arĩro tauro mũa yũre umũpeocũ gamebeaa.

⁷ Cristo ðatarĩarire Ʃmaroguere ĩgũ yũre ĩhmucũ ĩadigũ arĩgũ, “Gajirãre tarinũgaa yũhũ,” arĩboca yũpũ. Eropa yũ arĩbiriboro dopa Satana ĩgũ yũre dore moacũ ĩagũ “Őaroca,” arĩ apidi árĩmi Goãmu. Eropigũ yũ ñero tariboro dopa yũre dore moadi árĩmi Satana. Iri dore poraru ñajaro dopa ta yũre pũribũ. ⁸ Iri dore yũre taridoregũ serẽmũriribũ mari Opũre. Ʃhresubu serẽribũ. ⁹ Yũ eropa serẽquerecũ ta i dore tamerare yũre taricũ iibirimi ĩgũ. Őpa arĩ yũre yũhrimũrimi ĩgũ: “Mũre mahia. Yũ mahiri mera ðaro arĩgũca mũhũ. Pũriniguicãsũgũ, turabigũ arĩgũ yũ turarĩre ðaro ĩhmũgũca mũhũ. Turarã tauro mũhũ yũ turarĩre masare masicũ iigũca,” arĩ yũhrimũrimi Goãmu yũre. ĩgũ eroparĩcũ peegũ turabigũ yũ arĩrãre masigũ mucubiria. Eropigũ yũ turabirĩrãre masare mucubiriri mera weregũra. Eropa arĩ weregũca Cristo ĩgũ turarĩpũre yũhũ gajirãre ðaro masicũ iiboro dopa. ¹⁰ Eropigũ Cristo yagũ yũ arĩri dipuwaja yũre pũriro arĩquerecũ ta, gajirã ñero yũre wereniguquerecũ ta, ñetariaro tariqueregũ ta, yũre erã ñero erã iiniguquerecũ ta, yũre bujawerecũ erã iiquerecũ ta mucubiria yũhũ. Eropa ñero tariqueregũ ta,

eropa turabigu árĩqueregu ta Cristo turari mera bocatĩua ĩgure guñaturagu. Eropigu mucubiria.

Corinto majarãre Cristo yarãre wãaro guñaricũñumi Pablo

¹¹ Yũ árĩricũrire yũ basi weregu guhyasĩriñaria yũhũ. Pee masibigu iro dopa weregu iiaa, arĩ pepia yũhũ. Yũ eropa werequerecũ ta iri mũa ya dipuwaja ãhraa. Mũapũ yũ árĩricũrire gajirãre õaro werecũ yũ basi werebiriboaya. Yũhũ bu árĩgu árĩqueregu ta "Jesu ĩgu apinirã ãhraa," arĩ guyarãre doca merebeaa yũhũ. ¹² Diaye ta ñero tarigu árĩqueregu mũare Goãmũ turari mera deyoro moarire ii ĩhmuribũ. Eropa ii ĩhmugũ Cristo ĩgu apidigu yũ árĩrire ĩhmugũ iiribũ mũare. ¹³ Gaji macari majarãre Jesu yarãre mũa sãre yujuro mera ĩhmuribũ yũhũ. Mũapũre gajiropa ñari iiribũ. Mũa dihtare garibobiribũ. Mũa dihtare gajinore yaha árĩburire serẽbiriribũ. ¿Yũhũ mũare itamurire serẽbiricũ ñehe árĩri mũare? Iri ñeri árĩcũ irire cãdijique mũa yũre.

¹⁴ Ire peeque mũa. Pesubu mũa pohrogue yũ ejara pũhrũ dipaturĩ wadiaa daja. Erogue ejagu mũare garibosome yũhũ. Gajinore serẽsome yũhũ mũare. Mũa yare gamebeaa yũhũ. Cristo yapũre mũa yũhrirã árĩcũ gahmea yũhũ. Masa porãpũ erã pagũ sũmarãre erã gamerire obeama. Erã pagũ sũmarãpũ erã porã gamerire ohoma. Eropa ta mũa yũ porã iro dopa árĩrã yũ gameripũre osome mũa. ¹⁵ Eropigu yũ tamera yũ oparipũre odiaa mũare itamubu. Mũa pohro majagu iro dopa árĩdiaa mũare itamubu. Mũare yũ turaro mahiquerecũ ta mũapũ yũre daberogã mahia yũ pepicũ.

¹⁶ Eropigu mũa mera árĩgu mũare garibobiribũ. ¿Eropa ta iiri yũhũ mũa pepicũ? Eropa iiquerecũ ta yujurãyeri mũa mera majarã õpa arĩrãcoma: "Pablo gajinore marire aĩdiagũ guyami," arĩrãcoma. ¹⁷ ¿Erã arĩro dopa ta iigu árĩgu dohpa irire iiboyuri yũhũ? ¿Mũa pohrogue yũ obeonirã ñehenore yũre guyabasayuri erã mũare mũa ĩacũ? ¹⁸ Sohõ árĩrasubugue Titore mũa pohrogue wadoretuhabũ ĩgure. Eropigu gajigũre Jesu yagũre ĩgu mera obeobũ. ¿Tito mũare gajinore gũya aĩri mũa ĩacũ? ĩgu yũ iro dopa ta Goãmũ ĩgu gameri dihtare iigu ãhrimi. ¿Eropigu yũ iro dopa ta iibiriri ĩgu mũa ĩacũ?

¹⁹ ¿Ipũ mera gũa basi arĩ cãhmotarã iiri gũa mũa pepicũ? Árĩbeaa. Cristo yarã ãhraa. Eropirã Goãmũ ĩgu ĩhuro mũare wererã iiaa. Yũ acawererã, yũ mahirã, mũapũre eropa arĩ werea mũare itamudiarã. ²⁰ Yũ erogue ejacũ yũ gamero dopa iirã árĩbiriboca mũa. Eropigu mũare turaro guñaricua. Eropigu mũa gamero dopa iigu árĩbiriboca

yū sã erogue ejagũ. Gajiropa mua iicũ ĩagu wereguca muare. Erogue yū ejacũ muapu mua basi game duyatorã, gajino erã opacũ ĩarã ĩhaturirã, mata guarã, mua gamero gajirãre tarinugadiarã, gajirãre ñero wereniguirã, ñeri quere moarã, “Gua tamera gajirãre tarinugaa,” arĩrã, mua gamenererore goroweorã árĩboca mua. Mua eropa iicũ bocaboca arĩgu, guñaricua yũhũ muare. ²¹ Erogue yū ejacũ muare yũre guhyasĩrisãcũ iibocumi Goãmũ yũre. Eropigu árĩpehrerã iribojegue ñero iinirãre erã ñerire bujawerebircũ ĩagu turaro bujawereguca yũhũ. Nome mera ñero iirãre, ñerire uaribejarãre ĩagu bujawereguca yũhũ.

13

Pablo weretuñumi

¹ Dohpaguere mua pohrogue wagu uhresubu ejagũca eroguerẽ. Pesubu ero coreguere ejatuhabu. Eropigu muare ire weregura. Ōpa āhraa Goãmũ yare erã gojarapũ: “Yujugũre mari dipuwaja moaboro core perã, urerã ĩgũre weresãro gahmea. Erã eropa weresãra puhũ dipuwaja moamasia mari,” āhraa Goãmũ yare erã gojarapũ. ² Iribojeguere ñero iirã mua árĩcũ muare árĩpehrerã gajirã ñero iirã sãre dipaturi guhyadiaro mera weregura. Yujusubu ejadi mua pohro dipaturi ejagũ muare ire werebu. Dohpaguere mua mera árĩbigũ dipaturi muare ire werebeogu iiaa daja: Dohpaguere mua pohroguerẽ ejagũ, ñero iirãre diaye ta dipuwaja moagura yũhũ. ³ Yū eropa iicũ ĩarã, Cristo ĩgu apidigu ĩgu turari mera yū buhecũ masirãca masidiarã. Cristopũ muare doregu turatariagu āhrimi. Eropigu ĩgu turarire ĩhmumi muare. ⁴ Mari iro dopa dupucũgu, ĩgu turabigu árĩgu, crusague sĩripũ. Eropa sĩriquerẽgu ta Goãmũ ĩgu turari mera ojocarimi ĩgu dohpaguere. Gua sã ĩgu iidiro dopa ta turabirã āhraa. Eropa turabirã árĩquererã Cristo mera ojocarirã Goãmũ ya turari mera árĩrãca muare itamumorã. ⁵ Eropi muapu mua basi ōpa arĩ pepique. “¿Diaye ta Cristore umupeogu āhriri yũhũ?” arĩ pepique mua. Diaye ta Cristo mua mera majagu ĩgu árĩbircũ ĩgu yarã gohra árĩbeaa mua. ⁶ ¿Mua guapũre “Jesu yarã ĩgu apinirã árĩbeama,” arĩ pepiri? ĩgu yarã gohra āhraa gua. Irire mua masicũ gahmea yũhũ. ⁷ Eropigu mua ñero iiboroboro dopa Goãmũre serẽbasaa muare. Eropa serẽbasaa gua mua ōarire mua iiboro dopa. Mua Goãmũ itamuri mera eropa ōarire iicũ ĩarã ōpa arĩboca: “Guapu erãre ōarã wacũ iibũ,” arĩboca gua gajirãre guare umupeocũ

iimorã. Eropa arĩ umupeodorebeaa gũa. Iri duhpiburi árĩbeaa. Eropirã mũare eropa Goãmũre serẽbasarã mũa ya árĩburire serẽbasarã iiaa. Ōarire mũa iicũ tamerare gahmea gũa. ⁸ Eropa dihta gahmea gũa. Goãmũ ya diaye árĩrĩre goroweomasibeaa gũa. ⁹ Eropirã mũa õarire iicũ gamerã turabirã iro dopa árĩquererã gũa mucubiria. Ōarire iirãpũ mũapũ turarã árĩcũ õhaa. Eropirã mũa õarã waborore Goãmũre serẽbasaniguicãrãca gũa mũare. ¹⁰ Eropigũ mũa mera árĩbigũ mũare ipũre gojabeoyugũ iiaa. Mũa pohrogue ejagũ mũa ñero iirã árĩcũ ñagũ mũare dipuwaja moagũca. Cristo yũre ñgũ dorediro dopa ta mũare dipuwaja moagũca. Yũ eropa dipuwaja moabiriboro dopa ipũre mũare gojabeoyugũ iiaa. Mũa õarire gohrotocũ ñadiagũ gojabeoyugũ iiaa. Cristo ñgũ dorediro dopa mũare itamudiaca. Mũaare dipuwaja moadiabeaa.

¹¹ Dohpague yũ acawererã, mũare õadorea. Cristore guñaturanemoque. Eropa iirã õarã árĩque. Mũaare yũ wererare õaro peenũque. Mũa mera majarã mera yujuro mera pepique. Mũa basi õaro mera árĩque. Mũa eropa árĩcũ ñagũ mũa mera Goãmũ árĩgũcumĩ. Ñgũ marire game mahicũ iigũ, marire õaro mera árĩcũ iigũ ãhrimi. ¹² Eropirã mũa mera majarãre bocatĩrirã erãre õaro mera mojoto ñeaque mũa. ¹³ Árĩpehrerã õ majarã Goãmũ yarã mũare õadorea.

¹⁴ Mari Opũ Jesucristo mera mũare árĩpehrerãre õadorea. Eropigũ Goãmũ ñgũ mahiri mera árĩpehrerã mũare õadorea. Eropigũ Espĩritu Santo árĩpehrerã mũa mera õaro ãhrimi. Eropa ta árĩporo. Iripẽta ãhraa.

Gálatas

Pablo Galacia majarãre Jesu yarãre gojabeopu

1-2 Yũhu Pablo mũa Galacia majarãre ipũre gojabeogu iiaa. Yũhu Goãmu yare buhedore Jesucristo igu apidi ãhraa. Masa ne yure buhedore apibirima. Jesucristopu igu Pagu Goãmu mera yure apimi. Goãmu ãhrimi Jesucristo sãridire masudigu. Eropigu yũhu yu mera majarã mera Jesucristo yarã mera mũare ðadore. ³ Goãmu mari Pagu mari Opu Jesucristo mera mũare ðadore. Igu mũare itamuri mera ðaro árĩque mũa. ⁴ Jesucristo, igu Pagu Goãmu gamediro dopa ta iigu, igu basi mari ñeri iira dipuwaja sãribasadigu árĩmi. Eropiidi árĩmi i umu majarã ñero árĩricũre mari iibiriboro dopa. ⁵ Igu eropiicũ iha mari Goãmure "Mũhu ðagu ðaro iiaa," umuri nucũ arĩro gahmea. Eropu ta iirã.

Jesucristo masare igu tauburi yujuñe ta buheriñe ãhraa, arĩ werepu Pablo

⁶ Mũa mata Goãmu yare duhurã iica. Goãmu mũare igu yarã árĩmorãre aĩdigu árĩmi Jesucristo igu marire sãribasara mera. Igu mũare eropa aĩquerecũ muapu igure duhu gajirã ya buherire peenugarã iica. "Gaji ãhraa marire tauburi buheri," erã arĩ werecũ peerã iica mũa gajirãre. Mũa eropiira querere peegu pee uca waha yũhu. ⁷ Ōpa waro iica mũa arĩrore. Gajirã mũa pohro eja mũare were goroweorã iicoma. "Jesucristo marire taumi," arĩ buherire gohrotodiarã, "Gaji ãhraa marire tauburi buheri," arĩ buherã iicoma mũare. Eropigu mũare ire werediaca. Gaji buheri marire tauburi buheri marica. ⁸ "Gaji buheri ãhraa mari tauburi buheri," mũare arĩ were goroweorãre Goãmu burigã dipuwaja moagu peamegue wadoreporo. Yu basi ta were gorowecũre Goãmu yu sãre dipuwaja moaporo. Anyu umaro majagu igu eropa buhecũ igu sãre dipuwaja moaporo. ⁹ Gũa gajisubu arĩrare dipaturi yũhu werea daja mũare. Yujugu mũare ðari buherire gajiropa buhecũ, gũa mũare buhediro dopa werebigure igure Goãmu burigã dipuwaja moaporo. Peamegue wadoreporo.

¹⁰ Yũhu masare buhegu Goãmu gamero dopa ta diaye majare buhea. Masa peesuacũ, peesuabiricũ sãre buhea. Eropigu dohpaguere yũhu masa peediari dihtare werenigu-ibea. Cristo gamero dopa ta buhediacã. Igu pohro majagu ðagu arĩdiagũ eropa buhea yũhu.

Pablo ĭgu Jesucristo yare buhebure apirare wererũ

¹¹ Ōpa weregara mũare: Yũhu mũare ðari buheri eropa arĩ buhera masa ya pepiri árĩbeaa. ¹² Ne yujugu masũ iri buherire yũre weredorebirimi. Ne yujugu masũ yũre buhebirimi iri buherire. Jesucristo ĭgu basi yũre irire masicũ iimi.

¹³ Iribojegue yũ árĩricũrare yũhu judio masa buherire peenũrũrasubu yũ iirare mũa peetuhabu. Yũhu Jesucristo yarãre bũrigã ĩhaturigũ nrũsiamũribũ erãre ñero iibu. Eropigu Jesu yarãre bũrigã ñero iigu erãre wejẽpehocãdiaribũ. ¹⁴ Eropigu gũa judio masa ya buherire yũ mera masanirã tauro umupeomũricaribũ. Gũa ñecũ sũmarã árĩricũrire bũrigã iimũricaribũ. ¹⁵ Yũ eropa iirisubu ōpa wabũ yũre. Goãmũ ĭgu ðaro mahiri mera yũre sihumi pare. ĭgu yũ dehyoaboro coregue beyetuhapũ yũre. ¹⁶ Eropigu ĭgu magũre Jesucristore yũre masicũ iimi. ĭgũre masicũ iigu yũre judio masa árĩbirãre buhebure apimi. "Jesucristo marire taumi," arĩ buherire werebure apimi yũre. Eropa Goãmũ yũre masicũ iira pũhrũ gajirãre serẽpigũ wabiribũ. ¹⁷ Jerusalẽngue árĩrãre yũ core Jesu ĭgu apinirã sãre serẽpigũ wabiribũ. Erote eropa wabigu Arabia yebaguepũre diaye wabũ. Pũhrũguere Damascogue dujaa wabũ.

¹⁸ Ũhre bojori pũhrũ Jerusalẽngue wabũ. Pedrore ĩagu wabũ. Pe semana ta árĩbũ ĭgu mera. ¹⁹ Gajirã Jesu ĭgu apinirãre ne ĩabiribũ irisubure. Mari Opũ Jesucristo pagũ magũ Santiago dihtare ĩabu. ²⁰ Yũhu mũare eropa arĩgu diaye wereru iiaa. Yũ ōpa arĩrire Goãmũ masimi. Eropa arĩgu ōpa arĩdiaca mũare. Jesucristo dihta yũre masicũ iimi ĭgu buherire.

²¹ Jerusalẽngue árĩra pũhrũ Siria yebague Cilicia yebague ejabu. ²² Irisubu Judea yeba majarã Jesucristo yarãpũ yũre ĩha masibirima dohpa. ²³ Yũhu Jesucristo yagu árĩri querere peenirã árĩma. "ĭgu Pablo marire Jesu yarãre ñero iidianũrũ curidigu dohpaguere Jesucristo yare buhegu ãhrimi. Mari Jesucristore umupeorire dedeodiadigu dohpaguere irire Jesucristore umupeoburire buhegu wahami," gajirã erãre eropa arĩ wererũ peenirã árĩma Judea yeba majarã. ²⁴ Eropa peerã Goãmũ mera mucubiriñorã.

2

Gajirã Jesucristo ĭgu apinirã gameñorã Pablo buherire

¹ Catorce bojori pũhrũ Jerusalẽnguere wabũ daja. Bernabé wami yũ mera. Tito sãre aĩgãbũ. Goãmũ yũre

wadoremi Jerusaléngue. Eropigu erogue wabu. ² Eropigu erore eja Jesure umupeorã gamenererogue yuhũ erã oparãre boje sihuu werebu erãre. Judio masa árĩbirãre Jesucristo marire tauburi buherire yu buherare werebu oparãre. Eropa weregu erã yu buherire õaro masicũ erãre “Õapũrica,” arĩcũ iidiabu erãre. Erã yu buherire gamebirã yu buheri sãre “Waja mariri ãhraa,” arĩbocoma, arĩ pepirabu yuhũ. Erã gamema. ³ Eropirã erã Titore ĩgu judio masu árĩbiriqeregu ĩgu Jesure umupeogu arĩcũ ĩha erã judio masa dorero dopa iidorebirima ĩgure. Eropirã ĩgure gasiro merogã wiri aĩdorebirima ĩgure. ⁴ Gajirãpu Jesure umupeorã gamenererogue ñajajanirãpu ĩgure circuncisión gasiro merogã wiri aĩcũ gamerima. Erã Jesure umupeorã gohra árĩbirima. Erã gua sihubiriqerecũ gua pohrogue peedurirã ñajajanirã árĩma. Gũare weresãdiana. “Erã Jesu yarã Moise dorerire iibirã ãhrima,” arĩdiana gũare. “Goãmu pohro wadiarã gua dorerire iiro gahmea marire,” arĩ dorediarima daja. Gua Jesucristo yarãpũre Jesucristo tautuhajami gua Goãmu mera õaro árĩborore. ⁵ Eropirã erã eropa gũare dorecũ ĩarã erãre ne yuhribiribu. Erãre yuhrirã iri Jesucristo marire tauburi buherire queoro buhemasibiriboaya mũare. Eropirã erã dorediarire cãhmotacãbu.

⁶ Eropirã Jesu yarã oparã yu buherire erãre weretuhajara pũru “Mu buheri õhaa,” arĩrã, yu buherire yũre gohrotodiabirima. Gua judio masa dorerire iiburi sãre buhedorebirima. Erore erã oparãre masa umupeoquerecũ erã iiro dopa iibiribu. Goãmu arĩpehrerãre oparã arĩrã sãre bu arĩrã sãre yujuropa ta ĩhami. “Erãre beyediro dopa ta yu sãre Goãmu beyemi,” arĩ pepibu. ⁷ Eropirã oparã yu buherire gohrotodiabirã judio masare árĩbirãre yu buhe curirare peema. Eropirã yuhũ Jesucristo ĩgu yare buhebure apidigu arĩcũ ĩha masima yũre. Eropirã õpa arĩma yũre: “Īgu Goãmu judio masare iri õari buherire buhebure ĩgu Pedrore apidiro dopa ta mu sãre apiñumi. Judio masa árĩbirãpũre iri buherire buhebure mũre apiñumi,” arĩma yũre. ⁸ Eropigu ĩgu Goãmu Pedrore judio masare buhebure obeodigu ta yu sãre obeomi judio masa árĩbirãre buhebure.

⁹ Eropirã erã oparã urerã Santiago, Pedro, Ñu mera yũre ĩha masima. Goãmu ĩgu mahiri mera ĩgu yũre beyedigu yu arĩcũ masima. Eropirã yũre Bernabé sãre õaro bocatĩrima. “Eropa ta iirã mari. Mari yujuro mera buherã. Mũaru judio masa árĩbirã pohrogue buherã warãca. Gũaru judio masare buherã warãca,” arĩma yũre Bernabé sãre. ¹⁰ “Iri dihta iiro gahmea,” arĩma gũare. “Mojomorocũrãre

itamuniguicãro gahmea," arĩma. "Eropa ta iiaa," arĩbu gũa erãre. Eropigu eropa ta yũ buhe curirogue Jesu yarã mera niyerure gameneo erã mojomorocũrãre ohaa dohpa.

Antioquíague Pablo Pedroro werepũ ĩgu õaro iibirirare

¹¹ Ero pũhrũ gũa Antioquía macague árĩcũ Pedro curigũ erami gũa árĩrore Jesure umupeorã gamenererogue. Erogue erara pũhrũ Pedro queoro iibiricũ ĩha ĩgu eropa iira dipuwaja bũrigã werebũ ĩgũre Jesure umupeorã peeuro. ¹² Eropigu Pedro Antioquíague ne eragũ gamenere bamũrimi judio masa árĩbirã Jesure umupeorã mera. Irisubu gajirã judio masa Santiago obeonirã erama. Erã eranirã õpa arĩ pepirã árĩma. "Árĩpehrerã Jesure umupeorã judio masa árĩbirã sã gũa dorerire iiro gahmea Goãmũ erãre õaro ĩaborore. Eropirã árĩpehrerã judio masa iiro dopa gasiro merogã wiri aĩro gahmea. Eropa árĩbirã mera babiricãro gahmea," arĩrã árĩma eranirãpũ. Eropigu Pedro erã eracũ ĩha judio masa árĩbirãre dũca wami. Erã gasiro merogã wirisũbirinirã árĩcũ erãre dũca wami erã eranirã weresãrire gũigũ. Erã mera babirimi pare. ¹³ ĩgu eropiicũ ĩha ero majarã gajirã judio masa erã sã dũca wama judio masa árĩbirãre. Bernabé sã erã iiri queoro árĩbiricũ masiqueregũ erãre ĩhacũ ĩgu sã dũca wami erãre. ¹⁴ Erã eropiicũ ĩha gamebirigohracãbũ yũhũ. Erã judio masa árĩbirãre dũca warã "Jesu dihta marire taumi," arĩ ĩhmubirima. "Moise doreri sãre umupeoro gahmea," arĩ ĩhmurima erã judio masa árĩbirãre. Eropigu yũhũ árĩpehrerã Jesure umupeorã peeuro bũrigã arĩbũ Pedroro. "Mũhũ judio masũ árĩqueregũ õguere ne eragũ judio masa árĩbirã mera yujuro mera bagũ gũa judio masa árĩricũrire guñabirabũ. ¿Duhpigũ mũhũ dohpaguere gohrotodiari? ¿Eropigu duhpigũ dohpaguere erã judio masa árĩbirãpũre gũa árĩricũrire iidorediari?" arĩ werebũ ĩgũre ĩgu queoro iibirira waja.

Árĩpehrerã Jesure umupeocũ Goãmũ taumi erãre, arĩ werepũ Pablo

¹⁵ Gũa judio masa porã ãhraa. Eropa árĩrã gajirã Moise dorerire tarinũgarã iiro dopa árĩbeaa. ¹⁶ Eropa árĩbiriqererã gũa Jesure umupeorã dohpaguere õpa masirã ãhraa. Yujugũ Moise dorerire iicũ Goãmũ pohro waburi árĩbeaa. ĩgu Jesucristore umupeonijagu ĩgu ñeri iira dipuwajare cãdijisũdigũ wahami. Iri mera dihta õhami Goãmũ mera. Eropirã gũa judio masa árĩqererã Goãmũ mera õaro árĩmorã Jesucristore umupeobũ. Goãmũ mera õaro árĩmorã Moise dorerire iibiribũ. ĩgu mera

õaro árĩmorã gua dorerire umupeorã Goãmũ mera õaro árĩbiriboaya. Eropirã Jesucristore umupeobũ gua ñeri iira dipuwaja pehrebro dopa.

¹⁷ Eropirã gua Jesucristore umupeori mera gua Goãmũ mera õaro árĩrãca. Eropã Jesucristore umupeorã Moise dorerire iibiriquererã Goãmũ dorerire tarinũgarã iibea. Jesucristo sã Goãmũ dorerire tarinũgadoregũ ne árĩbeami. ¹⁸ Eropigũ masare õpa arĩ buhea yũhũ. Goãmũ mũare “Õarã ãhrima,” ãgũ arĩ ãaboro dopa Jesucristopũre umupeoro gahmea. Eropigũ “Mũa Goãmũ mera õaro árĩdiarã Moise doreri sãre umupeoro gahmea,” arĩbeaa. Yũhũ Moise dorerire doregũ Goãmũ dorerire tarinũgagũ árĩboya. ¹⁹ Ero corere Moise dorerire iimũriribũ Goãmũ mera õaro árĩdiagũ. Eropã iiqueregũ dipuwajacũgũ árĩmũriribũ. Dohpaguere Jesucristo mera dipuwajacũbeaa. Eropigũ “Iri Moise dorerire iiro gahmea,” arĩbeaa pare. Eropigũ yũhũ Goãmũ ãgũ dorero dopa ta iigũ iiaa. ²⁰ Jesucristo crusague sĩrigũ yũ ñegũ árĩrare gohrotodigũ árĩmi. Eropigũ yũ ero coregue árĩdiro dopa árĩbeaa pare. Cristo yũ mera árĩgũ yũre ãgũ dorerire õaro iimasicũ iimi. Eropigũ yũ árĩricũrare iibea. Jesucristo yapũre iiaa. ãgũ Jesucristo yũre mahitarigũ yũre yũ ñero iira dipuwaja sĩribasadi árĩmi. Eropigũ ãgũre guñaturagũ ãgũ dorerire iiaa. ²¹ Goãmũ mera õaro árĩmorã mari ñecũ sumarã árĩricũrire, Moise dorerire iicũ Jesucristo mari ñero iira dipuwaja sĩribasara wajamariboya. Eropigũ ne umupeogũ duhusome “Jesucristo marire taumi,” arĩ buherire.

3

Jesucristore umupeori mera Goãmũ marire “Õarã ãhrima,” arĩ ãhami, arĩ werepũ Pablo

¹ Mũa pee masibirã ãhraa dohpaguere. Mũare Jesucristo ãgũ basi mari ñeri iira dipuwajare sĩribasarare mũare werecũ mũa õaro ãha masiribũ. ¿Mũa eropa õaro masicũ noa mũare goroweoari dohpaguere iri diaye maja mũa umupeoborañere? ² Eropigũ õpa serẽpidiaca mũare. ¿Mũa Moise dorerire umupeori mera Espĩritu Santo mũare eranũgari? Erabirimi. Mũa “Jesucristo marire taumi,” arĩ buherire peecũ Jesucristore umupeocũ ãgũ Espĩritu Santo mũare erami. ãgũ yarã mũa árĩmorã árĩcũ erami. ³ ¿Mũa duhpirã pee masibirã iiro dopa wahari dohpaguere? Mũa ne Jesucristore umupeorã Espĩritu Santo itamuri mera ãgũ yare iimũriribũ. ¿Eropirã duhpirã dohpaguere mũa turari mera iidari? ⁴ ¿Mũa Jesucristo yarã árĩnũgarã mũa Jesucristore umupeora waja mũa ñero tarirare guñabeari?

¿Múa eropa umupeora “Bu gohra āhraa,” arī pepiri mua dohpaguere? ⁵ Ōpa ōaro guñaro gahmea. Goāmū muare ĩḡu Espírítu Santore odigū árīmi. Espírítu Santo mua mera árīḡu mua watope deyoro moarire muare ōarire iimi. Ĩḡu eropiḡu Moise dorerire mua umupeori mera eropa iibeami. Mua “Jesucristo marire taumi,” arī buherire ōaro pee ĩḡure umupeocū eropa iimi.

⁶ Gúa judio masa ñecu Abrahāpū Goāmure “Diaye ta árīḡu āhrimi,” arī ōaro umupeoñumi. Ĩḡu eropa umupeocū ĩha Goāmū ĩḡure “Ñeri dipuwaja marigū ōagū āhrimi,” arī ĩañumi. ⁷ Eropirā ōpa masique mua. Goāmū ōpa arīmi: “Árīpehrerā masa judio masa árībirā sã Abrahā umupeodiro dopa ta yure umupeorā Abrahā pãramerā āhrima. Eropirā yaharā āhrima,” arīmi Goāmū. ⁸ Iribojegue irire Goāmū arī wereyutuhañumi. Ĩḡu werepira ōpa āhraa ĩḡu yare gojarapūgue: “Árīpehrerā masa judio masa árībirā sã yure umupeorāre ‘Ōarā āhrima,’ arī ĩagūca. Ñero iira dipuwaja marirā ĩagūca erāre,” arīñumi. Eropiḡu iri ōari buherire Abrahāre arī wereyuñumi. “Árīpehrerā masa muñu yure umupeoro dopa ta yure umupeocū ‘Ōarā āhrima,’ arī ĩagūca yāñu erāre. Erāre ōaro iigūca,” arīñumi Goāmū Abrahāre. ⁹ Abrahā Goāmure ĩḡu umupeocū Goāmū ōaro iñumi ĩḡure. Eropiḡu árīpehrerā masa mari sã ĩḡure umupeocū Goāmū ōaro iigūcumi mari sãre.

¹⁰ Gajirā ōpa arīrā āhrima. “Moise dorerire ōaro iicū Goāmū ‘Ōarā āhrima,’ arī ĩagūcumi marire,” arīrima. Eropa arīrā dipuwajacurā āhrima dohpa. Goāmū yare gojarapūgue ōpa arī werea. “Moise dorerire iirā erā iri dorerire árīpehrerire queoro ipehobirā dipuwajacurā āhrima,” arī gojara āhraa. Eropirā iri dorerire ipehomasi-birira waja dipuwaja moasūmorā āhrima árīpehrerā. ¹¹ Ne yujugure iri dorerire ipeho masiya mara. Eropirā Moise dorerire iiri mera Goāmū mera ōamasibeama. Ōpa arī gojañuma Goāmū yare gojarapūgue. “Ĩḡure umupeorāre Goāmū ‘Ōarā āhrima,’ arī ĩhami. Ñero iira dipuwaja marirā ĩhami. Eropirā erā ōaro árīniguicārācoma Goāmū mera,” arī gojañuma. Eropirā mari masia. Ne yujugure iri dorerire ĩḡu iiri mera Goāmū ĩḡure “Ōagū āhrimi,” arī ĩabeami. Goāmure umupeogu dihta ōaro árīḡucumi ĩḡu mera. ¹² Goāmure umupeogupū, “Goāmū yure yū ñero iira dipuwaja maricū iigūcumi,” arīmi. Moise dorerire iigupū “Yū basi iri dorerire iigū ñero iira dipuwaja mariro ōaro árīḡūca,” arīrimi. Eropiḡu ĩḡu iri dorerire ipehomasiḡu

árġu ñero iira dipuwajacugũ dujami.

¹³ Eropirã mari árġpehrerã iri doreri mera ñero iira dipuwajacurã dujamuriribũ. Mari eropa árġũ ĩha, Jesucristo mari ñero iira dipuwaja ĩgu basi wajayemi ĩgu crusague sġrigũ. Goãmu yare gojarapũgue õpa werea: "Īgu yucugugue dirisiudigu Goãmu ĩgu ñero iira dipuwaja moadigu åhrimi," arġ gojañuma iribojegue. Eropigu Jesucristore crusague dirisiudigũre mari ñero iira dipuwajapũre Goãmu ĩgũre dipuwaja moadigu árġmi. Eropirã maripũ ñero iira dipuwaja marirã dujaa pare. ¹⁴ Jesucristo eropiĩcũ Goãmu Abrahãre õaro ĩadiro dopa ta judio masa árġbirã sãre õaro ĩanugami. Eropigu ĩgu arġdiro dopa ta ĩgu obeodigu Espĩritu Santopũ erami marire Jesucristore umupeorãre.

Īgu buherare werenemopũ Pablo

¹⁵ Mari masa mari iiro dopa ta weremuhtagũra mũare. Perã "Õpa iirãca," erã arġ weretamura pũhrũ gajigu gohrotomasibeami. ¹⁶ Eropigu Goãmu Abrahã mera weretamura pũhrũ Abrahãre ĩgu arġrare gohroto masiya mara. Õpa arġ werepiñumi ĩgũre: "Mu pãrami árġturiagu mera árġpehrerã masare õaro iigũra," arġ wereñumi. Eropa arġgu ĩgu pãramerã árġturiarãgue mera arġgu iibiriñumi. Yujugu ta ĩgu pãrami árġturiagu dihtare arġgu iinũmi. Eropa arġgu ĩgu pãrami árġturiagu Jesucristo ariburire arġ wereyugu iinũmi. ¹⁷ Eropigu õpa arġ werea mũare: Iribojegue Goãmu Abrahã mera weretamugũ masare ĩgu õaro iiburire wereñumi. Īgu eropa weretamura pũhrũ yoari boje pũhrũ cuatrocientos treinta bojori árġturiagu mera árġpehrerã masare õaro iigũra," arġ wereñumi. Eropa arġgu ĩgu pãramerã árġturiarãgue mera arġgu iibiriñumi. Yujugi pũhrũ Moiserẽ ĩgu doreri apiñumi. Moise doreri árġnũgaquerecũ Goãmu Abrahãre werepira pehrecũ iibiriyo-ro. ¹⁸ Goãmu Abrahãre mahigu õpa ĩgũre arġ were-tuhañumi. "Árġpehrerã masare mũ yũre umupeoro dopa ta yũre umupeorãre õaro iigũca," arġ weretuhañumi. Eropiro Moise doreri árġnũgaquerecũ Goãmupũ iri dorerire iiri mera masare taubeami. Moise doreri iiri mera mari taricũ Goãmu mũare "Waja mariro õaro iig mera arġgu iibiriñumi. Yujugũca," ĩgu arġrapũ duhpiburi árġbiriboaya.

¹⁹ ¿Eropigu duhpiburire iri dorerire Moiserẽ apiyuri Goãmu? Masa erã ñerire masiborore apiñumi iri dorerire erã ñero iira dipuwaja masiborore. Abrahã pãrami árġturiagu Jesucristo ĩgu eracũgue árġtuya iri doreri. Eropigu Jesucristo ĩgu eracũ Goãmu Abrahãre ĩgu werediro

dopa ta masare õaro iĩñumi. Goãmũ iri dorerire apigu anyuare weremũhtañumi. Erã anyua wereñuma Moisere. Īgũ Moiserũ masare wereñumi. ²⁰ Īgũ masare õaro iiburire Goãmũ ĩgũ basi ta werepiñumi Abrahãre. Gajirã mera werebeobiriñumi ĩgũ iri dorerire apidiro dopa ta. Eropigu ĩgũ Abrahãre werepirapũ Moise doreri taurõ õhaa.

Moise dorerire werepũ Pablo

²¹ Goãmũ Moisere ĩgũ dorerire apigu, ero coregue Abrahãre ĩgũ arĩrare “Yũ arĩdiro dopa iisome pare yũhũ,” arĩgũ iibiripũ ĩgũ. Abrahãre ĩgũ arĩmũhtadiro dopa iibu iipũ. “Masare õaro iigũca,” ĩgũ arĩrare iibu iipũ dohpa. Moise dorerire iiri mera mari Goãmũ mera õaro árĩmasirã mari iri dorerire õaro iirã ñero iira dipuwaja opabiriboya. ²² Eropa árĩquerecũ Goãmũ yare gojarapũgue õpa ãhraa: “Masa árĩpehrerã erã ñero iira dipuwaja opama, arĩ gojara ãhraa. Eropa dipuwajacũrãre erã Jesucristore umupeocũ Goãmũ õaro iigũcumi erãre. Īgũ Abrahãre werediro dopa ta iigũ erãre ñero iira dipuwaja marirã ĩagũcumi.

²³ Jesucristore umupeori mera masare tauburi árĩboro core gũa Moise doreri doca árĩmũribũ. Eropa Moise dorerire iirã peresugue árĩro dopa árĩmũribũ. Jesucristo gũare tauboro core eropa árĩmũribũ. ²⁴ Őpa sã árĩburi árĩbũ Moise doreri: Moise doreri mera Jesucristore mari masiburi erabũ. Mari porãre erã buherogue soro dopa ta Moise doreri marire Jesucristore masicũ iibũ. Eropirã mari Jesucristore umupeocũ ĩgũ marire taumi. Mari ñero iira dipuwaja maricũ iimi. ²⁵ Eropirã dohpaguere mari Jesucristore umupeorãre Goãmũ “Őarã ãhrima,” arĩ ĩhami. Gũa Jesucristore masirã ĩgũre umupeorã árĩrã dohpaguere Moise doreri doca árĩbeaa pare.

²⁶ Mũa sã árĩpehrerã Jesucristore umupeorã ĩgũ yarã árĩrã Goãmũ porã ãhraa. ²⁷ Eropirã mũa árĩpehrerã Jesucristore umupeorã ĩgũ waĩ mera waĩyesũnirã árĩrã Jesucristo ĩgũ iro dopa ta ãhraa. Jesucristo Goãmũ magũ árĩro dopa ta mũa sã Goãmũ porã ãhraa. ²⁸ Eropirã árĩpehrerã Jesucristo yarã yujuro mera ãhraa. Yujugu porã iro dopa ãhraa. Eropigu gũa judio masare mũa judio masa árĩbirã sãre Goãmũ yujuropa ta ĩhami. Masa pohro majarãre erã oparã sãre yujuropa ta ĩhami. Ŭmare nome sãre yujuropa ta ĩhami. ²⁹ Eropirã mũa Jesucristo yarã árĩrã Abrahã pãramerã sã ãhraa. Eropigu Goãmũ Abrahãre “Mũre õaro iigũra,” arĩrare mũa sãre iimi. Cristo yarã mũa árĩcũ ĩagũ mũare õaro iigũcumi.

4

1 Mari iri doreri doca árībiriborore mari Jesu yarā árīborore weregura daja. Yujugu majigu ĩgu pagu yare wuaro opapehobu árīqueregu majigu árīgu pohro majagu iro dopa āhrimi. Gajirā dorero doca āhrimi dohpa. 2 Gajirā ĩgu pagu apinirā ĩgu ya árīburire ĩhadibuma dohpa. ĩgu pagu gameranu árīcūgue ĩgu basi ĩgu yare doremi pare. 3 ĩgu majigu gajirā dorero doca ĩgu árīro dopa ta mari masa mari ñecu sumará árīricuri doreri doca árīmūriribū. Pohro majarā iro dopa ta árīmūriribū. 4 Mari eropa árīnirāre mari Pagu Goāmu ĩgu gameranu ejacū ĩgu magure ĩgu pohro árīdigure obeodigu árīmi. ĩgure obeocū ĩgu nomeoguere dehyoadigu árīmi. Eropa dehyoagu judio masu árīdigu árīmi Moise dorere iigu. Eropigu Goāmu obeodigu árīmi ĩgu magure. 5 Gua iri doreri doca árīrāre taubure obeodigu árīmi ĩgu magure. ĩgu marire taugu mari pohro majarā iro dopa árīnirāre wiugu ĩgu porā árīcū iimi.

6 Eropiituhaja mua sā ĩgu porā árīcū ĩgu Jesucristo mera Espíritu Santore obeomi muare. Eropirā Espíritu Santo marire ĩgu itamuri mera Goāmure mari Pagure “Ahū,” arāa mari pare. 7 Eropirā mua Goāmu porā ta āhraa. ĩgu porā árīrā mua ñecu sumará doreri doca, pohro majarā iro dopa árībeaa pare. Goāmu magu Jesucristo wiunirā āhraa. Mua eropárīrā ĩgu porā árīrā Goāmu oburire oparāca mua árīpehrerire.

Pablo Galacia majarā Jesu yarāre guñaricupu

8 Mua ero core Goāmure masibirā árīrā gajirā goāmarāre umupeomūriribū. Eropirā erā pohro majarā iro dopa árīmūrirabū. Goāmu gohrare umupeobirimūribū. 9 Eropa árīquererā ta dohpaguere Goāmure masia. Goāmupu muare ĩha masimi. ¿ĩgu eropa masiquerecū ta duhpirā i yeba majarā erā pepirire gahmeri daja? ¿Duhpirā iribojegue mua ñecu sumará doreri mua iidiro dopa ta mūraro ta Cristo mariro dopa ta iidiri daja? ¿Eropirā duhpirā dohpaguere Moise dorere mua iinugarā, pohro majarā iro dopa árīdiari daja mua? 10 Judio masa erā bosenuri iro dopa mua sā iica Goāmu mera ōadiarā. Soorinuri nucu, aberi nucu, bosenurire eropiica. Bojori nucu bosenurire ōaro iica. Mua eropiiri queoro árībeaa. 11 Mua eropiicū pee ñero sīporācūca yupu. Muare yu turaro buhequerecū ta “Iri waja mariboca,” arī pepia.

12 Eropigu yuhu muare būrigā ōpa arī werea. Mari Jesucristore umupeoturadiro dopa ta umupeoque daja. Yu Jesucristore umupeogu gua judio masa doreri yure

taubiricũ ĩha irire umupeobiribũ pare. Eropirã mũa sã Jesucristore umupeorã iri dorerire umupeobiricãro gahmea Goãmũ mera õaro árĩmorã. Yũhũ mũa pohro ne árĩcũ mũa ne ñero iibiribũ yũre. ¹³ Mũa masia yũhũ mũa pohro ne árĩdirore. Yũhũ Jesucristo marire tauburire ne mũare buhegũ ejagũ dorecũgũ árĩbũ. ¹⁴ Yũ dorecũgũ ñero taribũ. Yũ eropa dorecũgũ árĩquerecũ mũa yũre doobiribũ. Yũre õaro umupeo õaro bocatĩribũ. Goãmũ obeodigũ anyu árĩro dopa yũre ĩabũ. Yũre Jesucristore iiro dopa õaro iibũ. ¹⁵ Yũre bũrigã gamebũ. Yũre bũrigã gamerã yũ serẽropẽ ta árĩpehrerire omorã árĩbũ yũre. ¿Mũa eropa árĩcũ dohpa wahari dohpaguere? Mũa negohraguere yũre mucubiridiro dopa ta dohpaguere mucubiribeaa. ¹⁶ ¿Mũaare diaye majare yũ werera waja mũa ĩhaturigũ wahari dohpaguere?

¹⁷ Mũa pohrore gaji buherire buherã mũare õaro umupeocoma. Erã eropa umupeoquererã mũare sĩporã mera mahibiricoma. Mũa yũre yũ buheri sãre gamebiricũ gahmema erã. Mũa erãpũre umupeocũ gahmema. Eropirã mũare umupeocoma. ¹⁸ Masare umupeocũ õapũrica. Erã weca dihta umupeocũ õabeaa. Yũ árĩcũ dihtare umupeocũ õabeaa. Árĩpehrerãre yujuropa ta õari mera umupeoniguicãro gahmea. ¹⁹ Mũa yũ porã iro dopa ãhraa. Eropigũ mũare guñaricũa. Mũaare bũrigã guña teboricũa. Yujugo porãcũbo teboricũro dopa ta yũ sã teboricũa mũare guñagũ. Igo magũ õaro dehyoacũ gamego teboricũmo. Mũa Goãmũ porã õaro árĩcũ gamegũ teboricũa yũ sã. Mũa Jesucristo árĩricũre õaro opacũ gahmea. ²⁰ Mũa pohro bũrigã wadiarica. Yũ mũa mera árĩgũ yũ basi mũare õaro weremasiboya gojaripũ gojaro mariro. Eropigũ mũare dohpaguere ĩabigũ mũa Jesucristore õaro umupeoturanemoborore masibirica.

Agar Sara mera erã árĩrare werequeogu mari Goãmũ porã árĩrare werepũ Pablo

²¹ ¿Mũa Goãmũ mera õaro árĩmorã Moise dorerire iiniguicãdiarã mũa Moise arĩ gojarare masibeari? ²² Őpa arĩ gojañumi Moise: Abrahã porã ũama perã árĩñuma. Ĩgũ marapo pohro majago Agar waĩcũgo yujugũ porãcũñumo. Pũhrũ Abrahã maraporũ Sara waĩcũgo gajigũ porãcũñumo. ²³ Ĩgũ pohro majago magũ mari masa iro dopa ta masa dehyoañumi ĩgũ. Abrahã igore porã moara pũhrũ mata nijipo ãhri porãcũñumo. Ĩgũ maraporũ mata porã bocamasibiriñumo. Eropigũ Goãmũ ĩgũ arĩdiro dopa ta igore porã bocacũ iĩñumi. ²⁴⁻²⁵ Erã perã nome iri-bojegue eropa warare õpa buhegũra mũare. Goãmũ

Abrahãre wererare iirã Sara árĩro dopa ãhrima. Gajirã Moise dorerire iirã Agar iiro dopa ãhrima. Agar igo porã sã gajirã dorero doca árĩmuriñuma. Pohro majarã árĩmuriñuma. Erã árĩdiro dopa ãhrima Moise dorerire iirãpũ. Eropirã Moise doreri doca árĩmurirã ãhrima pohro majarã iro dopa árĩrã. Iri dorerire iirã “Goãmũ mera õaro árĩrãca,” arĩmuririma. Iri dorerire Goãmũ Moisere apiñumi Sinaí waĩcudigu utãgugue Arabia yebague. Dohpaguere iri dorerire Jerusalengue judio masa umupeoma. Eropirã iri doreri doca ãhrima. ²⁶ Õpa ãhrima Goãmũ Abrahãre wererare iirãpũ. Erã Jesucristore umupeorã ãhrima. Sara árĩdiro dopa ãhrima. Sarapũ pohro majago árĩbirimuriñumo. Mari Jesucristore umupeorã “Moise doreri mera taribea,” arãa. Jesucristo marire taucũ Goãmũ porã árĩrã mama Jerusalén maca majarã ãhraa. ²⁷ Eropirã Jesucristore umupeorã Goãmũ porãpũ bajarã árĩrãcoma. Moise dorerire iirãpũ bajamerã árĩrãcoma. Eropã ta arĩ werea Goãmũ yare gojarapũgue:

Mũhũ ne porã opabigo, porãcũri pũririñe pepibigo õaro mucubirique. Gajigo igo marapũ mera árĩgo igo porã árĩquerecũ igo pãramerã árĩturiarã bajamerã árĩrãcoma. Mũpũre dohparagã mũ porã mariquerecũ mũ pãramerã árĩturiarã tauro bajarã árĩrãcoma. Eropigo mucubirique, arĩñumi Goãmũ.

²⁸ Isaa Abrahã magũ árĩdiro dopa mari Goãmũ porã ãhraa. Isaa Abrahã magũ dehyoagũ Goãmũ ĩgu werediro dopa ta dehyoañumi. Mari Goãmũ porã árĩrã Goãmũ ĩgu werediro dopa ta ĩgu porã ãhraa. ²⁹ Eropirã Abrahã porã perã arĩñuma. Pohro majago magũ Ismael árĩpehrerã masa iro dopa dehyoañumi. Isaapũ ĩgu pago igo porã bocamasibiricũ Espĩritu Santo itamuri mera porãcũñumo. Erã dehyoara pũhrũ Ismaepũ pohro majago magũpũ Isaare Abrahã marapo magũre ĩgu ñero taricũ iimuriñumi. ĩgu iidiro dopa dohpaguere eropa wahaa. Erã Moise dorerire iidorerãpũ marire ñero taricũ iima. Mari Espĩritu Santo itamuri mera Goãmũ porã ãhraa. Mari eropa árĩrãre marire ñero taricũ iima. ³⁰ Eropã wacũ Goãmũ yare gojarapũgue irire dohpa arĩrire buherãca. Õpa Goãmũ arĩñumi Abrahãre. “Mũ pohro majago magũ mũ oparire ne opasome, arĩñumi. Mũ marapo magũ dihta opapehogucumi. Eropigu mũ pohro majago igo magũ mera cóãque mũ pohrore,” arĩ wereñumi Goãmũ Abrahãre. ³¹ Eropirã, yũ acawererã, mari Goãmũ porã árĩrã pohro majago magũ iro dopa árĩbeaa. ĩgu pagũ oburire opamasibiriñumi. Maripũ mari Pagũ Goãmũ ĩgu oburire

opamasirāca. Marire ĭġu mera ðacū iimi.

5

Cristo marire ĭġu taura pħrħ turarā árĭro gahmea marire, arĭ gojapħ Pablo

¹ Eropiġu marire mari ñecħ sħmarā árĭricħri dorero doca árĭnirāre Jesucristo tautuhajami. Mari ñero iira dipuwajare Jesucristo ĭġu basi wajayebasami mari Goāmħ mera ðaro árĭboro dopa. Eropirā mari Goāmħ porā árĭrā Jesucristore ġuñaturanĭguicāro gahmea. Eropirā peebiricāro gahmea erā Moise dorerire iidorerāre.

² ðaro peeque yħre. Yħħ Jesucristo ĭġu apidigħ āħraa. Eropiġu mħare ðpa werea. Mħa Goāmħ mera ðaro árĭmorā mħa gasiro merogā wiri aĭcū Jesucristo mħare ĭġu sĭribasara waja mariboya. ³ Eropiġu ġuhyadiaro mera werea daja. Goāmħ mera ðaro árĭborore erā gasiro merogā wiri aĭrā Moise dorerire árĭpehrerire iiro gahmea erāre.

⁴ Eropirā mħa “Goāmħ marire taugħcumĭ Moise dorerire iicū,” mħa arĭdiarā, mħa Jesucristore cōārā iiboca. Mħa eropiirā Goāmħ ĭġu mera ðaro árĭburire mħare ðaro ĭġu iiburire cōārā iiboca. ⁵ “Maripħ Goāmħ mera ðhaa,” arĭmasia Jesucristore umupeori mera, Espĭritu Santo ĭġu itamuri mera. “Goāmħ ġħare ‘Ñero iira dipuwaja mariro ðarā āħrima,’ arĭ ĭagħcumĭ,” arĭmasia. ⁶ Eropiro gasiro merogā wiri aĭnirā árĭcū sħre, wiri aĭbirinirā árĭcū sħre ĭabeami. Mari Jesucristore umupeorā árĭcū ġajirāre mari mahi umupeocū ĭħami Goāmħ.

⁷ Mħa ne Jesucristore umupeorā ĭġu yare ðaro diaye iimħribħ. Eropirā dohpaguere mħa Jesucristo yare diaye majare ðaro iibiricū ġajirā mħare cāhmotañorā.

⁸ Goāmħpħ eropa iibirimi. ĭġu mħare Jesucristo yarā árĭmorāre beyegħ āħrimi. ⁹ Eropiġu ðpa werea mħare. Yujugħ masħ ĭġu ġuyarire buhenugacū peerā masa árĭpehrerā ĭġure peerā ġuyarire umupeorā wahama ðaripħre peedibirā. ¹⁰ ĭġu mħare eropa ġuyarire buhenugaquerecū ðpa arĭ pepia. “Erā Jesucristore umupeorire oparā erā iri ġaya buherire umupeosome,” arĭ pepia yħħ mħare. Mħare goroweocoreġħre noho árĭġure ĭġu eropa iira dipuwajare Goāmħ dipuwaja moagħcumĭ ĭġure.

¹¹ ðpa arĭ werewħañorā ġajirā yħpħre: “ ‘Mari Goāmħ mera ðaro árĭmorā mari gasiro merogā wiri aĭro gahmea,’ arĭ buhemi Pablo,” arañorā yħre. Yħħ eropa arĭ ne buhebeaa. Yħħ dohpaguere “Gasirogā wiri aĭro gahmea,” yħ arĭ buhecū irire iidorerāpħ yħre ñero taricū iibiriboañuma.

Yũ õpa arĩ buhea: “Mari ñero iira dipuwajare Jesucristo wajayebasadi árĩmi crusague s̄irigũ. Eropirã mari Goãmũ mera õaro árĩmorã Jesucristore umupeoro gahmea,” arĩ buhea yũhũ. Yũ eropa arĩ buhecũ judio masa pee guama. Yũre ñero taricũ iima. ¹² Erãpũ mũare goroweorãpũ gasiro merogã wiri aĩdorerãpũ erã basi wiri aĩpehocãporo.

¹³ Mũapũre Goãmũ mũa igũ porã árĩmorãre aĩgũ mũa Moise dorerire iimorãre beyebiripũ. Mũare iri dorerire iidorebiriquerecũ mũa mũa Ƴaribejarire iibiricãro gahmea. Õpa iiro gahmea. Mũa árĩpehrerãre õaro mahi umupeorã erãre itamuniguicãro gahmea. Mũa gajirãre umupeorã Moise dorerire árĩpehrerire iirãca. ¹⁴ Eropa ta arĩ gojara ãhraa: “Mũ basi mahiro dopa ta mũ pohro árĩrãre mahique,” arĩ gojara ãhraa. ¹⁵ Eropirã mũa game ìhaturicũ, papũri, mũa disitĩri wereniguicũ mũa basi õaro mũa game umupeoro pehreboca. Eropirã mũa basi õaro árĩro gahmea.

Masa erã gamerire iirire Espĩritu Santo igũ gameri sãre werepũ Pablo

¹⁶⁻¹⁷ Õpa arĩ werediaca mũare. Mari Jesucristo yarã árĩcũ mari pepirigue õpa ãhraa. Mari ñeri Ƴaribejari ãhraa. Espĩritu Santo igũ gameri sã ãhraa. Mari Ƴaribejari Espĩritu Santo igũ gameri mera yujuro mera árĩbeaa. Eropiro marire masiya mariro wahaa. Eropirã mũa Espĩritu Santopũre yũhrirã mũa Ƴaribejaripũre iisome. Eropirã Espĩritu Santo igũ gamerire iiniguicãque. ¹⁸ Eropirã Espĩritu Santo gamerire iirã árĩrã “Moise doreri mera mari tarirãca,” arĩ pepibeaa mũa.

¹⁹ Masa erã ñeri Ƴaribejarire erã iicũ õaro ìhamasica mari. Õpa iima erã Ƴaribejarire iirã: Ƴma gajirã nome mera ñero iima. Nome sã gajirã Ƴma mera ñero iima. Di-ayea iiro dopa iiricũma. Ñerire pepima. Ñerire wereniguima. ²⁰ Eropirã goãmarã wéanirãre umupeorã “Mari goãmũ ãhrimi,” arĩ umupeoma. Gajirãre dojama. Eropirã masare doho ãhrima. Ìhaturima. Disitĩri wereniguima. Gajirãre doéma. Mata guama. Gajirãre tarinũgadiama. Yujuro mera árĩdiabeama. Yuju curu majarã gajĩ curu majarãre ìhaturima. ²¹ Eropirã gajirãre gajinore erã opacũ ìhaturima. Gajirãre wejẽdiarã wejẽma. Merericurã ãhrima. Mererã ñerire Ƴaribejama. Eropa iirã gajino ñeri sãre iima. Eropigũ yũhũ mũare werediõro dopa ta werea daja guhyadiaro mera. Iri ñerire iiniguigũ Goãmũ igũ opu árĩroguere ejamasisome.

²² Espĩritu Santo yapũ õpa ãhraa. Erãre õpa iirã árĩcũ iimi. Árĩpehrerãre mahi umupeoma. Mucubirima. Gũiro

mariro áhřima. Gajirã erãre ñero iiquerecũ erã mera guabeama. Mojomoro íhama. Duhuro mariro Goãmũ ĩgu gamerire õaro iima. Erã mohmediarire erã mohmediabiriri sãre õaro iima. ²³ Eropirã nijiyajaro mera iima. Erã ñero iidiaquererã iibeama. Eropa ta iima Espířitu Santore yũhrirã. Eropa iirãre “Eropa iibiricãque,” ne arĩbeami gajigũ. ²⁴ Eropirã mari Jesucristo yarã árĩrã mari ñero árĩdirore duhucã mari gamerire mari ƚaribejarire iiniguicãbeaa. ²⁵ Eropirã mari Espířitu Santo itamuri mera iirã árĩrã ĩgũre yũhriniguicãro gahmea.

²⁶ Eropirã mari “Yũhũ gajirãre tarinũgaa,” arĩ pepibiricãrã. Eropirã gajirãre game íhaturicũ iibiricãrã. Gajirã erã õari oparire obobiricãrã.

6

Mũa mera majarãre itamuque, arĩ werepũ Pablo

¹ Acawererã, mũa mera majagũ Jesu yagũ ĩgu ñerire iicũ íha ĩgũre itamuro gahmea mũa Espířitu Santo dorerire iirãpũre. ĩgu iri ñerire duhucũ õaro mera werero gahmea. Eropa itamurã mũa õaro pee masique mũa sã ñerire iiri arĩrã. ² Eropirã mũa basi game itamuque árĩpehrero. Mũa eropa itamurã Jesucristo dorediro dopa ta iirãca.

³ Yujugũ “Yũpũ õarire iigu áhřaa,” arĩ pepigũ, ĩgu õarire iibiriqueregũ õpa arĩgũ ĩgu basi gũyagũ iimi. ⁴ Eropirã marire õpa iiro gahmea. Mari basi mari iiricũre õaro queoñanũrsiario gahmea. Eropa íara pũhrũ mari árĩricũri õari árĩcũ íha “Yũhũ õarire iiaa,” arĩmasia. Eropirã mari õari árĩricũri mera mucubirimasia gajirã árĩricũre íaro mariro. ⁵ Eropigũ mari árĩricũre Goãmũ beyegũcumĩ. Eropirã mari gajirã erã iiricũre íhanũrubiricãro gahmea. Eropirã mari yujurãyeri iiripũre íaro gahmea.

⁶ Eropirã Jesucristo yare õari buherire peerãpũ erãre buherãpũre erã gamerire itamuporo árĩpehrerire õarire.

⁷ Eropirã “Goãmũ yũ ñerire iira dipuwaja dipuwaja moasome yũre,” arĩ pepi masiya mara. Őpa arĩ pepirã mũa diaye arĩ pepibirica. Eropiro Goãmũre gũya masiya mara. Eropirã mari dohpaguere iira waja pũhrũgue bocarãca. ⁸ Eropirã mari ƚaribejarire iiniguirã iri ñeri iira waja dipuwajacũrãca. Eropirã peamegue warãca. Mari Espířitu Santo gameripũre iirã õaro wajatarãca. Eropirã Goãmũ mera ƚmũri nũcũ õaro árĩniguirãca. ⁹ Eropirã mari Espířitu Santo gamerire iiniguicãrã. Gariborebiricãrã. Goãmũ gamerinũ mari wajatarãca õarire duhubirã. Eropirã õarire iiniguicãro gahmea. ¹⁰ Eropirã árĩpehrerisubure õaro umupeoro gahmea árĩpehrerãre.

Eropirã Jesucristore umupeorãre burigã mahi umupeoro gahmea yujungu porã iro dopa.

Pablo ïgu weretura

¹¹ Ìata. Yu basi muare gojagu pagari deyori mera gojagu iiaa. ¹² Eropigu òpa werea muare. Erã muare gasiro merogã wiri aïdorerãpu òpa gahmema. Erã dorerire mua iicũ ìha gajirã judio masa erã mera òaro árìbocoma. Eropirã erãre ñero taricũ iibiribocoma daja erã Jesucristo yare umupeoquerecũ. ¹³ Erã basi gasiro merogã wiri aïquererã Moise dorerire gajire iibeama. Erã eropa iibiriquererã, muapure erã dorerire iidorerã mua gasiro merogã wiri aïcũ gahmema erã. Eropa gahmema gajirã judio masare òpa erã arìboro dopa mucubiriri mera. “Gua dorero mera Galacia majarã judio masa árìbirã mari árìricurire iiaa,” erã arìboro dopa muare erã dorerire iicũ gahmema. ¹⁴ Yu tamera erã eropa mucubiridiaro dopa ta ne mucubirisome. Mari Opu Jesucristo iira mera dihta mucubiria. Ìgu mari ñero iira dipuwajare wajayebasadigu árìmi crusague sïrigu. Iri dihtare mucubiria. Jesucristo eropa iira mera yuhu ïgu taudigu árìgu masa erã ùaribejarire guñabeaa pare. I umu maja masa erã ùaribejari sã doremāsibeaa yure. ¹⁵ Eropiro gasiro merogã wiri aïcũ, wiri aïbircũ sãre Goãmu ìabeami. Masa Jesucristo mera òari mera gohrotorã árìcũ ìhami. ¹⁶ Erã eropa gohrotonirã árìpehrerã iri buherire Jesucristo yare yuhrirãre “Erã òaro árìporo,” arì serẽa Goãmure. “Erãre mu ya curu majarã gohra árìrãre mojomoro ìaque,” arì serẽbasaa yuhu Goãmure.

¹⁷ Yuhu Jesucristo dorediro dopa ta iigu ïgu yare buhera dipuwaja gajirã yure ñero taricũ iima. Erã eropa iira cami mura àhraa yure yu dũpũre. Eropigu òpa gahmea: Iripẽta yure bujawerecũ iiporo Jesucristo yarãre goroweorã.

¹⁸ Muare árìpehrerãre òaro árìcũ gahmea. Mari Opu Jesucristo muare árìpehrerãre òaro iiporo. Eropa ta iiporo. Iripẽta àhraa.

Efesios

Efeso majarãre gojabeoñumi Pablo

¹ Yũhũ Pablo Goãmũ ïgũ gamero dopa ta Jesucristo yũre ïgũ yare buhedore apidigũ áhraa. Eropigũ mũare Efeso majarãre gojabeoa. Mũare Jesucristore õaro umupeorãre gojabeoa yũhũ. ² Goãmũ mari Pagũ mera Jesucristo mari Opũ mera mũare õadoreã. Ìgũ mũare itamuri mera õaro árĩque mũa.

Cristo yarã mari árĩcũ ïagũ Goãmũ õaro iimi marire, arĩ gojañumi Pablo

³ Goãmũ mari Opũ Jesucristo Pagũ marire õaro iinigu-icãmi. Árĩpehreri ïgũ ya õari mera ïgũ mari pepirire õarire ohomi mari ïgũ pohro árĩro dopa. Marire sĩporã turacũ iimi. Cristo yarã mari árĩcũ ïagũ eropa marire õaro iimi. Gũa ïgũ eropiicũ ïha õaro umupeoa. Ìgũre õaro wereniguia. ⁴ Õpa iipũ ïgũ marire ïgũ yarãre: I yeba árĩboro coregue ïgũ yarã árĩmorãre beyemũtapũ ïgũ marire. Eropa beyegũ ïgũ marire ïgũ ïarore ñeri iiro marirã mari árĩmorãre iipũ. Eropigũ ïgũ marire “Ñerã áhrima, arĩsome. ⁵ Marire mahigũ mojomoro ïagũ iribojegue õpa arĩmũtapũ ïgũ marire: “Yũ magũ Cristo ïgũ itamuro mera erã yũ porã õaro árĩrãcoma,” arĩ apipũ marire iribojegue ta. Ìgũ gamediro dopa ta eropa iipũ ïgũ marire. ⁶ Marire ïgũ eropa õaro iicũ ïarã umupeoa. Ìgũre õaro wereniguia. Ìgũ magũ ïgũ mahigũ Jesucristo yarã mari árĩcũ ïagũ, õaro iimi ïgũ marire. ⁷⁻⁸ Eropigũ ïgũ magũ Jesucristo ïgũ di cóãgũ sĩrigũ mari ñeri iira dipuwajare wajayebasadi árĩmi. Ìgũ eropa wajayebasacũ mari ñeri iirare cãdijidi árĩmi Goãmũ. Eropigũ marire turaro mahigũ, marire mojomoro ïagũ eropa iipũ Goãmũ. Eropigũ marire peamegue wabonirãre taudi árĩmi. Ìgũ õaro masipehori mera eropiipũ ïgũ. Eropirã ïgũre õaro wereniguia. ⁹⁻¹⁰ Eropigũ ïgũ marire ïgũ iiborore marire masicũ iimi. Iribojegue majarãre irire masicũ iibirimũripũ ïgũ. Õpa áhraa marire ïgũ iiboro. Ìgũ gamediro dopa ta ïgũ pepidiro dopa ta árĩpehrerãre Cristo dorero doca árĩcũ iigũcumi. Eropigũ árĩpehrerire ïgũ ya árĩcũ iigũcumi. Ìgũ queorasubu árĩcũ umaro majarãre, i yeba majarã sãre ïgũ dorero doca árĩcũ iigũcumi ïgũ. Eropigũ umaro maja sãre i yeba maja árĩcũ sãre ïgũ ya dihta árĩcũ iigũcumi. Eropigũ

Jesucristopu árīpehrerā weca opu árīgucumi. Eropiro árīpehreri ĩgu ya dihta árīroca. Eropa árībure árīdorepu Goāmu ĩgure.

¹¹ Eropi Cristo yarā mari árīborore masiyugu Goāmu marire beyetuhapu ĩgu yarā árīmorāre. I árīpehrerire apipu ĩgu, ĩgu pepidiro dopa ta ĩgu gamediro dopa ta iibu. ¹² ĩgu eropiipu ĩgu yare gua iiborore. ĩgu yare gua ōaro iicū ĩarā gajirā sā ĩgure umupeorā “Turagu āhrimi,” arīrācoma. Guapu judio masa Cristore gamenuganirā árīrā ĩgure umupeomūhtanirā árību. ¹³ Mua sā diaye wereniguirire, ōari buherire peeabu. Iri buheri mera ta Goāmu pohrogue warāca mua. Irire peerā ĩgure umupeoa. Eropirā ĩgu yarā wahabu mua. Ōpa arīpu Cristo: “Yure umupeorāre Espírítu Santore obeogura,” arī werepipu. Eropigu ĩgure mua ua iiborore. ĩgu yare gua ōaro iicū ĩarā gajirā sā ūmupeocū ĩagu ĩgu Espírítu Santore odigu árīmi mware. Eropigu ĩgure mua opacū, “Jesucristo yarā āhrra,” arī masicū iimi ĩgu mware. ¹⁴ Goāmu marire taricū iiami. Eropigu puhru ĩgu pohrogue aīagucumi marire ĩgu oburire marire obu. Marire aīaboro core Espírítu Santopu mari mera āhrimi. ĩgu mari mera árīcū Goāmu mera mari árīborore ōaro masia. Goāmu marire ĩgu eropiicū ĩarā ĩgure umupeori mera, “Ōagu āhrimi,” arāa mari.

Pablo Goāmure serēbasañumi Jesu yarāre

¹⁵⁻¹⁶ Eropigu Jesucristore umupeorā mua árīcū peebeo, árīpehrerā ĩgu yarāre mua umupeo mahirire peebeogu Goāmure “Ōhaa,” arāa. Eropigu umuri nucu serēbasaa mware Goāmure. ¹⁷ Mari Pagu umaro majagu ĩgu yare mware ōaro masicū iidoregu serēbasaa. Eropigu ĩgure mua ōaro masinemoboro dopa serēbasaa. ĩgu Goāmu Jesucristo mari Opu Pagu āhrimi. ¹⁸ Eropigu mua ōaro masiboro dopa mware serēbasaa Goāmure. ĩgu mware taugū, ĩgu yarā árīmorāre iimi ĩgu mware. Eropigu mware ĩgu yarāre ĩgu pohro ōaro wacū iigucumi. Irire mua ōaro masiboro dopa serēbasaa yuhū Goāmure. Eropigu ĩgu marire oburi sāre “Ōataria āhrra,” iri mua arī mua masiboro dopa serēbasaa. Ōpa mua masiboro dopa serēbasaa mware Goāmure. ¹⁹ Mari Jesucristore umupeorāre ĩgu itamugu, ĩgu turari mera ĩgu iimi. ĩgu gajirā tauro turagu āhrimi. Mware iri sāre ōaro masiboro dopa serēbasaa mari Pagu Goāmure. ²⁰ ĩgu turari mera Cristo sīridigure masudigu árīmi. Eropigu ĩgu turari mera umarogue ĩgu diayepu

Cristo ĩĝu doacũ iidi árĩmi Goãmũ árĩpehrerãre ĩĝu dore-boro dopa. ²¹ Ero doagũ árĩpehrerã umaro majarã oparã weca, árĩpehrerã dorerã weca añhrimi Cristo. Eropigũ i umũ majarã weca opũ, gajipũ majarã sã weca opũ, árĩpehrerã dohpague majarã, gajisubu majarã sã, pũhrũgue majarã sã erã weca opũ árĩbu ta añhrimi ĩĝu. ²² Eropigũ árĩpehrerã weca, árĩpehreri weca apipũ Goãmũ Cristore. Eropigũ árĩpehrerire opũcũcũ iipũ ĩĝure. Eropiro Cristo yarã yuju curu árĩrã erã opũ árĩbure acupũ ĩĝure. Erã dipuru iro dopa árĩĝu añhrimi ĩĝu. ²³ Cristo yarã yuju curu árĩrã ĩĝu dupũ iro dopa árĩrã añhraa mari. Cristo árĩpehrerogue árĩniguimi. Eropigũ mari ĩĝu yarã mera árĩniguigũ marire itamuniguicãmi.

2

Goãmũ marire mahigũ, mojomoro ĩagũ taupũ marire, arĩ gojañumi Pablo

¹ Ñeri dipuwajacubonirã peamegue dederebonirã árĩquerecũ ta Goãmũ mũare taumi. ² Iribojeguere i yeba majarã Goãmũ tarinũgarã iro dopa iimũrinirã árĩribũ mũa. Eropirã watĩ ĩĝu gamero dopa ta iimũrinirã árĩribũ mũa. ĩĝu watĩ i yeba doregũ Goãmũre tarinũgarã opũ añhrimi. ³ Iribojegue árĩpehrerã mari õpa dihta iinirã árĩribũ. Mari ñeri dihtare uaribejaribũ. Mari ejatuharo mari pepiro dopa iimũribũ. Eropa árĩrã gajirã árĩpehrerã iro dopa ta mari sã ñerã árĩmũriribũ. Mari árĩpehrerã masa mera eropa árĩrã árĩcũ ĩagũ Goãmũ mari mera guagũ dipuwaja moadiaripũ. ⁴ Eropa iidiaqueregũ ta marire turaro mahigũ mojomoro ĩapũ. ⁵ Eropa mahitarigũ mari ñeri iira waja peamegue dederebonirã mari árĩquerecũ ta marire ĩĝu mera árĩniguimorã árĩcũ iimi. Jesucristo ĩĝu sĩribasara mera mari ĩĝu yarã árĩcũ marire iimi. Marire mojomoro ĩagũ taumi ĩĝu marire. ⁶ Goãmũ Jesucristo sĩridire masugũ ĩĝu pohro apidigũ árĩmi árĩpehrerãre dorebu. Eropigũ ĩĝu mari sãre ĩĝu yarãre Cristo dorerire opacũ iimi. Eropirã ĩĝu pohro ĩĝu mera árĩrãca mari. ⁷ Eropiimi ĩĝu pũhrũgue majarã marire ĩĝu mojomoro ĩarare erã masiboro dopa. Jesucristo marire ĩĝu õaro itamura mera ĩĝu masare turaro ĩĝu mahire ĩhmumi. ⁸ Cristore mari umupeocũ Goãmũpũ marire taricũ iimi. Marire mahigũ ĩĝu pohro ejacũ iigũcumĩ. Mari gamero õaro iiricũri mera Goãmũ pohro ejadiarã ejamasisome. Mari iibiriquerecũ apimi mari ĩĝu pohro ejaburire. Eropiro waja mariro umũri nũcũ ĩĝu mera mari árĩburire ohomi marire. ⁹ Mari basi tarimasibirica. Mari iiri mera mari gamero mera tarirã

mari "Gua basi taria," arĩboca. Goãmũpũ marire taumi ĩgu pohro mari wamorãre. ¹⁰ Jesucristo yarã árĩcũ iimi marire Goãmũpũ. Eropigu Jesucristo yarã mari árĩcũ ĩagu õarire iirã dihta wacũ iimi marire. Iribojegue ĩañumi marire õarire iimorãre.

Cristore oparã õaro ãhraa, arĩ gojañumi Pablo

¹¹ Eropirã mũa ero coregue árĩricũrare dohpague sãre guñaque. Mũare judio masa árĩbirãre gua judio masapũ ĩhaturimũribũ. Gua circuncisión iinirã gasiro merogã wiri añinrãpũ mũare gasiro merogã wiri aĩbirãre "Goãmũ yarã árĩbeaa mũapũ," arĩmũribũ mũare. ¹² Irisubure mũa Cristo yarã árĩbirã boje majarã árĩmũribũ. Goãmũ beyenirã judio masa iro dopa árĩbirimũribũ mũapũ. Mũa eropa árĩnirã ĩgu beyenirã mera pepũri majarã ĩhaturirã árĩmũribũ. Goãmũ mũare "Masare õaro iigũra," ĩgu arĩ apinirã árĩbirinirã árĩribũ mũa. Mũa ñeri dipuwaja peamegue wabonirã árĩrã árĩribũ mũa. Goãmũ moorã árĩnirã peamegue dederebonirã árĩnirã árĩribũ. ¹³ Dohpaguepũre Jesucristo yarã ãhraa pare mũa. Iribojegue boje majarã árĩnirã árĩquererã, dohpaguere ĩgu yarã ãhraa pare mũa. Cristo mũa ñeri dipuwaja crusague ĩgu di cóara pũhrũ Goãmũ yarã árĩcũ iimi mũare. ¹⁴ Eropigu judio masare mũa ĩhaturirã árĩcũ Cristo marire bosadigu árĩmi. Masare bosagu ãhrimi ĩgu. Judio masa, judio masa árĩbirã mera pe curu mari árĩcũ ĩagu ĩgu marire yuju curu ta árĩcũ iidi árĩmi. Mari ĩhaturiri duhucũ õaro mera árĩcũ iimi ĩgu marire. ¹⁵⁻¹⁶ Õpa iimi ĩgu marire. Mari ñeri dipuwaja crusague sĩrigũ, marire peamegue wabonirãre taugũ iimi. Eropa taugũ ĩgu yarã ĩgu iimi marire. Eropigu mari ĩgu yarã wacũ pe curu mari árĩquerecũ ta yuju curu ta mama curu iimi marire. Eropigu iribojegue mari game ĩhaturinirã árĩquerecũ ta marire crusague sĩribasagu bosadigu árĩmi. Eropigu judio masa doreri pehrecũ iimi ĩgu. Erã doreri marire dũca wayoro pe curu majarã wacũ. Eropigu yuju curu ta árĩcũ iimi pare. Eropigu Cristo Goãmũ yarã árĩcũ iimi marire.

¹⁷ Eropigu marire bosagu arigu õari buherire Goãmũ mera õaro árĩburire weregu aridi árĩmi. Mũa judio masa árĩbirã Goãmũre opabirã boje majarã árĩnirã árĩribũ. Mũa eropa árĩcũ ĩagu mũare õari buherire weregu aridi árĩmi. Gua judio masa sãre Goãmũ yare oparã sãre weregu aridi árĩmi. Eropigu árĩpehrerãre marire bosagu aridi árĩmi ĩgu. ¹⁸ Dohpague arĩpehrerã gua judio masa, mũa judio masa árĩbirã sã mari Pagũ mera õaro árĩmasia mari. Espĩritu Santo ĩgu itamuri mera Cristopũ marire eropa árĩcũ iimi.

19 Eropirã dohpaguere mũa boje majarã árĩbeaa. Īgũ ya curu majarã ta āhraa. Goãmũ yarãre ĩhaturirã árĩbeaa. Goãmũ yarã mera majarã āhraa pare. 20 Goãmũ yare weremuhtanirã iribojegue majarã ĩgũ ya wereniguirire goja, masare weremuĩnuma. Gũa sã ĩgũ yare buhedore apinirã Jesucristo ya õari buherire werea masare. Gũa árĩpehrerã eropa werecũ peerã Cristore umupeonũgabũ mũa. Cristopũ āhrimi mari árĩpehrerãre ĩgũ yarã árĩcũ iigũ. Īgũ eropa iibiricũ mari ĩgũ yarã árĩmasibiriboya. 21 Eropigũ ĩgũ turari mera marire ĩgũ yarãre yuju curu ta árĩcũ iimi ĩgũ marire. Eropirã ĩgũ turari mera õarã wahaa mari. Mari eropa árĩcũ ĩagũ ĩgũ mari Opũ ta mari mera āhrimi. 22 Eropirã Cristo yarã árĩrã árĩpehrerã gajirã mera ĩgũ yarã mera yuju curu wahabũ mũa sã. Mũa eropa wacũ Goãmũ ĩgũ Espĩritu Santo mũa mera āhrimi.

3

Judio masa árĩbirãre õari buherire wereñumi Pablo

1 Mũa judio masa árĩbirã eropa ĩgũ ya curu majarã árĩburire yũ werera dipuwaja peresugue āhraa yũhũ. 2 Mũare judio masa árĩbirãre Jesucristo yare buhebure Goãmũ yũre apimi. Yũre mojomoro ĩagũ, yũre mahigũ õari buherire yũre weredoregũ, yũre apimi. Irire peetuhabũ mũa. 3 Iribojegue masa erã masibirirare Goãmũ dohpaguere yũre masicũ iimi. Ire merogã were mũare gojabeotuhabũ. 4 Yũ eropa gojabeorare buherã Cristo ĩgũ yare yũ masirare masirãca mũa sã. 5 Iri ĩgũ wererare iribojegue majarãre ĩgũ erã masipehocũ iibiripũ. Dohpaguepũre gũare Jesu ĩgũ apinirãre Goãmũ yare weremuhtarã sãre irire masipehocũ iimi Goãmũ. Īgũ Espĩritu Santopũ gũare masicũ iibasami. 6 Ōpa āhraa ĩgũ werera gajirã masibirira: Judio masa dihtare Goãmũ itamubeami. Judio masa árĩbirã sãre ĩgũ itamumi. Ōari buherire erã õaro peecũ itamugũcumĩ ĩgũ erãre. Eropirã gũa judio masa, mũa judio masa árĩbirã mera yuju dũpũ iro dopa yuju curu ta āhraa mari. Eropirã mari árĩpehrerã Jesucristo yarã árĩrã yujuro mera Goãmũ ĩgũ masare “Ōaro iigũra,” ĩgũ arĩ werepirare oparãca mari.

7 Goãmũ mojomoro ĩagũ yũre mahigũ ire õari buherire werebure yũre apimi. Īgũ masiri mera apimi ĩgũ yũre. 8 Árĩpehrerã gajirã Jesucristo yarã erã doca árĩrã erã docague majagũ gohra āhraa yũhũ. Yũ eropa árĩquerecũ ta judio masa árĩbirãre õari buherire werebure apimi Goãmũ yũre. Iri buheri Cristo õatariagũ ĩgũ árĩrire,

ōatariari ĩḡu oparire, ōaro ĩḡu oburire werebure apimi yũre. ⁹ Yũre eropa apĩḡu Goãmũ “Ōpa masare taugũca,” arĩḡu, árĩpeherrerã masare dohpa ĩḡu itamuborore ōaro werepehobure apimi yũre ĩḡu. Goãmũ árĩpeherrerire ĩhacũnugudĩḡu àhrimi. Iribojegue majarãre irire masare ĩḡu tauborore masare werepehobirinĩḡu Goãmũ. Dohpague yũre iri ōari buherire weredoreḡu apimi masare ĩḡu ōaro tauborore masicũ iibu. ¹⁰ Eropirã iri buheri mera masa ĩḡu yarã wahama. Erã eropa wacũ ĩha umaro majarã oparã anyua Goãmũ masipehogu ĩḡu árĩricurire masima. Erã eropa masicũ gamepũ Goãmũ. ¹¹ Eropĩḡu i yeba árĩboro coregue ta “Masare peamegue wabonirãre taugũra,” arĩtuhapũ Goãmũ. Eropa arĩdĩḡu arĩḡu dohpague mari Opũ Jesucristo ĩḡu sĩriro mera ĩḡu arĩdiro dopa ta marire taudi árĩmi. ¹² ĩḡu eropa taucũ dohpaguere Cristore umupeorã ĩḡu yarã wahaa mari. ĩḡu yarã árĩrã güiro mariro Goãmũ mera wereniguimasia mari. Eropirã güibiricãque mũa. ¹³ Eropirã ōari buherire yũ wereri waja dohpaguere peresugue arĩḡu yũ ñero taricũ ĩarã bujawerenijarã Goãmũ yare duhubiricãque. Ōari buherire yũ werecũ peerã Goãmũ yarã wahabu mũa. Yũhũ eropiira dipuwaja peresugue àhraa. Eropa arĩḡu mũa ĩḡu yarã árĩburire ñero tarĩḡu iiaa. Eropĩḡu turaro mucubiridorea mũare.

Cristo masare turaro mahimi, arĩ gojañumi Pablo

¹⁴ Eropĩḡu i árĩpeherrerire mari Opũ Jesucristo Pagũ ĩḡu iirare guñagũ mereja ĩḡure serẽbasaa mũare. ¹⁵ Árĩpeherrerã ĩḡu yarã Pagũ àhrimi. ĩḡu árĩpeherrerire cururi majarã ĩḡu yarã ĩḡu pohrogue árĩrã i yeba árĩrã sã erã Pagũ àhrimi. ¹⁶ ĩḡu masipehogũ àhrimi. Turatarĩḡu àhrimi. Eropĩḡu ĩḡure ōpa serẽbasaa mũare. Mũare sĩporã ĩḡu masiri mera ōaro turacũ iiboro dopa serẽbasaa mũare. Eropĩḡu Espĩritu Santo ĩḡu itamuri mera eropa iĩḡucumi. ¹⁷ Eropĩḡu Cristore “Diaye iĩḡu àhrimi,” mũa arĩ umupeonemoboro dopa ĩḡu mũa mera ōaro árĩboro dopa serẽbasaa mũare. Eropĩḡu gajirãre ōaro mahirã mũa árĩboro dopa, Cristo ĩḡu turaro mahirire mũa masiboro dopa serẽbasaa mũare. ¹⁸⁻¹⁹ Mũa árĩpeherrerã gajirã Goãmũ yarã mera “Cristo ĩḡu marire turaro mahimi,” mũa arĩmasiborore serẽbasaa mũare. ĩḡu mari masare turaro mahĩḡu àhrimi. ĩḡu mahiri eropa ōatariari árĩcũ mũa ōaro masiboro dopa serẽbasaa mũare. Eropĩḡu ĩḡu mahirire mũa masicũ gahmea Goãmũ mũa mera ĩḡu ōaro árĩboro dopa. Eropĩḡu irire serẽbasaa mũare Goãmũre.

20 Eropirã Goãmure wũaro umupeori mera “Ígu turagu ãhrimi,” arĩrãca. Ígu turari mera ðaripure gohrotomasimi ígu marire. Marire ðarã árĩcũ iimasimi. Mari serẽra tauro iimasimi ígu. Mari gamerire, mari pepira tauro iimasimi ígu. 21 Jesucristo yarã mari árĩcũ íha Cristo ígu árĩricari sãre íha árĩpehrerinre. Eropigu ígu mahirire mua masicũ gahmea Goãmũ mua mera ígu ðaro árĩboro dopa. Eropigu irire serẽbasaa mwaruri árĩpehrerã Goãmure umupeoporo. Eropa ta iiporo.

4

Cristo yarã árĩrã yuju curu ta ãhraa mari, arĩ gojañumi Pablo

1 Mari Opure yũ itamuri waja peresugue árĩgu mũare turaro werea yũhũ. Goãmũ ígu yarã árĩmorãre mũare beyeru. Eropirã ígu beyenirã árĩrã ígu árĩdoreldiro dopa ta ðarã árĩque mua. Irire mũare werea yũhũ. 2 Ópa iirã ðarã árĩque mua: “Gajirãre masitarinũgaa yũhũ,” arĩ pepibircãque. Gajirãre ðaro mera iique. Eropirã guabircãque. Mũa mera majarã mũare gariboquerecũ ta erãre umupeori mera yuju diaye íacãque. 3 Eropirã Espĩritu Santo ígu itamuri mera ðaro mera yujuro mera árĩniguique mua. Eropirã gamequeãro mariro árĩcãque mua. 4 Yuju dũpũ iro dopa yuju curu ta ãhraa mari. Eropigu Espĩritu Santo yujugũ ta ãhrimi marire. Eropigu Goãmũ ígu yarã árĩmorãre marire beyemuripũ marire itamubu. Eropirã ígu itamuborore masia mari. Iri mari masirañe yujuñe ta ãhraa. 5 Mari Opũ Cristo mari umupeogu yujugũ ta ãhrimi. Ígu buheri sã yujuñe ta ãhraa. Ígu yarãre waĩyeriñe sã yujuñe ta ãhraa. 6 Eropigu Goãmũ yujugũ ta ãhrimi. Ígu árĩpehrerã Pagũ ãhrimi. Eropigu árĩpehrerã weca mari Opũ ãhrimi. Eropigu árĩpehrerãre marire itamumi ígu. Árĩpehrerã mari mera ãhrimi ígu. Eropigu árĩpehrerogue ãhrimi ígu.

7 Yuju curu mari árĩquerecũ ta árĩpehrerã marire yujurãyerire mari mohmemasiburire apidi árĩmi marire Cristo. Ígu eropa apidiro dopa ta mohmemasia mari. Ígu marire eropa apigu gajinore ígu eropa ocãbodiropo dopa ta apidi árĩmi ígu marire. 8 Eropa ta ãhraa Goãmũ yare erã gojarapũgue sã:

Goãmure íhaturirãre ígu tarinũgara pũhũ ígu dipaturi mũria wagũcumĩ. Eropigu masare baja eropa ocãgũcumĩ, arĩ gojañuma iribojegue Jesucristo ígu eraboro coreguere.

9 Erã eropa arĩ gojarã õpa werediarã iiriñuma: Jesu-
 cristo umusigue muria wadigu árigu ãgu ero coreguere
 دچارمأھتادىگۇ árĩmi. I yebaguere دچارىدىگۇ árĩmi.
 10 Eropigu ãgu دچارىدى مۇرىا وادى تا árĩmi Goãmũ
 pohrogue. Árĩpehrero weca muria wadi árĩmi ãgu
 árĩpehrerogue árĩbu. 11 Eropigu ãgu yarãre baja eropa
 ocãgu erã Goãmũ ya árĩburire mohmemasiburire apidigu
 árĩmi. Erã mohmemasiburire õpa apidigu árĩmi ãgu yarãre.
 Yujurãyerire Cristo ãgu buherare buhemorãre apidi árĩmi.
 Gajirãre Goãmũ yare weretaumorãre apidigu árĩmi. Õari
 buherire buhe curimorãre gajirãre apidi árĩmi. Cristo yarã
 gamenererã oparã árĩmorãre erãre õaro buhemorãre apidi
 árĩmi gajirãre. 12 Eropa dihta apidigu árĩmi marire gajirã
 ãgu yarãre mari game itamuboro dopa. Eropa apidigu
 árĩmi marire ãgu yarãre, ãgure mari umupeonemoboro
 dopa, sĩporã turarã mari waboro dopa. 13 Eropirã mari
 árĩpehrerã õaro mera, yujuro mera árĩrãca. Eropa ta árĩro
 gahmea marire Cristore umupeorã árĩrãre. Eropirã mari
 árĩpehrerã Goãmũ magure Jesucristore õaro masirãca.
 Eropirã Cristo turagu, pee masigu ãgu árĩro dopa ta, mari
 sã pee masia warãca. 14 Mari eropa warã majirãgã iro
 dopa árĩsome mari. Majirãgã iro dopa ta árĩrã õaro pee
 masinibeama dohpa. Eropirã gajirã gũyarã erãre buherã
 eracũ “I diaye ãhraa,” erã arĩcũ erã peema. Pũhrũ gajirã
 gajiropa árĩri buherire buherã eracũ erã sãre peema. Erã
 iro dopa árĩsome mari. 15 Eropa árĩbirã mari mera majarã
 mera game mahirã diaye ta wererire game wererãca mari.
 Eropirã majirãgã erã buga erã pee masirã erã waro dopa
 ta mari sã Goãmũ yare pee sĩporã turarã Goãmũ yare õaro
 masirã warãca. Cristo ãgu árĩro dopa ta warãca. ãgu ãhrimi
 mari dipuru. 16 ãgu yarã árĩrã ãgu dũpũ iro dopa yuju curu
 ta ãhraa mari. Mari bajarã árĩquererã ta yujuro mera õaro
 árĩrã iiaa. Mari eropa árĩborore Cristo itamumi. Eropirã
 mari yuju dũpũ iro dopa õaro gamesurirã mari õaro itamua
 gajirãre Cristo yarãre. Eropirã mari mera majarãre Cristo
 yarãre õaro mahirã, erãre õaro itamurã, turarã, Cristore
 umupeonemorã árĩrãca mari.

*Cristo yarã warã mari ñerire duhu, õarĩpũre gohrotoa
 mari, arĩ gojañumi Pablo*

17 Eropi mari Opũ Cristo ãgu dorero mera õpa werea
 mũare. Goãmũre gamebirã gohra iiro dopa iibiricãque
 mũa. Erã, erã pepiripũ ñeri dihta ãhraa. Eropiro
 erã pepiri duhpiburi árĩbeaa. 18 Eropigu watĩpũ Goãmũ

yare erãre peebiricũ iimi. Eropirã Goãmũ yapure pee-birigohracãma. Peediabeama erã. Eropirã Goãmũ ïgu õaro árĩdoreldiro dopa ta árĩbeama erã. ¹⁹ Eropirã erã ñerire iirã ne guhyasĩribirigohracãma. Eropirã ne bujawerebeama. Ñerire erã ùaribejari dihtare iiniguicãma. Árĩpehreri ñerire erã iirire ne duhudiabirã iinemoniguicãma. ²⁰⁻²¹ Mũapũ diaye ta ïgu yare peerã mua árĩcũ, Jesucristo yare õaro masirã mua árĩcũ mũapure erã ñero iiro dopa iidorebeami Goãmũ. ²² Iribojegue ñerire iiniguicãrã mua árĩcũ iri ñeripũ mũare goroweoro iidiro árĩbũ. Iri ñeri iiri mera mucubiridiaquererã ta ne mucubirimasibirimãribũ mua. Eropirã "Iribojegue mua árĩrare duhucãque," yũ mũare arĩ buhecũ peebũ mua. ²³ Eropirã mua pepiripure õaripure gohroto gahmea mũare. ²⁴ Ero core mua ñero iirare duhucãque. Eropirã õaripure gohrotonirã árĩque mua. Goãmũ ïgu õagũ árĩldiro dopa mũare õarã árĩcũ iimi. ïgu eropa iinirã árĩrã õarire iiniguicãrãca. Eropirã ñerire gamebirãca.

²⁵ Mari yuju dũpũ iro dopa yuju curu majarã ta árĩrã iiaa. Eropirã mua basi guyabita. Mũa mera majarãre diaye wereque guyarõ mariro.

²⁶ Gajirã mera guarã, erãre ñero iibiricãque. Mata irinũ ta amucãque gua wajaro mariro. ²⁷ Yoari boje guarã watĩ ïgu gamero dopa iirã iiaa. Eropã iibiricãque.

²⁸ Gajirã mua mera majarã Jesu yarã erã árĩboro core yajari masa árĩnirã árĩñorã. Dipaturi yajabiricãporo. Eropirã dohpaguere õaro mohmeporo. Mojomorocũrãre oburire mohmeporo.

²⁹ Ne ñero wereniguibiricãque. Õarire wereniguirã gajirãre itamua mua. Erã bujawererã erã árĩcũ ïarã eropa ta mucubiricũ iicãque erãre. Eropirã õari dihtare wereniguique. ³⁰ Ñerire iirã Espĩritu Santore bujawerecũ iirã iiaa mua. Eropã iibiricãque. Dohpaguere ne i mũũ pehrerinũ core, Cristo marire ïgu aĩgãboro core, Espĩritu Santo marire ïhadibumi. Ñerire mari iibiriboro dopa ïhadibumi. Eropigũ Cristo yarã mari árĩrre masicũ iimi ïgu marire. Eropirã ïgure bujawerecũ iibiricãque mua.

³¹ Eropirã ne papũriniguibiricãque. Guanemobiricãque. Game dũyasonemobiricãque. Erãre ñero arĩ gaguiniguibiricãque. Gajirãre quere moanemobiricãque. Gajirãre ïhaturinemobiricãque. ³² Eropi mua mera majarãre õaro mera õaro iique. Cristo yarã mua árĩcũ ïagũ mua ñerare cãdijicãmi Goãmũ. Eropã ta mua sã gajirã mũare erã ñero iicũ ïarã erã ñerire cãdijicãque.

5

Goãmꞡ porãre õpa árĩro gahmea, arĩ wereñumi Pablo

¹ Eropirã Goãmꞡ porã ĩꞡ mahirã árĩrã ĩꞡre ĩhacũque mꞡa. ² Eropirã gajirãre mahi umupeoniguicãque. Cristo marire mahĩꞡ, mari ñeri iira waja sĩripꞡ. Eropa sĩrigꞡ Goãmꞡre mucubiricũ iipꞡ ĩꞡ. Eropirã marire ĩꞡ mahidiro dopa ta mꞡa sã gajirãre game mahique.

³ Eropirã Goãmꞡ yarã árĩrã ne nome mera ñero iibiricãque. Nome sã ɯma mera ñero iibiricãque. Gaji ñerire eropa árĩrĩre ne iibiricãque. Gajinore gametaribiricãque. Ne eropa iibiricãro gahmea Goãmꞡ yarã árĩrãre.

⁴ Eropirã ꞡꞡhyasĩuro wereniguibiricãro gahmea mꞡare. Pee masibirã iro dopa wereniguibiricãro gahmea mꞡare. Eropirã ñero arĩ wereyabiricãro gahmea. ĩꞡre iiro gahmea mꞡare: Goãmꞡre serẽro gahmea mꞡare. Eropa serẽrã ĩꞡre, "Õaro iiabꞡ mꞡꞡ ꞡare," arĩro gahmea.

⁵ Gajinore gametarirã goãmarã wéanirãre erã umupeoro dopa iirã iiaa mari irire. Eropirã nome mera ñero iirã, ñeri dihtare pepirã, gajinore gametarinꞡgarã Goãmꞡ Cristo mera ĩꞡ opꞡ árĩroꞡere ne wasome erã. Irire õaro masia mari. ⁶ Õpa iirãre erã iira dipuwaja, turaro dipuwaja moagucumi ĩꞡre tarinꞡganirãre. Eropirã gajirã mꞡare gajiropa arĩmaacãcũ erã ꞡyarire peebiricãque. ⁷ Eropirã eropa ñerire iiniguicãrãre wapicũbiricãque.

⁸ Cristo yarã mꞡa árĩboro core mꞡa sã eropa ta iinirã árĩribꞡ. Dohpaguepãre ĩꞡ yarã árĩrã, Goãmꞡre õaro masia mꞡa. Goãmꞡ yarã õarire iima. Eropirã eropa ta iiro gahmea mꞡare. ⁹ Eropirã Cristo yarã árĩrã õarire, Goãmꞡ gamerire, diaye maja árĩrĩre iirãca mꞡa. ¹⁰ Õarire mari iicũ ĩagꞡ mari Opꞡ Cristo mucubirimi. Eropa õarire iiburire õaro masique mꞡa. Eropa masirã irire iique. ¹¹ Cristore gamebirã ñeri erã iimaacãri ñeri gohra ãhraa. Eropa erã iiro dopa ta mꞡapꞡ iibiricãque. Õari buherire Cristo yare wereque erãre. Eropirã erã ñeri iirare erãre masicũ iique. ¹² Masa erã ĩabiro erã ñero iicorema. Erã eropa iirare mari wereniguirã ꞡꞡhyasĩriboca. Eropirã ñetariaro iirã iima erã. ¹³ Eropirã erãre õari buherire mari wererã, ñetariarã erã árĩricurĩre erãre masicũ iirã iiaa mari. Erã ñeri iirire erãre masicũ mari iicũ erã ñeri iirire bujawerebocoma. Eropirã õaripãre gohrotobocoma. ¹⁴ Iri diaye ta ãhraa. Eropirã õpa wereñorã Goãmꞡ yare wererã:

Ne, yãre peediabirã, yãre peeque. Mꞡa ñero iirare bujawereque. Irire ñero iirire duhuque. Eropigu

Cristo m̄ua ñeri iirire masicũ iigu, m̄uare ðarire masicũ iigucumi, arĩñorã.

15 Eropirã umuri nucũ ðaro iique m̄ua. Pee masibirã iro dopa árĩbircãque. Pee masirã árĩque. 16 Dohpague majarã masa ñetariaro iiniguima. Eropirã m̄uapũ ðarire, Cristo yare m̄ua iiniguirã mata erã Cristo yarã árĩcũ itamuque. 17 Eropirã pee masibirã árĩbircãque. Goãmũ ìgu gamerore ðaro masique. Eropirã irire iique. 18 Eropirã ne merebircãque. Mererã erã basi ñero goroweoma. Eropirã merediabirã, Espíritu Santop̄are b̄urigã gameque. Ìgure ðaro yuhrirã árĩque. 19 Eropirã m̄ua basi Goãm̄ure umu-peori bayarire game bayaque. Eropirã Salmo gojaripũre, Goãmũ yare bayarire, gajĩ ìgure umupeori bayari sãre ìgure bayapeoque. Òaro guña umupeori mera bayapeoque. Eropirã mari Op̄ure “Òagũ àhrimi,” arĩ ðaro umupeoque. 20 Goãmũ mari Pagũ árĩpehrerire m̄uare ìgu ðaro iirire guñaniguicãque mucubiriri mera. Mari Opũ Jesu yarã árĩrã ìgure “Òhaa,” arĩniguicãque m̄ua.

M̄ua yuju wihi majarã Jesu yarã árĩrã, ðpa iique, arĩ wereñumi Pablo

21 M̄ua mera majarãre game umupeo yuhrique. M̄ua eropa game umupeo yuhrirã Cristo sãre umupeo yuhrirãca.

22 M̄ua marasã nomere weregura dohpaguere. Mari Op̄ure Cristore mari yuhriro dopa ta m̄ua marapũ s̄umarãre ðaro yuhrique. 23 Jesucristo marire taudigu árĩmi ìgu ya curu majarã mari árĩboro dopa. Eropirã mari ìgu ya curu majarã árĩcũ mari Opũ ìgu árĩro dopa ta m̄ua marapũ s̄umarã m̄ua marasã nomere weca oparã àhrima. 24 Eropirã Cristo yarã árĩrã ìgure yuhria. Eropirã mari Cristore yuhriro dopa ta m̄ua marapucurã nome m̄ua marapũ s̄umarãre ðaro yuhrirã nome árĩque.

25 M̄ua marapũ s̄umarã sãre weregura dohpaguere. Cristo marire ìgu yarãre mahigu mari ya árĩburire s̄iridigu árĩmi. Eropirã marire ìgu mahidiro dopa m̄ua sã m̄ua marasã nomere eropa mahiniguicãque. 26 Cristo marire ìgu yarã árĩcũ iibu s̄iripũ mari ñeri marirã árĩcũ iibu. Eropigu mari ñerire coeweadĩ árĩmi ìgu wereniguri mera deco mera ìgu waĩyeri mera. 27 Eropa coeweadĩ árĩmi ìgu marire ìgu yarã ðarã árĩmorãre iigu. Ìgu eropiicũ ñeri dipuwaja marirã árĩrãca ìgu ìacũ. Ne merogã eropa árĩri ñeri árĩsome marire. Eropirã ðarã Cristo iro dopa árĩrãca. 28 Eropirã m̄ua marasã nomere mahi umupeorã, m̄u basi m̄u d̄up̄are m̄u umupeoro dopa ta m̄ua m̄u marapore umupeoque. Ìgu marapore umupeogu ìgu basi umupeogu

iimi. ²⁹⁻³⁰ Ne mari dũpũre ñero wacũ gamebeaa mari. Mari basi mari ya dũpũre ñhadibua. Cristo yarã árĩrã ñgu dũpũ iro dopa ãhraa. Eropigũ marire ñgu õaro ñhadibumi. Eropirã Cristo marire ñgu õaro iidiro dopa ta mari sã mari dũpũre õaro iiaa. Mari marasã nome sãre eropa ta õaro iiro gahmea marire. ³¹ Eropa ta ãhraa Goãmũ yare erã gojarapũgue: Õpa gojara ãhraa: “Eropi mũmũ ñgu pagũ sũmarãre wirigũ, ñgu marapo mera árĩcãgũcumi. Eropirã erã perã árĩquererã ta yuju dũpũ iro dopa árĩrãcoma,” arĩ gojañumi iribojegue. ³² I gojarare õaro peebirinerã árĩma. Eropigũ irire õaro weregũra mũare. Õpa werero iica: Cristo ñgu yarã mera yuju dũpũ iro dopa ta yuju curu ta ãhrima. ³³ Eropigũ mũare õpa arĩ werenemogũra daja: Mũ basi mũ mahiro dopa ta mũ marapo sãre mahi umupeoque. Eropirã nomepũ mũa marapũ sũmarãre õaro gũhyadiaro mera umupeoque mũa.

6

¹ Dohpaguere majirãre weregũra: Mari Opũ Cristo yarã árĩrã mũa pagũ sũmarãre õaro yũhrirã árĩque. Mũa eropiirã õaro iirã iiaa. ²⁻³ Õpa arĩñumi Goãmũ doregũ: “Mũa pagũ sũmarãre õaro umupeoque,” arĩ doreñumi ñgu. I doreriñe mera Goãmũ werenemoñumi. Õpa arĩñumi: “Mũa pagũ sũmarãre umupeorã i yebaguere yoari boje mucubiriri mera árĩrãca mũa,” arĩ wereñumi. Eropa arĩgu ñe doreriñe mera, “Mũa eropa iirã õaro árĩrãca,” arĩ weremũhtañumi Goãmũ. Eropirã ñgu arĩdiro dopa mũa pagũ sũmarãre umupeoque mũa.

⁴ Dohpaguere erã pagũ sũmarãre weregũra. Mũa porãre eropa turiniguibiricãque guacũ iiri arĩrã. Mari Opũ Cristo ñgu mahiri mera ñgu itamuri mera erãre õaro mera masuque. Eropirã erãre masurã õaro wereque.

⁵ Dohpaguere pohro majarãre weregũra. Gũhyadiaro mera umupeori mera i yeba majarãre mũa oparãre õaro yũhrirã árĩque. Gũyaro mariro õaro yũhrirã árĩque. Cristore mũa yũhribodiro dopa ta yũhrique erãre mũa. ⁶ Erã ñhuro dihtare yũhrirã árĩbiricãque yũre ñhasũporo arĩrã. Erã ñhurore mũa yũhriro dopa ta erã ñabiro sãre õaro iirã árĩque. Cristo ñgu pohro majarã mũa árĩbodiro dopa ta mũa oparã sãre eropa yũhriniguicãque. Eropirã Goãmũ ñgu gamero dopa ta õaro mucubiriri mera mũa oparãre õaro yũhrirã árĩque. ⁷ Eropirã “Cristopũre yũhrirã iiaa,” arĩ pepirã mucubiriri mera yũhrique mũa oparãre. ⁸ Eropirã ire guñaque: Árĩpehrerã mari árĩpehreri õarire mari iicũ

ĭagũ Goãmũ õaro iigũcumi marire. Pohro majarãre, pohro majarã árĩbirã sãre õaro iigũcumi ĭgũ.

⁹ Eropigũ oparã sãre weregũra: Mũa pohro majarãre õaro iique. Erãre õaro yũ iidoreldiro dopa ta iique erãre õaro. Őpa masique. Őmũsi majagũ Goãmũ diaye ta erã opu ãhrimi. Mũa yagũ opu ãhrimi ĭgũ. Eropirã mũa árĩpehrerã ĭgũ pohro majarã dihta ãhraa. Eropigũ ĭgũ yujuropa ĭhami mũare árĩpehrerãre. Eropirã turibiricãque mũa pohro majarãre.

Cristo yarã watĩre erã cãhmotarire wereñumi Pablo

¹⁰ Őpa weretugũra mũare. Őaro guñaturarã árĩque mũa. Mari Opu Cristo mũa mera ãhrimi. Eropirã ĭgũ ya turari mera guñaturarã árĩque. ¹¹ Watĩ marire ĭgũ pepiri mera gũyagũ ñero iidoremi marire. Mari Jesucristore umupeorire goroweodiami. Goãmũpu marire cãhmotami ñerire mari iibiriboro dopa. Marire ĭgũ cãhmotaro surara ĭgũ cãhmotari suhriro come suhriro iro dopa ãhraa. Eropirã iri suhri mera erã cãhmotaro dopa ta Goãmũ ĭgũ yare iirã cãhmotaque watĩ ĭgũ ñero iidorerire. ¹² Jesu yarã mari árĩcũ marire goroweodiarã masa gohra árĩbeama. Erã bajarã mũmaro majarã, ñerã, turarã, oparã erãpu ãhrima. Watĩ ĭgũ mera majarã mera i mũmũ majarãre Jesucristo yarã árĩbirãre dorema erã. Eropirã erã mari Jesucristo yarã árĩcũ marire goroweodiana. ¹³ Eropirã erã marire goroweobiricũ dohpaguere Goãmũ yare opapehoque mũa cãhmotaborore. Eropirã watĩ mũare ñero goroweodiacũ, mũare ĭgũ ñero iidorecũ ĭgũre cãhmotarãca. Eropirã tarinũgarãca. Eropa ĭgũre tarinũgarã, turarã dujarãca mũa. ¹⁴⁻¹⁷ Eropirã turarã árĩque Goãmũ ya mera. Surara gamewejẽrã warã erã come suhri sañarã erã dũpũre õaro cãhmotama. Erã coretihbi cãhmotama erã come suhriro sañarã. Come zapatu sañama. Erã diapore cãhmotama comese mera. Come sãpea peyama. Ñoserimijire opama erã cãhmotaboro dopa. Erã surara cãhmotaro dopa ta mũa watĩre õaro cãhmotapehoborore õpa Goãmũ yare iique. Diaye majare Goãmũ yare õaro peeque. Eropirã Goãmũ gamero dopa õarire iinigũicãque mũa watĩre cãhmotamorã. Jesucristo ya õari buherire peerã õaro ãhraa. Eropirã iri õari buherire õaro wererã waque gajirãre. Watĩ mũare ñero iidorediarimi. Eropirã ĭgũre cãhmotamorã Jesucristore "Diaye iigũ ãhrimi," arĩ umupeonigũicãque. Cristopũ marire peamegue wabonirãre taumi. Mũa ĭgũ taunirã árĩrã watĩ ñero iidorerire yũhribiricãque. Eropirã watĩre

tarinugamorã Goãmũ yare õaro masique mũa Espíritu Santo ãgũ itamuri mera. ¹⁸ Eropirã mũa watĩre cãhmotarã Goãmũre eropa umuri nũcũ serẽniguicãque. Espíritu Santo ãgũ itamuri mera serẽniguique. Eropirã õaro guña masique. Eropa serẽrã gariborebircãque. Áripheerã Goãmũ yarãre eropa serẽbasaniguicãque. ¹⁹ Eropirã yũ sãre serẽbasaque Goãmũre. Õpa arĩ serẽbasaque: Õari buherire iribojegue masa erã õaro masibirirare õaro erãre masicũ yũ iiborore serẽbasaque. Eropirã güiro mariro yũ wereboro dopa serẽbasaque yũre. ²⁰ Cristo ãgũ yare weredoregũ yũre obeomi. Yũ eropa werera waja peresugue ãhraa dohpaguere. Yũhũ ohõ arĩqueregũ ta güiro mariro ãgũ yare yũ wereboro dopa serẽbasaque yũre. ãgũ yare werebu arĩgũ tiiaa.

Pablo õadoretuñumi

²¹ Tĩquico yũ mera majagũ mũa pohrogue ejagũ yũ arĩricũre mũare werepehogũcumi. ãgũ mari acaweregũ mari mahigũ ãhrimi. Eropigũ mari Opũ yare õaro itamugũ eropa arĩniguicãmi. ²² Gũa arĩricũre mũare weredoregũ ãgũre obeogũ iiaa mũa pohrogue mũa õaro mucubiriboro dopa.

²³ Goãmũ mari Pagũ mari Opũ Jesucristo mera mũare arĩpeherẽre gũa acawererãre õadorea. Cristore mũa õaro umupeori mera mũa game mahiboro dopa Goãmũre serẽbasaa mũare. ²⁴ Áripheerã mari Opũ Jesucristore eropa mahiniguicãrãre Goãmũ mera õadorea. Eropa ta arĩniguicãporo. Iripẽta ãhraa.

Filipenses

Peresugue árĩgu ipũre gojabeopu Pablo

¹ Gũa Pablo Timoteo mera Jesucristo pohro majarã áhraa. Eropirã árĩpehrerãre mũare ðarãre Jesucristo yarãre Filipo majarãre gojabeoa gũa. Mũa oparã sãre mũare itamurã sãre gojaa. ² Eropirã Goãmũ mari Pagũ mari Opũ Jesucristo mera mũare ðadoreã. Ĩgu itamuri mera ðaro árĩque mũa.

Pablo Jesu yarãre Goãmũre serẽbasapu

³⁻⁶ Goãmũ mũare ðaripũre gohrotocũ iigu iimi. Eropigu mũare ĩgu iinũgadiro dopa ta ii ojogorocũgũcumi. Eropirã Jesucristo i yebaguere ĩgu eracũguere ñeri marirã árĩrãca mũa. Negohraguere Jesu yarã mũa wara pũhrũ, dohpague sãre itamua mũa yũre ðari buherire yũ buhecũ. Mũa eropa iirã árĩcũ Goãmũre “Õhaa,” arãa yũhũ. Mũare guñagu ðpa dihta arãa yũhũ. Mũare Goãmũre serẽbasagu mucubiriri mera serẽbasaa. ⁷ Eropigu mũare yũ ðaro mera eropa pepicũ ðapũrica. Õari buherire “Diaye ta áhraa,” oparãre yũ arĩtarinũgacũ mũa yũre itamubũ. Iri buherire diaye ta iri árĩrĩre masare yũ werecũ itamubũ mũa. Peresu yũ árĩcũ sãre itamubũ. Eropa mũa itamucũ mari yujuro mera Goãmũ itamurire opaa. Eropigu yũ sĩporã mera turaro mahia yũhũ mũare. ⁸ Jesucristo ĩgu mahiri mera bũrigã mũare guñaa yũhũ. Yũ eropa guñacũ Goãmũ irire masimi. ⁹ Mũare ðpa arĩ serẽbasaa yũhũ Goãmũre. Goãmũ yare ðaro masiri mera ðaro pee masipehori mera Goãmũre masa sãre mũa mahinemoburire serẽbasaa yũhũ Goãmũre. ¹⁰ Õarire mũa masiburi sãre serẽbasaa mũare. Mũa eropa masirã Cristo i yebague ĩgu dujaricũ ðarire iinirã árĩrã, dipuwaja marirãca mũa. ¹¹ Eropa ðarire iirã Goãmũ gamerire iirãca mũa. Eropa iimorã wacũ iigũcumi Jesucristopũ mũare. “Goãmũ ðagu, turagu áhrimi,” árĩpehrerã ĩgũre erã arĩ umupeoburire ĩgu gamerire mũa iicũ iigũcumi mũare.

Pablo Jesucristo yagu ĩgu warare werepu

¹² Yũ acawererã, ire mũa masicũ gahmea. Yũ dohpaguere peresu yũ árĩquerecũ ta ðari buheripũ eropa mũhtaniguicãa. ¹³ Eropigu Cristo yagu yũ arĩri waja peresu yũ warare masipehrema opũ ya wihi majarã surara. Árĩpehrerã gajirã sã ðre irire masima. ¹⁴ Eropirã peresu yũ árĩcũ ĩarã, bajarã mari acawererã Jesu yarã mari Opũre

Jesure umupeonemoma. Eropa umupeorã güiro mariro ðari buherire gajirãre buhema erã.

¹⁵ Yujurãyeri Cristo yare buhebonirã áriquererã yure ðaturima. Cristo yare buherã erãpüre masa ðhasuacũ gah-mema. Gajirãpũ ðaro mera Cristo yare buhema. ¹⁶⁻¹⁷ Õari buherire yũ werenigui turaburire Goãmũ yure ðgũ apirare ðaro masima. Oãpũ eropa masirã yure umupeorã Cristo yare buhema. Gajirãpũ yure ðaturirã masare erãpüre ðhasuacũ gamerã Cristo yare buheama. Eropirã yũ peresu árĩcũ erã yure bujawerecũ iidiama. ¹⁸ Õaroca. Cristo yare ta buherã iima. Erã yure umupeobiriquererã Cristo yare buhema. Gajirãpũ ðari mera buhema. Árĩpehrerã erã ðgũ yare buhecũ mucubiria.

¹⁹ Eropigũ mucubiriniguicãgũca yũhũ. Goãmũre mũa yure serẽbasara mera, Jesucristo ðgũ Espiritu Santo itamuri mera Goãmũ yure ðaro taricũ itamugũcumi. Irire masia. ²⁰ Õpa ta bũrigã iidiaca yũhũ dohpa. Ne yũ iirare ñero pepidiabeaa. Ñero pepibigũ árĩgũ doyarõ mariro árĩgũpũ masare Cristore ðaro umupeocũ bũrigã iidiaa. ðmuri nũcũ yũ iidiro dopa ta dohpague sãre erã Cristore “Õagũ, turagũ àhrimi,” erãre arĩ umupeocũ iidiaa. Ojocarigũ gohra eropa ta iidiaa. Erã yure wejẽdiaquerecũ ta eropa ta iidiaca. ²¹ Ojocariniguigũ gohra Cristo yare iiniguica dohpa. Sĩrigũgue tamera ojocarirã tauro ðaro dujagũca yũhũ. ²² Ojocariniguigũ Cristo yare yũ iinemoboro dopa ojocariniguicãdiaca. Eropa iidiaqueregũ ta sĩriri sãre gahmea. ¿Dipüre yũ gamebocuri? Masibirica yũhũ. ²³ Yũ õpa arĩ wereniguicũ masisũya mara yure. Cristo mera bũrigã árĩdiaa. Eropigũ dohpaguere ðgũ pohrogue wadica. Ojocariri tauro sĩriripũ ðatarinũgacãroca. ²⁴ Eropa árĩquerecũ ta mũare yũ itamuboro dopa ojocarinemoro gahmea yure. ²⁵ Irire masigũ ohõ mũa mera yũ árĩborore masia yũhũ. Eropa árĩniguicãgũca yũhũ mũa Cristore umupeonemoboro dopa, iri umupeoturari mera mũa mucubiribore. ²⁶ I yebague árĩnigũ mũa pohrogue dipaturi yũ wacũ mũa mucubirirãca. Eropa yũhũ mũa pohro ejacũ Cristo Jesu yure ðgũ itamurire masirã, “Turagũ àhrimi ðgũ,” arĩ umupeorãca mũa ðgũre.

²⁷ Dohpague i dihtare iique. Cristo ya buheri iri arĩro dopa ta árĩricũque mũa. Guñaturarã árĩque. Eropirã game dũca wariro mariro ðari buherire yujuro mera bũrigã buheque. Eropa ta yũ mũa pohro wabiricũ sãre yũ wacũ sãre mũa eropa iicũ gahmea. Eropa mũa yujuro mera árĩrã árĩcũ peebeodiaa yũhũ. ²⁸ Mũare ðaturirãre

güibiricãque. Mũa eropa güibiricũ ïarã Goãmũ yarã mũa áricũ masirãcoma erã. Eropã masirã erã peamegue waboro sãre masirãcoma. Eropirã Goãmũ ïgũ tauboro sãre masirãcoma. Őpa ta masicũ iimi Goãmũ masare. ²⁹ Cristore mũa umupeobure Goãmũ apidi árimi. I sãre apidi árimi. "Cristo yare mũa werera waja ñero tarirãca," arĩ apidi árimi Goãmũ mũare. ³⁰ Eropirã Cristo yarã mũa árimi waja gajirã mũare ñero iima. Mũare erã iidiro dopa ta yũ sãre ñero iima erã. Mũa mera yũ áricũ yũre erã eropiicũ ïabũ. Dohpague sãre erã yũre eropiicũ pee waĩcua mũa. Eropirã mari yujuropa ta ñero taria.

2

Cristo bu árigũ iro dopa eradigũ áripehrerã weca opu arĩbu wapũ, arĩ gojañumi Pablo

¹⁻² Cristo mũare õaro sĩporãcũcũ iinirã, Cristo ïgũ mahiri mera mũa mucubirirã, yũpũre õaro mucubiricũ iique. Eropirã Espĩritu Santo áripehrerã mũa mera ïgũ áricũ gajirãre mahirã, mojomoro ïarã árirã, yũre õaro mucubiricũ iique mũa. Ire mũa iicũ mucubirigũca. Yujuropa ta õaro sĩporãcũque mũa. Eropirã mũa basi game mahique. Őari mera áricũque. Eropirã áripehrerã yuju diaye õaro árique. ³ Gajirãre tarinũgadiarã áribiricãque. Eropirã eropa ta pepi áricãque. Eropirã gajirãre õaro umupeo õpa arĩ pepique: "Erãpũ yũ tauro õarã ãhrima," arĩ pepique. ⁴ Gajigũ gajirãre itamudiabiribocumi. ïgũ iro dopa iibiricãque. Gajirã sãre itamuque.

⁵ Jesucristo ïgũ eropa pepicãdiro dopa ta mũa sã eropa ta pepicãque. ⁶ ïgũpũ Goãmũ gohra áriquerẽgũ ta "Goãmũ yũ áririre ne duhusome yũhũ," arĩbiripũ ïgũ. ⁷ Eropigũ ïgũ Goãmũ ïgũ árirare duhu, masũ ta masa dehyoadigũ pohro majagũ iro dopa árinũgapũ i yebaguere. ⁸ Eropigũ ïgũ masũ dũpũcũgũ bu árigũ gohra árinũgapũ. Eropa árinũgagũ "Crusague wejẽque ïgũre," erã aricũ ïgũ Goãmũre yũhrigũ tarinũgabiripũ. Crusague ta gũhyasiuro mera sĩribu áriquerẽgũ ta ïgũ tarinũgabiripũ ïgũ Pagure. ⁹ Eropigũ ïgũ eropiicũ ïha mari Pagũ áripehrerã masa erã umupeobure apipũ Jesure. Eropigũ áripehrerã gajirã weca opu acupũ Goãmũ ïgũre. ¹⁰ Eropirã áripehrerã umaro majarã, i yeba majarã, sĩrinirã mũra sã Jesu waĩre peerã erã mereja muju ïgũre umupeorãcoma pare. ¹¹ Eropa ïgũre opu acugũcumi mari Pagũ áripehrerã Jesucristore "Mari Opu ãhrimi," erã arĩbure. Eropa arĩã mari Pagũ Goãmũre umupeorãcoma.

Cristo yarã ðarire wererã masare masicũ iima

¹² Eropirã, yu mahirã, mua mera yu árĩcũ mua yuhridiro dopa ta, dohpaguere yu yoarogue árĩcũ sãre ðaro yuhrique yure. Eropirã peamegue wabonirã mua Goãmũ taunirã árĩrã Cristo ĩgu itamuro mera ĩgu gamero dopa ii purumujuque. Eropirã umupeori mera biraro mariro Goãmũ yare iique. ¹³ Goãmũ ðaripũre mũare gamecũ iigu iimi. ĩgu eropa gamero dopa ta mua iiborore iimi. Eropigu irire mua ĩgu yare ðaro iiborore itamuniguicãmi Goãmũ. ĩgu eropa iicũ irire yu arĩdiro dopa ta iique mua.

¹⁴ Árĩpehrerire iirã turiro mariro, mua basi gajinore werericũro mariro iique. ¹⁵ Eropiique mua ñeri dipuwaja marirã, ñerire iibirã Goãmũ porã ðaro mua árĩmorã. Eropiique mua masa guyarã, ñerã watopere goroweoro mariro mua árĩmorã. Erã ñerã watope mua árĩrã ðari buherire buherã masicũ iiaa mua i yeba majarãre. ¹⁶ Iri buherire mua peeñanirã Goãmũ mera eropa árĩniguimorã wabu mua. Iri buherire i yeba majarãpũre mua eropa buhecũ ĩagu mua mera mucubirigũca yuhũ. Eropigu yu mũare buherare guñagu, "Bu gohra ta mũare buhebiriya yuhũ," arĩguca yuhũ. Eropigu Cristo ĩgu i yeba ĩgu dujaricũ mua mera mucubirigũca yuhũ. Eropigu guhyasĩuro tarisome yuhũ. ¹⁷ Cristore mua umupeoturacũ Goãmũ mũare ĩhasũagũcumi. ĩgu eropa ĩhasũacũ ĩagu mũare Cristo yare yu buheri waja yure erã wejẽdiaquerecũ ta mucubirigũra. Eropirã mari árĩpehrerã yujuropa ta mucubirirãca. ¹⁸ Eropa ta mua sãre yu mera mucubiriro gahmea pũhrũ yu sĩricũ ĩarã.

Timoteore, Epafrodito sãre werepu Pablo

¹⁹ Mari Opũ Jesu ĩgu gamecũ yojaro mera Timoteore mua pohrogue obeodaa yuhũ mua árĩricũre masibu. Eropa masigugue ta mucubirigũca. ²⁰ ĩgu Timoteo mua ðaro árĩborore diaye ta bũrigã guñami mũare. Gajigu ĩgu iro dopa ta árĩgu marimi yure. ²¹ Gajirãpũ árĩpehrerã erã gameri dihtare iidia, Jesucristo ĩgu gameripũre iidiabeama. ²² Timoteopũ ĩgu ðaro iirire masia mua. Yu magũ iro dopa ta árĩgu ĩgu yu mera ðari buherire weremũrimi. Eropirã gũa yujuropa ta Cristo yare buhemũrabũ. ²³ Eropigu õ majarã oparã yure erã duhpiburire masira pũhrũ, Timoteore mua pohrogue obeodiaraa. ²⁴ Eropigu mari Opũ Jesu ĩgu itamuri mera yojaro mera yu sã mua pohrogue wagũca.

²⁵⁻²⁶ Yure itamudorerã mua Epafroditore obeoabu yu pohrogue. ĩgu yu acaweregũ, yu mera mohmegũ, yu wapi, Goãmũ yare buheturagũ aħrimi. ĩgu mũare turaro

guñabeomi. Eropigu ĩgu dorecurare mua peecũ masigu ĩgũpũ “Erã yũre guña bujawerecoma,” arĩ guñaricũmi. Eropa ĩgu wũaro guñaricũcũ ĩagu ĩgũre mua pohrogue omedujuro gahmea yũre, arĩ pepia yũhũ dohpaguere. ²⁷ Árĩro ta ĩgu turaro dorecuami. Mero sĩribocuri tariami ĩgu. ĩgu eropa dorecuquerecũ ta, Goãmũ ĩgũre mojomoro ĩagu taricũ iiami. ĩgu sĩricũ yũpũ bũrigã bujawereboaya. Eropigu yũ sãre Goãmũ mojomoro ĩami ĩgũre taricũ iigu. ²⁸ Eropigu dohpague tamerare yojaro mera ĩgũre mua pohrogue obeodaa dipaturi mua ĩgũre ĩha sĩñajaboro dopa. Mua eropa mucubiricũ peegũ yũ sã mucubirigũra. ²⁹ Eropirã ĩgũre Epafroditore mari Opũ yagũre õaro mucubiriri mera bocatĩrique. Eropirã gajirãre ĩgu iro dopa árĩrãre umupeoque. ³⁰ ĩgu Cristo yare itamudiagu sĩrirami. Mũapũ yũre itamumasibiricũ ĩgũpũ yũre itamubasamũrami. Eropigu dorecu sĩrirami ĩgu.

3

Õaro árĩri gohrare wereñumi Pablo

¹ Dohpague tamerare ire weregũra. Mari Opũ mera mucubirique. I buherire ero coregue yũ wererare dipaturi õpa arĩ gojabeogu mucubiria yũhũ. Eropigu ire werenemogu itamugu iiaa mũare. ² Gorowerebirã ta árĩque mua. Ñerire iiniguicãrã, diayea iro dopa ta árĩrã, ñerã, gasiro merogã wiri aĩdorerã mua ya dũpũre wiridiana. Eropa iidorerã árĩcũ ĩha “Queoro buheri árĩbeaa,” arĩrã õaro iique mua. ³ Erã circuncisión gasiro merogã aĩdoreciarã “Deyoro maja mera Goãmũre umupeocũ õhaa,” arĩrima. Maripũ eropa arĩbeaa. Espĩritu Santo ĩgu itamuri mera diaye ta Goãmũre umupeoa mari. Mari deyoro maja iiri mera mucubiribea. Jesu yarã mari árĩri mera mucubiria mari. ⁴ Eropa mucubiriqueregũ ta, yũ iirare erã iro dopa arĩdiagu, erãre docapicãboya yũ sã. Gajigu õpa ta arĩ tarinũgacãdiami. Yũpũ ĩgu tauro eropa arĩboaya. ⁵ Õpa iigu árĩribũ yũhũ: Ocho nũri yũ masa dehyoara pũhrũ gasiro merogã wiri aĩnirã árĩma yũre. Israe masũ árĩgu Benjami ya curu majagu ãhraa yũhũ. Yũ pagũ sũmarã hebreo masa erã árĩcũ diaye ta hebreo masũ gohra ta masa dehyoabũ. Moise dorerire diaye ta iipehodiagu fariseo curu mera ñajaribũ yũhũ. ⁶ “Goãmũ ya árĩsaca,” arĩgu õaro iiribũ yũhũ. Eropigu Jesu yarãpũre ñero iimũricarabũ yũhũ. Diaye ta Moise dorerire iigu irire tarinũgaro mariro iipehomũriribũ yũhũ. ⁷ Iribojeguere “Iri õari árĩsaca,” arĩ pepimũriribũ. “Iri yũ eropa arĩ pepira iribojeguere

yū eropa árīra duhpiburi árībirigohracādiro árībū,” arī pepia dohpaguere. Ōpa ta arī pepinūgabū yūhū Cristore umupeonūgagū. ⁸ Jesucristo yū Opūre yū masicū tamerare ōataria. Eropigū gaji doreripūre duhpiburi árībeaa, arī pepia yūhū. Iri árīpehrerire cóácābū Cristo yapūre iibu. Eropigū iribojegue yū iirare cóāgū “Ñeri gohra āhraya,” arī pepia. Cristo yare ōaro masibu īgū mera majagu árībū eropa pepia. ⁹ Eropigū yū ejatuharo ōaro yū iira waja “Ōagū āhrimi,” arī ĩabeami Goāmū. Eropiro Goāmū dorerire Moiserē īgū apirare yū iira waja sāre “Ōagū āhrimi,” arī ĩabirami. Cristore yū umupeora pūhrū “Ōagū āhrimi,” arī ĩami pare īgū yūre. Goāmūpū marire dipuwaja marirā árīcū iimi īgūre mari umupeocū. ¹⁰ Eropigū ero coregue yū árīmūhtarare duhucābū Cristore ōaro masigū wabu. Goāmū īgū turari mera Cristo masa mūriapū. Iri turari mera árīdiaca yūhū. Eropigū iri turari mera ōarire iidiaca. Cristo crusague sīripū mari ñeri iirare cóābū. Eropigū īgū yare iigū īgū iidiro dopa ta ñero taridiaa yū sã. ¹¹ Eropigū Cristo īgū masa mūriadiro dopa ta, yū sã masa mūriadiaca.

¹² I árīpehreri eropa arīgū “Cristo iro dopa ñeri marigū árītuhajaa,” arī pepibeaa. Yū eropa arī pepibiriquerecū ta Cristo īgū yagū árībure ōagū árībure iiami yūre. Eropigū īgū yare īgū sāre ōaro masinemodiagu turaro mera īgū yare iidiaa yūhū. ¹³ Yū acawererã, yūhū mūare eropa arīgū, “Jesucristore ōaro masipehotuhajaa yūhū,” arīgū iibeaa. Eropa arībiriqueregū ta i tamerare iiaa. Yū iribojegue iirare cādijigū dohpaguere “¿Goāmū dohpa iicū gahmeri yūre?” arīgū būrigã irire iidiaa. ¹⁴ Omabiragu pohbegū ejamūhtadi īgū wajatadiaro dopa ta būrigã iiaa yūhū yū wajataborore yū ñeaboro dopa ta. Cristo īgū yagū yū árīcū ĩagū yūhū wajataborore obu ūmarogue sihubeomi yūre.

¹⁵ Ōpa yū arīro dopa ta pepique mūa sã Cristore ōaro masirã árīrã. Eropirã mūare yū wererare mūa peediabiricū gajiropa mūa pepicū Goāmū mūare ōaro masicū iigūcumī. ¹⁶ Eropirã īgū yare mari masirare ōaro ii ojogorocūrã.

¹⁷ Yū acawererã, mūa árīpehrerã yūre ĩhacūque. Eropirã gajirã gua iiro dopa iirãre ĩhanūruque mūa erã sāre mūa ĩhacūboro dopa. ¹⁸ Bajasuburi gajirãre ñerãre wereabū yūhū mūare. Dohpague sāre būrigã būjaweregū erãre ta werea mūare daja. Erã ñero iiri mera “Cristo crusague īgū sīridi árīmi,” arī buherire ĩhaturirã āhrima. ¹⁹ Erã peamegue wamorã ta āhrima. Erã ūaribejaripūre būrigã gahmema. Eropirã iri mūare guhyasīrisāborare erāpū “Mari iiri ōari āhraa,” arīma erã. I ūmū maja dihtare

pepima erã. ²⁰ Maripure mari ejaburi maca umarogue ta ãhraa. Eropigu erogue ta marire taubu mari Opu Jesucristo dujarigucumi. Eropirã igu dujariborore corerã iiaa mari. ²¹ Igu dujarigu mari dupure bu ariri dupure gajiropa ariri dupure gohrotogucumi igu. Eropigu igu ya dupu iro dopa ta òari turari dupure gohrotogucumi marire igu turari mera. Aripehrerã opu ñajami igu iri turari mera. Eropigu aripehreri Opu ãhrimi igu iri turari mera.

4

Umuri nucu mari Opu mera mucubirique, arĩ gojañumi Pablo

¹ Eropirã yu acawererã, yu mahinirã, burigã yu guñarã, yure mucubiricũ iirã, mua guñaturadiro dopa ta mari Opure burigã guñaturaniguque mua.

² Ire weregura mware Evodiare, Sintique sãre: Jesu yarã nome ãhraa mua. Eropirã mua game duyasorire duhu òaro mera ariricu arique mua basi. ³ Mupu diaye ta yu wapi gohra ãhraa. Mu sãre weregura: Erã nome yu mera, Clemente mera, gajirã yu wapicurã mera mohmeama òari buherire gua buhecũ. Goãmũ erã waĩ sãre gojatutuhañumi igu yapũgue. Umuri nucu ojocariburire igu onirã waĩre igu gojaturipũgue gojatutuhañumi erã waĩ sãre. Eropigu erã nomere bosaque mũhũ.

⁴ Mua aripehrerã umuri nucu mari Opu mera mucubirique. Dipaturi ta weregura daja: Mucubirique. ⁵ Òaro iiniguicãque mua òaro iinirã arĩrare aripehrerã masa ñhamasiborore. Mari Opu Cristo igu ariboro merogã duhyaa.

⁶ Mua ariricurire ne bujawere guñaricubiricãque. Mua guñaricu bujawererire Goãmure òaro werepehocãque. Eropirã igure òaro serẽque. Eropirã mua sererã igure "Õhaa," arique igure. ⁷ Mua eropiicũ, òaro aricũ guñaricuro mariro iigucumi Goãmũ mware. Igu eropa iiri òataria. I mari òaro ariri òataria. Eropiro Jesucristo yarã mari aricũ marire òaro aricũ iigucumi Goãmũ. Marire òaro siporãcucũ iigucumi. Eropigu bujawererire guñaniguicãcũ iisome igu marire mari igure serera puhũ.

Òarire pepique, arĩ gojañumi Pablo

⁸ Acawererã, ire weretubu iiaa mware. Queoro arĩrire, masa erã umupeorire, òaro iirire, ñero marirore, suarire, masa "Õari ãhraa," erã arĩrire pepique mua. Òatariari iri aricũ iripure pepique. Masa òarire ñarã erã mucubiririre

mua sã mucubiri pepique. Iri árĩpehrerire guñaque irire mua iiboro dopa.

⁹ Mũare yũ buhediro dopa ta eropa ta iiniguicãque mua. Eropirã yũre ñhacũque mua. Mua eropa iicũ Goãmũ mũare ðaro árĩcũ iigũ mua mera árĩgũcumi.

Filipo majarã Pablore erã orare wereñumi ñgũ

¹⁰ Dohpague tamerare yoara pũhrũgue mua dipaturi yũre guñarã mua itamurare mucubiria. Eropa mucubirigu mari Opũ Cristore “Õhaa,” arãa. “Yũre cãdijia wabu mua,” arĩbeaa yũhũ. Iribojeguere yũre itamudiaquererã itamumasibirinirã árĩbũ mua. ¹¹ Yũre mua itamurare weregũ “Yũre dũhyaa dohpa,” arĩ werebu iibea yũhũ. Mũare gajinore gamegũ eropa arĩgũ iibea. Yũ opari mera árĩmasia yũhũ. ¹² Gajinore moogũ sã ðaro árĩmasia yũhũ. Eropigu baja opagũ sã ðaro árĩmasia yũhũ. Æmuri nũcũ oaboagũ sã oare nũgapoa waca. Yapigu arĩgũ sã ðaro árĩpoa waca. Dabero opagũ sã árĩpoa waca. Yũre gajino maricũ sãre ðaro árĩpoa waca. ¹³ Cristo yũre turacũ iigu mera árĩpehrerire yũ eropa warire ii bocatĩumasia yũhũ. ¹⁴ Yũ eropa árĩpoadigu árĩquerecũ ta yũ ñero taricũ mua itamurã yũre ðaro iiabũ mua.

¹⁵ Õari buherire yũ buhediacũ Macedonia yeba mua ya yeba árĩdigũ yũ wacũ gajĩ maca majarã Jesu yarã yũre itamubirama. Mua dihta yũre itamuabũ. Irere masia mua. Mũare yũ buhecũ yũpũre mua itamucũ mari yujuropa ta Cristo yare iirã iiabũ. ¹⁶ Eropirã Tesalónicague yũ árĩnicũ ñarã yũre itamubeobũ. Yujuyerisuburi yũre dũhyacũ ñha yũ gamerire obeoabũ mua. ¹⁷ Gajinore serẽgũ eropa arĩgũ árĩbeaa. Gajirãre mua itamucũ Goãmũ mũare ðaro itamugũcumi. Ñgũre mua itamuri waja Goãmũ mũare ñgũ ðaro iicũ gahmea yũhũ. Mua eropa itamurã guñaturarã wacũ sãre gahmea yũhũ. Eropigu yũre mua itamurare guñacũ iiaa mũare. ¹⁸ Dohpaguere yũre ðaro opehoabũ mua. Yũ gamera tauro ohabũ mua yũre. Yũre Epafrodito mera mua obeora pũhrũ gajino ne dũhyabeaa yũre. Mua yũre ora Goãmũre ora iro dopa ãhraa. Yũre mua ora Goãmũre ðaro sũacũ iiaa. ¹⁹ Jesucristo marire ðaro iidi árĩmi. Eropigu árĩpehrerire mũare dũhyarare ogũcumi mari Pagũ mũare. Õatariari ñgũ oparire ogũcumi. ²⁰ Æmuri nũcũ mari Pagũre Goãmũre umupeorã. Eropa ta iiporo.

Pablo ðadorepũ

²¹ Árĩpehrerã Goãmũ mera árĩrã Jesucristo yarã ðaporo. Mari acawererã Jesu yarã yũ mera majarã sã mũare ðadorema. ²² Árĩpehrerã õ majarã ðarã Jesu yarã

õadorema. Roma majarã weca opu ya wihi majarã tamera burigã õadorema.

²³ Mari Opu Jesucristo mera muare õadorea. Eropa ta arĩniguicãporo. Iripẽta ãhraa.

Colosenses

Colosa majarãre gojabeoñorã Pablo sã

¹⁻² Yũhu Pablo Jesu yagũ mari acaweregũ Timoteo mera mũare Colosa majarãre gojabeoa gũa. Jesucristo ãgũ yare buhedoregũ ãgũ apidigũ ta ãhraa yũhu. Goãmu ãgũ gamero dopa ta Jesucristo yũre ãgũ yare buhebure apimi. Eropirã mũare gũa acawererãre Cristore umupeorãre gojabeoa. Eropirã mari Pagũ Goãmu mera mũare õadoreoa. Eropirã ãgũ mera õaro árĩque mua.

Jesu yarãre Pablo serẽbasapũ Goãmũre

³⁻⁸ Mũa ya árĩburire Goãmũre serẽrã mucubiriri mera eropa serẽbasaniguicãa gũa. ãgũ mari Opũ Jesucristo Pagũ ãhrimi. Árĩpehrerinũri mua mũmũsigue õaro árĩcũ iigũcumi Cristopũ. ãgũ eropa iibu árĩcũ mua mucubirimũhtarã waĩcũa. "Jesucristo diaye iigũ ãhrimi," arĩ ãgũre umupeorã waĩcũa mua. Eropirã ãgũ yarãre mahi waĩcũa mua. Mũa eropa árĩrã árĩcũ Goãmũre "Õhaa," arĩ mucubiriri mera serẽbasaa gũa. Árĩpehreroguere Jesu yarã diaye árĩri buherire õari buherire erã werecũ peerã masa õaripũre gohrotoma. Goãmu yare masinemorã wahama. Õpa ta mua sãre Epafra õari buherire weredi árĩmi. ãgũ gũa mera Cristore mohme coregũ ãhrimi. Iri mohmerire duhubeami ãgũ. Mũare ãgũ eropa werecũ peerã, mata Goãmu yare õaro iiniguicãmũrayoro mua. Eropirã Goãmũ mũare mahirire diaye ta masirã mata õaro iiaiyoro mua. Mũa eropa iirare ãagũ Epafra weremi gũare. Espĩritu Santo itamuri mera Jesu yarãre mua mahirare weremi ãgũ gũare. ãgũ eropa arĩ werecũ peerã "Õhaa," arãa gũa Goãmũre.

⁹ Eropirã mũare guñarã eropa Goãmũre serẽbasaniguicãa. Goãmũ ãgũ gamerire mua masipehoboro dopa serẽbasaa gũa. ãgũ yare õaro masirã mua árĩboro sãre serẽbasaa gũa. ¹⁰ Õpa ta serẽbasaa gũa mari Opũ Cristo ãgũ gamero dopa ta õaro mua iiburire. Mũa eropa iicũ ãagũ ãgũ mũare sũagũcumi. Eropa ta mua árĩpehrerire õarire mua iiburire serẽbasaa. Goãmũre mua masinemoboro dopa serẽbasaa. ¹¹ I sãre serẽbasaa gũa. Goãmu ãgũ õaro turari mera mua õaro sĩporã turarã árĩboro sãre serẽa. Eropa ta serẽa ñero tariquererã mua Goãmũ mera yujuro bojeboro dopa. Ñero tariquererã mua eropa pepicãburire mua mucubiriri mera eropa

árĩniguiboro sãre serēbasaa daja gua. ¹² Goãmũ ĩgu yarã árĩcũ marire iimi. Eropã ĩgu ĩgu orire mari opamorã mari árĩcũ sãre iimi ĩgu. ĩgu árĩroque õarogue mari árĩborore amutihajami ĩgu. ĩgu eropa iicũ ĩarã mucubiriri mera mari Pagure “Õhaa,” mũa arĩborore serēbasaa gua mũare. ¹³ ĩgu ta marire peamegue wabonirãre taricũ iidi árĩmi. Iribojegue ñerire duhumasibiriribũ mari. Ñegũpũ marire doredi árĩnirimi. Eropigũ Goãmũpũ marire taudi árĩmi. ĩgu magũ ĩgu mahigure opũ acugũ ĩgu dorero dopa marire árĩcũ iimi. ¹⁴ ĩgu magũ mera marire peamegue wabonirãre taudi árĩmi Goãmũ. ĩgu magũ ĩgu sĩrirañe mera mari ñeri iirare cãdijidi árĩmi Goãmũ.

*Masa Goãmũre gamebircũ ĩha Cristo amupũ, arĩ go-
jañumi Pablo*

¹⁵ Goãmũre mari Pagure ĩaya mara. Cristo ĩgu magũ ĩgu Pagũ ĩgu árĩricũre ĩhmudigũ árĩmi masare. ĩgu ĩgu magũ árĩpehrerã core, árĩpehreri core árĩtuhadigũ árĩmi. Eropigũ tauro opũ ãhrimi ĩgu. ¹⁶ Goãmũ ĩgu dorecũ ĩgũpũ ĩgu Pagũ mera árĩpehrerire ĩhacũnuguñumi. Õmũsigue árĩre i yebague árĩri sãre ĩhacũnuguñumi. Mari ĩarire mari ĩabiriri sãre ĩhacũnuguñumi. I yeba majarãre, mũmũsi majarã oparãre, árĩpehrero dorerãre, mari ĩarãre, mari ĩabirã sãre, árĩpehrerãre ĩhacũnuguñumi. ĩgu árĩpehrerire, árĩpehrerãre ĩhacũnuguñumi. Eropirã árĩpehrerã ĩgu iinirã ãhrima. Árĩpehrerigue ta ĩgu iira ãhraa. ¹⁷ Árĩpehrerã core árĩpehreri core Cristo árĩmũhtañumi. Eropiro ĩgu turari mera árĩpehrerã dohpaguere árĩrã iima. Árĩpehreri sã árĩro iiaa. ¹⁸ Mari ĩgu yarã árĩpehrerã ĩgu ya curu majarã árĩrã ĩgu dũpũ waĩcũa. Eropigũ ĩgũpũ mari dipuru ãhrimi. ĩgu sĩrigũ masa mũriamũhtadigũ árĩmi árĩpehreri weca árĩpehrerã weca árĩbu. ¹⁹ Cristo mari Pagũ Goãmũ mera yuju dũpũ ta árĩro dopa ta ãhrimi. ĩgu eropa árĩcũ ta gamepũ mari Pagũpũ. ²⁰ Árĩpehrerã masa erã ĩgure gamebirimũricũ ĩagũ erã ĩgu mera amubure Cristore obeopũ. ĩgure eropa obeogũ ĩgu Cristo crusague sĩri ĩgu di cóãra mera amupũ. Eropigũ mũmũsi majarãre, i yeba majarã sãre ĩgu mera õaro árĩcũ iipũ. Õmũsi maja i yeba árĩri sã õaro árĩcũ iipũ. Eropigũ ĩgu guñadiro dopa iipũ.

²¹ Mũa sãre eropa ta ĩgu mera õaro árĩcũ iidi árĩmi. Mũa sã ñerire iiniguinirã Goãmũre boje majarã árĩrã mũa pepiri mera ĩgure gamebirinirã árĩmũriribũ. ²² Mũa eropa árĩnirãre Cristo sĩriro mera ĩgu Pagure mũa ĩgu

mera ðaro wacũ iipũ ĩgu. Eropa iipũ ĩgu mũa ĩgu yarã ðarã ñeri marirã, dipuwaja marirã mũa árĩboro dopa. Mũa eropa árĩcũ ĩgu árĩroguere mũa árĩborore eropa iipũ. ²³ Eropa ta iigucumi ĩgu mũa ĩgure duhuro mariro umupeoturaniguicãcũ. Mũa ðari buherire mũa Goãmũ mera árĩniguiborore mũa cãdijibiricũ, ĩgu mera mũa árĩcũ iigucumi mũaare. Iri mũa peera buherire ðari buherire árĩpehrerã i yeba majarã peenirã árĩma. Eropigũ yũhũ Pablo sã iri ðari buherire weregũ ta ãhraa.

Jesu yarãre itamubure apipũ Goãmũ Pablöre

²⁴ Cristo mari ĩgu yarã árĩborore crusague sĩrigũ ñero taripũ. Eropigũ yũ sã mũa ĩgu yarã árĩburire ñero tarigũ mucubiria. Eropa ñero tarigũ Cristo marire ĩgu apirare ii ojogorocugũ iiaa. Eropigũ mucubiria. Cristo yare mari iira dipuwaja mari ñero tarinemoboro duhyania dohpa. Eropigũ ĩgure mũa guñaturaborore ñero tari mucubiria yũhũ. ĩgu dũpũ iro dopa árĩrã ĩgu ya curu majarã ãhraa mũa. ²⁵ Jesu yarãre itamubure apimi Goãmũ yũre. Mũa ya árĩburire iibure yũre apimi ĩgu. ĩgu yare mũaare werepehobure apimi ĩgu yũre. ²⁶ Iri ĩgu yare iribojeguere baja cururi majarãre erã masipehocũ iibirimuriñumi mari Pagũ. Dohpagueere dohpague majarãre ĩgu yarãre irire ðaro masipehocũ iimi pare. ²⁷ Eropigũ “Judio masa árĩbirã sãre yaha buheri ðataria,” arĩ ĩgu yarãre irire weremi. Iribojegue erã masibirirare weremi Goãmũ. Ōpa ãhraa dohpagueere ĩgu werera: Cristo ĩgu yarã mera ãhrimi. ĩgu eropa árĩcũ ĩgu yarã umusiguere ðatariaroguere árĩrãcoma. Iri ãhraa iribojegue erã masibirira mari Pagũ ya.

²⁸ Cristore ta werea. Árĩpehrerãre gũisãgũ erãre werea yũhũ. Ōaro masiri mera buhea yũhũ ðaro Cristore masare masicũ iibu. Eropa buhea yũhũ erã ĩgu yare ðaro iirã erã árĩcũ iibu. ²⁹ Iri ta ãhraa yũ mohmeri. Jesucristo ĩgu ya turari mera yũre ĩgu ora turari mera turaro mohmea yũhũ ĩgu yare buhegũ.

2

¹ Ire mũa masicũ gahmea. Mũa ya árĩburire, Laodicea majarã ya árĩburire, árĩpehrerã ya árĩburire turaro mohmea yũhũ. Árĩpehrerã masa yũre ĩabirã ya árĩburi sãre turaro mohmea yũhũ. ² Ōpa ta mohmea yũhũ mũa árĩpehrerã ðaro sĩporãcuborore. Mũa mera majarãre mũa yujuro mera game umupeoburi sãre eropa mohmea yũhũ. Iribojegue majarãre Goãmũ werebirira Cristore masicũ iiri

ãhraa. Īḡu yare masirã Cristore umupeoa mua. Mua ĩḡure ðaro masiborore mua ĩḡu mera ðaro árĩborore burigã itamua yũhũ mũare. ³ Cristo dihta masipehocãmi gajirã masibirirare. Īḡu árĩpehrerire ðaro masigũ ãhrimi. Īḡu masiri ðatariaro ãhraa. ⁴ Irire werea mũare gajirã mũare peesuari wereniguiiri mera ḡuyari arĩḡu. ⁵ Yũhũ mua watope árĩbiriqeregũ yũ ḡuñari mera mua watope arĩḡu dopa ãhraa. Erogue árĩbiriqeregũ Cristore mua ðaro umupeoniguirare mua ðaro iirare peegũ mucubiria yũhũ.

⁶ Eropirã mari Opũ Jesucristore opamorã ĩḡure mua umupeonũgadiro dopa ta umupeoniguicãque. "Eropa ta yũre itamugũcumi," arĩrã mũuri nũcu ĩḡu mera ðaro árĩniguicãque. ⁷ Īḡure ðaro masirã árĩque mua. Eropirã mũuri nũcu ĩḡure masinemoque gajirã erã ero core mũare erã buhediro dopa ta. Eropirã Cristore mucubirãrã "Õhaa," arĩniguicãrã árĩque mua.

Cristo yarã árĩrã ðaripũre gohrotoa mari, arĩ gojañumi Pablo

⁸⁻¹⁰ Õaro pee masique mua. Masa erã gamero erã buherire erã ḡuyarire peebiricãque. Erã iribojegue majarã árĩricũrare buhema. Masa erã pepiro dopa pepirã árĩrã i doreri dihta buhema. Cristo yapũre buhebeama. Cristo mari Pagũ árĩro dopa ta árĩḡu Goãmũ gohra ta ãhrimi. Eropigũ Jesucristo Goãmũ árĩḡu i yebague masa dehyoadigũ Goãmũ ta árĩmi. Eropirã ĩḡu yarã árĩrã Goãmũ mera ðaro árĩniguia mari. Īḡu ta árĩpehrerã deyobirã oparã tauro opũ árĩḡu ãhrimi. Mũsi majarãre i yeba majarãre árĩpehrero majarãre doremi. Eropirã ḡuyari buherãre peebiricãque. ¹¹ Eropirã Cristo yarã árĩrã circuncisiónre iinirã gasiro merogã wiri añirã iro dopa árĩrã ãhraa mua. Masa erã dũpũre merogã gasirogãre erã wiri cóaro árĩbiriya. Mua pepiripũre Cristopũ mua ñeri uaribejarire cóãmi. ¹² Īḡu yarã árĩra pũhrũ waĩyesũnirã árĩnirã árĩbũ mua. Eropa waĩyesũnirã árĩrã õpa ĩhmurã iinirã árĩbũ mua: Iribojegue mua ñero iirare duhurare ĩhmurã iibũ mua. Jesucristo sĩridigũ mera mua uaribejarare cóãnirã árĩbũ mua. Eropirã Jesucristo sĩridigũ masa mũuriara mera ðaripũre gohrotonirã árĩbũ mua. Īḡu Goãmũpũ Cristore masudigũ árĩmi. "Īḡu turagũ ãhrimi," arĩrã ĩḡure umupeorã árĩrã ðaripũre gohrotonirã árĩbũ mua. ¹³ Iribojegue mua ñerã árĩra dipuwaja peamegue wabonirã árĩriyoro mua. Eropa wabonirã árĩriyoro mua Goãmũ yarã árĩbirã. Īḡu dorerire opabirã árĩriyoro mua. Dohpaguere mari Pagũ marire ĩḡu mera eropa ðaro árĩniguimorã iimi. Cristo

ĭġu sĭridiro mera eropa iimi ĭġu marire. Eropa iġu mari árĭpehreri ñeri iirare cãdijicãdi árĭmi ĭġu. ¹⁴ Goãmu ĭġu dorerire gojarare mari tarinuganirã mari árĭquerecũ ta ĭġu marire dipuwajacudorebeamı. Cristo crusague ĭġu sĭridiro mera Goãmupũ mari ñeri dipuwajare cãdijipehocãdi árĭmi. ¹⁵ ĭġu Cristo crusague sĭricũ watẽa ya dorerapũre Goãmupũ tarinugacãpũ. Eropirã bu árĭrã dujacãñorã erã watẽapũ. Eropa iġu erãre ġuhyasiuro wacũ iipũ erã ĭhuro.

Umusi majare Goãmu yare gameque, arĭ gojañumi Pablo

¹⁶ Eropirã gajirã erã dorerire dorediaricoma mũare. “Mũare irire barã, irire ihrirã ñerire iirã iiaa mũa,” arĭ werewũama mũare. Erã eropa arĭ werewũacũ eropa ĩacãque erãre. Bojori nũcu árĭrinũri, aberi nũcu árĭrinũri, semanari nũcu árĭrinũri, bosenũri mũa iidibiricũ werewũama. Erã eropa werewũacũ eropa pepicãque erãre. ¹⁷ Erã mũare doreri iribojegue Goãmu apira doreri Jesucristo mari ñeri iira dipuwaja sĭriburire ĭhmumũhtarañe árĭyoro. Dohpaguere Cristo arĭmi marire. Eropirã ĭġure umupeorã iri doreripũre umupeobeaa pare. ¹⁸ Erã dorerire iidorerã mũare dipuwajacurã dujacũ iidıama erã. Erã eropiicũ eropa ĩacãque erãre. “Gajiropa dehyoarire ĩabũ ġua,” arĭmaacãrã erã anyuare umupeorıma Goãmũre umupeoboro dopa. Erã eropa pepicãrã iro dopa iirıma. Gajirã masa iro dopa erã ñeri uaribejarire pepirıma erã. Eropa pepirã árĭrã “Masipehocãa ġua,” arĭ pepirıma erã. ¹⁹ Eropa iirã árĭrã Cristopũre umupeobeama. Cristo dihta ĭġu yarãre doreġu ãhrimi. Cristopũ mari ĭġu yarã dipuru ãhrimi. ĭġu yarãpũ ĭġu ya curu majarã árĭrã ĭġu dũpũ waĩcũa. Mari dipuru mari dũpũre gamesũriro dopa ta ãhrimi Jesucristo ĭġu yarãre. ĭġu yarãre itamugũ marire ĭġure umupeonemocũ iimi. Goãmu gamero dopa ta ĭġu yarãre ĭġure masinemocũ iimi.

²⁰ Marire ñero iira dipuwajacũnirãre Cristo taudıġu árĭmi crusague sĭriġu. Eropirã Cristore umupeorã ĭġu yarã ãhraa. Mũa eropa árĭrã i yeba maja buherire anyuare umupeori buherire gamebiro ġahmea mũare. ¿Duhpirã ġajino buherã erã dorerire iidıari mũa? ²¹ Őpa arĭ dorema erã basi erã gamero: “Irinore babiricãque. Irinore pẽhrebiricãque,” arĭma. ¿Erã eropa arĭdorecũ duhpirã yãhriri mũa? ²² Erã doreriñe bari iro dopa ta pehrea waroca. Erã doreriñe i mũa maja dihta ãhraa. Masa erã sũaro erã buheri dihta ãhraa i buheri. Eropiro duhpihuri árĭbeaa. ²³ Erã dorerire iirã Goãmũre umupeorã iro dopa árĭrıma. Eropirã eropa pepicãrã iro dopa ĩi ĭhmuma. Erã dũpũre ñero

taricũ iirã “Goãmure umupeorã iiaa,” arĩrima. Erã eropa iirã erã doreripũ masipehorã ya doreri iro dopa iirima. Eropa árĩbeaa. Erã dorerire iiquererã erã ñeri ùaribejarire duhubeama. Eropiro erã doreripũ duhpiburi árĩbeaa.

3

¹ Eropirã Cristo yarã àhraa mũa. Eropirã mũa ero core mũa ñeri iirare duhunijarã òaripũre gohrotonirã àhraa mũa. Eropa gohrotorã árĩrã ùmũsi majare Cristo yare gameque mũa. Erogue Cristo ĩgu Pagũ diayerũ doagu árĩpehrerore doregũ àhrimi. ²⁻³ Mũa ùaribejari cóãnirã árĩrã Cristo gamerire opaa. ĩgu Cristo mũa òaro iiborore òaro ĩhadibumi. Eropirã iri ñerire guñabeaa mũa. Eropirã ùmũsi majare Goãmũ yare guñamũhtaque. I yeba majare guñaniguibiricãque. ⁴ Eropirã ùmũsigue Cristo marire eropa árĩniguimorãre aĩgu ĩgu aricũ ĩgu mera warãca. Eropa warã ĩgu mera ùmũsigue Goãmũ yare oparãca.

Cristo yarã árĩbirã ñerire iiribũ mari, arĩ gojañumi Pablo

⁵ Eropi i yeba maja ñerire duhucãque. Ne yujugũ mojoto diribiriqueregũ nomeo mera árĩbiricãque. Ne yujugo mojoto diribiriquerego ùmũ mera árĩbiricãque. Eropa ñeri mũa iirire iripẽta duhucãque. Ñeri ùaribejarire iibiricãque. Mũa opaburire gajinore gametaribiricãque. Mari gajinore bũrigã gamerã goãmarã wéanirãre erã umupeoro dopa iirã iiaa mari irire. ⁶ Iri ñerire iirã Goãmure tarinũgarã àhrima. Erã eropa árĩcũ ĩagu ĩgũpũ erãre gamebeamĩ. Eropigũ erãre bũrigã dipuwaja moagũcumĩ. ⁷ Iribojeguere mũapũ iri ñerire iinirã mera majarã árĩriya mũa. ⁸ Dohpaguere i ñerire duhupehrecãque mũa. Guarire, disitĩri wiarire, gajirãre ñero arĩ pepirire, gajirãre ñero quere wereniguirire, ñero wereniguirire iri árĩpehrerire duhucãque. ⁹⁻¹⁰ Mũapũ Jesu yarã warã ñerã mũa árĩdiro dopa ta iri ñeri ùaribejarire duhutuhajanirã árĩbũ. Eropirã òaripũre gohrotonirã àhraa mũa. Mũare òaripũre gamecũ iigu iimi Goãmũ. ĩgu árĩro dopa mũa árĩboro dopa eropa iimi. Eropa ta iimi ĩgu mũa ĩgũre òaro masiboro dopa. Eropirã ĩgu eropiicũ mũa mera majarãre gũyabiricãque. ¹¹ Cristo yarã mũa árĩrã judio masa, judio masa árĩbirã sã yujuropa dihta àhraa mũa Goãmũ ĩgu ĩacũ. Gasiro merogã wiri aĩnirã, irire aĩbirinirã sã Cristo yarã árĩrã yujuropa àhraa Goãmũ ĩgu ĩacũ. Gaji yeba majarã sã, masibirã sã, mũa ya yeba majarã sã Cristo yarã árĩrã yujuropa àhraa Goãmũ ĩgu ĩacũ. Pohro majarã, erã pohro majarã árĩbirã sã, Cristo yarã árĩrã yujuropa ta àhrima

Goãmũ ĩgũ ĩacũ. Jesucristo tamera árĭpehrerã ĩgũ yarã mera àhrimi. ĩgũ yarã erã ĩacũ bu árĭgũ árĭbeamĩ ĩgũ.

12-13 Eropi Goãmũ ĩgũ beyenirã, òarã, ĩgũ mahirã árĭrã òpa árĭque mũa: Gajirãre mojomoro ĩarã, gajirãre òaro iirã árĭro gahmea. Mũare ñero iiquerecũ ta eropa pepicãrã árĭro gahmea mũare. Mũa mera majarã mera guarã, erãre quere iirã árĭbircãro gahmea mũare. Eropirã “Yũhũ bu árĭgũ àhraa,” arĩ pepique. Mari Opũ mũa ñeri iirare cãdijimi. ĩgũ eropa cãdijidiro dopa ta mũa sã mũa mera majarã erã ñero iirare cãdijique. 14 I doreri tauro òpa arĩ dorea mũare: Gajirãre mahi umupeoque. Mũa eropa iirã árĭpehrerã gajirã mera yujuro mera árĭrãca. 15 Cristo marire òaro árĭcũ iimi gajinore mari wereniguibiriboro dopa. ĩgũ eropa iicũ òaro árĭque mũa. Mari ĩgũ yarã yuju curu ta àhraa. Mari eropa árĭrãre mari Pagũ marire òaro árĭmorãre ta apimi. ĩgũ eropa iicũ òaro árĭque mũa mũa basi. Eropirã Goãmũre “Òhaa,” arĩ mucubirirã árĭque mũa Goãmũ mera.

16 Cristo ya buherire òaro guñaniguicãque mũa. Òaro pee masiri mera ĩgũ yare gajirãre buheque. Gũhyadiaro irire wereque. Eropirã Salmo gojaripũre, Goãmũ yare bayarire, gaji ĩgũre umupeori bayarire ĩgũre bayapeoque. Òaro guña umupeori mera bayapeoque. Eropa bayarã ĩgũ yare òaro guñaque mũa. Eropirã Goãmũre “Òhaa,” arĩ mucubirirã árĭque mũa Goãmũ mera. 17 Árĭpehreri mũa iirire òaro sĭporãcũ iique mari Opũ Jesu ĩgũ mucubiriboro dopa. Mũa wereniguirã ĩgũ ya árĭburi dihtare werenigu-ique. Eropirã Cristo ĩgũ itamuri mera Goãmũ mari Pagũre sererã “Òhaa,” arĩ mucubirique ĩgũre.

Jesu yarãre yujuro mera árĭburi doreri òpa àhraa, arĩ gojañumi Pablo

18 Mũa marapũcũrã nome, mũa marapũ sũmarãre òaro yũhrique. Eropa ta iiro gahmea mari Opũ yarã Cristo yarã nome árĭrã. 19 Mũa marapocũrã, mũa marasã nomere mahi umupeoque. Igore turibircãque. 20 Mũa erã porã sã mũa pagũ sũmarãre tarinũgabirã dihta árĭque. Mũa eropa iicũ ĩagũ mari Opũ òaro sũagũ árĭgũcumĩ. 21 Mũa erã pagũ sũmarã sã mũa porãre eropa turiniguibircãque bujawerecũ iiri arĩrã. 22 Mũa pohro majarã, mũa oparãre i yeba árĭrãre eropa yũhrirã árĭque. Erã ĩhurore erã dorero dopa ta mohmeque. Erã maricũ sãre mohmeque. Mari Opũre Cristore gũhyadiaro mũa ĩadiro dopa ta òaro mera yũhrique mũa oparã sãre. 23 Diaye ta Cristo yarã árĭrã òaro yũhrirã àhraa mũa ĩgũre. Eropirã mũa oparãre ò majarã

sãre yũhrirã, Cristore mũa yũhriro dopa ta yũhrique mũa. Eropirã mũa oparã erã dorero dopa ta turaro mera mohmeque “Cristo ya doreri ãhraa,” arĩrã. ²⁴ Mũa eropa iicũ Cristo mũare wajayegũcumi. Mũare ĩgu oburire mũare ogũcumi mari Opũ. Irire masia mũa. Mari Opũ Cristo ĩgu pohro majarã ãhraa mũa. Eropigũ ĩgũpũ mũa Opũ gohra ãhrimi. ²⁵ ĩgũre tarinũgarãre dipuwaja moagũcumi mari Opũpũ. Árĩpehrerã tarinũgarãre ne yujugũ duhyaro mariro yujuro mera dipuwaja moagũcumi ĩgu. Eropa yũre iiri arĩrã õaro yũhrique mũa.

4

¹ Mũa oparãpũ, mũa pohro majarãre diaye ta õaro iique erãre. Mũa sã opũ opaa. Mũa opũpũ umusĩ majagũ Goãmũ ãhrimi.

² Mũa árĩpehrerã umũri nũcũ Goãmũre serẽniguique. Õaro guña pee masi serẽniguique. Eropirã mari Pagũ õaro iirare guñaque. ³⁻⁴ Gũa ya árĩburipũre serẽque daja. Cristo yare iribojegue majarã erã masibirirare buherã iiaa gũa. Masare gũa õaro buheborro dopa serẽbasaque mari Pagũre. Yũhũ Goãmũ yare wereniguirĩ waja dohpaguere peresugue ãhraa. Eropigũ mũa eropa serẽcũ gahmea ĩgu yare yũ õaro iiborro dopa. Cristo ĩgu dorediro dopa ta yũ wereburire serẽque.

⁵ Jesu yarã árĩbirã mera árĩrã õaro iique mũa. Cristo yare wereque erãre. Erã mera mũa árĩropẽ ta eropa ta õaro iique erã Jesu yarã árĩborro dopa. ⁶ Gajirã mera weretamurã õaro sũaro mera weretamuque. Õari dihtare wereniguique. Mũa eropiirã gajirã erã Jesucristo yare mũare serẽpicũ õaro masiri mera yũhrirãca erãre.

Õadoretupũ Pablo

⁷ Tĩquico mari acaweregũ Jesu yagũ ãhrimi. ĩgu yũ árĩricũre mũare weregũcumi. ĩgu mari mahigũ ãhrimi. Cristo yare buhegũ, gũa mera mohmegũ ãhrimi. Ne iri mohmerire duhubeami ĩgu. ⁸ Mũa pohrogue ĩgũre obeogu iiaa yũhũ gũa árĩricũre mũa masiborro dopa. ĩgũre obeogu iiaa yũhũ mũare mucubiricũ iibure. ⁹ Onésimo mari acaweregũ mera wapimoa obeogu iiaa. ĩgu sã Cristo yare ne duhubeami. Mũa mera majagũ ãhrimi. Erã perã yũ dohpa tarirare wererãcoma mũare.

¹⁰ Aristarco peresugue árĩgu yũ mera majagũ mũare õadoremi. Marco sã õadoremi. ĩgu Bernabé pagũ magũ ãhrimi. Mũa pohrogue ĩgu ejacũ õaro mera ĩgũre bocatĩrique yũ mũare werebeodiro dopa ta. ¹¹ Jesu waĩcũgu

“Justo,” erã arĩ piyugu ðadoremi ĩgu sã. Oã ta yu mera mohmerã judio masa gohra ãhrima. Judio masa gohra erã dihta Goãmũ yare yu mera buhema. Őpa buhea guã Goãmũ yarã masa waboro dopa. “Jesucristo yu Opũ ãhrimi,” erã arĩboro dopa buhea guã. Erã yure ðaro itamunirã ãhrima. ¹² Epaфра mũa mera árĩdigũ muare ðadoremi. ĩgu Jesucristo dorerire ðaro iigu ãhrimi. Goãmure serẽgu, turaro mũa ya árĩburire serẽbasaniguicãmi ĩgu. Goãmure ðaro guñaturaniguimorãre, ĩgu gamero dopa iimorã mũa árĩboro dopa eropa Goãmure serẽbasaniguicãmi ĩgu. ¹³ ĩgu mũa ya árĩburire turaro serẽbasami. Laodicea majarã ya árĩburire, Hierapoli majarã ya árĩburi sãre ĩgu turaro serẽbasami. ĩgu eropa iigu árĩcũ ĩagu muare weregu iiaa. ¹⁴ Duhturu Luca waĩcũgu mari mahigu muare ðadoremi. Dema sã ðadoremi.

¹⁵ Őaporo mari acawererã Laodicea majarã. Ninfa sã ðaporo. Jesu yarã igo pohro gamenererã sã ðaporo. ¹⁶ Ipũre yu gojabeorapũre buhetuha Laodicea majarã sãre obeoque. Eropirã erãre Laodicea majarãre yu gojabeorapũre mũa sã buheque. ¹⁷ Eropirã ðpa arĩque Arquipore: “Mari Opũ Jesu yagu mũ árĩcũ ĩgu mohmerire apidi árĩmi mure. ĩgu eropa apicũ iri mohmerire ðaro mohme ojogorocũque mũhũ,” arĩque ĩgure.

¹⁸ Yũhũ Pablo, yu mojoto mera ire gojaa. Muare ðadorea yũhũ. Peresugue yu árĩrĩre guña serẽbasaque Goãmure. Őaro árĩque mũa. Goãmũ ĩgu mahiri mera muare ðadorea. Iripẽta ãhrraa.

1 Tesalonicenses

Pablo gojañumi Jesu yarãre Tesalónica majarãre

¹ Yꝰ Pablo, Silvano, Timoteo mera ipũre mũare gojabeoa. Mũapꝰ Tesalónica majarã mari Pagꝰ Goãmꝰ yarã árĩrã mari Opꝰ Jesucristo yarã sã áhraa mũa. Eropigꝰ Goãmꝰ mari Pagꝰ, Jesucristo mari Opꝰ mera mũare ðadoreo. Íꝰ itamuri mera ðaro árĩque.

Jesu yarã Tesalónica majarãpꝰ Jesure erã ðaro umupeorare wereñumi Pablo

² Goãmũre serẽrã mũa árĩpehrerãre guña mucubiriri mera. Mũa Jesure umupeorire guñarã “Ôatariari áhraa,” arĩ serẽniguicãa gũa Goãmũre. ³ Mũa Jesucristore “Diaye iigꝰ áhrimi,” arĩ umupeoniguicã waĩcũa. Eropa umupeoniguicãrã Jesucristo ya árĩburire ðaro iirã waĩcũa. Jesucristore, gajirã sãre mũa ðaro mahi umupeorã waĩcũa. Eropa mahirã Jesucristo ya árĩburire bũrigã iirã waĩcũa mũa. Eropirã Jesucristo íꝰ itamurire corerã waĩcũa mũa. Íꝰure eropa corerã íꝰure yare iirã duhubirã waĩcũa. Eropa iirã mũa Goãmꝰ mari Pagꝰ íacũ ðaro iiaa. Goãmũre gũa serẽrã irire mũa eropa ðaro ii waĩcũrere guñaniguicãa. ⁴ Gũa acawererã, ðpa peeque. Mũare Goãmꝰ mahimi. Eropigꝰ mũare íꝰure yarã árĩmorãre beyepꝰ. Irire masia gũa. ⁵ Gũa sohõ árĩrasubu mũa mera árĩrã ðari buherire mũare gũa wererã gũa pepiri mera werebirabꝰ. Espíritu Santo íꝰure doreri mera íꝰure yare wereabu gũa mũare. Eropa werecũ iri buheri diaye ta árĩrere ðaro masiabꝰ mũa.

⁶ Eropa masirã mũa iri ðari buherire ðaro pee ñeabu mũa mucubiriri mera. Eropirã mũa eropa peecũ íha gajirã gamebirã mũare ñero iima. Erã mũare ñero iiquerẽcũ ta mũa Espíritu Santo itamuri mera ðaro mucubiriabu. Eropirã gũa mũa watope árĩrã gũa ðaro árĩricũrere masiabꝰ mũa. Eropirã mũa gũa diaye maja iirare íarã gũare íhacũbꝰ. Eropirã Jesu mari Opꝰ íꝰure iidiro dopa ta iiaabu mũa. ⁷ Mũa eropiicũ pee Jesu yarã Macedonia yeba majarã, Acaya yeba majarã sã mũa eropa ðaro iirare peeañorã. Eropa peerã erãpꝰ mũa iidiro dopa ta iiañorã erã sã. ⁸ Eropirã mũaguere Jesucristo mari Opꝰ yare peesũyoro. Goãmũre mũa umupeorare Macedonia majarã Acaya majarã sã peeañorã. Erã dihta peebirañorã. Árĩpehrero majarã mũa umupeorare peeañorã. Eropirã gũa mũa umupeorare gajirã masituhajacũ íha werebirica erãre gũapꝰ. Erãpꝰ gũare

werema. ⁹ Ōpa arīma guare mua iirare wererā. “Tesalónica majarā muare ōaro bocatīriñorā mua erogue ejacū. Erā Jesucristo yare pee erā goāmarā wéanirāre umupeonirā árīrā gohrotoañorā. Gohrotorā Goāmū gohra ojocarigure diaye iigure umupeonugañorā. Eropirā dohpague Goāmū yare iirā iiañorā. ¹⁰ Eropirā Goāmū magū Jesucristo ĩgū umusigue ariburiñe ōaro corerā āhrañorā,” arī werema guare. Jesure sīridigure Goāmū masupū. Eropigu Jesupu marire ñetariaro dipuwajacubonirāre taudigu āhrimi.

2

Pablo Tesalónicaque ĩgū buherare wereñumi

¹ Mua pohro gua árīrā eropa árīcārā iibirabū. Muare ōaro itamurā árīmurabū gua. Irire ōaro masia mua, gua acawererā. ² Ero core Filipino maca gua árīrā ñero taribū. Guare ñero erā iirare masia mua. Guare erā eropa ñero iiquerecū ta Goāmū itamuri mera güiro mariro Goāmū yare ōari buherire wereniguirā gua ejabū mua pohroguere. Mua árīro sāre guare masa bajarā erā ĩhaturiquerecū ōari buherire buheabū gua muare. ³ Eropirā mua pohro árīrā muare gua werera ōaro diaye majare buheabū gua muare. Eropa wererā muare ñero iidiarā árībirimurabū gua. Muare guyadiarā buhebirimurabū gua muare. ⁴ Goāmū gamero dopa ta buhea gua. Ōari buherire buhemorāre Goāmū beyemi guare. Eropa beyegu ĩgū ya buherire guare weredoremi. Eropirā masa guare erā ĩhasuaburire buherā iibeaa gua. Goāmupū guare ĩgū ĩhasuaburire ĩgū yare buhea gua. Goāmū mari pepirire dohpa mari iidiarire ōaro masimi. ⁵ Eropirā gua muare ōari buherire wererā gajinore amarā ejabirimurabū. Eropirā werenigui guyarā iibirimurabū gua muare. Eropirā gua buherā muare niyerure aīmorā iibirimurabū. Irire gua mua pohro eropa ōaro iirare mua masia. Goāmū sã irire masimi. ⁶ Gua eropa buherā mua guare umupeoburire dorebirimurabū. Gajirā sãre eropa ne dorebirimurabū. ⁷ Gua Cristo ĩgū apinirā árīrā muare doremasiboaya. Ne eropa dorebirabū gua. Gua dorebirā majirāre nijisoro dopa ta muare ōaro iimurabū mahiri mera. ⁸ Eropirā muare ōaro gamerā Goāmū yare ōari buherire weremurabū gua muare. Gua basi ta árīpehrero gua iimasiburire muare itamumurabū. Gua mahirā mua árīcū eropa itamuabū muare. ⁹ Eropirā muare mahirā burigā itamumurabū. Irire guñaa mua, gua acawererā. Goāmū yare ōari buherire wererā árīrā, mua oparire serē garibobirimurabū muare. Eropirā gua basi

mohmemurabu gwa baburire wajatamorã. Eropirã umure, ñamigue sãre mohmemurabu gwa.

¹⁰ Eropirã òaro Goãmũ gamero iirã ñeri dipuwaja mariro diaye ta iimurabu mũare Jesu yarãre. Eropirã gwa mũa mera eropa queoro árĩrare masia mũa. Goãmũ sã irire masimi. ¹¹ Eropirã erã pagu ãgu porãre ãgu òaro were ãgu mucubiricũ iidiro dopa ta gwa mũa sãre árĩpehrerãre wererã mucubiricũ iiabũ mũare. Irire masia mũa. ¹² Goãmũ mũare ãgu opu árĩroque ãgu òatariaro árĩroque mũa árĩmorãre beyedigũ árĩmi. Eropirã mũa ãgu yarã árĩrã ãgu árĩro dopa ta òaro iiniguicãro gahmea, arĩmurabu.

¹³ Eropirã Goãmũ yare mũare gwa wererare mũa peerã òpa pepibu mũa: "Masa erã pepiri mera iri buheri árĩbeaa. Goãmũ ya buheri ta ãhraa," arĩ pepibu mũa. Irire mũa eropa pepicũ masirã mucubiria gwa. Eropirã Goãmũre sererã, "Õhaa," arãa gwa ãgure. Eropa ta ãhraa. Mũare gwa buheri, Goãmũ wereniguiriri diaye ta árĩri ãhraa. Eropigũ mũa Goãmũ yare ta peecũ ãgu ya buheri mera òaripure gohrotocũ iimi mũare. ¹⁴ Eropirã Jesucristo yarã mũa árĩcũ ãarã i yeba majarã Jesure gamebirãpu ñero iiañorã mũare. Mũa eropa wadiro dopa ta Judea yeba majarã sãre wayoro. Eroque sãre Jesucristore umupeorãre erã ya yeba majarã sã ñero iiañorã. Judio masa Jesure gamebirã erãre ñero taricũ iiañorã. ¹⁵⁻¹⁶ Mata judio masapu iribojegue majarã Goãmũ ya weremuhtanirãre wejẽmurinirã árĩma. Eropirã mari Opu Jesucristo sãre wejẽñorã erã. Eropirã erã Jesucristo yare gamebirã gwa sãre ñero ii cohãma guare erã ya yebare. Eropirã erã judio masa árĩbirãre erã dederebiriborore gwa erãre Goãmũ yare werecũ guare judio masa cãhmotamũrima. Goãmũ yare weredorebirima guare. Erã Jesu yarãre ãhaturi arĩmũrima. Erã eropiirare Goãmũ gamebirigohracãmi. Eropiro erã judio masa ñero iira dipuwaja wũaro árĩtuhaya. Erãre Goãmũ burigã dipuwaja moagucumi.

Pablo Tesalónica majarã pohroque dipaturi curigũ wadiaripũ

¹⁷ Gwa acawererã, mũa mera dohpaguere árĩbiriquererã ta mũare guñarã iiaa. Eropirã mũare burigã ãdiarã mũa pohroque wadiarabu gwa. ¹⁸⁻¹⁹ Bajasuburi yũhũ mũare ãagu wadiarabu. Watĩpu gwa wabodirore goroweoami. Eropirã gwa wabiricarabu. Guare mucubiricũ iirã mũa árĩcũ mũare ãdiarabu. Mari Opu Jesucristo i yebague dujaricũ turaro mucubirirãca mũa mera. Eropirã mucubirirã mũa mera Jesu core niguirãca. ²⁰ Eropa ta ãhraa. Mũare ãagu Jesupu

“Ōaro buhenirã āhraa mũa,” arĩgũcumi guare. Eropirã ãaro mucubirirãca gũa.

3

1-2 Eropii mũaare yoari boje gũa ĩabirã mũaare bũrigã peediarã irire guñarã Timoteore mũa pohrogue obeoabũ. Ĩgu mari acaweregũ Jesu yagũ Goãmũ pohro majagũ gũa mera ãari buherire buhegũ āhrimi. Eropirã ĩgũre obeoabũ Jesucristore mũa ãaro umupeoburire mũa mucubiriburi sãre. ĩgũre obeorã gũa seyaro Atena maca dujabũ. ³ Mũa Jesucristore umupeora waja gajirã mũaare ñero iiañorã. Eropirã mũa Jesu yare mũa cóãbiriboro dopa itamubure obeoabũ Timoteore mũa pohrogue. Mari Jesu yarã árĩãre eropa ta gajirã marire ñero taricũ iirãcoma. Irire masia mũa. ⁴ Mũa mera ero coreguere árĩã ãpa arĩ weretuhajabũ mũaare: “Mari Jesucristore umupeora waja gajirã marire ñero iirãcoma,” arĩ weretuhajabũ mũaare. Eropirã gũa werediro dopa ta erã ñero iima mũaare. Irire mũa ãaro masia. ⁵ Eropigũ mũaare mahitariagũ mũaare yoari boje ĩabigũ mũaare bũrigã peediabũ yũhũ. Eropigũ Timoteore obeoabũ yũhũ mũa Jesure umupeorire masibu. “Wafĩ mũaare ñero iidoreri,” arĩgũ, “Mũaare gũa buherare mũaague duhuri,” arĩgũ ĩgũre obeoabũ yũhũ.

⁶ Eropigũ dohpaguere Timoteo mũa pohrogue árĩdi gũa pohrogue dujarami. Eropa dujaragũ ãari querere guare wereami ĩgu. Jesure mũa ãaro umupeorare mũa gajirã mera ãaro mahira sãre ĩgu wereami guare. Eroparĩgu guare mũa ãaro guñara sãre wereami. “Erã sã mũaare bũrigã ĩadiama,” arĩ wereami ĩgu guare. ĩgu eropa arĩ werecũ peerã mucubiria. ⁷ Eropirã gũa dohpaguere ñero tarirã árĩquererã mũa Jesure ãaro umupeocũ peerã gũa mucubiria. ⁸ Jesure mũa ãaro umupeorare pee ĩgu yare mũa cóãbirirare peerã ãaro pepia gũa. ⁹ Eropa pepirã Goãmũ ĩaro gũa bũrigã mucubiria. Eropa mucubirirã Goãmũre serẽa, “Ōhaa,” arĩrã. ¹⁰ Eropirã gũa basi mũaare ĩaburire Goãmũre serẽniguia. Ũmuri ñamiri sãre serẽniguicãa. Mũaare ĩadiarã Jesucristo yare mũa ãaro masipehocũ itamudiaca ĩgũre mũa ãaro umupeonemoboro dopa.

¹¹ Goãmũ mari Pagũ ĩgu basi mari Opũ Jesu mera guare itamuporo mũa pohrogue gũa waburire. ¹² Eropigũ mari Opũ Jesu árĩpehrerã mũa mera majarãre árĩpehrerã gajirã sãre mahinemoburire iiporo mũaare. Gũa mũaare mahi umupeodiro dopa ta mũa sã bũrigã mahinemocũ iiporo mũaare. ¹³ Mũaare ĩgu ãaro itamuri mera mũa dipuwaja

marirã ñeri marirã árĩrãca Goãmũ mari Pagũ ñacũ. Eropa ta árĩrãca mũa mari Opũ Jesu dujaricũ árĩpehrerã ñgu yarã òarã mera i yebague.

4

Goãmũre mucubiricũ iidiarã òpa iique, arĩ were gojañumi Pablo

¹⁻² Dohpaguere Jesu mari Opũ ñgu dorero mera mũare òpa werea: “Goãmũre mucubiricũ iidiarã òpa iique,” arĩ buheabũ gũa mũare. Gũa eropa buhera pũhrũ gũa buhediro dopa ta iayoro mũa. Iri buherire òaro masia mũa. Eropirã mũa Goãmũ yare òaro iirã ãhraa. Eropirã mũa eropa iidiro dopa ta duhubirã ta. Mũraro ta iinemoque daja. Irire bũrigã werea mũare.

³ Irire mũare werenemogũra. Mũa òpa árĩcũ gahmemi Goãmũ. Ñerire iibirã Goãmũ yare iirã árĩque. Eropirã nome mera ñero iiro mariro árĩque mũa ũama. Mũa nome sã ũama mera ñero iiro mariro árĩque. ⁴ Ñero iibiraro mariro umupeori mera mũa marasã nomere opaque. Mũa irire masicũ gahmemi Goãmũ. ⁵ Goãmũre gamebirã Goãmũre masibirã ñerire uaribejarã nomere erã gamero dopa ta iibiricãque mũa. ⁶ Òpa ta mũa iibiricũ gahmemi Goãmũ: Ne yujugũ mũa acaweregũ marapore yajabiricãporo. Eropa yajagũ ñgu acaweregũre umupeobigũ iimi ñgu. Eropigũ eropa iigũre mari Opũ iri ñerire ñgu ya dipuwaja moabu árĩgu tiimi. Eropirã mũare gũisãrã irire wereabũ mũare. ⁷ Ñerire pepimorãre, ñerire iimorãre beyebirimi marire Goãmũ. Ñerire iibirimorãre òarire iimorãre beyemi Goãmũ marire. ⁸ Eropigũ òarire mari iimorã árĩcũ ñgu Espĩritu Santo odigũ árĩmi marire. Eropirã iri ñerire iibiricãro gahmea. Eropigũ yujugũ i gũa wererare yũhribigũ Goãmũ yapũ sãre yũhribigũ ãhrimi.

⁹⁻¹⁰ Mũa acawererãre, Jesu yarãre mũa game mahiburire Goãmũ mũare buhetuhajami. ñgu eropa buhecũ mũa diaye ta Jesu yarãre Macedonia majarã sãre árĩpehrerãre òaro mahi umupeo waĩcũa. Mũa eropa mahicũ peegũ “Mũa acawererãre mahique,” arĩ buhebeaa daja mũare. Eropigũ òpa dorea daja yũhũ. Mũa gajirãre mahiro dopa ta erãre mahinemoque. ¹¹ Eropirã mũa basi game ñhaturiro mariro árĩque. Gajirãre gajiropa arĩ wereniguibiricãque. Eropa ñacãque erãre. Eropirã mũa ya mohmeripũre òaro mohmeque. Ero coregue ta mũare eropa iidoreabũ. ¹² Mũa eropa mohmerã gajirãre barire amasome. Eropirã erã mũare òaro wereniguirãcoma.

I yebaguere Jesucristo ĩgu dujariborore werepu Pablo

¹³ Jesure gamebirã Jesu pohroguere wasome. Eropirã erã mera majarã erã sĭricũ ĩarã burigã bujawerema. Sĭrinirã mura erã waborore diaye ta oaro mua masicũ gahmea gua. Gajirã erã bujawerediro dopa mua bujawerebiriboro dopa muare masicũ iidiaa. ¹⁴ Jesu ĩgu sĭrira puhru masa muriadigu arĩmi. "Iri diaye ta ahraa," arãa mari. Eropa arĩrã arĩrã i sãre "Diaye ta ahraa," arãa mari. Goãmupũ ĩgu yarã sĭrinirã murare erã masa muriacũ Jesu mera aricũ ĩigucumi. Iri sãre "Diaye ta ahraa," arãa mari.

¹⁵ Mari Opũ ĩgu buhediro dopa ta ire werea. Jesucristo ĩgu dujaricũ ĩgu yarã ojocarirã sĭrinirã core masa muriamũhtasome. Sĭrinirã murapũ ojocarirã core masa muriamũhtarãcoma. ¹⁶ Opa arĩroca Jesu ĩgu dujaricũ: Mari Opũ ĩgu basi dijarigucumi umusigue arĩdigũ. Dijarigu busuro mera werenigui, doregucumi. ĩgu dorecũ ĩgu anyua opũ burigã piyugucumi. Eropa ĩgu piyucũ Goãmũ ya corneta busumũriroca. Erã eropiicũ Cristore umupeonirã sĭrinirã mura masamuria mũhtarãcoma. ¹⁷ Erã puhru mari ojocarirãre sĭrinirã masanirã mera Goãmũ aĩ muriagucumi. ĩgu eropa iicũ mari Opũ Jesure bocatĩrirãca mari. Eropirã mari Opũ Jesu mera arĩniguicãrãca. ¹⁸ Eropirã i yũ wererare mua mera majarãre wereque. Eropa arĩ wererã mucubirirãca mua arĩpehrerã. Mari Opũ Goãmũ ĩgu wereri ta ahraa i.

5

¹ Jesu ĩgu dujariburinũre "Inuri arĩcũ ĩgu dujarigucumi," arĩ muare were gojabeosome. ² ĩgu dujaririnũre marire masima masiya mara. Yajari masũ ñamigue guñaña mariro ĩgu yajagu ariro dopa ta i yebaguere mari Opũ guñaña mariro dujarigucumi. Iri sãre masia mua. ³ Eropirã masapũ "Dohpaguere mari oaro arĩcãa. Guhyari mara marire," erã eropa arĩ pepirisubu mata ñero waroca erãre. Ero eropa wacũ ne nohogue gohra duhri wiria masisome. Dederea warãcoma. Niji wahgũgo guñaña mariro igo pũriro pepiro dopa guñaña mariro eropa waroca masare Jesu ĩgu dujaricũ. ⁴ Yũ acawererã, mupũre eropa wasome. Yajari masũ wihi opũre ĩgu ucudiro dopa ta mupũre eropa wasome. Jesu arigu muare ucusome. Naitĩarore erã ĩha masibiro dopa gajirã Jesure ne masibeama. Mupũ erã iro dopa arĩbeaa. ⁵ Mua arĩpehrerã Jesu yarã ahraa. Eropirã boyorore erã ĩha masiro dopa ta Jesu ĩgu ariborore masia mua. Gajirã ĩgũre masibirã iro dopa arĩbeaa mua. Eropirã ucasome ĩgu dujaricũ. ⁶ Eropirã carĩrã iro dopa arĩbircãro

gahmea. Ōaro pee masirā āhri Goāmũ yare ōaro pepiro gahmea. Eropirā Jesucristo dujariborore ōaro corero gahmea. ⁷ Ŋamire carĩrā dopa árĩbircāro gahmea. Ŋamire mererā dopa árĩbircāro gahmea. ⁸ Ūmũre árĩro dopa ōaro pee masi árĩro gahmea. Eropirā marire watĩ ñero iidoreburire iibircāro gahmea. Surara gamewejẽgũ wagũ come suhriro saña, come sãpea peya ĩgũ cãhmotaboro dopa mari sãre watĩ ñero goroweoborore cãhmotaro gahmea. Őpa iiro gahmea watĩre cãhmotabure: Jesucristore “Diaye iigũ āhrimi,” arĩ umupeoniguicāro gahmea. Goãmũre masa sãre mahiniguicāro gahmea. Eropirā Jesu mera mari Goãmũ pohro mari árĩburire masi corero gahmea. Mari eropiirā ñero iibiriburire cãhmotarā árĩrāca. ⁹ ĩgũ dipuwaja moamorāre marire beyebiripũ Goãmũ. Jesucristo mari Opũ marire dipuwaja marimorāre, peamegue wabonirāre ĩgũ taumorāre beyepũ marire. ¹⁰ ĩgũ Jesu mari ya árĩburire ta sĩribasadigũ árĩmi ĩgũ mera mari árĩburire. Eropirā ĩgũ dujaricũ ojocarirā árĩrā sĩrinirā sã yujuropa ta ĩgũ mera árĩrāca mari ĩgũ yarā árĩrā. ¹¹ Eropirā mũa mera majarāre dohpague mũa mucubiricũ iidiro dopa ta mũa basi mũa mucubiricũ iique daja. Eropirā mũa basi ta Goãmũre umupeonemocũ iique mũa mera majarāre Goãmũ yare wererā.

Jesu yarāre Pablo weretuñumi

¹² Jesucristo yare buherā mũa ōaro iiburire wererā āhrima mũa pohro. Erāre mari Opũ Jesucristo buhedoregu beyeñumi. Erā ĩgũ beyenirā árĩcũ ōaro umupeoque erāre. Mũa erāre eropa umupeocũ gamegũ bũrigā dorea mũare. ¹³ Erā mohmerire erā iicũ erāre mahiri mera ōaro umupeoque. Eropirā gamequeāro mariro árĩrā gahmea.

¹⁴ Gũa acawererāre, mũare, ōpa bũrigā werea daja. Mohmediabirāre mohmedoreque mũa. Duhudiarāre “Goãmũ itamuri mera duhubiricāque,” arĩque erāre. Jesure merogā umupeorā sãre itamuque. Erā mata pee masibiricũ ĩha guabiricāque erā mera.

¹⁵ Yujugũ mũare ĩgũ ñero iiquerecũ mũaapũ dipaturi ĩgũre ñero ii gamebiricāque. Mũa mera majarāre árĩpehrerā gajirā sãre ōaro mera umupeoque.

¹⁶ Eropirā ƣmũri nƣcũ Goãmũ mera eropa mucubiriniguiicāro gahmea mũare. ¹⁷ Eropirā Goãmũre eropa serēniguicāro gahmea. ¹⁸ Mũa ōaro tarirā, mũa ñero tariquererā Goãmũre “Ōhaa,” arĩro gahmea. Goãmũre “Ōhaa,” arĩrā, Goãmũ ĩgũ gamediro dopa ta iirāca mũa Jesucristo yarā árĩrā.

19 Eropirã Espíritu Santo mũare ãgu wererire yuhribirã áribiricãque. 20 Espíritu Santo ãgu masiri mera gajirã mũare buheama. Erã eropa buhecũ erã buherire gamebirã áribiricãque. 21 Eropirã gajirã mũare gajiropa erã arĩ buhecũ iri Goãmũ ya áribiricũ masique mũa. Eropirã Goãmũ ya buheri iri árĩcũ sãre masique mũa. Eropirã ðari dihtare gameque. 22 Eropirã iri ñerire árĩpehreri ñerire gamebiricãro gahmea.

23 Eropigu Goãmũ marire ðaro iirã árĩcũ iigu áhrimi. Ìgu ãgu basi mũare ãgu yarãre mũa ðarã ñeri marirã árĩcũ iinemoporo mũare. Mũa dupũ sãre mũa síporã sãre ðaro íhadibuporo mũare. Mari Opũ Jesucristo i yebaguere ãgu dujariboro core Goãmũ mũare ðaro íhadibuporo mũa ñerire iibiriboro dopa. Ìgu eropa iicũ Jesucristo dujaricũ ñeri marirã árĩrãca mũa. 24 Eropa ta iigucumi Goãmũ. Ìgu mũare beyedigũ ãgu arĩdiro dopa ta iimi.

Pablo erãre ðadorebeõumi

25 Gũa ya ðaro áriburire Goãmũre serẽbasaque mũa sã, gũa acawererã.

26 Jesu yarãre bocatĩrirã árĩpehrerãre mahiri mera mo-joto ñeaque mũa.

27 Jesu mari Opũ ãgu doreri mera mũare werea yuhũ. Árĩpehrerã Jesu yarã gamenererãre ipũre buheque mũa.

28 Jesucristo mari Opũ ãgu mahiri mera mũare burigã ðadorea. Eropa ta árĩniguicãporo. Iripẽta áhraa.

2 Tesalonicenses

Pablo ïgu mera majarã mera gojabeoñumi daja Jesu yarã Tesalónica majarãre

¹ Yũhũ Pablo, Silvano mera, Timoteo mera ipũre mũare gojabeogu iiaa. Mũa Tesalónica majarã mari Pagũ yarã ãhraa. Mari Opũ Jesucristo yarã ãhraa mũa. ² Eropigu mari Pagũ Goãmũ, Jesucristo mari Opũ mera mũare õadoreaa. Ïgu itamuri mera õaro árĩque mũa.

I yebaguere Jesucristo dujarigu dipuwaja moagũcumi, arĩ gojañumi Pablo

³ Mũa Jesucristore “Diaye ta iigu ãhrimi,” arĩ umupeorã umupeonemorã árĩ waĩcuabũ. Eropirã mũa gajirãre mahi umupeorã turaro mahi waĩcuabũ. Mũa eropa árĩcũ pee Goãmũre õaro mera serẽro gahmea gũare. “Mũhũ erã mera õaro iiaa,” arĩro gahmea Goãmũre. ⁴ Mũa Jesure umupeora waja gajirã mũare erã ñero iiquerecũ mũa ñero tariquererã Jesure umupeonigui waĩcuabũ. Ïgũre umupeorã duhubirã waĩcuabũ. Mũa eropa iicũ pee mucubiriri mera werea gũa gajirãre Goãmũ yarãre. ⁵ Eropirã mũa Jesure umupeora waja gajirã mera ñero tariquererã Goãmũre umupeonigui icã waĩcuabũ. Goãmũrupũ diaye iigu ãhrimi. Eropigu ïgu mũa ïgũre eropa umupeocũ ïha ïgu Opũ árĩroguere wadoregũcumi mũare.

⁶ Ïgu Goãmũ diaye iigu árĩgu gajirãpũre mũare ñero iinirãpũre erãpũre ñero taricũ iigũcumi Goãmũ. ⁷ Eropigu mari ñero tarinirãre marire soocũ iigũcumi mari Opũ Jesu dujarigu. Ïgu dujarigu anyua turarã mera peame ãjũro iro dopa dehyoagu arigũcumi mũarogue. ⁸ Eropa arigu Goãmũre masibirãre erã ya dipuwaja moagũcumi. Mari Opũ Jesucristo ïgu õari buherire tarinũganirãre dipuwaja moagũcumi erãre. ⁹ Eropirã erã erã ya dipuwaja dedererãcoma. Peamegue ñero tariniguirãcoma. Eropirã erã mari Opũ Jesu ïgu dorerogue ïgu õari árĩroguere ne wamasisome. Eropa ta waroca irinũre Jesucristo ïgu dujaricũ. ¹⁰ Irinũ ta ïgu aricũ ïgu yarã ïhamariarã “Diaye ta turagu, õagu ãhrimi,” arĩ wereniguirãcoma. Eropirã ïgũre õaro peenirã ïgũre ïarã umupeorãcoma õaro ïgũre. Mũarũ Jesu yare gũa buherare õaro peeabũ. Eropirã mũa sã ïgu mera árĩrãca.

¹¹ Eropirã Goãmũre serẽniguica gũa mũa ya árĩburire. Õpa arĩ Goãmũre serẽbasaa ïgũre mũare itamudorerã.

“Erã m̄ beyenirã m̄ árĩro dopa ta erã árĩcũ iique,” arĩ serẽbasaa. “Goãm̄, m̄ doreri mera erã õaro iidiarire erã iicũ itamuque. Erã m̄re umupeorã m̄ gamerire erã iicũ iique,” ḡua arĩ serẽbasaa Goãm̄re. ¹² M̄ua eropa Goãm̄ gamerire iicũ ãha gajirã sã umupeorãcoma mari Op̄u Jesucristore. Eropiḡu Jesucristop̄u m̄are õaro ãaḡucumi. Eropiḡu Goãm̄ marire mahiḡu ḡua arĩ serẽbasaro dopa ta iiḡucumi mari Op̄u Jesucristo mera.

2

Ñeri mera masare weresãḡu dehyoaḡucumi, arĩ gojañumi Pablo

¹ Dohpague mari Op̄u Jesucristo i yebaguere ãḡu dujariborore werenemodiaca yũh̄u m̄are. ãḡure mari gamenere bocatĩriburire werediaca. Eropiḡu õpa arĩ burigã werea m̄are, ḡua acawererãre. ² Gajirã m̄are õpa arĩbocoma: “Mari Op̄u ãḡu dujariburin̄u, pehrerin̄u árĩrogue iiaa,” arĩbocoma m̄are. Erã eroparĩcũ peerã pee ãcabiricãque. Eropirã peerã peewisibiricãque. “Goãm̄ ȳre eropa ta arĩdi árĩmi,” arĩbocumi m̄are gajiḡu. Gajiḡu sã m̄are buheḡu eropa ta arĩbocumi. Gajiḡu sã eropa ta arĩ gojabeobocumi, “Yũh̄u Pablo ta ãhraa,” arĩ ḡuya gojabeoḡu. Irire m̄are wereḡure masibea yũh̄u. ³ Eropirã gajirã m̄are ḡuyacũ ne peebiricãque. Irin̄u Jesucristo dujariburin̄u arĩboro core õpa waroca. Bajarã masa Goãm̄re cóãrãcoma. Eropiḡu ñeri mera masare weresãḡu dehyoam̄htaḡucumi. ãḡu dederebu árĩḡu ãhrimi. ⁴ ãḡu Goãm̄re umupeorire, goãmarã sãre umupeorire gamebiḡucumi. ãḡu dihtare umupeodoreḡu “Árĩpehreri weca op̄u ãhraa yũh̄u,” arĩḡucumi ãḡu. Eropiḡu ãḡu Goãm̄ ya wihi doaḡu, “Yũh̄u ta Goãm̄ ãhraa,” arĩḡucumi ãḡu masare ãḡure umupeodoreḡu.

⁵ Yũh̄u m̄ua mera árĩrasubure irire ta wereb̄u. ¿Irire guñari m̄ua? ⁶ Dohpaguere ãḡure ñeri mera masare weresãḡure árĩdorebeami dohpa. ãḡure árĩdorebiḡure masica m̄ua. Queorin̄u árĩcũ ãḡu ñeri mera masare weresãḡu dehyoaḡucumi. ⁷ Dohpaguere ãaro mariro ãḡu ñerire mohmen̄gatuhajacumi. ãḡu ñeri iidiarire árĩpehrerire iimasibeami dohpa. ãḡure árĩdorebiḡu ãḡu wara p̄hr̄u árĩpehrerire ñerire iiḡu ãḡu ñeri mera masare weresãḡu dehyoaḡucumi. ⁸ Eropiira p̄hr̄u mari Op̄u Jesucristo ãḡu wereniḡuri mera ãḡure wejẽcãḡucumi. Eropiḡu Jesup̄u dujariḡu ãḡu dehyoari mera ãḡure wejẽ dedecãḡucumi ãḡure. ⁹ ãḡu ñeri mera masare weresãḡup̄u watĩ dorero

mera arigu baja deyoro moaro dopa árĩrire ii gũyagũcumi masare. ¹⁰ Ĩgu eropa árĩpehrerire ii gũyacũ peamegue wamorãpũ ĩgũre peerãcoma. Erã diaye árĩrire gamebirã àhrima. Erã eropa gamebircũ Goãmũ erãre dederemorãre tausome. ¹¹ Eropigu diaye árĩrire gamebirãre Goãmũ erãre gũyaripũre peecũ iigũcumi. ¹² Goãmũ árĩpehreri diaye árĩrire peediabirinirãre, ñerire iidianirãre erã ya dipuwaja moagũcumi.

Goãmũ mũapũre beyeñumi ĩgu taumorãre, arĩ gojañumi Pablo

¹³ Acawererã, mari Opũ mahirã, matague ta Goãmũ mũapũre dederebonirãre ĩgu taumorãre beyepũ mũare. Mũa Espĩritu Santo itamuri mera ñeri mariro mũa árĩmorã sãre beyepũ. Mũa ĩgu yare peemorã árĩmorãre beyepũ. Eropirã ĩgu mũare beyerare guñarã Goãmũre serẽrã “Õhaa,” arĩniguicãro gahmea gũare. ¹⁴ Eropigu iri õari buherire gũa buhera mera Goãmũ mũare ĩgu yarã árĩcũ iimi mari Opũ Jesucristo ĩgu õari oparire mũa sã opaboro dopa.

¹⁵ Eropirã õaro guñaturarã árĩque mũa. Eropirã gũa wereniguiiri mera gũa gojabeorapũri mera iri buherire õaro guñaque mũa. Eropirã iri buherire tarinũgabircãque. ¹⁶ Mari Opũ Jesucristo ĩgu basi Goãmũ mari Pagũ mera marire mahigu, mũmuri nũcũ marire mucubircũ iimi. Marire mahigu peamegue wabonirãre taugũcumi marire. Eropirã Goãmũ ĩgu tauborore õaro masi mucubiria mari. ¹⁷ Eropigu Jesucristo mari Pagũ mera mũare sĩporã turaniguicũ iiporo. Eropigu mũa ĩgu yare duhubircũ iiporo. Árĩpehreri õari iirire õari wereniguiiri sãre mũare iicũ iiporo.

3

Gũa ya árĩburire Goãmũre serẽbasaque, arĩ gojañumi Pablo

¹ Acawererã, dohpague gũa ya árĩburire Goãmũre serẽbasaque. Mari Opũ buheri cãhmotaro mariro bajarã masare buheburire serẽbasaque. Eropirã ĩgu buherire mũa õaro gamediro dopa ta gajirã bajarãpũ iri buherire umupeori mera erã gameboru dopa serẽbasaque mũa Goãmũre. ² Gajirã Jesure umupeobeama. Eropirã erã Jesure umupeobirã ñerã masa gũare erã ñero iidiarire Goãmũre serẽbasaque gũare ĩgu itamuboro dopa. ³ Mari Opũ õagũ ĩgu werediro dopa ta iimũrimi ĩgu. Eropigu mũare ĩgũre umupeocũ iigũcumi. Eropigu mũa ñero

iibiriburire ĩġu m̄are c̄ahmotagucumi. ⁴ ĩġu m̄are ĩġu eropa c̄ahmotarare masia ġua. Eropir̄a m̄are ġua dorediro dopa ta iiaa m̄ua. Eropir̄a irire iir̄aca daja m̄uraro ta. Iri s̄are masia ġua. ⁵ Eropiġu mari Op̄u Gōamu ĩġu m̄are mahirire m̄are masic̄ũ iiporo. Eropiġu Cristo ñero taririsubu ĩġu s̄ipor̄a turadiro dopa ta m̄ua s̄are s̄ipor̄a turaniguic̄ũ iiporo mari Op̄u.

Marire turaro mohmero gahmea, ar̄i gojañumi Pablo

⁶ Jesucristo mari Op̄u ĩġu dorero mera õpa dorea m̄are: M̄ua Jesu yar̄a mera majar̄a mohmediabir̄are ġua dorerire iibir̄are wapic̄ubiric̄aro gahmea. Eropa ĩac̄aque er̄are. ⁷ Sohõ ar̄irasubu m̄ua mera ġua ar̄irasubure ġua turaro mohmec̄ũ ĩabu m̄ua. Eropir̄a ġua iidiro dopa ta m̄ua s̄are mohmero gahmea. M̄ua basi irire õaro masia. ⁸ Eropir̄a m̄ua barire waja mariro ne babirabu. Eropir̄a um̄ari n̄acu, ñamiri s̄are buriḡa mohmem̄urabu ġua m̄are barire ser̄eri ar̄ir̄a. ⁹ ġua m̄are buhera waja m̄are wajayedoreboaya ġua. Wajayedorebir̄a ġua basi buriḡa mohmeabu m̄ua ġuare ĩhac̄uburire. ¹⁰ M̄ua mera ar̄irasubu õpa ar̄i buheabu m̄are: “Mohmebiġu babiric̄aporo,” ar̄i buhem̄urabu ġua m̄are. ¹¹ Yujur̄ayeri m̄ua mera majar̄a ne mohmebirañor̄a. Eropir̄a gajir̄are ser̄er̄a garibotariañor̄a er̄a. ¹² Eropir̄a mohmediabir̄are mari Op̄u Jesucristo dorero mera õpa ar̄a: “Er̄a yare ĩha er̄a basi mohmeporo er̄a baburire,” ar̄a yuh̄u.

¹³ ġua acawerer̄a, m̄uapu õarire iiniguir̄a gariborebiric̄aque. ¹⁴ Eropir̄a ero majar̄a yujuḡu ire ġua gojabeo dorerare tarinugac̄ũ ĩha masi ĩġure wapic̄ubiric̄aque. ĩġu ñero iira mera ĩġu ġuhyas̄iuro pepiboro dopa ĩġure wapic̄ubiric̄aque. ¹⁵ ĩġure wapic̄ubiriquer̄a ĩġure ĩhaturibiric̄aro gahmea. ĩġu m̄ua acawereġu Jesu yaḡu ta aħrimi. Eropir̄a ĩġu tarinugagure õaro wereque ĩġure ĩġu dipaturi irire iibirimaja õaro dopa.

Pablo gojatuñumi

¹⁶ Mari Op̄u marire õaro ar̄ic̄ũ iiḡu mera um̄ari n̄acu õaro ar̄ique m̄ua. Eropiġu “Mari Op̄u m̄ua ar̄ipehrer̄a mera ar̄iporo,” ar̄iġu m̄are õadorea.

¹⁷ Dohpaguere yu basi ta gojatuḡu iiaa. Eropiġu m̄are õadorea. Ar̄ipehreri p̄urire yu gojabeori p̄urire õpa ta ar̄i gojatuhaa yuh̄u. Eropa gojatura puhru yu basi irip̄ure ar̄i gojaḡu ar̄ic̄ũ masir̄aca m̄ua. ¹⁸ Mari Op̄u Jesucristo ĩġu mahiri mera buriḡa õadorea m̄are ar̄ipehrer̄are. Eropa ta ar̄iniguic̄aporo. Irip̄eta aħraa.

1 Timoteo

Pablo Timoteore gojabeopu

¹ Yuhu Pablo mure Timoteore ire gojabeogu iiaa. Goamu marire peamegue wabonirãre taudigu ahrimi. Jesucristo yare buhedoregu igu apidigu ahraa yuhu. Mari Pagu Jesu mera igu doreldiro dopa igu apidigu ahraa. Jesu ta marire itamumi. Eropirã marire igu tauborore masirã irire mucubiri cohrea mari. ² Yuhu mure Jesucristo yare buhecũ peegu Jesure umupeonugabu. Eropigu muhu diaye ta yu magu iro dopa arigu ta ahraa. Eropigu Goamu mari Pagu mera, mari Opu Jesucristo mera õadoreã mure. Eropigu igu itamuri mera õaro arique muhu.

Pablo guya buherire buhedorebiripu

³ Sohõ arĩrasubure Macedonia yebague wagu mure Efeso macague api tari wahgãbu. Ero yujurãyeri gaji buherire guya buherã arĩma. Iri buherire buhedorebiribure apibu yuhu mure. ⁴ Erã guyarã erã gamero buhemaacãma. Erã acawererã iribojegue majarã erã arĩ bocarare eropa buheniguicãma. Iri buheri mera gajirãre dũyasocũ iima. Eropirã Goamu igu dorerare gajirãre iicũ iibeama erã eropa buherã. "Goamu yure itamugucumi," arĩ umupeorã igu dorerare iima. Eropigu erã gamero buhedorebiribure apibu yuhu mure.

⁵ Goamu õpa gahmemi. Neri dipuwaja mariri mera, õari guñari mera, diaye Jesucristore umupeori mera, gajirãre mari mahi umupeoburire gahmemi. Irire erã iiboro dopa apibu mure. ⁶ Erã yujurãyeri i õari buheripure cóãtuha gaji buheripure gahmema daja. Eropirã iri buheripure dũyaso gorowerema. Iri erã buheri erã game dũyasori duhpiburi arĩbeaa. ⁷ Erã Moise dorerire masare buherã arĩdiaquererã ta erã basi ne õaro masibeama. Eropirã gũhyadiaro mera buhequererã erã buherire ne masibeama erã.

⁸ Moise dorerire diaye ta mari buhecũ õari doreri ahraa. Irire mari õaro masia. ⁹ Iri dorerire buherã ire masiro gahmea: Iri doreri õaro iirãre erãre buheburi arĩbeaa. Nero iirãpãre erãre buheburi ahraa. Õpa ta iirãre buheburi ahraa: Dorerire tarinugarãre, Goãmure tarinugarãre, ñeri dihtare iirãre, Goãmure gamebirãre, ñero werenigui corerãre, erã pagu sumarãre wejẽrãre, erã pago sã nomere wejẽrãre, gajirã masare wejẽrãre, ¹⁰ nome mera ñero iirãre, uma mera ñero iirã nomere, uma seyaro ñero iirãre, nome seyaro arĩquererã ñero iirãre,

masa porãre yaja duarãre, guyaricurãre, Moise dorerire erãre buheburi ãhraa ii. Eropiro gajirã árĩpehrerãre òari buherire tarinugarãre buheburi ãhraa Goãmũ ĩgu doreri. ¹¹ Goãmũ òagũ ĩgu òari buheri mera iri ñeri iirare cóãdoremi. Iri buheripũre yũre Goãmũ buhedoremi.

Goãmũ ĩgu marire mojomoro ĩarire wererũ Pablo

¹² Eropa yũ buhecũ, Jesucristo mari Opũ turarire ĩgu ogũ itamumi. "Pablo òaro buhegũcumi yahare," arĩ pepiñumi Jesu yũre. Eropigũ yũre beyegũgue ta ĩgũre itamubure apimi yũre. ĩgu eropa iicũ "Õhaa," arãa yũhũ ĩgũre. ¹³ Iribojegue yũ Jesucristore ñero wereniguiquerecũ ta, ĩgu yarãre ñero iiquerecũ ta ĩgu yũre beyemi. Eropigũ ĩgũre masinibigũ ĩgu yarãre ñero iigu "Ñero iigu iica," arĩ pepibirimũricarabũ. Yũ eropa masibiricũ ĩagũ ĩgu mojomoro ĩami yũre. ¹⁴ Eropigũ Goãmũ mari Opũ yũre burigã mahigũ òaro iimi yũre. Eropigũ Jesucristore umupeocũ iimi ĩgu yũre. Eropigũ ĩgũre masa sãre mahicũ iimi yũre.

¹⁵ Yũ gajirã tauro ñetariagũ árĩribũ. Ñerã mari árĩquerecũ ta Jesucristo mari ñerire cóãbu i yebaguere eramĩ. Marire peamegue wabonirãre taubu eramĩ. Iri diaye ta ãhraa. ĩgu eropa árĩgu árĩcũ árĩpehrerã irire masiporo. ¹⁶ Ñetariagũ yũ árĩquerecũ ta ĩgu yũre mojomoro ĩami. Eropa mojomoro ĩagũ Jesucristo guaro mariro, ĩgu yũre òaro iirare masicũ iigu iimi. Pũhrũ ĩgũre umupeomorã erã sã ĩgu òaro mojomoro ĩaburire erã masiboro dopa òaro iimi yũre. ĩgũre eropa umupeorã árĩpehrerinũri umaroguere eropa òaro árĩniguicãrãcoma. ¹⁷ Goãmũ árĩpehrerinũri masa tauro opũ ãhrimi. ĩgu ne sĩribeamĩ. Mari mera ĩgu árĩquerecũ ta ĩgũre ĩabeaa mari. Eropigũ ĩgu dihta Goãmũ gohra ãhrimi. Eropirã "Diaye ta òagũ, turagũ ãhrimi ĩgu," arĩrã ĩgũre. Umũri nũcũ ĩgũre umupeorã. Eropa ta iirã.

¹⁸ Timoteo yũ magũ iro dopa ta ãhraa mũhũ. Eropigũ dohpaguere ire mũre dorea. Jesu yarã Goãmũ ya weremũhtarã erã mũre werediro dopa ta mũre dorea. Cristo yare òaro wereniguique. Eropigũ ñero tariqueregu ta ĩgũre umupeo duhubiricãque mũhũ. ¹⁹ Jesure eropa umupeoniguicãque. Ñeri dipuwaja mariro árĩque. Eropigũ òari dihtare iique. Yujurãyeri irire iibirã Jesu yare erã cohãma. Eropa cóãrã ĩgũre umupeo duhucãma. ²⁰ Eropa ta iiaama Himeneo, Alejandro mera. Eropigũ "Watĩ ĩgu gamero erãre iiporo," arĩgu eropa apicãbũ erãre Goãmũre erã ñero wereniguinemobiriboro dopa.

2

Goãmure serēbasarire werepũ Pablo

¹ Dohpaguere õpa arĩ doremũhtaa mũare: Árĩpehrerã ya árĩburire Goãmure serēbasaque. Eropa serērã “Õhaa,” arĩque Goãmure. ² Oparã, gajirã masa tauro dorerã sãre, erã õaro doreburire Goãmure serēbasaque erãre mari õaro árĩricũ árĩboro dopa. Eropirã gamequeãro mariro ñeri marirã Goãmure umupeorã mari õaro árĩboro dopa erãre serēbasaque. ³⁻⁴ Eropa ta gajirã ya árĩburi sãre mari Goãmure serēbasacũ õapũricãa. Irire mari iicũ ãagu Goãmũ marire taubupũ marire õaro ãhasũami. Árĩpehrerã masa peamegue wabonirãre ãgu taumorã dihta árĩcũ gahmemi Goãmũ. Eropigu õari buherire diaye majare erã masicũ gahmemi ãgu. Eropigu gajirã ya árĩburire mari ãgure serēbasacũ mucubirimi Goãmũ. ⁵ Yujugũ ta ãhrimi Goãmũ. Eropigu Goãmũ mera mari õaro árĩcũ amubasagu yujugũ ta ãhrimi. ãgu ãhrimi Jesucristo. Jesucristo sã masũ ta ãhrimi. ⁶ Eropigu árĩpehrerã erã ñeri iira dipuwajare wajayebasadigu árĩmi ãgu crusague sĩridigu. Eropigu Goãmũ ãgu queorasubu masare ire masicũ iimi. ⁷ Masa masicũ iibure ãgu yare werebure irire Goãmũ yãre apimi. Eropigu judio masa árĩbirãre Jesure umupeoburire õari buherire buhebure beyemi yãre. Diaye ta mũre weregu iiaa yũhũ. Gũyabeaa.

⁸ Árĩpehrero majarãpũ Goãmũ yare õaro iirã Goãmure erã serēcũ gahmea. Eropa Goãmure serērã erã guaro mariro, game dũyasoro mariro erã árĩcũ gahmea. ⁹⁻¹⁰ Nomezũre Jesu yarã erã õaro árĩricũrĩre iicũ gahmea. Eropirã queoro erã ejatuharo suhri sañarã árĩporo. Eropirã gajiropa bejarĩ poaricũ “Yũhũ õago ãhraa,” arĩ ãhmubiricãporo. Eropirã õari dari oro dari waja pagari bũyarire, õari suhri waja pagari suhri sañarire guñabiricãporo. Eropirã õaro erã iira mera, erã õarã nome Jesu yarã nome erã árĩrĩre ii ãhmuporo. ¹¹ Ejarimarĩro umupeori mera peerã õari buherire peeporo erã nome. ¹²⁻¹⁴ Eropirã nome mũa gamenererogue mũare buhebircãporo. Eropirã mũare dorebircãporo. Erã nomezũ ejarimarirã nome árĩporo. Goãmũ Adãre ãhacũnugumũhtaũumi. ãgu pũhrũ Evare ãhacũnuguũumi. Eropigu watĩ ãgu gũyacũ peedigu Adãn árĩbiriũumi. ãgu gũyacũ peedigopũ Eva árĩũumo. Eropa ãgu gũyacũ peego Goãmure tarĩnũgago waũumo igo. Eropirã nomezũ mũare dorebircãporo. ¹⁵ Nomeo árĩmũhtadigo igo tarĩnũgaquerecũ ta nome erã porãre õaro

opacũ ĩagu erãre Goãmũ peamegue wabonirãre taugucumi. Eropirã nomepũ Goãmure erã umupeoniguicãcũ, Goãmũ erãre itamugucumi. Eropigu masare Goãmũ sãre erã mahiniguicũ pee masirã nome erã árĩniguicũ Goãmũ itamugucumi erãre.

3

Jesu yarã tauro oparã erã iiburire werepũ Pablo

¹ Jesu yarã doregũ árĩdiagu õarire iidiagu áhrimi ĩgu. Iri diaye ta áhraa. Eropigu Jesu yarã doregure apigu õpa árĩgũpũre beyeque. ² Dipuwaja marigure beyeque. Eropirã gajirã ĩgure weresã masiya mara. Eropigu yujugore ta marapocũgũ árĩgure beyeque. Eropigu õaro pee masigure, gũhyadiagure, masare õaro mera ĩgu wihire ñajaridoregure, gajirãre õaro buhemehregure beyeque mũa. ³ Eropa beyegũ ne merebigure, gamequeãbigure, masare õaro iigure, game dũyasobigure, niyerure gamebigure beyeque. ⁴ ĩgu porãre ĩgu marapo sãre ĩgure umupeori mera erã yũhrirã árĩcũ iigure beyeque Jesu yarãre dorebure. ⁵ ĩgu porãre ĩgu marapo sãre õaro yũhricũ iimasibigũ árĩgũ Goãmũ yarã sãre õaro yũhricũ iimasibiribocumi. ⁶ Jesu yarã opũ árĩbure beyegũ ne Jesu yagu ñajagure beyebita. Ne ñajagure beyecũ ĩgu “Jesu yarãre tauro áhraa yũhũ,” arĩ pepibocumi. ĩgu eropa arĩ pepicũ Goãmũ ĩgure dipuwaja moadorebocumi watĩre ĩgu iidiro dopa ta. Watĩ Goãmũ tauro árĩdiari waja Goãmũ ĩgure dipuwaja moapũ. Eropigu ne Jesure umupeogũ árĩgure beyebita. ⁷ Jesu yarã doregure beyegũ Jesu yarã árĩbirã “Õagu áhrimi,” erã arĩgũ dihtare beyeque erã ĩgure werewũabiriborore. Õaro iigu ĩgu árĩbircũ ĩarã gajirã ĩgure werewũabocoma. Eropigu ĩgu watĩ gamero dopa ta iigu árĩbocumi.

Jesu yarãre itamurã diáconoare erã iiburire werepũ Pablo

⁸ Eropirã Jesu yarãre itamurãpũre beyerã õarã árĩrã sãre beyeque. Erã gũhyadiaro árĩrãre, õaro diaye ta wereniguirãre, merebirãre, niyerure gamebirãre beyeque mũhũ. ⁹ Eropa ta Jesucristore õaro umupeorã “Goãmũ yare õaro diaye ta áhraa,” arĩrã árĩrãre beyeque. ¹⁰ Eropirã Jesu yarãre itamurã árĩdiarãre erã iirare ĩamũhtaque mũa. Mũa eropa ĩara pũhrũ erãpũ dipuwaja marirã árĩrã Jesu yarãre itamurã ñajaporo erã. ¹¹ Eropirã erã marasã nomepũ õpa árĩporo: Pee masirã nome, ñeri quere iibirã nome, gũhyadiarã nome árĩporo erã nome sã. Eropirã árĩpehreri

ōarire iiniguirã nome árīporo erã nome. ¹² Eropirã Jesu yarãre itamurãre beyerã yujurãyeri nome ta marapocurã árĩrãre beyeque. Erã porãre gajirã erã ya wihi majarã sãre ōaro ñhadiburã árĩrãre beyeque. ¹³ Mũ eropa beyenirã Jesu yarãre ōaro erã itamucũ gajirã erãre ōaro ñhasuarãcoma. Eropirã ōari buherire, Jesucristore erã umupeoburi sãre güiro mariro buherãcoma erã.

Goãmũ ya buherire werepũ Pablo

¹⁴⁻¹⁵ Dohpaguere mũ pohrogue wadiagu iiraa. Eropa wadiaqueregũ dohpaguere wanibigu ipũ mera mũre were gojabeogu iiaa. Jesu yarã gamenererã watope mũa dohpa iiborore mũre were gojabeogu iiaa, "Dohparagãre wabiri-boca," arĩgũ. Jesu yarã Goãmũ ojocarigu yarã ãhrima. Īgũ yarã diaye árĩri buherire Goãmũ ya buherire ōaro opama. Eropa oparã irire buheniguima. ¹⁶ I diaye ãhrraa. Marire Goãmũ Īgũ buhera mari ōaro iiburi buheri ãhrraa. Goãmũ iri buherire marire masicũ iimi. Iribojegue mari masibirira mũra ōatariari buheri ãhrraa. I buheri ōpa ãhrraa:

Īgũ Cristo mari dũpũ iro dopa ta dũpũcũgũ masa de-hyoadigu árĩmi. Ōagu ñeri marigu Īgũ árĩcũ ñhmudi árĩmi Espĩritu Santopũ. Anyua sã ĩgũre ñanirã árĩma. Eropirã gũa ĩgũ buhedore apinirã gaji yeba majarãre ĩgũ yare buhebũ. Eropirã i yebare masa bajarã ĩgũre umupeoama. Pũhrũ ãmarogue Goãmũ añadi árĩmi ĩgũre. Iri ta ãhrraa ōari buheri.

4

Ōari buherire cóãrãcoma arĩ werepũ Pablo Timoteore

¹ Espĩritu Santo ire ōaro weremi: Pehrerinũ coregã yujurãyeri masa Jesu ya buherire cóãrãcoma. Eropirã gũyari buheripũre watĩ yare buherãpũre peenũrũrãcoma erã. ² Iri buherire buherã gũyaniguirã wererãcoma masare. Erã gũyaniguirãpũ "Gũa tamerare dipuwaja mara," arĩ pepirã árĩrãcoma. Erã ñero iirapũre ne guñasome. ³ Ōpa arĩ buherãcoma erã: "Marapocũbircãque. I barire babiricãque," arĩ buherãcoma erã. Erã eropa badorebiriqurercũ ta Goãmũ barire ñhacũnugudi árĩmi mari baburire apigu. Mari Cristore umupeorã árĩcũ ōari buherire mari masirã árĩcũ, mari ya árĩburire ōarire iri barire apipũ ĩgũ. Iri barire oparã ĩgũre "Ōhaa," mari arĩcũ gahmemi ĩgũ. ⁴ Árĩpehreri Goãmũ ĩgũ ñhacũnugura ōari ãhrraa. Eropirã ĩgũ ñhacũnugurare barire añrã. Goãmũre "Ōhaa," arĩrã, "Irire basome," arĩbircãro gahmea. Iri barire basũaro gahmea marire. Eropirã "Irire babiricãque," gajirã erã

arĩcũ peebiricãque erãre. ⁵ Īḡu ĩhacũnugura iri õari árĩcũ weretuhapũ Goãmũ. Eropirã ĩḡure “Õhaa,” mari arĩra pũhrũ “Iri bari õari bari ãhraa,” arĩ baro gahmea marire.

Jesu pohro majagu õagure werepũ Pablo Timoteore

⁶ I yũ wererare diaye majare Jesu yarãre buheḡu Jesu-cristo pohro majagu õagu ãhraa mũhũ. Eropa buheḡu õari buherire peenũrugũ árĩḡuca. Õaro mũ peerare peenũrũ masipehogũ árĩḡuca mũhũ. ⁷ Eropigũ eropa erã arĩ bocarare, Goãmũ ya maja árĩbirirare peebiricãque. Eropigũ Goãmũ gameri dihtare iiniguicãḡu árĩque mũhũ. ⁸ Mũ mohmepocũ õañaria. Mũ mohmepodiro tauro Goãmũ gamerire mũ iipocũ õataria mũre. Goãmũ gamerire iipogu dohpaguere õaro ãhraa mũhũ. Eropigũ mũ sĩrira pũhrũḡue sãre masa mũriagu õaro árĩḡuca mũhũ. Eropigũ Goãmũ gamerire iiniguicãque. ⁹ Iri diaye ta ãhraa. Árĩpehrerã irire yũ arĩrãre masirã, “Diaye ta ãhraa,” arĩro gahmea erãre. ¹⁰ Eropigũ árĩpehrerã yũ arĩrãre masirã “Diaye ta ãhraa,” erã arĩburire Goãmũ gahmemi. Eropirã erã eropa iiburire mari turaro mohmea. Eropirã ñero taria mari gajirã marire ñero erã iicũ. Goãmũ ojocarigu árĩpehrerãre peameḡue wabonirãre taugu ãhrimi. Īḡure umupeorã tamerare ĩḡu taumi. Goãmũ marire õaro iiburire masirã ĩḡure mucubirirã iiaa. Eropa mucubirirã Goãmũ gameripũre masa iiburire bũrigã buhe mohmea mari.

¹¹ Iri árĩpehreri yũ arĩrãre doreque Jesu yarãre. Eropigũ irire buheque mũhũ. ¹² Mamũ mũ árĩcũ ĩarã gajirã Jesu yarã mũre peediabiribocoma. Erã mũre peeboro dopa õpa ii ĩhmuque erãre: Masare mahique. Eropigũ Jesure umupeoturaniguicãque. Eropa árĩḡu dipuwaja marigu árĩque. Mamũ árĩquereḡu ta mũ irire iicũ ĩarã mũre peerãcoma erã. Eropirã mũ wereniguirire peerã, mũ iirare ĩarã mũre ĩhacũrãcoma. ¹³ Eropigũ mũ pohrogue yũ ejaboro core õpa ii õaro mohmeyuque. Jesu yarã gamenererãre Goãmũ yare gojarapũre buhe ĩhmuque erãre. Eropigũ erãre irire buhetuha werenemoque daja. Eropigũ erãre õaro masinemocũ iique. ¹⁴ Ero core Jesu yarã oparã Goãmũ dorecũ erãpũ mũ weca erã mojotorire duhpeoma. Erã mũre eropa duhpeocũ Goãmũ ĩḡu turarire odi árĩmi mũre. Eropigũ Goãmũ ya árĩburire mũ mohmemasiburire apidigu árĩmi mũre Goãmũ. Īḡu mũre eropa mohmemasiburire apirare cãdijibita.

¹⁵ Yũ eropa wererare ḡũña eropa iiniguicãque mũhũ. Mũ eropiira pũhrũ õarire mũ iinemocũ árĩpehrerã ĩarãcoma. ¹⁶ Mũpũ õaro iique. Eropigũ õaro buheque mũhũ gajiropa

buheri arĩgu. Mũhũ eropiigu ĩgu taudigu árĩgu Goãmu mera árĩniguicãguca. Eropirã mure peenirã sã ĩgu taunirã árĩrã Goãmu pohro árĩrãcoma.

5

“Jesu yarãre õpa iique mũhũ,” arĩpu Pablo Timoteore

¹ Ne buũgure turibiricãque. Mũ pagure mũ õaro iidiro dopa ta, buũgũ sãre õaro mera wereque. Eropigu mũ pagu porãre mũ õaro iidiro dopa ta, mamarã sãre õaro umupeori mera erãre wereque. ² Eropigu mũ pagore mũ õaro iidiro dopa ta mũrã nome sãre õaro umupeori mera wereque. Eropigu mũ pagu porã nomere mũ õaro iidiro dopa ta, nóme sãre ñero ɯaribejaro mariro õaro umupeori mera wereque erãre.

³ Eropigu wapeweyarã nomere diaye ta mojomorocurã nomere umupeori mera itamuque erã nome sãre. ⁴ Wapeweyo porãcũgo igo árĩcũ pãramerãcũgo igo árĩcũ sãre, erãpu igore itamuporo erã masura waja. Eropa itamurã Goãmu masare erã acawererãre ĩgu itamudoreldiro dopa ta iirã iima erã. Erã eropiicũ ĩagu õaro Goãmu mucubirimi. ⁵ Mojomorocũgo wapeweyo acawererã moogo árĩgo, Goãmu igore itamuburire cohremo igoa. Eropigo ñamiri nũcũ, ɯmũri nũcũ igo Goãmure eropa serẽniguicãmo. ⁶ Gajigopũ wapeweyo árĩgo eropa iimaacãgo árĩgo ojocarigo árĩquerego igo síporã dederebo síridigo iro dopa ta iimo. ⁷ Eropigu i árĩpehreri yũ werera wapeweyo itamuburire Jesu yarãre iidoreque mũhũ. Õpa wereque erãre õari dihtare erã iiburire gajirã erãre werewuabiriburire. ⁸ Eropigu yujugu ĩgu acawererãre ĩhadibubigu, ĩgu porã erã pago sãre õaro ĩhadibubigu “Jesu yagu áhrea,” arĩmasibeami. Goãmu doreldiro dopa iibeami. Eropigu Goãmu ya buherire yũhribigu áhrimi. Jesure gamebirã tauro ñetariagu áhrimi ĩgũpu.

⁹ Wapeweyarã nome mũa itamumorã árĩcũ erã waĩre gojaturãca. Mũa eropa gojaturã õpa árĩrãre erã waĩre gojatuque. Sesenta bojori ejabigo igo waĩre gojatubiricãque. Eropirã wapeweyo yujugu ta marapũcũdigore gojatuque. ¹⁰ “Īgo õarire iigo áhrimo,” masa erã arĩgore gojatuque. Eropirã igo porãre õaro masugo árĩdigore gojatuque. Eropirã igo ya wihire gajirãre õaro mera ñajaridoregore gojatuque. Eropirã pohro majago iro dopa Jesu yarãre itamugore ñero tarirãre itamugore, árĩpehrerãre mojomoro ĩagore, õari dihtare iidiagore gojatuque. Eropa árĩrãre ĩagu iripũ ta erã waĩre gojatuque mũa erã mũa itamumorã árĩborore.

11 Wapeweyarã nóme, nómeñari erã árĩcũ erã waĩre gojatubiricãque erã Jesu yarãre itamumorãre. Pũhrũ erã waĩre mũa gojatura pũhrũ erã gamero iidiarã Cristo yare duhu, dipaturi mojoto diribocoma. 12 Eropirã erã mojoto dirirã Cristore “Mũ yarãre itamugora,” erã arĩdirore iibiribocoma. Erã eropa iibirira dipuwaja dipuwajacurãcoma. 13 Erã nómeñari eropa itamurã árĩrã tericurã nome wahama. Eropirã wirigue ñajacurirã ñeri querere werenigui curima. Erã weredorebirirare werema erã nome. 14 Eropirã erã Jesu yarãre itamumorã ñajabiricãporo. Eropigũ erã õpa iicũ gahmea yũhũ: Wapeweyarã nome, nómeñari árĩrã mojoto diriporo daja. Eropirã erã porãcũporo. Eropirã erã ya wihi majare õaro ñhadibuporo. Erã nome wapeweyarã nome eropa ta iicũ marire Jesu yarãre ñhaturirã “Ñerire iirã iima,” arĩmasibeama marire. 15 Dohpague tamerare yujurãyeri nome wapeweyarã nome Cristo yare duhu wafĩ gameripũre iinũgatuhama. Eropigũ õpa werea mũre.

16 Jesu yarã erã acawerego wapeweyo igo árĩcũ erã igo acawererãpũ igore itamuporo. Gajirã Jesu yarãpũre igore itamudorebiricãporo. Eropirã erã Jesu yarã igore acawererã opagore itamubirã, gajirã nome wapeweyarã nomepũre itamumasima.

17 Jesu yarã oparãre erã mohmerire erã õaro iicũ ñarã umupeoque erãre. Eropirã õaro wajayeque. Yujurãyeri mũa mera majarã Goãmũ yare wererã mũare buherã sã ãhrima. Erã tamerare tauro umupeo wajayeque. 18 Goãmũ yare erã gojarapũgue mohmegũre mũa wajayeborore õpa werea: “Wecũ trigo yerire cãhratĩacũ ñgũ disirore cãhmotabiricãque. Ñgũ gamero baporo,” arĩ gojañorã. Eropiro gajipũ õpa arãa: “Mohmegũre ñgũ mohmeri wajare oro gahmea,” arãa Goãmũ yare erã gojarapũgue. Goãmũ ya gojarapũ eropa arĩcũ peerã oparãre õaro umupeoque mũa. Eropirã õaro wajayeque erãre.

19 Jesu yarã mera majagũ opũre yujugũ ta ñgũre weresãcũ peebiricãque. “Opũ ñgũ õpa ñeri iirare ñabũ,” perã õũrerã arĩ weresãra pũhrũ peeque. 20 Eropa peerã ñgũ ñero iira árĩcũ ñatuhaja Jesu yarã gamenererogue turique ñgũre, gajirã ñgũre ñha masi gũiporo arĩrã.

21 Eropigũ Goãmũ Jesucristo ñgũ beyerã anyua erã ñhabeoro ire dorea mũre. Dohpague yũ mũre dorerare iipehoque. Eropa iigũ gajigũre gajiropa, gajigũ sãre gajiropa iibiricãque. Yujuropa ta iique arĩpehrerãre Jesu yarãre. 22 Gajirãre Goãmũ mohmerire mũ beyemorãre erã weca mũ mojotorire duhpeoboro core õaro ñaque mũhũ ñha masiri mera yojaro mariro. Ñerire iirã árĩbocoma. Eropigũ

m̄ erāre beyera p̄hr̄ erā ñerire iicũ erā ñeri iira dipuwaja opaḡca m̄ sã. Eropiḡ erāre beyeboro core erā ár̄ric̄ure ðaro masique. Eropiḡ ár̄pehreri ñeri mariro ár̄ique m̄h̄.

²³ Bajasuburi paru p̄risũḡ āhraa m̄h̄. Eropiḡ dohpaguere deco dihtare ihr̄ḡ ár̄ḡ, merogã vino sãre ihr̄ique m̄h̄ ococ̄ḡ.

²⁴ Yujurãyeri erā ñerire iicũ mari ihaa. Eropirã Goãm̄ erāre dipuwaja moaborore masia mari. Gajirãp̄re erā ñeri iirare mari iha masibea. P̄hr̄ erā ñeri iirare masirãca Goãm̄ dipuwaja moarin̄ ár̄ic̄. ²⁵ Eropa ta yujurãyeri ðarire erā iirare masia mari. Gajirã erā ðarire erā iirare dohpaguere masibiriquererã ta p̄hr̄ masirãca mari. Mari iabirirare ár̄pehrerã erā iirare p̄hr̄ iri dehyoacũ iãrãca.

6

¹ Pohro majarã Jesu yarãp̄ erā oparãre ðaro umupeo- poro. Erã eropa umupeocũ iãrã gajirã Goãm̄re mari ar̄ buheri sãre ñero werew̄amasibeama. ² Erã oparã Jesu yarã ár̄ic̄ iãrã erã pohro majarãp̄ ḡca oparã sã Jesu yarã ta āhrima. Eropirã “Erāre umupeobiricũ ðaroca,” ar̄ibocoma. Eropa iibiricãro gahmea. Erã oparã Jesu yarã ár̄irã erã mahirã yujuḡ porã iro dopa āhrima. Eropirã erã tamerare turaro itamuporo.

Goãm̄re umupeori sãre, ðaro ár̄iri sãre werep̄ Pablo

³ I ȳ wererare buheque. Eropiḡ ire doreque. Gajiro- pa ár̄irire ḡyarire buherã mari Op̄ Jesucristo ya buherire umupeobeama. Erã Goãm̄re umupeori buherire gamebirã õpa iirã āhrima. ⁴ “Masipehoḡ āhraa,” ar̄iquererã ta diaye majare ne masibeama. Eropirã pee masibirã iro dopa ta turaro game d̄yasodiamã erã. Eropirã Goãm̄ yare ar̄imaacã d̄yasorã āhrima. Eropa d̄yasorã, game ihatirã wahama. Eropirã gajirãre ñero quere moa- masibiriquererã masare ñero ar̄ pepima erã. ⁵ Eropirã erã ñeri dihtare pepinuirã, diaye ár̄irire ne masibirã eropa d̄yasoniguicãma. Eropirã “Goãm̄ yare buherã niyerure wajatarãca,” ar̄ pepirima. Erã eropa ár̄irãre wapic̄biricãro gahmea. ⁶ Mari ya mari opari mera mucubirã Goãm̄re umupeorã diaye ta wajatarã ta iia. ⁷ I yebaguere masa dehyoarã ne gajinore aĩgãribirib̄ mari. Eropirã mari s̄irirã warã ne gajinore aĩgãmasibeama mari daja. Eropirã m̄ca opari mera dihta mucubirique. ⁸ Eropirã mari barire, mari suhri sãre oparã, gajire gamenemobir- icãrã. Iri n̄c̄ mera ta mucubiricãrã mari. ⁹ Niyerure gamerã doberi w̄aro oparã ár̄idiarã wat̄i ñerire iğ̄

iidorerire árĩpehreri ñerire iirã árĩbocoma. Eropirã erã bajasuburi pee masibirã iro dopa ta gajinore gametarirã, ñeri ɯaribejari duhubirã, erã basi ta ñero tarima. Eropa dedererã wacãrã iima. ¹⁰ Niyerure gametarirã árĩpehreri ñerire iinũgama masa. Yujurãyeri niyerure gametarirã, Jesure umupeo duhura pũhrũ bajasuburi erã ñero iira waja turaro bujawerema erã. Eropirã mari opariñepẽ ta mucubiro gahmea marire.

Goãmũ ya árĩburire iiboro dopa ñerire tarinũgaque, arĩ gojañumi Pablo

¹¹ Mũ tamera Goãmũ yagũ ta ãhraa. Eropigũ i ñerire iibiricãro gahmea. Eropigũ ðaripũre gameque. Goãmũ yare iique. Eropa iigũ Jesure “Diaye iigũ ãhrimi,” arĩ umupeoque. Eropigũ gajirãre mahique. Ñero tariqueregũ ta bocatũque. Nijiyagũ árĩque masa mera. Eropigũ gajirãre tarinũgadiagũ árĩbiricãque. ¹² Ĩgũ mera árĩpehrerinũri mũ ðaro árĩniguicãburire Goãmũ beyemi mũre. Eropigũ Jesucristore mũ umupeorire bajarã masare ðaro werebũ mũhũ. Eropigũ ñero tariqueregũ ta ĩgũre umupeo ĩgũ yare duhubita ɯmarogue ĩgũ mera eropa mũ árĩniguicãboro dopa. ¹³ Goãmũ árĩpehrerãre árĩpehrerire árĩcũ iigũ ãhrimi. Jesucristopũ Poncio Pilatore Goãmũ yare ðaro werepũ. Eropigũ Goãmũ Jesucristo sã erã ĩhabeoro ire mũre iidoregũra: ¹⁴ Mũre Goãmũ ĩgũ dorerare iipehocãque. Jesucristo ĩgũ dujariboro core ñeri mariro, dipuwaja mariro ĩgũ dorero dopa ta iiniguicãque. ¹⁵ Ĩgũ queoranũ árĩcũ Goãmũ Cristore dujaricũ iigũcumĩ. Goãmũpũ ðagũ ĩgũ dihta masare doregũ ãhrimi. Eropigũ árĩpehrerã gajirã oparã erã tauro opũ árĩgũ ãhrimi. ¹⁶ Eropigũ ĩgũ dihta ne sĩribigũ ãhrimi. Ĩgũ gosesiriri mera árĩgũ ãhrimi. Eropirã masa ĩgũ gosesirogue ejamasibeama. Eropigũ masa erã ne ĩabigũ ãhrimi. Eropirã dohpague sãre ĩgũre ĩabeama. Ĩgũ eropa árĩgũre umupeorã. Eropirã árĩpehrerinũri “Turagũ ãhrimi ĩgũ,” arĩrã ĩgũre. Eropa ta iirã.

¹⁷ Eropigũ i yeba majarãre doberi oparãre ðpa arĩ doreque mũhũ: “Gajirãre tarinũgaa yũhũ,” ne arĩ pepibiricãporo. Erã doberi erã opari pehrea waroca. Eropirã “Yũhũ wũaro opari mera ðaro árĩgũca,” arĩ pepibiricãporo. “Goãmũ yapũ mera ðaro árĩgũca,” arĩ pepiporo. Árĩpehreri diaye ta mari gameripũre ogũ ãhrimi ĩgũ Goãmũ. Ĩgũpũre umupeoturaporo erã doberi oparã. ¹⁸ Eropirã erã ðaripũre iiporo ðarire erã iirã árĩboro dopa. Eropirã erã oparire mojomorocũrãre orã árĩporo. ¹⁹ Erã eropiicũ ɯmũsigue

Goãmũ pohrogue erã ya árĩroca. Erogue árĩcũ iri ne pehresome. Eropirã erogue òaro árĩniguicãrãcoma erã.

Pablo Timoteore doretupũ

²⁰ Mahgũ, mure Goãmũ ãgũ apirare ãgũ buhedorerare duhubita. Yujurãyeri masa Goãmure gamebirã iro dopa ta gũyarire, pee masibirã ya buherire wereniguima. Eropa wereniguirã “Òaro masirã buheri ãhraa,” arĩrima erã. Eropa erã wereniguirire peenurũbircãque. ²¹ Gajirã yujurãyeri erã wereniguirire peenurũrã Cristo ya buheripure cóãcãma.

Goãmũ ãgũ mahiri mera mure turaro òadorea. Eropa ta árĩniguicãporo. Iripêta ãhraa.

2 Timoteo

Pablo Timoteore dipaturi gojabeopu

¹⁻² Mũhũ Timoteo yũ magũ iro dopa ta yũ mahigu ãhraa. Yũhũ Pablo mũre ire gojabeoa. “Árĩpehrerã Jesucristore umupeorã mũsigue ðaro árĩniguicãrãcoma,” arĩ apimi marire Goãmũ. Ĩgu eropa arĩ apirare werebure yũre beye apimi Jesucristo Goãmũ ĩgu gamero dopa ta. Eropigu Goãmũ mari Pagũ Jesucristo mari Opũ mera mũre ðadorea. Eropigu ĩgu itamuri mera ðaro árĩque mũhũ.

Masare Cristo yare erã wererare werepu Pablo

³ Goãmũ mera wereniguigu mũ ya árĩburire serẽniguicãa mũuri nũcu. Eropa serẽgu Goãmũre “Õhaa,” arãa yũhũ. Iribojegue majarã yũ acawererã ñeri dipuwaja mariro ĩgu Goãmũre ta umupeoñuma. Erã umupeodiro dopa ta dohpaguere yũ sã ĩgu Goãmũre ta umupeoa. Ĩgu Goãmũ gohra ta ãhrimi yũ mũre serẽbasagu. ⁴ Sohõ árĩrasubure yũ wacũ mũ orenũrsiarare guñagu mũre turaro ãadiaca daja mũ mera ðaro mucubiridiagu. ⁵ Eropigu Jesure diaye ta mũ umupeorire guñaa yũhũ. Mũ ñeco bũro Loida, mũ pago Eunice sã Jesure umupeomũhtama mũ core. Eropigu dohpaguere ĩgure mũ umupeocũ ðaro masia yũhũ.

⁶ Eropigu ire mũre guñacũ iidiaa. Mũ dipuru weca yũ duhpeocũ Goãmũ ĩgu ya turarire omi mũre. Ĩgu ya árĩburire mũ mohmemasiburire mũre omi. Iri mohmemasiburi mera mohmeque mũhũ. ⁷ Goãmũ marire ĩgu Espĩritu Santore omi. Mari mera árĩgu masare marire gũicũ iibeami Espĩritu Santo. Eropigu turarã, masare mahirã, pee masirã mari árĩcũ iimi ĩgu. ⁸ Eropigu mari Opũ ya árĩburire gajirãre weregu guhyasĩribita mũhũ. Yũhũ ĩgu yare iicũ ĩha gajirã gamebirã yũre peresugue doboma. Peresu yũ árĩcũ sãre ĩagu yũre guhyasĩrisãbircãque. Mũhũ sĩporãguere ñero bujawerebircãque. Õari buherire mũ buheri dipuwaja mũ sã eropa wagũ “Õaroca,” arĩ pepique mũ sã. Mũ eropa ñero taricũ ĩagu Goãmũ mũre itamugũcumi. ⁹ Eropigu Goãmũpu marire peamegue wabonirãre taumi. Eropigu ðarã ĩgu yarã árĩmorãre beyepũ ĩgu. “Õarã ãhrima erã. Eropigu erãre beyegũra,” arĩbiripũ marire beyegu. Ĩgu marire mahigu ta negohraguere marire beyepũ ĩgu gamero dopa ta iigu. “Eropigu Jesucristore erãre taubure obeogũra,” arĩ beyepũ marire. ¹⁰ Eropigu dohpaguere Jesucristore marire

taubure obeodigu árīmi marire diaye ta ĩgu mahirire ĩhmugũ. Eropigu Jesucristo marire taugũ marire ĩgu yarãre dederebircũ iimi. Eropa iigu “Yũre umupeorã Goãmũ mera õaro árīniguicãrãcoma,” arĩgu õari buherire marire weregu aripũ ĩgu.

¹¹ Eropigu i õari buherire werebure ĩgu apimi yũre. ¹² Eropa ĩgu yare buhegu árĩgu dohpaguere ñero taria yũhũ. Eropa ñero tariqueregu ta sĩporã mucubirigu ãhrra. Yũ guñaturagũre Jesure masia yũhũ. Turagu ãhrimi ĩgu. Eropigu ĩgu yare buhedore apigu õaro itamugũcumi. Eropigu ĩgu yũre apirare yũre buhe ojo-gorocũcũ ĩhadibugũcumi yũre. “Yũre itamugũcumi,” arĩ irire õaro masigu sĩporã mucubirigu ãhrra.

¹³ Mũre yũ wererare ipehocãque. Jesucristo mũre ĩgũre õaro umupeocũ iimi. Eropigu ĩgũre gajirã sãre õaro mahicũ iimi mũre. Eropigu “Diaye ãhrra,” arĩ irire guñaniguicãque mũhũ. ¹⁴ Eropigu Espĩritu Santo mari mera árĩgu ĩgu itamuri mera õari buherire õaro buheque. Queoro buheque gajiropa arĩro mariro.

¹⁵ Yũ peresugue árĩcũ ĩarã yũre cóãgãpehrea wama. Árĩpehrrã Asia yeba majarã Jesu yarã yũre itamudibirã cóãgãpehrea wama. Erã mera majarã perã Figelo, Hermógene eropa ta iima erã sã. Erã eropa cóãgãrãre masituhaca mũhũ. ¹⁶⁻¹⁷ Erã eropa cóãquerecũ ta Onesĩforopũ bajasuburi yũre itamugũ õaro siñajacũ iimi. Eropigu ĩgu yũ peresu árĩcũ ĩgu yũre guhyasĩrisãbeamĩ. Eropigu Romague eragu yũre amaniguicãdi árĩmi. Eropa amaniguigu yũre bocami. Efesogue sãre ĩgu marire itamurare õaro masia mũhũ. ĩgu eropiira waja ĩgu porãre, erã pago sãre mojomoro ĩagũcumi mari Opũ Jesucristo. Goãmũ eropa iiboro dopa ĩgũre serẽbasaa. ¹⁸ Eropigu i yebague Jesu mari Opũ dujaririnũ arigu ĩgũre mojomoro ĩagũcumi. ĩgũre eropa iiboro dopa ta serẽbasaa Goãmũre.

2

Ñero tariqueregu ta Jesu yagũre bocatũuro gahmea

¹ Mũpũ yũ magũ iro dopa ta Jesucristo ĩgu itamuri mera turagu árĩque. ² Eropigu bajarã masare yũ buherare mũ peerare gajirã sãre wereturiaque mũhũ. Erã mũ buherã Goãmũ gamerire iiniguicãrã árĩporo. Eropirã gajirãre buheturiarã árĩporo erã sã.

³ Surara ñero tarigu ĩgu yujuro bojero dopa ta Jesu yagu árĩgu ñero tariqueregu yujuro bojeque. Eropa iigu gajirã Jesu yarã iiro dopa iigu iiaa mũhũ. ⁴ Surara ĩgu opũ ĩgu

doreripure iimi. Eropigu ĩgu surara árĭbirā erā iiripure iibeami ĩgu. Mũ sã eropa ta mari Opũ ĩgu dorera dihtare iique. ⁵ Omabiragu erā dorediro dopa queoro iibigu ĩgu omatariara waja wajatabeami. Eropa ta mũ sã Goãmũ dorediro dopa ta iibigu Goãmũ mera wajatasome. ⁶ Eropigu pohere õaro mohmedigũpũ ĩgu mohmera waja iri pohe majare aĩmũhtami. Eropa ta mũ sã Goãmũ yare õaro mohmera waja Goãmũ oburire aĩmũhtagũca. ⁷ Irire õaro masicũ iigũcumi Jesu mari Opũ mũre. Eropigu dohpaguere yũ mũre arĩdirore õaro guñaque.

⁸ Jesucristore guñaque. ĩgu opũ Davi mũrũ pãrami ĩgu árĭpũ. Eropigu sĭridigu masa mũriapũ ĩgu. ĩgu eropa sĭri masa mũriara marire tauburi buheri ta āhraa. I õari buherire buhegu iiaa. ⁹ Iri buherire buhegu ñero taria yũhũ. Eropirā irire yũ buhecũ ĩha gajirā gamebirā ñegũ iro dopa ta yũre dipuwaja moa yũre peresugue doboama. Masa yũre cāhmotaquererā Goãmũ ya õari buherire cāhmota masiya mara. ¹⁰ Eropigu Goãmũ ĩgu beyenirāre buhegu bajasuburi ñero taria yũhũ erā Jesucristo yarā erā árĭburire. ĩgu yarā árĭborore erā peamegue wabonirāpũ tauborore ñero tarigu yujuro bojea. Eropigu erā Goãmũ mera õaro árĭniguicāborore ñero taria ĩgu yare buhegu.

¹¹ I diaye ta āhraa:

Cristo ya árĭburire mari iira dipuwaja gajirā marire wejēquerecũ ĩgu mera mũsigure õaro árĭniguicārāca. ¹² Eropirā ĩgu yare mari iira dipuwaja ñero tariquererā ta ĩgu yare duhubirā árĭrā ĩgu opũ árĭroguere ĩgu mera dorerā árĭrāca mari sã. “Cristore yũ masibea,” mari gajirāre arĩcũ ĩgu sã marire eropa ta arĩgũcumi.

¹³ ĩgure mari tarinũgacũ ĩagu ĩgu arĩdiro dopa ta marire dipuwaja moagũcumi. ĩgu arĩro dopa ta iigu āhrimi ĩgu. Ne gũyabeami ĩgu. I árĭpehreri ĩgu werera diaye ta āhraa.

Goãmũ ĩgu ĩhasũarāre, ĩgu yare buherāre wererũ Pablo Timoteore

¹⁴ Ire yũ wererare mũ mera majarāre masicũ iique. Erā ejatuharo game dũyaso wereniguiri duhpiburi árĭbeaa. Eropirā erāre peerāre ñero wacũ iima. Eropigu mari Opũ ĩgu ĩhuro õpa arĩ wereque erāre. “Mũa eropa werenigu-iro dopa wereniguibiricāque,” arĩque erāre. ¹⁵ Mũpũ Goãmũ yare õaro buheque. Eropigu Goãmũ ya árĭburire turaro iique. Mũ eropa iicũ ĩagu “Õaro iibũ mũhũ,” arĩgũcumi Goãmũ mũre. Eropigu mũ buherare ĩgu ĩacũ

guhyaſirisome muhu. Īgu buheri diaye āhraa. Eropigu ĩgu buherire ōaro masique. Eropigu ire queoro buheque. ¹⁶ Erā ejatuharo bu árĩrire wereniguirā ñerire eropa iiniguicāma. Eropigu erā eropa arĩ wereniguirire ĩha gamebircāque muhu. ¹⁷ Erā wereniguiri camiro boagāro iro dopa ta āhraa. Erā wereniguiri gajirā Jesu yarāre ñerā wacũ iiaa. Eropa wereniguirā mera majarā Himeneo, Fileto sã āhrima. ¹⁸ Eropirā erā ōari buherire cóārā, “Jesu yarā ſirinirā erā ya dupu mura masa muriatuhanirā āhrima,” arĩ buhemaacāma. Eropa gajiropa buherā bajamerāgā Jesu yarāre goroweorā iima. ¹⁹ Erā eropa ñero buhequerecũ ta, Goāmũ ya buheripũ ne gohrotobea. Īgu ya diaye maja árĩro pehrebea. Ōpa arĩ gojara āhraa: “Mari Opũ ĩgu yarāre masimi. Eropirā árĩpehrerā ‘Jesu yarā āhraa,’ arĩrā ñerire duhucāporo,” arĩ gojañuma.

²⁰ Jesu yarā watope āhrima Goāmũ yare ōaro iirā. Gajiropa iirā sã āhrima ñeri buherire wereniguirā. ²¹ Eropigu yujugu Goāmũ ya árĩburire ōaro itamudiagu iri ñeri buherire pebircāporo. Árĩpehreri ñerire duhucāporo. Īgu eropiigu ōagu árĩgu árĩpehreri Goāmũ yare ōaro iimasimi. Goāmũ gamegu ōaro árĩgucumi.

²² Eropigu mũ mamũ árĩgu mamarā erā ñeri uaribejari iro dopa iibircāque. Eropigu ōarire iique. Jesure umupeoturaniguicāque. Eropigu ĩgure masa sãre mahi umupeoque. Eropigu gamequeāro mariro gajirā mera ōaro árĩque muhu. Eropa ta iique gajirā ñeri dipuwaja marirā mera Goāmure game serēniguirā mera árĩgu. ²³ Eropigu pee masibirā erā arĩ duyasore mũ sã peenurubita. Eropigu mũ sã duyasobita. Eropa arĩ duyasorā masa game gameturinugama. ²⁴ Mari Opũ pohro majagure duyasobircāro gahmea. Eropigu árĩpehrerāre ōaro iigu buhemehregũ, mata guabigu ĩgure árĩro gahmea. ²⁵ Eropigu gajirā ĩgu mera duyasocũ ĩgu erāre weregu ōaro mera yojaro mariro mera yũhriro gahmea ĩgure. Īgu ōaro yũhricũ ĩarā erāpũ Goāmũ ĩgu itamuri mera erā ñeri iirire bujawerebocoma. Eropirā ōari buherire diaye majare masinugabocoma. ²⁶ Erāre watĩ oparimi ĩgu gamerire iimorāre. Eropirā erā ñero iirare bujowerera pũhũ ōari buheripũre masirā, watĩre cóārācoma.

3

Pehreburinũ majare werepũ Pablo Timoteore

¹ I mũmũ pehreburinũ coregā ñero tarirācoma masa. Irire ōaro masique muhu. ² Irisubure masa gajirāre guñabirā,

erã ya árĩburi dihtare guñarã, niyerure gamerã, “Gajirãre tarinũgaa gũa,” arĩ erã basi pepirã, masare ñero turirã, erã pagũ sũmarãre tarinũgarã, erãre oquerecũ ta “Õhaa,” arĩbirã, Goãmũre umupeobirã árĩrãcoma. ³ Eropirã masare mahibirã, mojomoro ãabirã, ñeri quere iirã, ñeri ùaribejarire duhumasibirã, masare eropa paniguirã, õarire gamebirã árĩrãcoma. ⁴ Erã mera majarãre ñero iirã, pepiri moorã, “Masipehorã ãhraa,” arĩ pepirã árĩrãcoma masa. Eropirã erã, erã ùaribejarire iisuarã árĩrã Goãmũre umupeo sũabeama. ⁵ Eropirã erã masa erã ãhabeoro Goãmũre umupeoquererã ta “Goãmũ duhpibu árĩbeami,” arĩ pepirima erã.

Eropa árĩrãre wapicũbiricãque mũhũ. ⁶ Erã mera majarã pee masibirã nome pohro ñaja, erã nomere gũyarire buhema. Erã nomepũ turaro ñerire iiniguirã árĩrã, turaro ñerire iidiarã ãhrima. ⁷ Erã nome eropa peeniguirã nome árĩquererã ta, diaye majapũre ne masibeama. ⁸ Iribojegue Jane, Jambre sã yeea árĩnirã Moise wererare gamebiridiro dopa ta erã sã õari wereniguirire diaye majare gamebeama. Erã ñeri dihtare pepirã ãhrima. Eropirã Jesure umupeorã gohra árĩbeama. ⁹ Eropa iirã gũyari mera erã iidiarire yujuro bojesome. Pũhrũ erã gũyarire, erã pee masibiriri sãre árĩpehrerã ãha masirãcoma. Jane, Jambre mera erã gũyarire iribojegue masa erã ãha masidiro dopa ta eropa ta masirãcoma masa pehreburiũ coregã árĩrã erã gũyarire.

Pablo Timoteore doretupũ

¹⁰ Mũpũ yũ buherare, yũ árĩricũrãre, yũ iidiarare, Jesure yũ umupeorare õaro ãhabũ. Eropigũ guaro mariro yũ iirare, masare yũ mahi umupeorare, ñero tariqueregũ yũ yujuro bojerare masia mũhũ. ¹¹ Eropigũ Jesucristo yare yũ iira waja yũre erã ñero iirare, yũ ñero tarirare masia mũhũ. Eropigũ Antioquíague, Iconiogue, Listrague yũre ñetariaro erã iira sãre masia mũhũ. Eropa yũ wacũ ãha mari Opũ Jesucristopũ yũre itamumũrimi. ¹² Árĩpehrerã Jesucristo yarã árĩdiacũ Goãmũ gamerire iiniguidiacũ gajirã erãre ñero iirãcoma. Iri diaye ta ãhraa. ¹³ Eropirã ñerãpũ, gũyarã sã, ñetariarã árĩniguicãrãcoma erã. Gajirãre gũyarã, erã basi sã gũyarire peerã eropa ta ñetariarã árĩniguicãrãcoma.

¹⁴ Mũpũ yũhũ mũre buherare õaro mũ peerare eropa iiniguicãque. Mũre buhenirãre masia mũhũ. ¹⁵ Mũ majigũ árĩgũgue ta, Goãmũ yare erã gojarapũre masinũgayoro. Ĩgũ yare erã gojarapũ mũ buhegũ masia Jesucristo marire tauburire. Eropa buhegũ “Jesucristore umupeorã dihtare

peamegue wabonirãre taumi Goãmũ,” arĩ masia. ¹⁶ Goãmũ yare erã gojarapũre árĩpehrerire Goãmũpũ gojadorepũ erãre. Eropirã iripũre buherã mari masinemoa. Iripũre buherã mari õaro iiburire masia. Eropirã mari ñeri iirire masia iripũre buherã. Eropiro iripũ marire õaripũre gohrotodorea. Eropiro umũri nũcũ mari õarire mari iinigu-iburire werea iripũ. ¹⁷ Eropigũ Goãmũ yagũ ãgũ yapũre buhegũ, masipehocãgũcumi. Eropa masigũ árĩpehrerire õarire iimasigũcumi ãgũ.

4

¹ Jesucristo árĩpehrerãre doregũ arigũ dujarigũcumi. Eropa dujarigũ ojocarirãre, s̃irinerã sãre dipuwaja moagũcumi. Eropigũ ãgũ ãhabeoro ire mũre dorea yũhũ: Goãmũ sã ãgũ ãhabeoro ire dorea mũre. ² Umũri nũcũ masa erã peediacũ, erã peediabiricũ sãre Goãmũ yare wereque. Eropa weregũ masare erã ñeri dipuwajare masicũ iique erãre. Eropigũ “Mũa ñeri iirire iinemobiricãque,” arĩ wereque erãre. Õaripũre iidoreque. Eropa weregũ ne guabigũ gariborebigũ árĩque mũhũ. Eropigũ gajirãre buhe duhubita. ³⁻⁴ Pũhrũ, gajisubuguere masa õari buherire peediasome. Eropa peediabirã erã gamero dopa ta iirã, erã peediari dihtare buhemorãre amarãcoma erã. Eropirã gũyari buherire buherã bajarã oparãcoma erã. Erã eropa iirã õari buheri diaye majapũre cohã, erã eropa arĩ bocara buheripũre peenũrũrãcoma. ⁵ Eropigũ mũpũ diaye majare buhe duhubita. Eropa iigũ umũri nũcũ õaro pee masigũ árĩque. Eropigũ ñero tariqueregũ ta yujuro bojeque. Eropigũ õari buherire eropa buheniguique masa Jesu yarã waboro dopa. Goãmũ mũre ãgũ iidorerare iipehocãque mũhũ.

⁶ Yũhũ Goãmũ yare yũ iira dipuwaja yũ s̃iriboro merogã duhyaa. Eropigũ bajamenũrigã árĩnigũca. Eropigũ dohpague mũre dorea. ⁷ Yũ s̃iriboro coregã ire weregũra: Jesucristo yũre õari buherire buhedoregũ ãgũ apirare õaro buhe ojogorocũabũ. ãgũ dorerire õaro iipehocãbũ. Eropigũ ñero tariqueregũ ta ãgũre ne umupeo duhubiribũ. ⁸ Yũ eropa õarire iira wajare umũsigue dibugũcumi yũre. Eropigũ mari Opũ árĩpehrerãre masipehogũ, diaye ta dipuwaja moabu árĩgũ, queoro weregũ ãgũ dujaririnũ yũ wajatarare ogũcumi yũre. Gajirã sãre ãgũ dujariborore corerãre, ãgũre mahirãre erã wajatarare ogũcumi Jesu.

Pablo werenemopũ Timoteore

⁹ Yũ pohrogue yojaro ãagũ arique mũhũ. ¹⁰ Dema waĩcũgũ i yeba majare árĩpehrerire gamegũ yũre

cóãgã waha wami Tesalónicague. Crescentepu yure cóãbiriqeregu Galacia yebague wahámi Goãmu yare buhegu. Tito sã eropa ta Dalmaciague wahámi. ¹¹ Luca dihta yu mera áhrimi. Marco yure ðaro itamubu áhrimi. Eropigu ïgure aïgãrique mahu. ¹² Tíquicore Efeso macague obeoabu. ¹³ Eropigu mahu ðgue arigu, yu weca sañari suhrirore, Troa maca Carpo ya wihi yu apirañere aïgãrique. Eropi sohõ árira gojara turirire aïgãrique. Sohõ árira gojara gasiri tamerare turaro gahmea yuhu. Eropigu iri gasiri sãre aïgãrique.

¹⁴ Alejandro comere mohmegu yure ñetariaro iimi. Eropigu ïgu eropa iira dipuwaja Goãmu dipuwaja moagucumi. ¹⁵ ïgu Alejandro mari buherire ne gamebirimi. Eropigu mware ñero iiri arigu ðaro ïgure guña masique.

¹⁶ Peresu iidoregure yu iirare ïgure yu ne werecã ne yujugu Jesu yagu yure itamudiabirimi. Árïpehrerã yure itamubirã cóãgãpehrea wama. Erã eropa cóãquerecã ta yure erã cóãra dipuwaja Goãmure “Erãre dipuwaja moabita,” arïbu. ¹⁷ Yu yujugu ta árïquerecã ta Goãmu ðaro áhrimi yu mera. Eropigu ïgu buherire yu ðaro wereburire weremasicã ïgu turari mera itamumi yure. Árïpehrerã Judio masa árïbirã iri buherire erã peeburire werecã itamumi. Eropigu masa erã yure ñero iidiaquerecã ta yure erã ñero iibodigure itamumi mari Opu. ¹⁸ Árïpehrerire erã yure ñero iirire yure taugucumi mari Opu. Eropigu umusigue ïgu Opu árïroque yu árïborore itamugucumi ïgu. Eropirã “Mari Opu ðatariagu, turatariagu áhrimi,” árïpehrerinuri arïrã mari. Eropa ta arïrã.

Pablo ðadorepu Timoteo pohro árïrãre

¹⁹ Priscila, igo marapu Aquila, Onesíforo ya wihi majarã sã ðaporo. ²⁰ Erasto Corintogue dujami. Trófimo dorecua wahámi. Eropigu Miletogue apiabu ïgure. ²¹ Puhiró core yojaro arique mahu. Eubulo, Pudente, Lino, Claudia sã, árïpehrerã Jesu yarã mure ðadorema.

²² Mari Opu Jesucristo mu mera árïporo. Eropigu mware Goãmu mera turaro ðadorema. Eropa ta árïniguicãporo. Iripëta áhrra.

Tito

Pablo Titore gojabeorũ

¹ Yũhũ Pablo mũre Titore gojaa. Goãmũ pohro majagũ, Jesucristo yare ĩgũ buhedore ĩgũ apidigũ ãhraa. Goãmũ ĩgũ beyenirã Jesure erã umupeoburire, ðari buherire erã masiburire Jesu buhedoregũ yũre apimi. Iri buheri Goãmũ ĩgũ dorediro dopa ta mari iiburire werea. ² Eropigũ árĩpehrerinũri Goãmũ yarã umarogue erã ðaro árĩniguiboro sãre buhea erãre. Goãmũ ne gũyari marigũ i yebare ĩgũ ĩhacũnuguboro core “Yũ pohrogue eropa ðaro árĩniguicãrãcoma,” arĩ apirũ marire. ³ Eropigũ ĩgũ queoranũ árĩcũ ĩgũ eropa arĩ apirare masidoredigũ árĩmi masare. Eropa ta masidoregũ yũre erãre weredoremi ĩgũ marire taugũ. ⁴ Mũre Jesu yare buhebũ. Yũ eropa buhecũ peegũ, Jesure umupeonũgabũ mũhũ yũ umupeoro dopa. Eropigũ mũhũ yũ buhedigũ árĩgũ diaye ta yũ magũ iro dopa árĩgũ ta iiaa. Mũre ire gojabeogũ iiaa. Eropigũ Goãmũ mari Pagũ, Jesucristo marire taugũ itamuri mera mũre ðadoreã. ĩgũ itamuri mera ðaro árĩque mũhũ.

Creta waĩcũri nũgũro majarãre Tito ĩgũ wereburire werepũ Pablo

⁵ Creta waĩcũri nũgũro yũ mũre apicũ Jesu yarã erã buheboru duhyanibũ irisubure. Eropigũ erã iiburire werebure apibũ yũhũ mũre. Eropigũ macari nũcũ majarã Jesu yarã oparã árĩmorãre beyedoregũ apibũ mũre. ⁶⁻⁸ Erã oparã Goãmũ pohro majarã ãhrima. Eropigũ erãre beyegũ ðarãre beyeque gajiropa iibirãre. Eropigũ yujugo ta marapocurã árĩrãre beyeque. Eropigũ “Bu árĩgũ ãhraa yũhũ,” arĩ pepirãre beyeque. Eropigũ mata guabirãre, merebirãre, masa mera gamequeãbirãre, niyerure gamebirãre beyeque. Eropa beyegũ erã ya wihire ñajarãre ðaro ĩhadiburãre, ðaripũre sũarãre, pee masirãre, ðaripũre iiniguirãre, ñeri marirãre, erã ãaribejarire iibirãre, teboru mariro mohmerãre, ðarire iiniguirãre beyeque. Eropirã mũã beyerã porãre ðpa árĩro gahmeã. Jesure umupeorã, ðarire iiniguirã, árĩpehrerãre ðaro yũhrirã árĩro gahmeã oparã porãre. ⁹⁻¹⁰ Eropirã ðari buherire queoro mari buhediro dopa ta ne duhubirã árĩporo oparã mũ beyenirã. Eropirã ðari buherire wererã árĩrãcoma. Eropa iirã ðari buherire gamebirãre buherã erã ya gũyari árĩcũ masicũ

iirācoma erā. Eropigu ōaro beyeque Jesu yarā weca oparā árīpehrerāre.

Bajarā erā oparāre tarinugarā, ōaro pepi wereniguibirā, gūyarā āhrima dohpaguere. Eropa iirā yujurāyeri Moise dorerire iidorerā tamera ñetariaro iirā iima. Erā buheri iri diaye árībircū erāre masicū iiro gahmea. ¹¹ Erā Moise dorerire iidorerāpū gūyarire buherā niyerure wajatadiarā buhema. Eropa buherā yujuyeri wiri majarāre árīpehrerāre Goāmū yapūre cóācū iirā iicoma erā. Erā eropa iicū erāre iidorebircāro gahmea.

¹² Iribojegue weredigu Creta majagu árīqueregu ta ōpa arī werepū: “Creta nūguro majarā eropa gūyaniguirā waīcūma. Ñerire iirā diayea iro dopa iirā āhrima. Eropirā pagari barā árīrā ne mohmediabeama,” arīpū īgu īgu ya nūguro majarāre. ¹³ Īgu eropa arīra diaye ta āhraa. Erā eropa árīcū īagu erāre turaro wereque Jesu ya buheripūre erā ōaro pee masiboro dopa. ¹⁴ Eropigu “Judio masa iribojegue majarā erā arī bocarare peebircāque,” arī wereque erāre. Jesu yare gamebirā erā doreri sāre Creta majarā erā peenūrabiriborore wereque erāre.

¹⁵ Ōpa āhraa. Dipuwaja marirā ōari dihtare pepima. Ñerire iiniguirāpū ñeri dihtare pepima. Erā pepiripū ñetaria. Eropirā ōaripūre beyemasibeama. ¹⁶ Erā “Goāmūre masia gūa,” arīquererā ta ñerire iima. Eropa iinirā erā árīcū īarā Goāmūre masibirā erā árīcū masia mari. Eropirā erā ñetariarā, Goāmū yare tarinugarā āhrima. Eropirā ōarire iimasibeama.

2

Ōari buherire weredorepū Pablo Titore

¹ Mūpū buhegu ōari buheri arīdiro dopa ta ōaro buheque. ² Mūrāpūre ōpa wereque: “Mūa gūhyadiarā, masa erā umupeorā, pee masirā, ‘Goāmū diaye iigu āhrimi,’ arī umupeorā, ōari buherire ōaro iirā, Jesure masa sāre mahirā, ñero tariquererā ta yujuro bojerā árīque,” arī wereque erāre. ³ Mūrā nome sāre eropa ta arī wereque: “Gūhyadiarā nome, ñeri quere werewūabirā nome, merebirā nome árīque,” arī wereque erā nome sāre. Eropirā erā nome ōarire gajirāre buheporo. ⁴ Eropa iirā ōpa arī buheporo mūrā nome nómeñaripūre: “Mūa marapū sūmarāre mūa porā sāre mahique,” arī buheporo. ⁵ “Eropirā mūa pee masirā nome, gajirā ūma mera ñero iibirā nome, mūa ya wihi majare ōaro ihadiburā nome, ōaro iirā nome, mūa marapū sūmarāre ōaro yūhrirā nome árīque,” arī buheporo mūrā

nome nómeñaripure. Erã eropiicũ ãarã gajirãpu “Goãmũ yare umupeorã ñero iirã ãhrima,” arĩmasibeama mũare.

⁶ Eropigũ mamarã sãre õpa wereque: Pee masirã árĩporo erã. ⁷ Eropigũ mũpu õari dihtare iiniguicãque mũre erã ãhacũburire. Buhegu ne gũyaro mariro buheque. Eropa buhegu gũhyadiaro mera buheque mũhũ. ⁸ Eropa buhegu õaro pee masiri mera buheque ne gajirã mũre erã weresãmasibiriburire. Mũ eropa buhecũ ãarã marire ãhaturirã árĩquererã ta marire bu gohra ta werewũamasibeama. Marire eropa werewũamaacãrã gũhyasũuro warãcoma erã.

⁹ Eropigũ pohro majarãre õpa doreque: Erã oparãre õaro yũhrirã árĩporo. Eopirã erã oparãre õaro mucubiricũ iiporo. Eropa dihta iiporo. Eopirã erã oparãre pũriro mera yũhribiricãporo. ¹⁰ Eopirã erã oparã yare yajabiricãporo. Eopirã õarã erã oparã dorerire õaro iiniguicãrã árĩporo. Erã eropa õaro yũhrirã árĩcũ ãarã Goãmũ marire taugu ãgu buherire pee suarãcoma gajirã.

¹¹ Masare ãgu mahirire Goãmũ mari masare masicũ iituhajami. Mari masare eropa mahigu árĩpehrerã peamegue wabonirãre Goãmũ turaro taudiami. ¹²⁻¹³ Masare eropa mahigu Goãmũ marire õpa doremi: Ñeri iirire, ñerire mũaribejarire duhucãdoremi marire. Goãmũ turagu, Jesucristo marire taugu ãgu õarire mari ãaburinũre, ãgu õaro mera dujariburinũre mari corerã iiaa. Eropigũ mari corerĩnũ mari corerĩsubu, mari pee masirã, õarire iiniguirã, Goãmũre umupeoniguirã marire árĩdoremi Goãmũ. ¹⁴ ãgu Jesucristo mari ya árĩburire ta sĩridi árĩmi. Árĩpehrerã mari ñeri iirire duhucũ iibu, marire ãgu yarã wacũ iibu sĩridi árĩmi. Mari ñerire ãgu eropa cóãcũ mari ñerire iira dipuwaja marirã árĩrãca. Eopirã turaro õarire iidiarã árĩrãca.

¹⁵ Ire árĩpehrerire iri mũgũro majarãre Jesu yarãre buheque mũhũ. Erã opu árĩgu ta iiaa mũhũ. Eropigũ erãre wereque. Eropigũ erã ñerire iicũ ãagu wereque erãre. Eopirã árĩpehrerã gajirã mũre cóãdiabiricãporo.

3

Jesu yarã erã iiburire werenemopũ Pablo

¹ Õpa guñacũ iique ero majarã Jesu yarãre: Erã oparãre õaro yũhrirã árĩporo. Eopirã árĩpehrerire õari dihtare iirã árĩporo. ² Eopirã gajirãre ne quere goroweobiricãporo. Game dũyasobiricãporo. Eopirã masa õarã, árĩpehrerãre umupeorã árĩporo.

³ Iribojegue mari sã pee masibirã, tarinugarã, guyarire peenururã, ñerire iisuarã, ñerire ñaribeja duhumasibirã, umuri nucu ñerire iiniguirã, gajirãre erã gajinore opacũ ihaturirã árĩmuriribu mari sã. Eropirã marire gajirã ihaturimurima. Eropirã mari sã erãre ihaturimuriribu. ⁴⁻⁵ Eropa árĩnirã árĩquerecu ta Goãmũ marire peamegue wabonirãre taumi. Eropa taugu igu igu òagu árĩrire, masare igu mahirire marire ihmudi árĩmi. Òaro mari iira mera taubirimi marire. Marire mojomoro ãagu mari ñeri iirare coegu Espĩritu Santo mera marire taumi. Eropa iigu marire igu porã wacũ iimi. Eropigu Espĩritu Santopũ mari òarã árĩburire marire gohrotomi. ⁶ Jesucristo mari ñeri iira dipuwaja igu sĩri, masa muriaara mera Goãmũ igu Espĩritu Santore omi marire wũaro igu turarire mari opaboro dopa. ⁷ Marire mahigu, marire òaro iidiami. Eropigu igu, igu Espĩritu Santore omi, ñeri iira dipuwaja marirã mari árĩborore, umarogue mari eropa òaro árĩniguicãborore. Mari eropa árĩniguiburire masirã irire mucubiri corerã iiaa mari.

⁸ Iri yũ werera diaye ta ãhraa. Eropigu irire yũ werediro dopa ta masare buhegu iri dorerire iipehodoreque mũhũ. Eropigu Goãmũre umupeorãre irire buheque òarire erã òaro iiboro dopa. I yũ arĩ buhera òari buheri ãhraa. Eropirã masa i buherire erã peenurucũ òaro itamuri árĩroca erãre. ⁹ Gajirã wereniguiripu duhpiburi árĩbeaa. Erã masibiriquererã ta erã arĩ ðuyasoma. Erã ñecu sumarã arĩ bocarare game ðuyasoma. Moise dorerire arĩ ðuyasoma. Erã eropa arĩ ðuyasori iri árĩpehreri duhpiburi árĩbeaa. Eropigu irire peenurubiricãque. Mũ sã ðuyasobiricãque.

¹⁰ Mũa mera majagu eropa game ðuyasogu mũa basi game ðuca wacũ igu iicũ ãagu "ĩbiricãque," arĩque igure. Yujusubu, pesubu irire igure mũ iidorebirira puhru igu yuhribiricũ ãagu igure wapicu duhucãque. ¹¹ Eropa ðuyasogu ñeri dihtare ñaribejaniguigu ãhrimi. Eropa igu iicũ ãarã igu ñegu árĩcũ masi, igure wapicubiricãro gahmea.

Pablo doretupũ

¹² Nicopoligue puhirópẽ árĩbu iiaa. Eropigu Artemare o Tĩquicore mũ pohrogue yũ obeomuhtacũ eroguerẽ yure bocatĩrigũ arĩque mũhũ. ¹³ Eropigu dorerire òaro mehregure Zena waĩcũgure, Apolo sãre òaro itamuque erã waborore. Eropigu erã gamerire árĩpehrerire oque erãre ðuhyaro mariro. ¹⁴ Eropirã Jesu yarã mari mera majarã òarire iiporo. Gajinore opapehobirãre erã itamuboro dopa, òarire iiniguirã erã árĩboro dopa eropa iiporo.

Pablo òadorebeopu Jesu yarãre

¹⁵ Árĩpehrerã yu mera majarã mure òadorema. Ero árĩrã Jesu yarã guare mahirã òaporo. Árĩpehrerãre mure Goãmu ĩgu mahiri mera turaro òadorea. Eropa ta árĩniguicãporo. Iripẽta ãhraa.

Filemón

Pablo Filemo waĩcũgũre gojanũgapa

¹ Yũhũ Pablo Jesucristo yagũ yũ árĩri dipuwaja peresugue árĩgũ iiaa. Yũhũ, mari acaweregũ Jesu yagũ Timoteo mera mũre Filemore gojabeoa gũa. Mũhũ gũa mahigũ Cristo yare gũare mohmetamugũ āhraa mũhũ. ² Eropirã Jesu yarã mũ ya wi gamenererã sãre gojabeoa gũa. Mari mahigo mari acawerego Jesu yago Apia sãre gojabeoa gũa. Arquipo sãre gojabeoa gũa. Arquipopũ gũa iro dopa Cristo yare weregũ āhrimi. ³ Eropirã Goãmũ mari Pagũ, mari Opũ Jesucristo mera mũare õadoreo. Īgũ itamuri mera õaro árĩque mũa.

Filemo gajirãre ĩgũ mahirire, Cristore ĩgũ umupeorire werepũ Pablo

⁴⁻⁵ Yũ acaweregũ, Filemo, mũre guña Goãmũre mũre serēbasamũraa. Eropa serēbasagũ “Õhaa,” arãa yũhũ ĩgũre. Cristore mũ mahicũ ĩgũre mũ umupeocũ gajirã Jesu yarãre mũ mahicũ peeabũ yũhũ. Eropigũ Goãmũre “Õhaa,” arĩ mucubiria. ⁶ Cristore mari umupeorire gajirãre weregũ āhraa mũhũ. Mũ eropa árĩgũ árĩcũ i sãre serēbasaa Goãmũre. Jesucristo yarã árĩrã wũaro õarire oparãca mari. Irire mũ opaburire õaro mũre masipehodoregũ serēbasaa Goãmũre. ⁷ Acaweregũ, gajirãre mũ mahicũ peegũ mucubiria yũhũ. Árĩpehrerã Goãmũ yarãre õaro sĩporã turacũ ĩgũ waĩcũa mũhũ. Mũ eropa iicũ peegũ mucubiria yũhũ.

Pablo Onésimo ya árĩburire serēpũ Filemore

⁸⁻¹⁰ Eropigũ dohpaguere Onésimore mũ pohro majagũ árĩdigũre mũre serēbasadiaa. Peresugue gũa árĩrã Cristo yare werebũ yũhũ ĩgũre. Irire peegũ Cristore gahmeami ĩgũ. Eropigũ ĩgũ Goãmũ yagũ wahámi. Eropa wagũ yũ magũ iro dopa āhrimi. Eropigũ yũ bugũ árĩgũ Cristo yare yũ buhera dipuwaja peresu árĩgũ mũre Onésimo mera werebeogũra ĩgũre mũ iiburire. Cristo ĩgũ buhedore ĩgũ apidigũ āhraa yũhũ. Eropa árĩgũ, árĩgũ ĩgũre mũ iiburire mũre dorebu āhraa yũhũ. Eropa árĩgũ árĩqueregũ ta mũre doresome yũhũ. Mahiri mera mũre werebeogũra iripēta.

¹¹ Cristo yagũ ĩgũ árĩboro core Onésimo mũ pohro majagũ árĩgũ duhpibu árĩbiridigũ árĩmi. Mũre õaro itamubiridigũ árĩmi. Dohpague tamerare yũre õaro itamugũ āhrimi. Mũ sãre õaro itamugũ árĩgũcumĩ. Dohpaguere bu

árĩgu gohra árĩbeami. ¹² Eropigu dohpaguere ĩgure mure wiagu iiaa. ĩgure turaro mahia. ĩgu yu turaro mahigure mure wiagu iiaa. ¹³ ĩgure mure wiabiricũ ĩgu yu pohro dujaboñumi. Ōari buherire yu buheri dipuwaja peresu yu árĩrisubu ĩgure yure itamudoreboya yuhũ. Eropigu yu mera dujadoreboya yuhũ. Mupũ yure itamumasibiricũ ĩgupũ mure gohrotogu árĩboñumi. ¹⁴ Eropa árĩquerecũ mure wiagu iiaa ĩgure. Mũhũ ĩgure “Dujaque,” mũ arĩbeocũ, ĩgure dujadoreboya. Yũpũ mure “Yũ pohro ĩgure apique,” arĩdiabirica. Eropigu ĩgure mure wiagu iiaa. ¹⁵ ĩgu Onésimo mure bajamenurigã ĩgu mure duhrigãra puhũ dipaturi mũ mera árĩgũcumi daja. ĩgu mure duhricũ Goãmũ gamero dopa ta wahabũ, arĩ pepia yuhũ, ĩgu Jesu yagu ĩgu árĩborore. Eropigu mũ pohro árĩgu daja ōaro árĩniguigũcumi. ¹⁶ Eropigu ĩgu dohpaguere mũ pohro majagu gohra árĩbeami. Pohro majarã tauñariro árĩgu āhrimi ĩgu yu pepicũre. Dohpaguere ĩgu mũ acaweregu Jesu yagu āhrimi. Eropigu ĩgure turaro mahia. Mupũ yu tauro ĩgure mahique. Mũ eropa mahigu mũ pohro majagu ĩgu árĩqueregu ta mũ pohro majagu gohra árĩbeami ĩgu. ĩgu mũ acaweregu Jesucristo yagu āhrimi.

¹⁷ Eropigu yure mũ bocatĩridiro dopa ta ĩgu sãre ōaro bocatĩrique. Mũ mera majagu yu árĩcũ ĩgu sãre ōaro bocatĩrique. ¹⁸ Eropigu gajiropa mure ĩgu iicũ, mure ĩgu wajamogu árĩcũ yũpũ irire wajayegũra. ¹⁹ Yuhũ Pablo yu basi ire were gojagũra: Yũpũ wajayegũra mure. Mure yu buhera puhũ Cristo yagu mũ wacũ árĩpehrerinũri Goãmũ mera árĩbu āhraa mũhũ. Mure yu eropa buhera waja mũ sã yure wũaro wajamogu árĩboca. Mũ eropa árĩquerecũ ta mure wajayegũra ĩgu mure wajamorire. ²⁰ Eropigu yu acaweregu, yu mahigu, mari Opũ Cristo yagu āhraa mũhũ. Mũ eropa árĩgu Onésimore ōaro bocatĩrique. Cristo yagu árĩgu yu acaweregu āhraa mũhũ. Eropa árĩgu, árĩgu yure ōaro mucubiricũ iique.

²¹ I yu wererare ōaro iigũca mũhũ. Eropigu yu werera tauro iigũca mũhũ. Irire masigu mure gojabeogu iiaa. ²² I sãre weregũra mure: Mũa pohrogue yu waborore Goãmũre mũa serēbasarare ĩgu yuhribocumi. “Áũ,” ĩgu arĩcũ gahmea yuhũ. Eropigu mũa pohrogue yu ejaburi toẽre amuyaque mũhũ.

Pablo ōadoretupũ Filemore

²³ Epaфра mure ōadoremi. ĩgupũ Cristo yare ĩgu iira dipuwaja yu mera peresu árĩgu āhrimi. ²⁴ Eropirã Marco,

Aristarco, Dema, Luca yu mera mure òadorema. Cristo yare yu buhecũ erãpũ yure itamurã ãhrima.

²⁵ Mari Opũ Cristo mera òadorea mure. Ìgũ mure òaro iigucumi. Eropã ta iiporo. Iripẽta ãhraa.

Hebreos

Goãtmu magu Goãtmu yare werepũ marire

¹ Iribojegue Goãtmu masare werenũgarũ. Īgu ba-
jasuburi mari ñecu sũmarãre iribojegue majarãre Īgu
gamerire weremũripũ. Īgu yare weremũhtanirã mera
erãre weremũripũ Īgu. Gajirãre Īgu dehyoa weremũripũ.
Gajirãre Īgu bocatĩriro weremũripũ. Gajirãre quẽroque
weremũripũ. Eropa weremũripũ Īgu mari acawererãre.
² Dohpaguere pehreburiũ coregã arĩrinũrĩre Īgu magure
ĩgu yare Īgu weredore obeocũ Īguũ marire wereami.
Jesuscristo Īgu Pagũ iidorero mera i yebare umaro sãre
iidigu arĩmi. Īgu Pagũũ pehrerĩnũ arĩcũ arĩpehrerire
opabure apĩpũ ĩgure. ³ Eropigu ĩgu magũũ ĩgu Pagũ
õarire opagu arĩgu, ĩgu turari mera marire ii ĩhmudi
arĩmi. Eropigu yujuro mera ĩgu Pagũ mera arĩgu, ĩgu
Pagũ arĩricũrĩre marire ĩhmudi arĩmi. Eropigu ĩgu turari
mera ĩgu dorecũ i yeba, umaro sã eropa arĩniguia. Eropiro
dederebeaa ĩgu doreri mera. Eropigu mari ñero iirare ĩgu
coera pũhũ ĩgu Pagũ turatarigu diayerũ doapu ĩgu opu ĩgu
arĩrĩre ĩhmubu.

Goãtmu magu anyua tauro aħrimi

⁴ Īgu Goãtmu magu waĩcũmi. Eropa waĩcũgu gajirã
tauro opu aħrimi. Eropigu ĩgu anyua weca tauro opu
aħrimi. ⁵ Īgu anyuare Goãtmu ne õpa arĩ werebirimũripũ
ĩgu magure werediro dopa ta:
Yũ magu aħraa mũhũ. Dohpagãre mũre dehyoacũ iabũ,
arĩpũ Goãtmu ĩgu magure.
Anyuapũre ne eropa arĩ werebirimũripũ. Eropigu erãre i
sãre ne werebirimũripũ:
Īgu pagũ aħraa yũhũ. Eropigu ĩgu yũ magu arĩgũcumĩ,
arĩpũ Goãtmu ĩgu magure.
Anyuapũre ne eropa arĩ werebirimũripũ. Eropigu ĩgu magu
anyua tauro arĩpũ. ⁶ Eropigu gajisubu ĩgu magure masa
dehyoagure i yeba apõpa aĩgu õpa arĩpũ Goãtmu ĩgure:
Arĩpehrerã yaharã anyua yũ magure mereja, ĩgure umupe-
orãcoma erã, arĩpũ ĩgu.
⁷ Eropigu ĩgu anyuapũre werebu õpa arĩpũ ĩgu:
Yaharã anyuare miruñe iro dopa dũpũcũrãre iiaa yũhũ. Erã
yũ pohro majarã aħrima. Eropigu erãre peame iro
dopa arĩcũ iiaa yũhũ, arĩ werepũ Goãtmu mari Pagũ.
⁸ Erãre ĩgu eropa arĩqueregu ta ĩgu magũpũre õpa arĩpũ:

Mũhũ Goãmũ árĩpehřerã tauro opũ eropa árĩniguicãgũca. Diaye ta doregũca mũhũ mũ yarãre. ⁹ Diaye árĩřire, õaro iĩřire turaro gahmea mũhũ. Eropigũ ñero iĩřire gamebeaa mũhũ. Mũhũ eropa árĩgũ árĩcũ ĩagũ, yũhũ mũ Pagũ árĩpehřerã gajirã tauro mũre mucubiricũ iĩabũ, arĩpũ Goãmũ.

¹⁰ I sãre arĩpũ ĩgũ ĩgũ magũre “Opũ,” arĩ piyugũ:

Opũ, negohraguere i yebare, Ʃmaro sãre ĩhacũnugubũ mũhũ. ¹¹ Iri árĩpehřeri pehrea waroca. Mũpũ eropa árĩniguigũca. I yeba árĩpehřeri suhřiro iriĩne boaro dopa ta pehrea waroca. ¹² Iri árĩpehřeri i yebare Ʃmaro sãre gohřotocũ iigũca mũhũ. Mũraĩne suhřirore mũ cohã gajiĩne mera gohřotoro dopa ta árĩpehřerire gohřotocũ iigũca mũhũ. Mũpũ mũ árĩdiro dopa árĩniguicãgũca. Eropigũ ne gohřotosome. Eropa árĩniguigũca mũhũ, arĩpũ Goãmũ ĩgũ magũre.

¹³ Gajisubũ õpa ĩgũ magũre arĩgũ iri sãre anyuapũre ne werebirimũřipũ Goãmũ:

Yũ diayerũ doaque mũhũ. Eropigũ mũre ĩhaturĩrãre tarinũgabasadoregũra. Eropigũ erã weca opũ árĩque mũhũ, arĩpũ Goãmũ ĩgũ magũre.

¹⁴ Árĩpehřerã anyuapũ Goãmũ pohro majarã dihta ãhřima. Eropiro Cristo ĩgũ taumorãre itamudoregũ Goãmũ obeomũřimi erãre.

2

Goãmũ yare õari buherire marire eropa pepibiricãro gahmea

¹ Eropigũ Goãmũ magũ gohra marire weregũ ĩgũ árĩcũ masirã ĩgũ wererare mari peerare õaro guĩnaro gahmea marire irire cãdijiri arĩrã. ²⁻³ Anyua masare erã wererare masapũ erã tarinũgacũ ĩagũ Goãmũ masare dipuwaja moapũ. Eropigũ erã anyua werera iri diaye árĩcũ ĩhmuğũ iipũ. Eropiro anyua erã werera iri diaye árĩcũ marire irire peero gahmea. Erã tauro Cristopũre peero gahmea marire. ĩgũ mari Opũ ĩgũ marire tauborore weremũhtarũ. Eropirã ĩgũre penirãpũ ĩgũ wererare marire wereturiañorã marire õaro masicũ iirã. Eropigũ iri buherire “Jesucristo marire ĩgũ taugũcumĩ,” arĩ buherire mari eropa pepicãcũ Goãmũ marire dipuwaja moagũcumĩ. ĩgũ dipuwaja moaborore duhřimasibea mari. ⁴ Irire peemũhtanirã erã buhe weca peoro watope Goãmũpũ iri buherire diaye ta árĩcũ ĩhmudi árĩmi. Eropigũ erã irire buherã ĩgũ turari mera baja deyoro moari erã ii ĩhmucũ iri

buherire diaye ta árĩcũ ihmudi árĩmi masare. Eropigũ ĩgu Espĩritu Santo mera iri buheri diaye ta árĩcũ ihmudi árĩmi. Espĩritu Santo Jesu yarãre yujurãyerire Goãmũ yare erã mohmemasiburire apidi árĩmi erã game itamuboro dopa. ĩgu gamediro dopa ta apidi árĩmi erã mohmemasiburire erãre.

Jesucristo mari iro dopa ta d̄ur̄m̄c̄uḡũ masa dehyoar̄ũ, arĩ gojañumi

⁵ I mũũ pehrerinũ árĩcũ Goãmũ pohro árĩrã tauro oparã árĩsome anyuar̄ũ. Erãre oparã acusome Goãmũ. ⁶ Anyuare oparã acubiriquerecũ Goãmũ yare weremũhtadigũ õpa arĩ gojañumi iribojeguere Goãmũ ĩgu oparã acumorãre:

Gũa masa bu gohra gũa árĩrã árĩquerecũ ta gũare guña mũhũ. Gũa masare õaro árĩcũ iiaa mũhũ.

⁷ Bajamenurĩgã anyua doca masare apiyoro mũhũ.

Eropa apiquerẽgũ ta gũare turari ogũ oparã acuyoro mũhũ. ⁸ Mũhũ eropa acucũ i yeba maja weca

árĩpehreri weca ãhraa gũa masa, arĩ gojañumi iribojegue majagũ mari Pagũre.

Goãmũ masare apigũ i yebaguere árĩpehrerã waimurã sãre masa dorero doca árĩmorãre apiñumi. Masare ĩgu eropa oparã acuquerecũ ta erã waimurãre árĩpehrerãre doremasibeamã dohpa. ⁹ Jesupũ árĩpehrerã weca opu ãhrimi.

Bajamenurĩgã anyua doca mari Pagũ ĩgu sãre apipũ. Mari yañe árĩborañere sĩribasabure ĩgũre eropa apidi árĩmi. Mari Pagũ marire mahigũ Jesure mari ya árĩburire ĩgu sĩricũ gamepũ. Eropigũ ĩgu eropa sĩricũ ĩagũ ĩgũre turarire ogũ, opu acupũ ĩgũre pare árĩpehrerã ĩgũre umupeoborore.

¹⁰ Goãmũ árĩpehrerire ĩhacũnuguñumi. Eropiro árĩpehreri ĩgu ya dihta ãhraa. Eropigũ Jesure sĩridoregũ masa erã ñerire cãdijicũ iipũ ĩgũre. ĩgu masa bajarã ĩgu porã árĩmorãre mũmarogue õarogue aĩgãbu eropa iipũ. ĩgu eropiicũ tamera õapũrica. Eropigũ Jesupũ marire taugũ mari opu ta ãhrimi. ¹¹ Árĩpehrerã masa erã ñerire cóãdi árĩmi Jesucristopũ. Eropigũ ĩgu ñerire cóãnirã mera Pagũcũmi Goãmũre. Eropigũ mari Pagũ yujugũ ta ãhrimi. Mari Pagũ ĩgu árĩcũ Jesu marire ĩgu ñerire cóãnirãre “Yũ acawererã ãhrima,” arĩ piyugũ ne gũhyasĩribeamĩ. ¹² Õpa arĩgũ iipũ ĩgu Pagũre:

Mũ árĩricũrere weregũra yũ acawererãguere. Árĩpehrerã yaharã gamenererã pohro mũre umupeogũ “Turagũ ãhrimi,” arĩ weregũra yũhũ erãre, arĩpũ ĩgu ĩgu Pagũre, arĩ gojara ãhraa.

13 Eropigu õpa arĩpu daja:

Yu Pagure guñaturaguca yũhũ, arĩpu, arĩ gojara ãhraa.

I sãre arĩpu ãgu Jesucristo:

Ohõ ãhraa yũhũ. Goãmũ porã ãgu yũre apinirã yũ acawererã mera ohõ ãhraa, arĩpu ãgu. ãgu yarãre "Yu acawererã," arĩ piyugu eropa arĩpu.

14 "Yu acawererã," ãgu arĩ piyurã dũpũcurã mari áricũ ãagu, Jesupu mari ya dũpu mari iro dopa árigũ aripũ. Eropã árigũ arigu ãgu crusague sãrigũ aripũ watĩre dederecũ iibu. ãgu watĩpu sãridoregu ãhrimi marire. 15 Eropã ii ãgure dederecũ iidi árimi marire tauboro dopa. Maripu mũmũri nũcũ mari sãriborore gũiribu. Eropã gũirã gũiro doca árirã, ñero sãporãcurã áribu mari. Eropã árirã mari áricũ ãagu ãgu marire taumi. 16 Eropã taugu anyuapũre itamugu aribiripu ãgu. Abrahã pãramerãre maripũre itamugu aripũ. 17 Eropigu ãgu mari acaweregu iro dopa aripũ. Yujuropa ta mari iro dopa ta dũpũcugu aripũ. Eropã arigu mari masa ya áriburire sãribasagu mari ñeri iirare Goãmũre cóãdoregu aripũ. Eropigu pahia oparã erã Goãmũ ya áriburire serẽbasaro dopa ta õaro itamuboro dopa mari iro dopa dũpũcugu arigu iipu. Erã tauro marire ãgumojomoro ãhami. Eropigu marire õaro itamuniguicãmi. 18 ãgu ñero taripu. Eropigu watĩ ãgure ñero iidoreripu. Ibiripu ãgu. Eropã ñerire tarinũgadigu árigũ, ãgu mari sãre ñerire tarinũgacũ iimasimi. Watĩ ãgu ñerire iidorecũ ãgu marire ñerire iibiricũ iimasimi.

3

Jesu Moise tauro árigũ ãhrimi

1 Jesu ãgu eropa árigũ áricũ ãarã ãgure bũrigã guñaque mũa. Yu acawererã, Jesu yarã, Goãmũ ãgu yarã árimorãre mũare beyedigu árimi ãgu. ãgu Jesupu Goãmũ ãgu apidigu árigũ mari pahia opu ãhrimi. I yeba majarã pahia oparã tauro ãgupu mari ya áriburire Goãmũre serẽbasagu ãhrimi marire. Eropirã ãgure õaro guñaque mũa umupeodigũre. 2 Goãmũ ãgure marire ãgu tauborore ãgu apicũ ãgupu ãgu apidiro dopa ta iipu. Ne tarinũgabiripu. Moise sã iribojegue majagu Goãmũ yarã Israe masare itamugu ne tarinũgabiripu. Eropã ta iipu Jesu sã. 3 Eropiro Moisere erã umupeodiro tauro Jesupũre umupeoro gahmea marire. Õpa ãhraa iri. Wihire mari "Õari wihi ãhraa," arĩro tauro wihire iidigupũre "Õapũricãmi," arĩro gahmea marire. Eropigu Jesupu wihi iidigu iro dopa ãhrimi. ãgu eropa árigũ áricũ ãgupũre Moise tauro umupeoro

gahmea marire. ⁴ Masapɯ wirire iirã āhrima. Goãmɯpɯ árĩpehrerire iigu āhrimi. ⁵ Moisepɯ Goãmɯ mohme coregu árĩgu Goãmɯ ya curu majarãre itamuniguigu árĩmɯripɯ. Puhrugue Goãmɯ ĩgu masare wereborore weremuripɯ masare. ⁶ Cristopɯ Goãmɯ magu árĩgu ta, Goãmɯ yare iiniguicãgu árĩgu Goãmɯ ya curu majarã tauro opɯ āhrimi. Eropirã Moise tauro Cristopɯre umupeoro gahmea marire. Eropirã maripɯ Cristore guñatura duhubirã árĩrã marire ĩgu tauborore eropa mucubiri coreniguicãrã ĩgu ya curu majarã āhraa mari.

Goãmɯ ĩgu yarãre ĩgu mera ðaro soocũ gameñumi

⁷ Eropirã Jesucristore mari umupeo duhubiriborore ðpa iro gahmea marire. Irire weremí Espíritu Santo Goãmɯ yare gojarapũguere.

Dohpagãre yuhɯ Goãmɯ mɯare yɯ werecũ yuhridiibirã árĩbircãque mɯa. ⁸ Eropirã ðaro yuhrique yure mɯa. Iribojegue Israe masa masa marirogue árĩrã yɯ werequerecũ ta umupeodiibirã yure yuhribirimurima. Eropa iirã yure ĩhasɯabiricũ iima. Eropirã erã iidiro dopa iibiricãque mɯapɯ yure. ⁹ Eroguere cuarenta bojori gohra erãre deyoro moarire ii ĩhmuribɯ erãre itamugɯ. Yɯ eropa ii ĩhmuquerecũ ta erãpɯ ðpa arĩ pepimurima yure dɯyasorã. “Goãmɯ marire itamumasisome,” arĩ pepimurima. Eropa arĩ pepirã ñero iimurima. ¹⁰ Erã eropiicũ ĩagɯ erã mera guabɯ. Eropa guagɯ ðpa arĩbɯ: “Erã yahare peediibirã gajiropa árĩri buherire eropa guñamaacãrã āhrima,” arĩbɯ. “Yahapɯre ne buhedibeama,” arĩbɯ erãre. ¹¹ Eropigɯ erã mera guagɯ ðpa arĩ werebɯ: “Erã yɯ mera majarã ne árĩsome. Eropirã yɯ mera ðaro soosome erã,” arĩ werepɯ Goãmɯ.

¹² Eropirã, yɯ acawererã, ðaro iique mɯa Goãmɯre cohmorí arĩrã. Mɯa ñerire pepirã, Goãmɯ ojocarigure “Diaye iimi ĩgu,” arĩ umupeobirã, ĩgure cóãboca mɯa. Ne yujugɯ mɯa mera majagɯ eropa iibiricãporo. ¹³ Eropirã ipɯre iiro gahmea: Mɯa mera majarã ɯmuri nɯcɯ Goãmɯ yare mɯa basi game wereniguique ñerire iiri arĩrã. Ñerire iirã “Iri mera mucubiria,” arĩrã, gɯyarire pepirã iiaa mari. Eropa pepibiricãque. Ñeripɯre iiniguirã Goãmɯ yapɯre sɯabeaa mari. Eropa iirã ñerire duhudiibirã wahaa. Eropa iiri arĩrã mɯa mera majarãre Goãmɯ yare mɯa basi game wereniguique. Jesucristo ĩgu dujariboro core eropa game wereniguique. ¹⁴ Eropirã negohrare Cristore mari

umupeonugadiro dopa ta eropa ta mari umupeoniguicārā, mari ojocarioropē ĩḡu yare duhubirā ĩḡu mera majarā āhraa.

15 Goām̄u yare erā gojarapū yu dohparagā werediro dopa werea daja m̄are Goām̄u wereniguirire:

Dohpagāre yuh̄u Goām̄u m̄are werecū ōaro yuhrique m̄a yure. Iribojegue majarā Israe masa erāre yu werequerecū ta umupeodiabirā yure yuhridiabirima. Eropirā erā iidiro dopa iibiricāque m̄a, arīmi Goām̄u, arī gojañuma iribojegure.

16 Eropirā Goām̄u ĩḡu wererare peenirā árīquererā erā ĩḡure yuhribirim̄ariñorā. Erā árīpehrerā Egiptogue ñero tarinirāre Goām̄u Moise mera ĩḡu wiunirā árīñorā. Erā eropa árīquererā ĩḡure ne yuhribiriñorā. 17 Eropigū erā ñero iicū ĩagū cuarenta bojori gohra Goām̄u erā mera guap̄u. Erā ñero iira dipuwaja erogue masa marirogue erāre dujadorep̄u. Eropirā erore s̄iria wam̄ariñorā erā.

18 ĩḡure erā eropa yuhridiabicū ĩagū ōpa guhyadiaro mera arīp̄u ĩḡu: “Erā yu mera majarā ne ár̄some. Eropirā yu mera ne ōaro soosome erā,” arīp̄u ĩḡu. 19 ĩḡu eropa arīcū peerā ire masia mari: Erā Goām̄ure erā umupeobiriri waja, ĩḡu mera majarā árīmasibiriñorā. Eropirā ĩḡu mera ōaro soomasibiriñorā.

4

1 Eropigū iribojegue majarāre ĩḡu mera ōaro erā sooborore gamegū erāre “Yu mera soorāca,” arī apip̄u Goām̄u. Mari s̄are eropa ta arī apip̄u ĩḡu. Eropirā guhyadiaro mera Goām̄ure ōaro yuhrirā mari wieri marigue arīrā. Eropa wierā ĩḡu mera ōaro soosome mari. 2 Iribojegue majarā Goām̄u yare erā peediro dopa ta mari s̄a ōari buherire peeb̄u. Erāp̄u peerā “Goām̄u diaye iigū āhrimi,” arī pepibirim̄ariñorā. Goām̄ure umupeobirim̄ariñorā. Eropiro Goām̄u yare peequererā yuhribiricū erā peera ñehe árīburi árībiriyoero erāre. 3 Marip̄u ĩḡure umupeorā dihta Goām̄u mera majarā árīrāca. Eropirā ĩḡu mera ōaro soorāca. Goām̄u ōpa arīp̄u:

Erā mera guagu guhyadiaro mera ōpa arī wereb̄u: “Yu mera ne soosome erā,” arī wereb̄u, arīyoro Goām̄u yare erā gojarapūgue.

Eropa arīp̄u ĩḡu. I yebare ĩḡu ĩhacūnugura p̄hr̄u soop̄u ĩḡu. Eropigū masa s̄a ĩḡu mera sooborore amuyup̄u. Amuqueregū erāp̄ure “Yu mera ne soosome erā,” arīp̄u Goām̄u. 4 Seis n̄uri ĩḡu ĩhacūnugura p̄hr̄u ĩḡu soorare ōpa arī gojañuma Goām̄u yare erā gojarapūgue:

Seis nari p̄hr̄u ár̄ipehr̄erire ĩgu iirare pehogu, Goãmu mohmeduhu soopu, ar̄i gojañuma ĩgu yare erã gojarapũgue.

⁵ Eropiro Goãmu yare erã gojarapũ ðpa ar̄i werea daja ĩgu mera ðaro ár̄ibirinirãre:

Yu mera majarã ne ár̄isome erã. Eropirã ne yu mera soosome, ar̄ip̄u Goãmu.

⁶ Eropirã ðari buherire peem̄htanirã, ĩgure erã tarinugara dipuwaja ĩgu mera majarã ár̄ibirã ĩgu mera soobiriñorã erã. Gajirãp̄u ĩgu mera majarã ár̄irãcoma. ĩgu mera soorã ár̄irãcoma. ⁷ Eropigu masa ĩgu mera ðaro ár̄iburire erã ĩgu mera sooburire apigu daja, "Dohpaguere ãhraa," ar̄i apip̄u Goãmu. Israe masa Goãmure erã tarinugara p̄hr̄u baja bojori p̄hr̄u irire weredorep̄u Davire. Davi were gojarare m̄are weretuhajaqueregu weregura daja yuh̄u. Eropigu ðpa ar̄i gojañumi Davi Goãmu wereniguirire:

Dohpagãnure yuh̄u Goãmu m̄are yu werecã, tarinugaro mariro ðaro yuh̄rique m̄a yure, ar̄i gojañumi iribojegure.

⁸ Ero coregue Josué Israe masare Goãmu ĩgu ora yebague aĩ ejap̄u. "Yu mera soorã ár̄irãcoma," ar̄iḡu iri yebague erã sooborore ar̄iḡu iibirip̄u Goãmu. Iri yeba soodoregu gajin̄u erã sooburire apibiriboñumi ĩgu. ⁹ Seis nari p̄hr̄u i yebare ĩgu iira p̄hr̄u Goãmu ĩgu mohmeduhu soodiro dopa ta mari ĩgu yarã sã ĩgu mera mari sooburiñe ãhraa. ĩgu mera mari ðaro ár̄iburiñe ãhraa. ¹⁰ Eropigu Goãmu soogu, ĩgu mohmerare duhucãnip̄u. Eropu ta ĩgu mera soorã mari gamero mera iirire duhucãrãca. ¹¹ Eropirã mari ĩgu yarã ðaro iirã. Goãmu yare ðaro yuh̄rirã ĩgu mera mari sooboro dopa. Iribojegue majarã mari acawererã erã tarinugara p̄hr̄u Goãmu mera majarã ne ár̄imasibirimuriñorã erã. Erã iidiro dopa iibiricãrã mari.

¹² Goãmu ya wereniguirire marire Goãmu mera ðaro ár̄iniguicã iiaa. ðarip̄ure marire gohrotocũ iiaa. Eropiro ĩgu ya wereniguirire bu ár̄iri ár̄ibeaa. Eropiro matamiji pep̄rip̄u usirimiji mera ðore erã wiri ĩha erã masiro dopa ta, ĩgu ya wereniguirire mari ár̄iric̄urire mari pep̄irire ðaro masicũ iiaa marire. Eropu masirã mari iiric̄uri ðaro ár̄icũ, ðaro ár̄ibiricũ sãre masia ĩgu wereniguirire peerã. Iri mari buhecũ mari ár̄iric̄urire ðaro masipehocũ iiaa marire.

¹³ Ne Goãmure mari ár̄iric̄urire mari iirare duhmasibeeaa mari. Ár̄ipehr̄erire ĩgu ĩhacũnugurare ĩgu ĩhacũnugunirã sãre ĩhami ĩgu. ĩgu tamerare mari iirare mari pep̄irire werepehorãca mari.

Jesu turagu mari pahia opu ãhrimi

¹⁴ Jesu Goãmũ magũ ĩgũ sĭrira pũhrũ ĩgũ Pagũ pohrogue dujadigũ árĩmi. ĩgũ turagũ mari pahia opũ āhrimi. Eropigũ mari ya árĩburire Goãmũre serēbasami. ĩgũ eropa árĩgũ árĩcũ ĩarã maripũ ĩgũ yare õaro yũhrirã árĩrã ĩgũre õaro umupeoniguicãrã. ¹⁵ ĩgũ Jesucristo mari pahi árĩgũ mari ñero taricũ õaro mojomoro ĩagũ āhrimi. Mari ñerire Ʃaribejarire masimi ĩgũ. Watĩ árĩpehreri ñerire ĩgũ marire iidorero dopa ta Jesu sãre ñerire iidoreripũ. ĩgũ eropa iidorequerecũ ĩgũ ñerire iibiripũ. ĩgũ eropa ñerire iidorerire iidoredigũ árĩgũ marire mojomoro ĩagũ marire itamumasimi. ¹⁶ Eropirã “Yũre yũhrigũcumĩ,” arĩrã Goãmũre serērã. ĩgũ marire mahimi. Eropigũ mari ĩgũre serēcũ marire mojomoro ĩagũ marire itamugũcumĩ. Eropigũ mari ñero iidiacũ sãre ĩgũ marire itamugũcumĩ.

5

¹ Árĩpehrerã pahia oparã, masa mera majarã āhrima. Beyenirã āhrima erã mera majarã yare Goãmũre serēbasamorã. Eropirã masa ñerire erã iira dipuwajare Goãmũre serēbasama erã mera majarãre. Eropa serēbasarã waibũgũre wejẽ soe mujuma Goãmũre. ² Pahia oparã gajirã masa iro dopa õaro masipehobirã āhrima. Gajisubu õarire iibirã āhrima erã sã. Eropa masibirã árĩrã gajirã masibirãre itamumasima nijiyajaro mera. Eropirã õarire iibirã sãre õaro mera itamumasima. ³ Eropirã õaro masipehobirã ñeri iira dipuwajacũrã āhrima erã sã. Eropirã erã basi erã ñerire erã iira dipuwaja waibũgũre wejẽ soe mujuma Goãmũre. Gajirã masa ya árĩburire erã ñeri iira dipuwaja erã serēbasadiro dopa ta, erã basi erã ya árĩburi sãre serēma Goãmũre.

⁴ Eropigũ ĩgũ ĩgũ gamero pahia opũ ñajabeami. Goãmũpũ ĩgũre beyegũ, pahia opũ acumi. Iribojegue majagũ Aarõ mũrũre ĩgũ apidiro dopa ta gajirã pahia oparã sãre apimi ĩgũ. ⁵ Eropa ta Cristo sã ĩgũ basi ĩgũ gamero pahia opũ ñajabiripũ. Goãmũpũ ĩgũre opũ acugũ õpa arĩpũ:

Yũ magũ āhraa mũhũ. Dohpagãre mũre dehyoacũ iiabũ yũhũ, arĩpũ Goãmũ.

⁶ Gajisubu õpa arĩpũ Goãmũ Cristore:

Árĩpehrerinũrere pahi árĩniguicãgũca mũhũ. Melquisede ĩgũ árĩdiro dopa ta pahi árĩniguicãgũca mũhũ, arĩpũ ĩgũ magũre.

⁷ Cristo i yeba árĩgũ bũrigã gaguinigui, co deco mera Goãmũre turaro serēpũ ĩgũ, “Yũre masuque,” arĩgũ. Mari

Pagupũ Goãmupũ ĩgũre sĭridigũre masumasigũ árĭpũ. ĩgũ eropa serĕcũ Goãmũ peepũ ĩgũre. Goãmũ gameri dihtare ĩgũ iidiacũ ĩagũ Goãmupũ ĩgũ serĕrare peegũ yũhripũ. ⁸ Eropigũ Cristo Goãmũ magũ árĭqueregũ ñero taripũ ĩgũ. Eropa ñero tarigũ yũhripũ Goãmũre. Eropa yũhrigũ õaro yũhrire masituhapũ. ⁹ Eropa yũhridigũ crusague sĭrigũ masa erã ñerire cãdijigũ árĭpehlerã ĩgũre yũhrire taubu wapũ. ¹⁰ Eropigũ Goãmupũ ĩgũre pahia opũ masa yare serĕbasabure apipũ. Eropigũ Melquisede pahia opũ ĩgũ árĭdiro dopa ta ãhrimi Cristo.

Cristo yarã ĩgũre umupeo duhucũ gũhya ãhraa

¹¹ Baja õpa árĭrire mũare werenemodiaa gũa. Gũa eropa werenemodiaquerecũ ta mũapũ peediabirã ãhraa. Eropirã mũare gũa werecũ mmasumasigũ árĭpũ. ĩgũ eroasiya mara. ¹² Yoari boje Cristo yarã árĭraa mũa. Eropa árĭrã dohpaguere gajirãre buherãgue árĭboca mũa. Mũa eropa árĭbonirã árĭquerecũ ta gajirã mũapũre buherãcoma. Goãmũ yare mũare buhemũhtarare mũare buhero gahmea daja. Ne buhenũgarã iro dopa ta ãhraa mũa. ¹³ Apĭco mihrirã majirãgã árĭnima. Erã iro dopa ta mũa sã ãhraa õaro masibirã árĭrã. "I ñeri ãhraa. ĩpũ õari ãhraa," arĭ ĩha masibea mũa. ¹⁴ Barire barãpũ mũrã ãhřima. Erã iro dopa árĭrã õaro buhenirã õaro pepi masirã mũa árĭcũ õaboaya. "I ñeri ãhraa. I õari ãhraa," mũa arĭ ĩha masirã árĭcũ õaboaya.

6

¹⁻² Eropirã Goãmũ yare õaro masirã, õaro yũhrire árĭrã. Cristo yare negohraguere buhenũgarã õpa masinũgabũ mari: Mari gamero mera mari iiri duhpiburi árĭbeaa. Mari iiri mera tarisome mari. Tarimorã Goãmũre umupeoro gahmea marire. Ire negohraguere buhenũgama marire. Eropirã marire waĩyema. Mojotorire marire erã duhpe-orire buhe, sĭrinirã erã masa mũariborore buhe, i mũu pehrera pũhrũ Goãmũ ĩgũ dipuwaja moaborore buhe, ĩgũ dipuwaja moamorã erã ñero tariniguiboro sãre buhe, i sãre marire negohraguere buhenũgama. Eropa árĭri buherire mari masituhajarare buhenemobirã gaji buherire õaro buhenemorã. ³ Eropirã Goãmũre, ĩgũ ya sãre masinemorã. Goãmũ ĩgũ gamecũ eropa ta iirãca mari.

⁴ Goãmũ yare masinirã irire duhurãre ne dipaturi erãre erã ñeri iirare erãre bujawerecũ iimasiya mara daja. Eropa árĭrã, Cristo ĩgũ taunirã árĭrã Espĭritu Santore oparima. ⁵ Eropirã Goãmũ ya wereniguirire peerã õari wereniguiriri iri árĭcũ masirima. Eropirã pehrerinũ pũhrũgue Goãmũ

ĩḡu turari mera mari eropa árĩniguiborore, masare ĩḡu dipuwaja moaboro sãre erã masirima. ⁶ Eropã árĩrã Cristo yare erã duhurã Goãmũ magũre dipaturi crusague erã pabiadiro dopa ta ĩḡure iirã iima. Erã eropiicũ ĩarã gajirã masa Cristore wereyama. Eropirã dipaturi erãre, erã ñeri iirare erã bujawere ðarire gohrotocũ iimasiya mara. ⁷ Ōpa ãhraa iri mari werenigui queori mera buhecũ: Ōari yebare wũaro deco aricũ erã oteri ðaro puhri dũcacũ. Eropigu iri pohe opũ dũcare opami ĩḡu baburire. Iri yeba ðari yeba árĩcũ ĩha mucubirimi. Eropã ta Goãmũ iimi ĩḡu yare peenirã sãre. Erã ĩḡu yare ðaro iicũ ĩha mucubirimi erã mera. ⁸ Gaji yebapũ añapora mera, taa mera iri yeba tiaro duhpiburi yeba árĩbeaa. Eropã árĩri pohere cóãcãro gahmea. Eropã ta Goãmũ iimi ĩḡu ĩḡu yare peequererã iibirãre. Erãre dipuwaja moa peamegue cóãḡucumi.

Cristore eropa umupeoniguirãre taumi Goãmũ

⁹ Yũ mahirã, mũare eropa arĩ werequereru ta mũapũre “Cristore duhuristo yare erã duhurã Goãmũ mã ãhraa,” arĩḡu iibea. Mũapũ Cristo ĩḡu taurã ãhraa. Eropirã ðarire iirã iica mũa. Irire masia yũhũ. ¹⁰ Mari ðaro iira waja Goãmũ queoro marire ðaro iigu ãhrimi. Eropigu ĩḡu ya árĩburire mũa turaro mohmerare cãdijisome ĩḡu. Mũa ĩḡure mahirã ĩḡu yarãre itamuabũ mũa. Dohpague sãre erãre itamuniguia mũa. ĩḡure mũa eropa mahirare cãdijisome ĩḡu. ¹¹ Mũa ojocarĩniguicãropẽ gajirãre mũa umupeocũ, mũa itaisto yare erã duhurã Goãmũ mmuniguicũ sãre gahmea gũa. Mũa eropiicũ ĩagũ ðaro iigũcumĩ mari Pagũ mũare. ¹² Eropirã mũa tericũrã árĩcũ gamebeaa gũa. Gajirã Cristo yarã ñero tariquererã Goãmũre “ĩḡu diaye ta arĩḡu ãhrimi,” arĩ umupeoniguicãma. Erã eropiicũ ĩagũ Goãmũ “Masare ðarire ogũra,” ĩḡu arĩdiro dopa ta erãre opehogũcumĩ. Eropirã mũa sã erãre ĩhacũrã erã iro dopa ta iiniguicãque.

¹³⁻¹⁴ Iribojegue Goãmũ Abrahãre ðpa arĩ apipũ: “Yũ waĩ mera diaye ta ire arĩḡu iiaa mũre. Mũre ðaro iigũra. Eropigu mũ pãramerã arĩturiarãre bajarã masa árĩcũ iigũra,” arĩ werepipũ Goãmũ. Eropã arĩ werepigu ĩḡu ya waĩ mera waĩpeopũ. Gajigu ĩḡu tauro arĩḡu ne maricũ ĩḡu ya waĩ mera eropa waĩpeopũ. ¹⁵ “Mũre ðaro iigũra,” Goãmũ ĩḡu arĩ apirare Abrahãpũ ðaro ĩḡu umupeoyura pũhrũ Goãmũ ĩḡu arĩdiro dopa ta ĩḡure ðaro iipũ. ¹⁶ “Goãmũ mera diaye arĩḡu iiaa,” masapũ arĩrã, erã erã tauro arĩḡu waĩ mera waĩpeorã iima. “Goãmũ mera diaye arĩḡu iiaa yũhũ,” yujugũ ĩḡu arĩcũ gajigu peegũ “Diaye

āhraa," arīgucumi. Dūyasomasibeami. ¹⁷ Eropigu Goāmū Abrahāre "Mure ōaro iigura," arī apigu "Yū wai mera diaye ta arīgu iiaa," arī waipeoru. Īgu eropa waipeo wererare peerā "Diaye ta āhraa iri," arī masia. Eropirā "Īgu arīrare ne gohrotosome," arī masia mari. Irire mari masiboro dopa īgu arī apira mera īgu waipeogu eropa wereraru. ¹⁸ Eropigu īgu arī apira mera, īgu waipeora mera diaye īgu arīrare masicū iipū Goāmū marire. Eropiro īgu waipeocū īgu arī apira ne gohrotosome. Eropigu Goāmū ne gūyabeami. Īgu eropa arīgu arīcū masirā, mari marire īgu tauborore mucubiri corerāca, "Eropa ta iigucumi," arīrā. ¹⁹⁻²⁰ Eropa īgu tauborore corerā guñaturarā āhraa mari. Eropa arīrā "Mari sīrirā Goāmū pohro warāca," arī masirā gūibeaa. Pahia opu Goāmū īgu arīri taribu gohrague űajagu, cāhmotariñe suhriro pohecague tariñajami. Eropa űajagu masa ya arīburire serēbasami Goāmure. Īgu eropiidiro dopa ta Jesu sā űmarogue Goāmū arīroque űajamūhtadi arīmi. Eropa űajamūhtagu mari sāre erogue űajaburire ahmu serēbasami. Eropigu arīpehrerinari nūcū serēbasagu iimi pahia opu arīgu. Melquisede pahi īgu arīdiro dopa ta pahia opu āhrimi īgu Jesu.

7

Melquisede pahi īgu arīdiro dopa ta Jesu pahia opu āhrimi, arī gojañumi

¹ Melquisede iribojegue majagu Salem waiçuri maca majagu opu arīmuriaru. Eropigu pahi arīgu Goāmū turagure űmaro majagure masare serēbasagu arīmuriaru. Eropigu gajirā oparāre Abrahā gamewejētuhā, īgu dujaricū gohra, Melquisede īgu ya maca arīdigu waha, Abrahāre bocatīaru. Eropa bocatīrigu īgure serēbasaru Goāmure: "Ōaro iique ire," arī serēbasaru Abrahāre. ² Abrahāru īgu gamewejē tarinugara pūhru gajirā oparā yare aī dujaru. Īgu eropa aī dujarare merogā dūharu īgu Melquisedere. Diez īgu aī dujara arīcū yujuñe opu Melquisedere. Melquisede īgu wai mari ya mera arīro "Tauro opu ōaro iigu āhrimi," arīdiaro iiaa. Eropigu īgu Salem waiçuri maca majarā opu īgu arīcū iri maca maja waire waiçaru. Salem wai ōpa arīdiaro iiaa: "Tauro opu masare ōaro game mahicū iigu āhrimi," arīdiaro iiaa. ³ Ne Melquisede pagu űmarāre, īgu core arīmūhtanirāre, īgu acawerēre erā were gojatura mara. Īgu masa dehyoarare, īgu sīrira sāre were gojatura ne mara. Eropigu eropa arīniguigu iro dopa arīru īgu. Īgu eropa arīgu arīcū

Goãmũ ïgũ magũ ïgũ pahĩ ïgũ árĩrare marire buhemi. Melquisede pahĩ eropa árĩniguigũ iro dopa ta ãhrimi ïgũ Jesucristo Goãmũ magũ. ïgũ iro dopa ta Cristo sã pahĩ árĩgũ eropa árĩniguicãgũ ãhrimi.

⁴ Eropigũ Melquisede turagũ árĩrare guñaque. Abrahã mari ñecũ murũ opu gohra árĩqueregũ ta Melquisedepũ ïgũ duja aĩrare dũhapũ. Diez ïgũ duja aĩra árĩcũ yujuñe ópũ Melquisedere. Eropa ta ïgũ duja aĩ ïgũ dũharare ópũ ïgũre. ⁵ Eropiro Moise ïgũ doreri mera árĩpehrerã gajirã Israe masare iripẽta wajayedorepũ erã pahiare. Eropa doregũ Levĩ pãramerã árĩturiarãre erã acawererã árĩturiarã erã wajayerire ñeadoregũ apimũripũ. Levĩ pãramerã ya curu majarã pahia dihta wamũriñorã. Eropirã gajirã ya curu majarã sã Levĩ pãramerã mera Abrahã pãramerã árĩturiarã árĩmũriñorã. Erã acawererã árĩquererã erã Levĩ pãramerãre wajayemũriñorã. ⁶ Melquisedepũ Levĩ pãrami árĩturiagũ árĩbiriqueregũ ta wajaseapũ Abrahãre. Eropigũ “Mũre õaro iigũra,” ïgũ Goãmũ arĩ apidigũ árĩqueregũ Abrahãpũ Melquisedere wajayerũ. Eropigũ Melquisedepũ Goãmũre Abrahãre serẽbasagũ õaro árĩdoremũripũ. ⁷ Õaro árĩdoregũ Melquisedepũ ïgũ õaro árĩdoredigũ Abrahã tauro árĩpũ. Irire mari õaro masia. ⁸ Mari mera majarã pahia marire merogã wajasearã mari iro dopa ta masa ãhrima. Eropa árĩrã sĩrimorã ta ãhrima erã sã. Ihĩ Melquisedepũ iri-bojegue Abrahãre merogã wajaseadigũ eropa árĩniguigũ iro dopa ãhrimi ïgũpũ. “Ïgũ sĩria wañumi,” arĩ werera ne mara. Eropa ta ãhraa Goãmũ yare erã go-jarapũgue. ⁹ Dohpague majarã Levĩ pãramerã árĩturiarã pahia árĩrã masare merogã wajaseamũrima. Eropa árĩrã erã árĩquerecũ ta Abrahã erã ñecũ árĩgũ Melquisedere merogã wajayegũ árĩpehrerã Levĩ pãramerã ya árĩburi sãre wajayebasagũ iimũripũ. Eropirã Levĩ pãramerã sã Melquisedere wajayenirã iro dopa ãhrima. ¹⁰ Melquisedere Abrahã ïgũ wajayerasubure Levĩpũ masa dehyoanibiripũ dohpa. Eropa masa dehyoabiriqueregũ ta ïgũ ñecũ Abrahã dũpũgue ïgũ árĩbodiro dopa ta Levĩpũ árĩtuhagũ iipũ. Eropigũ Melquisede Abrahãre ïgũ bocatĩricũ Levĩ sã ïgũ ñecũ mera ïgũ árĩboro dopa árĩgũ iipũ. Eropa árĩgũ Levĩ, ïgũ pãramerã mera Melquisedere merogã wajayenirã iro dopa árĩrã erã ïgũ doca árĩrã iĩñorã.

¹¹ Ïgũ dorerire apigũ Goãmũ Aarõ pãramerã árĩturiarã Levĩ ya curu majarãre pahia árĩdoremũripũ. Eropirã ïgũ doreri dorediro dopa ta erã pahia waimũrãre soe murã masa ya árĩburire serẽbasamũriñorã Goãmũre. Erã

pahia erã eropiiquerecũ masa Goãmũ mera õaro wamorã árĩbirimuriñorã dohpa. Erã pahia erã iira mera masa õarã wacũ Goãmũ erãre gohrotobure Cristore obeobiriboñumi. Eropigũ ãgũ obeodigũ marire Goãmũ mera õaro árĩcũ ãgũ aridi árĩmi Cristopũ. Ìgũ Leví ya curu majagũ Aarõ mũru iro dopa árĩbiripũ. Melquisede iro dopa árĩpũ. ¹² Eropigũ pahiare gohrotogũ, marire doreri sãre gohroto gãmemi ãgũre. Pahia erã itamuri mera mari taribiro dopa ta iri doreri mera mari taribea. Eropiro iri dorerire gohrotope-horo gãmemi. ¹³ Aarõ Leví sã, erã ya curu majarã dihtare pahiare acumãripũ Goãmũ ãgũ dorerire apigũ. Ìgũ eropa acuquerecũ ta dohpaguere mari Opũre Cristore pahire Goãmũ ãgũ acudigũ gaji curu majagũ ãhrimi. ¹⁴ Ìgũ mari Opũ Cristo Judá ya curu majagũ masa dehyoapũ. Moise pahiare acugũ, Judá ya curu majarãre ne acubirimãripũ. Irire õaro masia mari.

¹⁵ Ire masirã, õpa mari õaro masia: Dohpaguere ne ãgũ acudigũ pahi Cristo Melquisede iro dopa árĩgũ ãhrimi. ¹⁶ Iribojegue maja doreri dorediro dopa ta Leví ya curu majarã dihta pahia ñajamuriñorã. Jesucristopũ Goãmũ ne ãgũ acudigũ gajirã pahia erã iro dopa pahi ñajabiridigũ árĩmi. Ìgũ Goãmũ turari mera árĩpehrerinũri árĩgũ ãhrimi. Eropigũ iri turari mera pahi ñajadi árĩmi ãgũ. ¹⁷ Õpa ãhraa Goãmũ yare weremũhtanirã erã gojarapũgue:

Árĩpehrerinũrire pahi árĩniguigũca mũhũ. Melquisede ãgũ pahi ãgũ árĩniguidiro dopa pahi árĩniguicãgũca mũhũ, arĩpũ Goãmũ ãgũ magũre, arĩ gojañuma iribojeguerẽ.

¹⁸ Goãmũ ãgũ doreri Moiserẽ ãgũ apimũhtara doreri turari árĩbiribũ. Eropigũ iri dorerire duhucãdi árĩmi Goãmũ. ¹⁹ Moiserẽ ãgũ apira doreri mera ne õaro tariburire opabirimũribũ mari. Eropigũ dohpaguepũre Goãmũ marire ãgũ tauborore marire apidigũ árĩmi. Ìgũ eropiicũ dohpaguere ãgũ pohrogue wamasia mari. Eropirã ãgũ mera wereniguimasia.

²⁰ Eropigũ Cristore pahi acugũ, “Yũ waĩ mera mũre acugũ iiaa,” arĩpũ Goãmũ. Gajirã pahia ñajacũ ãgũ iro dopa waĩpeo acubiripũ erãre. ²¹ Cristopũ ãgũ Pagũ waĩ werepira mera pahi ñajapũ. Õpa arĩ werepirũ ãgũ Pagũ Cristore:

Yũhũ mũ opũ yũ waĩ mera mũre weregũ diaye weregũra. Eropigũ ire ne gohroto mariro werea mũre. Árĩpehrerinũrire pahi árĩniguicãgũca mũhũ, arĩ werepirũ Goãmũ ãgũ magũre.

22 Eropā werēpīgū mama buherire marire apīgū, marire īgū taubore apīgū iipū. Iribojegue maja doreri tauro mari ōaro árīborore apīgū iipū. Eropīgū Goāmū masare “Ōaro iigūra,” īgū arīdiro dopa ta iibu, Jesure obeodīgū árīmi marire taubure. 23 Árīmūhtanirā pahia erā sīricū īarā gajirā gohroto űajamūriñorā daja. Eropirā erā bajarā pahia wañorā. 24 Jesupū eropa árīniguicāmi. Eropirā īgure gohrotorā ne marima pahia. 25 Eropīgū īgū eropa árīniguigū, Goāmure eropa serēbasaniguicāmi īgū īgū yarā ya árīburire. Eropīgū Goāmū mera erā eropa árīniguiboro dopa masare taumasimi īgū. Árīpehrerā īgure umupeorā Goāmū pohroge warāca. Eropīgū Jesu āhrimi űpūtū marire taubu.

26 Eropīgū Jesu āhrimi mari pahia opū. Īgū tamerare būrigā gahmea mari. Ne űeri dipuwaja marīgū āhrimi īgū. Eropīgū masa iro dopa űerire iibiridi árīmi. Eropīgū Goāmū īgure űerā watope árīdigure aīgū, űmarogue apī, árīpehrerā gajirā tauro árīgū opū acupū. 27 Gajirā pahia iro dopa árībeamī īgū. Erāpū űmūri nūcū waibūgure wejē, soe muju serēmūrima Goāmure masa űeri iira dipuwaja cādijidorerā. Erā basi erā űeri dipuwajare serēmūhtamūrima. Pūhrū gajirā űeri dipuwaja sāre serēbasamūrima erā. Eropirā erā bajasuburi eropa Goāmure serēbasamūrima. Jesupū pahī árīgū, yujusubu ta masa űeri dipuwajare Goāmure serēpū. Īgū waibūgure wejēbiri īgū basi sīridīgū árīmi mari masa űeri iira dipuwajare taubu. 28 Goāmū doreri Moiserē īgū apira mūra pahia oparā űajadorea. Eropā erā űajaquererā, űeri marirā árībeamā pahia űajarā. Iri doreri pūhrū Goāmū īgū magure pahire acugū “Diaye ta pahī árīniguicāgūcūmi,” arī acupū. Īgūpū űeri mariro eropa árīniguicāmi.

8

Goāmū masare “Mūare taugūra,” arī apirū daja īgū Moiserē arī apirare gohrotogū. Īgū mama apirare werebasagū āhrimi Jesu

1 Iri árīpehrerire arī wererā i tamerare mūare arīrā iiaa: Mūare gūa weredīgū pahia opū īgū tamera mari yagū gohra āhrimi. Mari ya árīburire Goāmure serēbasagū ta āhrimi. űmarogue Goāmū turatarīgū īgū opū doaro pohro īgū diayepū doami īgū Cristo mari pahia opū. 2 Eropīgū Goāmū wihi i yeba maja wihi, masa erā iira wihigū mohmebeamī. űmarogue árīri wihire mari Opū īgū iira wihire Goāmū ya

árĩburire mohmebasami. Iri wihi tamera Goãmũ ya wihi gohra āhraa.

³ Eropirã árĩpehrerã i yeba majarã pahia oparã waimurãre wejẽ soe muju Goãmũre omurima masa ñero iira dipuwajare cãdijidorerã. Eropa ta iimorãre apidigu árĩmi Goãmũ. Eropigu mari yagu pahi Cristo sãre apigu eropa ta iidorepũ. Eropigu mari ñeri iira dipuwajare Jesucristo ĩgu basi sĩridi árĩmi. ⁴ Moise doreri dorediro dopa ta i yebague pahia masa erã ñeri dipuwaja cóãburire mohmebasama. Eropirã i yebague pahia árĩtuhama. Erã eropa árĩtuhajacũ Jesupũ mari yagu pahi i yeba árĩniguigu, pahi árĩbiriboñumi ĩgu. ⁵ I yeba majarã pahia erã mohmerire i yeba maja wihi ta Goãmũ wihi mohmerã árĩtuhajama. Goãmũ wihi gohra umarogue āhraa. Eropiro Goãmũ wihi i yeba maja wihi umaro maja wihi ĩhacũ iira wihi āhraa. Eropigu Moise iri wihire i yeba maja wihire ĩgu moaboro coregã Goãmũ opa arĩpũ ĩgure. “Utãgugue árĩgu mũre yũ ĩhmudiro dopa ta yaha wihire opa iique. Yũhũ dorediro dopa ta yaha wihire queoro iique,” arĩmuripũ Goãmũ ĩgure. ⁶ Dohpaguepũre Jesu pahi árĩgu ĩgure apira mohmeri i yeba majarã pahia mohmeri tauro ðaro āhraa. Bu gohra árĩbeaa. Goãmũ masare “Cristo mera mũare ðaro iigũra,” ĩgu arĩ apira iribojegue maja doreri Moise doreri tauro ðari āhraa. Marire ĩgu arĩ were apira iri doreri tauro marire ðaro árĩcũ iiroca. Eropigu marire Goãmũ mera amubasagu árĩgu, Cristopũ gajirã tauro pahi āhrimi.

⁷ Negohrague Moise dorera mera mari Goãmũ mera ðamasibirimribũ. Iri doreri mera mari ðacũ gaji buherire apibiriboñumi Goãmũ. Iri doreri mera mari ðacũ, “Cristo mera mũare ðaro taugũra,” arĩ werebiriboñumi marire. ⁸ Iri dorerire erã bocatĩubirirare weregu opa arĩpũ ĩgu yarãre Israe masare:

Ōpa arãa yũhũ mũa Opũ: “Ōaro peeque. Pũhrũgue gaji buherire weregũra yaharãre Israe masare, Judá ya curu majarã sãre. ⁹ Iri buheri erã ñecu sumarãre erãre werepira iro dopa ne árĩsome. Yũ basi erãre Egipto yebague árĩnirãre wiugũ erãre werepiribũ. Yũ eropa arĩ werepirare tarinũgama erã. Erã eropiicũ ĩagu negohrare erãre yũ wererare duhucãbũ. ¹⁰ Eropigu pũhrũgue Israe masare opa arĩ weregũra: Yũ dorerire erãre guñacũ iigũra. Erãre yũ dorerire yũhridiacũ iigũca. Eropigu yũ Goãmũ erã opũ árĩgũra. Eropirã erãpũ yaharã masa árĩrãcoma, arĩ weregũra. ¹¹ Eropirã irisubure erã mera majarãre erã acawererãre ne erã opa erã basi game arĩsome:

'Dohpaguere mari Opure Goãmure masique mua,' ne arĩ game buhesome. Erã árĩpehrerã yure masituharãcoma. Majirãgã, murã sã yure masirã dihta árĩrãcoma. ¹² Eropigu erã ñeri iirare cãdijiguca yũhũ. Eropigu erãre dipuwaja moasome yũhũ," arãa yũhũ mua Opũ, arĩpũ Goãmũ igũ ya wereniguiri erã gojarapũgue.

¹³ Eropa arĩgu mama buherire apigu, iribojegue maja dorerire duhucã iigu iimi. Eropiro mura doreri igũ duhucã iira pũhrũ iri doreri mura gohrotopehrea waro iiaa.

9

I yeba maja taribure umaro maja taribu sãre Goãmure umupeori taribure werepũ

¹ Negohraguere Goãmũ igũ dorerire Moisere apigu masa igũre umupeoburi sãre werepipũ. Eropigu Goãmure erã umupeoburi wihi sãre iidore apipũ. ² Iri wihi waimurã gasiri wihi árĩyoro. Pe taribu opayoro. Wũari taribu erã ñajamũhtari taribu Goãmũ ya taribu waĩcũyoro. Iri taribure erã sihãgori yucũ duhpeodigu árĩyoro. Eroparĩcũ mesa sã árĩyoro. Iri mesa weca Goãmure erã ori pan peyayoro. ³ Gaji taribu suhri mera erã cãhmotara taribu árĩyoro. Iri taribu Goãmũ igũ árĩri taribu gohra waĩcũyoro. ⁴ Iri taribugue oro mera erã iira mesa, incienso erã soeri mesa árĩyoro. Eropiro oro õari mera erã sũra comoro ero oyayoro. Iri comoro waĩcũyoro Goãmũ arĩ werepira gojara dicũri comoro. Iri comoro pohecague dicũyoro. Yuju coro oro coro dicũyoro. Igũ masare ejorañegã mana waĩcũriñegã dicũri coro árĩyoro. Eropiro iri comoro pohecague Aarõ yagũ igũ tuadigu pũcũdigu árĩyoro. Eropiro pemiji utãmiji Goãmũ igũ doreri igũ gojatura mijiri iri comoro pohecague dicũyoro. ⁵ Iri comoro weca perã anyua wéanirã árĩñorã. Erã wéanirã Goãmũ igũ goesiriri mera, "Iri taribure igũ ãhrimi," arĩ werero iiyoro. Iri comoro buariñe erã quẽdũpũri mera buasũyoro. Iri comoro buariñe weca masa ñero erã iira dipuwajare cãdijidoregu waimurã di Goãmure erã orare wejẽsiripeopũ pahĩ opũ. Iripẽta weregura i wihi majare dohpaguere.

⁶ Eropirã iri wihire eropa erã õaro erã amura pũhrũ pahia umuri nũcũ erã ñajajamũhtari taribu erã mohmerire iimuriñorã. ⁷ Eropigu pahia opũpũ dihta gaji taribuguerẽ ñajapũ. Bojori nũcũ igũ iri taribure yujusubu ta ñajapũ igũ. Eropa ñajagũ erã wejẽdigũ waibũgu dire aĩ ñajagũ, Goãmure umupeopũ. Iri di mariro ne ñajabiripũ. Igũ basi igũ ñeri iira wajare, árĩpehrerã gajirã Israe masa

erã ñero iira dipuwaja sãre cãdijidoregũ dire aĩ ñaja apimuripũ ĩgũ Goãmure. ⁸ Árípehreri i mera Espíritu Santo marire õpa arĩ buhebu iimi: Iri wihi Moisere ĩgũ apira wihigue Goãmure umupeoburi árírisubu masapũ Goãmure umupeorã iri wihigue ñajamasibiriñorã. Pahia opũ dihta Goãmũ ĩgũ árĩri taribu gohraguere ñajamasimi masare serēbasagũ. ⁹ I árĩpehreri Goãmure umupeori wihi majare masare apira, marire dohpague majarã buheburi dihta árĩyoro. Pahia erã ñeri dipuwajare waimurãre wejẽra mera masa ne Goãmũ mera tarimasibiriñorã. Pahia erã eropa soe mujuquerecũ masa erã ñeri erã pepirigue ne pehresũbiriñorã. ¹⁰ Goãmũ Moisere apira doreri deyoro maja iiri dihta ãhraa. Erã õpa baburi, erã õpa ihriburi, erã õpa coeburi, erã õpa iiri dihta árĩyoro. Eropiro iri doreri marire õarã wacũ iibiriyoro. Goãmũ iri dorerire masa erã iiburire apiñumi Cristo ariboro core.

¹¹ Dohpague Cristopũ mari pahi opũ árĩgũ arituhadigũ ãhrimi. Eropigũ marire sĩribasara mera marire õarã wacũ iituhadi árĩmi. Eropigũ Goãmure mari ñeri dipuwajare cóãdoregũ Goãmũ árĩrogue ñajaja i yeba maja taribure ñajabiripũ. Ũmaro maja wihi ñajapũ. Iri wihi i yeba maja wihi tauro ãhraa. Eropiro masa erã iira wihi árĩbeaa. ¹² Eropigũ Cristo umarogue Goãmũ ĩgũ árĩro gohrague yujusubu ta mari ñeri dipuwajare ñajatupũ. Eropa ñajagũ cabritoa dire, wecua dire Goãmũ árĩri taribugue erã aĩ ñajaro dopa iibiripũ ĩgũ. ĩgũ basi sĩrigũ ĩgũ di gohrare cóãgũ árĩpehrerinũri Goãmũ mera mari õaro árĩniguicãborore iipũ. ¹³ Ñeri oparãre gũhraricũrãre coewearã erãre wejẽsiripeomuriñorã cabritoa di mera, wecua di mera, wecua erã soera niti mera. ¹⁴ Eropa iĩñorã masa erã dupure ñerire coewea cóarã. Iri tauro Cristopũ ĩgũ di mera mari pepirigue mari ñerire õaro coewea cóãcãdi árĩmi. Iri ñeri dipuwaja oparã peamegue wabonirã árĩribũ mari. Jesucristopũ ñeri marigũ árĩgũ ta ĩgũ basi crusague sĩrigũ Goãmure ópũ. Espíritu Santo eropa árĩniguigũ ĩgũ itamuri mera eropa ópũ ĩgũ ĩgũ basi. Eropigũ ĩgũ mari ñerire ĩgũ coeweadĩ árĩmi, Goãmũ ojocarigũ ya árĩburire mari õaro iimasiboro dopa.

¹⁵ Eropigũ “Õpa mũare õaro iigura,” Goãmũ arĩ ĩgũ mama wrepidiro dopa ta Cristopũ iidigũ árĩmi. Eropa iidi árĩmi ĩgũ Goãmũ ĩgũ beyenirãre taubu. ĩgũ eropa taucũ árĩpehrerinũri ĩgũ mera õaro árĩrãca mari ĩgũ yarã. Eropirã Goãmũ ĩgũ yarãre ĩgũ oburire oparãca mari. Moise doreri dihta árĩcũ masa erã ñeri iira dipuwajacurã árĩmuriñorã dohpa. Eropa ñeri iira dipuwajacurãre taubu

Īgū crusage sīribasadi árīmi. Īgū eropa sīricū mari Īgū yarāre Īgū oburire oparāca. ¹⁶⁻¹⁷ Ōpa āhraa mari masare. Yujugū Īgū sīriboro core Īgū acawererā Īgū yare aī gueremasibeama. Eropiro Īgū oparire Īgū acawererāre Īgū oburire Īgū gojatuyurapū Īgū sīriboro core iripū wacūbeaa dohpa. Īgū sīricū ĩarā iripū Īgū arī gojadiro dopa ta Īgū yare guererācoma erā. ¹⁸ Eropa ta Goāmū masare werepimūhtara Moisere Īgū apira doreri sīriro mariro di cóāro mariro ne duhpiburī árībiriyo. Eropigū waibugū dire Moise wejēsirira pūhrū Īgū dorerire diaye ta iigū iipū. ¹⁹ Eropigū ōpa iimūhtapū Moise: Goāmū Īgū apira dorerire masare werepehopū. Pūhrū cabritoa dire, wecūa dire deco mera morepū. Eropigū isopo waīcūdigū dūpū mera oveja poari diari poari mera erā űimurare turāpū. Iri dūpū mera dire yosogū, Goāmū dorerire Īgū gojarapū weca wejēsiripū. Árīpehrerā masa weca sāre wejēsiripeopū. ²⁰ Eropa iigū ōpa arīpū Īgū: “Goāmū marire Īgū werepira Īgū dorera i di mera iri diaye árīcū masia mari. I dire ĩarā diaye ta Īgū arīdiro dopa ta Īgū marire iiburire masia. Maripūre irire yūhridoremi,” arīpū Moise. ²¹ Eropigū masare Īgū iidiro dopa ta Goāmū umupeori wihi waimūrā gasiri wihire, árīpehreri iri wihi árīri sāre wejēsiripeopū. ²² Eropa ta āhraa. Īgū doreri iri dorediro dopa ta baja űerire di mera coeweadoreyoro. Eropigū di cohoro mariro Goāmū mari űeri iirare ne cādijisome.

Cristo Īgū dire cóāgū, Īgū yarā erā űeri iirare coewearū

²³ Eropiro i yeba maja wihire, iri wihi árīri sāre űerire coewearo dopa ta waimūrā di mera wejēsiripeomūripū. Eropiro iri tauro űmarogue wamorāre erā űeri dipuwaja oparare coero gahmea. Eropiro waimūrā di tauro árīgū ya di mera erā űerire coero gahmea. Eropirā Jesucristo ya di mera coenirā wabū maripū. ²⁴ Eropigū Cristo mari űeri iira dipuwajare Goāmūre cóādoregū Goāmūre erā umupeori wihi masa erā iira wihire űajabiripū. I yeba maja wihi űmaro maja wihi ĩhacū iira wihi āhraa. Goāmū ya wihi gohra űmaro maja wihi āhraa. Eropigū mari űeri iira dipuwajare cóādoregū Goāmū árīro gohrague űajapū Cristo. Ūmarogue wapū Īgū Goāmū core mari ya árīburire serēbasabu. ²⁵ Pahia opū bojori nūcū Goāmū Īgū árīri taribugue erā űeri iira dipuwajare cóādoregū űajamūripū waimūrā di mera. Cristopū sīrigū Īgū dire cóādigū Goāmūre mari űeri iira dipuwajare cóādoregū erā iiro dopa bajasuburi űajabiripū. ²⁶ Bajasuburi Īgū dire cóābu árīgū, i yeba árīropē bajasuburi Īgū űero

sĩriniguicãboñumi. Yujusubu ta dehyoapũ ĩgu i yebaguere i ămũ pehrerinũ coregã. ĩgu dehyoagu ĩgu yujusubu ta sĩribasara mera mari árĩpehrerã ñeri iirare cóãbu dehyoapũ. ²⁷ Árĩpehrerã mari masa sã yujusubu ta sĩrirãca. Mari eropa sĩrira pũhrũ, õarãre, ñerã sãre beyegũcumi Goãmũ. ²⁸ Yujusubu ta mari sĩriro dopa ta Cristo sã yujusubu ta sĩripũ bajarã masa erã ñero iirare cóãbu. Pũhrũ dipaturi dujarigũcumi. Mari ñerire cóãdigugue dujarigũcumi. Eropigũ irire dipaturi cóãgu arisome. Eropa arigũ mucubiriri mera ĩgũre corerãre taugũ arigũcumi. ĩgu pohrogue erãre aĩgãbu arigũcumi.

10

¹ Moise doreri pũhrũ Cristo masare ĩgu õaro iiburire ĩhmura dihta árĩbũ. Eropiro Cristo masare erã ñeri iirare õaro cóãboro dopa iri doreri erã ñerire cóãmasibiriyoro dohpa. Eropiro iri doreri iri iidorero dopa ta pahia bojori nũcũ Goãmũre waimũrãre wejẽ, soe muju, iiniguiquerecũ masa erã ñerire cóãmasibiriyoro. Goãmũre umupeomorãre õarã árĩcũ iimasibiriyoro iri doreri. ² Iri mera masa erã ñerire cóãcũ, yujusubu ta Goãmũre erã waimũrã wejẽ di cóãra pũhrũ erã ñerire cóãpehosũboñuma. Eropirã irisubu majarã, “Dipuwaja mara gũare,” arĩ pepiboñuma masa. Eropirã iripẽta dipaturi Goãmũre waimũrã wejẽburire duhucãboñuma. ³ Õabirimũriñorã dohpa. Eropirã bojori nũcũ Goãmũre waimũrãre wejẽ di cóãcũ masa erã ñeri dipuwajare guñaniguicãñorã. ⁴ Wecũa di mera, cabritoa di mera ne mari ñeri dipuwajare cóãmasiya mariyoro dohpa.

⁵ Iri eropa árĩcũ ĩagu Cristo i yebaguere ĩgu ariboro core õpa arĩpũ Goãmũre ĩgu Pagure:

Waimũrãre erã soe muju ocũ, trigo pogare erã ocũ sãre mũ ĩagu ĩhasũabeaa mũhũ. Eropigũ masa dehyoacũ iibũ mũhũ yare. Mũhũ yare iira dũpũ mũre mucubiricũ yũ iiburi dũpũ árĩroca. ⁶ Ñerire erã cóãborore waimũrãre wejẽ erã soe mujucũ ĩagu ĩhasũabirabu mũhũ. ⁷ Mũ eropa ĩhasũabiricũ ĩagu õpa arĩbũ mũre: “Mũ gamerire yebague iigũ wagũra. Yũ eropiiburire arĩ gojara ãhraa mũ yare erã gojarapũgue,” arĩbũ yũhũ, arĩmũripũ Cristo ĩgu Pagure.

⁸ Negohraguere Goãmũ ĩgu doreri waimũrãre trigo poga sãre erã ori mera erã ĩgũre umupeodorequerecũ ta õpa arĩpũ Cristo ĩgũre. “Waimũrãre soe muju erã ocũ, trigo pogare erã ocũ sãre gamebiribũ mũhũ,” arĩpũ ĩgu. ⁹ Eropa arĩtuhagu õpa arĩnemopũ: “Mũ gamerire yebague iigũ

wagura," arĩpu. Īgu eroparĩcũ õpa masia mari. Iribojegue Goãmure erã ñerire cóãdorerã waimurãre wejẽ di cóãrare gohrotogu iipũ Goãmũ. Eropa gohrotogu Cristo ĩgu sĩridiro mera masare erã ñeri dipuwajare taugacumi Goãmũ. ¹⁰ Jesucristo ĩgu dũpũre ogũ sĩrigũ árĩpehrerã mari ñero iirare cóãdigũ árĩmi. Yujusubu ta Goãmure ĩgu dũpũre ogũ marire dipuwaja maricũ iidi árĩmi. Eropa iigu Goãmũ ĩgu gamediro dopa ta iidi árĩmi.

¹¹ Árĩpehrerã pahia umuri nacũ Goãmure umupeori wihi mohmeniguima. Eropa mohmeniguirã muraro ta waimurãre wejẽ soe mujuma Goãmure masa ñerire cãdijidoremorã. Erã eropa iiquerẽcũ ta erã ñero iirire cãdijibeami ĩgu. ¹² Cristopũ yujusubu ta mari ñeri dipuwajare sĩrigũ, mari ñero iirare õaro cãdijipehocãcũ iidigu árĩmi. Irire cãdijipehocũ iituha waha wapũ ĩgu Pagũ pohrogue ĩgu diayepũ doagũ wagũ. Opũ árĩgu erogue doacumi. ¹³ Eroguere doagũ coregũ iimi. Īgũre ĩhaturirãre ĩgu Pagũ ĩgu tarinũgabasaborore coregũ iimi. ¹⁴ Yujusubu ta ĩgu sĩridiro mera ĩgu coenirãre õarã ñeri mariro erã árĩniguicũ iidi árĩmi. Eropigũ Goãmũ pohro doami pare. ¹⁵ Jesucristo eropa iiboro core erã arĩ gojamũhtarare arĩ weremi Espĩritu Santo marire. Õpa arĩ weremi ĩgu:

¹⁶ Õpa arĩmi mari Opũ: "Pũhrũguere õpa arĩ werẽgũra Israe masare. 'Yũ dorerire erã yũhridiacũ iigu erã pepirigue apigũra,' arĩ werẽgũra," arĩmi ĩgu.

¹⁷ Õpa arĩnemomi Goãmũ:

"Erã ñero iirare dipaturi guñanemosome yũhũ," arĩmi ĩgu, arĩ weremi marire Espĩritu Santo Goãmũ yare gojarapũgue.

¹⁸ Mari ñeri iirare ĩgu cãdijicũ dipaturi mari ñeri dipuwajare sĩribure gamebeaa mari.

Goãmũ pohro mari ejaro dopa ta ĩgu mera gũiro mariro mari wereniguimasia

¹⁹ Cristo ĩgu sĩriro mera ĩgu di cóãro mera mari sã dohpague gũiro mariro Goãmũ mera wereniguimasia. Eropirã ĩgũre serẽmasia. ²⁰ Iribojegue Goãmũ ĩgu árĩri taribugue Goãmure serẽbu pahia opũ dihta ñajamasimi. Iri taribure Goãmũ árĩrore cãhmotara suhrirore ĩgu dihta tari ñaja serẽmasimi. Dohpague ta mari basi Goãmũ árĩro ñajaro dopa ta Goãmure serẽmasia. Pahia opũ ĩgu iri taribugue ĩgu dire aĩ ñajaro dopa ta Cristopũ Goãmũ pohrogue ejapũ mari ñeri iirare cãdijidoregũ ejagũ. Eropa iigu Goãmũ mera mari wereniguibodirore cãhmotadirore cóãdi árĩmi. ²¹ Goãmũ pohrogue serẽbasagũ mari Goãmũ yarã yagu

pahia opu turatariagu ahrimi Jesucristo. ²² Eropirã, yu acawererã, Cristo mari pahia opu aricũ iha mari Goãmu mera wereniguimasirã arĩrã Goãmure sererã. Diaye pepirã arĩrã, “Igu yuhrigucumi,” arĩ umupeorã igure sererã. Cristo mari ñerire igu di mera coenirã ahraa. Eropirã “Dipuwajacurã ahraa,” arĩ pepirã arĩbeaa mari. Eropirã guhrari mariri deco mera coeweasunirã iro dopa ahraa. Eropa arĩrã Goãmure sererã. ²³ “Mũare taugura,” igu arĩdiro dopa ta iigucumi. Eropirã igu marire igu tauborore õaro mucubirimũhtayua mari. Irire mucubirimũhtayurã ne cãdijibiricãrã. Goãmure eropa guñaturaniguicãrã. Eropa guñaturarã irire gajirãre wererã mari. ²⁴ Mari mera majarãre mahirã itamurã mari arĩpehrerã mari game mahi mari itamuboro dopa. ²⁵ Eropirã õaro gamenererã Goãmure umupeomorã. Gajirãpu gamenerebeama Goãmu yare buhemorã. Erã iiro dopa iibiricãrã. Mari mera majarãre Jesucristore umupeonemocũ iirã. I yebaguere mari Opu igu dujariboro merogã duhyaa. Irire masirã turaro itamurã mari mera majarãre, Jesu yarãre erã Jesucristore umupeorire.

²⁶ Diaye arĩri buherire mari masiquererã ta irire cóãrã ñerire mari eropa iiniguicã, Jesucristo sĩrira mera mari ñerire cóãnemoboro ne mara. ²⁷ Eropiro eropa iirãre guhyaro dujaa. Arĩpehrerã igure ihatirirãre dipuwaja moagu turaro ãjurogue cóãgucumi Goãmu erãre. Eropirã igu dipuwaja moaborore guirã dihta ahrima igu yare cóãnirã. ²⁸ Moise dorerire tarinuganirãre dipuwaja moarã erãre wejẽmuriñorã. Ne mojomoro iaro mariro wejẽmuriñorã erãre. Urerã erã ñero iirare weresãcũ peerã erã tarinugarare masima. Urerã maricũ perã erã ñero iirare weresãcũ peerã erãre wejẽmuriñorã Goãmu dorero dopa ta. ²⁹ Erã iidiro tauro Goãmu magure ihatirirã dipuwaja moasũmorã arĩrãcoma. Cristo igu di cóãro mera marire mari ñeri iirare cóãdi arĩmi Goãmu. Igu eropa cóãborore wereyupu igu. Eropirã igu cóãnirã erã arĩquererã ta, puhru igu di cóãrãre “Bu gohra ahraa,” arĩrã igu dipuwaja moamorã gohra arĩrã ta iirãcoma. Eropa arĩrã Espiritu Santore ñero arĩ wereniguirã ahrima. Igu erãre mahigu ahrimi. Erã eropa ñero wereniguicã iagu turaro dipuwaja moagucumi Goãmu erãre. ³⁰ Goãmu eropa iigu arĩgure masia. Goãmu igu basi ta õpa arĩpu: “Yuhu ahraa dipuwaja moabu. Erã ñerire iira dipuwaja, dipuwaja moagura yuhu,” arĩpu igu. Õpa arĩnemopu: “Yaharãre ñero iirãre dipuwaja moagura,” arĩpu igu, arĩ gojañuma

ĩgũ yare gojarapũgue. ³¹ Goãmũ ojocarigũ marire dipuwaja moacũ guhyataria.

³² Iribojegue mũa árĩrare guñaque mũa. Irisubure Goãmũ yare ne masinugarã ñero tariquererã bajasuburi ñero tariquererã ne ĩgũ yare cóãbiribũ mũa.

³³ Yujuyerisuburi masa erã ĩhuro gajirã mũare ñero arĩ, ñero pabirama mũare. Eropirã gajirã Jesu yarãre erã ñero iicũ ĩarã erãre mojomoro ĩabũ mũa.

³⁴ Erã Cristo yarã erã árĩra waja erã peresugue árĩrãre mojomoro ĩabũ mũa. Eropirã mũa yare erã emaquerecũ ta mucubiriri mera “Ōaroca,” arĩmũribũ mũa.

I yeba maja tauro ðarire umaroguere mũa opaburire masimũribũ. Iri ðari pehrebiriborore masibũ mũa. Irire masirã mũa oparire erã emacũ bujawerebiribũ mũa.

³⁵ Eropirã irire guñatura duhubiricãque. Goãmũre eropa umupeoniguicãque. Mũa eropa iira waja mũare ðaro iigũcumi.

³⁶ Goãmũ yare ðaro iinigũicãro gahmea ne duhuro mariro. Goãmũ yare iirã bocatũuro gahmea. Eropa iirã árĩrã ĩgũ gamerire mũa iira puhũ ĩgũ “Mũare ðpa ogũra,” ĩgũ arĩ apirare oparãca.

³⁷ Ōpa āhraa Goãmũ yare erã gojarapũgue:

Merogã duh, ñero pabirama mũare. Eropiryaa Cristo ĩgũ eraboro. Eropa eragũ mata erapurumu-

jugũcumi. ³⁸ Yaharã ðarãpũ yũre umupeonigu-

icãrãcoma. Eropirã yaharã árĩniguicãrãcoma. Yũ

mera eropa árĩniguirãcoma. Yahare cóãnirãpũre

ĩhasũasome yũhũ, arĩmi Goãmũ, arĩ gojañuma.

³⁹ Maripũ Goãmũ yare cóãrã árĩbeaa mari. Eropirã peamegue wamorã árĩbeaa mari. Goãmũre umupeoa mari.

Eropirã ĩgũ taunirã āhraa ĩgũ pohro wamorã.

11

Umupeorire wererũ

¹ Ōpa āhraa umupeori: Goãmũre umupeorã, marire ĩgũ ðaro iiburire ðaro masia. ĩgũre ĩabiriquererã ĩgũre umupeorã “Diaye ta iigũ āhrimi,” arĩ pepia mari.

² Iribojegue majarã Goãmũre “Diaye ta iigũ āhrimi,” erã arĩ umupeocũ ĩagũ ĩhasũapũ Goãmũpũ.

³ Goãmũ ĩgũ wereniguiri mera árĩpehrerire ĩhacũnugupũ. Eropigũ ĩgũ mari ĩabirirare árĩpehrerire mari dohpague mari ĩari sãre ĩhacũnugupũ. Irire mari ðaro masia Goãmũre umupeorã.

⁴ Goãmũre umupeogũ Abelpũ cordero wejẽ, soe mujupũ Goãmũre umupeogũ. Eropa iigũ ĩgũ tĩgũ tauro ðaro umupeorũ ĩgũ Goãmũre. Eropigũ Goãmũ ĩgũ orare mucubiripũ.

Eropa mucubirigu “Ōagũ āhrimi,” arĩ ĩapũ ĩgu Abelre Goãmure umupeogure. Abel iribojegue sĩridigu mũru árĩquerecũ ĩgu Goãmure eropa ii umupeorare guñaã mari sã. Eropa guñarã. Goãmure umupeoa mari sã.

⁵ Enoco Goãmure ĩgu umupeocũ ĩagu mucubirimurĩpũ Goãmũ. Eropa mucubirigu ĩgure ĩgu pohroque aĩmuriarũ. Eropa ta werea Goãmũ yare werenĩguirire erã gojarapũgue. ĩgu eropa aĩmuriara pũhrũ masa ĩgure ne bocabiriñorã. ĩgu eropa aĩmuriadigu árĩgu ne sĩribiripũ. ⁶ Goãmure umupeobirã ĩgure mucubiricũ iimasibeaã mari. Goãmure serẽdiarã õpa ĩgure arĩ pepiro gahmea marire. “Diaye ta ĩgu Goãmũ gohra āhrimi. Eropigu ĩgure mari umupeocũ marire õaro iimi ĩgu,” arĩ pepiro gahmea. Mari eropa arĩ pepibirã mari ĩgure serẽmasibeaã.

⁷ Noé Goãmure umupeogu ĩgure ĩgu wererare õaro yũhrĩpũ. Pũhrũ erã ñero waborore Goãmũ ĩgure werecũ peegu õaro yũhrĩpũ ĩgu. Eropa yũhrigu wũadiru dohodiru ĩpũ ĩgu acawererã dia miririñere tarimorã. Noé eropa umupeogu árĩgu i yeba majarã ñerã erã umupeobirirare, erã taribiriboro sãre ĩhmugũ iimurĩpũ. Eropigu ĩgu umupeocũ ĩagu “Ōagũ āhrimi,” arĩ ĩamurĩpũ Goãmũ ĩgure.

⁸ Abrahã sã Goãmure umupeogu ĩgure yũhrĩpũ. Gaji yebaguere ĩgure ĩgu oburi yebaguere Goãmũ ĩgure wadorecũ ĩgure yũhrĩpũ. ĩgu ya yebare wirigãgu ĩgu masibiriri yebague ejarũ. ⁹ “I yebare mure ogũra,” Goãmũ ĩgu arĩcũ peegu ĩgure umupeogu iri yebague eja árĩmerejarũ ĩgu. Ero arĩmerejaqueregu ĩgu gaji yeba majagu árĩro dopa waimurã gasiri wiri mera wihicũ curimurĩpũ mũrano árĩbirinijagu árĩgu. ĩgu magũ Isaa sã ĩgu pãrami Jacobo sã ĩgu iiro dopa ta iimuriñorã. “Mũare i yebare ogũra,” arĩ weremurĩpũ Goãmũ erã sãre. ¹⁰ Eropigu i yebare curigu macari iibirimurĩpũ Abrahã. Gaji macague Goãmũ ĩgu árĩri macague umarogue ĩgu waborore coregu ĩpũ Abrahã. Iri maca Goãmũ iira macaũ. Eropigu ĩgu umupeocũ ĩ arĩyoro. Eropigu iri macare ne pehrebiriburi macare coregu ĩpũ.

¹¹ Goãmure umupeogo Sara waĩcũgo, buro gohra árĩquerego porã marigo árĩquerego ta porãcũpo. “Goãmũ ĩgu arĩdiro dopa ta iigũcumi,” arĩgo ĩgure umupeogo porãcũpo. ¹² Eropigu Abrahã bugu gohra árĩqueregu ta porãcũpũ. Eropirã ĩgu pãramerã árĩturiarãgue bajarã wacãñorã. Necãre, imĩpa yerire mari queorã yujuro bojeya mariro dopa ta, ĩgu pãramerã árĩturiarã sãre queo bocatũya mariñorã.

13 Árīpehrerā oā yu werenirā muraque Goāmure umu-peotuhajanirāgue sīriñorā. Goāmū “Mware ogura,” ĩgu arīrare opanibirāgue sīriñorā. Eropā opabiriquererā “Goāmū ĩgu arīdiro dopa ta pūhrūgue ogucumi guare,” arī masiñorā. Eropā masirā mucubirimūhtañorā. Eropirā ōpā arīñorā erā: “I yebague curirā āhraa. Gaji yeba majarā āhraa,” arīmuriñorā erā. 14 Eropā arīrā gaji yebare erā ya yeba árīborore corerā iñorā. Irire ōaro masia mari. 15 “Gaji yeba majarā āhraa,” erā arīrā iribojegue erā cóara yebare guñarā iibiriñorā. Iri yebague dujaa wadiarā dujaa waboñuma. 16 Ōari yebapure gahme corerā iñorā. Iri yeba umarogue āhraa. Erā eropā gahme corecū ĩagu Goāmure “Gua opu āhrimi,” erā arīcū peegu ne guhyasīribiripū Goāmū. ĩgu pohro erā ya maca árīborore iibasatuhadi árīmi ĩgu. Eropigu guhyasīribiripū.

17-18 Goāmū Abrahāre ĩgu magure Isaare wejē soe mujodorepū. ĩgure ĩadiagu eropā dorepū, “¿Diaye ta yure umupeori?” arīgu. Eropigu Goāmure umupeogu ĩgu arīdiro dopa ta iiripū Abrahā. “Mū magu Isaa mera mū pāramerā árīturiarāre opagūca mūhū,” Goāmū ĩgu arīdiro árīquerecū ĩgu magure wejēbu iiripū Goāmū dorero dopa ta. 19 “Yu magure Isaare yu wejēcū Goāmū ĩgure masugucumi,” arī pepigu ĩgure wejēbu iiripū. Eropigu Goāmū ĩgure cāhmota ĩgure wejēdorebiripū. ĩgu pagu ĩgu eropā wejēbu árīgu Isaa sīribudigu árīpū. Eropigu sīridi masadigu iro dopa árīpū ĩgu. Eropigu Abrahā ĩgure ojocarigu dipaturi opapū ĩgure.

20 Isaa Goāmure umupeogu ĩgu porāre Jacobore, Esaú sare “Pūhrūgue Goāmū mware ōaro iigucumi,” arīpū.

21 Goāmure umupeogu Jacobo ĩgu sīriboro coregā wahgānugaja ĩgu tuadigu mera tuañanugaja Goāmure serē umupeopū. Eropā serēgu José porāre umare “Goāmū mware ōaro iigucumi,” arīpū Jacobo.

22 Goāmure umupeogu José ĩgu sīriboro coregā Israe masa Egipto arīrā erā wiriaborore weremūhtarū. Eropā erā wiriaborore masiyugu ĩgu sīrira dūpū murarore aīgādorepū ĩgu porāre.

23 Goāmure umupeorā urerā abe gohra Moisere dibuñorā ĩgu pagu sumarā ĩgu masa dehyoara pūhrū. Ōagugā ĩgu arīcū ĩarā ĩgugāre dibuñorā. Iri yeba majagu tauro árīgu opu ĩgu majirāre wejēdorerire tarinugarā ĩgure dibuñorā erā. Erā erā opūre güibiriñorā. 24 Moisere masudigo i yeba majarā opu mago árīpo. Eropā igo masudigu árīqueregu, Goāmure umupeogu “Opu mago magu āhrimi,” erā arī piyucū gamebiripū ĩgu Moise.

Oparã mera majagu árĩdiabigu Goãmũ yarã mera majagu árĩdiapu. ²⁵ Goãmũre tarinũgadiagu árĩgu ïgũre masudigo pohrogue bajamenurigã õaro árĩboñumi. Eropã õaro árĩbu árĩqueregu ïgu Goãmũ yarã mera ñero taridiapu. ²⁶ Eropigu Egipto majarã ya õarire tauro Cristo ya árĩburire ñero tariburire gamepu. Pũhrũgue Goãmũ ïgũre ïgu õarire oborore masigu ñero taridiapu. ²⁷ Goãmũre umupeogu Egipto majagu tauro opu, ïgu mera ïgu guacũ güibiripu. Eropã güibigu iri yeba árĩdigu iri yebare cóãcã waha wapũ. Goãmũre ïabiriqueregu "Goãmũ árĩcumi," arĩ pepipu ïgu. Eropigu ïgu iiborore ne duhubiripu.

²⁸ Goãmũre umupeogu Moise Israe masare Goãmũ ïgu tauborore masipu. Eropã masigu Goãmũ ïgu dorediro dopa ta Israe masa erã disiporore erã tura mijirire di mera wejẽsiri tuhdorepu. Eropã dorepu anyu masare wejẽgu erã masa tĩrãre wejẽbodigu Israe masa erã masa tĩrãre wejẽbiriboro dopa. ²⁹ Goãmũre umupeorã Israe masa deco diariya waĩcariya deco watope árĩri maha deco mariri maha taribujãnorã. Erã eropã taribujacũ ïarã Egipto majarãpu erãre nũrusiarã erãre ïhacũ taribujanirã miri sĩria wañorã.

³⁰ Goãmũre umupeorã Israe masa Jericó maca sãriro, wũari sãriro pũrũpu majisora curiñorã. Siete nũri gohra iri macare majisora curiñorã erã. Iri nũcu nũri erã majisorara pũhrũ iri sãriropũ dijapehrea wayoro. ³¹ Iri maca majago ũaa mera ñero iidigo Rahab waĩcũgo Goãmũre umupeogo Israe masare itamupo. Iri macare erã cóãboro core bajamerãgã Israe masa erogue erã ñaja duhricũ ïha igo erãre itamupo. Eropirã Israe masa iri maca majarãre Goãmũre tarinũganirãre wejẽpehoquererã ta igopũre wejẽbiriñorã.

³² Gajirãre Goãmũre umupeonirãre werenemoboya yũhũ. Eropã werediaqueregu ta bajarãre eropã Goãmũre umupeorã sãre were gojapehomasibirica yũhũ. Gedeõ, Baraca, Sansõ, Jefté, Davi, Samue, Goãmũ yare weremũhtanirã sã árĩpehrerã yũ werebonirã ãhrima. ³³ Goãmũre umupeorã yujurãyeri gajĩ yebarigue árĩri macari majarãre gamewejẽ tarinũgañorã. Eropirã gajirã diaye dorenirã árĩñorã. Gajirã Goãmũ erãre "Mũare itamugũra," ïgu arĩdiro dopa ta ïgu itamurire bocañorã. Eropã ïgũre umupeorã yeea erãre badiacũ erãre erã babiricũ iĩñorã erã. ³⁴ Turaro ãjũri peameri árĩquerecũ ta ãjubiriñorã erã Goãmũre umupeonijarã. Gajirã erãre ñose wejẽdiacũ duhriãgã wañorã erã Goãmũre umupeorã. Turabirã árĩquererã Goãmũre umupeo, turarã wañorã. "Goãmũre umupeorã ãhraa. Gamewejẽ turarã ãhraa," eropã arĩrã árĩcũ gajĩ yebari majarã surara erã

wejērã arirã ne yujuro bojebiriñorã. ³⁵ Goãmure erã umupeocũ ãagũ yujurãyeri nome erã acawererã sãricũ ãagũ Goãmũ erãre masupũ.

Gajirãpũre “Goãmure gamebircãque,” erã arĩ peresu iicũ erãpũ Goãmure duhudiabiriñorã. “Mũa Goãmure duhucũ mũare taurãca,” arĩñorã erãre. Erãpũ duhubiriñorã Goãmũ mera erã òaro masaborore gamerã. Eropirã erãre erã ñero iicũ sãria wañorã. ³⁶ Gajirãre Goãmure umupeorãre ñero arĩ wereya erãre tãramuriñorã. Eropirã gajirãre guburire, mojotorire diricãa peresu iĩñorã. ³⁷ Goãmure umupeorãre ñerã utã mera dea wejẽmuriñorã. Gajirãre erã dũpũre seroti mera wiritamuriñorã. Gajirãre ñoserimijiri mera ñose wejẽmuriñorã. Erãre Cristore cóãdorerã erã ñero iimuriñorã. Gajirã erãre ñero iicũ oveja gasiri mera, cabra gasiri mera suhricũrã mojomocũrã árĩmuriñorã. ³⁸ Erã òatariarã erã árĩcũ i yeba majarã ñerã erã mera majarã árĩbonirã árĩbeama. Wiri marirã árĩrã, masa marirogue utã yucũgue árĩgãri siaricãmuriñorã. Eropa árĩgãri siarirã utã yucũgue árĩri gob-erigue, yebague árĩri goberi sãre carĩgãri siaricãmuriñorã. ³⁹ Oã árĩpehrerã Goãmure erã umupeocũ ãagũ mucubiripũ ãgũ. “Òaro iiabũ mũa,” arĩpũ. Erã eropa òaro umupeoquerecũ Goãmũ erãre “Mũare taugũra,” ãgũ arĩdiro ejanibiriya dohpa. ⁴⁰ Òpa arĩ pepipũ Goãmũ: “Oãre yaharãre, pũhrũgue árĩrã yaharã mera yujuro mera taugũra,” arĩ pepipũ. ãgũ eropa arĩ pepidiro dopa ta iigũcumĩ. ãgũ eropiicũ òatariaro árĩroca ero core ãgũ iidiro tauro.

12

Jesure eropa umupeoniguicãrã mari

¹ Eropirã oãre yũ werenirãre bajarã Goãmure umupeonirãre, ñerire iibirinirãre masirã árĩpehreri ñero iirire duhucãrã mari sã. Òpa ãhraa mari queoriñe mera werecũ: Nũcũrĩre opagũ omari masũ turaro omamasibeami. Eropa ta mari Goãmũ gamerire iimasibeaa mari ñerire iicũ. Eropirã irire duhucãrã mari. Eropirã Goãmũ ãgũ gamero dopa ta òarire iiniguicãrã. ² Eropirã Jesure eropa guñaniguirã. ãgũ ta ãhrimi marire umupeo guñaturacũ iigũ. Eropigũ marire umupeonemocũ sãre iimi ãgũ. Crusague sãrigũ yujuro bojepũ. Pũhrũ ãgũ mucubiriborore masigũ crusague sãripũ. Eropa sãrigũ gũhyasãribodigũ árĩqueregũ gũhyasãribiripũ ãgũ. Eropa iira pũhrũ dohpaguere Goãmũ ãgũ opũ ãgũ doaro diayepũ doanijagũ ãgũ dorebu iimi.

³ Ñerã masa ïgure ñero erã iicũ yujuro bojepu ïgu. ïgu eropa iidigure guñaque mua, mua sã ñero tarirã “Yujuro bojebiriboca,” arĩrã. Irire guñaque mua ïgure umupeo duhuri arĩrã. ⁴ Ñerire mua tarinugaboro dopa Jesu iro dopa ñetariaro gohra tarinibea mua. Ñerã muare wejënibeama. ⁵ ¿Goãmũ muare ïgu porãre ïgu wererare cãdijicãri mua? Õpa arĩpu ïgu:

Yu magu, yuhu mure werecũ eropa pepicãbita. Yuhu mure turicũ peegu bujawerebita. ⁶ Árĩpehrerã yu mahirãre werea. Eropigu árĩpehrerã “Yu porã ãhraa mua,” yu arĩ ïarãre tarinugadorebeaa. Eropigu erã tarinugacũ ïha erãre yu porãre merogã dipuwaja moaa, arĩpu Goãmũ.

⁷ Ñero tarirã yujuro bojeque “Goãmũ yure weregu iimi,” arĩrã. ïgu yare duhubiricãque. Goãmũ muare ïgu porãre merogã dipuwaja moagu iimi. Erã pagu sumarã erã porãre eropa werema. Eropirã erãre dipuwaja moama. Eropa ta iimi Goãmũ sã marire ïgu porãre. ⁸ Goãmũ árĩpehrerãre weremi. Goãmũ muare ïgu werebiricũ ïgu porã gohra árĩbeaa mua. Eropirã ïgu porã árĩbirã yujugu majigu ïgu pagure ïgu masibiro dopa ta ïgu weresũya marigu árĩro dopa ta ãhraa mua. Eropirã Goãmure “Yu pagu gohra ãhrimi,” arĩmasibea mua ïgu muare werebiricũ. ⁹ Mari pagu sumarã marire erã werecũ peerã erãre umupeoa mari. Mari pagu sumarãre mari umupeoro tauro umupeoro gahmea mari Pagu Goãmũ ïgu werecũ. Eropirã ïgure yuhriri gahmea marire. Eropa yuhrirã árĩpehrerinari ïgu mera árĩrãca. ¹⁰ Bajamenurigã mari pagu sumarã erã gamero dopa marire were dipuwaja moama. Goãmũpu marire ðaro weremi. Eropigu ïgu masiri mera marire dipuwaja moami marire ðarã masadoregu. Eropa iimi ïgu marire ïgu iro dopa ðarã mari árĩboro dopa. ¹¹ Marire ïgu dipuwaja moacũ mucubiribea mari. Mari bu bujawerea. Eropa bujawerequererã ta ïgu eropa dipuwaja moara puhru ðarã árĩrãca mari. Eropirã ïgu wererire peenirã árĩrã gajiropa iiro mariro ðaro árĩrãca.

Goãmũ marire ïgu dorerire mari yuhribiricũ guhya ãhraa marire

¹² Eropirã guñaturabirã árĩquererã ta Goãmure ðaro guñaturarã árĩque. ïgure duhubiricãque. ¹³ Õaro diaye maja mare mua waro dopa ta pee gorowerero mariro ðaro diaye ta Goãmure yuhrique. Mua eropiicũ ïhacũrã gajirã Jesu yarã gajiropa árĩrere iisome. Eropirã turabirã turarã warãcoma.

14 Árĩpehrerã masa mera õaro árĩque gamequeãro mariro. Eropirã ñero iibiricãque. Ñeri marirã dihta mari Opũ Cristore ïarãcoma. 15 Õaro iique mũa. Goãmũ mũare ïgũ itamucũ õaro yũhrique. Ñeri tiari iri oterire iri goroweoro dopa ta mũa sã Cristo yare duhu ñerire guñaniguibiricãque gajirãre goroweori arĩrã. 16 Ne nome mera ñero iirã árĩbiricãque. Eropirã Goãmũ yare gamebirã árĩbiricãque. Eropa árĩgũ árĩpũ Esaú. ïgũ masa tĩgũ árĩripũ. Eropigũ ïgũ pagũ yare ïgũ sĩrira pũhrũ opabu árĩripũ. Eropa árĩqueregũ yujunũ barire gametarigũ iri bari mera ïgũ pagũ magũre ïgũ tĩgũ opaborore bu gohrotopũ. 17 Pũhrũ ïgũre warare masia mũa. ïgũ eropiira pũhrũ ïgũ pagũ ïgũre Esaúre õaro árĩdoreburire Goãmũre serẽbasarire turaro gameripũ daja Esaúpũ. ïgũ eropa gamequerecũ ta ïgũ pagũ magũpũre ïgũ tĩgũ opaburire gohrotora dipuwaja ïgjiropa árĩrĩre iisome. Eropirã pagũ ïgũre obiripũ. Eropa gamegũ turaro orequeregũ ïgũ pagũre serẽqueregũ irire opamasibiripũ Esaú.

18 Goãmũ dorerire Moiserẽ ïgũ apicũgue mari acawererã Israe masa mũa Goãmũ pohro ejaboro gũhya árĩyoro. Dohpaguere mũapũre eropa árĩbeaa. Õpa wayoro erãre. Goãmũ ïgũ dorerire Moiserẽ iri dorerire apigũ erã árĩri yeba majagũ utãgũgue árĩpũ. Irigũpũ Sinai waĩcũdigũ árĩyoro. Eropiro erã Goãmũ pohro ejamorã irigũgue erã ejacũ turaro peame ãjũyoro. Eropiro naitĩaro, imica curu, turaro miru sã árĩyoro irigũ utãgũre. 19-20 Eroque erã ejacũ corneta busũyoro. Eropiro wereniguiro cariyoro. ïgũ eropa wereniguiuri ejaricũcũ peerã masa yujuro bojebiriñorã. Goãmũ erãre gũhyaro mera õpa arĩ dorepũ erãre: “Árĩpehrerã irigũ utãgũre pẽhrerãre utã mera dea wejẽque erãre. Irigũ utãgũre pẽhregũ waibũgũ gohra ïgũ árĩquerecũ ïgũ sãre utã mera dea wejẽcãque. O ñoserimiji mera ñose wejẽque ïgũre,” arĩpũ Goãmũ. ïgũ eroparĩcũ peerã yujuro bojebiriñorã erã. 21 Eropigũ árĩpehrerire utãgũguere gũhyaro árĩrĩre ïagũ õpa arĩpũ Moise: “Bũrigã gũigũ naragãgũ iiaa,” arĩpũ ïgũ.

22 Iribojegue Israe masa Goãmũ ïgũ árĩdigũ utãgũgue eja-masibiriñorã sĩriri arĩrã. Dohpaguere mũapũ Jesu yarãpũ Goãmũ árĩdigũ utãgũgue, Sion waĩcũdigũgue, umaro ma-jagũgue mũrijaro dopa ta diaye ta Goãmũ mera werenigu-imasia. Goãmũ ojocarigũ ïgũ ya macague mũrijaro dopa ta diaye ta ïgũ mera werenigũia mũa. Iri maca gaji maca mama maca Jerusalén umaro maja maca ahraa. Ero anyua bajarã gohra ahrima. Goãmũre umupeorã mucubiriri

mera gamenererã áhřima. ²³ Eropirã m̄ap̄ũ ĩgũ ya maca majarã árĩrã, erogue Goãmũ porã árĩmũhtarã mera m̄ua gamenere árĩbodiropã dopa ta áhřaa. ĩgũ porã erã waĩre ĩgũ gojaturapũgue ũmarogue erã waĩre gojatunirã áhřima. ĩgũp̄ũ mari Pagũp̄ũ árĩpehrerã beyebu áhřimi. ĩgũ mera majarã áhřaa m̄ap̄ũ. Eropirã gajirã õarã Goãmũ yarã mera gamenererã dopa ta áhřaa m̄ua sã. Erãre ta ñeri marirã iituhap̄ũ Goãmũ. ²⁴ Eropirã Jesu mera majarã áhřaa m̄ap̄ũ. Negohraguere ĩgũ dore apirare gohrotogũ “Mũare õaro iigũra yũhũ,” arĩ apip̄ũ Goãmũ marire. ĩgũ eropa arĩ apidiropã dopa ta iidigũ árĩmi Jesu. ĩgũ dire cohã ĩgũ sĩrirañe mera marire õaro taricũ iimi ĩgũ. Abelre ĩgũ di cóãrare ĩagũ Goãmũ Abelre wejẽdigũre dipuwaja moap̄ũ. Jesucristo ĩgũ di cóãrapũre ĩagũ marire dipuwaja marirã árĩcũ iip̄ũ. Eropiropã Abel ĩgũ di cóãra bu gohra árĩya. Cristop̄ũ ĩgũ di cóãra pũhrũ õatariaro iip̄ũ Goãmũ marire. Eropiropã Cristo ĩgũ di cóãra bu gohra árĩbiriya.

²⁵ Eropirã õaro iique m̄ua. Goãmũ yare m̄uare weregũre õaro yũhrirã árĩque. Iribojegue i yeba árĩdigũ Moise Goãmũ yare ĩgũ werecũ peerã, bajarã irire peedia-biriñorã. Erã eropa peediabirira dipuwaja, dipuwaja moap̄ũ Goãmũ erãre. Erã tauro dipuwaja moagũcumĩ Cristore cóãrãre. Cristop̄ũ ũmarogue árĩgũ Goãmũ yare weregũ áhřimi. ²⁶ Irisubure Moiserẽ ĩgũ dorerire ĩgũ apirasubure Goãmũ ĩgũ wereniguiropã mera yeba ñohmecũ iip̄ũ. Dohpaguepũre õpa weremi ĩgũ: “I yeba ñohmecũ yujusubu ta iinemogũra. I yeba dihta ñohmecũ iisome yũhũ. ũmarogue sãre ñohmecũ iigũra,” arĩ werep̄ũ ĩgũ. ²⁷ “I yeba ñohmecũ yujusubu iinemogũra,” arĩgũ, “Árĩpehrerire yũ ĩhacũnugurare cóãgũra,” arĩgũ iip̄ũ. Goãmũ ĩgũ op̄ũ árĩroguepũre cóãmasiya mara. Eropiropã ĩgũ ĩhacũnugurare ĩgũ cóãcũ ĩgũ op̄ũ árĩro dihta dujaroca. ²⁸ ĩgũ op̄ũ árĩrogue warãca mari. Eropirã ĩgũ op̄ũ árĩrore ĩgũ cóãbiricũ ĩarã, Goãmũre “Õhaa,” arĩrã mari. Eropirã umupeori mera, gũhyadiaro mera ĩgũ yare iirã mari ĩgũre mucubiricũ iimorã. ²⁹ Peame ũjũro gũhyaro dopa ta Goãmũ gũhyaro dipuwaja moagũ áhřimi. Eropirã ĩgũre gũhyadiaro mera umupeorã.

13

Õpa Goãmũre mucubiricũ iique

¹ M̄ua mera majarãre mahi duhubiricãque. ² Masa m̄ua masibirã árĩquerẽcũ erãre õaro mera m̄ua ya wirigue ñajaridoreque. Gajirã eropiirã, masibiriquerã anyuare

erã ya wirigue ñajaridoreñorã. Eropirã mua sã eropa ta iique.

³ Peresu árĩrãre mojomoro ãaque. M̃ap̃u erã mera peresugue árĩrã mua árĩboro dopa ta erãre mojomoro ãaque. Gajirã erã ñero tarirã sãre mojomoro ãaque. Erã iro dopa mua sã ñero tariro dopa ta erãre mojomoro ãaque.

⁴ M̃ua mojoto dirinirãre árĩpehrerã õaro game umupeq̃ue m̃ua. Eropirã mojoto dirinirã gajirã mera ñero iirã árĩbircãque. Árĩpehrerã ɰma nome mera ñero iinirãre, nome ɰma mera ñero iinirã sãre dipuwaja moag̃ucumi Goãm̃u.

⁵ Niyerure gamerã ne árĩbircãque. Õpa arĩp̃u Goãm̃u: "M̃uare ne cóãsome. Eropa itamuniguig̃ura," arĩp̃u ãgu. Eropirã mua opari mera irip̃eta mucubirique. W̃uaro gamenemobircãque. ⁶ Eropirã güiro mariro õpa arĩ pepirãca marmera m̃ua ya wirigue ñajaridori:

Mari Op̃u marire itamug̃u ãhrimi. Eropirã ne güisome mari. Masa marire erã ñero iiborore güisome mari, arĩ pepirãca mari.

⁷ Goãm̃u yare m̃uare werenirãre m̃uare dorenirãre guñaque m̃ua. Eropirã õaro erã árĩricurare guñaque. Eropa guñarã, Cristore erã umupeorare ãhacũque m̃ua.

⁸ Jesucristo ne gohrotobeami. Iribojegue, dohpague sãre, puhrugue sãre ãgu árĩdiro dopa ta árĩniguicãg̃ucumi ãgu.

⁹ Baja buheri gajiropa árĩri buherire peebircãque õari buherire g̃uague cohãri arĩrã. "Ire baque. Ire babircãque," arĩ buhemaacãma gajirã. Eropa arĩrire mari yuhricũ iri marire itamubeaa. Eropiro eropa arĩ buherire mari iicũ bu gohra ta ãhraa. Iri marire guñaturarã árĩcũ iibea. Goãm̃u marire guñaturacũ iimi.

¹⁰ Cristo mari ñeri dipuwajare s̃iridi árĩmi mari ñerire cóãbu. Pahiap̃u õpa arĩrã ãhrima: "Waibug̃u ỹu Goãm̃ure wej̃e soe mujucũ, Goãm̃u mera tarig̃uca," arĩrã iirima erã. Eropa arĩrã erã ñeri iirare ne cóãñirã árĩmasibea.

¹¹ Pahia op̃u Goãm̃u ãgu árĩri taribu gohrague waibug̃u wej̃edig̃u dire aĩ ñajag̃u Goãm̃ure óp̃u masa erã ñerire cóãdoreg̃u. Eropig̃u ãgu wej̃edig̃u waibug̃ure iri maca turogue soe cóãcãñorã. ¹² Eropa ta Jesu sã maca turogue s̃irip̃u. ãgu di cóãri mera masa ñeri marirã wacũ iibu s̃irip̃u.

¹³ Maca turogue ãgu s̃iricũ ãarã, erã buherire ãgu cóãcũ ãarã judio masa ãgure ãhaturiñorã. Eropirã mari sã ãgu mera majarã árĩrã. Mari eropa árĩcũ ãarã masa mari sãre ãhaturirãcoma. ¹⁴ Erã marire ãhaturiquerecũ ãhraa. I yebague mari árĩwajaburi maca árĩbeaa. Mari puhrugue árĩburi macare corerã iiaa mari. ¹⁵ Eropirã Jesu

ĩġu itamuro mera ĩġu Paġu mera wereniguia mari. Eropirã ĩġure ðaro serēniguicãrã. “Mari Paġu turagu ãhrimi,” arĩ umupeoniguirã gajirãre wererã. Mari eropa arĩ werecũ ĩġu mucubirigũcumĩ. ¹⁶ Mũa mera majarãre ðaro iique. Mũa oparire gajirã sãre oque. Irire cãdijibiricãque. Mũa eropa ðaro iirã Goãmũre umupeorã iica. Eropa iirã ĩġure mucubiricũ iirãca.

¹⁷ Mũa oparãre ðaro yũhrique. Erã dorero dopa ta yũhrique. Goãmũ mũare ĩhadibu buhedoreġu apimi erã oparãre. ĩġu eropa apinirã árĩrã eropa mũare ĩhadibuniguirã iima Goãmũre tarinũgadiabirã. Eropirã erãre ðaro yũhrique mũa erã mucubiriri mera mũare itamuboro dopa ta. Mũa yũhribiricũ ĩarã erã bujawererãcoma. Eropa yũhribirã ðaro árĩsome mũa.

¹⁸ Ģũare serēbasaniguique Goãmũre. Ʋmũri nũcu ðari dihtare iidiaa ġua. Eropirã “Ñerire iirã iiaa,” arĩ pepibea ġua. ¹⁹ I tamerare turaro serēbasaque Goãmũre yũre: Yojarõ mera yũ mũa pohroque wamasiborore serēque Goãmũre.

Ipũ gojabeodigũ ðadoretupũ

²⁰ Goãmũ marire ðaro árĩcũ iigũ ãhrimi. ĩġu mari Opũ Jesucristo sĩridigũre masupũ. ĩġu “Mũare ðaro iigũra,” marire arĩ apidigũ ãhrimi. ĩġu eropa arĩrare iinijagu Jesupũ marire taugũ ãhrimi. Mari ñeri dipuwajare ĩġu di cohã sĩripũ ĩġu. Eropigũ ĩġu turagu, ovejare ĩhadibugũ iro dopa árĩġu, marire ĩġu yarãre ðaro ĩhadibumi. ²¹ Eropigũ Goãmũ ĩġure masudigũ mũa sãre itamuporo árĩpehreri ĩġu gamerire mũa iiboro dopa. Eropigũ Jesucristo ĩġu itamuri mera Goãmũ ĩġu gamero dopa ta árĩpehrerã marire ðarire gohrotocũ iiporo. Eropirã árĩpehrerinũri Cristore umupeorã. Eropa ta iirã.

²² Ʋũ acawererã, ire turaro mũare doreġura: Ipũ mũare yũ wererare ðaro mera peeque mũa. I yũ mũare gojabeoripũ wũaripũ árĩbeaa. Eropirã ire ðaro peeque. ²³ I sãre mũare weregũra: Mari acaweregũre Timoteore peresu árĩdigũre wiuañorã. Dohpagohragã ĩġu aricũ yũhũ ĩġu mera mũare ĩagu wagũra.

²⁴ Mũa oparãre, árĩpehrerã gajirãre Goãmũ yarãre ero árĩrãre ðadorea. Italia majarã Jesu yarã sã mũare ðadorea.

²⁵ Árĩpehreri mera Goãmũ mũare ðaro iiporo. Eropa ta iiporo. Iripẽta ãhraa.

Santiago

Santiago Israe masare macari wasirinirãre gojabeoñumi

¹ Yuhũ Santiago ipũ mera mũare õadore gojabeogu iiaa. Goãmũ mari Pagu pohro majagu ãhraa. Mari Opu Jesucristo yare mohmegũ ta ãhraa yuhũ. Eropigu mũare Israe masare doce cururi majarãre Jesu yarãre macari wasirinirãre yũ acawererãre gojabeogu iiaa.

Goãmũ õaro pee masirire ohomi marire, arĩ gojañumi Santiago

² Yũ acawererã, baja árĩroca mũa ñero tariburi. Mũa ñero tariquererã õaro mucubiriri mera pepicãque. ³ Eropa ñero tarirã, Jesure mũa umupeorire diaye ta árĩcũ ñhmurã iica. Eropirã ñero tariquererã Jesure mũa õaro umupe-oniguicãnirã ñgũre umupeonemorã warãca. Eropa warã mũa ñero taririre bocatĩurãca. ⁴ Eropirã eropa bocatĩurã árĩque mũa duhuro mariro õaro pee masirã mũa árĩboro dopa.

⁵ Goãmũ duhyaro mariro árĩpeherrerãre ohomi. Eropa ogũ ñgũre serẽrãre turibeami ñgũ. Ñgũ eropa árĩgũ árĩcũ masirã mũare pee masiri duhyarire ñgũre serẽque. Mũa eropa serẽcũ mũa masiburire onemogũcumi ñgũ mũare duhyaro mariro. ⁶ Eropa serẽrã Goãmũre õaro guñaturanijarã serẽque mũa. “Gũa serẽcũ Goãmũ guare obiribocumi,” arĩ pepibiricãque. Eropa arĩ pepirã wũariya maja pãgũri iro dopa ãhrima. Pãgũri iri dũrũro gohroto dopa ta erã sã erã guñarire dũrũro gohrotoma. Eropirã Goãmũre “Diaye ta iigu ãhrimi,” arĩ umupeobeama. ⁷ Eropa arĩ pepirãre erã serẽquerecũ ta ne merogã erã serẽrere osome erãre mari Opu. ⁸ Dohpagãre ire gamedigu árĩqueregũ daja ñamigãre gajiropa guña wahgãmi daja. Eropa guñagũre ero wabeaa.

⁹ Jesu yarã bu árĩrãre mojomorocũrãre Goãmũpũ oparã iro dopa ñhami erãre. Ñgũ eropa ñarã árĩrã mucubiriri mera árĩporo. ¹⁰ Eropirã Jesu yarã doberi oparã árĩrãpũ erã doberi pehrebore masirã mucubiriporo. Erã doberi bu árĩri ãhraa Goãmũ ñgũ ñacũ. Doberi oparã erã doberi taa gori iro dopa pehrea waroca. Eropirã erã sã mucubiriporo. ¹¹ Abe mũririgũ ñgũ turaro asicũ taapũ ñañia wahaa. Eropiro goripũ ñañi dija wa, õari gori iri árĩra pehrea wahaa. Eropa ta waroca doberi oparã erã doberire erã aĩ gameneoro watope. Erã iri doberi mera ta dederea warãcoma.

Ñero iidorerire tarinugagu mucubirigu āhrimi, arī gojañumi Santiago

¹² Ñero tarigu bocatūgu, ñero iidorerire tarinugagu mucubirigu āhrimi. Īgu eropa bocatūcū, ĩgu ñerire tarinugacū árīpehrerinuri nucu umaro maja ojocaririre ĩgure ogucumi Goāmū. “Iri ojocaririre oguca,” arī apipū Goāmū árīpehrerā ĩgure mahirāre. ¹³ Mua ñerire iidiarā “Goāmū yure ñero iidoregu iimi,” arī pepibita. Ñerire iidorebeamī Goāmū marire. Eropigu ĩgupu masare ñero iidoregu árībeamī. ¹⁴ Masa erā turaro ñerire erā uaribejari ta iri ta erāre ñero iicū iiaa. ¹⁵ Eropirā iri ñerire uaribejama masa. Eropirā iripure pepima. Eropā pepirā iri ñeripure iiniguicāma erā. Erā eropa iiniguiri dipuwaja Goāmū erāre peamegue cóāgucumi.

¹⁶ Eropirā yu acawererā, yu mahirā, ne yujugu mu basi guayabita. “Goāmū yure dorecū ñero iiaa,” arī pepibita. Diaye árībeaa iri. ¹⁷ Mari Pagu umaro majagu marire ōari dihtare ohomi. Īgu tamera abe umu majagure, ñami majagure, necā säre ĩhacūnugudigu árīgu, ĩgupu ne gohrotobeamī. Eropigu ĩgu árīniguidiro dopa árīniguicāmi. ¹⁸ Īgu gamediro dopa ta ĩgu ōari buheri mera marire ĩgu porā wacū iimi mari ĩgu yarā árīmūhtarā árīboro dopa.

Diaye maja Goāmure umupeori ōpa āhraa, arī gojañumi

¹⁹ Yu mahirā, yu acawererā, ire ōaro peeque mua. Goāmū yare ōaro peeque mua. Eropā peerā, pepiro mariro wereniguibiricāque. Eropirā guabiricāque. ²⁰ Yujugu ĩgu guagu árīcū sūabeamī Goāmū. ²¹ Eropirā árīpehreri mua ñeri iirire, mua ñerire uaribejarare duhuque mua. Eropirā Goāmure ōaro yūhrirā árīrā ĩgu buherire peeñaque mua. Īgu ya buherire mua peecū Goāmupu mware peamegue wabonirāre taugucumi.

²² Īgu yare peequererā ta yūhribirā ñerire guyarire pepirā iiaa mua. “Yūhribiricū ōaroca,” arī pepirā guyarire pepirā iica mua. Eropirā ĩgu yare peerā iripure iique. ²³ Goāmū yare peequererā ta yūhribirā, ĩgu diapore diuru mera aī ĩaro dopa āhraa mua. ²⁴ Īgu ĩgu diapore ĩara pūhrū waha, ĩgu ĩarare cādijiro dopa ta mua Goāmū yare peequererā irire cādija waha. ²⁵ Eropigu gajigupu ĩgu peerare cādijibigupu Cristo ĩgu dorere ōaro guñagu irire iigu mucubirigu árīgucumi. Īgu tamera ĩgu peerare iicū Goāmū ōaro iimi ĩgure. Iri doreri “Cristo ĩgu mahiri mera masare taumi,” arī buheri āhraa. Iri buherire ne cóābigu mucubirigu árīgucumi.

²⁶ Yujugu ĩgu gamero arĩmaacãgu, diaye ta Goãmure umupeobeami. "Goãmure ðaro umupeoa," arĩ pepibodigu árĩqueregu ta ĩgu basi ta guyagu iimi. "Goãmure umupeoa," arĩgu árĩqueregu ĩgu Goãmũ yare yuhribiricũ ĩgu umupeori ne duhpiburi árĩbeaa. ²⁷ Diaye ta Goãmũ mari Pagure mari umupeorã, ĩgu gamero dopa ta umupeorã ðpa iiaa mari: Pagu sumarã marirãre, wapeweyarã sãre erã ñero taricũ ĩarã, erãre itamua mari. Eropirã i yeba majarã ñeri erã iirinore iidiabeaa mari. Eropa iirã diaye ta Goãmure umupeorã iiaa mari.

2

Masare yujuropa ðaro iiro gahmea marire, arĩ gojañumi

¹ Yũ acawererã, ðatariagure Jesucristo mari Opure peerã, ĩgure umupeorã ãhraa mũa. Eropa umupeorã árĩrã masare yujuropa ðaro iiro gahmea mũare. ²⁻³ Eropi doberi opu oro berorire, mojoto sañari berorire opagu, wajacurire suhricugu mũa Jesu yarã gamenerero pohrogue ĩgu aricũ ĩarã ĩgure ðaro mera bocatĩriboca. "Ohõ doaro ãhraa," arĩboca mũa ĩgure. Eropa ĩgure arĩquererã ta irisubu ta gajino moogu mojomorocugu sã ñeriñe suhricugu sã mũa pohro ĩgu aricũ ĩarã ĩgupure ðaro bocatĩribiriboca mũa. "Ohõ niguique. Ohõ yeba doaque," arĩboca mũa ĩgure. ⁴ Mũa eropa iirã masare yujuropa iibirã iiaa mũa. Eropirã ñerire pepirã masare beyerã iro dopa árĩrã iica mũa. "Īpu niyerucugu ðagu ãhrimi. Īpu gajino moogu ñegu ãhrimi," arĩ beyea mũa.

⁵ Yũ acawererã, yũ mahirã, yare peeque. Bajarã mojomorocurãpũre Goãmure erã ðaro umupeomorãre, ĩgu opu árĩroguere árĩmorãre beyepũ Goãmũ. "Eroguere warãca mũa," arĩ apipũ Goãmũ ĩgure mahirãre. ⁶ Erãre ĩgu beyequerecũ ta mũapũ mojomorocurãre ðaro umupeobeaa. Doberi oparãpũ mũare ñero iimurima. Eropirã erã opu pohrogue mũare aĩ taragãma mũare weresãmorã. ⁷ Mũapũ "Cristo ðagu yarã," masa erã arĩrã ãhraa. Baja doberi oparãpũ Cristore ñero arĩ wereniguima.

⁸ Goãmũ mari Opũ doreri tauro doreri ðpa arãa: "Mũ basi mahiro dopa ta mũ pohro árĩrã sãre mahique," arãa. Iñe doreriñere iirã, ðarire iiaa mũa. ⁹ Masare yujuropa umupeobirã ñero iirã iiaa mũa. Eropa iirã Goãmũ dorerire tarinugarã ãhraa mũa. Eropa ta arãa Goãmũ yare erã gojarapũ. ¹⁰ Goãmũ dorerire iirã árĩquererã ta yujuñe doreriñegãre mũa iibirã ñeri dipuwajacurã wahaa. Mũa yujuñegãre tarinugarã árĩpehreri ĩgu dorerire tarinugarã wahaa. Eropa iirã ñeri dipuwajacurã árĩnia

mua dohpa. ¹¹ “Gajigu marapo mera ñero iibita,” arigu Goãmu ta ãhrimi. “Masare wejêbita,” arĩ doregu igu ta ãhrimi Goãmu. Gajigu marapo mera ñero iibiriqueregu ta masare wejêgu Goãmu igu dorerire tarinugagu ãhrimi igu. ¹² Cristo marire turaro mahigu, marire doremi taubu. Igu dorerare mari iirare, mari iibirira sãre iagu marire beyegu arigucumi. Igu eropa beyemorã árĩrã igu dorerire ñaro iirã. Eropirã igu gamero dopa ta wereniguirã mari. ¹³ Dohpaguere mari gajirãre mojomoro ñabiricũ Goãmu muare igu masare beyerinu árĩcũ muare mojomoro ñasome. Eropigu mari mojomoro ñacũ iagu Goãmuru marire dipuwaja moasome.

Cristore umupeorãru ñarire iima, arĩ gojañumi

¹⁴ Yu acawerẽ, peeque mua yure. “Cristore umupeoa yuhu,” yujugu igu arĩ pepiquerẽ ta gajirãre igu ñaro itamubiricũ igu “Cristore umupeoa yuhu,” igu arĩrapu ne duhpiburi árĩbeaa. Eropa arĩ pepimaacãgure Goãmu tausome. ¹⁵⁻¹⁶ Jesu yagu, Jesu yago ñeri dihta erã suhri opacũ ñarã erã bari moocũ ñarã dohpa iiri mua erãre? “Ñaro árĩque mua. Eropirã ñaro suhricãque. Ñaro bari mera yapi wahgãque,” arĩquererã erã gamerire mua obiricũ mua eropa arĩri ne duhpiburi árĩbeaa. ¹⁷ Eropirã “Cristore umupeoaa yuhu,” mua arĩquererã ta ñarire mua iibiricũ Cristore mua umupeori ne duhpiburi árĩbeaa.

¹⁸ Gajigu i yu wererire igu peediabiricũ ñpa arĩnemoboya yuhu igure. Ñarire iibiriqueregu ta “Cristore umupeoa yuhu,” arĩraa mahu. Mahu ñarire iibigu Cristore mu umupeorire ñmupiburi árĩbeaa. Eropa arĩ pemasibea mahu. Yuru yu ñari iiri mera Cristore yu umupeorire ñmua, arĩnemoboya yuhu igure. ¹⁹ “Goãmu yujugu ta ãhrimi,” arĩ pepima masa. Mua eropa arĩ pepicũ ñapũricãa. Eropa árĩquerecũ ta iripẽta mua Goãmure yuhribiricũ “Igu Goãmu ãhrimi,” mua arĩri duhpiburi árĩbeaa. Watẽa sã mua pepiro dopa ta “Goãmu ta ãhrimi yujugu ta,” arĩ pepima. Eropirã Goãmu igu árĩricãre masima erã. Eropa masirã gũi naragãma. ²⁰ Yujugu ñarire iibiriqueregu ta “Cristore umupeoa,” arĩ pepigu arĩgu pee masibigu ãhrimi. “Cristore umupeoa,” arĩgũno gajirãre ñaro iibigu diaye ta Cristore umupeobeami. Ñpa arĩ werẽgura muare irire: ²¹ Iribojegue Abrahã mari ñecu igure umupeorire Goãmu masidiañumi. Eropigu igu magure Isaa waicãgure aigã wejẽdoreñumi. “Yure umupeogu yure yuhribocumi,” arĩ igu árĩricãre masima erã. Eropa masirã gũi naragãmagu wejẽdoreñumi. Eropigu Abrahã Goãmu igu dorediro dopa

ta ĩḡu magũre aĩḡã Goãmũre obu ĩḡure wejẽbu iiriñumi. ĩḡu eropa yũhricũ Goãmũ ĩḡure “Wejẽbita,” arĩñumi. ĩḡu dorediro dopa ta iibocuricũ ĩaḡu “Diaye ta õaḡu ãhrimi,” arĩ ĩañumi Goãmũ ĩḡure. ²² ĩḡu eropa arĩ ĩacũ ire masia mũa: Abrahã Goãmũre umupeoḡu ĩḡu dorerire yũhriñumi. Eropa yũhriḡu Goãmũre ĩḡu umupeorire ii ĩhmuñumi. ²³ Eropiḡu erã Goãmũ yare erã gojarapũ erã arĩ gojadiro dopa ta eropa wayoro: “Abrahã Goãmũre umupeorũ. ĩḡu eropa umupeocũ ĩaḡu “Õaḡu ãhrimi ĩḡu,” arĩ ĩapũ Goãmũ ĩḡure,” arĩ gojañuma Goãmũ yare erã gojarapũḡere. ĩḡu eropa arĩ ĩacũ masirã “Abrahã Goãmũ mera majagũ ãhrimi,” arĩñuma masa ĩḡure.

²⁴ Eropirã ire masia mũa: “Goãmũre umupeoa,” arĩḡu, ĩḡu õarire iibiricũ ĩaḡu Goãmũpũ ĩḡure “Õaḡu ãhrimi,” arĩ ĩabeami. Goãmũre umupeoḡupũ diaye ta ĩḡu õaro iicũ ĩaḡu “Õaḡu ãhrimi,” arĩ ĩhami Goãmũ ĩḡupũre. ²⁵ Eropa ta arĩ ĩañumi Goãmũ Rahab waĩcũḡore uma mera ñero iimũridigore. Josuẽ ĩḡu obeonirãre õaro bocatĩri “Õaro ñajarique,” arĩñumo iḡo erãre. Eropa iḡo erã dujadiacũ iḡopũ erãre gajĩ mare ĩhmuñumo erãre ĩhaturirã wejẽri arĩḡo. Eropa Goãmũ yarãre itamugo Goãmũre iḡo umupeorire ĩhmuñumo. Iḡo eropa iicũ ĩaḡu “Õaḡo ãhrimo,” arĩ ĩañumi Goãmũ iḡore. ²⁶ Eropa ta ãhraa. Mari dũpũre sĩporã maricũ ojocaribea mari. Eropiro sĩporã mariro mari dũpũ duhpiburi dũpũ árĩbeaa. Eropa ta “Goãmũre umupeoa,” arĩquererã ta gajirãre õaro iibirã mari árĩcũ diaye árĩbeaa mari umupeori. Eropiro mari umupeori duhpiburi árĩbeaa. Sĩporã mariro erãre ĩhaturirã wejẽri arĩḡo. Eropa Goãmũ yarãre itami dũpũ iro dopa ta ãhraa.

3

Mari disiro wiririre wereñumi

¹ Goãmũ yare masare buherãre ĩḡu yare erã buhe-maacãcũ, erã õaro iibiricũ ĩaḡu erã tamerare gajirã tauro dipuwaja moaḡucumi Goãmũ. Iririre mũa masia. Eropirã mũa mera majarã masare buherã bajarã árĩbita. ² Árĩpehrerã mari bajasuburi ñerire iiaa. Yujugũ ñerire ne wereniguibigu Goãmũ gamerire õaro iigu ãhrimi ĩḡu. Eropiḡu gajĩ ñeri sãre iibeami. ³ Mari werenigui queori mera buhecũ õpa ãhraa i: Cabayure ĩḡu disiro comemiji ĩḡu nerore ñehadiuburimijire mari apia ĩḡure majinũḡacũ iimorã. Eropirã irimiji comemiji mera ĩḡure ĩḡu waborore mari taramajinugua. Irimijigã mirimijigã árĩquerecũ ta irimiji mera ĩḡu dũpũre wacũ iiaa. Eropa ta mari

disiro mera miri disirogã árĩquerecũ ta wuaro wacũ iiaa mari. ⁴ Dohodiru queoriñere werenemogura mũare: Gasiru wuadiru iriru árĩquerecũ ta irirure miruñe turaro weãquerecũ ta autugupu miri mijigã mera iriru waborore autumi. ⁵ Eropa ãhraa mari wereniguiri. Mari disiro miri disirogã árĩquerecũ ta baja wereniguiri wiria. Miri peamegã wuaro ñju wahgũro dopa ta mari disiro mera wuaro ñero wacũ iiaa. ⁶ Eropiro mari wereniguiri peame iro dopa ãhraa. Mari wereniguiri árĩpehrerire ñerire iicũ iiaa marire. Peame ñjunũgaro 4 Dohodiru queoriñere werenemogura mũare: Gasiru wuadiru iriru árĩquerecũ ta irirure m dopa ta mari wereniguiri mera mari õaro árĩbodiore goroweoa mari. Mari ñerire wereniguirã watĩ dorero dopa ta eropa iirã iiaa. ⁷ Árĩpehrerãre nũgu majarãre waimurãre, mirimagu porãgãre, waimurã paharãre, waire mari masa seyacũ iimasia. Eropirã mari bajarã erãnore masa seyacũ iituhabu. Eropirã erã õaro masa seyacoma. ⁸ Erãre masa seyacũ iiquererã ta mari wereniguiri mera mari basi pee masiri mera wereniguicũ iimasibea. Marriru árĩquerecũ ta irirure mi ejorãre nijiyajaro dopa ta mari disiropu ne nijiyajabirigohracãa. Mari wereniguiri ñetariari ãhraa. Eropiro aña gajirãre ñgu wejẽro dopa ta marire gajirã sãre ñetariaro wacũ iiaa mari disiro. ⁹ Mari disiro mera mari Pagu mari Opu Goãmure mari õaro arĩ wereniguia. Eropa wereniguiquererã ta masapure ñero arĩ wereniguia. Goãmũ iro dopa árĩrã ñgu ñhacũnugunirã árĩquerecũ ta erãre ñero arĩ wereniguia mari. ¹⁰ Yuju disiorriru árĩquerecũ ta irirure me ta ñeri wereniguiri sã, õari wereniguiri sã wiria. Yu acawererã eropa arĩ wereniguibiricãro gahmea. ¹¹ Maugã dipa ohma wiuri gobere yuju gobere õari dihta wiria. Gaji gobere ñeri dihta wiria. Eropirã Goãmũ yarã sãre õari dihtare wereniguio gahmea. ¹² Yu acawererã, iguigu poegu ducare ducacumasibea. Eropiro poegupu iguigu ducare ducacumasibea. Eropi maugã dipa ohma wiuri gobere moayuari deco wiricũ, imisĩri deco sã wirimasibea. Eropa ta mari disirore õari wereniguiri, ñeri wereniguiri mera wiricũ gamebiricãro gahmea.

Diaye maja masiri õpa ãhraa, arĩ gojañumi Santiago

¹³ Yujurãyeri mũa mera majarã masirã ãhrima. Eropirã "Gajirã tauro gua masirã ãhraa," arĩbiricãporo. Eropa arĩbirã ta õarire iique mũa. Eropa õarire iirã diaye ta masirã ãhraa mũa. ¹⁴ Eropirã gajigu gajinore ñgu opacũ ñhaturirã, mũa ya árĩburi dihtare iidiarã árĩrã,

“Goãmũ yare òaro masia gua,” arĩbircãque. Mũa eropa arĩrã árĩrã gũyarã àhraa mũa. ¹⁵ Eropa ñerire pepirã erã ya pepiri Goãmũ ya pepiri árĩbeaa. Erã pepiri i yeba majarã erã ñero pepiri àhraa. Erã pepiripũ watĩ ya àhraa. ¹⁶ Masare ìhaturirã, erã ya árĩburi dihtare iidiarã eropa game dũyasoniguicãma. Árípehreri ñerire iima. ¹⁷ Gajirãpũ Goãmũ yare òaro masiri oparãpũ erã tamera eropa iimaacãrã iibeama. Eropirã erã ne game dũyasobeama. Eropa iirã masa òarã, dorerire òaro yuhrirã, mojomoro ìarã, masare itamurã, masare yujuropa iirã àhrima erã. Irire iirã gũyaro mariro iima erã. Eropirã pee masirã gohra àhrima. ¹⁸ Eropirã gamequeãro mariro árĩrã, gajirãre “Gamequeãbircãrã mari,” arĩ bosarã òarã wacũ iirã iiaa mari masare.

4

I yeba maja ñerire gamerã, Goãmũre gamebirã àhraa mũa, arĩ gojañumi ìgũ

¹ ¿Duhpirã mũa game dũyasori? ¿Eropirã duhpirã gamequeãri mũa? Ñerire ùaribejarã gamequeãdiaa mũa. ² Gajinore mũa gahmea. Eropa gamerã masare wejẽa mũa mũa erã yare emamorã. Eropirã gajigũ gajinore ìgũ opacũ ìarã irire mũa burigã gahmea. Eropa gamerã irire aĩmasibeeaa mũa. Eropirã irire game dũyaso gamequeãa mũa. Goãmũre serẽbirã, mũa gamerire bocabeeaa. ³ Eropirã serẽrã mũa ya árĩburi dihtare serẽa mũa mũa gamero dopa ta iiniguicãmorã. Eropa mũa serẽcũ Goãmũ mũa serẽrere obeami. ⁴ Goãmũre cóarã ùa mũa. I yeba maja ñerire gamerã, Goãmũpũre gamebirã àhraa mũa. ¿Irire masibeari mũa? Eropigũ i yeba majarã ñerire gamegũ Goãmũre gamebigũ arĩtuhami. ⁵ Òpa arĩñumi Goãmũ yare erã gojarapũ: “Goãmũ ìgũ Espĩritu Santore mari mera árĩbure apimi. Eropigũ Espĩritu Santopũ marire mahigũ ñerire mari ùaribejarire gamesãbeami ìgũ. Eropigũ doero dopa ta marire turaro mahimi erãgue ñerire iiri arĩgũ,” arĩ gojañumi iribojeguerẽ. Ìgũ eropa arĩ gojara bu gohra árĩbeaa. Diaye arĩro tiiaa. ⁶ Eropigũ Goãmũ marire òaro itamumi mari ñerire iibiriburire. Òpa àhraa Goãmũ yare erã gojarapũ: “ ‘Yũ tamera gajirãre masi tarinũgaa,’ arĩgũre Goãmũ ìhaturimi. Gajigũpũre ‘Ñegũ bu arĩgũ àhraa yũhũ,’ arĩgũpũre Goãmũ itamumi ñerire ìgũ iibiriborore,” arãa ìgũ yare erã gojarapũ. ⁷ Eropirã Goãmũre òaro yuhrirã árĩque mũa. Eropirã watĩre yũhribircãque. Mũa eropa yũhribircũ ìagũ ìgũpũ mũare duhucãgũcumĩ. ⁸ Goãmũre

õaro yuhrique mua. Mua eropa iicũ ïgũpũ mũare mahi itamugũcumi. Ñerã áhraa mua. Eropirã ñerire iinemobiricãque. Ñeri sãre gahme, õari sãre gamerã áhraa mua. Eropirã mua ñeri iirare bujawereque. Mua eropa iicũ ïagu Goãmũ mua ñeri iirare cãdijigũcumi. ⁹ Mua ñeri iirare turaro bujawereque. Eropirã mua ñeri iira dipuwajare oreque. Mucubirirã árĩbiricãque. Eropirã mua ñeri iirare ñero sĩporãcũ, irire guhyasĩriñariro pepique. ¹⁰ “Ñegũ bu árĩgu áhraa yũhũ,” arĩrã Goãmũre umupeoque. Mua eropa iicũ ïagu ïgũpũ mua ñeri iirare cóãgu “Õarã áhraa,” arĩ ïagũcumi mũare.

Erã acawererãre Jesu yarãre erã basi ñeri quere iidorebiriñumi

¹¹ Yũ acawererã, Jesu yarã arĩrã, mua basi ñeri quere iibiricãque. Mua acaweregure ñeri quere iirã ïgure dipuwaja moadorediarã árĩca mua. Cristo doreripũ masare dipuwaja madoreri árĩtuhaa. Eropirã masare ñeri quere iirã Cristo ya dorerire õpa arĩrã iica: “Marire õaro dorebeaa Cristo ya. Eropirã mari gamero dipuwaja madorerã,” arĩrã iica masare ñero werewuarã. Eropa arĩrã Cristo dorerire ñero arĩ wereniguirã dujaa mua. Eropirã iri dorerire yuhribirã dujaa. ¹² Masare dorerire ogu, masare beyegu Goãmũ ta áhrimi. Eropigu masare peamegue wabonirãre ïgu ta taumasimi. Eropigu ïgu ta masare peamegue cóãmasimi. Eropirã maripũ masare “Ñerã áhriima,” arĩmasibea. Mari acawererãre beyebu Goãmũ dihta áhrimi.

Ñamigãguere dohpa marire waborore masibea mari

¹³ Dohpaguere yũre peeque mua. Õpa arĩboca mua Goãmũre guñaro mariro: “Dohpagãre o ñamigãre gaji macague arĩrã warãca. Eroguere yuju bojori arĩrã, gajinore dua, asũ iirãca. Eropa iirã wajatarãca mari,” arĩboca mua. Eropa arĩrã arĩrã, yũpũre peeque mua. Eropa arĩrãre ire werebu iiaa: ¹⁴ Ñamigãguere dohpa marire waborore masibea mari. Imica áhri, mata pehremaaro dopa ta áhraa mari árĩricuri. Imica merogã árĩniguirã pehrea waha. Eropa mari sã merogã árĩniguirã sĩria warãca. ¹⁵ Eropirã õpa arĩ pepiro gahmea mũare: “Goãmũ ïgu gameropẽ arĩrãca mari. Eropirã ïgu gamero mera iirãca mari,” arĩ pepiro gahmea mũare. ¹⁶ Mũapũ “Dohpaguere mari gamero õpa iirãca,” arĩniguirãa mua Goãmũre guñaro mariro. Eropa arĩ wereniguirã ñerire iirã iiaa mua. ¹⁷ Eropirã õarire mari iiburire masiquererã ta irire iibirã ñerire iirã iiaa mari.

5

Doberi oparãre wereñumi Santiago

¹ Doberi oparã mua dohpaguere peeque yure. Puhruaguere mua ñero tarirãca. Eropirã gaguinigui orerãca mua. ² Mua doberi boapehrea waroca. Eropiro mua suhrire sarirã sã bapehocãrãcoma. ³ Mua niyerure mua wuaro dibura ne duhpiburi árĩbeaa. Mua eropa dibucũ ñagu mua niyerure mahicũ masimi Goãmũ. Eropirã niyerure mua mahira dipuwaja ñero tarirãca. Iri dipuwaja peamegue warãca. ⁴ Mua ya poerire mohme corerãre wajayebeaa mua. Eropirã mua erãre guyaa. Eropigu erãre mua wajayebirira niyerure ñagu, mua guyarare masimi Goãmũ. Muare mohme corerã wajaseadiarã, gaguiniguima erã. Erã eropa arĩ gaguiniguicũ mari Opũ turatarigu peemi erãre. ⁵ I yebaguere baja doberi mera árĩricua mua. Árĩpehrerire oparã mua gameri dihtare mua uaribejarire iiaa mua. Eropirã wuagu wecu erã ñaro ejogu iro dopa árĩricua mua. Eropirã wuagu wecu ñgu diserecũ ñarã ñgure erã wejẽburi gorogue aĩ wahgãma. Eropa ta mua sãre wuaro mua opara puhru muare ñgu dipuwaja moarogue aĩgãgucumi Goãmũ muare. ⁶ Ñarãre peresu iidore wejẽdorebu mua erãre. Mua eropa iicũ erãpu duhri wiriamasibirama.

Cristo ñgu dujariborore ñaro coredorepu marire Santiago

⁷ Eropirã yu acawererã, mari Opũ Cristo ñgu i yeba ñgu dujariborore ñaro coreyuque. Pohe opũ ñgu oteri ducacuburisubure ñgu ñaro corero dopa ta ñaro coreyuque Cristo dujariborore. Ñgu oteriguere "Deco ariporo," arĩgu ñgu pohere ñaro puhriburire ñaro cohremi ñgu. ⁸ Eropa ta mua sã ñaro coreyuque. Mari Opũ ñgu dujariboro merogã duhyaa. Eropirã Goãmũre eropa guñaturaniguicãque mua. Eropirã eropa coreniguicãque mua.

⁹ Yu acawererã, mua basi duyasobiricãque Goãmũ muare dipuwaja moabiriboro dopa. Eropirã ire guñaque mua. Dipuwaja moabu ñgu dujariboro merogã duhyaa. ¹⁰ Yu acawererã, ñero tariquererã ta yujuro bojeque Goãmũre cóaro mariro. Goãmũ yare weremũhtanirã mura erã Goãmũ ya árĩburire iirã ñero tariquererã duhubirimuriñuma. Erã duhubiridiro dopa ta duhubiricãque mua sã. ¹¹ Eropirã ire guñaque mua. Ñero tariquererã ta Goãmũre duhubirãre Goãmũ ñaro iigucumi. Iribojegue majagu Job waicũgure peebu mua. Ñgu ñero tariquerẽ ta Goãmũre duhubiriñumi. Eropigu ñgu ñero tarira puhru, Goãmũ ñgure ñaro iinũmi. Goãmũ mari Opũ marire ñaro

mojomoro ĩagu áriġu eropa iĩnumi ĩġure. Iri áriġpehrerire masia mũa.

¹² Yũ acawererã ire masique. Őpa arĩma waĩpeo piyurã: “Ŭmaro majagu mera diaye arĩrã iiaa,” arĩ waĩpeoma masare peedorerã. Erã iro dopa arĩ waĩpeo piyubiricãque. Ire mũare turaro dorea. Mũa gajirãre wererã, õaro diaye wereque erãre ġuyaro mariro. Arĩnemopeobiricãque. Eropa mũa diaye werecũ ĩagu Goãmũ mũa gajiropa arĩra dipuwajare dipuwaja moasome.

¹³ Mũa mera majagu ñero tarigu áriġu, Goãmũre serẽporo ĩġu. Gajigu mucubirigu áriġu Goãmũre mucubiriri mera bayaporo. ¹⁴ Mũa dorecũrã, Jesu yarã oparãre sihubeoque mũa. Mũa eropa sihubeocũ erãpũ mũare uyu mera sũrãcoma. Eropa iirã Goãmũre mari Opũre mũa dorecũrãre serẽbasarãcoma erã. ¹⁵ Eropa arĩ serẽbasarã “Mari serẽro dopa ta ĩġu iigũcumi,” erã arĩ pepicũ mũare dorecũrãre Goãmũ itamugũcumi. Eropa iigũ mũare õarã wacũ iigũcumi mari Opũ. Eropigu mũa ñeri iira dipuwaja mũa dorecũrã áriġũ ĩarã mũare serẽbasarãcoma. Erã eropa serẽbasacũ ĩagu mũa ñeri iirare cãdijigũcumi Goãmũ. ¹⁶ Eropirã mũa mera majarãre mũa ñeri iirare game pepũri weretarique. Eropirã mũa basi Goãmũre game serẽbasaque. Mũa eropa arĩ serẽbasacũ mũa serẽbasanirãre Goãmũ taugũcumi. Őarire iirã mũa áriġũ Goãmũre mũa turaro serẽbasadiro dopa ta iigũcumi Goãmũ. Eropiro mũa erãre serẽbasari bu áriĩri áriĩbeaa. ¹⁷ Goãmũ ya weremũhtadigu mũrũ Elia mũrũ mari iro dopa masũ áriĩnumi. Eropigu masa ñero iira dipuwaja “Deco aribiricãporo,” arĩ turaro serẽñnumi Goãmũre. ĩġu eropa arĩ serẽcũ uĩre bojori gohra gaji bojori deco deco aribiriyoro i yebaguere. ¹⁸ Eropigu dipaturi Goãmũre deco ĩġu aridore serẽcũ deco mereyoro daja. Eropiro dipaturi i yebaguere yucũ buġũ dũca dũcacũyoro. Eropiro Goãmũre mari serẽri bu áriĩri áriĩbeaa.

¹⁹ Yũ acawererã, mũa mera majagu Goãmũ yare diaye maja áriĩire duhudigu Goãmũ yare dipaturi ĩġu gameborore ĩġure wererã, õaro iirã iiaa mũa. ²⁰ Eropirã ire masique mũa: Goãmũre duhudigũre Goãmũre dipaturi gamecũ iirã, peamegue wabodigũre taricũ iirã iica mũa. Eropigu baja ĩġu ñeri iirare Goãmũ cãdijicũ iirãca mũa ĩġure.

1 San Pedro

Jesu gaji macari wanirãre gojabeoñumi Pedro

¹ Yuhũ Pedro Jesucristo ïgu buhedore apidigu ta ãhraa. Eropigu mũare yoaro maja macarigue wanirãre, Ponto yebague wanirãre, Galacia yebague, Capadocia yebague, Asia yebague, Bitinia yebague wanirã sãre mũare árĩpehrerãre gojabeogu iiaa yuhũ. Mũare òadore gojabeoa yuhũ. ² Negohraguere Goãmũ mari Pagũ “Õpa iigũra,” ïgu arĩdiro dopa ta mũare beyepũ. ïgu beyera pũhrũ ïgu Espĩritu Santo mera mũare Goãmũ yarã árĩmorãre acupũ. Õpa ta acupũ ïgu Jesucristore òaro yũhrimorã mũa árĩboro dopa. ïgu di cóãro mera ñerire coenirã mũa árĩboro dopa iipũ. Eropirã Goãmũ ïgu mahiri mera òaro árĩque mũa.

Jesu yarã árĩrã marire ñmarogue ïgu aĩgãborore corerã iiaa mari, arĩ gojañumi Pedro

³⁻⁵ Goãmũ marire turaro mojomoro ïagu, Jesucristo sĩridigu ïgu masa mũariaro mera marire òarã gohrotocũ iimi. Eropa iigu ïgu gohrotori mera Goãmũ porã ta wahaa mari. Eropa warã ïgu mera eropa mari òaro árĩnigucãborore òaro masia mari. Eropigu mũare ïgu òari opaburire odiagu mũare coregu iimi. Iri mũare ïgu oburi ne pehresome. Eropigu ïgure mũa umupeorãre Goãmũ ïgu turari mera mũare ïhadibugũ, taricũ iigucumi. Pehrerinũ árĩcũ mũare ïgu taurare masicũ iigucumi ïgu. Eropirã ïgu marire òaro mojomoro ïacũ ïarã, ïgure Goãmũre mari Opũ Jesucristo Pagure “Õagu, turagu ãhrimi,” arĩ umupeoro gahmea marire.

⁶ Eropa ïgu taumorã árĩrã bũrigã mucubiriro gahmea. Mero i yeba mũa árĩropẽ, bajasuburi mũa ñero tariquererã ta bũrigã mucubiriro gahmea. ⁷ Eropa ñero tariquererã ta Goãmũre cóãbirã mũa árĩrã “Queoro Jesucristore umupeoa gũa,” arĩmasia mũa ïgure. Mũa ñero tariquererã Jesucristore umupeonigucũ mũa umupeoripũ yuju diaye árĩbeaa. Eropigu mũa ñero taricũ ïagu “¿Árĩro ta mũa yũre umupeori?” arĩ queoñagu iimi Goãmũ mũare. Mũa eropa ñero tarirã diaye ta Cristore òaro umupeonigucũ “Õaro iiabũ mũa,” arĩgucumi Cristo mũare. Eropigu Jesucristo dujarigu mũa ïgure òaro umupeoniguinirãre òaro ïagucumi mucubiriri mera.

⁸ ïgure Jesucristore ïabiriquererã mahia mũa. Eropirã dohpaguere ïgure ïabiriquererã ta ïgure “Diaye ta iigu

ãhrimi," arĩ umupeoa. Eropa umupeorã turaro mucubiria mũa. Mũa eropa mucubirirã mũa Goãmũ pohro mucubiriboro dopa ta mucubiria. Mũare eropa mucubiricũ iimi Goãmũ. Eropirã turaro mucubiria. ⁹ Eropigũ Goãmũ mũare peamegue wabonirãre taricũ iigũcumĩ mũa ĩgũre ðaro umupeoro mera.

¹⁰ Goãmũ ĩgũ masare eropa tauborore iribojegue Goãmũ yare weremũhtanirã irire masidiarã serẽpi ĩamũriĩnuma. ¹¹ Cristo ĩgũ ñero tariborore, ĩgũ sĩridigũ masa mũriaborore, árĩpehrerã tauro opu ĩgũ árĩborore erã ero coregue ta weremũhtaĩnuma. Jesucristo ĩgũ Espĩritu Santo ĩgũ itamuri mera eropa wereĩnuma erã. Erã eropa weremũhtaquererã erã wererare masibiriĩnuma. Eropirã erã wererare ðaro masidiarã serẽpi ĩamũriĩnuma erã Goãmũre. ¹² Iri erã werera Jesucristo ariburi erã ya árĩburi árĩburiyoro. Mari ðaro árĩburi árĩyoro. Iri erãre masicũ iĩnumĩ Goãmũ. Eropirã dohpaguere mũarogue obeodigũ Espĩritu Santo ĩgũ itamuri mera ðari buherire mũare gũa werea. Iribojegue mũa ya árĩburire erã weremũhtara iri ta árĩcãro tĩaa dohpaguere gũa mũare wereri. Iri buherire anyua sã bũrigã masidiariĩnuma.

Goãmũ marire ñeri marirã árĩdoremi, arĩ gojaĩnumi Pedro

¹³ Eropirã ðarire guĩa masi árĩyũque mũa. Eropirã gũhyadiaro árĩque. Cristo ĩgũ dujaricũ Goãmũ mũare ĩgũ ðaro tauborore guĩaque. Eropirã irire ðaro mucubirimũhtarã coreque. ¹⁴ Iribojegue Goãmũre masinibirãgue ñerire mũaribejarã árĩmũrinirã árĩribũ mũa. Dohpaguere irire iibiricãque. Eropirã majirã erã pagũ sũmarãre ðaro yũhriro dopa ta Goãmũre ðaro yũhrique daja. ¹⁵ Eropirã ĩgũ yarã árĩmorãre mũare sihubeodigũ ñeri marigũ ĩgũ árĩro dopa ta mũa sã ñeri marirã ta árĩque. Eropirã ðari dihtare iirã árĩque. ¹⁶ Eropa ta arĩ gojaĩnuma Goãmũ yare erã gojarapũgue: "Ñeri marigũ ãhraa yũhũ. Yũ eropa árĩcũ mũa sã ñeri marirã árĩque," arĩmi Goãmũ, arĩ gojaĩnuma.

¹⁷ ĩgũ Goãmũ mari Pagũ yujurãyeri árĩpehrerã erã iirare ĩagũ yujuro mera beyemi ĩgũ erãre. ĩgũ eropiigũ árĩcũ ĩgũre "Ahũ," arĩdiarã ðaro iiqunerire mũaribejarã árĩmũrine. I yeba mũa árĩropẽ gũhyadiaro mera ðaro iique mũa. ¹⁸ Mũa ñecũ sũmarã mũra erã árĩricũri ne duhpiburi árĩburiyoro. Mũa sã erã iidiro dopa ta iinirã mũa árĩquerecũ ta Cristo mũare ĩgũ yarã árĩmorãre iimi. Mari wajamorire ĩgũ wajayebasaboro dopa ta mari ñeri iirare cãdijiborore mari ñeri iira dipuwajare wajayebasami. Iri erã ðaro masia mũa. Eropa wajayebasagũ ĩgũ niyeru mera, oro

mera wajayebasabirimi. Niyeru, oro sã dederea waroca. ¹⁹ Īḡu di cóãra mera ta wajayebasami mari ñeri iira dipuwajare. Ovejagã erã Goãmure obodigũ ðagũ Īḡu árĩdiro dopa ta Jesucristo ðagũ ñeri marigũ árĩdigũ árĩmi. ²⁰ Iribojeguere i yebare ĩḡu ĩhacũnuguboro coregue Jesucristo ĩḡu eropa waborore masituhapũ mari Pagũ Goãmũ. Dohpaguepũre pehrerinũ coregã árĩcũ, Cristo sĩribasami mũare mũa ya árĩburire. ²¹ Eropirã Jesucristo ĩḡu itamuro mera Goãmure umupeoa mũa. Goãmũpũ Cristore sĩridigũre masudigũ árĩmi. Eropigũ ĩḡure umarogue apigũ, árĩpehrerãre ĩḡure umupeocũ ĩpũ mari Pagũ. Īḡu eropiicũ ĩḡure mari Pagũre “Diaye ta ĩḡu ãhrimi,” arĩ umupeoa mũa. Mũa eropa umupeocũ ðaro iimi mũare. Eropirã mũa ĩḡu mera ðaro árĩnigũborore ðaro masia mũa.

²² Ōari buherire diaye majare yũhrirã mũa ñerire duhunerã ãhraa mũa. Eropa árĩrã, diaye ta mari acawererã Jesu yarãre mahi umupeomasia mũa. Eropirã mũa mera majarãre mũa sĩporãri mera turaro mahi umupeoque. ²³ Mũa dipaturi masa dehyoaro dopa ta Goãmũ porã wahabũ mũa. Mari pagũ samarã mera masa dehyoanirã árĩrã, pũhrũ sĩria warãca. Iri iro dopa árĩbeaa Goãmũ porã mũa wacũ. Goãmũ mera árĩniguicãrãca. Goãmũ ĩḡu buheri mera ĩḡu porã wahabũ mũa. Iri buheri pehrebirĩburi buheri marire Goãmũ mera eropa árĩniguicũ iiaa. ²⁴ Ōpa ãhraa Goãmũ yare erã gojarapũ:

Árĩpehrerã masa taa iro dopa wahama. Eropiro ðari erã opari sã gori iro dopa ãhraa. Taa masa, sĩria wahaa. Gori sã masa, sĩria wahaa. Iri taa iro dopa ta mari masa sã wahaa. ²⁵ Mari Opũ ya buheripũ ne pehresome. Īḡu arĩdiro dopa ta eropa waroca, arĩ gojañuma.

Iri buheri mũare erã werera ðari buheri ta Jesucristo marire tauburi buheri ta ãhraa.

2

¹ Eropirã árĩpehreri ñeri iirire, erã pũrũpũrũ erã ñero ii corerire, gajirã gajinore opacũ ĩhaturirire, gajirã ñeri quere moarire, irire duhuque mũa. ²⁻³ Mari Opũ mũare ðaro ĩḡu iirire dabero masituhaa mũa. Eropirã ne masa dehyoarãgã apĩcore erã gamero dopa ta mũa sã ðari buherire Goãmũ yare turaro gameque. Eropa ĩḡu yare gamerã mũa ĩḡure mũa guñaturanemorãca. Īḡu yarã ðaro pee masirã árĩrãca.

Cristo ojocaricũ iigu utãye iro dopa árĩgu ãhrimi, arĩ gojañumi Pedro

⁴ Cristo ojocaricũ iigu utãye iro dopa árĩgu ãhrimi. Masa Cristore gamebirima. Erã gamebiriqerecũ Goãmupũ ĩgu Pagupũ ĩgure beyedigũ árĩmi. Ōatariagu ãhrimi. ĩgu eropa árĩgu árĩcũ ĩgure gameque. ⁵ Eropirã mũa Jesu yarã árĩrã mera Goãmũ ãhrimi. Eropirã yujuro mera ĩgu yare ōaro iirã árĩque mũa. ĩgu ya árĩburire mũa iimorãre beyedigũ árĩmi. Eropirã mũa Jesucristo itamuri mera ĩgu yare ōaro iirã ĩgu Goãmũre mucubiricũ iiaa. ⁶ Ōpa ãhraa Jesucristore Goãmũ yare erã gojarapũ:

Cristo utãye iro dopa yũ beyedigũ ãhrimi. Eropigu ōatariagu ãhrimi. ĩgu mariro yaharã wamasibeamã. Eropigu ĩgure Jerusaléngue dohpague apigu iiaa. ĩgu masare ōaro árĩcũ iigucumi. Eropirã ĩgure umupeorã mucubiriniguirãcoma, arĩmi Goãmũ, arĩ gojañuma Goãmũ yare weremũhtanirãgue.

⁷ ĩgure umupeorãpũ “Ōatariagu ãhrimi,” arĩrãcoma. ĩgure umupeobirãpũ ñero warãcoma. Erãre ōpa ãhraa Goãmũ yare erã gojarapũgue:

Ihĩ Cristo utãye iro dopa ta Goãmũ beyedigũ ãhrimi. ĩgu Goãmũ beyedigũ árĩquerecũ masa ĩgure gamesome. ĩgure gamebiriqerecũ Goãmũ ĩgure opũ acumi árĩpehrerãre dorebure, arĩ gojañuma.

⁸ Ō sãre arãa Goãmũ yare erã gojarapũ:

ĩgu utãye iro dopa árĩgure gamebirã dederea warãcoma, arĩ gojañuma iribojeguerẽ.

Eropa gojarã Jesucristore masa gamebiriburire ōpa arĩ gojamũhtañuma. Erã ĩgure gamebirã Goãmũ ya buherire yũhribirima. Cristore gamebirã, ĩgure tarinũgarã, Goãmũ pohrogue ejasome erã. Erã eropa waborore apipũ Goãmũ erãre.

Ōpa ãhrima Goãmũ yarã, arĩ gojañumi Pedro

⁹ Mũapũ Goãmũ ĩgu beyenirã ãhraa. ĩgu mari Opũ ĩgu yarã pahia ĩgu yare itamurã ãhraa mũa. Eropirã ĩgu ya curu majarã ñeri marirã Goãmũ yarã ta ãhraa mũa. Eropigu mũare naitĩaro árĩbonirãre boyoropũ árĩmorãre, ñerire iibirimorãre, ōaripũre iimorãre aĩdigũ árĩmi mũare. Eropa ta aĩdigũ árĩmi Goãmũ mũa ĩgu ōarire ĩgu ōaro iirare gajirãre weremorãre. ¹⁰ Ero coregue duhpimorã árĩbirimũribũ mũa. Dohpague tamerare Goãmũ yarã ãhraa mũa. Ero core mũare mojomoro ĩabupũ marinimi mũare dohpa. Dohpaguepũre mũare Goãmũ mojomoro ĩagu ãhrimi.

Goãmũ yare iirã árĩque mũa, arĩ gojañumi

¹¹ Yũ mahirã, mũa i umũre wari masa iro dopa ãhraa dohpaguere. Goãmũ pohro wamorã ta ãhraa. Mũa eropa árĩrã árĩcũ, ire turaro werea mũare: Mũa ñeri ñaribejarire iibiricãque. Iri ñerire ñaribejarã, ñerã warã iica mũa. ¹² Goãmũre gamebirã watope árĩrã òaro iirã árĩque mũa gũare werewũari arĩrã. Mũa eropa iirã árĩcũ mũare dohpaguere ñero werewũadiaquererã mũa òaro iirire masirãcoma erã. Eropa masirã erã Goãmũre “Õagũ, turagũ ãhrimi,” arĩrãcoma. Õpa ta arĩrãcoma Cristo ïgũ i yebague ïgũ dujaricũ.

¹³ Mari Opũ yare iirã árĩrã ò majarã oparã sãre yũhrique mũa. I yeba majagũre mũa árĩpehrerã tauro opu árĩgũre ïgũ sãre yũhrique. ¹⁴ Goãmũ erã oparãre apipũ tarinũgarãre dipuwaja moamorãre. Eropigũ òaro iirãre “Õaro iiabũ mũa,” arĩdoregũ apipũ erãre. ïgũ eropa apicũ erãre yũhrique mũa. ¹⁵ Mũa òaro iicũ ïarã, pee masibirã erã sihajaro mũare weresãdiaquererã ta weresãmasibeama. Eropigũ mũa òaro iicũ gahmemi Goãmũ.

¹⁶ Mũa ñecũ sumarã árĩricurĩ doca árĩnirãre Goãmũ mũare taudigũ arĩmi. Eropa taunirã árĩquererã ta, “Gũare doreri mara. Eropirã gũa ñerire iirãca,” arĩ pepibiricãque ñerire iiri arĩrã. Eropirã “Goãmũ pohro majarã ãhraa gũa,” arĩ pepique mũa. Eropa arĩ pepirã ïgũ dorerire iique mũa. ¹⁷ Árĩpehrerã masare mahi umupeoque. Mari acawererã Jesu yarãre mahi umupeoque. Goãmũre gũhyadiaro ïaque. I yeba majagũ opu sãre umupeoque.

Cristo ñero tarigũ ïgũ yujuro bojediro dopa ta yujuro bojeque mũa sã, arĩ gojañumi Pedro

¹⁸ Mũa pohro majarãre weregũ iiaa dohpaguere. Mũa òaro umupeori mera mũa oparãre yũhrirã árĩque. Õarã, mũare òaro iirã mera dihtare yũhrirã árĩbiricãque. Mũa mera guarã sãre yũhrique mũa. ¹⁹ Mũa ñero iibiriquerecũ, mũare erã dipuwaja moabocoma. Erã eropa dipuwaja moarare Goãmũ ïgũ gamero dopa ta irire mũa yujuro bojecũ “Õaro iiabũ mũa,” arĩgũcumi Goãmũ mũare. ²⁰ Mũa ñero iira wajapũ erã mũare dipuwaja moasũcũ irire mũa yujuro bojequerecũ Goãmũ “Õaro iiabũ mũa,” arĩsome. Mari òaro iiquererã erã dipuwaja moasũcũ irire mari òaro mera guaro mariro árĩcũ yujuro bojecũ Goãmũ marire òaro ïhasũagũcumi. ²¹ Eropa iimorãre ïgũ yarã arĩdoremi Goãmũ mũare. Cristo sã mũa ya árĩburire ñero tarimi mũa ïgũre ïhacũboro dopa. ²² ïgũ ne ñero iibirimi. Eropigũ ne gũyabirimi. ²³ ïgũre turicũ, ïgũpũ

eräre ne turi gamebirimi. Īgure erā ñero iiquerecũ ta “Mũare ñero iigũra,” ne arĩbirimi ĩgũ. Eropigũ “Ahũ queoro dipuwaja moagũ āhrimi. Īgũgue amugũcumi,” arĩ pepiñumi ĩgũ. Eropirā mari säre ĩgũ iidiro dopa ta iiro gahmea. ²⁴ Īgũ Cristo ĩgũ basi crusague mari ñeri dipuwaja sĩrimi. Eropa sĩrimi dipaturi mari ñerire iibiriboro dopa, Goãmũ gameripũre mari iiboro dopa. Īgũ ñero camicũmi marire peamegue waboniräre marire taricũ iibu. ²⁵ Oveja erā dedereboro dopa ta mũa sã peamegue dederebonirā árĩribũ. Dohpaguepũre Cristore umupeorā ĩgũ yarā wahabũ pare. Eropigũ ovejare ĩhadibugũ iro dopa Cristo mũare ĩhadibumi. Mũa sĩporā mera dederebiriborore õaro ĩhadibumi.

3

Mojoto diriräre õpa iiro gahmea eräre, arĩ gojañumi Pedro

¹ Eropigũ pohro majaräre yũ doreldiro dopa ta mũa marasã nomere doregũra. Mũa marapũ sũmaräre õaro yũhrique erā Goãmũ buherire erā gameboro dopa. Yujurãyeri mũa marapũ sũmarã Goãmũ buherire gamebirã āhrima. Eräre mũa yũhricũ ĩarã Goãmũ ya buherire gamebocoma erā. Eropirã iri buherire mũa eräre werebiriqerercũ ta ĩgũ yare gamebocoma erā. ² Eropa ta gamebocoma mũa eräre õaro iirire, mũa umupeorĩ säre ĩarã. ³ Mũa nome, mũa poarire wũapuwea sepatanirã nome, oro dari bũyanirã nome, õari suhri sañanirã nome árĩdiarire guñabiricãque mũa. Mũa ya dũpũ masare ĩhasũacũ iibiricãque. ⁴ Eropa iibirã õpa iique. Mũa pepiri õaro árĩcũ guñaque. Eropirã mũa gũhyadiarã nome iro dopa gajiräre nijiyajaro mera iirã nome árĩque. Gũhyadiaro mera weretamurã árĩrã ipũre masare ĩhasũacũ iique. Iripũ pehresome. Iri õatariari āhraa Goãmũ ĩacũ. ⁵ Ópa ta iimũriñuma iribojegue majarã nome Goãmũ yarã nome. Erã nome Goãmũre umupeorã nome árĩrã, erã marapũ sũmaräre õaro yũhrimũriñuma. ⁶ Eropa Sara igo marapũre Abrahãre õaro mera yũhrimũriñumo. Eropigo ĩgure “Opũ,” arĩ piyumũriñumo. Eropirã mũa õaro iirã nome árĩrã, gũiri marirã nome árĩrã, Sara árĩldiro dopa āhraa mũa.

⁷ Ópa ta mũa marapũ sũmarã sã mũa marapo säre õaro iique. Erã nome mari mũa iro dopa turarã árĩbeama. Eropirã umupeori mera õaro iique erã nomere. Goãmũ árĩpehrerinũri ĩgũ mera mari árĩniguiborore ĩgũ mũare odiro dopa ta ogũcumi erã nome säre. Erã eropa árĩmorã

árĩcũ erã nomere ðaro iique. Goãmure mũa serẽrire ĩgu yũhriboro dopa erã nomere ðaro iique mũa.

Õaro erã iiquerecũ ta gajirã erãre erã ñero iirire werepũ Pedro

⁸ I mera weretugũra: Mũa árĩpehrerã yujuro mera ðaro árĩque. Eropirã mũa mera majarãre ðaromojomoro ĩarã árĩque. Mũa acawererã Jesu yarãre pepãri majarã game umupeoque. Eropirã ðaro iique erãre. Eropirã "Gajirãre masitaugũ ãhraa," arĩ pepibirã erã gamero dopa ta iique.

⁹ Gajirã mũare erã ñero iicũ erãre ñero ii gamebircãque. Mũare erã turicũ erãre turi gamebircãque. Mũare erã eropa iiquerecũ ta ðaro iique erãre. Eropirã ðaro yũhrique erãre. Irire iimorãre ta apimi Goãmũ mũare ðaro iibu.

¹⁰ Eropa ta ãhraa Goãmũ yare erã gojarapũ:

Mũa ðaro mucubiriri mera árĩdiarã ne ñero werenigu-ibircãque. ¹¹ Árĩpehreri ñeri iirire duhucãque.

Õaripũre iique. Game mũa basi ĩhaturiro mariro

árĩque. Irire turaro iique. ¹² Õarãre mari Opũ

eropa ĩhadibuniguicãgũ iimi. Eropigũ ĩgũre erã

serẽrire eropa peeniguicãgũ iimi. Ñero iirãpũre ĩgu gamebeamĩ, arĩ gojañuma Goãmũ yare gojarapũgue.

¹³ Õarire mũa turaro iidiacũ gajirãpũ mũare ñero iidia-quererã ta ne yujuro bojesome. ¹⁴ Õaro mũa iiquerecũ ta

mũare erã ñero iicũ ĩagũ Goãmũpũ mũare ðaro iigucumi.

Eropirã mũare ñero iidiarãre, "Mũare wejẽrãca," arĩrãre

gũibircãque. Eropirã bũjawerebircãque. Irire pee

guñaricũbircãque. ¹⁵ Eropirã mũa Cristore "Gũa Opũ

ãhrimi," arĩ pepirã, umupeoque ĩgũre. Eropirã Cristore

mũa umupeorire, Goãmũ mera mũa árĩborore, gajirã

mũare serẽpibocoma: Erã mũare serẽpiboro core erãre

yũhriburire ðaro guñayuque. Eropa erãre yũhrirã nijiyajaro

mera, ðaro umupeori mera wereque erãre. ¹⁶ Õarã

árĩque. Eropirã "Ñerire iiaa," arĩ pepisome mũa. Eropirã

Cristo yare mũa ðaro iirã árĩcũ gajirã mũare ñeri quere

moarã gũhyasiuro warãcoma. ¹⁷ Ñerire mari iira dipuwaja

mari ñero taricũ ðabeaa marire. Eropiro Goãmũ gamecũ

ðarire mari iira dipuwaja mari gajirã mera ñero taricũ

ðapũrica iri tamera.

¹⁸ Eropa ta ñero tarimi Cristo. Yujusubu ta árĩpehrerã

ñeri dipuwajare sĩrimi ĩgu. Õagũ árĩmi. Eropa árĩgu

ñerã mari árĩcũ mari ya árĩborare ñero tarimi ĩgu. Ñero

tarimi ĩgu Goãmũ yarã mari wacũ iibu. ĩgu sĩria wami.

Eropa sĩriquerecũ ta ĩgu sĩporã ojocariyoro. ¹⁹ Eropigũ

ĩḡu sīporã mera sīrinirã mura erã dipuwaja moaburire corerã erã pohrogue Goãmũ yare werepũ erã sīporãrire. ²⁰ Erã muraꝑũ iribojegue Goãmũre yũhribirimũriĩuma. Irisubuguerẽ Noé ĩḡu árĩrasubuguerẽ, wuadiru dohodirure dohogũ iĩũumi. Irirure ĩḡu dohorisubu Goãmũre yũhribirinirã mura erã yũhricũ gameriĩumi. Eropiḡu erã yũhriborore yoari boje dipuwaja moabiḡu coreriĩumi Goãmũ. Yũhribirimũriĩuma. Eropiḡu erãre dipuwaja moaĩumi. Eropirã bajamerãgã ocho dihta dia miririĩnere tariwereĩuma. ²¹ Miricũ erã taridiro dopa ta marire waĩyecũ peamegue wabonirãre mari tariborore ĩhmua. Deco mera marire waĩyecũ mari dũpũre mari guhharire tu coero dopa árĩbeaa. Marire waĩyecũ ñeri marirã mari árĩborore Goãmũre mari serẽa. Eropirã Jesucristo ĩḡu masa mũriara mera peamegue wabonirã taria mari. ²² ĩḡu Jesucristo umarogue wadi árĩmi Goãmũ mera dorebu. Eropiḡu ĩḡu anyua tauro, umaro majarã oparã tauro, árĩpehrerã dorerã tauro erãre doreḡu aħrimi.

4

Cristo yarã árĩrã õarire gohrotonirã árĩrãca, arĩ wereĩumi

¹⁻² Mari ñero tarirã mari ñero iirire duhucãa mari. Eropa duhucãrã mari dipaturi mari uaribejarire iibeaa. I yeba mari árĩropẽ Goãmũ gamerire iiniguirãca. Eropirã Cristo ĩḡu ñero tarigũ ĩḡu gũibiridiro dopa ta mũa sã ñero tariborore gũibiricãque. ³ Iribojegue Goãmũre gamebirã erã ñerire uaribejadiro dopa ta iimũriyoro mũa. Guhyasĩriro mariro ñerire iirã, ñeri uaribejarire iirã, mereri bosenuri iirã, Goãmũ dorerire tarinũgarã, goãmarã wéanirãpũre umupeorã iimũriyoro. Eropirã iripẽta iri ñerire iipuru-mujucãque pare. ⁴ Eropirã erã mũraro ta iirãpũ mũa dohpaguere iri ñerire erã mera iibiricũ ĩarã erãpũ ĩha uca wahama. Eropirã erã muraꝑũre ñero wereniguirã, querere goroweoma. ⁵ Erã eropiicũ ĩagũ erã ñeri ĩirare Goãmũpũ serẽpi ĩagũ, weretaridoreḡucumi erãre. ĩḡu ojocarirãre, sīrinirã sãre beyebu aħrimi. ⁶ ĩḡu eropa beyebu árĩḡu erã sīrinirãpũre õari buherire werepũ Goãmũ mera erã õaro árĩniguiborore. Eropirã i yebare erã árĩpehrerã masa iiro dopa sīrinirã árĩquerecũ Goãmũ ĩḡu mera erã õaro árĩniguiborore werepũ erãre.

⁷ Pehreburinũ merogã duhyaa. Eropirã õaro pee masirã árĩque. Eropirã Goãmũre serẽniguicãque. ⁸ Gajirãre mari õaro mahirã baja gajiropa erã marire ñero iiquerecũ ta eropa ĩacãa mari. Eropirã mũa mera majarãre burigã

umupeo mahiniguicãque. ⁹ Mũa mera majarãre mucubiriri mera mũa ya wirigue ñajaridoreque. ¹⁰ Goãmũ ĩgu yarã nũcũre ĩgu yare mũa mohmemasiburi nũcũre apimi. ĩgu eropa apicũ mũa iimasiro dopa ta mũa mera majarãre irire õaro itamuque. Goãmũ mũa nũcũre mũa ĩgu yare mohmemasiburi nũcũre apimi. ĩgu apirañe mera gajirãre õaro itamurã, Goãmũ ĩgu apidiro dopa ta õaro iirã iiaa mũa. ¹¹ Eropirã mũa õaro wererã árĩrã, Goãmũ ĩgu werebodirop dopa ta õaro wereque mũa sã. Masare itamurã árĩrã, Goãmũ ĩgu apira turari mera gajirãre itamuque. Árĩpehreri mũa iira nũcũ Goãmũre masa erã umupeoboro dopa irire iique. Jesucristopũ mũa irire iicũ itamugũcumi. ĩgũre árĩpehrerinũri umupeoque. “Õagũ, turagũ àhrimi,” arĩro gahmea árĩpehrerãre. Eropa ta arĩporo.

Jesu yarã erã árĩri dipuwaja erã ñero taririre were gojañumi Pedro

¹² Yũ mahirã, dohpaguere ñetariaro tarirã, “Gajiropa arĩro wãca yũre,” arĩ guña iibiricãque. Mucubirirã árĩque. ¹³ Bũjawerebirã ta mucubirirãpũ árĩque. Eropirã “Cristo ĩgu ñero taridirop dopa ta gũa sã eropa ta wahaa,” arĩ mucubirique mũa. Eropa mucubirirã Cristo ĩgu õarire ĩgu ĩhmugũ dujaricũ mũa turaro mucubirirãca. ¹⁴ Cristo yarã mũa árĩri dipuwaja gajirã mũare erã turicũ Goãmũ ĩgu Espĩritu Santo ĩgu õagũ mũa mera árĩgu iimi. Eropirã õaro mucubirirã àhraa mũa. ¹⁵ Eropirã masare wejẽra waja dipuwajacũrã, yajara waja dipuwajacũrã, ñero iira waja dipuwajacũrã, gajiropa arĩ goroweora waja dipuwajacũrã árĩbiricãque. Iri dipuwaja mũa ñero taricũ ñehe àhraa. ¹⁶ Cristo yarã mũa árĩra wajapũ ñero taricũ õhaa. Eropirã Cristo yarã mũa árĩcũ ĩha ñero iima mũare. Erã eropiicũ guhyasĩribiricãque. Ñero tariquererã ta Cristo yarã mũa árĩrĩre mucubirirã, Goãmũre “Õhaa,” arĩ umupeoque mũa.

¹⁷ Goãmũ ĩgu yarã erã iirare ĩgu beyerisubu arĩro iiaa dohpaguere. Árĩpehrerã mari ĩgu yarã mari iirare ĩha serẽpimũhtagũcumi. ¿Eropa marire serẽpimũhtagũ dohpã iigũcũri ĩgu yarã árĩbirãpũre mũa pepicũ? ĩgũre yũhribirinirãpũre turaro dipuwaja moagũcumi. ¹⁸ Eropirã õarã ĩgu yarã eropa ñero tarira pũhrũ Goãmũ erãre tau erãre ĩgu pohro aĩagũcumi. Goãmũre gamebirãpũ ñetariaro tarirãcoma. Eropirã dederea wa peamegue warãcoma. ¹⁹ Eropirã Goãmũ ĩgu gamecũ mũa ñero tarirã árĩrã, õarire mũa iirare duhubiricãque. Eropirã mũare ĩhacũnugudigũre mũare ne duhubigũre ĩgũre umupeoro gahmea. “Yũre ĩhadibugũcumi,” arĩro gahmea.

5

Jesu yarã erã iiborore were gojañumi Pedro

¹ Dohpaguere mũare Jesu yarã oparãre weregura: Yũhũ Jesu yarã opu ãhraa. Mũa sã erã oparã ta ãhraa. Mũare yũ iro dopa oparã árĩrãre ire werebu iiaa yũhũ: Cristo ãgũ ñero tarĩrare ãadigũ árĩgũ, mũa mera umarogue Cristo mera ðaro árĩniguibu árĩgũ ire mũare weregura: ² Goãmũ yarã oveja iro dopa ãhrima. Mũapu ovejare ãhadiburã iro dopa ãhraa. Eropirã Goãmũ mũare ãgũ apinirãre ãgũ yarãre ðaro ãhadibuque mũa. Eropirã Goãmũ ãgũ gamediro dopa ta ðaro siporãcũri mera erãre ãhadibuque. Eropirã erãre ãhadiburã “Niyerure wajatarãca,” arĩ pepibiricãque mũa. ³ Eropa ãhadiburã erãre pũriro mera ðorebirabiricãque. Eropirã ðaro iique mũa Jesu yarã mũare erã ãhacũboro dopa. ⁴ Mũa eropa iirã Cristo marire árĩpehrerãre ãhadibugũ ãgũ dujaricũ ãgũ mũare ðarire oburire oparãca. Iri mũa opaburi ne pehresome.

⁵ Erãre yũ dorero dopa ta mũa mamarã sã erãre mũa oparãre yũhrirã árĩque. Eropirã mũa Jesu yarã árĩpehrerã game yũhri árĩque.

“Õatariagũ ãhraa,” arĩ pepirãre Goãmũ gamebeami. Gajirãre umupeorãpũre “Bu árĩrã ãhraa,” arĩ pepirãpũre ðaro mahi itamumi ãgũ, arĩ gojara ãhraa. ⁶ Eropirã Goãmũ turagupũre mũare dorecũ yũhrique. Eropirã mũa basi “Yũ ðagũ ãhraa,” arĩ pepibiricãque. Mũa eropa ðarire iicũ ãagũ Goãmũ ãgũ queoranũ árĩcũ masa ãhuro mũare “Õarã ãhrima,” arĩ ãhmugũcumĩ. ⁷ ãgũ mũare wũaro pepi ãhadibumi. Eropirã ãgũre guñaturarã, ne wũaro bujawere guñaricũbiricãque mũapu.

⁸ Mũare ãhaturigũ watĩ yee guagũ ãgũ ehma baro iro dopa ta ãhrimi. Mũare ñero iidoregũ goroweodiami. Eropirã pee masi árĩque. ⁹ Árĩpehrerogue sãre gajirã Jesu yarã eropa dihta teboricũma watĩ goroweodiari mera. Irire masirã ãgũre yũhribiricãque. Eropirã Cristore umupeorã turaro guñaturaque mũa. ¹⁰ Mũa i yeba árĩrisubu dihta watĩ ñero iidorediaro mera teboricũrãca. Merogã ãhraa. Pũhrũ mũa Jesucristo pohro árĩrã, mũare ðarã turarã árĩcũ iigũcumĩ. Eropigũ mũa sãñajarã ðaro árĩcũ iigũcumĩ mũare. ãgũ Jesucristo iira mera árĩpehrerinũri umũsigue mũa ðaro árĩborore mũare apigũcumĩ. ãgũ Goãmũ ãhrimi árĩpehrerãre mojomoro ãagũ. ¹¹ Eropirã umũri nũcu “ãgũ turagũ ãhrimi,” arĩ umupeorã ãgũre. Eropa ta iirã.

¹² Ipũgãre miripũgãre yũ mũare gojabeocã Silvanopũ yũre gojabasami. Silvano Jesu yagũ yũ acaweregũ Jesure duhubigũ ãhrimi yũ pepicũ. Mũare õaro werediaa. Eropigũ “I buheri diaye ta Goãmũ mũare ãgũ mahiri buheri ãhraa,” arĩ weregũ mũare ipũre gojabeoa. Eropirã i buheri mera sĩporã turarã árĩque mũa.

¹³ Mũare ãgũ beyediro dopa ta Jesu yarã Babilonia majarã sãre beyedigũ árĩmi Goãmũ. Erã mũare õadorema. Marco sã yũ magũ iro dopa árĩgũ sã mũare õadoremi. ¹⁴ Mũa mera majarãre bocatĩrirã õaro mera mojoto ñeaque.

Árĩpehrerã mũare Jesucristo yarãre gua õadorea. Eropa ta árĩque. Iripẽta ãhraa.

2 San Pedro

Jesu yarãre gojabeoñumi daja Pedro

¹ Yũhũ Simo Pedro Jesucristo ïgũ buhedore ïgũ apidigu ãhraa. Eropigũ ïgũ pohro majagũ ta ãhraa. Eropigũ muare gojabeoa yũhũ. Goãmũ marire taudigũ Jesucristo mera marire árïpehrerãre diaye iigũ ãhrimi. Eropa iigũ árïgũ Cristore umupeocũ, ïgũ yarã wacũ iimi muare. Eropa warã mũa sã gũa iro dopa ta ïgũ yarã ãhraa. Mari yujuro mera ïgũ yarã árïrãre muare gojabeoa. ² Eropirã Goãmũ sãre mari Opũ Jesucristo sãre masinemorã ïgũ mahiri mera õaro árïrãca mũa. Eropa õaro mũa árïboro dopa muare serẽbasaa Goãmũre yũhũ. Eropa arïgũ muare õadorea.

Õpa ãhrima Cristo yarã, arï gojañumi Pedro

³⁻⁴ ïgũ yarã árïmorãre Cristo marire aïdigũ árïmi. ïgũ eropa aïcũ peerã, ïgũre yũhribũ mari. Eropa yũhrirã Jesucristo õagũ, õarirepa ta ïgũ yarã ãhraa. Mari yujuro mera ïgũ yarã árïrã iimasigũ árïro dopa ta mari sã ïgũ iro dopa ta árïmasia. Eropa Goãmũre mari masinemorã, ïgũ turari mera ïgũ gamero dopa ta õarã árïrãca. ïgũ ãhrimi ïgũ yarã árïmorãre marire aïdigũ. Õagũ õarire iimasipehogũ ïgũ árïro dopa ta marire árïpehrerãre aïdigũ árïmi. Eropa ta iri ïgũ turari mera marire õatariaro wahabũ. "Õpa ta muare õaro iigũra," ïgũ arïdiro dopa ta marire õatariaro iimi ïgũ. Marire ïgũ eropiicũ i yeba maja ñerire mari ãaribejarire mari duhucãa. Iri ñeripũ marire goroweotariaca. Eropirã ïgũre yũhrirã árïrã Goãmũ ïgũ arïdiro dopa dujarãca mari. ⁵ Eropirã Cristore umupeorã árïtuhaa mũa. Eropirã ïgũ turarire oparã õpa iinemoque daja: Õarã árïque mũa. Eropa õarã árïrã õaro pee masirã árïque mũa. ⁶ Eropa pee masirã árïrã ñerire iidiaquererã ta Goãmũ ïgũ gameripũre iiniguicãrã árïque. Eropa iirã Cristo yarã mũa árïri dipuwaja gajirã muare ñero iiquerecũ ta eropa yujuro bojeniguicãque mũa. Eropa yujuro bojerã Goãmũre umupeorã, ïgũ gamerire iirã árïque mũa. ⁷ Eropa iirã mũa mera majarãre mahi umupeoque. Erãre õaro itamurã árïque. Eropa iirã árïpehrerã gajirã sãre mahi umupeoque.

⁸ Mũa eropa iinemocũpũre õataria. Mũa eropa iinemorã, õaro iirã árïrãca. Eropirã mari Opũ Jesucristore õaro guñaturarã ïgũ gamerire õaro iiniguirã árïrãca mũa. Bu árïrãre iisome. ⁹ Mũa eropa iinemobirã Goãmũ yare ne

masibirigohraboya mua. Eropirã Cristo mua ñeri iirare ïgu coerare ne guñabiriboya mua. Eropa ta cãdijicãdiaboya mua. ¹⁰ Eropirã yu acawererã, Goãmu yarã árĩmorãre muare ïgu árĩdorecũ yuhrinirã árĩbu mua. Eropa yuhrirã árĩrã, ïgu yare guña duhudiabirã ïgu gamerire turaro eropa iiniguicãque. Mua eropa iirã diaye ta Goãmu mera árĩrãca mua. Eropirã diaye ta ïgu beyenirã árĩrãca mua. Eropirã ñerire iiniguirã árĩsome. ¹¹ Mua eropa ïgu gamero dopa ta iirã árĩrã mari Opu marire taudigu Jesucristo ïgu árĩroque òaro warãca mua. Diaye ta ïgu yarã mua árĩcũ ïagu “Òaro mera yu mera árĩque mua,” arĩgucumi Jesu muare.

¹² Eropigu muare ire eropa guñaniguicũ iigura. I muare yu wererare masituhabu mua. Eropa masirã Goãmu yare mua peediro dopa ta òaro iirã iiaa mua. Eropa iirã mua árĩquerecũ ta i muare yu wererare eropa guñanemocũ werenemogura. ¹³⁻¹⁴ “Merogã duhyaa mu sĩriboro,” arĩ weremi yare mari Opu Jesucristo. Eropigu ojocarinigũ ire yu muare wererare eropa guñaniguicãcũ iiniguigara. Yu eropa iicũ òapũrica. ¹⁵ Eropigu i yu were gojara muare gojapiphegura yu sĩrira pũru mua òaro masiboro dopa. Eropirã i yu wererare eropa guñaniguirãca mua.

Cristo ïgu turagu árĩricũre ïabu yuhu, arĩ gojañumi Pedro

¹⁶ Eropirã mari Opu Jesucristo ïgu turari sãre, ïgu dujariboro sãre muare wererã, gua gamero gua arĩ bocarire wererã iibiribu. Turagu ïgu árĩrĩre gua basi ta ïabu. ¹⁷ Cristo ïgu turatariagu ïgu árĩrĩre guare ïhmumi Goãmu mari Pagu. ïgu eropa ïhmucũ Cristo òaro gosesiricũ ïabu. ïgu eropa gosesiricũ òpa arĩro caribu: “Ihĩ yu magu yu mahigu àhrimi. ïgu mera òaro mucubiria,” arĩro caribu gua peecũ. ¹⁸ Ùmarogue eropa arĩro caricũ peebu gua. Ùtãgu wecague Goãmu yagu utãgu wecague Cristo mera ejarã eroparicũ peebu gua irire.

¹⁹ Irire ïanirã árĩrã, Goãmu yare weremũhtanirã iribojegue majarã erã gojara diaye árĩcũ òaro masia gua. Erã gojarare mua òaro buheniguirã òaro iirã iica mua. Iri erã gojara muare sihãgodiru iro dopa àhraa. Naitĩaroguere òaro sihãgodiru mera mari ïhamasiro dopa ta erã gojarapu marire Goãmu yare òaro masicũ iiaa. Eropirã ïgu yare eropa buheniguique ne ïgu Jesucristo dujaricũgue. Jesucristo dujaricũ ïgu yare masipehorãca mari pare. ²⁰⁻²¹ Yu werediro tauro ipũre òaro masique mua: Iribojegue majarã òarã Goãmu yare erã weremũhtarã erã guñabocarire wereniguibirĩnuma. Espĩritu Santopũ erã Goãmu yare

wereniguiburire eräre masicũ iĩñumi. Eropirã mari erã wereniguiri gojarare buherã mari pepiri mera irire buherã “Õpa arĩro iica,” arĩmasibirica. Espĩritu Santo ĩgũ itamuri mera mari masia.

2

Goãmũ yare diaye buhebirãre were gojañumi Pedro

¹ Iribojegue mari acawererã judio masa mera majarã gajirã “Goãmũ yare weremũhtarã ãhraa,” arĩ gũyamũriĩnuma. Erã iidiro dopa ta dohpague sãre mũa mera majarãre eropa ta arĩ gũyarã árĩrãcoma. Erã diaye Goãmũ yare buherã arĩ buheboro dopa ta gũyarĩpũre buherãcoma. Eropa buherã Cristo yapũre goroweorãcoma. Eropa iirã Cristo erã ya dipuwajare sĩribasadigũre guñabirãcoma. Eropirã ĩgũre “Gũa Opũ ãhrimi,” arĩ ne pepisome. Iri árĩpehrerire erã eropa iira dipuwajare mata Goãmũ eräre peamegue wadoregũcumi.

² Eropa erã gũya buhecũ peerã erã, erã ñerire ãaribejaro dopa ta bajarã masa eräre ĩhacũ ñero iirãcoma. Erã ñero iicũ ĩha gajirã Jesucristo yare diaye majare ñero wereniguirãcoma. ³ Eropirã erã gũyaricũrã niyerure waja gamerã gũyari buherire buherãcoma mũare. Eropa buhera dipuwaja Goãmũ eräre peamegue wadoregũcumi. Iribojegue ta eropa iinirãre dipuwaja moadoretuhañumi ĩgũ.

⁴ Eropa ta iribojegue dipuwaja moadoreñumi ñerã anyua sãre. Eräre peamegue peresu iĩñumi. Eropa iigũ i ãmũ pehrerĩnũ árĩcũ eräre dipuwaja moagũcumi.

⁵ Eropa ta iribojegue majarãre Goãmũre gamebirinirãre dipuwaja moañumi ĩgũ. Eropigũ árĩpehrero i yebare miũgũ, árĩpehrerã ñerã masare miu wejẽpehocãñumi. Noé dihtare gajirã siete masa mera tauñumi. Noépu irisubu majarãre Goãmũ yare õarire buhemũririĩnumi.

⁶ Eropa ta Sodoma waĩcũri maca majarãre Gomorra waĩcũri maca majarã sãre Goãmũ dipuwaja moañumi. Iri macarire pa iinirãre dipuwaja moadoretupeame mera õaro soepehocãñumi. Eropigũ pũhrũgue árĩmorãre ĩgũre gamebirinirãre ĩgũ dipuwaja moaborore ĩhmũgũ iĩñumi. Ñerãre ĩgũ dipuwaja moaborore ĩhmũgũ iĩñumi

“Gũiporo,” arĩgũ. ⁷ Eropigũ Lote waĩcũgũre tauñumi. Lotepũ õagũ árĩñumi. Eropa árĩgũ árĩgũ Sodoma majarã Goãmũ dorerire tarinũgarã ñetariaro erã iicũ ĩagũ gariborea wañumi. Eropigũ ãma erã basi erã ñero iicũ ĩagũ gariboretaria wañumi ĩgũ. ⁸ ĩgũ õagũ ñerã watope árĩñumi. Eropigũ ãmũri nũcũ ñetariaro erã iicũ ĩagũ ñero erã wereniguicũ peegũ ñero sĩporãcũñumi. ⁹ ĩgũre

Goãmũ taucũ ïarã ire masia mari. Goãmũ mari Opũ marire ïgũre gamerãre mari ñerã watope árĩcũ marire taugũcumi mari ñero iibiriboro dopa. Eropigu ñerãpũre erã ñero iira dipuwajacurã árĩcũ apigũcumi. Pehrerinũ árĩcũguere erãre dipuwaja moagũcumi.

10 Ñerire turaro ùaribejarã Goãmũ dorerire tarinũgarã erã tamerare ñero dipuwaja moagũcumi ïgũ. Oã mũa mera majarãre gũya buherã ñeri ùaribejarire iirã ne mari Opũre umupeobeama. “Gajirãre mari tarinũgaa,” arĩ pepirã ãhrima erã. Eropa arĩrã erã deyobirãre ùamaro majarãre, ñerã turarãre ne gũibirã ñero arĩ wereyama erãre. Erãpũre tauro dipuwaja moagũcumi Goãmũ. 11 Goãmũ yarã anyuarũ ne erã iiro dopa iibeama. Erã tauro turarã ãhrima. Eropa turarã árĩquererã ta erã ne wereyari mera ùamaro majarãre ñerã turarãre “Peamegue waporo,” arĩ weresãbeama mari Opũre.

12 Erã gũya buherãpũ nũgũ majarã waimurã iro dopa pee masibirã ãhrima. Erã gamero dopa ta iima erã. Eropirã erã masibirirare wereya ñero arĩ wereniguicorema. Eropa iirã erã árĩcũ waimurãre mari wejẽro dopa ta Goãmũ erãre peamegue cóagũcumi. 13 Eropigu erã ñero iira dipuwaja dipuwaja moagũcumi Goãmũ. Erã ñerire ùaribejataricãma. Eropirã ñerire ñero iiniguicãma. Mũa mera bosenu iiquererã iri bosenu iri ñerire iidiana. Erã eropiirã gũhyasĩricũ iima erã querecurã árĩrã.

14 Eropirã nomere ïarã ñeadiama erã. Eropirã ñerire eropa iiniguidia. Goãmũ yare dabero masinũgarãre ñerire iidorerã, eropa árĩrãre erã ïhacũcũ iima. Eropirã erã seyaro gajinore, niyeru sãre gũya emamehrerã ãhrima. Eropirã erã Goãmũ ïgũ dipuwaja moamorã ãhrima. 15 Erã ñerire majare duhu Balaam ïgũ iidiro dopa iirã iima. Balaam murũ Beor murũ magũ árĩñumi. ïgũ iribojegue ïgũ ñeri iiri mera niyerure wajatadiariñumi. 16 ïgũ eropa iigũ wacũ ïgũ burropũ ïgũre turiñumi. ïgũ burro wereniguimasibigu ïgũ árĩquerecũ ta Goãmũ ïgũre wereniguicũ iinũumi. ïgũ eropa wereniguicũ peegu Balaam turaro ïgũ ñeri iidiarare duhucãñumi.

17 Erã gũyaricurã maũ dipague deco mariro iro dopa ãhrima. Deco mariri maũri dipari iri duhpiburi árĩbiriro dopa ta erã gũyaricurã ne duhpimorã árĩbeama. Eropirã imica cururi miruñe weãbeori cururi gohroto dopa ta erã gũyaricurã sã erã wereniguirire gohrotoniguima. Eropigu naitiarogue erã warore amutuhapũ Goãmũ erogue erãre dipuwaja moabu. 18 Erã gũyaricurã erã wereniguiro duhpiburi gohra árĩbeaa. Masirã iro dopa masare eropa

buhemaacāma. Ōpa arī buhema erā: “Mari gamero dopa ta mari iicū ōapūrica,” arī buherima erā. Erā eropa arī buhecū masa peerā, erā ɯaribejarire iidiarā erā ya buherire gahmema. Gajirā masa Goāmure ne umupeonugarā erā gɯyaricarire peerā āhrima. Erā ɱerire erā duhura pɱhrugā erā gɯyarire peenugama daja. Eropa peerā Goāmɱ yapure erā peeborapure peebeama daja. ɱeripure gohrotoma daja Goāmɱ yarā árībonirā. ¹⁹ Erāre ōpa arī buhema gɯyarā: “Mari iidiaro dopa ta mari iimasia,” arīrima erā. Erā eropa arī buhequerecū ta erā arīdiro dopa wabeaa erāre. Ōaripure iidiaquererā iimasibeama. ɱerire yoari boje duhudiabirā, pɱhrɱ irire duhudiaquererā duhumasibeama. Iri ɱeri erāre dorea. Erā ɱeri ɯaribejari erāre dorea. Eropiro yujugure ɱeripɱ tarinugacū ĩgɱpure ɱerire duhumasiya mara. ²⁰ Mari Opɱ Jesucristore marire taugure ne masinugarā i yeba maja ɱerire duhucāma. Erā eropa duhura pɱhrɱ dipaturi ɱerire gohrotorā daja, ɱero gohra dujaboñuma erā. Cristore erā masiboro core erā árīmɱhtadiro tauro ɱetariaro dujama pare dipaturi ɱerire gohrotorā daja. ²¹ Eropa ɱero dujarā ōari buheripure erā ne masinugabiricū ōatariaboya erāre. Erā Goāmɱ dorerire masira pɱhrɱ irire cóānirā ɱetariaro dujarācoma. ²² Eropirā dipaturi ɱerire gohrotorā, masa nɱcɱ erā ōpa arī wereniguidiro dopa ta iirā iima erā. “Diaye etocapi ĩgɱ etocapirare dipaturi ĩgɱ basi ta bahami daja. Eropigɱ yese ĩgure guhbura pɱhrɱ dipaturi ĩgɱ ɱeri tarague oyami daja,” arī wereniguima masa. Eropa ta iima ōarire ne gamenugarā dipaturi ɱerire gohrotorā daja.

3

Cristo ĩgɱ i yeba ĩgɱ dujariborore were gojañumi Pedro

¹ ɱɱ mahirā, mɱare yujupū gojabeotuhabɱ. Eropigɱ ipūre daja dohpaguere mɱare gojabeogɱ iiaa. Eropigɱ mɱare pesubu gojabeogɱ i árīpehrerire guñacū iidiaɱ iiaa ōari dihtare mɱa iiboro dopa. ² Irire guñaque mɱa: Iribojegue majarā ōarā Goāmɱ yare weremɱhtanirā erā were gojarare guñaque. Eropirā mari Opɱ marire taugɱ Cristo ĩgɱ doreri sāre guñaque. Iri dorerire gɱa ĩgɱ apinirā mɱare buheabɱ.

³⁻⁴ Eropirā negohrare ire guñamɱhtaque: Pehrerinɱ coregāque Goāmɱ yare wereyarā árīrācoma. Erā ɱerire ɯaribejaniguirā árīrācoma. Ōpa arī wereyarācoma: “‘Cristo dujarigɱra,’ ĩgɱ arīqueregɱ ne dujarisome. ¿Dujaridiaqueregɱ duhpigɱ ne deyobeari ĩgɱ? I yeba árīnugara pɱhrɱ mari ɱecɱ sumarā mɱra erā sīrira pɱhrɱ

árĩpehrero m̃uraro ta árĩniguia. Eropigũ i yebague dujaribu ne ɯmaroguere marimi,” arĩ wereyarã árĩrãcoma. ⁵ Eropã arĩ wereyarã ip̃ure ne guñadiabeama erã: Iribojeguere Goãmũ ĩgũ dorediro mera i yebare ɯm̃usi sãre ĩhacũnugũmi. Eropã ĩhacũnugugũ deco mera i yebare iĩnũmi. Eropigũ i yeba deco mera árĩcũ iĩnũmi. ⁶ ĩgũ eropiira p̃hrũ i yebare miuñumi. Miugũ i yeba maja dederepehrecũ iĩnũmi. ⁷ Eropigũ ĩgũ ta ɯm̃usire, i yeba sãre dipaturi dederepehrecũ iigũcumi ĩgũ. Peame mera dederecũ iigũcumi. Dohpague ĩgũ ĩgũ dorero mera i yebare ɯm̃usi sãre árĩniguicũ iimi dohpa. Eropigũ coregũ iimi p̃hrũ árĩpehrerore soebu. Eropã coregũ iimi Goãmũ ĩgũre gamebirãre dipuwaja moabu. Eropigũ ĩgũ beyerinũ árĩcũ soepehocãgũcumi. Irisubu erã ñerãre dedeogũcumi.

⁸ Yũ mahirã, ip̃ure guñaque m̃ua: “Yoatariari boje ãhraa,” mari arĩ pepiquerecũ ta, mil bojori yujunũ iro dopa ta ãhraa Goãmũ ĩgũ ĩacũp̃ure. ⁹ “Goãmũ ĩgũ arĩdiro dopa ta ne yojaro mera iibeami,” arĩma masa. Eropã árĩbeaa. Masare ðaro iidiagũ corenigũ iimi. Ne yujugũ masure peamegue cóadiabeami ĩgũ. Eropigũ árĩpehrerã erã ñeri iirire b̃jawerecũ, ñerire ii duhucũ corenimi ĩgũ dohpa.

¹⁰ Ñamigue yajari b̃gũ, ĩgũ guñaña mariro yajagũ ñajariro dopa ta Cristo i yebaguere guñaña mariro arigũcumi. ĩgũ aricũ ɯm̃usi maja pehrea waroca turaro busuro mera. Ɖj̃pehrea waroca. I yeba maja sã ɯj̃pehrea waroca.

¹¹ “I árĩpehreri pehrea waroca,” Goãmũ ĩgũ eroparĩcũ peerã ñerire duhu, Goãmũ gamerip̃ure iirã árĩro gahmea marire. ¹² Mari Opũ i yebague ĩgũ dujariborore m̃ua corerã árĩrã yojaro mera ĩgũ aricũ iique m̃ua. Irinure ɯm̃usi maja ɯj̃pehrea waroca. ¹³ Eropã guhyaro watope ádopa maripũ Goãmũ ĩgũ arĩ apidiro dopa ta árĩpehrerire ĩgũ gohrotoburire cohre mucubiriyua mari. Árĩpehreri iri ɯj̃ara p̃hrũ ðpa árĩroca: Ɖm̃usi i yeba sã gaji dihta árĩroca. Eropirã irisubuguere ðari dihtare iirãcoma árĩpehrerã. Irire ta cohrea mari.

¹⁴ Eropirã yũ mahirã, mari Opũ ĩgũ dujariborore corerã Goãmũ ĩgũ ĩarore ñeri marirã, ñerire iibirã árĩque m̃ua. Eropirã Goãmure ĩadiabirã árĩbircãque m̃ua. Eropirã Goãmũ mera ðaro árĩque. ¹⁵ Eropirã yoañariri boje ĩgũ deyobiricũ ĩarã ðpa masique m̃ua. Masa erã ñerire b̃jawerecũ corenigũ iimi dohpa Goãmũ erãre tauborore. Eropã ta arĩ m̃uare gojabeodigũ árĩmi mari mahigũ mari acaweregũ Pablo. Goãmũ masiri mera irire gojabeodigũ árĩmi ĩgũ. ¹⁶ Eropã dihta arĩ gojabeodi árĩmi Pablo ĩgũ

gojabeora n̄ac̄u. Cristo ãgu dujariborore, ñerire iibirã mari árīboro sãre weregu õpa dihta arĩ gojabeodigu árīmi ãgu. Yujuyerisuburi diasarire were gojabeodigu árīmi. Gajirã ne masibirã, pee masibirã ḡyari mera ãgu eropa arĩrare gohrotom̄arima. Eropirã ãgu eropa werera árīquerecũ ta gajiropa arĩ gohroto werecãma erã. Goãm̄u yare erã gojarapũgue gajĩ sãre eropa ta iima erã. Erã eropiicũ ãagu Goãm̄u erãre dipuwaja moagu peamegue cóãgucumi.

¹⁷ Ȳu acawererã, ȳu mahirã, i árīpehrerire i eropa waboro core weretuhab̄u m̄uare. Eropirã ire masirã õaro iique m̄ua. Ñerã m̄uare erã gajiropa arĩ buhecũ, peeigu árīmi. Gajirã ne masibirã, pee masibirã ḡyari mera ãgu eropa arĩrare gohrotom̄aribircãque erãre Cristo yare duhuri arĩrã. ¹⁸ Eropa duhubirã mari Op̄ure marire taudiḡure Cristore õaro umupeonemoque m̄uap̄u. ãgure õaro masinemoque. Árīpehrerin̄ari ãgure õaro umupeorã mari. “Õagu turagu ãhrimi,” arĩrã mari ãgure. Eropa ta arĩrã. Irip̄eta ãhraa.

1 San Juan

Ñu Jesucristore were gojara āhraa

¹ Dohpague ta gwa Jesucristo yare were gojarā iiaa mware. Mata negue ta árīdigu āhrimi ĩgu. ĩgu masare mari Pagu mera eropa árīniguicū iigu āhrimi. ĩgure ĩabu gwa. ĩgu wereniguirire pee gwa ya cuiuri mera ĩabu gwa ĩgure. Eropirā ĩgure ĩarā, gwa ya mojotori mera mohmeribu ĩgure. ² ĩgu masare mari Pagu mera árīniguicū iibu árīgu ĩgu i yebague ĩgu dehyoami. ĩgu masa dehyoacū gwa ĩabu ĩgure. Eropirā ĩgure werea gwa mware. ĩgu umuri nucu mari Pagu mera árīniguicādigu mari pohro erami. Eropirā ĩgure gwa ĩarare werea mware. ³ Mari Pagu mera gwa ōaro āhraa. ĩgu magu Jesucristo mera sāre gwa ōaro āhraa. Eropirā mua sā gwa mera, mari Pagu mera, ĩgu magu mera mua ōaro árīburire gwa mua sāre Jesucristore werea. Gwa ĩarare gwa peerare werea. ⁴ Irire ta gwa gojaa mua ōaro mucubiriburire.

Goāmū mera ōaro árīburi āhraa

⁵ Dohpague ta Jesucristo wereniguirare werea gwa mware. Iri buherire Jesucristo guare buhecū gwa peebu. Ōpa āhraa. Goāmū ōagu dihta āhrimi. Ñeripu ne mara ĩgure. Irire werea mware. ⁶ Eropirā mari ñeri iirire iiniguirā, “Goāmū mera ōaro árīcāa yuhū,” arīquererā mari guyarā iiaa. Eropirā diaye majare iibea. ⁷ Eropirā mari Goāmū iidiro dopa ta mari ōarire iiniguirā tamera, Goāmū mera ōaro árīrā iiaa. Mari basi sā ōaro árīrā iiaa. Eropigu Jesucristo Goāmū magu mari ñeri iirire árīpehrerire coegu āhrimi. ĩgu crusague sīrigu ĩgu dire cóami. ĩgu eropiigu mari ñeri iirire coeniguicāmi.

⁸ Yujugu “Yu tamera ne ñerire iibea,” eropa arīgu ĩgu basi ta guyami. Eropigu diaye majare pepibeami. ⁹ Eropirā mari ñero iirare werero gahmea Goāmure. Eropa wererā mari ñero iira puhru Goāmure mari weretaripehocācū, ĩgu mari ñero iirare cādijipehocāgucumi. ĩgu arīdiro dopa ta diaye ta iigu ōagu āhrimi. Eropigu daja mari ñeri árīpehreri sāre coeweagucumi. ¹⁰ “Árīpehrerā ñerire iirā āhrima,” arītuhajapu Goāmū. Eropirā “Ne ñerire iibea yuru,” mari arīrā ōaro arībeaa mari. Mari eropa arīrā “Goāmū guyaricugu āhrimi,” arīdiarā iiaa. Ōpa arīrā ĩgu ya buherire gamebirā āhraa.

2

Jesucristo marire itamumi, arĩ wereñumi Ñu

¹⁻² Yũ porã, mua ñerire iibiriboro dopa ire gojagu iiaa. Yujugu ñero iirare iicũ Jesucristo itamumi marire mari Pagu iri ñero iirare cãdijiboro dopa. Īgu Jesucristo õagu Pagu pohro árĩgu Īgu Pagure õpa arĩ serẽbasacumi mari ñero iira puhru: “Ihĩ ñero iira dipuwaja moabita ĩgure,” arĩrã “Goãmũ guyaricugu åhrimi,” arĩdiarã iiaa. Õpa arĩrã ĩgu ya buhe arĩcumi mari Pagure. Eropigu Jesucristo mari ñero iira dipuwaja wajayebasadi árĩmi. Mari ñero iira dihtare wajayebasabiridigu árĩmi. Árĩpehrero majarãguere erã ñero iirare wajayebasadi árĩmi.

³ Maripu Goãmũ dorerire iirã arĩrã “Goãmure diaye ta masia yũhũ,” arĩ masia mari. ⁴ Yujugu Goãmũ dorerire iibigu, “Yũ sã Goãmure diaye ta masia yũhũ,” arĩgu guyagu åhrimi. Eropigu Cristo yare masibeami. iiaa. Õpa arĩrã ĩgu ya buhe ⁵ Goãmũ dorerire iigupu ĩgu Goãmure õaro mahigu åhrimi. Eropa árĩgu ta “Yũhũ Goãmũ mera õaro árĩcãgu åhraa,” arĩ masimi ĩgu. ⁶ Mari “Goãmũ mera õaro åhraa,” arĩrã Jesucristo ĩgu õaro árĩricũdiro dopa ta iiro gahmea.

Goãmũ doreriñe åhraa

⁷ Yũ acawererã, yũhũ mũare dohpaguere werebeoburi mama doreriñe árĩbeaa. I doreriñe mua negohraguere Jesu buherire peerañe ta åhraa. Eropirã iriñe doreriñere peetuhajabu mua. ⁸ Iri doreriñe “Gajirãre mahi umupeoque,” arãa. Cristo iri doreriñere iigu masare umupeomi. Eropiro dohpaguere iri doreriñe mũrañe doreriñe árĩquerero ta mama doreriñe sã åhraa. Dohpaguere mua pee masibirañe pehre wahgãro iiaa õaro. Jesucristo mũare pee masicũ iigu eratuhajami. Eropirã mua sã masare umupeorã iiaa.

⁹ Eropigu yujugu gajigure ĩhaturigu árĩgu ñerire iigu åhrimi. Īgu ta “Yũhũ õarire iigu åhraa,” arĩmasibeami ĩgu gajigure ĩhaturinijagu. ¹⁰ Eropigu yujugu gajirãre mahi umupeogu tamera õarire iigu õaro åhrimi. Eropigu ñerire iibeami. ¹¹ Gajirãre ĩhaturigupu ñerire iigu åhrimi. Eropigu ĩgu õaro iiburire pee masibeami ĩgu.

¹² Yũ porã, Goãmũ mua ñeri dipuwajare cãdijipehodi árĩmi Cristo ĩgu sĩrirañe mera. Eropa mua ñerire cãdijisũrã árĩcũ mũare wegũ árĩgu ñerire iigu åhrimi. Īgu ta “Yũhũ õarire iigu åhraa,” arĩmasibre gojagu iiaa. ¹³ Mua pagu sũmarã sã, mua Cristore negohraguere árĩdigure masirã åhraa pare. Mua eropa masicũ mua sãre were gojagu iiaa. Mua mamarã, mua watĩre tarinũgabũ mua. Mua eropa tarinũgarã árĩcũ mũare were gojagu iiaa.

Yũ porã, mũa mari Pagure masia. Mũa eropa masirã áricũ were gojagu iiaa. ¹⁴ Mũa pagu sumará, mũa Cristore negohraguere árdigure masia mũa. Mũa eropa masirã áricũ mũare were gojagu iiaa. Mũa mamarã, mũa Goãmũ yare umupeoturará áhrraa. Eropirã igũ yare diaye majare iiaa. Goãmũ wereniguirire masia. Mũa eropiirã wafire tarinugabu. Eropigu mũare were gojagu iiaa.

¹⁵ I yebare, i yeba majare gamebircãque. I yeba majare gamerã maripũ mari Pagure gamebeaa mari. ¹⁶ I yeba maja áhrraa: Masa erã ñerire uaribejari, ñero ñha iiditari áhrraa. Eropáricũ masa erã ya dihta guña mucubiriri áhrraa. Iri Goãmũ mari Pagu ya árĩbeaa. Iri árĩpehreri i yeba maja áhrraa. ¹⁷ Eropirã i yeba majare iirã erã ñero iiditari mera dederea wahama i yeba mera. Goãmũ yapu pehresome. Eropirã Goãmũ yare iirãpũ Goãmũ mera árĩnigucãrãcoma.

Diaye maja árĩri, diaye maja árĩbiriri áhrraa, arĩ gojañumi Ñu

¹⁸ Yũ porã, i umũ pehrebro merogã duhyaa. “Cristore ñaturidigu gohra arigucumi,” arĩ Jesu yarã mũare weretuhajama. Dohpaguere Cristore ñaturirã bajarã árituhajama. Eropirã dohpaguere i umũ pehreburiũ merogã ero duhyacũ mari masia. ¹⁹ Oã Cristore ñaturirãpũ mari mera árĩquererã mari yarã diaye árĩbeama. Eropirã marire cohã wiriama. Erã mari yarã árĩrã mari mera dujaboañuma. Eropirã marire cohã wiriama. Erã eropa wiriacũ mari mera majarã erã árĩbirirare masia mari.

²⁰ Muapũre Cristo Espiritu Santore mũare otuhajadi árĩmi. Eropigu Espĩpehreri i yeba maja áhrraa. Íritu Santo mũa mera áhrimi. Igũ árĩro mera mũa árĩpehreri diaye maja árĩrere masia. ²¹ Eropigu yũ mũare weregũ, “Diaye maja árĩrere masibea mũa,” arĩbeaa yũhũ. Mũa diaye maja árĩrere masirã gũyacũ sãre masia. Eropigu mũare werea yũhũ.

²² Ihĩ diaye majare masibigu áhrimi gũyagupũ. “Jesu-cristo Goãmũ magũ árĩbeami,” arĩgũpũ gũyagu áhrimi. Igũ Cristore ñaturigũ áhrimi igũ. Eropigu mari Pagure igũ magũ sãre “Erã diaye ta árĩbeama,” arĩgũ Cristore ñaturigũ ta áhrimi. ²³ Ōpa áhrraa: Jesure gamebigũpũ mari Pagu sãre gamebeami. Jesure umupeogu mari Pagu sãre umupeomi.

²⁴ Negohraguere mũa Goãmũ yare peebũ. Irire õaro guñaque. Irire guñarã Jesucristo mera õaro árĩrãca. Eropirã mari Pagu mera sãre õaro árĩrãca. ²⁵ Jesucristo

marire weremi: Ōpa āhraa ĩgu werera: “Mua umuri nucu Goāmũ mera árĩrāca,” arĩ werepimi Jesu marire.

²⁶ Gajirā mũare gũyadjarima. Eropigu mũare were gojaa. ²⁷ Mũarũre Cristo Espĩritu Santore otuhajami. Espĩritu Santo mua mera árĩniguimi. Eropigu Espĩritu Santo mua mera árĩgu diaye majare mũare masicũ iimi. Espĩritu Santo mũare buhecũ ĩha gajigu mũare buhegure amabeaa mua. Árĩpehrerire diaye maja árĩrĩre buhemi mũare Espĩritu Santorũ. Gũyarire ne buhebeamĩ ĩgu. Eropirā Espĩritu Santo ĩgu mũare buhediro dopa ta Jesucristo yare peerā ĩgu mera ōaro árĩque.

²⁸ Eropirā, yũ porā, Jesucristo mera majarā árĩque. Mua eropiirā Cristo ĩgu dujaririnũ árĩcũ ne gũisome ĩgure. Eropirā ĩgu dujaririnũ árĩcũ mua gũhyasĩriri mariro árĩrāca. ²⁹ Cristo Goāmũ magũ ĩgu ōari dihta iidigu árĩcũ mua masia. Irire masirā iri sãre masia mua. “Árĩpehrerā diaye maja ōarire iirā Goāmũ porā ta āhrima,” arĩ masia mua.

3

Mua ta Goāmũ porā āhraa, arĩ werera āhraa

¹ Goāmũ mahitaricāmi marire. Eropigu ĩgu marire “Mua yũ porā ta āhraa,” arĩmi. Eropirā ĩgu porā ta āhraa mari. I yeba majarā ñerā Goāmũre masibeamã. Eropirā erā mari sãre masibeamã Goāmũ porā mari árĩcũ. ² Yũ mahirā, dohpague Goāmũ porā āhraa mari. Pũhrugue mari dohpa árĩburire mari ōaro masibeamã dohpa. Cristo dehyoacũ daja diaye ta irire masirāca. ĩgu árĩricũrĩre ĩha masirāca. Eropirā Cristo marire dehyoacũ daja ĩgu iro dopa ta mari gohroto árĩrāca. Eropirā ĩgu ōagu iiro dopa ta iirāca pare. Irire masia mari. ³ Eropa masirā ñerire duhu Cristo ĩgu árĩro dopa ta ōarire iidiaa dohpague sãre.

⁴ Árĩpehrerā ñerire iirā Goāmũ dorerire tarinũgarā āhrima. Ñero iiri Goāmũ dorerire tarinũgari āhraa. ⁵ Cristo márĩburire mari ōaro masibeamã dohpa. Cristo dehyoacũ daja diaye ta irire masirāca. ĩgu árĩricũrĩre ĩha masirāca. Eropirā Cristo marire dehyoacũ daja ĩgu iro dopa ta mari gohroto árĩrāca. Eropirā ĩgu ōagu iiro dopa ta iirāca pare. Irire ari masa ñerire cóabu erami. ĩgũpũre ñeri ne mara. Mua irire masia. ⁶ Eropirā árĩpehrerā Cristo mera majarā árĩrā erā sã ñerire eropa iiniguicābeama. Ñerire eropa iiniguicārã Cristore ne masibeamã. Eropa iirā Cristo yarā árĩbeama. ⁷ Yũ buherā, mũare gũyarãre peebiricāque. Árĩpehrerā diaye majare iirā, Cristo iro dopa

ōarā āhrama. ⁸ Ñerire eropa iiniguicāgu watī yagu āhrimi. Watī tamera mata ñerire iinugadigu árĩñumi. Eropigu Goāmũ magũ Jesucristo watī dorerire cóagũ erami.

⁹ Eropirā Goāmũ porā ĩgu árĩrire opama. Eropirā erā ñerire eropa iiniguicābeama. Goāmũ erā Pagũ árĩcũ erāpũ ñerire iiniguicāmasibeama. ¹⁰ Ōpa Goāmũ porā árĩrāre, watī porā árĩrā säre masirāca. Watī porā Goāmũ porā iro dopa ta árĩbeama. Diaye maja árĩrire iibirā, gajirāre umupeobirā Goāmũ porā árĩbeama.

Mũa mera majarāre mahi umupeoque, arĩ werera āhraa

¹¹ “Mari mera majarāre mahi umupeoro gahmea,” ne arĩ buhecũ peeabũ mũa. ¹² Eropirā mari Caĩn iribojegue majagu ĩgu ñero iidiro dopa ta ñerire iibiricārā. ĩgu Caĩn watī yagu árĩdi ĩgu pagũ magũre wejēcāñumi. Caĩn ñerire iimuriñumi. ĩgu pagũ magũpũ ñarire iimuriñumi. ĩgu eropa ñarire iira dipuwaja Caĩnpũ ĩgũre ĩhaturĩñumi. Eropigu ĩgũre wejēcāñumi.

¹³ Eropirā i mũmũ majarā ñero iiricūrā mari ñarire iicũ ĩha ĩhaturima marire. Eropirā “¿Duhpirā yũre ĩhaturiri erā?” arĩrire masirāca. ¹⁴ Negohrare mari Goāmũ yare iibirā árĩnirā mari dederebonirā árĩribũ. Dohpaguere pare Goāmũ yare iirā árĩrā ĩgu mera árĩniguimorā āhraa. Eropirā ĩgu itamuri mera Jesu yarāre mahi umupeorā āhraa. Eropa umupeorā árĩrā “Goāmũ yarā āhraa,” arĩ masia mari. Masare mahibirā peamegue wamorā āhrama. ¹⁵ Eropirā erā erā mera majarāre ĩhaturirāpũ masare wejērā iro dopa ta iima Goāmũ ĩgu ĩacũ. Masare wejērā mũmarogue árĩmorā árĩbeama. Irire ñaro masia mũa. ¹⁶ Cristo ĩgu sĩrirañere guñarā marire ĩgu mahira gohrare masia. Cristo mari masare mahitarigu mari dipuwajare aĩ mari Goāmũ mera árĩniguiborore sĩrimi. Mari sã gajirāre itamugu sĩribu ta árĩqueregu mari acawererāre mahi itamuro gahmea. ¹⁷ Yujugu baja opagu Jesucristo yagũre mojomorocũgũre ĩaqueregu ta ĩgũre mojomoro ĩabigu Goāmũre mahibeami ĩgu. ¹⁸ Yũ porā, mari “Yũhũ masare umupeoa,” mari arĩ wererā erāre itamuro gahmea. Erāre itamubirā erāre mahi umupeobirā iiaa.

Gũiro mariro Goāmũ pohro árĩmasia mari

¹⁹ Eropa gajirāre mahi umupeorā, “Mari diaye ta Goāmũ yarā āhraa,” arĩmasia. ²⁰ Eropirā mari basi “Gajino yũ ñero iira dipuwaja árĩca yũre,” arĩ pepiquererā ta Goāmũ mera ñaro sĩporācūrā árĩmasia. Goāmũpũ árĩpeherire masigu ñaro masimi mari sĩporārire. ²¹ Eropirā mari “Ñeri dipuwaja marica yũre,” arĩ pepirā ñarire iirā Goāmũ

mera mari gũiro mariro árĩmasia. ²² Goãmũ ìgũ dorerire ìgũ gamerire mari iicũ ìgũre mari serẽri nũcũre ogũcumi marire. ²³ Ōpa doremi ìgũ marire: “Goãmũ magũ Jesucristore umupeoque. Eropirã mũa mera majarãre mahi umupeoque Cristo marire ìgũ dorediro dopa ta,” arĩ doremi marire. ²⁴ Goãmũ dorerire iirã Goãmũ mera ðaro árĩcãa mari. Ìgũ Goãmũ sã mari mera ðaro ãhrimi. Goãmũ ìgũ Espĩritu Santore obeomi marire. Mari mera árĩgũ “Goãmũ yũ mera ãhrimi,” mari arĩ masiburire Espĩritu Santo marire masicũ iimi.

4

Goãmũ yarã gohrare masiro gahmea marire, arĩ werera ãhrraa

¹ Yũ mera majarã, dohpaguere i ãmũre bajarã gũyarã ãhrima, “Goãmũ yare wererã ãhrraa,” arĩquererã. Eropirã gajirã mũa watopegue Goãmũ yare buherã aricũ ðaro ìaque erãre. “¿Erã buheri noa buheri ãhriri?” arĩ ìaque. “¿Erã Goãmũ yarã ãhriri?” arĩ ìaque. ² Ōpa masique erãre serẽpirã: “¿Jesucristo i yebague aridigũ diaye ta masũ gohra árĩyuri?” arĩ serẽpiñaque erãre. Mũa eroparĩcũ pee erã Goãmũ yarã árĩrã “Masũ ta árĩñumi Jesu,” arĩ yũhrirãcoma. ³ Erã Goãmũ yarã árĩbirãpũ “Jesucristo masũ gohra árĩbiriñumi,” arĩ yũhrirãcoma. Erã eropa arĩ yũhricũ “Erã ya pepiri Cristore ìhaturigũ ya dorero dopa ta ãhrraa,” arĩ masirãca mũa. “Cristore ìhaturigũ arigũcumi,” peetuhajabũ mũa. Eropigũ ìgũ ya buheri i yebaguere árĩtuhajaa.

⁴ Yũ porã, Goãmũ yarã ãhrraa mũapũ. Eropirã mũa Goãmũ yare were gũyarãre tarinũgatuhajabũ. Mũa mera árĩgũ Espĩritu Santopũ watĩ tauro ãhrimi. Watĩ i ãmũ majarã yagũ ãhrimi. Eropirã mũare gũyarãre tarinũga, erãre peebirabũ mũa. ⁵ Gũyarãpũ i ãmũ majarã ãhrima. Eropirã erã i ãmũ majare gũyarire buhecũ i ãmũ majarã dihta erãre peema. ⁶ Maripũ Goãmũ yarã ãhrraa. Eropirã Goãmũre masirãpũ marire peema. Gajirãpũ Goãmũ yarã árĩbirãpũ marire peebeama. Eropirã ðpa arĩ masia mari. “Erã Goãmũ yare peerã Goãmũ doreri diaye majare opama. Erã Goãmũ yare peebirãpũ watĩ doreri gũyari majare opama,” arĩ masia mari.

Goãmũ árĩpehrerãre burigã mahiniguigũ ãhrimi, arĩ werera ãhrraa

⁷ Yũ mahirã, mari gajirãre mahicũ Goãmũ iigũ ãhrimi. Ìgũ eroparĩcũ ìarã mari mera majarãre mahirã. Masare ðaro mahirãpũ Goãmũ porã ãhrima. Eropirã erã Goãmũre

õaro masima. ⁸ Masare árĩpehreräre Goãmũ bũrigã mahiniguigu ãhrimi. Ĩgu eropa mahiniguigu árĩcũ masare mahibirãpũ Goãmũre masibeama. ⁹ Goãmũ marire ĩgu mahirare ĩhmudi árĩmi ĩgu magure obeogu. Ĩgu magure yujugu ta árĩgũre marire taubu obeodi árĩmi i yebaguere. Eropa obeogu marire ĩgu mahirire masicũ iidi árĩmi. ¹⁰ Ĩgu magure obeora mahiri gohra ãhraa. Mari masa Goãmũre mahibiriquerecũ ĩgu Goãmũpũ marire bũrigã mahidi árĩmi. Eropigu ĩgu magure obeodi árĩmi mari ñerire cóãbure. Ĩgu magure obeora iri ta ãhraa marire ĩgu mahiri gohra.

¹¹ Eropirã, yũ mahirã, Goãmũ bũrigã marire mahicũ ĩarã mari sã mari mera majaräre mahirã. ¹² Masapũ ne mari Pagure Goãmũre ĩabeama. Ĩgũre ĩabirã mari árĩquerecũ ta mari mera majaräre mari mahicũ Goãmũpũ mari mera õaro eropa árĩniguicãmi. Eropigu ĩgu mari mera árĩgu marire gajiräre õaro mahinemocũ iimi. ¹³ Goãmũ marire ĩgu Espĩriture ohami. Eropirã ĩgu Espĩriture mari oparã “Goãmũ mari mera õaro ãhrimi,” arĩ masia mari. ¹⁴ Mari Pagũ ĩgu magure i yeba majaräre taubure ĩgu obeocũ gũa ĩabũ. Eropirã irire ĩanirã gajirãguere irire werea gũa. ¹⁵ “Jesucristo Goãmũ magũ ta ãhrimi,” arĩgu ĩgu ta Goãmũ mera õaro árĩgu iimi. Eropigu Goãmũ sã ĩgu mera õaro árĩcãgu iimi.

¹⁶ Eropirã Goãmũ marire mahirire masia mari. Eropirã marire diaye ta mahigu ĩgu árĩcũ masia mari. Goãmũ masare árĩpehreräre bũrigã mahiniguicãgu ãhrimi. Eropirã masare mahiniguirãpũ Goãmũ mera õaro ãhrima. Goãmũ sã erã mera õaro ãhrimi. ¹⁷ I yeba árĩdigũ Cristo Goãmũre gajirã sãre ĩgu mahidiro dopa ta mari sã Goãmũre gajirã sãre mahia. Eropirã mari eropa mahirã mahinemoa, dipuwaja moarinũ árĩcũ mari güibiriboro dopa. ¹⁸ Eropirã mari Goãmũre mahirã güibeaa. “Goãmũ marire bũrigã mahimi,” arĩ õaro masirã güisome pare. “Mata Goãmũ yũre dipuwaja moagucumi,” arĩ pepirãpũ güia mari. Mari eropa pepirã Goãmũ marire ĩgu mahirire õaro masibeaa.

¹⁹ Marire Goãmũ mahimũhtami. Eropirã mari sã ĩgũre mahia. ²⁰ Yujugu masũ gajigũre ĩhaturigu árĩqueregu “Yũ sã Goãmũre mahia,” arĩgu gũyagu ãhrimi. Gajigũre ĩhaturigu Goãmũre mahibeami ĩgu. Gajigũre ĩgu masigu árĩqueregu ta mahibigu Goãmũ sãre ĩgu ne ĩabigũre mahimasibeami ĩgu. ²¹ Eropa ãhraa marire Cristo ĩgu doreri: Goãmũre mahirã árĩrã mũa pohro árĩrã sãre mahi umupeoque.

5

Goām̄ porā árĩrã Goām̄ dorerire iima, arĩ werera āhraa

¹ Árĩpehrerã Jesup̄re “Cristo āhrimi. Goām̄ obeodigu ire burigã mahimi,” arĩāhrimi,” arĩrã Goām̄ porā ta āhrima. Gajirã paḡure mahirã ĩgu porā sãre mahia mari. Eropa ta mari mari Paḡure Goām̄ure mahirã, ĩgu porā sãre mahia. ² Eropirã Goām̄ porãre mari mahirire mari õpa masirãca: Goām̄ure mahi, ĩgu dorerire õaro ii, ĩgu porā sãre mari mahirã iiaa. ³⁻⁴ ĩgu dorerire õaro iirã Goām̄ure mahirã iiaa mari. Marire Goām̄ ĩgu dorerire iicũ teboricũsũya mara. Eropirã mari árĩpehrerã Goām̄ porā árĩrã, i ɸm̄ maja ñerire eropa iiniguicãsome. Goām̄ure umupeorã ne ñerire gamebeaa. Eropirã ĩḡure mari umupeora p̄hrũ ñerire iidiabeaa. ⁵ Ñerire gamebirã õpa arĩrã āhraa mari Jesucristore. “Jesu Goām̄ maḡu ta āhrimi,” arĩ umupeorã ta āhraa. Eropa arĩrã árĩrã ñerire gamebirã āhraa mari.

Goām̄ maḡu árĩric̄urire werera āhraa

⁶ Jesucristo i yebague erami. I yebaguere árĩgu deco mera waĩyesũmi. Deco dihta árĩbeaa. P̄hrũ s̄rigũ ĩgu di cóami. Eropirã Jesucristore ĩgu deco mera waĩyecũ ĩha ĩgu ya di cóacũ ĩha “ĩgu Goām̄ maḡu ta āhrimi,” arĩ masia mari. Jesucristo árĩric̄urire diaye ta marire árĩpehrerãre masicũ iimi Esp̄ritu Santo. Esp̄ritu Santo diaye majare marire masicũ iimi. ⁷⁻⁸ Ƴmarogue sãre irire “Jesucristo Goām̄ maḡu ta āhrimi,” arĩ wererã ɸrerã āhrima. Mari Paḡu, ĩgu maḡu, Esp̄ritu Santo erã ta āhrima. Erã ɸrerã ta āhrima. Eropirã yujugũ iro dopa ta āhrima. I yebague sãre “Jesucristo Goām̄ maḡu āhrimi,” arĩ masisũa. ĩgu maḡu ĩgu árĩric̄urire Esp̄ritu Santo marire masicũ iimi. Eropi Jesure deco mera ĩgu waĩyerare masirã “ĩgu Goām̄ maḡu āhrimi,” arĩ mari masia. Eropirã mari árĩburire Jesu s̄rigũ ĩgu di cóarañere ĩha masirã “Goām̄ maḡu ta āhrimi,” arĩ masia mari. Iri mera marire masiro gahmea. ⁹ Mari masa dihta wereniguicũ mari peea. Eropirã marire Goām̄p̄ ĩgu maḡu árĩric̄urire wereniguicũ õaro peero gahmea. ¹⁰ Eropirã Goām̄ maḡure umupeorã ĩgu Jesure were buherire õaro peema. “Diaye ta āhraa,” arĩ pepima erã Jesu yare buherire. Goām̄ ĩgu maḡu yare “Diaye árĩbeaa,” arĩ pepirãp̄ “Goām̄ ḡyaḡu āhrimi,” arĩrã āhrima erã. Goām̄ ĩgu maḡure arĩ wererire peebirã āhrima. ¹¹ Goām̄ marire ɸm̄ri n̄c̄u ĩgu mera mari árĩniguicũ iiḡucumi. Goām̄ maḡure gamerã árĩrã mari árĩcũ ĩgu mera eropa árĩniguicũ iiḡucumi marire. I āhraa

Goãmũ magure ïgu wereri. ¹² Eropirã Goãmũ magure umupeorã Goãmũ mera árĩniguicãrãca. Eropirã gajirã ïgure gamebirãpũ ïgu mera árĩsome.

Weretu ïgu gojara ãhraa

¹³ Mũa Goãmũ magure umupeorã ïgure peerã mũa Goãmũ mera eropa árĩniguicãrãca. Mũa Goãmũ mera árĩburire ðaro masicũ mũare were gojagu iiaa.

¹⁴ Mari, mari dohpa árĩrire Goãmũre sererã ïgu gamediro dopa ta mari serẽcũ ïgu marire ðaro peenurugucumi. Eropa mari sererã, "Diaye ta ðaro peemi ïgu," arĩ masia mari. ¹⁵ ïgure mari eropa serẽcũ ïgu marire peemi. ïgu pee mari sereropẽ ta ogucumi. ïgu eropa peecũ masirã ïgure mari sereropẽ ta ïgu obu árĩcũ sãre masia mari.

¹⁶ Mari mera majagu gajigu Jesucristore umupeogu ñerire ïgu iigu árĩcũ ïha ïgure Goãmũre serẽbasaro gahmea. Eropa serẽcũ Goãmũ ïgure taugucumi ïgu dedereborãñere. Gaji ñero iiri ãhraa. Iri ñero iirire gajigu ïgu iigu árĩcũ ïha Goãmũ ïgure dedereburiñere taubeami. Eropigu mũ acaweregũ iri ñerire iicũ Goãmũ taubiriburire iicũ "ïgure Goãmũre serẽbasaque," arĩbeaa yũhũ mũare. ¹⁷ Árĩpehreri ñero iiri ñetariari ãhraa Goãmũ ïgu ïacũ. Eropa árĩquerecũ gaji ñeri iiri peamegue wacũ iibeaa mašare.

¹⁸ Goãmũ magũ Jesucristo Goãmũ porãre ðaro cãhmotami. Eropigu watĩpũ Goãmũ porãre ñero iirire doremasibeami. Eropirã Jesucristo cãhmotari mera Goãmũ porã ne ñero iirire eropa iiniguicãbeama. Irire mari masia.

¹⁹ Mari Goãmũ porã ãhraa. Watĩ i mũmũ majarã opu ãhrimi. Iri sãre masia mari.

²⁰ Goãmũ magũ i yebague aridi Goãmũre ðaro masicũ iimi ïgu marire. Eropirã Goãmũre "Diaye ta ãhrimi," arĩ masia mari. Eropirã Goãmũ magũ Jesucristo yarã ãhraa mari. Eropirã Goãmũ mera mari ðaro árĩniguicãrã iiaa. Ihĩ diaye ta Goãmũ gohra ta ãhrimi. Eropirã ïgu mera árĩniguicãrãca.

²¹ Yũ buherã, goãmarã wéanirãre "Goãmũ ãhrimi," arĩ umupeobiricãque. Goãmũ dihtare umupeoque. Iripẽta ãhraa.

2 San Juan

Gajirāre were gojañumi Ñu. Jesu yare, diaye mahiri sāre wereñumi

¹⁻² Yũhũ bũgũ mũre Goãmũ beyedigore mũ porã sāre ipũre gojabeoa. Jesucristo yare diaye majare opaa mari. Iri mari mera árĩniguicāroca. Eropigũ diaye ta mahia yũhũ mũare. Yũ dihta mahibea mũare. Gajirã Jesu yare masirã sã diaye ta mũare mahima. ³ Goãmũ mari Pagũ, Jesucristo ĩgũ magũ mera diaye ĩgũ mahiri mera marire õaro iigũcumi. Eropigũ marire mojomoro ĩagũcumi. Eropigũ marire õaro árĩcũ iigũcumi ĩgũ.

⁴ Mari Pagũ marire ĩgũ dorediro dopa ta mũ porã yujurāyeri ĩgũ yare õaro yũhrirã árĩcũ peebũ. Eropa peegũ mucubiriabũ. ⁵ Eropigũ, acawerego, mari mera majarāre mahi umupeodorea marire. Yũ doreri mama doreriñe árĩbeaa. Iri doreriñe marire mata árĩtuhaya. ⁶ Eropirã Goãmũ dorerire iipehorã mari ĩgũre mahia. Eropiro iri doreriñe āhraa mũa negohrare peerañe. Gajirāre eropa mahiniguicārã árĩque.

Bajarã gũyaricũrã árĩrãcoma, arĩ werera āhraa

⁷ Bajarã gũyarã i mũmũ majarāre buherã wahama. "Jesucristo i yebaguere aridigũ masũ dũpũ gohra árĩgũ aribiriñumi," arĩma. Erã gũyarã Cristore ĩhaturigũ iro dopa ta iima. ⁸ Eropirã õaro pee masique mũa. Mũare gũyarāre peebiricāque Goãmũ mũare ĩgũ õaro iiburire cóari arĩrã. Erāre peebiricũ Goãmũ mũa õari iira waja obeogũcumi mũare.

⁹ Árĩpehrerã Jesucristo buherire peenirã irire cóarã Goãmũ yarã árĩbeama pare. Jesucristo buherire õaro peenũrũrãpũ Goãmũ mari Pagũ yarã āhrima. Goãmũ magũ Jesucristo yarã sã āhrima. ¹⁰ Eropirã mũa yujugũ Jesucristo ya buherire gamebigũ gaji buherire buhegũ mũa pohro eracũ ĩgũre game bocatĩribiricāque. Mũa ya wirigue ñajadorebiricāque. ¹¹ Gaji buherire buhegũ Jesucristo yare umupeobigũ ñero iigũ āhrimi. Eropirã mũa ĩgũre bocatĩri serērã ñero iidigũre itamurã iiaa. Eropirã ĩgũre bocatĩri serēbiricāque.

Were gojatura āhraa

¹² Baja yũhũ mũare werediaqueregũ ta irire paperapũgue gojabeodiabirica. Yũ basi ta mũare ĩagũ wadiaca. Mũare ĩagũ weretamugũca mari õaro mucubiriburire.

¹³ Mu pagu mago Goãmu beyedigo igo porãpu muare
õadorema. Iripêta ãhraa.

3 San Juan

Gaji carta gojañumi daja Ñu. Gayo ïgu ðaro iirare wereñumi

¹ Yuhũ buçu mure Gayore diaye ta yũ mahigure ipũre gojabeoa.

² Yũ mahigu, mũhu Goãmure ðaro umupeocũ masia yuhũ. Mũhu Goãmũ mera ðaro árĩro dopa ta mũ dũpũ sã ðaro árĩcũ serẽbasaa yuhũ Goãmure. ³ Gajirã Jesucristo yarã yũ pohro erarã mũ árĩricũre yũre wereama. Cristo gamerire diaye mũ iirare wereama erã yũre. Erã eropa werẽcũ peegu bũrigã mucubiriabũ yuhũ. ⁴ Jesucristo yarã yũ buhenirã Jesucristo yare diaye ta árĩre erã iicũ pee bũrigã mucubiria yuhũ.

⁵ Yũ mahigu, mũhu Jesucristo yarãre itamugu ðaro iiaa mũhu. Jesucristo yarã mũ ïha masibirã sãre itamugu ðatariaro iiaa. ⁶ Erãpũ erãre mũ umupeorare wereama guare Jesucristo yarã gamenererogue. Eropigu Goãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa iigu ðaro iigu árĩgũca mũhu. Eropa ta marire itamuro gahmea Goãmũ yare buherãre. ⁷ Erã Jesucristo ya árĩburire buhe curirã warã, Jesucristore umupeobirãpũre erã itamurire ne serẽbeama. ⁸ Eropirã marire Jesucristo yare buhe curirãre itamuro gahmea. Erãre eropa itamurã erã iiro dopa ta mari sã Goãmũ yare buherire itamurã iiaa.

Diotrefe ïgu ñero iira ãhraa

⁹ Eoãmũ yare buhe curirãre mũ pohrogue erarã erã gajipũ wacũ itamuque erãre. Mũ eropa ro majarãre Jesucristo yarãre yũ gojarapũre gojabeorabũ. Diotrefepũ ïgu basi erã opu árĩdiagũ yũ wererare peediabiripũ. ¹⁰ Eropigu maa pohro yũ ejara pũhrũ ïgu iirare werepehogura. Guare ñero werenigupũ. Eropigu Jesucristo yare buhe curirãre bocatĩbiripũ. Gajirã ero árĩrã erãre bocatĩridiacũ gamebiripũ. Gajirãpũ erã buhe curirãre bocatĩricũ ïha ïgu Diotrefe erã bocatĩrira waja erãre cohã wiupũ Jesucristo yarã gamenereri wihigue.

¹¹ Yũ mahirã, ñero iirãre ïhacũbircãque. Õaro iirãre ïhacũque. Õarire iirã Goãmũ yarã ãhrima. Ñerire iirã Goãmure masibeama.

Demetrio ïgu ðari iira ãhraa

¹² Árípehrerã “Demetrio ðagũ áhrimi,” arĩma. Eropirã ïgũ iirire ïarã ðaro ïgũ iira árĩcũ masima masa. Gũa sã ïgũ ðaro iirare eropa ta werea. Gũa wereniguiripũ diaye árĩcũ masia mũa.

Ñu weretura ãhraa

¹³ Mũare baja werediarabũ. Iirire gojasome. ¹⁴ Merogã pũhrũ mũare ïagũ wadiaca. Eropirã mari basi weretamurãca.

¹⁵ Õaro árĩque mũhũ. Mari mera majarã Jesucristo yarã mũre ðadorema. Ero majarã mari mera majarã sã ðaporo. Iripẽta ãhraa.

San Judas

Juda Jesu yaräre gojabeoñumi

¹ Yuhũ Juda Santiago pagũ magũ Jesucristo pohro majagu mũare Jesu yaräre ipũre gojabeoa. Mũare mari Pagu Goãmũ ĩgu beyenirã áhraa. Eropirã ĩgu mahiri mera õaro áhraa mũa. Eropigu mũare Jesucristo ĩhadibumi mũa ñerire iibiribore. ² Õadoreo mũare. Goãmũ itamuro mera õaro árĩque mũa. Eropigu Goãmũre mojomoro ĩhadore, mũare mahidoregũ serẽbasaa yuhũ Goãmũre. Mũa gajirã mera õaro áhri erãre mahibore serẽbasaa Goãmũre.

Gũyarã erã buherire werenũgañumi Juda

³ Goãmũ marire peamegue wabonirãre ĩgu itamuripũre turaro gojabeodiarabũ mũare, yũ mahirãre. Eropa gojadiaqueregũ ta dohpaguere gũyari buherire gamedorebigũ mũare gojabeoa. Gajirã mũa pohro ejanirã erã gũyari buherire mũa peebiriboro dopa mũare gojabeoa dohpaguere. Eropirã Jesucristo ya buheripũre buhe tarinũgaque. ĩ buheripũre peerã, mari Goãmũre õaro umupeoa. ĩ buheripũ Jesu ĩgu apinirã ĩgu yaräre erã buhera eropa árĩniguicãro iiaa gohroto mariro. ⁴ Bajamerãgã masa ñerã ĩha masiya marirã mũa pohro ejanirã árĩma. Mũa mera árĩrã erã buherire buhe gũyama gũare ĩha masiri arĩrã. Õpa arĩ buhema: “Goãmũ yarã mũa árĩcũ, ĩgu mahimi mũare. Eropigu nome mera mũa ñero iicũ ĩgu mũare ne dipuwaja moasome,” arĩ buherima erã. Eropirã mari Opũre yjugũ ta árĩgũre Jesucristore “Goãmũ magũ árĩbeamĩ,” arĩ buherima erã. Eropa arĩ buherãre Goãmũ ĩgu dipuwaja moaborore werenũmi iribojeguere ĩgu yare erã gojarapũgue.

⁵ Dohpaguere gajire guñacũ iidiaa mũare. Ire mũa masiquerecũ ta dipaturi mũare ire guñacũ iidiaa. Goãmũ ĩgu yaräre Egipto árĩnirãre ĩgu wiura pũhrũ erã mera majarã ĩgũre umupeobirinirãre Goãmũ wejẽñumi. ⁶ Eropirã mũa gajirã sãre guñaque. Gajirã anyuapũ Goãmũ doreri iinirã, pũhrũ iidiabiriñuma. Eropirã erã ĩgu árĩdore apidiro sãre erã árĩdiabiriñuma. Eropirã erã árĩdirore cóacãñuma erã. Erã eropa cóacũ ĩagũ Goãmũ erãre naitĩarogue erãre peresu iĩñumi. Eropirã erã pehrerinũ core comedare dirinirã iro dopa árĩniguicãrãcoma. Eropigu pehrerinũ árĩcũ dipuwaja moagũcumĩ Goãmũ erãre. ⁷ Eropa ta

ñero iĩnuma gajirã sã. Erã sãre guñaque mũa. Erã Sodoma waĩcũri maca majarã, Gomorra waĩcũri maca majarã iri macari pohro árĩri macari majarã sã nome mera ñero iimũriĩnuma. Eropirã gajiropa árĩri sãre iĩnuma. Erã ɯmapũ erã basi ta erã dũpũ mera ñero iĩnuma. Nome sã eropa ta iĩnuma erã seyaro. Erã eropa iira dipuwaja Goãmũ erãre soepehocãnumi. Erãre soegu Goãmũ árĩpehrerã ĩgũre tarinũgarãre ĩgũ dipuwaja moaburire ĩhmugũ iĩnumi. Erãre ĩgũ dipuwaja moari peame ne yarisome.

⁸ Erã Goãmũre tarinũganirã iidiro dopa dohpague sã eropa ta iiniguicãma gũyarire buherã. Erã pee masibirã iro dopa ta erã dũpũ mera ñero iima. Eropirã mari Opũ dorerire gamebeama erã. Eropirã deyobirãre, ɯmaro oparãre, turarãre erãpũ ñero werenigui corema. ⁹ Ōagu anyua opũpũ Migue waĩcũgũ ĩgũ turagũ árĩqueregũ ta watĩpũre ñero werenigui corebiripũ. ĩgũ Moise dũpũ mũrarore gamegũ, watĩ mera game dũyasopũ. Turagũ árĩqueregũ ta ĩgũ watĩ tauro “Yũ tamera turaa,” arĩ pepibiripũ. Eropigũ ĩgũ gamero watĩre “Peamegue waporu,” arĩ weresãbiripũ Goãmũre. Eropigũ õpa arĩpũ watĩre. “Goãmũgue mũre turiporo,” arĩpũ Migue watĩre. ¹⁰ Oã gũyarãpũ erã masibirirare ñero werenigui corema. Eropirã waimũrã pee masibirã erã gamero ñero iiro dopa ta erã gũyari wererãpũ eropa iimaacãma. Eropa iirã árĩrã peamegue warãcoma.

¹¹ Erã ta ñero tarirãcoma. Caĩn iribojegue majagũ iidiro dopa ta ñero iima erã. Eropirã Balam sã ĩgũ iidiro dopa ta erã niyerure mahi, aĩdiarã gũyarire buhema. Eropirã niyeru aĩri dihtare pepima erã. Eropirã iribojegue majagũ Coré waĩcũgũ ĩgũ opũre Moiserẽ ĩgũ cóãdorediagũ ĩgũ iidoreldiro dopa ta erã sã Jesure eropa ta cóãdoreldama. Eropirã ĩgũ iidiro dopa ta erã sã peamegue warãcoma. ¹² Erã mũare gũya wererãpũ mũa game mahi ii ĩhmuburi bosenuirẽ barã, umupeori mariro erã erã gamero bira, erã seyaro ta barire bapehocãma gajirãre oro mariro. Eropirã ñerire iirã erã mũa bosenuirẽ õarinũri wabornañere goroweoma. Deco mariri imica cururi iri mari otera itamubiro dopa ta erã gũyarire buherã ne mũare itamubeama. Eropiro iri imica cururi miruñe weãcũ eropa gohrotoniguĩro dopa ta erã gũyarã sã erã wereniguirẽ gohrotoniguicãma. Yucũ dũcacũbiriri yucũ duhpiburi árĩbiro dopa erã duhpimorã árĩbeama. Erã buheri mera gajirãre Goãmũre umupeocũ iibeama. Yucũgũ dũca maricũ ĩha mari duha peamegue soe cóãcãa irigũre. Eropa ta

Goãmũ erãre guyarãre peamegue cóãgũcumĩ. ¹³ Pãgúri pumarare pamujupira iro dopa erã ñerire guhyasiurire wereniguima. Necãmũ yuridija ãgũ pehrero dopa ta erã sã pehrea warãcoma. Erã eropa ñero iira dipuwaja dederea warãcoma. Goãmũ erãre dipuwaja moacũ naitĩarogue árĩniguicãrãcoma.

¹⁴⁻¹⁵ Enoco iribojegue majagũ Adán pũhrũ siete cururi pũhrũ majagũ õpa arĩmuriñumi. “Peeque yũre. Goãmũ bajarã ãgũ anyua õarã mera árĩpehrerã ñerãre erã ñerire iira dipuwaja moagũ arigũcumĩ. Eropigũ árĩpehrerã Goãmũre ãhaturirãre erã ñeri iira dipuwajare erãre masicũ iigũ arigũcumĩ Goãmũ. Eropigũ Goãmũre erã ñero wereniguira dipuwaja sãre erãre masicũ iigũ arigũcumĩ,” arĩmuriñumi Enoco mũrũ. ¹⁶ Erã guyarã gajirãre duyaso ñero werenigui corerã, erã ñero ãaribejari dihtare iirã ãhrima erã. Eropirã “Gajirãre masitarinũgaa gũa,” arĩrima erã. Eropirã erã gamero dopa iidiarã gajinore emadiarã, peemaja õaro wereniguima masare.

Jesu yarãre werenemoñumi Juda

¹⁷ Mari Opũ Jesucristo buhedore ãgũ apinirã erã buherare guñaque mũarũ, yũ mahirã. ¹⁸ Õpa arĩma erã mũare. “I yeba pehrebro coregã Goãmũre ñero arĩ wereyarã árĩrãcoma. Eropirã erã Goãmũre gamebirã, ñerire erã ãaribejarire iirãcoma erã,” arĩ werema Jesu ãgũ apinirã mũare. ¹⁹ Jesu yarãre erã basi erã game ãhaturicũ iima erã guya wererãpũ. Eropirã ñerã erã ñeri ãaribejarire iirã árĩrã, Espĩritu Santore ne opabeama erã.

²⁰ Mũarũ yũ mahirã, Jesucristo ya buherire õaro peenemoque guñaturarã mũa árĩboro dopa. Iri buheripũ õataria. Espĩritu Santo itamuri mera Goãmũ mera wereniguique mũa. ²¹ Goãmũ mũare bũrigã mahimi. Eropirã ãgũ mũare mahiniguiboro dopa ñeri mariro árĩniguicãque Goãmũ ãgũ dorero dopa. Eropirã Jesucristo mera mũa eropa árĩniguiburire coreque. ãgũ marire mojomoro ãagũ ãmaroguere eropa árĩniguicũ iigũcumĩ.

²² Cristo yare peediabiriñarirãre mojomoro ãaque. Eropirã erãre Jesucristo ya diaye árĩrire wereque. ²³ Erãre peamegue wabonirãre Goãmũre itamucũ iique mũa. Gajirã ñerire iirã wahama. Erã ñerire dooque. Erãpũre mojomoro ãaque mũa. Erãre itamurã mũa sã õaro iique erã ñeri iirire ãhacũri arĩrã. Gũhraricũri suhrirore mũa gamebiro dopa ta, gajirã erã ñeri iirire gamebircãque irire pẽhreri arĩrã.

Juda Goãmũre ãgũ utũpeori ãhrũ ãmaroguere eropa árĩniguicaa

24-25 Goãmꝰ mari Opꝰ marire ãhadibumasimi ñerire mari iibiriboro dopa. Eropigꝰ ãgꝰ marire ñeri dipuwaja marirãre ¼marogue ãgꝰ pohrogue apimasimi. Eropa marire ãgꝰ erogue apicũ mari mucubirirãca. ãgꝰ Goãmꝰ yujugꝰ ta ãhrimi. Eropigꝰ peamegue wabonirãre taugꝰ ãhrimi ãgꝰa. ãgꝰpꝰ iribojegue dohpague sãre õatariagꝰ, mari tauro opꝰ árãgꝰ, turatariagꝰ, árãpehrerãre doregꝰ ãhrimi. ãgꝰ eropa árãgꝰ árãcũ Jesucristo yarã árãrã ãgꝰre umupearã. Eropa ta iirã. Iripẽta ãhraa.

Apocalipsis

Puhrugueru I ɯmɯ dohpa waborore marire masicũ iimi Jesucristo, arĩ gojañumi Ñu

¹ Ipũ mera Jesucristo ĩgu yarãre masicũ iirare were gojabeogu iiaa. Mari Pagu Goãmupɯ irire weredoregu apipɯ Jesucristore. ĩgu yarãre ĩgu pohro majarãre masicũ iidoregu apipɯ. Eropigu puhru waburire marire masicũ iidoregu apipɯ Jesucristore. Eropigu Jesucristo marire eropa masicũ iibu ĩgu anyure obeodigu árĩmi yure Ñure irire weredoregu. ² Eropigu yuhɯ Ñu baja ĩamɯhtabɯ Goãmɯ ĩgu dohpa iiburire. Goãmɯ ĩgu wereniguirĩ sãre peeabɯ. Eropigu árĩpehreri yɯ ĩarare yɯ peerare were gojabeogu iiaa. Jesucristo ĩgu basi ta diaye arĩrare were gojabeogu iiaa.

³ Ipũ mera puhrugue dohpa waburire were gojagu iiaa. Merogã duhyaro iiaa iri árĩpehrero eropa waboro. Eropirã árĩpehrerã ipũre buherã, yɯ wererire õaro yuhrirã õaro mucubirirã árĩrãcoma.

Siete iglesia majarãre Jesu yarã gamenererãre gojabeopɯ Ñu

⁴ Yuhɯ Ñu mɯare siete cururi majarãre Jesu yarãre Asia yeba majarãre gojabeoa. Goãmɯ ĩgu mahiri mera mɯare õadorea. Eropirã ĩgu itamuri mera õaro árĩque mɯa. ĩgu negohraguere eropa árĩniguidigu árĩñumi. Dohpague sãre eropa ta árĩniguimi. Puhrugue sãre eropa ta árĩniguigucumi. Goãmɯ ĩgu opɯ doaro core Espiritu Santo áhrimi. Siete suburi maja turari árĩpehreri opagu áhrimi. ĩgu mera sãre yɯ mɯare õadorea daja. ⁵ Cristo ĩgu mahiri mera mɯare õadorea daja. ĩgu Cristo Goãmɯ yare gɯyaro mariro weregu áhrimi. Eropigu ĩgu sĩridigu ĩgu masa mɯriadigu ne dipaturi sĩrisome ĩgu. ĩgu yarã waborore masa mɯriamɯhtadigu áhrimi. Eropigu i yeba majarã árĩpehrerã oparã tauro opɯ áhrimi ĩgu. Marire mahigu ĩgu di cóãra mera mari ñeri iirare cóãdi árĩmi ĩgu. ⁶ Eropa cóãgu marire oparã wamorãre wacũ iidigu árĩmi ĩgu. Eropigu marire pahia masare Goãmure serẽbasarã wamorã sãre wacũ iidigu árĩmi. Eropigu Goãmɯ mari Pagu yare iimorãre wacũ iidigu árĩmi ĩgu eropa sĩrigu. ĩgu eropa iidigure õaro werenigui umupeoro gahmea árĩpehrerinuri.

Árīpehrerā tauro opu eropa árīniguimi ĭgu. Eropā ta árīporo.

⁷ Ōaro pee masi coreque m̄a. Imica cururi weca dijarigucumi Cristo. ĭgu eropa aricū ĩarācoma árīpehrerā. ĭgure crusague pabia wejēnirā m̄ra sã ĩarācoma. Eropirā ĭgu aricū ĩarā i yeba majarā árīpehreri cururi majarā orerācoma güirā. Eropā ta árīporo.

⁸ Ōpa arīmi mari Opu Goām̄: “Yuh̄u árīpehrerire ĩhacūnugudigu āhraa. Eropigu árīpehrerire pehrecū iibu āhraa, arīmi. Iribojegue sãre eropa árīniguim̄ribu. Dohpague sãre eropa āhraa. P̄hr̄ugue sãre árīgura,” arīmi Goām̄.

Jesucristore gosesirigure yu ĩhabu, arĩ werepu Ńu

⁹ Yuh̄u Ńu m̄a acaweregu Jesu yagu āhraa. Eropigu m̄a iro dopa ta yu sã Jesu ya árīburire yu iira dipuwaja ñero taribu. Eropigu m̄a iro dopa ta yure erā ñero iiquerecū ĭgu itamuri mera Jesure cóābiribu. Mari yujuro mera ĭgu Opu árīro majarā árīmorā āhraa. Yaha yeba majarā erā cóādigu árīgu Patmo waĩc̄uri n̄gurogue āhraa. Goām̄ yare Jesucristo ĭgu werera sãre gajirãre yu wereri dipuwaja õgue erā cóābeodigu āhraa. ¹⁰ Ohõ yujun̄ soorin̄u árīcū Espíritu Santo yure quēroque ĩhmuami. ĭgu eropa ĩhmucū yu p̄r̄p̄r̄p̄ burigã wereniguiri busuro dopa carabu. Corneta turaro busuro dopa eropa ta busuro carabu ĭgu wereniguicū. ¹¹ Ōpa arīgu carami yu peec̄:

—Yuh̄u árīpehrerire ĩhacūnugudigu āhraa. Eropigu yuh̄u árīpehrerire pehrecū iibu āhraa. Dohpague m̄ ĩaburire gojarip̄gue goja aĩque. M̄ eropa goja aĩra p̄hr̄u siete cururi majarãre Goām̄ yarãre obeoque irip̄ure. Erã siete cururi majarã Asia yeba árīri macari majarã āhrima. Eropigu Efeso majarãre, Esmirna majarãre, Pérgamo majarãre, Tiatira majarãre, Sardis majarãre, Filadelfia majarãre, Laodicea majarãre m̄ ĩaburire gojabeoque, arīgu carami yure.

¹² ĭgu eroparīcū peegu majin̄gajabu yure wereniguigure ĩabu. Eropā majin̄gajagu siete sihãgori yucure erã duhpeora yucure oro mera erã iira yucure ĩhabu. ¹³ Iri yucu watope masu iro dopa bejagure ĩhabu yuh̄u. ĭgu yoari suhriro sañagu āhrami. ĭgu guburigue dijimerejabu ĭgu suhriro. Eropigu oro mera erã iira gasiro mera ĭgu coretihbire tuãdiudigu āhrami. ¹⁴ Eropiro ĭgu poari yaji poari iro dopa boreabu. ĭgu cuiiri peame porã iro dopa goseabu. ¹⁵ ĭgu guburi bronze waĩc̄uri come timura come

iro dopa gosesiriabu. Eropiro ĩgu wereniguiri baja utã dipabu iro dopa busuro carabu. ¹⁶ ĩgu mojoto diaye maja mojotopu siete necã opãmi. Eropiro ĩgu disirore ñoserimiji pepuri usirimiji cuñuami. Eropiro abe umu majagu ĩgu cuimijuro dopa ĩgu diapo turaro gosesiriami.

¹⁷ Eropigu ĩgure ĩagu uca waha ĩgu guburi pohro mehmerejabu siringu iro dopa. Yu eropa mehmerejacu ĩagu ĩgu, ĩgu mojoto diayepu mera yure duhpeo opa arãmi:

—Ucabitã. Yu arĩpehrerire ĩhacũnugudigu ahraa. Eropigu arĩpehrerire pehrecu iibu ahraa. ¹⁸ Ojocarinigu ĩgu ahraa yuhu. Siringu arĩribu. Dohpaguere ĩaque. Arĩpehrerinuri eropa ojocariniguicãa yuhu. Sirdi dipaturi masagu dipaturi masare sribiricu iimasia yuhu. Eropigu masare peamegue wabiricu igu ahraa yuhu. ¹⁹ Eropigu dohpague mu ĩarare gojaque. Puhrgue eropa waboro sare ĩagu gojaque. ²⁰ Oã siete necãre yu mojoto diayepu oparãre weregura mre. Eropigu siete sihãgori yucure erã duhpeora yucu oro yucu sare weregura. Yu opa arĩ wererire iribojegue majarãre ne werebirimuribu. Opa ahraa iri: Siete necã siete cururi majarã yaharã oparã arĩrã iro dopa ahrima. Eropiro siete sihãgori yucure erã duhpeora yucu siete cururi majarã yaharã iro dopa ahrima, arãmi yure Jesucristo.

2

Efeso majarãre Jesu yarãre gojanugadoreñumi Ñure

¹ Eropa arĩtuhaja opa arĩnemoami yure gojadoregu:

—Efeso majarã yaharãre, erã opu sare opa yu arĩrire arĩ gojabeoque muhu. Yuhu mojoto diayepu siete necãre opagu ahraa. Eropigu siete sihãgori yucu watope curigu ahraa. Eropa curigu arĩgu mreare opa arĩ werea: ² Arĩpehreri mua iirare masipehoa. Yaha arĩburire turaro mohmeabu mua. Yure mua umupeo duhubirabu. Ñerire iirãre mua ĩadiabirabu. Eropirã “Jesu buhedoregu ĩgu apinirã ahraa,” arĩmaacãnirãre queoro erã buhebiricu ĩarã, guyarã erã arĩcu masiabu mua. ³ Yahare mua iira dipuwaja mua ñero tariquererã erã guyarãre tarinugabu mua. Eropirã yure ne duhubirabu mua. “Irire gariborea waca pare,” arĩbirabu mua. ⁴ Eropa mua ðarã arĩquererã ta yujuñere ðaro iibea mua. I ahraa iri: Yure ðaro mua mahimãhtadiro dopa dohpaguere iibea mua. ⁵ Yure mua umupeomãhtarare guñaque murraro ta daja. Dohpaguere mua yure umupeobiriqueyarire guñaque. Eropirã mua irire mua ñeri iirare bujawereque. Irire duhuque. Eropa duhurã yahare

mua iimũhtadiro dopa ta iique daja. Mua ñeri iirare mua duhubiricũ ñagũ, yujugũ mua yagure sihãgodigure aĩ cóãgura. Eropa iigũ mua yuju curu majarãre cóãgura. Mua ñeri iirare duhubiricũ mua yaha curu majarã árĩnirãre duhupehrecũ iigura. ⁶ Yũre umupeobiriqueyarã árĩquererã ta ire õaro iiabũ mua: Nicolaita yare buherãre ñerãre ñadiabeaa mua. Yũ sã erãre ñadiabeaa. ⁷ Gamiricurã ãhraa mua. Eropirã peeque. Mũare yaha curu majarãre Espiritu Santo ñgũ wererare peeque mua sã. Õpa arĩmi ñgũ: “Árĩpehrerã Jesure umupeo duhubirãre Goãmũ ya pohe majagũ dũcare paraíso majagũ dũcare badoregura. Irigũ dũca ojocaririre odigũ ãhraa,” arĩmi Espiritu Santo, arĩ were gojabeoque Efeso majarã yaharãre erã opũ sãre, arãmi yũre Jesucristo.

Esmirna majarãre Jesu yarãre gojabeodoreñumi Ñure

⁸ —Esmirna majarã yaharãre erã opũ sãre õpa yũ arĩrere gojabeoque mũhũ, arãmi yũre Jesucristo. Yũhũ árĩpehrerire ñhacũnugudigũ ãhraa. Eropigũ árĩpehreri pehrecũ iibu ãhraa. Sĩria wabũ. Dípaturi ojocaria daja. Eropigũ õpa arĩ werea mũare: ⁹ Mua ñero tarirare masia. Mojomorocũrã mua árĩcũ sãre masia. Eropa mojomorocũrã árĩquererã ta ñgũ wereniguirire peerã Goãmũ yare õarire wũaro opaa mua. Gajirãpũ mũare ñhaturirã mũare erã ñero quere moarare masia. Erã “Gũa judio masa Goãmũ yarã ãhraa,” arĩquererã gũyarã iima. Erã Satanare umupeorã ãhrima. ¹⁰ Dohpaguere mua ñero tariburire gũibiricãque. Peeque mua. Watĩ mũare Goãmũre duhudoregũ yujurãyeri mua mera majarãre peresu iidoregũcumĩ. Diez nãri gohra ñero tarirãca mua. Erã eropa ñero iicũ mũare erã wejẽdiaquerecũ ta yũre yaha sãre ne cóãbiricãque. Mua yũre eropa cóãbiricũ ñagũ árĩpehrerinũri mũare õaro árĩcũ iigura. ¹¹ Gamiricurã ãhraa mua. Eropirã peeque. Mũare yaha curu majarãre Espiritu Santo ñgũ wererare peeque mua. Õpa arĩmi ñgũ: “Árĩpehrerã Jesure umupeo duhubirã peameguere wasome,” arĩmi Espiritu Santo, arĩ gojabeoque Esmirna majarã yaharãre erã opũ sãre, arãmi Jesucristo yũre.

Pérgamo majarãre Jesu yarãre gojabeodoreñumi Ñure

¹² —Pérgamo majarã yaharã erã opũ sãre õpa yũ arĩrere gojabeoque mũhũ, arãmi yũre Jesucristo. Yũhũ ñoserimijire pepãri usirimijire opagũ ãhraa. Mũare õpa arĩ weregura: ¹³ Mua árĩrore masia. Erogue mua ya macã majarã opũ Satana ãhrimi. Erã Satanare umupeoquecũ mũarũ yũre umupeoa. Erã mua mera majagũ mũũre

Antipa mūrure yahare ðaro weredigū mūrure wejēma. Īgure erā wejēcū ĩaquererā ta yure ne umupeo duhubirabū mūa. ¹⁴ Mūa eropa umupeo duhubiriquererā merogā yure tarinūgabū mūa. Yujurāyeri mūa mera majarā Balaam ya buherire gahmema. Iribojegue majagu ĩgu Balaam waīcūgu ðpa arīmūriñumi Israe masare ĩhaturirā erā opure: “Israe masare tarinūgadiagu ðpa iique. Goāmarā wéanirāre mūa orare barire badoreque erāre. Eropigu nome mera ñero iicū iique erāre,” arī weremūriñumi Balaam gajirā opure Balaco waīcūgure. Iribojegue ĩgu eropa ñero iidoreldo dopa ta dohpague sāre ñero iicū iima yujurāyeri mūa mera majarāre. ¹⁵ Eropirā erā iro dopa ta gajirā mūa mera majarā Nicolaita buherire gahmema. Iri buheri sāre ĩadiabeaa yūhū. ¹⁶ Eropirā mūa iri ñeri iirire duhuque mūa. Mūa eropa duhubiricū ĩagu yojaro mera mūa pohrogue wagu, eropa ñero iirā mera gamequeāgūca. Yūhū disirogue cuñurimiji ñoserimiji mera gamequeāgūca erā mera. ¹⁷ Gamiricūrā āhraa mūa. Eropirā mūa ya curu majarāre yaharāre Espiritu Santo ĩgu wererare peeque mūa. Ōpa arīmi ĩgu: “Arīpehrerā Jesure umupeo duhubirāre mana waīcūri barire ũmaro maja barire ogura. Utā boreriyeri sāre ogura erāre. Iri utāyeri mama waīre yū gojaturayeri arīroca. Gajirā iri waīre ne masisome. Iri utāyerire aīrā dihta iri waīre masirācoma,” arīmi Espiritu Santo, arī gojabeoque Pérgamo majarāre erā opu sāre, arāmi yure Jesucristo.

Tiatira majarā sāre Jesu yarāre gojabeodoreñumi Ñure

¹⁸ —Tiatira majarā yaharā erā opu sāre ðpa yū arīrere gojabeoque mūhū, arāmi daja yure Jesucristo. Yūhū Goāmū magū yū cuirī peame porā iro dopa goesirigu āhraa. Eropiro yū guburi bronze waīcūri come erā timura iro dopa goesiria. Mūare ðpa arī werea: ¹⁹ Mūa iirare masia yūhū. Goāmūre masa sāre mūa umupeorare, yure mūa cóābirirare, gajirāre mūa itamurare, ñero tariquererā mūa yure duhubirirare masia. Negohraguere mūa iidiro tauro dohpaguepūre ðaro iinemorā iiaa mūa. Iri sāre masia yūhū. ²⁰ Mūa eropa ðaro iirā arīquererā ta ðpa yure tarinūgabū mūa: Jezabe waīcūgo “Goāmū yare werego āhraa,” arī gūyago mūa watope ta āhrimo. Mūare igo ñero buhecū peerā igore turibirabū mūa. Eropa gūya buhego yaharāre yū pohro majarāre nome mera ñero iicū iimo. Eropigo goāmarā wéanirāre erā orare barire badoremo igo yaharāre. ²¹ Igo ñerire igo bujawereborore

coreniribũ. Yũ eropa corequerecũ igo ñero iirire duhubiramõ. ²² Eropirã yũre peeque mua. Igoe dorecũcũ iigura. Igo mera ñero iinirã sãre dorecũcũ iigura. Eropirã erã burigã ñero tarirãcoma. Eropa ta iigũca erãre igo mera erã ñero iirare erã bujawerebircũ, irire erã duhubircũ. ²³ Eropigũ igo porãre wejẽgũra. Yũ eropa iicũ iarã arĩpehrerã yaharã yũ õaro masirire masirãcoma. Masa erã pepiri sãre erã haribejari sãre masia. Yũ eropa masicũ masirãcoma erã igore yũ eropa dipuwaja moacũ. Arĩpehrerã mua ñerire iira dipuwaja, dipuwaja moagũra mũare. Eropigũ mua õarire iira wajapũre õaro iigura mũare. ²⁴ Mua Tiatira majarã gajirã mua mera majarã igo ya buherire gamebirabũ. Mũapũ Satana ya buherire "Wũaro igũ masiri ahraa," erã arĩrãre gamebirabũ mua. Eropigũ mũapũre gajino mua iiburire dorenemosome yũhũ. ²⁵ Dorenemobiriqueregũ iñe dihtare dorea mũare: Mua pohroge yũ dujariboro core yũ buherire mua masirare ne merogã mera cãdijibircãque. ²⁶⁻²⁷ Arĩpehrerã ñerire tarinũganirãre, yũ gamerire eropa iiniguirãre oparã arĩmorãre acugũra. Yũ Pagũ igũ yũre opũ acudiro dopa ta mũare oparã acugũra yũ sã. Arĩpehreri yeba majarã tauro arĩrã oparã arĩmorã acugũra mũare. Eropa oparã ñajarã, mua doca arĩrãre arĩpehreri yeba majarãre turaro dorerãca. Eropa turaro dorerã mũare tarinũganirã mata pehrea wacũ iirãca mua erãre. ²⁸ Eropigũ mũare yahare ne duhubirinirãre boyomũriridirure ogũra. Eropigũ mua mera arĩgũca yũhũ. ²⁹ Gamiricũrã ahraa mua. Eropirã mua ya curu majarãre yaharãre Espĩritu Santo igũ wererare peeque mua, arĩ gojabeoque Tiatira majarãre, arãmi yũre Jesucristo.

3

Sardis majarãre Jesu yarãre gojabeodoreñumi Ñure Jesucristo

¹ —Sardis majarã yaharãre erã oparã sãre õpa yũ arĩrãre gojabeoque mũhũ, arãmi daja yũre Jesucristo. Yũhũ igũ Espĩritu Santo siete suburi maja turarire opaa. Eropigũ siete necãre opaa. Mũare õpa arĩ werea: Mua iirare masia. Õpa arĩ pepirima mũare gajirã: "Erã Goãmũ yare õaro iipehorã ahrima," arĩ pepirima mũare. Erã eropa arĩ pepiquerecũ, Goãmũ yare õaro iibea mũapũ. ² Eropirã mua iirare õaro guñaque mua. Goãmũ yare mua masirare õaro guñaque daja cãdijiro mariro. Goãmũ igũ iacũ õaro iipehobirabũ mua. ³ Eropirã yahare mua peemũhtarare mũraro ta õaro

guñaque mua daja. Eropa guñarã yahare iique mua daja. Mua ñeri iirare duhuque. Yu arĩro dopa mua iibiricũ guñaña mariro muare dipuwaja moagura. Yajari masu igu guñaña mariro igu yajagu ñajaro dopa ta muare guñaña mariro dipuwaja moagu ariguca. ⁴ Yujurãyeri mua mera majarã Sardis majarã ñero erã iirire ihacũbeama. Eropa òarã árĩrã, boreri suhriro sañarã yu mera curirãcoma. ⁵ Árĩpehrerã yahare duhubirã eropa ta boreri suhri sañarã árĩniguirãcoma. Eropirã yu mera eropa árĩniguiomorã erã waĩre yu gojaturipũgue erã sã erã waĩre gojatunirã árĩrãcoma. Erã erã waĩre yu gojaturare coesome yuhũ. Yu Pagu igu ihabeorogue, anyua sã erã ihabeorogue, “Yaharã àhrima,” arĩ wereguca erãre. ⁶ Gamiricurã àhraa mua. Eropirã mua ya cururi majarãre yaharãre Espĩritu Santo igu wererare peeque mua, arĩ gojabeoque Sardis majarãre yaharãre erã opu sãre, arãmi yure Jesucristo.

Filadelfia majarãre Jesu yarãre gojabeodoreñumi Ñure

⁷ —Filadelfia majarã yaharã erã opu sãre òpa yu arĩrĩre arĩ gojabeoque muhũ, arãmi daja yure Jesucristo. Yuhũ ñeri marigu àhraa. Diaye maja weregũ àhraa. Davi muru iribojegue majagu opu masare igu dorediro dopa ta turari mera doregura yu sã. Iri turari mera iidorecũ ne gajirã irire cãhmotamasibeama. Yu iidorebiricũ ne gajirã irire iimasibeama. ⁸ Árĩpehreri mua iirire masia yuhũ. Guñaturabirĩnarirã árĩquererã ta yaha buherire òaro peeabu mua. Yure waĩpeo duhubirabu mua erã muare ñero iidiaquerecũ ta. Eropigu yahare iimorã apiabu muare. Eropirã yu dorerire mua iicũ gajirã cãhmotamasibeama muare. ⁹ Gajirã mua pohro árĩrã “Gua judio masa Goãmu yarã àhraa,” arĩquererã ta gũyarã àhrima. Goãmu yarã árĩbeama. Satanare umupeorã àhrima. Eropigu erãpũre mua core mereja muare erã umupeocũ iigura erãre. Yu eropiicũ ñarã yu muare mahirire masirãcoma erã. ¹⁰ Muare yahare yu duhudorebiricũ peerã òaro yuhriabu mua yure. Mua eropa iicũ ñagu i yeba majarã árĩpehrerã erã ñero tariburisubu árĩcũ muare ñhadibugura. Irisubu árĩpehrerã erã ñero tariburisubu árĩroca. ¹¹ Merogã duhyaa i yebague yu dujariboro. Yahare mua masirare cãdijibiricãque. Eropirã yure eropa yuhriniguiicãque mua wajataborore dedeori arĩrã. ¹² Eropigu yahare duhubirãre yu Pagu ya wihi majarã apigura erãre. Igu ya wihi maja borari iro dopa árĩcũ apigura erãre. Eropirã Goãmu mera majarã eropa árĩniguirãcoma. Eropirã Goãmu yu Pagu yarã waĩcurã, igu ya maca majarã waĩcurã sã árĩrãcoma. Igu

ya maca mama maca Jerusalén árĩroca. Iri maca ɯmarogue Goãmu pohroque dijariri maca árĩroca. Yu waĩ sãre mama waĩ opaguca. Iri waĩ sãre waĩcũrãcoma yaharã. ¹³ Gamiricũrã ãhraa mua. Eropirã mua ya cururi majarãre, yaharãre Espĩritu Santo ĩgu wererare peeque mua, arĩ gojabeoque Filadelfia majarãre yaharãre erã opu sãre, arãmi yure Jesucristo.

Laodicea majarãre Jesu yarãre gojabeodoreñumi Nũre Jesucristo

¹⁴ —Laodicea majarãre yaharã erã opu sãre ðpa yu arĩrire gojabeoque mũhu, arãmi daja yure Jesucristo. Yu arĩro dopa ta iigu ãhraa yũhu. Eropigu gũyaro mariro yu ĩarare eropa wereniguigu ãhraa. Árĩpehrerire mari Pagu ĩgu ĩhacũnugurare iibasagu ãhraa yũhu. ¹⁵ Árĩpehreri mua iirare masia yũhu. Mua “Jesu yarã ãhraa gũa,” arĩquererã yure merogã umupeoa. Yure mua merogã umupeorã mua árĩcũ yũhu gamebeaa mũare. Mua “Jesure umupeobeaa gũa,” arĩbeaa mua. “Jesure umupeorã ãhraa gũa,” arĩquererã ta yure ðaro umupeobeaa. Mua yure umupeodiaro dopa ta yure wũaro umupeocũ ðaboaya. ¹⁶ Mua eropa yure ðaro umupeobiricũ ĩagu mũare gamebirigohracãgũra. ¹⁷ Eropirã ðpa arĩ pepiraa mua: “Árĩpehrerire opaa. Ne gajino dũhyabeaa gũare,” arĩ pepiraa mua. Eropa arĩquererã mojomorocũrã iro dopa ta ãhraa mua yu ĩacũ. Dũhyataria mũare. Eropirã ne moonjarã, suhri marirã, cuirĩ ĩhajabirã iro dopa ãhraa mua yu ĩacũ. Mũare dũhyarire masibeeaa mua. ¹⁸ Mua eropa masibirã árĩcũ ĩagu ðpa arĩ weregũra mũare: Mũare dũhyarire masique. Eropirã yure serẽque. Oro gohrare mua asũro dopa ta ðarire yu oparire yũpũre aĩque mua. Mũare yure ðaro umupeocũ iigũra. Eropirã diaye ta Goãmu ya mera wũaro oparãca mua. Eropirã yu sĩrira mera mua ñero iirare cóãnirã árĩque mua. Eropirã suhri sañarã erã gũhyasĩribiro dopa ta mua ñeri iirare cóãnirã ðarire iimorã árĩrã gũhyasĩrisome mua. Eropirã mua cuirĩ ococũra pũhrũ ðaro mũare deyoro dopa ta Goãmu yare ðaro peeque mua ðaro masiboro dopa. ¹⁹ Árĩpehrerã yu mahirãre erã ñero iirare werea. Eropigu yu mahirãre dipuwaja moaa gajisubu erãre itamubu. Eropirã yũpũre turaro gameque. Eropirã mua ñerire bũjawere duhuque. ²⁰ Peeque yure. Mua wirire bihara wirire yu ejanũgaja ñajadiabodiro dopa ta mua mera árĩdiagũ coregu iiaa. Yu eropa árĩdiacũ peerã yure mua mera árĩdoreque. Yaharã árĩque. Mua eropa árĩdorecũ mua mera árĩgũra. Eropigu mari sihu baro

dopa ta m̄ua mera õaro árĩgura. Eropirã yu mera õaro árĩrãca m̄ua. ²¹ Ñerire yu tarinugara p̄hru yu Pagu opu ĩgu doaro pohro doaa yu sã dorebu. Eropa ta m̄ua sã ñerire m̄ua tarinugara p̄hru yu opu doaro pohro doarãca doremorã. M̄uare yu pohro doacũ iigura. ²² Gamiricurã ãhraa m̄ua. Eropirã m̄ua ya cururi majarãre yaharãre Espiritu Santo ĩgu wererare peeque m̄ua, arĩ gojabeoque Laodicea majarãre yaharã erã opu sãre, arãmi Jesucristo yure.

4

Umarogue Goãmure erã mereja umupeorare ĩapu Ñu

¹ Yure ĩgu eropa arĩ werera p̄hru um̄siguere pãgũra disiporore ĩhabũ. Dipaturi corneta turaro busuro watope turaro wereniguiri busuro carabu yu peecũ. Õpa arĩro carabu yure:

—Õgue m̄uririque. I yu wereburi p̄hruguerẽ waroca. Eropa waborore m̄ure ĩhmugura. Yu arĩdiro dopa ta eropa waroca, arĩro carabu umarogue.

² ĩgu eropa arĩ werecũ ta erogue m̄urijagu Espiritu Santo ĩgu turari mera ĩagu ĩiabũ. Eropigu opu doarore umarogue ĩhabũ. Ero yujugu doãmi. ³ Eropigu õaro gosesirigu doãmi. Jaspe waĩcũri utãye gosesiriro dopa ta, cornalina waĩcũri utãye gosesiriro dopa ta õaro gosesirigu doãmi ĩgu. Eropigu õaro gosesiriri bero esmeralda iro dopa gosesiriri bero pohecague doãmi ĩgu. ⁴ Eropigu ĩgu doaro turore yuju bero ĩhabũ oparã doari berorire. Veinticuatro gohra ãhrabu. Iri oparã doarire veinticuatro gohra Jesu yarã oparã doãma. Boreri suhricurã ãhrama. Eropirã oparã erã peyari berorire oro berorire peyanirã ãhrama erã. ⁵ Doariñe yu ĩamũhtarañegue miamaabũ. Eropiro gajiropa wereniguiri busuro carabu. Bupu sã busugu carami. Iri doaro core siete sihãgori yucu ãhrabu. Iri siete sihãgori yucu Espiritu Santo ĩgu siete suburi maja turari opari iro dopa ãhrabu. ⁶ Eropiro ĩgu doaro core wũariya ãhrabu. Vidrio iro dopa arĩriya ãhrabu. Õaro deco suririya ãhrabu.

ĩgu doaro pohro wapicurã gajiropa bejarã ãhrama. Ojocarirã ãhrama. Erã diaporire erã p̄urup̄urire baja cuiricurã ãhrama. ⁷ Yu ĩamũhtadigu gajiropa bejagu yee diagu iro dopa bejagu ãhrami. ĩgu p̄hru árĩgu wecu iro dopa bejagu ãhrami. Erã p̄hru árĩgu masu diapo iro dopa diapocugu ãhrami. Erã urerã p̄hru árĩgu gaa ĩgu quẽ d̄p̄ure s̄egũ iro dopa ãhrami. ⁸ Erã wapicurã nucũ seis quẽ d̄p̄uricurã ãhrama. Eropiro erã quẽ d̄p̄uri pep̄urigue ta baja cuiricuri

quē dūpuri āhrabū. Eropirā umuri nūcū, ñamiri nūcū eropa bayaniguirā iiama. Ne baya duhubirama. Ōpa arī bayāma:

Ōagū, ōagū, ōagū Goāmū mari Opū turatariagu āhrimi. Īgū iribojegue eropa ta árīniguicāpū. Dohpague sāre eropa ta árīniguimi. Pūhrūgue sāre eropa árīniguicāgūcumī, arī bayaniguirā iiama.

⁹ Eropa bayarā erā wāpicurā gajiropa bejarā ĩgū turarire bayarā iiama. Eropirā ĩgūre árīpehrerināri árīniguigūre “Ōhaa,” arīrā umupeorā iiama. ¹⁰ Erā eropa baya umupeocū ĩarā veinticuatro Jesu yarā oparāpū opū doaro core mereja, ĩgūre umupeoama. Īgū árīpehrerināri árīniguigū āhrimi. Eropa umupeorā erā oparā erā peyari berorire ĩgū doaro core mehpeoama. Eropa mehpeorā ōpa arāma erā:

¹¹ Mūhū Goāmū gūa opū gohra āhraa. Turagu ōagu āhraa mūhū. Mūhū gūa umupeogu árīgū ta iiaa. Mūre eropa umupeoro gahmea gūare. Árīpehrerire ĩhacūnugudigū āhraa mūhū. Mū gamediro dopa ta iri árīpehrerire ĩhacūnuguyoro mūhū, arāma erā Goāmūre ero doagūre.

5

Gojarapū tūrara tūrure cordero sāre werepū Ńu

¹ Pūhrū ero doadigū ĩgū mojoto diayepū ĩgū oparipūre gojarapūre ĩhabū. Iripū pepūri ĩgū gojarapū ĩgū tūrara tūru āhrabū. Eropiro siete suburi pihañari mera ĩgū pihañara tūru āhrabū. ² Eropigū turagu anyure ĩhabū. Īgū turaro werenigūiri mera ōpa arī wereami:

—I tūrure pihañarare ōagū dihta pāñamasimi. ¿Nihipū āhriri iripūre pābu? arāmi ĩgū anyu.

³ Eropa arīqueregū ta iri tūrure pāñabure bocabirami. Eropa ōagūre bocabirami. Ūmarogue i yebague ojocarirā watope, sīrinirā watope ne iri tūrure pāñabu marami. Eropigū iri tūru majare buhebu marami. ⁴ Eropigū iripūre pāñabodigūre erā bocabiricū ĩagu turaro oreabū yāpū. ⁵ Yū eropa orecū ĩagu yujugū erā Jesu yarā oparā mera majagu ōpa arāmi yūre:

—Orebiricāque. Iri tūrure ñearire yujugū pāñamasimi. Īgū Juda ya curu majagu turagu āhrimi. Īgū opū Davi pārami árīturiagu āhrimi. Watīre tarinugadigū āhrimi ĩgū. Eropigū ĩgū iri tūrure siete ñearire pāmasigū āhrimi, arāmi ĩgū yūre.

⁶ Īgū eroparīcū peegū opū ĩgū doaro core Cordero ĩgū nigūicū ĩhabū. Wāpicurā gajiropa bejarā, Jesu yarā

oparã sã erã watope niguiami ĩgu Cordero. ĩgu eropa niguiqueregu ĩgu masa erã wejẽdigu muru dopa dehyoami. Siete cusaricugu, siete cuiricugu aħrami. Iri siete cuiri ĩgu Espĩritu Santo ĩgu siete suburi maja turari aħrabu ĩgu arĩpehrero ĩhamasiburi. Espĩritu Santo arĩpehrero i yebaguere Goãmu ĩgu obeodigu aħrimi. ⁷ Eropigu Corderopu opu doaropohogue ejagu, ero doagure ĩgure ĩgu diayeru opara tũrure tũawea aĩami. ⁸ ĩgu eropa tũawea aĩcũ ĩarã wapicurã gajiropa bejarã, veinticuatro Jesu yarã oparã sã Cordero core mereja ĩgure umupeoama. Erã Jesu yarã oparã arĩpehrerã arpa waĩcũri buamutẽrire opãma. Oropari sãre opãma. Iripari incienso ujtũturiripari dihta aħrabu. Iri incienso Goãmu yarã ĩgure erã serẽra aħrabu. ⁹⁻¹⁰ Eropa ĩgure umupeorã opa arĩ mama bayarire bayãma erã Corderore:

Erã wejẽdigu muhu aħraa. Eropigu mu ya di mera masa ñeri iirare coeabu muhu Goãmu yarã erã arĩboro dopa. Eropigu masare arĩpehreri cururi majarãre yujurãyerire, arĩpehrerã yare wereniguirãre, arĩpehreri yeba majarãre erã ñero iirare wajayebasabu. Eropa iigu erãre oparã arĩmorã, pahia masare Goãmure serẽbasarã arĩmorã sã arĩcũ iiabu. Eropigu i yeba majarã weca oparã arĩmorã acubu muhu guare. Eropa iigu arĩdigu iri tũrure aĩ pañamasibu aħraa muhu, arĩ bayãma erã Corderore.

¹¹ Yu ĩagu daja bajarãre millones anyua majarãre ĩhabu. Opu doarore, wapicurã gajiropa bejarãre, veinticuatro Jesu yarã oparãre anyuapu erãre gãhrisianugajãma. Erã anyua majarã turaro mera erã bayacũ ĩhabu. ¹² Opa arĩ turaro bayapeoama erã:

Cordero, muhu erã wejẽdigu arĩgu arĩpehrerãre doremasibu, arĩpehrerire opamasibu aħraa. Eropigu masipehogu, turatariagu aħraa muhu. Mu eropa arĩgu aħraa masa erã ñerire erã iira dipuwaja erã wejẽdigu. Eropirã gu mure umupeorãca. "Õatariagu aħrimi," arĩrãca mure. Mure õaro wereniguirãca, arĩ bayãma anyua majarã.

¹³ Eropigu gajirã erã bayacũ peeabu. Arĩpehrerã i yeba majarã, umaro majarã sã, ojocarirã, sĩrinirã, wũariya majarã sã, arĩpehrerogue arĩrã opa arĩ bayarã carama:

Goãmure ĩgu doarogue doagure, Cordero sãre õaro wereniguirãca. Mũare umupeorãca. "Õatariarã aħrima. Turatariarã aħrima," arĩrã arĩpehrerĩnũri eropa arĩniguiarãca mũare, arĩ bayapeorã carama.

¹⁴ Eropirā erā wapicūrā gajiropa bejarā erā eropa arī bayacū peerā “Eropa ta arī bayaporo,” arāma. Eropirā Jesu yarā oparāpū mereja Goāmure, Cordero sāre umupeoama.

6

Papera tūrure ĩḡu aīra tūrure pihañarare pāmi Cordero, arī werepū Ńu

¹ Pūhrū papera tūrure ĩḡu aīgāra tūrure Cordero pihañamūhtarañere pāmi. ĩḡu eropa pācū ĩhabū. ĩḡu eropa pāra pūhrū yujugū gajiropa bejarā mera majagu “Īagu arique,” arāmi. Eropa arīḡu bupu būsuro dopa ta wereniguiami. ² ĩḡu eropa arīra pūhrū ĩhabū yuhū. Boregu cabayure ĩhabū. ĩḡu weca peyagu buiri berore opāmi. ĩḡure opu peyari berore ohami gajigupū. ĩḡu eropa ora pūhrū ĩḡupū ĩḡure ĩhaturirāre tarinugagu wahāmi.

³ Pūhrū yujuñe pihañarañere pātuhaja Cordero gajiñe pihañarañere pāmi daja. ĩḡu eropa pāra pūhrū gajigu gajiropa bejarā mera majagu “Īagu arique,” ĩḡu arīcū peeabū daja. ⁴ Eropigu gajigu cabayure diagure ĩhabū daja. ĩḡu weca peyagure turarire ohami gajigupū. I yeba majarāre erā basi gamewejēcū iibure apiami ĩḡure. Eropirā árīpehrero majarā gamewejērācoma i yebague. Eropigu wuarimiji ñoserimijire ohami ĩḡure.

⁵ Pūhrū peñere pātuhaja Cordero gajiñere pāmi daja. Eropigu gajigu gajiropa bejarā mera majagu ĩḡu sā “Īagu arique,” arīcū peeabū daja. ĩḡu eropa arīra pūhrū cabayu ñigure ĩhabū. ĩḡu weca peyagu nūcūri queoriñere opāmi. ⁶ ĩḡure yu ĩara pūhrū gajiropa bejarā watope ōpa būsuro carabū:

—Trigo cebada sā pehrea waroca. Eropiro iri waja pagari árīroca. Eropirā yujunū mohmeri waja mera trigore yuju kilo ta asūrācoma. Yujunū mohmeri waja mera cebada yerire ūhre kilo ta asūrācoma. Bari moari ūyupū, vino sā baja árīcāniroca, arīro carabū.

⁷ Pūhrū ūhreñere pātuhaja Cordero gajiñere pāmi daja. ĩḡu eropa pāra pūhrū gajigu gajiropa bejarā mera majagu árītugū ĩḡu sā “Īagu arique,” ĩḡu arīcū peeabū daja. ⁸ ĩḡu eroparīcū peegu borewijigu cabayure ĩhabū. ĩḡu weca peyagu sīririñe waīcuami. Eropigu ĩḡu pūhrū arigu peame waīcuami. Eropigu erāre cabayua weca peyarāre turarire ohami corderopū. Wapicūrā masa árīcū yujugū erā mera majagure wejēdoreami. Eropa ta árīpehrero i yebaguere yujurāyeri masare wejēdoreami. Gamewejēri

mera, oaboari mera, dorecūri mera, waimurā nūguri majarā guarā mera, yujurāyeri masare erā wejēburire apiami erā perāre.

⁹ Puhru wapicūriñere pātuhaja gajiñere pāmi daja Cordero. Īgu eropa pācū Goāmure umupeoburi mesa doca Jesu yarāre erā wejēnirāre erā siporārire ĩhabu. Goāmu yare erā werera dipuwaja, “Jesu yarā āhraa,” arī erā werera dipuwaja gajirā erā wejēnirā āhrama. ¹⁰ Erā gaguiniguirā ōpa Goāmure erā arīcū peeabu:

—Muhu gua Opu ñeri marigu, guyarō mariro mu arīro dopa ta iigu āhraa muhu. ¿Eropigu i yeba majarāre guare wejēnirāre dohpāricū dipuwaja moagucuri muhu erāre? arī gaguiniguama erā.

¹¹ Eropigu erāre boreri suhri yoari suhrire ohami. Erāre eropa ogu ōpa arāmi erāre:

—Soonique dohpa. Gajirā mua acawererā Jesu yarā mua iidiro dopa ta dohpague sāre ōari buherire buhenirā iima masare. Mure wejēdiro dopa ta erā sāre erā wejēpehoboro duhyaa dohpa. Eropirā erāre arīpehrerāre erā wejēboro core merogā corenique mua, arāmi erāre.

¹² Puhru cinco ñearire pātuhaja Cordero gajiñe ñeariñere pācū ĩhabu daja. Iriñere ĩgu pācū ta, turaro yeba ñohmeabu. Eropigu umu majagu abe ñigu guhyaro wahāmi. Īniriñe suhriro iro dopa ta bejagu ĩgu guhyaro wahāmi. Eropigu abe ñami majagu di iro dopa ta diagu guhyaro wahāmi. ¹³ Eropirā necā yebague yuhridija wahāma. Yucugu ducare miruñe weāburiboro dopa ta necā yuhridija wahāma. ¹⁴ Eropiro umusi dederea wahabu. Paperapūre mari tūrabeo dedeodiro dopa ta dederea wahabu umusi. Eropiro arīpehreri utā yucu sā arīpehreri nūgurori sā gajipugue ejanugaja waha wahabu. ¹⁵ Erōpa wacū ĩarā i yeba majarā tauro oparā, utā yucu maja wiri poheca maja goberigue duhrirā wahāma. Gajirā oparā, surara oparā, doberi oparā, turarā, arīpehrerā erā pohro majarā, erā pohro majarā arībirā sā yujuro ta duhrirama. ¹⁶ Eropirā duhrirā utā yucure utā sāre ōpa arīrama:

—Gua weca yuhridijari wejēcāque. Sihire opure ĩgu doaro doagure güitaria. Cordero guare ñero dipuwaja moagucumi. ¹⁷ Guare arīpehrerāre turaro dipuwaja moaburinū arītuhajaa. Eropirā ĩgu dipuwaja moaborore ne bocatiusome gua. Erōpa dipuwaja moari arīrā gua weca yuhridijari wejēcāque, arīrama utā yucure arīpehrerā.

7

Israe masa diaporire Goām̄ ɪḡu wāi tuhuborore werep̄u

Ñu

¹ P̄h̄r̄u wapic̄r̄ā anyuare ɪhab̄u. Er̄ā ár̄ipehrerogue waháma. Yujuḡu nortep̄u waḡu eroḡue arirañere miruñere aribiric̄ū iiami. Gajiḡu surgue, gajiḡu abe m̄uririrogue, gajiḡu abe ñajarogue waha ɪḡu iro dopa ta miruñere aribiric̄ū iama er̄ā s̄ā. Eropiro i yebague, w̄w̄ariyague s̄āre ne miruñe aribiric̄ū iama. Ne yujuḡu yucuḡure miruñe weã ñohmec̄ū iibirama. ² Eropiḡu gajiḡu anyure ɪhab̄u daja. Abe m̄uririrogue ariḡu iiami ɪḡu. Goām̄u ojocariniuiḡu ɪḡu wāi aɪturiñere sello wāic̄uriñere aɪḡariḡu iiami ɪḡu. Eropa aɪḡariḡu gajir̄ā anyua wapic̄r̄āre ɪḡu gaguiniguiami. Er̄ā anyuap̄u i yebare, w̄w̄ariya s̄āre ñero wac̄ū Goām̄u ɪḡu iidorenir̄ā āhrama er̄ā. ³ Er̄āre gaguiniḡu ōpa ar̄āmi ih̄i anyu:

—Corenique. Goām̄u pohro majar̄āre er̄ā diaporire ɪḡu wāi aɪturiñere tuhunimor̄ā iiaa gua. Gua eropa tuhuboro core i yebare, w̄w̄ariyare, yuc̄u s̄āre ñero wac̄ū iibiric̄āque m̄ua dohpa, ar̄āmi ɪḡu gajir̄ā wapic̄r̄ā anyuare.

⁴ Eropiḡu Goām̄u ɪḡu wāi mera er̄ā diaporire er̄ā tuhumor̄ā “Oã n̄uc̄u āhrama,” ar̄i wereami ȳare yujuḡu. Israe masa doce cururi majar̄ā ciento cuarenta y cuatro mil gohra masa er̄ā tuhumor̄ā ár̄iñor̄ā. ⁵ Oã ár̄iñor̄ā er̄ā tuhumor̄ā: Doce mil masa Judá p̄āramer̄ā ár̄ituriar̄ā er̄ā tuhumor̄ā ár̄iñor̄ā. Doce mil masa Ruben p̄āramer̄ā ár̄ituriar̄ā ár̄iñor̄ā er̄ā tuhumor̄ā. Gajir̄ā doce mil masa Gad p̄āramer̄ā ár̄ituriar̄ā ár̄iñor̄ā er̄ā tuhumor̄ā. ⁶ Gajir̄ā Aser p̄āramer̄ā ár̄ituriar̄ā doce mil gohra, gajir̄ā doce mil gohra Neftalí p̄āramer̄ā ár̄ituriar̄ā, gajir̄ā doce mil Manase p̄āramer̄ā ár̄ituriar̄ā er̄ā tuhumor̄ā ár̄iñor̄ā. ⁷ Gajir̄ā doce mil masa Simeo p̄āramer̄ā ár̄ituriar̄ā, gajir̄ā doce mil masa Leví p̄āramer̄ā ár̄ituriar̄ā, gajir̄ā doce mil masa Isaca p̄āramer̄ā ár̄ituriar̄ā ár̄iñor̄ā er̄ā tuhumor̄ā. ⁸ Gajir̄ā doce mil masa Zabulón p̄āramer̄ā ár̄ituriar̄ā, gajir̄ā doce mil masa José p̄āramer̄ā ár̄ituriar̄ā, gajir̄ā doce mil masa Benjami p̄āramer̄ā ár̄ituriar̄ā, er̄ā tuhumor̄ā ár̄iñor̄ā. Er̄ā n̄uc̄u ár̄ipehrer̄ā masa ciento cuarenta y cuatro mil gohra ár̄iñor̄ā er̄ā tuhumor̄ā.

Bajar̄ā boreri suhric̄r̄āre werep̄u Ñu

⁹ P̄h̄r̄u masa bajar̄āre ɪhab̄u. Ár̄ipehreri yeba majar̄āre, ár̄ipehreri cururi majar̄āre, ár̄ipehrer̄ā yare wereniguir̄āre, ár̄ipehreri macari majar̄āre, yujur̄āyerire Cristo gamer̄ā dihtare er̄ā niguir̄āre ɪhab̄u. Op̄u ɪḡu doaro pohro, Cordero core niguiama er̄ā masa. Bajar̄ā masa

ãhrama. Eropirã erãre queorã bocatïurã mejeta ãhrama. Boreri suhricurã ãhrama erã. Eropirã mijipũrire opãma. ¹⁰ Eropirã erã árïpehrerã õpa arï gaguiniguiama:

Goãmũ ãhrimi marire taugũ. Ìgũ, ìgũ doaro doagũ ãhrimi. Cordero sã marire taugũ ãhrimi, arï gaguiniguiama erã.

¹¹ Eropirã árïpehrerã anyua, Jesu yarã oparã, gajiropa bejarã mera Opũ ìgũ doaro tãrore yuju bero niguiama. Eropa niguirã ìgũ doaro core mereja, Goãmũre umupeoama.

¹² Õpa arï umupeoama erã:

Eropa ta ãhraa. Goãmũ gua Opũre mũre õaro wereniguiã. Õatariagũ ãhraa mũhũ. Masipehogũ ãhraa mũhũ. Mũre “Õhaa,” arãa. Mũre umupeoa. Turatariagũ ãhraa mũhũ. Mũ turari mera iigũ ãhraa mũhũ. Mũre eropa arïrã árïpehrerĩnũri eropa mũre arĩniguirãca. Eropa ta iirã, arï umupeoama erã Goãmũre.

¹³ Eropigũ yujugũ Jesu yarã oparã mera majagũ yũre wereamĩ:

—¿Oã boreri suhricurãre masiri mũhũ? ¿Erã aridirore masiri mũhũ? arï serẽpiami yũre.

¹⁴ Ìgũ eroparĩcũ peegũ,

—Masibea, arï yũhriabũ yũrũ.

—¿Noa ãhriri erã? arï serẽpiabũ ìgũre.

Yũ eroparĩcũ peegũ õpa arãmi yũre:

—Oã ñetariaro taririnũri árĩcũ yujuro bojerã ãhrima, arãmi ìgũ yũre. Erã suhrire coewearo dopa ta Cordero ìgũ di cóãra mera erã ñerire coenirã ãhrima. Eropirã õari boreri suhricurã ãhrima. ¹⁵ Eropa ìgũ coenirã árïrã Goãmũ ìgũ doaro core ìgũre eropa umupeoniguiãma. Õmũri ñamiri nũcũ ìgũre eropa umupeoniguiãma pahia Goãmũ wihigue erã iiro dopa ta. Eropigũ erã mera eropa arĩniguiã erãre itamugũcumĩ Goãmũ gajiropa wari arĩgũ. ¹⁶ Eropirã ne dipaturi oaboasome erã. Eropirã ne ñemesibusome. Ne abe mũmũ majagũ asiriñere pabusome erã. Turaro asiri erã ñero taricũ iisome. ¹⁷ Opũ doaro core niguiã Cordero erãre ìhadibugũcumĩ. Ovejare ìhadibugũ iro dopa erãre ìhadibugũcumĩ. Eropigũ maũrigã dipague ojocaricũ iiriyarigã dipague erãre mũhta wahgãgũcumĩ oveja ìhadibugũ iiro dopa ta. Eropigũ eropa mucubiricũ iigũcumĩ erãre. Eropirã mũmarogue árïrã ne dipaturi oresome erã, arãmi Jesu yarã oparã mera majagũ yũre.

8

Seis papera erã pihãnarare pãtuhaja gajĩñere pãpehopũ Cordero

1 Seis papera erã pihañarare pãtuhagũ dũhyarañere pãtuhami Cordero. Īgũ eropa pãtuhacũ yuju hora deco ɯmarogue ne ejarimaria wahabũ. 2 Eropigũ siete anyuare Goãmũ pohro niguirãre ĩhabũ. Eropigũ erãre siete cornetarire ohami gajigũ. 3 Gajigũ anyu oropari incienso dicũburipari opadigũ Goãmũre umupeori mesa pohrogue eja, niguiami. Ero ĩgũ niguicũ baja inciensore ĩgũre ohama. Árípehrerã Goãmũ yarã ĩgũre erã serẽra mera moreburi inciensore ohama. Eropigũ oro mera iira mesague, Goãmũ ĩgũ doaro pohro áríri mesague iri incienso Goãmũre soe mujuburi ãhrabũ. 4 Eropigũ anyu ĩgũ oparapari maja inciensore mesa weca pohsiri peo soeami. Īgũ eropa soera pũhrũ iri incienso maja imica Goãmũ yarã ĩgũre erã serẽra mera mũria wahabũ Goãmũ pohrogue. 5 Eropa wara pũhrũ ĩgũ anyu i mesa maja nitire iriparigue aĩ pohsãtuhaja, yebague pohmehdijucãmi. Īgũ eropa pohmehdijucũ miãmi. Turaro bupu paãmi. Eropiro gajiroa bũsũmaa, yeba ñohmemaabũ.

Cornetarire werepũ Ñu

6 Pũhrũ siete anyua yujurãyeri erã cornetarire purimorã iiaama.

7 Yujugũ anyu ĩgũ yarure purimũhtami. Īgũ eropa puricũ decoyeri yũsariyeri peame mera, di mera moreriyeri yebague yurimerejabũ. Iriyeri yurimerejacũ ta yeba ɯjũa wahabũ. Ipẽ ɯjũabũ: I yeba deco ejaboro pohro gohra ɯjũa wahabũ. Eropiro iripẽta yucũ sã taa yahsari sã ɯjũa wahabũ.

8 Anyu yujugũ ĩgũ eropa purimũhtara pũhrũ gajigũ anyu ĩgũ yaru cornetare puriami daja. Īgũ eropa puricũ wũadigũ ɯtãgũ iro dopa bejadigũ õaro ɯjũniguidigũ wũariyaguere mihrua dijabũ. Eropiro yeba ɯjũdiropẽ ta wũariya diya poya wahabũ. 9 Eropirã wũariya majarã wai sã deco mera ejarã gohra yujupũ majase majarã sĩria wahãma. Eropiro iri nũcũ gasi ta dohori gasi miria wahabũ wũariyaguere.

10 Perã anyua erã purira pũhrũ gajigũ anyu sã ĩgũ yaru cornetare puriami daja. Īgũ eropa puricũ wũadiru necãru, sihãdiru dopa ta bejadiru yebaguere yurimereja wahabũ. I yeba maja diarire maũ diparire yujupũ majase majare yurimerejabũ necãru. 11 Eropiro iri nũcũ maũri ta sũiriyari dujabũ. Eropa wacũ bajarã masa iri decore sũiri decore ihrinijarã sĩria wahãma. Iri ru necãru sũidiru waĩcũabũ.

12 Ƴrerã anyua erã purira pũhrũ gajigũ anyu sã ĩgũ yaru cornetare puriami daja. Īgũ eropa puricũ abe ɯmũ majagũ, ñami majagũ sã deco erabonirã gohra poya wahãma. Necã

majarã sã deco erabonirã dipuru ta poya waháma. Eropiro umugue wapicuri horari gohra abe ne boyobirami. Nami sãre wapicuri horari gohra abe ñami majagu, necã sã ne boyobirama.

¹³ Puhru ñhamemujuabu daja. Umarogue gaa wuwahgãgure ñhabu. Eropigu ñgu gaguiniguicã peeabu. Opa arãmi ñgu:

—Ñetariaa. Ñetariaa. Urerã anyua purinibeama dohpa. Erã purira puhru ñetariaro waroca. Eropo wacũ i yeba arĩrã ñetariaro warãcoma, arĩ dijuami ñgu.

9

¹ Puhru wapicurã anyua erã purira puhru gajigu anyu ñgu yaru cornetare puriami daja. Ñgu eropa puricũ necãru iro dopa bejagu arĩgu anyu umarogue arĩdigu yebague yuhridijaricũ ñhabu. Eropigu ñgure peame gobe uhcãri gobe maja sawire ohami gajigu. ² Eropigu ñgu iri gobere pãgũcũ peame imica wiriabu. Wuari peame imica iro dopa ta wuaro imica wiriabu iri gobere. Eropiro iri imica mata abe umu majagure, umaro sãre dederea wacũ iabu. ³ Eropirã iri imica pohecague arĩrã poreroa yebague wudijarama. Eropirã coreba erã burigã pũriro dopa ta erã burigã pũriama. ⁴ Eropigu taare, yucure, gaji taare ñero iidorebirami erãre. Masa dihtare ñero iidoreami erãre. Goãmu ñgu waĩ aĩturiñere erã diaporire tuhuya marirã dihtare ñero iidoreami erãre poreroare. ⁵ Eropo ñero iidorequeregu ta erãre wejẽdorebirami. Erãre wejẽdorebiriqueregu ta cinco aberi gohra masare burigã pũricũ iidoreami. Coreba toarã erã pũriro dopa ta pũricũ iirã ãhrama poreroa sã.

⁶ Irinũire erãre erã pũriro iicũ masa sĩridiarãcoma. Erã eropa sĩridiaquerecũ ta erãre sĩridoresome Goãmu.

⁷ Oã poreroapũ cabayua iro dopa dehyoama. Surara cabayuare erã come suhri cãhmotari suhri sãnirã dopa ta dehyoama erã poreroa. Erã dipu weca oparã erã peyari berori oro berori iro dopa peyãma. Erã diapori masa diapori iro dopa bejãma. ⁸ Erã poari nome poari iro dopa ãhrabu. Eropirã erã gũcũri yea gũcũri iro dopa ãhrabu. ⁹ Sĩporã cãhmotari gasiro come gasiro iro dopa cãhmotama erã coretihbire. Eropiro erã wũcũ bajarã cabayua omarã erã omaro dopa erã wũri dũpũri busuabu. Cabayua tũruri gasire tararã erã gamewejẽroque warã erã busuro dopa ta busuabu poreroa wũri dũpũri. ¹⁰ Eropirã coreba ñgu pĩgurucũro dopa ta toadiru ñgu oparo dopa ta ãhrabu erã poreroa. Eropirã erã pore mera masare cinco aberi gohra

pūricũ toáma. ¹¹ Eropirã erã opu āhrami. Ʋhcãri gobe opu āhrami erã opu. Īgu anyu mæru āhrami. Hebreo ya mera Abadón waĩcuami ĩgu. Griego ya mera Apolión waĩcuami. Apolión, mari ya mera arĩrã, “Ñero goroweogu” waĩcuagu iimi.

¹² Poreroa masare erã ñero pūricũ toara pũru i ñero erã tarimũhtadiro pehrea wahabu. Iri pũru pesubu ñero tarinirãcoma daja masa.

¹³ Pũru yuju mojtocu majarã anyua erã purira pũru gajigu anyu ĩgu yaru cornetare puriami daja. Īgu eropa puricũ Goãmu core niguri mesague oro mera iira mesague wereniguri busuro carabu. Iri mesa maja sari wapicuri sarogue wereniguri busuro carabu. ¹⁴ Eropa wereniguro cornetare purigure anyure õpa wereniguri mera busuro carabu:

—Wuariyague Eufrate waĩcuriyague peresu árĩnirãre anyuare wiuque. Erã wapicurã anyua āhrima, arĩro carabu.

¹⁵ Eroparicũ peegu anyupu erãre wapicurãre wiuami bajarã masare wejẽmorãre. I bojorire, inure, i horare queoro corerã iama erã wiumorã wapicurã anyua. Erã corediro sihajaa. Eropirã wejẽnugagãrirã iama. Árĩpehrerã deco mera erabonirãre masare wejẽmorã āhrama. ¹⁶ Eropigu erã anyua yarã surara, “Oã nucũ āhrima,” erã aricũ peeabu. Erã cabayua weca peyarã āhrama. Doscientos millones surara āhrama.

¹⁷ Eropigu cabayua erã weca peyarã yu ñanirã õpa dehyoama. Erã sĩporãrire cãhmotari suhri come suhri diari suhri, yãhãri suhri, boreri suhri suhricuama. Eropirã cabayuapu erã dipu yea diarã iro dopa dehyoama. Erã disirogue peame, imica, azufre ũjuri imica sã wiriabu. ¹⁸ Eropiro cabayua disiro wiriri mera masare wejẽabu. Árĩpehrerã masa deco erabonirãre masa bajarãre wejẽama. Eropirã peame mera imica mera, azufre ũjuri imica mera bajarã masare wejẽama. ¹⁹ Erã cabayua erã disiro wiriri mera wejẽama. Eropirã erã pore mera sã wejẽama daja. Erã pore ojogorogue añaa dipu dopa bejabu. Eropirã iri pore mera camicucũ iama erã masare.

²⁰ Bajarã masa erã wejẽ duhanirãpu erã mera majarãre wejẽcũ ñaquererã erã ñeri iirare ne duhubirama. Watẽare umupeo duhubirama. Erã goãmarã wéanirãre umupeo duhubirama. Erã wéanirãpu oro mera, plata mera, bronce mera, utã mera, yucu mera erã wéanirã āhrama. Erã wéanirã ojocaribirama. Peebirama. Ñohmebirama. Erã eropa árĩquerecũ ta erãre masa umupeoama. ²¹ Eropirã erã

wejē duhanirā gaji űeri sāre ne bujawerebira. Masare erā wejērare, erā nome mera erā űero iirare, erā yajara sāre ne bujawere duhubira erā.

10

Miri tūrugāre papera tūrugāre aīgārimi anyu

¹ Pūhrū gajigū turagū anyu űmarogue dijaricū űhabū. Imica curu watope āhrami. Eropigū buibugūda ĩgū dipuru weca peyabū. ĩgū diapo űmū majagū abe iro dopa goesiriabū. ĩgū űĳari peame iro dopa goseabū. ² Eropigū miri tūrugāre papera tūrugāre ĩgū pāra tūrugāre opāmi ĩgū. ĩgū guburu diayerū maja guburu mera wūariyague cūhrapi niguiami. ĩgū guburu copū maja guburupū yebague cūhrapi niguiami. ³ Eropa niguigū yeea erā gaguinigiuro dopa ta ĩgū turaro gaguinigiuiami. ĩgū eropa gaguiniguira pūhrū siete bupua wereniguirā carirama. ⁴ Erā eropa wereniguicū peegū gojanūgarabū yūhū. Yū eropa gojanūgacū ta űmarogue yūre werenigiuro carabū.

—Siete bupua erā arīrare gajirāre werebita. Eropigū irire goja aībita, arīro carabū yūre.

⁵ ĩgū eropa arīra pūhrū wūariyague niguidigū, yeba niguidigū anyu ĩgū mojoto diayerū mera sīme mujuami űmarogue. ⁶ Eropa sīme mujugū Goāmū eropa ojocariniguigū wāī mera wāīpeoami. ĩgū Goāmūpū árīpehrerire, űmūsi, űmūsi majarāre, i yebare, i yeba árīrāre, pagayarire, pagayari majarāre iigū āhrimi. Eropigū ōpa arāmi anyu:

—Goāmū mera diaye arīgū iiaa. Iripēta corerāra. ⁷ Seis anyua erā corneta dipurure erā purira pūhrū gajigū anyu ĩgū puritucū Goāmū iribojegue ĩgū “Ōpa iigūra,” ĩgū arīdiro dopa ta iigūcumī. Iribojegue masare irire ōaro werebiripū. Pūhrū ĩgū pohro majarāre, ĩgū yare weremūhtarāre ōaro werepehorū ĩgū. Iri ĩgū werepirare dohpaguere iigūcumī, arāmi anyu.

⁸ ĩgū eropa arīra pūhrū űmarogue yūre wereniguidiro dopa ta dipaturi wereniguigū carami daja. Ōpa arīgū carami yūre:

—Wūariyague niguigū yebague niguigū sihī anyu pohrogue waque. Eropa wagū papera tūrugāre ĩgū opari tūrugāre aīque, arīgū carami yūre. ⁹ ĩgū eroparīcū peegū anyu pohrogue wahabū. ĩgūre papera tūrugāre yū serēcū peegū ōpa arī yūhriami yūre:

—Aĩque. Eropigũ i papera tũrugãre baque mũhũ. Mũ ne bacũ mome iro dopa õaro imisĩroca. Mũ parugue mũ acura pũhrũ sũia waroca, arãmi yũre.

¹⁰ Īgũ eroparĩcũ peegũ iri tũrugãre anyure yũ aĩra pũhrũ bahabũ. Yũ ne bacũ mome iro dopa imisĩabũ. Yũ ba acura pũhrũ yũ parugue sũiro carabũ yũre. ¹¹ Yũ eropa bara pũhrũ õpa arãmi yũre:

—Dipaturi bajarã masare, macari majarãre, yebari majarãre, baja disĩrori wereniguirãre, erã tauro oparã sãre pũhrũ erã dohpa waborore wereyumũhtaque, arãmi yũre.

11

Perã Goãmũ yare weremorãre were gojapũ Ñũ marire

¹ Pũhrũ yũre queodigũre odoreami Goãmũ. Tuadigũpẽ yoadigũ ãhrabũ irigũ. Irigũre odoregũ õpa arãmi yũre:

—Yaha wihire queogũ waque. Iri wihi majañe yũre umupeori mesa sãre queoque. Eropigũ iri wihiguere masare yũre umupeorã sãre queoque. ² Disiporo wirinũgaropũre queobita. Iripũũ yũre gamebirã erã cũhrapĩrapũũ ãhraa. Erã cuarenta y dos aberi gohra Goãmũ ya macare iri maca majarã sãre ñero iirãcoma. Eropigũ queobita iripũũre. ³ Eropigũ yahare wererãre perãre obeogũra. Mil doscientos sesenta nũri gohra yahare wererãcoma. Co suhri sañanirã árĩrãcoma erã yũ weredorenirã, arĩ wereami yũre.

⁴ —I yeba majarã tauro opũ pohro pegũ olivo waĩcũri yucũ niguia. Pegũ sihãgori yucũ sã iri yucũ pohro niguia. Iri yucũ oã perã yahare weremorã iro dopa ãhraa, arĩ wereami daja yũre. ⁵ Eropirã erãre ñaturirã erãre erã ñero iidiacũ erã disirogue pea porã wirimaaro soe wejẽpehocãroca erãre ñaturirãre. Eropa ta erãre ñero iirãre wejẽrãcoma erã perã. ⁶ Eropiro erã perã erã deco aridorebircũ deco arisome. Eropiro yahare erã wereropẽ deco arisome. Eropirã maũrire diyari poyacũ iirãcoma erã. Eropirã i yebare ñero wacũ iirãcoma erã. Árĩpehreri dohpa árĩrore, dohpa árĩrãre, masare ñero wacũ iirãcoma erã. Erã noho gamero iidiaropẽ eropa ñero wacũ iirãcoma i yebare.

⁷ Erã Goãmũ yare weretuhajacũ ãhcãri gobegue árĩgũ ñegũ nũgũ majagũ wirigũcumi. Eropigũ Goãmũ yare wererã erã perã mera gamequeãgũcumi. Eropa gamequeãgũ turatarinũgagũ erãre wejẽcãgũcumi. ⁸ Īgũ eropa wejẽra pũhrũ erã ya dũpũri mũra wũari maca maja mague oyaroca. Mari Opũre Jesucristore erã pabia wejẽra maca ãhraa iri maca. Iri maca majarã ñerã árĩrã, Sodoma

majarã mura, Egipto majarã mura iro dopa ãhrama. ⁹ Erã dũpuri mura oyaro ùhrenũ ðaro oya, gajinũ deco erã ya dũpuri mura iri mare oyaroca. Eropirã árĩpehreri yeba majarã yujurãyeri, árĩpehreri cururi majarã yujurãyeri, árĩpehrerã yare wereniguirã yujurãyeri iri nũcũ nũri gohra erã ya dũpuri murare ãarãcoma. Eropirã iri nũcũ nũri gohra erãre yaadoresome. ¹⁰ Erã perã Goãmũ yare weremũhtanirã i yeba majarãre erã ñero iira dipuwaja moanirã árĩrãcoma. Eropirã erã eropa sĩrinirã árĩcũ ãarã árĩpehrero majarã mucubirirãcoma. Eropa mucubirirã bosenu ii, erã basi gajinore eropa ocãrãcoma.

¹¹ Erã eropa iiquerecũ ùhrenũ pũhrũ gajinũ deco gohra Goãmũ erãre masugũcumi daja. Ĩgũ eropa masucũ erã dipaturi wahgãnũgajarãcoma. Erã eropa wahgãnũgajacũ ãarã árĩpehrerã bũrigã gũirãcoma erãre. ¹² Pũhrũ ùmarogue bũrigã erãre perãre wereniguicũ peerãcoma masa. Ōpa arĩri bũsũroca erãre:

—Ōgue mũririque mũa, arĩri bũsũroca.

Erãre eropa arĩ wereniguirire bũsucũ peerã imica cururi watope mũria warãcoma. Erãre doonirã mura erã mũriacũ ãarãcoma. ¹³ Erã eropa mũriarisubu yeba turaro ñohmeroca. Eropa ñohmecũ ta iri maca maja wiri baja wiri mihrua dija waroca. Eropirã yeba ñohmero mera siete mil masa sĩria warãcoma. Gajirã dũhyarãpũ ùca wa, Goãmũre ùmaro majagũre “Turagũ ãhrimi,” arĩ umupeorãcoma pare ĩgũre.

¹⁴ I árĩpehreri eropa wara pũhrũ pesubu masa erã ñero tarituhajanirã árĩrãcoma. Eropa tarira pũhrũgã ta dipaturi masa mata daja ñero tarirãcoma.

Seis corneta dipurure erã purira pũhrũ gajigũ puripũ

¹⁵ Pũhrũ seis corneta dipurure erã purira pũhrũ gajigũ anyu ĩgũ yarure puriami. Ĩgũ eropa puricũ ùmarogue turaro wereniguiro carabũ. Ōpa arĩro carabũ:

Dohpague mari Pagũ, Cristo mera i yeba majarã tauro opũ árĩgũcumi. Eropigũ eropa opũ árĩniguigũcumi Goãmũ, arĩro carabũ.

¹⁶ Eropirã Goãmũ core oparã doarigue doarã veinticuatro Jesu yarã oparã Goãmũ core mereja, ĩgũre umupeoama.

¹⁷ Eropa umupeorã ðpa arãma:

Gũa opũ Goãmũ, turatariagũ ãhraa mũhũ. Mũhũ negohraguere eropa árĩmũriyoro. Eropigũ dohpague sãre eropa árĩniguia. Pũhrũgue árĩgũca mũhũ. Mũ turari mera masa erã opũ mũ árĩnũgacũ, “Ōhaa,” arãa gũa mũre. ¹⁸ Árĩpehrerã i yeba majarã mũre gamebirã

m̄ mera guarima. Dohpaguere erāre m̄ dipuwaja moaburibusu āhraa. Sīrinirā sāre m̄ dipuwaja moaburibusu āhraa. Eropiro m̄ yarāp̄ure ōarire erā iira wajare m̄ oburinosubu āhraa. Yujurāyeri erā m̄ yare werem̄htanirā árīma. Eropirā erā gajirā m̄ yarā mera árīpehrerā m̄re ōaro umupeonirā árīma. Eropigū oparāre, bu árīrā sāre m̄ yarā erā árīcū īha ōaro iiḡuca m̄h̄ erāre. Eropiro i yeba majarāre goroweocorerāre m̄ cóāburisubuno árīro iiaa dohpaguere, arī umupeoama Jesu yarā oparā Goām̄re.

19 Erā eropa arī umupeora p̄hr̄ ̄maro maja wihi Goām̄ ya wihi īḡ p̄ḡura wihi īhab̄. Eropirā iri wihi árīri comorore īhab̄ ḡua. Iri comoro pohecague Goām̄ “Masare itamuḡura,” īḡ arī werepirap̄ sañab̄. Ḡua eropa īac̄ ta miamaa, bupu paamaa, gajiroa b̄s̄maa, i yeba ñohmemaahab̄. Deco ȳsariyeri deco b̄rigā ̄marogue dijarib̄.

12

Nomeore, p̄ru sāre werep̄ N̄u

1 P̄hr̄ i yeba dohpa waborore ̄marogue dehyoab̄ ȳre. Eropa dehyoari ḡhyadiaro maja āhrab̄. Ōpa īam̄htab̄: ̄marogue nomeore īhab̄. Igo suhriro abe ̄m̄ majaḡ iro dopa gosesiriab̄. Eropigo abe ñami majaḡ weca niguiamo. Op̄ īḡ peyarino berore doce necā opari berore peyadigo niguiamo. 2 Eropiro igo porāc̄b̄oro merogā d̄hyab̄. Eropigo igo niji wahḡgo p̄riro mera gaguiniguamo. 3 P̄hr̄ dipaturi īhab̄ daja ̄marogue: W̄aḡ p̄rure diaḡre īhab̄. Siete dipu dipuc̄ḡ āhrami. Árīpehreri īḡ dipu oparā erā peyarino berorire peyara dipu dihta āhrab̄. Eropigū diez cusaric̄ḡ āhrami īḡ. 4 Īḡ p̄guru mera necā dipurure wejēsiri medijuami. Árīpehrerā necāre deco gohra wejēsiri medijuami. Eropigū nomeo porāc̄go pohro niguiami p̄ru. Igo maḡgā dehyoac̄ babu iirami. 5 Merogā p̄hr̄gā ta masa dehyoatuhami majiḡgā. Árīpehreri yeba majarā op̄ árību āhrami īḡgā. Īḡ eropa op̄ turaḡ árīcū masa īḡre tarin̄garā yujuro bojesome. Īḡ eropa masa dehyoac̄ ta Goām̄ īḡ doaro pohrogue īḡgāre aībeocāmi. 6 Īḡ eropa iic̄ nomeop̄ masa marirogue p̄rure duhrigā wahámo. Goām̄ īḡ amuyudirogue duhrigā wahámo igo. Eroguere mil doscientos sesenta ñari gohra Goām̄ igore īhadibumi.

⁷ Eropirã ɯmarogue gamewejẽnugãma. Migue waĩcugu anyu ĩgu yarã anyua sã pĩru mera gamequeãma. Erã eropa gamequeãcũ pĩru ĩgu yarã anyua mera Miguere gamequeãmi. ⁸ Eropirã Migue sã pĩrure tarinugãma. Eropigu pĩrure ĩgu yarãre anyuare ɯmaroguere árĩnemodorebirami. ⁹ Eropigu wɯagu pĩrure cóacãmi Goãmɯ. ĩgu pĩru watĩ ta árĩgu iiami. Satana waĩcugu ãhrimi. Iribojeguere ĩgu pĩru dɯpɯ dopa deyogu árĩñumi. Eropigu árĩpehreri yeba majarãre guyagu ãhrimi. Goãmɯ ĩgure cóãgu ĩgu yarã anyua mera yebague cohã dijuami.

¹⁰ Pɯhrɯ ɯmarogue turaro wereniguicũ peeabɯ:

—Dohpaguere mari Pagɯ masare taumi pare. Dohpague tamerare mari Pagɯ mari Opɯ árĩgu ãhrimi ĩgu turarire ĩhmubu. Eropigu ĩgu obeodigu Cristo sã ĩgu opɯ árĩrire ĩgu turarire ĩhmumi árĩpehrerãre. Watĩre ɯmarogue árĩdigure cohã dijuami i yebague. Eropigu ĩgu turarire ĩhmumi mari Pagɯ. ĩgu watĩpɯ ɯmuri nɯcɯ, ñamiri nɯcɯ Jesu yarãre, “Oã ñerã ãhrima,” arĩ weresãgu iimi mari Pagure. Eropigu mari acawererãre Jesu yarãre weresãgu árĩmi. ¹¹ Cristo Cordero waĩcugu ĩgu di cóãro mera mari acawererã ĩgure umupeorã erã ñeri iirare cóãsũnirã árĩma. Eropa árĩrã watĩre tarinugãma. Eropirã õari buherire wererã, watĩre tarinugãma. ĩgu yare werera dipuwaja gajirã erãre wejẽdiaquerecũ ta, Cristo yare duhubirã árĩrã ĩgure tarinugama. ¹² Eropirã mɯa ɯmaro majarã mucubirique. Watĩre ĩgu yebague cohã dijucũ ĩarã mucubirique. Mɯa yeba majarãpɯ, wɯariya majarã sã mojomorocurã warãca mɯa. Mɯa pohrogue dijami watĩ. ĩgure dipuwaja moaboro merogã dɯhyaa. Eropigu guataricãmi ĩgu. Mɯa pohrogue ĩgu ejacũ mojomorocuro dujacũ iigucumi ĩgu mɯare, arĩ gaguiniguero caricũ peeabɯ.

¹³ Eropigu pĩrupɯ cohã dijudigu nomeore, majigugã pagore nɯrusia wahgãmi. ¹⁴ Eropigu Goãmɯ gaa wɯagu quẽ dɯpɯre ohami igore masa marĩrogue igo wɯɯ duhri wahgãboro dopa. Erogue igo ejara pɯhrɯ ɯhre bojori õaro gaji bojori deco gohra õaro ĩhadibuami Goãmɯ igore. ĩgu eropa ĩhadibucũ pĩru igore ñero iimasibirami. ¹⁵ Ero igo árĩcũ ĩagu pĩru igore miudiagu wɯaro decore etocabeocãmi. ¹⁶ ĩgu eropa iiquerecũ yebapɯ igore itamuabɯ. Pĩru ĩgu disiro wiriri decore yebapɯ yehrimaa wa uju aĩbeocãbɯ. ¹⁷⁻¹⁸ Eropa wacũ ĩagu pĩru guatariami. Eropa guagu yujurãyeri igo pãramerã árĩturiarã mera gamewejẽgu wahãmi. Erãpɯ Goãmɯ dorerire iirã ãhrima. Jesu yare õari buherire ne duhubirã ãhrima. Erã mera

gamewejęgu wahámi. Eropigu pĩru wuariya turo pohro nguiami.

13

Perã nęgu majarãre werepu Ńu

¹ Wuariya turo niguigu, nęgu majagu iriya árĩgure ĩgu wahgãpacũ ĩhabũ. ĩgu siete dipu, diez gohra cusaricęgu ãhrami. ĩgu cusari oparã erã peyarino berori peyámi. Eropiro ĩgu dipure ĩgu waĩre ĩgu gojatura ãhrabũ. ĩgu waĩ iri ñeri waĩ árĩro Goãmure ĩhaturiri waĩ ãhrabũ. ² Eropigu ĩgu nęgu majagu yee dorogę guagu iro dopa bejámi. Eropigu bugu iro dopa guburicęgu ãhrami. Eropigu yee wuaguro iro dopa disirocęgu ãhrami. Eropigu pĩrupu ĩgu turarire ohami nęgu majagure. Eropa ogu ĩgure ĩgu opu doaro apigu ĩgu iro dopa ta masa bajarãre dorecũ iiami pĩru nęgu majagure. ³ ĩgu nęgu majagu dipuru yuju dipuru camirocũri dipuru dopa bejabũ. Iri camiro ĩgure wejẽbocurira camiro árĩquerero yarira camiro ãhrabũ. Iri dipuru ojocaricũ ĩarã, uca waháma i yeba majarã árĩpehrerã. Eropa ĩha ucarã, nęgu majagure “Turagu ãhrimi,” arĩ umupeoama. Eropirã ĩgu yarã waháma masa. ⁴ Eropirã nęgu majagure pĩru ĩgu turarire ocũ ĩarã masapu ĩgure pĩrure mereja umupeoama. Eropirã nęgu majagu sãre mereja ĩgure umupeoama. Eropa umupeorã õpa arãma:

—Ne gajigu mu iro dopa turagu marimi. Gajigu mure ne tarinugamasibeami, arĩ umupeoama masa nęgu majagure.

⁵ Eropigu ĩgu nęgu majagu “Turatariagu ãhrimi,” erã ĩgure arĩquerecũ ta, ĩgu Goãmure ñero wereniguiquerecũ ta eropa pepicãnimi Goãmuru. Eropigu cuarenta y dos aberi gohra ĩgu nęgu majagu masare dorenigucumi. Iripẽta ĩgu opu árĩcũ gahmemi Goãmũ. ⁶ Eropigu Goãmure ñero wereniguiami ĩgu. ĩgu waĩre, ĩgu wihire, umarogue ĩgu árĩro, ĩgu pohro majarã sãre ñero wereniguiami nęgu majagu. ⁷ Eropigu Goãmũ yarãre gamewejęgu erãre tarinugámi. ĩgu eropa tarinugaquerecũ ta eropa ĩacãniami Goãmũ. Goãmũ ĩgu eropa iidorebircũre iisome ĩgu. Eropigu árĩpehrerã i yeba majarã tauro opu árĩnirami nęgu majagu. Árĩpehreri cururi majarã, árĩpehreri yebari majarã tauro, árĩpehreri macari majarã tauro, árĩpehrerã yare wereniguirã tauro opu árĩnirami ĩgu. ⁸ Eropirã árĩpehrerã i yeba majarã ĩgu nęgu majagu pohro mereja ĩgure umupeorãcoma Goãmũ yarã árĩbirãpu. I yebare Goãmũ ĩgu ĩhacũnuguboro core ĩgu yarã árĩmorãre ĩgu

mera árĩniguimorãre erã waĩre gojatutuhañumi. Iripũ ĩgu eropa gojaturapũ Cordero erã wejẽdigu yapũ ãhraa. Iripũ erã waĩre gojatubirã dihta Goãmu yarã árĩbirã nugu majagure umupeorãcoma.

⁹ Gamiricũrã ãhraa mua. Eropirã peeque mua Jesu yarã árĩrã. ¹⁰ Árĩpehrerã mãare peresu iinirãre erã sãre peresu iigucumi pũhrũ. Árĩpehrerã masare ñose wejẽnirãre erã sãre ñose wejẽgucumi pũhrũ. Irire masirã mari Goãmu yarã ñero tariquererã ta ĩgure cóãbiricãrã. Eropirã yujuro boje ĩgure guñaturarã.

¹¹ Pũhrũ gajigu nugu majagure ĩhabũ daja. Yeba pohecague ĩgu árĩdigu ĩgu wiriricũ ĩhabũ. Pecusaro oveja cusaro iro dopa bejari cusaro cusarocũgu ãhrami. Eropa árĩqueregu pĩru iro dopa wereniguiami. ¹² Eropigu nugu majagu árĩmũhtadigupũ pũhrũ árĩdigure opu acuami. ĩgu eropa opu acugupũ árĩpehreri yeba majarãre árĩmũhtadire umupeodoreami. Árĩmũhtadi nugu majagu erã wejẽbocuridi camiro yaridigu ãhrami. ¹³ Eropigu pũhrũ árĩdigu deyro moarire ii ĩhmuami masa erã ĩha ucaboro dopa. Eropa iigu masa erã ĩaro peame wũari peame umarogue dijaricũ iiami. ¹⁴ Eropigu árĩmũhtadigu ĩgu ĩhuro gajigu nugu majagupũ deyro moari mera masare gũyãmi, "Ihĩ mua umupeobu ãhrimi," arĩgu. Eropigu ĩgu gajigu nugu majagu árĩmũhtadigure wéadoreami masare. ĩgu árĩmũhtadigu ñoserimiji mera erã ñosedigu árĩqueregu ta ojocarigu ãhrami. ĩgu iro dopa bejagure ta wéadoreami gajigu nugu majagu masare. Erã eropa iicũ ĩagu Goãmu dooqueregu ta eropa ĩacãniami. ¹⁵ Eropigu pũhrũ árĩdigu nugu majagupũ árĩmũhtadire wéadigure ojocaricũ iiami masare ĩgu doreboro dopa. Eropigu wéadigupũ erã ĩgure umupeobirãre wejẽdoreami. ¹⁶ Eropigu árĩpehrerãre erã mojotori dayepũ sãre ĩgu waĩre gojatudoreami nugu majagu pũhrũ árĩdigu. Erã mojotorire gojatubirinirãre erã diaporire gojatudoreami ĩgu waĩre. Bu árĩrãre, oparãre, doberi oparãre, mojomorocũrãre, erã pohro majarãre, erã pohro majarã árĩbirãre, árĩpehrerãre ĩgu waĩre gojatudoreami. ¹⁷ ĩgu árĩmũhtadigu nugu majagu ĩgu waĩre, ĩgu numerore gojatubirãre ne asũdorebirami. Eropigu erãre duadorebirami.

¹⁸ Irire õaro masique mua. Pee masirã árĩrã nugu majagu ĩgu numerore õaro ĩha masique. Iri numero uma waĩ iro dopa ãhraa. Iri numero seiscientos sesenta y seis gohra ãhraa.

14

Goãmũ ĩgũ taunirã mama bayariñere bayañorã

¹ Pũhrũ Sión waĩcudigu Ʃtãgu weca niguigũre Corderore ĩhabũ. ĩgu mera ciento cuarenta y cuatro mil masa ãhrama. Erã ĩgu ya waĩre ĩgu Pagũ ya waĩ sãre erã diaporire erã gojatunirã ãhrama. ² Erãre yũ ĩacũ ta Ʃmarogue bũsũro carabũ. Wũari Ʃtãmu bũsũro dopa ta, bupu ĩgu wũaro bũsũro dopa ta bũsũro carabũ. Eropigu arpa waĩcũrire erã buamutẽro dopa ta bũsũro carabũ. ³ Erã ciento cuarenta y cuatro mil masa bayarã ãhrama. Ero opu ĩgu doaro pohro wapicũrã gajiropa bejarã, Jesu yarã oparã sã core bayarã ãhrama erã. Erã bayariñe mama bayariñe ãhrabũ. Iri bayarire erã dihta masiama. Cristo ĩgu taunirã dihta iri bayarire masiama. Erã i yeba árĩnirã mũra ĩgu aĩ mujunirã ãhrama. ⁴ “Ne ñerire iisome,” arĩnirã ñerire iibirinirã ãhrama. Ne erã yujusubugã nome mera ñero iibirinirã ãhrama. Eropirã Corderore ĩhacũnirã árĩrã, ĩgu yare eropa iiniguimũrama. Eropigu erãre ñerã watope árĩnirãre ĩgu taumorãre aĩami Goãmũpũ. Eropa ĩgu taunirã árĩrã, Goãmũ yarã árĩmorã, Cordero yarã sã árĩmũhtanirã ãhrama. ⁵ Eropirã erã mera majarã ne yujugu gũyagu marami. Eropirã Goãmũ ĩgu pepicũ ñeri iira dipuwaja marirã ãhrama erã.

Ʃrerã anyua weremedijuñorã

⁶ Pũhrũ Ʃmarogue wũugũre anyure ĩhabũ. ĩgu i yeba majarãre árĩpehreri cururi majarãre, árĩpehrerã yare werenigũrãre, árĩpehreri yebari majarãre õari buherire werebu ãhrami. Iri buheri ne gohrotobea. Eropa árĩniguicãa. ⁷ Eropigu anyu gaguinigũ õpa arĩ medijuami:

—Goãmũre gũique. “Turatariagu, õatariagu ãhrimi,” arĩ umupeoque ĩgũre. Dohpaguere masare ĩgu dipuwaja moaburibusu árĩro iiaa. ĩgu Ʃmũsire, yebare, pagayarire, mũtayarigã sãre iidigu ãhrimi. Eropirã ĩgũre mereja umupeoque, arĩ gaguinigui dijuami anyu.

⁸ ĩgu eropa arĩra pũhrũ gajigu anyu Ʃmaro wũugu õpa arĩ medijuami:

—Erãre cóãcãmi. Wũari maca Babilonia waĩcũri maca majarãre cóãcãmi Goãmũ. Erã ĩgu cóãnirãpũ árĩpehrerã gajirãre ñero iicũ iima. Masa erãre ĩhacũrã, ñerire Ʃaribejarã, goãmarã wéanirãre umupeoma. Merericũrã vinore erã turaro Ʃaribejaro dopa ta erã ñerire turaro Ʃaribejama Babilonia majarãre ĩhacũrã, arĩ were medijuami gajigu anyu.

9-10 Erã perã anyua eropa arĩra pũhrũ gajigũ anyu erã pũhrũ wũũgũ gaguinigiui õpa arĩ medijuami ĩgũ sã:

—Árĩpehrerã nũgũ majagũre umupeorãre, ĩgũre wéadigũre umupeorãre erã diaporire, erã mojotorire ĩgũ waĩre gojatunirãre dipuwaja moagũcumi Goãmũ. Erã mera guagũ erã tamerare turaro dipuwaja moagũcumi Goãmũ. Eropigũ Goãmũ erãre bũrigã dipuwaja moaniguigũcumi cãdijiro mariro. Nũgũ majagũre umupeorã arĩpehrerã peamegue warãcoma. Erogue bũrigã pũriroca erãre. Azufre waĩcũri mera erã dihura peame arĩroca. Goãmũ yarã anyua, Cordero sã erã ĩhuro ñero tarirãcoma erã. ¹¹ Iri peame eropa imicacũniguicãroca. Ne yarisome. Erãre eropa pũriniguicũ iiroca. Árĩpehrerã nũgũ majagũre mereja umupeorãre eropa pũriniguicroca. Ûmũri sãre, ñamiri sãre eropa pũriniguicãroca sooro mariro erãre. ĩgũ nũgũ majagũre ĩgũ wéadigũre umupeorã, ĩgũ waĩre erã gojatunirã sã, eropa ta ñero tarirãcoma, arĩ medijuami anyu.

¹² Eropigũ õpa arĩ werea mũare ire: Mũa erã eropa ñero tariborore masirã, Goãmũ yarã ĩgũ dorerire iirã, Jesure cóãbirã árĩrã, ĩgũ yare duhubiricãque. Ñero tarirã árĩquererã ta Goãmũ yare duhubiricãque, arãa yũhũ mũare.

¹³ Pũhrũ umarogue yũre wereniguiro caracũ peeabũ daja. Õpa arãmi yũre:

—Ire gojaque mũhũ. Goãmũ yarã ĩgũre cóãbirã árĩnirã dohpaguere mũa sĩrira pũhrũ sãre õaro mucubirirã árĩrãca mũa, arĩ medijugũ carami yũre. ĩgũ eropa arĩra pũhrũ Espĩritu Santopũ õpa arĩnemoami daja:

—Eropa ta ãhraa. Diaye ta ãhraa. Erã turaro erã mohmerire duhpiicã soorãcoma. Ûmarogue erã wacũ õaro erã iirare guñagũcumi Goãmũ. Eropigũ erãre õaro iigũcumi. Eropirã erã mucubirirã árĩrãcoma, arĩnemoami Espĩritu Santo.

Pohe maja oteri dũcare mari beye aĩro dopa ta Goãmũ ĩgũ yarãre beye aĩgũcumi. Ñerãrũre boje beye dobogũcumi, arĩ gojañumi Ñu

¹⁴ Pũhrũ imica curu boreri curure ĩhabũ. Iri curu weca masũ dopa bejagũ doãmi. ĩgũ oro bero opũ ĩgũ peyarino berore peyãmi. Eropigũ matamiji usiri mijire opãmi ĩgũ. ¹⁵ Pũhrũ gajigũ anyu Goãmũ wihigue árĩdigũ wiriramĩ. Eropa wiririgũ turaro gaguiniami imica curu weca doagũre:

—Muhū matamiji mera pohe maja dūcare i yeba maja dūcare tabe aīpehocāque. Dohpaguere mū queodiro ejaa. Dūca boretuhabū, arāmi anyu.

¹⁶ Īgū eroparīcū peegū Īgū matamiji mera i yebare tāranūgami Īgū imica curu weca doagū. Eropa tāranūgagu i yeba maja dūcare aīro dopa iiami.

¹⁷ Pūhrū gajigū anyu sā Goāmū wihigue árīdigū wirirami. Īgū sā matamiji usirimijire opámi. ¹⁸ Eropigū gajigū anyu Goāmūre umupeori mesa pohrogue árīdigū wirirami. Īgūpū mesa maja peamere ihadibugū āhrami. Eropa wiririgū matamiji usirimiji opagūre gaguiniguiami:

—Muhū matamiji mera i yeba árīri pohere, igui pohe maja dūcare aīque. Iguipū űituhabū, arī gaguiniguiami.

¹⁹ Īgū eroparīcū peegū anyu ĩgū matamiji mera i yebare tāragū, iguitōrīre wírīta aīami. Īgū eropa iira pūhrū iritōrīre iguitōrīre ĩgū űatīarogue cōhāmi. Īgū eropa űatīaro dopa ta Goāmū ĩgūre gamebirāre turaro guagu, dipuwaja moagūcumi. ²⁰ Iri maca tūro pohro erā űatīaro iri iguitōrīre űatīama. Ero erā űatīacū igui deco wiriro dopa di wiriabū. Trescientos kilómetros yoariya, yuju metro ōaro gajī metro deco űhcāriya āhrabū di mera. Irīre ĩha masiabū. Yujunū anyu Goāmūre gamebirāre űerire iinirāre gameneo erā űeri iira dipuwaja moagūcumi. Īgū eropiicū masa bajarā sīrirācoma. Eropa sīrirā di pagari cōārācoma, arī masiabū yuhū.

15

Masa erā űero tarīborore anyua apitūñorā masare

¹ Pūhrū űmarogue gajiropa árīrore ĩhabū. Gūhyadiaro árīro i yebague dohpa waborore ĩhmuriñe āhrabū. Ōpa ĩhabū: Siete anyua āhrama. Goāmū guagu siete suburi masare dipuwaja moatubu iiami. Eropirā erā siete anyuapū dipuwaja moadore ĩgū apimorā āhrama.

² Anyuare yū ĩara pūhrū wūariyare ōaro deco sūririya dopa árīriyare ĩhabū. Iriya peame mera árīriya āhrabū. Eropigū iriya pohro niguirāre nūgū majagūre ĩgūre wéadigū sāre tarinūganirāre ĩhabū. Erā nūgū majagu numerore ĩgū ya wāī maja numerore gojatudorebirinirā āhrama. Ero niguirā arpa wāīcūri būamūtēre opáma. Iri būamūtēri Goāmū ĩgū ora āhrabū. ³ Eropirā Goāmū pohro majagu Moise ya bayarire bayarā iiama. Cordero ya bayariñe sāre bayarā iiama. Ōpa arī bayáma:

Gūa opū muhū Goāmū turatariagu āhraa. Mū iirare ĩarā ĩha űca wahaa gūa. Mū iira ōataria. Muhū

árīpehreri yeba majarā tauro opu āhraa. Ōaro gūyaro mariro diaye iiaa mūhū. ⁴ Árīpehrerā mure güima. Árīpehrerā mure “Turagu āhrimi,” arīrācoma. Mū dihta ñeri marigu āhraa. Árīpehrerā i yeba majarā mū pohrogue ejarā mereja mure umupeorācoma. Eropa ta iirācoma erā árīpehrerā ōaro mū iirare iarā, arī bayarā iiama erā.

⁵ Pūhrū umarogue ihamemujugu, Goāmū ya wihire pāgūra wihire ihabū. Iri wihigue Goāmū īgu doreri īgu gojara mijiri utā mijiri erā dibura mijiri āhrabū. ⁶ Iri wihire yū iacū ta siete anyua iri wihi pohecague árīnirā wirirama. Erā Goāmū īgu dipuwaja moadoregu īgu apimorā āhrama. Erā nūcū erā dipuwaja moaburire opāma erā anyua. Ōari suhri, boreri suhricūrā āhrama. Eropiro erā coretihbi weca oro gasiro mera tūādiunirā āhrama. ⁷ Iri wihigue árīnirā erā wiriricū wapicūrā gajiropa bejarā mera majagu erāre siete anyuare oroparire ohami. Iripari Goāmū gua īgu dipuwaja moadoreburi mera ōaro ūjūturiabū iripari. Īgu Goāmū eropa árīniguigu āhrimi. ⁸ Īgu iriparire erāre ocū ta Goāmū wihi pohecague īgu gosesiriri mera īgu turari mera imicacū sehya wahabū. Iri wihi eropa imicacū sehya wacū iri wihire ne yujugu ñaja masiya marabū. Siete anyua Goāmū dipuwaja moadoregu īgu apidiro dopa ta erā masare dipuwaja moatura pūhrū dipaturi iri wihigue ñajamasirācoma daja. Īgu dipuwaja moaboro core ñaja masiya mara. apidiro dopa ta erā masare dipuwaja moatura pūhrū dipaturi iri wihigue ñajamasirācoma daja. Īgu dipuwaja moaboro core ñaja masiya mara.

16

Goāmū masare īgu dipuwaja moaborore werepū

¹ Pūhrū Goāmū wihigue turaro wereniguiro carabū. Siete anyuare weregu iigu carami:

—Goāmū īgure tarinūganirā mera guami. Eropirā īgu dipuwaja moadorerare iique. Eropirā dohpaguere siete pari dicūrire yebague pisiri medijurā waque i yeba majarāre, arī wereniguigu carami.

² Eroparīcū peegu árīmūhtadigu anyu īgu oparipa dicūrire yebague pisiri medijuami. Īgu eropa pisiri medijucū nūgu majagu waire gojatunirā īgure wéadigūre umupeonirā ñero camicūama. Iri cami turaro pūriyoro erāre.

³ Īgu eropa pisirira pūhrū gajigu anyu daja īgu oparipa dicūrire pisiri medijuami daja wūariyague. Īgu eropa

pisiricũ iriya diya wahabũ. Sĩridigũ di iro dopa áhrabũ iri di. Eropa wacũ iriya pohecague árĩnirã sĩripehrea waháma.

⁴ Perã eropa pisiri dijura pũhrũ gajigũ anyu ĩgũ oparipa dicũrire pisiri medijuami daja maũrigue, iri maũri diparigue sãre. ĩgũ eropa pisiricũ maũri diyari dihta wahabũ.

⁵ Eropa wacũ ĩagũ gajigũ anyu maũrire coregũ õpa arĩgũ carami:

—Goãmũ, mũhũ ñeri marigũ áhraa. Dohpague sãre eropa árĩniguicãgũ áhraa mũhũ. Iribojegue sãre eropa árĩniguicãmũribũ mũhũ. Eropigũ dipuwaja moagũ diyarire iigũ diaye iiabũ mũhũ. ⁶ Nũgũ majagũ yarãpũ mũ yarãre wejẽrã di cóãcũ iima. Mũ yare wererã sãre wejẽrã di cóãcũ iima erã. Erã eropa wejẽra dipuwaja iriyari diyari wahabũ erã ihriburi. Õpa ta mũ iicũ gahmeama erã, arĩgũ carami maũrire coregũ anyu.

⁷ ĩgũ eropa arĩra pũhrũ Goãmũre umupeori mesague wereniguiro carabũ daja:

—Eropa ta áhraa. Goãmũ gũa opu turatariagũ áhraa mũhũ. Gũyaro mariro, queoro masare beye, dipuwaja moaa mũhũ, arĩ wereniguiro carabũ.

⁸ Ûrerã anyua erã pisirira pũhrũ gajigũ anyu ĩgũ oparipa dicũrire pisiri medijuami daja. Abe umũ majagũ weca pisiri medijuami. ĩgũ eropa pisiricũ abere masare turaro asicũ iiami Goãmũ. ⁹ Eropigũ abe umũ majagũ masare turaro asiami. Erãre eropa asicũ erã Goãmũ erãre ĩgũ dipuwaja moadorecũ masirã, ĩgũre ñero wereniguiama masa. Eropa ñero tariquererã ta erã ñero iirare ne bũjawerebirama. Eropirã duhubirama. Goãmũre “Turagũ áhrimi,” arĩ umupeodiabirama.

¹⁰ Wapicũrã anyua erã pisirira pũhrũ gajigũ anyu daja ĩgũ oparipa dicũrire pisiri medijuami daja. Nũgũ majagũ ĩgũ doaro weca pisiri medijuami. Opu doaro áhrabũ ĩgũ doaro. ĩgũ eropa pisirira pũhrũ ĩgũ yarã árĩri yebague naitĩaro wahabũ. Eropirã ĩgũ yarã masa ñero pũricũ gũcũrire cũridihuama. ¹¹ Erãre ñero pũricũ ta, erã ñero camicũrã ta Goãmũre umaro majagũre ñero wereniguiama. Erã ñero iirapũre bũjawerebirama. Eropirã irire duhubirama.

¹² Yuju mojotocu majarã anyua erã pisirira pũhrũ gajigũ anyu daja ĩgũ oparipa dicũrire pisiri medijuami daja. Eufrate waĩcũriya wũariyague pisiri medijuami. ĩgũ eropa pisiricũ iriya bojomerea wahabũ. Abe mũririro majarã oparã erã gamewejẽrã warã erã iriya taribujariboro dopa eropa iiami.

¹³ Puhru ɯrerã watẽare tarumurã iro dopa bejarãre ïhabu. Yujugu tarubugu pĩru pohecague árdigu ïgu disirogue wirirami. Gajigu tarubugu watĩ nugu majagu disirogue wirirami. Gajigu tarubugu watĩ daja “Goãmu yare weregũ áhraa,” arĩ guyadigu ya disirogue wirirami.

¹⁴ Eropirã erã ɯrerã watẽa tarumurã iro dopa bejarã deyoro moarire ii ïhmurã áhrama. Eropirã árĩpehrero majarã oparãre gamenerecũ iiama erã basi Goãmu mera gamewejẽdorerã. Erã eropa gamewejẽburinu Goãmu turatariagu árĩpehrerãre ïgu dipuwaja moaburinu, pehrerburinu árĩroca.

¹⁵ Ero coregue õpa arĩmi Jesu guare: Ìaque mua. Yajari masu ïgu yajagu ariro dopa ta yu sã guñaña mariro arigũca. Yu ariborore õaro coredigu mucubirigu árĩgucumi. Ìgu yaha árĩburire iinigidigu ñeri marigu mucubirigucumi. Yu mera árĩgucumi. Eropa iidigu árĩgu yu dujaricũ guhyasĩrisome ïgu, arĩmi Jesu guare.

¹⁶ Eropirã ɯrerã watẽa i yeba majarã tauro oparãre gamewejẽcũ iituhãma. Erã gamewejẽro Hebreo ya disiro mera Armagedón waĩcua.

¹⁷ Seis anyua erã pisirira puhru daja gajigu anyu ïgu oparipa dicũrire imica cururi weca pisiri medijuami daja. Ìgu eropa pisirira puhru Goãmu wihigue ïgu opu doarogue turaro wereniguiro carabu:

—Iripẽta árĩroca, arĩro carabu.

¹⁸ Ìgu eroparĩcũ ta miamaa, bupu pamaa, gajiropa busumaa, guhyaro yeba ñohmeabu. I yeba masa erã árĩnũgara puhru eropa siari ñohmebirabu i yeba. Gajisubu ñohmediro tauro guhyaro yeba ñohmemaabu. ¹⁹ Eropa ñohmecũ wũari macare Babilonia waĩcũri macare uhrefa yehremaa wahabu. Eropiro paga macari i yeba árĩri macari dija wahabu. Eropigu Babilonia waĩcũri maca majarãre wũari maca majarãre guñami Goãmu erãre dipuwaja moabu. Erã ñerire iiri dipuwaja erã mera turaro guãmi. Eropa guagu erãre burigã dipuwaja moãmi. ²⁰ Ìgu eropa iicũ árĩpehreri nũguri, utã yucu sã pehrea wahabu. Eropiro ne marabu. ²¹ Eropiro decoyeri pagayeri yusariyeri yebague masa weca دچارabu. Árĩpehreri decoyeri cuarenta kilo nũcũriyeri áhrabu. Erã weca iri eropa دچارicũ Goãmu erãre ïgu turaro dipuwaja moacũ masirã ñero wereniguiama masa Goãmure.

17

Ñerire iigore dipuwaja moadoregucumi, arĩ werepu Ñu

¹ Puhru siete parire oparã anyua mera majagu yu pohrogue eragu opa arãmi yure:

—Īagu arique. Diari bajayari weca doagore uma mera ñero iiricudigore Goãmu ĩgu dipuwaja moaborore ĩagu arique mahu. ² I yeba majarã oparã igo mera ñero iiro dopa ta igo yapure gamema. Goãmupure gamebirama. I yeba majarãre igo sihu merecu iiro dopa ta, erã mera igo ñero iiro dopa ta igo masare ñero iirire uaribejacu iimo igo. Eropa iigo arĩpehreri ñerire erã iicũ iimurimo igo masare, arĩ wereami anyu yure.

³ Īgu eropa arĩra puhru Espiritu Santo yure deyoro moarire ĩacũ iiami. Eropigu anyu masa marirogue aĩ wahgãmi yure. Ero igo nomeore ĩhabu. Igo nugũ majagu diagu weca peyago ahramo. Nugũ majagupu ĩgu dupu baja waĩ erã gojatudigu ahrami. Iri waĩ ñeri waĩ Goãmure ñeri wereniguri waĩ ahrabu. Eropigu siete dipucugu, diez gohra cusaricugu ahrami nugũ majagu. ⁴ Eropigo nomeopu oaro yahsari suhri oparã erã sañarino suhrire sañadigo ahramo. Diari suhri sãre sañadigo ahramo. Baja orore, wajacuri utãre, perlayeri sãre tuhura suhriore sañadigo ahramo igo. Eropigo oropare opãmo igo. Iripare dicuri ñeri igo iira ahrabu. Nero iigo burigã ñero iidigo arĩmo igo. Iri ñeri Goãmũ ĩgu ĩadiabirira ahrabu. ⁵ Igo diapo igo waĩ erã gojatudigo ahramo. Iri waĩre oaro masibea mari. Opa arĩ gojatura ahrabu igo diapogue: “Wuari maca Babilonia ahrimo. Igo arĩpehreri ñeri iinugadigo ahrimo. Arĩpehrero majarã erã ñerire, Goãmure erã gamebiririre iinugadigo ahrimo. Eropirã erã igore ĩhacũrã ñetariaro iirã iima,” arĩ, igo diapore erã gojatudigo ahramo. ⁶ Eropa igore ĩagu igo bajarã Goãmũ yarãre igo wejẽdigo arĩcũ masiabũ yuhũ. Mererã erã mucubiro dopa ta igo erãre wejẽgo erã di cóacũ ĩago mucubiridigo ahramo igo. Jesure erã cóabiriri dipuwaja erãre wejẽdigo ahramo igo.

Igore ĩagu, ĩha uca wahabu. ⁷ Eropigu ĩgu anyu arãmi yure:

—¿Duhpigũ ĩha uca wahari mahu? arãmi yure. — Mũ masibirirare mure ĩhmugura. Igo nomeore mure weregura. Igo peyagu sãre weregura. Īgu nugũ majagu ahrimi. Eropigu siete dipucugu, diez cusaricugu ahrimi. ⁸ Īgu mũ ĩadigu iribojegue arĩdigu arĩmi. Dohpaguere marimi ĩgu. Puhru ĩgu uhcãri gobegue arĩdigu wiriri dehyoagucumi daja. Īgu eropa wiririra puhru dederebu peamegue wagucumi. I yeba majarã ĩgu dehyoacũ ĩha uca wa, ĩgure umupeorãcoma. I yeba arĩboro core Goãmũ

Īgū yarā árīmorāre erā waīre gojatudigu árīmi. Īgū gojatubirininrā āhrima nūgū majagūre umupeorā. Īgūpū iribojegue árīdi árīmi. Dohpaguepūre marimi. Pūhrū dipaturi dehyoagūcumi daja. Eropirā masa Īgū dehyoacū ĩarā, ĩha ũca warācoma.

⁹ “Dohpaguere yū wereburire ōaro masidiarā, ōaro peerāca mūa, arīnemoami yūre daja. Eropirā pee masirā árīque mūa. Nūgū majagū dipu, siete dipu siete ũtā yucu iro dopa āhraa. Iri ũtā yucu weca peyamo igo űero iiricūgo.

¹⁰ Iri dipu siete oparā sā iro dopa āhraa. Bajarā masa tauro oparā āhrima. Cinco oparāre cóātuhama. Gajigu erā pūhrū árīgū opū āhrimi dohpaguere. Gajigūpū pūhrū opū űajagūcumi. Eropā űajagū merogā opū árīgūcumi Īgū.

¹¹ Eropīgū nūgū majagū diagū core árīdigū, dohpaguere marīgū erā siete oparā pūhrū opū árīgūcumi. Siete oparā mera majagū āhrimi. Pūhrū peamegue dederea wagūcumi.

¹² “Nūgū majagū cusari diez cusari diez oparā iro dopa āhraa. Bajarā masa tauro oparā āhrima. Erā oparā űajanibeama dohpa. Pūhrūgue oparā űajarā merogā oparā árīrācoma. Yoari boje oparā árīdoresome erāre. Eropā oparā árīrā nūgū majagū mera oparā árīrācoma.

¹³ Erā diez oparā yujuro mera pepirā árīrācoma. Eropirā erā nūgū majagūre erā ya yebari majarā tauro opū acurācoma. ¹⁴ Eropirā Cordero mera gamewejē warācoma erā. Erā eropa gamewejēquerecū ta Cordero Īgū beyenirā mera Īgūre ne cóābirininrā mera erāre tarinūgarācoma. Īgū árīpehrerā gajirā tauro opū āhrimi. Eropīgū erāre tarinūgagūcumi,” arāmi anyu yūre.

¹⁵ Ire yūre werenemoami anyu:

—űero iiricūgo mauri weca doago iimo. Iri mauri ōpa iro dopa āhraa: Baja yebari majarā, baja cururi majarā, baja disiri wereniguirā iro dopa āhraa iri mauri. Erā bajarā weca āhrimo igo. ¹⁶ Nūgū majagū, diez oparā mera űero iiricūgore ĩhaturirācoma. Erā diez oparā nūgū majagū mera igore goroweopeho igo yare emapehocā, suhri marigo cóārācoma igore. Eropā iirā igo dūpūre barācoma. Erā eropa iira pūhrū igore soepehocārācoma. ¹⁷ Erā diez oparā yujuro mera pepirā nūgū majagūre erā ya yebari majarā tauro opūre acurācoma. Erā eropa iicū apimi Goāmū Īgū gamediro dopa ta iibure. Eropīgū nūgū majagūpū opū árīgūcumi. Árīpehreri Goāmū Īgū iribojegue Īgū werediro dopa ta Īgū iira pūhrū nūgū majagūre cóāgūcumi. ¹⁸ Igo mū ĩadigo mera ōpa arī buhema: Igo wūari maca Babilonia waīcūri maca iro dopa āhrimo. Árīpehrerā gajī macari majarā tauro āhrima iri maca majarā, arāmi anyu yūre.

18

Babilonia waĩcũri maca cohmojoro

¹ Pũhrũ gajigũ anyure Ʃmarogue dijarigũre ĩhabũ. Ĩgũ opũ gohra āhrami. Eropigũ ĩgũ gosesiriri árĩpehreroguere ōaro boyoro wahabũ. ² Ĩgũ eropa dijara pũhrũ turaro gaguinigui wereami:

—Cóãcãmi, Babilonia waĩcũri macare wũari macare iri maca majarã sãre cóãcãmi. Dohpaguere watẽa bajarã ñerã dũpũ deyobirã sã iri maca mũraro árĩrã iima. Ñerã mirimagũ porã majarã sã masa erã ĩha doorã iri maca mũrarore árĩrã iima. ³ Iri maca majarã mũra árĩpehreri yeba majarãre goroweonirã árĩma. Eropirã baja yebari majarã tauro oparã iri maca majarãre pee Goãmũre cóãnirã árĩma. Erã ñeri Ʃaribejarire iidiarã cóãnirã árĩma Goãmũre. Iri maca majarã baja gajinore wajapagari duarire gamenirã árĩma. Eropirã gajĩ macari majarã erãre duarã pagari dihta wajatanirã árĩma, arĩ wereami anyu.

⁴ Pũhrũ dipaturi Ʃmarogue wereniguicũ peeabũ. Őpa arĩro carabũ iri macare cóãboro core ĩgũ wereniguire:

—Mũa yaharã, iri maca majarã mera árĩbiricãque mũa. Iri maca majarã mera mũa árĩcũ mũa sãre dipuwaja moagũcumi. Eropirã iri macague ñero iirire ĩhacũbiricãque. ⁵ Ero ñero iira baja árĩcãa. Iri maca majarã yoi boje bũrigã ñerire iituhajama. Eropigũ yũhũ Goãmũ iripẽta erã ñero iicũ gahmea. Eropigũ erãre dipuwaja moagũca. ⁶ Iri maca turaro dipuwajacũporo. Ero majarã masare erã ñero iidiro dopa ta erã sãre ñero taricũ iiporo. Masare erã ñero iidiro dopa ta erã tauro erãre ñero dipuwaja moaporo, arĩro carabũ. ⁷ Iri maca majarã “Őarã āhraa gũa,” arĩ pepirima. Eropa arĩ pepirã, wajapagarire wũaro opãma erã. Erã wajapagarire wũaro erã oparopẽ ta turaro ñero taricũ iiporo. Eropirã erãre bũjawerecũ iiporo. Erã basi ōpa arĩ pepirima erã: “Gũa i yeba majarã oparã árĩrã iiaa. Mojomorocũrã árĩbeaa. Eropirã ne ñero tarisome gũa,” arĩ pepirima erã. ⁸ Eropa arĩ erã pepirã árĩcũ yujunũ erãre guñaña mariro dipuwaja moaburĩnũ árĩroca, arĩro carabũ. Irĩnũ sĩriri, dorecũri, co oreri, oaboari árĩroca. Eropigũ iri macare soepehocãgũcumi, arĩro carabũ. Mũa opũ Goãmũ iri macare dipuwaja moadoregũ turatariagũ āhrimi. Eropigũ eropa ta ĩgũ arĩdiro dopa ta iri macare dipuwaja moadoregũcumi, arĩro carabũ Ʃmarogue.

⁹ Eropirã Goãmũ iri macare ĩgũ dipuwaja moacũ ĩha i yeba majarã oparã bũrigã bũjawere orerãcoma. Erã iri maca majarã mera ñerire iirã ōaro mucubirirã árĩmũrinirã

árîma. Eropirã iri maca ũjucũ ãarã orerãcoma erã. ¹⁰ Ñgu iri macare eropa soecũ ãarã oparã gaji yeba majarã yoarogue ãhabeoniguirãcoma gũa sãre dipuwaja moari arĩrã. Ero ãhabeoniguirã õpa arĩrãcoma:

—Ade. Mojomorocuri maca ãhraa Babilonia. Si maca wãari maca turari maca árĩrabũ. Mata yojaro mera si macare dipuwaja moami, arĩrãcoma erã.

¹¹ I yeba majarã doberi duarã iri maca ũjucũ ãarã burigã bujawere orerãcoma erã sã. Iri maca pehrecũ ãarã, erã ya doberire asũrã maricũ ãarã bujawere orerãcoma. Eropirã orerãcoma. ¹² Erã aĩgãrirare, orore, platare, wajacuri utãre, perla waĩcuri dipu sãre asũrã marirãcoma. Eropi gaji erã aĩgãrirare suhri õarire wajapagarire, yahsari suhrire, oparã erã sañari suhri dopa bejarire, seda waĩcuri suhrire, diari suhrire asũrã marirãcoma. Eropi gaji erã aĩgãrirare yucũ poresuri yucũre asũrã marirãcoma. Eropi gajire erã aĩgãrirare marfil waĩcuri mera erã iirare, wajacuri yucũ mera erã iirare, bronce mera erã iirare, come mera erã iirare, marmol mera erã iirare asũrã marirãcoma. ¹³ Eropi erã aĩgãrirare canela waĩcũre, gaji bari usuricũ iirire, inciensore, mirra waĩcũri poresurire, gaji poresurire asũrã marirãcoma. Eropi gaji erã aĩgãrirare vinore, uyũre, trigo pogare, trigore, wecuare, ovejare, cabayuare, tũruri gasire, pohro majarãre asũrã marirãcoma. Eropirã bujawererãcoma doberi duari masa. ¹⁴ Eropirã õpa arĩrãcoma erã iri maca majarã murare:

—Ade. Ñetariaro wahari erã. Árĩpehreri erã mahira mura pehrea wahaa. Eropiro árĩpehreri erã õarire erã wajapagari opara pehrea wahaa. Eropirã iri dipaturi bocasome mari, arĩrãcoma doberi duari masa.

¹⁵ Erã iri macare doberi duarã wũaro wajatamurininã árîma. Eropirã erã iri macare yoarogue ãhu niguirãcoma gũa sãre dipuwaja moari arĩrã ucara. Eropa ãhabeorã iri macare burigã bujawere orerãcoma. ¹⁶ Ñpa arĩrãcoma iri macare:

—Ade. Ñetariaro wahaa iri maca wãari maca. Si maca majarã õarire opamuririma. Nomeo õari suhrire, wajapagari suhrire, yahsari suhrire, diari suhri sãre sañago dopa õarire opamuririma. Eropirã oro wajapagari utã, perla dipu waĩcuri tuhura suhriro sañamurima. Wũaro opamurima si maca majarã. ¹⁷ Eropiro mata si maca wũaro dobericuri maca dederea wahaa, arĩrãcoma iri macare.

Eropirã árĩpehrerã dohori gasi mera curirã, iri gasi oparã, erã uma, gajirã wũariyague mohme watarã sã iri macare yoarogue ãhu niguirãcoma erã sã. ¹⁸ Ero ãhabeorã iri macare ũjucũ ãarã õpa arĩ gaguiniguirãcoma:

—Paga macari si maca iro dopa árĩri macari ne gaji maca mara, arĩ gaguiniguirācoma erā. ¹⁹ Eropa bujawererā árĩrā erā dipu weca nicure ñaji peorācoma. Eropirā co orerā ōpa arĩrācoma:

—Ade. Ñetariaro wahaa si maca mūraro. Ōari maca árĩribu. Árĩpehrerā dohori gasi oparā wuariyague curirā si maca maja doberi mera ōaro wajataribu mari. Eropiro mata si maca dederepehrea wahaa, arĩrācoma gasi majarā, arĩ werero carabu yure umarogue.

²⁰ —Iri macare ĩgu cóácũ ĩarā mucubirique m̄ua, umaro majarāp̄u, arĩro carabu. —Goām̄u yarā, Jesu ĩgu apinirā, ĩgu yare werem̄htanirā árĩpehrerā m̄ua mucubirique. Iri maca majarā m̄uare ñero taricũ iima. Erā eropa iira dipuwaja, dipuwaja moami Goām̄u. Eropirā mucubirique m̄ua, arĩro carabu.

²¹ Eropa arĩ wereniguirare peera p̄hr̄u ōpa ĩhabu yuh̄u. Turagu anyu wuariye utāyere aĩ wahgũ, wuariyague mehyuami. Eropa mehyugu ōpa arāmi:

—Iye utāye yuriñajadiro dopa ta wuari maca Babilonia waĩc̄uri maca turaro yuhridijaro busuroca. Eropa yuhridijara p̄hr̄u iri macare dipaturi ĩasome m̄ua. ²² Iri macare dederea wacũ iigucumi. Eropiro ne iri macare bayarire m̄ua peediro dopa árĩsome. Arpa buam̄t̄eri, flauta dipurure, corneta s̄are ne dipaturi peeya mariroca. Eropirā iri maca maricũ ero mohmenirā dipaturi erore mohmesome. Eropiro trigo yeri utā mera erā oera s̄a ne peeya mariroca. ²³ Iri maca boyo oyadiro dopa ne árĩsome. Eropirā mojoto dirinirā erā mucubiri wereniguidiro dopa ne dipaturi árĩsome. Iri maca majarā doberi duarā asūrā mera gajirā tauro opam̄rima erā. Eropirā iri maca majarā yeea erā purisiriri mera árĩpehrero majarāre ḡuyam̄rima. Eropirā ñerire uaribeja, Goām̄p̄ure gamebirim̄rima masa, arāmi yure turagu anyu.

²⁴ Iri maca majarā Goām̄u yare werem̄htanirāre gajirā ĩgu yarā s̄are árĩpehrero majarāre wej̄em̄rinirā arĩma. Erā eropa wej̄era dipuwaja, gaji ñero iira dipuwaja s̄are dipuwaja moāmi Goām̄u iri macare.

19

¹ Babilonia macare ĩgu cóārare yu ĩara p̄hr̄u umarogue bajarā gaguiniguirā carama yu peecũ. Ōpa arĩ gaguiniguirā carama:

Aleluya. Goām̄ure ōaro wereniguirā. Goām̄u marire taugu āhrimi. ĩgure ōaro umupeorā. Turatariagu āhrimi ĩgu. ² Ḡuyaro mariro queoro iigu masare dipuwaja moami ĩgu. Ñeri dipuwaja moorāre erāre dipuwaja

moabeami. Igo nomeo ñerire iiricugo Babilonia waĩcũri maca aħrimo. Iri maca majarãre ĩhacũrã i yeba majarã ñero iimũrima. Eropigu iri maca majarãre dipuwaja moami Goãmũ. Eropigu ĩgu dorerire iinirãre ĩgu pohro majarãre erã wejẽra dipuwaja dipuwaja moami ĩgu, arĩ gaguiniguirã carama.

³ Dipaturi gaguiniguirã carama daja:

—Aleluya. Goãmũre õaro wereniguirã. Iri maca ñero iira maca ĩgu soera maca eropa imicacũniguicãroca, arĩ gaguiniguirã carama.

⁴ Eropirã veinticuatro Jesu yarã oparã, wapicũrã gajiropa bejarã mera mereja, Goãmũre mari Pagũre ĩgu doaro doagũre umupeoama. Őpa arĩ umupeoama erã:

—Amén. Aleluya. Eropa aħraa. Mari Pagũre õaro wereniguirã, arãma erã.

⁵ Pũhrũ opũ doarogue õpa arĩro carabũ:

Mari Opũ Goãmũre umupeoque. Mũa ĩgu pohro majarã, ĩgũre umupeorã bu arĩrã, oparã sã arĩpehrerã mũa ĩgũre õaro wereniguique, arĩro carabũ.

Cordero ĩgu mojoto diriburinũ bosenure wererũ Ñu

⁶ Pũhrũ bajarã masa erã wereniguirã caracũ peebũ. Erã utãmu iro dopa bupu iro dopa bũsũrã carama yũ peecũ. Őpa arĩ gaguiniguirã carama:

Aleluya. Goãmũre õaro wereniguirã. ĩgu mari Opũrũ opũ ñajatuhami. Turatariagu aħrimi ĩgu. ⁷⁻⁸ Cordero ĩgu mojoto diriburi bosenu aħraa dohpaguere. ĩgu mojoto diribo õaro amudigogue aħrimo. Igo õari suhrirore gũhrari mariri suhrirore sañatuhamo. Iri suhriro Goãmũ yarã õarire erã iira iro dopa aħraa. Eropirã mucubirirã mari. Goãmũre “Őatariagu aħrimi,” arĩ umupeorã mari ĩgũre, arĩ wereniguirã carama.

⁹ Erã eropa arĩra pũhrũ anyurũ arãmi yũre:

—Ire goja aĩque. “Cordero ĩgu mojoto diriri bosenure ĩgu sihubeonirã mucubirirã aħrima,” arĩ goja aĩque, arãmi yũre anyu.

Eropa arĩgu ta õpa arĩnemoami:

—Diaye ta aħraa i yũ werera. Goãmũ ya wereniguirã aħraa, arĩnemoami yũre.

¹⁰ ĩgu eroparĩcũ peegu ĩgũre mereja umupeobu iirabũ. Yũ merejacũ gohra õpa arãmi yũre:

—Yũre mereja umupeobita. Mũ arĩro dopa ta Goãmũ pohro majagu ta aħraa yũ sã. Mũ acawererã Jesu yarã arĩpehrerã ĩgu ya buherire werenirã iro dopa yũ sã Goãmũ

pohro majagu āhraa. Eropigu Goāmupure mereja ĩgupure umupeoque, arāmi yure anyu.

Goām yare weremūhtanirā iribojegue majarā Espiritu Santo ĩgu itamuro mera Jesu ya buherire ta wereyuñuma.

Cabayu boregu weca peyagure wereru Ñu

¹¹ Pūhrū ũmaro pārimaacū ĩhabū. Ero cabayu boregu āhrami. ĩgu weca peyagu ōpa waĩcuami: ĩgu arīro dopa ta iigu diaye iigu waĩcuami ĩgu. Eropigu masare dipuwajare moagu ĩgu ĩhaturirā mera gamewejēgu ōaro guyarō mariro iiami. ¹² ĩgu cuiiri peame porā iro dopa āhrabū. Eropiro ĩgu dipuru weca baja oparā peyari berori āhrabū. Eropigu ĩgu dupure ĩgu waĩre gojatudigu āhrami. Iri waĩre ĩgu dihta masiami. Gajirā masibirama. ¹³ ĩgu sañariñe yoariñe di tuyariñe āhrabū. ĩgu ōpa waĩcuami: Goām yare wereniguirire weregu waĩcuami ĩgu. ¹⁴ Eropirā ĩgu yarā surara ũmarogue majarā ĩgure nūrusiāma. Borerā cabayua weca peyarā āhrama. Ōari suhrire boreri suhrire, guhrari mariri suhrire sañanirā āhrama. ¹⁵ ĩgu erā opu wamūhtadigu ĩgu disiro ñoserimiji usirimiji cuñuami. Irimiji i yeba majarāre ĩgu tarinugaburimiji āhrabū. Eropigu ĩgu turari mera ĩgu dorecū ne yujugu ĩgure tarinugagu ĩgure bocatiusome. Igui dipurure erā ñatīacū igui deco wiriro dopa ta i yeba majarā ñerāre di wiriroca ĩgu erāre dipuwaja moacū. Goām erā mera guami. ĩgu eropa guagu árīcū cabayua weca peyagu dipuwaja būrigā moagucumi. ¹⁶ ĩgu suhriro, ĩgu ñigagu sāre iri waĩre gojatudigu āhrami: “Árīpehrerā gajirā tauro opu waĩcūmi,” arī gojatudigu āhrami.

¹⁷ Pūhrū abegue niguigure anyu niguigure ĩhabū. Árīpehrerā ũmarogue wūrāre goro porā majarāre gaguiniguibeoami ĩgu. Ōpa arī turaro gaguiniguibeoami erāre:

—Gamenererā arique. Goām ĩgu bosenu wūari bosenu barā arique. ¹⁸ Baja yebari majarā tauro oparā mūrare, surara oparā mūrare, surara bajarā mūrare, cabayua mūrare, erā weca peyarā mūrare, árīpehrerā gajirā masa mūrare, pohro majarā mūrare, pohro majarā árībirā mūrare, gajirā oparā mūrare, bu árīrā mūrare barā arique. Erā árīpehrerā dupu mūrare barā arique, arī gaguiniguibeoami anyu goro porā majarāre.

¹⁹ Eropigu nūgu majagure, i yeba majarā tauro oparā erā surara bajarā sāre ĩhabū. Erā gamenerenirā āhrama cabayu weca peyagu mera ĩgu surara bajarā mera gamewejēmōrā. ²⁰ Erā eropa gamewejēcū cabayu weca

peyagu nugu majagure peresu iiami. Gajigu "Goamu yare wereniguigu ahraa," arĩ guyadigu sare peresu iiami. Igu guyadigupu nugu majagu igu ihuro deoro moarire iibasadigu ahrami. Igu deoro moari mera nugu majagu igu waire tyanirare, igu masu weadigure umupeorare guyadigu ahrami. "I Goamu ya ahraa," arĩgu guyamuridigu ahrami. Erare perare igu peresu iira puhru erare ojocarirare ta peamegue cohami. Iri peame wuariya iro dopa wuari peame azufre mera ujuri peame ahraabu. ²¹ Eropigu duhyarare era surara arinirare noserimiji mera igu disiro cunurimiji mera wejemi cabayua weca peyagupu. Eropa igu wejera puhru goro pora majara era dupu murare bara yapitaria wahama.

20

Mil bojori gohra Cristo igu yarã mera masare doregucumi, arĩ gojañumi Ñu

¹ Puhru gajigu anyu umarogue igu دچارicã ihabu. Uhcãri gobe maja sawire, wuarida comeda sare opami igu. ² Eropa دچارigu pirure ñeami igu. Igu piru iribojegue piru dupucugu arĩgu, watĩ Satana waicugu ahrami. Igure ñeagu dihriami mil bojori gohra peresu iibu. ³ Eropa dirituha uhcãri gobegue cohã dijuami igu i yeba majarare mil bojori gohra igu guymasibiriborore. Eropa cõatuhagu iri gobere biha, sawi biacami. Eropigu mil bojori puhru dipaturi igure bajamenurigã wiunigucumi daja.

⁴ Puhru oparã doarire ihabu. Iri doarire doarã sare ihabu. Erare masare era beyedoboborore apiami Cristo. Gajirã sare ihabu. Erãpu Jesu yare Goamu yare era werera dipuwaja erare dipure tabe cõanirã ahrama. Nugu majagure, igu weadigu sare ne umupeobirininã ahrama. Eropirã era diaporire era mojotori sare igu waire gojatudorebirininã ahrama era. Eropirã gajirã erare wejëninã arĩma. Erare wejera puhru masa muria wanirã arĩma. Masa muriarã era mil bojori gohra Cristo mera oparã arĩrãcoma. ⁵ Gajirã Cristo yarã sirininã mura masa murianibirama dohpa. Era wejenirã era masa muria puhru mil bojori oparã era arĩra puhru gajirã sã masa muriarãcoma. Eropirã era wejëninã mura Cristo puhru masa muriamuhtarã arĩrãcoma. ⁶ Igu masumuhtanirãpu turaro mucubirirã arĩrãcoma. Ñeri marirã arĩrãcoma era. Eropirã peamegue wasome era. Eropirã Goamu yare Cristo yare era sã serëbasarã pahia arĩrãcoma era. Eropirã era

masa m̄riam̄htarā mil bojori gohra Cristo mera masa tauro oparā árĩrācoma.

Satana dederea waḡucumi, arĩ gojañumi Ñu

⁷ Mil bojori p̄hr̄u Satanare peresu árĩḡure wiuḡucumi.
⁸ Īḡu eropa wirira p̄hr̄u árĩpehrero i yeba majarāre ḡuyaḡu waḡucumi ĩḡu, "Ina gamewejērā warā," arĩḡu. Gog waĩc̄urāre, Magog waĩc̄urā s̄are ḡuyaḡu waḡucumi. Eropirā erā ĩḡu ḡuyarire peerā, erā surara majarāre gameneorācoma gamewejēmōrā. Erā surara majarā bajarā gohra árĩrācoma. W̄ariya maja imipa árĩro utāburuyeri n̄c̄u dopa erā surara bajarā árĩrācoma

⁹ Eropirā i yebaguere wasirirā, Goām̄u yarā erā árĩri macare Goām̄u ĩḡu mahiri macare c̄āhmotan̄gajarācoma. Erā eropa c̄āhmotan̄gajara p̄hr̄u Goām̄u erāre umaro maja peame mera soe mehdijuc̄āḡucumi. ¹⁰ Eropa wara p̄hr̄u wat̄ire erāre ḡuyaḡure peamegue cóāḡucumi. Iri peame w̄ariya iro dopa árĩri peame azufre mera ĩj̄uri peame āhrab̄u. Erogue n̄ḡu majaḡure "Goām̄u yare wereḡu āhraa," arĩ ḡuyaḡure cóātuhajami. Ero erā árĩc̄ū um̄uri n̄c̄u p̄riroca erāre.

Masare Goām̄u dipuwaja moatuḡucumi, arĩ gojañumi Ñu

¹¹ P̄hr̄u w̄aro op̄u ĩḡu doarore ōaro borero ĩhab̄u. Iri doaro weca doaḡu s̄are ĩhab̄u. Eropiro ĩḡu árĩrogue mata i yeba umaro s̄a dederea wahab̄u. Ne deyobirab̄u pare. ¹² Eropiḡu op̄u pohro s̄irinirā m̄ra erā niguic̄ū ĩhab̄u. Erā bu árĩrā, oparā m̄ra s̄a āhrama. Ero erā niguic̄ū ĩḡu gojaturap̄urire p̄ḡūami. Irip̄uri masa erā iirare ĩḡu gojaturap̄uri āhrab̄u. Eropiḡu ĩḡu op̄u beyeḡu irip̄ure ĩatuha erā iirare masiami. Irire masiḡu s̄irinirāre beyeami ñerā, ōarā. P̄hr̄u gajip̄u s̄are p̄ḡūami. Irip̄u Goām̄u mera eropa árĩniguimōrāre erā waĩre erā gojaturap̄u āhrab̄u. ¹³ W̄ariyague miri s̄irinirā m̄ra, diague erā cóānirā m̄ra s̄a masa m̄ria wahāma. Eropirā yeba pohecague árĩnirā m̄ra, s̄irinirā erā árĩrogue árĩnirā m̄ra s̄a masa m̄ria wahāma. Erā eropa m̄rijac̄ū ero doaḡu erā iirare masiḡu erāre beyeami. Ōarāre, ñerāre beyeami. ¹⁴ P̄hr̄u s̄iririñere, s̄irinirā erā árĩro s̄are cóāc̄āmi Goām̄u dipaturi mari s̄iribiriboro dopa. Peamegue irire cóāc̄āmi. Iri peame w̄ariya iro dopa árĩri peame āhrab̄u. Goām̄ure gamebirāp̄u peamegue warā dipaturi s̄irirā dopa wahama. ¹⁵ Eropiḡu ĩḡu mera árĩniguimōrā erā waĩre Goām̄u ĩḡu gojaturap̄u árĩpehrerā gojatus̄uya marirāp̄ure peamegue c̄ohāmi ĩḡu.

21

Umaro, yeba sãre mamare gohrotogucumi Goãmũ, arĩ gojañumi Ñu

¹ Pũhrũ umaro, yeba sãre mamare igũ gohrotorare ñhabũ. Árĩmũhtara mũra umaro, yeba, pagayari sã pehrea wahabũ. Marabũ. ² Eropigũ yũhũ Ñu õari macare, mama macare Jerusalén waĩcũri macare ñhabũ. Iri maca umarogue Goãmũ pohrogue dijaricũ ñhabũ. Õaro dehyoabũ iri maca. Mojoto diribo igo marapũre mucubiriborore õari suhri sã igore õaro amuro dopa ãhrabũ iri maca. Õpa iro dopa ta iri macare amuyudĩ árĩmi Goãmũ igũ yarãre mucubiricũ iibu. ³ Irire yũ ñara pũhrũ opũ doarogue gaguiniguicũ peeabũ:

—Ñaque. Dohpaguere masa watope árĩgũ iimi Goãmũ. Erã mera árĩgũcumi igũ. Eropirã igũ yarã árĩrãcoma erã. Eropigũ Goãmũ igũ basi erã mera majagu árĩgũ, erã yagu Goãmũ árĩgũcumi. ⁴ Eropigũ eropa mucubiriniguicũ iigũcumi igũ erãre. Eropirã dipaturi bũjaweresome erã. Eropirã ne dipaturi sĩrisome erã. Ne ñero sĩporãcũri, co oreri, pũriri sã mariroca erãre. I árĩpehreri iribojegue maja pehrea waroca erãre, arĩ gaguiniguigũ carami.

⁵ Pũhrũ opũ doarogue doagu õpa arãmi:

—Ñaque. Árĩpehrerire mama gohrotocũ iigũca, arãmi.

Ñgũ eropa arĩra pũhrũ yũre õpa arãmi daja:

—Yũ arĩrere goja aĩque. Yũ arĩri diaye ta ãhraa. Eropiro yũ arĩdiro dopa ta eropa waroca. Eropigũ yũ arĩrere goja aĩque, arãmi yũre.

⁶ Pũhrũ õpa arãmi daja yũre:

—Iripẽta arĩca. Yũ árĩpehrerire ñhacũnugudigu ãhraa. Eropigũ árĩpehrerire pehrecũ iibu ãhraa daja. Ñemesiburã erã turaro ihridiario dopa ta yũ pohrogue wadiarã Jesure gamerãcoma. Eropirã Jesure yũhrirãcoma. Ñgũ ojo-caririre oro deco iro dopa ãhrimi. Ñgũre gamerãre waja gamero mariro yũ mera eropa árĩniguiborore ogũra erãre.

⁷ Árĩpehrerã ñero tariquererã yũre umupeoduhubirãre õpa iigũra: Erã Goãmũ árĩgũra. Eropirã erãpũ yũ porã árĩrãcoma. ⁸ Erã eropa árĩquerecũ masare gũi yaharare duhurã, yahare gamebirã, ñetariarire iirã, masare wejẽrã, nome mera ñero iirã, uma mera ñero iirã nome, yeea, goãmarã wéanirãre umupeorã, árĩpehrerã gũyarã peamegue warãcoma. Ero wũariya iro dopa arĩri peame azufre mera ãjũri peame ãhraa. Eroque warã dipaturi erã sĩriro dopa ta warã iirãcoma, arãmi yũre.

Mama maca Jerusalénre werepũ

⁹ Pũhrũ yujugũ anyu yũ pohrogue erámi. Īgũ siete pari opanirã mera majagũ áhrami. Īgũ dipuwaja moadoregũ ĩgũ apinirã mera majagũ sã ĩgũ anyua mera majagũ áhrami. Eropa eragũ õpa arãmi yũre:

—Īlagũ arique. Cordero ĩgũ mojoto diribore ĩhmugũca mãre, arãmi anyu yũre. ¹⁰ Eropigũ Espĩritu Santo yũre Goãmũ ya macare ĩacũ iiami. Eropigũ umadigũ utãgũ wecague yũre aĩ mũriámi. Erogue Goãmũ ya macare Jerusalénre õari macare ĩhmuami yũre. Iri maca ĩgũ mojoto diribo iro dopa áhrabũ. Goãmũ pohrogue umarogue دچارو iiabũ iri maca. ¹¹ Goãmũ ĩgũ gosesiriri mera gosesiriabũ iri maca. Wajacũri utã iro dopa gosesiriabũ. Jaspe waĩcũri utã gosesiriro dopa gosesiriabũ. Eropiro vidrio iro dopa õaro deco sũriabũ iri maca. ¹² Eropiro wũari sãriro umari sãriro erã sãri sãra maca áhrabũ. Doce gohra disipororicũabũ iri sãriro. Iri disiporore cohreama anyua. Iri maca disiporori bihariserigue Israe masa cururi doce cururi nũcũ erã waĩ tuhyabũ. ¹³ Abe mũririropũ iri sãriro opabũ uhre disiporo. Surpũ uhre disiporo opabũ. Nortepũre uhre disiporo opabũ. Abe ñajaropũ sãre uhre disiporo opabũ. Árĩpehrero doce disiporori gohra opabũ iri sãriro. ¹⁴ Iri sãriro doce utã weca peyabũ. Iri utã nũcũ Cordero ĩgũ apinirã doce ĩgũ apinirã gua yujurãyeri waĩ tuhyabũ.

¹⁵ Eropigũ anyu yũre weregũ queodigũ oro mera erã iidigũre opámi. Iri macare, iri maca maja disiporori sãre, iri sãriro sãre queobu iiami. ¹⁶ “Iri maca yoaropẽ ta ehyaa,” arãmi queotuhagũ. “Umãro sã iripẽta umaa,” arãmi. Eropigũ anyu ĩgũ queodigũ mera iri macare queoami. Iri maca dos mil doscientos kilómetros yoari maca áhrabũ. Iripẽta ehvari maca áhrabũ. Iripẽta umãro áhrabũ. ¹⁷ Eropigũ iri maca maja sãrirore queoami anyu. “Sesenta y cuatro metros umaa,” arãmi. Marĩ masa queoro dopa ta queogũ iiami ĩgũ.

¹⁸ Iri sãriro jaspe waĩcũri utã mera ĩgũ iira sãriro áhrabũ. Eropiro iri macapũ oro mera ĩgũ iira maca áhrabũ. Iri oro gũhrari mariri árĩro õaro deco sũriabũ. ¹⁹ Iri sãriro doca árĩri utãre baja gajiropa árĩriyeri tuhyabũ õaro deyoboro dopa. Iriyeri wajapagariyeri áhrabũ. Iriyeri tuyara utã sãriro doca oyari utã doce utã áhrabũ. Árĩmũhtari yegue jaspe waĩcũri utãyeri tuhyabũ. Iriye pũhrũ maja yeguere safiro waĩcũri utãyeri tuhyabũ. Peye pũhrũ maja yeguere ágata waĩcũri tuhyabũ. Uhreye pũhrũ yeguere esmeralda waĩcũri utãyeri tuhyabũ. ²⁰ Wapicũriye

utāye pūhrū maja yeguere ónice waĩcūri utāyeri tuhyabū. Yuju mojobocū maja pehreri utā pūhrū maja yeguere cornalina waĩcūri utāyeri tuhyabū. Seis pūhrū majaye utāyeguere crisólito waĩcūri utāyeri tuhyabū. Siete pūhrū árĩriye utāyeguere berilo waĩcūri utāyeri tuhyabū. Ocho pūhrū árĩriyeguere topacio waĩcūri utāyeri tuhyabū. Nueve pūhrū árĩriyeguere crisoprasa waĩcūri utāyeri tuhyabū. Diez pūhrū árĩriyeguere jacinto waĩcūri utāyeri tuhyabū. Once pūhrū árĩriyeguere amatista waĩcūri utāyeri utūyabū. ²¹ Eropiro doce disiporori doce perla mera ĩgū iiraseri āhrabū. Iriseri nūcū yujuye perlaye mera ĩgū iira dihta āhrabū. Eropiro iri maca wari maha oro mera ĩgū iira maha āhrabū. Iri oro gūhrari mariri oro āhrabū. Eropiro ōaro deco sūriri maha āhrabū iri maha.

²² Iri macare Goāmū wihire ĩabirabū. Marabū. Iri maca árĩpehrerogue mari Opūre Goāmū turatariagūre, Cordero sāre umupeoama masa. Eropiro iri maca árĩpehrero Goāmū ya wihi iro dopa āhrabū. ²³ Eropigū iri maca Goāmū ĩgū goesiriri mera ōaro boyoabū. Cordero sā sihāgodiru iro dopa boyoami. Eropirā abe ūmū majagū sāre űami majagū sāre ero boyocū gamebirama. ²⁴ Eropirā i yeba majarā Goāmū Cordero sā boyori mera árĩrācoma Goāmū ĩgū taunirā. Eropirā árĩpehreri yeba majarā oparā iri macague ōatariari erā oparire aĩrā erarācoma. ²⁵ Eropiro ūmūre iri maca maja disiporori pāgūra disiporori árĩroca. Eroguere ne űami mariroca. Eropirā iri disiporore ne bihasome. Eropiro toyoniguia. ²⁶ Eropirā baja yebari majarā ōarire erā oparire iri macague aĩrā erarācoma. ²⁷ űeripūre iri macaguere ne aĩsome. Gūhyasĩricū iirā, űerire iirā, ne iri macaguere wasome. Gūyarā sā wasome. Cordero ĩgū gojarapū erā waĩ gojatusūnirā dihta iri macaguere warācoma. Iripū ĩgū taurā erā waĩre ĩgū gojaturapū āhrra. Iripūgue erā waĩ gojatusūnirā eropa árĩniguicārācoma ĩgū mera.

22

¹ Pūhrū ōariyare ojocaricū ĩriyare ĩhmuami yūre anyu. Iriya deco sūririya Goāmū, Cordero sā erā doarogue aririya āhrabū. ² Eropiro iri maca deco yuriabū iriya. Iriya pepūri masegū ojocaricū ĩiri yucū niguiabū. Iri yucū aberi nūcū dūcacūa. Yuju bojore doce suburi dūcacūa. Eropirā iri yucū maja pūri mera ōaro ococūrācoma masa i yeba majarā. ³ Iri macare ne pūriri mariroca. Iri maca Goāmū ĩgū opū árĩro árĩroca. Cordero ĩgū opū árĩro sā árĩroca iri maca. Eropirā ĩgū pohro majarā árĩrā ĩgū pohro mereja ĩgūre umupeorācoma. ⁴ Erā Goāmūre

ōaro ĩaniguicārācoma. Eropirā erā diaporire erā ĩgu waĩre tuyasūrā árĩrācoma. ⁵ Eroguere ñami ne mariroca. Eropirā sihāgori dipurure gamesome ero árĩrā. Abe ĩgu boyocũ sāre gamesome. Mari Opũ Goāmũ ĩgu boyoro árĩroca. Eropirā iri maca árĩrā gajirā tauro oparā eropa árĩniguirācoma.

Jesucristo i yebague ĩgu dujariboro merogā dũhyaa, arĩ gojañumi Ñu

⁶ Pũhrũ anyu yũre ōpa arāmi:

—Árĩpehrerire mũ ĩha gojara diaye āhraa. Eropiro gũa mũre eropa arĩdiro dopa ta eropa waroca. Mari Opũ Goāmũ ĩgu yare weremũhtarāre masicũ iigu āhrimi. ĩgũpũ dohpaguere yũre ĩgu yagu anyure obeomi ĩgu pohro majarāre masicũ iibu. Pũhrũ maja dohpa waborore masicũ iibu, ĩgu yũre ĩgu yagu anyure obeomi, arāmi anyu yũre.

⁷ Jesupũ ōpa arāmi:

—Peeque mũa. Merogā dũhyaa yũ dujariboro. Ipũ maja weremũhtarire tarinũgabirinirā mucubirirā árĩrācoma, arāmi Jesu.

⁸ Yũhũ Ñu i árĩpehrerire yũ goja aĩrare peeabũ. Eropigu irire ĩhabũ. Eropigu yũ peera pũhrũ, yũ ĩara pũhrũ yũre ĩhmudigu anyu pohro merejarabũ umupeobu. ⁹ Yũ eropa iicũ ĩagu ōpa arāmi yũre:

—Yũre mereja umupeobita. Mũ iro dopa ta yũ sã Goāmũ pohro majagu ta āhraa. Mũ acawererā Goāmũ yare weremũhtarā, árĩpehrerā ipũ maja dorerire iirā sã erā árĩro dopa ta yũ sã Goāmũ pohro majagu ta āhraa. Eropigu Goāmũpũre mereja ĩgũre umupeoque, arāmi anyu yũre.

¹⁰ Eropigu ōpa arĩ werenemoami yũre:

—Ipũ mũ goja aĩrapũ pũhrũ maja dohpa waborore werea. Eropa waboro merogā dũhyaa. Eropa árĩcũ ipũ wererare dibubita mũhũ. ¹¹ Irisubu yũ wererisubure ñerāpũ eropa iiniguicoma ñerire. Ōarāpũ ōaro iiniguima. Eropirā erāpũ ñeri marirā árĩrācoma, arāmi yũre anyu.

¹² Ōpa arāmi Jesu:

—Peeque mũa. Merogā dũhyaa yũ dujariboro. Mũare yaharāre yũ wajayeborore aĩgāribu iiaa. Eropigu ōarire mũa iira waja mũare ōaro iigura. ¹³ Yũhũ árĩpehrerire ĩhacũnugudigu āhraa. Eropigu árĩpehrerire pehrecũ iibu āhraa.

¹⁴ “Árĩpehrerā gũhrari mariri suhrire sañanirā árĩro dopa ta erā ñeri iirare coenirā iri macaguere ejarācoma. Eropirā iri maca maja yucũ ojocaricũ iiri yucũ dũcare barācoma. Eropirā mucubirirā árĩrācoma erā. ¹⁵ Iri

macague ejabirãpũ õpa âhrima: Ñetariarã, yeea sã, nome mera ñero iirã, uma mera ñero iirã nome, masare wejërã, goãmarã wéanirãre umupeorã, gũyaricũrã sã âhrima iri macague ejabirã, arãmi Jesu.

¹⁶ Eropigũ õpa arĩnemoami Jesu yũre:

—Yũhũ Jesu yahagũ anyure obeoabũ mũare yaharãre ipũ majare werebure. Opũ Davi árĩturiagũ pãrami âhraa yũhũ. Yũhũ boyomãririduru iro dopa árĩgũ mũare õaro árĩcũ iigu âhraa, arĩ werenemoami Jesu.

¹⁷ Espĩritu Santo Jesure “Dujarique,” arĩmi. Jesu yarã sã ĩgũ mojoto diribo dopa árĩrã, “Dujarique,” arĩma. Árĩpehrerã erã “Dujarique,” erã arĩcũ peerã sã, “Dujarique,” arĩporo Jesure. Ñemesiburã decore erã turaro gamero dopa ta Goãmũ pohrogue wadiarã Jesure turaro gameporo. ĩgũ ojocaricũ iiri deco iro dopa âhrimi. ĩgũ gamerãre waja gamero mariro umarogue erã eropa árĩnigucãborore ogucumi Goãmũ.

¹⁸ Yũhũ Ñu árĩpehrerã ipũ maja wererire, Goãmũ yare weremũhtarare peenirãre õpa arĩ mũare gũhyadiaro mera weregũra. I buheri mera gaji buheri mera moresũ werenemorã Goãmũre tarinũgarã iima. Erã eropa tarinũgacũ ĩagũ árĩpehreri ipũ ĩgũ dipuwaja moaburire ĩgũ werero dopa ta apigucumi erã sãre. Eropigũ eropa erã sãre dipuwaja moagucumi. ¹⁹ Eropirã ipũ maja wererire i Goãmũ yare weremũhtarare goroweorã Goãmũre tarinũgarã árĩrãcoma. Erã eropa tarinũgacũ ĩagũ ojocaricũ iiri yucũ dũcare erãre badoresome. Eropirã Goãmũ mera árĩniguisome erã. Eropirã ĩgũ ya macague õari macague wasome erã. Iri yucũre, iri maca sãre ipũ mera erã wererague âhraa.

²⁰ Árĩpehreri ipũ majare weregũ Jesucristo õpa arĩmi.

—Eropa ta âhraa. Merogã dũhyaa yũ i yebague dujari-boro, arĩmi ĩgũ.

Eropigũ yũpũ õpa arĩtugũ iiaa.

—Eropa ta iique. Gũa Opũ Jesu dujarique, arãa yũhũ.

²¹ Mari Opũ Jesu ĩgũ itamuro mera árĩpehrerã mũa Goãmũ yarã õaro árĩque. Eropa ta árĩrã. Iripẽta âhraa.